


# Verikariano Vou Na Baki



The New Testament in the Baki language of Epi, Vanuatu

**Verikariano Vou Na Baki**  
**The New Testament in the Baki language of Epi, Vanuatu**  
**Le Nouveau Testament en Baki langue de l'île d'Épi au Vanuatu — Niutestamen**  
**long Baki lanwis, blong Epi Aelan, Vanuatu**

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019  
f1528695-aae7-544e-aadd-9084a3830ae4

## Contents

Mataiu . . . . .	1
Mak . . . . .	76
Luka . . . . .	123
Jone . . . . .	207
Imãuano Nalo . . . . .	269
Romo . . . . .	349
1 Korin . . . . .	388
2 Korin . . . . .	422
Kalesia . . . . .	446
Eveso . . . . .	459
Vilipae . . . . .	470
Kolosia . . . . .	480
1 Tesalonaika . . . . .	489
2 Tesalonaika . . . . .	496
1 Timoti . . . . .	500
2 Timoti . . . . .	511
Taitas . . . . .	518
Vailimon . . . . .	523
Abe Kulo Ju . . . . .	526
Yemesi . . . . .	555
1 Pitere . . . . .	564
2 Pitere . . . . .	576
1 Jone . . . . .	582
2 Jone . . . . .	591
3 Jone . . . . .	593
Jut . . . . .	595
Navisiþeiano . . . . .	599

**Yesu Kristo Kiano  
Ioluano Vou  
Napano  
MATAIU  
Bivitauiaio  
Verialiano Moti**

*Tukunu bulati na niosi nei*

Niosi nei Yesu Kristo Kiano Ioluano Vou napano Mataiu jirio, naio berial ioluano vou ber Yesu naio be toro napano Atua berkario ban kiano tomu nalo nua, ber mia rimei rilurur kiano tomu nalo. A ea Yesu, verikariano nalo napano Atua mila ban kiano tomu nalo nei ea Naverikariano, moruo nalo amoluo.

Yesu moluo ea kulo Israel kialo yati, naio be nalo tai jo bijalo, mia ioluano vou nei maka ve nalo nei ga kanalo, be tomu nalo na yetemerba kanalo.

Mataiu midu vatitig torogio nalo na niosi nei ju jibe nei. Beamu, naio berii napano Yesu kiano moluoiano, mia jokia ban berii tukunu na napano Jone baruei ea naio, bija napano Siñaro milavon naio. A iorou, naio berii napano Yesu jikar kiano iñauano ea tanobuku nei Kalele, ana jo berii ioluano vou ban tomu nalo, a jo berlogloglo, a jo milarur tomu nalo kialo mieano. Mia iorou bereio, naio berii napano Yesu jaluvo den Kalele miel ba Yerusalemo, a naio berii vite nalo napano Yesu mila ea sude maaro na kiano iñauano. Mia maariano, naio berii napano Yesu mñaro, a naio meul bereio.

Mataiu berii napano Yesu be Naveriloglogiano novo tai napano mije moroano ka verial nioti na Atua kiano Tuboiano, a berii bajago napano Atua binime be Parinio Tubo ka kiano tomu nalo. Vite nalo telabo napano Yesu berloglog ka tomu nalo, Mataiu jankanio ea yati jimo.

Yesu berloglog kiano tomu nalo mave ea suku. Ea kiano verloglogiano nene, naio berial bajago napano tomu nalo monoka alaio, ka amei napano Atua ve Parinio Tubo kalo. A naio berial kialo iñauano, a kialo moroano nalo, a vite nalo napano mia avokar ea juluvati na kialo meuliano ea yetemerba vou na napano mia Atua rive Parinio Tubo kanio kiano Verloglogiano nalo nei ajua mirano jimo [5] ban bokar mirano aluo [7]

Yesu berloglog kiano tomu duelimo ba juo [12], a jian moroano banlo ka ava averial kiano Ioluano vou van tomu dolu nalo. Verloglogiano nalo nei ajua mirano duelimo [10]

Jamerjiano nalo napano Yesu ber ka verii tomu nalo napano Atua be Parino Tubo kalo, a Yetemeriba vou na napano mia ava atuaio. Jamerjiano nalo nene ajua mirano duelimo ba tolu [13]

Yesu berloglog kiano tomu nalo ka bajago napano toro monoka rila ka takisor naio. Verloglogiano nalo nei ajua mirano duelimo ba arolu [18]

Yesu berloglog kiano tomu nalo, ber vite nalo napano mia rimaluvo ea bogo na maaro, bija yetemeriba vou napano Atua rive Parinio Tubo kanio, mia rimaluvo. Verloglogiano nalo nei ajua mirano duelimo valuo ba veri [24] a mirano duelimo valuo ba jimo [25]

*Torogio nalo na niosi nei*

Yesu korobinio nalo a Yesu kiano moluoiano 1:1—2:23

Jone Baruei kiano iñauano 3:1-12  
Jone baruei ea Yesu, a Siñaro milavon naio 3:13—4:11

Yesu mila kiano iñauano ea tanobuku nei Kalele 4:12—18:35  
Yesu jaluvo den Kalele ban yako Yerusalemo 19:1—20:34

Yesu kiano sude maaro napano mila kiano iñauano yako Yerusalemo bija vio nalo

vaataro kean Yerusalemo 21:1  
—27:66  
Yesu meul bereio a kiano tomu  
nalo amial naio 28:1-20

*Yesu korobinio nalo*  
*Luka 3:23-38*

<sup>1</sup> Yesu Kristo naio miyotuba ea bajulukuti na tormoruo juo na tortoru na kulo Ju nalo korobilo, nina be Epraamo naio beamu, bija Teviti naio iorou kanio. Yesu korobinio nalo nonovio, sialo ajibe nei:

<sup>2</sup> Epraamo naio kenerinio napano Aisak.

Aisak naio kenerinio napano Yakovo.

Yakovo naio kenerinio napano Yuta, naliko kuruano dolu nalo.

<sup>3</sup> Yuta naio kenerinio juo Beresi naljuo kuruano Jera, naljuo abe savoro, napano kenielo Temnar.

Beresi naio kenerinio napano Esrono.

Esrono naio kenerinio napano Remo.

<sup>4</sup> Remo naio kenerinio napano Aminatapo.

Aminatapo naio kenerinio napano Nesono.

Nesono naio kenerinio napano Solomon.

<sup>5</sup> Solomon naio kenerinio napano Boasa, ana Boasa nene napano kenieno napano Reavo.

Boasa naio kenerinio napano Ovete, ana Ovete nene na kenieno Ruta.

Ovete nene kenerinio na Jese.

<sup>6</sup> Jese naio kenerinio napano Teviti, ana Teviti nene napano be parinio tubo na vio Israel.

Teviti naio kenerinio napano Solomon, ana Solomon nene na kenieno tira na Uraia koano jukamu.

<sup>7</sup> Solomon naio kenerinio napano Reopoam.

Reopoam naio kenerinio napano Apia.

Apia naio kenerinio napano Asa.

<sup>8</sup> Asa naio kenerinio napano Jeosevata.

Jeosevata naio kenerinio napano Joramo.

Joramo naio kenerinio napano Usaia.

<sup>9</sup> Usaia naio kenerinio napano Jotamo.

Jotamo naio kenerinio napano Easa.

Easa naio kenerinio napano Esekaiia.

<sup>10</sup> Esekaiia naio kenerinio napano Manasa.

Manasa naio kenerinio napano Amon.

Amon naio kenerinio napano Josaiia.

<sup>11</sup> Josaiia naio kenerinio napano Jekonaia naliko kuruano nalo.

Naruei ea kialo bogo nei, kulo buruvenuo dolu napano Bapilon nalo abano aburu bulag kulo Israel nalo ka ava aimiau kurano ga tibe na yako Bapilon.

<sup>12</sup> Ka bogo napano amimiau kurano ga yako Bapilon kia ga vo, Jekonaia naio kenerinio napano Sieltiel.

Sieltiel naio kenerinio napano Serupapele.

<sup>13</sup> Serupapele naio kenerinio napano Aviyuti.

Aviyuti naio kenerinio napano Eliakim.

Eliakim naio kenerinio napano Aso.

<sup>14</sup> Aso naio kenerinio napano Setoko.

Setoko naio kenerinio napano Akimi.

Akimi naio kenerinio napano Eliuti.

<sup>15</sup> Eliuti naio kenerinio napano Eliesa.

Eliesa naio kenerinio napano Matano.

Matano naio kenerinio napano Yakovo.

<sup>16</sup> Yakovo naio kenerinio napano Yoseve, napano koano Mere. Mere nei, naio be Yesu kenieno, namia aberii naio ka be Naverikariano.

<sup>17</sup> Naruei jikar ea Epraamo binimei bokar Teviti, be taara duelimo ba veri [14]. A jikario ea Teviti binimei bokar bogo napano kulo Bapilon aburu bulag kulo Israel nalo ka ava aimiau kurano ealo, be bunu

taara duelimo ba veri [14]. A mia jikario ea bogo na nalo ajua vio Bapilon binime i bokar bogo napano Kristo kiano yotubaiano, be bereio taara duelimo ba veri [14].

*Abar Yesu  
Luka 2:1-7*

<sup>18</sup> Ninei be tukunu napano abar Yesu Kristo eaio, m̄arabo nene ninei: kenieno tira napano Mere, na beamu aberkakario ka mia naio soro ka toro tai, siano Yoseve. Ana bogo na maka asoro vo, mia Mere mijogluar ka be m̄abono, napano m̄abono nei binime i ea Niununo Lu. <sup>19</sup> Ana Yoseve napano aberkar ka mia naio rivuru Mere nei ve koano, naio be toro novo tai, a naio maka tom̄a river Mere naio mila vite na bova tenia. Mia naio mial ka mia nalo ve juo monoka ala korov kialo verikariano nei, mia naio jidomii ka mia rim̄aukanio ea bajago novo tai napano melumu ga, bior naio maka sidom rila Mere rimou m̄ele rivior vite nei. <sup>20</sup> Mia bogo napano naio jidomii ka mia rila tibena, Atua kiano nailiano tai miyotuba kano ea monovovvano tai bogiano, naruei nailiano nei berii kano, berinavo “Yoseve, jau Teviti kiano bajulukuti, jau kojog re rivova ka mia kovuru tira na Mere ka ve koamo, bior tete na joa mabono, binime i ea Niununo Lu. <sup>21</sup> Mia Mere naio rivar tete sum̄ano tai, mia monoka jau kesisia siano ka Yesu Naioruriano, bior mia naio rilakon nonovio kiano tomu nalo kialo kariano nalo.”

<sup>22</sup> Naruei vite nalo nei miyotuba jibe na ka rila iliano tai rime i rive riano tavukia na Atua naio berial nua ea niono Naverialiano Aisea, <sup>23</sup> napano naio berenio, berinavo

*“Mia merevono tai na maka rijkia sum̄ano vo, mia naio ve m̄abono,  
mia naio rivarlar kenerinio sum̄ano tai,  
mia nalo asisia siano aver ‘Emanuela.’”* *Ais 7:14*  
Sio nei “Emanuela,” berenio “Atua to kiteaku.”

<sup>24</sup> Naruei Yoseve naio jevijo bereio, ana naio mila jibe ka napano Atua kiano nailiano berkanio, ana joro ka Mere, buru be koano. <sup>25</sup> Mia maka nalo atubiju vo bano-o bokar bogo napano Mere naio barlar kenerinio nene karina. Ana bogo napano Mere bar kiritete nene, ana mo Yoseve jisia tete nene ka Yesu.

## 2

*Tomu nalo nam̄a amijikia batitig bajago na m̄arivitano nalo abinime i ka aial Yesu*

<sup>1</sup> Yesu kiano yotubaiano ea komeli tai na siano Betleem, ea tanobuku na vio Yutea, ka bogo na Erot naio be parinio tubo ka kulo Israel nalo. Mia maka vesiou ga ka bogo nene, ana tomu tai nam̄a amijikia batitig bajago na m̄arivitano nalo, abinime i ea vio Yerusalemo. Nalo nei ajumolu ea kialo buruvenuto ea vio nam̄a m̄erenio mijivi eaio abinime i. <sup>2</sup> Naruei nalo abika den tomu nalo, aberenio “?Tete na miyotuba voniganei, na aber mia naio ve kulo Israel kialo parinio tubo, naio jo be? Kumemi numial kiano m̄arivitano nene ruei, miyotuba ea vio napano m̄erenio mijivi eaio, ana kumemi nubinime i ka nuvilivu ka siano.”

<sup>3</sup> Bogo na iliano nei binime i bokar Parinio tubo Erot naliko kulo Yerusalemo nalo tealoo, amijogio, mia nalo maka asaaro kano. <sup>4</sup> Naruei Parinio tubo Erot naio bio tomu na tortoru na kulo lu nalo naliko naverloglogiano na tuboiano nalo abinime i amial naio, ana naio bika denlo, berinavo “?Mia Naverikariano nam̄a aju aberiio vuru na, mia naio rime i riyotuba to be?”

<sup>5</sup> Nalo nei aberdope, aberinavo “Mia Naverikariano naio riyotuba ea tanobuku na vio Yutea, ea komeli na vio Betleem. <sup>6</sup> Nina bior beamu naverialiano tai naio bivitauiakar iliano nalo nei, berenio  
*‘Atua naio ber jibe nei, berinavo*

*“Kamii na vio Betleem, maka kuvijikia kuver kulo dolu na tortoru nalo na ga ea vio Yutea, nalo ga abe tomoruoa loa kamii, ana kamii kumitutano, makanio,*

*bior mia navurim̄araboiano na toru tai riyotuba ea kamii rimemedu, naio rivitikar vatitig kiaku kulo Israel nalo.””* *Maika 5:2*

<sup>7</sup> Karina Parinio Tubo Erot naio bio bena ga tomu napano amijikia bajago na m̄arivitano nalo, abokar vioriano tai naliko naio ga, ka naio jidom rijogio vatitig denlo ka m̄arivitano nene naio miyotuba memedu ka bogo vaio. <sup>8</sup> Bisi na naio ber kalo, berinavo “Monoka kamii kuva kuvisirag tete nene, ver kuvilealio, ana mo mia kumei kuverialio va kiniou bereio, ka mia kiniou bunu nava nolotu ka siano,” bisi na naio miilalo aba Betleem. Mia kanano iliano nei be sibiano ga, naio jidom rileal tete domudomu nei ka mia naio riva ruebinio ga.

<sup>9-10</sup> Ana tomu nalo nei amia-gago ka Parinio Tubo Erot kiano iliano nalo bisi, ana nalo aban ea kialo m̄arabo, ana amial bereio m̄arivitano nei nua amialio naio jo merera ea vio na m̄erenio mijivi eaio. Mia bogo na nalo amial bereio m̄arivitano nene, nalo amijog bo toru laka, ana m̄arivitano nei naio buru m̄arabo kalo abano-o aboru ea vio na kiritete nei naio mon eaio. <sup>11</sup> Naruei nalo aba joomo ea yimo, amial kiritete bija kenieno Mere. Naruei nalo aminie kamu kean naio, amilivu ka siano. Karina nalo abetavo ea kialo basaro nalo, ana abar kanano jidomiano nalo banio, niogo tai, bija bonotanunu na siano vrakenses, bija pomat, na puruveru nene bavin laka, siano mer.

<sup>12</sup> Naruei bogiano, ana Atua mil banlo ea monovovvano tai, berbu-relo ka mia avan re bunu aial Erot. Naruei nalo ajumolu, ajel ea m̄arabo dolu aban bereio ea kialo vio.

*Amidu Yesu sesa nene, aburo aba Ijivi*

<sup>13</sup> Bogo na tomu nalo nei ajuvan vio nei ruei abano, ana Atua kiano nailiano tai miyotuba ka Yoseve ea monovovvano tai, naio berkanio, berinavo “Yoseve, jau kotumolu, kodu kiritete domudomu naljuo keniene, kuva kuvitu bilig ea vio Ijivi, bior Tubo Erot naio jom̄a jidomii kakar ka mia riila kiano tomu na mira nalo asirag kiritete domudomu na ka mia auebinio. Kamii monoka kuva kuvitua vio na rivano-o ver kiniou never kamii kumei, ana mo kumei bereio.” <sup>14</sup> Ana Yoseve jumolu, midu kiritete domudomu naljuo keniene, ka bogiano nene ga ajumolu amiel ka avan ea vio Ijivi. <sup>15</sup> Nalo ajua vio na jiou kija, bano-o bokar bogo na Parinio Tubo Erot naio m̄aro.

Tena maluvo jel jibe nei ka mia rimemedu ka Atua kiano iliano tai na naio berio ban Naverialiano Osea nanua ruei, berinavo “Keneriku joa vio Ijivi, mia kiniou nobio naio ka rimeio bereio.” *Osea 11:1*

*Tomu na mira amue tam̄aria tete nalo*

<sup>16</sup> Mo bogo na Parinio Tubo Erot naio mijikia ka tomu napano amijikia batitigio m̄arivitano amiyotel ea naio, maka bunu amei eaio, naio tinienmimi toru, ana naio ber ka kiano tomu na mira nalo, ka ava asirag kiritete sum̄ano nalo napano ajua vio Betleem bija komeli nalo napano aju jouro ea tanobuku nei, nalo nonovio na kialo yuka maka rivokar yuka ve juo vo, ka mia nalo auebinvinlo am̄arm̄aro. A naio buluku bogo nei memedu jibe nei, bior iliano napano naio mijogio den tomu nalo nei nua, aberial memedu ban naio ka bogo napano m̄arivitano nene naio miyotuba garuei be moti eaio.

<sup>17</sup> Ea m̄arabo nei, vaio napano Naverialiano Jeremaia ber nua bini-meio miyotuba be riano, na naio berinavo

18 “*Jooa na tegiano tai amijogio ea vio Rama, tegiano na tinie jaleleiano. Rejel naio joña jegi kumabinio nalo, naio miilkue ka aioliþiliþi naio, bior kumabinio nalo aþarmþaro liki.*” *Jeremaia 31:15*

*Yoseve midu Yesu sesa ajuvan vio Ijivi, abinimei bereio ea vio Nasarete*

19 Mia bogo na Parinio Tubo Erot naio mþaro, Yoseve nalo aju kia ga Ijivi vo, naruei naio monovovu, mial bereio Atua kiano nailiano tai, napano naio binimeai berkanio, 20 berinavo “Yoseve, jau kotumolu, kodu tete na vija keniene, kamiu kuvan bereio ea kenemiu venuo napano Israel, bior Parinio Tubo Erot nanua mþa jidom ruei kiritete na, naio mþaro ruei.” 21 Naruei Yoseve naio jumolu, midu tete bija keniene, ana nalo aban bereio ea kialo venuo napano Israel.

22 Mia bogo napano Yoseve mijogial ka Akaleasi jo jeleig karamþano Erot, ka naio be parinio tubo ea vio Yutea, Yoseve naio merou ka rivan bereio ea vio Yutea. Ana Atua mil bereio ban Yoseve ea monovovuano tai, berbure naio ka mia naio rivan re bunu ea vio Yutea bereio, naruei Yoseve naio ban ea vio dolu, vio nene siano Kalele. 23 Ana nalo abajua komeli tai napano ea tanobuku na, siano Nasarete.

Vite na maluvo jibe na ka rila naverialiano nalo kanalo iliano nalo ave riano, napano mþa aberii Verikariano nei nanua ruei, aberinavo

“Mia averenio naio be toro re Nasarete tai.”

### 3

*Jone Baruei joa vio yauo, naio joña mioliolu ka naviligiano*

*Mak 1:1-8; Luka 3:1-18; Jone 1:19-28*

1 Yesu naio miluo binimeai toru, nina ea vio Nasarete kia ga vo, mia ka bogo na, Jone Baruei miyotuba

binimeai ea vio yauo na Yutea, naio mioliolu berinavo 2 “Kamiu monoka kuvilig kamiu bior Atua kanano navenatuboiano jo binimeai.” 3 Mia ninei be toro napano Naverialiano Aisea naio joña berial nua ruei, berinavo

“Toro tai bio jouo ea vio yauo, berinavo

‘Kamiu kuvila Atua kiano mþarabo rimemedu, ka mia naio

riyotuba ea kenemiu meuliano nalo.’” *Ais 40:3*

4 Jone Baruei nene naio javukia Naverialiano Elaija re nua, jibe ka napano naio maka mþano kulumþarauo novo nalo, mia mþano kulukoti amimþaukanio ea vijinio kamele ga a naio mior mþano kulukoti ka niati kulubue marauo tai ga. Sano sinaniano na yeturu nene naio be surubu nalo ga bija vite sesei napano sukabak nalo amimþaukanio.

5 Mia tomu na vio Yerusalemo bija komeli dolu nalo na vio Yutea, bija komeli nalo napano mþa aju vaataro ka mþarauei na vio Yortano, abinimei ka naio. 6 Ana aber bulag kialo kariano nalo banio, naruei naio baruei ealo ea mþarauei na vio Yortano.

7 Be bogo tai, Jone mial ka napano be tiniobi na terati juo na nalotvano na kulo Ju nalo kialo, nina be Varisis bija Satusis nalo, abinimei ka naio rivaruei ealo, mia naio mil jikili banlo, naio berinavo “?Kamiu kumitavukia maro nalo ga napano amerou ka sebi tai naruei nalo aburo, mia kamiu kuberiamþa mia kumijikia kuvuro ka sebi napano mia Atua riila rimeai, napano kamiu maka kuvilig vatitigio kamiu rivu vo? 8 A ver kamiu kube riano ka kubilig tiniemiu bior kenemiu kariano nalo, mia kuvila titai medave ea kenemiu meuliano nalo ka mia ajikia ka kube riano. 9 Mia

maka rivu kamþa kuvarvar ka kamiu, tibe kanio namþa kumilaio, kuberinavo ‘Kito robo ruei, robe Epraamo kiano bajulukuti nalo.’ Mia kiniou neber ka kamiu, neber vite na maka

ve titenia, bior Atua naio mijikia rivar puruveru nalo nei riviliglo amei ave Epraamo kiano bajulukuti nalo, ka adu jelemiu. <sup>10</sup> Neber ka kami, yekesi tai jua burupati iesi ruei, ju rorea ka mia ate bulag buruiesi nalo napano maka avar m̄arati nalo na bo, mia ate bulaglo avukulo avan ea sebi sisenlo. <sup>11</sup> Kiniou nojukamu nebinimei, nojoma nabaruei ea kami ka uei ga, ka rila rimeravo ka kami kuvilig kami ruei, mia be toro dolu tai napano jo binimei iorou ka kiniou. Naio jo loa kiniou, a kiniou maka navare ka neve kar kiano kulubue, p̄elina nala kiano im̄auano dolu tai. Mia naio naruei mia rivaruei ea kami ka Niununo Lu vija kiano sebi ka sisen kon bulag iorosoro nalo den kenemi meuliano nalo. <sup>12</sup> Naio midukar titai jibe ka m̄artea joa jum̄ano, ka mia naio rilakon vatitig kanano uiti nalo. Mia naio rivar uiti napano be nioti uiti na bo, ava joomo ea kunuano, mia nalo na abe vinikiti ga, mia naio risebilo ka sebi tai napano maka rijikia rim̄aro bogo tai leleio.”

*Jone naio baruei ea Yesu  
Mak 1:9-11; Luka 3:21-22*

<sup>13</sup> Mia Yesu naio juvan vio Kalele, binimei ea m̄arauei Yortano, ka Jone naio rivaruei eaio. <sup>14</sup> Mia Jone naio jidom riverbure be deio, ana naio ber “?Jum̄abe ana jau kobinimei ka navaruei easo? Kejiio, memedu ga ka jau kavaruie ea kiniou.”

<sup>15</sup> Mia Yesu naio berdope, berinavo “Peli ga koig, mia tibena re. Jau kala ninei beamu vo, bior bo laka ka mia kito ve juo monoka rotum̄a rataki vite nalo napano Atua jidom ka kito roim̄aukanio.”

Naruei Jone mijamo ka Yesu binimei, ana naio baruei eaio.

<sup>16</sup> Mia bogo napano Jone baruei eaio bisi, ana Yesu nene jaluvo den uei, ana vaarakurano naio mial vio mave betavo ka naio, ana naio mial Atua kiano Niununo Lu batove

javukia vaama tai, binimei bujo jua Yesu. <sup>17</sup> Naruei Atua mil batove, naio ber “Nina be keneriku napano kiniou nejidom m̄lea naio. Kiaku jidomiano joa naio, kiniou najaaro toru m̄lea ka naio.”

## 4

*Sim̄aro nalo kanalo parinio tubo,  
naio mila von Yesu*

*Mak 1:12-13; Luka 4:1-13*

<sup>1</sup> Iorou ka bogo napano Jone Baruei naio baruei ea Yesu bisi, ana Niununo Lu buru Yesu ban ea vio yauo tai ka sim̄aro nalo kanalo parinio tubo rila von naio. <sup>2</sup> Naruei Yesu naio monduka bogoti delimo va veri [40] a bogiano delimo va veri [40], ka bolkouo, mia iorou ka bogoti nalo nei ana jijer taneaio. <sup>3</sup> Ana mo Sim̄aro, toro nam̄a milavonvon tomu nalo, naio ber ka Yesu, berinavo “Verenio jau kobe Atua kenerinio riano, ana mo kover ka puruveru nalo na aju na, ka amei ave joko, ka kesen tai.”

<sup>4</sup> Ana Yesu naio berdopeio, berinavo “Makanio, bior Niosi Lu naio berenio ruei, berinavo

*‘Maka toro rijikia rimeul ea ga siniano,*

*mia toro mijikia rimeul ea iliano nonovio napano Atua naio berenio.’ ”*

*Tiut 8:3*

<sup>5</sup> Mia Sim̄aro naio milavon Yesu kiano jidomiano bereio, naio jiloglog Yerusalemo, naio buru kiano jidomiano bavin mave ea Atua Kunuano Lu. <sup>6</sup> Naruei Sim̄aro ber ka Yesu, berinavo “Verenio jau kobe Atua kenerinio, ana mo jau koviako kavatove ea borotano. Mia jau kovu ga na, bior Iliano Lu naio berii Atua, berinavo

*‘Mia naio mijikia riila kiano nailiano nalo,*

*ka amei atu avitkariso.*

*Mia nalo adukarso ga ka jum̄alo mave, ka mia kavan re jaamo ea puruveru.’ ”*

*Iouano*

*91:11,12*

7 Ana Yesu berdoŝe Siĉaro, berinavo “*Makano, bior Niosi Lu berbunu ruei, berinavo*

‘*Maka rivu ka kalavon kanamo Tubo Atua, jau katadua re naio ka rila kiamo vite tai.*’ ” *Tiut 6:16*

8 Naruei Siĉaro naio milavon Yesu bereio, ka jidom rivuru Yesu kiano jidomiano rivavin ea burusuku na toru laka tai, ka mia naio rijikia siloglog buruvenuo nonovio na vio yetemeriba nei ka Yesu, rivija vite maraiu nene nalo. 9 Naruei Siĉaro milavon Yesu bereio va rolu nene, berinavo “Saba nalo na komial na mia kiniou najamo kalo vansom, verenio jau keinietano, jau kolotu ka kiniou.”

10 Mia Yesu naio mil ban Siĉaro, berdoŝe kiano iliano, berinavo “Jau kovuro den kiniou, Siĉaro. Niosi Lu naio berenio ruei, berinavo ‘Mia jau kolotu ka ga Tubo kiamo Atua, naio ga takurano, mia naio ga kala kanano iĉauano.’ ”

11 Naruei Siĉaro buro den Yesu, ana nailiano nalo abinimei, aju naliko amiyoluŝiluŝi naio.

*Yesu jikar kiano iĉauano ea tanobuku na Kalele*  
*Mak 1:14-15; Luka 4:14-15*

12 Mia ka bogo nei, parinio tubo Erot kiano tomu na mira nalo tai aba abokar Jone Baruei, ana aburu naio ban ea yimo na tetavokoiano. Mia ka legiano nene ga Yesu naio mijogial lilianiano nei, naruei naio jumolu den vio na, ana ban bereio ea tanobuku na vio Kalele. 13 Mia naio maka riva toa vio Nasarete, mia naio mijaka batove ea ĉarkomeli na vio Kapeneam, napano naio jo vaataro ka ueiyabo na toru na vio Kalele. Vio nalo nei napano jikar Kalele batove boru koyou ea tei, beamu borotano nei naio be Sebulano kiano bajulukuti nalo bija Naptali kiano bajulukuti nalo kialo nua. 14 Tenei miyotuba jel jibe nei ka mia rila iliano nalo napano Naverialiano

Aisea berialio nanua ruei, rimei rive riano tibe ka napano naio berenio, berinavo

15 “*Kamiu tomu nalo na Sebulano bija Naptali kialo vio nalo, napano kamiu kumitu iviso ka ĉarauei na vio Yortano bija tei na toru, kamiu na vio Kalele, vio na tomu na maka ajikia Atua, kamiu kuvijog iliano nei:*

16 *Tomu nalo napano ĉa aju nunu ga, mia nalo aial buruĉara yulu tai.*

*Nalo na aju nunu darĉariga, ka mia ĉa aĉarĉaro ga, mia buruĉara yulu tai naio rimereralilo.”* *Ais 9:1,2*

17 Mia jikar ea bogo nei, ana Yesu naio joĉa mioliolu, naio berinavo “Kamiu monoka kuvilig kenemiu jidomiano nalo ka kenemiu kariano nalo, bior navenatuboiano na vio mave naio binimei vaataro ruei.”

*Yesu bio kiano naiagagoano veri*  
*Mak 1:16-20; Luka 5:1-11*

18 Yesu naio joĉa mieliel kiki jakii baramudou na ueiyabo napano toru na vio Kalele, ana naio mial tomu juo, Saimon Pitere naio kuruano Adru. Naljuo ajumĉa ajuvan suŝede, bior naljuo amijikia bajago namĉa aburu niado. 19 Mia naio ber kalo, berinavo “Kamjuo kuvitakisior kiniou, mia kiniou nala kamiu kuve navagadeano na tomu nalo.” 20 Mia vaarakurano, naljuo ajuvan kialo suŝede nalo ajubo, ana nalo ajakisior Yesu.

21 Karina Yesu naio miel ban lie kija ga bereio, ana naio mial tomjuo dolu bereio, Yemesi naio kuruano Jone, nalo abe Sepeti kenerinio nalo. Nalo ajua kialo buluku uako naliko karamĉalo, nalo ajumĉa amila batitig kialo suŝede. Naruei Yesu biolo ka atakisorio, 22 mia vaarakurano ga, nalo ajumolu soŝeli, ajuvan karamĉalo jobo ea kialo uako, ana nalo ajakisior Yesu abano.

*Yesu naio mioliolu, berloglog tomu nalo, a naio mieliel ka mieiano nalo*

*Luka 6:17-19*

<sup>23</sup> Naruei Yesu naio jomã mieliel ea vio nalo napano Kalele, naio jomã berloglog kulo Ju nalo ea kialo yimo na lotuano nalo. Naio jomã berial ioluano novo nei na Atua kiano navenatuboiano, mia naio mieliel ka tomu napano namã amie, naio milarur tomu namã mieiano dedade nalo milalo, abo bereio. <sup>24</sup> Naruei ajukunu ka Yesu siano banbano barko reraio bunu buruñara tanobuku na vio Kalele tivelinio batove, napano ajisia ka Siria. Naruei tomu nalo na vio na bunu abarvar kialo namieiano nalo abinimei amial Yesu. Nalo nene tealo amie, tealo amijog niabele mijalele, tealo niadu jualo, tealo ajumã amiabulu marmãro, mia nalo tealo napano niabele nalo amãrmãro, mia Yesu naio milarurlo abo bereio. <sup>25</sup> Mia tiniobi toru na tomu nalo ajakisor Yesu ka bogo na. Nalo nei amolmoluo ea vio Kalele, ea vio napano ajisia ka Komeli Duelimo, mia ea vio Yerusalemo a ea vio dolu nalo na vio Yutea, a ea vio nalo napano jua m̃arauei na vio Yortano tivelinio bano. Nalo na vio nalo nei naruei nalo ajakisor Yesu ea bogo na.

## 5

*Yesu berloglog tomu nalo*

*Luka 6:20-23*

<sup>1</sup> Mia be bogoti tai, ana Yesu naio mial tiniobi toru abinimei aju naliko, naruei naio bavin ea suku tai. Jibe ka kialo naverloglogiano tai, naio jotano, ana na kiano tomu nalo abinimei ajutano jeliviv eaio, <sup>2</sup> ana na naio berlogloglo.

<sup>3</sup> Mia Yesu kanano iliverloglogiano nalo na tortoru tai ajibe nei. Naio berinavo  
“Nalo napano abitulubar ka maka aleal Atua ea kialo meuliano nalo vo,  
mia ilivuiano rimei toalo,

bior mia Atua naio rive Parinio Tubo ka tomu nalo na ajibe na.

<sup>4</sup> Nalo napano amijog bova ka jaleleano nalo, ana ajumã ajegi, mia ilivuiano rimei toalo, bior mia nalo avokar luñiluñiano, ka mia nalo ajog rivu bereio.

<sup>5</sup> Nalo napano tinielo melumu bo, mia ilivuiano rimei toalo, bior napano Atua berkario ruei ka mia rije tonovo na yetemeriba nei vanlo.

<sup>6</sup> Nalo napano ajidom m̃lea bajago napano memedu javukia napano m̃a Atua naio jidomio, mia ilivuiano rimei toalo, ana na mia nalo aial bajago na memedu nalo nei amei avujo lou vatitig ea kialo meuliano nalo.

<sup>7</sup> Nalo ga napano ajumã tinielmiia tomu dolu nalo, mia ilivuiano rimei toalo, ka mia Atua naio mijikia tinienriialo ve toru.

<sup>8</sup> Nalo ga napano kialo iviso meravo bo, ilivuiano rimei toalo, ka mia aial Atua.

<sup>9</sup> Nalo ga napano abe tomu namã amila tumãro, mia ilivuiano rimei toalo, ka mia Atua naio riviolo ave kenerinio nalo.

<sup>10</sup> Nalo ga napano amonea Atua, napano mia m̃a tomu dolu nalo amila baravo kalo bior kialo moneano nene, mia ilivuiano rimei toalo, bior mia Atua rivurlo ava jouro ea kiano navenatuboiano.

<sup>11</sup> “Kamii napano verenio tomu nalo amila lelan kamii ajumã amijil kamii, a ajumã amila sibi ea kamii, napano ajumã aber niegeniege kamii, nina bior kube kanaku tomu nalo, mia ilivuiano rimei toa kamii bunu. <sup>12</sup> Kamii kuvisidom bivovijon re, kuvisaaro ga, bior amila kiki kamii ea bajago na ga amila ka naverialiano nalo re nua. Mia kamii kuvar kenemii buruñara ijiiano ea vio mave.”

*Vaatei bija yulu**Mak 9:50; Luka 14:34-35*

<sup>13</sup> Ana Yesu ber bunu, berinavo “Kamii kube vaatei na tomu nalo na yetemeriba nei, napano kenemiu bajago novo naio bakar vio yetemeriba nei maka riva rivova laka. Ana verenio vaatei nei rijeja re bunu rivu, maka bunu rijikia rila kanano iñauano, a maka bunu titai rijikia rila rivu, mia naio bo ka ga avukuio rivano.

<sup>14</sup> “Kamii kumitavukia yulu na yetemeriba nei. Mia verenio m̃arkomeli tai toa suku levlevi mave, mia bogiano tomu nalo napano aju koalabo amijikia aial yulu na m̃arkomeli nene, tomu nalo napano ajuaio maka ajikia aduvan kanalo m̃arkomeli nei. <sup>15</sup> Mia bogo napano verenio rejelan yulu, kito maka rejikia reivekoio ka baja bereio, mia kito rejelan ka reive takilele mave ka vio reraio amerera. <sup>16</sup> Ana ea bajago nene ga, kamii monoka kuvijamo ka kenemiu yulu nalo na kenemiu meuliano amerera rivokar tomu nalo, ka ajikia aial vatitig iñauano novo nalo napano m̃a kamii kumim̃aukanio. A bogo napano nalo aial kenemiu iñauano novo nalo, mia avamenea Karamemiu napano joa vio mave rivorio.”

*Yesu naio berii Mosis kiano tuboiano nalo*

<sup>17</sup> Ana Yesu berii bunu, berinavo “Mia maka rivu ka kamii kuvituña kuver kiniou nebinimeĩ ka nala lelan Mosis kiano tuboiano nalo vija naverialiano nalo kialo iliano nalo, p̃eli ga, maka lele tibena. Kiniou nebinimeĩ ka mia natakij masosoua nonovio, ka nevisi vatitig nioti nene nalo. <sup>18</sup> Kamii kuvisidomikar vatitig iliano nei, mia tuboiano nalo nei maka ajikia ava kovio bogo tai-o-a ka vio mave vija borotano ave juo avakovio. Tuboiano nei be ilisesa nene nalo telabo, mia maka lele kiri m̃ariliano na tai tertelisu

nalo nei rijikia rivakovio, riva rivokar bogo na kiano iñauano nalo amalmaluvo nonovio. <sup>19</sup> Tenene na, verenio toro tai rilakorov kiri tuboiano nalo nei tertelisu nei tai, mia naio tom̃a riverloglog toro dolu ka mia nalo atavukia naio, mia toro nene naio toa vio tai napano jotano maaro ea Atua kiano navenatuboiano. Mia verenio toro na naio bakar batitig tuboiano nalo nei, a naio jom̃a berloglog tomu dolu nalo ka mia ala tavukia naio, mia naio ve toro na toru tai ea Atua kiano navenatuboiano. <sup>20</sup> Kamii kumituña kumisidomii kuberenio naverloglogiano na tuboiano nalo a Varisis nalo abe tomu na memedu nalo laka ruei, a kamii monoka kuvila bajago nalo na memedu lie vo tuvululo, ver p̃eli, mia kamii kuvijikia re kuva jouro ea Atua kiano navenatuboiano.”

*Yesu berii natiniemimiano**Luka 12:57-59*

<sup>21</sup> Ana Yesu berii bunu, berinavo “Kamii kumijog ruei ka napano aberloglog kiado tormoruo nalo re nua beamu, aber ‘Kouebini re toro,’ mia bunu ‘Toro na riuebin toro rim̃aro, mia memedu ka avuru naio riva komeli ka mia ail vanio.’ <sup>22</sup> Mia kiniou nei, neber ka kamii: verenio toro na tinienjer kuruano, mia memedu ka avuru naio riva komeli labo, toro napano mil bova toru ka kuruano, naio berenio ‘!Jau kobo ka ga iakurano!’ memedu ka avuru naio ea kiado tomu na tortoru nalo kialo vioriano. Mia verenio toro tai napano naio mil m̃ele ban kuruano, naio berenio ‘Pariparimo miavovu’ mia memedu ka mia avuku naio rivan ea sebi ea vio na jogvaiano. <sup>23</sup> Ka tena, verenio bogo tai jau komei ea Atua kiano vio na sida ka mia kodu kanamo ijaiano van naio, mia tiniem rimaio ka napano kanamo vite tai joa jau kamjuo kuruamo, <sup>24</sup> jau monoka kodu batitig kanamo ijaiano tobo ea vio na sida nei beamu vo, ana monoka kavan bereio kala merevuiano kam ve juo

beamu vo, avona iorou kanio ana mo jau komijikia komei bereio ka kodu kanamo ijaiano rivan Atua.

<sup>25</sup> “Verenio jau bogu tai kovilvil ea toro tai ka titai, karina naio jidom rivurso kava komeli kario, mia bo ka jau kavan soĝeli keial naio ka keil vatitig vija naio tukamu, ka bogu napano maka avuruso kava komeli vo. Verenio makanio, ĵeli mia naio ruduso kotoa toro na toru juĝano ka naio tibureso, a mia naio naruei ruduso kotoa toro naĝa bokakar toro juĝano, ka toro nene naio ruduso kotoa yimo na tetavokoiano. <sup>26</sup> Kiniou neber kaso, verenio tibena mia jau maka kejkia kataluvo den yimo na tetavokoiano rivan rivokar bogu na mia jau kovulu nonovio kanamo mauo beamu, avona bisi ana jau komijikia kataluvo.”

#### *Yesu berii siakaiano*

<sup>27</sup> Ana Yesu berii bunu, berinavo “A kamiu kumijog bunu ruei ka napano aberloglogio ruei, aber ‘Mia kala re siakaiano.’ <sup>28</sup> Mia kiniou neber ka kamiu, verenio toro na biti va ea tira tai ka naio jidom rivurio, mia naio mila siakaiano ban tira nene ruei ea kiano iviso. <sup>29-30</sup> Verenio miramo tivelinio rilaso kala kariano, bo ka jau ketelario, kovuku rivano. A verenio juĝamo tinene rilaso kala kariano, bo ka jau ketelario, kovuku rivano. Bo kanio jau kalavenio niabemo togio tibena, ver ĵeli, mia mokotenamo reraio rivakovio ea vio na jogvaiano.”

#### *Yesu berii titigiano*

*Mataiu 19:9; Mak 10:11-12; Luka 16:18*

<sup>31</sup> Ana Yesu berii bunu, berinavo “Bereio, aber bunu nua, aberinavo ‘Toro napano jitiglar koano, mia naio monoka rudu mĝesi na silubariano tai vanio, napano naio beriio meravo ka naio jitiglar naio ruei, tira na maka bunu ve koano.’ <sup>32</sup> Mia kiniou neber ka kamiu, ver toro na ver jitiglar koano, ka iakurano ga maka tira nei naio rive kodovo

van koano neibano jukamu, mia ver tira neibano naio rila siakaiano, mia koano moruo naio be burupati nene. Mia toro na ver soro ka tira na jibe nei mia naio mila siakaiano.”

#### *Yesu berii juĝabe ka toro na mila verikariano ea Atua*

<sup>33</sup> Ana Yesu berii bunu, berinavo “Kamiu kumijog bunu ruei ka nalo aberii ka kiado tormoruo nalo nua bogobe, aberver jau kover Atua siano ka mia rila kanamo verikariano to sikili, mia maka jau kalakarov bereio kanamo iliano nene. A vaio napano jau koberkar ban Atua, monoka jau kalaiio.

<sup>34</sup> “Mia kiniou neber ka kamiu, neber jau maka kejkia kover titai siano leleio ka rila kanamo verikariano to sikili. Maka kejkia kover ‘Riano mave’ ver ĵelina jau kojomĝa kamila bulag tolu na vio mave napano be vio na Atua kiano. <sup>35</sup> A maka kejkia kover ‘Riano, vio yetemeriba novo na,’ ver ĵeli, mia jau kala bulag tolu na vio yetemeriba na jotano ka Atua kiano moroano. Maka kejkia koverenio ‘Riano, komeli lu yako Yerusalemo niako vo’ ver ĵeli, jau kojomĝa komila bulag tolu na vio na kanado Parinio Tubo Lu kanano. <sup>36</sup> A maka kejkia koverenio ‘Riano, paripariku nei’ kanio rila kanamo verikariano to sikili, ver ĵelina jau kojomĝa komila bulag Atua kiano tolu napano naio ga takurano mijikia rila viju parido tai ve takurano rimei riuvu ĵelina rimei ribobogio. <sup>37</sup> Ea kenemiu verikariano nalo, monoka kamiu kuver ga ‘Nao,’ ĵelina kamiu kuver ga ‘Makanio,’ nina ga barei na. Iliano dolu nalo napano mĝa kumituĝa kuverenio, nalo abinimei den Simĝaro.”

#### *Yesu berii ka ala meran re vite na bova bereio* *Luka 6:29-30*

<sup>38</sup> Ana Yesu berii bunu, berinavo “Mia kamiu kumijog naverloglogiano nalo aberii nua ruei, aberinavo ‘Verenio toro tai rila lelan toro dolu mirano tinene, monoka ala lelan mirano bunu. Mia verenio toro tai tukular toro dolu m̄arjuvono tai, monoka atukular m̄arjuvono bunu.’ <sup>39</sup> Mia kiniou nei naruei neber ka kamiu, Mia kovioluta re toro napano mila bova banso. Verenio toro rijuba yaba miramo tivelinio, monoka jau kovilig yaba miramo tivelinio rivan kean naio, ka naio rijuba bunu. <sup>40</sup> A verenio toro tai rivurso ea komeli ka tutuaso ka m̄amo kulusoto, mo mia jau kajamo ka vanio vija m̄amo kulukoti bunu. <sup>41</sup> A verenio toro na toru tai rituaso ka kavara kiano basaro keiel ka aura ve takurano, tibe ka napano naio mijikia berenio, monoka kasaaro ga ka kavario keiel ka aura ve takurano bereio vo. <sup>42</sup> Verenio toro tai rivika vite tai denso, mia monoka jau kodu vite nene vanio, a verenio toro tai sidom rudu kija vite na be kanamo, mia monoka kajamo ka vanio mia koverbureio re.”

*Yesu berii ka tum̄abe mia rosidom kiado uolu nalo*

*Luka 6:27-28,32-36*

<sup>43</sup> Ana Yesu berii bunu, berinavo “Mia kamiu kumijog naverloglogiano nalo aberii nua ruei, aberinavo ‘Monoka jau kosidom nalo napano aju vaatara kaso, mia jau kovijuku die kanamo uolu nalo.’ <sup>44</sup> Mia kiniou nei naruei, neber ka kamiu, neber monoka kamiu kuvisidom kenemiu uolu nalo, a kubolkouo ka nalo napano amila lelan kamiu, <sup>45</sup> ka mia kamiu kuvitakii vatitigio bajago na Karamemiu na ea vio mave, napano naio jidom nalo beberare ga. Tenene na naio mila kanano inio merera a kanano yuo bovo ea tomu nonovio, toro napano bo, a toro napano bova. <sup>46</sup> Verenio kamiu kuvitum̄a tiniemiu rija tomu nalo na ga tiniel miia kamiu, Atua maka rijikia rijeve ijaiano van kamiu rivorio. Tomu nalo nam̄a abarbijii

takis, napano kulo dolu nalo aberinavo nalo abe kulo va, mia nalo abare ka ala tibe na. <sup>47</sup> Verenio kamiu kuvitum̄a kuvan jumemiu kamlika ga kenemiu tomu nalo, nina maka tovulu bajago na kulo va nalo. Tomu nalo napano maka amonea Atua, ajum̄a ajidom bunu kanalo m̄aratavo nalo. <sup>48</sup> Mia kenemiu meuliano nalo monoka tibe ka na Karamemiu napano joa vio mave kiano bajago, napano memedu, a bo laka ban tomu nonovio.”

## 6

*Yesu berii bajago na ijaiano nalo*

<sup>1</sup> Ana Yesu naio mil banlo, berinavo “Vite nalo napano kiado nalotuanano naio berenio bo ka alaio, kamiu kuvila re tavukia napano kamiu kumilaio ka mia tomu ve telabo ajikia avitulubarario ka napano kamiu kumila tonovo. Verenio kamiu kuvitum̄a kuvila tibe na, mia Karamemiu napano joa vio mave, naio maka rijikia rije ijaiano van kamiu rivior vite na.

<sup>2</sup> “Tibe na, ea bogo nalo napano jau kesian ijaiano van talim̄asa nalo, jau keil vevavin re kanio, tavukia nailikuleiano nalo. Nalo ajum̄a aber bulag kanalo im̄auano novo nalo joomo ea yimo na volkouano, a tavio bunu ea vio medave, ka rila ana tomu nalo avamenealo kanio. Mia kiniou neber ka kamiu, vameneano na kulo dolu na, nina ga be kialo ijaiano, mia maka bunu ajikia avokar vite dolu bereio. <sup>3</sup> Mia ver bogo na jau kodu ijaiano tai van talim̄asa nalo, monoka jau kala ea bajago na tai napano mia jau ga ve takurano kejikia kanamo im̄auano novo na, a napano kanamo jidomiano rivarvar re naio kanio. <sup>4</sup> Ver jau kalavan kiamo im̄auano vu tibe na, mia Karam̄amo napano mijikia mial vite nalo napano kulo dolu maka ajikia aialio, naio mia sian ijaiano vansom rivorio.”

*Yesu berii ilivolkouano*

*Luka 11:2-4*

<sup>5</sup> Ana na Yesu berii bunu, berinavo “Verenio bogo napano kamiu kubolkouo, mia maka rivu ka jau kala takii bajago napano nailikuleiano nalo kialo. Nalo ajidom m̄lea ka atumolu ka abolkouo joomo ea yimo na volkouano, a tavio ea vio medave nalo, ka tomu nalo amijikia aialo. Vameneano na kulo dolu na, nina ga be mauo, mia maka bunu ajikia avokar vite dolu bereio. <sup>6</sup> Mia ver bogo napano jau kobolkouo, mia bo ka jau kala ka mia jau ga ve takurano kava joomo ea kunuamo yesobi, ea vio na tomu nalo ajikia re ka aialso, mia jau ketetavoko kiamo m̄aratavo, ana mo jau kobolkouo van Karañamo napano naio jo, mia maka toro tai rijikia rial naio. Ana mia Karañamo nene naio ga mijikia rial vite nonovio nalo napano tomu nalo maka ajikia aialio, mia naio rijeve mauo nene vanso riviorio.

<sup>7</sup> “Mia ver bogo napano kamiu kubolkouo, maka rivu ka kamiu kuver iliano ve telabo tibe ka tomu dolu nalo na maka amonea Karañado riano vo. Nalo ajidomii aber mia avokar vaio napano ajum̄a abolkouo kanio, bior nalo aju aber iliano telabo telabo ea kanalo volkouano nalo, mia be deio ga. <sup>8</sup> Mia kamiu kuvila re takii kialo bajago, bior Karamemiu, naio mijikia ruei vite nalo na kumisidomio, bogo napano kamiu maka kuvika vite nalo nei denio vo.

<sup>9</sup> “Bior vite na, memedu ka mia kamiu kubolkouo tibe ka volkouano nei, napano naio berenio, berinavo ‘Karamememi napano jau kojoa vio mave, memedu ga ka tomu nalo atu avatove ka siamo lu.

<sup>10</sup> Kumemi nubolkouo ka kanamo navenatuboiano rimei tumolu tu sikili ea vio yetemeriba nei, ka mia tomu nalo alaio tavukia ga napano jau kojidomio, tibe ka napano nalo na vio mave ajum̄a amilaio.

<sup>11</sup> Aiou, jau kesian van kumemi sememi sinaniano, banei a ea legiano nonovio.

<sup>12</sup> A jau koviekokoa kumemi rivior kenememi kariano nalo, tibe ka kumemi numitum̄a nubiekokoa tomu dolu nalo napano amila vite jorokor ban kumemi.

<sup>13</sup> A jau kajamo ka re vite va nalo na ajukujuku kumemi m̄le, a kovuru bulag kumemi den sim̄aro napano jidom rila lelan kumemi.’

<sup>14</sup> “Bior ver kamiu kuviekokoa tomu nalo na abijuku jorokor ban kamiu, mia Karamemiu na joa vio mave naio riviekokoa kenemiu vijukuano torokoriano nalo bunu.

<sup>15</sup> Mia ver kamiu kuvisaaro re ka kuviekokoa nalo napano abijuku jorokor ban kamiu, mia Karamemiu naio maka rijikia riviekokoa kamiu ka kenemiu torokoriano nalo bunu.”

#### *Yesu berii monduluano*

<sup>16</sup> Ana Yesu berii bunu, berinavo “A bereio, ver bogo napano kamiu kumituvan semiu sinaniano, kuvel ga ka tiniemiu rimaio ka Atua a kuvolkouo vanio, maka kamiu kuvijikia kuvila tibe ka maka kuvisekon miremiu, p̄elina kamiu kuvila miremiu tibe ka jjer tanea kamiu, ka tomu nalo avitilubar tena kamiu kumitum̄a kumilaio. Nina be im̄auano na bova ga na nailikuleiano nalo kialo. Ana verenio nalo ala tibe na, a tomu tai tiniel riialo, nina be kialo vuluiano napano amijikia ajevio rivior kanalo monduluano, mia Atua maka rijikia sian titai vanlo bereio.

<sup>17</sup> “Mia jau, bogo napano ver kumituvan samo sinaniano to tibe na, bo ka jau koyovovua vatitig miramo, tavukia nam̄a jau kojom̄a komilaio julaka ga, <sup>18</sup> ka mia tomu nalo ajikia re vaio napano jau komilaio. Karañamo ga napano jo, maka tomu nalo aialio, mia naio ga rivitilubarior bior naio rial vite nalo napano tomu dolu nalo maka ajikia

aialio, ana na mia naio rijeve mauo nene vanso kanio.”

*Yesu berii puruveru*

*Luka 12:33-34*

<sup>19</sup> Ana Yesu berii bunu, berinavo “Maka rivu ka kamiu kuvitunãa kuvila bijii kenemiu saba novo nalo ea vio yetemeriba nei ka mia kuve tomu na sanibaiano. Bior vio yetemeriba nei be vio na sivinia nalo, a tauo bunu napano mijikia rila bulag kenemiu saba novo nalo, a toro na vinauano bunu napano mijikia rimeiri rivar bulag saba nalo napano kamiu kumiãauka bijon kanio. <sup>20</sup> Mia kamiu monoka kuvila bijii kenemiu saba novo nalo tu mave, ea vio napano sivinia a tauo a tomu na vinauano nalo ajikia re ka amei ala bulag kenemiu saba novo nalo napano kubar batitiglo aju.

<sup>21</sup> “Bo ka kamiu ve kenemiu saba novo nalo vetelabo atua vio mave, bior mia kenemiu iviso rivujo tulaka ea jidomiano nalo na vio napano ga kenemiu saba novo nalo ajuao.”

*Yesu berii lie ka tomu nalo monoka ave viti re*

*Luka 11:34-36*

<sup>22</sup> Ana Yesu berii bunu, berinavo “Toro mirano be vio tai napano yulu binimeiri joomo ea mokotenano. Verver miramo rimeravo rivu, mia komijikia kovitilubar vatitig toro dolu, ka koija naio. Verver kala tibe na, kiamo iviso bujolou ka yulu.

<sup>23</sup> Mia verver miramo rimeravo re rivu, mia maka kojikia kovitilubar vatitig toro dolu, mia koto kovitii kiamo saba nalo ga, ana koto kove viti kalo. Verver kala tibe na, kiamo iviso bujolou ka melijokouo, a ver melijokouo ritoa vio napano memedu ka yulu toaio, nina jau kojoa melijokouo na bobogio mia kiri bobogio laka.”

*Maka toro tai rijikia sel tano ka tubo ve juo*

*Luka 16:13*

<sup>24</sup> Mo Yesu berii bunu, berinavo “Verenio toro ve takurano, naio maka rijikia rimãau buron ea tubo

ve juo ve vaarakurano. Verenio tibe na, mia naio tinien tii tinene, mia naio rilikue ka tinene, ðelina mia naio rudu niono tinene, mia tuvan tinene. Kamiu maka kuvijikia kuvila ka kuve Atua kiano tomu nalo a kamiu kuve tomu na puruveru bunu ka bogo nene ga.”

*Tumãabe ka toro napano jidom laka ka kiano meuliano*

*Luka 12:22-31*

<sup>25</sup> Ana Yesu berii bunu, berinavo “Ka tenene, kiniou neber ka kamiu, maka rivu ka tiniemiu rivujo mñele ka kenemiu imãauano na kuvitigar kamiu nalo, ka mia kuvivika, kuver? Mia releal sado sinaniano vija mñado uei tumãabe, a mia releal mñado kuluniabedo na mia reyaio toko mokotenado tumãabe? Mia jidomiano nalo na biniu kiri torokor laka, bior kenemiu meuliano nalo, naio bo loa sinaniano, mia mokotenemiu nalo, abo loa kuluniabelo. <sup>26</sup> Kamiu kuvial von menu nalo napano mña aju amier janea vio. Mia nalo maka ala tiniavio, a nalo maka avarbijii sinaniano rimeiri vonuo, a nalo maka avar batitig sinaniano tu joomo ea yimo. Mia Karamemiu na vio mave naio baganlo, mia kamu ea mirano, naio mial kamiu kumitu mave loa menu nalo, mia naio monoka rivitigar kamiu rivu lie vo loalo. <sup>27</sup> ? Kamiu kuberiamãa toro tai mijikia rila kiano meuliano na bulati rimeiri ve tebievi kija bereio, bior jomãa jidom mñelea kiano meuliano? Peli ga, maka tibe na, ana bo ka kamiu kuvisidom mñelea re kenemiu meuliano.

<sup>28</sup> “?A bior vaio ana kamiu kumitunãa kumisidom berevereiri ea kuluniabemiu? Kuvisidomii von buruneginiegi nalo napano aju amiluo janea vio ga. Nalo maka aimãau a maka atul mñalo kuluniabelo nalo.

<sup>29</sup> Mia kiniou neber ka kamiu, Parinio Tubo Solomon re nua, napano naio be toro na sanibaiano tai, jumãano bujo ka saba nonovio, mia mñano kuluniabene maka tavukia buruneginiegi nalo

nei m̃alo. <sup>30</sup> Burunieginiieg nalo na abe tena bogoti takurano ga, mia beni ana mia aisebilo ea sebi, mia Atua naio jo miyovovua batitiglo bo laka. ?Ana na kamiu kuberiam̃a naio maka rijikia rivar kenemiu kuluniabemiu van kamiu? !Aa, maka lele garuei kuviekouo ea Atua sikili leleio!

<sup>31</sup> “Bior vite nalo na, mia maka rivu ka kenemiu iviso nalo avujo ka jidomiano nalo na, ka kuvika kuver ‘?Jum̃abe, mia resen venia, romunu venia, a releal kiado kuluniabedo nalo tum̃abe?’ <sup>32</sup> Nao, bogo nonovio ga tomu na maka amonea Atua nalo ajum̃a ajidomii m̃ele vite nalo na jibe na julaka, mia kamiu, Karamemiu napano jo mave, naio mijikia ruei ka monoka kamiu kumisidom ka kuvar vite nalo na. <sup>33</sup> Vite na be moti ka mia kuvisidomii ve toru laka ea kenemiu meuliano, naio be Atua kiano navenatuboiano, vija kiano namemeduano nene nalo. Verenio tibe na, mia naio rivar bunu vite dolu nalo na rivan kamiu.”

<sup>34</sup> “Tibe na maka rivu ka banei, kamiu kuvitum̃a kuvisidomii m̃elea rivior tena legiano na beni. Beni ga, ana mo kamiu kumijikia kuvisidomii tena vio beni, bior legiano na banei, naio be kiano jaleleano nalo telabo ruei.”

## 7

*Yesu berii tibure niegeniegeiano toro dolu*

*Luka 6:37-38,41-42*

<sup>1</sup> Naruei Yesu mil kia ga vo banlo, berinavo “Mia monoka kamiu kuvitibure niegeniege m̃elea re toro dolu. Tibe na, mia Atua naio tibure re kamiu sikili, <sup>2</sup> bior jidomiano napano joa kamiu ka bogo napano m̃a kamiu kumitibure toro dolu, mia jidomiano na ga jibe na joa Atua ea bogo napano mia naio tibure kamiu. Mia kamiu kuvar tibureiano rive verare ga ka tibureiano napano kamiu kumisianio. <sup>3</sup> Maka rivu ka jau kotoñã koververii soro

napano telisu ga joa kuruamo mirano, mia jau maka keial kar ka be burum̃ara bulapati iesi tai napano joa miramo. <sup>4</sup> ?Jum̃abe ana na jau kober komijikia keil van kuruamo na, koberinavo ‘Peli nelelar soro na telisu na monea miramo beamu?’ <sup>5</sup> !Jibe na, jau maka kotoñã kovitilubar kiamo kariano, ana na jau kojom̃a kojiibure kulo dolu nalo kialo kariano nalo! Mia jau kobe toro na ilikuleiano ga. Jau kodular bulapati iesi na den miramo beamu vo, karina mo jau kovitii batitig rivu ea niati soro na telisu na ea toro dolu mirano.

<sup>6</sup> “Maka rivu ka kuvila von ka kuverial Atua kiano Iliano Lu van tomu nalo napano maka asaaro ka ajevio. Nina jibe ka napano kamiu kumitum̃a kubagan kuli deden ka sinaniano novo nalo, naruei bogo napano ajenio bisi, ana mia avilig pariparilo mia nalo aser kamiu bereio. Jibe ga na bunu verenio kamiu kuvisian ijaiano novo nalo van kiribue nalo, mia nalo avie dodomlo ea bulukinia.”

*Yesu berii vikadeniano na vite den Atua*

*Luka 11:9-13*

<sup>7-8</sup> Mia Yesu berinavo “Toro na ver jom̃a bika vite, julaka mia naio mijikia rijeivio, mia verenio toro na jom̃a jirag vite, julaka mia naio mijikia rilealio, mia ver toro na naio jom̃a minia m̃aratavo, julaka mia m̃aratavo nene mijikia rivetavo ka naio. Tibe na, mia kamiu kumijikia kuvar vite nalo nam̃a kumitu kubika den Atua, mia kamiu kumijikia kuvileal vaio nam̃a kamiu kumitum̃a kumisirag denio, mia m̃aratavo nam̃a kumitum̃a kuminia, mia Atua rivetavo ka van kamiu. <sup>9</sup> Verenio kenerimo tai siserio, rivika kiri joko napano jo, mia jau maka kejikia kesian puruveru van naio, <sup>10</sup> p̃elina ver naio rivika batitig ga niado na jo ruei, maka kejikia kodu maro tai van naio ka senio. <sup>11</sup> Riano ka kamiu kube kulo va ga nalo, mia maka kamiu tai rijikia rila

tibe na, kamiu kumitumã kumisaaro damãariga ka kuvisian vite novo nalo van kenerimiu nalo. Jibe na ga, ver bogo napano kamiu kubika vite tai den Karamemiu na vio mave, mia naio jaaro ga ka sian vite novo nene nalo rivan kamiu kenerinio vevinio nalo rivavin ve toru laka vo.

<sup>12</sup> “Bo ka kamiu kuvila rivu van tomu dolu nalo damãariga ea vite na bo nalo, tibe ka ga na kamiu kumisidom tomu dolu nalo monoka ala rivu van kamiu. Iliano nei naruei naio be burupati na iliano nalo na jua tuboiano napano Mosis jirio, bija bunu vaio napano naverialiano re nua nalo aberiio.”

### *Marabo juo ga*

*Luka 13:24*

<sup>13-14</sup> Ana na Yesu berii bunu, berinavo “Be burumãara bulumorouo tai napano betavo laka jo, mia mãarabo nene jagati toru laka be vodobi bo. Mia tomu telabo ajumãa ajakii mãarabo nene, mia mãarabo nei naio ban ea vio na avokar vironiano. Mia kamiu monoka kuvisel ea bulumorouo dolu napano naio kiritavaso. Marabo nene naio jikili, mia maka tomu nalo ve telabo napano ajeliaio, mia mãarabo nei naio be mãarabo na meuliano.”

### *Buruiesi bija mãarati nene*

*Luka 6:43-44*

<sup>15</sup> Ana na Yesu berii bunu, berinavo “Bo ka kamiu kuvitigar vatitig ka tomu nalo namãa aju aber nalo abe naverialiano, mia nalo ajumãa aberloglog vite na be sibiano ga. Bogu napano ajidom averloglog kamiu, abinimei ajibe ka kenemiu bilbilu novo kamliko, napano ea kuluniabelo amomãavo novo ga, jibe ka nunu nalo, mia ea kialo iviso nalo ajavukia kuli deden nalo ga, napano nãa jijerlo ka vite nonovio. <sup>16</sup> Mia kamiu kuvitilubarbarlo ea mãarati na kialo meuliano nalo. Soro napano be niononoti, bija teli nalo napano abe niononoti, maka atumãa avar sinaniano novo pãeli mãarati napano jesei bo. <sup>17</sup> Buruiesi napano jo miluo

bo, naio monoka rivar mãarati na bo, mia buruiesi napano maka riluo rivu, naio monoka rivar mãarati na bova ga. <sup>18</sup> Buruiesi napano jo miluo bo, maka rijikia rivar mãarati na bova, a buruiesi napano maka riluo rivu, maka rijikia rivar mãarati novo nalo. <sup>19</sup> Jibe na naruei, ana buruiesi va nalo nei napano maka avar mãarati novo nalo, mia monoka ate bulaglo ga ana mo avukulo van ea sebi. <sup>20</sup> Jibe na naruei, mãarati napano miyotuba ea toro kiano meuliano, mila meravo ka toro na naio be toro na jumãabe, mia kamiu kumijikia kuvitilubar naverialiano va nalo na ea mãarati va nalo napano amiyotuba ea kialo meuliano nalo.”

### *“Kiniou maka nejikia kamiu leleio”*

*Luka 13:25-27*

<sup>21</sup> Ana Yesu mil berinavo “Tiniobi toru ajumãa abio kiniou, aber ‘!Kiaku Tubo, kiaku Tubo o!’ mia nalo aviniu re napano mia amijikia ava jouro ea Atua kiano navenatuboiano ea vio mave. Toro napano mijikia riva jouro, naio be toro ga napano jomãa mila vite nalo napano Karamãaku naio jidomio. <sup>22</sup> Mia ka bogu napano mia Atua tibure tomu nalo, mia tomu ve miroano avio kiniou, tibe ka kiniou nebe kialo Tubo. Mia averinavo ‘?Tubo, jumãabe ka kumemi? Kumemi numimãauka vite telabo na bo ea siamo, a kumemi nuber bulavulag kiamo iliano, a kumemi numijil bulag simãaro nalo, a numila vremesiano nalo telabo bunu. ?Mia jau maka bunu kosidomial kenememi imãauano novo nalo nene a?’ <sup>23</sup> Mia kiniou neverial kalo rimemedu ga ea miralo, neverinavo ‘Kiniou maka leleio nejikia kamiu bogu tai, napano kamiu kube kiaku. Kamiu tomu na kariano ga. !Kamiu kuvitaluvo den kiniou vonganei!’ ”

### *Yimo juo*

*Luka 6:47-49*

<sup>24</sup> Ana Yesu naio mil berinavo “Tibe na, nalo napano atakii vatitigio tibe ka napano kiniou neberloglog kamiu ruei, mia nalo atavukia toro tai na be masou, napano miñauka kunuano, napano mebija kiano m̃artea nene batove bokar tabaṣilio na jikili. <sup>25</sup> Iorou kanio, ana yuo bovo toru binime, mia ueimia buru vio toru, mia jegi miuvuvu biloulo, midon yimo nei, mia yimo nene maka rijoru, bior toro na yimo nei naio milakar kunuano jo mave ea tabaṣilio. <sup>26</sup> Mia nalo napano maka atakii vatitigio rivu tibe ka nañã kiniou neberloglog kamiu ruei, nalo ajavukia toro tai napano kiano jidomiano kirivova, telikiti napano naio miñauka kunuano, naio bitiri bulag m̃artea nene nalo mave ea bayono ga. <sup>27</sup> Iorou kanio, mia yuo bovo batove, ueimia buru vio toru, mia jegi miuvuvu biloulo midon yimo nei, mia yimo nei mijoru. Mia bogu na naio mijoru, toro nei kiano iñauano binime, bova kitkitio garuei.”

### *Amiilo manenea ka Yesu kiano iliano*

<sup>28</sup> Iorou ka napano Yesu mila nonovio kiano iliano bisi, mia tomu nalo aju amiilo manenea kanio, <sup>29</sup> bior abitii kiano iliano maka tavukia kialo tomu na verloglogiano na tuboiano nalo kialo, mia kiano iliano tomi laka, a jo julu kialo jidomiano nalo, a naio ber bulavulag iliano nalo javukia na moroano joa naio.

## 8

### *Yesu mila toro na bar burumieni tai meravo bo bereio*

*Mak 1:40-45; Luka 15:12-16*

<sup>1</sup> Mia Yesu naio jumolu den suku, napano naio joñã berloglog tomu nalo eaio, naio batove, ana tomu telabo ajakisora naio. <sup>2</sup> Naruei toro tai napano naio bar burumieni binime, vaataro keanio, naio minie kamu kanio, ana balea, berinavo “! Tubo! Kiniou namoneaso ka jau

komijikia kalarur kiniou bereio, ana ver jau kajaaro, nejidom nevika denso ka jau kala tibe na van kiniou.”

<sup>3</sup> Ana Yesu maka rimerou ka tokol toro nei rivior kiano mieiano, mia naio jian juñano, jokolio, ana naio berinavo “Kiniou nejidom jibe na. Neberinavo, mo, niabemo rivu.” Mia vaarakurano ga niabene meravo, mia burumieni nei naio bisi denio. <sup>4</sup> Ana na Yesu berkanio, berinavo “Jau komijog, jau kava koverii re tenei van tomu nalo vo, mia vonganai jau kava koverloglog niabemo ka toro lu, ka naio ria veve niabemo. Karina, jau kava kolotu van Atua, keisebi sida nañã Mosis naio berenio monoka toro rilaiu bior vite na jibe na, mo iorou kanio nina, mia toro lu naio mijikia riverialio river burumieni nei naio bisi.”

### *Yesu mila toro tai na niabene togio m̃aro bo bereio*

*Luka 7:1-10*

<sup>5</sup> Mia bogu na Yesu naio ba jouro ea bulukomeli na Kapeneam, boru na mira tai na vio Romo binime, mialio, naio jegi banio, <sup>6</sup> naio berinavo “Tubo, kiaku naim̃auano tai naio mijoru mon kea ea m̃ano jogu ea kunuaku. Niabene togio m̃aro, a naio mijog bova toru laka.”

<sup>7</sup> Ana Yesu naio berkanio, berinavo “Mo, kito ve juo ravano. Mia kiniou nala naio rijog rivu bereio.”

<sup>8</sup> Mia boru na toro na mira nei naio berdoṣeio, berinavo “Tubo, kiniou maka neve verare ka jau komei joomo ea kunuaku, jibe kanio kiniou maka neve toro Ju, mia ver jau kover iliano tai ga, mia kiniou nemijikia ka mia kiaku toro nene naio mijikia rijog rivu bereio. <sup>9</sup> Mia kiniou nemijikia ka monoka tibe na, bior kiniou nemijikia ka kiamo iliano amije moroano toru. Naio jibe kanio tomu na mira nalo napano aju yetano ka kiniou, napano mia monoka ajogkar kiaku iliano. Ver never ka tai ‘Kavano’ mia monoka rivano, ṣelina never

‘Komei’ monoka rimej, ĉelina never ‘Kala tibe na,’ mia monoka naio rilaio. Mia kiniou bunu monoka nala tena kiaku boru na toru naio berii ka kiniou. Jibe na naruei, ana kiniou nomoneaso ka ver kover ga titai, mia monoka tibe na.”

<sup>10</sup> Mia bogo na Yesu mijogial iliano nei, mila naio miilo toru a naio jaaro toru laka kanio. Naruei naio ber ka tiniobi nalo napano aju naliko, berinavo “Riano ga kiniou neber ka kami memedu, kiniou maka leleio neleal toro tai na vio Israel naio riviekar kiniou sikili tibe ka toro nei.

<sup>11</sup> Mia kiniou neber ka kami neber, maka kulo Ju nalo ga ajikia amei jouro ea jokoluolu na toru ea legiano na maaro. Makanio, mia tomu dolu nalo bunu ve telabo tibe ka toro nei, ea vio dolu nalo ea yetemeriba nei, napano mia amei ka atutano vio takurano ka asinan naliko Epraamo, Aisak, a Yakovo. Mia nalo na atu rivu bogo nonovio tibe na jouro ea Atua kiano navenatuboiano ea vio mave. <sup>12</sup> Mia kulo Ju nalo napano Atua biolo jukamu ka ava jouro, voniganei maka bunu amonmonea kiniou, ana mia Atua rivuku bulaglo ava atu tavio ea melijokouo, ea vio napano tomu ajumã ajegi ajer m̃arjuvolo eaio.”

<sup>13</sup> Naruei Yesu ber ka boru na mira nei, naio berinavo “Mo, bo ga, jau komijikia kava vonuo. Mia rimaluvo kaso tibe ka na jau komoneaio.” Mia memedu ka bogo nene garuei, toro na iñauano nei niabene binimej bo bereio.

*Yesu mieliel ka Pitere koano kenieno*

*Mak 1:29-34; Luka 4:38-41*

<sup>14</sup> Ana Yesu naio jo kia ga Kape-neam, ana naio ban ea Pitere kunuano, mia naio mial Pitere koano kenieno mieyulu, naio jo mon ea m̃ano jogu. <sup>15</sup> Naruei Yesu mijiou jokol tira nene jumãno, ana kiano mieyuluano nei jaluvo denio, ana naio mijog bo jumolu, naruei naio jian sinaniano ban Yesu.

<sup>16</sup> Ea niogoravo na legiano nei, tomu nalo aburu tomu telabo abinimej ea Yesu, napano simãaro nalo ajualo. Naruei naio mijil bulag simãaro nalo nei ea ga kiano iliano, ana naio mila tomu na mieiano nalo bunu amijog bo bereio. <sup>17</sup> Vite nalo nei amaluvo jibe nei ka mia rila Naverialiano Aisea kiano iliano rimej rimaluvo, tibe ka napano naio berenio, berinavo

*“Naio bar bulag kiado mieiano nalo, a naio bar kiado niabe jaleleano nalo bunu.” Ais 53:4*

*Tomu juo ajidom atakisor Yesu Luka 9:57-62*

<sup>18</sup> Ea bogoti dolu bereio, ana Yesu jo naliko tomu telabo napano aju jelliviv ea naio, ana naio jidom taluvo denlo, naruei naio ber ka kiano na-iagagoano nalo, berinavo “Kito m̃a, ravan ea ueiyabo tivelinio.”

<sup>19</sup> Mo nalo abarvio ka mia avano, ana naverloglogiano na tuboiano tai binimej ea naio, berkar ban Yesu, berinavo “Naverloglogiano, mia kiniou natakisorso navan ea vio vabe na jau kavan eaio.”

<sup>20</sup> Ana na Yesu naio berdoĉe banio, berinavo “Kuli deden nalo abe m̃alo ĉili na amon eaio, a menu nalo abe m̃alo niuku. Mia kiniou, Kulorinio Kenerinio, kiniou maka ve kiaku vio tai, ka nava nomonmel eaio. Mia verenio jau kajaaro ka meuliano na jibe nei mia jau komijikia komei.”

<sup>21</sup> Ea bogo nene ga, Yesu kiano naiagagoano dolu bereio berkanio, berinavo “Tubo, jau kajamo ka kiniou nava nevitikar kiaku tormoruo beamu vo, mia verenio bogo tai naio rimãaro ana mia kiniou nemej bereio natakisorso.”

<sup>22</sup> Ana Yesu naio berkanio, berinavo “Komei katakisor kiniou ga. Kotuvan tomu napano niunulo amãaro ruej ka ativin kialo tomu nalo napano amãarmãaro.”

*Yesu berbure burumãara jegi Mak 4:35-41; Luka 8:22-25*

<sup>23</sup> Mia Yesu naliko kiano naiaga-goano nalo abinime i aboru ea ueiyabo nei bisi, ana nalo abavin ea uako tai ea vio na. <sup>24</sup> Nalo aju abano, mia buruñara jegi tai binime i miuvuvu mila ueiyabo nei bieveluo ñele, mila uako nei jikar ka jidom rimadudu. Mia Yesu naio joa uako, mia naio mon ea selailugu monmelio, <sup>25</sup> mia nalo aba amila bonio, nalo aberinavo “!Tubo, keialio! Vaataro ka ramadudu naruei, jau monoka kalarur kito.”

<sup>26</sup> Naruei Yesu naio mil banlo, naio berinavo “!Mm! ?Kam iu kumerou ka venia? Kam iu maka kuvitu sikili ea kiaku moroano leleio.” Karina naio jumolu ju, ana naio mil berbure jegi ber riuvuvu re, naio mil berbure tei, ber rivatove. Ana vio binime i melumu bo.

<sup>27</sup> Bogo napano naiagagoano nalo amial ka vio jubabinio bo jibe na, nalo amiilo toru, nalo aberenio “!Tomu nalo! Toro nei maka garuei, mil ga jibe nei, mia jegi naio tei naljuo amiduio. !Toro na naio maka tibe ka toro na!”

*Yesu mijil bulag siñaro nalo den tomu juo*

*Mak 5:1-20; Luka 8:26-39*

<sup>28</sup> Mo bogo napano Yesu naio boru ea yaba ueiyabo tivelinio, ana naio ban ea kulo Katara nalo kialo vio. Ea vio na, tomu juo amiyotuba ea buluvae nalo na tomu na ñariano nalo, ana naljuo amileal Yesu. Tomu juo nei niadu ban ealo, mia nalo abe deden ñele, ana mila tomu nalo amerou ñele ka ña asel ea ñarabo na. <sup>29</sup> Mia bogo napano nalo amial Yesu, naljuo amiaga jouo, aberinavo “?Jau Atua Kenerinio, kiamo vaio joa kumemi? ?Jau kobinime i ka koje vironiano van kumemi napano maka ve kenememi bogo nene vo, a?”

<sup>30</sup> Ana ea vio na taara na kiribue nalo ajumña amiuoio ea borotano, <sup>31</sup> ana niadu nalo nei ajegi, abika jikili den Yesu, aberinavo “A verenio jau keji bulag kumemi, nuberibo

kaso jau keiila kumemi nuva joomo ea kiribue nalo na.”

<sup>32</sup> Naruei Yesu naio ber kalo, berinavo “Kuvano.” Naruei nalo ajaluvo den tomu juo nei, ana aba joomo ea kiribue nalo neibano. Mia vaarakurano ga, kiribue nalo nei ajikiti, aban ea yabalili tai, ana na ajibirbil abavatove ea ueiyabo nei, abava kovio eaio.

<sup>33</sup> Naruei tomu nalo namña abitkar kiribue nalo nene aburo, aban ea kialo komeli, ana na nalo aberial vite nalo napano maluvo, a aberii bunu vaio napano bokar tomu juo nei napano beamu niadu jualo.

<sup>34</sup> Naruei vaarakurano ga, tomu nalo na komeli nene abinime i ka aial Yesu, mia bogo na amialio, nalo amil jikili ban naio ka naio taluvo den kialo vio.

## 9

*Yesu mijikia biekokoa kariano*

*Mak 2:1-12; Luka 5:17-26*

<sup>1</sup> Ana Yesu naio ban bereio naliko kiano naiagagoano nalo, abavin ea uako nei bereio, nalo abarkor ueiyabo na toru nei bereio, naruei nalo abinime i ea kiano komeli nei Kapeneam. <sup>2</sup> Mia tomu tai añier toro na mieiano tai binime i ea naio napano niabene togio ñaro, naio mon ea ñano jogu. Ana bogo napano Yesu mialio ka nalo amonea jikili ka mia Atua rilarrur toro na mieiano nei, naio ber ka naio, berinavo “Keneriku, jau komerou re. Kiniou nebiekokoa kiamo vijuku vovaiano ruei.”

<sup>3</sup> Ana ka bogo nene tomu tai na verloglogiano na tuboiano nalo bunu aju, mia amijog Yesu kiano iliano nalo nei. Soñeli ga nalo aberii naio banlo, aberinavo “Toro na mil mila bulag tolu na Atua siano. Naio jo mil jibe na jibe ka naio be Atua ruei.”

<sup>4</sup> Mia Yesu bitilubar kialo jidomiano nalo, naruei naio berinavo “?Ka vaio ana kenemiu jidomiano bujo ka sidom vovaiano jibe na? <sup>5</sup> Ver kiniou never tibe na ka toro na, never ‘Kiniou nebiekokoa kiamo

vijuku vovaiano nalo,' p̄eli na never kanio, never 'Jau kotumolu keiel,' mia iliano juo nei, tinene jikili ka averenio, a tinene naio monmaio ka averenio. Nina iliano na napano naio berinavo 'Jau kotumolu, jau keiel,' naio jikili laka, bior tomu nalo amijikia avitulubar ka toro nene jumolu p̄elina maka tumolu. <sup>6</sup> Mia kiniou neim̄auka titai napano mia kamiu kuvisidomii kuver Atua naio ga takurano mijikia rilaido, bior kiniou nejidom nala rimeravo van kamiu ka Kulorinio Kenerinio naio bare ka riviekokoa kariano ea yetemeriba nei." Naruei Yesu mil ber ka toro na mieiano nene, naio berinavo "Jau kotumolu, jau kojuku m̄amo jogu, jau keiel kava vonuo." <sup>7</sup> Ana toro nei naio jumolu jibe na, ana naio ba vonuo.

<sup>8</sup> Telikiti na tiniobi nalo nei amialio vite nei nalo amerou, a nalo abamenea Atua, bior naio mijamo ka moroano ban toro tai ka naio mijikia rila tibe na.

*Yesu bio Mataiu binimej jakisor naio*

*Mak 2:13-17; Luka 5:27-32*

<sup>9</sup> Mia Yesu naio juvan vio na, naio miel kija ga ba lie bano. Naio jo miel bano, ana naio mial kiniou nojom̄a nojotano ea kanaku vio na im̄auano. Mia kanaku im̄auano ea bogo na, nojom̄a nabarbijii puruveru na takis. Naruei Yesu bio kiniou, naio berinavo "Mataiu, jau komei katakisor kiniou." Mia kiniou nojumolu soṗeli, najakisor Yesu.

<sup>10</sup> Karina Yesu binimej jinan ea kunuaku, ana ea bogo na noburu tomu telabo na abarbijii takis, bija kulo va dolu nalo telabo bunu abinimej, ka amijikia atutano asinan burukuti naliko Yesu naliko kiano naiagagoano nalo. <sup>11</sup> Ana na Varisis nalo tai amial ka napano Yesu jo vio takurano naliko tomu nalo nei, ana abika den kiano naiagagoano nalo, aberinavo "?Ka venia aṇa kenemiu naverloglogiano naio jom̄a jinan burukuti vio takurano jibe na naliko tom na bova na?"

<sup>12</sup> Mia Yesu naio mijog kialo iliano nei, ana na naio berdoṗe banlo, berinavo "Tomu na niabelo jikili bo, nalo maka asidom toro na kulekuleiano, mia tomu na abar mieiano, nalo ajidom naio. <sup>13</sup> Bo ka kamiu kuvisidomii nioti na iliano tai napano joa Iliano Lu, napano Atua naio berenio, berinavo

'Kiniou maka nesidom kenemiu sida nalo  
mia kiniou nejidom tinievuiano toa kenemiu meuliano nalo.'  
Kiniou maka nemei ka novio nalo napano ajidomii aber nalo abe tomu na amemedu rui, p̄eli ga, mia kiniou nebinimej ka novio tomu na bova nalo ka atakisor kiniou."

*Vikadeniano tai tivelinio ka monduluanu*

*Mak 2:18-22; Luka 5:33-35*

<sup>14</sup> Iorou ka vite na, naiagagoano nalo na Jone Baruei kiano abinimej ea Yesu, nalo abika denio, aberinavo "Kumemi numisidom jau koverial vite na ka kumemi. ?Kumemi numondulu damariga ka nubolkouo, mia Varisis nalo bunu amila jibe na, mia bior vaio ana kiamo naiagagoano nalo maka alaio?"

<sup>15</sup> Ana Yesu naio berdoṗe banlo, berii naio naliko naiagagoano nalo, jibe kanio napano nalo ajaaro toru laka bogo napano naio jo naliko, mia monoka nalo ajog rivova iorou ka bogo napano mia naio taluvo denlo, ana naio berinavo "?Bogo napano toro napano naio joro jo kia ga vo ea jokoluolu naliko kiano bilbilu nalo, kamiu kuberiaṇa amijikia ateg rivior naio? Peli ga. Mia bogo tai, verenio toro nei kiano uolu tai amei avurular naio den kiano bilbilu nalo, ka bogo na naruei mia nalo amijikia amondulu ka sinaniano bior nalo amijog bova toru."

*Vite vou a vite moruo*

<sup>16</sup> Bajago na monduluanu, naio be bajago moruo tai na nalotuanu na kulo Ju nalo kialo, mia Yesu naio jidom rila rimeravo vanlo ka bajago moruo na jibe na, maka ajikia

aviran rivija vite vou nalo napano naio jomã jiloglog kalo, ana naio jii jamerijiano tai tivelinio banlo, naio berinavo “Jau maka kejikia kodu niati kulumãarauo napano be terivou, ka jau kotuluko ka kulumãarauo moruo tai ka toko vio na buruþe. Bior niati kulumãarauo vou nei, naio mijikia rila korov kulumãarauo moruo na togio, ana na mia bulujeleigio rimei ve toru lie vo. <sup>17</sup> Ana na jau maka kejikia koi-son m̃arjum̃elm̃elu vou napano naio jomã jarabujo kia ga vo ea kulukuti nani napano be terimoruo napano amison m̃arjum̃elm̃elu ea va telabo rui. Verenio jau kala tibe na, mia m̃arjum̃elm̃elu nene riyukuio, rila kulukuti nani nene rivuruþeio, naruei ana m̃arjum̃elm̃elu nene riou bulagio, ana kulunani nene rimei rivova bunu. Mia m̃arjum̃elm̃elu vou, jau monokanio koisonio rivan ea kulukuti nani napano be terivou, jikili bo, ana na jau komijikia kodu vatitig m̃amo m̃arjum̃elm̃elu toaio.”

*Yesu mieliel ka tiramoruo tai bija tira sesa tai*

*Mak 5:21-43; Luka 8:40-56*

<sup>18</sup> Bogo napano Yesu naio jomã mil jibe na ban Jone kiano naiagagoano nalo, toro na toru tai na nalotvano na kulo Ju nalo kialo naio binimej vaataro keanio, naio minie tano ka Yesu, jegi banio, berinavo “Aue koig keneriku vevinio naio m̃aro vonganei ga, mia kiniou nebikaso ka nejidom komei, kodu jumãamo toaio, ka mia naio rimeul bereio.” <sup>19</sup> Naruei Yesu jumolu jakisor toro nei, naio naliko kiano naiagagoano nalo abano.

<sup>20-21</sup> Mo bogo napano Yesu naio jo miel ban jibe na, naruei tira tai naio jo napano mieiano na jada joa naio mila ka legiano nonovio ga, bokar yuka duelimo ba juo [12] rui. Naruei naio mial Yesu jo binimej, naio jo ber ea kiano iviso, naio berinavo “Ver kiniou notokol ga kiano kulukoti, mia kiaku mieiano taluvo den kiniou.” Naruei tira nei binimej

iorou ka Yesu taakano, ana naio jokol juluvati na kiano kulukoti.

<sup>22</sup> Soþeli ga Yesu bariþiligio, mial tira nei, ana naio berkanio, berinavo “Nena, jau komerou re. Kiamo viekouoiano ea kiniou burumeuliaso bereio.” Naruei memedu ka bogo na, mieiano nei naio jaluvo den tira nene.

<sup>23</sup> Telikiti napano Yesu naio boru ea toro na toru nei kunuano, naio mial tomu nalo aju tiniel miia tira sesa nei, ajumã ajegio, amiou ka iou na m̃ariano nalo. <sup>24</sup> Naruei naio mil banlo, berinavo “Kamiu kuvatavio kuviel dedade bereio. Tira sesa na naio maka rimaro na, mia naio monmelio ga.” Mia nalo na amiyotel ea naio, abital ea ga.

<sup>25</sup> Naruei nalo amiila bulag tomu nalo nei abatavio, ana Yesu naio ba joomo ea yimo. Naio ba bokar tira sesa nei jumãano, ana naio jumolu, meul vatitigio bereio. <sup>26</sup> Naruei lilianiano na tenei buro janea vio ninio, bokar vio reraio jeliviv ea vio nei.

*Yesu milarur merebono juo*

<sup>27</sup> Mia Yesu naio jaluvo den toro na toru neibano kunuano, mia bogo napano naio jo miel bano, mia merebono juo ajakisorio, nalo ajumã abio naio, aberinavo “!Jau tormoruo Teviti kiano bajulukuti, jau kobe Naverikariano, aui koig, tiniem riia kumemi juo liki!”

<sup>28</sup> Ana Yesu ba joomo ea yimo tai, naruei merebono juo nei abinimej ea naio. Naruei Yesu naio bika denlo, berinavo “?Kamjuo kumonea ka mia nemijikia nalarur kamiu tibe na?”

Ana tomjuo nei aberdoþe, aberinavo “Nao Tubo, kumemi numoneaio.”

<sup>29</sup> Ana Yesu mije jumãano monea tomjuo nei miralo, ana naio berinavo “Mia rimei tibe ka na kamjuo kumoneaio.” <sup>30</sup> Ana na tomjuo nei miralo binimej bo bereio ea aura nene. Naruei Yesu berburelo jikili, naio berinavo “Mia kamiu kuverial re tenei van tomu dolu nalo.” <sup>31</sup> Mia

abe juo abatavio, ana aberial liliani-ano nei ka vaio napano Yesu milaio banbano-o bokar nonovio vio reraio nei biniu.

*Yesu mijil bulag niadu den buru tai*

<sup>32</sup> Telikiti na naljuo nei abatavio, mia tomu dolu nalo aburu toro tai binimei ban Yesu. Toro nene niadu ban ea naio, mila na naio be buru maka rijikia ril. <sup>33</sup> Mia Yesu jan ka niadu nei jaluvo den naio, ana toro nei naio mijikia mil bo naruei, mia tiniobi nalo nei amiilo toru kanio, aberenio aberinavo “Uerei, maka leleio reial titai tibe nei kija ea kito kulo Israel-o, mia banei ga.”

<sup>34</sup> Mia Varisis nalo aju aberenio, aberinavo “Tete na naio joña jan ka niadu nalo jibe na ea ga moroano napano siñaro nalo kialo parinio tubo ga mijamo ka ban naio.”

*Yesu tinien miia tomu nalo*

<sup>35</sup> Ana Yesu naio jo miel jeliviv ea komeli nalo a naio joña berloglog tomu nalo ea kialo yimo na volkouano nalo. Naio joña berial lilianiano vou na Atua kiano navenatuboiano, mia naio milarur tomu na mieiano nalo a tomu na nia-bele nalo bova bunu. <sup>36</sup> Mia bogo napano naio joña miel jeliviv jibe na, naio jo mial tiniobi nalo, naio mialo jibe ka kialo jidomiano nalo bujo laka a nalo abokar jaleleano telabo laka ea kialo meuliano nalo, naruei naio tinien miialo toru laka, bior ajavukia nunu nalo na maka ve kialo toro na vitikariano tai, maka ajikia bunu ka mia atumabe naruei. <sup>37</sup> Naruei naio ber ka kiano naia-gagoano nalo, berinavo “Riano ga, mñarimeuano toru meruo jua tini-avio, mia maka tomu ve telabo na aju ka mña abarvario binimei vonuo. <sup>38</sup> Kamiu monoka kuvalea sikili ea tubo na tiniavio nei, ka mia riila bulag tomu tabunu avan ka avar kiano sinaniano nalo rimei.”

9:34 Mat 10:25, 12:24; Mak 3:22; Luk 11:15  
6:34 9:37 Luk 10:2

## 10

*Yesu kiano naiagagoano nalo*

*Mak 3:13-19; Luka 6:12-16*

<sup>1</sup> Naruei Yesu bio kiano naia-gagoano duelimo ba juo [12] ka amei aialio. Nalo abinimei, ana naio mil batitig banlo, bisi na mije moroano banlo ka mia amijikia atitig bulag niununo va den tomu nalo, a ka amijikia aieliel ka tomu nalo napano mña amie ka mieiano dedade nalo bunu.

<sup>2</sup> Atevi nalo sialo nalo nei:

nana jukamu, Saimon, napano abio ka Pitere, napano naio be kialo toro na toru, a Adru, napano Pitere kuruano; Yemesi naio kuruano Jone, napano Sepeti kenerinio nalo;

<sup>3</sup> Vilip;

Bartolomio;

Tomas;

kiniou Mataiu, napano nebe toro na var bijii takis;

Yemesi napano Alveas kenerinio;

Tateas;

<sup>4</sup> Saimon, napano naio mila poletik mñele laka ka jidom rijil bulagio kulo Romo nalo;

a Jutas na vio Kariot, napano mia iorou kanio ana naio jiveluku ka Yesu ban kulo va nalo.

*Yesu miila bulag kiano atevi nalo*

*Mak 6:7-13; Luka 9:1-6*

<sup>5</sup> Mia Yesu naio mil batitig ban nalo duelimo ba juo [12] nei, karina naio miila bulaglo abano. Ili-vatitigiano napano naio berii kalo, nainei, naio berinavo “Mia kamiu kuvan ea re nalo napano maka ave kulo Ju nalo, a kamiu kuvan ea re mñarkomeli nalo na vio Sameria vo. <sup>6</sup> Kamiu kuvan rivior ga nunu nalo na vio Israel napano amilaluv mñarabo. <sup>7</sup> Mia ver bogo napano kamiu kuvan ka nalo na, mia kamiu monokanio kuvioliolu, kuverinavo ‘! Vonganei be bogo na mia Atua kiano navenatuboiano naio jo binimei ea

9:35 Mat 4:23; Mak 1:39; Luk 4:44

9:36 Mak

kito!’<sup>8</sup> Mia monokanio kamiu kuvieliel ka namieiano nalo, a kamiu kuvurumeulia tomu nalo napano amãarmãaro ameul bereio. Kamiu kuvilarur nalo napano burumieni milalo, niabelo ameravo bereio, a kamiu monokanio kuvititig bulag niadu nalo ea tomu nalo. Imãauano nalo na, mia kamiu kuvimãau kanio ea moroano tai napano kamiu kumijev kurano ka ga, ana mo mia kamiu monokanio kuvisian kurano ka ga bereio van tomu nalo.<sup>9</sup> Mia kamiu kuvar re kenemiu puruveru tai vija kamiu ea kenemiu siveu nalo,<sup>10</sup> kamiu kuvar re kenemiu basaro tai napano mĩa kumison kenemiu kuluniabemiu dolu nalo vija kulubue na jaamiu dolu bunu ban eaio, a kuvar re kenemiu iesi na abanio vija kamiu kuvano. Tomu nalo napano mĩa amila imãauano novo jibe ka kamiu, mia tomu nalo napano nalo nei amimãau kanalo, monokanio mia nalo avitikal vatitiglo.”

<sup>11</sup> Ana Yesu berii bunu, berinavo “Bogo napano verenio kamiu kuva kuvoru ea mĩarkomeli tai, mia monokanio kamiu kuvisirag toro tai napano naio jaaro ka rivurukar kamiu ka kuvitua kunuano, ana mo kuvitu vija naio rivano-o rivokar bogo napano mia kamiu kuvituvan mĩarkomeli nene bereio.<sup>12</sup> Avena verenio bogo na kamiu kuvan kuvitu vija mĩaratavo na toro nei kiano, monokanio kamiu kuvan jumemiu kamliko, kuver kalo, kuver ‘Tumãaro to vija kamiu.’<sup>13</sup> Avena verenio mĩaratavo nei avijuku rivu ka kamiu, mia kenemiu tumãaro napano kamiu kuber kanio mia naio to vijalo, mia ver avijuku rivu re van kamiu, mia tumãaro nei rimei bereio vija kamiu.<sup>14</sup> Mia ver tomu tai ailkue ka avurukar kamiu ea kunualo, mia ver ailkue ka aiagago ka kamiu, mia kamiu kuvituvan mĩaratavo nene p̃elina mĩarkomeli nene to. Mia bogo na kamiu kuvituvan vio nene, ana

mo kuvijuba kon yeve ea jaamiu, tibe ka kenemiu iliano na jikili tai banlo ka mia avokar vironiano tai napano memedu ga ka kialo bajago va nalo.<sup>15</sup> Riano kiniou neber batitig ban kamiu, mia sikili lie vo van nalo na ea bogo na tibureiano, tovulu bogo napano Atua naio jibure kulo Sotomo bija kulo Komora nalo nanua beamu.”

*Mia tomu nalo ajil Yesu kiano naiagagoano nalo*

*Mak 13:9-13; Luka 21:12-17*

<sup>16</sup> Mia Yesu naio berii kalo, berinavo “Kamiu kuvisidomii vatitig rivu. Kiniou nemiila bulag kamiu ka kuvano, mia kamiu kuvano jumemiu yauo ga tibe na, napano kuvitibe ka nunu nalo napano aju iviso ka kuli deden nalo. Tibe na, monokanio kamiu kuve masou rivu, a monokanio kamiu kumelumumu vatitig rivu.<sup>17</sup> Bo ka mia kamiu kuvitikal vatitig kamiu rivu, bior mia tomu nalo avuru kamiu kuvan ea komeli a ea kialo yimo na volkouano ka ail van kamiu, ana na mia atibure kamiu a mia avitiv kamiu.<sup>18</sup> Mia avuru kamiu kuva kuvitumolu kuvitu kamu ea tomu na tortoru nalo na buruvenuo miralo, kar ga kamiu kube kiaku naia-gagoano nalo, mia ka bogo nene mia kamiu kumijikia kuverial kenemiu moneano na ea kiniou kamu ea nalo na miralo, a kamu ka nalo na maka amonea Atua miralo.<sup>19</sup> Mia ka bogo na nalo amei avuru kamiu, bo ka mia niukniuku rivie re kamiu m̃ele, kuver ‘?Mia neil tumãabe, a never venia vanlo?’ bior mia Niununo Lu naio sian iliano van kamiu ka mia kuverialio, rimemedu ka bogo na iliano.<sup>20</sup> Ana bogo napano kamiu kuvil, mia ve re kenemiu iliano, mia ve Karamemiu kiano Niununo na naio mil ea kamiu.

<sup>21</sup> “Ea bogokouo na, mia toro mijikia rijamo ka kulo va dolu nalo amei avurular kuruano kar garuei, p̃elina kenerinio kar garuei, ka mia auebinvinlo amãarmãaro, nina bior

ka napano nalo amonmonea kin-iou. Mia kiritete nalo bunu amijikia atumolu, ka averial karamalo kenielo nalo napano amonmonea kiniou, ka mia amarmaro tibe na bunu. <sup>22</sup> Naruei mia tomu nalo tiniel tii re kamiu, mia atupe kenemiu iliano ka kamiu napano siaku jua kamiu, mia ver toro napano riviekouo damariga rivano-o rivokar bogokouo nei ribisi, mia Atua rilarrur naio. <sup>23</sup> Bogo na ver tomu nalo ala baravo ka kamiu ea komeli tai, mia kamiu kuvuro kuvan ea nana lie kanio, mia verenio nalo ala baravo ka kamiu ea vio na, monokanio kamiu kuvuro bereio. Riano kin-iou neber ka kamiu, mia kenemiu inauano riviniu re vo ea markomeli nalo nonovio na vio Israel nei vo, mia kiniou Kulorinio Kenerinio, nemei bereio.”

<sup>24</sup> Mia Yesu berenio “Naiagagoano, naio maka rijikia to loa kiano naverloglogiano, mia toro na inauano, naio maka rijikia to loa kiano tubo. Tibe na, mia kamiu monokanio kuvividomii re kuver mia sikili re van kito bogo tai, <sup>25</sup> bior bajago na jikili napano mia ala ka naverloglogiano, mia ala ka naiagagoano bunu, a vite kouo napano ma tubo rivokario, mia kiano toro monokanio rivokario bunu. Jibe ka tomu nalo abio niegeniege kiniou, napano kiniou nabe tobu ka kiaku maratavo, aberinavo kiniou nebe Belsabel, napano nina be sio na tubo na simaro nalo kialo, mia amijikia avio niegeniege kamiu rivova lie vo, kamiu napano kube kiaku maratavo nalo.”

*Yesu kiano naiagagoano nalo maka ajikia amerou ka tomu*

*Luka 12:2-7*

<sup>26</sup> Ana Yesu berinavo “Bior mia ail rivova ka kamiu tibe ka ga na amil bova ka kiniou, mia kamiu kumerou re kalo. Vite va nonovio na tomu nalo ajuma amila luklukuaio, pelina aber vavania, mia amalmaluvo amei

medave navo, ka tomu nonovio amijikia ajikiaio. <sup>27</sup> A kamiu bunu, vite novo nalo napano nojoma neber ka kamiu ea burumelijo, kamiu monoka kuverialio bereio ea mi-amoiانو, a vite nalo nama kiniou nojoma nomijuvaluva kanio ea burutiliniemiu ga, monokanio kamiu kumadu ka bereio ea tomu nalo miralo, ka tomu nalo aviniu amijikia ajogio.

<sup>28</sup> “Kamiu kumerou re ka nalo na amijikia auetamaria mokotenemiu, bior napano nalo maka ajikia auetamaria niunumiu, mia monokanio kamiu kumerou ka ga Atua, napano naio mijikia rila lelan mokotenemiu vija niunumiu ea vio na jogvaiano. <sup>29</sup> Kuvialio, menu nalo napano sialo kirijako, nalo miroano laka, aju janea vio, mia apilivili kanio puruveru telisu ga ka juo, mia ver nalo tai rijoru ea borotano, Karamemiu naio rijikiaio. <sup>30</sup> A vijumiu nalo na pariparimiu nalo, nalo miroano laka bunu, mia Atua bulukuio nonovio abeve terakurano, naio mijikialo. <sup>31</sup> Naruei, kamiu maka kuvijikia kumerou mele, bior naio mial kamiu kubo loa kirijako nalo nei, mia naio rivitkar vatitig kamiu ka vite nonovio nalo ea kenemiu meuliano nalo.”

*Toro napano berial ka naio be Yesu kiano*

*Luka 12:8-9*

<sup>32</sup> Ana Yesu berinavo “Toro napano riverial ea tomu nalo miralo, riverinavo naio be kiaku toro tai, toro na, mia kiniou bunu neverial ea Teta na joa vio mave mirano never toro na naio be kiaku. <sup>33</sup> Mia toro napano naio riverial naio ea tomu nalo miralo riverinavo naio maka ve kanaku, mia kiniou bunu neverial naio kamu ea Teta na joa vio mave neverinavo naio maka ve kanaku.”

*Yesu be burupati ka tupeiano*

*Luka 12:51-53*

<sup>34</sup> Ana Yesu berinavo “Kamiu kuvividomii re kuver kiniou nebinimei

ka nala burum̃ara tum̃aro ve toru toa vio yetemeriba nei. Makanio, mia kiniou maka nemei ka nodu tum̃aro toaio, mia kiniou nebinime i bija iobogu na mira tai, napano mia tomu nalo ala baravo a ala mira rivior kiniou. <sup>35</sup> Mia kiniou nebinime i ka nala m̃eaku nalo atupe karam̃alo nalo, a merevono nalo atupe kenielo nalo, a tira m̃eaku nalo napano ajoro vonga, mia atupe kenielo simemi nalo. <sup>36</sup> Mia nalo nam̃a tiniel mimi toru julaka ka kiaku naiagagoano nalo, nina maka ve kulo dolu nalo, mia nalo na abe kialo m̃aratavo ga nalo.”

*Yesu jo jukamu garuei ea kiano naiagagoano nalo kialo meuliano*

*Luka 14:26-27*

<sup>37</sup> Ana na Yesu naio berinavo “Verenio toro tai na naio jidom kenieno toru laka, pelina karam̃ano, pelina kenerinio, tuvulu napano naio jidom kiniou, toro na naio maka rijikia rime i rive kiaku naiagagoano. <sup>38</sup> Mo verenio toro tai rudu re kiano m̃akolkolo, ka takisor kiniou, tibe ka napano naio maka rijamo ka naio ka rijog rivova kar kiniou, toro na maka rijikia rime i rive kanaku naiagagoano. <sup>39</sup> Verenio toro tai tom̃a sidom m̃elea kiano meuliano, toro na mia rilaluvu kiano meuliano. Mia verenio kiaku naiagagoano tai rilaluvu kiano meuliano bior naio be kiaku, mia naio mijikia rivokar meuliano napano maka rijikia ribisi.”

*Nalo napano avitkar vatitig naiagagoano nalo, mia ajev kialo mauo nene*

*Mak 9:41*

<sup>40</sup> Ana na Yesu berenio, berinavo “Verenio toro tai rivuru kami u kuva joomo ea kunuano, nina jibe ka ga napano naio buru kiniou ga naba joomo ea kunuano. A verenio toro tai rivuru kiniou nava joomo ea kunuano, nina jibe ka ga napano buru naio napano miila kiniou nebinime i, naio ba joomo ea

kunuano. <sup>41</sup> A verenio toro tai rivuru naverialiano tai pelina toro na memedu tai tibe na rivan ea kunuano, bior naio mijikia ka toro nei naio be toro lu tai na Atua kiano im̃auano, mia naio rivokar mauo na ga napano mia Atua rivar van kiano tomu na tortoru nalo nei. <sup>42</sup> Kiniou neber vatitig ban kami u, ka verenio toro tai rije baja na uei menini ga van kanaku naiagagoano tai, napano naio maka sidomii river naiagagoano na naio be toro na toru tai, pelina naio be toro kurano ga, mia toro nene rije v kiano mauo tai rivior vite novo napano naio milaio ban kanaku toro neibano.”

## 11

<sup>1</sup> Naruei bogo na Yesu mil batitig ban kiano naiagagoano nalo due limo ba juo [12] nei bisi, ana naio jumolu den vio nei, naruei naio ban ka riverlogloglo a rioliolu vanlo ea komeli nalo na vio Kalele.

*Jone Baruei kiano naiagagoano nalo abinime i*

*Luka 7:18-23*

<sup>2</sup> Kanio bogo nei, Jone Baruei joa yimo na tetavokoiano, a naio mijog lilianiano na im̃auano nalo napano Kristo jom̃a miñau kalo, naruei naio miila kiano naiagagoano teal o, <sup>3</sup> abano abika den Yesu, aberinavo “?Jum̃abe? ?Jau kobe toro na aju m̃a aberiio na nanua ruei aberinavo mia toro na toru tai naio rime i ka rivurim̃arabo ka kito, pelina jau maka kove toro nene kiana navo, ana monoka kumemi nuviturorea toro dolu bereio vo ka mia naio rime i?”

<sup>4</sup> Naruei Yesu berdope banlo, berinavo “Kami u kuvan bereio, kuvial Jone, ana kami u kuverial vanio vite nalo napano kami u kumial napano kiniou nomim̃aukalo ea vio nei, a vite nalo na kumijog aberi i ban kami u ea kiniou, jibe ka vite nalo napano Naverialiano Aisea beriio na nanua ruei, napano naio berinavo:

**10:38** Mat 16:24; Mak 8:34; Luk 9:23 **10:39**

**10:40** Luk 10:16; Jon 13:20, Mak 9:37; Luk 9:48

Mat 16:25; Mak 8:35; Luk 9:24, 17:33; Jon 12:25

5 *‘Merebono nalo, ajirarag bereio ruei,  
a nalo napano abe jaba milalo a  
abe javuluku milalo, vonganei  
amiel bereio ruei,  
a nalo napano burumieni milalo,  
vonganei niabele binimej mer-  
avo bo nonovio bereio ruei,  
a nalo napano abe bulubau nalo, von-  
ganei amijog vite bereio ruei,  
a nalo napano amãarmãaro, von-  
ganei nalo amemeul bereio  
ruei,  
a nalo napano abe taliãasa, von-  
ganei kiniou nojomãa neberial  
Lilianiano Vou banlo ruei.’  
Ais 35:5,6*

6 “A kamiu kuva kuver ka Jone bunu, kuver ‘Toro napano maka leleio kiano jidomiano riveve juo ea kiniou bogo tai, mia ilivuiano rimej van naio.’”

*Yesu jukunu ka Jone Baruei  
Luka 7:24-30*

7 Bogo napano Jone Baruei kanano naiagagoano nalo ajumolu ka avan bereio, Yesu berii Jone nene ban tomu nalo, berinavo “?Bogo napano kamiu kubatavio ea vio yauo na beamu, kamiu kuban ka kuvial venia? !Maka ve tinieku ka kamiu kuban ka kuvial javiniu nalo napano jegi jomãa buku biliviliglo janea vio julaka ga! 8 A kiniou maka ve tinieku bunu ka kamiu kuban ka kuvial toro na toru tai napano naio miya kuluniabele maraiu, bior tomu na jibe na nalo maka ajikia atua vio na miagiago jibe ka vio yauo kurano ga na, mia nalo bogo nonovio ajua yimo novo na tubo na toru kunuano. 9 ?Makanio, mia kiniou neber ðeli kamiu kuban ka kuvial naverialiano tai, a? Mo nina bo ga, mia kiniou neber ka kamiu, neberinavo toro napano kamiu kumitumolu ka kuva kuvial naio, naio toru lie, juvulu naverialiano re nua nalo, 10 bior Atua naio berii Jone nene ea kiano Iliano Lu ruei, naio berinavo

*‘Kiniou nemiila kanaku naveri-  
aliano jukamu kaso, ka naio*

*rila vatitig kanamo mãarabo.’  
Malakai 3:1*

11 “Riano, kiniou neber ka kamiu, neberinavo ea vio yetemeriba nei, Jone Baruei naio jo mave loa tomu dolu nalo abiniu. Mia nalo aviniu napano mia amej joomo ea nave-natuboiano na Atua kiano, riva rivokar toro na maariano kalo nana jotano laka garuei, nalo na naruei aviniu atu mave loa Jone, ka mia nalo avar ilivuiano na Atua kiano tuvulu Jone. 12 Jikario ea bogo napano Jone Baruei jikar ka mãa mioliolu, binimej bokar banej, tomu nalo ajumãa amilidie navenatuboiano na Atua kiano, a uolu kouo na mira nalo bunu ajumolu mãa amila vio ka atuvulio. 13 Be bogo binimej bokario bogo na Jone, naverialiano nalo a Mosis kiano tuboiano napano naio jirilo, aberial vite telabo napano mia amijikia ayotuba iorou. 14 A verenio kamiu kumisaaro ka kumonea vite nalo nei napano mia ayotuba iorou, mia kamiu kumijikia kuvitilubar ka kuver Jone Baruei naio be Elaija na nanua aberkario nua ruei ka mia naio rimej bereio. 15 A verenio be tiliniemiu, bo ka kuviagago vatitig ka kiaku iliano nei.”

*Yesu mil kilkil ban taara nalo na  
ea kiano bogo*

*Luka 7:31-35*

16-19 Ana na Yesu mil lie vo, berinavo “? Mia kiniou nemijikia never iliano vaio ka mia rivokar bajago na tomu na vonganei? Ea mãarabo nonovio napano Atua milaio ka rila von ka mia rivu ka kamiu, mia kamiu maka lele kuvisidomio, kamiu kumitu bereio mãa kumil niegeniege naio biorio. Bior bogo napano Jone naio jo, naio jomãa mondulu ka sinaniano ka tomãa rivolkouo, a naio jo bel bunu ka mãarjuãelãmelu, ana tomu nalo ami-alio jibe na, ana nalo amiila naio, aber ‘Tete na niadu jua naio.’ Mia bogo napano Kulorinio Kenerinio naio binimej jo, naio jinan batitigio a naio munu batitigio, ana

nalo amil ea naio, aber 'Kuvialio vo, toro na naio be toro na jinan m̃ele, a miokovo ka sinaniano julaka, a naio be toro na munu m̃elea m̃arjũm̃el̃m̃elu, a naio be toro tai napano kiano bilbilu nalo abe tomu na abarbijii takis a tomu na bova ga nalo.'

"Ka tenene, kiniou nemial kamiu tomu na vio banei, napano kamiu kuvitibe ka kiritete nalo napano ver ajuṃa ajerjere ea vio medave na komeli, mia nalo atu aviovio van kialo bilbilu sesa nalo, aver '!Oi, kamiu kubova ga! Verenio kumemi numitu numue bulaiu, mia kamiu maka kuvisidom kuvolu vija kumemi, a verenio numiou ka iou na m̃ariano, mia kamiu maka kuvisidom kuviteg vija kumemi.'

"Mia vite nonovio napano amal-maluvo ea Atua kiano masouano, beamu tomu telabo amilikue keanio, mia iorou ana mia naio rila rimeravo ka masouano nei keano, naio memedu ga a be riano laka."

*Yesu berkakar vatitigio bo ban nalo napano maka amonea naio*

*Luka 10:13-15*

<sup>20</sup> Naruei Yesu mil berkakar ban tomu nalo na ea komeli nalo napano naio miṃauka burutomoluo telabo kalo, bior nalo amial kiano vite nalo nei, mia nalo maka leleio aviliglo.

<sup>21</sup> Naio berenio "!Kulo Koresin nalo, naliko kulo Betsaeta nalo, kamiu kumila lelan kamiu toru laka! Verenio kulo Taia naliko kulo Saiton nanua aial burutomoluo nalo nei napano kamiu kumialio nei ruei, mia nalo aviliglo nua ruei. Nalo maka ave kulo Ju, mia aya kuluniabelo na be m̃adati a mia nalo avisivisii buluṃaroro ea pariparilo ruei, ka tomu nalo avitilubarioro ka nalo amijog bova riano bior kialo kariano nalo. <sup>22</sup> Kiniou neber ka kamiu memedu, ea bogo na tibureiano, mia kenemiu vironiano tovulu nana ve kialo.

<sup>23</sup> "!A kamiu kulo Kapeneam, napano m̃a kumituṃa kubarvar ka kamiu, a kumisidom kuvitu mave

laka, mia kamiu kuvitkar kamiu! Mia Atua naio rivuku kamiu kuvatove laka ea bulukusebi. A verenio kulo Sotomo nalo aial burutomoluo nalo napano kamiu kumialio nei, mia p̃eli aviliglo ka mia buruṃara sebi na vio mave maka rijikia sisen kialo vio rivakovio. Mia kamiu kumial burutomoluo nalo nei ruei, mia kamiu maka kuvilig kamiu leleio vo.

<sup>24</sup> Tenene na kiniou neber ka kamiu, ka bogo na tibureiano, mia Atua tinien riialo tovulu kamiu."

*Yesu ber siva ban karam̃ano*

*Luka 10:21-22*

<sup>25</sup> Mia ka bogo nei, Yesu bolkouo, ber "!Teta o, Tubo na vio mave, a Tubo na yetemeriba! Neber siva banso, bior jau koberloglog vite nalo napano ea kiniou, ban nalo napano kialo jidomiano jibe ka kiritete nalo ga, mia nalo napano ajidom ka abe masou laka, bija nalo napano ajidom aber amijikia vite, mia jau komilavan vite nalo nei kalo.

<sup>26</sup> Riano, Teta, ninei javukia ga nana jau kojidomio."

<sup>27</sup> Karina Yesu ber bunu, berinavo "Karam̃aku juvan vite nonovio jua juṃaku ruei. Mia Karam̃aku, naio ga takurano mijikia batitig kiniou, mia kiniou nei napano nebe kenerinio, kiniou ga takurano napano nemijikia batitig naio. Kiniou kumemlika nalo napano nebijauialo ka nesiloglog Karam̃aku kalo ka avarkar tinielo ea naio, kumemi nene naruei numijikia batitig naio napano be karamememi."

*"Kamiu kumei ea kiniou ka kuvijilimebi"*

<sup>28</sup> Ana Yesu berii bunu, berinavo "Kamiu nonovio napano tiniemiu maro m̃ele bior kamiu kumituṃa kubar de kenemiu bagaro nalo na teremi ea kenemiu meuliano, bo ka kamiu kumei, kamiu kumei ea kiniou, ka mia kiniou nemijikia nejev jilimebiano van kamiu. <sup>29</sup> Kamiu kuvudu kiaku iliano nalo tibe ka vuu tai na kenemiu meuliano, a kamiu kuvudu kanaku bajago nalo, bior

kiniou nebe toro na momavo ga, kanaku jidomiano batove. Tibe na, mia kamiu kuvileal ka kenemi jidomiano nalo ajilimebi,<sup>30</sup> bior kanaku verloglogiano nalo, nalo amonñai ga a amelala ga, a vite nalo napano mia kiniou navar van kamiu ka mia kuvario, mia ve temi laka re ka kamiu.”

## 12

*Yesu naio be tubo na Legiano Lu  
Mak 2:23-28; Luka 6:1-5*

<sup>1</sup> Naruei ka bogoti dolu bereio napano be Legiano Lu, Yesu naliko kiano naiagagoano nalo amiel abano, mia kialo m̄arabo jel iviso bure tiniavio na m̄arauti. Nalo ajum̄a amiel jibe na, naruei kiano naiagagoano nalo jijerlo, ana amikiti kokorov m̄arati uiti nalo tealo ka asenio. <sup>2</sup> Nalo ajum̄a amila jibe na, naruei Varisis nalo tai ajua vio na,aju amial Yesu nalo, naruei nalo amil ban Yesu, aberinavo “!Ei, jau keialio! Kiamo naiagagoano nalo ajum̄a abar sinaniano ea tiniavio jibe na, ajum̄a amila iñauano ea Legiano Lu, ana verenio amila jibe na, nalo ajum̄a amila korov kiado tuboiano.”

<sup>3</sup> Ana Yesu berdoṓelo, naio berinavo “?Jibe na kovio, ṓelina maka kamiu kuvuluku kovio ea Iliano Lu bogo tai, ea vite nalo napano Parinio Tubo Teviti re nua milaio, a? Naio naliko kiano tomu nalo jijerlo toru, <sup>4</sup> naruei naio ba joomo ea Atua kiano Tobobo Lu, naio midu joko lu na tuboiano berenio kulo lu nalo ga amijikia asenio, mia Teviti nalo bunu ajenio. <sup>5</sup> ?Jibe na kovio, ṓelina kamiu maka kuvuluku bunu ea Tuboiano na Mosis kiano, napano ea Legiano Lu nalo, kulo lu nalo monokanio ava joomo ea yimo lu na Atua kiano, ka nalo ala kialo iñauano eaio? Jibe na, nalo ajum̄a amila korov tuboiano na berbure ber toro maka rijikia riñau ka Legiano Lu, mia Atua naio maka sidomialio tena river nina be tena

bova tai. <sup>6</sup> Kiniou neber ka kamiu, neberinavo be navenatuboiano vou tai jo vonganei, napano naio jo mave laka jovulu tuboiano na Atua Kunuano Lu, <sup>7</sup> mia naio jibe ka napano ea Iliano Lu, napano Atua naio berenio, berinavo ‘*Kiniou maka nesidomii kenemiu sida nalo, mia kiniou nejidomii ga bajago na tinieiaiano.*’ *Osea 6:6*

?Pelina kamiu maka kuvijikia nioti na iliano na navo? A verenio kamiu kumijikia ruei, mia kamiu kuvitu re kuvitibure searo ea kanaku naiagagoano nalo nei napano maka ala titai na bova. <sup>8</sup> Kulorinio Kenerinio, naio naruei naio be tubo na Legiano Lu.”

*Yesu milarur toro tai jum̄ano  
Mak 3:1-6; Luka 6:6-11*

<sup>9</sup> Naruei Yesu naio juvan vio na, naio miel bano, ana na naio ba joomo ea kialo yimo na volkouano tai. <sup>10</sup> Ea vio na, toro tai naio jo na, naio be jumekirikokouro, a tomu tai bunu aju ajidom aleal torokoriano tai ea Yesu verenio naio rila vite rimemedu re. Naruei tomu nalo nei abika Yesu, aberinavo “?Jum̄abe, kiado tuboiano berbure iñauano ka ala batitig mokotenano toro ka Legiano Lu, ṓelina naio maka riverbureio? !Jau kover von vite na!”

<sup>11</sup> Naruei Yesu berdoṓe, berinavo “?A verenio toro tai kiano nunu tai, mia nunu nene ga rijoru ea ṓili tai ea Legiano Lu, kuberiam̄a mia toro nei maka rijikia riva rivuru lario bereio? !Nao, mia kito nonovio monokanio rala tibe na van kiado temeul nalo! <sup>12</sup> A verenio memedu jibe na ea kiado tuboiano ka kito rajai nunu ea Legiano Lu, jibe na kito romijikia rala iñauano ka rajai toro ea Legiano Lu bunu, bior toro naio bo loa nunu.”

<sup>13</sup> Naruei Yesu ber ka toro na be jumekirikokouro, berinavo “Kovitirii jum̄amo rimemedu.” Naruei naio mila jibe ka napano Yesu naio berenio, ana na naio jum̄ano binime bo bereio, javukia jum̄ano

tinene. <sup>14</sup> Ana na Varisis nalo napano aju ea bogo nei amijoku, naruei nalo abatavio, ka averii tumabe naruei ka mia amijikia auebin Yesu riñaro.

*Yesu naio be toro na iñauano na Atua kanano*

<sup>15</sup> Mia Yesu naio mijikia ka Varisis nalo ajidom aue naio, naruei naio juvan vio nei, naio naliko tomu telabo napano ajakisorio. Naruei naio jo milarur tomu nalo na amie, <sup>16</sup> mia naio mil jikili banlo, naio berburelo ka ava averii re naio van kulo dolu nalo. <sup>17</sup> Naio mila jibe na ka mia Atua kiano iliano tai mijikia rimei rive riano, napano Naverialiano Aisea berialio nua, a iliano nei naio ber jibe nei, berinavo

<sup>18</sup> *“Nina be toro napano miñau kanaku, napano kiniou nebi-jaiualar naio.*

*Kiniou nejidom mēlea naio bo laka, a kanaku jidomiano jaaro toru kanio.*

*Mia kiniou nodu Niunuku toa naio, ka mia naio riverial bajago nalo napano memedu van tomu nonovio nalo na yetemeriba nei.*

<sup>19</sup> *Mia naio maka rivukuju van toro, naio maka vijago mēle, mia naio maka rijikia rivuku iliano ve telabo ea vio medave.*

<sup>20</sup> *Mia naio maka rijikia telar javiniu napano burukorovio jaklele ruei jo,*

*a naio maka rijikia rijukon bin yulu na volvolkouo ka riñaro.*

*Mia naio riñau tibe na rivanvano-o rivokar napano bajago na memedu naio tumolu sikili tu tovulu bajago na bova.*

<sup>21</sup> *A mia tomu nalo nonovio na yetemeriba nei, mia nalo avarkar tinielo ea naio sikili ka mia naio rilarrulo.” Ais 42:1-4*

*Aberenio Yesu miñau ea moroano na Siñaro kiano*

*Mak 3:20-30; Luka 11:14-23, 12:10*

<sup>22</sup> Naruei tomu nalo aburu toro tai napano niadu ban ea naio, naio binimeia ea Yesu. Niadu nene mila

naio mirano bono, a naio be buru bunu, mia Yesu naio mila batitig mirano a tiniajono abinimeia abo bereio. <sup>23</sup> Naruei nalo napano amial vite nalo nei amiilo toru, amemebiju kanio, ana na aberinavo “!Uerei! ?Tete na naio be Teviti kenerinio namā roju rorea naio kovio, pēlina makanio?”

<sup>24</sup> Mia bogo na Varisis nalo amijog tomu nalo kialo iliano nei, mia nalo amijoku toru, nalo aberenio “Toro na jitig bulag niadu nalo ea ga moroano napano siñaro nalo kialo tubo napano siano Belsabel, mijamo ka ban naio.”

<sup>25</sup> Mia Yesu naio mijikia kialo jidomiano, ana naio ber kalo, berinavo “A verenio tubo tai, kiano tomu nalo avuruburelo, napano togio nene ail die togio nene, mia tubo nene kanano iñauano nalo monoka mia atibirbili; a verenio komeli tai, pēlina m̄aratavo tai, tomu nene nalo avuruburelo, ka togio ajidom ajil bulag togio nene, mia tomu nalo nei maka ajikia atu rivu bogo tai.

<sup>26</sup> ?A jibe na bunu, verenio Setano kanano tava nalo tealō atu ajil bulag nalo togio dolu, nina berial ka nalo aburuburelo ruei, ana na mia navenatuboiano na Setano kanano naio sikili tu tumabe? <sup>27</sup> !Mia kamiū kumitum̄a kuberenio kuber jibe na naruei, kuberenio kiniou nojom̄a nemijil bulag niadu dolu nalo ea moroano na burum̄ara siñaro napano Belsabel, mia maka rijikia tibe na leleio garuei! ?Mia verenio tibe ka napano kamiū kuberenio, jum̄abe naruei ana kamiū tealō bunu ajuñā amijil bulag niadu? ?Kei mijamo ka moroano na jibe na banlo, pēli Setano bunu kovio? Bo ka verenio kenemiu naiagagoano napano ajuñā amijil bulag niadu, ajog kenemiu iliano na. <sup>28</sup> Ana makanio, kamiū kuber maka rimemedu ga. Kiniou nojom̄a nejitig bulag niadu ea moroano na Atua kiano Niununo ga, mia tenei berial ber Navenatuboiano na Atua kiano ju iviso

bure kamiu ruei.

<sup>29</sup> “! Kuvijio! Verenio toro tai sidom riva joomo ea toro kouo tai kunuano ka mia naio rivina ka kanano saba nalo, mia naio monokanio rivar teli riorkar toro nene sikili beamu vo, avona bisi, ana na mo naio mijikia riva joomo ka rivina ka nonovio saba nalo na kanano. Mia kiniou nojomã nomila jibe na naruei ka toro kouo napano Setano.

<sup>30</sup> “Toro napano maka takisor kiniou, naio jo berbure kiniou, a toro napano maka rimãu vija kiniou ka nuvuru kiaku tomu nalo amei vio takurano, naio jomã mijil dedade ealo abeve terakurano. <sup>31-32</sup> Jibe na naruei, kiniou neber ka kamiu, kariano nalo bija ilivovaiano nalo, a iliano napano mila bulag Kulorinio Kenerinio, mia Atua naio mijikia riviekokoa toro riviorio, mia toro napano naio ril rivova ka Niununo Lu, riverenio kiano imãuano nalo be Setano ga mimãukanio, toro na jibe na, Atua naio maka rijikia riviekokoa naio bogo tai, ea bogo nei a ea bogo dolu napano mia rimei.”

*Buruiesi bija m̃arati nene nalo*  
*Luka 6:43-45*

<sup>33</sup> A Yesu naio ber bunu, berinavo “Kito romijikia rovitilubar buruiesi nalo ea salo m̃arati napano abarlo. Buruiesi napano miluo bo, bar m̃arati na bo, mia buruiesi napano miluo bova, naio bar m̃arati napano bova. <sup>34</sup> Mia ea meuliano na toro kiano jibe na bunu, napano kiano iviso jibe kanio burupati tai, a iliano nalo napano amolmoluo ea kiano meuliano ajibe ka m̃arati nalo napano amolmoluo ea burupati nei. ?Mia kiniou nemial kenemiu burupati nalo amenunu ruei, mia tumãbe ana m̃arati na bo tai mijikia rimoluo ea kenemiu iliano nalo? !Kamiu kube bajulukuti na maro nalo ga! <sup>35</sup> Toro napano bo, naio barbiji vite na bo nalo jua kiano iviso, naruei

bogo nonovio kiano jidomiano na bo naio jo, napano naio mijikia sian bulagio, mia toro na bova, naio jo barbiji vite nalo na bova jua kiano iviso, naruei naio maka rijikia sian bulag jidomiano na bo bogo tai.

<sup>36</sup> “Mia kiniou nejidom kamiu kuvijikia ka ea bogo na tibureiano, mia tomu nalo nonovio monokanio ala kialo veriiano ea kialo ilivovaiano nonovio veve terakurano napano ajumã aberenio ea kialo meuliano nalo, <sup>37</sup> bior mia Atua naio tibure kanamo meuliano rivior kanamo iliano nalo. Nina bior kanamo iliano nalo amijikia alaso komeul, p̃elina mia alaso kovokar vironiano.”

*Tomu na tortoru tai ajidom aial vremesiano*  
*Mak 8:11-12; Luka 11:29-32*

<sup>38</sup> Ana tomu na verloglogiano na tuboiano, naliko Varisis nalo tai aber ka Yesu, aberinavo “Ei, jau napano abioso ka Naverloglogiano, kumemi numisidom ka jau kala vremesiano tai van kumemi ka mia nuviai kanamo moroano.”

<sup>39</sup> Mia Yesu naio berdope banlo, berinavo “Tomu nalo napano ajidom aial ga vremesiano nalo, abe kulo va nalo, nalo amila kodovo ban Atua jibe ka nalo napano m̃a amila siakaiano. Makanio, mia kamiu kuvial re vremesiano tai, mia vremesiano na Naverialiano Jona ga nanua, nina ga mia kamiu kuvialio. <sup>40</sup> Jona nene naio jo joomo ea burumãara keniene kelijumdumu na toru tai mabono ka legiano tolu a bogiano tolu, naruei mia tibe na bunu ea Kulorinio Kenerinio, napano mia naio toa bulumãbono borotano ka legiano ve tolu a bogiano ve tolu. <sup>41</sup> Naruei nalo na vio Nineva re nua, amijog Jona kanano iliano, mia nalo abiliglo, a mia nalo na atumolu atu ea legiano na tibureiano, ka mia averilubarbar kenemiu torokoriano nalo, bior be toro tai napano naio loa ka Jona naio

jo bija kamiu vonganei, mia kamiu maka kuvilig kamiu leleio vo.

<sup>42</sup> “Nanua bunu be tira na toru tai napano naio be parinio tubo napano juvan kiano buruvenuo koalabo laka, naio batove binimej ka rijog tormoruo Parinio Tubo Solomon kiano ilimasosouano nalo. Naruei mia tira na toru nei bunu, mia naio tumolu tu ea legiano na tibureiano, naio riverlubarbar kenemiu torokoriano nalo, bior toro tai napano naio be masou loa ka Solomon naio jo bija kamiu vonganei, mia kamiu maka kuvisidom naio leleio.”

*Niununo va mijikia binimej bereio  
Luka 11:24-26*

<sup>43</sup> Karina Yesu ber bunu, berinavo “Bogo tai, napano ver ajitiglar niadu ea toro, niadu nene naio mijikia riva yeturu, sirago ka buluvio na mia naio rijilmebi eaio. Mia ver naio maka rijikia rialelio, <sup>44</sup> mia naio river ‘Ee, bo ka mia kiniou naiadu ka bereio kunuaku moruo na beamu vo.’ Naruei, bogo napano naio rimej bereio mia naio rial yimo nei beteauo, a mila kon a meravo bo, a amila batitig saba nene nalo memedu rui ju. <sup>45</sup> Naruei naio mijikia riva rivuru bereio niadu dolu nalo ve aluo napano abova laka loa naio, amei vija naio, ka mia amijikia ava joomo bereio atua toro nei. Mia toro nei nua kiano meuliano bova, mia iorou kanio kiano meuliano rivova lie vo. A mia tibe na ga bunu ea meuliano na tomu na bova nalo ea bogo nei.”

*Yesu, kenieno a kuruano nalo  
Mak 3:31-35; Luka 8:19-21*

<sup>46</sup> Bogo na Yesu joma mil kia ga vo bija tomu nalo nei, kenieno naliko kuruano nalo abinimej aboru ea vio nei, nalo ajikili aju tavio, ajidom ail vanio. <sup>47</sup> Mia nalo nei tai berial ka Yesu, berinavo “Oi, koniomo naliko kuruamo nalo ajikili aju tavio, amilavio ka ail vanso kija beamu vo.”

<sup>48</sup> Mia Yesu naio miolu berdoŝelo, berinavo “?A konioku be kei, a kuruaku nalo abe kei?” <sup>49</sup> Ana naio jiloglog kiano naiagagoano nalo, naio berinavo “?Kumial nalo na aju na? Konioku a kuruaku nalo, nalo nei aju nei! <sup>50</sup> Bior ver toro napano rila tavukia napano Teta na vio mave naio jidomio, toro na jibe na naio be kuruaku, ŝeli kuvivinioku, ŝeli konioku.”

## 13

*Jamerijano na kurukuti uiti napano ajibirbil ea borotano kinkin veri  
Mak 4:1-9; Luka 8:4-8*

<sup>1</sup> Ka legiano nene, Yesu jaluvo den vonuo, ba jotano koyou ea baramudou na ueiyabo na toru ka to riverloglog tomu nalo. <sup>2</sup> Mia tiniobi toru abinimej ka naio ka bogo na, mila ana naio bavin ea uako tai, jotano eaio, mia tiniobi toru nei nalo aju bin baramudou aju, <sup>3</sup> ana naio jo berloglog vite telabo kalo ea jamerijano nalo.

Ana naio berii kalo, berenio “Kuvijiio toro tai napano ban ka rivisivisii kurukuti ea kiano tiniavio. <sup>4</sup> Telikiti napano naio joma bisivisii kurukuti nalo nei, tealo ajibiribil ea m̃arabo, ana iorou kanio, menu nalo abinimej amikiti bulagio nonovio. <sup>5</sup> A kurukuti tealo ajibiribil ea vio na be tabaŝilio yetano kanio, mia maka ŝano tano nene rimerorolu. Mia abitovtov soŝeli, bior salo tano menivivivi ga. <sup>6</sup> Ana bogo napano m̃erenio mijivi nieja jikili nieje salo toti nalo, vaarakurano ga amekekeu, bior maka ve salo bati ka avatove batitigio vo. <sup>7</sup> Mia kurukuti tealo ajibiribil ea vio napano beamu maka atekono vatitig teli va nalo eaio, mia iorou kanio, ana teli va nei naio miluo bereio toru, ana muevo miralo-o ana na nalo am̃arñaro. <sup>8</sup> Mia kurukuti dolu nalo bereio ajibiribil ea tano na bo tai, naruei nalo amiluo, ajakou abar m̃arati nalo, napano tealo abar duelimo

toromomou [100], tealo abar due-  
limo va ari [60], a tealo abar duelimo  
va rolu [30].”

<sup>9</sup> Ana na Yesu ber kalo, beri-  
navo “Toro napano be tiliniene  
monokanio naio riiagago vatitig ka  
iliano nei.”

*?Kar vaio ana Yesu joŃa mil jel ea  
jamerijiano?*

*Mak 4:10-12; Luka 8:9-10*

<sup>10</sup> Mia iorou kanio, ana na Yesu  
kiano naiagagoano nalo abinimei  
abika den naio, aberinavo “? Bior  
vaio ana jau kojoma koberloglog  
tomu nalo jel ea jamerijiano jibe  
na?”

<sup>11</sup> Naruei Yesu berdoŃe banlo,  
berinavo “Atua mila jibe na ka mia  
kamiu kuvijikia kuvileal mŃajig na  
navenatuboiano na kiano, mia naio  
maka jian jikiaiano nei van kulo  
dolu nalo nei. <sup>12</sup> Kiniou neber  
jibe nei ka kamiu, ka toro napano  
verenio be kiano saba ruei, mia  
naio rijeŃ tabunu bere vo ka mia  
ve miroano, mia toro napano maka  
ve kanano saba tai, mia naio rila  
deven vite vaio na telisu napano be  
kiano ruei. <sup>13</sup> Tenene na kiniou no-  
joma neberlogloglo ea jamerijiano,  
bior aju amial vite, mia maka lele  
avitilubarario, a ajuŃa amiagago, mia  
maka lele ajoglubarbario. <sup>14</sup> Tomu  
nalo na jibe nei naruei, nalo naŃa  
Atua beriilo nanua ruei, ea iliriani-  
ano napano Naverialiano Aisea naio  
berialio, berinavo

*‘Mia kamiu kuvijogio rivano-o, mia  
kamiu maka leleio kuvijikia  
kuvijoglubarbario bogo tai.*

*Mia kamiu kuvialio rivano-o, mia  
maka leleio kuvijikia kivi-  
tilubarbario bogo tai,*

<sup>15</sup> *bior kamiu kumitibe ka tomu  
nalo napano kialo jidomiano  
nalo aŃarŃaro, jibe ka na-  
pano ajinioko tilinielo nalo, a  
ajetavoko miralo nalo ruei.*

*Verenio nalo ala re tibe na, Ńeli  
mia miralo rivitii dulu vite,  
Ńelina tilinielo rijoglubarbar  
vite, a Ńeli kialo jidomiano*

*rijoglubarbar vite, ana tibe na  
ana amijikia aviliglo amei ka  
kiniou ka mia kiniou noiŃau  
ka vatitiglo.’ Ais 6:9,10*

<sup>16</sup> “Kiniou neber ka kamiu,  
kanaku naiagagoano nalo, ilivuiano  
joa kamiu, bior miremiu nalo aju  
amial vite nalo napano kamiu ku-  
mialio, a tiliniemi nalo amijog vite  
nalo napano kiniou nojoma neber-  
loglogio ka kamiu. <sup>17</sup> Naverialiano  
nalo telabo bija Atua kiano tomu  
nalo nanua, nalo ajidom toru ka aial  
vite nalo napano kamiu kumialio  
vonganei, mia maka lele aialio, mia  
nalo amila vio toru ka ajog venia na  
kamiu kumijogio vonganei, mia nalo  
maka ajog vite nalo nei tai leleio.”

*Yesu ber bisivisii nioti na jameri-  
jiano na kurukuti uiti*

*Mak 4:13-20; Luka 8:11-15*

<sup>18</sup> Mia Yesu mil banlo, berinavo  
“Mo, kamiu kuviagago vatitig ka  
kuvijog nioti na jamerijiano na toro  
napano ban ka rivisivisii kurukuti  
ea kiano tiniavio.

<sup>19</sup> “Vite na jukamu, be kurukuti  
na jibiribil ea mŃarabo, nina javukia  
napano tomu nalo na amijog Iolu-  
ano Vou na navenatuboiano nei, mia  
nalo maka ajoglubarario. Kurukuti  
novo nalo na ajibiribil ea kialo jido-  
miano nalo, mia toro va nei SimŃaro  
naio binimei ana naio bar bulag  
Ioluano Vou nei bereio den kialo  
iviso.

<sup>20</sup> “Kurukuti dolu tealo nalo,  
ajibiribil ea vio na be tabaŃilio  
yetano napano tano nene menivinivi  
ga, nina javukia napano tomu nalo  
na amijog Ioluano Vou nei, mia nalo  
ajaaro soŃeli ga kanio, <sup>21</sup> mia jibe ka  
maka ve salo pati tai. Amijikia atu  
ka bogo ve bulati ga, mia verenio  
bogo na jikili rimei, Ńelina tomu  
nalo ajilo kar amonea Atua kiano  
iliano, mia vaarakurano ga nalo  
ajoru bereio.

<sup>22</sup> “Dolu bunu, nina be kurukuti na  
jibiribil ea vio na teli va juaio, mia

nina jibe ka napano tomu nalo amijog Ioluano Vou nei, mia nalo ajidom mēlea kialo meuliano, a tinieljii saba nalo na yetemeriba nei toru laka. Bajago nalo na jibe nei jibe ka teli va, ana nalo abivibin Ioluano Vou nei ka mia naio rivar re m̄arati ea kialo meuliano nalo.

<sup>23</sup> “Mia na maariano nene, naio be kurukuti na jibiribil ea borotano na bo, ninei javukia napano tomu nalo na amiagago ka Ioluano Vou nei, mia nalo amijoglubarbario, naruei ajakou abar m̄arati na Ioluano Vou nei ea kialo meuliano nalo, napano mia tai atakou avar m̄arati rivokar duelimo va rolu [30], mia tealo atakou avar m̄arati ve duelimo va ari [60], mia tealo atakou avar ve telabo, tibe ka m̄arati ve duelimo toromomou [100].”

#### *Jamerijiano na soro va na miluo biju bija kurukuti uiti*

<sup>24</sup> Naruei Yesu berii jamerijiano dolu banlo, berinavo “Bajago napano Atua buru tomu nalo abinimej jouro ea kiano navenatuboiano nene jibe nei. Toro na toru tai napano naio ba bisivisii kurukuti uiti na bo ea kanano tiniavio, <sup>25</sup> mia bogo napano tomu nalo amonomel bogiano, ana kiano uolu tai binimej, bisivisii kurukuti soro na bova ea tiniavio nei bunu, karina naio buro ban bereio. <sup>26</sup> Naruei kurukuti vite juo nei amiluo biju vaarakurano, abe verare ga, mia bogo na ga uiti nalo ajikar ka ajakou, mia tomu nalo na toro na toru nei kiano nalo abitilubar ka soro na bova bunu miluo biju bija uiti nalo. <sup>27</sup> Ana na nalo abinimej amial naio, abika denio, aberinavo “?Boru, jum̄abe? Kurukuti nalo napano romebijalo ea kanamo tiniavio, nalo abe kurukuti na bo ga. ?Mia soro va nei naio binimej jum̄abe?”

<sup>28</sup> “Ana na naio berii kalo, berinavo ‘Makanio, nina kiaku uolu tai napano naio mila vite na jibe nei.’

“Naruei kiano tomu nalo abalea naio bereio, aberinavo “?Mo, ana mia tum̄abe, jau kojidom nuva nuvuru bulag soro va nalo nene?”

<sup>29</sup> “Mia naio berburelo, berinavo ‘Makanio, atubo beamu vo. ?Verenio kami kuva kuvuru bulag soro va na, p̄eli mia kami kumijikia kuvuru bulag belea uiti bunu, ve juo vaarakurano koviobo? <sup>30</sup> Mia nalo amijikia ave juo ailuo biju vio takurano riva rivokar bogo napano avarbijii uiti m̄arati rimej joomo. Ka bogo na, mia kiniou nemijikia never ka tomu nalo avan ka ate uiti nalo, mia ate bulag soro va nalo nene beamu, aiorkakarlo ve bagaro ka mia avukulo rivan ea sebi. Iorou kanio, ana mo amijikia ava ate uiti nalo ka avario rimej vonuo.’”

#### *Jamerijiano na kurukuti m̄arabako Mak 4:30-32; Luka 13:18-19*

<sup>31</sup> Naruei Yesu naio berial jamerijiano dolu tai bereio banlo, berinavo “Navenatuboiano na vio mave naio javukia kurukuti m̄arabako napano naio mijoru balea buruiesi. <sup>32</sup> Mia kurukuti nene naio kiritavaso leleio ga, mia bogo napano naio pitov mia naio binimej be buruiesi na burutomoruo tai, juvulu buruiesi dolu nalo, naruei menu nalo amue m̄alo niuku nalo ea sano jaati nene nalo.”

#### *Jamerijiano na isi Luka 13:20-21*

<sup>33</sup> Mia Yesu berial jamerijiano dolu bereio kalo, berinavo “Navenatuboiano napano Atua kiano, naio javukia tira tai napano mim̄auka isi na telisu ga bija burum̄ara baju na yeve, mia isi na telisu neibano naio miyuku joko nalo nei biniu tortoru.”

#### *Yesu mil ea ga jamerijiano nalo banlo*

##### *Mak 4:33-34*

<sup>34</sup> Ea Yesu kanano iliano nalo nei, naio ber bulag vite nalo jibe na ban tomu nalo, mia va telabo napano naio mil ea jamerijiano banlo. <sup>35</sup> Jibe na, ana mila naverialiano nanua kanano iliano be riano, napano Atua ber

“Mia kiniou neverial kanaku iliano nalo ea ga jamerijiano,

*mia kiniou neverial saba nalo napano  
ajuluku koalabo laka nua ruei  
aju nunu kia ga vo,  
jika ka bogo na nejii yetemeriba,  
binimej bokar banei.” Iouano  
78:2*

*Yesu berial nioti na jamerijiano na  
soro va*

<sup>36</sup> Karina Yesu juvan tiniobi, ana naio ba joomo ea yimo, naruei kiano naiagagoano nalo abinimej kean naio, abika denio, aberinavo “? Aiou koig, kumemi numisidom kovisi nioti na jamerijiano na soro va na miluo ea tiniavio na uiti nei?”

<sup>37</sup> Ana Yesu naio berdoŕelo, berinavo “Toro na toru napano bisivisii kurukuti na bo, naio be Kulorinio Kenerinio. <sup>38</sup> Mia kanano tiniavio nene, naio be yetemeriba nei. A kurukuti na bo nalo nei, nalo abe tomu nalo napano aju jouro ea navenatuboiano na Atua kanano. Mia soro va nalo nei nalo abe Simaro kanano tomu nalo. <sup>39</sup> A uolu napano bisivisii kurukuti soro va nei, nina naio be Simaro ga. A bogo na avarbijii m̄arati uiti, nina naio be bogo na tagaŕiano. A tomu nalo na in̄auano nei napano avan ka ate bijii m̄arati uiti nalo nei, nina naio be nailiano nalo. <sup>40</sup> A in̄auano na ayobijii soro va karina aisebilo, nina bajago napano mia rimej ea bogo na maaro, <sup>41</sup> napano mia Kulorinio Kenerinio, naio riila kiano nailiano nalo ka avan ka avar bulag vite nalo napano amila toro mijoru ea kariano, vija tomu nalo na amila bijuku vovaiano nalo, ka mia nalo ajikia atu re bunu naliko tomu nalo na kiano navenatuboiano. <sup>42</sup> Mia nailiano nalo avukulo avan ea sebi na toru, ea vio napano tomu nalo ajum̄a ajegi eaio, a ajum̄a ajer m̄arjuvolo nalo eaio. <sup>43</sup> Mia iorou kanio, ana tomu na memedu nalo atu jouro ea Karam̄alo kiano navenatuboiano, mia nalo nei amerera atavukia m̄erenio. A toro napano be tiliniene, bo ka naio riagago vatitig ka iliano nei.”

*Jamerijiano na buruñara puruveru novo tai napano m̄a aburu veru ea*

<sup>44</sup> Mia Yesu naio berinavo “Bajago na ver toro napano jidom riva jouro ea navenatuboiano na Atua kiano, jibe ka jamerijiano nei: toro tai ba mial borotano tai, mia naio mילו ka buruñara puruveru novo tai napano jovorvoru ga eaio. Naruei naio jivin vanio lie ka puruveru nei bereio, mia naio ba p̄iliv̄ili bulag ka nonovio kanano saba nalo biniu, ka mia naio mijikia rivulular borotano nei, bior naio mijog bo toru laka ka tonovo napano naio milealio.”

*Jamerijiano na basabebe*

<sup>45</sup> Mia Yesu berii bunu, berinavo “Mia bereio, bajago na toro napano jidom riva jouro ea navenatuboiano na Atua kiano, javukia bunu: toro tai, napano naio jom̄a bulu basabebe novo nalo den tomu nalo. <sup>46</sup> Mia bogo tai ana naio mileal tai napano bo, ana naio berinavo ‘Riano ga na, kiniou tinieku jii vite nei toru laka. !Verenio kiniou nemijikia nodu ve kiaku garuei! Mia monoka kiniou nava noñiliv̄ili bulag ka kanaku saba dolu nalo nonovio, ka mia kiniou nemijikia nemej novulu vite novo nei.’ ”

*Jamerijiano na levlevi*

<sup>47</sup> Ana Yesu naio ber bereio, berinavo “Mia bereio, bajago na Atua kiano ka rivuru tomu nalo ava jouro ea kiano navenatuboiano, naio javukia bunu, napano bogo na tomu nalo ajuvarvan levlevi ea ueiyabo, ana amijikia avuru ko niado kinkin nalo ve telabo eaio. <sup>48</sup> Ana bogo napano levlevi bujo vatitig bo, mia tomu nalo aburio bauro, naruei nalo ajaburuburu, abarburevure niado nene nalo. Ana niado nalo na bo, amisonlo aban ea kanalo basaro nalo, mia niado na bova nalo, nalo abuku lo abano. <sup>49</sup> Mia nina rimej tibe na ea bogo na maaro, mia nailiano nalo ava alaburevure tomu nalo, avuru bulag tomu na bova nalo, <sup>50</sup> avukulo avan ea sebi na toru, na tomu nalo ajum̄a

ajegi eaio, ajumã ajer m̃arjuvolo nalo eaio.”

### *Jamerijiano na terimoruo a terivou*

<sup>51</sup> Naruei Yesu bika den kiano naiagagoano nalo, ber “?Kamiu kumijoglubarbar iliano nalo nei?”

Ana nalo aberdoþe, aberinavo “Nao, kumemi numijikia koviobo.”

<sup>52</sup> Ana naio ber kalo, berinavo “Saba nalo nei jibe ka toro tai napano beamu, naio be naverloglogiano na tuboiano nalo na Atua kiano Iliano Lu, mia iorou kanio, ana naio binimei be kanaku naiagagoano tai ea navenatuboiano na Atua kanano. Naio javukia toro na toru tai napano kiano saba novo na inãuano nalo telabo ea kunuano. Ana bogo nonovio, naio mijikia rivar bulag kiano vite na be terimoruo na bo kia ga vo, a naio mijikia rivar bulag bunu kiano tena be terivou, ka mia naio rila kiano inãuano nalo ealo.”

### *Kulo Nasarete amilidie ka Yesu* *Mak 6:1-6; Luka 4:16-30*

<sup>53</sup> Bogo napano Yesu berial jamerijiano nalo nei bisi, ana naio juvan vio nei, <sup>54</sup> binimei bereio ea kiano vio. Naruei naio jomã berloglog tomu nalo na vio nei, joomo ea kanalo yimo na volkouano, mia nalo amiilo toru ka kiano iliano nalo. Ana nalo ajumã aberverii kalo, aberinavo “!Tomnei! ?Tete na, naio bokar m̃asosouano nei jumãbe, a naio jomã mila vremesiano nalo na jumãbe? <sup>55</sup> Romijikia tete nei ruei. Naio karamãno napano be toro namã miñauka yimo ga napano Yoseve, a napano kenieno, tira napano Mere. A kuruano nalo, nina Yemesi, a Yoseve, a Saimon, a Jutas, nalo na abe kurualo ea naio. <sup>56</sup> A kuvivinieno nalo, nalo nei ga aju kitoliko ga. ?Mia tete na naio jaluvo den kito, ba bar tenalo na be?”

<sup>57</sup> Naruei nalo tiniel jer naio, maka asidom naio leleio.

Mia Yesu naio ber kalo, berinavo “Toro napano be naverialiano, tomu

dolu nalo amijikia ajovonio, mia tomu na kanano vio, naliko kanano m̃aratavo nalo, nalo na ga maka ajikia atovon naio.” <sup>58</sup> Naruei ea vio na, Yesu naio maka rila vremesiano ve telabo, bior nalo maka amonea naio.

## 14

### *Parinio Tubo Erot Antapas berii Yesu*

*Mak 6:14-16; Luka 9:7-9*

<sup>1</sup> Ka bogo nei, aber Yesu ba bokar Parinio Tubo Erot, na naio be parinio tubo na tanobuku na vio Kalele. <sup>2</sup> Ana Parinio Tubo Erot naio mijog iliano nalo nei, ana naio ber ka kiano tomu na tortoru nalo, berinavo “?Toro napano ajumã aberiio na, naio be Jone Baruei ga kovio, napano naio meul bereio den na m̃ariano bo? Tenene na naio mije moroano ka miñauka vremesiano nalo na.”

### *? Jone Baruei kiano m̃ariano jumãbe?*

*Mak 6:17-29*

<sup>3-4</sup> Parinio Tubo Erot naio mil jibe na, bior naio naruei muetañaria Jone Baruei m̃aro ruei, ana naio jo merou m̃ele kanio. A tukunu na m̃ariano na Jone Baruei kiano jibe nei: Parinio Tubo Erot nei kuruano Vilip, napano naljuo karamãlo takurano mia keniele juo. Ana beamu, Vilip nene, naio joro ka tira tai siano Niarotias. Mia iorou kanio, ana Parinio Tubo Erot naio ba burular tira nene. Tenene na, Jone jomã mil ban Parinio Tubo Erot kanio, berinavo “Tena jau komila na maka rimemedu ka, napano jau koburular tira na, bior naio be kuruamo koano.” Mia Niarotias maka saaro leleio ka Jone kanano iliano, naruei naio mil ban Parinio Tubo Erot, ana Parinio Tubo Erot mila kanano tomu tai aba abokar Jone, amiorkario, ana amidu joa nalakoiano. <sup>5</sup> Mia Parinio Tubo Erot milavio ka ruebin Jone, mia naio merou kija kanio kulo Israel nalo,

bior nalo amonea Jone aberinavo naio be kialo naverialiano tai.

<sup>6</sup> Naruei Niarotias nei, naio be kenerinio vevinio tai, mia bogo napano nalo amila jokoluolu ka atekar bogo napano abar Parinio Tubo Erot eaio, ana niatira nene naio bolu kamu ka nalo na ajua jokoluolu nei miralo. Naruei Parinio Tubo Erot naio jaaro toru ka merevono nei kanano voluano, <sup>7</sup> naruei naio berkakario jikili banio, berenio vaio napano ver naio rivika denio, mia naio rudu vanio.

<sup>8</sup> Naruei Niarotias naio mil bija kenerinio vevinio, bisi ana kenerinio vevinio nei naio ber ka Parinio Tubo Erot, berinavo “Vonganei, kiniou nejidom kodu van kiniou Jone Baruei pariparinio, toa baju tai, rime i ea vio nei.”

<sup>9</sup> Mia iliano nei mila Parinio Tubo Erot mijog bova bior kiano verikariano na yokovoano nei, mia naio berenio ka ala bo ka tibe ka ga na merevono nei naio berenio, bior naio mila ilikakariano jikili jibe na ea kanano bilbilu nalo miralo ruei. <sup>10</sup> Ana nalo aban ea yimo na lakoiano, ajektorov Jone burujono, <sup>11</sup> ana amidu parinio joa baju tai, ana amidu binime i ban merevono nene, ana merevono nene na midu ba ban kenieno. <sup>12</sup> Iorou kanio ana Jone kiano naiagagoano nalo abinime i amidular mokotenano aba ajivinio, ana nalo aba aberial ka Yesu.

Mo tukunu na Jone Baruei kiano m̄ariano biniu ea vio nei.

*Yesu bagan suñanalo menu jimo  
Mak 6:30-44; Luka 9:10-17; Jone  
6:1-14*

<sup>13</sup> Naruei bogo napano Yesu mijogial ka Parinio Tubo Erot naio jo berii naio, berinavo naio be Jone Baruei naio meul bereio den na m̄ariano, ana Yesu jumolu den vio na, ana naio bavin ea uako tai, ka naio rivan ea vio yauo tai napano be tuñaro napano maka tomu nalo atuaio. Mia bogo napano tiniobi nalo amijikia ka naio ban jibe na, amolmoluo ea kialo m̄arkomeli nalo,

ajakisorio, ajel uro. <sup>14</sup> Mia bogo napano Yesu bauro, mia naio mial ka tiniobi na tomu naloaju ruei, mia naio tinien miialo toru, ana naio mila kialo tomu na mieiano nalo abo bereio.

<sup>15</sup> Mia bogo napano m̄erenio batove, ana Yesu kiano naiagagoano nalo abinime i kean naio, aberinavo “Tubo, vio nei maka rivu, a vaataro ka vio rimelijo bunu. Bo ka jau kei-ila tiniobi nalo na avanvan bereio ea komeli nalo, ka avulu salo sinaniano tai.”

<sup>16</sup> Ana Yesu berdoṽe ber kalo, berinavo “Makanio, nalo amijikia atu tibe na rivu ga na. Bo ka kamiukuvar sinaniano tai vanlo.”

<sup>17</sup> Ana nalo aber kanio, aberinavo “!Uerei ṽeli ga, kumemi nubokar joko sesa jumo ga, bija momaio bana juo ga!”

<sup>18</sup> Ana Yesu berinavo “Kuvar rime i van kiniou,” <sup>19</sup> ana naio ber ka tiniobi nei, berinavo “Kamiu kuvitutano ea soro beamu vo.” Naruei naio bar joko sesa jumo bija momaio bana juo nei, naio jirarago bavin ea vio tiniabene, ana naio ber siva ban Atua ka sinaniano nei, karina naio burekokorovio joko sesa nei, naio jian ban kiano naiagagoano nalo ka nalo avar van tiniobi nalo nei. <sup>20</sup> Mia nalo ajinan bano-o, mabolo jouo bo, mia niati na sinaniano nalo napano maka asenio, nalo abe verare ka aisonlo rivan ea basaro solokobaro nalo napano tortoru ve duelimo ba juo [12]. <sup>21</sup> Mia tomu nalo napano ajinan, suñanalo ga abokar kovio ea menu jumo [5,000], mia maka avuluku tire nalo vija kiritete nalo.

*Yesu miel mave ea niunuku tei  
Mak 6:45-52; Jone 6:15-21*

<sup>22</sup> Karina Yesu ber ka kiano naiagagoano nalo, berenio “Kiniou nejidom ka kamiukuvidu kiado uako, kamiu beamu kuva tivelinio ea ueiyabo na toru nei, mia kiniou noto nei beamu vo ka mia neiila tiniobi nalo nei avanvan bereio ea kialo m̄arkomeli dedade nalo.” <sup>23</sup> Ana bogo napano naio miila dedade ea tiniobi nalo nei abanvan bisi, ana

naio bavin ea suku tai, naio takurano, ka rivolkouo. Bogo napano vio melijo ruei, mia Yesu jo naio ga takurano, <sup>24</sup> mia ka bogo nei, uako neibano naio jo koalabo ruei, iviso ea tinia ueiyabo. Naruei niatuva toru laka, a nalo aju ajuþe jegi, mila ana nalo amidu tei mia amidu tei. <sup>25</sup> Mia vaataro ka vio rivuruburevure ka viorijeni, ana Yesu binimej ka rialo, naio jo miel manono mave ea tei.

<sup>26</sup> Mia bogo na kiano naiagagoano nalo amial naio jo miel binimej jibe na, mia nalo amerou, ana aber “! Uerei! ?Titai yako, þeli siþaro tai koviobo, þeli venia jibe na?”

Mia nalo amiaga jouo, bior nalo amerou mþe, <sup>27</sup> mia vaarakurano Yesu naio mil banlo, berinavo “!Ei, kamiu kumerou re bunu, mia be kiniou ga nei!”

<sup>28</sup> Ana Pitere berdoþe, berinavo “Tubo, a verenio be jau riano, mia kajamo ka kiniou bunu neiel mave ea tei neviedu keanso.”

<sup>29</sup> Ana Yesu berinavo “Jau, bo ga, komei.”

Ana Pitere batove den uako, naio jikar miel mave ea tei, naio ban vaataro ka Yesu, <sup>30</sup> mia bogo napano naio tinien maio bereio ka jegi napano jikili nei, naio merou. Mia bogo na naio merou jibe na, ana naio jikar ka madudu, naruei naio bio ban Yesu, berinavo “!Tubo, jau kajai kiniou!”

<sup>31</sup> Vaarakurano ga Yesu mijiou bokar Pitere juþano, ana naio berkanio, berinavo “?Juþabe ana niukniuku bieso? !Maka leleio koviekar kiniou sikili leleio kija vo!”

<sup>32</sup> Mia bogo napano nalo abe juo abavin ea uako bereio, vaarakurano jegi juba bin, <sup>33</sup> mia nalo napano ajua uako amiaia Yesu, aberenio “Riano ga, jau kobe Atua kenerinio riano.”

*Tomu na mieiano nalo ajokol Yesu kiano ikiniono kulumþarauo*

*Mak 6:53-56*

<sup>34</sup> Ana Yesu nalo aban ea kialo uako abarkorovio ueiyabo labo nei, aba tivelinio, naruei nalo abauro ea vio tai, siano Kenasarete. <sup>35</sup> Mia bogo napano tomu na vio nei amijikia naio, ana nalo amiila toru janea vio nonovio jeliviv ea vio nei. Ana nalo aburu tomu na mieiano nalo abinimej ea naio, <sup>36</sup> naruei nalo abalea naio ka rijamo ana nalo napano amie atokol ga kiano ikit kulumþarauo. A nalo na atokolio tibe na, mia kialo mieiano nalo ribisi, ana mia nalo avu bereio.

## 15

*Yesu kiano naiagagoano nalo amiakurano ea bajago moruo na kulo Ju nalo kialo*

*Mak 7:1-13*

<sup>1</sup> Ana bogo nene, Varisis nalo tai naliko naverloglogiano na tuboiano nalo tai ajuvan vio Yerusalemo, abinimej ka aial Yesu. <sup>2</sup> Nalo abika denio, aberinavo “?Ka vaio ana kanamo naiagagoano nalo ajumþa amiakurano ea bajago moruo na kiado nalotvano, na kiado navurimþaraboiano nalo na beamu ajumþa aberloglog ka kito, aberinavo bogo nonovio ver toro sidom sinan, monokanio naio takii vatitig mþarabo na memedu nene, ka sekon juþano beamu vo, karina mo naio mijikia sinan?”

<sup>3</sup> Ana Yesu berdoþe banlo, berinavo “?Ana kamiu bunu, bior vaio ana kamiu kumisikili ka kumitakii kenemiu bajago moruo nalo nei, mia ea kenemiu bajago moruo kamiu kumituþa kumilakokorov Atua kanano tuboiano? <sup>4</sup> Mia Atua nene, naio ber ‘Jau komonmonea karamþamo a koniomo,’ mia naio ber bunu, berinavo ‘Ver toro tai naio ril rivova ka karamþano a kenieno, kamiu kuvuebin naio rimþaro.’ <sup>5</sup> Mia vonganei, verenio toro tai berkar ber kiano saba nalo abe lu, mia naio rivar van Atua bogo tai, naio ber jibe na mia iorou kanio, ana naio maka rijikia rivitikar kiano tormoruo juo nei, þeli rijailo ka

saba nalo nene, <sup>6</sup> ana kamiu kumitu kuber jibe na naio bo ga na, nina maka ve vite tenia. Mia ea bajago na, kamiu kumituña kumila Atua kiano tuboiano binime i be iakurano, bior kamiu kumisidom kuvokar ga kenemiu bajago moruo nalo. <sup>7</sup> !Mia kamiu kumilasibi ga na, kamiu kumituña kumil kurano ga! Naverialiano Aisea naio berii kamiu nua ruei, napano naio berial iliano na Atua naio berenio, napano ber

<sup>8</sup> *'Tomu nalo na amonmonea kiniou ka kialo iliano nalo ga, mia kialo jidomiano nalo aju koalabo den kiniou kia ga vo.*

<sup>9</sup> *Mia nalo aju amilotu ban kiniou kurano ga, bior bogo napano aberloglog toro, nalo aber iliano na, naio be Atua nene kanano, mia iliano na be nalo kulorinio ga kialo.'* *Ais 29:13*

*Vite nalo napano mila toro miagiago ea Atua mirano*  
*Mak 7:14-23*

<sup>10</sup> Naruei Yesu naio bio tomu nalo ka amei vio takurano ea naio, ana naio mil banlo, berinavo "Bo ka kamiu kuviagago vatitigio, monoka kamiu kuvijogluar kanaku iliano. <sup>11</sup> Maka sinaniano napano ba joomo ea toro niono, naio mijikia rila toro riagiago ea Atua mirano, mia iliano nalo napano ña moluo ea toro niono, naina naruei napano mila toro miagiago."

<sup>12</sup> Ana karina, kiano naiagagoano nalo abinime i, aber kanio, aberinavo "?Ai koig, jau komijikia ka Vari-sis nalo tiniel mimi toru ka iliano nalo napano jau kojomña koberenio?"

<sup>13-14</sup> Ana Yesu berdoře ber kalo, berinavo "Kamiu kuvisidomial re nalo na. Venia napano nalo ajumña amilaio, naio maka ve Atua kiano iñauano na, mia Teta napano joa vio mave mia naio rivuru bulag nonovio vite nalo napano naio maka rimebijalo. ? Tomu nalo na abe merebono ga, mia ajidom

avurimñarabo ka toro dolu napano be merebono, mia nalo ave juo aiel tunñabe? !Mia nalo ave juo amijikia ajoru ea bulukuřili tai na!"

<sup>15</sup> Naruei Pitere bika den Yesu, ber "Koig, jau kobijuku bo komijikia koverial nioti na jamerijiano neibano jau koberiio jukamu ban kumemi."

<sup>16</sup> Mia Yesu berenio "?Junñabe, řeli parimiu merorol bunu kia ga vo? <sup>17</sup> Pelina kamiu kumijikia kija ruei, bior vaio napano ba joomo ea toro niono, jelea mabono ba tavio den mokotenano bereio, <sup>18</sup> mia vaio napano moluo ea toro niono, naio moluo ea kiano iviso jukamu, naruei naio mijikia mila toro miagiago. <sup>19</sup> Mia nina bior kiano jidomiano va nalo amoluo ea tiniene toro, jibe ka amila bin toro, amila siakaiano, a ñeaku naljuo niatira amila siakiano, a vinauano, a ilisibiano, a ilivovaiano. <sup>20</sup> Mia nina be bajago nalo napano amijikia amila toro miagiago kamu ea Atua mirano. Mia bajago napano ajinan, maka asekon jumñalo tukamu, naio maka rijikia rila toro riagiago tibe na."

*Yesu jitiglar niadu tai ea merevono tai*  
*Mak 7:24-30*

<sup>21</sup> Naruei Yesu juvan vio nei, ana naio batove ea bulukomeli juo na vio Taia bija Saiton. <sup>22</sup> Ana tira valauo tai na vio Kenano, naio joa tanobuku na vio nei ruei, ana naio binime i mial Yesu, naio bio banio, berinavo "Tubo, jau kobe Naverikar-iano napano komiyotuba ea Teviti kiano bajulukuti. Kiniou neber bo kaso tiniem riia kiniou. Keneriku vivinio, niadu tai ban ea naio, a mila lelan naio jikili laka." <sup>23</sup> Naruei Yesu mijog tira nei kiano iliano, mia maka riolu riveriře titai leleio van tira nei.

Iorou kanio, ana kiano naia-gagoano nalo abinime i, aber kanio aberinavo "Tubo, tira nei, naio jomña bio lili kito toru laka. Bo ka jau keiila naio rivabilig."

<sup>24</sup> Ana Yesu maka riverdoḡelo, mia naio mil ban tira nei, berinavo “Atua miila kiniou nebinime i ka navan ea kulo Israel nalo ga, nalo napano ajavukia nunu nalo napano amilaluvu m̄arabo.”

<sup>25</sup> Mia tira neibano naio binime i, minie kamu kean Yesu jaano, ana naio berinavo “Tubo, neber bo kaso nejidom jau kajai kiniou.”

<sup>26</sup> Mo Yesu naio berdoḡe, ber “Maka rivu ka navar bulag kiritete nalo salo sinaniano, novuku van kuli nalo.” Naio mil jibe na bior naio mijikia ka bogo na, kulo Ju dolu nalo aberiaḡa nalo ga abe Atua kenerinio nalo, bior ajaḡa aberii searo ea tomu nalo napano maka ave kulo Ju, abiolo aber abe kuli ga liki.

<sup>27</sup> Mia tira neibano naio mil, berinavo “Jau kober riano, Tubo, mia kuli nalo amijikia asen ga iororoti sinaniano napano jibiribili jel tano ka boru na kuli nalo nei kiano baro-baro na sinaniano.”

<sup>28</sup> Ana Yesu berdoḡe vatitig ban naio naruei, berinavo “Tira, jau kobiekouo ea kiniou koju jikili laka. Mia vonganei jau keialio rime i vanso tibe ka napano jau komoneaio.” Mia memedu ka bogo nene, ana tira neibano kenerinio vivinio neibano binime i bo bereio.

*Yesu milarur tomu na mieiano telabo*

*Mak 7:31-37*

<sup>29</sup> Karina, Yesu jumolu den vio na bereio, naio ban bereio ea tanobuku na vio Kalele. Naio joḡa miel barlaka, ban vaataro ka ueiyabo na tanobuku nei, naruei naio bavin ea suku tai, naio jotano. <sup>30</sup> Naio jotano jibe na, naruei tiniobi na tomu nalo abinime i ka naio, bija javuluku nalo, a nalo napano abe jaḡaba kirikokouo, a merebono nalo, a buru nalo, a tomu na mieiano dedade nalo bunu. Aburulo abinime i, ajuvanlo aju vaataro ka Yesu, naruei Yesu naio milarurlo abo bereio. <sup>31</sup> Ana tomu nalo amialo toru ka bogo napano nalo amial buru nalo amil,

jaḡaba kirikokouo nalo abo, javuluku nalo amiel, a merebono nalo ajirarago, naruei nalo amialio, ana amiaia kulo Israel nalo kialo Atua toru laka biorio.

*Yesu bagan suḡanalo menu veri [4,000], bija tire nalo a kiritete nalo bunu*

*Mak 8:1-10*

<sup>32</sup> Ana Yesu bio kiano naiagagoano nalo ka amei aialio, karina naio berinavo “Kiniou tinioku miia tiniobi na toru nei, bior nalo aju kitoliko bogoti tolu ruei, mia vonganei salo sinaniano nalo biniuviniu. Mia kiniou maka nejikia neiilalo avanvan vonuo ver maka sinaniano, bior ver kiniou nala tibe nei, ḡeli mia tomu tai miralo ribobogio ea m̄arabo rivior vitu.”

<sup>33</sup> Naruei Yesu kiano naiagagoano nalo aber kano, aberinavo “?Mia ravar salo sinaniano ea vio be? Bior vio nei be vio yauo kurano ga, a tiniobi toru laka.”

<sup>34</sup> Ana Yesu bika denlo, berinavo “?Kamio kubar joko vio?”

Ana nalo aberinavo “Joko aluo [7] ga, bija momaio tealoo.”

<sup>35</sup> Naruei Yesu ber ka tiniobi na toru nei, berinavo “Kamio kuvitutano beamu vo.” <sup>36</sup> Ana naio bar joko aluo [7] neibano, bija momaio nalo nei, ana naio ber siva kano ban Atua, karina naio burekokorovlo, ana bario ban kiano naiagagoano nalo. Ana kiano naiagagoano nalo kija abario abiovio ka janea tiniobi nalo nei. <sup>37</sup> Naruei nalo ajenio bano-o mia mabolo jouo bo. Mia iorou kano, ana nalo amison niati sinaniano nalo napano aju, ban ea basaro sarobobotu nalo aluo, abujovujo vatitigio bo. <sup>38</sup> Mia tomu nalo napano ajinan, suḡano nalo ga abokar menu veri [4,000], mia maka avuluku tire nalo vija kiritete nalo.

<sup>39</sup> Karina Yesu miila dedade ea tiniobi nalo nei abanvan bereio vonuo, mia naio ban bereio ea kialo uako, ana naio juvan vio nei, naio binime i jo bogo bulati ga ea tanobuku na buruḡara komeli na vio Makatano.

## 16

*Tomu na tortoru tai ajidom aial vremesiano*

*Mak 8:11-13; Luka 12:54-56*

<sup>1</sup> Bogo tai, ana Varisis nalo naliko Satusis nalo abinimei amial Yesu, ajidom ka alavon naio, ana nalo aberinavo “Kumemi numisidom jau kalavon vremesiano na toru tai van kumemi, napano mia jau koimaukanio ea moroano na vio mave.”

<sup>2</sup> Ana Yesu naio berdoŝe banlo, berinavo “Bogo napano mĕrenio jo batove, mia verenio kamiu kumial vio bilvili ea vio na mĕrenio jo batove eaio, ana kamiu kumijikia kuverenio ‘Mia nieta beni,’ <sup>3</sup> a bogo napano mĕrenio bavin, mia verenio kamiu kumial vio bilvili ana kumial melijo bobogio, ana kumijikia kuverenio ‘Mia yuo rivovo banei.’ ? Mia kamiu kumijikia kubitii vremesiano na ea tiniabene ruei, ka mia kuverenio mia bogo tumĕbe, mia jumĕbe ana kamiu maka kuvijikia kuvitilubar kiaku vremesiano nalo ea burumĕara bogo toru nei nojo bija kamiu nei?”

<sup>4</sup> Mia Yesu berii bunu banlo, berinavo “Tomu nalo na ajidom aial ga vremesiano nalo, abe kulo va nalo, nalo namĕa amila kodovo ban Atua, abilig taakalo ban naio, jibe ka nalo napano amila siakaiano aburo den koualo nalo. Makanio, mia kamiu maka kuvijikia kuvial vremesiano tai, mia kamiu kuvial ga napano mia riyotuba ka kiniou tavukia vremesiano na Naverialiano Jona re nua, napano Atua mila naio meul bereio.” Ana naio jumolu denlo juvanlo ajubo.

*“Kuvitkar isi na Varisis a Satusis nalo kialo”*

*Mak 8:14-21*

<sup>5</sup> Mia bogo na Yesu naliko kiano naiagagoano nalo ajumolu abano, ana abarkorov ueiyabo na toru nei aba tivelinio, ana kiano naiagagoano nalo tiniel bobogia ka

avarkar salo joko tai. Mia bogo na aboru tivelinio, <sup>6</sup> ana Yesu jian iliano tai banlo, ana naio berinavo “Kamiu kuvitkar vatitig kamiu rivu ka isi na Varisis naliko Satusis nalo kialo.”

<sup>7</sup> Ana nalo amijog iliano nei, mia nalo ajumĕa aberiio ka nalo bereio, aberinavo “?Naio mil jibe na bior maka ravarkar joko tai rimei ea vio nei koviobo?”

<sup>8-9</sup> Mia Yesu mijikia kanalo jidomiano nalo nene, ana naio ber “? Bior vaio ana kamiu kumitumĕa kumisidomii mĕlea mabomiu nalo, ka mia kito resen venia? ?Jumĕbe ana maka kuvijoglubar vite nei vo? !Kenemiu moneano kiritavaso! ? Peli kamiu tiniemiu bobogia bunu joko jumo nanua na, nabar ban tiniobi menu jumo [5,000], bija basaro solokobaro nalo na kumisonlo abujovujo? <sup>10</sup> ?Peli kamiu tiniemiu bobogia bunu joko aluo nanua na, nabar ban tiniobi menu veri [4,000] nalo, a basaro sarobobotu vio napano kamiu kumisonlo abujovujo iorou kanio? <sup>11</sup> ?Jumĕbe maka kuvijoglubar ka kiniou maka neil van kamiu ka joko? Mia neber ka kamiu bereio, kuvitkar vatitig isi na Varisis naliko Satusis nalo kanalo.”

<sup>12</sup> Mia vonganei nalo amijikia ka naio maka riverii isi na joko miyuku, mia naio jo ber avitkar batitig Varisis naliko Satusis nalo kanalo ilisibiano nalo napano mia averlogloglo kanio, napano mijikia rila toro parinio turobi ve toru, mijikia riva rila searo ea nono togio na kiano meuliano, tavukia napano isi mila ka joko.

*Pitere berial ber Yesu naio be Naverikariano memedu*

*Mak 8:27-30; Luka 9:18-21*

<sup>13</sup> Naruei Yesu nalo abatove ea tanobuku na bulukomeli na toru nei Sisiria Vilipai, mia ka bogo na naio bika den kiano naiagagoano nalo, berinavo “?Kamiu kumijog ka tomu nalo ajumĕa aberverii aber Kulorinio Kenerinio naio be kei?”

<sup>14</sup> Ana nalo aberinavo “Tomu tealo aber jau kobe Jone Baruei bereio, a tealo aber jau kobe Elaija, a tealo aber jau kobe Jeremaia, ðelina nave-rialiano dolu tai re nua nua.”

<sup>15</sup> Naruei naio bika denlo, beri-navo “?Ana kamiu, kamiu na kuber kiniou nebe kei?”

<sup>16</sup> Ana Saimon Pitere naio berdoþe, berinavo “Jau kobe Naverikariano, jau kobe Atua na meul kenerinio.”

<sup>17</sup> Ana Yesu berdoþe banio, beri-navo “Saimon, Jone kenerinio, mia ilivuiano rimeï vanso. Vite na jau koberialio, maka kulorinio riverial kaso, mia Teta napano joa vio mave, naio berial banso. <sup>18</sup> Mo jau na siamo dolu nene napano Pitere naio ber jibe nei ber ‘Veru,’ a be riano laka, ka kiniou nemialso jibe ka veru tai napano jo, a mia kiniou nevitirilar kanaku taara na lotuano nalo ea tabaþilio tibe na naruei, mia moroano na mariano maka rijikia tovulu taara na. <sup>19</sup> Mia kiniou nodu ki nalo na vetavoiano a na tetavokoiano na navenatuboiano na Atua kanano vanso, ka mia vere- nio vite napano jau koverbure ea yetemeriba nei, mia Atua na vio mave bunu riverbure kamiu ve juo, mia verenio vite napano jau kajamo kanio ea yetemeriba nei, mia Atua na vio mave naio bunu rijamo kanio kamiu ve juo.”

<sup>20</sup> Ana na Yesu ber jikili ban kiano naiagagoano nalo, berinavo “Mia kamiu kuverial re van tomu nalo ka kiniou nebe Naverikariano.”

*Yesu berial kiano mariano  
Mak 8:31-33; Luka 9:22*

<sup>21</sup> Mia jikar ea bogo na, Yesu milavon ka riverial rimeravo van kiano naiagagoano nalo, ka mia naio monoka rivavin ea vio Yerusalemo, ana ea vio na, mia tubo nalo na vio Israel, a nalo napano abe parinio kulo lu nalo, a naliko naverloglo- giano na tuboiano nalo, nalo nei naruei nalo aviniu ala lelan searo ea naio. Mia Yesu berial banlo bunu

ber mia nalo nei auetaaria naio riaro, mia bogoti ve tolu [3] nene, ana mia Atua naio rivurular naio tumolu rimeul bereio.

<sup>22</sup> Naruei Pitere biolar Yesu denlo, ana naio jikar mil jikili banio, berbu- reio, berinavo “Yesu, monoka mia Atua naio riverbure tena. Vite nalo na maka rijikia rimaluvo kaso tibe na.”

<sup>23</sup> Mia Yesu barþilig naio, ana mil jikili ban Pitere, berinavo “!Setano, kotu koalabo den kiniou! Jau ko- jona komilavon kiniou ea kanamo jidomiano napano be toro ga kiano, mia maka ve Atua kanano jidomi- ano leleio.”

*Yesu kiano naiagagoano nalo  
monoka asidom ve iakurano ga ea  
kialo tinietiiano nalo*

*Mak 8:34-9:1; Luka 9:22-27*

<sup>24</sup> Naruei Yesu ber ka kiano nai- agagoano nalo, naio berinavo “Toro napano ver jidom rimeï tu iorou ka kiniou, monoka naio sidom ve iaku- rano ga ea kiano tinieiaiano nalo, mia monokanio naio rudu kanano makolkolo, ana mo naio takisor kin- iou. <sup>25</sup> Toro napano jidom rilaluru kiano meuliano, mia naio rilaluvuio, mia toro napano rilaluvu kiano meuliano rivior kiniou, mia naio mi- jikia rivokar meuliano na be riano.

<sup>26</sup> Naruei verenio toro tai napano na rivokar saba nalo nonovio na vio yetemeriba nei riviniu, mia naio milaluvu marabo na meuliano, naio nei maka rijikia rivokar telerinio nabo tai leleio, mia iorou kanio, mia kiano saba novo nalo nei maka rijikia rivulu meran kanano meu- liano bereio. <sup>27</sup> Mia vaataro ka Kulorinio Kenerinio rimeï bereio naliko kanano nailiano nalo, mia naio rimeï vija karamano kanano miamoiano, naruei mia naio rivulu tomu nalo rive verare ka kialo iauano nalo. <sup>28</sup> Riano ga kiniou neber ka kamiu, be tomu tai nalo ajumolu ajua vio na, napano mia nalo maka ajikia aaro vo, rivano- o mia rivokar bogo napano mia aial

Kulorinio Kenerinio naio rimaluvo rimej vija kiano navenatuboiano, ka mia rimej rive tubo ka tomu nonovio.”

## 17

*Yesu niabene binimej be dolu*  
*Mak 9:2-10; Luka 9:28-36*

<sup>1</sup> Mia iorou ka bogoti ari [6] barlaka, ana Yesu buru Pitere, a Yemesi, a kuruano Jone, ana nalo veri abavin ea burusuku tai. <sup>2</sup> Bogo napano nalo aju jibe na, ana naiagagoano tolu nei amial Yesu niabene binimej be dolu, a mirano binimej merera toru jibe ka mērenio, a mñano kulumñarauo nalo abinimej amiuvu novo mia amiuvu nonovio garuei. <sup>3</sup> Naruei nalo tolu nei amial Mosis naio Elaija amaluvo bunu, ana naljuo aju amil naliko Yesu. <sup>4</sup> Ana Pitere ber ka Yesu, berinavo “Tubo, bo ka kito rotua ga vio nei. Mia ver kajamo kanio, ana mo noimñauka tobobo ve tolu ea vio nei, tai ve kanamo, tai ve Mosis kanano, a tai ve Elaija kanano.”

<sup>5</sup> Bogo napano Pitere naio jo mil kia ga vo, ana melijo tai napano merera binimej jovukolo, naruei nalo amijog iliano tai maluvo ea melijo nene, na berinavo “Nina be keneriku napano kiniou nejidom mēlea na. Kiaku jidomiano joaio na, mia kiniou najaaro mēlea kanio na. Mia monoka kamiu kumonmonea vatitig naio.”

<sup>6</sup> Ana kiano naiagagoano nalo amijog iliano nei, naruei nalo amerou mia amerou, ana nalo amijoru ea tano ana amiduvan miralo.

<sup>7</sup> Mia Yesu naio binimej ealo, ana naio mijubaluba taakalo abe tolu, ana naio ber kalo, berinavo “Kamiu kuvitumolu, kamiu kumerou re.”

<sup>8</sup> Naruei bogo napano nalo abar bulag pariparilo ajirarag bavin bereio, mia maka bunu aial tomu juo nei, mia Yesu ga takurano ju.

<sup>9</sup> Tilikiti napano nalo ajuvan burusuku nei, aju abatove bereio, ana Yesu berii kalo berburelo, berinavo “Vite napano Atua mila kamiu kumialio, mia kamiu kuverial re ka tomu tai rivano-o rivokar bogo napano Kulorinio Kenerinio rimeul bereio ea mñariano, ana ea bogo na naruei, ana mia kamiu kumijikia kuverial ka tomu nalo.”

*Nalo aberii Elaija*

*Mak 9:11-13*

<sup>10</sup> Karina naiagagoano tolu nei abika den Yesu, berinavo “?Jumñabe ana naverloglogiano na tuboiano nalo ajumñabe aber jibe nei, berinavo ‘Monoka mia Elaija naio rimej bereio tukamu vo, avona bisi ana mia Naverikariano nei naio mia riyotuba?’”

<sup>11</sup> Ana Yesu berdope banlo, berinavo “Tena ajumñabe aberverii na jibe nei, tena be riano ga na, bior Naverialiano Malakaia naio berenio jibe na ea kanano niosi ruei. Elaija monoka mia naio rimej tukamu, ka mia naio rila batitig vite nalo nonovio atu batitig ka mia Naverikariano nene naio mijikia rimej, <sup>12</sup> mia kiniou neber ka kamiu, neberinavo Elaija nene naio binimej ruei, mia tomu nalo maka avitulubar naio, a nalo maka asidomial naio. Mia ea ga bajago nene, mia ala lelan Kulorinio Kenerinio bunu tibe na.”

<sup>13</sup> Ka bogo nei, kiano naiagagoano tolu nei miralo madulu ana nalo amijikia ka Elaija napano Yesu naio jomñabe berii, naio be Jone Baruei ga.

*Yesu jitiglar niadu ea tete mēaku tai*

*Mak 9:14-29; Luka 9:37-42*

<sup>14</sup> Mia Yesu naliko nalo tolu nei aban bereio, naruei nalo amiabure tiniobi nalo napano ajua bogo na, naruei toro tai binimej minie tano ea Yesu jaano, ana naio berinavo

<sup>15</sup> “Koig, jau kobijuku bo, kiniou nejidom jau tiniem rii keneriku mēaku, nejidom kajai naio, bior mieiano tai joa naio. Mieiano nene

mila naio jomã miabulumãarmãaro va telabo, a mila lelan m̃eleia naio-o mia, mila naio jomã mijorutate ban ea sebi a ban ea uei nalo bunu. <sup>16</sup> Mia kiniou noburu naio binimeï ban kanamo naiagagoano nalo ruei, amiãaukanio bano-o, mia maka ajikia aimãauka naio rivu.”

<sup>17</sup> Ana Yesu naio mil ban kiano naiagagoano nalo, berinavo “?Kamiu na, jumãbe jibe na? Kamiu maka kuvitu sikili ea Atua leleio, bogo nonovio ga m̃a kumiavovu. ?Mia kiniou monoka noto vija kamiu rivano-o mia rivokar nagi? Mia kiniou tinieku maro ruei ka kamiu. Mo, bo ga, kamiu kuvuru m̃eaku nene rimeï van kiniou.” <sup>18</sup> Ana nalo aburu m̃eaku nene binimeï, ana Yesu janka niadu napano joa naio, berinavo “!Komoluo den naio vonganei ga!,” ana vaarakurano ga m̃eaku nei naio binimeï bo bereio.

<sup>19</sup> Ana iorou ka bogo nene, bogo napano Yesu jo naio takurano, ana kiano naiagagoano nalo abinimeï kean naio, abika denio aberinavo “?Jumãbe ana kumemi maka nuvijikia nuvititiglar niadu napano joa m̃eaku na?”

<sup>20</sup> Ana Yesu ber kalo, berinavo “Nina bior kamiu maka kuviekouo ea kiniou sikili rivare vo. Riano, kiniou neber ka kamiu, verenio kamiu kuviekouo ea kiniou ve kiritavaso leleio ga tavukia kurukuti burubako, mia verenio kenemiu viekouoiano na rive riano rivu, ana mia kamiu kumijikia kuver ka burumãara burusuku na, kuver ‘Kataluvo den vio na,’ mia naio taluvo. Mia maka titai ka mia kamiu kuvijikia re ka kamiu kuvilaio. <sup>21</sup> Mia ka natitiglariano na niadu nalo tibe nei, m̃arabo nene jibe nei: toro naio monoka rivolkouo, a naio rimodulu ka sano sinaniano. Ea bajago na ga, mia naio mijikia titiglar niadu ninio nalo na.”

*Yesu berial bereio kiano m̃ariano  
Mak 9:30-32; Luka 9:43-45*

**17:20** Mat 21:21; Mak 11:23; 1Kor 13:2

<sup>22</sup> Bogo tai ana Yesu naliko kiano naiagagoano nalo abinimeï vio takurano ea vio Kalele, ana naio ber kalo, berinavo “Vaataro ka mia adu Kulorinio Kenerinio toa tomu nalo jumãlo, <sup>23</sup> ka mia auetaãaria naio rimãaro, ana mia iorou kanio, bogoti ve tolu nene, ana mia Atua rila naio rimeul bereio.” Ana kiano naiagagoano nalo amijog iliano nei, nalo amijog bova toru laka.

*Puruveru na takis na Atua  
kunuano lu na vio Yerusalemo*

<sup>24</sup> Tilikiti napano Yesu naliko kanano naiagagoano nalo abinimeï aboru Kapeneam, tomu nalo namã abarbiji takis na Atua Kunuano Lu, nalo abinimeï kean Pitere, abika denio, aberinavo “?Jumãbe, kanamo naverloglogiano na naio jomã bulu takis na bunu, ðelina makanio?”

<sup>25</sup> Naruei Pitere berdoþe, berinavo “Nao, naio buluio.”

Naruei Pitere ban bereio ea yimo napano Yesu joaio, mia Pitere maka river iliano tai vo, ana Yesu naio mil jukamu banio, bika berinavo “Saimon, jau kosidomii von parinio tubo na yetemeriba nalo. ?Kulo be nalo napano m̃a ajumã abulu takis banlo? ?Nalo napano abe m̃aratavo, ðelina kulo dolu nalo?”

<sup>26</sup> Naruei Pitere berinavo “Tomu dolu nalo ga monoka avuluio.”

Ana Yesu berenio “Nao, jibe na naruei, a nina berenio m̃aratavo nalo na parinio tubo nalo, maka ajikia avuluio. A kiniou naruei, nebe m̃aratavo na Parinio Tubo na Yimo Lu napano memedu, mia kiniou maka nejikia novulu takis na ajumã abika denso na. <sup>27</sup> Mia bo ka kito juo rala bulag re tomu nalo na ajumã abarbiji takis, mia kito juo bunu rovuluio bo ka ga. Mo, jau kavatove ea ueiyabo, ana kosuvan taþig, mia niado nana mia kovuruio tukamu, mia keial puruveru tai ea niono, na bare ka kiado takis kito juo, mia kodu kava kovulu kanio.”

## 18

*“?Toro kei napano naio jo mave loa tomu dolu nalo?”*

*Mak 9:33-37; Luka 9:46-48*

<sup>1</sup> Ana memedu ka bogo nene, naiagagoano dolu nalo abinime memedu ka Yesu, abika denio, aberinavo “Kumemi numisidom nuvijikia: ?Toro kei na mia naio jo mave loa tomu dolu nalo jouro ea Atua kiano navenatuboiano?”

<sup>2</sup> Ana na Yesu bio kiritete tai ka rime kean naio, naruei naio mila naio jumolu ju iviso kalo, ana naio ber <sup>3</sup> “Riano, kiniou neber ka kami memedu, verenio kami kuvilig re kami, ka kenemi bajago nalo amei atavukia bajago na kiritete nei kiano, mia kami maka lele kuvijikia kumei jouro ea navenatuboiano na Atua kanano bogo tai. <sup>4</sup> Mia verenio toro na rila kanano jidomiano totano tavukia kiritete na telisu nei, mia naio mijikia rime to mave loa, tovulu tomu dolu nalo namã aju jouro ea Atua kiano navenatuboiano. <sup>5</sup> Toro na kiano jidomiano rivatove ka kiniou, mia naio saaro ka rive merevu van kiritete nalo na tertelisu na tai jibe na, nina jibe ka ga napano naio jomã jaaro ka kiniou.”

*Tiboliboiano nalo*

*Mak 9:42-48; Luka 17:1-2*

<sup>6</sup> Mia Yesu berii bunu, berinavo “Mia verenio toro tai rila kiritete nei tai ka mia naio tuvan kiniou, riviekouo ea re bunu kiniou, mia toro nene naio rivokar vironiano na jikili laka tai. Verenio aiorikar puruveru na toru tai ea burujono, ana avukuio rivatove rimadudu ea bulu niogovu, nina naio be vironiano tai na monmaio ga, mia toro na naio rivokar rivan lie vo tovulu ninei. <sup>7</sup> ! Banalo! Yetemeriba nei naio bova nonovio ruei, naio bujo ka saba nalo na ajumã amila lili tomu nalo ka mia mã nalo alaluvu kialo viekouoiano ea kiniou. Mia tiboliboiano nalo na mia atu iviso ka kami bogo nonovio, mia rivova laka van tomu

nalo na abar tibol boiano va nalo na jibe na amei van kulo dolu nalo.

<sup>8-9</sup> “A verenio jumãmo, þelina jaamo, þelina miramo, þelina vite dolu venia bunu ea kiamo meuliano, verenio vite nalo nene tai rilaso koviekouo ea re bunu kiniou, bo ka jau ketelar vite nene denso, ana kovukuio rivano. A verenio jau ketelar bajago na kariano den kiamo meuliano tibe na, mia jau komijikia kava jouro ea meuliano, a verenio jau kava jouro ea meuliano napano jumãmo, þelina jaamo, þelina miramo, þelina vite dolu venia bunu ea kiamo meuliano, verenio vite nalo nene tai rivakovio denso ruei, nina bo ga na. Mia bova laka ka verenio taniabemo momou vija kiamo bajago va momou atu rivu ga easo, mia karina avukuso kavan ea sebi na maka rijikia rivatove bogo tai ea vio na jogvaiano.”

*Jamerijiano na nunu napano milaluvu m̃arabo*

*Luka 15:3-7*

<sup>10</sup> Ana Yesu berii bunu, berinavo “Kami monokanio kuvitikar batitig kami rivu ka mia kami kuviakurano re ea kanaku kiritete nalo nei tai bogo tai. A ver makanio, ana mia kami kuvitikar kami, bior tete nalo nei abe kanaku, ana nalo abe kanalo nailiano nalo napano ajua vio mave, napano ajumã abitikar batitiglo, a nailiano nalo nene, nalo aju bogo nonovio ea Teta na joa vio mave mirano. <sup>11</sup> Naruei Kulorinio Kenerinio, kiano imãuano jibe na ga: naio binime ka rilur nalo na amilaluvu m̃arabo.

<sup>12</sup> “Kami kuviagago batitig ka tukunuano nei: Be toro tai napano be kiano nunu toromomou [100], mia nalo tai mila pariparinio ba koalabo, ana naio milaluvu m̃arabo. ?Mia toro nei naio rila tumãbe naruei? Monokanio naio tuvan kiano nunu duelimo va koveri ba koveri [99] nalo nei, atu asinan ea vio na soro bo eaio, ana mia naio monokanio riva rila von ka sirag

napano milaluvu m̄arabo a ba kovio tai. <sup>13</sup> Riano ga kiniou neber ka kamiu, bogo napano naio mileal bereio nunu nene, mia naio mijikia saaro m̄ele kanio, tovulu napano naio jaaro ka kanano nunu dolu nalo napano telabo aju bo ga, maka avarlaka m̄ele ka mia ava kovio tai.

<sup>14</sup> “Mia karamemiu na vio mave, naio bunu jibe na, naio maka sidom ka kiritete nalo nei tai rilaluvu m̄arabo riva kovio.”

*Ver kuruamo tai rila leleanso  
Luka 17:3*

<sup>15</sup> Ana Yesu berii bunu, berinavo “Avena kuruamo rila vite rimemedu re vanso, monoka jau kava keial naio, kam ve juo ga kuvitu, ana jau koverial kiano vijuku vovaiano nene ka naio. Avena naio saaro ka rijog kanamo iliano nalo, nina jibe ka kanamo iliano nalo amila merevuiano ban kamjuo bereio rui.

<sup>16</sup> Mia ver naio maka sidom ka riagago ka kanamo iliano nalo, monokanio jau kava kovuru bereio tomu dolu tai amei vijaso, ka aijaso ka kanamo iliano, tavukia napano Niosi Lu berenio, berinavo ‘Iliano nonovio monoka ve ilitusoliano na tomu ve juo p̄elina ve tolu, ka mia iliano nei tu sikili tu.’ <sup>17</sup> Mia ver kuruamo neibano naio to riilkue ka riagago vatitig rivu kaso, mia monokanio jau koverial kanano siniabu van taara na namoneano nalo, ka nalo tealu amijikia amei aial naio. Mia ver naio jikili kia ga vo, ka naio riagago vatitig re ka nalo bunu, mia kamiu kuvial naio tibe ka valauo ga tai, p̄elina naio tibe ka tomu nalo napano ajum̄a abarbijii takis, maka tomu nalo ala bilbilu nalikolo leleio.”

*Volkouano napano tomu m̄arati  
juolar ga abirakarlu eaio*

<sup>18</sup> Ana Yesu berii bunu, berinavo “Riano, kiniou neberii ka kamiu, mia verenio vite napano kamiu kuverbure ea yetemeriba nei, mia Atua na mave naio riverbureio bunu vija kamiu, mia verenio vite na kamiu

kuvijamo ka ea yetemeriba nei, mia Atua na mave naio rijamo kanio bunu kamlika. <sup>19</sup> A bereio, kiniou neber bunu ka kamiu, neber verenio tomu ve juo ea kamiu, naljuo ala ilivirakariano tai ea yetemeriba nei ka titai, ana verenio nalo abolkouo rivorio, mia Karam̄aku na mave mia naio rila tenene vanlo. <sup>20</sup> Bior ver tomu ve juo p̄elina ve tolu avior vio takurano ea siaku, mia kiniou bunu noto iviso kalo.”

*Jamerijiano na bajago na  
viekokoano*

*Luka 17:3-4*

<sup>21</sup> Naruei Pitere binimei mial Yesu, ana bika denio, berinavo “?Tubo, verenio kuruaku rila rivova van kiniou bogo nonovio, mia kiniou neviekokoa naio ve va vio? ? Monokanio riva rivokar ve va aluo, p̄elina jum̄abe?”

<sup>22</sup> Mia Yesu berdoḗe banio, berinavo “Makanio, mia jau koviekokoa re naio rivokar ve va aluo ga, mia monokanio jau koviekokoa naio rivokar duelimo va aluo va aluo bereio [70 va 7]. <sup>23</sup> Bajago na viekokoano jouro ea Atua kiano navenatuboiano, naio monokanio tibe ga na. Kamiu kuviagago ka tukunuano tai napano berii bajago na viekokoano napano berenio, berinavo: Parinio tubo tai, na naio jidom rivitii veve jabue nalo napano kiano tomu na im̄auano nalo amila jua naio. <sup>24</sup> Mia naio mila jibe na bano-o, na aburu kiano toro na im̄auano tai binimei ea naio, napano toro nei mila jabue na veru taam̄aka [1,000,000] vio ea kiano toro na toru nei. <sup>25</sup> Bogo napano abika veru den toro nei, ana naio berenio maka rijikia rivulu meran bereio jabue nene. Ana na toro na toru nei, naio ber ka kiano tomu nalo, berinavo ‘Mo, bo kanio kamiu kuvilalar naio, a kuḗiliḗili lario, ka naio ve toro na toru dolu kanano, naio riva rim̄au kurano ga ea naio. A aḗiliḗililar ka koano bunu, naliko kenerinio nalo, vija kialo saba nonovio, mo kuvar

puruveru nene rimei ka avulu bulag ka kiano jabue nene togio.'

26 "Naruei na toro nei naio mijoru kamu ea kiano parinio tubo nei jaano, ana naio jegi jouo banio, berinavo 'Jau kobe parinio tubo, koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nala von ka navulu nonovio jabue nei denso.'

27 Naruei parinio tubo nei tinienmii toro nei, ana naio biekokoa nonovio kanano jabue nei, ka mia naio rivulu kean re bunu, ana naio juvan toro nene bano.

28 "Mia bogo napano toro nene naio bano, ana naio mial kiano bilbilu tai, napano bilbilu nene naio kiano jabue tai telisu ga jua naio. Mia naio ba bokar toro dolu nei, ana naio mikiti burujono, naio berkanio, berinavo 'Monokanio jau kovulu bulag kanamo jabue na jua kiniou vonganei.' 29 Naruei kiano bilbilu nei naio mijoru ea jaano, naio mila mirano melumu kanio, jegi banio, berinavo 'Koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nemijikia ka novulu nonovio jabue nei denso.' 30 Mia toro nei naio maka sidom riviekokoa kiano bilbilu neibano, naruei naio ba mila aburu naio ban ea nalakoiano, ka naio to rivano-o mia naio rivulu bulag nonovio jabue nei, karina naio mijikia taluvo bereio.

31 "Mia bogo na parinio tubo nei kiano tomu tealoo amial bajago nei, nalo amijog bova toru kanio, ana na nalo aban ea kialo parinio tubo nei, aberial saba nalo nonovio ban naio. 32 Ana parinio tubo nene, naio bio kiano toro neibano ka naio rimei bereio ea naio, ana naio mil jikili banio, berkanio, berinavo 'Aa, jau kobe toro va kitkiti tai! Kiniou nebiekokoa nonovio kanamo burumara jabue nanua ruei, bior ke-jegi toru ban kiniou kanio, ana mila kiniou tinieku miiaso kanio. 33 ?Mia jumabe ana maka kejikia tiniem riia bunu kiamo bilbilu dolu, tibe ka na-

pano kiniou tinieku miiaso jukamu ruei?' 34 Ana parinio tubo nene naio tinien mimi lie vo, ana naio berinavo monokanio avuku naio riva toa nalakoiano, a monokanio nalo atu avar vironiano vanio-o, rivokar bogo na naio rivulu bulag nonovio kanano jabue nene."

35 Ana Yesu naio berinavo "A verenio kamiu kuviekokoa re kuruemiu nalo tulaka ve riano, ea iviso na tiniemiu momou nalo, mia karamaku na mave naio tinien ser kamiu tibe na, mia naio sian vironiano tibe ga na van kamiu."

## 19

*Yesu berii jumabe ana toro mila titig koano*

*Mak 10:1-12*

1 Bogo na Yesu berenio iliano nalo nei bisi, ana naio juvan vio Kalele naio bavin tivelinio ea tanobuku na vio Yutea, ea m̄arauei na Yortano tivelinio bano. 2 Ana tiniobi toru ajakisorio ka bogo na, mia ea vio na naio mila batitig tomu na mieiano nalo telabo abo bereio.

3 Mia Varisis nalo tai bunu ajua vio na, nalo abinimei amial Yesu ka ajidom ala von naio bereio, ana abika vikadeniano tai denio, aberinavo "? Kiado tuboiano berii vaio tivelinio ka bajago na toro mijikia titiglar koano? ?Memedu ga ka toro mijikia rila tibe na kar vite ninio ga, pelina mijikia rila kar ga vite na tortoru ga tai?"

4 Ana Yesu berdoḡelo, berinavo "Peli kamiu maka kuvijikia Atua kiano Iliano Lu na naio berenio, berinavo

'Tikariano, Atua naio jii vite nonovio, a naio jii bunu kulorinio juo, napano tinene be sumano a tinene be tira.'

5 Tena kamiu kumijikia ruei, bija bunu iliano dolu na napano berinavo

'Tibe na, toro tai rivuro den karamano naio kenieno, riva rivijurukar koano, mia naljuo ave takurano.' *Jen 2:24*

<sup>6</sup> Nina mila ana maka bunu ave juo, mia nalo abinimei abe takurano ga. Naruei vite napano Atua naio birokario, maka rivu ka kulorinio rilakorovio bereio.”

<sup>7</sup> Ana Varisis nalo nei amijog iliano nei, ana nalo abika den Yesu bereio, aberinavo “? Bo ga, ana jumabe na Mosis naio berial tuboiano na jamoiano ka mia toro mijikia rudu m̃esi na silubariano tai rije van koano, ka mia naio mijikia titiglar naio rivano?”

<sup>8</sup> Ana Yesu berdoṣelo, berinavo “Ee, ana mia beamu ka bogo na tiiano na yetemeriba naio maka tibe na, mia bior kamiu pariparimiu nalo binimei kirisikili laka, tenene na mila ana Mosis mijamo kanio jikar ea korobimiu nalo binimei, ka kamiu kumijikia kuvila titiglar kouemiu nalo tibe na. <sup>9</sup> Mia vonganei, kiniou neberii ka kamiu, ka verenio toro tai, koano naio rila siakaiano, mia toro nene mijikia rila titig koano nene. Mia verenio tira nene naio maka rila siakaiano, mia kiano sumano nene naio titiglaro, ana naio riva rivuru tira dolu, ver tibe na, Atua naio mial jibe ka toro nene naio mila siakaiano bija tira dolu nene ruei, naio milakiki tira nei napano be koano jukamu.”

<sup>10</sup> Ana Yesu kiano naiagagoano nalo aber ka naio, aberinavo “Ver bajago na soriano jikili laka jibe na, bo laka ka kito rala re bunu soriano ka kito.”

<sup>11-12</sup> Mia Yesu ber kalo, naio berinavo “Nao, be riano ka napano be tomu tealo napano mia asoro re bogo tai, jibe ka napano tealo amiyotuba mia niabele nalo abova, ṣelina tealo napano amila bulag niabele nalo, jibe ka napano ajivivi nalo, naruei nalo maka ajikia asoro. Mia tomu tealo maka asoro bior ka napano nalo ajuvan soriano ga ka amim̃au jikili ka Atua kiano navenatuboiano. Mia Iliano Lu naio berinavo bo kanio sumano a tira, ave juo asoro, a bo ka nalo ve juo atu rivu vija naljuo rivokar jukuti na

kialo meuliano nalo ve juo. Mia jau napano jau kajaaro ka iliano nei, a napano jau komial ka napano Atua naio mila jibe na banso ruei, mia bo ka kovokar sikili iliano na ea kiamo meuliano.”

*Yesu milivu ka kiritete nalo  
Mak 10:13-16; Luka 18:15-17*

<sup>13</sup> Naruei nalo tai aburu kenerilo nalo abinimei ea Yesu, ka naio rudu jumano toalo, a ka rivolkouo kalo. Mia kiano naiagagoano nalo amialio, ana nalo amil jikili ban tomu nalo nei, aberburelo, <sup>14</sup> ana Yesu berii kalo, berinavo “Kamiu kuverbure re kiritete nalo nei, kamiu kuvituvanlo amei ea kiniou, bior kiritete nalo na nalo ajavukia nalo napano aju jouro ea navenatuboiano na Atua kiano.”

<sup>15</sup> Ana naio midu jumano joa kiritete nalo nei, iorou kanio, ana naio miel bano.

*Toro m̃eaku tai napano naio be sanibaiano*

*Mak 10:17-22; Luka 18:18-23*

<sup>16</sup> Ka bogoti dolu tai, m̃eaku tai binimei mial Yesu, ana naio bika denio, berinavo “?Naverloglogiano, mia monokanio kiniou nala im̃auano novo na vabe, ka napano mia rila kiniou nemijikia nejev meuliano na jo jobo jo?”

<sup>17</sup> Ana Yesu berkanio, berinavo “? Jumabe ana kobika den kiniou jibe na, ka never im̃auano na bo tai vanso? Atua ga takurano naio bo, a verenio jau komonmonea kiano tuboiano nalo, ana mia jau komijikia kejev meuliano na bo nene.”

<sup>18</sup> Ana na m̃eaku nei naio bika denio bereio, berinavo “?Ana jau konoṃa koberii tuboiano nalo na vabe na?”

Naruei Yesu berii kanio, berinavo “Tuboiano nalo nene nei naruei, napano aberinavo: jau kouebin re toro, jau kesiaka re siakaiano, jau kovina re, <sup>19</sup> jau kala sibi re, jau kotovon karam̃amo naio koniomo, mia kosidom tomu nalo napano aju

vaataro kaso, jau kovitkar vatitiglo, tibe kanio napano jau kobitkarso.”

<sup>20</sup> Ana m̄eaku nei naio ber ka Yesu, berinavo “Tuboiano nalo napano jau kojom̄a koberenio na, kiniou nojom̄a nobokario nonovio ruei. ? Mia vite venia bereio napano naio jo kiano vo, napano kiniou maka nalaio vo?”

<sup>21</sup> Ana na Yesu berdoḡe banio, berinavo “Verenio jau kosidom ka komei komemedu rivu batitigio, rivare ka meuliano na jo jobo jo, mia jau kala tibe nei: jau kavano, koḡiliḡili bulagio ka kanamo saba nalo nonovio riviniu, ana mo jau kavar puruveru nene, kava kovioa ka taliḡasa nalo. Verenio jau kala tibe na, mia ve kanamo togogo novo ve toru ea vio mave. Mo, jau, kava kalaiio, karina jau komei katakisor kiniou.”

<sup>22</sup> Mia bogo napano m̄eaku nei naio mijog iliano nei, mia kiano iviso mijog bova toru, kiano jidomiano temi, bior naio kiano saba toru laka. Ana naio jaluvo den Yesu.

*Toro na be sanibaiano, kirisikili kija ka naio riva jouro ea navenatuboiano na Atua kanano*

*Mak 10:23-31; Luka 18:24-30*

<sup>23</sup> Naruei Yesu ber ka kiano naiaga-goano nalo, berinavo “Riano, kiniou neber ka kamiu, verenio toro tai na kiano saba toru, mia naio sidom riva jouro ea navenatuboiano na Atua kiano, mia vite nene naio kirisikili kija na. <sup>24</sup> Nao, kiniou neber ka kamiu, verenio kamele tai naio riovo dulu ea bulu mirano nitil, nina kirisikili kija, mia verenio toro tai napano kiano saba toru, naio jidom ka riva jouro ea navenatuboiano na Atua kiano, nina kirisikili laka lie vo.”

<sup>25</sup> Mo bogo napano naiagagoano nalo amijog iliano nei, nalo amiilo toru kanio, ana nalo aberinavo “? Tomnei, verenio tibe na, ana mia kei naio mijikia rijev meuliano nei?”

<sup>26</sup> Mia Yesu jirarag bitikarlo, ana naio berinavo “Nao, riano ka kulorinio maka rijikia rila kulorinio rijev meuliano nei, mia Atua ga naio mijikia rila vite nalo nonovio.”

<sup>27</sup> Naruei Pitere berdoḡe, berinavo “? Mia jum̄abe ka kumemi? Kumemi numituvan kenememi saba nalo nonovio ruei, ana kumemi nubinimei ka nuvitakisorso. ? Mia kumemi nuvijev kija vite nalo na abo tai, ḡelina makanio?”

<sup>28</sup> Ana Yesu ber kalo, berinavo “Riano ga kiniou neber ka kamiu, bogo napano verenio Kulorinio Kenerinio totano ea kiano burum̄ara jobaro lu ea yetemeriba vou nene napano mia rimei, kamiu napano kamiu kumitum̄a kumitakisor kiniou vonganei, mia kamiu kuvitutano ea burum̄ara jobaro duelimo vaarakurano ba juo [12] ka kuve boru ka bajulukuti duelimo vaarakurano ba juo [12] na Israel, tibe ka kialo parinio tubo nalo. <sup>29</sup> Mia toro na verenio tuvan kunuano, ḡeli kuruano ḡelina kuvivinieno, ḡelina karan̄ano ḡelina kenieno, ḡelina kenerinio, ḡelina kiano borotano, mia verenio naio tuvan vite nalo nei rivior kiniou ga, mia naio mijikia rivar meran bereio ea yetemeriba nei, vite nalo napano juvanlo ruei, riva rivokar ve va duelimo toromomou, mia mave ka mia naio rijev meuliano na jo jobo jo.

<sup>30</sup> “Mia tomu nalo telabo na aju mave, mia nalo atu tano, a tomu nalo na ajutano, mia nalo atu mave.”

## 20

*Jamerijiano na tomu na im̄auano nalo*

<sup>1</sup> Ana Yesu naio jo mil dolu ka ga bano, ana naio berinavo “Vite na kiniou neber vonganei, naio jibe ka bajago na Atua jom̄a mila ban tomu nalo na aju jouro ea kiano navenatuboiano. Mia kiniou never vite nei van kamiu ea jamerijiano tai, napano jibe ka: Toro na toru tai,

napano naio be boru ka jiotilikrevi na toru tai. Mia kavijo tai, viomijeni mermeravo vonga, ana naio ban ea m̃arkomeli tai ka naio rivuru tomu tai ka ava aim̃au ea kanano jiotilikrevi ka legiano nei. <sup>2</sup> Naio mial tai, ana naio berkar banlo ka puruveru tai na naio bare ka im̃auano na legiano vodolu tai, ana naio miila bulaglo ka ava aim̃au ea kiano jiotilikrevi nei. <sup>3</sup> Mia ka m̃erenio kover, ana naio ban bereio ea m̃arkomeli nei, ana naio mial tomu nalo dolu bereio, aju kurano ga, maka ve kialo im̃auano, <sup>4</sup> naruei naio ber kalo, berinavo ‘Bo ka kamiu bunu kumei kuvim̃au kija ea kanaku jiotilikrevi, mia kiniou novulu kamiu rimemedu ga.’

<sup>5</sup> “Naruei nalo nei aba amim̃au, ana iorou ka bereio, napano leri, a ea m̃erenio tolu kijeve bunu, toro na toru nei naio ba buru tom tai ka aim̃au kanano tibe na. <sup>6</sup> Mia bogo tai bereio, ka m̃erenio jumo kijeve ruei, ana naio ban bereio ea m̃arkomeli nei, ana naio mial tomu tai aju kurano ga ea vio nei kia ga vo, naruei naio ber kalo, berinavo ‘?Ka venia ana kamiu kumitu kumilakule legiano momou nei ea vio na, maka kuvim̃au tai?’

<sup>7</sup> “Naruei nalo nei aberdoṽe, aberinavo ‘Ana maka toro tai rime rivio kumemi ka nuva nuvim̃au kanano tai.’

“Naruei toro na toru nei naio ber kalo, berinavo ‘Mo bo ga, ver tibe na kiniou novuru kamiu bunu. Kamiu, kumei kuvim̃au kanaku.’

<sup>8</sup> “Mia kijeve laka, ana toro na toru nei naio ber ka kiano boru na im̃auano, berinavo ‘Mo bo ga, jau kovio tomu na im̃auano nalo na amei, ana mo jau kovululo. Mia jau kala tibe nei: ketikar ea nalo na ajikar amim̃au iorou, rivano-o rivokar nalo na abinimej ajikar amim̃au jukamu kavijo.’ <sup>9</sup> Mia bogo na nalo na ajikar amim̃auka m̃erenio jumo abinimej, ana toro na naio bululo bare ka legiano takurano momou na

im̃auano. <sup>10</sup> Mia bogo na nalo napano amim̃au jukamu abinimej ka avar kialo puruveru, aberiam̃a mia nalo avar rivavin tovulu nalo napano amim̃au ka bogo bulati ga, mia boru nei bar kialo vuluano banlo beberare ga.

<sup>11</sup> “Mia bogo na nalo amial kialo puruveru jibe ga na, mia nalo aju abar lele kuluniolo, aju amil muṽi die toro na toru nei. <sup>12</sup> Ana nalo amiila nalo tai ba bika denio, berinavo ‘Nalo napano abinimej vonganei, amim̃au ka aura takurano ga, mia kumemi numim̃auka legiano momou ea burutiniano nei. Mia kumemi numialio kobululo be verare ga ka kobulu kumemi. ?Vite na jum̃abe na?’

<sup>13</sup> “Mia toro na toru nei naio berdoṽe banio, naio ber ‘Koig, kiniou maka nala lelanso. Kito juo robirokar jukamu ruei, roberenio mia jau koiṽau legiano momou ve takurano nei, mia kiniou novuluso rimemedu kanio. <sup>14</sup> Mo verenio tibe na, ana bo ka kodu puruveru na be kanamo ana kava vonuo ga. Nina be kiaku jidomiano tai jibe na naruei, ka puruveru na nemijeve banso, kiniou nejidom nejev van nalo na abinimej maaro bunu tibe na. <sup>15</sup> ?Jau koberiam̃a mia kiniou maka nejikia nala tibe ka napano kiniou nejidom ka kanaku puruveru? ?Jum̃abe ana jau komijoku ka tomu nalo na kiniou tinieku miialo?’ Ana jamerijiano nene maaro ea vio na.”

<sup>16</sup> Ka Yesu rila nonovio kiano iliano nalo nei, naio berinavo “Ana tomu nalo napano nalo iorou, mia nalo atu kamu, a nalo napano aju kamu, mia nalo iorou.”

*Yesu berial kiano m̃ariano varolu naruei*

*Mak 10:32-34; Luka 18:31-34*

<sup>17</sup> Ana Yesu naio jo bavin ea vio Yerusalemo naruei, ana bogo napano nalo aju amiel ea m̃arabo ka abano, ana naio bio kiano naia-gagoano duelimo ba juo [12] nalo abinimej ea naio, naruei naio mil

banlo, berinavo <sup>18</sup> “Kamiau kuvia-gago vatitigio. Vonganei, kito roju rabavin ea vio Yerusalemo, ka mia vesiou re ga, ana adu Kulorinio Kenerinio toa parinio kulo lu nalo jumalo, a tomu na verloglogiano na tuboiano, ka mia atibure naio ka mia aver naio monoka rimaro. <sup>19</sup> Karina mia adu naio toa kulo Romo nalo jumalo, ka mia ayotel va ea naio, avitiv naio, mia atukukakar naio ea mǎkolkolo ka mia naio rimaro. Mia bogo napano naio rimaro ribisi, bogoti ve tolu nene, ana mia Atua rila naio rimeul bereio.”

*Yemesi naio Jone keniele bika titai den Yesu*

*Mak 10:35-40*

<sup>20</sup> Naruei Sepeti koano, naio buru kenerilo abe juo Yemesi naio Jone, abinimei ea Yesu. Naio minie yetano kamu ka Yesu jaano, naio bika denio, berinavo “Kiniou nejidom kajamo ka titai van kiniou.”

<sup>21</sup> Mia Yesu berdoŝe ban naio, bika denio “?Jau kojidom kovika vaio?”

Mia tira nei naio berinavo “Kiniou nejidom verenio bogo na mia jau kovitirilar kanamo navenatuboiano, mia kenerimemi juo nei amijikia atutano vijaso ea kanamo vio lu na jo mave laka, ka mia tinene totano tivelinio vameruo, a tinene totano tivelinio mal.”

<sup>22</sup> Mia Yesu berdoŝe banlo, berinavo “Kamiau maka kuvijikia tena mia kuvitumǎa kuvikano na. ? Jumabe, kamjuo kuber kubare ga ka romunu bitiran ea baja na jaleleano na mia kiniou monokanio nomunu eaio?”

Ana naljuo nei aberinavo “Ee, kumemi juo nubare.”

<sup>23</sup> Mia Yesu naio berii ka tomu juo nei, berinavo “Mm, be riano ka kamjuo bunu kumunu ea kanaku baja na jaleleiano nene, mia tena kamjuo kubikano na, ka mia kamiau kuvitutano rivija kiniou ea jumaku ve juo, nina maka ve kanaku ka mia nesian van kamjuo. Vio nalo na

jibe na, abe nalo na ga karamǎaku mila batitig ruei ajurorealo, kanio napano naio berkar ruei banlo berii mia nalo atutano eaio.”

*Kulorinio Kenerinio binimei ka rimau tomu nalo kanalo*

*Mak 10:41-45*

<sup>24</sup> Bogo napano naiagagoano due-limo [10] dolu nene amijog vite na, mia nalo tiniel jer kurualo juo [2] nei. <sup>25</sup> Naruei Yesu biolo ka amei ea naio ka naio ril vanlo, naruei naio berinavo “Kito romijikia ruei bajago na tomu nalo napano maka amonea Atua. Kito romial tubo nalo bija tomu na tortoru na yetemeriba nei, nalo ajidom avututua kulo dolu nalo ka atutano kalo tulaka ga. <sup>26-27</sup> Mia kamiau kiaku naiagagoano nalo, kenemiu bajago tibe na re. Verenio kamiau tai sidom ka naio rimei ve toro na toru ŝelina naio rive kenemiu navurimǎaraboiano, mia mǎarabo nene jibe nei: monokanio toro nene naio rimei tibe ka toro na rimau kenemiu tai. <sup>28</sup> Kulorinio Kenerinio naio mila jibe naruei, ka naio maka rimei ka mia tomu nalo ala imǎuano na ka mia aija naio, mia naio binimei ka rila imǎuano na ka mia naio rijailo, a kanio rijamo ka kiano meuliano ka rivulu bulag tomu nalo ve telabo.”

*Yesu milarur merebono juo*

*Mak 10:46-52; Luka 18:35-43*

<sup>29</sup> Ka bogo nene Yesu naliko kiano naiagagoano nalo aju Jeriko, mia bogo napano nalo ajaluvo den komeli na, mia tomu nalo telabo laka ajakigsorlo. <sup>30</sup> Naruei merebono juo, napano nalo ajutano ea ikimǎarabo. Mia bogo napano naljuo amijog ka tomu nalo aju amiolu juva aberinavo Yesu jo miel ea mǎarabo binimei, ana na naljuo abio jouo, aberinavo “!Tubo o, jau Teviti kiano bajulukuti, kumemi juo numisidomso tiniem riia kumemi!”

<sup>31</sup> Naruei tomu nalo amil jikili banlo, aberinavo “Kuvuetuba re, tomjuo.”

Mia tomjuo nei abio dolu ka ga, nalo abio jouo mave aberinavo “! Tubo, jau Teviti kiano bajulukuti, tiniemriia kumemi juo!”

<sup>32</sup> Ana na Yesu naio jikil ju m̄arabo, ana naio bio tomjuo nei, naio ber kalo, berinavo “?Tomjuo, kami kumisidom ka kiniou nala tum̄abe ka kamjuo?”

<sup>33</sup> Ana naljuo nei aber kanio, aberinavo “Tubo, jau kobijuku bo, kumemi juo numisidom ka mirememi rivu, ka mia nuvijikia ka nuvisirarago.”

<sup>34</sup> Ana na Yesu tinien miialo, ana naio jokol tomu juo nei miralo, vaarakurano nalo amial vite nalo ea bogo nei, ana nalo ajumolu ajakisor Yesu abano.

## 21

*Yesu binimej boru Yerusalemo  
Mak 11:1-11; Luka 19:28-40; Jone  
12:12-19*

<sup>1</sup> Vonganei, Yesu nalo aju abinimej vaataro ka Yerusalemo naruei, mia beamu kanio nalo amaluvo ea m̄arkomeli tai, siano Petevas, napano naio joa suku na aberii Suku Na Buruolivi. Naruei Yesu miila kiano naiagagoano naljuo nei, berinavo <sup>2</sup> “Kamiu kuvan ea m̄arkomeli yako, mia verenio bogo na kamiu kuva jouro eaio, mia kamiu kuvial togki tai amiadikario ju, naio ju bija kirikiti. Ana kamiu kuvijubar lario, ana kuvurulo amei van kiniou ea vio nei. <sup>3</sup> Avena verenio toro tai ril van kamiu kanio, mia kamiu kumijikia kuverii kanio, kuverenio ‘Kiado tubo naio jidom temeul juo nei ka ala kiano iñauano tai’ ana bogo napano kamiu kuver iliano nei, mia ve vaarakurano ga naio mijikia tuvan temeul juo nene van kamiu.”

<sup>4</sup> Tena miyotuba jibe na ka rila iliano na naverialiano naio berii nua ruei rimej rive riano, napano naio berenio, berinavo

<sup>5</sup> “*Kamiu kuvio ka kulo Saion nalo, kuverinavo ‘Kuvialio, vonganei kenemiu parinio tubo naio jo binimej ea kamiu.*

*Naio be toro tai napano kiano jidomiano melumu batove ga, mila naio midu togki ga, togki tai napano telisu ga, napano naio be tete kia ga vo.’”* *Sek 9:9*

<sup>6</sup> Naruei kiano naiagagoano juo nei abano, amila jibe ka napano Yesu berenio. <sup>7</sup> Ana bogo napano naljuo aburu togki nei bija kirikiti abinimej, naruei nalo abisi kanalo kulukoti ea togki juo nei taakalo, mia Yesu naio ba jotano mave ea na telisu nene. <sup>8</sup> Mia tomu nalo telabo abisi kanalo kulukoti nalo ea m̄arabo labo, a nalo tealoo aje kokorov m̄am̄ali abar abinimej abue ka Yesu kiano togki mijikia riel ealo. Tibe na, jibe ka nalo amila ka nalo avatove ka Yesu, tibe kanio naio be parinio tubo na toru tai. <sup>9</sup> Ana nalo aju amiel ka ava jouro ea vio Yerusalemo, ana tiniobi toru aju kamu ka Yesu bija nalo na ajakisor naio, nalo aju abiovio jouo jibe nei, aberinavo

Aiou bo mia bo laka  
“!Kito ravamenea naio napano be  
Teviti kiano bajulukuti nei!

*Atua Soḻi, jau keilivu ka ninej napano  
naio binimej ea siamo.*

*Kamiu napano ea mave laka,  
kamiu bunu kuvilivu ka naio.”*  
*Iouano 118:26*

<sup>10</sup> Mia bogo na Yesu naio ba jouro ea vio Yerusalemo, ana tomu nalo tinielo mudulo, amila iliano telabo, nalo aju abivika denlo aberinavo “?Toro na naio be kei?”

<sup>11</sup> Mia nalo napano abinimej bija Yesu aberdoḻelo jibe nei, aberinavo “Nina naio be naverialiano napano naio maluvo ea m̄arkomeli na Nasarete ea vio Kalele, na naio siano Yesu.”

*Yesu mijil bulag tomu nalo na  
ajuñña aḻilivili ka saba nalo ea Atua  
kunuano lu*

*Mak 11:15-19; Luka 19:45-48;  
Jone 2:13-22*

<sup>12</sup> Ana na Yesu bavin ea Atua kunuano Lu, ana bogo nene naio mial ka be tomu telabo napano ajua m̄arsuḻiki na yimo nene. Nalo na ajum̄a amila iñauano na avuru

veru, nina ea tivelinio ea ijaiano a sida nalo na ea Yimo Lu nei, mia nalo ajumã amijukubin tomu nalo toru. Mia bogo na Yesu mial vite nei, naruei naio maka saaro ka leleio. Naruei naio ba mijil bulaglo, a naio javu bulag kialo barobaro nalo napano ajumã abar bereverei ka puruveru eaio, a naio buku bulag kanalo iesi nalo namã aþilivili ka sibo. <sup>13</sup> Naruei naio berii kalo, berinavo “Atua naio berenio ea kiano Iliano Lu, naio berinavo ‘Mia averenio Kunuaku Lu naio ve yimo na volkouano,’ mia kamiu kubilig lario ruei binimei be buluvae na tomu na vinauano nalo.”

<sup>14</sup> Naruei bogo na Yesu naio joa kia ga Atua Kunuano Lu nei vo, ana tomu na miralo bono a tomu na jaalo be kiri kokouro a javuluku milalo nalo abinimei ea Yesu, naruei naio milalo abo bereio. <sup>15</sup> Mia tomu na tortoru na kulo lu nalo kialo, naliko naverloglogiano na tuboiano nalo, amial Yesu kiano imãuano novo nalo nei, a amijog bunu kiritete nalo ajumã abiovio kia ga vo, aberinavo “!Bo mia bo! !Kito ravamenea naio napano be Teviti kiano bajulukuti tanie!,” naruei tomu nalo na tortoru nei tiniel mimi toru. <sup>16</sup> Nalo tiniel mimi jibe na, ana aber ka Yesu, aberinavo “?Ei jumãbe, jau komijog iliano namã ajumã aberenio na?”

Naruei Yesu naio berdoþe banlo, berinavo “Ee, kiniou nomijogio kiana. Ana kiniou nemialio jibe ka maka leleio kamiu kuvuluku Iliano Lu na Atua kiano napano naio berenio, berinavo

*‘Atua o, mia jau komijikia kala kiritete nalo, vija nalo na amidomudomu kia ga vo, avameneaso rivu.’* ” *Iouano 8:2*

<sup>17</sup> Naruei Yesu juvan nalo na, ana naio ban ea m̃arkomeli na telisu na Betani, naio ba monmelio ea vio na.

*Buruiesi tai napano makanio takou*

*Mak 11:12-14,20-24*

<sup>18</sup> Mia Yesu monmelio ea vio na, mia viomijeni kavijo, ana naio jidom ka rivan bereio Yerusalemo, mia naio jo miel ban jibe na, mia naio mijog jijerio. <sup>19</sup> Ana naio mial buruviki tai ju ikiñarabo, m̃ati telabo, mia maka m̃arati tai tuaio. Bior maka ve m̃arati tai tibe na, ana Yesu mil ban buruiesi nei, naio berinavo “Jau katakou re bunu bereio.” Mia bogo napano naio mil jibe na, vaarakurano ga buruviki nei naio mekekeu menoko nonovio.

<sup>20</sup> Ana kiano naiagagoano nalo amial buruviki nei naio menoko jibe nei, ana nalo amagmagodu toru, ana nalo abika den Yesu, aberinavo “?Vaio mila buruviki na menoko soþeli jibe na?”

<sup>21</sup> Naruei Yesu berdoþe berii kalo, berinavo “Riano ga kiniou neberii ka kamiu, verenio kamiu kuvitu sikili ea kiniou, ka mia kenemiu jidomiano riveve juo re, mia kamiu bunu kumijikia kuvila tibe na, mia kamiu kumijikia kuvila bunu nana mave lie vo ka ñinei. Verenio kamiu kuver ka burum̃ara suku na, ka naio tumolu tabujo rivan ea tei, mia naio rila tibe na. <sup>22</sup> Mia verenio kamiu kuvitu sikili ea Atua, ka mia kamiu kumonea riano, mia kamiu kumijikia kuvijev vaio napano verenio kamiu kubolkouo, kuvikanio.”

*Navuriñaraboiano nalo na Israel ajidom averbure Yesu*

*Mak 11:27-33; Luka 20:1-8*

<sup>23</sup> Mia bogo na Yesu ban bereio jouro ea burusio na Atua Kunuano Lu, naio ba jo berloglog tomu nalo bereio. Mia parinio tomu na tortoru na kulo lu nalo bija navuriñaraboiano na Israel abinimei ea naio abika denio, aberinavo “?Jau kojomã komila saba nalo na ea kei siano? ?A kei naio mijamo ka banso ka jau kala tibe na?”

<sup>24</sup> Ana Yesu berdoþe berii kalo, berinavo “Mo kiniou bunu nejidom nevika vikadeniano tai bunu den kamiu. Ver kamiu kuverdoþe kanaku vikadeniano, ana mo mia

kiniou neverialio ka kamiu ka kei napano naio mijamo ka kiniou ka nala saba nalo nei. <sup>25</sup> Mo kanaku vikadeniano jibe nei: ?Varueiano na Jone naio mila ban tomu nalo nanua, naio be tena Atua jian ban Jone ka naio mijikia rila, þelina tomu nalo ga aber kanio?”

Yesu kiano vikadeniano mila nalo abilvilii ealo kanio, mia aberenio “?Mia kito rover tunþabe ka naio? !Rovitikario! Verenio kito rover varueiano na Atua naio berii ka Jone, monokanio mia toro nei naio rivika kito river jumþabe ana maka romonea Jone. <sup>26</sup> Mia maka rejikia rover varueiano na tomu nalo ga aberii ka Jone, ver tibe na þeli mia tomu nalo na mia nalo ala titai ka kito kovio na, bior nalo amonea Jone ruei ka aberenio naio be Atua kiano Naverialiano riano tai.”

<sup>27</sup> Kialo jidomiano nalo jibe nei mila na nalo amiolu aber ka Yesu jibe nei ga, aber “Kumemi maka nuvijikiaio.”

Naruei Yesu berenio “Mo bo ga, mia kiniou bunu maka nejikia neverial ka kamiu ka kei naio mijamo ka ban kiniou ka nala saba nalo nei.”

### *Jamerijiano na toro tai naliko kenerinio suþano juo*

<sup>28</sup> Ana Yesu berii bunu kalo, berinavo “Kamiu kuvisidomii von tukunuano nei. Toro tai kenerinio suþano juo, naio berii ka motoru nene berenio ‘Keneriku, banei mia jau kava koiþau ea kiado jiotilikrevi.’

<sup>29</sup> “Ana tete nene naio berdoþe berenio ‘Eau. Kiniou maka nosidomio.’ Mia iorou kanio, kiano jidomiano biligio, ana naio ba miþau jibe ka napano karamþano berkanio.

<sup>30</sup> “Mia karamþalo nene naio jo jidomii berinavo mia kenerinio nei mia naio rivan re, naruei naio ba mial kenerinio maratoru nene, naio berenio iliano nei ban naio, naruei kiritete nei berdoþe kirinovo ban naio berinavo ‘Bo ga, teta.’ ”

<sup>31</sup> Ana Yesu bika denlo, berinavo “?Naljuo nei, na vabe nene naio mila jibe ka na karamþalo jidomio?”

Nalo aberdoþe aberinavo “Mortoru.”

Ana Yesu berii kalo, berinavo “Tenene na. A riano kiniou neber ka kamiu, tomu na bova nalo jibe ka tomu na abarbiji takis, bija tire nalo na mþarabo nalo, nalo naruei aju abinimei jouro ea Atua kiano navenatuboiano, aju abiliglo ruei, mia kamiu kumitu iorou maaro kalo ga ruei. <sup>32</sup> Bogo na Jone Baruei naio binimei nei, berloglog kamiu ka bajago na mþarabo na memedu, mia tomu na bova nalo nei amonea naio. Mia kamiu bunu, kamiu kumial vite nalo nei, mia maka leleio kuvilig kamiu ve riano, ka kumonea naio leleio.”

### *Jamerijiano na jiotilikrevi tai Mak 12:1-12; Luka 20:9-19*

<sup>33</sup> Mia Yesu mil kia ga vo, naio berenio berinavo “Kamiu kuviagago rivu ka jamerijiano dolu tai, napano berii toro na toru tai, bija kanano jiotilikrevi tai. Toro nei mila batitig kiano vio nei, mila siokoa tai jeriko nonovio jelifiv, a naio miþauka kanano vio tai ka rivie bulag vati mþarkrevi, a naio miþauka bunu kanano burutili yimoliu tai ka avieii avavin atu mave ka asirarag kuku ka jiotilikrevi nei.

“Mia bogo tai, ana toro na toru nei naio jidom riel kiki kija rivan ea buruvenuo dolu, ana naio juvan kanano jiotilikrevi ban kulo dolu nalo tealo, ka mia amei aiþau eaio, ka mia avulu van naio. <sup>34</sup> Naruei toro na toru nei naio ba jo laka o-o, karina naio mial ka vonganei bogo na mþarati krevi meruo naruei. Ana naio miila kiano tomu tealo ka avan bereio ea nalo napano ajua jiotilikrevi na kanano nei, ka avar puruveru na krevi nalo nei togio napano tomu dolu nei monokanio avulu vanio kanio. <sup>35</sup> Mia bogo na kanano tomu nalo nei abinimei,

tomu dolu nalo neibano amuelo, napano mia nalo tai abitivio, dolu nene ajukubin naio m̃aro, a dolu bereio ajubabinio ka puruveru m̃aro.

<sup>36</sup> “Mia toro na toru nei naio miila kiano tomu dolu nalo bereio nalo telabo kija, mia nalo nei amila bere ga bajago nei kalo bereio. <sup>37</sup> Naruei toro na toru nei naio jo jidomii m̃elea kialo bajago nam̃a ajum̃a amilaio, ana naio berenio, berinavo ‘Monoka kiniou neiila keneriku garuei rimemedu ka naio rivano, monoka mia nalo avatove ka naio,’ ana naio miila kenerinio bano.

<sup>38</sup> “Mia bogo napano nalo amial naio, nalo aju aberverii kalo aberinavo ‘Nina naio be toro na toru kenerinio na kito rava roue bin naio rim̃aro, ka mia romijikia rodu jiotilikrevi na, mia rudu tibe ka karam̃ano kiano jajum̃ano ve kanado.’ <sup>39</sup> Naruei nalo abano aba kakario kirisikili ana aburio ba tavio ka jiotilikrevi nei ana nalo amuebinio m̃aro.”

<sup>40</sup> Naruei Yesu bika berinavo “? Bogo napano toro na toru na jiotilikrevi nei naio rimeii bereio, mia naio rila tum̃abe ka nalo na ajum̃a amim̃au ea kanano jiotilikrevi nei?”

<sup>41</sup> Nalo aberdoŝe banio, aberinavo “Kulo va nalo na, mia toro na toru nei naio ruebinvinlo, am̃arm̃aro sel ea bajago na jogdedeiano tai. Iorou kanio, ana mia naio rudu kiano jiotilikrevi toa kulo dolu nalo jum̃alo, ka mia amijikia avulu van naio rimemedu ka bogo nene.”

<sup>42</sup> Naruei ana Yesu berii kalo berinavo “Ea iliano Lu tai napano Atua kiano, be iliano tai jibe nei napano naio berenio

*‘Puruveru na, tomu na amila yimo aberenio naio bova abukuio ban ruei,  
mia vonganei puruveru nene naio binimeii be puruveru na bo tai ka bokar sudu na yimo ka rudukar yimo sikili rivu.*

*Tena Atua na jo mave laka naio milaio, mia kumemi numialio bo laka.’ Iouano 118:22*

“? Mia kamiu iliano nei kamiu kubuluku bogo tai ruei ŝelina makanio vo?”

<sup>43</sup> “Mia kiniou neberii ka kamiu, mia Atua rudular kiano nave-natuboiano den kamiu, ana mia naio rudu van kulo dolu nalo na kialo meuliano nalo amijikia avar m̃arati novo nalo rivare ka mia amijikia atu jouro eaio. <sup>44</sup> Mia verenio toro tai rijoru ea puruveru nei, mia puruveru nene tiviniege-niege niabene, rivurboŝeio, ŝelina verenio puruveru nei rijoru mave ea toro tai, mia puruveru nene tuba kitkiti toro nene mia rim̃akitkit vatitigio.”

<sup>45</sup> Mia bogo napano kulo lu nalo nei naliko Varisis nalo amijog Yesu kiano jamerijiano nalo nei, mia nalo amijikia ka naio jo beriilo ga. <sup>46</sup> Mia bogo napano nalo ajidom ka avokar naio, mia nalo amerou ka tomu nalo, bior tomu nalo amonea naio ruei ka naio be Atua kiano Naverialiano tai.

## 22

*Jamerijiano na jokoluolu na soriano*

*Luka 14:15-24*

<sup>1</sup> Naruei, Yesu mil ka jamerijiano banlo bereio, naio berinavo <sup>2</sup> “Atua kiano bajago na jom̃a bio tomu nalo ka amei jouro ea kiano nave-natuboiano, naio jibe nei: Parinio tubo tai napano naio mila batitig sinaniano na toru tai ka rila jokoluolu na soriano ka kenerinio. <sup>3</sup> Naio miila toru ka tomu nalo telabo ruei ka atu rorea ka mia nalo amei ea jokoluolu nene, mia bogo napano naio miila kiano atevi nalo ka avuru tomu nalo nene amei, mia tomu nalo nei maka bunu asidom ka amei. <sup>4</sup> Naruei parinio tubo nei ber ka kiano atevi dolu nalo, berinavo ‘Kamiu kija kuan bereio, kamiu kuverii kanaku iliano nei vanlo, kuverenio romue buluku ruei bija temeul dolu nalo napano amijabojabo bo, mia saba nonovio na sinaniano nei binu ju batitig bo ruei. Kuver kalo monokanio nalo amei aiasol kito ea jokoluolu nei.’

<sup>5</sup> “Ana nalo abano aberii kalo jibe nei, mia nalo nei amiakurano ea ga parinio tubo nei kanano iliano, aju amila ga kialo jidomiano nalo. Tai bavenei ea kanano tiniavio, mia dolu jo bitikar kiano yimo na v̄ilv̄iliano, <sup>6</sup> a nalo tealobakakar parinio tubo nei kiano atevi nalo, amila lelanlo, amuebinvinlo amarmaro. <sup>7</sup> Naruei parinio tubo nei naio tinien mimi toru, ana naio miila kiano tomu nalo na mira nalo abano, amuebinvin kulo va nalo napano amisebi kunualo a kialo komeli bunu.

<sup>8</sup> “Naruei parinio tubo nei naio berii ka kiano atevi nalo, berinavo ‘Siniano nei ju batitig bo ruei, mia nalo na kiniou nobiolo ruei ka amei avijurukario, nalo maka bunu avu ka amei, mia kito rotuvanlo. <sup>9</sup> Kiniou nejidom kamiu kuvitakii m̄arabo sesa dolu nalo mia toro kei napano verenio kamiu kuvilealio, mia kamiu kuvikalo ka nalo amei ea jokoluolu nei.’ <sup>10</sup> Naruei kiano atevi nalo nei abano, nalo amila jibe ka napano naio berii kalo, ana aburu tomu nalo abinimei, bekurano ka tomu nalo na abo p̄elina nalo na abova, nalo amei tibe ga na, ka nalo aison vatitig vio na jokoluolu nei rivujo.

<sup>11</sup> “Mia bogo napano nalo aju jouro ea vio nei ruei, mia parinio tubo nei naio binimei ka rivanjumano nalikolo, mia ka bogo na naio mial toro tai napano naio maka riya kulumarauo na bo tai napano beberare ka jokoluolu nei, mia naio miya kulumarauo p̄ilipili ga. <sup>12</sup> Naruei parinio tubo nei naio bika den toro nei, naio berinavo ‘?Koig, jumabe ana jau kobinimei joomo nei, ana maka keya m̄amo kulumarauo na bo na jokoluolu nei tai?’ Mia naio niono buru maka bunu rijikia river titai. <sup>13</sup> Naruei parinio tubo nei naio ber ka kiano atevi nalo, berinavo ‘Kamiu kuviorokar jumano ve juo a nalo ve juo, ana kuvuku naio riva tavio, ea vio na melijokouo, ea vio na mia naio

to teg tulaka a naio ser m̄arjuvono eaio.’”

<sup>14</sup> Ana na Yesu berenio, berinavo “Atua bio tomu nonovio, mia maka ve telabo napano naio bijauialo ka nalo ave kiano.”

*Vite na be Atua kanano a vite na be Sisa kanano*

*Mak 12:13-17; Luka 20:20-26*

<sup>15</sup> Naruei Varisis nalo abano ka alavon ka aleal vikadeniano nalo na jikirkili tai ka alavon Yesu eaio, ka napano mia naio rijikia re ka riverdoṗelo eaio. <sup>16</sup> Bogo na aberioo bisi, ana amiila kialo naiagagoano tai, naliko kulo dolu nalo na taara na Erot kiano, abinimei ea Yesu. Ana nalo nei amijubolbolili ka ilisibiano novo nalo, berinavo “Yesu, kumemi numijikia ka jau kobe naverloglogiano, jau kobe toro na memedu tai. Kiamo iliano nalo abiniu abe riano, a jau kojo koberloglog tomu nalo ka bajago nalo na Atua naio jidomio. Mia jau maka kejikia kovitii ga tomu tai, mia jau kobitii tomu nalo abiniu abe verare ga. <sup>17</sup> ?Tenene na, kumemi numisidom jau kover von ka kumemi, ka ea kiado tuboiano, naio berii jumabe? ?Memedu ka kito kulo Ju nalo rovalu takis van Sisa, napano parinio tubo na vio Romo, p̄elina maka rimemedu ka tibe na?”

<sup>18</sup> Mia Yesu naio mijikia ka nalo ajidom ala kiki naio ga, ana naio berenio “Kenemiu iliano nalo kirinovo mia kirinovo, mia kenemiu iviso nalo kirivova jono ruei. ? Kamiu kumitu kumila von kiniou jibe na ka venia? <sup>19</sup> Mo bo ga, kamiu kuvudu puruveru na takis tai rimei van kiniou.”

Naruei nalo amidu tai binimei ban naio, <sup>20</sup> ana na Yesu bika denlo, berinavo “?Kei mirano nei joa puruveru nei? ?A sio nei be kei siano?”

Ana nalo aberenio, berinavo “Sisa mirano na a siano na bunu.”

<sup>21</sup> Naruei naio berii kalo, berenio “Mo, vite napano be Sisa kanano, kuvar van Sisa. Mia vite napano be Atua kiano, kuvar van Atua.”

<sup>22</sup> Bogo na nalo amijog iliano nei, nalo amiilo toru kanio, ana nalo ajuvan Yesu ajaluvo den naio abano.

*Tomu nalo na aňaro, mia ameul bereio*

*Mak 12:18-27; Luka 20:27-40*

<sup>23</sup> Ea bogoti nene ga, kulo Satusis nalo tai abinimei ea Yesu, nalo ajidom avika naio ea tivelinio na vite napano nalo amonea jikili ea naio, napano nalo amonea aberinavo tomu nalo na aňarmňaro maka bunu ajikia ameul bereio ea bogo na tagaňiano. Ka tenene, nalo abika Yesu jibe nei, aberinavo <sup>24</sup> “Yesu, jau kobe naverloglogiano, kumemi numisidom nuvika denso, ka juňabe ka iliano tai napano tormoruo Mosis naio berenio jukamu nua ruei. Naio berinavo ‘Verenio toro tai riňaro den koano, maka ve kenerilo tai vo, mo kuruano monokanio soro ka taanou nene. Ea bajago na, mia naljuo ve kenerilo ka mia rivokar toro na űaro ruei siano.’ <sup>25</sup> Naruei ea kenememi űaratavo tai, tomu aluo napano abe kurualo. Motoru nene naio joro, karina naio űaro den koano napano maka ve kenerilo tai, ana kuruano maratoru naio buru tira nene. <sup>26</sup> Naruei, kuruano na toru naio bunu űaro den tira neibano, a nana lieie kaniao jibe na bunu, bano-o bokar kurualo aluo, nene abiniu amila bajago takurano ga. <sup>27</sup> Mia iorou kalo abiniu aňarmňaro tira nei bunu űaro. <sup>28</sup> Naruei kumemi numisidom jau koverial van kumemi vite nei: ea tagaňiano, bogo napano aberii tomu nalo ameul bereio, mia tira nei ve kei koano, bior naio joro ruei ka kurualo aluo nei abiniu?”

<sup>29</sup> Naruei Yesu berenio “Peli ga, kenemiu jidomiano jokoro, bior kamiu maka kuvijikia vaio napano Atua kiano Iliano Lu naio berenio, a kamiu maka kuvijikia vaio napano kiano moroano na toru naio mijikia rilaio. <sup>30</sup> Bogo napano tomu nalo ameul bereio, mia atibe ka nailiano nalo na mave ga, mia bajago na

soriano naio maka bunu. <sup>31-32</sup> Ana ea tivelinio na meuliano bereio nei, be Atua kanano Iliano Lu tai naio jo napano naio mijikia rijai kito ea vio nei, űeli kamiu maka kuvulukuio vo? Iliano na naio berenio jibe nei berinavo ‘Kiniou nebe Epraamo a Aisak a Yakovo kialo Atua.’ ? Ana iliano na naio berenio venia? Nalo tolu nei aňaro ea yetemeriba nei bogo be nua ruei, ana yuka telabo barlaka ana Atua berii vonga iliano nei, ka naio be kialo Atua. Jibe na, ana kanano iliano nei naio jiloglog ka nalo tolu nei aňaro ea yetemeriba, mia nalo aju ameul ea naio kia ga vo. Atua maka sidom ka kanano tomu nalo ave tomu na aňarmňaro ga, mia naio jidom ka naio rive Atua na tomu nalo na ameul.”

<sup>33</sup> Ana bogo napano tiniobi nalo amijog Yesu kiano iliano nei, nalo amiilo toru ka vite nalo nei napano naio joňa berlogloglo kanio.

*Tubeiano juo na tortoru*

*Mak 12:28-34; Luka 10:25-28*

<sup>34</sup> Telikiti napano Varisis nalo amijog ka Yesu mila Satusis nalo maka bunu ajikia aver titai, ana nalo abior telisu beamu vo karina abinimei ea Yesu, nalo bunu ajidom ala vonio. <sup>35</sup> Naruei nalo tai napano naio be masou ka Tubeiano, naio bika vikadeniano tai den Yesu, berinavo <sup>36</sup> “?Naverloglogiano, kiniou nejidom ka jau koverial von, ka ea iliano nonovio napano ajua kiado Tubeiano, na vabe nene napano naio toru, jo mave jovulu dolu nalo?”

<sup>37</sup> Ana Yesu ber ka toro nei berinavo “Iliano Lu berenio jibe nei, berinavo ‘Atua Soűi napano be kanamo Atua, jau monokanio kosidom naio ka tiniemo momou, ka kiamo meuliano momou, ka kiamo jidomiano momou.’ <sup>38</sup> Nina naruei napano naio be tubeiano na be moti, a toru laka bunu. <sup>39</sup> A tinene kanio, napano naio toru bunu jibe ka napano jukamu nene,

na naio berenio, berinavo ‘Mia jau monokanio kosidom tomu nalo napano aju vaataro kaso, kala rivu vanlo, rivare ka napano jau kojidomiiso.’<sup>40</sup> Tuboiano juo nei, nalo abe burupati na tuboiano dolu nalo nonovio napano Mosis kiano, bija Naverialiano nalo kialo iliano bunu, napano ajua kiado Niosi Lu nei.”

*Naverikariano naio be tormoruo Teviti kiano Atua*

*Mak 12:28-34; Luka 10:25-28*

<sup>41</sup> Naruei ka bogo nei mia Varisis nalo aju vio takurano naliko Yesu, ana naio bunu bika vikadeniano tai denlo, berinavo <sup>42</sup> “?Ea kenemiu jidomiano nalo aberenio mia Naverikariano rimaluvo ea kei kiano bajulukuti?”

Mia nalo aberii kanio, aberinavo “Naio ve tormoruo parinio tubo Teviti kiano bajulukuti tai.”

<sup>43-44</sup> Naruei Yesu bika bereio denlo, berinavo “?Ee, kamiu kuberiano ga na, ana jumabe ana Niununo Lu joa Teviti, naruei Teviti mil, berenio

*‘Atua Soři naio berkanio kiaku Tubo, naio berinavo*

*“Jau koto tano tivelinio vameruo ka kiniou, rivano-o mia kiniou nala kiamo uolu nalo amei atibe kanio yebe sesa na kobijankon jaamo eaio.” Iouano 110:1*

“Ea vio na naruei, kito romialio ka napano Teviti naio jo bio naverikariano nene berinavo naverikariano naio be kiano Tubo ruei.<sup>45</sup> ? Mia bior Teviti naio berii jibe na, jumabe ana kamiu kumitumia kuber Naverikariano nei naio miyotuba ea Teviti, ana naio be kiano bajulukuti tai ga?”

<sup>46</sup> Naruei maka toro tai rijikia river iliano tai van Yesu. Mia jikario ea bogo na, mia maka bunu toro tai rijikia rila von Yesu ea navikadeniano nalo.

## 23

*Yesu mil jikili ban navurim̄araboiano na nalotvano*

*Mak 12:38-39; Luka 11:43,46, 20:45-46*

<sup>1</sup> Mia ka bogo na, ana Yesu mil ban tiniobi, naliko bunu kiano na-iagagoano nalo, naio berinavo <sup>2</sup> “Beriano ka vonganei, naverloglogiano na tuboiano a Varisis nalo, nalo amidu Mosis jeleigio kamia aberial nioti na tuboiano na Atua kanano. <sup>3</sup> Mo verenio tibe na, ana tenene na kamiu monokanio kamiu kumonmonealo, kamiu kuvila tibe ka napano nalo aberenio. Mia kamiu kuvitakii re kialo bajago, bior nalo maka atumia ala tenalo namia aju aberio ka tomu dolu nalo. <sup>4</sup> Nalo aju aburonkar bereio tuboiano sesa nalo telabo na nalo ga amilaio, amila jikili laka, mia nalo ajutua tomu nalo ka aiagago kalo. A nalo aju amila im̄auano na jibe na ka nalo ajumia amison vite nalo na kiri teremi nalo laka ban tomu nalo, mia maka leleio asaaro ka aija tomu nalo ka avar bitiran vite nalo nene.

<sup>5</sup> “Nalo abarvar kalo m̄ele ka kialo im̄auano nalo, napano nalo amila jibe na ka mia avuru ga tomu dolu nalo miralo. Kamiu kuvial kialo bulusiveu nalo na amison Atua kiano Vivitauiano Lu juaio, ka mia ma amiorario jua merinalo a moko-jum̄alo nalo. Nalo ajidom ka kanalo monokanio ve tortoru loa tomu dolu nalo kanalo. Mia kamiu kuvial bunu ka abili iki m̄alo kulukoti na volkouano nalo terebievi laka. A abavavin m̄ele ka vite nalo nei, a ajidom ga ka tomu nalo avamenealo rivorio. <sup>6</sup> Ana ea bogo na jokoluolu a joomo ea yimo na volkouano bunu, nalo ajidom ka mia bogo nonovio nalo atutano ea tomu na tortoru nalo jelelo, <sup>7</sup> a verenio nalo aiel ea vioruru, mia nalo ajidom tomu nalo avatove kalo, a avio batitiglo averinavo ‘!Nao, kiaku naverloglogiano novo, kavijo bo o!’

<sup>8</sup> “Mia kamiu, kenemiu naverloglogiano takurano ga naruei,

a kamiu kumitibe ka m̃aratavo takurano ga, mia verenio tibe na, kamiu kuvijamo ka re tomu nalo ka mia m̃a avio kamiu tai ka 'Naverloglogiano.' <sup>9</sup> Ana mia kamiu kuvio re toro na yetemeriba nei tai ka teta, bior kamiu be karamemiu takurano ga, napano naio jo mave. <sup>10</sup> A mia kamiu kuvijamo ka re tomu nalo avio kamiu tai aver kube navurim̃araboiano na kialo bior kamiu kenemiu navurim̃araboiano takurano ga, naio napano be Naverikariano. <sup>11</sup> Mia toro napano naio be kenemiu toro na toru laka, mia monokanio naio rime ve kenemiu toro na im̃auano ga. <sup>12</sup> Mia toro na naio ga bitirilar naio ka naio to mave, mia Atua rila naio to yetano. Mia verenio toro napano naio ga rila naio to yetano, mia Atua rivitirilar naio to mave."

*Yesu berial vijuku torokoriano na navurim̃araboiano na lotuano*

*Mak 12:40; Luka 11:39-42,44,52, 20:47*

<sup>13</sup> Ana Yesu mil dolu ka ga banlo, berinavo "¡Kamiu Varisis nalo kamliko naverloglogiano na tuboiano, o-o! Kamiu kumila lelan kamiu toru laka, mia ve kirivova laka van kamiu, kanio kenemiu iliano nalo kirinovo, mia tiniemiu nalo abova, ajoron ruei. Tomu nalo ajidom amei jouro ea Atua kiano nave-natuboiano, mia kamiu kumitu kumitavoko morouo kalo ea miralo, ka mia nalo ajikia re ka amei jouro, mia mave kanio, kamiu bunu maka kuvitu kumei jouro. Kamiu kubova ruei. Kamiu kumitum̃a kuburu kenemiu volkouano nalo terebievi laka, mia be sibiano ga, bior ka bogo nene ga mia kamiu kumitum̃a kumijubolibo lili taanou nalo nei, kam̃a kubina ka kialo saba nalo. Bior tena, mia kenemiu tibureiano sikili lie vo.

<sup>14-15</sup> "¡Kamiu Varisis nalo kamliko naverloglogiano na tuboiano, o-o! Kamiu kumim̃au bova ga. Kamiu kumisaaro ka kuviel ea uako, ka kuvan ea buruvenuo dolu nalo ka

kuvuru tomu nalo atakisor kamiu, mia bogo napano kamiu kubokar tai binime, mia maka vesiou, mia naio bokar nonovio kenemiu bajago va nalo ba bova laka, bova jovulu kamiu bereio.

<sup>16</sup> "¡ Kamiu navurim̃araboiano nalo, kamiu miremiu bono ga. Mia kumila lelan kamiu laka, mia rivova laka van kamiu. Ea bogo napano tomu nalo aber titai ka rila kialo verikariano tu sikili, mia ver averenio 'Kiniou neber riano, Atua kunuano Lu yako jo,' a karina, ala korov verikariano nei bereio, ana kuberenio 'Nina maka ve titenia.' Mia verenio averinavo 'Kiniou neber riano, niogo nalo na ajua Atua kunuano Lu joomo, nalo naaju,' mia kamiu kuber iliano na naio jikili laka, maka ajikia ala korovio bereio. <sup>17</sup> Aire tomu nalo, kamiu miremiu bono, a pariparimiu nalo amiavovu. ?Venia napano naio be lu laka: niogo nalo, p̃elina Atua kunuano Lu napano naio mila niogo nalo abe lu? <sup>18</sup> Mia verenio toro tai riverenio 'Neber riano, boda naio yako jo,' kamiu kuber iliano nei be kurano ga. Mia verenio naio riverenio 'Kiniou neberii riano, sida na naio joa boda,' mia kamiu kuber iliano nei jikili laka, toro tai maka rijikia rilakorovio. <sup>19</sup> ! Jibe kanio napano neberii ruei, kamiu kube merebono riano! ? Venia naio be lu laka: sida napano joa boda p̃elina boda na mila sida nei be lu? <sup>20</sup> Monokanio kamiu na kuvitilubar vite nalo nei, bior verenio toro tai naio jo jiloglog boda ka rila kiano iliano nei tu sikili, mia naio jo jiloglog bunu bija sida napano joa boda nene. <sup>21</sup> A toro napano ver jom̃a jiloglog ban ea Atua kunuano Lu, naio jo jiloglog bunu bija nana naio be kanano yimo nene, <sup>22</sup> ana toro na jom̃a jiloglog mave, naio jom̃a jiloglog bunu bija jobaro lu na Parinio tubo lu na toru kanano, tenene naio jom̃a jiloglog Atua garuei memedu.

23 “! Kamiu naverloglogiano na tuboiano kamliko bunu Varisis nalo, o-o! Kamiu kumila lelan kamiu toru laka, mia rivova laka rivan kamiu. Kiniou nemijikia napano kamiu kumituña kubitii bo julaka, ka verenio mia kuvar semiu sinaniano ve du-elimo, mia ve takurano monokanio rivan ea Atua Kunuano, tibe ka napano tuboiano naio jomña berenio, a kamiu kumituña kumila jibe na ka kenemiu saba nonovio nalo, rivano-o rivokar bunu mãmësi na kiritavarvasu nalo a vite nalo bunu napano javukia mãsili nalo. Mia vite tomormoruo nalo napano tuboiano naio berenio, kamiu maka kuvisidomial leleio, tibe ka napano naio berenio berinavo kamiu kumemedu rivu, a kamiu monokanio tiniemiu riia kulo dolu nalo, monokanio kamiu kuvokar kenemiu verikariano. Verenio kamiu kuvisidom kuvokar sikili vite nalo na kiritavarvasu, naio bo ga, mia vite nalo na tomormoruo nei naruei bo ka kamiu kuvituña kuvilaio garuei, ana makanio.

24 “! Aire tomu nalo, kamiu navurimãaraboiano nalo, kamiu miremiu bono ga! Kamiu kumituña kumila jibe na kanio napano bogo na ana kamiu kumunu saba, mia kamiu tiniemiu maio jikili ka mia kuvilaluvu re ka kuviovolar nionono tai napano mijoru batove ea kenemiu baja nalo, mia kamiu maka kuvial kar ka kumdidiomo belia kamel napano joaio.

25 “! Kamiu naverloglogiano na tuboiano bija Varisis nalo bunu! Kamiu kumila lelan kamiu toru laka, mia rivova laka rivan kamiu. Kamiu kumituña kumitakii vatitig tuboiano nalo napano kiritavarvasu nalo tivelinio ka sekoniano na kenemiu baju a baja nalo, naruei kamiu kuberiamña kenemiu vite nalo nonovio ameravo bo ruei. Mia kenemiu baju nalo nei abujo ka sinaniano na vinauano napano kamiu kubario ea bajago na yebekavoano. 26 Kamiu Varisis nalo, kamiu miremiu bono riano. Verenio

kamiu kuvisidomii ka kenemiu baju a baja nalo ameravo rivu bogo nonovio, mia kamiu kuvisonlo re bunu ka sinaniano nalo napano kenemiu kariano juaio.

27 “! Kamiu naverloglogiano na tuboiano bija Varisis nalo, o! Kamiu kumila lelan kamiu toru laka, mia rivova lie vo van kamiu. Kamiu kumitavukia mãartanbo napano amiovovua miuvu meravov kirinovo bo jel tavio, mia vajoomo nene naio bujo ka buriu na tomu nalo napano amãarmãaro, bija mokotenalo napano ajorono. 28 Jibe na, bogo na tomu nalo aial tavio na kamiu, mia nalo amijikia averenio kamiu kumemedu bo, mia makanio, vajoomo na kamiu bujo ka juboluboiano a kariano nalo.

29 “! Kamiu naverloglogiano na tuboiano nalo bija Varisis nalo! Kamiu na bogo nonovio kumil ka kuluniomiu ga. Mia rivova lie vo van kamiu kenemiu jidomiano nalo beve juo. Kamiu kumituña kubitikar vatitig mãartanbo na naverialiano nalo re nua, a kamiu, kumiovovua bo bunu puruveru na sidomkariano na tomu memedu nalo, ana jumãabe: ?Kamiu kuberiamña kumemedu kamliko nalo na a? 30 Mia kamiu kumitu kuberinavo verenio kamiu kumeul nua ruei ea bogo na korobimiu nalo, mia kamiu maka kuvijikia kuvijurukar nalo na ka bogo napano nalo amuebinvin Atua kiano naverialiano nalo re nua. 31 Mia ea kenemiu ilisibiano nei, kamiu kumituña kumil lelan kamiu bereio ga, bior iliano napano berial ka kamiu kube bajulukuti memedu na korobimiu nalo na amuebinvin naverialiano nalo. 32 Mo bo ga, kamiu kuvimãau bo ka rivano-o, kamiu kuvila von ka kuvila nonovio imãauano na korobimiu nalo nei ajikario nanua bogobe ruei.”

*Vironiano na navurimãaraboiano nalo na lotuano*

*Luka 11:47-51*

33 Naruei Yesu mil jikili kia ga banlo, naio berinavo “Kamiu

kumitibe ka maro nalo garuei memedu. ? Kamiu kuberiaña mia kumijikia kuvuro ka kenemiu vironiano na ea vio na jogvaiano? ! Maka leleio! <sup>34</sup> Verenio mia kiniou neiila naverialiano nalo aviedu, vija tomu napano abe masou bo ka Atua kiano iliano nalo, a vija bunu naverloglogiano na tuboiano nalo, verenio aviedu ea kamiu, mia kamiu kuvuebinvin tealo añaro ea ñakolkolo, a tealo mia kamiu kuvitivlo ea kenemiu yimo na volkouano nalo, a mia kuvijili bulaglo ea kenemiu ñarkomeli nalo. <sup>35</sup> Mia kamiu kuvila tibe na kalo ñamãriga rivano-o, mia kamiu naruei kuvokar vironiano na ñariano na tomu na memedu nalo nei aviniu napano korobimiu nalo nanua amuebinvinlo. Tenei jikar ea Epel, na naio maka rila titai napano tokor leleio, binimeï bokar Sakaraia, na Parakaia kenerinio, naio napano korobimiu nalo amuebin naio jo vaataro ka boda, joomo ea Atua Kunuano Lu. <sup>36</sup> Riano kiniou neberii ka kamiu, mia vironiano na ñariano na tomu nalo nei, mia rivokar kamiu, napano kumeul kia ga vo vonganei.”

*Yesu tinien miia Yerusalemo*  
*Luka 13:34-35*

<sup>37</sup> Ana Yesu jegi bior Yerusalemo, ana naio berinavo “! Yerusalemo-o, Yerusalemo-o! ? Bior vaio ana kojomã komuebinvin naverialiano nalo, a kojuba binvin nalo napano Atua miilalo abiedu easo? Va telabo kiniou nejidom nodu jumãaku selvivko kiamo tomu nalo, tibe ka tu sabarou buru kirikiti nalo abinimeï ajuluku ea sibiano, mia kiamo tomu nalo maka asaaro ka kiniou. <sup>38</sup> Jau, komial na, Atua jo juvanso naruei, mia jau komei kove vio yauo kurano ga naruei. <sup>39</sup> Tenene na neber ka jau, mia kiamo tomu nalo aial re bunu kiniou bereio, rivano-o rivokar bogo napano mia nalo averenio bereio tenei, averinavo ‘Atua Soñi, jau keilivu ka ninei napano naio jo binimeï ea siamo.’”

## 24

*Yesu berial ka mia aue bulag Atua kunuano lu*

*Mak 13:1-2; Luka 21:5-6*

<sup>1</sup> Ana Yesu batavio den Atua Kunuano Lu, mia bogo na naio miel bano, kiano naiagagoano nalo abinimeï ana nalo ajiloglog yimo tomormoruo nalo napano aju jouro ea burusio na Atua Kunuano Lu, mia abo laka, ana aberii ka Yesu ka naio siraragdi rialo. <sup>2</sup> Mia Yesu naio berii kalo, berinavo “?Kamiu kumial yimo nalo na? Riano kiniou neber ka kamiu, yimo nalo na, mia ve re bunu puruveru nene tai totano vatitig ea jeleigio, bior mia tomu tai amei aue bulaglio nonovlo.”

*Jaleleano na mia monokanio rimeï*  
*Mak 13:3-13; Luka 21:7-19*

<sup>3</sup> Telikiti na nalo amiel jibe ga na, nalo abinimeï ea Suku Na Buruolivi, naruei Yesu naio jotano ea vio na. Mia bogo na maka bunu tomu dolu nalo tai atu naliko, ana kiano naiagagoano nalo abinimeï ea naio, abika denio, aberinavo “?Mia aue bulag Yimo Lu nene nagi, a kijokijo na vabe na kanamo liliuano, napano mia jau komei bereio ea bogo na maaro?”

<sup>4</sup> Naruei Yesu berdoñe banlo, naio berinavo “Bo ka mia kamiu kuvitkar vatitig kamiu rivu, ka mia ve re toro tai rimeï ka rijubolbolili kamiu, <sup>5</sup> bior mia tomu ve telabo napano mia adu siaku, naruei mia nalo amei averinavo ‘Kiniou nebe Naverikariano nene,’ naruei nalo avuru tomu ve telabo aiel vovu. <sup>6</sup> Ana ea bogo na bunu, mia kamiu kuvijog ñaduano na mira napano ju vaataro, a liliariano na mira nalo na aju koalabo, mia kamiu kumemebiju ñele re. Vite nalo na monokanio nalo amalmaluvo tukamu beamu vo, mia nina maka legiano na maaro nene navo. <sup>7</sup> Ana parinio tubo nalo ala mira ka parinio tubo dolu nalo, a venuo dolu nalo atumolu ka venuo dolu nalo. Mia ve bogo na vitu na toru, mia ñii rikulkulu ea vio yetemeriba reraio. <sup>8</sup> Mia vite nalo nei, maka ve bogo na

maaro nene navo, mia tibe ka tira napano naio be mābono, naio jikar ka mijog be moti garuei ka taakano mijalele ka mia naio rivar kenerinio, mia burumāara jogvaiano naio maka navo.

<sup>9</sup>“Mia ka bogo nene, kamiū na napano siaku joa kamiū, mia avokakar kamiū, a adu vironiano va nalo van kamiū, rivano-o mia auebinvin kamiū kumārmaro. Ana mia tomu na buruvenuo dolu nalo nonovio asidom lele re kamiū, mia ail die kamiū. <sup>10</sup>Vite nalo na, mia rila tomu nalo ve telabo atu sikili re bunu ea kiniou, a nalo na amonmonea kiniou jukamu, mia nalo asidom re bunu nalo na amonea kiniou jikili kia ga ea bogo nene, mia nalo ativeluku kalo van kialo uolu nalo nei jumālo. <sup>11</sup>Mia naverialiano nalo na tuboluboiano ve telabo atumolu, mia avuru tomu ve telabo aiel tokoro. <sup>12</sup>Mia vijuku vovaiano nonovio riluo ve toru lie vo rila ana tomu ve telabo kialo iviso rimeī rimenini, asidom re bunu Atua. <sup>13</sup>Mia verenio toro na tu sikili damāariga ea kiniou riva rivokar bogokouo nei ribisi, mia Atua rilarur naio. <sup>14</sup>Mia ioluano vou na navenatuboiano nei, mia aioliolu van taara kinkin nalo kanio ea vio yetemeriba reraio, jibe ka kijokijo tai napano berial ka legiano na iorou maaro jo binimeī.”

*Jaleleano toru ea vio Yerusalemo  
Mak 13:14-23; Luka 21:20-24*

<sup>15</sup>Naruei Yesu berii bunu iliano dolu tai, napano bo ka verenio toro na rivulukuio, bo ka naio rila von ka rijikia vatitig nioti nene. Iliano nene berii jibe nei, berinavo “Mia kamiū kumijikia kuvial avitirilar tavoru tai napano kirivova mia kirivova laka, tumolu tu rila niegeniege vio Lu na Atua Kunuano Lu. Vite na Naverialiano Taniel naio berialio nanua ruei, <sup>16</sup>ana verenio bogo na kamiū kuvial vite nene, kamiū napano kumitua vio Yutea, monokanio kamiū kuvuro kuva kuvituluku ea suku nalo. <sup>17</sup>Ka bogo na, verenio toro tai to rijilmebi tavio ea kunuano,

mia naio maka bunu rijikia riva joomo ka rivar kanano saba tai bereio, <sup>18</sup>ṗelina verenio toro tai toa kanano tiniavio, mia naio maka bunu rijikia riva vonuo bereio ka rivar kanano kuluniabeno. <sup>19</sup>Ana ka bogo nene kia ga vo, mia rivova laka van tire nalo na mābolo, a nalo na ajuña amije yu ban kenerilo tete mudomudomu nalo. <sup>20</sup>Verenio tibe na, monokanio kamiū kubolkouo ka kamiū, ka kenemiū bogo na jaleleano nei, ka mia rimeī re rivokar kamiū ea bogo na niavo, ṗelina ea legiano tava tai, <sup>21</sup>bior bogo na jikili nei, naio sikili lie todovulu bunu bogo tealō na jikili, jikar ea bogo napano Atua jii vio yetemeriba binimeī bokar banei, ka mia ve re bunu jaleleano na burutomoruo tai tibe nei bogo tai bereio. <sup>22</sup>Mia Atua naio jidomii ruei ka mia naio tekorov ve bulati ga bogo na jikili nei, kanio tomu nalo napano naio bijauialo ka ave kanano, napano ajua bogo na. Ana verenio naio tekorov re ve bulati tibe na, mia maka toro tai rijikia rimeul to.

<sup>23</sup>“A ka bogo nene, verenio toro tai river ka kamiū, riverinavo ‘Kamiū kuvialio, nina naio be Naverikariano na,’ ṗelina naio riverinavo ‘Nina naio be Naverikariano naio yako,’ mia kamiū kumonmonea re kiano iliano nalo na, <sup>24</sup>bior naverikariano na tiboliboiano nalo ve telabo atumormolu, vija naverialiano na ti boliboiano ve telabo mia nalo nene ala kijokijo na tortoru, vija tokokouro nalo na iloiano. Mia nalo ala tibe na, ka avuru tomu nalo aiavovu, rivano-o rivokar napano mia alavon ka avuru bunu tomu nalo napano Atua bijauialo ka ave kanano, mia vite nei maka ajikia alaio. <sup>25</sup>Mia kamiū kuvitkar kamiū, bior kiniou neberial vite nalo nei ban kamiū jukamu ruei, ka bogo na tenene nalo maka amalmaluvo vo.

<sup>26</sup>“Naruei ka tenene, verenio tomu nalo averii ka kamiū, averinavo ‘Kamiū kuvialio, Naverikari-

ano naio joa vio yauo yako ruei,' mia kamiu kuvan re ea vio nene, a verenio averii ka kamiu averinavo 'Kamiu kumial na, naio jo joomo ea yimo yako ga,' mia kamiu kumonealo re. <sup>27</sup> Ana ea bogo napano Kulorinio Kenerinio naio rimei bereio, mia naio rimei rimeravo ka tomu nalo nonovio, tavukia vio bijano, naio merera rudul batitig vio tiniabene reraio tikar is van ea ues. <sup>28</sup> Ea bogo nene, mia tavukia bunu napano verenio tena m̃aro tai toa vio tai, mia bebekumo rinio nalo napano ajum̃a ajen temeul nalo nam̃a am̃arm̃aro, mia nalo amei kanio, monokanio aje buronlo ve telabo."

*Mia Kulorinio Kenerinio rimei bereio*

*Mak 13:24-27; Luka 21:25-28*

<sup>29</sup> Naruei Yesu naio berinavo

"Mia bogo na jaleleano nei naio ribisi, vaarakurano ga m̃erenio naio rimei ribobogio, mia siberio rimerera re bunu.

*Marivitano nalo na tiniabene mia nalo atibirbil, mia tenalo na jikirkili nalo na tiniabene, mia Atua rikulkulu kalo.*" *Ais 13:10, 34:4*

<sup>30</sup> "Mia ka bogo nene mia kijokijo na Kulorinio Kenerinio riyotuba ea tiniabene, a mia m̃atatoko nalo na yetemeriba nei mia nalo ateg ve toru aviovio mia aial Kulorinio Kenerinio riyotuba ea melijo nalo vija kiano burum̃ara moroano a vija kiano burum̃ara miamoiano. <sup>31</sup> Mia karina, simeduo na toru riolu, ana mia naio riila kiano nailiano nalo ava aseliviv ea vio yetemeriba reraio a vio mave bunu, ka avuru kiano tomu nalo napano naio bijauialo ruei, amei vio takurano ea naio."

*Maka toro tai rijikia bogo na legiano na maaro nene*

*Mak 13:28-32; Luka 21:29-33*

<sup>32</sup> Ana Yesu naio berinavo "Kamiu kuvisidomii von buruiesi napano aber buruviki. Naio mijikia riverloglog kamiu ka vite tai napano kamiu monokanio kuvitii vatitigio.

Bogo napano kamiu kuvial ka jaati nalo amei amemeiaio, amelumu, tikar ka mia rivarboveio, kamiu kumijikia ka kuverenio bogo binimei vaataro ka bogo na m̃erenio rivitunu ve toru. <sup>33</sup> Ka tenene, bogo na kamiu kuvial kijokijo nalo na ea vio yetemeriba, tavukia na kiniou neberenio ka kamiu ruei, mia kamiu kuvijikia ka Kulorinio Kenerinio naio jumolu jikili jua m̃aratavo ruei, vaataro ka naio rimaluvo naruei. <sup>34</sup> Riano kiniou neberii ka kamiu, mia vite nalo na mia ayotuba tukamu vo, mia iorou, ana taara na tomu nalo napano m̃ameul ka bogo na, mia mijikia ava kovio den vio yetemeriba nei. <sup>35</sup> Mia tiniabene a yetemeriba ave juo bunu ava kovio, mia kanaku m̃ariliano nalo maka ajikia ava kovio bogo tai leleio. <sup>36</sup> Mia maka toro tai rijikia legiano nene p̃elina aura nene napano mia Kulorinio Kenerinio naio rimei eaio. Nailiano nalo na vio mave, naliko Atua Kenerinio, maka ajikiaio, mia Karam̃aku ga takurano naio mijikiaio."

*Monokanio kamiu kuvitu derevijo*

*Mak 13:33-37; Luka 17:26-30,34-*

<sup>36</sup>

<sup>37</sup> Ana Yesu naio berinavo "Rivano-o rivokar bogo na Kulorinio Kenerinio rimei bereio, mia tomu nalo atu batitig re, tibe ka bogo na tormoruo Noa kiano nanua. <sup>38</sup> Ea kiano bogo nene naruei, bogo na ueimia na toru nei naio maka rimei vo, ana tomu nalo ajum̃a ajinan, a ajum̃a amunu tenalo nam̃a amunmunio, ajum̃a amila soriano jibe na ga, binimei bokar bogo napano Noa naio ba joomo ea kiano uako na toru napano naio mir̃aukanio. <sup>39</sup> Mia tomu nalo na aju dam̃ariga jibe na, maka asidomial titai, naruei amial ga burum̃ara ueimia nei binimei buru bulaglo. Mia kiniou neber ka kamiu, mia bogo na Kulorinio Kenerinio naio riyotuba rimei bereio, mia tomu nalo ave virare ga ka nalo

nei nua beamu ea Noa kiano bogo.  
<sup>40</sup> Mia verenio tomu ve juo atu aimāu ea tiniavio, mia nailiano nalo amei avurular tinene, mia tinene atuvanio tobo, <sup>41</sup> mia verenio tira ve juo atumā ala sinaniano, mia avurular tinene, mia tinene atuvanio tobo.

<sup>42</sup> “Tenene na mia kamiu monokanio kuvitikar vatitigio, bior kamiu maka kuvijikia ea legiano na vabe napano mia kenemiu Tubo naio rimei bere eaio. <sup>43</sup> Mia monokanio kamiu kuvitilubar vite nei, ka verenio toro na toru tai, verenio naio mijikia memedu ka bogo na mia toro na vinauano tai rimei ea kunuano, ka mia naio rivina ka kiano saba nalo, mia naio to derevijo rivu damāriga, ka mia toro na vinauano naio rimei. <sup>44</sup> Tenene na, mia monokanio kamiu kuvitu derevijo rivu damāriga, kanio mia Kulorinio Kenerinio naio riyotuba ea bogo tai napano mia kamiu kuvisidomial re ka mia naio rimei eaio.”

*Jamerijiano na toro na imāuano napano kiano boru naio binimei bereio*

*Luka 12:41-48*

<sup>45</sup> Naruei Yesu naio berinavo “? Verenio toro na imāuano tai, napano naio be masou bo ka kiano imāuano, a naio bokar vatitigio, mia naio rimāu tumābe? Naio rimāu tibe nei, napano verenio kiano toro na toru tuvan vio nei ka naio riel riva koalabo, ana toro na toru nei rudu naio to ka rivitikar vatitig rivu tomu na imāuano dolu nalo, ana mia toro nei naio rivokar vatitig imāuano nalo nei. <sup>46</sup> Mia bogo napano toro na toru nei naio rimei bereio, mia naio rijikia rileal kiano boru na imāuano nei naio jo bokar vatitig imāuano nalo nei bo. Ana mia boru na imāuano nei naio rijikia rijog rivu ve toru, <sup>47</sup> bior mia toro na toru nei naio tuvan kiano saba nalo nonovio tua toro na imāuano nei jumāno. Ierinio, mia Atua rila tibe ga na bunu.

**24:43** Luk 12:39,40    **25:1** Luk 12:35

<sup>48</sup> “Mia verenio boru na imāuano nei naio rivova, mia bogo na toro na toru nei naio tuvan vio, ana naio riva koalabo, mia boru na imāuano nei naio rijikia river ‘?Ee, toro na toru nei naio jo kirisiou laka, p̄eli mia naio rimei re bunu koviobo, p̄elina jumābe?’ <sup>49</sup> Ana mia naio tumolu rila lelan tomu dolu na imāuano nalo, mia naio rijikia riva rimunu uei naliko tomu na pariparilo nalo mā amiavovu, mia nalo atu asen searo ea toro na toru neibano kanano puruveru nalo. <sup>50</sup> Mia toro na toru neibano naio rimei bereio ea legiano tai napano toro na imāuano nei riilo kanio garuei, a ea bogo tai napano toro nei risidomial re ka mia naio rimei eaio. <sup>51</sup> Naruei toro na toru nei naio rudu vironiano ve toru van boru nei, mia naio riila naio riva to vija tomu na tibolboiano dolu nalo ea vio napano tomu nalo ajumā ajegi, ajerkakar m̄arijuvolo nalo eaio.”

## 25

*Jamerijiano na merevono duelimo*

<sup>1</sup> Ana Yesu berenio, berinavo “Ka bogo napano mia Kulorinio Kenerinio naio rimei bereio, mia Atua kiano navenatuboiano naio tibe ka jamerijiano nei naio berenio. Jamerijiano nei berii jokoluolu na soriano tai, napano jakii kanalo bajago, nalo na tivelinio ka sumāno aburu naio ban ea nitira kunuano ka avuru naio rimei rivijaio. Naruei kuviviniene duelimo [10] nei nalo aju bo ga ea kunuano, ka aiomon vite nonovio tu rivu vatitigio. Ana vaataro ka melijo tarako m̄esi naruei kuviviniene nalo abar kanalo yulu nalo amielko m̄arabo kalo, ka aviniu amei bereio. <sup>2-4</sup> Kuviviniene nalo neibano, jumo nene abe masou bo, abe kialo jidomiano napano nalo abarkar kialo bauei na kanalo sunsunu ka mia aison bereio kanalo yulu nalo, mia nalo jumo nene nalo abe taboso ga, maka kialo jidomiano rivu tibe na ka avarkar kanalo bauei

na sunsunu tai ka verenio sunsunu tabo, ana mia amijikia aison bereio.

<sup>5</sup> Ana nalo aju rorea toro na soriano jiou jibe na bano-o, mia maka naio rila soĝeli, ana merevono nalo nei miralo temi toru ana nalo amonmelio.

<sup>6</sup> “Mia kanio bogiano viovare sebisaro, toro tai bio, berinavo ‘Toro na soriano, naio jo binime naruei. Kamiu kumei kuviviuo naio.’ <sup>7</sup> Ana na merevono duelimo nei nalo ajevijo, ana amimaukanio kialo yulu nalo ka avilvil rivu bereio. Amilakon julu na kanalo yulu nalo, a abitii batitig kialo sunsunu nalo. <sup>8</sup> Naruei nalo na abe taboso abitilubar ka kialo yulu nalo, vaataro ka mia amarmaro, naruei nalo abika den kuluelo jimo nene, aberinavo ‘Aiou banalo, kamiu kubo, kuviyon kija kenemiu sunsunu rivan kumemi, ver ĝeli mia kenememi yulu nalo amarmaro koviobo.’

<sup>9</sup> “Mia nalo na abe masou, aberinavo ‘Vedeio ga, sunsunu maka rivare ka kumemi a kamiu bunu. Bo ka kamiu kuvan ea yimo na vilviliano ka kuvulu kenemiu tai.’

<sup>10</sup> “Naruei nalo napano abe taboso aba ka avulu kanalo sunsunu, ana bogo napano nalo aju koalabo kia ga vo, mia toro na soriano naio boru. Naio ba jouro ea kiano vonuo, naliko merevono jimo na aju rorea naio, naliko abijurukar ea sinaniano na soriano. Naruei bogo napano tomu nalo aba aju jouro rui, ana nalo ajetavoko maratavo bo batitigio.

<sup>11</sup> “Karina iorou kanio, ana merevono nalo na abe taboso abinime bereio, abio aberinavo ‘! Kumanememi, kumanememi, jau kobijuku bo kajamo ka kumemi nuvedu joomo!’

<sup>12</sup> “Mia toro na soriano naio rivinavo ‘! Ierinio, kiniou neberii ka kamiu, kiniou maka nejikia bunu kamiu kube kei!’ ”

<sup>13</sup> Mia Yesu berii jamerijiano nei bisi, ana naio berinavo “Mo, kamiu monokanio kuvitigar batitig rivu,

bior kamiu maka kuvijikia legiano na vite nei a aura nene.”

*Jamerijiano na tomu tolu na abitigar puruveru*

*Luka 18:11-27*

<sup>14</sup> Ana na Yesu mil berinavo “Mo, mia bogo na Kulorinio Kenerinio rime bereio, mia tibe ka bunu napano jamerijiano nei berenio, napano toro na toru tai na naio miomon ka mia naio riel riva koalabo ea buruveno dolu. Ana toro na toru nei naio bio kanano atevi na imauano nalo ka amei aialio, naruei naio mil banlo, naio bar kanano saba nalo jua jumalo ka avitigar vatitigio, ka aimau rivijaio. <sup>15</sup> Naio bitii vatitig kialo jikiaiano, naruei ea nalo tai jumano naio midu siveu na puruveru jimo, ea dolu jumano naio midu siveu na puruveru juo a ea dolu jumano naio midu siveu na puruveru takurano ga, karina naio juvanlo, ana na naio ba jo koalabo kirisiou kija. <sup>16</sup> Naruei toro na bar siveu na puruveru jimo, vaarakurano ga naio ba mila imauano telabo ka puruveru nalo nei, bano-o naio bokar bereio siveu na puruveru jimo dolu bereio. <sup>17</sup> Mia ea bajago nene kia ga, toro napano mijev siveu na puruveru juo, naio bokar bereio siveu na puruveru juo dolu bereio. <sup>18</sup> Mia toro napano naio mijev siveu na puruveru takurano ga, naio ba mikil ĝili ea borotano, ana naio jivin puruveru napano be kiano tubo kanano.

<sup>19</sup> “Naruei bogo jiou barlaka rui bano, karina toro na toru na tomu tolu nei kialo naio binime bereio. Naruei naio jidom rial kanano puruveru nalo napano naio bario ban tomu tolu nei. <sup>20</sup> Naruei toro na bokar siveu na puruveru jimo jukamu, naio binime jumolu jikili jukamu ea toro na toru nei mirano, naio bar bereio siveu na puruveru jimo dolu bereio. Naruei naio berenio ‘Tubo, Beamu jau kabar siveu na puruveru jimo ban kiniou, siveu jimo nene ninei. Mia nana kiniou

nemiñau nabokario tenene ninei, be siveu na puruveru jimo bereio, napano kiniou namiladu kanio be kanamo.'

<sup>21</sup> "Naruei toro na toru nei naio berkanio, berinavo 'A siva toru. Jau kobe kanaku atevi na iñauano novo, jau kobokar vatitig bo laka kanaku iñauano telisu na nemije monea jumãamo, mo mia kiniou nevitiri larso ka mia jau kovitkar kanaku iñauano dolu nalo na tortoru. Maraiu novo, jau komei kovijurukar kiniou kiteaku ea kanaku jokoluolu na tiniesaariano nei.'

<sup>22</sup> "Karina toro napano bar siveu na puruveru juo beamu, naio binimeĩ jumolu jikili jukamu ea toro na toru nei mirano, ana naio berenio 'Tubo, beamu jau kabar siveu na puruveru juo ban kiniou. Siveu juo nene ninei, mia nana kiniou nemiñau nabokario bereio tenene ninei, be siveu na puruveru juo, napano kiniou namiladu kanio be kanamo.' <sup>23</sup> Ana toro na toru nei berkanio, berinavo 'A siva toru. Jau kobe kanaku atevi na iñauano novo, jau kobokar vatitig bo laka kanaku iñauano na telisu napano nemije monea jumãamo, mo mia kiniou nevitiri larso ka mia jau kovitkar kanaku iñauano dolu nalo na tortoru. Jau komei, kovijurukar kiniou ea kanaku jokoluolu na tiniesaariano nei.'

<sup>24</sup> "Karina, toro napano mijev siveu na puruveru takurano ga naio binimeĩ, jumolu jikili jukamu ea toro na toru nei mirano na berkovio ga, berenio berinavo 'Koig, kiniou nejidomii ka jau kobijuku mĩete. Jau komijikia kokilkili ea tiniavio na maka jau komebijo eaio, a jau komijikia kabar mĩariesi ea buruiesi napano maka jau komebijaio. <sup>25</sup> Bior tena, kiniou nemerou, ana nabano nomidu van kanamo puruveru, nejin joa borotano. Keialio, ninei be kanamo puruveru na jo bo ga jo.'

<sup>26</sup> "Mia toro na toru nei naio berenio 'Aa jau, toro va tai, jau komiovo

toru. Jau komil searo ea kiniou ruei, ka kober kiniou nebe toro ðiliðili tai jibe na jibe na, naruei verenio jau komial ka kiniou nebe toro kouo tai jibe na bior vaio ana jau komidu kanaku puruveru jo kurano ga jibe na. <sup>27</sup> Verenio jau kava kodu toa yimo na puruveru mia kiniou nemijikia navar bulagio vija kirikiti nene, ka bogo na kiniou nebinimeĩ bereio jibe nei.' <sup>28</sup> Ana na toro na toru naio ber ka kiano navitikariano nalo, naio berinavo 'Mo, kamiu kuva kuvidu denio puruveru na ea jumãano, kamiu kuvidu van toro napano naio bokar siveu na puruveru duelimo ruei. <sup>29</sup> Kiniou neber jibe nei ka kamiu, neber toro napano verenio be kiano saba ruei, mia naio mijikia rivokar tabunu bereio vo ka mia ve miroano, mia toro napano maka ve kanano saba tai, mia naio rila deven vite na telisu napano be kiano. <sup>30</sup> Mia taboso nei, kamiu kuvuku naio riva tavio ea vio na melijokouo, ea vio na tomu nalo ajumã ajegi a ajumã ajer mĩarijuvolo eaio.' "

### *Legiano na tibureiano*

<sup>31</sup> Mia Yesu naio mil berinavo "Bogo napano mia Kulorinio Kenerinio naio rimeĩ naliko kiano nailiano nalo, ea kiano mermerano ka rive Parinio Tubo, naruei mia naio rimeĩ ka mia totano ea kiano jobaro lu. <sup>32</sup> Naruei mia nailiano nalo avan ka avuru mĩatatoko nalo nonovio na yetemeriba nei amei, ka mia atumolu atu kamu ea mirano, mo ka bogo na mia naio tiburevure tomu nalo, ana avan ea taara ve juo, tavukia toro tai napano naio jo bitikar kiano temeul nalo jiburevure kanano nunu nalo ka nani nalo. <sup>33</sup> Mia parinio tubo nei naio tiburevure nunu nalo ka ava atua jumãano meruo, mia nani nalo ava atua jumãano mal. <sup>34</sup> Ana mia naio river ka nalo na ea jumãano meruo, riverenio 'Kamiu

kumei naruei, kube tomu nalo napano karamñaku milivu ka kamiu. Kamiu kumei kuvidu jelemiu jouro ea kiano navenatuboiano, napano naio mila batitigio jororea kamiu ruei, ka bogo napano naio jii yetemeriba nei eaio. <sup>35</sup> Kamiu kumei, bior ka bogo napano ña jjer kiniou, ana kamiu kumije sinaniano ban kiniou, a bogo napano ña midoujer kiniou, kumijev uei ban kiniou. A bogo napano nebe valauo, mia kamiu kuburu kiniou naba joomo ea kunuemi, <sup>36</sup> a bogo napano kiniou niabeku yauo, kamiu kubar kulumñarauo ban kiniou. Bogo na kiniou nemie, kamiu kubinimei kumiadu ka kiniou, a bogo napano kiniou nojoa yimo na tetavokoiano, kamiu kubinimei kumitukunu bija kiniou.'

<sup>37-39</sup> "Mia tomu nalo na memedu nei napano ajua jumñano meruo, mia nalo avika denio, averenio "? Tubo, jumñabe? Jau kojomña koberenio kumemi numituña numijaso ea kiamo bogokouo nalo na jibe na, mia kumemi maka bunu tiniememi rimaio ka kumemi numila jibe na banso leleio. ?Kumemi numila vite nalo na nagi?"

<sup>40</sup> "Ana na Parinio tubo nei mia naio river kalo riverinavo 'Riano kiniou neber ka kamiu, bogo nanña kamiu kumila jibe nei ban toro na kiaku mñaratavo nalo nei tai, bekurano ka ver naio be toro na jumñabe, mia jibe ka kamiu kumila ban kiniou ga na.'

<sup>41</sup> "Mia iorou kanio, mia naio ril bunu van nalo na ea jumñano mal, mia naio river kalo, riverinavo 'Kamiu kuvuro den kiniou, Atua miobañe ka kamiu ruei. Kamiu kuvan ea sebi na maka rijikia rimaro bogo tai, napano naio jororea kia Setano ruei naliko kanano nailiano nalo ka avan eaio. <sup>42</sup> Kanio bogo napano jjer kiniou, mia kamiu maka kuvar sinaniano van kiniou, a bogo napano midoujer kiniou, mia maka kuvijev uei van kiniou, <sup>43</sup> a bogo napano kiniou nebe valauo, mia

kamiu maka kuvuru kiniou nevedu joomo ea kunuemi a bogo napano niabeku yauo, mia kamiu maka kuvar kulumñarauo van kiniou, a bogo napano kiniou nemie, ñeli na nojoa yimo na tetavokoiano, mia kamiu maka kumei kuviadu ka kiniou.'

<sup>44</sup> "Ana mia nalo averdoñe Parinio Tubo nei, averinavo "?Tubo! Ana kumemi numialso nagi napano jau jijerso, ñeli napano midoujerso, ñeli napano kobe valauo, ñeli na niabemo yauo, ñeli napano komie, ñeli napano kojoa yimo na tetavokoiano? ? Ana bogo jumñabe napano jau kojibe na, ana maka kumemi nuvedu nuvijaiso?"

<sup>45</sup> "Mia naio ril vanlo, riverinavo 'Riano kiniou neberii ka kamiu, bogo napano maka kamiu kuvisidomial ka kamiu kuvila tibe na van kiaku toro tai napano naio be toro na jumñabe, nina jibe ka kamiu maka kuvisidom ka kuvila van kiniou.'

<sup>46</sup> Naruei Yesu mila nonovio kiano iliano, ana naio berinavo "Nalo na mia avan ka ajev vironiano tai napano maka rijikia ribisi bogo tai. Mia tomu na memedu nene nalo ava ajev meuliano napano maka rijikia ribisi bogo tai."

## 26

*Ajidom auebin Yesu rimaro*

*Mak 14:1-2; Luka 22:1-2; Jone 11:45-53*

<sup>1</sup> Ana telikiti napano Yesu berloglog kiano tomu nalo ka iliano nalo nei avona bisi, ana naio berii kalo, naio berinavo <sup>2</sup> "Kamiu kumijikia ruei ka veua ana Jokoluolu na Sidomkariano Na Ioruriano tikario. Mia ea bogo na jokoluolu nene, mia nalo adu Kulorinio Kenerinio toa tomu nalo jumñalo ka mia atukukakario ea mñakolkolo ka mia naio rimaro."

<sup>3</sup> Naruei kanio bogo nene, tomu na tortoru na kulo lu nalo, naliko navurinñaraboiano na kulo Israel nalo aju abior ea parinio toro lu kunuano, napano siano Kaivas. <sup>4</sup> Nalo amil kavulio ka mia avokar Yesu bena ga ka mia tomu nalo

ajikia re, mia nalo adu vironiano na m̄ariano vanio. <sup>5</sup> Mia nalo aberenio, aberinavo “Kito maka rejikia rala ea bogo na jokoluolu, bior mia tomu nalo tiniel ser kito ve toru, mia uetubaiano ve toru, bior nalo telabo napano tiniel jii tete neibano ruei.”

*Mere miyon bonotanunu ea Yesu parinio*

*Mak 14:3-9; Jone 12:1-8*

<sup>6</sup> Mia iorou kanio, Yesu naio joa m̄arkomeli na Betani, naio joa toro tai kunuano napano abio ka Saimon Burumieni, kunuano bior mieiano na burumieni jua naio nua. <sup>7</sup> Mia ka bogo tai napano Yesu jo jinano ea yimo nei kia ga vo, mia tira tai binimeia ea naio, tira nene midu bauei tai napano amim̄aukanio ea puruveru novo tai, napano bujo ka bonotanunu napano puruveru nene burutomoruo laka. Ana tira nei miyon nonovio bonotanunu nei ea Yesu parinio.

<sup>8</sup> Mia bogo napano Yesu kiano naiagagoano nalo amial vite nei, mia nalo tiniel mimi, ana nalo aberinavo “?Ka venia ana naio mila kule bonotanunu na jibe na? <sup>9</sup> Verenio naio riṽilṽili kanio ga, mia naio mijikia rivokar puruveru ve toru eaio, ka mia naio rivar van talim̄asa nalo.”

<sup>10</sup> Mia Yesu mijikia ka ajun̄a amil jibe na, ana naio ber kalo, berinavo “?Jum̄abe ana kamiu kumila lelan tira nei jibe na? Naio mila tonovo tai ban kinio. <sup>11</sup> Talim̄asa nalo na, mia nalo atu dam̄ariga iviso ka kamiu, ka mia kamiu kumijikia kuvijailo, mia kinio, kinio noto re kitoliko tulaka. <sup>12</sup> Vite napano tira nei naio milao, napano naio miyon bonotanunu nei ea niabeku, nina jibe ka naio mila batitig kinio rorea kanaku tiviniano. <sup>13</sup> Riano kinio neber ka kamiu, ea vio yetemeriba nonovio na averial kanaku ioluanō nei eaio, mia monokanio mia atukunu bunu ka vite napano tira nei naio milao, ka mia asidomkario dam̄ariga bereio kiano burum̄ara

tinietiano, napano naio tinien miia kinio toru riano.”

*Jutas berkar ka mia tiveluku ka Yesu*

*Mak 14:10-11; Luka 22:3-6*

<sup>14</sup> Karina kiano naiagagoano du- elimo ba juo [12] nei tai, napano siano Jutas na vio Kariot, naio ban ea tomu na tortoru na kulo lu nalo, <sup>15</sup> ana naio berinavo “?Verenio kinio netiveluku ka Yesu riviedu ea jumemiu, mia kamiu kuvar venia van kinio?” Ana nalo abulu ka puruveru silva duelimo va rolu [30] banio, <sup>16</sup> ana mo jikario ea bogo na, Jutas jom̄a jirag m̄arabo ka mia naio tiveluku ka Yesu vanlo eaio.

*Naiagagoano nalo amiomon siniano na jokoluolu nene*

*Mak 14:12-16; Luka 22:7-13*

<sup>17</sup> Ana binimeia bokar bogoti napano be moti ka jokoluolu nei, napano abio ka bunu Jokoluolu Na Asen Beskit Na Mioboba, ana kiano naiagagoano nalo abinimeia kean Yesu, ana abika aberinavo “?Jau kojidom kumemi nuva nuvila vatitig vite nalo nene ea vio na vabe, ka mia kito rala Siniano na Sidomkariano Na Ioruriano eaio?”

<sup>18</sup> Ana Yesu naio berdoṽe banlo, berinavo “Kamiu kuva Yerusalemo, kamiu kuvial toro na, kuverii kanio, kuverinavo ‘Kenememi naverloglogiano naio berii kiano bogo binimeia vaatara na ruei. Mia naio jidom naio naliko kumemi kiano naiagagoano nalo, numei nuvila siniano nei ea kunuamo.’”

<sup>19</sup> Ana Yesu kiano naiagagoano nalo aba amila javukia napano naio berii kalo, ana nalo amila batitig vite nalo na jokoluolu nene.

*Yesu berial ka mia Jutas tiveluku ka naio*

*Mak 14:17-21; Luka 22:14,21-23; Jone 13:21-30*

<sup>20</sup> Naruei iorou kanio ana Yesu nalo abinimeia ea vonuo nene, ana bogiano binimeia, naruei Yesu binimeia naliko kiano naiagagoano nalo

ajutano, ana nalo aju amijev siniano nene, <sup>21</sup> ana Yesu berenio, berinavo “Riano kiniou neberii ka kami, be kami tai napano mia naio tiveluku ka kiniou.”

<sup>22</sup> Telikiti na kiano naiagagoano nalo amijog naio mil berii jibe nei, mia nalo amijog bova toru, ana nalo abiniu abivika denio, aberinavo “?Tubo, be kiniou kovio, a?”

<sup>23</sup> Mia Yesu berdoĝelo, berinavo “Toro napano kumemi ve juo nuvititi ka joko ea baju ve takurano naio naruei be toro nene. <sup>24</sup> Mia Kulinio Kenerinio naio monokanio riĉaro tibe ka na Vivitauiano Lu berenio, mia toro na naio ritiveluku ka naio, mia rivova laka van naio, bo laka ka ver naio rimoluo re.”

<sup>25</sup> Mia Jutas, toro napano karina naio jiveluku ka Yesu, bika berinavo “?Naverloglogiano, be kei? ?Kiniou bo, a?”

Ana Yesu berdoĝe naio, berenio berinavo “Tenene ga naruei na jau koberenio na.”

*Siniano na maaro*

*Mak 14:22-26; Luka 22:15-20; 1 Korin 11:23-25*

<sup>26</sup> Telikiti napano nalo aju ajinan kia ga vo, ana na Yesu midu joko tai, ber siva ban Atua kanio, karina naio bure kokorovio ana naio ban jian ban kiano naiagagoano nalo, naio berenio berinavo “Kamiu kuviveio, kamiu kuvisenio. Nina be mokotenaku.” <sup>27</sup> Karina naio mijev baja na ĉarĉumĉelĉelu, ana naio mil berenio siva ban Atua kanio, karina naio jian banlo, ana naio berinavo “Kamiu kuviniu kumunu bitirano ga ea baja nei, <sup>28</sup> bior ninei be kanaku burukija, napano mia rila Atua kiano verikariano tu sikili, napano mia naio rioukar viekokoano na vijuku vovaiano na tomu ve telabo kialo. <sup>29</sup> Kiniou neberkar ban kami, mia kiniou nomunu re bunu ĉarĉumĉelĉelu na bereio, rivano o mia nomunu ĉarĉumĉelĉelu vou na kitoliko, ea Teta kiano nave-natuboiano.”

<sup>30</sup> Karina nalo amijev iou tai maariano ea Iouano Nalo bisi, ana nalo abatavio, abano maariano ea Suku na Buruolivi.

*Yesu berial ka mia Pitere rivar bonbonua naio*

*Mak 14:27-31; Luka 22:31-34; Jone 13:36-38*

<sup>31</sup> Naruei Yesu berii kalo, berinavo “Ka bogiano nei, mia kenemiu moneano ea kiniou ajoru, kar vite nalo napano mia amei avokar kiniou. Mia tavukia ga na Atua berenio ea kiano Vivitauiano Lu, napano naio berenio, berinavo

*‘Mia kiniou nouebin toro na bitikar nunu naio riĉaro, ana mia kanano nunu nalo avuro dedade atan ea vio nonovio.’*  
*Sek 13:7*

<sup>32</sup> “Mia bogo napano nemeul bereio den naĉariano, mia kiniou notukamu nava Kalele, ana mia kami bunu monokanio kumei iorou.”

<sup>33</sup> Naruei Pitere berial kanio, berinavo “Yesu ĉeli mia nalo dolu na aviniu kialo moneano ajoru kaso, ana avuro, mia kiniou maka nejikia notuvanso bogo tai.”

<sup>34</sup> Mia Yesu berdoĝe, berkanio berinavo “Riano kiniou neber kaso, mia ka bogiano nei ga, bogo na tormanano tokokoreko re vo, mia jau kavarbonbonua kiniou ve varolu, koverenio maka kejikia kiniou.”

<sup>35</sup> Ana Pitere naio berial meravo ban Yesu, ea miralo abiniu, berinavo “Verenio nalo asidom auebin kiniou bunu kito ve juo, nina bo ga na, mia kiniou maka nejikia navar bonbonuaso, ka never kiniou maka nove kanamo.” Mia kiano naiagagoano dolu nalo bunu aberii jibe na.

*Yesu ba bolkouo yako Ketsemani*

*Mak 14:32-42; Luka 22:39-46*

<sup>36</sup> Karina Yesu naliko kiano naiagagoano nalo aban ea vio tai, siano Ketsemani. Naruei naio ber kalo, berinavo “Kamiu kuvitua vio nei beamu vo, mia kiniou nava lie kija bereio, ka nava novolkouo ve telisu yako.”

<sup>37</sup> Naruei naio buru Pitere naliko Sepeti kenerinio juo, Yemesi naio Jone, nalo tolu naliko aban lie kija telisu bereio, mia ka bogo nei Yesu mijog kiano iviso binimeĩ temi laka, naio mijog bova toru laka. <sup>38</sup> Ana naio mil ban nalo tolu nei, berinavo “Vonganei, nemijog niunuku burukorov toru, mila vaataro ka naĩaro kario. Aiou bo ka kamiu kuvitevijo vija kiniou ve telisu beamu ea vio nei vo.”

<sup>39</sup> Ana Yesu miel ba lie kija telisu bereio, ana naio mijoru minie, dabuko mirano ka rivolkouo. Ana naio bio, berinavo “Teta o-o, verenio jau komijikia kala vite nei, aiou kiniou nejidom ka jau kejelar baja na jogvaiano nei den kiniou ka mia kiniou nomunu ea re. Mia kala re tibe ka na kanaku jidomiano, mia kala ea ga kanamo.”

<sup>40</sup> Karina, naio binimeĩ bereio kean naiagagoano tolu nei, naio mialo ajumĩ amonmelio ruei. Karina ajevijo, ana Yesu berii ka Pitere, ber “?Jumĩabe ana kamiu maka kuvijikia kuvitevijo rivija kiniou ka aura ve takurano ga nei? <sup>41</sup> Kamiu monokanio kuvitikar vatitig rivu, a kamiu monokanio kumolkouo bogo nonovio, ka mia natiboliboiano nalo ala re kamiu kuvijoru ea kariano. Riano ga, kenemiu jidomiano jikili bo, mia niabemiu melukluku toru laka.”

<sup>42</sup> Karina valuo nene, naio ban bereio ea vio nabano, naio bolkouo bereio, berinavo “Teta o-o, verenio jau maka kejikia kodular baja na jogvaiano na kiaku nei, mia kiniou monokanio nomunu eaio, bior monokanio tibe kanio ga na jau kojidomio.” <sup>43</sup> Karina, naio binimeĩ bereio, mial nalo tolu nei ajumĩ amonmelio bereio, bior nalo miralo jouo ajevijo dedeio.

<sup>44</sup> Naruei naio juvan nalo tolu nei aju ga, ana naio ban bereio ea vio napano naio bolkouo ber bereio iliano takurano ga, mila varolu ka ninei. <sup>45</sup> Naruei naio binimeĩ bereio kean nalo tolu nei, ana berenio “?Ei,

kamiu kumijilimebi, kamiu kumonmel kia ga vo? !Kamiu kuvitikario! Vaataro ka bogo na Kulorinio Kenerinio naio rivan ea tomu na bova nalo jumĩalo naruei. <sup>46</sup> Kito, kuvitumolu, ravano. Kamiu kumial na, toro na jiveluku ka kiniou nana ju binimeĩ vaataro ga naruei.”

*Nalo abokakar Yesu jikili*

*Mak 14:43-50; Luka 22:47-53; Jone 18:3-12*

<sup>47</sup> Ana bogo na Yesu naio jomĩ beriliano nene kia ga vo, Jutas neibano naio be naiagagoano duelimo ba juo [12] tai, naio binimeĩ, naliko tomu telabo na mira nalo abar iobogu na mira bija kialo nia nalo. A tomu na tortoru nalo na kulo lu nalo naliko navurimĩaraboiano nalo na kulo Israel, nalo naruei amiilalo abinimeĩ.

<sup>48</sup> Mia beamu ka nalo amaluvo, toro na tiveluku Jutas naio berial kijokijo tai banlo, naio berinavo “Toro na verenio kiniou neviviuo naio tukamu, naio naruei kamiu kuvokakar naio sikili,” <sup>49</sup> mia bogo napano nalo amiyotuba, Jutas miel memedu ka Yesu, biviuo naio ana naio berkanio, berinavo “!Bogiano bo-o, Naverloglogiano! Tumĩaro to vijaso.”

<sup>50</sup> Ana Yesu berkanio, berinavo “Koig, imĩauano napano kobinimeĩ kanio, mia jau kalaiio ga.” Naruei nalo abinimeĩ, abokakar Yesu jikili.

<sup>51</sup> Mia bogo napano abokar naio jibe na, ana Pitere burular kiano iobogu, ĩiligio je titire ea Parinio toro Lu kiano toro tai ana jelar tilinieno tivelinio. <sup>52</sup> Naruei Yesu mil banio, berinavo “Kodu vatitig kanamo iobogu rivan ea sivi nene bereio. Toro na jo midu iobogu na mira, mia naio rimĩaro ea iobogu na mira. <sup>53</sup> ?Kamiu kuberiamĩ maka nejikia nevio van Teta ka naio rijai kiniou? Verenio nevio van naio, mia ve vaarakurano ga, naio riila kiano taara na nailiano nalo ve telabo ka mia amei avitkar kiniou. <sup>54</sup> Mia verenio kiniou nala tibe na, mia iliano nalo nanua jua Vivitauiano

Lu, mia maka ajikia amei ve riano, tibe kanio napano aberkario nua ruei.”

<sup>55</sup> Mia Yesu mil ban tomu nalo nei, naio berinavo “?Ka vaio ana kamiu kubar kenemiu iobogu nalo bija kenemiu nia nalo? Kubokar bena kiniou jibe na? ?Peli kamiu kuberiaña kiniou nebe toro kouo na vinauano, p̃eli na napano ña mue toro? ?Mia legiano nonovio kiniou nojom̃a noberloglog tomu nalo ea Atua Kunuano Lu, mia jum̃abe ana maka kamiu kumei kuvokar kiniou ea bogo na? <sup>56</sup> Mia vite nalo nei bo ga na, bior vite nalo na kamiu kumitu kumilaio, jibe ka ga napano naverialiano nalo aberialio nanua ruei ea Vivitauiano Lu, ana kialo iliano nalo nene, aju abinimei aberiano naruei.”

Ana ea ga aura nei, naiagagoano nalo ajuvan Yesu, nalo aburo ka naio.

*Aburu Yesu ban ea komeli labo na kulo Ju nalo kialo*

*Mak 14:53-65; Luka 22:54-55,63-71; Jone 18:13-14,19-24*

<sup>57</sup> Mia nalo napano abokar Yesu, aburu binimei ka ala naio tumolu tukamu kean Kaivas, Parinio toro lu, napano naverloglogiano na tuboiano nalo naliko navurim̃araboiano na kulo Ju nalo kialo abinimei vio takurano ea kiano komeli nene ruei. <sup>58</sup> Mia Pitere bunu jakisor Yesu ka bogo nene, mia naio maka rivan vaatara ka naio, mia bogo na abinimei jouro ea burusio na komeli labo nei, Pitere naio ba jotano naliko Kaivas kiano tomu na im̃auano nalo, ka mia rijog von ka mia ala tum̃abe ka Yesu.

<sup>59</sup> Naruei tomu na tortoru na kulo lu nalo, bija tomu na tortoru dolu nalo na aju joomo ea vioriano nei, nalo ajirag tomu nalo tai ka mia ajubolbo ka Yesu, ka mia aver vite nalo tai ka napano aial ka amijikia auebin Yesu riviorio. <sup>60</sup> Naruei nalo amil, ana tomu telabo ajumolu, amijubolbo bano-o, mia vioriano nei maka rial vite tai ea kialo iliano nalo

rivare ka mia ala tibe na ka Yesu. Kialo iliano nalo beve dolu ga jibe na bano-o bisi ana tomu juo ajumolu, <sup>61</sup> aber iliano takurano ga aberinavo “Toro na naio berenio mijikia rue bulag Atua kunuano Lu, karina naio rivot vavin bereio ka bogoti ve tolu ga.”

<sup>62</sup> Naruei Parinio toro lu nei naio jumolu, mil ban Yesu, berinavo “? Jum̃abe, jau koverdoṓelo, p̃eli na makanio? ?Jum̃abe ka iliano nalo nam̃a aju aber bulagio na?”

<sup>63</sup> Mia Yesu maka ril, naio ju buru ga. Naruei Parinio toro lu nei berkanio bereio berinavo “?Kiniou neber kaso, jau monokanio kover Atua Meul siano kover riano ka jau kobe Naverikariano, napano Atua kenerinio, p̃eli na jau maka kove naio? ?Jau monokanio koverialio vatitig van kumemi vonganei!”

<sup>64</sup> Naruei Yesu mil banio, berinavo “Vite nene naruei, jau kojom̃a koberenio kiana. Mia kiniou neber ka kamiu, iorou kanio vesiou re, kamiu kuvial Kulorinio Kenerinio napano mia naio totano tivelinio vameruo ea Atua na moroano, a mia kuvial naio riyotuba ea melijo nalo ea yetemeriba.”

<sup>65</sup> Mia Parinio toro lu nei, naio tinien mimi m̃ele, ana mijede m̃ano kulukoti, ana naio berinavo “!Barei naruei! Toro na naio ber niegeniege Atua siano lu ruei. ?Kamiu kumijogio? ?Jum̃abe ana roju rejirag bereio toro tai ka mia river bereio titai ka naio? <sup>66</sup> ?Vioriano jidomii jum̃abe? ?Mia roviron tum̃abe?”

Nalo amil aberenio, aberinavo “Bo kanio auebin toro na naio rim̃aro.”

<sup>67</sup> Naruei nalo abule mirano, a ajuku naio, mia tealoo amijuba bilivilig naio, <sup>68</sup> ana nalo amiyotel ea naio, abika denio aberinavo “?Ei, Naverikariano, jau koverial vonio, kenia mijubaso vonga na?”

*Pitere barbonbonua Yesu*  
*Mak 14:66-72; Luka 22:56-62;*  
*Jone 18:15-18,25-27*

<sup>69</sup> Ana ka bogo nene Pitere naio jotano jouro ea burusio nei, ana niatira tai napano joña bitikar yimo naio binimeĩ, berinavo “!Uerei, jau bunu kamliko Yesu na vio Kalele neibano!”

<sup>70</sup> Mia kamu ea miralo abiniu, Pitere barbonbonua tenei, naio berinavo “Kiniou maka nejikia tena jau kojoma koberenio na.” <sup>71</sup> Naruei naio buro den niatira nene, batavio jua morouo na toru na burusio na komeli nei.

Ana ea vio na, niatira dolu mialio, ana naio berii ka tomu nalo na aju vaataro, berinavo “Tete na, naio naruei naliko Yesu re Nasarete.”

<sup>72</sup> Ana Pitere naio barbonbonua tena bereio, naio mila kiano iliano jikili, mia naio berinavo “Peli ga, kiniou maka leleio nejikia toro na.”

<sup>73</sup> Ana maka vesiou, ana tomu nalo na aju vaataro ea morouo nene abinimeĩ ea Pitere, aberii kanio aberinavo “Ninei be riano, jau kobe nalo tai, bior jooa na kojoma kabar ka kiamo iliano, jibe ka kulo Kalele nalo.”

<sup>74</sup> Mia Pitere naio mila iliano jikili lie vo, ana naio berinavo “!Maka leleio! !Riano ka tiniabene! !Kiniou neberenio ruei, maka nejikia tete na!”

Ana memedu ka bogo nene, tormanano tai jokokoreko, <sup>75</sup> ana mila Pitere tinien maio ka Yesu kiano iliano, napano naio berkanio berinavo “Riano kiniou neber kaso, mia ka bogiano nei ga, bogo na tormanano tokokoreko re vo mia jau kavarbonbonua kiniou ve varolu, koverenio maka kejikia kiniou.” Naruei Pitere batavio, naio jegi mia jegi ka tinie na jogvaiano toru.

## 27

*Abur Yesu ban ea parinio tubo na Romo napano joña bitikar Israel*

*Mak 15:1; Luka 23:1-2; Jone 18:28-32*

<sup>1</sup> Naruei kavijo, binimeĩ bogo na mērenio bavin, tomu na tortoru na parinio kulo lu nalo naliko

navurimāaraboiano na kulo Israel nalo, ajutano bereio ka alavon ka avirakar mārabo tai rivu, ka mia rila ana Yesu monokanio rimāaro. <sup>2</sup> Mia bogo napano amil bisi, ana amiorkar Yesu jumāno, ana aburu naio ba ban Pailat, napano naio be Parinio tubo na vio Romo napano naio bitikar Israel ka bogo na, ana nalo amidu Yesu joa Pailat nene jumāno, ka mia naio tibureio.

*Jutas ga milabin naio bereio*

*Imāuano 1:18-19*

<sup>3</sup> Mia Jutas, napano naio jiveluku ka Yesu karina, naio bitilubar ka ajibure Yesu ruei ka monokanio mia naio rimāaro, ana naio mijog bova toru ka vite na milaio. Ana naio bilig kiano jidomiano bereio ruei, ana naio bar bereio silva duelimo va rolu [30] nei, ba ban tomu na tortoru nalo nanua abar banio jukamu. <sup>4</sup> Naruei naio ber kalo, berinavo “Kiniou nabijuku bova bior nejiveluku ka toro na maka rila titai leleio tokoro, mia kanaku iliano ga mila ka mia ala bin naio rimāaro.”

Ana nalo nei aberii kanio ga, aberinavo “?Ai koig, jumābe ana jau kobinimeĩ kejegi bereio ban kumemi? Kumemi nubisi denso ruei.”

<sup>5</sup> Naruei Jutas p̄ilig mēlea ga puruveru nalo nei joomo ea Atua kunuano Lu, ana naio batavio, ba jellan burujono ka teli, ka naio rimāaro.

<sup>6</sup> Mia tomu na tortoru na kulo lu nalo nei aba abar puruveru nalo nene, naruei nalo aberenio “Puruveru nei, burukija na toru miou kario ruei, ana ea kiado tuboiano, maka rejikia rodu puruveru na jibe na toa basaro na Atua kunuano Lu.” <sup>7</sup> Ana nalo aberiio, karina nalo abar puruveru nene, aba abulu ka niatano tai, napano beamu, siano “Borotano Na Tanoḡili,” naruei nalo ajuvan niatano nei be pakeltavo na valauo nalo m̄alo. <sup>8</sup> Tenene na, binimeĩ bokar banei, tomu nalo ajumā abio niatano nene, aberenio “Borotano na Burukija.”

<sup>9</sup> Vite na jibe na, ana mila Naverialiano Jeremaia kiano iliano tai re nua naio binimei be riano, napano berenio

*“Abar puruveru silva veru duelimo va rolu [30], bare ka napano kulo Israel aberenio naio bare ka avulular ka toro,*

<sup>10</sup> *ana nalo aba abulular borotano nei den toro naña miñauka tanoñili, jibe ka na Atua berii ka kiniou ka noiñau kanio.”*  
*Sek 11:12-13*

*Yesu jumolu jukamu ea Pailat mirano*

*Mak 15:2-5; Luka 23:3-5; Jone 18:33-38*

<sup>11</sup> Ana nalo aburu Yesu binimei jumolu jukamu ea Parinio Tubo Pailat, ana na bika den Yesu berinavo “?Jau kobe Parinio tubo ka kulo Israel nalo ðeli na makanio?”

Ana Yesu mil berdoþeio, berinavo “Tenene na, jau kojoma koberenio na.”

<sup>12</sup> Mia bogo napano tomu na tortoru na kulo lu nalo naliko navuriñaraboiano nalo aberii lualua vite nalo telabo kar Yesu, mia Yesu maka bunu riverdoþe titai.

<sup>13</sup> Mia Yesu naio juburu ga jibe na, naruei mila Pailat bika bereio, berinavo “?Jumabe, jau maka kosidomial ka ajumña aberenio vite telabo na bova karso?”

<sup>14</sup> Mia ea tivelinio na vite nalo na ajumña aberenio nei, mia Yesu maka leleio riveriþe titai vanlo, naruei Parinio tubo nei miilo toru kanio.

*Pailat mijamo ka Yesu naio monoka riñaro*

*Mak 15:6-15; Luka 23:13-25; Jone 18:39-19:16*

<sup>15</sup> Ka bogo nene, mia nalo aju kia ga vo ea Jokoluolu na Sidomkariano Na Ioruriano, mia ka yuka nonovio ea jokoluolu nei, Parinio tubo na Romo nei naio joma mila vite tai ka kulo Israel nalo. Naio jibe ka napano verenio nalo tealu ajua tetavokoiano, ana nalo amijikia aver nalo tai kalo, ka mia parinio tubo nei naio rijamo ka naio riva tavio.

<sup>16</sup> Mia ka bogo nei, toro na poletik tai joa tetavokoiano, napano mia tomu nalo amijikia batitig naio, siano Yesu Barabas.

<sup>17</sup> Naruei bogo na tomu nalo abior vio takurano nalo telabo ea vio nei, Pailat bika denlo, berinavo “?Kamui kumisidom kiniou najamo ka kei taluvo riviedu bereio ea kamui? ?Yesu Barabas, ðeli na Yesu na aju abio naio ka Naverikariano?”

<sup>18</sup> Pailat bika jibe nei, bior naio mijikia ruei ka tomu nalo na tortoru na kulo Ju nalo, nalo ga aburu Yesu binimei banio bior imauano na jokuano ga, bior kialo tomu nalo ajaaro toru ka Yesu.

<sup>19</sup> Ana ea bogo na bunu napano naio jotano ea vio na tibureiano ka rila iliano nei, mia kouano miila toru binimei banio berinavo “Jau kala re titai ka toro na. Naio maka rila titai, mia ka bogiano kiniou nomonbovui naio, mia vonganei kiniou nomijog bova toru kario.”

<sup>20</sup> Tenene na, Pailat jidom tuvan Yesu, mia tomu nalo na tortoru na kulo lu nalo naliko navuriñaraboiano na kulo Ju nalo, amila bulag tomu nalo kialo jidomiano nalo, ajikili laka kalo, aberinavo monoka averii ka Pailat naio tuvan Barabas, mia naio rila Yesu riva riñaro.

<sup>21</sup> Naruei Parinio tubo nei naio bika denlo bereio, berenio berinavo “?Kamui kumisidom kiniou najamo ka tomu juo nei, na vabe nene naio taluvo rivano?”

Ana nalo abio jouo, aberenio aberinavo “Barabas.”

<sup>22</sup> Naruei Pailat bika denlo, berinavo “?Mo, bo ga, ana mia kiniou nala tumabe ka Yesu napano ajumña abio naio ka Naverikariano?”

Mia nalo abiniu amiaga jouo, aberenio “! Kotukukar naio toa mñakolkolo!”

<sup>23</sup> Ana naio berinavo “?Kar vaio? ?Venia bova napano naio milaio?”

Mia nalo amiaga kilkil, aberinavo “Kotukukario, kotukukario toa mñakol kolo.”

<sup>24</sup> Telikiti na Pailat mial ka maka rijikia riverburelo, bior uetubaiano jumolu mēle ruei, ana naio midu baju na uei tai, naruei kamu ka tiniobi nei, naio jekon jumāno, ana naio berenio “Mia burukija na toro nei toa re kiniou. Kiano māriano naio be kenemiu iñauano ga.”

<sup>25</sup> Naruei tomu nalo amil aberdoḡe, aberenio “Bo ga na, jibe na garuei ana kumemi numisidom, napano kiano māriano be kenememi iñauano, a napano kiano burukija naio toa kumemi vija kenerimemi nalo.”

<sup>26</sup> Ana Pailat naio mijamo ka Barabas banlo, jibe ka na nalo ajidomio, ana naio midu Yesu joa kiano kulo na mira nalo jumālo ka avitivio, a ka avuruio rivan ka atukukario toa mākolokolo.

*Kulo na mira nalo amiyotel ea Yesu*

*Mak 15:16-20; Jone 19:2-3*

<sup>27</sup> Naruei Pailat kiano kulo na mira nalo aburu Yesu abatavio ea vio medave na kanano komeli nene, mia nalo abio bunu kulo na mira taara dolu nalo ka amei aial Yesu. <sup>28</sup> Naruei nalo amiya bulag kanano kuluniabene, ana amiya kulukoti tai ea naio napano niabene be vabolo jibe kanio namā parinio tubo nalo amiyaio, <sup>29</sup> naruei nalo abar tilikou abili vatitig bisi, ana amive joa parinio, jibe ka parinio tubo kanano batubatu tai, ana nalo amidu bunu iesi tai joa jumāno meruo ka naio rivokario. Naruei nalo aju aminie ka sudu jaalo kanio, ana nalo aju amiyotel eaio, aberinavo “! Kumemi nubameneaso, jau Parinio tubo novo na Kulo Israel kialo!” <sup>30</sup> Ana nalo aju abule titia naio, a amidu burusubavio nene, amue ka Yesu pariparinio. <sup>31</sup> Mia bogo napano amiyotel ea naio bisi, ana nalo amiyalar kulukoti vabolo nei denio, ana amiya māno kuluniabene ea naio bereio, ana nalo aburu naio, abatavio ka atukukakario ea mākolokolo.

*Ajukukar Yesu ea mākolokolo*  
*Mak 15:21-32; Luka 23:26-43;*  
*Jone 19:17-27*

<sup>32</sup> Ana bogo na kulo na mira nalo aburu māarabo ka Yesu aba tavio, ana nalo amileal toro na vio Saireni tai, siano Saimon, naruei nalo ajutua naio ka naio kija rudu Yesu kiano mākolokolo rivano. <sup>33</sup> Mia nalo aba abokar suku tai, napano siano Kolkota, napano nioti nene berenio vio na jibe kanio bordada. <sup>34</sup> Bogo napano nalo amijivi ea vodobi na suku nene, nalo ajidom adu mārumēlmēlu tai van Yesu ka rimunuio, mia mārumēlmēlu nei vati titai napano mijeia juaio, ka mia rila Yesu niabene je ka mia rijog re rijalele mēle, mia bogo napano Yesu miomo vonio, mia maka sidom rimunuio.

<sup>35</sup> Nalo aburu Yesu bano, ana ajukukakar naio ea mākolokolo. Karina, nalo amila jibe ka na amiere mābujo ka aleal ka mia kei rivar Yesu māno kuluniabene tai a kei rivar dolu nene, <sup>36</sup> ana nalo ajutano ea vio nene ka aviti kuku ka naio. <sup>37</sup> Ana nalo ajiri verialiano tai, ajukukario jo mave ka parinio, naio berial vite na mila amuebin naio biorio, napano naio berenio “Nina be Yesu, Parinio tubo na kulo Ju nalo.” <sup>38</sup> Mia nalo amidu tomu juo na vinauano ajukukakarlo bunu ea mākolokolo jibe ka Yesu, amidu tinene jo tivelinio vameruo, a tinene jo tivelinio vanāli.

<sup>39</sup> Naruei tomu nalo napano mā amiel abarlaka ea vio na, aḡiligvīlig pariparilo, aberii niegeniege Yesu liki, nalo aberinavo <sup>40</sup> “!A! Jau mā na, nanua mā kober komijikia kala bulag Atua Kunuano Lu, ka mia bogoti ve tolu ana koivon kar vavin bereio, mia jumābe naruei? !Ee, mia bo ka jau kalarur kanamo meuliano vonio! !A verenio jau kobe Atua kenerinio riano, kataluvo den mākolokolo na, ana katabulu!”

<sup>41</sup> Ea bajago nene ga bunu, tomu na tortoru na kulo lu nalo naliko naverloglogiano na tuboiano nalo naliko navurim̄araboiano nalo aju abital eaio, <sup>42</sup> nalo aju aberinavo “! Peli naio milarur tomu dolu nalo telabo ruei, mia vonganei, naio maka rivare ka rilarrur naio! ? Naio be kito kulo Ju nalo kiado Parinio Tubo na, p̄eli na makanio? Bo ka naio tabulu den m̄akolkolo vonganei, ka mia kito romonea naio. <sup>43</sup> Toro na naio berenio naio biekouo ea Atua, naio berenio naio be Atua Kenerinio. !Mo, kito reial vonio, verenio Atua jaaro kanio, mia naio rilarrur naio vonganei!”

<sup>44</sup> Mia tomu juo na vinauano napano ajukukakarlo ea m̄akolkolo jibe ka Yesu, naljuo bunu amil bova ka Yesu, abironkar nalo nei ka kialo ilivovaiano nalo nalikolo.

*Yesu m̄aro*  
*Mak 15:33-41; Luka 23:44-49;*  
*Jone 19:28-30*

<sup>45</sup> Ana ea legiano viovare, ana melijokouo binimei miununuko vio reraio, mia jo jibe na bano-o bokar m̄erenio tolu niogoravo, <sup>46</sup> mia vaataro ka bogo na, Yesu miaga jouo ea kiano iliano memedu, naio berinavo “?Eli, Eli, lam̄a sabatani?” napano berenio “?Kiaku Atua, kiaku Atua, ka vaio ana kojuvan lelan kiniou nojo jibe nei?”

<sup>47</sup> Mia tomu nalo nei tai ajua vio na, nalo aju abitii vite nalo na malmaluvo, nalo amijog belia Yesu miaga jibe nei, nalo aberenio “Toro na naio jo bio tormoruo Elaija, ka rimej rijai naio.” <sup>48</sup> Mia soṗeli ga, nalo tai jikiti binimej, midu burujumu tai, miyon m̄arjum̄elm̄elu na mijea ban eaio, julu kario ka iesi tai, ana jianio ban Yesu ka rimunuio. <sup>49</sup> Mia kulo dolu nalo aberenio “!Ei, jau koto vo! Reial vonio, p̄eli mia tormoruo Elaija rimej rilarrur naio bo, p̄eli na mia rimej re.”

<sup>50</sup> Karina Yesu miaga jouo bereio, naio buru maaria kanano jegi, ana

juvan niununo bano, ana mo naio m̄arodobi liki.

<sup>51</sup> Monloglog ea bogo nene ga, jagidago na ea Atua Kunuano Lu, napano joko vio lu na be vio lu laka, naio buruṗe tivelinio juo, jikario mave batove boru yetano. Mia m̄ii mukulkulu ka borotano, ana puruveru nalo na tortoru aburuboṗelo, <sup>52</sup> mia ea pakeltavo, martanbo telabo na tomu nalo na memedu nua ajuvavo, mia tomu nene nalo amemeul bereio. <sup>53</sup> Ana amolmoluo den salo m̄artanbo, mia iorou ka bogo na Yesu bunu meul bereio ea nam̄ariano, nalo nei amiel aban ea bulukomeli lu na Yerusalemo, naruei tomu telabo amialo.

<sup>54</sup> Naruei kulo na mira nalo, naliko kialo toro na toru, napano aju abitikar Yesu, bogo na amijog m̄ii mukulkulu, nalo amial vite nalo na amalmaluvo, nalo amerou toru, amemebiju, ana nalo aberenio “! Aue, tomu nalo, toro nei be Atua Kenerinio riano ga!”

<sup>55</sup> A tire nalo telabo ea vio na, nalo ajikili aju koalabo, aju abitivitii Yesu. Nalo na, nanua ajaluvo Kalele ruei, ajum̄a jakisor Yesu bano-o, a nalo ajum̄a amiija naio. <sup>56</sup> Ana iviso ka tire nalo nei, tolu nene tai be Mere tira re Maktala, a Mere napano Yemesi naio Yoseve kenielo, a tira napano Sepeti kouano.

*Yoseve jivin Yesu*  
*Mak 15:42-47; Luka 23:50-56;*  
*Jone 19:38-42*

<sup>57</sup> Naruei toro tai na vio Arimatea naio jo, napano naio be Yesu kanano naiagagoano, a naio be toro na sanibaiano, siano Yoseve. Naruei bogo napano vaataro ka m̄erenio rivatove, <sup>58</sup> naio ba jikili jukamu ka Pailat mirano, ana naio bika Yesu mokotenano. Naruei Pailat berii ka kiano kulo na mira nalo ka adu Yesu mokotenano rivan naio. <sup>59</sup> Ana Yoseve naio midu Yesu mokotenano, mijuvulukoio ka kulum̄arauo tai na miuvu bo, <sup>60</sup> ana naio midu ba joa m̄ano buluvae vou, napano aje

batitigio vonga. Ana amilivlivi ka puruveru na toru nene binime, ajubonkokar buluvae nei m̄aratavo nene, ana Yoseve nalo aban bereio. <sup>61</sup> Ana Mere juo nei, tinene tena vio Maktala, naliko naljuo dolu nene, abinime ajua vio nei, ajutano memedu ka m̄aratavo na buluvae nei napano Yesu mokotenano jo joomo eaio.

### *Kulo na mira nalo ajukuku ka buluvae*

<sup>62</sup> Vite nalo na amalmaluvo ea legiano na ka rila vite nonovio atu batitigio ea Legiano Lu. Mia bogoti dolu nene, napano naio be Legiano Lu nei naruei, tomu na tortoru na kulo lu nalo naliko Vari-sis nalo aba ajumolu aju kamu ea Pailat mirano, <sup>63</sup> nalo aberinavo “O Pailat, kumemi numisidom nuverial titai kaso beamu vo, napano kumemi numitum̄a numisidomii kia ga toro na sibiano nei, ka bogo napano naio meul kia ga vo, ana naio jom̄a berkar berenio ‘Iorou ka legiano ve tolu, mia kiniou nemeul bereio.’ <sup>64</sup> Tenene na, kumemi numisidom nuvika denso, ka jau ke-ila kanamo kulo na mira nalo tai avan ka atukuku ka buluvae na riva ribisi ea legiano tolu nene. Tibe m̄a na mia kiano naiagagoano nalo amei avinalar ka mokotenano, ana mia nalo ala sibi, averial ka tomu nalo averenio ‘Naio meul bereio ea nam̄ariano.’ Verenio tibe na, mia kiano sibiano na iorou nene mia naio rivova laka, tovulu nana jukamu.”

<sup>65</sup> Naruei Pailat berii kalo berinavo “Mo, bo ga, kami kuvuru kiaku na mira nalo tai avano, ka ala vite nonovio tibe ka na kami kumisidom, ka kuvitkar vio na.”

<sup>66</sup> Ana nalo aba amila vatitigio puruveru nei a abijuru ka bijuru tai, ka verenio toro tai rikulkulu ka veru nei, mia bijuru nene rivurikorovio, ka mia amijikia avitilubariorovio, ka mia amijikia avitilubariorovio, ka mia amijikia avitilubariorovio. Ana abar bunu kulo na mira nalo ajukuku ka vio nene.

## 28

### *Buluvae beteau jo*

*Mak 16:1-10; Luka 24:1-12; Jone 20:1-10*

<sup>1</sup> Legiano Lu barlaka, ana legiano napano binime iorou, napano be legiano moti na sude, bogo napano m̄erenio mijivi, ana Mere na vio Maktala, naljuo Mere dolu, abe juo aba ka aial buluvae nene. <sup>2</sup> Naljuo aba aboru ea vio nei, soḡeli ga m̄ii mukulkulu toru, bior Atua kiano nailiano tai moluo den vio mave binime ea yetemeriba, melivlivilar ka puruveru nei, ana naio ba jotano mave eaio. <sup>3</sup> Mirano merera o-o mia, kiano kuluniabene meravo a miuvu mia miuvu kirinovo, <sup>4</sup> mia bogo na kulo na mira nalo amialio, nalo amerou kilkil bano-o mia m̄a am̄arm̄aro yulu kanio garuei aju.

<sup>5</sup> Naruei nailiano nei naio mil ban tira juo nei, naio berinavo “Kamjuo kumerou re. Kiniou nemijikia ka kamjuo kubinime nei kar ga Yesu napano ajukar naio ea m̄akolkolo, <sup>6</sup> mia naio maka bunu toa vio nei, naio meul jumolu bereio ruei, jibe kanio napano naio berkario jukamu. Kamjuo kumei kuvial vio napano nanua mokotenano mon eaio. <sup>7</sup> Naruei kuve juo kuvan soḡeli, kuverialio ka kiano naiagagoano nalo ka naio meul bereio den nam̄ariano. Mia vonganeei, naio tukamu rivatove Kalele, mia kami kuviniu kuvatove bunu kuvial naio ea vio na. Ninei naruei be kanaku iliano ban kamjuo.”

<sup>8</sup> Naruei naljuo ajuvan buluvae, amila soḡeli aba. Naljuo abano jibe ka napano amerou kia ga vo, mia ajaaro toru bunu. Naruei abe juo ajikiti aban ka averial lilianiano nei ka kiano naiagagoano nalo, <sup>9</sup> mia naljuo aju aba kia ga jibe na, ana abitavo bija Yesu. Amiilo binvinlo garuei, ana naio mil banlo berinavo “Kavijo bo.” Naruei naljuo aba aminie yetano ka Yesu jaano, ana abe juo abokar jaano, ana amilotu

kano. <sup>10</sup> Naruei Yesu berii ka naljuo nei, berinavo “Kamjuo kumerou re. Kuve juo kuvan bereio kuverialio ka kuruaku nalo ka mia nalo ava Kalele, naruei ea vio na mia nalo amijikia aial kiniou.”

*Kulo na mira nalo aba aberialio vite nalo nei*

<sup>11</sup> Bogo napano tira juo nei aban bereio ea naiagagoano nalo, naruei kulo na mira nalo tealoo aban bereio Yerusalemo, aberial vite nalo na amalmaluvo ka tomu na tortoru na kulo lu nalo. <sup>12</sup> Naruei kulo lu nalo nei aba vio takurano naliko navurimaraboiano nalo, aberii vite nei bano-o, bisi na abironikar ka abar veru toru ban kulo na mira nalo nei, <sup>13</sup> ana nalo amil jikili banlo, aberinavo “Kamiu monokanio kuva kuverialio ga ka tomu nalo, kuverinavo ‘Kiano naiagagoano nalo ga abinimei bogiano, bogo napano kumemi numitumãa numonmelio, naruei nalo abinalar ka mokotenano, amidu abano.’” <sup>14</sup> Aber kalo bunu, aberinavo “Verenio iliano na tenei riva rivoru ea Pailat, mia kumemi nuva nuvila vatitigio vija naio, mia kamii kuvijog re bunu iliano tai.”

<sup>15</sup> Naruei kulo na mira nalo nei ajaaro ka veru nei, ana abario naruei, ana nalo aba amila ilisibiano janea vio jibe ka na aberii kalo, mila ana Kulo Israel nalo ajumãa aberver iliano nei binimei bokar banei.

*Yesu binimei ea kiano naiagagoano nalo*

*Mak 16:14-18; Luka 24:36-49; Jone 20:19-23*

<sup>16</sup> Naruei naiagagoano duelimo ba tai [11] abatove Kalele, ea burusuku na Yesu berii kalo, <sup>17</sup> mia bogo na nalo amial naio nalo amilotu ka naio, mia nalo tealoo ajidom dede ga ka be Yesu p̃eli na maka ve naio. <sup>18</sup> Naruei Yesu binimei vaataro kalo, ana naio berii kalo, berinavo “Atua mijamo ka vite nonovio jua jumãaku, napano mave a na vio yetemeriba nei bunu, ka mia kiniou neje tuboiano kalo.

<sup>19</sup> Tenene na, kiniou nemiila bulag kamii naruei, ka kamii monoka kuvan ea m̃atatoko nalo ea vio yetemeriba reraio, monoka kamii kuvurulo amei ave kiaku naiagagoano nalo, napano kuvaruei ealo ea Teta, Kenerinio a Niununo Lu sialo, <sup>20</sup> a napano kamii kuverlogloglo ka mia ajogkar iliano nalo napano kiniou neber ka kamii ruei. Mia monokanio kamii tiniemiu rimaio ka tulaka ka na mia kiniou noto kitoliko damariga, rivano-o rivokar juluvati na yetemeriba. Mm.”

**Yesu Kristo Kiano  
Ioluano Vou  
Napano  
MAK  
Bivitauiiao  
Verialiano Moti**

*Tukunu bulati na niosi nei*

Niosi nei Yesu Kristo Kiano Ioluano Vou napano Mak Jirio Iliano nei naio berinavo ioluano vou nei, napano be Yesu Kristo kiano Ioluano Vou, Atua kenerinio. Mak jiloglog napano Yesu be toro na iñauano, a moroano joa kiano iliano. Kito romjikia roial kiano moroano ea bajago nei napano naio jo berloglogii tomu nalo, a napano mije moroano ka rijilbulag sim̃aro, a ka ridu bulag tomu nalo kialo kariano. Yesu berial ka naio be Kulorinio Kenerinio napano binimei ka sian kiano meuliano ka ridu bulag tomu nalo kialo kariano, ka rila lo ajev ioruriano. Mak berii Yesu kiano vremesiano nalo liei jovulu napano naio berii kiano iliano nalo.

Ea niosi nei, beamu Mak berii Jone Baruei a kiano iñauano, bija napano Jone baruei ea Yesu. Iorou naio berii napano Sim̃aro mila von Yesu. A iorou ka iliano bulati nei, naio judu ka berii Yesu kiano iñauano napano naio jo mila tomu nalo napano amie amijog bo bereio, bija napano naio jo berloglog tomu nalo. Bogo na Yesu jo mila kiano iñauano nalo, bogo nonovio kiano tomu nalo aju amijikia naio liei. Mirano maariano nalo na niosi nei aberii Yesu kiano meuliano ea kiano sude maaro ea yetemerba nei, a vite burtumoruo napano naio berenio, nina kiano m̃ariano, bija napano naio meul bereio.

Ea mirano duelimo ba ari [16] tomu miroano amonea aber Mak bivitauiia tukunu maaro ea togio arolu [8] ga mia torogio iorou kanio, toro dolu tai bivitauiiao.

*Tukunu nalo na ajua niosi nei*

Jone Baruei kiano iñauano 1:1-13  
Yesu kiano iñauano yako Kalele  
1:14—9:50

Yesu jaluvo den Kalele ban yako  
Yerusalemo 10:1-52

Yesu kiano sude maariano na-  
pano mila kiano iñauano yako  
Yerusalemo a ea vio nalo jeliviv  
kean Yerusalemo 11:1—15:47

Yesu meul bereio 16:1-8

Yesu miyotuba kean kiano tomu  
nalo bija naio bavin ea Tini-  
abene 16:9-20

*Jone Baruei naio joa vio yauo,  
naio berial Atua kiano iliano*

<sup>1</sup> Niosi nei, naio be Ioluano Vou na  
Yesu Kristo kiano, Atua kenerinio.

<sup>2</sup> Tukunuano na ioluano vou nei  
naio jikario bija Jone Baruei, jibe  
napano Atua kiano Iliano Lu beriio  
nuanua ruei, ea iliano tai napano  
naverialiano Aisea berialio, napano  
Atua naio berenio, berinavo

*“Naio be toro tai na ridu kiaku iliano,  
napano kiniou nemiila naio  
biedu jukamu kaso, ka rila  
vatitigio kiamo m̃arabo nalo  
ameravo rivu. Mal 3:1*

<sup>3</sup> *Mia naio joñã bio ea vio yauo,  
berinavo*

*“Kamiu kuvila vatitigio m̃arabo  
nalo na Tubo Atua kiano, nalo  
amemedu rivu, ka naio mijikia  
rieliel ealo, naio rimaluvo ea  
kenemiu meuliano nalo!” Ais  
40:3*

<sup>4</sup> Jibena naruei, Jone Baruei naio  
miyotuba ea vio yauo ea tanobuku  
na Yutea, ana naio jo mioliolu ka  
Atua kiano iliano ban tomu nalo.  
Naio berial banlo berinavo “Kamiu  
monokanio kuvilig kamiu rivior  
kenemiu kariano nalo, a kumei,  
ana mia navaruei ea kamiu ka uei,  
naruei mia Atua riviekokoa kamiu  
riviorio.” <sup>5</sup> Mia tomu telabo laka  
yako Yerusalemo a ea komeli dolu  
nalo na ea tanobuku na vio Yutea,  
nalo aban ka aiagago ka Jone, naruei  
nalo ajunã aber bulag kialo vova-  
iano nalo ban Jone ana naio baruei  
ealo ea marauei na Yortano.

<sup>6</sup> Mia bogo napano Jone Baruei joa  
vio yauo jibe na, naio mila javukia

tormoruo naverialiano re nua nei, Elaija, jibe napano naio maka to riya kulum̄arauo novo nalo leleio, m̄ano kulukoti abie bija vijinio temeul na toru tai ga kamel, mia miorikar m̄ano kulukoti nene bija niati kulubue marauo ga. Mia sano siniano ea vio yauo nene, be surubu nalo ga bija vite sese nalo nei napano jago deden miñaukanio. <sup>7</sup> Ana Jone berkar ban tomu nalo, berinavo “Mia toro tai, napano kiano moroano loa kiniou, naio mia takisor kiniou rimej. Toro nene loa ka kiniou, mia kiniou maka navare ka nomon korkor neialar kiano kulubue, p̄elina nala iñauano dolu tai na jibena van naio. <sup>8</sup> Kiniou nabaruei ea kamiu ea uei ga, mia naio rivaruei ea kamiu ea Niununo Lu.”

*Jone naio baruei ea Yesu*

*Mataiu 3:13-17; Luka 3:21-22*

<sup>9</sup> Mia maka vesiou, Yesu juvan komeli nei Nasarete, ea tanobuku na Kalele, binimej ea vio na ea marauei nei Yortano, ana Jone baruei ea naio ka uei nene. <sup>10</sup> Bogo napano Jone baruei ea Yesu bisi, Yesu binimej mave, jaluvo den uei, mia vaarakurano ga tiniabene betavo, ana naio mial ka Niununo Lu jo batove jibe ka vaama tai napano binimej yetano, bujo joa naio. <sup>11</sup> Ana amijog Atua na tiniabene nei mil batove, berinavo “Jau kobe keneriku novokario ga takurano na, a tinieku jiiso toru. Kiaku jidomiano joaso, kiniou najaaro toru kaso.”

*Siñaro mila von Yesu*

<sup>12</sup> Ana ea bogo nene bunu, Niununo Lu buru Yesu naio takurano ban lie ea vio yauo, <sup>13</sup> ana Yesu joa vio na ba bokar bogoti duelimo va veri [40] napano bogo nonovio Siñaro jom̄a mila von naio laka. Yesu naio jo bija tededen nalo ea vio nene, mia Atua kiano nailiano nalo abitikar naio.

*Yesu naio jikar kiano iñauano yako Kalele*

*Mataiu 4:12-17; Luka 4:14-15*

<sup>14</sup> Mia iorou, abinimej abokar Jone Baruei, ana abuku naio ban ea yimo na lakoiano. Mia Yesu mijog liliano nei, karina jaluvo den vio nei, naio ba batove bereio ea tanobuku na vio Kalele, ana jikar ea bogo na, naio jo mioliolu ka Atua kiano Ioluanou. <sup>15</sup> Bogo na naio mioliolu, jo berinavo “Vonganei, Atua mila ka kenemiu bogo memedu ka kuvilig kamiu naruei. Atua kiano nave-natuboiano jo binimej ea kamiu naruei, mia vonganei monokanio kuvilig kamiu a kumonea Ioluanou. Vou nei.”

*Yesu bio tom veri na aburu niado*

<sup>16</sup> Iorou kanio, ana na Yesu jom̄a mieliel ea baramudou na burum̄ara ueiyabo na Kalele, mial tomjuo, nam̄a aburuvurua niado, be Saimon bija kuruano Andru, napano naljuo aju aburu kialo levlevi. <sup>17</sup> Ana naio ber kalo abe juo, berinavo “Kamiu kumej kuvitakisor kiniou. Mia kiniou nala kamiu kuve tomu nalo na avuru tomu nalo amej ave kanaku tomu nalo.”

<sup>18</sup> Mia vaarakurano ga, naljuo ajuvan kialo levlevi, ajakisor Yesu. <sup>19</sup> Karina Yesu miel ba lie kija, ana mial Sepeti kenerinio abe juo, be Yemesi naio kuruano Jone. Nalo aju ajutano joomo ea kialo uako ana nalo abe juo amila batitig kialo levlevi. <sup>20</sup> Mia bogo napano Yesu mial naljuo nei, naio bio naljuo, ka atakisor naio bunu, mia ajuvan karam̄alo Sepeti joa uako bija kialo tomu nalo na iñauano, ana naljuo ajakisor Yesu.

*Yesu mijil lar niununo va tai*

*Luka 4:31-37*

<sup>21</sup> Ana Yesu nalo amiel aba abokar m̄arkomeli na Kapeneam, a ea Legiano Lu, nalo aba joomo ea yimo na volkouano, ana Yesu jo berloglog tomu nalo ka Atua kiano Iliano Lu. <sup>22</sup> Mia nalo napano amiagago

nalo amiilo laka, bior nalo amijog Yesu kiano verloglogiano maka tibe ka kialo naverloglogiano dolu nalo, bior napano Yesu kiano temi vatitig bo, ana Atua kiano moroano joaio. <sup>23</sup> Ana ka bogo na, toro tai napano niununo va joaio, naio jo naliko, <sup>24</sup> ana mila toro neibano miaga va souo, naio mil ban Yesu berinavo “? Yesu re Nasarete, kiamo venia jua kumemi? Peli na jau kobinimej ka kala lelan kumemi, a! Kiniou namijikiaso ruei, ka jau kobe kirinovo, kobe Atua kiano Tolu tai.”

<sup>25</sup> Mia Yesu mil kirisikili ban niununo va neibano, joko vio ka naio, berinavo “E! Jau keil re! Jau kataluvo den toro na vonganei ga!”

<sup>26</sup> Mia niununo va neibano naio mila kema neibano naio miaburusalsal, ana naio miaga souo vaarakurano bereio, naruei naio moluo den naio ana buro bano.

<sup>27</sup> Mia tomu nalo na vio na amiilo laka, nalo ajumã aberverii Yesu, aberinavo “?E jumãbe nei? ?Verloglogiano vou tai bereio nei, peli venia na? Toro na, kiano moroano kirisikili laka na, naio mil ga ban niununo va nalo, nalo amijogkar naio.” <sup>28</sup> Kar vite nalo na naruei nalo ajaaro, ana nalo ajumã aber vatitig Yesu siano novo ban ea vio nonovio ea tanobuku na vio Kalele.

*Yesu milarur Saimon Pitere koano kenieno bija tomu telabo dolu nalo bunu*

*Mataiu 8:14-15; Luka 4:38-39*

<sup>29</sup> Mia Yesu naliko tomu nalo nei, Yemesi bija Jone a Saimon bija Andru, nalo abatavio ea yimo na volkouano mia nalo aban ea Saimon naio Andru kunualo, ninei ea m̃arkomeli na Kapeneam kia ga vo. <sup>30</sup> Naruei ea m̃aratavo nene, Saimon kenieno simemi, naio mie m̃a niabene bituvitunu na naio jomã mon ea ga m̃ano jogu, mia nalo aberial ka Yesu. <sup>31</sup> Ana Yesu naio binimej bokar tiramoruo neibano jumãno, naio burular naio jumolu, jotano ea m̃ano jogu, ana niabene minini bereio, mia naio jumolu

ju, ba borosebi salo. <sup>32</sup> Ea kijej na legiano nene, bogo napano Legiano Lu bisi, bogo na m̃erenio batove ruei, mia tomu nalo abarvar tomu nalo na amie bija nalo na simãaro nalo abujo ealo abinimej ea Yesu. <sup>33</sup> Mia tomu nalo miroano laka, jibe ka napano vaataro ka tomu nalo na m̃arkomeli neibano abinimej amivinkakarło vatitig ea m̃aratavo na yimo neibano, vio telisu. <sup>34</sup> Mia Yesu naio milarur tomu nalo miroano na amie ka mieiano ninio nalo, naio mijil bulag simãaro miroano den tomu nalo, naio joko vio ka simãaro nalo neibano ka nalo aver re titai leleio, ka napano nalo amijikia ruei ka naio be Naverikariano riano.

*Yesu mioliolu reraio ea tanobuku na vio Kalele*  
*Luka 4:42-44*

<sup>35</sup> Mia ea vio niogoravo, bogo na tu naio maka tokokoreko vo, ana Yesu naio jumolu jaluvo den yimo, mia naio ban ea vio tai napano vio melumu bo laka, mia naio rivolkouo rivan karamãno. <sup>36</sup> Ana iorou, tomu nalo abinimej ka naio ea yimo bereio, mia Saimon nalo maka bunu aial naio, mia nalo aban ka asiravo naio. <sup>37</sup> Nalo ajiravo naio bano-o, nalo amilealio ea vio nei, mia nalo aber ka naio, aberinavo “Tomu dolu nalo miroano abinimej kaso, mia nalo aju ajiragso.”

<sup>38</sup> Ana Yesu berdope banlo, berinavo “Riano, kiniou nemijikia na. Mia makanio, kito monokanio ravan lie ea m̃arkomeli dolu nalo napano aju kia vo, ka mia kiniou nemijikia noioliolu ka ioluano vou nei ea vio dolu nalo bunu. Ka tena naruei, kiniou najaluvo yako nebinimej ea vio nei biorio.” <sup>39</sup> Mia Yesu naio ba mieliel ea vio nonovio na Kalele, na naio jo mioliolu ea yimo na volkouano na kulo Ju nalo kialo, a jo mijil bulag simãaro telabo den tomu nalo.

*Yesu milarur toro tai na menko burumieni jua niabene, binimej bo bereio*

*Mataiu 8:1-4; Luka 5:12-16*

<sup>40</sup> Mia toro tai napano bokar menko burumieni naio binimej ea Yesu, naio minie tano keanio, naio bika kirisikili denio, berinavo “Neber bo, ver jau kojamo ka ga, kiniou nomonea ka jau komijikia kolarur kiniou, nomeravo bereio.”

<sup>41</sup> Mia Yesu tinien miia naio laka, ana naio maka river mirou ka tokolio ka kiano mieiano, mia naio midu jumano joa naio, ana berkanio “Kiniou nemijamo; voniganei niabemo monoka rimeravo.”

<sup>42</sup> Mia vaarakurano ga menko burumieni neibano naio jaluvo den toro nei niabene, naruei naio meravo bereio. <sup>43-44</sup> Mia Yesu jutua naio, berinavo “Jau komijog, jau kava koververii re tenei van tomu nalo vo, a voniganei ga jau kova kosel ea toro lu ka naio mijikia rivitii veve niabemo. Karina jau komijikia kava kala lotuano van Atua vija koisebi bunu ga sida ka meravoiano nei napano ma Mosis naio berenio, napano toro monoka rilaio bior vite na jibena. Karina iorou ka nina, toro lu naio mijikia riverialio ka menko burumieni nei naio binu ruei.” Ana Yesu miila toro neibano bano.

<sup>45</sup> Ana bogo na toro neibano naio bano, mia naio ba jo berii tenalo neibano ka tomu nonovio, mila na iliano neibano ban ea vio nonovio, bano-o napano mila Yesu naio maka bunu rijikia ka riel ka riva joomo ea markomeli nalo, ka ver naio rivano, tomu ve miroano laka amei ka naio. Naio jojo tavio ga ka vonuo, mia tomu nalo amalmaluvo ea kialo vio nonovio kiavo, nalo abinimej eaio.

## 2

*Yesu naio mijikia riviekokoa kariano*

<sup>1</sup> Ana bogoti nalo tealoo abarlaka ruei, ana na Yesu naio ban bereio ea markomeli napano Kapeneam, a maka ve kirisio, mia tomu nalo amijogial ka naio binimej bereio

ruei. <sup>2</sup> Ana nalo miroano abinimej ea Yesu, mia joomo ea yimo neibano naio bujomagmago kalo, a tavio ea markatavo bunu, vio telisu ga. Mia bogo napano aju vio takurano jibe na, ana na Yesu mioliolu ka Atua kiano iliano lu banlo. <sup>3</sup> Mia ea bogo nene, tomu nalo apier nalo tai napano naio mie binimej, napano niabene nonovio marko. Mia nalo veri apier ea ga mano jogu, napano naio jo monmoneaio. <sup>4</sup> Mia bogo napano abinimej abokar vio neibano, amial ka vio nene teliki laka, mia nalo maka ajikia adu kialo bilbilu nei rivano vaataro ka Yesu.

Naruei nalo apier abavin ea yimo mave, ana nalo amuedulu vodobi loglog vio napano Yesu naio jo memedu kanio yetano, ana ajuvarvan toro nei batove bija mano jogu batove ea buluvio, batove joomo ea yimo. <sup>5</sup> Mia bogo na Yesu mial vite nei, naio mijikia ka tomu nalo nei amonea naio kirisikili laka, ka mia naio rijai toro neibano mie nei, mia Yesu ber ka kema neibano mie nei berinavo “Keneriku, kiniou nebiekokoa kiamo kariano nalo.”

<sup>6</sup> Ea bogo nene tomu nalo tai tena naverloglogiano na tuboiano, nalo bunu ga aju, mia nalo amijog Yesu kiano iliano. Ana kialo jidomiano jo mimau bova ka vite nei, <sup>7</sup> nalo aju amil niege naio, aberinavo “Jumabe ana toro nei naio mil mila bulag Atua siano lu jibe na? Atua naio takurano ga naio mijikia riviekokoa kariano, maka bunu toro dolu tai bereio, ana kema nei naio jo mil jibe ka naio jo jidomii ka beriamna naio be Atua naruei.”

<sup>8</sup> Mia vaarakurano ga Yesu naio mijoglubar ea naio mijikia ka tomu nalo neibano aju ajidomii va jibe na ka naio, mia naio ber kalo berinavo “?Ka vaio ana kenemiu iviso bujo ka jidomiano va nalo na jibe na? <sup>9</sup> A ver kiniou never tibe nei ka namieiano nei neverinavo ‘Kiniou nebiekokoa kiamo kariano’ pelina kiniou never kanio, neverinavo ‘Jau kotumolu, kojuku mamoo jogu ana keiel,’ ana ea

iliano juo nei, tai naio jikili ka averenio, ana tai naio monmaio ga ka averenio. Ana naina berinavo 'Kotumolu keiel,' naio jikili bior ka kamiu kuvijikia kuvitilubar kiaku iliano nei naio be riano þelina naio maka rive riano, ka toro nei naio tumolu þelina makanio. <sup>10</sup> Mia vonganei, kiniou noimãauka titai napano mia kamiu kuvisidomii kuver Atua ga takurano naio mijikia rimãaukanio, ka mia kamiu kuvijikia kuvitilubar ka kiniou Kulorinio Kenerinio, kiaku moroano bare ka noviekokoa bunu kariano na yetemeriba nei. Kamiu kuviagago vatitigio."

<sup>11</sup> Ana na Yesu mil ban namieiano nei, berinavo "Kiniou neber kaso, jau kotumolu, kojuku mãmamo jogu, keiel kava vonuo."

<sup>12</sup> Mia kirisofeli ga ea tiniobi miralo napano aju amialio, toro neibano naio jumolu ana na naio mijuku mãmamo jogu, ana miel ba tavio ba vonuo.

Bogo na tiniobi neibano amial tenei, mia nalo amiilo toru, abame-neia Atua, aberinavo "Koig, kito maka lele reial titai tibena ea kiado meuliano, mia banei ga."

*Mataiu, napano abio bunu ka Livai, Yesu bijauia lario ka rimei takisor naio*

*Mataiu 9:9-13; Luka 5:27-32*

<sup>13</sup> Mia Yesu batove tivelinio bereio ea burumãara ueiyabo neibano, mia tiniobi nalo abinimei vio takurano aju jeliviv eaido, naio berlogloglo.

<sup>14</sup> Karina, naio mieliel ba lie, mia naio mial toro tai jotano joa kiano vajoomo na imãauano ea yimo na abarivar bijii veru na takis. Toro nene, be Livai, Alveas kenerinio. Ana Yesu bio naio berinavo "Komei kotakisor kiniou," mia soþeli ga Livai naio jumolu ana jakisor Yesu.

<sup>15</sup> Karina, Yesu ba jinano ea Livai neibano kunuano, mia ea bogo na, tilikiti na tomu dolu nalo na abarivar bijii takis, bija tilikiti na veribinio dolu nalo, nalo bunu abinimei ajutano burukuti bija Yesu naliko kiano naiagagoano nalo, bior napano bogo

nei, tomu ninio ga aju ajakisor Yesu.

<sup>16</sup> Mia tomu na verloglogiano na tuboiano tealoo, napano nalo abe Varisis, nalo amial ka Yesu naio joãna jotano burukuti bija tomu nalo na jibena, ana nalo abika den naia-gagoano nalo aberinavo "?Kar vaio ana kenemiu naverloglogiano naio ba joãna jinano burukuti jibena bija tomu veribinio nalo na?"

<sup>17</sup> Mia Yesu naio mijog iliano nei, mia naio berdoþe berenio banloo, berinavo "Nalo napano mokotenalo kirisikili bo, nalo maka asidom ka ava aial toro namãa mieliel ka namieiano nalo, mia namieiano nalo ajidom mẽlea naio. Kiniou maka nemei ka novio tomu nalo na aber nalo amemedu ruei ea Atua mirano ka nalo atakisor kiniou, mia kiniou nebinimei ka tomu nalo na abova ajibe ka tomu nalo nei naruei."

*Vikadeniano tai ea tivelinio na veliano na sinaniano*

*Mataiu 9:14-17*

<sup>18</sup> Naruei ea bogo nei, Jone Baruei kiano naiagagoano nalo bija Varisis nalo ajumãa abokar bajago na veliano na sinaneano ka nalo abolkouo ban Atua. Ana tomu nalo abinimei ea Yesu, mia abika veve denio, aberinavo "?A jumãabe? Jone Baruei kiano naiagagoano nalo abel ka sinaneano kamãa abolkouo, a Varisis nalo kialo naiagagoano bunu ga amila jibe na, ana jumãabe na jau kiamo naiagagoano maka atumãa alaio?"

<sup>19</sup> Ana Yesu berdoþe banloo, berii naio naliko kiano naiagagoano nalo jibe kanio napano nalo ajaaro toru laka bogo napano naio jo naliko, mia nalo ajog rivova iorou ka bogo napano mia naio taluvo denloo, ana berinavo "?Bogo napano toro na naio joro jo kia ga vo ea jokoluolu naliko kiano bilbilu nalo, kamiu kuberiamãa amijikia atuvan sinaniano na jokoluolu? Maka leleio. <sup>20</sup> Mia bogo tai navo, ver bogo tai toro nei kiano uolu tai amei avurular naio den kiano bilbilu nalo, ea bogo na

naruei mia kiano bilbilu nalo amijikia aveli ka sinaniano, bior napano nalo tiniel miia naio laka.”

### *Vite moruo a vite vou*

<sup>21</sup> Bajago na veliano na sinaneano, naio be bajago moruo tai na kulo Ju nalo kialo lotuano, mia Yesu naio jidom rila rimeravo vanlo ka bajago moruo na jibe na, nalo maka ajikia aveverare rivija vite vou nalo napano naio jom̃a berlogloglo kalo. Ana naio ber jamerijiano tai tivelinio kalo, naio berinavo “Kito maka rejikia rodu niati kulum̃arauo napano be terivou, ka rotuluko ka kulum̃arauo moruo tai ka toko bulukuti vio na buruḡe eaio. Bior napano niati kulum̃arauo vou nei naio mijikia rila korov kulum̃arauo moruo na togio, ana mia bulujelegio mijikia rimei ve toru lievo.

<sup>22</sup> “Ana m̃arjum̃elm̃elu vou napano naio jom̃a jarabujo kia ga vo, maka rojikia roisonio rivan ea kulukuti nani napano be terimoruo, napano amison m̃arjum̃elm̃elu ban ea vatelabo ruei. Verenio jau kala tibe na, mia m̃arjum̃elm̃elu nene riyukuio, rila kulukuti nani nei saburu, mia m̃amo m̃arjum̃elm̃elu riou bulagio ana bauei nene rimei rivova bunu. Mia m̃arjum̃elm̃elu vou, jau monokanio koisonio rivan ea kulukuti nani napano be terivou bunu, jikili bo, naruei na jau komijikia kodu batitigio to vesiou.”

### *Yesu be tubo ka Legiano Lu*

#### *Mataiu 12:1-8; Luka 6:1-5*

<sup>23</sup> Ana ka legiano tai bereio, napano naio be Legiano Lu, Yesu naliko kiano naiagagoano nalo amiel abano, mia kialo m̃arabo ba jel bure tiniavio na subavio. Nalo amiel jibe na, naruei naiagagoano nalo jijerlo ana amikiti kokorov subavio nei m̃arati tealo ana ajenio.

<sup>24</sup> Nalo ajum̃a amila jibe na, naruei Varisis tealo ajua vio na, napanoaju abitii Yesu nalo, naruei nalo aber ka Yesu, aberinavo “Ai, kal kija! Kiamo naiagagoano naloaju amila jum̃abe na, mia nalo maka ajikia ala

im̃auano na ea Legiano Lu, ver tibe na nalo ajum̃a amila korov kiado tuboiano na.”

<sup>25</sup> Ana Yesu berdoḡe banlo, berinavo “?ḡeli kamiu maka kuvuluku lliano Lu bogo tai bo, napano berii vite nalo napano Parinio Tubo Teviti na nanua naio jom̃a milαιο? Naio naliko kiano tomu nalo, nalo jijerlo m̃ele, <sup>26</sup> ana naio ba joomo ea Atua kiano vio lu, ana naio midu joko lu napano tuboiano ber kulo lu ga amijikia asenio, mia Teviti nalo nei ajenio. Ana Abieta, napano naio be parinio toro lu ka bogo na, naio mijamo ka banlo ga. <sup>27</sup> Kiniou neber ka kamiu, neber kiado tuboiano nalo maka ka atutua niegeniege kito bereio. Jibe na, Legiano Lu naio maka ve tena rila bulag kiado meuliano bereio, mia naio be tena ka rijai kito. <sup>28</sup> Mia kiniou nebe Kulorinio Kenerinio, a naio be tubo ka vite nonovio, naio naruei be tubo ka Legiano Lu bunu. Mia naio ga mijikia river venia napano ramijikia rala ea Legiano Lu, ḡeli venia na maka rimemedu ka kito ralaio.”

## 3

### *Yesu milarur jumevuluku ea Legiano Lu*

#### *Mataiu 12:9-14; Luka 6:6-11*

<sup>1</sup> Ana ea Bogoti Lu tai bereio, Yesu naio ban bereio ea yimo na volkouano, mo na ka bogo nene, jumevuluku tai naio jo joomo bunu napano naio jum̃ano buluku. <sup>2</sup> Mia Varisis tealo napano tiniel jer Yesu ruei, naloaju vaataro ka ga Yesu ea bogo neibano, nalo ajum̃a miralo jua ga Yesu ka ajidom aleal bajago va nalo eaio Yesu.

Naruei nalo ajidom ka aial von ka ver Yesu rilarur kema neibano ea Bogoti Lu nei ḡeli mia rila re.

<sup>3</sup> Mia Yesu naio mil ban kema neibano, berinavo “Jau kotumolu, komei mave nei beamu vo.” <sup>4</sup> Ana Yesu bika den tomu nalo naaju,

berinavo “?Kiado tuboiano naio berinavo kito romijikia rola venia ea Bogoti Lu? ?Naio bo ka kito

reimãauka tena bo, ðeli na bo ka kito reimãauka tena bova? ?Peli na naio berinavo bo ka kito ralarur tomu nalo, ðeli na bo ka kito rouebinvinlo?”

Mia tomu nalo neibano maka leleio aver iliano tai bereio. <sup>5</sup> Naruei Yesu jirarag jeliviv ealo, napano naio mial miralo nalo kirisikili ga, mia naio mijog bova toru biorio a naio tinien jerlo. Naruei naio mil ban kema neibano bereio, berinavo “Kala von ka kovitirii jumãamo beamu vo,” mia ea bogo na ga toro na mila jibe na, jumãano binimei bo bereio.

<sup>6</sup> Mia Varisis nalo nei abava tavio, aban memedu ga abiviuo vio takurano bija Parinio Tubo Erot kiano tomu nalo, ka nalo alavon ka aleal mñarabo ka amijikia auebin Yesu rimãaro tumãabe.

#### *Tomu telabo abinimei kar Yesu*

<sup>7</sup> Ana Yesu naliko kiano naigagoano nalo ajaluvo denlo abatove bereio ea burumãara ueiyabo, mia tomu nalo miroano ajakisorlo abatove. Tomu nalo neibano, tealo abinimei ea vio dolu nalo tealo ea vio nei Kalele, <sup>8</sup> ana nalo tealo abinimei rove yako ea vio Yutea bija kiano mñaromeli nei Yerusalemo, mia tealo abinimei ea tanobuku na vio Itumea, a tealo abinimei ea vio nalo napano marauei na Yortano tivelinio bano, ana tealo abinimei ivin ea tei napano toru laka ea komeli nalo na ea komeli juo nei, Taia bija Saiton. Nalo nonovio nei abiniu nalo amijog ruei iliano na vite nalo napano mña Yesu naio jomãa milαιο, naruei nalo ajidom ka amei kanio. <sup>9</sup> Ana bogo napano nalo miroano aju tivelinio ea ueiyabo napano ana Yesu ber ka kiano naigagoano ka nalo averiko tauako sesa tai to, ka tomu nalo miroano laka, mia naio merou ka mia tomu nalo amei mña aivinkakar naio laka. <sup>10</sup> Nina bior naio milarur tomu nalo miroano napano amie amijog bo bereio ruei, naruei tomu dolu nalo na amie kia ga vo nalo ajumãa amila

von ka aivinlo tibe na ka mia nalo bunu amijikia atokol Yesu. <sup>11</sup> Mia ka bogo nene aver niununo va nalo tai napano ajua tomu nalo tealo, bogo na amial Yesu, mia nalo monokanio avatove ka naio, nalo ajorua jaano, abio toru, aberinavo “Jau kobe Atua Kenerinio.”

<sup>12</sup> Ana Yesu mil kirisikili ban niununo va nalo neibano berburelo, berinavo mia nalo atu re aververii ka tomu nalo aver naio be kei.

#### *Yesu bitiri bulag kiano atevi duelo ba juo [12]*

*Mataiu 10:1-4; Luka 6:12-16*

<sup>13</sup> Naruei iorou kanio ana na Yesu naio bavin mave ea suku nalo, ana naio bio tomu nalo tai abinimei eaio. <sup>14</sup> Bogo na nalo abinimei, naio bitiri bulag nalo duelo ba juo [12], naio ber nalo ave atevi nalo, napano kialo imãauano naio jibe nei, mia nalo aiel vija naio tulaka ka mia naio rilalo avar ioluano vou avan ea vio nalo, <sup>15</sup> a mia moroano na ajil bulag simãaro nalo tualo.

<sup>16</sup> Naruei Yesu kiano atevi duelo ba juo [12] sialo ajibe nei:

Saimon, napano Yesu midu sio vou joa berinavo Pitere.

<sup>17</sup> A Yemesi, napano Sepeti kenerinio.

A Jone napano Yemesi kuruano napano Yesu midu sio vou ban naljuo nei, berinavo Boanejes, napano ber nalo abe juo atibe ka tubaal memedu, bior naljuo na niolo jaburu julaka ga.

<sup>18</sup> A Andru,

a Vilip,

a Bartolomio,

a Mataiu,

a Tomas,

a Yemesi, napano Alveas kenerinio,

a Tatesa,

a Saimon, napano naio mila poletik die kulo Romo nalo.

<sup>19</sup> A Jutas na Kariot, napano iorou kanio, ana naio jiveluku ka Yesu ban kiano uolu nalo.

*Yesu kiano m̄aratavo ajidom aberiam̄a naio miavovu*

*Mataiu 12:24-32; Luka 11:14-23, 12:10*

<sup>20</sup> Ana iorou, Yesu naio binimej bereio vonuo, mia tiniobi toru abinimej ka naio bereio, ana Yesu bija kiano naiagagoano nalo amim̄au kalo bano-o nalo maka bunu averio ajilimebi kija ka asinan. <sup>21</sup> Naruei Yesu kiano torogio nalo amijog ka napano Yesu naio jo mim̄au m̄ele jibena, a nalo amijog bunu ka tomu nalo ajum̄a amil dieio, aberinavo “Peli kema nei, naio milaluvu parinio ruei kovio!”

Mia Yesu kenieno bija kuruano nalo aban ka ajidom ka alavon ka avurular naio den tomu nalo nei.

*Tomu nalo na tortoru bunu aberii Yesu naio jo mim̄au bija Sim̄aro kiano moroano*

<sup>22</sup> Naruei ea bogo nene, tomu nalo na naverloglogiano na tuboiano, nalo ajaluvo den vio Yerusalemo abatove ea vio neibano, mia nalo ajum̄a amilidie Yesu ban tomu nalo ajum̄a aberial, aberinavo “Sim̄aro nalo kialo Tubo Belsabel, naio ba joa toro na ruei,” a nalo aju bunu ga aber “Toro na naio jom̄a jitig bulag sim̄aro ea moroano na ga napano Belsabel juvan ban naio.”

<sup>23</sup> Naruei Yesu biolo abinimej eaio, ana na naio mil banlo ea jamerijiano, berinavo “?Jum̄abe na kamiu kuberiam̄a Sim̄aro bereio naio mijikia titiglar sim̄aro. Maka rijikia tibe na! <sup>24</sup> A verenio tubo tai napano kiano tomu nalo avuruburelo, napano togio atum̄a aildie nalo togio, mia tubo neibano naio kiano im̄auano nalo maka rijikia atu sikili leleio. <sup>25</sup> Ana verenio ea m̄aratavo tai na nalo ajum̄a aburuburelo napano nalo togio ajum̄a ajitig nalo togio, mia nalo maka leleio ajikia atu rivu bogo tai. <sup>26</sup> A jibe na bunu ga, averenio niadu nalo na Sim̄aro kiano togio nalo atumolu alavon ka ajil bulag togio dolu nene, nina jibe ka moroano na Sim̄aro kiano

maka bunu rijikia tumolu tu, kiano moroano bakovio ruei. Mia maka leleio, Sim̄aro p̄irinio kirisikili dolu ga kiana vo.

<sup>27</sup> “!Kuvijii! Verenio toro tai sidomii ka riva joomo ea toro kouo tai kunuano ka mia naio rivina ka kanano saba nalo, mia naio monoka rivar teli riorkar toro kouo nei sikili beamu vo, avona bisi ana mo naio mijikia riva joomo ka rivina ka nonovio saba nalo na be toro kouo nei kanano. Mia kiniou nojom̄a nomila jibe na naruei ka toro kouo neibano Sim̄aro.

<sup>28</sup> “Mia kiniou neber riano ka kamiu, tomu nalo kialo kariano bija iliano va nalo nam̄a ajum̄a aberenio, Atua mijikia riviekokoalo riviorio, <sup>29</sup> mia toro na mil bova lelan Niununo Lu naio berenio kiano im̄auano tealó Sim̄aro ga naio mim̄aukanio, toro na jibe na naio mia maka lele rijikia rivokar viekokoano bogo tai, kiano kariano naio mia toa naio rivano-o, mia maka rijikia ribisi.”

<sup>30</sup> Naruei Yesu naio berii vatitig iliano jikili nei banlo, bior nalo naruei ajum̄a aberii ruei ka niununo napano joa naio, be niununo va.

*Yesu kenieno bija kuruano nalo abinimej ka avurular naio*

*Mataiu 12:46-50; Luka 8:19-21*

<sup>31</sup> Mia Yesu kenieno bija kuruano nalo abinimej amiyotuba kean naio ea bogo nei, mia nalo abinimej ajikili aju tavio ga, na amiila toru ban ka naio rimoluo rimej rialo. <sup>32</sup> Ana ea bogo na, tiniobi toru ajutano vaataro ka Yesu, mia iliano binimej bokario, ana nalo aberinavo “Ai, koniomo bija kuruamo bija kuviviniemo nalo aju tavio, ajidom ka ail kijaso beamu vo.”

<sup>33</sup> Ana na Yesu berdope berinavo “?A kenioku nalo be kei? A nalo na abe kuruaku nalo abe kei?”

<sup>34</sup> Naruei naio jiraravo bitikar tomu nalo napano ajum̄a ajutano vaataro

ka naio, ana berinavo “!Kamiau kuvial, nalo nei abe konioku bija kuruaku nalo, nalo nei naruei. <sup>35</sup> Bior toro napano mila jibe ka napano Atua jidomio, toro na jibe na naio be kuruaku, a be kuviviniek, p̄eli na abe konioku ruei.”

## 4

*Jamerijiano na toro napano bisivisii kurukuti subavio*

*Mataiu 13:1-9; Luka 8:4-8*

<sup>1</sup> Ana ea bogo dolu bereio, Yesu naio jo berloglog tomu nalo ea tivelinio na ueiyabo na Kalele. Mia tomu telabo laka napano abinimei ea naio ka bogo na, mila na naio bavina ea uako sesa tai napano joa ueiyabo nei, ana naio ba jotano mave eaio, mia tomu nalo aju reraio ea baramudou uro. <sup>2</sup> Mia Yesu jo berlogloglo ka vite telabo ea jamerijiano nalo, <sup>3</sup> mia naio ber kalo berinavo “Kamiau kuvilavon ka kuviagago vatitigio. Toro tai, ban ka rivisivisii kurukuti subavio ea kiano tiniavio. <sup>4</sup> Naio jo bisivisii jibe nei bano, mia kurukuti tealo ajibirbili vaataro laka ka ikiñarabo tivelinio. Ana iorou, menu nalo abinimei amikiti bulaglo bereio.

<sup>5</sup> “Mia kurukuti tealo ajibirbili ea vio na be tabaver yetano, mia ea vio na maka tano rimerorolu napano rivu mave, mila na nalo amiluo soṗeli. <sup>6</sup> Mia bogo na m̄erenio mijivi ana naio junulo ana soṗeli ga amekekeu ka bati nalo maka avatove vatitigio.

<sup>7</sup> “Mia nalo tealo ajibirbili ea vio tai na beamu maka ate bulag vatitig teli va nalo na beve niononoti ealo, mia iorou teli neibano miluo toru bereio, ana naio misoveko kialo vitoviano nalo bano-o añarm̄aro, mia maka ave m̄arati nalo.

<sup>8</sup> “Mia kurukuti dolu tealo bereio, ajibirbili ea borotano novo tai, mia nalo amiluo bo, bano-o ajarako abar m̄arati nalo. Tealo abar m̄arati abokar duelimo va rolu [30], nalo tealo abokar duelimo va ari [60],

mia nalo tealo abokar toromomou takurano [100].”

<sup>9</sup> Mia Yesu naio berkalo berinavo “Kamiau kubiniu kube burutiliniemi, bo ka kamiau monokanio kuvijogkar kiaku iliano nalo.”

*?Ka vaio na Yesu jo mil jelia jamerijiano nalo?*

<sup>10</sup> Ana iorou kanio tiniobi nalo abanvan bereio, ana na Yesu jo naio takurano ga, naruei tomu nalo napano aju bija naio bija kiano na-iagagoano nalo, abinimei abika den naio aberinavo “Vaio naruei naio be nioti na jamerijiano na? Mia ka vaio ana jau kojom̄a komil jibe na, a koberloglog tomu nalo jamerijiano nalo?”

<sup>11-12</sup> Ana Yesu berdoṗe banlo, berinavo “Kiniou nojom̄a neberlogloglo ka jamerijiano nalo na bior abe veribinio laka. Nalo ajibe ka, ajuñã amila iliano tai na naverialiano Aisea nua binimei maluvo, napano naio berenio

*‘Nalo ajuñã abitii, abitio bano, a aju amijogii, amijogio bano, mia maka lele aver avitilubar a maka lele mia ajog lubar vite.*

*!Ver makanio, p̄eli nalo avilig kialo jidomiano nalo ruei, a p̄eli Atua biekokoa kialo kariano ruei!’* *Ais 6:9,10*

“Jibe na naruei kiniou neber nalo pariparilo kirisikili laka, nalo aju koalabo laka keano vo. Mia kamiau naruei bo lie vo ban kamiau. Ililuklukano nalo na Atua kiano nave-natuboiano, mia kiniou neverial rimeravo ga rivan kamiau.

<sup>13</sup> “? Ana juñabe, kamiau maka kuvijoglubar nioti na kurukuti subavio neibano? A ver kamiau maka kuvijikia kuvisidomii lubarbar nioti nene, mia tuñabe naruei na mia kamiau kuvijoglubar jamerijiano dolu nalo na mia kiniou neverio ka tomu nalo?”

*Yesu ber bulag nioti na jamerijiano na toro napano bisivisii kurukuti subavio*

<sup>14</sup> Ana Yesu berinavo “Mo, mia kiniou never bisivisii nioti na jamerijiano neibano van kamiu. Nioti nene naio jibe nei: Borotano ninio nalo na, nalo ajibe ka tomu nalo kialo iviso ninio nalo. Mia toro nei nana jo bisivisii kurukuti ea borotano nalo na, naio jibe ka toro napano jom̃a berial Atua kiano iliano ban tomu nalo.

<sup>15</sup> “Borotano na kirisikili na jel ikiñarabo tivelinio, naio jibe ka toro na napano naio mijog Atua kiano iliano, ana iliano nene maka lele riva joomo vatitig ea kiano iviso na jikili leleio. Mia menu nalo neibano, ajibe ka Siñaro, napano naio binimej vaarakurano ga, naio midular bereio iliano nei ea toro napano kiano iviso.

<sup>16</sup> “A borotano na puruveru toru yetano tabañoilio, naio jibe ka toro na napano naio mijog Atua kiano iliano, mia kirisofeli ga naio tiniene jaaro kanio, miduio. <sup>17</sup> Ana iliano nene naio maka totano vatitig joomo ea kiano iviso. Mia naio miluo jibe ka titai napano maka ve sano bati novo, napano mijikia riluo bogo ve bulati ga. A verenio bogokouo rimej p̃elina tomu nalo asidom ka ajil lo rivior ka amonea Atua kiano iliano, a mia soñeli ga nalo atuvan bereio.

<sup>18</sup> “Mia borotano na napano teli na bova juaio, naio jibe ka tomu nalo napano bogo na amijog Atua kiano iliano, <sup>19</sup> mia karina, nalo ajum̃a ajidomii m̃lea ga kialo meuliano nalo, a jidomii ka avar vite ve telabo rimej rive sibiano ga rivanlo, a nalo ajum̃a ajidomii m̃lea vite novnovo nalo na yetemeriba nei. Bajago nalo na abinimej jibe ka teli va, ana na amikitiko ioluano vou nei ka rivar re m̃arati ea tomu nalo tibe na ea kialo meuliano.

<sup>20</sup> “Ana borotano na bo na, jibe ka tomu nalo napano bogo na nalo amijog Atua kiano iliano, amijoglubarj ana tiniel jaaro kanio a amiduio ea kialo iviso ana iorou kanio abar

m̃arati na ioluano vou neibano ea kialo meuliano nalo, napano na tealo abar m̃arati duelimo va rolu [30], a tealo abar m̃arati duelimo va ari [60], a nalo tealo abar bokar toromomou takurano [100].

“Ninej naruej jamerijiano na kurukuti uiti, naio bisi ea vio na.”

### *Jamerijiano na yulu*

#### *Luka 8:16-18*

<sup>21</sup> Mia Yesu ber bereio banlo, berinavo “Kito tomu nalo, ver kito rotilan yulu tai, mia kito rodu van re to yetano ka basaro tai. Maka leleio, kito monokanio rotilan to mave ga ka rimererali vio vatitigio. <sup>22</sup> A bo ga, Atua kiano navenatuboiano naio jibe ka yulu na, napano vonganei naio jo malmaluvo terteliki ea kito ka rimermerali vite nonovio nalo, a mia vite nonovio napano ajulukuju, a bija ililuklukuano nonovio mia monoka amej medave. <sup>23</sup> Mia kami nonovio kube burutiliniemiu, bo ka kami kuvijoglubar kiaku iliano nei.”

### *Monokanio aiagago vatitig ka Yesu kiano iliano nalo*

<sup>24</sup> Mia Yesu ber kalo bereio, berinavo “Kami monoka kuviagago vatitig ka kiaku iliano nalo, a kuvila von ka kuvisidomii vatitiglo. Toro na jo mijog ga mia maka to takiio, mia naio maka bunu rijikia rijoglubar vatitigio bereio. A toro na mijogkar kiaku iliano nalo, mia naio mijikia rijoglubarbar vatitig kiaku verloglogiano ve telabo iorou. <sup>25</sup> Toro napano kiano saba nalo miroano ruej, mia naio rivar lie ve miroano laka, mia toro na maka kiano saba, mia naio rilaluvu vaio napano kiri teliki na be kiano.”

### *Jamerijiano na kurukuti napano jo miluo*

<sup>26</sup> Yesu ber bereio, berinavo “Atua kiano navenatuboiano naio jibe kurukuti napano toro bisivisii ea kiano borotano. <sup>27</sup> Bogo na naio bukuio bisi, mia naio maka bunu

river rila titai ka kurukuti nene bereio. Toro neibano monmelio, jumolu, monmelio, jumolu, bogiano bija legiano, mia kurukuti nene naio ga takurano bitovi moluo, ana jo miluo. Joña miluo jibe na banbano-o mia toro neibano maka lele rijikia ka kurukuti neibano joña miluo jumabe. <sup>28</sup> Toro nei maka rijikia, naio maka rila titai, mia vite nei miyuku jumano nalo aba laka, ana maka vesiou bar niati, bano-o bar nioti.

<sup>29</sup> “Naruei bogo na nioti meruo bo, kema neibano jikario ka miñau bereio naruei, midu kiano iobogu ba je bulag m̄arati.

“Mia Atua kiano navenatuboiano joña miluo tertelisu jibe ka jeliviv ea vio yetano nei vonganei, a ea bogoti tai, mia reial m̄arati na toru naio rimei mave.”

#### *Jamerijiano na kurukubako*

*Mataiu 13:31-32; Luka 13:18-19*

<sup>30</sup> Ana Yesu ber bereio, berinavo “Bajago na Atua kiano navenatuboiano, naio be dolu laka, naio kirisikili ka mia neleal jamerijiano tai bereio ka never naio jumabe.

<sup>31</sup> Peli naio jibe ka kurukubako, napano naio teliki ka kurukuti dolu nalo tealo naña remebijaio ea kiado tiniavio nalo, naio teliki mia teliki.

<sup>32</sup> Mia bogo na naio miluo binimei toru, burupati toru loa ka sinaniano dolu nalo napano ea kiado tiniavio. Mia jaati nalo tortoru, napano menu nalo aba ajaio ka vamelu nene bunu ga bo.”

#### *Yesu berloglog tomu nalo ka jamerijiano*

<sup>33</sup> A Yesu jo berloglog tomu nalo ka ioluanu vou ea jamerijiano na miroano jibe na, jibe napano bare ka nalo ajoglubario. <sup>34</sup> A iliano nalo nonovio napano naio berloglog kalo, mia be jamerijiano ju joomo eaio, ana bogo na aju jibe naio ga bija kiano naiagagoano nalo, ea bogo na naruei naio jo ber bisivisii vatitig jamerijiano nalo na kalo.

#### *Burum̄ara jegi napano Yesu mil kovio kanio*

*Mataiu 8:23-27; Luka 8:22-25*

<sup>35</sup> Mia Yesu joa kea uako napano naio ba joa ka verloglog tomu nalo, mia bogo na m̄renio jo batove, naio ber ka kiano naiagagoano nalo, berinavo “Ei, kito ravarkorov rava tivelinio ea ueiyabo neibano yako.” <sup>36</sup> Mia naiagagoano nalo ajuvan tomu nalo neibano aju, ana abavin ea uako na Yesu ju joomo eaio ruei, ana aburu naio abano. Mia uako dolu nalo bunu ga aban bijalo. <sup>37</sup> Uako nalo neibano aburo abano-o, mia burum̄ara jegi tai jumolu, mila na burum̄ara tei nalo ajum̄a abievelveluo a abava joomo ea uako bano-o bujo ka tei vare ga rimadudu. <sup>38</sup> Mia Yesu jo milugu ea selailugu tai ea uako iorou, naio jo monmelio ga. Naruei nalo aba abio bonio, ana nalo aber kanio aberinavo “!Naverloglogiano! ?Jumabe na jau maka kosidomial kito ka vaataro ka mia ramadudu naruei?”

<sup>39</sup> Ana Yesu jumolu, mia mil kirisikili ban jegi, naio mil ban burum̄ara tei bija bievelveluo tortoru nalo nei, berinavo “Kamiu kumelumu.” Ana vaarakurano ga jegi m̄aro, vio melumu nonovio. <sup>40</sup> Ana Yesu ber kalo berinavo “?Ka vaio ana kamiu kumerou jibe na? Peli kamiu maka kuvarkar tiniemi ea kinio kovio?”

<sup>41</sup> Naruei nalo amerou m̄lele, ana ajum̄a aberver kalo bereio aberinavo “?Toro kenja nei? Naio mil jibe na ga, mia jegi bija tei, abe juo amijogkar naio! Ou!”

## 5

#### *Yesu mijil bulag niadu telabo den toro Kerasa tai*

*Mataiu 8:28-34; Luka 8:26-39*

<sup>1</sup> Naruej Yesu nalo amaluvo aboru ea burum̄ara ueiyabo nei tivelinio, naina memedu ka vio na Kerasa, mia nalo tealo ajisia ka Katara p̄eli na Kerkasa. <sup>2</sup> Naruei nalo abauro ea vio nene, ana ea vio nene be buluvae nalo na tomu na am̄arm̄aro nalo ajaio, mia be toro tai napano

niununo va telabo ajuaio, napano naio jo joa m̄artanbo nei, jibe ka kiano vio.

Naruei bogo na Yesu jabulu den uako nei, mia vaarakurano ga toro neibano moluo ea m̄artanbo nei, jikiti binimei ka rial Yesu. <sup>3</sup> Toro nene be deden laka, mia tomu nalo amila von ka aiorikario banbano-o mia amila de ga. <sup>4</sup> Va telabo ruei amiorkar jaano bija jum̄ano ka m̄arimieni, mia naio jo burukokorovio ga, mia va telabo amiorkar ea iesi, mia jo mila kokorovio ga, banbano-o napano maka bunu ve toro tai na be kiano moroano bare ka rila toro nei rimei melumu. <sup>5</sup> Ana ea legiano nonovio a bogiano nonovio naio jom̄a jeliviv ea m̄artanbo nalo a bunu mave ea suku dedade nalo, a naio jom̄a miaga m̄erere, a naio jo jukujuku niabeno ka puruveru nalo.

<sup>6</sup> Ana toro nei naruei napano bogo na naio jo koalabo kia ga vo ka vio na Yesu nalo abauro eaio, mia naio mial Yesu, ana jikiti batove keanio, a batove ka naio, minie tano kamu kanio. <sup>7-8</sup> Ana Yesu berenio, berinavo “Niununo va, kotuvan kema na, kotaluvo den naio vonganei!”

Mia niununo va nei miaga toru laka ban Yesu naruei, ana berinavo “Mia jau, Yesu, Atua kenerinio napano meul, jau kiamo vaio joa kinio? Kiniou nebikaso ea Atua siano, ka mia kosian re vironiano rivan kinio!”

<sup>9</sup> Mia Yesu bika denio, berinavo “? Na siamo, kei?”

Naruei niununo va nei berdopeio, berinavo “Kiniou siaku, burutiniobi na mira, bior kumemi miroano laka nei.” <sup>10</sup> Mia niununo va nei naio jo bivika kirisikili den Yesu bereio, ka Yesu rijil bulaglo re ea kialo tanobuku nei.

<sup>11</sup> Mia ea burusuku neibano tivelinio, be burum̄ara taara na kiribue nalo miroano, nalo aju amiuo ea borotano, abokar kovio menu juo [2,000], <sup>12</sup> ana sim̄aro nalo neibano ajegi, nalo abika kirisikili den Yesu aberinavo “Nuber bo

banso, jau koilla kumemi nuvan ea kiribue nalo na, jau kajamo ka kumemi nuva nuvitu joomo ealo.”

<sup>13</sup> Mia Yesu naio mijamo kalo, berinavo “Bo ga, kamiu kuvano.” Naruei nalo ajaluvo den toro neibano, ana aba aju joomo ea kiribue nalo neibano. Ana soḡeli ga kiribue nalo neibano ajikiti, abatove ea bavio tai burukorovio, ana nalo ajibirbili abavatove ea ueiyabo na toru ana nalo amunu tei banbano-o abiniu amadudu.

<sup>14</sup> Naruei tomu nalo na abitkar kiribue aburo, aban bereio vonuo, aban aberial vite nei, a aberveriio ea vio dedade nonovio bunu, mila na tomu telabo abinimei ajidom aialio. <sup>15</sup> Mia bogo na aba amial ka Yesu naio jo, naio bija toro neibano nua niununo va nalo ajuaio, napano vonganei, naio miya vatitig kulum̄arauo ruei, naio jom̄a jotano marga, a maka bunu rive deden leleio. Nalo amialio ka naio binimei bo ruei jibe na, mia amerou. <sup>16</sup> Mia nalo napano m̄a aju beamu, napano amial vite nonovio nalo, ajukunu ka nalo na abinimei vonga, aber vaio na Yesu mila ka toro nei, a jum̄abe na kiribue nalo neibano aba amadudu ea tei. <sup>17</sup> Mia nalo amialio bova ga, mia nalo ajum̄a ajikili ka Yesu, ajidom ka mia naio tubilig den kialo vio.

<sup>18</sup> Mia Yesu nalo abatove ea kialo uako bereio, mia bogo napano Yesu jo bavin mave ea uako, toro neibano na, naio binimei bika kirisikili den Yesu, berinavo “Aiou, Tubo, kiniou nojidom ka ver jau kajamo ka kiniou nemei vijaso.”

<sup>19</sup> Mia Yesu naio maka rijamo kanio, mia naio ber ka ga berinavo “Makanio, bior bo laka ka jau kova vonuo bereio, a kava kotukunu rivan kiamo m̄aratavo vija kiamo bilbilu nalo, jau kover kalo ka jum̄abe na Atua tinien miaso toru laka, ana naio mila bo mia bo laka banso jibe na.”

<sup>20</sup> Naruei toro nei naio ban bereio, ana naio jo jeliviv ea vio nalo na kiano tanobuku nei, napano ajisia

ka Komeli Duelimo, napano tomu nalo na maka ave Ju ajaiao, a naio berial iñauano novo nalo napano Yesu jomã mila ka naio. Mia nalo na amijog kanano tukunuano nei, nalo amiilo toru ka naio.

*Jairas kenerinio tira sesa, naljuo tira na jokol Yesu m̃ano kulum̃arauo Mataiu 9:18-26; Luka 8:40-56*

<sup>21</sup> Mia Yesu nalo ajel ea uako, abarkorov bereio ueiyabo nei aba tivelinio ruei, ana bogo na Yesu biako yetano jo bauro ga, tiniobi toru na tomu nalo abinimeĩ ajelivivi eaio bereio. <sup>22</sup> Ana toro na toru tai na kialo yimo na volkouano ea vio na, siano Jairas, naio binimeĩ mial Yesu, binimeĩ vaataro kanio, minie keanio. <sup>23</sup> Ana naio jegi ban Yesu, bika berinavo “Keneriku tira sesa mie mia mie, vonganei ðeli naio m̃aro ruei. Mia kiniou nebika denso ka jau komei, kodu jum̃amo toaio, ka naio mijikia rijog rivu bereio, ka naio rimeul kia to.” <sup>24</sup> Ana Yesu naio jumolu, ban naljuo kema neibano abano, ana tomu telabo na tiniobi neibano, nalo bunu ga aban bijalo, napano ajum̃a aba amivin-vinkakarło janea vio jeliviv ea ga Yesu.

<sup>25</sup> A nalo tai napano aju aban bija Yesu jibena, naio be tira tai, napano mieiano na jada mila naio bogoti nonovio ga, bokar yuka duelimo ba juo [12] ruei. <sup>26</sup> A tira neibano, naio bulu nakulekuleano nalo banbano-o kiano veru biniu, mia nalo amim̃auka naio bano-o, mia mijog bova ga, kiano mieiano nei jo ba bova lie dam̃ariga. <sup>27-28</sup> Naio jom̃a mijog vatelabo ruei napano tomu nalo ajum̃a ajukunu ka Yesu ruei, mia be kiano jidomiano tai, berinavo “A ver kiniou notokol ga m̃ano kulum̃arauo, mia kiaku mieiano ribisi vatitigio.” Mia naio binimeĩ juluku ga iviso ea tomu nalo neibano, ana jo binimeĩ binimeĩ iorou vaataro ka Yesu taakano ana naio jian jum̃ano jibe na, jokol Yesu m̃ano juluvati kulukoti ga.

<sup>29</sup> Mia naio jokol Yesu m̃ano kulum̃arauo jibe na, ana monloglog ka bogo nene ga, jada nei mijelkorovio, mia naio mijoglubar ea niabeno ka kiano mieiano jaluvo denio ruei. <sup>30</sup> Mia Yesu bunu ga mijogii ea naio, naio mijogii ka kiano mo-roano jaluvo den naio, ana soðeli ga barðilig naio iviso ka tomu nalo, ana naio bika berinavo “?Mia kei naio jokol vonga kiaku kulum̃arauo?”

<sup>31</sup> Mia naiagagoano nalo aber ka naio aberinavo “?Jau kobika koberinavo kei naio jokolso vonga na, ana jum̃abe, jau maka keial ka tomu nalo na miroano nei na aju ga amivinkakarło jeliviv easo?”

<sup>32</sup> Ana Yesu naio jo jiraravo jeliviv kia ga vo mila von ka rial kei jokol naio. <sup>33</sup> Mia tira neibano, naio mijikia ruei ka naina, ana naio merou laka, ana jo memebiju, mia naio binimeĩ ea Yesu, mijorua Yesu jaano, ana naio berial vite nonovio. <sup>34</sup> Mia Yesu berkanio, berinavo “Nena, kiamo viekouoiano ea kiniou milaso komijog bo bereio ruei, kiamo mieiano na maka bunu. Atua kiano tum̃aro to vijaso, jau kava vonuo bereio ga.”

<sup>35</sup> Mia bogo na Yesu jo mil kiaga vo ban tira nei, mia iliano tai binimeĩ den Jairas kunuano, aber ka toro na toru nei, aberenio “Kenerimo tira sesa m̃aro ruei. Bo ka jau kovuru re bunu naverloglogiano na toru na rimeĩ, kala bulag re naio.”

<sup>36</sup> Mia Yesu bunu ga mijogio, ana naio ber ka Jairas, berinavo “Kiamo iviso rivova re, jau komonea kar ga Atua sikili.” <sup>37</sup> Naruei Yesu berbure tom nonovio ka mia atakisor re bunu naio avan ea vio neibano, ana naio buru ga tom tolu nei, nina Pitere, bija Yemesi, bija kuruano Jone, abano.

<sup>38</sup> Mia bogo na abinimeĩ vaataro ka toro na toru nei kunuano, amial ka tomu nalo ajum̃a tiniel miia tira sesa neibano ruei, aju ajegi, a amila burum̃ara uetubaiano. <sup>39</sup> Mia Yesu ba joomo, ber ka tomu nalo nene

berinavo “?Ka vaio ana kamiu kumituña kumila uetubaiano toru, a kumituña kumiteg jibe na? Tira sesa na naio maka riñaro, naio jo monmelio ga.” <sup>40</sup> Mia nalo abital niege naio ga.

Mia Yesu miila bulag tomu nalo abava tavio, ana naio buru tira sesa nei karamñoano bija kenieno ga, bija kiano naiagagoano nalo tolu neibano, nalo aba joomo ea vio na tira sesa nei mokotenano mon eaio. <sup>41</sup> Ana Yesu ba bokar jumñoano, mia naio mil banio jelea kialo iliano, berinavo “Talita kum” napano naio berenio “Keneriku tira sesa, jau kotumolu von beamu vo.”

<sup>42</sup> Mia ea bogo nene ga, tira sesa nei, napano kiano yuka duelimo ba juo [12], jumolu, ana jo mieliel. Mia nalo na amialio vite nei, amiilo bano-o, jidomiano bulati ga. <sup>43</sup> Mia Yesu ber kalo berenio mia adu sinaniano ve telisu vanio, a naio ber bunu banlo ber mia tomu dolu nalo monokanio ajog re tenei.

## 6

### *Kulo Nasarete maka asidom Yesu Mataiu 13:53-58; Luka 4:16-30*

<sup>1</sup> Mia Yesu jaluvo ea vio nei, ana binimei bereio ea kiano vio, naio naliko kiano naiagagoano nalo. <sup>2</sup> Mia ea Legiano Lu, naio bija tomu nalo na kiano vio aba joomo ea kialo yimo na volkouano, ana naio jo berlogloglo. Mia bogo napano amijogio, nalo amiilo laka ka kiano iliano nalo. Ana nalo aberenio “Tomnei! ?Kema na naio bar tenalo na be? ?Naio bokar masouano na jumabe? ?A naio jomña mila vremesiano nalo na jumabe? <sup>3</sup> Kito romijikia kema na naruei. Naio be toro na miñauka yimo nalo ga na, tira na Mere kenerinio na. Mia nalo nei Yemesi, a Joses, a Jutas, a Saimon, nalo na abe kuruano nalo. A kuviviniene nalo, nalo nei napano aju kitoliko ga.”

Naruei nalo tiniel jer naio, maka asidom naio.

<sup>4</sup> Mia Yesu ber kalo, berinavo “Toro napano be naverialiano, tomu dolu nalo amijikia atovon naio, mia tomu na kanano vio, naliko kanano mñaratavo nalo, nalo na ga maka ajikia atovon naio.”

<sup>5</sup> Naruei ea kiano vio memedu nei, Yesu maka rijikia rila vremesiano, mia midu jumñoano jua tom juo ðeli tolu ga na amie, milarurlo bereio.

<sup>6</sup> Mia Yesu miilo laka ka tomu nalo na kiano vio na, bior napano maka asidom amonea naio leleio. Ana naio juvan kiano vio na, ana ba jeli-viv ea mñarkomeli dolu nalo napano naio jo berloglog tomu nalo.

### *Yesu miila bulag kiano atevi nalo abeve juo*

#### *Mataiu 10:5-15; Luka 9:1-6*

<sup>7</sup> Mia Yesu bio kiano duelimo ba juo [12] nei, ana mil batitig banlo, naio jian moroano banlo ka nalo amijikia atuvulu niununo va nalo, mia iorou naio miila bulaglo abeve juo abano. <sup>8</sup> Ilivatitigiano nalo na naio beriio beamu ruei nua ka avano, ajibe nei, napano naio berinavo “Ea tivelinio na kenemiu mñarabo, mia kamiu kuvar re titai vija kamiu, mia kenemiu nasitoga ga na kubanio, kumijikia kuvario. Mia kamiu kuvar re semiu sinaniano tai kuvano, ðelina kenemiu basaro, ðelina kenemiu veru. <sup>9</sup> Kamiu kumijikia kuvar kenemiu kulubue kuviya ea jaamiu, a mia maka kuvijikia kuvar kenemiu kulumñarauo dolu nalo bereio, mia kamiu kuvar ga kenemiu kulumñarauo ve takurano ga napano kuviya bogo na kuviel kuvano.”

<sup>10</sup> Ana Yesu ber bunu, berinavo “Bogo napano ver avuru kamiu kuva joomo ea kunualo nalo tai, mia kamiu monoka tiniemiu saaro ka kuvitu kamlikolo, mñaratavo nalo na vonuo nene, rivano-o rivokar bogo napano mia kuvitaluvo den mñarkomeli na bereio. <sup>11</sup> Ana ver ea mñarkomeli tai, tomu tai maka asidom avuru kamiu kuvan ea kunualo nalo, ðelina maka asidom

aiagago ka kamiu, mia kuvituvan ga kialo vio na to, mia bogo na kamiu kuvitaluvo den vio na, kamiu monoka kuvijubakon yeve na vio na den jaamiu nalo, jibe ka kijokijo tai ĩelina kenemiu iliano tai na kirisikili banlo, ka mia nalo avokar vironiano tai na memedu ga ka kialo bajago na bova nene.”

<sup>12</sup> Mia atevi nalo aban abeve juo jibe na naruei, mia aba amioliolu ban tomu nalo ka monoka aviliglo, <sup>13</sup> a amijil bulag siĉaro telabo den tomu nalo, ana nalo amionion bonotanunu na ĉarolivi teliki ea tomu na amie telabo parilo, jibe kijokijo tai na Atua kiano ilivuiano, ana amijog bo bereio.

#### *Tube Erot Antipas berii Yesu*

*Mataiu 14:1-2; Luka 3:19-20, 9:7-9*

<sup>14</sup> Naruei ea bogo nei, Parinio tubo Erot naio bunu mijog kija vaio na Yesu jomĉa milaio, bior ka Yesu siano, ajumĉa aberverii janea vio nonovio, mia tomu nonovio amijikia batitigio rui. Ana tomu tealo ajumĉa aberii Yesu, aberinavo “Nina be Jone Baruei bere na, napano vonganei meul bereio ea ĉariano. Tenei naruei napano mila naio be kiano moroano ka rila kijokijo nalo na.”

<sup>15</sup> Ana nalo dolu nalo aberii Yesu, aberinavo “Nina tormoruo Elaija re nua na,” ana tealo aberenio “Nina be naverialiano tai na, jibe kiado nave-rialiano moruo nalo tai re nuanua laka.”

<sup>16</sup> Mia bogo na Parinio tubo Erot mijog vaio na Yesu jomĉa milaio, berinavo “Toro na ĩeli Jone Baruei bere ga na! Kiniou nejelar pariparinio rui, mia vonganei naio meul bereio ea ĉariano bo?”

#### *?Jone Baruei ĉaro jumĉabe?*

<sup>17-18</sup> Parinio tubo Erot mil jibe na bior naio naruei muetamĉaria Jone Baruei ĉaro rui, ana jo merou ĉelea kano. Mia tukunuano na ĉariano na Jone Baruei kiano naio jibe nei. Parinio tubo Erot kuruano nei, be Vilip, napano naljuo

nei, karamĉalo takurano mia keniele naljuo. Vilip naio joro ka tira tai siano Erotias, mia iorou kano ana Parinio tubo Erot naio ba burular tira nene. Tenena Jone jomĉa mil ban Parinio tubo Erot kano, berinavo “Tena jau komila na maka rimemedu, ka na jau koburu tira na, bior naio be kuruamo koano.”

Mia Erotias maka leleio saaro ka Jone kanano iliano, naio tinienjer Jone, mila na Parinio tubo Erot miila kiano tomu nalo tealo abano abokar Jone amiorkario aburu ban ea yimo na lakoiano. <sup>19</sup> Mia Erotias jo jidom ka auebin Jone riĉaro, mia naio maka rijikia rilao, <sup>20</sup> bior Erot merou ka ruebinio. Naio merou jibe na bior naio mijikia ka Jone be toro na memedu tai, a be toro lu bunu, ana naio bokar vatitigio ga jo. Bogo telabo naio bio Jone binimej ka ave juo atukunu, mia naio jidom Jone kanano iliano nalo, mia bogo nonovio iliano nalo nei aju ajulu naio bunu, a mila na naio kiano jidomiano beve juo naruei.

<sup>21</sup> Mia maka vesiou, Erotias mial ka be kiano bogo. Nina, ea bogo napano nalo amimĉauka jokoluolu ka asidomkar bogo na Erot moluo eaio. Ana Erot naio mila jokoluolu tai ka kiano tomu nalo na tortoru bija kiano navurimĉaraboiano na kiano imĉauano nalo bija tomu nalo na tortoru na tanobuku na vio Kalele. <sup>22-23</sup> Ea jokoluolu nei naruei, Erotias kenerinio tira naio binimej bolu ea ga miralo, ana Erot nalo tinielo jaaro laka ka kiano voluano, naruei Erot naio mila verikariano tai kirisikili ban naio berinavo “Vaio na jau kovika den kiniou, mijikia rivano-o rivokar togio na kiaku vite nalo nonovio, ana mia kiniou nemijikia notuvan ga rivanso.”

<sup>24</sup> Mia tira neibano naio ba tavio, ana bika den kenieno, Erotias, berinavo “?Nena, mia kiniou nevika vaio denio?”

Naruei kenieno ber banio, berinavo “Mia jau kover ka ga koveri-

navo naio monokanio rudu Jone Baruei parinio rivan kito juo.”

<sup>25</sup> Naruei kenerinio tira nei naio mila soĥeli bere ga ba joomo, ba bika soĥeli ga den Erot, berinavo “Kiniou nojidom ka jau kodu Jone Baruei parinio ea baju tai ana kodu rimei ea vio nei vonganei.”

<sup>26</sup> Naruei iliano nei mila tubo Erot mijog kirivova, mia naio maka bunu rijikia rila korov kiano verikariano na kirisikili nei napano naio mila ea kiano bilbilu nalo miralo rui, <sup>27</sup> mia ea bogo nene ga naio miila kiano toro tai na mira, ba ber ka mia adu Jone parinio rime. Naruei nalo aban ea yimo na lakoiano ana aje korov Jone burujono, <sup>28</sup> ana amidu Jone parinio neibano ea baju tai, amidu abinimei ban tira neibano, ana tira neibano naio midu ba ban kenieno.

<sup>29</sup> Mia iorou, bogo na amijog vite nei, Jone kiano naiagagoano nalo abinimei amidu mokotenano, aba amidu batove jua ĩartanbo. Naruei tukunu na berii Jone Baruei, naio maaro ea vio na, mia bogo na Erot mijog veriiano na Yesu, mila naio merou laka, ber ĥeli Jone Baruei nene napano naio muebinio, meul bereio.

*Atevi nalo aba amioliolu, karina abinimei bereio*

*Mataiu 14:13-21; Luka 9:10-17; Jone 6:1-13*

<sup>30</sup> Naruei atevi nalo napano Yesu miila bulaglo abano ka aioliolu, mia abinimei bereio naruei. Mia nalo aju aberialio ban Yesu vaio nalo napano amila ka tomu nalo, bija ĵumabe aĵumã aberlogloglo.

<sup>31</sup> Mia tomu miroano napano aju abinimei ealo, karina nalo abano, ana tealo bere abinimei, karina aban bereio, mia jibe na ga bano, mia Yesu nalo maka ajikia ajilimebi leleio, maka leleio bogo vare ka ajikia adu salo sinaniano ve teliki. Naruei Yesu ber kalo berinavo “Bo ga, mia kito ravano. Kito rala von ka rotu ĥilig den vio nei ve telisu vo beamu, kito rava resiravo vio tai na

be tuĩaro vatitigio, napano kamiu kumijikia kuvijilimebi vatitig eaio.”

<sup>32</sup> Jibe na aba amidu uako tai, ana ajel eaio ka ava asirarag ka vio tai ea ueiyabo tivelinio, napano maka tomu nalo atua vio nene.

*Yesu bagan tomu telabo juvulu menu jimo [5,000]*

<sup>33</sup> Mia tomu miroano na abitulubar ka Yesu nalo ajaluvo jibe na, ana nalo bunu ga ajaluvo den kialo ĩarkomeli nalo, ajikiti, ajel uro, ana aba abokar beamu vio napano amial ka uako nei naio ĵomã ban eaio, beamu ka Yesu nalo.

<sup>34</sup> Mia Yesu bauro, a bogo na naio mial ka tomu telabo aju rui, mia naio tinien miialo laka, bior naio mialo jibe ka nunu nalo napano amilaluvu ĩarabo, napano maka toro tai ka rivitikarlo, ana naio ĵomã berlogloglo ka iliano novo nalo telabo.

<sup>35</sup> Mia bogo na ĩerenio batove, kiano atevi nalo abinimei eaio, aberinavo “Ai Tubo! Vio nei naio bova ga, a vaataro ka vio ribobogio naruei bunu. <sup>36</sup> Bo kanio jau keiila tiniobi nalo na avanvan bereio ea kialo vonuo nalo ĥelina avanvan ea ĩarkomeli nalo na aju dedade ea vio nalo nei, ka avulu salo sinaniano tai.”

<sup>37</sup> Mia Yesu ber kalo, berinavo “E, makanio, bo kanio kamiu ga kuvar sinaniano tai rivanlo.”

Mia aberiamã Yesu maka river vatitigio, naruei nalo aberinavo “E! Bo ga na ĥeli jau kojidom ka kumemi nuvar kiado puruveru na toru na, kumemi nuvario nuvulu ka joko rivare ka tomu menu telabo nei ka asenio?”

<sup>38</sup> Naruei Yesu ber kalo berinavo “Mia kamiu kuva kuvial von ver joko vio na ju bija kamiu vonganei.”

Mia nalo aba amialio, ana abinimei bereio, aberinavo “Kumemi nubar joko jimo na tereteliki ga ju, bija niado momaio juo.”

<sup>39</sup> Mia Yesu ber ka tomu nalo, berinavo “Kamiu kuvitutano ea soro na beamu,” <sup>40</sup> ana ajutano ea taara

nalo, napano tealo abokar duelimo va limo [50], a tealo abokar toromomou takurano [100]. <sup>41</sup> Ana naio bar joko jimo nei bija momaio juo nei, jirarago bavin ea tiniabene, ber siva ban Atua biorio, ana burekokorov joko nalo nei, jian ban kiano atevi nalo, ka avario asian van tiniobi nalo nei, mia naio janka bunu ga niado tereteliki juo neibano jibe na.

<sup>42</sup> Mia nalo ajinan bano-o, mia mabolo jouo vatitigio, <sup>43</sup> mia ioroti sinaniano bija niado nalo napano ajen ana nina beva aju, nalo amisnio ban ea basaro nalo bokario duelimo ba juo [12]. <sup>44</sup> Mia tomu nalo napano ajinan, napano sumano nalo ga, nalo abokar jibe kovio menu jimo [5,000].

*Yesu miel mave ea niunuku tei  
Mataiu 14:22-23; Jone 6:16-21*

<sup>45</sup> Karina Yesu berii ka kiano atevi nalo, berenio “Kiniou nojidom ka kami kuvidu kiado uako, kuvan beamu tivelinio ea ueiyabo nei, ea mmarkomeli na Betsaeta, mia kiniou noto nei beamu vo ka mia naiila tiniobi nalo nei avanvan bereio.”

<sup>46</sup> Ana bogo na miila bulag tiniobi nalo nei abano beve terakurano bisi, naio bavin ea suku ka rivolkouo.

<sup>47</sup> Ana bogo na vio binimej viobobogio ruei, uako jo koalabo tavio ea tinia tei ruei, mia Yesu jo naio takurano ga uro. <sup>48</sup> Ana Yesu mial ka nalo ajumã amila bijon ka mã abeluo ka uako neibano, bior aju abiniua jegi ga, mila nalo aburo melmelumu laka ga. Mia vaataro ka viorijeni mermeravo, naio binimej ealo, jomã miel mave ea niunuku tei. Nina naio jidom rivan vaataro ga kalo, ka riva rivotu tivelinio tukamu kalo, <sup>49</sup> mia bogo na nalo aju abitii naio jo miel mave ea niunuku tei binimej vaataro kalo jibena, abio souo, aberinavo “E! ?Vaio na binimej jibe na? ?Peli simãaro tai, pãelina venia na jibe na?”

<sup>50</sup> Nalo abiniu ajumã abitikar naio jibena, mia amerou laka. Mia kirisopeli Yesu mil banlo “E, kami kumerou re bunu, kiniou ga na.”

<sup>51</sup> Mia Yesu bavin ea uako bijalo, ana ea bogo na memedu ga, jegi neibano mãaro, ana nalo na ajua uako amiilo toru laka garuei. <sup>52</sup> Nalo amiilo jibe na bior kialo jidomiano nalo kirisikili laka kia ga vo, maka atu avitilubar vite nalo napano Yesu mijikia rila ea kiano moroano, jibeka vaio napano naio mimãauka bija joko jimo tereteliki neibano.

*Namieiano nalo ajokol ga Yesu  
kiano juluvati kulumãarauo*

*Mataiu 14:34-36*

<sup>53</sup> Ana Yesu nalo abarkorov ueiyabo neibano aban ea kialo uako tivelinio, naruei aba aboru ea vio tai, siano Kenasarete. Mia bogo na abuku veru ba uro, <sup>54</sup> mia abavatove ea uako, ana soãeli ga tomu nalo na vio na abitilubar Yesu. <sup>55</sup> Naruei nalo ajikiti ajeliviv ea kialo mmarkomeli nalo, aju abarvar kialo namieiano nalo ea mãalo jogu nalo, abinimej ea vio nalo vabe napano amijog ka Yesu jomã ban eaio.

<sup>56</sup> Ana ea vio nonovio na Yesu naio jomã ban eaio, ea mmaratavo nalo, ea mmarkomeli nalo, pãelina ea mmarabo nalo, nalo ajumã abar kialo namieiano nalo, aju abarlo ju vatitig ea vio medave, ana aju abika denio ka rijamo ka namieiano nalo nei atokol ga juluvati na kiano kulumãarauo. Mia nalo na mia atokolio tibena, kialo mieiano nalo ribisi, a nalo amej rivu bereio.

## 7

*Yesu kiano atevi nalo maka atakii  
bajago moruo na kulo ju nalo kialo*

*Mataiu 15:1-9*

<sup>1</sup> Mia ea bogo nei, Varisis tealo abinimej vio takurano ea Yesu, bija bunu naverloglogiano na tuboiano, napano nalo ajaluvo ea vio Yerusalemo abinimej. <sup>2</sup> Mia nalo aju amial ka bogo napano Yesu kiano atevi nalo ajumã ajinan, amila napano ea Varisis nalo kialo vitiiano, jumãalo nalo abova. Nina bior napano maka atakii vatitig kiri mmarabo sesa nalo telabo ka asekon jumãalo, napano Varisis nalo aber

tomu nalo monoka alaio, karina amijikia asinan. <sup>3</sup> Nina bior ea bogo na, Varisis nalo bija kulo Ju dolu nalo ajikili laka ka ala tibena naruei, ka nalo monoka atakii vatitig rivu kialo bajago moruo na kialo lotuano re beamu. <sup>4</sup> Ajuña amila jibena ka ver nalo amiel aban ea komeli ĩeli na vio vabe, mia bogo na abinimei vonuo bereio, mia monoka nalo atakii tuboiano na ka asekono ameravo rivu ĩeli na ave lu vatitigio rivu bereio. Iorou ka nina, amijikia atikar ka asinan naruei, bior ver nalo ala re, maka ajikia atokol sinaniano leleio. Mia be tuboiano sesa telabo bereio jibe na napano monoka atakii, napano tealu, aber monoka asekono baja tibe na tibe na, a tealu, aber monoka asekono ĩili marauo tibe na tibe na, a tealu, aber monoka asekono baju na amiñaukanio ea burujievi na be bras tibe na tibe na, rivan tibe na. <sup>5</sup> Vite na naruei mila Varisis nalo abika den Yesu, aberinavo “?Ka vaio ana kanamo atevi nalo maka atu atakii bajago moruo nalo na kiado lotuano nanua, napano kiado navuriñaraboiano nalo na ajuña aberloglogio ka kito. Kanamo nalo na, ajuña ajinan bija niamiamo nalo na juñalo, bior napano maka asekono batitig juñalo nalo.”

<sup>6</sup> Ana Yesu berdoĥe banlo, berinavo “Riano ga na, naverialiano Aisea re nua naio berii memedu ga kamiu tomu nalo na sibiano na, napano naio berial iliano nei napano Atua naio berenio, napano ber

*‘Tomu nalo na abamenea kiniou ka kialo iliano nalo ga,*

*mia kialo jidomiano nalo aju koalabo den kiniou kia ga vo.*

<sup>7</sup> *Mia nalo aju amilotu ka kiniou kurano ga,*

*bior bogo napano aberloglog tomu nalo, nalo aju aber nina*

*Atua kanano iliano na, mia makanio, iliano nei be tomu nalo kialo ga.’” Ais 29:13*

<sup>8</sup> Ana Yesu ber kalo berinavo “Kamiu kumituña kumituvan Atua

kiano tuboiano, ana kumituña kubokar bajago moruo na kulorinio ga kiano kirisikili laka. <sup>9</sup> Maka leleio rimemedu ka mia kamiu kuvituña kuvila tibe na, bior napano kamiu kumituña kumisikili ka kuvitakii bajago moruo nalo na toro ga kanano, mia vonganei kamiu kumila banbano-o mia bajago nei naio jo midu jeleig vio ĩelina naio jo bukular Atua kanano tuboiano. <sup>10</sup> Mosis kiano tuboiano naio berenio ruei, berinavo

‘Jau komonmonea karamamo naio koniomo,’

a naio ber bunu, berinavo

‘Toro na mil bova ka karamano naio kenieno, mia kamiu kuvuebinio rimaro.’

<sup>11</sup> “Tuboiano nei berenio ka kito monoka rovitikar vatitig kiado tormoruo juo nei, mia kamiu kumitu kumila dolu nei. Verenio toro tai verko kario kiano vite tealu ka river abe Atua kiano, ana ver tormoruo juo juñalo bulati, amei avikanio, mia kamiu kuver van naio ka monoka rila vaio van naljuo?

<sup>12</sup> Mia kamiu kuvitutua naio, kuverinavo ‘Maka lele, maka kojikia kosian van naljuo nei, bior kanado bajago moruo ber vaio na kuberkoio ban Atua, monoka kosian ga van kiano tomu lu nalo, jau maka kojikia kotuvan van toro dolu.’ <sup>13</sup> Kamiu kuberenio jibena, mia vaio na jibena? Kamiu kumitu jikili ea bajago moruo nalo, kamiu kumitu kumituvan batove, mia jo mila Atua kiano tuboiano binimei be vite kurano tai. Mia maka nina ga, mia kamiu kumitu kumila vite telabo na jibena.”

*Vite nalo naña mijikia rila toro riagiago ea Atua mirano*

*Mataiu 15:10-20*

<sup>14</sup> Naruei Yesu bio tomu nalo ka amei vio takurano bereio ea naio, ana naio mil banlo, berinavo “Kamiu nonovio kuviagago vatitig ka kiniou, kamiu monokanio kuvijogluar kanaku iliano nei. <sup>15-16</sup> Maka leleio ve vite tai naña jo tavio ea toro, mia river riva joomo ea naio mijikia rila naio riagiago

ea Atua mirano. Mia vite nalo namā aju joomo ea naio, napano mā amoluo ea naio, vite nalo na naruei amila naio miagiago ea Atua mirano.”

<sup>17</sup> Ana Yesu jaluvo den tomu nalo nei, ana ba vonuo bereio, ana karina, kiano naiagagoano nalo abinime, abika denio jamerijiano napano naio jomā berii kalo. <sup>18</sup> Ana Yesu berinavo “?Jumābe, pēli kamiu bunu parimiu bono kia ga vo javukia nalo na? Bior vaio napano kamiu maka kuvitilubar vite na? Vite vaio na jo tavio, jibe sinaniano nalo, verinavo riva joomo ea toro, nalo maka ajikia ala toro rivova ea Atua mirano. <sup>19</sup> Nina bior napano vite nalo nei maka ava avokar kiano jidomiano, mia abatove ea mabongo ga, karina abarlaka amoluo den nibene bereio.” Mia Yesu ber jibe na naruei, ana karina, tomu nalo abitilubar von naruei ea kiano iliano nei, Yesu mila meravo ka maka ve sinaniano tai napano toro monoka rivēl kanio ka rila naio rimeravo rivu ea Atua mirano, mia sinaniano nonovio ga nalo abo ga ka asenio.

<sup>20</sup> A Yesu berenio bunu “Mia vite nalo napano ajua toro rui, ana aju amalmaluvo ea kiano meuliano, vite nalo na naruei amijikia ala toro riagiago. <sup>21</sup> Nina bior joomo ea toro, be bajago va nalo napano aju amoluo ea naio, jibe jidomiano va, siakiano, vinauano, amue tamāro ea toro, siakaiano, <sup>22</sup> tinieiano, bajago na bova, sibiano, lakoroviano na tuboiano, jokuano, tii ilisibiano nalo, ilivarvariano, bija vovuiano. <sup>23</sup> Bajago va nalo nei naruei, nalo amoluo den toro kiano iviso, mia nalo nei naruei vite nalo namā amijikia ala toro riagiago kamu ea Atua mirano.”

*Yesu mijil lar niadu den niatira tai Mataiu 15:21-28*

<sup>24</sup> Ana Yesu jaluvo den vio na, naio batove ea tanobuku na komeli nei Taea. Mia naio ban ea yimo tai, naio jidom rila ka mia tomu nalo ajikia re ka naio joa vio na,

mia naio maka rijikia toluku tibena. <sup>25-26</sup> Naruei tira tai joa vio na napano maka ve Ju, bior napano kiano torogio nalo abe Kris ga, mia abinime ajua tanobuku na Vonisia vaataro ka Siria. Tira nene, kenerinio kiri tira sesa, niununo va tai joaio, mia bogo na tira neibano mijog ka Yesu joa vio na, naio binime minie tano ka Yesu jaano, jegi banio, ka naio rijil lar simāro nene den kenerinio niatira sesa nei. <sup>27</sup> Mia Yesu berdope naio, berinavo “Mia memedu ka kiritete nalo monoka asinan beamu! Maka rimemedu ka navar bulag kiritete nalo salo sinaniano nalo denlo, novuku rivan kuli nalo.” Naio berenio jibe na bior ka bogo na, kulo Ju nalo, napano aberiamā nalo ga abe Atua kenerinio nalo, nalo ajumā abio niegeniege tomu nalo napano maka ave kulo Ju, aberinavo “Kamiu kuli nalo ga.”

<sup>28</sup> Mia tira neibano berdope naio, berinavo “Jau kober be riano Tubo, mia kuli nalo aju aban vaataro ka vio na kiritete nalo salo sinaniano, ka mia amijikia asen yororoti sinaniano nalo namā ajibirbil yetano ea borotano.”

<sup>29</sup> Naruei Yesu berkanio, berinavo “Jau kojian verdopeiano novo tai ka kiaku iliano nei. Naruei bior kanamo iliano novo na, kiniou nebitilubar ka jau tiniemo barkar vatitig kiniou, ana bo, neber kaso ka jau komijikia kava vonuo ga, simāro nene jaluvo den kenerimo niatira nene rui.”

<sup>30</sup> Naruei tira nei naio ban bere vonuo, ana binime mial kiritete neibano kenerinio naio jo melumu ga, naio jo mon vatitig ea māno jogu.

*Yesu mimāuka batitigio bulubau tai*

<sup>31</sup> Mo, karina Yesu juvan tanobuku nei Taea, ana naio ba jel ea mākomeli dolu na Saiton, ana binime bereio ea ueiyabo na Kalele, nina tivelinio na tanobuku napano abio ka Komeli Duelimo. <sup>32</sup> Ana nalo na vio na aburu toro tai binime banio, ka naio rudu jumāno toaio,

bior toro nene naio tiliniene bono, naio mil dede laka ga. <sup>33</sup> Naruei Yesu buru toro nei jaluvo den tiniobi nalo nei napano aju, naruei naljuo aba laka kija. Naruei Yesu miyuku m̄arjukjũmano ban ea bulukuti buru tiliniene, karina naio midu titinio, mia ea kema neibano buruminano. <sup>34</sup> Karina Yesu jirarago mave ea tiniabene, naio burukar kiano jegi toru, ana ber ka kema neibano jel kialo, berinavo “Evata,” napano iliano na berenio “Jau kove-tavo.” <sup>35</sup> Naruei vaarakurano ga, kema neibano, buru tiliniene betavo, bija buruminano miñau vatitigio, mila na kema neibano naio mijog vite bo a mil vatitig meravo ga.

<sup>36</sup> Naruei Yesu jadu kalo, ka mia avan re atukunu ka tenei tanea vio van tomu dolu nalo, mia bogo na naio jo berii jibe na ka tomu nalo, mia nalo aba aberverii lie vo ea vio reraio ga. <sup>37</sup> Nalo aberii m̄elea jibe na, bior amiilo mia amiilo ka vite nalo nonovio napano m̄a nalo amialio ka Yesu mijikia miñaukanio. Nalo ajum̄a aberverii aberinavo “Yesu nei mila nalo nam̄a tilinielo bono nalo amijog vite, a naio miñauka tomu na maka ajikia ail, nalo amil. Kaleliki, kema na miñauka vite nalo nonovio bo mia bo laka, mm.”

## 8

*Yesu bagan tomu nalo juvulu menu veri [4,000]*

*Mataiu 15:32-39*

<sup>1</sup> Ana bogo tai, tiniobi toru tai na tomu telabo nalo abinimei ea Yesu bereio. Mia nalo aju bija naio bano-o, ana nalo jijerlo, ana nalo maka bunu salo sinaniano. Ana Yesu bio kiano naiagagoano nalo abinimei ea naio, ana naio ber kalo, berinavo <sup>2</sup> “Kiniou tinieku jii tiniobi nalo nei toru, bior aju bija kito bogoti tolu ruei, mia salo sinaniano biniu ruei. <sup>3</sup> A ver kiniou neiila bulaglo avan ea kunualo napano maka ve salo

sinaniano jibenei, p̄eli tealo siserlo ve toru ea m̄arabo togio ana miralo ribobogio, bior nalo tealo, kialo komeli aju koalabo laka.”

<sup>4</sup> Ana Yesu kiano atevi nalo aber ka naio, aberinavo “Ana mia kito ravagan tomu nalo nei ea vio iauo nei tum̄abe?”

<sup>5</sup> Ana Yesu bika denlo, berinavo “Ana kamiu be semiu joko vio?”

Ana nalo aber “Aluo ga.”

<sup>6</sup> Naruei Yesu mil ban tiniobi toru nei, berinavo “Kamiu kuvitutano ea vio nei beamu vo.” Ana naio bar joko aluo nei, naio ber siva ban Atua kanio, karina naio burekoko-rovio, ana bario janea kiano naiagagoano nalo ka avar van tomu nalo, ana nalo aba ajankanio ealo.

<sup>7</sup> A nalo abar niado momaio juo na tertelisu ea bogo nene, ana Yesu ber siva kalo bunu, ana berinavo “Kuva kuvitan kalo bunu van tomu nalo.” <sup>8</sup> Ana nalo ajenio banbano-o, napano mabolo jouo vatitig, ana amison basaro aluo bereio abujo magmago vatitig bija ioroti sinaniano nalo na ju. <sup>9</sup> Ana nalo na ajinan ea bogo nei, nalo abokar p̄eli menu veri [4,000].

Naruei Yesu miila bulag tiniobi nei aban bereio ea kialo komeli, <sup>10</sup> ana naio ban ea kialo uako na, bija kiano atevi nalo, a nalo ajuvan vio na, aba abokar tanobuku na vio Dalmanuta.

*Tomu na tortoru tai ajidom aial kijokijo*

<sup>11</sup> Ana ea bogo tai na, Varisis nalo tai abinimei ajidom avilvil ea Yesu, a ajidom ala vonvon naio, ana nalo aberinavo “Kumemi numisidom jau koverloglog kijokijo tai na toru ka nuvalio, napano jau kalaio vija sikiliano na tiniabene.”

<sup>12</sup> Mia Yesu naio buru kiano jegi, jibe napano naio tinien maro kalo ruei, ana berdope banlo, berinavo “Ka vaio kamiu na tena banei, kumitu kumisidom kuvial kijokijo tai tibena? Kiniou neber be riano ban kamiu, maka leleio, mia kenemiu bajulukuti na banei mia maka ajikia

aial kijokijo tai.” <sup>13</sup> Ana Yesu jaluvo denlo juvanlo ajubo, ana naio ban ea uako bereio, naio barkorov bereio ueiyabo ba tivelinio.

*Navuriñaraboiano nalo na lotu-ano amila bajago va aju amiluo lie*

*Mataiu 16:5-12*

<sup>14</sup> Ana bogo na nalo ajaluvo aba abokar tivelinio na ueiyabo na toru nei, nalo ajidomii von bereio napano tinielo bobogia ka avar salo joko tai rimei, mia salo joko takurano ga jo bijalo ea uako. <sup>15</sup> Ana Yesu ber iliano tai banlo, berinavo “Kamiiu monoka kuvitikar vatitig kamiiu, ka Varisis nalo bija Erot kialo is.” Yesu berenio jibe na ber ka bajago va nalo na kialo navuriñaraboiano nalo, mia atevi nalo maka asidomiilubario.

<sup>16</sup> Nalo amijog ga, ana aju aberii ealo, aberinavo “Peli naio mil jibe nei bior napano kito maka ravar joko tai rimei.”

<sup>17</sup> Ana Yesu mijikia kialo jidomiano na, ana berinavo “Kamiiu kumitu kuberii napano m̃aka ve sado joko ka vaio? Jum̃abe, kamiiu maka kuvijoglubar p̃eli maka kuvitilubar vite nalo navo? Peli tiniemiu nalo jikili laka ga! <sup>18</sup> Kamiiu, miremiu nalo ju, mia kamiiu maka kuvitu kuvitilubar vite, a burutiliniemiu nalo ju, mia kamiiu maka kuvijoglubar vite. Peli kamiiu maka bunu kuvitu kuvisidomii bereio vite nalo napano kiniou nomilaio ban tomu nalo? <sup>19</sup> Bogo na kiniou nemila burevure joko jimo nua na ruei ea tomu nalo menu jimo [5,000] na, nalo ajenio banbano-o mia kamiiu kumison iororoti sinaniano nalo aban ea basaro vio?”

Nalo aberdoṽe ban naio, aberinavo “Kumemi numison duelimo ba juo.”

<sup>20</sup> Ana naio bika bereio, berinavo “Ana bogo na nalo menu veri [4,000] na ajen ga joko aluo na, iorou kamiiu kumison basaro vio bereio?”

Ana nalo aberdoṽe, aberinavo “Kumemi numison aluo.”

<sup>21</sup> Ana naio ber kalo, berinavo “Boga, ana jum̃abe vonganei? Kamiiu kumijikia kija vite nalo nei naruei, p̃eli na makan vo?”

*Yesu milarur merebono tai na vio Betsaeta*

<sup>22</sup> Naruei Yesu nalo abinimeii abokar komeli nei, Betsaeta. Ana nalo na vio na, aburu merebono tai binimeii ea Yesu, ajegi ban Yesu ka naio tokol vatitig toro nene.

<sup>23</sup> Ana Yesu bokar merebono napano jum̃ano, ana naio burio bano, ana naljuo aban bilig ea komeli tivelinio abano. Naruei Yesu midu titinio jua toro napano mirano, a naio midu jum̃ano joa mirano be juo, ana bika den naio, berinavo “Jum̃abe, jau kojo komial vite, p̃elina makan vo?”

<sup>24</sup> Ana toro napano naio jirarago, mial vio, mia naio ber berinavo “Nao-o, kiniou nemial tomu nalo, a nemial nalo jibe bulapati buruiesi ga nalo napano aju amiel.” <sup>25</sup> Ana Yesu midu jum̃ano joa naio bereio ea bogo valuo nene, ana toro nei, mirano binimeii bo nonovio garuei, ana naio jirarago bereio, mial vite nalo meravo mia meravo bo. <sup>26</sup> Ana Yesu berkanio, berinavo “Mia kavan re bunu keial nalo na aju komeli, kavan memedu ea kunuamo.”

*Pitere berial ka Yesu be Naverikariano memedu*

*Mataiu 16:13-20; Luka 9:18-21*

<sup>27</sup> Mia Yesu bija kiano atevi nalo ajidom avatove ea m̃arkomeli na tertelisu vaataro ka komeli na toru nei Sisiria Vilipai, a bogo napano nalo aju amiel ea m̃arabo ka avatove ea vio na, naio bika denlo berinavo “Kamiiu kumitu kumijog tomu nalo aju aberverii kiniou ka kiniou kiniou kei?”

<sup>28</sup> Nalo aberdoṽe banio, aberinavo “Tealo aberinavo jau Jone Baruei bereio, a tealo aber Elaija, a tealo aber jau naverialiano na nuanua laka.”

<sup>29</sup> Ana naio bika bereio den nalo, berinavo “A jumabe ka kami, kami kumitu kuberii kiniou kiniou kei?”

Naruei Pitere berdoŕeio, berinavo “Jau kobe kenememi Naverikariano memedu na.”

<sup>30</sup> Ana Yesu ber memedu banlo, beri-navo “Bo, mia kami kuva kuverialio re vite nei van tomu nalo.”

*Yesu berial kiano m̄ariano  
Mataiu 16:21-28; Luka 9:22-27*

<sup>31</sup> Ana ea bogo na, Yesu jikar ka milavon ka riverloglog kiano atevi nalo ka Kulorinio Kenerinio, mia monoka nalo ala vite ve telabo napano mia naio rijog rivova kanio, a mia navurim̄araboiano nalo na kulo Israel bija kialo parinio kulo lu nalo, bija tomu na verloglogiano na tuboiano nalo, mia nalo avukular naio. A Yesu ber bunu mia auebin naio, mia bogoti ve tolu nene, mia naio tumolu bereio, naio tovulu m̄ariano. <sup>32</sup> Iliano nalo nei, Yesu berialio meravo vatitig kalo, a bogo na Pitere mijogio, bio Yesu, burular naio, mil jikili banio, jidom verbure naio, ber mia tibe na re. <sup>33</sup> A soŕeli ga Yesu naio bilig taakano ka Pitere, naio bitii ban ea kiano atevi nalo dolu na aju, ana naio mil koko vio jikili ban Pitere, ber kaio, berinavo “Sim̄aro, kava bilig den kiniou! Kiamo jidomiano na be toro kiano ga, maka Atua kiano jidomiano leleio.”

*Yesu kiano naiagagoano monokanio  
sidomii ve iakurano ga ka kiano  
sidomiano nalo*

<sup>34</sup> Ana Yesu bio tiniobi nalo bija kiano naiagagoano nalo, ka amei ea naio, ana ber kalo, berinavo “Toro na jidom takisor kiniou, naio monoka sidomii iakurano ea kiano sidomiano nalo, monoka rudu kiano m̄akolkolo, ana takisor kiniou. <sup>35</sup> Toro na jidom rilaluru kiano meuliano, mia rilaluvuio. Mia ver toro tas milaluvu kiano meuliano bior kiniou, ŕeli na bior kiaku Ioluanou, mia naio rije ioruriano.

<sup>36</sup> “Verver toro tai rije vite nonovio na yetemeriba nei, mia iorou naio rilaluvu m̄arabo na meuliano, naio maka rije tena bo tai leleio. <sup>37</sup> Mia kiano vite novo nalo nei napano bario, maka ajikia avulu kean bere kiano meuliano bogo tai. <sup>38</sup> Tomu nalo miroano ea taara na vonganei nalo amila kariano, nalo maka leleio ave riano ea Atua, nalo abova laka, a nalo amimou ka tomu dolu nalo bior kiniou bija kiaku iliano. Ana iorou mia Kulorinio Kenerinio rimei bereio, naio vija kiano nailiano lu nalo, vija karam̄ano kiano mermerano, a bogo na amei, ver toro mimou ka naio vonganei, mia naio bunu rimou ka toro nene.”

## 9

<sup>1</sup> A Yesu ber bunu banlo, beri-navo “Riano ga neber ka kami, tomu nalo tai na aju ajikili ajua vio nei, napano mia nalo maka ajikia am̄arm̄aro, rivanvano-o rivokar bogo na nalo aleal Atua kiano Navena-tuboiano rimei riyotuba vija kiano burum̄ara sikiliano.”

*Yesu niabene binime be dolu  
Mataiu 17:1-13; Luka 9:28-36*

<sup>2</sup> Iorou ka bogo nei, bogoti ari barlaka ruei, ana Yesu buru Pitere, a Yemesi, a Jone, nalo abano mave ea burusuku tai na bavin laka, napano nalo veri ga. Ana bogo na nalo aju jibena, naiagagoano tolu nei amial Yesu niabene jo binime be dolu, <sup>3</sup> a nalo amial kiano kulum̄arauo nalo amieg, a nalo amiuvu bo mia amiuvu nonovio garuei, jovulu vite dolu nalo tealu na yetemeriba neibano na amiuvu. <sup>4</sup> Ana nalo amial bunu naverialiano Elaija bija tormoruo Mosis, naljuo amiyotuba, naljuo aju ajukunu bija Yesu.

<sup>5</sup> Ana Pitere ber ka Yesu, berinavo “Tubo, bo ka kito rotua vio nei. Bo ka kumemi nuvin̄auka yimo tobobo ve tolu ea vio nei, kiamo ve takurano, Mosis kiano ve takurano, a

Elaija kiano ve takurano.”<sup>6</sup> Pitere mil vovu jibe na ka nalo amemebiju laka, a nalo amerou, nalo maka bunu ajikia mia aver venia.

<sup>7</sup> Ana vaarakurano ga, melijo tai binimej jovukolo, ana nalo amijog iliano tai binimej eaio, berinavo Ninei be keneriku na, napano kiniou nojidom naio laka.

Kamiu monoka kuvijogkar vatitig naio.

<sup>8</sup> Naiagagoano nalo amijog iliano na, ana ajiraravo jeliviv ealo, ana maka bunu aial naljuo nabano, mia amial Yesu naio ga takurano jo bijalo. <sup>9</sup> Ana nalo ajaluvo den burusuku neibano, nalo aju abatove bereio, ana Yesu mil jikili banlo, berburelo berinavo “Tena Atua mila kumialio, mia kamiu kuvan kuver re ka tomu nalo vonganei, riva riva rivokar bogo na Kulorinio Kenerinio naio rimeul bereio ea namariano, naruei ea bogo na mia kuverialio ka tomu nalo.” <sup>10</sup> Ana nalo amijogkar Yesu kiano iliano nei, mia nalo abokar iliano nei be kialo ga, kar na nalo aju abivika denlo aber venia naruei be nioti na kiano iliano nei napano naio jo berii rimeul bereio ea namariano.

*Nalo aberiamā Elaija juo nene mia naio rimej navo, mia Yesu ber Jone Baruei ruei*

<sup>11</sup> Ana naiagagoano tolu nei nalo abika den Yesu, aber “Jumābe ka tomu na verloglogiano na tuboiano nalo aju aber Elaija mia rimej bereio beamu, iorou Naverikariano nei mia riyotuba?”

<sup>12</sup> Ana Yesu berdoŕe banlo, berinavo “Nina nalo aberiio be riano ga, Elaija monoka rimej beamu ka rila saba nalo rimemedu ka Naverikariano naio rijikia rimej. Mia iliano lu nalo aju aber todolu tai bunu na nalo maka atu asidomiio, nina jo berii Kulorinio Kenerinio, berinavo mia naio monoka riviviuo bogokouo ve telabo, a mia tomu nalo asidomii va lelan naio laka. <sup>13</sup> A kiniou

neber ka kamiu, neber Elaija nei naio binimej vonga garuei, a tomu nalo maka asidom naio. Jibe Iliano Lu naio berenio, nalo amila bova ka naio ruei.”

*Yesu mijil bulagio simāro ea mēaku tai*

*Mataiu 17:14-22; Luka 9:37-43*

<sup>14</sup> Naruei Yesu bija nalo tolu nei aju aban ea naiagagoano dolu nalo, ana amial napano tiniobi miroalo aju jeliviv ealo, a nalo amial ka naverloglogiano nalo na tuboiano bunu aju jeliviv ealo. <sup>15</sup> Ana bogo na tiniobi nalo nei amial Yesu jo binimej bereio, nalo amiilo ka naio, a nalo ajaaro toru ka amialio, ana nalo ajikiti abinimej eaio, nalo aban jumālo bija naio. <sup>16</sup> Ana Yesu bika den naiagagoano nalo berinavo “Ee, kamiu kumitu kumitukunu ka vaio bija nalo na?”

<sup>17</sup> Ana nalo tai ber ka Yesu, berinavo “Naverloglogiano, kiniou naruei noburu keneriku sumāno mēaku binimej easo ka jau keial naio, ka simāro tai na buru joa naio. <sup>18</sup> Ana bogo na jo mirāukanio, buku naio batove ea borotano, titinio miou kirivova jibe tililevlevi, naio jer mārjuvono, a niabene nalo amārmāriulu. Ana kiniou noburu naio binimej, ana jau maka koto, ana nebika kiamo naiagagoano nalo ka abolkouo ka ajil lar simāro nene, ana nalo amila vonvonio, amila banbano-o, nalo abijukudeio.”

<sup>19</sup> Ana Yesu berdoŕe, mil banlo, naio berinavo “Kamiu na, jumābe jibe na? Kamiu maka kuvitu sikili ea Atua leleio. Kiniou monoka noto vija kamiu vano-o vokar nagj? Kiniou tinieku maro ka kamiu ruei. Mo, bo ga, kuvuru mēaku nene rimej ea kiniou.”

<sup>20</sup> Ana nalo aburu binimej, ana bogo napano simāro nene mial Yesu, mila mēaku neibano niabene mārmarūlu, mila mijoru ea borotano, naio jo bilivilig janea vio jibe na, a mila titinio miou bova jibe

jo beŕeili. <sup>21</sup> Ana Yesu bika suṁano ṁeaku nei karamāno, berinavo “A siṁaro nei jikar mila naio jibe na nagi ruei?”

Ana karamāno berdoŕeio, berinavo “O, tenei nua ruei, bogo na naio be tete kia ga vo. <sup>22</sup> Binime i bokar banei bogo telabo ruei, tena jomā mila naio jo mijoru batove ea sebi ŕeli ea bulukue. Tena jidom ruebulag naio laka, a ver jau komijikia kala titai ka naio, kumemi nubika denso, aua jau tiniem riia kumemi, jau koija kumemi rivior kenerimemi nei.”

<sup>23</sup> Ana Yesu ber ka naio berinavo “Kiniou nomijog ka kober jibe na, ver kiniou nejikia neimāukaio. Ana kiniou neber kaso, verver jau komonmonea ga, jau komijikia koimāuka vite nonovio.”

<sup>24</sup> Naruei suṁano ṁeaku nei karamāno bio soŕeli ban Yesu, jegi banio, berinavo “Nojo nomonea teliki, a maka nomonea vare vo. Aua jau koija kiniou ka kiaku moneano rime i ve toru lie.”

<sup>25</sup> Ana bogo na Yesu mial ka tiniobi abinime i miroano aju ajelivivi ealo, ana naio mil ban niununo va nei napano joa suṁano ṁeaku nei, berinavo “Jau niununo va na tiliniene bono, a na be buru, neber memedu banso, neber jau kataluvo den naio vonganei, a mia kavan lele re bunu joomo eaio bereio bogo tai.”

<sup>26</sup> Ana niununo va nene miaga va laka, a mila suṁano ṁeaku nei niabene aṁarmāriulu banbano ba bova laka, ana naio jaluvo denio, buro bano. Vonganei suṁano ṁeaku nei niabene melukluku laka jo, jibe ka naio ṁaro ga, a tomu nalo na aju abitii aber jibe nei naruei, aberinavo “O, suṁano ṁeaku nei naio ṁaro ruei na.”

<sup>27</sup> Mia Yesu bokar juṁano, ana buru suṁano ṁeaku nene jumolu, ana jumolu ju vatitig jo. <sup>28</sup> Mia iorou, Yesu ban bere ea komeli bereio, ana ka bogo na, napano naio jo naio takurano ga, kiano

naiagagoano nalo abinime i abika, aberinavo “Juṁabe kumemi maka nuvijikia nuvijililar siṁaro na joa suṁano ṁeaku na?”

<sup>29</sup> Ana Yesu ber kalo, berinavo “Siṁaro ninio nalo na jibe na, nalo ajikili laka, volkouano ga mijikia rijil bulaglo.”

*Yesu berial bereio kiano ṁariano Mataiu 17:22-23; Luka 9:43-45*

<sup>30</sup> Mia Yesu nalo ajuvan vio nei, ana nalo abanvano amalmaluvo ga ea tanobuku nalo na Kalele, mia ea bogo na, Yesu maka sidom ka tomu nalo ajikia venia na naio jo milao, ŕeli ea vio vabe na nalo aju aban eaio. <sup>31</sup> Nina, bior ka naio jo berloglog kiano naiagagoano nalo ea bogo na, ana naio jo ber kalo, berinavo “Vaataro ka mia adu Kulorinio Kenerinio van ea tomu nalo juṁalo napano mia auebin naio riṁaro, mia iorou, ea bogoti ve tolu, mia Atua rila naio rimeul bereio.”

<sup>32</sup> A kiano naiagagoano nalo maka ajoglubarbar vo venia napano Yesu naio jo berenio banlo, a nalo amerou ka avika vatitig denio bereio.

*Toro kei naio jo mave ka toro dolu Mataiu 18:1-5; Luka 9:46-48*

<sup>33</sup> Ana iorou, bogo tai abinime i abokar bereio Kapeneam, abinime i joomo ea yimo tai, ana Yesu bika den kiano naiagagoano nalo, berinavo “Kamii kumitu kubivivika iliano ea kamii ea ṁarabo bior vaio?”

<sup>34</sup> Mia maka averdoŕeio van naio, bior ka bogo na nalo aju amiel abinime i ea ṁarabo, nalo aju amil banlo, aber kei kalo na jo loa mave, ŕeli kei naio bo loa tealoo. <sup>35</sup> Ana Yesu jotano, bio nalo duelimo ba juo [12] nei ka amei vaataro ka naio, ana naio ber kalo, berinavo “Verver kamii tai na jidom naio to ve moti, a naio jidom ka siano to mave, bo ga, ana mia naio monoka rila naio rime i ve na maariano, to totano maariano laka garuei, naio monoka rime i tibe toro na iṁauano na nalo dolu beamu.”

<sup>36</sup> Ana Yesu bio kiritete tai napano jo binimeia ea naio, naio miduio jikili ju iviso kalo, ana naio bokar tete nei ana ber kalo, berinavo <sup>37</sup> “Toro na kiano jidomiano batove ka kiniou, ana naio tinien jaaro ka rila vatitig kiritete tai na jibe nei, nina, jibeka ga na naio jo jaaro ka kiniou. A toro na jaaro ka kiniou jibe na, maka saaro ka kiniou ga, mia naio jaaro ka nina naio miila kiniou nebinimeia.”

*“Toro na maka to verbure kito, naio jo miija kito”*

*Mataiu 18:6-9; Luka 9:49-50, 17:1-2*

<sup>38</sup> Ana naiagagoano nei Jone ber ka Yesu, berinavo “Naverloglogiano, kumemi numial toro tai, napano naio jo mijil bulag siñaro nalo, naio jo mijil bulaglo ea siamo. A toro nene maka nuvijikiaio, naio maka ve kito tai, mia kito rotuko vio ka naio.”

<sup>39</sup> Ana Yesu ber kalo, berinavo “Makanio, kami kuverbure re naio. Verver toro tai jibe naio be riano, ana naio mila inñauano nalo na bo tortoru laka ea siaku, mia toro na maka rijikia ril vova ea siaku bereio bogo tai. <sup>40</sup> Toro na maka to toko vio ka kito, naio jo miija kito na. <sup>41</sup> Neber be riano ban kami, ka ver toro tai mijikia ka kami kumitu kubar Kristo siano ea kami, ana naio midu baja na uei tai ban kami ka kumunio, toro na mia maka rijikia rilaluvu kiano jidomiano tai na bo mia naio ruduio iorou.”

### *Tuboluboiano nalo*

<sup>42</sup> A Yesu ber bunu, berinavo “A verver toro tai rila ka tete tai naio maka bunu sikili ea kiniou, mia toro na ridu mauo tai na jikili lie vo, todovulu nina mia ver aiorikar puruveru tai na toru ea burujono ana avuku naio rivan ea niogovu.

<sup>43-46</sup> “Verver juñamo tai ðeli na jaamo tai milaso maka bunu koto sikili ea kiniou, bo ka ketelario rivan ga. Verver kete bajago na kariano ea

kiamo meuliano tibe na, mia komijikia kava joomo ea meuliano, a ver kava joomo ea meuliano a juñamo tivelinio ðeli jaamo aba kovio ruei, nina bo ga na. Mia bova laka ver juñamo ve juo vija jaamo ve juo nalo atu rivu ga, mia iorou avukuso ea sebi na maka rijikia riñaro bogo tai. <sup>47</sup> Peli ver miramo, ðeli venia bereio ea kiamo meuliano milaso maka bunu koto kesikili ea kiniou, bo ka jau koija lario ga. Tibe na, mia jau kava joomo ea Atua kiano navenatuboiano napano vite teliki nei bakovio denso ruei, a nina bo ga na. A bova laka ver miramo ve juo ðeli kiamo bajago bova nalo ju bo ga easo, mia iorou tenalo teliki nei ga buru kiamo meuliano ban ea sebi ea vio na jogvaiano, <sup>48</sup> napano sebi nene maka rijikia riñaro bogo tai, sorel nalo aju ajen mokotenamo bogo nonovio ga.

<sup>49</sup> “Jibe na tei mijikia rila sinaniano maka jikia soono, mia Atua ridu sebi toa tomu nalo ka sisen bulag soro nalo na joa kialo meuliano. <sup>50</sup> Mia romial bunu tei mila sado sinaniano jesei bunu, a ver kiano sikiliano riva kovio, naio maka bunu rijikia rila kiano inñauano. Vonganei kami monoka kuvijamo ka Atua kiano tei riñau ea kami bogo nonovio, ka kenemiu meuliano soono re, a ka kenemiu bajago naio sese, mia kami kuvitu vija tuñaro bogo nonovio.”

## 10

*Yesu berii juñabe toro jitiglar koano*

*Mataiu 19:1-12; Luka 16:18*

<sup>1</sup> Ana iorou, Yesu juvan vio Kalele, naruei naio bavin tivelinio ka tanobuku na Yutea, ea mñarauei na vio Yortano tivelinio bano. Ana tiniobi nalo aju abinimeia ea naio bereio ea vio na, a javukia napano naio jomña mila julaka, naio berlogloglo ka vite telabo. <sup>2</sup> Mia

Varisis tai aju bunu ea bogo nei, mia nalo abinimei ea Yesu, a ajidom alavon naio bereio, naruei nalo abika vikadeniano tai denio. Nalo aberinavo “Tuboiano na kanado naio ber vaio ka tivelinio na bajago nei napano toro naio jitiglar koano? Jumabe, jau be tiniemo ka napano toro mijikia rila tibena, ðeli na maka rimemedu?”

<sup>3</sup> Ana Yesu bika ber banlo, berinavo “Mia tormoruo Mosis naio berial venia ea kiano tuboiano ruei?”

<sup>4</sup> Mia Varisis nalo nei aberenio, aberinavo “Mosis naio berial ea tuboiano tai napano mijamo ka toro mijikia sian mēsi tai van koano, naruei naio mijikia riilalar naio rivano.”

<sup>5</sup> Mia Yesu naio berdoþe banlo, berinavo “Nao, mia Mosis naio bivitauia iliano na bior napano ga pariparimiu nalo abinimei jikili laka, tenene na naruei mila naio mijamo jibe na kar kami kumijikia kuvilalar kouemiu nalo. <sup>6</sup> Mia jikario ea tiiano naio maka tibena, bior napano Atua kanano iliano lu naio berinavo

‘Ea burupati Atua jii tomu nalo, napano sumāno bija tira.’

<sup>7</sup> “A iliano dolu bunu berinavo  
‘Tibena, mia toro tuvan  
karamāno a kenieno,  
naruei riva to rivijurukar vija  
koano,

<sup>8</sup> naruei naljuo abinimei abe takurano ga.’

“Nina naio mila ka naljuo maka bunu ave juo, mia naljuo abinimei abe takurano ga. <sup>9</sup> Mia venia na Atua miasolio binimei be takurano, maka rimemedu ka toro silubar bereio.”

<sup>10</sup> Ana bogo napano nalo aba joomo ea yimo bereio, Yesu kanano naiagagoano nalo abika naio bereio tivelinio na iliano nalo nei. <sup>11</sup> Ana Yesu ber memedu banlo, berinavo “Verenio toro tai titiglar koano, karina naio riva rivuru tira dolu tai, Atua mial jibe toro nei naio jo mila siakaiano ruei, naio mila lelan

bunu tira nei napano naio be koano jukamu. <sup>12</sup> Mia verenio tira tai rivuro den kanano sumāno, riva soro ka toro dolu tai bereio, naio bunu Atua mial ka naio mila siakaiano ruei.”

*Yesu milivu ka kiritete nalo  
Mataiu 19:13-15; Luka 18:15-17*

<sup>13</sup> Naruei tealo aburu kenerilo nalo abinimei ea Yesu ka naio tokollo, ana naiagagoano nalo amialio, naruei amel jikili ban tomu nalo nei aberburelo. <sup>14</sup> Mia bogo napano Yesu mialio, maka saaro leleio ka napano kanano naiagagoano nalo amila jibena, ana naio ber kalo, berinavo “Kami kuverbure re kiritete nalo na, kami kuvijamo kalo amei ea kiniou ga, bior napano kiritete nalo ajibe ka ga tomu nalo napano aju jouro ea Atua kiano nave-natuboiano. <sup>15</sup> Kiniou neber riano ka kami, ka toro napano naio jidom riva jouro ea Atua kiano nave-natuboiano, naio monoka rijikia ka naio javukia kiritete teliki tai ga, naio maka rijikia rila vite tai ka rila ka naio rudu Atua kiano nave-natuboiano nei ea kiano meuliano.”

<sup>16</sup> Ana Yesu bokar kiritete nalo nene, jikario naruei ka naio midu jumāno joa pariparilo ka naio rilivu kalo.

*Meaku tai napano be sanibaiano  
Mataiu 19:16; Luka 18:18-23*

<sup>17</sup> Naruei bogo napano Yesu jo batavio ka riel rivano, toro tai jikiti binimei minie tano ka Yesu, naio bika denio, berinavo “?Naverloglogiano novo, kiniou monoka nala imāuano vaio ka rila ka mia kiniou novokar meuliano nei napano maka rijikia ribisi?”

<sup>18</sup> Ana Yesu ber ka naio berinavo “?Bior vaio ana jau kobio kiniou jibe na kober kiniou nebe naverloglogiano novo? Maka ve toro tai napano be kirinovo to, mia Atua naio ga takurano naio be kirinovo. <sup>19</sup> A jau komijikia bunu kanano tuboiano nalo, napano kito monoka romonea nalo, napano aber jibene

aberinavo: Jau kouebin re toro, jau kola re siakaiano, jau kovina re, jau kala sibi re, jau kojukujuku re toro, jau kavamenea karamamo naio koniomo.”

<sup>20</sup> Ana m̄eaku nene berkanio, berinavo “Naverloglogiano, tuboiano nalo na napano jau koberenio, bogo napano kiniou nebe tete kia ga vo, kiniou nojoma nobokar nonovlo, binimej bokar banej.”

<sup>21</sup> Ana Yesu bitikar naio bano, tinien jii naio toru bior kanano iliano nei, ana naio berkanio, berinavo “Vite takurano ga jo keano vo, napano jau maka kalaio vo. Jau kava kovilivili bulag ka kanamo vite nonovio nalo, ana jau kavaveru na vite nalo nene, jau kava kotiburevure van taliñasa nalo. Ver jau kala tibena, mia jau ve kanamo vite novonovo nalo ve miroano ea tiniabene. Mo, jau kava kalaio, karina komei katakisor kiniou.”

<sup>22</sup> Mia bogo na m̄eaku nei mijog iliano nei, naio miilo va kanio, ana kanano iviso mijog bova toru, bior napano naio be kiano vite miroano. Ana naio jaluvo den Yesu.

*Toro napano be sanibaiano, jikili ka naio rivan ea Atua kanano navenatuboiano*

*Mataiu 19:23-30; Luka 18:24-30*

<sup>23</sup> Naruei Yesu jirarag jeliviv ea naiagagoano nalo, ber kalo, berinavo “?Kiniou neber batitig ban kami, neber ver toro tai napano be kiano vite miroano, mia naio jidom riva jouro ea Atua kanano navenatuboiano, nina naio jikili mia jikili na.”

<sup>24</sup> Mia naiagagoano nalo amiilo toru laka ka Yesu kiano iliano nei, ana naio ber bereio kalo, berinavo “Riano keneriku nalo, ka ava jouro ea Atua kanano navenatuboiano, jikili mia jikili na. <sup>25</sup> Kiniou neber ka kami, ka kamele tai ri vodulu ea bulumirano nitil tai, naio jikili laka, mia ka toro tai napano be kanano vite miroano ka naio rijikia

riva jouro ea Atua kanano navenatuboiano, nina naio kirisikili lie vo.”

<sup>26</sup> Ana bogo na naiagagoano nalo amijog iliano nalo nei, mia nalo amilo toru laka kanio, ana aberinavo “Tomnei! Mia karina, aber mia kei naio mijikia rivokar meuliano?”

<sup>27</sup> Mia Yesu jirarag bitikarlo, berinavo “Toro maka rijikia rilarur toro, mia Atua naio mijikia rila vite nonovio.”

<sup>28</sup> Naruei Pitere naio jidom ril naruei, berinavo “? Mia jumabe ka kumemi? Kumemi numituvan kenememi vite nonovio ruei, ana kumemi nubinimej numitakisorso.”

<sup>29</sup> Ana Yesu ber kalo, berinavo “Kiniou neber riano ban kami, ka toro kei napano naio tuvan kunuano, ðeli kuruano bija kuviviniene, ðeli kenieno bija karamano, ðeli kenerinio, ðeli kiano borotano, rivior kiniou a rivior kanaku ioluano vou nei, <sup>30</sup> mia naio rijev bereio venia naio juvan riva rivokar toromomou ve takurano [100]. Ea yetemeriba nei, mia naio rivokar bereio yimo nalo, kuruano nalo, kuviviniene nalo, kenieno nalo, kenerinio nalo, borotano nalo, mia vija vite nalo nei mia naio rivokar bogokouo nalo ve telabo, napano tomu nalo ajermi ka naio bunu. A mave ka vite dolu nalo nei, ea bogo napano jo binimej, mia naio rivokar bunu meuliano nei napano maka rijikia ribisi. <sup>31</sup> Mia tomu telabo napano ma aju mave vonganei, iorou nalo atu yetano, a nalo napano ma aju yetano vonganei, iorou mia nalo atu mave.”

*Yesu berial kanano m̄ariano varolu nene*

*Mataiu 20:17-19; Luka 18:31-34*

<sup>32</sup> Ana Yesu nalo aju amiel ea m̄arabo, aju abavin Yerusalem naruei. Ana Yesu naio jo miel jukamu ka kanano naiagagoano nalo, mia aju amiilo laka napano naio jo burum̄arabo kalo aba Yerusalem, bior nalo amijikia ka

tomu nalo na vio na ajerñi laka ka Yesu. A nalo dolu naña aju abinimei iorou kalo, nalo bunu aju amermerou kija naruei. Mia Yesu naio bio kanano duelimo ba juo [12] amei vaataro ka naio, ana naio berial bere kalo juñabe mia ala kiki naio yako Yerusalemo.

<sup>33</sup> Naio ber bisivisii banlo, naio berinavo “Kamiu kuviniagago vatitig. Vonganei kito roju rabavin Yerusalemo naruei, napano rivesiou re, mia adu Kulorinio Kenerinio toa tomu na tortoru na kulo lu nalo juñalo nalo vija naverloglogiano na tuboiano, naruei mia nalo na atibure naio ka mia naio monoka riñaro. A mia adu naio toa kulo Romo nalo juñalo, <sup>34</sup> naruei nalo na mia ayotel va ea naio, avule mirano, mia avitiv naio, rivan mia auebinio riñaro. Mia ka bogoti ve tolu nene, mia naio rimeul bereio.”

*Yemesi naio Jone naljuo abika titai den Yesu*

*Mataiu 20:20-23*

<sup>35</sup> Ana nalo aban lie telisu bereio, ana Sepeti kenerinio juo nei Yemesi naio Jone, naljuo abinimei vaataro ka Yesu, ana abika denio, aberinavo “Naverloglogiano, kumemi juo numisidom ver venia na mia kumemi ve juo nuvika denso vonganei, mia jau kotuvan van kumemi juo ga.”

<sup>36</sup> Ana Yesu berdoŕe ban naljuo, berinavo “? A kamjuo kumisidom kuvika ka mia kiniou nela vaio ka kam ve juo?”

<sup>37</sup> Ana nalo abe juo aberdoŕeio, aberinavo “Kumemi juo numisidom ka kajamo ana ver bogo napano jau komei tibe parinio tubo ea yetemeriba nei, mia kumemi juo numijikia nuvitutano ea kiamo vio lu vaataro kaso, tai toa juñamo meruo, a tai ea mali.”

<sup>38</sup> Ana Yesu ber ka naljuo, berinavo “Kamjuo maka kuvijikia tena kamiu kumitu kubikanio? Juñabe, kamjuo na kumisidom ka kamjuo kubare ka romunu vio takurano

ea baja na jogvaiano na mia kiniou monoka nomunu eaio? Peli kamjuo kuber kamjuo kumijikia kuvidu varueiano napano abaruei ea kiniou kanio?”

<sup>39</sup> Ana naljuo aber ka naio, aber “Ee, kumemi juo nubare.”

Ana Yesu ber ka naljuo, berinavo “Ee, be riano ka mia kamjuo kumunu ea kiaku baja na jogvaiano, a be riano bunu ka mia avaruei ea kamiu ka uei napano abaruei ea kiniou kanio, <sup>40</sup> a vite na kamiu kubika na, ka kam ve juo kuvitutano vija kiniou, ea tivelinio ve juo na kiniou, tena maka ve kiaku ka mia nejikia notuvan van kamjuo. Vio nalo na jibe na, nalo ga na Karañaku mila vatitigio kalo, a napano naio berkar ruei ka mia nalo atutano ealo.”

*Kulorinio Kenerinio binimei ka riñau tomu nalo kialo*

*Mataiu 20:24-28*

<sup>41</sup> Mia naiagagoano duelimo dolu amijog tenei napano kurualo juo nei Yemesi naio Jone abikanio, ana nalo tiniel jerlo abe juo. <sup>42</sup> Ana Yesu bio nalo abinimei ka naio ril vanlo, ana naio ber kalo, berinavo “Kito romijikia ruei tomu nalo kialo bajago napano maka amonea Atua. Kito romial ka tubo nalo bija tomu nalo na tortoru ea vio yetemeriba nei, nalo aju ajututua tomu nalo dolu ka atu yetano ka nalo bogo nonovio. <sup>43-44</sup> A kiaku naiagagoano nalo kenemiu bajago monoka tibena re. Verver kamiu tai sidom ka rimeu rive toro na toru tai ŕeli naio rimeu rive kenemiu toro na vurin̄araboiano tai, kiano marabo jibe nei. Toro na monoka rimeu tibe toro tai ga na riñau kenemiu. <sup>45</sup> Kulorinio Kenerinio mila jibena ruei, na naio maka rimeu ka tomu nalo aija naio, mia naio binimei ka rijai tomu nalo a ka rijamo ka kiano meuliano ka rivulu bulag tomu ve miroano.”

*Yesu milarur merebono tai*  
*Luka 18:35-43*

<sup>46</sup> Ana Yesu bija kiano naia-gagoano nalo abinimei aju Jeriko, ana iorou, bogo na nalo ajumã abanvan ea komeli nei, tomu miroano ajakisorlo. Nalo aju amiel abano, ana merebono tai naio jomã jotano ea ikinãarabo tivelinio ea vio nei. Toro nene, karamãano siano Timeas, ana nalo abio kenerinio nene ka Batimeas. Batimeas nene, naio jomã jotano ea mãarabo bogo nonovio ga, naio jo bio ban tomu nalo ka nalo aje veru ve teliki van naio ka rimeul eaio.

<sup>47</sup> A bogo na mijog ka Yesu na vio Nasarete nei naio jo miel ea mãarabo binimei, naio jo bio, berinavo “Oi Yesu, jau Teviti kiano bajulukuti! Kiniou nojidom tiniem riia kiniou beamu.”

<sup>48</sup> Ana tomu nalo dolu amil tiniemimi ban naio, aberinavo “!Ei, jau koyotuba re!”

A naio jo bio mave lie, berinavo “Oi Tubo, jau Teviti kiano bajulukuti! Neber bo kaso tiniem riia kiniou!”

<sup>49</sup> Ana Yesu binimei jikili joa vio nei, ber ka tomu nalo ber avio toro napano na rimei vaataro ka naio, ana nalo aba aber ka merebono napano, aber “?Ei, komijikia vaio?”

Ana toro neibano ber “Venia?”

Nalo aber “Yesu nei naio berenio jau komei vaataro ka naio beamu vo. Bo ga, jau kotumolu kito ravano.”

<sup>50</sup> Ana toro napano naio miyalar mãano kulukoti, naio jumolu soḡeli ga, ana binimei ea Yesu. <sup>51</sup> Mia Yesu bika den naio berinavo “?Ana jau kojidom mia nala vaio kaso?”

Mia toro nei berdoḡe, berinavo “Tubo, aua, kiniou nojidom ka kala miraku nalo rimei rivu, ka kiniou nejikia nesirarago.”

<sup>52</sup> Mia Yesu ber kanio, berinavo “Bo, jau komijikia kavan bere ea kiamo vonuo, kiamo viekouoiano naio mila na jau kobinimei bo ruei.” Mia toro nei naio mial vatitig vite ea aura nene ga, mia naio jo mieliel ea mãarabo, naio jo jakisor Yesu bano.

## 11

*Yesu binimei bokar vio nei Yerusalemo*

*Mataiu 21:1-11; Luka 19:28-40; Jone 12:12-19*

<sup>1</sup> Vonganei, Yesu nalo abini mei vaataro ka Yerusalemo naruei, ana beamu kanio, nalo amiyotuba ea komeli juo nalo na terteliki nei, Betevas bija Betani, napano nalo aju tivelinio ea suku nei napano ajisia ka Suku na Buruolivi. Ana Yesu miila kiano naiagagoano juo, berinavo <sup>2</sup> “Kamjuo kuvan ea komeli yako na, mia memedu ka bogo na kam ve juo kuva jouro eaio, mia kuvial kirikiti togki tai, napano amiadikario ju, napano toro maka lele totania kija taakano vo. Mia kam ve juo kuvijubarlar sano teli, ana kuvuruio rimei bereio van kiniou ea vio nei. <sup>3</sup> A verver toro tai ril rivan kamiu kanio, rivika riverinavo ‘? Kamiu kumila jibe na ka venia,’ mia kamiu kuver ka naio, kuverinavo ‘Tubo naio jidom temeul nei, a mia naio riila rimei bereio ea vio nei vesiou re.’”

<sup>4</sup> Ana naiagagoano juo nei abano, ana aba amial kirikiti togki nene, napano amiadikario, naio jumolu ju ju tavio ka mãaratavo na yimo tai tivelinio ka mãarabo. Ana naljuo ajidom ka ajubarlar sano teli, <sup>5</sup> mia nalo napano ajua vio na, abika aberinavo “?Oi, kamiu kumitu kumila venia na, na kumitu kumijubar bulag teli nene na?”

<sup>6</sup> Mia naljuo aber kalo iliano nalo na Yesu ber kalo ruei, napano mia nalo amijikia averii ka tomu nalo, ana tomu nalo amijamo ka naljuo amijikia avuru togki riva rivu ga. <sup>7</sup> Ana naljuo aburu togki nene binimei, ana nalo abisi m̃alo kulukoti nalo ea taakano, ana Yesu bavin jotano mave eaio. <sup>8</sup> Ana tomu nalo miroano amiya bulag m̃alo kulukoti nalo abisi ea mãarabo, a nalo tealõ aba aje m̃amãali nalo, abar abulan ea mãarabo ka togki naio rijikia riel eaio. Jibe na, nalo amila ka avatove ka Yesu jibe ka naio be tubo tai

na toru laka. <sup>9</sup> Ana nalo amiel ka abano ka ava jouro Yerusalemo, a tiniobi nalo napano aban jukamu ka Yesu, bija nalo napano iorou ka naio, nalo aju amiaga laka jibe nei, nalo aberinavo

!Bo mia bo laka! Roiovu ka naio!

!Atua Soři jau keilivu ka naio nei napano binimeia eamio!

<sup>10</sup> ! Kito rajaaro toru ka Nave-natuboiano na kiado tormoruo Teviti nei napano joa binimeia!

Kamiu nalo na tiniabene mave kuviovu bunu ka naio!

<sup>11</sup> Ana Yesu ba jouro yako Yerusalemo, a naio ba bokar Atua Kunuano Lu. Ana naio ba joomo, ba bitii vio nalo nene, a vite nalo nonovio napano amila eaio. Ana mřenio jo batove ruei, mia naio buru kiano naiagagoano duelimo ba juo [12], ana nalo ajaluvo ea komeli na toru nei bereio, nalo aba amon Betani.

*Buruiesi tai na maka rivar mřarati vo*

*Mataiu 21:18-19*

<sup>12</sup> Ana kavijova, nalo ajaluvo Betani bereio, nalo amiel abinimeia bereio Yerusalemo, ana Yesu naio mijog vitu. <sup>13</sup> Ana naio bitii buruviki tai jo, ana naio miel ba vaataro kanio ka rivar mřarati tealoo. Mia bogoo na naio binimeia mialio, naio mial ka buruviki nene, mřati telaboo, a maka ve mřarati, bior maka ve bogoo nene vo. <sup>14</sup> Ana Yesu naio mil ban buruviki nene, berinavo “Jau, mia jau maka leleio kejikia kavar mřarati bereio ka tomu nalo ajikia asenio.” A kiano naiagagoano nalo amijog bunu ka naio ber iliano nei.

*Yesu naio mijil dedade ea nalo namřa aju ařilřili ka saba ea Atua Kunuano Lu*

*Mataiu 21:12-17; Luka 19:45-48; Jone 2:13-22*

<sup>15</sup> Ana Yesu nalo aba abokar Yerusalemo bereio, ana nalo aban bereio joomo ea Atua Kunuano Lu. A Yesu bitii bereio ka tomu nalo miroano ka nalo aju tivelinio ka yimo, nalo aju amimřauka imřauano

nalo na ka ajev veru eaio, a tomu miroano aju abulu saba nalo na aju ařilřili kanio. Ana naio maka leleio saaro kanio, naio ba mijil bulagloo, bilig dea ka barobaro nalo napano nalo aju mřa amijebukua veru nalo na vio Romo binimeia ea veru na kulo Ju nalo kialoo, napano nalo aju mřa ajuvanio ea Yimo Lu. A ba bunu buku bulag kialoo iesi na totaniano na nalo aju ařilřili ka sibo na sida.

<sup>16</sup> A naio berbure bunu nalo namřa aju ajidom avar kialoo saba nalo na imřauano ka aiel avarkorov yati na Yimo Lu nei.

<sup>17</sup> Ana naio berloglogloo, berinavo “?Jumřabe, kamiu maka kuvijikia ka Atua berial ea kiano Iliano Lu, ber

*‘Mia nalo aver kiaku Yimo Lu naio be yimo na volkouano na taara nonovio na tomu nalo na yetemeriba reraio?’ Ais 56:7*

*‘A mia kamiu kumitu kubilig Yimo Lu nei ruei ka rimeia tibe buluvae tai na vinauano.’” Jeremaia 7:11*

<sup>18</sup> Ana maka vesioo tomu nalo na tortoru na kulo lu bija naverloglogiano nalo na tuboiano, amijog venia na Yesu naio mila ruei ea Atua Kunuano Lu, mia nalo tiniel mimi laka, nalo ajidom ala titai kanio. Mia nalo amerou laka ka Yesu, nalo maka bunu ala, bior nalo abitilubar ka tomu nalo ajidom laka ka naio, nalo aju amiilo ka kiano verloglogiano novo nalo. <sup>19</sup> Mia ka bogoo na mřenio jo batove ruei, Yesu nalo ajaluvo Yerusalemo bereio.

*Bulabati iesi na maka rivar mřarati naio rimřaro nonovio*

*Mataiu 21:20-22*

<sup>20</sup> Mia kavijoo, nalo aju amiel abano Yerusalemo bereio, ana amial bereio buruviki napano beamu na, ana nalo amial ka vonganee mřati nalo mekekeu binuu ruei. <sup>21</sup> Ana Pitere naio jidomii bereio Yesu kiano iliano, ana naio ber ka naio, berinavo “Tubo, jau keial vo! Buruviki nei napano jau komil banio niovo, vonganee naio binimeia mekekeu nonovio ruei!”

<sup>22</sup> Ana Yesu berdoĝeio, ber kalo, berinavo “Kamiu monoka kuvitu sikili vija Atua. <sup>23</sup> Kiniou neber beriano ban kamiu, ver toro kei na maka kiano jidomiano veve juo, a monea kirisikili, ana venia na naio berenio, mia monoka tibe na ga. Verver naio ril van burusuku na toru nei, river kanio riverinavo ‘Jau kavatove koviako ea tei,’ nina, mia monoka tibe na ga. <sup>24</sup> Nina naruei kiniou neber ka kamiu, ka venia na kamiu kumitu kubika ea kene-miu volkouano, verver jau komonea sikili ka tena be kiamo ruei, bo, mia monoka tibe na ga naruei. <sup>25-26</sup> A ea bogo nonovio na kamiu kuvisidomii ka kubolkouo, kamiu monoka tiniemiu maio ka bunu, ka ver titai joaso bija toro dolu, monoka koviekoko beamu, karina jau komijikia kotumolu koverialio ea kiamo volkouano nene van Atua. Verver jau kala tibena, mia Karamado na tiniabene, naio bunu mia sidomii ka riviekokoaso ka kiamo vovaiano nalo.”

*Navurimāraboiano nalo na Israel nalo ajidom averbure Yesu*

*Mataiu 11:23-27; Luka 20:1-8*

<sup>27</sup> Ana Yesu nalo amiel abinimej abokar bereio Yerusalemo, ana nalo aba jouro ea burusio na Atua Kunuano Lu bereio. Ana bogo napano nalo aju amiel jouro, tomu nalo na tortoru na kulo lu nalo, bija tomu na verloglogiano na tuboiano, bija tomu na vurimāraboiano na kulo Ju kialo, nalo abinimej ea naio. <sup>28</sup> Nalo abika naio, aberinavo “‘Jau kojo komila jibena ea vio nei ea kei siano? Peli kei bereio na berii kaso ka jau kala tibena?’”

<sup>29</sup> Ana Yesu naio ber kalo, berinavo “Bo ga, a kiniou bunu nojidom nevika vikadeniano tai van kamju beamu. Verver kamju kuverdoĝe kiaku vikadeniano nei rivu, mia kiniou neverial van kamju jumabe ana kiniou nemijikia nemila jibe nei. <sup>30</sup> Bo ga, kiaku vikadeniano naio jibe nei naruei, berinavo ‘Baruei nei na

Jone naio mila von nua bogobe ka tomu nalo, naio be titai na Atua ber ka Jone ka naio rilao, ĥeli tomu nalo ga nalo aber ka naio? Kamju kuvilavon ka kuverdoĝe kiaku vikadeniano nei.”

<sup>31</sup> Mia Yesu kiano vikadeniano nei naio mila nalo abilvili ealo bereio, nina nalo aju aberinavo “‘Mia kito rover tumabe ka naio? !Rovitkar batitig kito nei! Verver kito rover varueiano nene Atua naio ber ka Jone, mia toro na monoka rivika den kito river ka venia na kito maka romonea Jone. <sup>32</sup> Ana kito maka rejikia rover bereio Jone kiano varueiano nene naio miyotuba ea tomu nalo kialo jidomiano ga, ka ver maka mia tomu nalo tiniel ser kito!’”

Tomu nalo na tortoru nei nalo amerou ka aver iliano nei, ka nalo amijikia ka tomu nalo aju amonea Jone jikil ruei ka naio be Atua kiano naverialiano tai na be riano. <sup>33</sup> Ana kialo jidomiano nalo jibe nei mila nalo aberdoĝe Yesu jibe nei ga, nalo aber ga “Kumemi maka nuvijikiaio.”

Ana Yesu ber ka nalo neibano, berinavo “Jumabe, mia kiniou bunu, kiniou maka nejikia nover ka kamju kei naruei naio ber ka kiniou ka nala imāuano nalo nei.”

## 12

*Jamerijiano na tomu va nalo namā abitkar jiotilikrevi tai*

*Mataiu 21:33-46; Luka 20:9-19*

<sup>1</sup> Mia bogo na Yesu naio jo berlogloglo, naio jo berii jamerijiano banlo bogo nonovio. Jamerijiano tai naio ber jibe nei, naio berii toro na toru tai, bija kiano jiotilikrevi tai. Toro nene naio mināuka vatitig ka kiano vio nene, naio mila burusio tai jikili jeriko tivelinio nalo biniu, ana naio mila vio tai ka rivie bulag vati mārkrevi, a naio mila bunu kanano burutili vio tai ka avoio avavin atu mave eaio ka asiraragkuku ka jiotilikrevi nei. Mia bogo tai, toro na toru nei naio jidom riel kiki kija rivan ea buruvenuo dolu nalo, ana

naio juvan kanano jiotilikrevi nei ban kulo dolu nalo tealó, ka nalo amei aimãau eaio, nalo avuluio van naio.

<sup>2</sup> Naruei toro na toru nei naio ba jo laka-o, karina naio mial ka vonganei be bogó na m̃ariesi nalo ameruo naruei. Ana naio miila kiano toro tai ban bereio, ka rivar veru na m̃arati krevi nene togio ve kiano, nina monoka avario van naio. <sup>3</sup> Ana bogó napano naio ba miyotuba kean nalo nei, nalo amue niegeniege naio bova laka, ana nalo amijil deven naio ban bereio naruei naio maka rivar titai leleio. <sup>4</sup> Mia tubo nei naio miila kiano toro dolu bano, mia nalo nei amueio, bar ja ea parinio, nalo amila bova toru banio bano-o nalo amijil lar naio ban bereio.

<sup>5</sup> Karina naio miila bereio tai, nalo amuebinio m̃aro, a iorou kanio naio miila kiano tomu nalo miroano nalo abano, a nalo aju ajukulo a amuelo bunu nalo am̃arm̃aro ga. <sup>6</sup> Naruei toro na toru nei naio mial ka toro ga takurano naio jo naruei, nina be kenerinio memedu na naio tinien jii m̃elea naio, ana naio jidomii banbano na berenio “Vonganei, monoka neiila keneriku ga naio rivano, mia nalo monoka avamenea naio.”

<sup>7</sup> “Ana bogó na kulo va nalo nei amial toro na toru nei kenerinio binimeí, nalo aju aberverii kalo, aberinavo ‘Nina be toro na toru kenerinio na. Toro na naruei, napano verver toro na toru rivakovio, mia naio naruei rudu tanobuku nei tibe kanano jajum̃ano. Bo ka rouebin bunu naio rim̃aro, ka mia kito ga rojikia rovokar tanobuku nene ve kiado.’ <sup>8</sup> Tibe na naruei, nalo aba abokakar naio kirisikili, nalo amuebinio, ana nalo abukuio batavio ea jiotilikrevi nene.”

<sup>9</sup> Naruei Yesu naio bika denlo, berinavo “?Bogó na toro na toru na jiotilikrevi nene mia naio rimeí bereio, mia naio rila tum̃abe ka nalo na aju amim̃au ea kanano jiotilikrevi? Tomu nalo bova nei, mia naio rimeí ruebinvin nalo am̃arm̃aro ea bajago tai na jikili, a mia naio rudu kiano jiotilikrevi

rivan kulo dolu na bo.” <sup>10</sup> Naruei Yesu ber kalo, berinavo “Iliano tai ea Atua kiano Iliano Lu napano naio ber jibe nei, berinavo

*Veru na, tomu nalo na amim̃auka yimo aberinavo naio bova, ana nalo abuku ban ruei, mia vonganei veru nene binimeí be veru tai napano bo ka toa sudu na yimo, ka naio rivokar yimo sikili.*

<sup>11</sup> *Tena, Atua ga naio mila, a kumemi numial jibe ka bo mia bo.” Iouano 118:22,23*

“?Ana jum̃abe naruei, iliano na kamiu kumijikia ruei, a p̃eli kamiu maka kuvulukuio kija bogó tai?”

<sup>12</sup> Mia bogó na Yesu berii jamerijiano nei bisi, mia nalo na tortoru abitilubar ka naio ber iliano na jibe na ka kialo bajago, ana nalo tiniel mimi, mila nalo aju ajidom alavon ka avokar naio sikili to, karina nalo amial tomu miroano laka, ana nalo amerou kalo, ana nalo ajuvan naio jo, nalo aju koalabo den naio ga.

*Vite na be Atua kanano, a vite na be Sisa kanano Mataiu 22:15-22; Luka 20:20-26*

<sup>13</sup> Mia tomu nalo na tortoru aba abitii tenei, mia nalo amiila Varisis tealó bija Erot kiano burukuti tealó abinimeí, ka alavon ka avika vikadeniano tealó na jikirikili ka alavon Yesu kanio, napano mia naio maka rijikia ka riverdopeio. <sup>14</sup> Mia nalo abinimeí ea Yesu, amila sibilili naio ka iliano novo nalo, nalo aberii “Naverloglogiano, kumemi numijikia ka jau kobe riano garuei. A jau, jau maka koto komerou ka toro, ka toro na jo loa nalo dolu p̃eli toro na toru p̃eli na jum̃abe, a jau kojo koberial memedu Atua kiano m̃arabo ka tomu nalo abiniu. Mia kumemi numisidom nuvika denso tibenei, kiado tuboiano naio ber jum̃abe? ?Naio berii memedu ka kito kulo Ju rovulu takis van Parinio Tubo Sisa nei na Romo, p̃eli naio ber maka rimemedu? <sup>15</sup> Bo ka rovulu takis nalo p̃eli na makanio?”

Ana Yesu naio mijikia ka aju abivika sibusibi ga, nalo ajidom ala bulag naio ga, ana naio berkalo, berinavo “?Ee, kamiu kumitu kumisidom kuvilavon kiniou tibe na ka vaio? Bo, kuvidu veru tai rimeĩ ka nevitio.”

<sup>16</sup> Ana nalo amidu tai binimeĩ banio, ana naio bika denlo, berinavo “?Mirano toro kei nei joa veru na teliki nei? ?A sio na abivitaũia joaio, naio be toro kei siano?”

Nalo aberenio “Parinio Tubo Sisa mirano na, a siano bunu.”

<sup>17</sup> Ana naio ber kalo berinavo “Bo ga, vite na be Sisa kiano, kamiu monoka kuvar van Sisa, a vite na be Atua kiano, kamiu monoka kuvar van Atua.”

Mia bogo na amijog verdoŕeiano nene, nalo amiilo va laka.

*Tomu nalo na aĩarmĩaro mia nalo ameul bereio*

*Mataiu 22:23-33; Luka 20:27-40*

<sup>18</sup> Mia iorou kanio, ana Satusis tealo abinimeĩ ea Yesu, napano nalo ajidom avika den naio tivelinio na vite tai napano nalo amonea kirisikili eaio, napano tomu nalo na aĩarmĩaro, nalo maka bunu ajikia ameul bereio ea bogoti na maaro. Nina naruei nalo abika den Yesu, nalo aberinavo <sup>19</sup> “Naverloglogiano, kumemi numi-sidom nuvika denso, ka jumĩabe ka iliano tai na tormoruo Mosis naio bivitaũia be kiado beamu nua. Naio berinavo ver toro tai, kuruano naio mĩaro den koano tira, na nalo maka ve kenerilo tai vo, mia toro na monoka rivuru taanou nene ve koano. Ana verver tira nei rivar tete, nalo amijikia asisia naio takii karamĩano na mĩaro ruei, ka siano rimeul to. <sup>20</sup> Mia ea bogo tai, tomu aluo na abe kurualo. Nana beamu laka kalo naio buru koano tai, a mia naio mĩaro den koano napano naljuo maka avar kiritete tai vo. <sup>21</sup> Karina kurualo juo nene naio buru tira neibano, karina naio bunu mĩaro denio, na maka ve kenerinio, a iorou kurualo tolu nene naio bunu mila jibe na, <sup>22</sup> banbano-o bokar kurualo aluo nene, nalo nonovio amila jibe

na ga, nalo aĩarmĩaro den tira nene. A iorou ka koano surĩano nalo nei napano abiniu aĩarmĩaro ruei jibe na, tira nene naio bunu mĩaro. <sup>23</sup> Mia jau kover von tenei? Ea legiano na maaro, bogo na mia atu aver ka mia tomu nalo amemeul bereio, mia tira neibano ve kei koano, ka napano naio joro ka tomu aluo napano abe kurualo ruei?”

<sup>24</sup> Mia Yesu naio berinavo “Makanio, kenemiu jidomiano na naio ba kirivova laka. ?A ŕeli kamiu maka kuvijikia venia mila kenemiu jidomiano bova jibe na, a? Nina ka maka kuvijikia venia na Atua kiano iliano lu berenio, a kamiu maka kuvijikia venia bunu kiano moroano na toru rijikia rilaio.

<sup>25</sup> Bogo na tomu nalo amemeul bereio, mia nalo atibe ka nailiano nalo na tiniabene ga, ana mia nalo maka bunu ala tenei soriano. <sup>26</sup> A ea tivelinio na ameul bereio nei, kiano iliano jo ruei ea niosi na Mosis bivitaũia, napano naio berii iesi na teliki napano sebi jijenio, na Atua mil ban Mosis, berinavo

*‘Epraamo, Aisak, a Yakovo, kiniou nebe kialo Atua.’*

“?Vede kamiu maka kuvuluku iliano nei kija bogo tai, <sup>27</sup> ana mia kiniou never bisivisii van kamiu ka rivuririi kenemiu jidomiano nalo. Nalo tolu nei aĩarmĩaro ea yetemeriba nei bogo be nua ruei, mia yuka telabo barlaka ruei karina Atua naio ber vonga iliano nei, ber naio be kialo Atua. Tibena, kanano iliano nei berenio nalo tolu nei aĩarmĩaro ea yetemeriba nei, mia nalo aju ameul ea naio kiano vo. Atua naio maka sidom ka kiano tomu nalo ave tomu nalo na aĩarmĩaro ga, mia naio jidom ka rive Atua ka tomu nalo napano amemeul.”

*Tubeiano juo na tortoru*

*Mataiu 22:34-40; Luka 10:25-28*

<sup>28</sup> Naruei naverloglogiano na tubeiano nalo tai binimeĩ jikili ju bunu ka bogo nei, mia naio jomĩa mije tiliniene ka napano Satusis nalo

ajumã ajidom ka alavon Yesu, mia Yesu naio jomã juvululo ea kiano verdoŝeiano novo nalo. Naruei naverloglogiano nei naio be tiniene ka naio kija, mia naio bika den Yesu, berinavo “?Ea kiado tuboiano nalo, nana vabe nene naio bo lie loa laka juvulu nalo dolu nalo?”

<sup>29</sup> Naruei Yesu berkanio, berinavo “Iliano Lu naio ber jibenei, berinavo ‘Tomu nalo na Israel, kamiu kumije tiliniemi.

Atua Soŝi, kiado Atua, naio takurano be Atua Soŝi.

<sup>30</sup> Atua Soŝi napano be kiamo Atua, jau monoka tiniemo tii naio ka kiamo iviso momou, ka kiamo meuliano momou, ka kiamo jidomiano momou, a ka kiamo moroano momou.’

<sup>31</sup> “Nina naruei naio be moti, a juo nene, naio ber jibe nei, berinavo

‘Jau tiniemo tii nalo napano aju vaataro kaso, jau kovijuku rivu kalo, tavukia napano konomã tiniemo jiiso.’

“Mia maka bunu ve tuboiano dolu tai bereio napano naio loa laka ka juo nei.”

<sup>32</sup> Naruei naverloglogiano na tuboiano nei naio berdoŝe, berinavo “Riano ga naverloglogiano, jau kober memedu ga. Jau kober be riano, ka Toro na Toru naio takurano ga, maka ve dolu tai.

<sup>33</sup> “Mia jau kober be riano bunu, ka kiniou monoka tinieku tii naio vija tinieku momou, a vija kiaku jiki-aiano momou, a vija kiaku moroano momou, a kiniou monoka tinieku tii nalo napano mã aju vaataro ka kiniou, tavukia napano tinieku jii kiniou kiniou takurano. Be riano na, ea Atua kiano vitiano, ver kito rala tibe na, nina naio jo mave laka, naio bo laka ka sida nalo napano mã kito roju romilaio ea Kunuano Lu.”

<sup>34</sup> Mia Yesu mijog kiano verdoŝeiano naio bo, naio be masou, naruei naio berkanio, berinavo “Kiniou neber kaso, neberinavo, jau kojo vaataro ruei, ka mia jau kava

jouro ea Atua kiano navenatuboiano navo.”

Ana mia iorou ka bogo na, maka bunu toro tai rila vonvon Yesu ea vikadeniano bereio.

*Naverikariano naio be tormoruo Teviti kiano Atua*

*Mataiu 22:41-46; Luka 20:41-44*

<sup>35</sup> Ana iorou, Yesu jomã berloglog tomu nalo joomo ea Atua Kunuano Lu, karina naio kija bika vikadeniano tai denlo. Naio bika, berenio “?Kiniou nomijikia ka naverloglogiano na tuboiano ajumã aberloglog kamiu, mia kiniou nojidom novika ka bior vaio ana ajumã aberenio Naverikariano naio monoka riyotuba ea tormoruo Teviti nei kiano yati, napano naio be Parinio Tubo beamu. <sup>36</sup> Kiniou nebika nina, bior napano beamu, Niununo Lu naio binimeia ea Teviti, mila na naio mil berinavo

*‘Atua Soŝi naio ber ka kanaku Tubo, berinavo*

*‘Jau kototano tivelinio vameruo na kiniou, jau kotororea rivano-o mia kiniou novuru kanamo uolu nalo amei ave madayebe tai tena kovijankon jaamo eaio.’”* *Iouano 110:1*

<sup>37</sup> “Ea vio na kito romialio ka napano Teviti naio jomã bio Naverikariano nei naio be kiano Tubo ruei. Naruei bior Teviti naio ber jibena, jumãbe ana ajumã aberinavo mia Naverikariano nene mia naio riyotuba ea Teviti, be kiano yati ga?”

Mia burumãara tiniobi napano aju ka bogo na, ajidom m̃lea verloglogiano na jibe ka Yesu kanano, nalo amije tilinielo toru laka eaio.

*Yesu naio mil jikili ban navurimãaraboiano na lotuano nalo*

*Mataiu 23:1-36; Luka 20:45-47*

<sup>38</sup> Mia bogo napano Yesu jomã berlogloglo, naio jo jokol bunu bajago na m̃rouano na kialo navurimãaraboiano. Naio berinavo “Kamiu kuvitikar kamiu ka naverloglogiano na tuboiano nalo. Nalo abarvar kalo m̃lea ka kialo burutili kulumãarauo nalo na, mia verenio amiel ea vio

na vioruru, nalo ajidom ka tomu nalo monoka avatove kalo, a avio batitiglo aver 'Naverloglogiano, kav-ijo bo!' <sup>39</sup> A ea bogo na jokoluolu a joomo ea yimo na volkouano bunu nalo ajidom dañariga nalo atutano ea vio na tomu na tortoru jelelo ga. ?Kamii kubitilubarlo ruei, a? <sup>40</sup> A ajumã aburii kialo volkouano terebievi laka, mia ajumã amila sibi ga, bior bogo nene kia ga, nalo ajumã amijukujuku taanou nalo ka amijikia avina ka kialo saba nalo. Naruei bior kialo bajago nalo na, mia kialo mauo nene mia naio sikili lie vo."

*Taanou tai jian veru sesa tai ban Atua*

*Luka 21:1-4*

<sup>41</sup> Naruei iorou kanio, Yesu mijian naio ba jotano vaataro ka vio namã abuku ijaiano na Yimo Lu nei, mia naio bilig pariparinio bitivitii tomu nalo namã ajuvan kialo ijaiano. Naruei naio mial tomu telabo napano abe sanibaiano, nalo abar kialo burumãara ijaiano nalo abinimej, ajuvanio. <sup>42</sup> Mia karina naio mial bunu ka napano tiramoruo tai naio binimej, naio be taanou ga tai, a naio be talimãasa laka. Naruei naio bar veru sesa subaier juo binimej naio jian ban Atua.

<sup>43</sup> Naruei Yesu bio kiano naiagagoano nalo ka amei ea naio, naruei naio mil banlo, naio berinavo "Kamii kumial tiramoruo na, napano naio juvan veru sesa juo na? Kiniou neber be riano ka kamii, ka naio jian loa, naio jovulu ijaiano dolu nalo nonovio napano na sanibaiano nalo ajuvanio. <sup>44</sup> Nalo na, be kialo burumãara puruveru nalo, mia amije bena ga torogio nene, mia taanou nei, kiriveru teliki na naio bokar jo ka mia rijai kiano meuliano, naio jian nonovio ban Atua."

### 13

*Yesu berial ka mia aue bulag Atua kunuano lu*

*Mataiu 24:1-2; Luka 21:5-6*

<sup>1</sup> Mia Yesu naio jaluvo den Atua Kunuano Lu, mia bogo napano naio jomã miel bano, naiagagoano nalo tai naio jiloglog burumãara yimo nalo na Yimo Lu nei, ana berinavo "Naverloglogiano, jau keialio! Yimo nalo na bija salo puruveru nene nalo romial lo amieg kirinovo laka, a!"

<sup>2</sup> Ana Yesu berkanio, berinavo "? Jau komial yimo nalo na tortoru na? Mia iorou kanio mia ve re salo puruveru nene nalo atu batitig ea jeleigio, bior mia tomu tai, mia amei auebulag lelan nonovio yimo nalo na aviniu."

*Jaleleano mia monoka rimej Mataiu 24:3-14; Luka 21:7-19*

<sup>3</sup> Ajumã amiel jibe na, abinimej ea Suku na Buruolivi Nalo, nina naio jo jirarago ban ea Yimo Lu, ana Yesu naio jotano ea vio na. Ka bogo napano maka ve kulo dolu nalo atu, a naiagagoano ver abinimej ea naio, nina be Pitere, Yemesi, Jone a Andru. Naruei nalo abika denio, aberinavo <sup>4</sup> "?Mia auebulag Yimo Lu na nagi, a venia naruei mia naio rila vite nalo nei monoka amalmaluvo?"

<sup>5</sup> Ana Yesu mil banlo naruei, naio berdope, berinavo "Bo ka kamii kuvitkar vatitig kamii rivu, ka mia ve re toro tai rimej rila sibilili kamii, <sup>6</sup> bior mia tomu ve telabo napano mia adu siaku, ana mia amei averinavo 'Kiniou nobe Naverikariano nene,' naruei mia avuru tomu ve telabo aiel vovu. <sup>7</sup> Ana ver ea bogo na, mia kamii kuvijog uetubaiano na mira naio jo binimej vaataro, peli na kamii kuvijog lilianiano na burumãara mira nalo napano mã aju koalabo, mia kamii kumemebiju mlea re. Vite nalo nei monoka amalmaluvo beamu vo, mia nina maka ve legiano na maaro nene navo. <sup>8</sup> A mia parinio tubo nalo, mia ala mira ka parinio tubo dolu nalo, mia buruvenuo nalo mia atumolu ka buruvenuo dolu. Mia vio reraio ea yetemeriba nei, mia mii rikulkulu ve toru, a mia ve burumãara bogo na vitu bunu, mia vite nalo na, maka ve Legiano na

Maaro nene navo. Vite nalo na naio jibe ka ga napano tira napano mābono, naio mijog dovorovo ka taakano mijalele garuei be moti ka rudu kenerinio, mia burumāra jaleleano nei naio maka navo.

<sup>9</sup> “A kamiū monoka kuvitkar vatitig kamiū rivu, bior ka napano tomu nalo mia avuru kamiū ea komeli nalo p̄eli ea kialo yimo na volkouano ka mia ail van kamiū, naruei mia atibure kamiū p̄eli mia avitiv kamiū. Mia monoka avuru kamiū kuva kuvitu kamu ea mirano tomu na tortoru na buruvenuo nalo rivior ga kamiū kube kiaku naia-gagoano, ana ea bogo na kamiū kumijikia kuverial kenemiū moneano ea kiniou kamu ka miralo. <sup>10</sup> Ana Ioluano Vou, mia aioliolu kanio van taara nalo na tomu nalo na yetemeriba nei beamu vo, karina mia vite nalo nei amijikia amalmaluvo. <sup>11</sup> Ver nalo amei avokakar kamiū, ka avuru kamiū kuvan ka atibure kamiū, mia kamiū kuvisidomii bijovijon re laka, verenio ‘?Mia kiniou never vaio vanlo?’ Mia kamiū kuverial ga iliano vaio napano mia Niununo Lu naio sian rivan kamiū, rimonloglog bogo napano mia kamiū monoka kuvil, bior ka napano mia ve re kamiū napano kuvil, mia naio rive Niununo Lu napano mia naio ril moluo ea kamiū.

<sup>12</sup> “Ea bogokouo na, mia toro mijikia rijamo ka tom na bova dolu nalo nei amei avuru bulag kuruano rimemedu p̄eli na kenerinio memedu, ka auebinvinlo amārmāro, nina kar ga napano amonea kiniou. A mia kiritete nalo amijikia atumolu bunu ka averial keniele nalo a karamālo nalo napano amonea kiniou, ka amārmāro bunu tibe na. <sup>13</sup> Mia tomu nalo asermi mēlea ka kamiū napano siaku joa kamiū, mia kamiū kei napano naio tumolu tu sikili riva rivokar juluvati na bogokouo nei, mia Atua rilarurio.”

*Jaleleano toru yako Yerusalemo  
Mataiu 24:15-28; Luka 21:20-24*

<sup>14</sup> Ana Yesu naio ber iliano dolu tai bunu, napano naio bo ka ver toro napano naio rivuluku, rilavon ka rijikia vatitig nioti nene. Iliano nei naio ber jibe nei, berinavo “Mia kamiū kuvial ka napano mia avitirilar tavoru tai napano kirivova mia kirivova laka, naio tumolu toa vio lu tai napano maka rimemedu ka toaio. A bogo na kamiū kuvial vite nei, kamiū napano kumitu Yutea, bo ka kamiū kuvuro bilig, kamiū kuva kuvitoluku ea burusuku nalo. <sup>15</sup> Ea bogo na, ver toro tai to rijilmebi tavio ea kunuano, naio monoka riva joomo re bereio ka rivar kanano saba tai, <sup>16</sup> p̄eli ver toro tai toa kanano tiniavio, mia naio monoka rivan re bunu ea kunuano ka rivar kanano kulumārauo, mia naio monoka rivuro soḡeli tibe na ga rivano. <sup>17</sup> Ka bogo na, mia rivova laka bunu rivan nena nalo napano abe mābolo, vija nalo namā amije yu ban kenerilo solbouo nalo. <sup>18</sup> Ver tibe na, bo ka kamiū kubolkouo rivior kamiū, ka bogo na kenemiū vurojano nei ka mia naio rivokar re kamiū ea bogo na burumāra niavo. <sup>19</sup> Nina bior ka napano bogo na, mia sikili mia sikili, sikili lie tovulu bogokouo dolu nalo, napano jikar ea bogo na Atua naio jii yetemeriba nei binimei bokar banei, a mia ve re bunu burumāra bogokouo na toru tai tibe nei bereio bogo tai. <sup>20</sup> Mia Atua jidomii ruei ka mia naio tekor bogokouo nei ve bulati ga, bior kanano tomu nalo napano naio bijauia bulaglo ka ave kanano ajua bogo nei. Ver naio tekoro re ve bulati tibe na, mia ve re toro tai rijikia rimeul to.

<sup>21</sup> “Mia ver tomu nalo averver ka kamiū ka bogo nei, averinavo ‘Kamiū kumial toro yako, nina be Naverikariano na,’ p̄eli na ver averii toro dolu, averinavo ‘Naio be Naverikariano na niako laka,’ mia kamiū kumonea re kialo iliano nalo na. <sup>22</sup> Naverikariano telabo napano maka ave riano amijikia atumor-

molu, vija bunu naverialiano na sibilibiano, mia nalo na amijikia ala jamerijiano nalo, vija vite nalo na memebijuiano. Mia nalo ala tibe na, ana mia avuru tomu nalo ave vovu, riva rivokar napano mia alavon ka avuru bunu Atua kiano tomu nalo napano bijauia bulaglo ka ave kiano, mia vite nei mia maka ajikia alaio ga. <sup>23</sup> Mia kamiu kumijikia kuvitkar vatitigio, bior napano kiniou neberial vite nalo nei ka kamiu vonganei ruei, napano maka amalmaluvo vo.”

*Mia Kulorinio Kenerinio rime bereio*

*Mak 13:24-27; Luka 21:25-28*

<sup>24</sup> Ana Yesu berinavo “Naruei ea bogo na, iorou ka napano jaleleano nalo nei ribisi, mia m̄renio rime ribobogio, a mia siberio rimermera re bunu. <sup>25</sup> Marvitano nalo ea bulniogovu mia atibirbili, a moroano na vio yauo, mia Atua rikulkulo kalo. <sup>26</sup> Naruei ea bogo na, mia aial Kulorinio Kenerinio rimaluvo ea melijo vija kiano burum̄ara moroano a vija kiano burum̄ara mermerano. <sup>27</sup> Avona bisi, mia naio riila kiano nailiano nalo aseliviv ea vio reraio yetemeriba a tiniabene, a mia avuru kiano tomu nalo napano naio bijauia bulaglo ruei, nalo amei vio takurano ea naio.”

*Maka toro tai napano rijikia bogoti na maaro nei*

*Mataiu 24:32-36; Luka 21:29-33*

<sup>28</sup> Ana Yesu berenio, berinavo “Kamiu kuvisidomii von buruiesi nei, napano aber buruviki. Naio be kiano titai ka verloglog ka kamiu, napano kamiu monoka kuvitii vatitig eaio. Bogo na kamiu kumial ka sudoti vou nalo aju amiluo, aju abinimei amemeaio, ana kumijikia ka bogo na inio ve toru jo binimei vaataro. <sup>29</sup> Tibe na, bogo na kuvial jamerijiano nalo na ea yetemeriba, nalo aju amalmaluvo jibe ka napano kiniou neber ka kamiu ruei, mia kamiu kumijikia ka Kulorinio

Kenerinio jikili jua m̄aratavo ruei, vaataro ka riyotuba naruei.

<sup>30</sup> “Riano, kiniou neber ka kamiu, mia tenalo na mia amaluvo beamu, ana iorou, tarati na tomu nalo napano ameulial bogo na amijikia aṁarn̄aro ea yetemeriba nei. <sup>31</sup> Ana mia buluniogovu vija yetemeriba nei, naljuo avakovio bunu, mia kaku iliano nalo maka ajikia avakovio bogo tai. <sup>32</sup> Mia maka toro tai napano mijikia bogoti na p̄eli aura nene napano mia Kulorinio Kenerinio rime bere eaio. Nailiano nalo na tiniabene, bija Atua kenerinio, nalo maka ajikia, mia Karam̄aku, naio takurano ga mijikia.”

*Kamiu monoka kuviturorea rivu Mataiu 24:42-44*

<sup>33</sup> Naruei Yesu berenio, berinavo “Tibe na, kamiu monoka kuvitu kuvitkar vatitigio rivu, bior kamiu maka kumijikia ka legiano na vabe naruei mia kenemiu Tubo rime bere eaio. <sup>34</sup> Vite na naio jibe ka napano toro na toru tai juvan kiano vonuo ka riva rudu kiano burum̄ara ieliano tai. Beamu ka naio taluvo ea kanano vio, mia naio juvan kiano saba nonovio jua kiano tomu na im̄auano nalo jum̄alo, ka avitkar kiano im̄auano nalo, a mia ril vatitig van nalo napano abe nakukuano ea kiano morouo, ka monoka avitkar rivu.

<sup>35</sup> “Vonganei, jibe na bunu ban kamiu, naruei mia kamiu bunu monoka kuvitu kumisirarag kuku rivu, bior kito maka rejikia ka mia toro na toru na vonuo mia naio rime nagi. Vede naio rime ka niogoravo, vede ka bogiano, vede ka bogo na tu riolu, vede kavijo va, <sup>36</sup> mia maka rivu ka ver naio rimaluvo kean kamiu, ana rial napano kamiu kumitu kumonmelio ga. <sup>37</sup> Naruei iliano nei napano kiniou naber ka kamiu, naio memedu ga ka tomu nalo aviniu monoka ajogio, napano berio kamiu kuvitkar rivu, kamiu kuvitkar kamiu rivu.”

## 14

*Navurim̃araboiano nalo na kulo Israel kialo ajum̃a ajidom auebin Yesu kiana vo*

*Mataiu 26:1-5; Luka 22:1-2; Jone 11:45-53*

<sup>1</sup> Naruei, bogo binimei vaataro ka yuka nonovio nalo ajum̃a amila kialo jokoluolu juo na tortoru. Bogoti juo ju kia vo, ka mia aim̃auka jokoluolu na sidomkariano na ioruriano tukamu, ana kario na aim̃auka ka jokoluolu na asen beskit na jikili.

Mia ea bogo nene, tomu na tortoru nalo na kulo lu kialo bija naverloglogiano nalo na tuboiano, ajum̃a ajidom kea auebin Yesu. Aju kea amilavon ka asirag m̃arabo tai ka mia avokarvan ga naio. <sup>2</sup> Mia nalo ajum̃a aberii banlo bereio, aberinavo “Vite na, kito maka rojikia roim̃auka ea tomu nalo miralo napano abinimei ea jokoluolu nei, ver p̃eli mia nalo tiniel ser tanea kito kanio, mia ala burum̃ara uetubaiano na, bior napano nalo telabo ajum̃a ajidom kema nei laka ruei.”

*Mere miyon m̃aatei ea Yesu*

*Mataiu 26:6-13; Jone 12:1-8*

<sup>3</sup> Mia ka bogo nene, Yesu joa m̃arkomeli na Betani, naio ba jo miadu ka toro nei napano ajisia ka Saimon Burumieni, napano nanua beamu naio bokar burumieni ea niabene. Mia Yesu jo jinano ea vio na, tira tai binimei eaio napano naio midu bauei tai na amim̃auka ea puruveru na kirinovo tai, mia bauei neibano naio bujo ka m̃aatei na kirinovo tai napano amim̃aukanio ea uei na baiesi na buruiesi tai, napano puruveru nene toru laka garuei. Mia tira neibano naio mijukonlar tiniu na bauei neibano, ana miyon nonovio m̃aatei nene ea Yesu parinio. <sup>4</sup> Mia nalo tealo napano ajua vio neibano amial tenei, mia nalo tiniel jer tira neibano, aju amil mum̃ii kanio ban berelo, aberinavo

“?Ka venia na tira na miyon bulag kule m̃aatei na bo nei jibe na? <sup>5</sup> A ver naio rivulvulu kanio ga, mia naio rivar burum̃ara puruveru tai, ana naio mijikia rivar puruveru nene ka rijai talim̃asa nalo. Mila bulagio ga na!” Ana ajum̃a amil niegeniege tira neibano jibe na.

<sup>6</sup> Mia Yesu ber kalo berinavo “? E, kamiu kumila jibe na ban tira na ka vaio? Kamiu kuvil niegeniege re naio tibe na, naio mila tonovo tai ban kiniou, milivu ka kiniou laka. <sup>7</sup> Talim̃asa nalo nam̃a kumitu kuberiilo na, mia nalo bogo nonovio atu burukuti vija kamiu, ana kamiu kuvijikia kuvijailo bogo nonovio ea bogo ve telabo napano kamiu kumisidom. Ana kiniou, mia noto re bogo nonovio rivija kamiu na. <sup>8</sup> Tena, tira nei mim̃aukanio, napano naio miyon m̃aatei na ea kiniou, naio mila nonovio saba nalo na bo bo laka ga, napano naio mijikia rim̃aukanio, ka rijikia rila vatitig mokotenaku ka mia navan ea m̃ariano. <sup>9</sup> Kiniou neber beriano ban kamiu, ea vio nonovio ea vio yetemeriba reraio napano mia averial kiaku ioluano vou nabo eaio, mia nalo atukunu bunu ka vaio na tira nei naio mim̃aukanio, ka nalo asidomial bereio bogo nonovio tena tira nei kiano tinietiano ban kiniou, napano naio tinien miia riano kinou.”

*Jutas jiveluku ka Yesu*

*Mataiu 26:14-30; Luka 22:3-20; Jone 13:21-30*

<sup>10</sup> Naruei Jutas na Kariot, napano naio bunu be Yesu kiano na iagagoano duelimo ba juo [12] tai, naio jo jidomii ruei ka mia tiveluku ka Yesu, ana naio ba mial tomu nalo na tortoru na tomu lu nalo. <sup>11</sup> Mia bogo na nalo amijog ka mia naio rim̃aukanio m̃arabo ka nalo ajikia avokar lukua Yesu, nalo ajaaro laka, aberkar ban naio aberinavo “Naio bo laka na, a ver jau kajai kumemi tibe na, mia kumemi nuvisian iaiano tai ve telisu rivanso riviorio.”

Naruei jikar ea bogo nene, Jutas naio jo jiravo buluvio tai na mia naio riven Yesu rivan ea kulo lu nalo nei juṁalo.

*Yesu miila Pitere naio Jone ka ava ala batitig sano sinaniano na maariano*

<sup>12</sup> Naruei ea legiano napano be moti na jokoluolu ka asen taba na, be Taste, a ea legiano nene ajuṁa amila sida ka nunu solbouo nalo ka sidomkariano na ioruriano. Naruei ea bogoti nei naiagagoano nalo abika den Yesu, aberinavo “? Jau kojidom ka mia kumemi nuva nuvila batitig sado sinaniano na jokoluolu nei ea vio vabe?”

<sup>13</sup> Mia naio ber kalo abe juo, berinavo “Kuve juo kuva jouro Yerusalemo, mia kamiu kuvial toro tai napano midu buruṁara bauei tai, naio rimei riviviuo vija kamiu. Mia kuve juo kuvitakisor naio kuvano, <sup>14</sup> ana mia naio rivuru kamiu kuvan ea yimo tai. Naruei bogo na kamiu kuve juo kuva joomo ea yimo nene, mo na kamiu kuvil van boru na yimo nene, kamiu kuverii tibe nei, kuverinavo ‘Kiado naverloglogiano naio bikanio, berenio vajoomo vabe na valauo nalo kialo, ka naio naliko kumemi kanano na-iagagoano nalo, kumemi numijikia nuvisen sinaniano na sidomkariano na ioruriano eaio?”

<sup>15</sup> “Kuve juo kuvil tibe na vanio, ana mia naio siloglog buruṁara vajoomo na yimo tai napano ea kotkoti na jo mave ka kamiu, napano vite nonovio jua ruei, ana mia kamiu kuve juo kuviomon vite nonovio na sinaniano nei ea vio nene.”

<sup>16</sup> Mia Yesu ber jibe nei ka na-iagagoano juo neibano bisi, ana nalo abe juo abano, nalo amiel aba abokar vio Yerusalemo. Mia ea bogo nene amial ka saba nalo nonovio amalmaluvo jibe ka ga napano Yesu berii kalo abe juo jukamu. Jibe na naruei, ana na naljuo amila batitig sinaniano na maariano na jokoluolu na Yesu kiano, karina abe juo aban bereio.

*Yesu berial ka mia Jutas tiveluku ka naio rivan kiano uolu nalo juṁalo*

<sup>17</sup> Naruei ea bogiano, Yesu naliko kiano duelimo ba juo abinimei Yerusalemo, naruei nalo aban ea yimo neibano. <sup>18</sup> Naruei bogo napano nalo ajuṁa ajinan, Yesu mil banlo, berinavo “Kiniou neber beriano ban kamiu, ka mia kamiu tai ga mia naio riṽilṽili bena ga ka kiniou, kamiu ga tai napano mia kumemi ve juo nuvisinan burukuti vonganei.”

<sup>19</sup> Naruei naiagagoano nalo amijog ka naio ber jibe na, mia nalo tinielo miia naio toru laka, ana na nalo ajuṁa abivika veve terakurano denio, aberinavo “?Koig, maka ve kiniou, a?”

<sup>20</sup> Ana na Yesu berdoṁeio, berinavo “Nana mia naio rila tibe nei ka kiniou, naio be tai ga ea kiaku duelimo ba juo [12] nei ga, naio napano mia kumemi ve juo nuvititi ka sememi joko ea baju ve takurano ga. <sup>21</sup> Mia Kulorinio Kenerinio monokanio rimaro tibe ka na vivitauiano lu nalo aberii nua ruei, mia toro napano naio ṽilṽili bena ga ka naio, mia rivova laka van naio, bo laka verenio naio rimoluo re.”

*Sinaniano maariano*

<sup>22</sup> Ana bogo napano nalo ajuṁa ajinan jibe na, Yesu midu joko tai, ber siva ban Atua kanio, ana burekokorovio bar banlo, ana ber kalo, berinavo “Kamiu kuvijevio kuvisenio, ninei naio be mokotenaku.” <sup>23</sup> Mia iorou kanio nina, Yesu midu baja na ṁarjuṁelmṁelu tai, ana naio ber siva ban Atua kanio, ana jian ban kiano naiagagoano nalo, mia nalo abeve terakurano abiniu amunu terteliṣu eaio. <sup>24</sup> Ana naio ber kalo, berinavo “Ninei naio be kiaku burukija, ka rila Atua kiano virakariano tumolu tu sikili bogo nonovio, bior mia kiaku burukija nei naio riou ka sovoko tomu ve miroano kialo meuliano nalo. <sup>25</sup> Kiniou neberkar be riano ban kamiu, ka mia kiniou nomunu re ṁarjuṁelmṁelu na bereio rivano-o

rivokar bogo na ga mia kiniou nomunu m̃arjum̃elm̃elu vou ea Atua kiano navenatuboiano.”

<sup>26</sup> Mia bogo napano Yesu naio mila jibe na bisi, ana na nalo amiou ka iou tai napano joa niosi na Iouano nalo, avona bisi ana nalo abava tavio, aban ea Suku na Buruolivi Nalo.

*Yesu berial ka mia Pitere rivar-bonbonua naio*

*Mataiu 26:31-35; Luka 22:31-34; Jone 13:36-38*

<sup>27</sup> Naruei bogo na ajua burusuku nene, Yesu ber kalo berinavo “Banei bogiano na, kenemiu moneano ea kiniou mia rijoru, bior iliano lu naio ber rui, berinavo

*‘Mia kiniou nouebin toro na bitikar nunu,*

*ka mia kiano nunu nalo*

*mia avuro ave dedade tanea vio.’*

*Sek 13:7*

<sup>28</sup> “Ea iliano nei, Iliano Lu jo berii venia napano mia rimaluvo ea kiniou, mia bogo na kiniou nemeul bereio ea m̃ariano, mia kiniou notukamu nava Kalele, ana mia kamiu monokanio kumei iorou, kumei ea vio nene bunu ga.”

<sup>29</sup> Naruei bogo na Pitere naio mijog ka Yesu ber jibe na ana naio mil ban Yesu, berial, ber “Peli kumemi tealoo nonovio mia kialoo moneano easoo rijoru, mia nalo avuro denso, mia kiniou maka nejikia notuvanso bogo tai.”

<sup>30</sup> Mia Yesu berkanio, berinavo “Bo Pitere, ka na jau kober jibe na, mia kiniou neber be riano ga banso neber ka mia bogiano na ga, mia tu tokokoreko ve valuo ga, ana mia jau kavarbonbonua kiniou rive varolu rui.”

<sup>31</sup> Mia Pitere naio mil joko vio ka iliano na, naio berkar iliano na kirisikili lie, berinavo “A ver nalo ajidom ka auebin kiniou vijaso, bo laka lie vo, mia kiniou, maka nejikia nalabonuaso ka never kiniou maka nove kiamo.”

Ana bogo nene, naiagagoano dolu nalo bunu aber iliano nene bunu ga.

*Yesu ba bolkouo yako Ketsemani Mataiu 26:36-46; Luka 22:39-46*

<sup>32</sup> Mia iorou, Yesu nalo abarpiiliglo ajel tivelinio ea suku neibano, abatove abokar bolu na telisu tai, aban ea vio tai siano Ketsemani. Ana naio ber kalo, berinavo “Kamiu kuvitu nei vo, mia kiniou nava nobolkouo ve telisu kija tukamu.”

<sup>33</sup> Mia naio buru Pitere naljuo Yemesi naio Jone, nalo aban bija naio, ana nalo aban lie kija telisu ga, ana ea bogo na Yesu kiano iviso binimei temi laka, ana naio mijog naio bova laka. <sup>34</sup> Naruei Yesu mil banlo abe tolu, berinavo “Vonganei namijog jibe ka niunuku burukorovio rui, mila na kiniou vaataro ka nam̃aro kanio. Neber bo ban kamiu, kamiu kuvilavon ka kuvitevijo kuvitu vija kiniou ea vio nei kija ga vo.”

<sup>35</sup> Ana Yesu naio miel ba lie kija ga, ana naio mijoru minie ana bolkouo ban karam̃ano, berinavo “Teta o, Teta o! Verver jau komijikia kajamo ga ka aura na jogvaiano nei naio rimei ea re bunu kiniou. <sup>36</sup> Jau komijikia komila vite nonovio, mia kiniou nobika denso ka jau kodular baja na jogvaiano den kiniou, ka mia kiniou nomunu eao re. Mia jau kala re tibe ka na kiniou nejidom, mia be kiamo ga.”

<sup>37</sup> Kario naio binimei bereio ea kiano naiagagoano tolu neibano ana naio mial amonmelio rui, mia bogo na nalo ajevijo ana Yesu ber ka Pitere, berinavo “?Saimon jum̃abe na jau kojo komonmelio jibe na? ? Kamiu maka kuvijikia kuvitevijo kuvitu vija kiniou ka aura ve takurano ga? <sup>38</sup> Kamiu monokanio kuvitikar vatitigio, ka mia kamiu monokanio kubolkouo bogo nonovio, ka mia lavonvoniano nalo ala re kamiu kuvijoru ea kariano. Ee, kenemiu jidomiano nalo kirisikili vatitig, mia mokotenemiu nalo niabelo mave.”

<sup>39</sup> Mia iorou kanio ana naio bano bereio ea vio napano, ana naio bolkouo bereio jaki kiano ilibolkouoiano

napano jukamu. <sup>40</sup> Naruei naio binimej bereio mial ka nalo tolu nei ajumã amonmelio bereio, bior miralo jouo tomi laka, a bogo na naio mil banlo, maka bunu ajikia averdoþe titai bereio rivanio.

<sup>41</sup> Mia naio ba bolkouo bereio, nainei be varolu nene, karina naio binimej bereio, mia naio mil banlo berinavo “E, kamiu kumituãa kumijilimebi kia ga vo, kamiu kumonmelio kia ga vo. Bo ga, bare naruei! Na vonganei vaataro ka bogo na Kulorinio Kenerinio naio rivan ea tomu va nalo jumãlo naruei. <sup>42</sup> Ei, kamiu kuvitumolu, kito ravano. Toro na vïlïvili bena ka kiniou, naio yako jo binimej vaataro.”

*Nalo abokar kilkil ea Yesu  
Mataiu 26:47-56; Luka 22:47-53;  
Jone 18:3-12*

<sup>43</sup> Naruei monloglog bogo na Yesu naio jo ber kea iliano nalo nei kia navo, Jutas neibano be nalo duelimo ba juo [12] tai, naio binimej naliko tomu nalo miroano, napano nalo abar iobogu na mira nalo bija kialo nia nalo. Nalo na naruei, tomu nalo na tortoru na kulo lu nalo, bija naverloglogiano nalo na tuboiano, bija navurimãaraboiano nalo na kulo Ju nalo, nalo amiilalo abinimej. <sup>44</sup> Nua na maka amei vo tibe na, toro na jiveluku neibano Jutas, naio jii jamerijiano tai ruei kalo, napano naio berinavo “A ver toro na navan jumãaku vija naio tukamu, toro nene naruei napano kito rojidomio, ana kenemiu tomu nalo na be þirilo monoka avokario avuru naio avano.”

<sup>45</sup> Mia ka bogo na nalo abinimej naruei, Jutas naio miel ban memedu ka Yesu, naio berkanio, berinavo “Bogiano bo, Naverloglogiano.” Ana naio ban jumãano bijaio. <sup>46</sup> Ana kialo tomu nalo abinimej abokario kirisikili, nalo ajidom ka avuru naio rivano. <sup>47</sup> Nalo abakar naio jibe na naruei, ana naiagagoano nalo na ajua vio na nalo tai midular kiano iobogu na mira, jidom ka te

toro tai na Parinio Kulo Lu kialo, naruei naio jeluvuio ana jelar ga burutiliniene tivelinio.

<sup>48</sup> Na Yesu mil ban tomu nalo neibano, berinavo “? Jumãabe ana kamiu kubar kenemiu iobogu a kenemiu nia nalo? Bior venia ana kamiu kumisidom ka kumei kuvokar kiniou tibe na? Þeli na kamiu kumituãa kumisidomii kuber kiniou nebe toro tai na be þiriku ka nevina bija nouebin toro? <sup>49</sup> Julaka ea bogoti nonovio, kiniou nojomãa neberloglog kamiu ea Atua kunuano lu ruei, ana ka venia ana kamiu maka kumei kuvokar kiniou ea bogo nalo nene? Mia bo ga na, bior vite nalo napano vivitauiano lu berenio nua bogobe ruei, monoka amei tibe na ga.” <sup>50</sup> Mia ea bogo nei, naia-gagoano nalo ajuvan Yesu ana nalo aburo dedade denio.

<sup>51</sup> Mia bogo nene, m̃eaku tai naio jomãa jakisorilo, ana aburu Yesu bano ana m̃eaku neibano naio jukulou ga. Mia nalo tealó abitulubarbar naio, mia nalo ajidom ka avokar naio bunu ga, <sup>52</sup> naruei nalo abuluvu naio, nalo abokar ga kiano tukulou ana nalo aburu lario denio, naio buro jibe na ga napano be blamoma ga jo.

*Aburu Yesu ea komeli na toru, na  
tomu nalo na tortoru na kulo Ju nalo  
kialo*

*Mataiu 26:57-68; Luka 22:54-71;  
Jone 18:13-24*

<sup>53</sup> Naruei nalo aburu Yesu binimej jikili jukamu ka Parinio Toro Lu, nina be Kaivas, ana tomu na tortoru nalo na kulo lu nalo, bija naverloglogiano nalo na tuboiano, bija navurimãaraboiano nalo na kulo Ju nalo, nalo abinimej vio takurano ea vio neibano bunu. <sup>54</sup> Mia Pitere bunu jomãa jakisosor Yesu ea bogo nene, mia naio maka riva vaataro kanio, mia bogo na nalo abinimej jouro ea burusio na komeli neibano, Pitere naio ba jotano bija tomu nalo na amimãau Kaivas kiano, napano

nalo ajumãa ajutano vaataro ka sebi, bior vio menini.

<sup>55</sup> Naruei tomu nalo na tortoru napano aju joomo ea vioriano neibano, nalo ajirag von tomu tealo ka aver vite nalo tai napano Yesu jomãa mila ðeli namãa naio jo berenio, ka nalo amijikia auebin naio riviorio, ana nalo maka aleal tai. <sup>56</sup> Nalo amileal tealo napano aburulo abinime i aberial iliano miroano, mia iliano nalo na abiniu ajumãa amila sibi ga, mia nalo ajumãa aber saba nalo na abeve dolu, naruei kialo ilisibiano nalo nei ajumãa ajibirbili ga. <sup>57</sup> Mia karina tomu tealo na sibiano nalo neibano nalo amileal iliano tai, ana ajikili aberinavo <sup>58</sup> “Kumemi numijog ka kema na, naio jomãa mil barvar m̃lea ka naio jibe na naruei, berii Yimo Lu neibano korobido nalo amim̃aukanio bija jumãalo nalo, berinavo naio ga mia rue bulagio bereio, ka mia naio ga rimãauka vatitig Yimo Lu vou tai bereio, ka bogoti ve tolu [3] ga, napano mia toro jumãano rimãauka re.” <sup>59</sup> Nalo aber iliano nalo na bano-o, mia karina kialo iliano nalo amierier janea vio ga, maka bunu atu sikili.

<sup>60</sup> Naruei parinio toro lu nei jumolu jikili jua miralo, mil ban Yesu, bika denio berinavo “?Mia jau koverdoþeio vanlo, ðeli makanio? Jumãabe ka iliano nalo nei napano aju aber bulagio?” <sup>61</sup> Mia Yesu naio jo ga jibe na, maka riverdoþe vanio bereio. Naruei Parinio Toro Lu nei ber bereio ban Yesu, berinavo “? Jumãabe, jau kobe Naverikariano nei napano naio be Atua Lu kenerinio, ðeli na makanio?”

<sup>62</sup> Naruei Yesu berdoþe banio, berinavo “Ee, Naverikariano na be kiniou na. Mia kiniou najidom never bunu vansom, never iorou, mia rivesiou re, mia kamiu kuvial kiniou Kulorinio Kenerinio napano nojo nojotano ea tivelinio vameruo ea Atua na moroano. Mia kamiu kuvial ka mia noyotuba ea melijo nemei bereio ea vio yetemeriba nei.”

14:58 Jon 2:19

<sup>63</sup> Ana Parinio Toro Lu neibano tinien mimi laka, naio mijede kiano kulukoti, berinavo “Bisi ea vio na! ? Bior venia ana kito rojumãa rejiravo toro dolu bereio ka river saba nalo tealo rivanio? <sup>64</sup> ?Kamiu kumijogio na? Toro na naio jo mila bulag tolu na Atua siano lu ruei! Mia vioriano naio jidom jumãabe, mia kito rotibure naio tumãabe?”

Ana nalo ajibure Yesu, aberinavo memedu ga ka nalo monoka auebinio. <sup>65</sup> Mia nalo tealo ajumãa abuvule eaio, napano abiviko mirano, ana ajukuio, naruei nalo amiyotel eaio, abika denio, aber “Ei, jau kover von, kei mijubaso vonganei?” Naruei Parinio Toro Lu kiano tomu nalo nei abinime i ka avuru Yesu ajaluvo den vio neibano, mia nalo neibano bunu napano ajumãa ajuku naio bija amijuba naio napano mia nalo aju aburu naio abano.

*Pitere barbonbonua Yesu  
Mataiu 26:69-75; Luka 22:56-62;  
Jone 18:15-18,25-27*

<sup>66</sup> Naruei ea bogo nei, Pitere naio jo jouro ea burusio nei kia ga vo, ana tira tai na jo bitikar Parinio Toro Lu kunuano naio binime i ea vio neibano. <sup>67</sup> Mia bogo na naio mileal ka Pitere jo juva sebi, ana naio mial mijikia Pitere, mia naio berkanio, berinavo “Ei, jau bunu kojo kajakisor toro na Nasarete na!”

<sup>68</sup> Mia vonganei, Pitere naio mila bonua tenei, berinavo “Ei, kiniou maka leleio nojoglubarbar vaio na jau kojomãa koberenio.” Naruei naio jaluvo den vio neibano, ba vaataro ka burumãara m̃aratavo na toru na yimo neibano.

<sup>69</sup> Mia ea vio nei, tira neibano mialio bereio, a naio berealio ka tomu nalo napano aju na, berinavo “Toro na, naio be nalo tai na abe kiano.”

<sup>70</sup> Ana Pitere naio mila bonua iliano nei bereio. Ana maka vesiou, ana tomu nalo na ajua vio na aber ka Pitere, aberinavo “Maka, jau kobe nalo tai na, bior jau kobe toro tai na vio Kalele memedu na!”

<sup>71</sup> Mia Pitere mil kirisikili lie ea iliano nalo na kirisikili, berinavo “Riano mave, kiniou neber rui, kiniou maka lele nejikia kema na kamiu kumituña kuberenio na.”

<sup>72</sup> Naruei memedu ka bogo na Pitere naio berenio jibe na, tu naio jokokoreko valuo nene, mila na Pitere naio tinien maio ka bereio iliano na Yesu berenio berinavo “Riano ga kiniou neber kaso, mia bogiano na ga, bogo na tu naio tokokoreko rive valuo nene vo, mia jau kalabonua kiniou rive varolu rui.”

Mia Pitere mijog tinieno bova mia bova, ana batavio, mia naio jegi mia jegi.

## 15

*Aburu Yesu ban ea Parinio Tubo na Romo napano joma bitikar Israel, nina Pailat*

*Mataiu 27:1-2,11-14; Luka 23:1-5; Jone 18:28-32*

<sup>1</sup> Naruei ka Vraire kavijova, tomu na tortoru na kulo Israel nalo ajutano bereio ea kialo burumara komeli. Nalo nei, tomu na tortoru na kulo lu nalo kialo, bija navurimmaraboiano nalo a kialo naverloglogiano nalo na tuboiano. Nalo amil bano-o, nalo abokar jidomiano tai, ana iorou amiorkar Yesu jumano, aburu naio aban ea Parinio Tubo Pailat, ana ajuvan Yesu jua jumano ka tibureio. <sup>2</sup> Ana Parinio Tubo Pailat naio bika den Yesu berinavo “?Jau kobe Parinio tubo ka kulo Israel nalo peli na makanio?”

Ana Yesu berdope, berinavo “Tenene na naruei, jibe na kojoma koberenio kia na.”

<sup>3</sup> Mia tomu na tortoru na kulo lu nalo aberii bulavulag vite nalo telabo kar Yesu, aberinavo naio jo mila vite telabo na bova.

<sup>4</sup> Naruei Pailat bika bereio, berinavo “Jumabe? Nalo nei aberenio vite telabo na bova biorso rui, mia jau be kiamo verdopeiano kanio, peli makanio?” <sup>5</sup> Mia ea tivelinio na venia nalo na ajuma aberenio, mia

Yesu maka bunu sian verdopeiano tai bereio vanlo, naruei Pailat miilo toru kanio biorio.

*Pailat mijamo ka Yesu ka naio monokanio rimaro*

*Mataiu 27:15-26; Luka 23:13-25; Jone 18:39-19:16*

<sup>6</sup> Ea bogo na, mia nalo aju kia ga vo ea Jokoluolu na Sidomkariano na Ioruriano, a ka yuka nonovio ea jokoluolu nei, Parinio Tubo na Romo naio joma mila vite tai ka kulo Israel nalo. Naio mila jibe ka napano verenio nalo tealo ajua lakoiano, tomu nalo amijikia avika nalo tai napano ajidom, ka mia Pailat rijamo ka naio riva tavio ga.

<sup>7</sup> Ana ea bogo na, toro na poletik tai joa lakoiano, napano tomu nalo amijikia batitig naio, napano siano be Barabas. Naio be toro tai na kirisiou napano ajumolu ka ala mira keano kulo Romo, naio muebinvin tealo amarmaro, naruei ajetavokio ea lakoiano biorio.

<sup>8</sup> Jibe na, ana tiniobi nalo abinimej telabo vio takurano ea Pailat mirano, nalo abika den naio ka rila rivanlo tavukia nama naio joma mila, ka naio monoka rijamo ka nalo tai kalo napano joa lakoiano naio riva tavio bereio.

<sup>9</sup> Naruei Pailat berdope, berinavo “Moo, peli kamiu kumisidom ka kiniou najamo ka kema nei rivatavio bereio, nina be kamiu kulo Ju kenemiu Parinio Tubo?” <sup>10</sup> Pailat bika jibe nei, bior naio mijikia rui ka tomu na tortoru nalo na kulo lu nalo na Ju nalo ga aburu Yesu binimej ban naio, jibe ka imauano na jokuano ga, bior amial ka tomu dolu nalo ajaaro laka kanio.

<sup>11</sup> Jibe na, Pailat jidom tuvan Yesu rivano, mia tomu na tortoru na kulo lu nalo amila bulag tomu nalo kialo jidomiano binimej bitunu melea, ana aber monoka asikil ka Pailat ka naio tuvan re Yesu rivano, mia naio tuvan ga Barabas rivano.

<sup>12</sup> Mia Pailat naio mijog venia napano ajuma aber ka naio, naruei naio bika denlo bereio, berinavo

“Mo bo ga, a ver tibe na, mia kin-iou nala tum̃abe ka toro nei nam̃a kamiu kubio Parinio Tubo na kulo Ju nalo kialo?”

<sup>13</sup> Mia nalo abiniu amiaga mave bereio, aberinavo “!Kuvitukukakar naio ea m̃akolkolo!”

<sup>14</sup> Naruei Pailat bika denlo, berinavo “?Mia bior vaio, naio mila vaio na kirivova?” Mia nalo amiaga jouo lie vo, aberinavo “Kuvitukukakario, kuvituku-kakar naio mave ea m̃akolkolo!”

<sup>15</sup> Mia Pailat maka bunu rijikia naruei mia naio rila tum̃abe, mia jidom ka naio monoka river titai ka mia tomu nalo nei amijikia ajog rivu riviorio, naruei naio berinavo Yesu naio tobo, mia naio tuvan Barabas bere rivanlo. Ana naio midu Yesu joa kiano na mira nalo jum̃alo ka nalo avitivio, ana ka avurio riva atukukakario ea m̃akolkolo.

### *Namira nalo amiyotel ea Yesu*

*Mataiu 27:27-31; Jone 19:2-3*

<sup>16</sup> Naruei Pailat kiano na mira nalo aburu Yesu aba joomo ea burusio na kanano komeli, mia nalo abio kialo taara dolu nalo telabo abinimeĩ ka aialio. <sup>17</sup> Naruei nalo amiya bulag kanano kulum̃arauo, ana amiya kulukoti tai ea naio napano be vabolo, jibe ka nam̃a parinio tubo nalo amiyaio, a nalo abar nionoti tilikibi abili, amiveio ea parinio, jibe ka parinio tubo tai kanano batubatu. <sup>18</sup> Mia bogo napano abar tenalo na bisi, amiyotel eaio, aberinavo “Parinio Tubo na kulo Ju kialo, o! Kumemi nubatove kaso, kumemi numiaiaso!” <sup>19</sup> Ana nalo amidu jaati subavio, amue pariparinio, a abuvule niegeniege naio, aminie ka naio jibe ka abameneao. <sup>20</sup> Mia bogo nam̃a amiyotel ea naio jibe na bisi, nalo amiyalar kulukoti vabolo nei denio, ana amiya m̃ano kulum̃arauo eaio bereio, ana nalo aburu naio, abatavio ka atukukakar naio ea m̃akolkolo.

### *Ajukukakar Yesu mave ea m̃akolkolo*

*Mataiu 27:32-44; Luka 23:26-43; Jone 19:17-27*

<sup>21</sup> Ana bogo na na mira nalo aburu Yesu aju abano, nalo amileal toro tai napano naio ba yeturu jo miel binimeĩ. Toro nei, nina be Saimon nanua beamu naio be toro na Saireni, a napano naio be karam̃ano tomu juo nei Aleksada bija Rovus. Naruei nalo amial naio, ana ajutua ka naio kija rudu Yesu kiano m̃akolkolo rivano. <sup>22</sup> Mia nalo aburu m̃arabo ka Yesu aba abokar suku tai, siano Kolkota, napano nioti nene berenio vio na jibe kanio bordada na burio na toro. <sup>23</sup> Naruei bogo napano nalo amijivi ea suku nene, nalo ajidom adu m̃arjum̃elm̃elu van Yesu ka rimunuio. Mia m̃arjum̃elm̃elu nei, nalo amiyon buron vite tai mije ban bijaio ka rila Yesu niabene rije, ka naio rijog rijalele m̃elea re, mia bogo na nalo ajian banio mia naio maka sidom rimunuio.

<sup>24</sup> Ana nalo amidu Yesu, ana ajuku kakario mave ea m̃akolkolo. Karina, nalo amiere m̃abujo, ka aleal ka kei kalo mia rivar kiano kulum̃arauo tai, a mia kei rivar dolu nene. <sup>25</sup> Mia bogo napano amidu Yesu joa m̃akolkolo nei, nina kavijova, ea aura kover jibe na. <sup>26</sup> Ana na mira nalo na Romo nei, nalo ajiri iliano tai, napano berial vite napano navurim̃araboiano nalo na ajidom auebin naio rim̃aro riviorio, napano berinavo “Toro nei, naio be Parinio Tubo na Ju nalo.” <sup>27</sup> Mia ka bogo na bunu, tomu va juo na vinauano, ajukukakar lo bunu ea m̃akolkolo jibe ka Yesu, tai abitirilario ea vameruo na naio, a tinene abitirilario ea vañali. <sup>28</sup> Ea bajago nei naruei, nalo amila ka mia iliano moruo tai na Iliano Lu naio rimeĩ rive riano, napano berenio berinavo “Nalo amidu naio mon naliko tomu nam̃a amila kokorov tuboiano.”

<sup>29</sup> Naruei tomu nalo napano m̃a amiel abarlaka ea vio na, nalo

aju aŝiligviliĝ pariparilo, nalo amil niegeniege Yesu liki, aberinavo “Aie, jau na, nanua m̃a kober komijikia kala bulag Atua Kunuano Lu, a mia jau kovitiri lario bereio ka bogoti ve tolu ga, mia jum̃abe vonganei? <sup>30</sup> !Bo ga, jau kalavon ka kalarurso, jau kataluvo den m̃akolkolo na, jau katabulu!”

<sup>31</sup> Ea bajago na bunu, tomu na tortoru na kulo lu nalo naliko naverloglogiano na tuboiano nalo aju abital niegeniege naio, nalo aberinavo “!Naio milarur tomu dolu nalo telabo rui, mia naio maka bunu rijikia rilarrur naio bereio naruei! <sup>32</sup> ?Naio be Naverikariano, naio be Parinio Tubo ka kito kulo Ju, p̃eli? Bo ka naio tavulu den m̃akolkolo vonganei, ka mia kito reial ka naio be riano, ka mia kito romijikia romonea naio.” Mia naljuo napano ajukukakarulo ea m̃akolkolo bija Yesu, naljuo na bunu amiasol ilivaiano nalo ea naio jibe na.

*Yesu m̃aro*  
*Mataiu 27:45-56; Luka 23:44-49;*  
*Jone 19:28-30*

<sup>33</sup> Mia ka legiano viovare, ana melijokouo binimej miununuko vio reraio garuei, naio jo jibe na bano o bokar m̃erenio tolu niogoravo. <sup>34</sup> Ana ea bogo na, Yesu miaga jouo ea kiano iliano memedu, naio berinavo “?Eli, Eli, lam̃a sabatani?” napano berenio “?Kiaku Atua, kiaku Atua, ka vaio ana kojuvan kiniou nojo jibe nei?”

<sup>35</sup> Mia tomu tealoo napano ajum̃a ajumolu ajua vio nei, napano nalo aju abitii vite nalo na, nalo amijog belea Yesu kiano iagaiano nei, naruei nalo aberinavo “Kamiu kumijog, toro na naio jo bio tormoruo Elaija na, ka rimej rijai naio.” <sup>36</sup> Mia soŝeli ga, nalo tai jikiti binimej, midu burujumu, miyon m̃arjum̃elm̃elu na mijeja banio, ana julukar ka iesi tai, ana miyuku ban ka Yesu rimunu eaio, berinavo “!Ei, kito rotu vo! Reial von, p̃eli mia

tormoruo Elaija rimej rilarrur naio kovio, p̃eli na rimej re.”

<sup>37</sup> Naruej Yesu miaga jouo, naio buru maaria kanano jegi, naio m̃arodobi. <sup>38</sup> Ea bogo nene na ga, jagidago merorolu laka napano jaklele ea Atua Kunuano Lu, nam̃a joko vio lu na be vio lu laka, naio buruŝe tivelinio juo, jikar mave batove boru yetano.

<sup>39</sup> Naruej toro na toru ka na mira nalo, napano ju bitikar Yesu, bogo na mial Yesu buru maaria kiano jegi jibe na, naio berinavo “!Banalo tom nalo, toro nei be Atua Kenerinio riano ga!”

<sup>40</sup> A tire tealoo napano ajum̃a ajakisor Yesu aju ka bogo nei, nalo ajikili aju koalabo kija, aju abitikar kialoo naverloglogiano. Ea nalo nei, nalo tolu nei, be Mere tira re Maktala, a Mere dolu napano Yemesi naio Yoseve kenielo, a tira napano Salome. <sup>41</sup> Nalo nei naruej napano bogo na Yesu jo Kalele nua rui, ajum̃a ajakisor naio, ajum̃a amijaio. A be tire telabo dolu nalo bunu ajumolu aju ea bogo na, napano nalo bunu ajaluvo Kalele, ajakisor Yesu abinimej mave Yerusalemoo.

*Yoseve jivin Yesu*  
*Mataiu 27:57-61; Luka 23:50-56;*  
*Jone 19:38-42*

<sup>42</sup> Mia bogoti nei be Vraire, naio be bogo na ala vite nonovio atu batitig rivu ea Legiano Lu nei beni, mia bogo napano vaataro ka m̃erenio rivatove, <sup>43</sup> toro tai na Arimatea, naio siano Yoseve, naio mila kiano jidomiano jikili, ana ba jikili jukamu ka Pailat mirano, naio bika Pailat ka rijikia ridu Yesu mokotenano.

Mia kirisikili ka Yoseve naio rila tibe na, bior ka naio be tarati tai na buruñara vironiano na komeli na kulo Ju kialoo, mila na tomu nalo amijikia batitig naio, a naio be toro tai bunu nam̃a jidom laka ka Atua kiano navenatuboiano rimej.

<sup>44</sup> Ana ka bogo na, Pailat maka rijikia ka Yesu naio m̃aro rui p̃eli na makan vo, naruej naio bio kiano

toro na toru na kiano na mira nalo, ka vika denio. <sup>45</sup> Mia bogo napano naio mijogial ka Yesu naio m̃aro ruei, naio mijamo ka Yesu mokotenano ban Yoseve.

<sup>46</sup> Mia Yoseve naio je m̃ano buluvae tai be terivou ga maka vesiou vo, karina naio ba bulu kulum̃arau vou tai, naio ba amidular Yesu mokotenano batove ea m̃akolkolo, ana amijuvuliko ka kulum̃arau neibano, ana nalo amidu abano mon ea m̃ano buluvae napano. Ana amelivivi ka puruveru na toru nene binime, ajubonkokar m̃aratavo nene, ana aban bereio.

<sup>47</sup> Ana Mere juo nei, tinene tena vio Maktala, naliko dolu nene napano be Joses kenieno, naljuo bunu abinime amial vio nei napano Yesu mokotenano joaio.

## 16

*Buluvae be teau jo*

*Mataiu 28:1-8; Luka 24:1-12; Jone 20:1-10*

<sup>1</sup> Mia bogo napano Legiano Lu naio barlaka ruei bisi, nina ka bogo napano m̃erenio jikar batove vonga kijeve ka Sarere, mia Mere na vio Maktala, bija Mere napano Yemesi kenieno, bija Salome bunu, nalo tolu nei aba abulu bonotanunu nalo tealoo ka amijikia aion ea Yesu niabene.

<sup>2</sup> Naruei ka Sade kavijo, bogo na m̃erenio jikar ka mijivio kia ga vo, nalo tolu amiel ka avan ea buluvae nene. <sup>3</sup> Aju amiel abano, nalo ajum̃a abivika denlo, aberinavo “? Mia bogo na rovoru yako, mia kei mijikia rimelivlivilar ka buruñara puruveru napano ajubonkokar buluvae nei van kito, ka romijikia rava joomo?”

<sup>4</sup> Mia bogo napano nalo abinime vaataro ka vio nei, nalo amial ka buruñara puruveru nei, napano toro tai melivlivilaro ruei. <sup>5</sup> Naruei nalo aba joomo ea buluvae nene, amiilo ka m̃eaku tai, naio jotano tivelinio

vameruo, napano naio miya kulum̃arau nalo na amiuvuruvu laka, mia bogo na nalo amial naio amiilo bova laka.

<sup>6</sup> Naruei naio mil banlo, berinavo “!Ei, kami kumerou re! Kiniou nemijikia ruei ka napano kami kubinime ea vio nei bior Yesu na vio Nasarete, napano ajukar naio ea m̃akolkolo. Mia naio jumolu meul bereio ruei, naio maka bunu toa vio nei. Kami kumei von kuvialio! Ninei naruei vio nanua amidu batitig mokotenano mon eaio! <sup>7</sup> Mia kami kuvan soḻeli, kuva kuverial ka Pitere vija naiagagoano dolu nalo, ka mia Yesu rivatove tukamu kalo yako Kalele, mia nalo bunu monokanio atakisor naio, mia nalo amijikia aialio ea vio na, tavukia na nanua berkar kalo nua ruei.”

<sup>8</sup> Naruei tire nalo nei amila soḻeli, ajaluvo den buluvae, aburo abano, bior nalo amiilo toru laka ka vite nalo neibano bano-o m̃a amemebiju garuei. Ana amerou m̃elea bunu, mila ana maka ava averial ka tomu dolu nalo leleio, mia nalo aban memedu ka naiagagoano nalo ga.

*Yesu naio miyotuba ka Mere re Maktala*

*Mataiu 28:9-10; Jone 20:11-18*

<sup>9</sup> Ana Yesu naio meul bereio jibe nei ea kavijo vio buru vurevure ka Sade nei ruei, napano naio be legiano moti na bogoti aluo. Naruei naio jo malmaluvo keanlo napano ajakisor naio, mia nana miyotuba kean beamu be Mere re Maktala, nina napano naio mijil bulag sim̃aro nalo aluo eaio nua ruei.

<sup>10</sup> Ana iorou ka na Mere naio mial Yesu, naio ba miyotuba kean nalo nanua m̃a ajakisor naio, napano aju amijog bova a ajum̃a ajegi kia ga vo, ana naio berial kalo ka napano Yesu naio meul bereio ruei. <sup>11</sup> Naio ber batitig kalo ka naio mial Yesu ruei ka mirano, mia nalo maka amonea naio.

*Yesu miyotuba kean kiano naiagagoano juo*

<sup>12</sup> Ana iorou ka bereio, ea bogo tai napano naiagagoano juo aju ajaluvo den Yerusalemo, naljuo aju amiel abano, ana Yesu naio maluvo kean naljuo. Naruei naljuo amial jibe ka napano Yesu niabene be dolu, naio maka tibe ka nua.

<sup>13</sup> Mia bogo napano amial naio bisi, abe juo abarĉiliglo, aban bere, abano aberial vite nei ban nalo dolu, mia bogo tai bereio, nalo dolu nei maka amonea vite nei.

*Yesu naio miyotuba ka kiano naiagagoano nalo*

<sup>14</sup> Ana iorou ka bereio, Yesu naio miyotuba kean naiagagoano due-limo ba tai, ea bogo tai napano nalo ajutano aju ajinan. Ana naio mil kija banlo, bior ka napano maka avar tinielo ea naio, a bior ka napano kanalo iviso nalo jikili laka, mila na maka atu amonmonea kialo iliano nalo ka amial naio meul bereio ruei.

<sup>15</sup> Ana Yesu naio ber kalo, berinavo “Vonganei, kamiu monoka kuvano, kuvitan ka kamiu ea vio nonovio na yetemeriba nei, a kamiu monoka kuvioliolu ka kanaku Ioluno Vou van tom nonovio. <sup>16</sup> Ver toro tai rijogio, mia naio rimoneaio, mia karina avaruei ea naio, toro nene mia naio rijev ioruriano. Ana naio napano ver maka rimoneaio, mia Atua naio riverkar mĉariano vanio.

<sup>17</sup> “Mia nalo napano mĉa amoneaio, mia vremesiano nalo toalo, tibe ka napano mia ajil bulag siĉaro nalo ea moroano na siaku, a mia ajev iliano dolu nalo, <sup>18</sup> mia ver bogo tai avokar maro tai, mia nalo avu ga, a ver bogo tai amunu vite tai napano monoka aĉaro kario, mia vite nene naio maka rijikia rila titai kalo, a mia adu juĉalo toa namieiano nalo, naruei mia nalo amei avu bereio.”

*Yesu naio bavin bereio tiniabene  
Luka 24:50-53; Inĉauano 1:9-11*

<sup>19</sup> Ana iorou ka napano kiado Tubo Yesu ber iliano nalo nei banlo bisi, Atua burular naio ban bereio mave tiniabene, midu naio

jotano tivelinio vameruo na naio. <sup>20</sup> Naruei naiagagoano nalo abanvan tavio naruei, aba amioliolu ea vio nonovio, a nalo amial ka napano Tubo naio jo miĉau bijalo, naio jo mila lo amila vremesiano telabo ka rila tomu nalo avitulubar ka kanalo iliano nalo nei abe riano.

A tukunu nei naio bisi ea vio na.

**Yesu Kristo Kiano  
Ioluano Vou  
Napano  
LUKA  
Bivitauiaio  
Verialiano Moti**

*Tukunu bulati na niosi nei*

Niosi nei, Yesu Kristo Kiano Ioluano Vou napano Luka Jirio, naio berii Yesu ber naio be toro napano Atua berkar ruei ban taara nalo na Israel nua, ka mia rime i rilarurlo, a ka rilarur tomu nalo na yetemerba. Luka jiri ea kiano niosi nei ber Yesu nei, Atua sofi kiano niununo naruei bio naio ka riverial ioluano vou van talimasa nalo. Naruei bior vite nei, ioluano vou nei napano jirio, bujo ka tukunuano nalo napano aberial ka Atua tinien miia tomu nalo napano ajua jaleleano.

Vite dolu telabo napano romialio ea niosi nei, nina tukunuano nalo na tomu nalo napano amijog bo ajaaro. Tukunuano nalo telabo jibe na ajua mirano takurano [1] napano berial ka mia Yesu rime i, a ea mirano juo [2] napano berial ka Yesu moluo. Mia bereio ea mirano maariano, tomu nalo ajaaro napano Yesu meul bereio, a bavin ea Tiniabene. Toro napano jiri niosi nei, naio jiri niosi dolu tai bereio napano siano Atevi Nalo Kialo Imãauano Nalo.

Ea niosi juo nene nei, naio berial tukunuano nalo napano amiyotuba iorou ka bogo nei napano Yesu bavin ea Tiniabene.

Tukunuano nalo nei aberial ka tomu nalo napano amonea Kristo abinime i mirouano, a aba aberial kialo moneano nei ea vio dolu nalo. Niosi nei Yesu Kristo Kiano Ioluano Vou napano Luka Jirio abe torogio arolu [8]. Ea torogio juo nene, bija torogio ari nene be tukunuano nalo napano ajua niosi nei ga, nalo maka atua niosi tolu nalo na Yesu Kristo kanano Ioluano Vou napano Mataiu, Mak bija Jone nalo tolu ajiriio. Nine tukunuano napano

berii agelo nalo napano amiou, a tukunuano napano berii tomu nalo ka avitakar nunu napano abinime i ka aial Yesu ea bogo nei napano naio moluo, a tukunu napano berii Yesu ea bogo na napano naio ban ea Atua kunuano ea bogo na naio be tete m̃eaku kiaga, a jamerijiano na toro novo na Samaria, a jamerijiano na kirtete napano ba kovio. Vite burtumoruo tealoo nalo napano Luka berii van telabo ea niosi nei jibena. Naio berii bolkouano, a Niununo Lu, a tire nalo kialo vio ka aimãau Yesu kanano, a berii napano Atua mijikia viekokoa toro, mijikia ridular kiano kariano.

*Torogio nalo na niosi nei*

Ilano moti 1:1-4

Jone Baruei, bija Yesu naljuo amoluo, a naljuo amiluo bavini 1:5—2:52.

Jone Baruei kiano imãauano 3:1-20

Jone Baruei baruei ea Yesu, a Simãaro milavono naio 3:21—4:13

Yesu mila kiano imãauano ea tanobuku na Kalele 4:14—9:50

Yesu jaluvo den Kalele ba Yerusalemo 9:51—19:27

Yesu kanano sude maariano napano mila kanano imãauano yako Yerusalemo bija nalo na vaataro kean Yerusalemo 19:28—23:56

Yesu meul bereio bija kiano tomu nalo amial naio 24:1-53

*Iliano na be moti*

<sup>1</sup> Kiniou Luka nebivitaui tukunuano nei banso, toro na toru Tiovilas. Jibe ka napano jau komijikia ruei, tomu telabo abivitaui ruei tukunuano na vite nalo nei nanua amalmaluvo ka kito yuka tealoo bar laka ruei. <sup>2</sup> Vite nene nalo, kito maka reialio rimemedu ka mirado, mia tomu nalo napano jikar ea burupati nene, nalo aju amialio, a ka napano nalo ajibe ka tomu na be moti na Lilianiano Vou nabo, nalo naruei aberial sosolio batitig binime i ban kito. <sup>3</sup> Naruei jikar nanua ruei, kiniou nojomãa

nebitii batitig mēsi dolu nalo namā abivitauiāio, a nojomā nabar iliano na vite nene nalo, naruei namial jibe bo ka ver nalavon ka navar torogio dolu nalo na tukunuano nei, novivitauiā sosolio amei tibe ka niosi novo tai napano jakii memedu kiri mārabo sesa nalo na tukunuano novo nei. <sup>4</sup> Naio naruei nobivitauiāio ruei jo, mia kiniou najaaro ka notuvan riviedu ve kiamo, ka mia jau komijikia kovulukuio, komijikia kovitilubar ka vite nalo namā kojomā komijogio ruei amemedu ga a abe riano, ajavukia namā kanaku niosi nei berialio.

*Nailiano mijuelar ban Sakaraia ka mia naio rivar Jone Baruei*

<sup>5</sup> Tukunuano nene naio jikar jibe nei: Ea bogo namā Parinio Tubo Erot naio jo mije tuboiano ea tanobuku na vio Yutea, toro lu tai, naio be mārātavo na Abija, a naio buru tira tai napano naio bunu miyotuba ea yati na kulo lu nalo, nina ea mārātavo na tormoruo Erono, Mosis kuruano re nua laka. Toro nene siano Sakaraia, a koano, siano Lesveti. <sup>6</sup> Mia naljuo nei, kialo meuliano kiri memedu laka ea Atua kiano vitiano, ka namā amonmonea kiano tuboiano, a nalo ajumā amila bajago nalo na memedu kamā amila bogo nonovio ga, maka atumā ala belea tai. <sup>7</sup> Mia vite takurano ga, naljuo maka ve kenerilo tai, bior tira nei Lesveti naio jumolumu ga, mia vonganei naljuo abinimei abe kulo moruo nalo laka ruei.

<sup>8</sup> Mia ka bogo tai, naio be bogo na Sakaraia kiano taara nalo monoka ava ala sida ea Atua Kunuano Lu, tavukia namā taara nalo amila terakurano ea sude nalo. <sup>9</sup> Mia damariga, bogo namā amilala jibe na, nalo monoka ala tibe ka namā amiere mābujo, ka mia aleal nalo na vabe kalo naruei napano mia naio mijikia rila burumāra imāuano nei ka mia mā riva joomo ea Vio Lu na Yimo Lu nei, ka risebi sida ea boda na jo. Mia ka bogo na amilaiio jibe

na, mia Sakaraia siano mijoru loglogio, ka mia naio naruei riva rilaii burumāra imāuano nene. <sup>10</sup> Naruei monologlog bogo namā amisebi sida nene, ana naio ba joomo ka rilaiio, a burutiniobi toru na tomu nalo aju tavio ajumā abolkouo.

<sup>11</sup> Ana bogo na Sakaraia naio ba joomo, mia miilobin naio ka mial Atua kiano nailiano tai napano naio miyotuba kanio, jikili ju tivelinio vameruo na boda nene. <sup>12</sup> Mia bogo na Sakaraia mial nailiano nei, naio maka bunu rijikia ka mia tumābe naruei, a merou toru bunu. <sup>13</sup> Mia nailiano nei naio mil banio, berinavo “Sakaraia, jau komerou mēlere. Kiniou nebinimei ka neverial ga vanso ka Atua mijog kenemiu volkouano kube juo ruei, a mia koamo tira na Lesveti, mia naio rivar kenerimo solbouo sumāno tai, mia bogo na naio riyotuba, mia jau monoka kesisia naio ka Jone. <sup>14</sup> Mia bogo na naio riyotuba dovorovo, mia kuve juo tiniemiu saaro ve toru laka, tiniemiu sese, mia kamiu ve juo re ga, mia kulo dolu nalo bunu mia asaaro ve toru laka. <sup>15</sup> Kiritete nene, mia naio rimei rive Atua kanano toro na toru tai, a mia naio tibe ka toro lu tai, mia naio rivel ka mārjumēlmēlu vija uei na bitunu. Tikario ea bogo napano joa kia ga kenieno mabono, mia Niununo Lu to rivujolou ea naio ruei. <sup>16</sup> Mia naio rive toro tai napano mia naio rivilig kulo Israel nalo ve telabo amei bereio ea Atua Soḡi, kialo Tubo. <sup>17</sup> Mia aial ka napano niununo a moroano nanua joa Naverialiano Elaija mia to rivare ka ga naio bereio, bior mia naio tukamu rimei, ka riverial ka mia Naverikariano naio rimei iorou ka naio vesiou re. Mia naio rivilig teta nalo kialo iviso nalo ka mia asidomial vatitig bereio kenerilo nalo, a mia rivilig tomu nalo namā amila kokorov tuboiano ka mia atakii bereio bajago napano be masou a memedu. Ea mārabo nalo na naruei, mia naio rila vatitig rivu taara na tomu nalo tai ka mia ave

Atua kiano, ka atu rorea naio ka mia riyotuba kalo.”

<sup>18</sup> Mia Sakaraia naio mijog iliano nei, ana naio berkanio nailiano nei, berinavo “Ai, abe kover re tibe na. Maka rijikia tibe na, bior kumemi juo nei mērenio batove ruei nei.”

<sup>19</sup> Ana na nailiano nei mil ban bereio, berinavo “Makanio, mia tibe ga na. Kiniou nebe nailiano Kapriel nei, namā bogo nonovio najikili nojua Atua mirano ka mā nabar kanano iliano, naruei naio miila kiniou nebinimei easo ka neverial lilianiano novo nei vanso. <sup>20</sup> Mo bogo na kiniou neberialio kaso, mia jau maka komoneaio, naruei kiniou never kaso ka mia kove buru, a mia jau koto tibe na rivano-o rivokar bogo na keial vite nalo nene ayotuba kaso, nina ea bogo nene rimemedu.”

<sup>21</sup> Mia bogo na nailiano jomā mil kia ga jibe na ban Sakaraia, mia tomu nalo ajikili aju tavio kia ga vo, aju rorea bano deio, ana nalo aju ajidomii aberinavo “?Ka venia ana naio ba joomo, bijuku kiki jibe na?” <sup>22</sup> Ana iorou kanio, ana naio batavio bereio, mia nalo amial ka naio maka bunu rijikia ril vanlo, naruei nalo abitilubar ka naio jo joomo naio mial titai napano mila naio jibe na. Naruei naio jonā mil ka ga jumāno banlo, maka bunu ril be buru ga jo. <sup>23</sup> Mia naio jidel dolu ka ga mā jo mila kiano imāuano ea Yimo Lu na Atua Kunuano, bano-o kiano bogo nene bisi, ana naio ban bereio vonuo.

<sup>24</sup> Naruei nalo aju jibe na bano-o, mia maka vesiou, ana koano p̄igi, mia bogo na naio mial ka naio be mābono jibe na, mia naio ba jo vonuo ga bano-o bokar siberio jumo.

<sup>25</sup> Ana ea bogo na, naio jo ber jibe nei, berinavo “!Atua bijuku bo tanea ban kiniou nei! Beamu tomu nalo ajumā abiti sa ea kiniou bior maka navar tete, mia vonganei, Atua naio mial kiniou, tinien miia kiniou, naruei naio midular imouiano na kanaku jumolumu nene ruei.”

*Nailiano binimei mijuelar ban Mere ka mia naio rivar Yesu*

<sup>26-27</sup> Naruei Lesveti naio be mābono siberio ari ruei, ana na Atua miila kiano nailiano nei, Kapriel, ka riva riverial kiano iliano tai rivian niatira tai, siano Mere, napano naio be niatira tai na komeli na vio Nasarete ea tanobuku na vio Kalele. Ea bogo na, aberkar Mere nene ruei ka mia riva soro ka toro tai, siano Yoseve, napano naio miyotuba ea yati na Parinio Tubo Teviti re nua, mia Mere naio maka riva to rivija naio vo.

<sup>28</sup> Ana na nailiano nei Kapriel naio binimei, miyotuba ka Mere, naio berinavo “Mere-o, abe Atua naio jo jaaro toru laka ka jau, naio milivu kaso, a naio jo bijaso riano.”

<sup>29</sup> Mia bogo na Mere mijog iliano nei, naio jidom bijovijonio toru laka, ana ber mia riviti von, ka nailiano nei mil kirinovo laka ban naio jibe nei, ber nioti nene venia.

<sup>30</sup> Karina nailiano nei mil bereio banio, berinavo “Mere, jau komerou re. Atua tinieno jaaro kaso ga, mia rila burumāra ilivuiano tai rimeia ea kiamo meuliano. <sup>31</sup> Vonganei, mia jau kove mābomo, vano-o mia kodu kenerimo sumāno tai, a ver naio riyotuba kario, ana monoka jau kesisia ka Yesu. <sup>32</sup> Iliano Lu re nua berii kenerimo nene ruei, na naio berinavo

‘Naio mia rive toro na toru, a mia siano rive  
“Atua Na Loa Laka Kenerinio,”  
a Atua Tubo rila naio rimeia ve parinio tubo tai, napano ridu jeleig korobinio re nua nene, napano parinio tubo Teviti,

<sup>33</sup> naruei mia naio rije tuboiano ka nalo napano na amiyotuba ea Yakovo kanano m̄aratavo, nina be kulo Ju nalo na aju vonganei, a ka mia nalo na amei iorou, a kanano nave-natuboiano mia naio maka rijikia ribisi bogo tai.’”

<sup>34</sup> Naruei Mere naio miilo toru laka ka iliano na ber mia naio rudu tete, ana bika den nailiano

nei, berinavo “?Ana mia vite nene riyotuba sel tum̃abe liki nei, bior kiniou maka nuvitu biju kumemi juo kanaku sum̃ano vo?”

<sup>35</sup> Ana na nailiano berdoṽe, berinavo “Mia Niununo Lu rivatove easo, a mia moroano na Atua Na Loa Laka kiano rimeĩ sovokoso, ana na mia jau koṽigi. Ana bior mia jau kotibe na, mia nalo averinavo kiritete lu napano mia jau koduio be ‘Atua kenerinio.’

<sup>36</sup> “Ea kanamo vitiano, jau komial tena kirisikili laka ka mia tibe na, ana bo ka jau kosidomii von koniomo tiramoruo Lesveti yako. Aju amial aber mia naio rivar kulu re tete ga, mia naber kaso, naio be tiramoruo ruei, mia vonganei, naio kiano siberio ari ruei. <sup>37</sup> Jau monoka tiniemo rimaio, ka jibe ka napano Atua ber ka tiramoruo Sera re nua laka, ea tivelinio ka naio, maka ve titai leleio napano mia naio rijikia re ka rilao.”

<sup>38</sup> Ana na Mere naio berdoṽe, berinavo “Ierinio ga. Kiniou nobe niatira na Atua kanano im̃auano ga, mo kiniou nomijamo ga ka mia naio rila vite nalo na ayotuba ka kiniou tibe ka ga napano naio jidomio, tibe kanio na jau koberial ban kiniou na.” Ana na nailiano nene juvan naio ban bereio.

#### *Mere ba miadu ka Lesveti*

<sup>39</sup> Ana na Mere joṽa jidomii nailiano nei kanano iliano nalo nei, karina naio jidom toru ka riva rial kenieno nene napano Lesveti, mia maka vesiou ga, ana naio jumolu den kiano vio, mila soṽeli ban ea m̃arkomeli napano Lesveti naio koano Sakaraia ajuaio, nina ea tanobuku na suku nalo na vio Yutea.

<sup>40</sup> Mia Mere neibano bokar naljuo nei kunualo nene, naio ba bio Lesveti. <sup>41</sup> Mia bogo napano Lesveti naio mijog lubar Mere jooṽo ka mil banio, naio mijog ka kenerinio napano joa naio, bijobijo toru. Naruei Niununo Lu binimeĩ ea Lesveti, naio binimeĩ bujolou eaio, <sup>42</sup> naio miaga manenea, berinavo

“Aiou Mere, Atua rilivu kaso ve toru laka, loa tira dolu nalo aviniu, a mia kanano burum̃ara ilivuiano toa bunu kanamo m̃arati napano mia kovario! <sup>43</sup> Kiniou maka nove tira na memedu leleio ka mia kanaku Tubo Kenieno rimeĩ riadu ka kiniou tibe nei, mia namial kirinovo laka ban kiniou. <sup>44</sup> Mia kanaku solbouo naio bitilubarso, naio jaaro toru laka, bior monloglog bogo napano numijog joomo be moti garuei, naio bijobijo toru laka ea kiniou. <sup>45</sup> Kito juo rajaaro mia rajaaro, bior robiekar batitig Atua Soṽi kanano iliano, a mia rimeĩ rive riano van kito juo tavukia ga napano naio berkar ban kito ruei.”

#### *Mere miaia Atua ka iouano tai*

<sup>46</sup> Ana ka bogo na, Mere kanano iouano tai jibe nei, berinavo

“Kanaku iviso miaia Atua toru, <sup>47</sup> niunuku jaaro toru laka ea Tubo kiaku ioruriano,

<sup>48-49</sup> naio mial kiniou nojotano, tira na kiano im̃auano tai, naio be Atua na Moroano, jidomial kiniou,

mila tonovo ban kiniou.

Taara nalo napano amei iorou, averii kiniou, averinavo

‘Tira nei, Atua milivu toru.’

Nomidular siano lu,

<sup>50</sup> tinien miia nalo nam̃a ajutano kanio,

taara re nua, na iorou.

<sup>51</sup> Moroano na jum̃ano mila vite miroano,

naio jiburevure nalo nam̃a tinielo jikili,

mila dedade ealo abeve terakurano.

<sup>52</sup> Mila bulag parinio tubo den jelelo, bitiri bulag nalo nam̃a jidomiano batove ga.

<sup>53</sup> Nalo nam̃a jjerlo, naio bagan batitiglo,

nalo nam̃a abe sanibaiano,

naio mijil bulaglo, jum̃alo yauo ga.

<sup>54-55</sup> Naio mila nam̃a berkario nua ban korobido nalo,

binimeĩ miija kito, kanano kulo Israael nalo.

Maka rivitoviton ea Epraamo,

tinienriia kiano bajulukuti namāriga-  
o tobo to.”

<sup>56</sup> Naina naruei Mere kiano iouano maaro ea vio na, mia naio jo bija Lesveti bano-o bokar siberio tolu, karina ban ea kanano vonuo bereio.

### *Jone Baruei naio moluo*

<sup>57</sup> Naruei binimej monloglog bogo na mia Lesveti rudu kenerinio, mia naio barlar be suñano. <sup>58</sup> Mia bogo napano Lesveti kiano mārataro bija tomu na vaataro nalo amijogial vite nei, nalo ajaaro toru laka bija naio ka Atua kanano burumāra tinieiano nei banio, ka beamu naio be jumolumu ga, mia vonganei naio barlar kenerinio motoru. <sup>59</sup> Mia bogo na kiritete nei naio bokar bogoti aluo, ana abinimej ka ala pakuveu ka naio. Ka bogo na, ajidom ka adu siano bunu, avio ka Sakaraia, tibe ka karamāno siano, <sup>60</sup> mia kiritete keniemo berbure, berinavo “Makanio, naio siano Jone.” <sup>61</sup> Naruei nalo amil banio, aberinavo “?Venia na? ! Maka lele garuei kanamo mārataro tai napano adu sio na jibe na toa naio!”

<sup>62</sup> Naruei amil ka ga jumālo ban kiritete nei karamāno, ka avika denio ka naio jidom ka adu sio na vabe toa kenerinio nene. <sup>63</sup> Ana na Sakaraia mil ka jumāno banlo, ber adu mēsi tai rimej vanio, naruei naio bivitauia, berinavo “Siano, Jone.”

Vite na naruei mila nalo na vio na amiilo toru laka kanio, <sup>64</sup> mia monloglog bogo na bunu, Sakaraia minano mijuo, naruei naio mijikia mil bereio, ana na miaia Atua.

<sup>65</sup> Mia tomu nonovio nalo na tanobuku na, amijogial vite nei, amiilo va kanio, mia tukunuano nene mererako janea mārkomeli dolu nalo na tanobuku na suku nalo na vio Yutea. <sup>66</sup> Ana na nalo namā amijogio, ajidom bijovijon toru laka kanio, bior abitilubar ka Atua jumāno jo bijaio, naruei nalo ajumā abivika denlo, aberinavo “?Kiritete lu nei mia naio tumābe?”

### *Sakaraia berial iliano na Atua jian banio*

<sup>67</sup> Naruei Niununo Lu binimej bujomagmago ea Sakaraia, kiritete telisu nei karamāno, ana naio berial jibe nei, ber

<sup>68</sup> “Kito raiaia kanado Atua siano, Tubo re Israel,

batove kean kito, bulular kito,

<sup>69</sup> bitirilar kiano siyovo, miyotuba ea bajulukuti na kiano toro na ināuano Teviti, ka mia rilurur kito.

<sup>70</sup> Nina kiano verikariano nanua, naverialiano nalo aberialio, aber

<sup>71</sup> Naio mia rivuru bulag kito den kiado uolu nalo jumālo,

<sup>72</sup> tinieie ribobogia re kanano virakariano bija korobido nalo, tinien miialo kia ga vo.

<sup>73</sup> Nina verikariano jikili nene bija korobido Epraamo,

<sup>74-75</sup> nanua Atua berkar ber rilurur kito ka kiado uolu nalo jumālo,

ka romerou re bunu, rove lu, romemedu kamu ea mirano, roimāu kanano ka legiano nonovio ea kiado meuliano.

<sup>76</sup> Keneriku, mia avioso ka Atua Loa Laka kiano Naverialiano, mia kotukamu ka kala vatitig Tubo kiano mārabo.

<sup>77-78</sup> Mia koverial ka mia Atua tinien riia kiano tomu nalo, tinien tiilo, ana mia riviekokoa kialo kariano nalo,

a rilururlo.

Mia Atua riila kiano kiriyulu telisu na kavijo ve moti rimererali kito,

<sup>79</sup> rimej rimererali kito napano mā rojua melijokouo,

napano niununu namāriano miununuko kito ruei,

a mia rimej rimererali mārabo na tumāro ka rotumā reiel eaio.”

### *Jone Baruei miluo*

<sup>80</sup> Mia bogo na yuka nalo aju abarlaka bano, Jone nene naio miluo bavin ririo bo, a kiano jidomiano meruo batitigio, a naio biekouo ea Atua kiano ināuano bo. A naio ba joa vio yauo, ka riva rivokar bogo na

mia naio monoka riyotuba ea kulo Israel nalo miralo.

## 2

### *Yesu moluo Mataiu 1:18-25*

<sup>1</sup> Ana ka bogo na, parinio tubo na kulo Romo kialo, naio siano Sisa Okastas. Naruei naio berial ka mia monoka avuluku tomu nalo na venuo nalo namã ajutano ka kiano vitikariano. <sup>2</sup> Imãuano na abuluku tomu nalo nei, naio be moti na amila jibe na, a ka bogo na amilaio, mia toro tai na Sisa kanano naio jomã bitikar burumãara tanobuku nei na vio Siria, a toro na toru nene, siano Kuarenias. <sup>3</sup> Ana ka ala imãuano nei, aberenio tomu nonovio monoka avanvan bereio ea kialo vio nalo, ka mia amijikia avivitauiã vatitig sialo, a avuluku vatitiglo.

<sup>4</sup> Vite na naruei mila ana Yoseve naio jumolu den komeli na vio Nasarete, namã naio jojoaio, nina ea tanobuku na vio Kalele, ana naio bavin ea komeli na vio Betleem, ea vio na tormoruo Parinio Tubo Teviti naio moluo eaio nua, nina ea tanobuku na vio Yutea, bior Yoseve naio miyotuba ea yati na tormoruo Teviti nene.

<sup>5</sup> Mo Yoseve burukar koano Mere jakisorio, napano ka bogo na, vaataro ka rivarlar kenerinio. <sup>6</sup> Naruei abe juo abano, mia bogo na nalo aju kia ga Betleem vo, mia Mere mijog ea naio ka kiano bogo na mia naio to joomo binimeï nonovio naruei. <sup>7</sup> Ana na Mere midu kenerinio motoru, naio be sumãano, a naio bivikakari batitigio ka niakulmãarauo, mia maka kanano vio nabo tai, bior abe juo amilavon ka ava atua yimo na valauo, mia naio bujo ruei, naruei Mere mila kenerinio mon joomo ea vio na abagan temeul nalo eaio.

### *Nailiano nalo amiyotuba ka navitikariano na nunu nalo*

<sup>8</sup> Naruei ka bogiano nene, be tomu tai namã abitikar nunu aju bija kialo temeul nalo, ea soro tavio ka Betleem nene ga. <sup>9</sup> Naruei Atua

kanano nailiano tai batove keanlo, a Atua kiano mermerano midulii rera vio nene jibe ka burumãara yulu tai, mila nalo nei amerou toru laka. <sup>10</sup> Naruei nailiano nei mil banlo, berenio berinavo “Kamiu kumerou re. Kiniou nomidu iliano nabo tai ka naver ka kamiu, ka mia naio mijikia rila tomu nonovio ajog rivu ve toru laka. <sup>11</sup> Ka bogiano nei ga, ea komeli na Parinio tubo Teviti re nua kanano, nina ea vio Betleem, kiritete solbouo tai naio moluo vonga, ka mia naio rive kenemiu ioruriano. Naina naruei be kenemiu Tubo, naio be Naverikariano namã Atua berkario nua ruei ka mia riilaio rimeï.

<sup>12</sup> “A naina naruei be kijokijo na vite nene: Mia kamiu kuvileal kiritete telisu nene, napano amila kokouro ea naio. Mia kuvial ka napano abivikario ka niakulmãarauo nalo ga, ka mia adu naio ka rimon ea vio na temeul nalo salo sinaniano.”

<sup>13</sup> Naruei nalo amiilo ka soŕeli ga, burumãara taara na nailiano dolu nalo na vio mave abinimeï amiasolo bija nailiano neibano. Naruei nailiano nalo nei amiaia Atua, a amiou aber

<sup>14</sup> “Mave niogovu, nalo ajuãã amiaia Atua toru, a ea yetemeriba nei, tunãaro joa tomu na Atua jaaro kalo.”

### *Tomu na abitikar nunu nalo aba Betleem*

<sup>15</sup> Nailiano nalo aberial iliano nei ruei, bisi na ajaluvo den tomu na abitikar nunu nalo nei bereio, karina abavin mave niogovu. Naruei nalo nei ajuãã aberverii vite nei banlo bereio, aberinavo “Ai, abe ravano. Bo ka rava Betleem ka reial vite nei miyotuba vonganeei, napano Atua berial ka kito.”

<sup>16</sup> Ana nalo amila soŕeli, aba amileal Mere naio Yoseve, a amijaka aba amiadu ka kiritete sesa napano monea mãano vio namã abavagan temeul eaio. <sup>17</sup> Mia bogo na amial vite nalo nei, ana aber bulavulag nonovio iliano nalo napano nailiano berial kalo ruei, tivelinio na kiritete sesa nei. <sup>18</sup> Telikiti na

kulo dolu nalo amijog tukunuano nei, tinielo bujo ka burumãara vame-neano tai. <sup>19</sup> Mia Mere, mijekar vatitig nonovio vite nalo nei jua kiano iviso, maka tiniene ribobogia, naio jomã jo jidomiio julaka ga.

<sup>20</sup> Mia tomu nalo nei aban bereio ea kialo nunu nalo, a ajumã abame-neia Atua siano, a nalo ajumã amiaia naio toru laka ka vite kirinovo nalo napano amijogio a amialio, napano kirimemedu ga ka nailiano nei kiano iliano napano berial banlo.

#### *Amidu Yesu siano banio*

<sup>21</sup> Telikiti napano kiritete bokar kiano sude takurano, naio be bogo na mia ala pakuveu ea naio. Amila jibe na, kario ajisia ka Yesu, napano sio nei be sio nanua nailiano berial kalo jukamu ruei, avona bisi ana Mere naio be p̃igi kanio.

#### *Amidu dovorovo Yesu ban ea Atua Kunuano Lu*

<sup>22-24</sup> Telikiti na Yesu miyotuba sude ari barlaka ruei vo, bisi na be bogo na monoka avuru sida na lakoniano ea Atua Kunuano Lu, nina bior burukija na tira na bar tete. Naruei aba aburu sida nene, jakii tuboiano na Mosis kiano berenio, berinavo “Taliãasa nalo amijikia aue ga vaama ve juo, p̃eli na kirisibo ve juo.”

Ana ka bogo nene, amidu dovorovo Yesu ban ea Atua Kunuano Lu, amiokoio ban Atua. Vite na jakii Mosis kiano tuboiano, na naio berenio “Tete sumãano nalo nonovio na amoluo jukamu, nalo abe lu, abe Atua kanano.”

#### *Tormoruo Simion mial Yesu ea Atua Kunuano Lu*

<sup>25</sup> Mia be toro tai joa Atua Kunuano Lu ka bogo na, siano be Simion. Naio be tena vio Yerusalemo ga tai, naio be namemedu tai, a naio be toro tai namã biekouo ea bajago na volkouano. Naio jororea jidom m̃elea ka rial Atua kanano Natinieiano, nina Naverikariano, rimei ea kulo Israel nalo ea bogokouo nei ajaiao.

Mia Simion nei naio be toro tai namã Niununo Lu jojoa m̃a naio namãariga, <sup>26</sup> mia Niununo Lu berial ka naio ruei ka mia naio rivakovio re vo rivano-o mia mirano rialio Atua kiano Naverikariano. <sup>27</sup> Ana Niununo Lu buru naio binimei ea Atua Kunuano Lu, monloglog bogo na amidu kiritete sesa Yesu binimei, ka ala bajago na tuboiano nene.

<sup>28</sup> Ana Simion midu kiritete nene, ana naio miaia Atua a ber siva banio, berinavo

<sup>29</sup> “Tubo toru o, vonganei nemial vite na jau koberkar ka kin-iou, naio miyotuba ruei. Mila tumãaro binimei ea tinieku, ana vonganei jau komijikia kajamo ka kinio kanamo naimãauano, nataluvo den yetemeriba nei nevedu.

<sup>30</sup> Ea miraku ga namial kanamo Ioruriano, <sup>31</sup> napano komiila binimei ea tomu kinkin nalo na yetemeriba nei miralo,

<sup>32</sup> javukia yulu tai napano jiloglogso ka kulo dolu nalo, a ka mia aiaia kumemi kanamo kulo Ju nalo, bior kenememi mermerano nei, Yesu.”

<sup>33</sup> Ana Yoseve naio Mere, abe juo amiilo toru laka ka Simion kanano iliano nalo namã berii Yesu, <sup>34</sup> ana Simion mil bereio, milivu kalo, naruei naio mil ban Yesu kenieno, berinavo

“Atua mila kiritete nei binimei ban kito na vio Israel ka rila kito ve telabo rojoru,

a kanio rila kito ve telabo rotumolu bereio.

Atua mila naio binimei jibe ka kijok-ijo tai, mia tomu ve telabo ail rivova ka naio,

<sup>35</sup> ana tibena mia naio rila kialo jidomiano nalo napano m̃a ajuluku nei amalmaluvo ea vio medave.

Mia tivelinio ka jau, mia jogvaiano tulu tiniemo tavukia iobogu na mira, mia kanamo iviso rivurupeio kar tenalo na napano mia ayotuba ka kenerimo nei.”

*Tiramoruo Ana mial Yesu ea Atua Kunuano Lu*

<sup>36-37</sup> Mia tiramoruo tai bunu jo ka bogo nene, siano Ana, napano naio be naverialiano tai. A Ana nene, karamãano siano Vanuele, napano naio miyotuba ea yati na tormoruo Aisere re nua. Naio joro nua ruei, ka bogo na naio be niatira kia ga vo, mia naio jo bija koano ka yuka aluo ga, ana koano m̃aro denio. Naruei naio be taanou jibe na ga, bano-o kiano yuka bokario duelimo va arolu ba veri [84].

Naio be tira tai napano monmon ka ga m̃a jojoa m̃a Atua Kunuano Lu, napano naio jo m̃a bijurukar bogo na lotuano na kavijo bano-o bokario na kijeve, a dam̃ariga naio monduka m̃a jo bolkouo.

<sup>38</sup> Ka bogo na naruei, naio binime i vaataro kalo, ana naio bolkouo, ber siva toru ban Atua bior kiritete nei, a iorou ka nina, naio ba tavio ba jo m̃a berii Yesu ban tomu nalo nam̃a aju ajirarag rorea ka Atua rime i rilarur Yerusalemo, mia Ana ber bisivisii banlo ka kanalo Naverikariano naio binime i ruei.

*Yoseve nalo aban bereio Nasarete*

<sup>39</sup> Telikiti napano Yoseve naio Mere amila nonovio vite nalo nei biniu javukia nam̃a Atua kanano tuboiano berenio, mo Yesu abatove bereio ea kanalo komeli na Nasarete, nina ea tanobuku na vio Kalele. <sup>40</sup> Mia kiritete nene miluo binime i toru, a kiano jidomiano binime i be masou laka, a amial ka napano Atua miija naio ka naio rila vite nonovio rivu ea kiano meuliano.

*Yesu be m̃eaku kia ga, naio berloglog tomu nalo ea Yimo Lu*

<sup>41</sup> Ana ka yuka nonovio, kulo Ju nalo ajum̃a amila kanalo jokoluolu tai, napano naio be Sidomkariano na Ioruriano. A dam̃ariga, nalo nam̃a aju janea vio dolu, tiniel jii toru ka avavin Yerusalemo ka ala jokoluolu nene, a Yesu kanano tormoruo juo bunu amila jibe na.

<sup>42</sup> Ana ka yuka tai, bogo napano Yesu kanano yuka bokar duelimo ba juo [12] kia ga vo, aban bereio aburu Yesu bijalo. <sup>43</sup> Mia amila vite nalo na jokoluolu nei bano-o biniu, ana tomu nalo amieliel bere abanvan ea kanalo vio nalo. Mia Yesu naio maka rivano, naio jobo kia Yerusalemo, mia kanano tormoruo juo, maka ajikiaio. <sup>44</sup> Naljuo ajidomii aberiam̃a naio jo kovio bija lo bure burum̃ara taara na m̃aratavo bija kanalo bilbilu nalo, mia nalo amiel ba bokar legiano momou takurano. Mia bogiano ana ajirag Yesu bano-o, <sup>45</sup> mia maka aialio to vijalo, naruei nalo amial ka monoka atakii bere jaalo ava Yerusalemo alavon ka alealio. <sup>46</sup> Amiel bogoti takurano momou, abinime i aboru bereio Yerusalemo, nalo ajiragio bano-o, ana ea bogoti dolu nene, be bogoti tolu na kialo ieliano, ana amileal vonga naio, amial naio jo m̃a jotano ea Atua Kunuano Lu. Naio jotano bija naverloglogiano nalo na vio na, naio jo m̃a mije tiliniene ka kialo iliano nalo, a jo m̃a bivika vikadeniano denlo. <sup>47</sup> A nalo nam̃a aju vaataro ka Yesu ea bogo na, amiilo toru ka kiano burum̃ara masouano a jikiaiano na, a kanio verdopeiano nalo nam̃a naio jian ban nalo nam̃a ajum̃a abika vite denio. <sup>48</sup> Ana telikiti napano kanano tormoruo juo nalo amial ka napano naio jo m̃a mila jibe na, amiilo toru kanio, ana kenieno mil banio, berinavo “!Ai, keneriku! ? Bior vaio ana kojidom ka kala lelan kumemi ve toru tibe na? Keialio, kumemi juo numisiragso-o mia, maka lele nuvillealso, komila kumemi numijog kirivova-o mia.”

<sup>49</sup> Ana ka bogo na Yesu midu verdopeiano tai banlo, napano ber jibe nei, berinavo “? Bior vaio ana kubano kumitum̃a kumisirag kiniou janea vio dolu nalo jibe na? Jum̃abe, kamjuo maka kumisidomii ka kiniou monoka notom̃a nala Teta kanano im̃auano joomo ea kunuano?” <sup>50</sup> Mia verdopeiano na

ber kalo, maka ajikia ajog lubar nioti nene. <sup>51</sup> Naruei Yesu jumolu den vio nei, ana naio ban bijalo, abatove bereio ea kanalo vio Nasarete.

Ana Yesu jobo bijalo ea vio na, naio jo mijogkarlo bo dañariga. A kenieno Mere naio jomã jidomikar vite nalo nei joomo ea kanano iviso bogo nonovio. <sup>52</sup> Mia yuka nalo aju abinimei abarlaka bano, mia Yesu jo miluo binimei toru nonovio, a kiano masouano bija kiano moroano jo binimei toru lie vo, mia Atua jo milivu kanio toru laka, mila ana tomu nalo amial naio bo laka, ajaaro toru kanio.

### 3

*Jone Baruei naio joa vio yauo, jomã mioliolu ka naviligiano*

<sup>1-2</sup> Yuka tealó bar laka ruei vo bisi, ana Jone Baruei, Sakaraia kenerinio, naio miyotuba ea vio yauo. Nina ea bogo na burumãara parinio tubo Taiperias Sisa na vio Romo naio be tubo bokar kiano yuka duelimo ba jimo ruei, ana ka telikiti na naio bitiri bulag kanano tomu na tortoru nalo tai ruei, jibe Pontas Pailat, naio mije tuboiano ea vio Yutea, a Erot, naio mije tuboiano ea vio Kalele, a kuruano Vilip, naio mije tuboiano ea tano na vio Ituraia bija Trakonaetis, a Lesanias, naio mije tuboiano ea tanobuku na vio Abilini. Ana ka bogo na bunu, parinio kulo lu juo napano mã aju Yerusalemó, be Anas naljuo Kaivas.

Mia Jone joa vio yauo, ana Atua jian iliano ban naio, <sup>3</sup> naio ba jeliviv ea tanobuku nalo na Yortano, naio jomã mioliolu berinavo tomu nalo monoka aviliglo, a avaruei, tibe na ana mia Atua riviekokoa kanalo kariano nalo. <sup>4</sup> Naio mila javukia ga na nanua mã Naverialiano Aisea naio ber nua ruei ea kiano niosi, napano mã berenio

*“Niono tai naio jo bio ea vio yauo, berinavo: Kuvila vatitig Atua kanano m̃arabo nalo, ka naio*

*mijikia rimei ea kenemiu meuliano nalo.*

<sup>5</sup> *Mia monoka kuvitiviniko bořařili nalo,*

*a monoka kuvikili bulag yasuku nalo avatove rivu,*

*a vio nalo na jorokoro monoka nalo amemedu rivu,*

*a vio nalo namã jukujukuduo monoka nalo aierivin rivu;*

<sup>6</sup> *tibe na, ana mia taara nonovio na tomu nalo aial kialo Ioruriano napano Atua riila riel ea m̃arabo nei riyotuba kalo.”*  
*Ais 40:3-5*

*Tomu nalo abinimei ka Jone*

<sup>7</sup> Imãuano na be Jone kanano, naio jo ka mã rioliolu tibe na naruei, mia telikiti na tiniobi toru aba tavio ea vio yauo ka naio rivaruei ealo, naio mil jikili banlo, naio ber jibe nei berinavo “Kamiu na kumitibe ka maro nalo ga napano amerou ka sebi tai ana aburo, mia kuberiamã kumijikia kuvuro ka buruta kenieno sebi na mia Atua rionio rimei? Makanio, bior maka kuvilig kamiu vatitigio vo. <sup>8</sup> Mia ver kuberiano ka napano kumerou ka vironiano nei, kenemiu meuliano monoka avar m̃arati nabo napano rivare ka kenemiu viligiano nene. Mia kuvitigar, kuve re m̃arou bereio, tibe ka namã kumila ruei, namã kumitumã kuberinavo ‘Ee, kito roju bo ruei, bior kito naruei robe Epraamo kiano yati nalo memedu kia nei.’ Mia nina maka titenia, bior ver Atua sidom, naio mijikia rivar puruveru nalo na ga rimãukalo ave Epraamo kanano yati ve telabo, ka mia adu jelemiu. <sup>9</sup> Kiniou neber ka kamiu, ka m̃aryekesi jo ruei ka te bulag buruiesi nalo na maka avar m̃arati nabo, ka avukulo avan ea burutinia sebi.”

<sup>10</sup> Telikiti na tiniobi neibano amijogio amerou mia amerou, ana abika aberinavo “Mo aver tibe na, ana mia kumemi nuvila tumãbe naruei?”

<sup>11</sup> Ana Jone berdoĝelo, berinavo “Toro na ĉano kulukoti juo, mia monoka naio rijamo ka tinene van toro na maka ve ĉano tai; a toro na be sano sinaniano miroano, mia naio monoka riviovio ka tealo van toro na maka ve sano taio.”

<sup>12</sup> A tomu na takis, naĉa abe tomu na jukujukuano memedu, telabo bunu abinimej ka Jone rivaruej ealo, mia nalo bunu abitilubar kialo vovaiano nalo, naruej abika bunu aberinavo “? Naverloglogiano, tuĉabe ka kumemi, mia monoka nuvila tuĉabe?”

<sup>13</sup> Ana naio ber kalo, berinavo “Mia kuvar den tomu nalo rive verare ka ga nana mia monoka avuluio, mia to loa re, tibe ka naĉa kumilala mugaruej.”

<sup>14</sup> Mia tomu na mira tealo bunu abika jibe na ka Jone, aberinavo “? Mia kumemi, nuvila tuĉabe?”

Naruej naio ber kalo, berinavo “Kamiu kubar kenemiu tenalo na mira ana tomu nalo aju amerou laka ka kamiu, mila na bogo napano kamiu kumisidom vite tai, kuber ga, ana nalo monoka ajamo bior napano amerou. Mia bajago na, mia monoka kuvila re bereio. A kamiu kumituĉa tiniemiu mimi daĉariga ka kuber tom na tortoru nalo ajuĉa abulu kamiu telisu ga, ĉeli bare ga kovio vo, mia kamiu monoka kuvisaaro ga kanio.”

### *Jone berenio mia Naverikariano rimej*

<sup>15</sup> Mia ea bogo na, kulo Ju ajidomii aber kialo Naverikariano vaataro ka maluvo, ana nalo amijog Jone kiano ilinovoiano nalo nei, ana nalo ajaaro kanio, naruej vikadeniano joa kialo jidomiano, ajuĉa abivika, aberinavo “?Aa, ĉeli toro na naruej, ĉeli naio be kiado Naverikariano koviobo?”

<sup>16</sup> Mia Jone naio juĉa ber lubarbario banlo, naio berinavo “Makanio, kiniou nebinimej jukamu, nojuĉa nabaruej ea kamiu ka uej ga, mia be toro dolu tai

napano naio jo binimej iorou ka kiniou. Toro nene, naio loa lie vo ka kiniou, mia kiniou maka navare ka neialar kanano kulubue na jaano, ĉeli nala kanano iĉauano dolu tai. Mia naio naruej, mia rivaruej ea kamiu ka Niununo Lu, rivija kanano sebi, ka risebi kon niamiamo nono den kenemiu meuliano nalo. <sup>17</sup> Naio jibe ka napano naio midukar buruĉia ĉarteja tai, ka mia rikurkar ka uiti nalo, riĉilig kon ĉarati nalo. Tibe na, ka mia naio rivar ĉarati uiti nabo nene ava vonuo, mia naio rivuku vinikiti nene rivan ea sebi tai napano mia maka rijikia riĉaro bogo tai.”

<sup>18</sup> Nina naruej, Jone Baruej naio juĉa mioliolu ka ioluano vou nabo ban tomu nalo jibe na naruej, a naio juĉa ber iliano dolu nabo telabo ka tunukakarlo, a ka rilabonlo. <sup>19</sup> Mia be toro tai naio tiniene maka saaro ka Jone nene leleio, nina be Parinio tubo Erot, bior ka napano Jone naio juĉa mil banio ka napano naio burular tira nei Erotias, napano kuruano koano, mia mil banio bunu ka vite dolu telabo napano juĉa milaio. <sup>20</sup> Mia loa ka kanano vovaiano dolu nalo, Erot tinien jer Jone banbano-o deio, ana jumolu buku naio ban ea yimo na lakoiano.

### *Jone baruej ea Yesu*

#### *Mataiu 3:13-17; Mak 1:9-11*

<sup>21</sup> Mia bogo na Jone maka rivan ea yimo na lakoiano vo, naio juĉa baruej ea tomu nalo banbano-o, mia bogo tai ana Yesu bunu binimej ea vio nene, ana na Jone baruej ea naio bunu. Naruej telikiti na Yesu jaluvo den uej, naio juĉa bolkouo, ana vio mave betavo, <sup>22</sup> naruej Atua kanano Niununo midu niabene, naio batove binimej jibe ka vaama tai, binimej bujo jua naio. Ana na Atua mil jel mave batove berkanio, berinavo “Jau kobe keneriku na, naĉa nejidomso toru laka. Tinieku joaso, tinieku jaaro toru kaso.”

*Yesu korobinio nalo  
Mataiu 1:1-17*

<sup>23</sup> Mia iorou ka na Jone baruei ea Yesu, ana na naio jikar kiano iñauano naruei, ana ka bogo na, naio kiano yuka bokar duelimo va rolu. Mia yati na Yesu miyotuba eaio, nina tivelinio ka suñano, jikar ea Yoseve, napano amial jibe ka naio be Yesu karamñano, naio jo ban jibe na:

Yoseve, naio be Eli kenerinio

<sup>24</sup> Eli naio be Matata kenerinio

Matata naio be Livai kenerinio

Livai naio be Melki kenerinio

Melki naio be Janae kenerinio

Janae naio be Yoseve kenerinio

<sup>25</sup> Yoseve naio be Matateas kenerinio

Matateas, naio be Amos kenerinio

Amos, naio be Neam kenerinio

Neam, naio be Esli kenerinio

Esli, naio be Nagae kenerinio

<sup>26</sup> Nagae, naio be Mat kenerinio

Mat, naio be Matateas kenerinio

Matateas, naio be Semein kenerinio

Semein, naio be Yosek kenerinio

Yosek, naio be Jota kenerinio

<sup>27</sup> Jota, naio be Joanan kenerinio

Joanan, naio be Resa kenerinio

Resa, naio be Serupapele kenerinio

Serupapele, naio be Sieltiel kenerinio

Sieltiel, naio be Neri kenerinio

<sup>28</sup> Neri, naio be Melki kenerinio

Melki, naio be Adi kenerinio

Adi, naio be Kosam kenerinio

Kosam, naio be Elmñatam kenerinio

Elmñatam, naio be Ere kenerinio

<sup>29</sup> Ere, naio be Yosua kenerinio

Yosua, naio be Eliesa kenerinio

Eliesa, naio be Jorim kenerinio

Jorim, naio be Matat kenerinio

Matat, naio be Livai kenerinio

<sup>30</sup> Livai, naio be Simion kenerinio

Simion, naio be Yuta kenerinio

Yuta, naio be Yoseve kenerinio

Yoseve, naio be Jonam kenerinio

Jonam, naio be Eliakim kenerinio

<sup>31</sup> Eliakim, naio be Melea kenerinio

Melea, naio be Mena kenerinio

Mena, naio be Matata kenerinio

Matata, naio be Netan kenerinio

Netan, naio be Teviti kenerinio

<sup>32</sup> Teviti, naio be Jese kenerinio

Jese, naio be Ovete kenerinio

Ovete, naio be Boasa kenerinio

Boasa, naio be Sala kenerinio

Sala, naio be Nesono kenerinio

<sup>33</sup> Nesono, naio be Aminatapo kenerinio

Aminatapo, naio be Atmin kenerinio

Atmin, naio be Ani kenerinio

Ani, naio be Esrono kenerinio

Esrono, naio be Peres kenerinio

Peres, naio be Yuta kenerinio

<sup>34</sup> Yuta, naio be Yakovo kenerinio

Yakovo, naio be Aisak kenerinio

Aisak, naio be Epraamo kenerinio

Epraamo, naio be Tera kenerinio

Tera, naio be Nao kenerinio

<sup>35</sup> Nao, naio be Seruk kenerinio

Seruk, naio be Reu kenerinio

Reu, naio be Pelek kenerinio

Pelek, naio be Epa kenerinio

Epa, naio be Sela kenerinio

<sup>36</sup> Sela, naio be Kaenan kenerinio

Kaenan, naio be Avaksati, kenerinio

Avaksati, naio be Sem kenerinio

Sem, naio be Noa kenerinio

Noa, naio be Lamek kenerinio

<sup>37</sup> Lamek, naio be Metusela kenerinio

Metusela, naio be Inok kenerinio

Inok, naio be Jarete kenerinio

Jarete, naio be Malalel kenerinio

Malalel, naio be Kaenan kenerinio

<sup>38</sup> Kaenan, naio be Enos kenerinio

Enos, naio be Sete kenerinio

Sete, naio be Atam kenerinio

ana Atam, naio be Atua kenerinio.

## 4

*Siñaro nalo kanalo parinio tubo,  
napano Setano, milavon Yesu*

*Mataiu 4:1-11; Mak 1:12-13*

<sup>1</sup> Naruei telikiti na Yesu naio binimei bereio ea tanobuku na marauei na Yortano ea vio na Jone baruei ea naio, naio binimei bujo vatitig ka Niununo Lu. Ana na Niununo buru Yesu ban ea vio yauo bereio, <sup>2</sup> mo naio joa vio na bano-o bokar bogoti duelimo va veri [40], napano mia

siĉaro nalo kanalo parinio tubo nei jomĉa milalilio. A ka bogoti nalo na, naio maka mĉa to sinano, banbano-o na mijog ka jijer naio.

<sup>3</sup> Ana Setano nene binimej, berinavo “Ver jau kobe Atua kenerinio riano, jau kover von ka puruveru na ka rimej rive joko, ka kosenio.”

<sup>4</sup> Ana Yesu berdoĉe, berinavo “Maka leleio, bior Iliano Lu naio ber ruej, berinavo ‘Maka toro rijikia rila toro rimeul ea sinaniano ga.’”

<sup>5</sup> Ana na Setano jidom rilavon Yesu bereio, naruej naio buru kanano jidomiano bavin ea burumĉara burusuku tai. Ana vaarakurano ga naio jiloglog buruvenuo nalo na yetemeriba nei kanio, <sup>6</sup> ana naio berkanio, berinavo “Navitikariano na vio nalo na, bija kialo mermerano nonovio nalo na, ajua jumĉaku ruej. Kiniou nabar siano kario, ka namijikia najamo ka van kei napano tinieku ka naio.

<sup>7</sup> Mo, ver jau kojorua jaaku ga, kobolkouo ka kiniou ga, mia kiniou najamo ka vite nalo na riviniu tua jumĉamo.” <sup>8</sup> Mia Yesu berdoĉe, naio berenio berinavo “Iliano Lu naio berenio ber

‘Jau kobolkouo ka Atua ga, jau monoka kala kanano iĉauano naio ve takurano ga, bior naio ga be kanamo Tubo.’”

<sup>9</sup> Naruej Setano naio jidom rilavon Yesu bereio, naio buru kiano jidomiano ba Jerusalemo, midu naio jo levlevi ea vio tai, mave ea Atua kunuano, ana berkanio, berinavo “Ver jau kobe Atua Kenerinio, koviako yetano. Ver jau kalaio, mia rivu ga na, <sup>10</sup> bior Iliano Lu berij Atua, berinavo

‘Naio mia riila kiano nailiano nalo, ka mia amej atu avitikarso, atukuku kaso.

<sup>11</sup> Mia aisopkarso mave ga ka jumĉalo ka mia kavan re jaamo ea puruveru.’” *Iouano 91:11,12*

<sup>12</sup> Mia Yesu berdoĉe naio bereio, berinavo “Maka leleio, bior Iliano Lu ber bunu ber

‘! Jau kolavon re Tubo kiamo Atua ka naio rila kanamo vite tai!’”

<sup>13</sup> Mia telikiti na Setano mila juboluboiانو nalo nei bisi, ana buro denio, ba jo rorea ka rileal bogo dolu tai napano naio jidom ber mia mijikia tovulu Yesu eaio.

*Yesu jikar kiano iĉauano yako Kalele*

*Mataiu 4:1-11; Mak 1:12-13*

<sup>14</sup> Karina, Yesu miel ea moroano na Niununo Lu, binimej boru Kalele, mia tomu nalo ajumĉa aberij naio banbano-o ba bokar vio nonovio ea tanobuku nei. <sup>15</sup> Ana naio jomĉa ban ea kanalo yimo nalo na volkouano, naio jomĉa berlogloglo, naruej nalo ajaaro toru kanio, ajumĉa amidular siano bavin.

*Nalo na vio Nasarete amijilar Yesu*

<sup>16-17</sup> Bogo tai Yesu binimej boru ea kiano vio Nasarete, vio napano naio miluo binimej toru eaio, ana ka Legiano Lu, javukia namĉa naio jomĉa mila bogo nonovio, naio ban bijalo ea kanalo yimo na volkouano. Ana aber naio rivuluku bulag Atua kanano Iliano Lu vanlo, ana na amidu niosi namĉa Aisea naio bivitauia binimej banio. Ana naio jumolu betavo ea niosi nene, mileal vio na naio jidom rivuluku bulag vanlo, ana naio bulukuio, napano naio ber jibe nei, berinavo

<sup>18</sup> “Niununo na Atua kanano naio joa kiniou ruej, bior Atua naio jiloglog kiniou ka kiniou naruej noioliolu ka Iouano vou nabo rivan talimĉasa nalo.

*Naio miila kiniou nebinimej ka neverial van nalo na ajua lakoiano, ka vonganei, amijikia avanvan tavio bereio ga tibe na,*

*a ka kiniou neverial ka merebono nalo, ka vonganei, miralo mijikia rimej rivu bereio.*

*A naio miila kiniou, ka tomu nalo namĉa ajutano, napano kulo dolu nalo ajumĉa amila kikilo*

*Julaka, mia kiniou novuru bulaglo, amei atua vio tai nabo bereio.*

<sup>19</sup> *Tenene na, kiniou nemijikia nala rimeravo, ka vonganei, Atua mila kanano bogo vou nabo tai miyotuba ka tomu nalo nene naruei.”* *Ais 61:1,2*

<sup>20</sup> Telikiti na Yesu buluku nina bisi, ana na mijukukarko niosi nene, jian ber ban tikon, ana naio ba jotano mave ea jeleigio vio naña amioliolu eaio, ka naio ril van tomu nalo. Naruei nalo abiniu napano aju joomo aju abiti kilkil ea Yesu ka ajog ka venia napano mia naio river kalo. <sup>21</sup> Mia bogo napano naio jikar kiano iliano, naio ber jibe nei, berinavo “Kiniou neber ka kami, ka Atua kiano Iliano Lu na kumijogio vonganei, iliano nalo nei kanano abinime be riano bo vonganei ga, ea miremiu.”

<sup>22</sup> Mia telikiti na tomu nalo amijog Yesu kiano iliano nalo nei, amijog jibe ka naio mil bo mia bo, melokloko a madigdig, mia nalo abameneao toru, ajuma aberverenio jibe nei, aberinavo “!Ana kema na, naio be Yoseve kenerinio ga na! ?Mia naio joma bar tanea iliano novo nalo na ea vio be?” <sup>23</sup> Ana na Yesu berdoŝelo, berinavo “Peli kumisidom kuver kanado iliano moruo tai ka kiniou, napano ber ‘Nakulekuleano, jau kala vatitigso beamu vo, karina jau komijikia kajai tomu dolu.’ Nina bior kami kumijog ruei ka bogo napano nojo yako Kapeneam, nojoma namieliel ka tomu telabo, tenene na kumitu kumisidomii kuber bior vaio ana maka nemei nala tena van kami ea kanado vio nei bunu. <sup>24</sup> Be riano never ka kami, ka ver navelialiano tai, mia tomu na kanano vio memedu, maka ajikia asaaro kano, maka ajikia avatove kano. <sup>25-26</sup> Nina be riano ga. Nejidom ka kami kuvisidomii von tormoruo Elaija re nua. Ka bogo na, yuo maka rivovo bano-o bokar yuka tolu togio,

a burumara vituiano tai jovuko rera vio Israel. ?Ana Atua miila Elaija ba miija kei ka bogo na? Kam kuvialio, naio maka riila naio rivan ka riija taanou re Israel tai naña aju amijog bova, mia naio miila ba miija taanou na bulukomeli na vio Serevati, nina ea tanobuku dolu na vio Saiton. <sup>27</sup> A kuvisidomii von tormoruo Elisa kiano bogo bunu. ? Ka bogo na, tomu miroano na abar burumieni, mia Atua milarur kei? Naio maka rilarur nalo na Israel tai na bokar mieiano nei, mia naio milarur toro re Siria nei, Nomano. Be riano, kito tomu nalo naña roju rober kito robe Atua kiano tomu nalo memedu, mia nalo naña Atua miilalo abinime ka ala imauano van kito, mia kito romielikue kalo ga.”

<sup>28</sup> Ana na nalo napano aju joomo ea yimo na volkouano nei amijog iliano nei, kialo jidomiano bilig ba be dolu, vonganei nalo tiniel jer Yesu toru. <sup>29</sup> Naruei nalo ajermi ka Yesu, ana aburio bano, aburu ba tavio ka kanalo komeli, ana aburu naio ba abavin ea burumara yabalili tai napano kanalo komeli joaio ka ajidom avuku Yesu rivatove ea vio na naruei. <sup>30</sup> Mia Yesu jaluvo den jumalo bea ga, ana naio miel jel burelo ga bano, naio juvanlo ajubo.

*Yesu ban ea vio Kapeneam, naio miilalar niadu tai*  
*Mak 1:21-28*

<sup>31</sup> Ana na Yesu miel batove bokar komeli dolu tai na vio Kalele, nina be Kapeneam, mia ka Legiano Lu berlogloglo ea kanalo yimo na volkouano. <sup>32</sup> Mia nalo naña amije tilinieto amiilo toru laka, bior amijog Yesu kanano iliano temi bo, a Atua kanano moroano joaio. <sup>33</sup> Ana ka bogo na, toro tai jo joomo naliko, napano niununo na simaro va tai joa mila bulag naio, mia toro nene miaga merere kirivova tai vo, naio mil ban Yesu, berinavo <sup>34</sup> “? Ei, Yesu re Nasarete, kiamo vaio joa kumemi? !Peli jau kobinime ka

kalakiki kumemi, a! Bior nemijiki-  
aso ruei, ka kobe Toru Lu nabo tai  
na Atua kanano.”<sup>35</sup> Ana Yesu mil  
jikili ban niadu va nene, berbureio,  
berinavo “!Ee, abe keil re bunu! Jau  
kataluvo den toro na vonganei ga.”  
Ana niununo va nei buku toro nei  
mijoru iviso burelo, ana na naio  
jaluvo denio, buro bano, mia toro  
nei mijog bo bereio jo.

<sup>36</sup> Naruei tomu na vio nei amiilo  
toru laka, mia nalo ajumã aberverii  
Yesu, aber “Ei, iliano na jumãbe  
tenia na? Nina be buruvayukouo  
tenia, kiano moroano buru tomoruo  
loa laka. Naio mil ga ban niununo  
va nalo, mia aburovuro jibe na ga.”  
<sup>37</sup> Ana bior tena mia nalo ajaaro,  
ajumã aberial vatitig Yesu siano ba  
janea vio bokar vio nonovio na  
tanobuku nei.

*Yesu milarur Saimon Pitere ke-  
nieno simemi, naliko kulo dolu telabo  
bunu*

*Mataiu 8:14-17; Mak 1:29-34*

<sup>38</sup> Ana Yesu jumolu den yimo na  
volkouano nei, mia naio ban ea  
Saimon kunuano, nina ea komeli na  
Kapeneam kia ga vo. Naruei ea  
vonuo nei, Saimon kenieno simemi  
naio jo mon ea mãano jogu, mie yulu,  
niabene bituvitunu, mia aberial ka  
Yesu, abika den naio aber jumãbe  
ka tiramoruo nei. <sup>39</sup> Naruei Yesu  
binimej jikili ju tivelinio ka tira  
neibano, ana mo naio mil berbure  
mieiano nei, ana niabene binimej  
menini nonovio bereio, naio mijog  
bo bereio, ana jumolu, ba milaii  
salu sinaniano. <sup>40</sup> Mia bogo namã  
mãrenio batove, jibe ka na Legiano  
Lu na bisi, ana nalo namã nalo tealu  
amie ajumã, abarvarlo abinimej ban  
Yesu, ana naio mije jumãano mon-  
ealo, mieliel kalo.

<sup>41</sup> A telabo kalo, simãaro nalo abava  
tavio denlo, napano ajumã amiaga,  
aberinavo “!Ei, jau naruei jau kobe  
Atua kenerinio a!” Mia Yesu berbure  
simãaro nalo nei ka mia aver re bunu  
titai leleio, bior amijikia ruei ka naio  
be Naverikariano riano.

5:1 Mat 13:1,2; Mak 3:9,10, 4:1

*Yesu mioliolu janea tanobuku na  
Yutea*

*Mak 1:35-39*

<sup>42</sup> Mia kavijova kia ga vo, ana Yesu  
jumolu ana naio takurano batavio  
den yimo, ban ea vio tai napano  
be tumãaro bo. Kar iorou, ana  
tomu nalo abinimej kanio, ajirag  
naio bano-o mia amileal naio joa  
vio nei naruei, ana ajidom naio to  
naliko, amila vio ka averbure naio  
ka tuvanlo re, <sup>43</sup> mia naio ber kalo,  
berinavo “Makanio, monoka kiniou  
nava noioliolu ka loluano vou nabo  
na navenatuboiano na Atua kanano  
nei van komeli dolu nalo na aju  
keano vo, bior amiila kiniou nebin-  
imej ka vite nei naruei.” <sup>44</sup> Ana  
naio jaluvo denlo, ba mioliolu janea  
yimo na volkouano nalo ea komeli  
nonovio na tanobuku nei Yutea.

## 5

*Nalo napano Yesu biolo be moti,  
aba ajakisorio*

*Mataiu 4:18-22; Mak 1:16-20*

<sup>1</sup> Bogo tai, ana Yesu joa yaba  
ueiyabo na toru nei, namã tomu  
tealo ajumã abio ka Ueiyabo na  
Kenasarete, a tealu abio ka Ueiyabo  
na Kalele. Ana ka bogo na, tomu  
nalo miroano laka ajumolu aju jel-  
viviko Yesu, jibe ka vio telisu ga,  
bior ajidom ajog naio rioliolu ka  
Atua kiano iliano rivanlo. <sup>2</sup> Mia  
Yesu mial ka uako sesa juo aju ga  
vaataro kalo yako, napano aburulo  
abavauro ajua baramudou ea bay-  
ono, a naio mial ka napano tomu  
nene nalo ajudobi ea tei, ajumã  
ajekon kanalo suãede. <sup>3</sup> Mia Yesu  
miel bano-o biako ea uako sesa nei  
tinene, napano be Saimon kanano,  
ana naio berkanio ber naio riyuku  
lario rivajou lie kija ga. Naruei Yesu  
jotano ea uako sesa nei, ana naio  
jomã berloglog nalo napano mã aju  
bijilo uro.

<sup>4</sup> Mia bogo na naio mil banlo-o  
avona bisi, ana naio ber ka Saimon,

berinavo “Kito, kiniou nejidom rava-jou lie kija koyou von ka rovuku suþede beamu vo.”

<sup>5</sup> Ana Saimon berdoþe, berinavo “E abe toro na toru, kumemi numisidel ka tena ruei o-o viomijeni nei, maka nuvokar niado tai leleio. Mia bior jau naruei kober ka kiniou jibe na, bo, kiniou najaaro ka rava lie kija bere vo.”

<sup>6</sup> Ana nalo aba amila jakiiio napano Yesu berenio, mia amiilo ka buruñara taara na niado napano bujo ea kialo suþede, mila kanalo suþede jikar ka buruboþeio, <sup>7</sup> naruei abio nalo dolu nalo na ajua uako sesa dolu, ajuvanjuñalo kalo ka amei aijalo. Ana nalo nei abinimei, ana aburu bitiran suþede ka niado nalo nei binimei joomo ea buluku uako, bano-o uako juo nei abujovujo vatitigio, vaataro ka ña amadudu.

<sup>8</sup> Mia Saimon Pitere mial tenei, naio bitilubar ka Yesu ga mila tenei ea kiano buruñara moroano lu nei, ana minie tano ea Yesu jaano, berinavo “Tubo, kiniou nobe toro na bova ga tai. Bo laka ka kovuro den kiniou, jau kotu re vaataro ka kiniou.” <sup>9</sup> Mia maka naio ga ve takurano, mia nalo dolu napano aju naliko ka aura nei, nalo abiniu abameneao toru laka ka buruñara tiniobi na niado na abokarlo, <sup>10</sup> bija bunu Sepeti kenerinio juo nei, Yemesi naio Jone, napano naljuo amiasol Saimon amiñau vio takurano, naljuo amiilo toru kanio.

Ana na Yesu mil ba Saimon, naio berinavo “Ei, jau komerou re ka vite na tibe na. Bior tikar banei, mia jau kovuru bere re niado, mia jau kotomña kovuru tomu nalo amei atakisior kiniou.” <sup>11</sup> Ana nalo abinimei bereio, aburu kialo uako nalo nene abauro bereio, mia maka bunu ala titai, mia ajuvan kialo saba nalo biniu ju bo ga jibe na, ana ajakisior Yesu abano.

*Yesu mieliel ka toro na bar burumieni tai*

*Mataiu 8:1-4; Mak 1:44-45*

<sup>12</sup> Ana iorou kanio, ea bogo tai, ana Yesu joa komeli na vio na tai, ana toro tai mialio, binimei ka naio, napano toro nene, mieiano na burumieni mila tanea niabene-e mia mila bulagio laka. Naruei naio binimei mijoru ea Yesu jaano, jegi banio, bika jikili denio berinavo “! Tubo! Kiniou nomoneaso jikili ka jau komijikia kalarur kiniou bereio, mia ver jau komijamo, kiniou nejidom nevikaso ka jau kalakon kiniou ga.”

<sup>13</sup> Mia Yesu maka rienien ka tokol kiano menko nene, mia midu juñano joaio, naio berinavo “Nao, kiniou nejidom komeravo.” Mia vaarakurano ga niabene meravo, burumieni nei ñapñapvo denio. <sup>14</sup> Ana na Yesu berkanio, berinavo “Komijog, jau kava koverii re tenei ka toro tai vo, mia vonganei ga jau kejaka kava kesel ea toro lu ka naio riia veveso mia mijikia riverial niabemo meravo ruei. Karina monoka kava kolotu van Atua a keisebi sida na kanamo lakoniano, tavukia nañña Mosis naio ber monoka alaio.”

<sup>15</sup> Yesu naio ber toro nei naio riva riverii re vite nei, ana deio ga, maka vesiou ana ajuñña aberverii Yesu banbano-o, ba bokar vio reraio biniu, mila ana tiniobi na toru aju abinimei ka ajog kiano iliano nalo, a ajidom ka rilarur kialo mieiano nalo. <sup>16</sup> Mia ka bogo nalo nene, Yesu joñña miel batavio ea tomu nalo bunu, naio joñña janea vio yauo, bolkouo ban Atua.

*Yesu mijikia biekokoa kariano*

*Mataiu 9:1-8; Mak 2:1-12*

<sup>17</sup> Mia ka bogo tai, ana Yesu joñña berlogloglo, mia Varisis tai naliko naverloglogiano na tuboiano ajuñña ajutano ea vio nei, napano nalo abe nalo na komeli dolu nalo na tanobuku na Kalele bija Yutea, a tealoo ajuvan vio Yerusalemo abinimei. Ana ka bogo na, Atua kiano

moroano jo binimei toru nonovio ea Yesu, mila ana naio mijikia milarur tomu na mieiano nalo. <sup>18</sup> Ana tom tai aþier toro na mieiano tai binimei, napano niabene biniu maro, mia nalo aþier binimei, naio mon ea ga mano jogu. Ajidom adu naio riva joomo rimon vaataro ka Yesu, <sup>19</sup> mia amial tiniobi toru jo joomo ruei, mia vio nene telisu laka, maka ajikia adu kialo bilbilu rivano. Naruei amidu naio abavin ea yimo, ana amijag bulag vodobi mave memedu ka vio na Yesu jotano loglogio, ana ajuvarvan toro nei bija mano jogu batove ea buluvio nene ba jotano iviso ka tomu nalo, kamu kean Yesu mirano memedu.

<sup>20</sup> Mia bogo na Yesu mial vite nei, mijikia ka nalo aju abiekouo kilkili ea naio ka mia naio rijai toro na mieiano nei, ana naio berkanio berinavo “Koig, kiniou nebiekokoaso ka kiamo vovaiano nalo.”

<sup>21</sup> Mia bogo napano Varisis nalo bija naverloglogiano na tuboiano nalo amijog iliano nei, aju ajidomii kirivova-o mia, naruei nalo ajuma abivika denlo, aberinavo “?Kei tenia ma jo mil niegeniege tolu na Atua siano jibe na? Atua ga takurano naio mijikia riviekokoa kariano, maka toro dolu bereio, mia tete na naio jona mil jibe na ka jo jidom ber naio naruei, naio be Atua ruei kovio.”

<sup>22</sup> Mia Yesu mijoglubar ea naio ka ajuma ajidomii kirivova jibe na ka naio, ana ber kalo, berinavo “? Kar venia ana tiniemiu nalo bujo ka jidomiano na kirivova jibe na?

<sup>23</sup> Ver never ka toro na mieiano nei, neverinavo ‘Kiniou nebiekokoaso ka kanamo kariano,’ þeli kiniou never kanio neverinavo ‘Jau kotumolu, keiel,’ ana ea iliano juo nei, tinene jikili ka averenio, a tinene naio monmaio ga. Nana berenio ‘Jau kotumolu, keiel’ naio jikili lie, bior mia kamiu kumijikia kuvitilubar ka kanaku iliano nei naio be riano þeli na makanio, ka napano toro nei naio jumolu þeli maka tumolu. <sup>24</sup> Mia

vonganei, kiniou noimau ka titai na mia kamiu kuveriama Atua ga takurano mijikia rilao, kanio mia kamiu kuvitilubar ka kiniou Kulorinio Kenerinio nemijev moroano. A kiniou neber ka kamiu, neberinavo moroano nene naruei naio bare ka kiniou nemijikia neviekokoa kariano bunu ea yetemeriba nei. Kamiu kuviagago vatitigio.”

Ana Yesu ber ka namieiano nei, naio berinavo “Kiniou neber kaso, ka jau kotumolu, kojukular mamo jogu, jau keiel kava vonuo.”

<sup>25</sup> Mo soþeli ga, ea mirano tomu nalo na aju amialio, toro nei naio jumolu jibe na, midu mano jogu miel batavio, ana ba vonuo napano naio miaia Atua ga naio jo bano.

<sup>26</sup> Mia bogo na tiniobi nei amial vite nei, abamenea naio toru riano, kuluniabelo þili burevure biorio, a nalo ajuma amiaia Atua, ajuma aberinavo “!Uerei tom nei, riano ga, banei romial titai napano dolu laka!”

*Yesu bio Mataiu bunu, napano abio ka Livae, binimei jakisorio Mataiu 9:9-13; Mak 2:13-17*

<sup>27</sup> Iorou kanio, ana Yesu miel kiki kija ga bano, naruei naio mial toro tai jona jotano ea kiano vio na totanian na imauiano, joomo ea vio na ma barbiji veru na takis eaio. Toro nene siano tai Livai. Ana Yesu bio naio, berinavo “Jau komei katakisor kiniou.” <sup>28</sup> Mia soþeli ga Livai jumolu, juvan kiano imauano, juvan kiano saba nonovio ju bo ga jibe na, naruei jakisor Yesu.

<sup>29</sup> Karina, Livai nene mimauka Yesu sano burumara sinaniano tai ea kunuano, mia ka bogo na, tomu telabo dolu nalo nama abarbiji takis bija tomu dolu nalo na jibe na, nalo bunu abinimei ajutano vio takurano naliko Yesu a kiano naiagagoano nalo ea sinaniano nene. <sup>30</sup> Mia Varisis tealoo, naliko kialo naverloglogiano na tuboiano tealoo, amil niege naiagagoano nalo, aberinavo “?Bior

vaio ana kumituña kumisinin burukuti kamliko tomu na bova a tom na pariparilo kiri merorol na?”

<sup>31</sup> Mia Yesu naruei naio berdoĥelo, berinavo “Tomu na niabele jikili bo, maka ña tiniel tii ka ña avan ea toro naña miñauka mieiano, mia tomu naña amijogjog mieiano, nalo naruei ajidom naio toru. <sup>32</sup> Kiniou maka nemei ka novio nalo na ajumña aber amemedu ruei kamu ea Atua mirano ka atakisor kiniou, mia kiniou nebinimei bior tomu na bova jibe ka nalo na naruei, ka aviliglo rivior kialo vovaiano nalo.”

*Navikadeniano tai tivelinio ka atuvan sinaniano*

*Mataiu 9:14-17; Mak 2:18-22*

<sup>33</sup> Naruei nalo abika vikadeniano tai den Yesu, nalo aberinavo “Jone Baruei kanano naiagagoano nalo ajumña abokar jikili bajago naña vatelabo, ajumña ajuvan sinaniano kaña abolkouo ban Atua, a Varisis nalo bunu ajumña amilala jibe na. ?Mia bior vaio ana kanamo naiagagoano nalo maka atumña alalaio?”

<sup>34</sup> Ana Yesu berdoĥelo, berii naio bija kiano naiagagoano nalo, jibe ka napano amijog bo laka ka bogo na naio jo naliko, ana mia ajog rivova iorou ka bogo na ver naio taluvo denlo. Naio berinavo “?Bogo na toro na soriano naio jo kean ea jokoluolu naliko kiano bilbilu nalo, kuberiamña mia amijikia atuvan sinaniano na jokoluolu nei to, asenio re? Peli ga. <sup>35</sup> Mia ve bogo tai rimei napano mia avurular toro na soriano nei denlo, mia ka bogo na naruei mia nalo amijikia atuvan sinaniano bior amijog bova toru kanio.”

*Vite moruo a vite vou*

<sup>36</sup> Bajago naña ajuvan sinaniano na, naio be bajago moruo tai na kulo Ju nalo kanalo lotuano, mia Yesu jidom rila rimeravo vanlo ka bajago moruo nalo na jibe na, maka ajikia atusol vite vou nalo naña naio jomña berloglog kalo. Ana naio beri jamerijiano tai kalo. Naio berinavo “Jau maka kejikia kavar niati kulumñarauo tai na be

terivou, kejedeĥe lario niati nene tai, ana jau kotuluko ka kulumñarauo na be terimoruo ka toko vio na buruĥe be bulukuti eaio. Ver tibe na, jau komijedelar kule ga niakulmñarauo vou nene kurano ga, a niati nene, mia keial ve kirivova-o mia. <sup>37</sup> A jau maka kejikia koison mñarjumñelñelu vou napano jomña jarabujo kia ga vo rivan ea kulukuti nani napano be terimoruo naña amison mñarjumñelñelu vatelabo ban ea ruei. Ver jau kala tibe na, mia mñarjumñelñelu vou nei riyukuio, mia rila kulukuti nei saburu, ana mia mñarjumñelñelu nene riiou kule ga na, mia bati nene bunu rimei rivova. <sup>38</sup> Mia mñarjumñelñelu vou, monoka jau koison rivan ea kulukuti nani na be terivou bunu, na jikili bo, naruei komijikia kodu vatitigio mñamo mñarjumñelñelu to rivu eaio. <sup>39</sup> A bunu, bogo naña tomu nalo ajumña amunu mñarjumñelñelu na amimñauka jiou kija ruei, mia asaaro re bunu ka amunu mñarjumñelñelu vou napano amimñauka vonganei ga, mia monoka averenio mñarjumñelñelu moruo nei naio jesei kiano vo.”

## 6

*Yesu be tubo ka Legiano Lu  
Mataiu 12:1-8; Mak 2:23-28*

<sup>1</sup> Naruei ka legiano tai bereio, napano naio be Legiano Lu, Yesu naliko kiano naiagagoano nalo ajumña amiel abano, mia kanalo mñarabo naio ba jel bure tiniavio na kon. Amiel jibe na naruei, mia naiagagoano nalo jijerlo naruei ana nalo ajavo bulag mñarati tealo abal kon avona bisi ajenio. <sup>2</sup> Ajumña amila jibe na, mia Varisis nalo tai ajua vio na ka bogo nene, napanoaju amial Yesu nalo, naruei nalo aberinavo “!Ai, bior vaio kumitu kumila imñauano na ea Legiano Lu jibe na? Jibe na, kamiu kumitu kumilakorov kanado tuboiano ga na.”

<sup>3</sup> Ana na Yesu berdoĥelo, naio berinavo “?Ii, ĥeli jibe na kovio, ana kamiu maka kuvuluku ea Iliano Lu bogo tai vo, ka vite nalo naĥa Parinio tubo Téviti re nua joĥa milaio? !Kamiu kumijikia ruei tena! Naio naliko kiano tomu nalo jjerlo toru laka, <sup>4</sup> naruei naio ba joomo ea Atua kiano Yimo Lu, mia midu joko lu naĥa tuboiano berenio kulo lu ga nalo amijikia asenio, mia Téviti nalo ajenio.”

<sup>5</sup> Ana Yesu ber kalo, naio berinavo “Kiniou Kulorinio Kenerinio, kiniou naruei nebe Tubo ka Legiano Lu, mia nemijikia neverenio venia na memedu ka mia alaio ea Legiano Lu, ĥeli na venia na maka rimemedu ka mia alaio re ea Legiano Lu.”

*Yesu mieliel ka jumevuluku tai ea Legiano Lu*

*Mataiu 12:9-14; Mak 3:1-6*

<sup>6</sup> Ana ea Legiano Lu dolu bereio, Yesu ba ba joomo bereio ea yimo na volkouano, mia naio berlogloglo. Mia ka bogo na be toro tai bunu jo joomo napano juĥano tivelinio vameruo be jumevuluku. <sup>7</sup> Naruei naverloglogiano na tuboiano nalo bija Varisis nalo, napano tiniel jer Yesu ruei, aju vaataro ka naio ka bogo nei. Nalo ajuĥa abitikuku vatitig bo ka naio ka alavon ka aleal bajago na bova tai eaio, jibe na naruei ajidom aial ka mia rieliel ka jumevuluku ea kialo Legiano Lu nei ĥeli na mia rila re.

<sup>8</sup> Mia Yesu mijikia batitig bo ruei venia napano jo joomo ea kialo jidomiano nalo, naruei naio mil ban kema neibano, naio berinavo “Jau kotumolu, komei, kotu mave ea vio nei beamu vo,” naruei toro neibano jumolu bano. <sup>9</sup> Ana na Yesu bika den nalo neibano aju nei, naio berinavo “?Kiado tuboiano ber kito romijikia rala venia ka Legiano Lu nalo? ?Naio berenio bo ka kito rala tena bo ĥeli na bo ka rala tena bova? ?Naio ber bo kanio kito ralarur kulorinio, ĥeli na bo kanio rouebin toro rimaro?” <sup>10</sup> Ana Yesu

barĥilig, naio bitiilo abiniu jelviv, avona bisi ana na naio ber ka toro neibano bereio, berinavo “Jau kovitirii juĥamo vonio.” Mia monloglog bogo neibano ga toro nei naio mila jibe na, mia juĥano binimei bo vatitigio bereio.

<sup>11</sup> Mia Varisis nalo tinielo kiri mimi, bano-o ĥa tinielo bitunu mia bitunu vatitigio laka, naruei nalo abava tavio aber vonvon ka mia ala tuĥabe ka Yesu.

*Yesu bitiri bulagio kiano naia-gagoano duelimo ba juo*

*Mataiu 10:1-4; Mak 3:13-19*

<sup>12</sup> Ana iorou ka bogo dolu bereio, Yesu jaluvo denlo ban ea burusuku na toru tai ka toĥa rivolkouo van Atua, naruei naio jo mila jibe na ea vio nene bano mia viomijeni konio garuei. <sup>13</sup> Ana kavijo nene naio binimei bere, bio kiano naiagagoano nalo abinimei vio takurano ea naio, mia ea nalo nei naio berial nalo duelimo ba juo, napano bitiri bulaglo, berenio nalo nene naruei nalo abe atevi.

<sup>14</sup> Mia duelimo ba juo neibano, sialo nalo ajibe nei:

Saimon napano Yesu midu sio  
dolu ban ber Pitere,  
a Andru, na naio kuruano,  
a Yemesi,  
a kuruano Jone,  
a Vilip,  
a Bartolomio  
<sup>15</sup> a Mataiu,  
a Tomas,  
a Yemesi, napano Alveas kenerinio,

a Saimon, nanua ĥa mila poletik,  
jidom ka rijil bulag kulo Romo,  
a Jutas, na Yemesi kenerinio,

<sup>16</sup> a Jutas re Kariot, napano karina naio jiveluku ka Yesu.

*Yesu joĥa mioliolu a mieliel ka namieiano nalo*

*Mataiu 5:1-12*

<sup>17</sup> Mia Yesu buru atevi nalo neibano abatove bereio, ana amileal vio vodobi tai, ana aba ajuaio. Ana ka bogo na, vio bujo ka Yesu kiano naiagagoano nalo miroano

dolu nalo bunu, naliko burum̃ara tiniobi nalo na komeli dolu na vio Yutea, a kulo Yerusalemo bunu bija bunu tomu na vio Taia a tom na vio Saiton napano ajumormolu den kialo vio rove yako ea tei na toru abinimei. <sup>18</sup> Nalo nei abinimei ka ajidom ajog Yesu kiano iliano nalo, a bunu ajidom ka naio rieliel ka kialo namieiano nalo. Naruei Yesu milaiilo jibe na bano-o, ba bokar bunu tomu nam̃a niadu jualo m̃a mila lelanlo vururu. <sup>19</sup> Tomu nalo miroano laka, mia abiniu ga ajidom atokol Yesu, ka avokar kija burum̃ara moroano nam̃a amial jom̃a miyotuba ea naio, napano m̃a jo mila batitig tomu nalo miroano ruei.

*Yesu kiano verloglogiano nalo*

<sup>20</sup> Ana na Yesu jom̃a bitii kiano naiagagoano nalo nene, karina naio berloglogo, naio berinavo:

“Kamiu nam̃a kubitilubar ka m̃a kube talim̃asa, ilivuiano toa kamiu, bior kamiu naruei, Atua naio be Parinio Tubo ka kamiu, mia naio vitikar kamiu.”

<sup>21</sup> “Kamiu nam̃a jjer kamiu vonganei, ilivuiano toa kamiu, mia kamiu kuvijog ka kamiu kubinimei kuvujo vatitig ka vite novo nalo.

Kamiu nam̃a kamiu kumitum̃a kumiteg vonganei, ilivuiano toa kamiu, mia kamiu kumijikia kuvisaaro.”

<sup>22</sup> “Kamiu nam̃a tomu nalo maka asaaro ka kamiu, a napano m̃a maka asidom kamiu, a napano m̃a amil niegeniege lelan kamiu, a napano m̃a abuku bulag siemiu nalo aberinavo kamiu tomu na kirivova ga,

nina bior kamiu kube kiniou Kulorinio Kenerinio kanaku tomu nalo, ilivuiano toa kamiu bunu.”

<sup>23</sup> “Ka bogo nalo na jibe na, kamiu kuvisidom bijovijon re, mia kuvitatabujo vija saariano, bior ajum̃a amila lelan kamiu

ea ga bajago na nanua m̃a korobilo nalo amilaio ban naverialiano nalo re nua. Mia naio bo ga, mia kamiu kuvijev burum̃ara ijaiano nene ea vio mave.”

<sup>24</sup> “Mia kamiu tomu na sanibaiano mia rivova ve toru laka van kamiu, bior kamiu kubar kenemiu jogvuiano a kenemiu saariano na kenemiu meuliano nabo na ruei ea yetemeriba nei.”

<sup>25</sup> “Mia kamiu nam̃a mabomiu bujo batitig ruei jo, mia ve kirivova laka rivan kamiu, bior mia siser tanea kamiu ve toru laka.

A kamiu napano kumitum̃a kubital banei kia ga vo, mia rivova laka rivan kamiu, bior mia kamiu kuvijog rivova ve toru laka mia kuviteg ve toru.”

<sup>26</sup> “Mia kamiu monoka kuvitikar vatitig bogo napano tomu nalo aju amiaia siemiu. Verver tibe na, maka rivu ka kamiu bunu kuvisidomii kuver kubo, bior napano naverialiano sibisibiano re nua,

kiado tormoruo nalo, ajum̃a amiaia sialo, mia Atua bitiilo abova ga, naruei naio mije vironiano banlo.”

*Yesu berii tinietiiano na uolu nalo Mataiu 5:38-48, 7:1-5*

<sup>27</sup> Ana na Yesu berenio, berinavo “Kamiu nam̃a kumijoglubarbar kanaku iliano, kiniou neber ka kamiu, neber: Monoka kito rosidom kanado uolu nalo, a monoka rovi-juku rivu ka nalo nam̃a maka asidomii kito, <sup>28</sup> a monoka reilivu ka nalo nam̃a amiolua kito, a monoka robolkouo kalo nam̃a ajum̃a amila kiki kito. <sup>29</sup> Verenio toro tai rujuba kulbibimo tivelinio, monoka jau kovilig kulbibimo tivelinio vanio ka rijikia rijuba bunu, mia verenio toro tai sikili ka rivar m̃amo koti, mia kasaaro ga ka kajamo ka m̃amo soto bunu van naio rivario.

<sup>30</sup> Mia ver toro tai rivika kiamo titai,

monoka jau kajamo ka rivanio, a ver toro tai rudular kanamo titai, mia jau kovika re bunu ka rudu merano bere rivanso. <sup>31</sup> Bajago na vabe naña jau kojidom ka tomu nalo ala vanso, bajago nene naruei monoka jau kala rivanlo.

<sup>32</sup> “Mia ver kito rotuña tiniedo riia ga nalo na ga ña ajidom kito, nina maka ve titenia, bior tomu na kariano nalo tiniel jii tomu nalo naña aju ajidomlo mugaruei. <sup>33</sup> Peli na ver rotuña rovijuku rivu ka ga nalo naña abijuku bo mugaruei ka kito, naio bunu maka rive titenia, bior tomu na kariano nalo, nalo bunu ajumña amila jibe na mugaruei.

<sup>34</sup> Peli na ver rotuña rajamo ka veru van nalo na ga amijikia avar meran bereio, naio bunu maka ve titenia, bior tomu na kariano nalo, nalo bunu ajumña amilala jibe na mugaruei.

<sup>35</sup> “Mia kiniou neber ka kamiu, neberinavo: Monoka tiniemotii kanamo uolu, a mia kovijuku rivu kanio, a mia kajamo ka kanamo veru tibe na ga, napano kosidom bijovijon re ka na naio bario, ka mia naio mijikia rivar kean bogo tai, ðeli na mia naio rivar kean lele re bunu. Mia ver jau kotomña kalala tibe na, kojomña kabar bajago na karamado, Toro na Loa laka, mia naio sian kanamo ijaiano tai na mia ve toru lie vo, bior naio be toro tai napano kiano iviso bo ga ka nalo na maka atu aver siva vanio, ðeli na nalo na ajumña ajidomial nalo ga bereio. <sup>36</sup> Ver tibe na, jau monoka tiniem riia tomu nalo tavukia naña karamado tinien miialo.”

*Yesu berii tibureiano na toro dolu Mataiu 7:1-5*

<sup>37</sup> Mia Yesu mil kia ga banlo vo, naio berinavo “Mia kamiu monoka kuvitu re ña kuvitibure ñelea toro dolu ðeli na kuvijev vironiano vanio. Aver tibe na, mia Atua tibure laka re kamiu tibena, mia naio rije re vironiano van kamiu. Ver kuviekokoa toro dolu, mia Atua

riviekokoa kamiu, <sup>38</sup> mia ver kuvisian titai van toro dolu, mia Atua sian vite rimei van kamiu. Mia Atua sian vite van kamiu ve toru loa nana kamiu kumisianio, mia naio sian ve miroano lie vo, tavukia naña ajosonu ea bake, ajan kakario, amielio bano-o mia josonu batitigio bo, vite nene nalo bujo magmago ana na jibirbili. Riano, mia avar van kamiu rive verare ka ga nana ña kamiu kumituña kumisian ban tomu dolu nalo.”

*Kamiu monoka kuvitii vatitig ken-emi meuliano*

<sup>39</sup> Mia Yesu jomña mil banlo kia ga vo, naio ber jamerijiano tai banlo, berinavo “?Jumabe, ver toro tai ve merebono to, naio mijikia rivuru ñarabo ka merebono dolu ka nalo ve juo ava aiel nunu? Peli ga, mia ave juo atibirbil avatove ea bulukupili tai na! <sup>40</sup> Naiagagoano, naio maka to loa nana berloglog naio, mia ver naio rila kakar vatitig vite nonovio na naverloglogiano berloglogio kanio, mia naio mijikia rimei rive verare ka kiano naverloglogiano. <sup>41</sup> Maka rivu ka kotomña koververii niamiamo na telisu na joa kuruamo mirano, mia jau maka keial kar burumñara burupati iesi na joko miramo jo. <sup>42</sup> ?Jumabe jau koberiamña komijikia keil van kuruamo na, kover ‘Koig, mia nelelar niamiamo na joa miramo na beamu vo’? Ver tibe na jau kojomña kobitoviton ia kia ga ka kiamo vovaiano, a jau kojomña kejibure toro dolu kiano vovaiano ga. Jau komijikia ruei ka jau kobova ga, ana jau kojidom kala van tomu nalo ka aver jau kobo ruei. Jau monoka kodular beamu burumñara bulapati iesi na den miramo beamu vo, karina mo jau komijikia kovitii vatitig niamiamo na monea toro dolu mirano.”

*Buruiesi bija ñarati nene Mataiu 7:16-20, 12:33-35*

<sup>43</sup> Ana Yesu ber bunu, berinavo “Buruiesi na bo maka rijikia rivar

m̃arati na bova, a buruiesi na bova maka rijikia rivar m̃arati na bo. <sup>44</sup> Nao, jibe na naruei, napano kito rojuṃa robitilubar buruiesi nalo ka ajum̃abe ea salo m̃arati. Marati nalo na bo a nam̃a jesei bo, kito maka rotum̃a ravarlo ea soro na be niononoti, makanio. <sup>45</sup> Toro na tiniene bo, naio jom̃a miobijii vite nalo na bo jua kiano iviso, naruei bogo nonovio be kiano jidomiano na bo napano jo ka mijikia jian bulagio. Ana toro na bova naio jo miobijii vite nalo na bova jua kiano iviso, naruei naio jian bulag jidomiano na bova ga. Vite venia napano bujo toru ea toro kiano iviso p̃eli na kiano jidomiano, vite na naruei mia naio tom̃a rimalmaluvo bogo nonovio ea niono.”

### *Yimo juo*

#### *Mataiu 7:24-27*

<sup>46</sup> Ana Yesu ber kalo, berinavo “? Bior vaio ana kumitum̃a kubio kiniou kuber ‘Tubo o, Tubo o,’ karina maka kuvitum̃a kumonmonea venia nam̃a kiniou nojom̃a neber ka kamiu ka m̃a kuvilaio? <sup>47</sup> Toro na ver binimei ka kiniou, mijog kiaku iliano, naio monoka rimonmoneaio a naio monoka rilaiio. Toro nam̃a rila tibe na, naio javukia tukunu tai napano berii, ber jibe nei: <sup>48</sup> Toro tai jo miṃauka kunuano, mia toro nene be masou laka, jom̃a mikil p̃ili nene nalo bululuo batove yetano laka ka rivokar vio na borotano jikili eaio, karina mebija m̃artea nene nalo ea bulukuṃili nalo neibano. Mia bogo na bogu va, burum̃ara ueimia mieraro, mia maka rijikia rila yimo rikulkulu leleio, bior toro nene miṃaukanio, miṃauka jikili bo. <sup>49</sup> Mia toro nam̃a mijog kanaku iliano nalo mia maka tom̃a rimonmoneaio, naio jibe ka toro dolu tai. Toro nene naio bunu miṃauka kunuano tai, mia naio be vovu, miṃauka jumolu ju vorvoru mave ea ga borotano, mia m̃artea nene maka rivatove rivare leleio. Mia bogo na bogu va, burum̃ara ueimia

binimei, mila yimo nene mijoru, burukokorovio nonovio, bova laka.”

## 7

### *Toro na toru na mira tai na Romo naio monea Yesu jikili*

#### *Mataiu 8:5-13*

<sup>1</sup> Naruei bogo na Yesu ber bulag nonovio kiano verloglogiano nalo nene ban tomu nalo bisi, ana naio ba jouro ea bulukomeli na vio Kape-neam. <sup>2</sup> Mo ea vio na, be natukamuano na mira na kulo Romo naio jo, mia naio be kiano toro novo na im̃auano tai mie toru laka, vaataro ga ka rim̃aro. <sup>3</sup> Ana bogo napano naio mijog ka napano tomu nalo ajum̃a aberii ka mia Yesu rimeia ea kialo vio naruei, ana bio navurim̃araboiano na kulo Ju nalo, miilalo aban ka Yesu, ka avikanio rimeia rieliel ka namieiano neibano.

<sup>4</sup> Naruei nalo nei abinimeia ea Yesu, aberii toro namieiano nei banio, a abika jikili banio jibe nei, aberinavo “Natukamuano na, memedu ka jau komeia keijaio. <sup>5</sup> Be riano ka naio maka ve kito tai, naio be toro re Romo ga, mia naio be toro tai nam̃a jidomii m̃elea taara na kiado tomu nalo, a naio bunu miija kumemi toru rueia ea vio nei, napano naio miṃauka kenememi yimo na volkouano. Naruei numial bo laka ka ver kajaaro ka komeia keial kanano toro na mie toru neibano.”

<sup>6</sup> Ana Yesu mijamo kanio, naruei ban bijalo. Aju amiel abano, ana bogo napano aju koalabo kija kia ga vo ka natukamuano na mira nei kunuano, mia nalo amial ka tomu tealo ajum̃a amiel abinimeia. Nalo nei natukamuano nene kiano bilbilu nalo tealo bereio, napano naio miilalo abinimeia ea Yesu, ka aver kiano iliano tai kanio. Naruei abinimeia aber ka Yesu, aberinavo “Toro Romo nei miila kumemi nubinimeia easo bereio, naio ber jibe nei, ber naio jo mila lelanso toru laka. Naio berenio berinavo naio mial naio jibe ka napano naio maka ve toro na bare ka mia jau komeia joomo ea

kunuano. <sup>7</sup> A jidomiano nei bunu mila naio mial ka maka rivu bunu ka riyotuba kaso, bior naio maka ve Ju tibe kaso, mia naio ber ga, ver jau kover ga iliano tai, mia kanano toro neibano rijog rivu bereio ga na. <sup>8</sup> Naio mijikia ka monoka tibe na, bior naio mijikia ka kanamo iliano mije moroano. Naio berenio berinavo vite na naio jibe ka tomu na mira nalo napano ajutano yetano ka naio, napano monoka ajogkar kanano iliano nalo. Ver naio river ka tai riverinavo 'Jau kavano,' naio monoka rivano, p̄eli na riverinavo 'Jau komei,' naio monoka rime, p̄eli na riverinavo 'Jau kala tibe na,' mia naio monoka rilao. A naio berinavo naio bunu monoka rim̄auka vaio napano kanano natukamuano na toru river kanio. Jibe na naruei, naio monea ka ver jau kover titai ga, mia monoka tibe na."

<sup>9</sup> Telikiti na Yesu mijog iliano nei, naio miilo toru ka natukamuano nei kiano jidomiano, a bunu naio jaaro toru kanio, naruei mil ban tiniobi nalo napano m̄a aju naliko ka bogo nei, berenio berinavo "Kiniou neber ka kamiu, ka kiniou maka neleal leleio toro Ju tai napano naio tumolu tu sikili ea kiniou tibe ka toro nei."

<sup>10</sup> Mo iorou kanio, nalo nene aban bereio ea natukamuano nei kunuano, mia amiilo ka napano amial toro na mie neibano naio binime, bo nonovio bereio ruei jo.

*Yesu burumeulia taanou tai kenerinio m̄eaku sum̄ano den m̄ariano bereio*

<sup>11</sup> Ana iorou kanio, maka vesiou, ana Yesu miel ba bokar m̄arkomeli dolu tai, siano Naeni, a jibe ka titiliu, kiano naiagagoano nalo naliko kulo dolu nalo telabo ajum̄a ajakisorio.

<sup>12</sup> Ana tilikiti napano Yesu nalo nei aju abinime, vaataro ka morouo labo na komeli nei, amial ka tomu nalo amidu buronlo amielve, abinime, nalo aju ap̄ier tasim̄aro tai ka ava ativinio. Naio napano m̄aro ruei, naio be m̄eaku sum̄ano tai, napano kenieno be taanou. Taanou nene, naio maka rivar kenerinio

dolu tai bereio, naio bar takurano ga neibano m̄aro ruei. <sup>13</sup> Mia Yesu nalo aju amial nalo napano m̄a aju amiel abinime, mia bogo na kiado Tubo mial taanou nei, naio tinien miiao toru laka-o mia. Naruei naio ban vaataro kanio, berkanio, berinavo "Ai, jau koteg re bunu." <sup>14</sup> Ana Yesu binime, vaataro ka tasim̄aro nei, midu jum̄ano joaio, a nalo napano ajum̄a ap̄ier ba ajumomou ga aju jibe na, maka bunu aiel. Ana naio mil banio, berinavo "Koig, kiniou neber kaso, jau kotumolu bereio."

<sup>15</sup> Naruei m̄eaku nei naio jumolu jibe na, jo mil banlo, ana amidular naio bereio, ana Yesu jukamu kanio ba ban kenieno bereio. <sup>16</sup> Mia bogo na tomu nalo amial vite nei, burevure burelo toru laka, mia aju abamenea Atua, aberenio aberinavo "Uerei, burum̄ara naverialiano na Atua kanano tai jumolu ju iviso ka kito vonganei naruei!" A tealo aber bunu, aberinavo "Riano ga na! Atua miyotuba ka kiano tomu nalo naruei." <sup>17</sup> Mia tukunuano na tenei, ajum̄a aber liliano banbano-o bokar tanobuku na vio Yutea, bija vio dolu nalo napano m̄a aju ga vaataro kanio.

*Jone Baruei miila kiano naiagagoano nalo abinime, ea Yesu*

*Mataiu 11:2-19*

<sup>18</sup> Ana ea bogo na, Jone Baruei naio joa yimo na tetavokoiano ruei, ana kiano naiagagoano nalo abinime, ajukunu banio ka vite nalo napano m̄a Yesu jom̄a milao. <sup>19</sup> Naruei Jone mil ban kanano tom juo, naio miilalo aban ea kiado Tubo, ka ava avika vatitig denio, ka naio be Naverikariano na, nam̄a aju rorea ka mia rime, p̄eli na maka ve naio.

<sup>20</sup> Ana amiel ka amei aial Yesu, mia bogo napano amileal naio, abika jibe nei naruei denio, aberinavo "Kenememi toro na toru nei Jone, jidom rijikia jum̄abe? ?Jau kobe toro na nanua m̄a aberenio ruei aber ka mia toro na toru tai rime, ve kiado navurim̄araboiano, p̄eli na jau maka kove naio vo,

mia monoka kumemi nuviturorea kiano vo ka mia toro nene naio rimei?”<sup>21</sup> Mia memedu ka bogo napano abinimei ka avika vikadeniano nei, Yesu jom̃a mieliel ka tomu na mieiano nalo, a jom̃a mijil bulag niadu nalo denlo, a jo mila merebono nalo miralo abinimei abo bereio, ana Jone kiano naiagagoano nalo amial yite nalo nei.<sup>22</sup> Naruei Yesu berdoḡe vikadeniano nei, naio berinavo “Kam̃iu kuvan bereio kuvoru ea Jone, ana mo kuverial vanio vite venia napano kumialio ḡeli kumijogio ea vio nei. Ajibe ka vite nalo nam̃a Naverialiano Aisea berial nua ruei, napano berinavo:

‘Merebono nalo, vongañei amial vatitig vite bo bereio ruei,  
a javuluku nalo, vongañei nalo amiel bo bereio ruei,  
a tomu nalo napano burumieni milalo, vongañei niabelo binimei meravo bo ruei,  
a nalo na abe bulubau, vongañei tilinielo bo bereio ruei,  
a tomu nalo na am̃arm̃aro, vongañei amemeul bereio ruei,  
a talim̃asa nalo, vongañei neberial Ioluaño Vou banlo ruei.’

<sup>23</sup> Mia kam̃iu kuva kuverial ka Jone bunu, kuverinavo “Toro napano ver maka leleio kiano jidomiano riveve juo ea kiniou bogo tai, ilivuiano toa naio.”

### *Yesu berii Jone Baruei*

<sup>24</sup> Ana bogo napano Jone Baruei kiano naiagagoano nalo ajuvan ka avan bereio, Yesu berii Jone nei ban tomu nalo napano aju naliko, naio berinavo “?Bogo nam̃a kam̃iu kubatavio ea vio yauo na beamu, kam̃iu kuban ka kuvial venia? ! Maka tinieku ka kam̃iu kuban ka kuvial buruburi nam̃a jegi jom̃a miuvuio ḡiligviligio!<sup>25</sup> A maka tinieku bunu ka kam̃iu kuban ka kuvial toro na toru tai napano m̃a miya kulum̃arauo na kirinovo a napano joa meuliano nabo, bior tomu nalo na jibe na maka ajikia atua vio na kiriniagiago jibe ka vio yauo na, mia

nalo dam̃ariga ajujua yimo nabo na be tubo na tortoru nalo kunualo.<sup>26</sup> ?Makanio, mia kiniou tinieku ka kam̃iu kubatavio ka kuvial naverialiano tai, inau? Nina bo na, mia kiniou neber ka kam̃iu, Jone nam̃a kam̃iu kubatavio ka m̃a kumialio, naio loa laka, naio jovulu naverialiano nalo re nua,<sup>27</sup> bior Atua berii naio ea kiano Iliano Lu ruei, naio berinavo

*‘Kiniou nemiila kiaku atevi na binimei jukamu kaso, ka rila vatitig kiamo m̃arabo.’*  
*Malakai 3:1*

<sup>28</sup> “Riano neber ka kam̃iu, ka ea yetemeriba nei, Jone Baruei naio loa laka ka kulo dolu nalo abiniu. Mia nalo nonovio napano mia amei jouro ea Atua kanano navenatuboiano, riva rivokar toro na maariano kalo nana jotano laka garuei, nalo na abiniu nalo loa laka ka Jone, napano mia avar Atua kiano ilivuiano nalo ve toru loa tovulu naio.”

<sup>29</sup> Mia bogo na aban amijog Jone Baruei jo mioliolu, berial m̃arabo na Atua ka ajikia aviliglo, mia tomu na bova telabo, ba bokar tomu na takis bunu, amial ka m̃arabo nene be riano, ana abiliglo ana Jone baruei ealo.<sup>30</sup> Mia kulo dolu nalo, jibe ka Varisis bija naverloglogiano na tuboiano nalo, abilig taakalo ka m̃arabo na Atua naio mila ka ajikia aviliglo ka naio, ana Jone Baruei naio maka rivaruei ealo.

### *Yesu naio mil jikili ban tomu nalo ea kiano bogo*

<sup>31</sup> Mia Yesu berii kulo m̃arou nalo nei ka bogo na, naio berinavo “? Mia kiniou never iliano na vabe na mia mijikia rivokar tomu re banei kialo bajago, ka river nalo tomu na ajum̃abe?<sup>32-34</sup> Vite nonovio na Atua mila ka rilavonio rivu van kam̃iu, mia kam̃iu maka kuvisidomio ga, mia kumil niegeniege naio ga biorio. Bior bogo napano Jone naio binimei, naio jom̃a monodulu ka m̃a bolkouo, a naio bel ka m̃arjum̃el̃mel̃u, mia tomu nalo amial jibe na, nalo

ajumãa amilia naio aberinavo ‘Tete na simãaro juaio.’

“Mia bogo na kiniou Kulorinio Kenerinio nebinimei nojo, nejinan batitig bo a nomunu batitig bo, naruei amilia kiniou, aberinavo ‘! Keal, tete na naio be toro namãa jinano m̃ele, a naio be toro namãa munu m̃elea m̃arjuñelm̃elu, a napano kanano bilbilu nalo, nalo abe tomu namãa abarbiji takis a tomu na abova!’

“Bior vite na naruei, kiniou nemial kamiu tomu na vio banei napano kamiu kumitibe ka kiritete nalo, napano ver ajumãa amijejea ea vio yauo na komeli, mia nalo aviovio aiagiaga van kialo bilbilu sesa nalo, averinavo ‘! Oi, kamiu kubova na! Ver kumemi numituñãa numue bulaiu, mia kamiu maka kuvisidom kuvolu rivija kumemi, ðeli na ver kumemi numituñãa numiou ka iou na m̃ariano, mia kamiu maka kuvisidom kuviteg vija kumemi!’

<sup>35</sup> “Nina naruei, tomu nalo maka asidom Atua kanano m̃arabo nalo, mia kiriñarati novo napano maluvo ea toro kiano meuliano na jo jakii Atua kiano m̃arabo, rila rimeravo ka m̃arabo na naruei naio be m̃arabo na masouano napano be riano.”

### *Tira tai ber aua riano bior kiano bajago va nalo*

<sup>36</sup> Mia Varisis nalo tai kalo, siano Saimon, naio berinavo naio jidom rimãauka Yesu sano sinaniano tai, ana Yesu ban ea kiano vonuo, a naio ba jotano ka asinan. <sup>37</sup> Ana ea komeli na, be tira tai napano jo naio mila bajago miroano na kirivova laka, naruei naio mijog ka napano Yesu ba jo jinano ea Varisis nei Saimon kunuano. Naruei tira nene bitilubar kiano kariano, mijog kirivova toru laka, naruei naio mijog ka monokanio riva rial Yesu, ana naio midu kanano bauei na bonotanunu nabo tai, naio midu binimei ea yimo nei. <sup>38</sup> Mia Yesu mijoru mon ka merikono ka sinano, naruei tira nei binimei jumolu ju

iorou ka naio ea jaano, napano jogumirano miou jibirbili bavatove ea Yesu jaano. Jogumirano nei jomãa jekon Yesu jaano jibe na, naruei naio bar burutili vijinio m̃a na, naio jomãa miolkono ka Yesu jaano, a naio mije kulbibinio tivelinio mon mave ea Yesu suvajaano, avona bisi ana na miyon bonotanunu nei eaio.

<sup>39</sup> Naruei Varisis neibano miog Yesu binimei ea kunuano, naio jomãa bitii vite nei, naruei naio jomãa tiniene bova kanio kija. Naio jomãa jidomii jibe nei, berinavo “Verenio Yesu na naio be naverialiano riano tai, ðeli mia rijikia batitig rui ka tira na naio be tira na kariano mugaruei jibe na, mia naio rijikia re rijamo ka naio tokol jaano lu na. Mia naio mijamo ka ga naio ka rila tibe na, kiniou maka bunu nejikia vatitig naio naruei.”

<sup>40</sup> Mia Yesu mijikia kiano jidomiano, naruei berdoðe banio, berinavo “Saimon, kiniou nejidom never kiri iliano tai ve telisu vansom beamu vo.”

Ana Saimon berdoðe berinavo “Bo ga, Naverloglogiano. Jau komijikia koverenio.”

<sup>41</sup> Naruei Yesu berdoðe jibe nei banio berinavo “Toro tomoruo tai, mia tomu juo amila jabue ea naio. Ea naljuo nei, tinene kiano jabue toru, mia tinene, naio kiano jabue burutomoruo laka. <sup>42</sup> Ana ea bogo na ka avulu meran bereio jabue nalo nei, mia abe juo maka ajikia avulu meran bereio, naruei toro tomoruo nei tiniene mialo abe juo, naio biekokoalo abe juo ka kialo jabue nonovio. ?Mo bior vite na, tom juo nei na vabe nene na naio monoka tinienriia m̃elea toro tomoruo nei?”

<sup>43</sup> Ana Saimon berdoðe ban Yesu, naio berinavo “Kiniou maka nejikia, ðeli na kanano jabue burutomoruo laka kovio, naio monoka sidomii naio rivu lie.”

Ana Yesu berenio berinavo “Nao koig, naio jibe na naruei.” <sup>44</sup> Mo Yesu barðilig naio ka tira nei, jiloglog

naio ka Saimon, berinavo “Saimon, bogo na kiniou nebinimei joomo ea kunuamo, maka neial toro tai rudu uei tai rimei ka mia nemijikia ne-sekon bulagio niamiamo na m̃arabo den jaaku, napano javukia kanado bajago, jau monoka kalaiio. Mia jau keial tira nei, naio naruei jekon jaaku ka jogumirano, a miolkon juva ka vijinio. <sup>45</sup> Kiniou nebinimei joomo ea kunuamo, mia jau maka kavan juṃamo vatitig rivija kiniou tibe ka nebe kanamo bilbilu nabo tai, mia jikar ea bogo na kiniou nebinimei joomo, naio midu kulbibinio tivelinio mon mave ea suvajaaku nam̃ariga. <sup>46</sup> Jau maka kavar bonotanunu rimei ka koyon ea paripariku, mia naio mila ka jaaku ruei. <sup>47</sup> Mia kiniou neber batitig banso, ka tira nei, kanano kariano nalo miroano laka, mia kiniou nebiekokoa nonovlo biniu ruei, ana mila na tinien jii kiniou toru laka. Mia kiniou nemial ka toro na kanano kariano maka ve toru, kiniou nebiekokoa naio, mia naio tinien jii kiniou maka rive toru.” <sup>48</sup> Mia Yesu mil batitig ban tira nei bunu, naio berkanio berinavo “Ki-amo kariano nonovio nam̃a kojom̃a kojidomii bova vururu biorio, kiniou nebiekokoa nonovlo ruei.” <sup>49</sup> Mia bogo na Yesu ber iliano na, kulo dolu nalo napano ajum̃a ajinan vio takurano naliko ka bogo nei, nalo maka asaaro laka, nalo ajum̃a amijuvaluva tertelisu banlo, ajum̃a aberinavo “?Mia tete na naio jidom naio rive kei, napano jom̃a berenio naio mila bulag kariano na tomu nalo kanalo jibe na?” <sup>50</sup> Mia Yesu mil ber ban tira nei vaarakurano bereio, naio berinavo “Kanamo viekouoiano milaso kobokar ioruriano ruei. Jau maka bunu kojog rivova, jau komijikia kavano ga, mia Atua kanano tum̃aro to vijaso.”

## 8

### *Tire nalo telabo ajakisor Yesu*

8:2 Mat 27:55,56; Mak 15:40,41; Luk 23:49

<sup>1</sup> Ana maka vesiou bereio, Yesu naio jom̃a mieliel bano, naio jo ba jel burevure komeli nalo na tertelisu a nalo na tortoru, mia ea vio nonovio naio jom̃a mioliolu, a jom̃a midu lilianiano vou nabo na Atua kiano navenatuboiano binimei ban tomu nalo. Mia jibe ka titiliu, kiano duelimo ba juo [12] nalo aju bija ka bogo na, <sup>2</sup> mia tire nalo telabo kija bunu aju iorou ka nalo. Ea tire nalo nene, tealo kalo napano Yesu mieliel kalo bior niununo nalo na kirivova a kanio mieiano na jualo, jibe ka Mere na Maktala, napano nanua beamu niadu aluo ajua naio, <sup>3</sup> bija Joana, napano naio be toro nei Kusa koano, nanua naio be toro na toru tai na im̃auano na Parinio tubo Erot kiano, a bija Susano bunu. Mia nalo miroano lie vo bereio, napano nalo amiija Yesu nalo toru, mia nalo ajum̃a abitikarlo ka ijaiano nalo nam̃a tomu nalo aju ajian banlo.

*Jamerijiano na kurukuti na uiti napano ajibirbili ea borotano kinkin veri*

*Mataiu 13:1-9; Mak 4:1-9*

<sup>4</sup> Naruei ea kiri bogo tai, burum̃ara tiniobi na tomu nalo amoluo ea komeli telabo beve terakurano na kanalo, naruei nalo abinimei amiobijiilo jeliuiv ea Yesu, naruei naio mil banlo, buku jamerijiano tai kalo. <sup>5</sup> Naio berenio jibe nei, berinavo “Be toro tai napano ban ka rivisivisii kurukuti ea kiano tiniavio. Bogo napano jom̃a bisivisii kurukuti nene abano, kurukuti tealo ajibirbili ea m̃arabo, mia iorou, tomu nalo abinimei amiel ea abie lelanlo, a menu nalo amikiti nonovlo. <sup>6</sup> A kurukuti tealo ajibirbili ea vio na be tabaṃilio eaio, abitovtov soṃeli, mia karina abinimei amekekeu ga, bior maka ve uei tai ea vio nene. <sup>7</sup> Mo kurukuti tealo ajibirbili ea vio nanua beamu maka atekon batitig rivu teli va nalo eaio, mia iorou kanio ana ṃeli nana bova nei naio barboṃeio miluo bereio, bisoyoko toti nalo bano-o mia am̃arñaro.

<sup>8</sup> Mia kurukuti dolu tealo bereio ajibirbili ea kiri borotano nabo tai, mia nalo amililiuo bano-o, ajakou abar m̄arati nalo, bokar toromomou takurano [100].”

Mia bogo napano Yesu berenio iliano nei banlo bisi, ana naio miaga m̄erere banlo, naio berinavo “Toro na be tiliniene, monokanio riagago vatitig ka iliano nei.”

*?Bior vaio ana Yesu jo mil jel ea jamerijiano?*

*Mataiu 13:10-23; Mak 4:10-20*

<sup>9</sup> Ana iorou kanio, ana naia-gagoano nalo abinimeĩ ea Yesu mia nalo abika nioti na jamerijiano nei denio. <sup>10</sup> Naruei naio berdoḡe banlo, berinavo “Atua naio mila jibe na ka mia kamiu kumijikia kuvileal ililuklukuano nalo na kiano nave-natuboiano.

*‘Mia ea kulo dolu nalo, ililuklukuano nalo na ajuluku ea jamerijiano kia navo, mia ajum̄a abitio-o mia maka avitilubarlio, a ajum̄a amiagago-o mia maka ajog lubarlo.’” Ais 6:9*

*Yesu naio ber bisivisii nioti na jamerijiano na kurukuti uiti*

<sup>11</sup> Naruei Yesu ber bisivisii masosoua jamerijiano nei banlo. Naio berenio berinavo “Mo, nioti na jamerijiano nei naio jibe nei. Vite na be moti, naio be kurukuti, mia nina naio jibe kanio Atua kiano iliano.

<sup>12</sup> Mia kurukuti nalo napano ajibirbili ea m̄arabo, nina naio jibe kanio napano tomu nalo amijog iliano nei, a kurukuti novo nei ajibirbili ban ea kialo jidomiano nalo. Mia Parinio Sim̄aro nei naio binimeĩ bar bulag iliano nei bereio den kialo iviso nalo, ka rila amonea re bunu, a ajikia re avokar ioruriano.

<sup>13</sup> “Dolu, nina kurukuti nalo napano ajua tabaḡilio, mia nina jibe kanio tomu nalo nam̄a amijog Lillianiano Vou na bo nei, mia nalo amijeivio, ajaaro kanio, mia jibe kanio napano maka ve salo bati na

bo. Nalo amonea ka bogo bulati ga, mia verenio ve bogokouo, ḡeli na juboluboiano rimeĩ, mia nalo ajoru bereio ga.

<sup>14</sup> “Dolu bunu, nina kurukuti nalo napano m̄a ajua vio napano be teli na bova eaio, a nina jibe kanio napano tomu nalo na amijogio, mia bogo nam̄aaju amiel abano jibe na, mia ajidom yebekavo toru ea kialo meuliano, mia ajidom m̄lea puruveru, a nalo tinieĩ jii m̄lea serevuiano nalo na yetemeriba nei. Bajago nalo na abinimeĩ jibe ka teli na bova tai nam̄a m̄ekolo, ka mia rila ana na mia nalo ajikia re avar m̄arati napano meruo bo ea kialo meuliano nalo leleio.

<sup>15</sup> “Mia nana maariano, nina kurukuti napano ajua borotano nabo, nina javukia napano tomu nalo nam̄a amiagago ka Lillianiano Vou nabo nei, naruei nalo amije batitigio monea kialo iviso nalo, abokario jikili vatitig bo be riano. Kulo novo nalo na jibe na, nalo ala kialo jidomiano nalo ve terebievi, naruei nalo aim̄au rimemedu rivanvano-o mia avar m̄arati na Ioluanou Vou nei ea kialo meuliano nalo.”

*Jamerijiano na yulu*

*Mak 4:21-25*

<sup>16</sup> Ana Yesu ber bunu, berinavo “Kito tomu nalo, verenio kito ravaryulu rimeĩ, mia ve re tai napano roduvanio sel tano ka basaro ḡeli na vite na jibe na. Peli ga, kito reive takilele mave ga ka rila tomu nalo na ver amei joomo aial ka napano vio merera bo. <sup>17</sup> Mo, na Atua kanano navenatuboiano naio jibe ka yulu nei, napano vonganei joḡa malmaluvo ea kito ka rudulii vite nonovio. Vite nonovio napano ajulukuaju, a ililuklukuano nalo, mia nalo monoka amalmaluvo ea vio medave ka tomu nalo avitilubarlio. <sup>18</sup> Kamiu monoka kuviagago vatitig ka kanaku iliano nalo, a kuvilavon ka kuvisidomii vatitigio. Toro napano be kiano saba miroano ruei,

mia naio rivar rivan lie vo ve telabo laka, mia toro napano maka kiano saba, mia rila luvuio vite vaio na telisu nei napano naio tiniene ka ber kiano ruei.”

*Yesu kenieno naliko kuruano nalo, abinimei ka avurular naio*

*Mataiu 12:46-50; Mak 3:31-35*

<sup>19</sup> Ana na Yesu kenieno naliko kuruano nalo amiyotuba ka naio ka bogo nei, mia nalo maka ajikia avokar naio joomo, bior burutiniobi toru laka, mila vio telisu. <sup>20</sup> Mia tomu nalo aber lilian iliano binimei bokar Yesu, ana aberenio aberinavo “!Ai, koniomo naliko kuruamo nalo, nalo yako ajikili aju tavio, ajidom aialso beamu vo!”

<sup>21</sup> Mia Yesu berdoŕe banlo, berinavo “Nana naio be kenieku, ŕeli na kuruaku, nina nalo ga nei napano amijog Atua kiano iliano lu, a nalo ajumã amila javukia ga napano iliano nei berenio.”

*Burumãara jegi napano Yesu berbureio*

*Mataiu 8:23-27; Mak 4:35-41*

<sup>22</sup> Mo ea legiano tai, Yesu buru naiagagoano nalo, abiako ea uako tai, naruei Yesu ber kalo, berinavo “Kito mãa rava tivelinio ea ueiyabo nei.” Naruei ajuvan vio, ana abano, <sup>23</sup> mia bogo na uako jo juvan bano, mia Yesu mirano jouo toru ana monmelio. Ana iorou kanio, ana burumãara jegi tai jumolu binimei ea ueiyabo nei, mia burumãara kenieno niatuva nalo na amidon tanealo bano-o mia uako nei binimei bujo ka jumu, mia nalo amialo ka bova kitkiti ga naruei. <sup>24</sup> Ana nalo aba abio bon Yesu, aber kanio, aberinavo “!Tubo, Tubo, vaatara ka mia kito ramadudu naruei!”

Ana na Yesu jevijo jumolu, ana naio berbure jegi bija burumãara kenieno niatuva nalo nei, naruei vite nalo nei ajuba binilo, vio be tumãaro nonovio bo.

<sup>25</sup> Ana Yesu ber kalo berinavo “? Kenemiũ viekouoiano nibe?”

Naruei nalo amerou mia amerou laka, amiilo toru, ana na nalo ajumã abivika denlo bereio, aberinavo “?

Toro kenia na? Naio mil ga jibe na mia jegi naio tei amijogkar niono. ! Tomnei!”

*Yesu jitig bulag niadu miroano den toro Kerasa tai*

*Mataiu 8:28-34; Mak 5:1-20*

<sup>26</sup> Naruei Yesu nalo abarkor abokar tivelinio nene, napano Kalele jirarago ban eaio, nina memedu ka vio nei Kerasa. <sup>27</sup> Mia bogo napano Yesu jabulu, bauro ea vio nei, toro na vio nei tai binimei ka rivitavo vijaio, napano toro nene siũaro nalo ajuaio. Bogobe nua ruei, toro nene naio jo jibe ga na, maka riya kulumãarauo tai, a maka mãa monmon ea yimo, mia tinien jii ka mãa mon ea pakeltavo ga, ea buluyae nalo namãa abar kanalo tasimãaro nalo aba amonmoneaio. <sup>28-29</sup> Siũaro nalo nei ajumãa ajutua kiki toro nei va telabo ruei, mila na tomu nalo amilavon ka atukuku kanio damãariga, a nalo ajumãa amiorkakar ka mãmarmieni, ŕeli amiorkakar jaano a jumãano ka teli, mia naio jomãa mila kokorovlo ga, a siũaro nalo nei amijil deven naio binimei joa vio momãa nei.

Mia Yesu mialio, mil ban niununo va nei, jitig naio berinavo tuvan toro nene.

Mia toro nei mial Yesu, naio bio banio, a naio mijorua jaano, ana niununo neibano joa naio mil buru-tomoruo, naio berenio berinavo “? Mia jau, Yesu, Atua Soŕi kenerinio, kanamo vaio joa kiniou? !Kiniou nobika jikili denso, ka mia jau kesian re vironiano van kiniou!”

<sup>30</sup> Ana na Yesu bika denio berinavo “?Ana siamo, kei?”

Ana na niununo va nei naio berdoŕe, berinavo “Siaku be ‘Tomu na mira miroano.’ ” Naio ber jibe na, bior siũaro nalo namãa aba joomo ea naio nalo miroano laka. <sup>31</sup> Mia niununo va nalo nene nalo ajumãa abivika jikili den Yesu bereio ka mia naio rijil nalo re, naio rila lo re ava ajoru avatove yetano ea burumãara bulukuti sebi.

<sup>32</sup> Mo ea suku tivelinio na vio nei, be burumãara taara na kiribue, nalo

ajumã amiuiuo ea borotano, ana siñaro nalo neibano amiaga ban Yesu, abika jikili denio aberinavo naio rila lo ava joomo ga ea kiribue nalo nei. Ana na Yesu mijamo ka jibe na banlo, <sup>33</sup> naruei nalo ajaluvo den toro nei, ana nalo aba joomo ea kiribue nalo neibano. Mia soñeli ga, kiribue nalo nene ajikiti, ajibirbili ea yabalili tai, abavatove yetano ea burumãara ueiyabo nei, amadudu nonovio ea bulu niogovu.

<sup>34</sup> Ana bogo napano tomu na abitkar kiribue amial vite nei, mia nalo bunu aburo kilkil, aban bereio vonuo, aberial vite nei, mia nalo aberial janea vio reraio bunu, <sup>35</sup> mila ana vio bujo ka tomu nalo abinimei, ka ajidom aial kija. Mia bogo na abinimei, amial ka na Yesu naio jo, a toro namã niununo va nalo neibano aburo denio ruei, naio jomã jotano ea Yesu jaano. Naruei naio miya batitig kulumãarauo nabo ruei, mia naio jo melumu bo ruei jo, maka bunu rive deden leleio. Bogo napano amialio ka napano toro nei naio binimei bo ruei jibe nei, mia nalo amerou toru. <sup>36</sup> Mia nalo napano aju jukamu, napano amial vite nonovio, nalo ajukunu kanio ban nalo na abinimei vonga, nalo aberbisivisiio banlo jumãbe ka toro nei nua niadu nalo aban ea naio, mia Yesu mila naio binimei bo bereio ruei. <sup>37</sup> Mia tomu nalo na tanobuku nalo na vio Kerasa, nalo amial ka bova ga, naruei nalo aju ajadu jikili ka Yesu ka ajidom ka mia naio taluvo denlo, bior vite na milalo amerou toru laka. Naruei Yesu nalo abajou bereio ka avan ea kialo uako, ka nalo avan bereio.

<sup>38</sup> Ana bogo na ajumã abajou, toro neibano naio binimei balea Yesu jikili, ka jidom riva to naljuo bogo nonovio, mia Yesu maka rijamo kanio, mia naio berkanio, berinavo <sup>39</sup> “Makanio, bior bo laka ka kava vonuo bereio, a jau kava kover van tomu nalo, kover kalo jumãbe napano Atua mila bo mia bo laka banso jibe na.”

Ana toro nei ban bereio, a naio jomã miel jeliviv ea vio nalo na ea tanobuku na kanano burumãara bulukomeli, a naio jomã ber bulavulag imãuano novo nei napano Yesu mila ban naio.

*Jairas kenerinio vevinio, naljuo tira tai napano jokol Yesu mãano kulumãarauo*

*Mataiu 9:18-26; Mak 5:21-43*

<sup>40</sup> Naruei Yesu nalo abarkor bereio ueiyabo aba tivelinio, mia burumãara tiniobi na tomu nalo aju rorea naio, mia nalo ajaaro toru ka amial naio bereio. <sup>41</sup> Mia toro na toru tai na yimo na volkouano na kanalo na vio nei, siano Jairas, naio binimei vaataro ka Yesu. Naruei minie yetano kanio, jegi banio, baleaio ka rimei ea kunuano, <sup>42</sup> ka rial kenerinio vevinio, napano mie toru. Tira sesa nei, naio be toro na toru nei kenerinio takurano mãanonga, a kiano yuka be titai jibe ka duelimo ba juo ga [12], mia kiano mieiano binimei biloulo ruei, mila ana amial ka vaataro ka mia naio rimãaro. Naruei Yesu jumolu, ban bija toro nei abano.

Mia bogo na naio jo ban jibe na, vio bujo ka burumãara tiniobi na aju ajakisosorio, nalo ajumã amivinkakarilo ajeliviv ea Yesu. <sup>43</sup> Mia nalo nene tai kalo, naio be tira tai, napano kiano mieiano na monoleri mila naio ka legiano nonovio ga, bokar yuka duelimo ba juo [12] ruei, mia maka ve toro tai napano mijikia rila rivu kiano mieiano nei leleio. <sup>44</sup> Naruei tira nei, naio milavan naio bure tomu nalo nei, naruei mijian lilie ka naio binimei vaataro ka Yesu taakano, ana na naio jian jumãano jibe na ana jokol mãano ikiniono kulukoti. Naio jokol Yesu mãano kulumãarauo jibe na, mia monloglog bogo nei ga, kiano mieiano nei bisi ruei.

<sup>45</sup> Mia kolvare ga Yesu bika, berinavo “?Kenia na jokol kiniou von-ganei ga?”

Mia nalo aber “Maka toro tai tokolso,” mia Pitere bunu berkanio

berinavo “? Ana Tubo, jum̃abe? Tom miroano miroano laka na amivinkakarlo jelviv easo, a ajum̃a abalbaliaso.”

<sup>46</sup> Ana Yesu berkanio, berinavo “Makanio, toro tai jokol batitig kin-iou nei, bior nomijog lubar ka kanaku moroano togio jaluvo ea kiniou ban ea toro nene ruei.”

<sup>47</sup> Naruei tira nene, naio bitilubar ka naio maka bunu rijikia rilavan naio, naruei naio binimei ea Yesu, napano naio merou toru bano m̃a jo memebiju ka garuei. Naio binimei mijoru ea Yesu jaano, kamu ka tomu nalo napano aju na miralo, naio ber bulag nonovio vite ea naio banio, jibe na kar vaio napano naio binimei jokol Yesu, a jum̃abe napano naio binimei bo ruei ea bogo nei. <sup>48</sup> Ana na Yesu berkanio, berinavo “Nena, kanamo viekouoiano ea kiniou milaso kobo bereio ruei. Atua kiano tum̃aro to vijaso, jau kava vonuo ga bereio.”

<sup>49</sup> Naruei bogo napano Yesu jom̃a mil ban tira nei kia ga vo, iliano binimei ea toro na toru nei kunuano, berinavo “Kenerimo vevinio nam̃a na, naio bakovio ruei. Bo ka mia jau kovuru re bunu naverloglogiano na toru na rimei, ka kala lelan kule re naio.”

<sup>50</sup> Mia Yesu bunu mijog iliano nei, ana na naio ber ka Jairas, berinavo “Jau niukniuku rivieso re, jau kavarkar tiniemo sikili ea Atua ga, bior mia kenerimo vevinio naio rimeul bereio na.”

<sup>51</sup> Naruei Yesu ban bija toro nei ea kiano vonuo, mia bogo napano abinimei abokar vio nene, naio berbure nalo dolu berinavo mia nalo ava joomo re naliko naio, mia naio buru ga Pitere naljuo Jone, bija Yemesi, naliko niatira sesa nei karam̃ano a kenieno, mia nalo na ga aba joomo.

<sup>52</sup> Mia bogo na nalo aba joomo jibe na, amial ka napano tomu nalo ajum̃a tiniel miia niatira sesa nene ruei, nalo ajum̃a ajigio, mia Yesu ber kalo, berinavo “Kam̃iu kuviteg re rivior niatira na tibe na. Naio maka

rim̃aro na, mia naio jo monmelio ga na.” <sup>53</sup> Mia nalo abital m̃elea ga banio, bior nalo amijikia ruei ka napano niatira nei naio m̃arodobi ruei.

<sup>54</sup> Naruei Yesu ba bokar niatira nei jum̃ano, a naio mil banio, berinavo “Kanaku niatira, jau kotumolu von.”

<sup>55</sup> Naruei monloglog bogo nei ga, nalo amial ka napano niatira nei kiano meuliano binimei bere joaio bereio, naruei naio jumolu jikili ju, naio jom̃a miel, ana na Yesu ber kalo berinavo bo ka adu kiri sinaniano tai vanio. <sup>56</sup> Mia karam̃ano a kenieno, nalo amiilo toru napano mila kanalo jidomiano bakovio ruei, mia Yesu ber kalo berinavo mia averial re vite nei van kulo dolu nalo.

## 9

*Yesu miila bulagio kiano naia-gagoano nalo abeve juo*

*Mataiu 10:5-15; Mak 6:7-13*

<sup>1</sup> Naruei Yesu bio biroviron kiano duelimo ba juo [12], ana na naio mil batitig banlo, jian moroano banlo, mijamo kalo ka amijikia atuvulu sim̃aro, a ka amijikia aieliel ka mieiano nalo. <sup>2</sup> Naio mila jibe na ka mia naio riila bulaglo ka mia ava aioliolu ka Atua kiano navenatuboiano, a ka aieliel ka namieiano nalo. <sup>3</sup> A iliano nabo nalo tealoo napano naio ber kalo beamu vo, avona bisi ana na nalo abanio aber jibenei, napano naio berinavo “Tivelinio ka kenemiu m̃arabo, mia kam̃iu kuvar re titai. Mia kam̃iu kuvar re kenemiu nasitogo nam̃a kubanio, p̃eli na kenemiu basaro, p̃eli na sinaniano, p̃eli na kenemiu puruveru, a mia kuvar re kenemiu kulum̃arauo ve juo, mia kam̃iu kuvar kenemiu kulum̃arauo ve takurano ga nam̃a kumiya kar vonganei ka kuvano.

<sup>4</sup> “Mo vonuo na vabe na mia avurkar kam̃iu kuvitum̃a, kuva jouro eaio, mia monoka kam̃iu kuvisaaro ka mia kuvitu kamliko m̃aratavo na vonuo nene, mia kuvituvan vonuo nei bogo napano mia kuvitaluvo

den m̃arkomeli nei bereio. <sup>5</sup> A ea m̃arkomeli na vabe na ver maka asidom avurukar kamiu ea kunualo nalo, mia kamiu kuvituvan ga kialo vio nene, a bogo na kamiu kuvitaluvo denio, kamiu monoka kuvijubakon bulukievi na m̃arabo na vio neibano den jaamiu nalo, tibe ka kijokijo tai, p̃eli na iliano na kirisikili tai na kenemiu banlo, ka mia avar vironiano tai napano memedu ga ka kialo bajago na bova nene.”

<sup>6</sup> Ana na naiagagoano nalo abava tavio naruei, nalo aba ajel ea m̃arkomeli nalo, nalo ajum̃a amiololu ka Liliano Vou nabo, a nalo ajum̃a amieliel ka tomu nalo.

*Parinio Tubo Erot Antipas jidom bitovitonia Yesu*

*Mataiu 14:1-2; Mak 6:14-16*

<sup>7</sup> Ana ea bogo na, Parinio Tubo Erot nene bunu naio mijog kija ka vaio napano m̃a Yesu nalo ajum̃a amilaio, naruei naio jo tiniene burukorov biorio, bior tomu tealo ajum̃a aberii Yesu, ka naio be Jone Baruei, napano naio meul bereio den nam̃ariano, <sup>8</sup> mia nalo dolu ajum̃a aber vonvon aberinavo Yesu be tormoruo Elaija re nua, napano naio miyotuba bereio, a nalo tealo ajum̃a aberinavo Yesu be naverialiano nalo re nua nua tai, napano naio jumolu bereio den nam̃ariano.

<sup>9</sup> Mia Parinio Tubo Erot naio berinavo “Maka ve Jone Baruei na, bior kiniou nomiovlar pariparinio ruei, mia toro nam̃a ajum̃a aberverii na, naio be kenia bereio?” Mo jidomiano nei mila ana naio jidom toru ka rial kija Yesu.

*Naiagagoano nalo aba amiololu, karina na abinimej bereio*

*Mataiu 14:13-21; Mak 6:30-44; Jone 6:1-15*

<sup>10</sup> Ana naiagagoano nalo napano Yesu miila bulaglo ka ava aioliolu, nalo aborvoru bereio, naruei nalo aberial ka Yesu vite nalo nonovio napano m̃a amim̃aukanio. Ana Yesu

burulo ajaluvo den tomu nalo, ajubilig telisu ea m̃arkomeli tai, siano Betsaeta. <sup>11</sup> Mia karina, tomu nalo amijog ka aju aban ea vio nei, mia nalo bunu ajakisorilo, aban ea vio nene bunu. Mia Yesu naio jaaro ga, naio jukunu kija naliko, a kario naio berlogloglo ea tivelinio na nave-natuboiano na Atua kiano, a naio mila batitig nalo nam̃a aju ajidom toro tai ka rieliel kalo.

*Yesu bagan tomu menu jimo [5,000]*

<sup>12</sup> Mia Yesu jo naliko banbano, karina nalo amial ka napano m̃erenio jo batove nonovio, naruei kanano duelimo ba juo [12] abinimej keanio, aberinavo “Ai, Tubo, bo kanio jau kajamo ka tiniobi nei avan bereio ea kanalo vonuo nalo, p̃eli na ea m̃arkomeli tealo na, ka amijikia avulu salo sinaniano tealo, a ka amijikia aleal vio tai ka mia amon eaio, bior vio nei kito rojua nei naio bova ga, maka rivu ka vio ribobogko kito eaio.”

<sup>13</sup> Mia Yesu ber kalo, berinavo “Ee, makanio. Bo kanio kamiu ga kuvar sinaniano vanlo.”

Mia nalo aberdope aberinavo “! Ajerei! Abe kumemi nubarkar ga joko sesa jimo, bija niado na tertelisu juo. ?Peli na ver makanio, jau kojidom ka mia kumemi naruei, nuva nuvulu sinaniano rivare ka burutiniobi nalo na?” <sup>14</sup> Mia nalo aber jibe na bior tomu nalo napano aju na nalo miroano laka, napano kulovu nalo ga abokar titai kovio jibe ka menu jimo [5,000].

Ana na Yesu ber kalo berinavo “Kamiu kuva kuver ka tomu nalo na kuver atutano beamu vo, atutano ea taara nalo, napano mia tomu veve duelimo va jimo [50] atua taara tai.” <sup>15</sup> Naruei nalo abano amila javukia napano naio berenio, naruei tomu nalo ajutano ea taara nalo. <sup>16</sup> Naruei Yesu bar joko jimo bija niado na tertelisu juo nei, naio jirarago bavin tiniabene, naio milivu kanio, karina

burekokorovio, ana bar jian ban na-iagagoano nalo ka aviovio ka tanea taara nalo nei. <sup>17</sup> Naruei nalo ajinan banbano-o, mabolo jouo batitigio bo, a iororoti sinaniano napano ajen digio ju, nalo amisonsonlo aban ea basaro solokobaro nalo bokar due-limo ba juo [12].

*Pitere berial ka Yesu be Naverikariano memedu*

*Mataiu 16:13-28; Mak 8:27-31*

<sup>18</sup> Mia bogo tai, ana Yesu jo bolkouo naio takurano, a kanano naiagagoano nalo aju vaataro ka ga naio, naruei naio bika denlo, berinavo “?Kamiu kumitumãa kumijog tomu nalo ajumãa aberverii kiniou aber kiniou nebe kei?”

<sup>19</sup> Ana na nalo aber kanio, aberinavo “Tealo aber jau kobe Jone Baruei, a tealo aber jau kobe Naverialiano Elaija, a tealo aber jau kobe naverialiano dolu nalo re nua nua tai napano meul bereio den namãariano.”

<sup>20</sup> Mo naio bika denlo, berinavo “?Mo ana jumãabe ka kamiu, kamiu kumitumãa kuber kiniou nebe kei?” Ana na Pitere naio berdope, berinavo “Jau kobe Naverikariano na Atua kanano.”

*Yesu berial kiano mãariano*

<sup>21</sup> Naruei Yesu mil jikili, ber kalo memedu, berinavo mia nalo avan re averial vite nei ka tomu nalo, <sup>22</sup> mia naio ber batitigio bo banlo ka mia tumãabe ka naio. Naio berenio berinavo “Kiniou nebe Kulorinio Kenerinio, mia navurimãaraboiano nalo na kulo Israel nalo kialo, vija tomu na tortoru na kulo lu nalo, bija naverloglogiano na tuboiano nalo, mia avukular kiniou, monoka mia ala vite ve telabo ka ala lelan kiniou. Mia monoka auebin kiniou namãaro, mia ka bogoti ve tolu nene, mia Atua rivitirilar kiniou nemeul bereio.”

*Yesu Kiano naiagagoano naio monoka sidom iakurano ga ea kanano sidomiano nalo*

**9:19** Mat 14:1,2; Mak 6:14,15; Luk 9:7,8  
Mat 10:39; Luk 17:33; Jon 12:25

<sup>23</sup> Naruei ea bogo na, Yesu mil banlo, naio berenio berinavo “Toro napano jidom rimei takisor kiniou, naio monoka sidom iakurano ga ea kanano sidomiano nalo, ana mia naio monoka rudu kanano mãakolkolo ea legiano nonovio, jibe napano mia nodu kanaku, naruei naio takisor kiniou namãariga. <sup>24</sup> Neber jibe na bior toro na ver sidom ridururu kiano meuliano, mia naio rilaluvu kiano meuliano. Mia toro na ver rijamo ka kiano meuliano rivior kiniou, mia naio rijeve kiano meuliano bereio. <sup>25</sup> Avona ver toro tai bokar vite novo nalo na yetemeriba nei riviniu, mia rilaluvu mãarabo a rilaluvu kiano meuliano, naio maka rijeve vite novo tai leleio.

<sup>26</sup> “Toro namãa mimou ka kulo dolu nalo miralo bior kiniou peli bior kanaku iliano, mia kiniou Kulorinio Kenerinio, mia kiniou bunu noimou ea Atua mirano rivior toro nene, ea bogo napano mia nemei bereio eaio, napano mia nemei vija burumãara mermerano napano kanaku, a napano be karamãaku kanano, a napano be nailiano lu nalo kanalo. <sup>27</sup> Riano kiniou neber ka kamiu, be tomu tai ajumolu aju ea vio nei, napano mia maka ajikia amãaro, rivanvano-o rivokar bogo napano mia aial navenatuboiano na Atua kanano riyotuba.”

*Yesu niabene binimej be dolu*  
*Mataiu 17:1-8; Mak 9:2-8*

<sup>28</sup> Iorou ka bogo na napano Yesu berenio iliano nalo na, titai jibe ka sude takurano barlaka bereio ruei, naruei naio buru Pitere, Jone, a Yemesi, nalo veri abavin ea burusuku tai, napano jidom rivolkouo. <sup>29</sup> Naruei nalo abinimej abokar vio nene, a bogo namãa Yesu jomãa bolkouo, naiagagoano tolu nalo nei amialio napano mirano binimej be dolu, a amialio ka napano mãano kulumãarauo merera laka, a amiuvu bo mia amiuvu nonovio garuei.

**9:20** Jon 6:68,69    **9:23** Mat 10:38; Luk 14:27    **9:24**

30-31 Ana iorou, tormoruo juo nei Elaija naio Mosis, naljuo amiyotuba bija burum̃ara miamoiano na mermerano na tiniabene, ana na abe juo ajum̃a ajukunu naliko Yesu, napano ajum̃a aberii ka mia tum̃abe ana na mia naio monoka riva Yerusalemo, a monoka m̃aro den yetemeriba nei, tavukia napano Atua berkario ruei.

32 Mia beamu, Pitere nalo nei amijog miralo jouo toru, amiyukudovo banbano-o mia amonmelio garuei, mia bogo napano ajevijo bereio, amiilo ka vite nalo nei, napano amial Yesu kiano burum̃ara miamoiano na mermerano, a amial tomu juo nei ajumolu aju bijaio.

33 Naruei nalo amial ka napano naljuo neibano aju ajuvan vio ka avan bereio, naruei Pitere naio jidom ril, mia maka rijikia vaio ka mia riverenio, ana naio berilikodovoiano tai ban Yesu, berenio berinavo “Tubo, bo ka napano kito rojua vio nei. Bo kanio kito roim̃auka tobobo ve tolu ea vio nei, tai ve kiamo, tai ve Mosis kiano, a tai ve Elaija kanano.”

34 Mia bogo napano naio jom̃a beriliano nei, melijo tai binimeimidukolo, mia bogo napano amialio ka nalo aju joomo ea melijo nene, nalo amerou binvinlo. 35 Naruei amijog iliano tai miyotuba ea melijo neibano, naio berenio berinavo “Nina be keneriku na, napano kinio nebitirilar naio ruei. Naina naruei monoka kumonmonea naio rivu.”

36 Mia bogo na iliano nei bisi, melijo bakovio, amial ka napano Yesu naio ga takurano juo naliko bereio. Iorou ka nina, naiagagoano nalo aju ajurbanin kanio ga aju, maka ava averii vite neibano amialio ka tomu dolu nalo.

*Yesu mijil lar sim̃aro den m̃eaku tai*

*Mataiu 17:14-21; Mak 9:14-29*

37 Mia ea legiano dolu nene, Yesu naliko nalo tolu nei ajuvan burusuku nei, abatove bereio, mia

burum̃ara tiniobi na tomu nalo aju rorea ka ajidom aial naio.

38 Mia bogo napano amiyotuba kalo, toro tai kalo bio jouo ban Yesu, naio berenio berinavo “Naverloglogiano, neber aiou banso, kovitii von keneriku m̃eaku nei, bior naio be keneriku takurano manono ga.

39 Niununo va tai jom̃a binimeiea naio jibe na, mila naio miaga burutomoruo laka, a miaburusalsal bano-o m̃a titilevlevi bavin eaio. Tenei jom̃a mila naio napano kirivova laka, mila lelan naio laka, a naio jom̃a monmon ga milαιο, naio maka lele tuvan naio torm̃aro bogo tai. 40 Kiniou noburu naio ban ea kiamo naiagagoano nalo, neber aiou kalo ka ajilar niununo va nei, naruei nalo amila von, amim̃aukanio bano-o, mia abijukudeio ga.”

41 Naruei Yesu berdoḡe, mil banlo, berinavo “?Kamiau na, jum̃abe jibe na? Kamiau maka kuvarkar tiniemiu sikili ea Atua leleio. ?Mia kiniou monoka noto vija kamiau kelvovu nalo riva rivokar nagii? Kiniou tinieku m̃aro ea kamiau ruei. Mo, bo ga, kovuru kenerimo nene rimeivonio.”

42 Naruei nalo aba aburu kiritete nene binimeiea, mia bogo napano aju abinimeiea ga vo, niununo va nei mila m̃ele niadua kiritete nei bereio-o mia, mila niabene memebiju a ba burukar jikili. Mia Yesu mil jikili, berbure niununo va nene, ana naio mieliel ka m̃eaku nene, naruei naio buru bereio ba ban karam̃ano.

43 Mia nalo napano amial vite nalo nei, nalo amiilo toru laka ka Atua kanano moroano na loa laka na kirinovo nei, napano mila bo laka jibe nei ban tete m̃eaku nei.

*Yesu berial bereio kiano m̃ariano*

Ana memedu ka bogo na napano m̃a kulo dolu nalo ajum̃a aberverii vite novo napano Yesu milαιο, mia Yesu beriliano tai ka kanano naiagagoano nalo. 44 Naio berkalo, berinavo “Kamiau kuvije tiliniemiu rivu ka kanaku iliano nei, kamiau

kuvidu vatitigio toa kenemiu jidomiano nalo, ka mia tiniemiu ribobogia re bereio bogo tai. Nao, kiniou neber batitigio ban kamiu, Atua miila kiniou jibe Kulorinio Kenerinio, mia vaataro naruei ka mia adu kiniou navan ea tomu nalo junalo napano mia ala bin kiniou namaro.”

<sup>45</sup> Mia naiagagoano nalo maka ajog lubar vo venia napano Yesu jomã berii kalo, jibe ka nioti nene joluku kia ga vo, mila maka ajikia ka avitilubarario, a amerou bunu ka avika batitig den Yesu tivelinio ka iliano nene.

*?Toro kei naio loa laka ka kulo dolu nalo?*

*Mataiu 18:1-5; Mak 9:33-40*

<sup>46</sup> Mia iorou, ana baravo tai moluo iviso bure naiagagoano nalo, ka mia kei naio to mave ka nalo dolu. <sup>47</sup> Mia Yesu mijikia kialo jidomiano nalo, naruei naio bio kiritete tai napano jo miel binimei kanio, naruei naio midu kiritete nene ji ju tivelinio ka naio, <sup>48</sup> ana naio ber kalo, berinavo “Toro napano kiano jidomiano batove ka kiniou, mo naio saaro ka rijeve kiritete nei, nina javukia ga napano naio jaaro ka rijeve kiniou. A toro namã jaaro ka kiniou, jibe ka napano naio jaaro ka nana miila kiniou nebinimei. Nina bior nana ka kamiu napano kiano jidomiano rivatove laka, naio naruei napano mia naio loa laka ka kam nonovio.”

*“Toro na maka riverbure kito, naio jomã miija kito”*

<sup>49</sup> Ana Jone ber ka Yesu, berinavo “Tubo, kumemi numial toro tai, napano naio jomã mijil bulag siãaro nalo, naio jo mijil bulaglo ea siamo. Mia toro nene, kumemi maka nuvijikiaio, naio maka ve kito tai, naruei kumemi nuberbureio.”

<sup>50</sup> Mia Yesu berkanio, berinavo “Makanio, kamiu kuverbure re naio, bior toro napano maka mã riverbure kito, naio jomã miija kito kiana.”

*Yesu jidomial ka vaataro ka monoka naio rivavin ea vio Yerusalemo*

<sup>51</sup> Mia Yesu bitilubar ka vonganei, vaataro ka mia Atua rivuru naio rivavin bereio tiniabene, naruei naio midu vatitig kiano jidomiano ruei ka kiano m̃arabo monoka rivavin mave Yerusalemo. <sup>52</sup> Ana na nalo aju amiel abano, ana Yesu miila kiano atevi nalo ajukamu, aban ea m̃arkomeli tai na kulo Same-ria kialo, ka ayomon vite nonovio rimemedu ka mia naio mijikia rime iorou. <sup>53</sup> Mia nalo na vio na, maka asidom Yesu nalo amei jouro ea kialo vio, bior nalo maka atuãa tiniel tii ka aija kulo Ju nalo, napano ajumã ajel ea kialo vio na abavin Yerusalemo.

<sup>54</sup> Tilikiti napano naiagagoano juo nei Yemesi naio Jone naljuo amial ka napano nalo ajumã aberburelo jibe na, abika den Yesu, aberinavo “Tubo, kojidom nubolkouo, nuvio sebi tai taluvo ea vio mave rivatove sisen tanea nalo na?”

<sup>55</sup> Mia Yesu naio bilig naio banlo, berbure kialo jidomiano na jikili nei. <sup>56</sup> Ana naio jukamu kalo, maka bunu ava jouro ea vio nei, mia amiel ga aban ea komeli dolu tai.

*Toro napano naio jakisor Yesu, maka rijikia siraragdi bereio*

*Mataiu 8:19-22*

<sup>57</sup> Tilikiti napano aju amiel ea m̃arabo abano, toro tai binimei vaataro ka Yesu, naio berkar banio, berinavo “Mia kiniou natakisorso, ea vio na vabe na jau kavan eaio.”

<sup>58</sup> Ana Yesu berdoŝe banio, berinavo “Kuli deden nalo abe m̃alo bulukuŝili na amon eaio, a menu nalo abe m̃alo niuku nalo. Mia kiniou Kulorinio Kenerinio napano nebinimei tiniabene, maka ve kiaku vio tai, ka mia nava nomon eaio. Ver jau kajaaro bunu ka meuliano na jibe na, jau komijikia komei.”

<sup>59</sup> Ana ea bogo nei, toro dolu tai, Yesu berkanio bunu ber rime takisorio, ana naio berdoŝe banio, berinavo “Tubo, bo ga, mia jau kajamo

ka kiniou navan nevitikar kanaku tormoruo beamu vo, mia ver naio rimaro bogo tai, mia kiniou nemei bereio natakisorso.”

<sup>60</sup> Ana Yesu ber ka naio, berinavo “Jau kotuvan tomu nalo napano maka ajev meuliano vo ka mia ava ativin kanalo tomu na amarmaro. Mia jau, komei ga, rava roioliolu ka Atua kanano navenatuboiano.”

<sup>61</sup> A dolu tai bunu mila sopeiano jibe nei, naio bika den Yesu, berinavo “Tubo, mia kiniou tulaka ga natakisorso, mia vite tai ga, kiniou nojidom ka jau kajamo ka kiniou nava never bogiano bo van nalo na ea kanaku vonuo beamu vo.”

<sup>62</sup> Ana Yesu ber iliano tai banio jibe nei, berinavo “Toro namā jomā jidom mēlea kanano vonuo a kiano saba nalo nonovio nei, naio jibe toro namā jelanvu ka uako, a julaka jomā jiraragdi. Toro na jibe na maka rivare ka rimei ve toro na Atua kiano navenatuboiano.”

## 10

*Yesu miila bulag tomu miroano ka aveve juo ava aioliolu*

*Mataiu 9:37-38, 10:7-16, 11:20-24*

<sup>1</sup> Ana ea bogo na, kiado Tubo bitiri bulag kiano naiolioluano tealō bereio. Nalo duelimo va aluo ba juo [72] abiniu, a naio jomā jidomii ka mia rila lo ava atukamu ka naio, ava aveve juo ea mmarkomeli a ea vio nalo napano mia naio rivarlaka ealo iorou. <sup>2</sup> Naio berlogloglo jibe nei, naio berinavo “Be sinaniano miroano laka ju mermeruo ea tiniavio, mia tomu nalo maka ve telabo aju abarvar bijiilo binimej vonuo. Kamiu monoka kuvika sikili van boru na tiniavio nene, ka mia naio riila bulag tomu ta bunu avan ka avarvar sano sinaniano nene nalo rimei. <sup>3</sup> Ver tibe na, mo kamiu monoka kuvidu kenemiu mmarabo kuvano. Mia bo kanio kamiu kuvitilubar ka nemiila kamiu kuba tavio, jibe ka napano kamiu kumitavukia

nunu solbouo nalo, napano kumitumā kuba tavio ka mia kuviniua burumara kuli deden nalo. <sup>4</sup> Bogo na ver kamiu kuvano, mia kuvar re siveu na kenemiu puruveru, mia kuvar re kenemiu basaro nalo, a kuvar re kulubue na jaamiu tai bereio. Mia kuviel yauo ga tibe na kuvano, kuvitukunu pilipili re ea mmarabo van tomu nalo.

<sup>5</sup> “A bogo napano kuvano-o kuviyotuba ea yimo na vabe, vite na be moti ka mia kuverenio, kuver tibe nei, kuverinavo ‘Tumaro toa vonuo nei.’ <sup>6</sup> Ana verenio toro na toa vonuo nei naio tinien tii ka tumaro, mia tumaro neibano kuberenio mijikia to vija naio, mia verenio ve re toro tai tibe na, mia tumaro nei rimei ea kamiu bereio. <sup>7</sup> A kamiu kuvitatan ea re yimo nalo, mia kamiu kuvitua ga yimo ve takurano nei ga, mia kamiu kuvisaaro ga ka kumisen sinaniano vaio pēli na kumunu vaio na avar rimei asian van kamiu. Kamiu kuvimou re ka kuvijev vite novo vaio napano ajidom ala van kamiu, bior memedu ga ka toro na imauano monoka rivar kiano ijaiano ve telisu.

<sup>8</sup> “Tibe na, mmarkomeli na vabe na kuva kuviyotuba eaio, ver asaaro ka avitikar kamiu, mia monoka kamiu kuvisaaro ka sinaniano vaio napano mia asian van kamiu, <sup>9</sup> a mia kamiu monoka kuvieliel ka tomu na mieiano nalo na vio nene, a kamiu kuvijikia kuver kalo, kuver ‘Vonganei, Atua kanano navenatuboiano binimej vaatara ka kamiu, vonganei Atua jo binimej ka ve kenemiu Tubo naruei.’

<sup>10</sup> “A bogo tealō mia kamiu kumalmaluvo ea mmarkomeli tai, mia nalo asaaro re ka mia avuru kamiu kuva kuvitu kamliko. Verenio tibe na, mia kamiu kuvitakii ga mmarabo labo kuvan na jel jouro medave ea komeli nene, a kuverial ka tomu nene nalo tibe na, kuverinavo <sup>11</sup> ‘Yevi na mmarabo na kenemiu vio nei, kumemi numijuba

kon bulagio den jaamemi, jibe ka kijokijo tai ka kamiu kuvisidomiio. Kamiu monoka tiniemi ribobogia re, ka vaataro ga ka Atua kanano navenatuboiano riviedu kean kamiu rui, mia kamiu kumilkue kanio, naruei kumilaluvuio rui.’

<sup>12</sup> “Kiniou neber riano ka kamiu, ka legiano na tibureiano, mia nalo na jibe na avar vironiano nana jikili loa tovulu nana mia nalo na bulukumeli na Sotomo re nua mia nalo avario.”

*Yesu berii nalo naña maka amonea naio*

*Mataiu 11:20-24*

<sup>13</sup> Naruei Yesu mil jikili ban tomu nalo ea vio tealó, berenio berinavo “!Kulo Korosin, bija kulo Betsaeta, kamiu kumila lelan kamiu toru like mia! Ver kulo Taia vija kulo Saiton nalo aial kijokijo neibano kamiu kumialio rui nei, mia nalo aviliglo nua rui. Nalo maka ave kulo Ju, mia nalo aya mñadabake ga a avuku bulukievi ea pariparilo rui, nalo atutano atu tibe na ka tomu nalo avitulubar ka nalo amijog bova toru riano bior kialo kariano nalo. <sup>14</sup> Kiniou neber ka kamiu, ea bogo na tibureiano, mia kenemiu vironiano tovulu napano ve nalo nei kanalo.

<sup>15</sup> “! A kamiu kulo Kapeneam, napano kubarvar ka kamiu mñele, napano mña kumisidom kumijalar kamiu ka kumitu mave levlevi, kamiu kuvitikar kamiu! Mia Atua rivuku bulag kamiu kuvatove laka ea bulukuti sebi.”

<sup>16</sup> A Yesu ber bunu ka nalo, berinavo “Toro napano verenio ka mia naio rudukar kamiu, naio jo midukar kiniou, a ver toro napano maka sidom kamiu, naio jo maka sidom kiniou, a ver toro na maka sidom kiniou jibe na, naio jo maka sidom toro na toru napano naio miila kiniou nebinimej.”

Naruei bija iliano na, Yesu miila kiano naiolioluano nalo abatavio ka ala imñauano.

*Naiolioluano nalo abinimej bereio*

<sup>17</sup> Naruei najolioluano nalo nei aba amila imñauano novo nalo telabo, karina iorou kanio ana abinimej bereio ea Yesu, napano tinielo bujo laka ka saariano ka vite nalo napano mña amilaio. Abinimej bereio aber ka Yesu, aberinavo “! Tubo, kumemi numimñauka vite nalo ea siamo bano-o bokar napano simñaro nalo bunu ajutano ka kumemi!”

<sup>18</sup> Ana na Yesu berdoņelo berinavo “Ee, kiado imñauano jibe na naruei. A kiniou bunu, nemial Simñaro jumolu den tiniabene, amiila deven naio mijoru batove jibe ka viobijio tai. <sup>19</sup> Vonganei, kiniou nomijamo ka ban kamiu rui, ka kamiu kumijikia kuvivikar maro a buruolu, a moroano na kiado uolu kiano naio totano ka jaamiu bunu, ana mia ve re titai rijikia re rila bulag kamiu. <sup>20</sup> Mia kamiu kuvarvar ka kamiu re ka vaio napano kiniou nemijamo ka ban kamiu, napano niununo va nalo ajutano ka kamiu, mia be vite takurano ga napano kamiu kumijikia kuvujo ka saariano kanio, nina napano siemiu nalo, ajirikakarło aju joomo ea niosi na meuliano rui.”

*Yesu ber siva ban karamñano*

*Mataiu 11:25-27, 13:16-17*

<sup>21</sup> Mia ka bogo nei, Yesu bolkouo, berinavo “!Teta o, Tubo na vio mave a Tubo na yetemeriba! Neber siva banso, bior vite nalo napano ea tivelinio na kiniou, jau kobisiņeio banlo napano kialo jidomiano jibe ka kiritete nalo ga, mia nalo napano ajidomii ka abe mñasou laka, bija nalo napano ajidomii aber amijikia vite, mia jau komilavan vite nalo nei kalo. Riano, Teta, ninei javukia ga nana jau kojidomiio.”

<sup>22</sup> A Yesu ber bunu berinavo “Karamñaku mijamo ka vite nonovio jua jumñaku rui. Teta naio ga takurano napano mijikia batitig kiniou ka nobe kei, a kiniou napano nobe

kenerinio, kiniou ga takurano napano nomijikia batitig naio, ka naio be kei. Kiniou bija nalo napano nebijauia bulaglo abe kanaku, ka mia nesiloglog Teta kalo ka mia avarkar tinielo eaio, kumemi naruei numijikia batitig naio ka naio be karimememi.”

<sup>23</sup> Naurei Yesu barḡilig ka kiano naiaga-goano memedu nalo, naio mijuvaluva banlo bare ka nalo ga ajogio, naio berinavo “Atua mila bo ban kamiu, napano kumijikia kuvial vite nalo na. <sup>24</sup> Naverialiano telabo a parinio tubo telabo re nua napano ajidom mēlea ka aial vite nalo na, mia maka aial kija bogo tai, a abijuku kouo ka ajog vite nalo na bunu, mia maka ajog kija leleio.”

*Jamerijiano na toro na vio Same-ria tinien miia toro Ju tai*

*Mataiu 22:34-40; Mak 12:28-31*

<sup>25</sup> Mia bogo tai bereio, toro tai napano be māsou bo ka tuboiano, naio jidom rijukujuku Yesu ea vikadeniano tai na kirisikili, naruei naio jumolu ju, bika den Yesu, berinavo “?Naverloglogiano, verenio kiniou nesidom nalavon ka navokar meuliano napano maka ve jukuti nene, mia kiniou monoka nala tumābe?”

<sup>26</sup> Naruei Yesu berdoḡe banio, berinavo “?Mia kiado Niosi Lu naio ber venia ka tivelinio na? ?Jau kobulukuku komialio ber jumābe?”

<sup>27</sup> Ana na toro neibano berdoḡeio berinavo “Niosi Lu ber jibe nei, berinavo: Atua Soḡi napano naio be kiamo Atua, jau monoka tiniemo tii naio, kodu naio to tukamu ea kiamo iviso momou, a ea kiamo meuliano momou, a ea kiamo sikiliano momou, a ea kiamo jidomiano momou, a jau monoka tiniemo tii nalo napano aju vaataro kaso, jau kovijuku rivu kalo, tavukia napano mā tiniem jiiso.”

<sup>28</sup> Ana Yesu berkanio, berinavo “Nao, jau kober kirimemedu tanea na. Mia ver jau kala tibe na, mia

jau kovokar meuliano na kojomā kobikanio na.”

<sup>29</sup> Mia tete nei nao mijikia ka naio maka tomā rila rimemedu tibe na, mia naio jidom rila soḡeiano, naio bika den Yesu, berinavo “?Ana be kei nalo napano mā ajuju vaataro ka kiniou, napano kiniou monoka nala rivu kalo?”

<sup>30</sup> Naruei Yesu berdoḡe kiano vikadeniano nei ea jamerijiano tai, napano naio ber jibe nei berinavo: Toro tai, bogo tai naio juvan vio Yerusalemo naio jo miel batove yako Jeriko. Naruei naio jomā miel ba bokar vio kouo tai, naruei naio miilo ka taara tai na tomu nalo na vinuano, napano abiako eaio, amue tanea, naio, abar bulag nonovio kiano saba nalo, ana aburo kilkil, napano ajuvan toro nei māriulu mijoru joa kiano māarabo togio. <sup>31</sup> Ana kanado toro lu tai, naio bunu jo miel naio iorou kanio ea māarabo nene, ana bogo na naio binimej vaataro kean toro neibano, naio ju ḡilig kanio jel ea ikiḡarabo tivelinio ka ga bano, naio miel barlaka denio ban ga. <sup>32</sup> Ana iorou kanio, ana toro dolu tai miel binimej. Nao be Livai nalo tai na, napano ajuḡa amila imāuano nalo nonovio ea Atua Kunuano Lu, mia bogo na binimej bokar toro nei, naio bunu maka sidom rijai naio, naio miel ga barlaka ban ea ikiḡarabo tivelinio ban ga. <sup>33</sup> Mia iorou ka bereio, toro dolu tai, napano naio jo miel ea kiano burutili māarabo na, naio binimej. Nao be tete re Sameria tai, naruei jibe napano romijikia, nalo nene abe bilbilu va toru naliko kito kulo Ju nalo. Mia bogo na naio binimej bokar vio na, mial toro na māriulu mijoru mon ea māarabo, mia tinien miia naio toru.

<sup>34</sup> “Mia naio binimej vaataro keanio, ana jekon batitigio kiano niajebijo nalo, a mia titikivaka ealo, a bitakar batitiglo bo. Naruei naio burular toro nene jumolu, midu jotano mon mave ea kiano togki

taakano, ana miel ka bija naio bano abinimei abokar vio tai napano be yimo na jilimebiano tai joaio. Ana naio buru toro neibano ba joomo ea vio nene, miija batitig naio bo mia bo laka.

<sup>35</sup> “Mia kavijo, ana naio bar kanano puruveru tai, bar ban boru na yimo na jilimebiano nei, berenio berinavo ‘Kiniou monoka navan ea kanaku m̄arabo, mia toro nei toa jum̄amo beamu vo. Kovitikar batitig ka vite nonovio, a verenio puruveru na rivare re, mia kiniou nevitii bereio ka bogo na nemei nei bereio ea kanaku ieliano.’”

<sup>36</sup> Naruei Yesu bika den toro neibano bika vikadeniano nei denio, berinavo “?Jau komial tukunu nei jum̄abe? ?Ka nalo tolu neibano amiel ea m̄arabo napano toro nei jo mon eaio, na vabe kalo mila banio jibe ka napano naio be toro tai napano jo vaataro ka naio?”

<sup>37</sup> Ana na toro nei berinavo “Peli nana tinien miiiao.”

Mia Yesu ber ka bereio, berinavo “Ee naio nao, a jau bunu, jau kava kataki kiano bajago novo na.”

### *Marita naio Mere*

<sup>38</sup> Mia ka bogo na, Yesu naliko kiano naiagagoano nalo ajum̄a amiel abavin mave Yerusalemo, naruei nalo amalmaluvo ea m̄arkomeli na telisu na Betani, ana ea vio na tira na Marita naio buru Yesu ban ea kialo vonuo. <sup>39</sup> Mia bogo na Yesu ba jo bijalo, ana Marita nene kuluene tai, siano Mere, naio jotano kamu ka Yesu jaano, naio jum̄a miagago ka kiano verloglogiano nalo. <sup>40</sup> Mia ka bogo na, Marita maka tovon ka riagago, naio jum̄a bukudeli toru ka rila vite nonovio riviniu tu vatitig rorea Yesu, a naio jo jidomii bijovijon ka im̄auano nalo nei. Mia iorou kanio, ana naio binimei mial Mere naio jum̄a jotano, naio jum̄a miagago ka Yesu, naruei naio ber ka Yesu, berinavo “Tubo, kulueku na naio jotano kurano ga jum̄abe na, napano kiniou ga takurano nojum̄a nomila

vite nonovio nalo. Peli jau maka koto kovitulubar koviobo, mia bo kanio jau kover ka rimei riija kiniou.”

<sup>41</sup> Mia kiado Tubo berdoŝe naio berinavo “Marita, jau kobe tira tai nam̄a kojo kojidom bijovijon vite m̄ele, a jau kojom̄a komijog bova m̄ele ka vite telabo na jibe na. <sup>42</sup> Mia be vite takurano ga jo ka mia jau kosidomii ve temi kanio, a vite nene Mere nei naio jo mileal ruei ea kiano meuliano, mia maka nejikia nodu lario den naio bereio.”

## 11

### *Volkouano nam̄a Tubo berloglog ka kito*

#### *Mataiu 6:9-13*

<sup>1</sup> Bogoti tai, Yesu ba bolkouo ea vio tai, avona bisi, ana naio binimei bereio, ana na kiano naiagagoano nalo tai bika denio, berinavo “Tubo, bo laka ka ver jau kalavon ka koverloglog kumemi ka kumemi bunu nuvijikia nubolkouo, tavukia na Jone berloglog kiano naiagagoano nalo beamu ka abolkouo tavukia naio.”

<sup>2</sup> Ana Yesu mijamo kanio, naio berinavo “Mo, ver kamiu kuvisidom kubolkouo, kamiu kumijikia kuver tibe nei, kuverinavo:

‘Karamememi, memedu ga ka kumemi nuvitu nuvatove ka siamo lu.

Kumemi nubolkouo ka kiamo navenatuboiano rimei.

<sup>3</sup> Kumemi nubika denso ka kavar simemi sinaniano na banei a legiano nonovio.

<sup>4</sup> A koviekokoa kumemi rivior kenememi kariano nalo, bior nam̄a kumemi numituŋa nubiekokoa nalo nam̄a abijuku bova ban kumemi.

A jau kotuvan re vite nalo alavon kumemi m̄ele.”

### *Jamerijano na vikaniano na vite*

<sup>5-6</sup> Mia Yesu naio jidom ka nalo monoka amerou re ka avika vite den Atua, naruei naio ber jamerijano tai banlo, berinavo “Verenio ka bogiano vio vare, keiilo ka kanamo bilbilu

tai napano miel binimei boru ea kanamo vonuo. Mia samo sinaniano maka bunu tai rito, mia monoka jau ketikiti kavan ea tai na kunuano jo vaataro keanso, monoka kovika sikili denio, kover 'Koig, bilbilu tai miyotuba ka kiniou vonganei ga, mia kiniou nebe deio riano. Maka bunu ve titai leleio ka mia nomijikia nodu rivan naio ka mia senio. ? Jau samo sinaniano tai beva ju kovio napano komijikia kajamo kanio van kiniou beamu vo?"

<sup>7</sup> "Mia jumabe, rojidomii rober ðeli mia toro na mijikia riverdoþe, verinavo 'Ee koig, jau kala mēlea re kiniou tibe na. Jau keialio, kumemi numituboniko m̄aratavo ruei, mia kumemliko kiritete nalo, kumemi numitua mememi jogu nalo ruei, naruei maka bunu nejikia notumolu bereio.' Mia toro na maka rijikia river tibe na."

<sup>8</sup> Mia Yesu naio jusol tukunuano, ana naio ber kalo, berinavo "Peli bogo tealo toro tai rijikia sidomii iakurano ka riijaso bior jau koje vaataro ga ka naio. Mia ver jau koiñau re ka kovivika sikili denio vano-o, mia monoka sian vite venia napano ña koje kobivika banio."

*Yesu berii navikadeniano na vite den Atua*

*Mataiu 7:7-11*

<sup>9-10</sup> Mia tibe ka kiano jamerijiano Yesu ber bunu kalo berinavo "Toro na ver joñã bika vite, julaka mia naio mijikia rijeivio, mia verenio toro na joñã jirag vite julaka, mia naio mijikia rilealio, mia ver toro na joñã miniania m̄aratavo julaka, mia m̄aratavo nene mijikia rivetavo kanio. Tibe na, mia kamiu kumijikia kuvar vite nalo nañã kumituñã kubika denio, a mia kamiu kuvileal venia na kamiu kumituñã kumisir-agio denio, a m̄aratavo nañã kumituñã kuminianiaio mia naio rivetavo ka kamiu. <sup>11</sup> Ver kenerimo tai siserio, naio rivika niado sesa na jo, mia maka kejikia kodu maro tai vanio, <sup>12</sup> ðeli na ver rivika boboti tu na jo, mia maka kejikia

kodu buruolu rivan naio ka senio. <sup>13</sup> Be riano ka kamiu kube tomu na kirivova ga nalo, mia maka kamiu tai mijikia rila tibe na, kamiu kumitu kumisaaro julaka ga kañã kumisian tonovo nalo ban kenerimiu nalo. Jibe ga na, bogo napano kamiu kumituñã kubika den karamemiu na tiniabene, naio jaaro ga ka sian Niununo Lu van kamiu kenerinio nalo."

*Aberenio Yesu miñau ea Siñaro kiano moroano*

*Mataiu 12:22-30; Mak 3:20-27*

<sup>14</sup> Ana iorou kanio, ana aburu m̄arabo ka toro tai na siñaro ban ea naio binimei ban Yesu, siñaro nene mila toro nei maka ril, mia Yesu mijidiglar siñaro nene denio, naruei naio mil bo bereio, mila ana nalo napano amial vite nei amiilo toru laka. <sup>15</sup> Mia nalo tealo amijoku, naruei nalo aberii niegeniege Yesu, nalo aberinavo "Tete na naio joñã mijil bulag siñaro nalo ea ga moroano na siñaro nalo kanalo tubo, napano siano Belsabel, naio mijamo ka ban naio." <sup>16</sup> A nalo tai bereio, ajidomii bova bunu ka Yesu, naruei nalo ajumã amilavon naio, nalo ajidom ala luþiluþi naio ka naio rila kijokijo tai ea moroano na vio mave ka amijikia aialio.

<sup>17</sup> Mia Yesu mijoglubarbar kialo jidomiano nalo, ana na naio berinavo "Ver tubo tai, kanano tomu nalo avuruburelo, napano mia togio atuþelo ka togio dolu, mia tubo nene kanano im̄auano nalo monoka atibirbil. A ver vonuo tai, atuñã avuruburelo napano togio sidom rijil togio dolu, mia nalo na maka ajikia atu rivu bogo tai. <sup>18</sup> ? Jibe ga na bunu, ver siñaro nalo na Setano kanano atuñã avuruburelo ruei, ana mia nave-natuboiano na Setano kanano tumolu tu tumabe? !Ana kamiu kumituñã kuberinavo jibe na naruei, ka kuber kiniou nojoñã nemijil bulag siñaro dolu nalo ea moroano na burum̄ara siñaro na Belsabel kanano, mia maka rijikia tibe na

leleio! <sup>19</sup> ?Mia ver tibe ka namã kamiu kuberenio, jumãbe naruei ana kam tealò bunu ajumã amijil bulag simãaro? ?Kei naio mijamo ka moroano na banlo, ðeli Setano bunu ga bo? Bo ka ver kenemiu naiagagoano nalo namã ajumã amijil bulag simãaro nalo ajog kenemiu iliano nalo. <sup>20</sup> Mia makanio, kamiu kuberenio nina maka rimemedu na. Mia kiniou nojomã nemijil bulag simãaro nalo ea moroano na Atua jumãano ga, mia vite na berialio ka Atua kanano navenatuboiano naio ju iviso ka kamiu ruei.

<sup>21</sup> “!Kamiu kuvialio! Jibe kanio napano ver torkouo tai, naio rivar kiano saba na mira nalo, a tukuku vatitig ka burumãara kunuano. Naruei, vite nalo na toru nei kiano aju bo ga jouro ea kanano burusio. Naina naruei Setano kiano imãauano jibe na naruei. <sup>22</sup> Mia ver torkouo dolu tai rimej napano naio ðirinio jikili loa naio, mia naio rila mira kanio-o tuvulu Setano, ana mia naio mijikia rivar bulag vite nalo na mira na be kanano, napano beamu barkar tinieno eaio, a naio mijikia rivar vite nonovio napano ju jouro ea burusio na torkouo kanano, tan kalo van kanano tomu nalo.

<sup>23</sup> “Toro napano maka takisor kiniou, naio jo berbure kiniou, a toro na maka rimãau vija kiniou ka kumemi nuvuru kanaku tomu nalo amei vio takurano, naio jomã mijil dedade ealo abeve terakurano.”

*Niununo va naio mijikia binimej bereio*

*Mataiu 12:43-45*

<sup>24</sup> Ana Yesu ber bunu, berinavo “Bogo tai, bogo namã amijil lar niadu den toro tai, niadu nene mijikia riva yeturu ka sirago kunuano dolu tai. Mia ver rialeal re tai, mia naio riverinavo ‘Ee, mia nalavon ka navan bere ea kunuaku moruo na beamu vo.’ <sup>25</sup> Mia bogo napano naio binimej, mia rialeal ka yimo nene meravo bo jo, abar batitig vite nene nalo binu ju memedu bo ruei.

<sup>26</sup> Ana mia naio rivan rivuru niadu ve aluo dolu napano nalo abova loa naio lie vo, amei vija naio, ka na mia nalo ava joomo bereio ka atua toro nene. Ana toro nene, beamu kiano meuliano bova, mia iorou kiano meuliano bova bova laka.”

*Marabo na avokar saariano na berialio*

<sup>27</sup> Ana ka bogo na, tira tai jo naliko nalo napano ajumã amial vite nalo nei, napano mã amijog Yesu kanano iliano, naruei tira nei jaaro mñele kanio. Mia naio miaga merere laka naio berinavo “!Aiou liki! Konio nalo napano bariso, midu yu banso, Atua kiano ilivuiano ve toru laka toa naio, napano bar tete tai jibe ka jau.” <sup>28</sup> Mia Yesu berdoðe ban naio, berinavo “Nao, nina be riano na, mia kiniou neber ka jau ka mia Atua kiano ilivuiano rimej ve toru lie bereio vo van toro kei napano naio monmonea Atua kiano iliano nalo, naio mila venia napano naio jomã berenio.”

*Tomu na ajidom aial kijokijo*

*Mataiu 12:38-42; Mak 8:11-12*

<sup>29</sup> Ana ka bogo na, tiniobi nalo namã amiagago ka Yesu nalo aju abinimej telabo lie vo, mia Yesu naio mijikia ka nalo miroano kalo nalo abinimej ka ajidom aial kiano kijokijo nalo ga, ana naio mil banlo, berinavo “Kiniou nemial jibe ka tomu nalo na taara na kenemiu banej abova laka. Nalo aju ajidom aial kijokijo toru laka, mia makanio, mia Atua maka rijikia sian kijokijo tai leleio vanlo. Mia naverialiano Jona, kiano kijokijo re nua ga, nina ga mia amijikia aialio. <sup>30</sup> Atua miila Jona, jibe ka kijokijo tai ban nalo na vio Nineva re nua ruei, ana naio miila bunu kiniou Kulorinio Kenerinio nebinimej jibe kijokijo tai ban kamiu na vonganei.

<sup>31-32</sup> “Mia kulo Nineva re nua napano amijog Jona kiano iliano nalo, abiliglo ka bogo nene, a mia nalo na atumolu ea legiano na tibureiano, mia aver bulag rimemedu kenemiu

torokoriano nalo, bior be toro tai napano naio loa laka ka Jona naio jo bija kamiu, mia maka kuvilig kamiu.

“Nanua bogo tai bunu tira na toru tai na naio be parinio tubo tai napano naio jumolu ea kiano buruvenuto, napano jo koalabo laka, naio batove binimei ka rijog tormoruo parinio tubo Solomon kiano ilimasosouano. Naruei tira na toru nei bunu mia naio tumolu tu ea legiano na tibureiano, naio river bulag rimemedu kenemiu torokoriano nalo, bior be toro tai napano naio be masou loa Solomon naio jo bija kamiu, mia kamiu maka kuvisidom naio leleio.”

*Kijokijo juo ea tivelinio na yulu*

*Mataiu 5:15, 6:22-23; Mak 4:21; Luka 8:16*

<sup>33</sup> Mia Yesu ber bunu, berinavo “Bogo na ver rejelan yulu, kito maka retelan ka mia rava roduvanio toa bulutanbo tai ea borotano, p̄eli na mia kito reivekoio ka basaro tai bereio, mia kito rejelano ka mia reiveio takilele mave, ka mia ver toro na rimei mia mijikia rial ka yulu mereralii vio nonovio binuu.”

<sup>34</sup> A Yesu ber bunu, berinavo “Toro mirano naio jibe ka vio takurano napano yulu mijikia mereralii binimei joomo ea mokotenano. Tibe na, ver miramo rimeravo rivu, rivitii batitig vite nalo, mia tibe ka napano tiniemo bujo magmago ka yulu. Mia verenio miramo rivova, tinie jii vite nonovio nam̄a jom̄a mialio, mia jibe kanio napano tiniemo bujo magmago ka melijokouo. <sup>35</sup> Tibe na, mia kamiu monoka kuvitkar rivu, ka yulu napano joa tiniemiu rimei re bunu tibe ka melijokouo bereio. <sup>36</sup> Mia ver tiniemiu rivujo ka yulu tulaka nam̄ariga, napano maka ve melijokouo tai ve telisu toaio, mia kenemiu meuliano rimerera vatitig rivu, rudulii vatitig vio nonovio rivu.”

*Yesu mil jikili ban navurim̄araboiano na nalotvano nalo*

*Mataiu 23:1-36; Mak 12:38-40; Luka 20:45-47*

<sup>37</sup> Mia Yesu mil ban tiniobi nalo bano-o, naruei Varisis tai napano jom̄a miagago kanio ber ka Yesu berinavo mia rivuru naio rivan ea kunuano, ka rila sano sinaniano tai. Ana na Yesu ban bija naio, mia bogo na sinaniano amiomon ju, Yesu ba jotano ea vio na sinaniano. <sup>38</sup> Naruei ka bogo nene, Varisis nalo abokar jikili kialo tuboiano tai ka toro monoka takii m̄arabo tealoo ka m̄a sekon jum̄ano karina mijikia sinano. Mia Varisis nei naio jidom ber Yesu naio be toro lu tai, naio monoka rila tibe ka napano kialo bajago na jikili nei berenio, mia bogo napano naio mial ka Yesu maka sidom bijon ka naio rilaio, naio miilo toru laka kanio. <sup>39</sup> Ana Tubo mil ban toro nei, naio berinavo “Kinio nemijikia kenemiu bajago kamiu Varisis nalo ruei. Kamiu tiniemiu jii m̄elea ka m̄a kumisekon vatitig rivu dam̄ariga kenemiu baja nalo a kenemiu baju nalo, ana kumitum̄a kube m̄arou kanio, kumitum̄a kuberiam̄a kamiu kumeravo, a kube lu. Mia burum̄ara niamiamo na bijurukar kamiu kiano, bior kenemiu iviso nalo abujo magmago ka m̄a kumijukubin toro, a kumila kiki toro, a bajago nalo na kirivova jibe na. <sup>40</sup> !Ai, abe mia m̄a kuviavovu m̄elea re tibe na! ?Kamiu maka kuvitilubar ka Atua nam̄a jii vatavio na vite nonovio, naio ji bunu vajoomo na vite nonovio, mia bo laka ka ver kamiu kuvilakon nono tivelinio na kamiu rimeravo rivu ve riano, vatavio a vajoomo bunu. <sup>41</sup> Tonovo nalo nam̄a kamiu kumitum̄a kumisonlo toru bogo nonovio ban ea kenemiu baju nalo a bija kenemiu baja nalo, ver kamiu kuvitum̄a kuvilavon ka m̄a kuvio ka kija ga rivan talim̄asa nalo ga, mia rivu. Ver tibe na, p̄eli mia kamiu kuvial ka kenemiu vite nonovio nalo amei rimeravo vatitig ruei, ana mia m̄a kumila bijon re bunu kenemiu

bajago dolu nalo.”

<sup>42</sup> Naruei Yesu berii bajago nalo na juboluboiano na navurim̃araboiano na nalotuano nalo ba lie vo, naio berinavo “!Kamiiu kulo Varisis, aua! Kamiiu kumila bulag kamiiu toru laka, mia rivova laka van kamiiu. Kiniou nemijikia ka kamiiu kumitum̃a kubitikar batitig bo dam̃ariga, ka ver kubar semiu m̃arsiniano duelimo, mia monoka ve takurano rivan ea Atua kunuano, tavukia na tuboiano naio jom̃a berenio, a kumitum̃a kumila jibe na ka saba nonovio na be kenemiu, ba bokar bunu m̃asebitu sesa nalo a vite nalo bunu na jibe ka m̃arsili nalo. Mia vite nalo na tomormoruo nam̃a tuboiano berenio, kamiiu maka kuvisidomialio leleio, jibe ka nam̃a ber monoka kamiiu kumemedu rivu, a kamiiu monoka tiniemiu tii Atua a kulo dolu nalo bunu. Ver kamiiu kuvisidom kuvokar sikili vite nalo na tertelisu nei, naio bo ga, mia vite nalo na tomormoruo nei naruei naio bo ka kamiiu kuvitum̃a kuvila ruei, mia maka lele kuvilaio.

<sup>43</sup> “!Kamiiu kulo Varisis o! Kamiiu kumila lelan kamiiu toru laka, mia rivova laka van kamiiu. Joomo ea yimo nalo na volkouano, kamiiu kumisidom ka bogo nonovio kuvitutano ea vio na be tomu na tortoru nalo jelelo ga, a verenio kuviel ea tomu nalo miralo, kumisidom ka avatove ka kamiiu, a avio vatitig kamiiu, a averinavo ‘Aiou, naverloglogiano novo, kavijo bo!’ <sup>44</sup> Mia ve kirivova laka rivan kamiiu bior kamiiu kube tekurano ga, kumitavukia m̃artanbo moruo nalo na tinielo bobogia ea ruei, amiel pilinio mave ea ga, maka bunu ve tinielo ka vite jono tai napano menununu montano nei.”

<sup>45</sup> Ana ea bogo na, toro tai napano naio be masou bo ka tuboiano, naio bunu jom̃a miagago, ana mijog jibe ka Yesu kiano iliano bokar naio bunu bija nalo napano amim̃au jibe ka naio, ana na naio berinavo “!Naverloglogiano, kiniou nomijog jibe ka kojidom keil niegeniege kumemi bunu!”

<sup>46</sup> Ana Yesu berdoṣe, naio berinavo “!Nao-o, mia rivova van kamiiu tomu nalo natuboiano bunu! Kamiiu kumitum̃a kubitiri bulag bereio tuboiano sesa nalo tivelinio ka nalotuano bogo nonovio, nalo ajibe ka vite na teremi napano kumivon kakarlo ea tomu nalo taakalo ka monoka avarlo, mia kamiiu kumitu jibe na ga, maka kuvikulkulu ka m̃arjukujumemiu tai leleio ka rilavon ka riijailo. <sup>47</sup> Mia rivova van kamiiu, bior kamiiu kumitum̃a kumiyovovua batitig m̃artanbo na naverialiano nalo na Atua kiano, mia kamiiu kubevirare ga ka korobimiu tormoruo nalo re nua, napano nalo naruei amuebinvin naverialiano nene nalo am̃arm̃aro. <sup>48</sup> Kamiiu bija nalo nei kubare ga, bior nanua, tormoruo nalo nei amue naverialiano nalo, mia banei kamiiu kumisaaro ka kialo im̃auano nene, kumitusolio bereio napano m̃a kumitum̃a kumiyovovua m̃artanbo nene nalo.

<sup>49</sup> “Kamiiu kumitibe ka ga napano ilimasosouano na Atua kiano ber nua, naio berinavo ‘Mia kiniou nei-ila kiaku naverialiano nalo a atevi nalo aviedu ealo, mia ala lelanlo, ṣeli mia auebinvinlo am̃arm̃aro.’ <sup>50</sup> Iliano nei sano nioti nene ber mia kamiiu naruei kuvokar vironiano nam̃a korobimiu nalo re nua amuebinvin naverialiano nonovio nalo, jikar ka bogo na tikariano na yetemeriba nei. <sup>51</sup> Nina jikar ea Epel, binimej bokar Sakaraia, napano korobimiu nalo amue tam̃aria naio iviso ka boda bija Vio Lu joomo ea Atua Kunuano Lu. Riano, kiniou neber ka kamiiu nei, ka vironiano na burukija na Atua kiano naverialiano nalo jua kamiiu na vonganei.

<sup>52</sup> “Nao, mia ve kirivova lie vo van kamiiu tomu nam̃a amijikia batitig tuboiano, bior kamiiu naruei kumidu van navetavoiano na m̃aratavo na jikiaiano, ana kamiiu maka bunu kuvitum̃a kuva joomo eaio, a kamiiu kumitum̃a kumituko m̃arabo ka tomu dolu nalo nam̃a ajum̃a amila vio ka ava jouro.”

<sup>53</sup> Ana Yesu ber iliano nalo nei bisi

ana naio batavio den yimo neibano, naruei naverloglogiano na tuboiano naliko Varisis nalo tinielo bitunu tanea ka naio, napano tiniel mimi laka. Ana na nalo abie sosor Yesu dañariga, nalo ajumã abika iliano nalo a vikadeniano nalo na jikirgili banio, ka alavon ka ayukuru naio a ka rila naio river iliano tai na maka rimemedu. <sup>54</sup> Amiliviko Yesu jibe naio be temeul deden tai, bior ajidom ka aleal kiano iliano nalo tai ka mia amijikia atibure naio riviorio.

## 12

*Ililuklukuano nalo mia amal-  
maluvo amei medave*

*Mataiu 10:26-27*

<sup>1</sup> Ana na tiniobi nalo ajumã abinime i ea Yesu keano vo, ajovulu menu na tomu nalo miroano. Mia bogo namã abinime i vio takurano jibe na, vio telisu garuei, napano nã ajumã amivinkakarulo ga. Ana na bogo na Yesu maka ril vanlo vo, mia naio mil ban kiano naiagagoano nalo jukamu, berinavo “Kamui monoka kuvitikar vatitigio ka Varisis nalo kialo bajago va nalo, bior nalo ajumã amil ka kuluniolo ga, ajumã amil moruo mia amila sibi ga. Kialo bajago va nalo nei amijikia amaluvo rivokar a rila bulag toro dolu nalo, jibe isi na joko telisu ga mia kirisopeli ba miãau bokar joko nonovio. <sup>2</sup> Vite nonovio na bova namã tomu na jibe na ajumã amilavonio, ðeli namã aber luklukua ga, mia amalmaluvo ea vio medave navo, ka mia aviniu ajikiao. <sup>3</sup> Iliano vaio namã toro jomã berenio ea meljokouo, mia monoka ajogio bereio ea legiano, a vite nalo namã toro jomã mijuvaluva kanio ea kunuano ga, mia aiaga mnerere bereio ea tomu nalo miralo, ka mia aviniu amijikia ajogio.”

*Yesu kiano naiagagoano monoka  
rimerou re ka tomu nalo*

*Mataiu 10:28-31*

<sup>4</sup> Ana na Yesu ber ka bunu kiano naiagagoano nalo, naio berinavo “Banalo, kiniou neber ka kamui ka kamui kumerou re ka nalo namã amijikia aue tamãria mokotenemiu nalo ga, karina mia maka bunu ajikia ala titai bereio ka niunumiu nalo. <sup>5</sup> Mia nejidom neil vatitig rivan kamui ka mia kumerou ka toro kei? Mia kamui monoka kumerou riano ka Atua ga, napano mia naio mijikia rila niabemiu rimãro beamu, karina mia mijikia rivu niunumiu bunu rivan ea vio namã ajog rivova eaio. Lerinio, toro na naruei kamui monoka kumerou ka naio. <sup>6</sup> Mia ver kumerou kanio, mia kamui maka bunu kuvijikia kumerou ka todolu bereio, bior Atua jomã bitikar kamui, naio jo jidomial kamui. Kuvisidomii von menu sesa napano kirijako. Nalo miroano laka janea vio ga, ajibe ka soro ga, apiliãili kalo veru telisu ga ka kirijako jimo, mia Atua jomã tinien maio kalo abeve terakurano dañariga, naio maka tinien ribobogialo. <sup>7</sup> A vijumiu nalo na ea pariparimiu bunu, miroano laka, mia naio buluku nonovlo beve terakurano ga. Mia Atua naio jo mial kamui kubo laka jovulu kirijako nalo nei, naruei mia naio rivitikar vatitig kamui rivu ka vite nonovio na kenemiu meuliano.”

*Toro na berial ka naio be Yesu  
kiano*

*Mataiu 10:32-33, 12:32, 10:19-20*

<sup>8</sup> Ana na Yesu berenio, berinavo “Kei namã berial kamu ka tomu nalo miralo ber naio be kanaku toro tai, mia kiniou Kulorinio Kenerinio, kiniou bunu neverial siano van nailiano nalo na mave ka toro nene be kanaku. <sup>9</sup> Mia toro kei namã berial kamu ka tomu nalo miralo ber naio maka ve kiaku, mia kiniou Kulorinio Kenerinio kiniou bunu neverial van nailiano nalo na mave never toro na naio maka ve kanaku.

<sup>10</sup> “Kariano nalo bija ilivovaiano nalo, bija iliano nalo namã mila lelan kiniou Kulorinio Kenerinio,

Atua mijikia riviekokoa toro riviorio, mia toro na ver mila lelan tolu na Niununo Lu, berii Niununo Lu kiano iñauano, berinavo Simãaro ga mirãaukanio, toro na jibe na, Atua maka rijikia riviekokoa bogotai leleio.

<sup>11</sup> “A verenio bogotai, tomu nalo tiniel ser kami, mia avan ea ilivatitigiano ka kami. Mia amijikia avuru kami kivan kuvitumolu kuvitu kamu ea tomu na tortoru na yimo na volkouano nalo miralo, a ea komeli bunu, mia kami kuvisidomial mēle re ka mia kuverdopelo tunãabe, ðeli na mia kuver iliano na vabe vanlo. <sup>12</sup> Rimonloglog aura nei ga, mia Niununo Lu ga rijai kami, ka riverloglog kami ka iliano na vabe na mia kami kumijikia kuvrenio.”

*Jamerijiano na toro be sanibaiano napano maka sidonii vatitig kiano meuliano*

<sup>13</sup> Naruei tiniobi nei napano aju nei nalo tai, naio bio ban Yesu, berinavo “Naverloglogiano, kuruaku naio jomã mijukubin kiniou-o mia, naio maka tomã tan ka batitig karamememi jajumãno rivija kiniou. Bo kanio mia jau kover kanio ka naio rila rive verare ga vija kiniou.”

<sup>14</sup> Ana na Yesu berdoþe, berinavo “Ai, abe vite na maka ve kanaku ka nalaiio. Kiniou maka nove toro nana mia netibure kami.” <sup>15</sup> Jibe na naruei ana na Yesu maka rila tibe ka na kema nei naio berkanio, mia naio jian iliano tai tivelinio ka sidom mēlea vite nalo. Naio berinavo “Kami monoka kuvitigar rivu, maka rivu ka kuvitumã kuvijoku mēle ka kulo dolu nalo, kumisidom mēle ka kuvar vite nalo na be kialo. Kiado meuliano maka toa vite ve telabo nalo napano na roju rabario, mia kiado meuliano jikili jua vite dolu.”

<sup>16</sup> Mia Yesu jusol kiano iliano ea vio na lie vo, naio ber jamerijiano tai banlo, naio berinavo “Toro sanibaiano tai kiano borotano toru laka,

a bo laka, naruei kiano tiniavio nalo abar marimeuano toru ealo. <sup>17</sup> Mia tete nei naio mial sinaniano nalo nei, naio maka bunu rijikia mia rila tunãabe naruei, ka mia rivar vatitig sano sinaniano nalo nei tua vio na vabe, bior kiano yimo na varvatitigiano na sinaniano bija kiano vio dolu nalo abujovujo nonovio ruei. <sup>18</sup> Ana na kema neibano, berinavo ‘! Mia noue bulag kanaku yimo na varvatitigiano na sinaniano moruo nalo nei, ana mo nomijikia noimãu kanio na be terivou dolu nalo bereio, na mia nalo ave tortoru lie vo, na mia rivare ka sinaniano a vite dolu nalo na miroano nei kanaku. <sup>19</sup> Mia bogotai na ver noimãu kanio riviniu, mia kiniou naiãl kiniou tibe ka kiniou riano, kiniou nobo kija naruei! Riano ga, mia kiniou nojog rivu! Mia kiaku saba na miroano nei, mia nesenilo rivano-o mia avitigar vatitig kiniou rivano-o rivokar yuka ve miroano. Ka bogotai na, mia noimãu lele re bunu mia nesen vaio na nojidom, a mia nomunu uei tibe na ga, mia notoa meuliano nabo namãariga na.’

<sup>20</sup> “Toro nei naio jomã jidom jibe na bano-o, mia naio maka rijikia ka Atua berii ruei ka mia ril vanio naruei, naio berinavo ‘E kodovo, komiavovu ga na, bogiano nei ga, kiniou nojidom nodular bereio kanamo meuliano denso. A vite nalo na miroano namã komiãu bijon kalo na, namã jau komiãu bijo be kanamo na, mia ave kei kiano bereio liki na?’”

<sup>21</sup> Ana na Yesu ber kalo, berinavo “Mia tibe na naruei rivan tomu nalo namã ajumã abarbijii kialo saba telabo, napano abe tomu na sanibaiano tivelinio na yetemeriba nei, mia maka leleio ave sanibaiano tivelinio na saba nalo na ea Atua.”

*Yesu berlubarbar banlo jumãbe ka toro namã jo jidonii mēlea kiano meuliano*

*Mataiu 6:25-34*

<sup>22</sup> Ana na Yesu ber ka bunu kiano naiãgagoano nalo, naio berinavo “Kar tena, kiniou naber ka kami,

ka maka rivu ka kenemiu jidomiano rivujo mēle ka iñauano na kuvitkar kamiu ga, ka na mia mña kuvivika, kuverinavo “?Mia vio na vabe na mia kito romijikia releal sinaniano?” Peli na “?Mia rovokar kulumñarauo na royaio tumñabe?”<sup>23</sup> Jidomiano nalo na maka rimemedu, bior kenemiu meuliano naio bo loa ka sinaniano, a niabemiu naio bo loa ka kulumñarauo.<sup>24</sup> Kuyisidomii von menu maina nalo namña ajumña amierier janea vio nalo na. Nalo na maka mña aimñauka kialo tiniavio, a maka avaveni ka avarbijii sinaniano rimei vonuo, a maka avar batitig salo sinaniano nalo tua vio nene tai. Mia Atua jomña baganlo, a ea kiano vitiiano, naio mial kamiu kubo lie loa ka menu nalo, ana mia naio rivitkar kamiu rivu laka tovulu nalo.<sup>25</sup> ?Kamii kuberianña toro napano jomña jidomii kiano meuliano toru laka naio mijikia rila kiano meuliano na bulati na rimei vetebievi kija bere ve telisu?<sup>26</sup> Makanio, maka tibe na, mia bior kamiu maka kuvijikia kuvila titai na telisu jibe na, bo kanio kamiu kuvisidom bijovijon re vite dolu nalo na ea kenemiu meuliano nalo.

<sup>27</sup> “Kuvisidomii von buruniegnegi novo nalo namña ajumña amililuo janea vio na. Nalo na maka mña atu aimñau a maka mña atulu mñalo kuluniabele nalo. Mia kiniou naber ka kamiu, Parinio tubo Solomon re nua, napano naio be nasanibiano laka, a naio be kiano saba nonovio, kulumñarauo nalo namña miyaio maka rivar niogniogu na bo tibe ka mñaniegnegi nalo nei.<sup>28</sup> Maniegnegi nalo namña abe tena bogoti takurano ga, mia beni ana aisebilo ea sebi, mia Atua jo miyovovualo batitigio abo laka. Junñabe, kuberianña Atua maka rijikia rivar kulumñarauo van kamiu? Kaleliki, kamiu na maka kuviekar naio sikili leleio a!

<sup>29</sup> “Bior vite nalo na, mia maka rivu ka kenemiu iviso rivujo ka jidomiano nalo na, kuverinavo “?

Tumñabe ana na mia rosinan, a romunu, a releal kulumñarauo?” Mia maka rivu ka kuvitumña kuvisidomii bijovijon mēlea laka tibe na.<sup>30</sup> Ierinio, tomu nalo reraio na buruvenuto nonovio na yetemeriba neibano ajumña ajidomii mēlea vite nalo jibe na bogo nonovio ga, mia kamiu, karamemiu naio mijikia ruei ka monoka kuvar vite nalo na jibe na.<sup>31</sup> Tena be moti ka mia kuvisidomii ve toru ea kenemiu iviso nalo, naio be Atua kiano navenatuboiano. Mia verenio kuvila tibe na, ana na mia naio rivar bunu vite dolu nalo nei rivar kamiu.<sup>32</sup> Ierinio kiaku nunu sesa nalo, karamemiu naio jidom toru ka rijamo ka kamiu kumei kuve tubo ka kiano tomu nalo, ana na mia kamiu kuvisidomial re titai leleio, mia vite nonovio rimei rivu ka kamiu.”

*Toro na be sanibaiano tivelinio na Atua*

*Mataiu 6:19-21*

<sup>33</sup> Ana na Yesu ber bunu ber “Bo kanio kamiu kuviliñivi bulag ka kenemiu saba nalo na, kuvar veru nene van talimñasa nalo ka kuvijailo. Ver kuvitumña kuvila tibe na, jibe kanio kumitu kubar kenemiu burumñara basaro tai joa vio mave, napano mia maka rijikia rimei dagdago bogo tai, a kuvitumña kuvison bijii kenemiu saba nalo na miroano rivar eao, ka mia kuvarkar tiniemiu eao, ka mia toro na vinauano rijikia re ka rivar bulagio den kamiu bereio, pñeli na mia sivinia ser dudulio re.<sup>34</sup> Mia bo kanio kamiu ve kenemiu saba novo nalo na atua vio mave tibe na, bior mia kenemiu jidomiano nalo atu tulaka ea vio na ga napano kenemiu saba na bo nalo ajuao.”

*Naiagagoano nalo monoka atu vatitigio ka mia Tubo rimei bereio*

*Mataiu 24:42-51; Mak 13:33-36*

<sup>35-36</sup> Ana na Yesu ber bunu kalo, berinavo “Kamii monoka kuvitu derevijo tulaka ka mia kenemiu Tubo riyotuba ka kamiu. Kamii monoka kuvitibe ka tomu namña

amimāu toro na toru tai kanano, napano naio juvanlo ka ban ea soriano tai. Naruei nalo amiyovovualo, aje-lan bunu yulu nalo, ajumormolu aju, mia bogo vaio napano mia kialo toro na toru naio rivoru, naio rimej rinia māratavo, mia nalo aju rorea ruei, amijikia avetavo kanio vaarakurano ga. <sup>37</sup> Mia burumāra ilivuiano van tomu nalo namā amimāu jibe na, ka bogo napano kialo toro na toru boru keanlo, mia nalo aju rorea ruei, nalo ajevijo aju. Mia kialo toro na toru naio saaro ve toru kalo, ana na mia naio riva riija naio, karina mia rimej mia amiilo ka naio rivio ka amei atutano ea kiano vio na sinaniano, naio biovio ka sinaniano novo tai banlo. <sup>38</sup> Mia bekurano ka ver vio bobogio ruei, pēli na ba bokar bogiano vio vare, pēli na vaataro ka tu riolu, mia ver toro na toru naio rimej, rial ka kiano tomu nalo ajevijo aju rorea naio jibe na, mia naio rila vatitiglo rivu-o mia.

<sup>39</sup> “Mia bereio be verare ga ka ver toro tai napano mijikia memedu ka bogo na toro na vinuano mia rimej ea kunuano, mia toro nei maka rijikia tuvan kunuano to ga tibe na ka naio riva vio dolu, naio monoka to derevijo rorea naio to. <sup>40</sup> Tibe na, kami bunu monoka kuvitu rorea vatitig rivu ka mia kiniou Kulorinio Kenerinio nomaluvo, bior mia nomaluvo ka kami bereio ea bogo tai napano maka toro tai rijikiaio, pēli na tomā sidonii ka mia river nemej bereio eaio.”

*Jamerijiano na toro na imāuano na kiano toro na toru naio binimej bereio*

*Mataiu 24:45-51*

<sup>41</sup> Ana mo Pitere bika den Yesu, berinavo “?Tubo, jamerijiano na jau kober vonganei na, jau kober ban kumemi kanamo naiagagoano ga, pēli na kober ban tomu nalo nei ga abiniu?”

<sup>42</sup> Mia Yesu maka sian verdopeiano nene rimemedu vanio, mia naio berdope ban ea jamerijiano tai. Jamerijiano nene naio

jibe nei, ber “Ver toro na imāuano tai, napano naio be masou bo laka, a naio biekouo ea kiano imāuano, mia naio rimāu tumābe naruei? Ver kiano toro na toru juvan vio ka riva koalabo, mia naio tuvan kiano naimāuano nalo atua naio jumāno. Mia kema nei naio rivitikar kiano tomu na imāuano dolu nalo, mia naio rivokar vatitig imāuano nalo nene. <sup>43</sup> Mia bogo na toro na toru naio rimej bereio, mia naio rialeal ka kiano toro na imāuano nei, naio jo bokar batitig imāuano nalo nene kiano vo. Mia ka bogo na, mia toro na imāuano nei naio rijog rivu ve toru laka, <sup>44</sup> bior mia toro na toru nei naio tuvan vite nonovio na kanano tua jumāno. Ierinio, mia Atua rila tibe na ga bunu.

<sup>45</sup> “Mia ver toro na imāuano nei naio rimāu rivova, mia bogo na ver kiano toro na toru nei tuvan vio ka riva to koalabo, mia naio jidom riverinavo ‘E, toro na toru nei naio ba jo yako kirisiou laka ruei, pēli mia rimej re bunu naruei.’ Ana na mia naio tumolu rila kiki tomu na imāuano dolu nalo, a rivijuku rivova ka tire nalo na imāuano, a mia naio tomā sen veru na toro na toru nei kiano, a riva rimunu uei ea legiano nonovio. <sup>46</sup> Ana mia toro na toru nei naio rimej bereio ea legiano tai na mia toro na imāuano nei naio riilo kanio garuei, ea bogoti tai na mia naio risidom re ka mia boru nei rimej eaio. Ana na mia toro na toru nei sian burumāra vironiano van toro nei napano mia rila naio riva toa vio na tomu na pariparilo kirisikili ajuo.

<sup>47</sup> “Mia toro na imāuano napano mijikia batitig venia napano kiano boru jidomio ka naio monoka rilaio, karina maka rilaio, mia monoka avitii vatitig naio. <sup>48</sup> Mia toro na imāuano napano mila na bova memedu ga ka mia avitii vatitig naio rivorio, verver naio maka rijikiaio, mia avitiv naio ve toru re.

“Toro na Atua mije ban naio ve toru, Atua jidom ka rial toro nene

riñau ve toru rivijaio. Mia ver toro napano tomu nalo amiye vite nalo miroano monea juñano, mia amijikia avika vite ve miroano lie vo den naio bereio.”

*Yesu be burupati na toro naña mil die toro*

*Mataiu 10:34-36*

<sup>49</sup> Ana na Yesu berenio berinavo “Kiniou nebinimei ka noyon sebi rimemedu ea vio yetemeriba nei, mia bo ka ga ver sebi nene rivilvili ruei, ana makan vo. <sup>50</sup> Burumñara iñauano kouo tai monokoro jo kamu ka miraku kia navo, ka mia monoka nevija dulo eaio, mia vonganei notomña noñidig kar kin-iou ruei riviorio. Bo ka tenene rimei soñeli, ka nomijikia nala nonovio. <sup>51</sup> ?Kamiau kumisidom kuberiamña kiniou nebinimei ka nala burumñara tumñaro toa yetemeriba nei? Makanio, maka nemei ka nodu tumñaro toaio, mia nebinimei ka nala bajago na vuruvureiano rimei ve toru lie vo. <sup>52</sup> Mia tikar vonganei, ðeli ea vonuo tai, tomu nalo jumo ajuaio, ana mia nalo tolu nene avuruburelo ka naljuo nene, ðeli na juo nene avuruburelo ka nalo tolu nene. <sup>53</sup> Mia tomu nalo avuruburevurelo, ka na mia tete mñeaku nalo atudie karamñalo nalo, mia teta nalo atudie kialo tete mñeaku nalo, mia nena nalo atudie kenerilo niatira vevinio nalo, a niatira vevinio nalo atudie kialo nena nalo, a mia niasimemi nalo atudie niatira na joro vonga ka kenerilo mñeaku nalo, ana mia niatira nalo atudie kenielo niasimemi nalo.”

*Monoka avitulubar kijokijo na bogo na Yesu kiano*

*Mataiu 16:2-3*

<sup>54</sup> Ana mo Yesu mil ban tiniobi nalo bereio, naio berinavo “Bogo na kito rotumña roial burumñara melijo na bobogio joa vio naña jegi moluo eaio, romijikia ka mia yuo rimei, mia maka vesiou ga ana na yuo bovo. <sup>55</sup> Mia bogo naña romijog ka kanado jegi na saot jomña miuvuvu, nina naruei romijikia ka mia vio

rivitunu mñele, ana na mia monoka tibe na ga na. <sup>56</sup> ?Nina naruei, kamiau kumitumña kubitulubar ruei kijokijo na vio yauo a yetemeriba, ka mia bogo tumñabe ðeli mia tumñabe, ana mia juñabe kamiau maka kuvijikia kuvitulubar kijokijo nalo na ea kanaku burumñara bogo na vonganei nei napano mña nojo bija kamiau? Peli kamiau maka kuvisidom kuvitulubar ga kovio? Tomnei, kamiau kubarvar laka ka kamiau, kuber vite nalo mia maka kuvilaii.”

<sup>57</sup> “Bo ka ver kamiau kuvilayon ka kuvijikia kuvitulubar kija ka mñarabo na vabe naruei na naio memedu ka kamiau kuvitakiio. <sup>58</sup> Verver bogo tai jau kala baravo kam juo toro tai ka titai, mia naio sidom rivurso kavan kotumolu kotu kamu ea toro na tibureiano mirano riviorio, mia bo ka jau kala vio sikili ka keil vatitig rivija naio, beamu ka bogo na kamiau maka kuvoru komeli vo. Ver makanio, ðeli mia naio ruduso kotoa toro na toru naña jijibure toro juñano, ana na toro na toru nei ðeli mia naio ruduso kotoa tomu naña abokakar tomu nalo jumñalo, ana mia nalo aduso kotoa yimo na tetavokoiano. <sup>59</sup> Ierinio, kiniou neberii kaso, ka ver tibe na, mia jau maka kejikia kataluvo bereio den yimo na tetavokoiano nene, rivanvano-o mia jau kovulu bulag nono kiamo mauo riviniu beamu vo, ana mia jau komijikia kataluvo bereio.”

“Mia iliano nei naio be riano ban kenemiu meuliano na yetemeriba nei, a be riano bunu ea tivelinio na kamiau bija Atua.”

## 13

*Ver koviligso re, mia jau kañaro*

<sup>1</sup> Mia tomu nalo na aju ea bogo na, ajukunu ka kulo Kalele tealu ban Yesu, napano toro na toru na Romo nei Pailat mila bajago na kirivova tai kalo. Nalo aberenio “Nalo na ajua Atua Kunuano Lu, mia monloglog bogo na aju amilotu ka Atua, amila

sida banio, mia Pailat nalo abinimej amiel binvinlo amarmaro, mia amila kitkita kialo burukija bija burukija na kialo sida neibano ajumna amilaio.”

Naruei bogu na aber vite nei ka Yesu, ajidomii ruei ka vite na bova nei na maluvo kalo, pli be Atua kiano vironiano tai banlo, bior kialo vovaiano tai napano pli nalo amilaio.

<sup>2</sup> Ana na Yesu berdope banlo, berinavo “Kamiu kuvial kulo Kalele nalo na amarmaro kirivova jibe na jumabe na? Peli kuberiamna nalo abe tomu na bova laka, jovulu kulo Kalele dolu nalo, naruei naio be kialo vironiano ga? <sup>3</sup> Kiniou nojidom nover ka kamiu never makanio, naio maka tibe na. Mia monoka kuvitkar vatitig rivu, bior ver kuvilig re kamiu, mia kumijikia kunaro bunu ea bajago na jibe na.

<sup>4</sup> “Mia kamiu kuvisidomii von yimo na siraragkuiano napano joa komeli na Sailomo. Naio bavin loa laka, mia bogu nanua naio mijoru, na jibirbil ea tomu nalo mia nalo duelimu ba arolu [18] amarmaro. ?Mia jumabe ka nalo na? ?Peli kumituma kuber nalo na bunu abova loa ka kulo dolu nalo na vio Yerusalemo, mia nina naio jibe ka kialo vironiano tai, a? <sup>5</sup> Mia makanio, naio bunu maka tibe na. Mia kiniou neber bereio ka kamiu, neber monoka kuvitkar kamiu rivu, bior ver kuvilig re kamiu, mia kumijikia kunarmaro bunu ea bajago na tai jibe na.”

#### *Kijokijo na burubilivo na maka takou*

<sup>6</sup> Ana na Yesu ber jamerijiano tai bereio, napano naio ber jibe nei, berinavo “Toro tai, kiano burubilivo tai jua kiano tiniavio. Mia bogu tai ana toro nei naio binimej ea burubilivo nene, jidom ka rial von naio jakou pli na maka takou. Naruei naio binimej mial ka buruiesi nene maka takou leleio. <sup>7</sup> Mia naio mil ban toro nana bitikar kiano tiniavio, berinavo ‘Vonganei bokar yuka

tolu ruei, napano nobinimej najirarago ka burubilivo nei marati, mia maka lele tai. Niabeku mave ka ruei, naio jukoko vio na bo nei kurano ga, mia jau ketelario ga rivano.’

<sup>8</sup> “Ana na toro na imauano neibano naio tinien mia burubilivo nei toru, ana ber ka kiano toro na toru nei, berinavo ‘Ver tumabe, mia kito ralavon ka rotuvan tu ka yuka ve takurano bereio von. Ka mia kiniou nalavon ka noimau ka vatitigio von beamu vo, mia nekil pli selvivia burupati, ka mia novisivisi tera buluku ea ka mia rila riluo rivu. <sup>9</sup> Naruei ver riluo rivu, rivar kija marati ka yuka yako, mia mijikia tu bo tibe na bo kano, ver makanio, mia jau komijikia ketelario rivano.’”

Jamerijiano nene ber be bogu telisu kiano jo ka tomu nalo amijikia aviliglo, verver makanio mia Atua rijev vironiano vanlo.

#### *Yesu mieliel ka tiramoruo tai ka Legiano Lu*

<sup>10</sup> Ana ea Legiano Lu tai, mia Yesu naio joma berloglog tomu nalo joomo ea kialo yimo na volkouano.

<sup>11</sup> Ana ea vio na be tiramoruo tai naio jo, napano niununo na bova tai na mieiano joa naio. Ana niununo napano miadikar naio ka yuka duelimu ba arolu [18] ruei, napano mila na tiramoruo nei taakano jupe laka, naio maka rijikia rivitiri naio memedu leleio.

<sup>12</sup> Mia bogu na Yesu jirarag loglogio, bio naio binimej, ana mil banio, ber jibe nei berinavo “Tiramoruo, kiniou neber jibe nei, neber jau, mieiano nana bivikakarso na, mia ritaluvo denso vonganei ga.” <sup>13</sup> Ana bija iliano nei Yesu midu jumano joaio, mia vaarakurano ga taakano binimej memedu bo bereio, naruei tiramoruo nei mijog bo toru laka, miaia Atua Sopi-o mia.

<sup>14</sup> Mia navurimaraboiano na yimo na volkouano nei, naio tinien jer Yesu ka napano naio mieliel ka tiramoruo nei ea Legiano Lu. Naruei naio mil ban tomu nalo, berinavo

“Jibe ka na kito romijikia ruei, romijikia ka roimãauka bogoti ve ari, mia bogoti takurano, maka roimãau. Ver kami kuvisidom ka aieliel ka kami, mia bo kanio kumei ka bogoti ve ari ga, mia Legiano Lu na jibe nei naio maka rive bogo nene rimemedu.”

<sup>15</sup> Ana na Tubo berdoþeio berinavo “? Juñabe? Peli kami kumitumãa kumijian kenemiu bue m̃arauo nalo ka Legiano Lu, þeli maka kumijianlo? Peli na kami kumitumãa kubagan kenemiu temeul nalo a kumitumãa kumiyon uei banlo ka Legiano Lu, þeli na maka kuvila tibe na? ?Mia bior vaio ana maka kuvisaaro ka namila batitig tonovo tai ea tiramoruo nei? !Kami kubarvar laka, kuber vite nalo mia maka kuvila! <sup>16</sup> Tiramoruo nei, naio be kuviviniedo tai napano kito robiniu romiyotuba ea yati na tormoruo Epraamo, mia Najuboli-boiano miorikar naio ka mieiano nei mijil yuka duelimo ba arolu [18] ruei. Ana kiniou namial jibe ka Legiano Lu naio memedu ga ka kito rovrular naio den vio na bova nei napano joaio.”

<sup>17</sup> Mia bogo na Yesu ber iliano nei, mila kiano uolu nalo nei amijog amimou toru laka ea tomu nalo miralo. Mia kulo dolu nalo, nalo ajaaro toru laka ka imãuano na bo nalo na miroano napano Yesu milaio banlo.

*Jamerijiano na kurukubako*  
*Mataiu 13:31-32; Mak 4:30-32*

<sup>18</sup> Mia Yesu mil bereio, naio berinavo “?Kiniou never iliano venia rivan kami ka mia rila na kami kuvijikia ka Atua kanano navenatuboiano naio juñabe? ?Mia kiniou never navenatuboiano nene naio javukia vite venia? <sup>19</sup> Mia nalavon ka nala rimeravo rivan kami ka jamerijiano nei, napano naio ber jibe nei, berinavo, Navenatuboiano nene, naio jibe ka kurukubako napano mijoru ba birakar joa buruiesi tai. M̃arati nei kiritavaso leleio, mia bogo na miluo,

binimei be buruiesi tai na burutomoruo laka, naruei menu nalo abinimei amila m̃alo niuku nalo jua jaati nene nalo.”

*Jamerijiano na isi*  
*Mataiu 13:33*

<sup>20</sup> Ana Yesu ber jamerijiano dolu tai bereio banlo, naio berinavo “?Peli mia kiniou neverinavo Atua kiano navenatuboiano naio javukia vite venia bereio? <sup>21</sup> Navenatuboiano nei, naio javukia tira tai namãa jo milalaglag isi na teliki ga bija burumãara baju na yevei tai, naruei isi na teliki nei naio mila joko nonovio miyuku toru.”

*Be m̃arabo juo ga*  
*Mataiu 7:13-14,21-23*

<sup>22</sup> Ana Yesu naio jo midu kiano m̃arabo bereio, naio jo jidom ka rivavin bere Yerusalemo. Mia bogo na jo ban jibe na, jo miel jel ea komeli nalo, jomãa berloglog tomu nalo. <sup>23</sup> Naruei ea komeli tai, be toro tai bika denio, naio berinavo “?Tubo, nalo na mia avokar meuliano, nalo telabo, þeli na maka ve telabo laka?”

<sup>24</sup> Naruei Yesu berdoþelo, berinavo “Kami monoka kuvilavio sikili ka mia kuva joomo ea bulutavo dolu na, napano na teliki ga. Kiniou neber riano ka kami, ka mia tomu ve telabo asidom ava joomo, mia maka ajikia alaio. <sup>25</sup> Nina bior iorou, ana mia toro na toru na yimo mia naio rial ka bare ruei, mia naio tumolu, tetavoko vatitigio bereio. Ka bogo na, mia kami ve telabo kumei kuvidu buron kami ea m̃aratavo nei, mia kuviniu kuvio kuverinavo ‘Tubo, kumemi nuber bo ka jau kovetavo ka kumemi.’ Mia toro na toru nei naio riverdoþe ga tibe nei, naio riverinavo ‘Ai, abe kiniou maka najikia kami leleio! Kami kube kulo be nalo?’ <sup>26</sup> Ana na mia kami kuvilavon ka kuver kanjo ka bogo na, kuverinavo ‘Ana juñabe, jau maka bunu kosidomial ka kito naruei rojumãa rajinan vio takurano damãariga beamu mugaruei m̃a na? !Kumemi nene nei naruei namãa jau

kobinimeĩ m̃a koberloglog kumemi janea vio medave nalo ea kenememi komeli nalo!'<sup>27</sup> Mia naio river kalo, riverinavo 'Kiniou neber ka kamiu vaarakurano nua ruei, ka maka lele nejikia kamiu, kamiu kube kulo be. Mia namijikia ga ka napano kamiu kube tomu nam̃a amim̃auka bajago na kirivova ga. !Kamiu, kuvitaluvo den kiniou vonganei!'

<sup>28</sup> "Ka bogo na, mia kuvijog rivova ve toru, mia ve burum̃ara tegiano, kuviser m̃arjuvomiũ. Nina bior ka mia kamiu kuvial ka napano Atua kiano tomu novo nalo, jibe ka Epraamo, Aisak, Yakovo, a naverialiano dolu nalo bunu, nalo aju bo jouro ea kiano navenatuboiano ruei, mia kamiu, avuku kamiu kuvitu bo ga tavio tibe na. <sup>29</sup> Ea bogo na, mia kulo dolu vetelabo ayotuba ea sudu veri na yetemeriba nei, amei ka atutano ka asinan ea burum̃ara jokoluolu na jouro ea Atua kiano navenatuboiano, mia kamiu maka kuvijikia kuva jouro eaio. <sup>30</sup> Mia tibe na naruei, ka nalo nam̃a aju iorou, mia atu tukamu, a nalo nam̃a aju jukamu, mia atu iorou."

*Parinio Tubo Erot naio jidom rue bin Yesu*

*Mataiu 23:37-39*

<sup>31</sup> Ka bogo na, ana Yesu jo bavin Yerusalemo kia vo, mia Varisis nalo tai abinimeĩ eaio, aberial kanio, aberinavo "Peli jau maka kejikia, ana Parinio Tubo Erot na, naio berkar ruei ka mia ruebinso. Bo ka jau kataluvo den tanobuku na naio jom̃a be tubo eaio, jau kovuro kava Yutea beamu vo."

<sup>32</sup> Ana na Yesu berdoḡelo berinavo "Kiniou maka nosidomial souo kurkuru na ka naio be toro tai na mijikia rila titai ka kiniou. Kuva kuverial ea mirano kuver kiniou noto nala kiaku im̃auano beamu vo. Kuver kanio kuver kiniou nojom̃a nemijil bulag sim̃aro nalo, a nojom̃a nemieliel ka tomu nalo, a mia notom̃a noim̃au tibe na banei, beni, veua bereio, rivano-o mia neial

ka namila nonovio ruei. <sup>33</sup> Mia kiniou namijikia na ver ka kamiu, ka mia kamiu kuvisidomii m̃elea re kiniou, bior ka legiano nalo nei, kiniou nojo najaluvo den tanobuku nei navan tibe na naruei. Monoka najaka nava novoru Yerusalemo vo, bior namial jibe ka vio na naruei nam̃a tomu nalo ajum̃a amuebinvin naverialiano nalo eaio, jikar nua ruei."

*Yesu naio tinien miia vio Yerusalemo*

<sup>34</sup> Ana na ka bogo na, Yesu tinien miia Yerusalemo m̃a jegidu kanio, naio berinavo "¡Yerusalemo, Yerusalemo-o! Bior vaio ana kojom̃a komuebinvin naverialiano nalo, a kojom̃a kojuba binvin tomu nalo nam̃a Atua jom̃a miilalo abinimeĩ easo? Vatelabo kiniou nejidom nodu jum̃aku selvivko kiamo tomu nalo tibe ka sabarou bio kirikiti nalo abinimeĩ amiyuku jel tano ka sibiano, mia kanamo tomu nalo maka asaaro kanio. <sup>35</sup> Mia komialio na, Atua naio jo bilig taakano kaso ruei nei, ana naio miila kiniou nebinimeĩ be moti nei naruei, ana naber kaso, neber mia kanamo tomu nalo ajikia re aial kiniou bereio, rivano-o rivokar bogo na avitilubar kiniou, averii kiniou averinavo

'!Atua soḡi loa laka, jau keilivu ka naio napano naio jo binimeĩ ea siamo!'"

## 14

*Yesu mieliel ka toro na mieiano tai*

<sup>1</sup> Ana ka Legiano Lu tai, navurim̃araboiano na Varisis tia bio Yesu ba jinano ea kunuano. Mia tomu dolu nalo tealo nam̃a maka tiniel tii Yesu, nalo aju bunu ka bogo nei, ajum̃a abitivitii julaka ver naio rila vite tai na maka rimemedu, mia amijikia ala tibekovio ka naio. <sup>2</sup> Mia toro na mieiano tai jo naliko joomo ka bogo nei, napano toro nene niabene nalo jurojurobi tortoru laka. Mia Yesu mial toro nene, <sup>3</sup> naruei mil ban

naverloglogiano na tuboiano nalo, bija Varisis nalo napano aju, naio bika denlo, berinavo “?Jum̃abe ka tivelinio na kiado tuboiano? ?Naio berenio kito romijikia reieliel ka toro ea Legiano Lu, p̃eli na ber maka rejikia reieliel kanio?”

<sup>4</sup> Mo bogo na Yesu bika vikade-niano nei, amial jibe maka bunu ajikia asian verdopeiano rivanio, mia maka bunu ail. Ana na Yesu buru toro nei binimej vaataro keanio, ana mieliel vatitig ka naio bo bereio, berinavo mijikia rivan bereio vonuo. <sup>5</sup> Ana naio mil ban nalo na aju, naio berinavo “Kamiu kuvilavon ka kuvisidomii vonio. Ver kamiu tai, ka Legiano Lu, kenerinio tai, p̃eli na kanano temeul tai, naio riva rijoru rivatove ea bulukuei tai, ana mia jau kala tum̃abe? ?Mia jau monoka kala sopẽli ga kava kovurular bereio, p̃eli na mia koverinavo ‘Uerei bova naruei, vonganei be Legiano Lu ruei, tuboiano berenio mia kiniou noim̃au re ea Legiano Lu, mia p̃eli keneriku p̃eli na kanaku temeul na tobo beamu vo ea p̃ili na, mia beni ga ana mia nava novuru lario?’ Peli mia maka bunu kejikia koto rorea titai bereio, mia jau kala sopẽli ga na.”

<sup>6</sup> Mia nalo maka bunu ajikia ka mia aver verdopeiano venia ka tivelinio na rivan naio bereio, aju buru ga jibe na.

#### *Maka rivu ka toro riyuku lelar naio bereio*

<sup>7</sup> Mia bogo na aju ka atutano ea sinaniano, Yesu bitilubar ka nalo tealoo napano boru na jokoluolu biolo abinimej, tiniel jii toru ka ajidom aleal vio na bo, nalo aba ajutano mave ea tomu na tortoru jelelo. Ana Yesu mial kialo bajago na m̃arouano nei, ana ber kalo, berinavo <sup>8</sup> “Ver bogo tai avioso ka kavan ea sinaniano na soriano tai, p̃eli na jokoluolu tai na jibe na, maka rivu ka koyokovo sopẽli ka kava kototano ea tomu na tortoru jelelo

garuei. Peli jau maka kejikia ka vio na, amila batitigio bo jororea toro na toru tai, <sup>9</sup> ana mia boru na jokoluolu nei mia rimej river ka jau, riverinavo ‘Aiou kuruaku liki, mia p̃eli jau kavatove beamu vo, bior jau kojom̃a kojotano ea kanaku toro na toru jeleigio na.’ Naruei mia jau kavar burum̃ara imouiano tai na rila kojog ve kirivova laka, mia monoka jau kavatove ga bereio, kalavon ka keleal kiri vio sesa tai ka na mia komijikia ketivan miramo eaio. <sup>10</sup> Mia bajago na bo naio jibe nei: Ver avioso ka kavan ea sinaniano tai, bogo na kovoru eaio, jau kava kototano rivija tomu ninio ga. Mia ver boru na jokoluolu nene naio rimej, mia naio rialso, mia naio riverinavo ‘Oi, burum̃ara toro, kiniou nemije batitig jelemo na jo mave ruei, mia kito ve juo ravan ana neti vatitigso.’ Ana ka bogo na, mia komijikia kojog rivu ve toru laka, ka boru na jokoluolu rivitiri larso tibe na ea kulo dolu nalo miralo nam̃a kumisinin vio takurano. <sup>11</sup> Tibe na naruei, ka mia toro nam̃a miyuku lelar naio, mia adu naio totano, mia toro nam̃a midu naio jotano mia ayukular naio to mave.”

#### *Bo ka kovio talim̃asa bunu rimej ea kiamo jokoluolu*

<sup>12</sup> Ana ka bogo na, Yesu ber iliano tai bunu ban toro napano bio naio binimej jinano ea kiano vonuo, naio berkanio, berinavo “Vonganei, kito romial ka napano tomu nalo, bogo na amila sinaniano tai, tiniel jii ga ka avio kialo bilbilu na bo, p̃eli kurualo nalo, p̃eli na kialo m̃aratavo dolu nalo, vija bunu tomu na tortoru nalo na abe sanibaiano nam̃a aju vaataro ga kalo. Ajum̃a amilala jibe na naruei, bior amijikia ka iorou, ver nalo nei bunu ala sinaniano tai bogo tai, mia monoka ala meran rivanlo bereio.

<sup>13</sup> “Mia bajago na bo ka rila bogo na jokoluolu naio maka tibe na. Bo laka ka kovio kulo dolu nalo, jibe

ka nalo namãa abe talimãasa, ðeli na nalo na niabelo maka rivu, ðeli na jaba nalo, ðeli na merebono nalo, ðeli na tomu nalo na ajiberbena, amei asinan rivijaso. <sup>14</sup> Tomu nalo na jibe na maka ajikia ala meran rivanso bogo tai, mia bogo na Atua mial ka jau tiniem jaaro ka koburulo abinimeï ajinan kamliko ea kanamo vonuo, mia naio saaro laka kaniso. Karina naio rilivu kaso, a mia jau kavara vonga kiamo ijaiano na bo biorio, ea bogo na naio rila kanano tomu na memedu ameul bereio den namãariano.”

### *Jamerijiano na soðeiano*

#### *Mataiu 22:1-10*

<sup>15</sup> Ana na toro tai napano joa sinaniano nei, naio mijog ka napano Yesu berii ka mia Atua rivitiri bulag kiano tomu na memedu ea legiano na maaro, naruei naio berinavo “! Ierinio, mia rivu lie rivan kito ka bogo na, ka napano mia kito riasol burumãara jokoluolu na jouro ea Atua kanano navenatuboiano nene!”

<sup>16</sup> Toro na, ðeli naio jomãa ber naio bo kovio ruei, mia tomu na jibe na maka asidom ava jouro, naruei Yesu ber jamerijiano tai ea tivelinio na, napano jibe nei “Toro na toru tai, naio jidom ka rila sinaniano tai, mia naio bio tomu nalo telabo ka amei.

<sup>17</sup> Ana bogo na naio miomon vite nonovio bisi ju, ana miila kiano toro tai ka riva rivuru nalo namãa abiolo ruei ka amei. <sup>18</sup> Mia bogo na kiano toro nene bano-o miyotuba kalo, nalo abiniu abare ga, ajumãa amila ilisoðeiano ga. Tai ber jibe nei, berinavo ‘Ierinio, mia kiniou nobulu von ga kiaku niatano tai, naruei nojo napano ka neial von ka borotano nene jumãabe. Mia kover ka toro na toru kover aua toru vanio, mia maka nejikia nevedu vonganei.’ <sup>19</sup> Mia dolu, naio ber jibe nei, berinavo ‘Ierinio, mia kiniou nobulu von ga kanaku buluku nalo tai, ka avuru kanaku rukuruku nalo, naruei nojidom ka nava neial ka be ðirilo jikili jumãabe.

Mia kover ka toro na toru kover aua toru laka, mia maka nejikia nevedu vonganei.’ <sup>20</sup> Mia dolu bunu, naio berinavo ‘Ierinio, mia kiniou namila jokoluolu na kanaku soriano maka vesiou vo, naruei namial jibe ka ðeli mia maka nejikia nevedu, bior saba telabo laka.’

<sup>21</sup> “Ana na toro nei binimeï berial iliano nalo nei ka kiano toro na toru, mia bogo na naio mijogio mila naio mila siniabu kalo. Naruei miila kiano toro nei bereio, naio berinavo ‘Mo, jau kala soðeli kavan ea mãarabo nalo na tertelisu vaatara na, kava keleal talimãasa nalo, vija nalo napano abe mervitovi, vija merebono nalo, ana kuvurulo amei ea kiado jokoluolu.’ <sup>22</sup> Naruei naio ba milaio, mia iorou kanio ana naio binimeï bereio ea kiano toro na toru nei, ana naio berinavo ‘Tubo, vite napano jau koberenio, kiniou nemilaiio ruei, mia tomu telabo abinimeï ruei mia be vio toru jo kiano vo.’

<sup>23</sup> Ana miila naio bereio, berinavo ‘Tibe na, jau kavan bereio, kava lie kija ea vio nalo na komeli, mia katadua sikili toro kei na ver jau keialio, ka monoka amei, ka aison kanaku burusio, ka rila jokoluolu nei rive kirinovo tanea. <sup>24</sup> Nalo dolu namãa amila ilisoðeiano na kirivova na, kiniou nobiolo batitig ka amei ea jokoluolu nei ruei, mia vonganei, mia maka nalo tai kalo napano mia rijikia sen kiri sinaniano nei tai leleio ea jokoluolu nei. !Kiniou neber vatitigio kiana!”

### *Yesu monoka to tukamu ea kiano naiagagoano nalo kialo meuliano*

#### *Mataiu 10:37-38*

<sup>25</sup> Naruei Yesu naio jo midu kiano mãarabo ka rivavin Yerusalemo bereio vo, mia tiniobi niukniuku vio bujo kalo ajumãa ajakisorio. Amiel bano-o, mia naio barðilig kalo, ber kalo, berinavo <sup>26</sup> “Toro na jidom rimeï rue jaaku, mia naio monoka rudu kiniou noto tukamu ea kiano meuliano, kiniou loa laka lie vo ka karamãano, kenieno, koano, kenerinio, kuruano, ðeli

na kuviviniene. Toro napano ver maka riilkue ka kiano meuliano, naio maka rivare ka rimei rive kanaku naiagagoano tai. <sup>27</sup> Mia toro naña jidom ka rimei rive kiaku naiagagoano, naio monoka rila tibe nei. Naio monoka rudu kiano m̃akolkolo, rue jaaku nañariga, tibe ka mijamo ka naio ka rijog jaleleano rivior kiniou. <sup>28</sup> Bo ka kuvisidomii vatitig rivu vite nei beamu vo, beamu ka na mia kuvil soḡeli, kuver mia kuvitakisor kiniou.

“Naio jibe ka na toro tai, ver naio sidom ka riñauka buruñara yimo tai, naio monoka totano, rivitii beamu vo, mia rivuluku vatitig beamu kiano veru na vuliano na iñauano nei, mia monoka rivitii veve rivu ka naio bare ka mia rila nonovio buruñara iñauano nei, ḡeli na maka rivare. <sup>29</sup> Ver ḡeli na, mia naio tikar riñauka batitig bulapati, rivavavin kija ga, ana mia naio riilo ka napano juñano bulati garuei, ana na mia iñauano nei tei riuedom tobo. Naruei bogo na kulo dolu nalo amei aial yimo neibano jo bija bayimo nene be togio ga jo, a maka ve vodobi nene, mia avital niegeniege m̃elea toro nene-o mia averinavo <sup>30</sup> ‘O, kema na, kiano jidomiano kirinovo laka. Naio jidom riñauka kunuano, mia maka rila batitig tiiano na iñauano, mila na maka rijikia rila nonovio riviniu.’

<sup>31</sup> “Jibe ga na, toro na jidom riverkar ka mia rimei rila iñauano vija kiniou, naio monoka rila tavukia parinio tubo tai, napano toro na toru dolu jumolu ka naio, buru kiano buruñara taara na mira abinimei ka ala mira kanio. Tomu na mira na parinio tubo nei kanano nalo maka ve telabo tavukia toro na toru nei kanano, mia parinio tubo nei monoka rivitii vatitigio ga beamu vo, monoka sidomii vatitigio rivu ka naio mijikia tovulu buruñara taara neibano naio jo binimei ka naio kiana, ḡeli na maka rijikia tovulio. <sup>32</sup> Ver naio rial ka

maka rijikia rilaio, naio monoka riila toro rieliko m̃arabo ka toro na toru nei, ka bogo napano naio jo koalabo kia ga vo. Naio monoka rivika denio, ka mia rivulu venia na ver toro na toru nei riverenio, ka mia ave juo atua tuñaro bereio. Tibe na ana naio monoka rivatove ka toro na toru nei, rijamo ka naio nonovio rivanio. <sup>33</sup> Mo kami naña kumisidom ka kumei kuvitakisor kiniou, kami monoka kuvitilubar ka kami bunu monoka kuvila tibe na ka kiniou. Toro na maka rijamo ka kiano meuliano kar kiniou, vija rera garuei kiano saba nalo, naio maka rijikia rimei rive kiaku naiagagoano tai.”

*Jamerijiano na vaatei*  
*Mataiu 5:13; Mak 9:50*

<sup>34</sup> Ana Yesu ber jamerijiano dolu banlo, naio berinavo “Vaatei naio be tonovo tai, mia ver bogo tai ana vaatei nene naio rijeja re bunu rivu, naio maka bunu rijikia rila kiano iñauano, ḡeli na maka bunu ve titai rijikia rila rijeja rivu bereio. <sup>35</sup> Mo vaatei naio jibe na, naio maka rijikia rila iñauano na bo easo ea kanamo vonuo, ḡeli na ea kanamo tiniavio bunu. Vite na bo kanio, bo ka avuku rivan ea vio na soro ga. Nina naruei be tovorovo na kanaku naiagagoano napano milaluvu kanano moroano ka rila kanaku iñauano.

“Ana toro na be tiliniene bo, bo ka naio rijoglubar kanaku iliano nei.”

## 15

*Yesu mila bilbilu naliko tomu na boya nalo*

<sup>1</sup> Ana ea bogo nalo na jibe na, amial ka napano tomu tealoo napano tomu dolu nalo maka tiniel tiilo, jibe ka tomu na takis nalo, bija kulo dolu nalo napano Varisis aber abova, nalo bunu abinimei vaatara ka Yesu ka aiagago ka naio. <sup>2</sup> Naruei bogo na Varisis naliko naverloglogiano na tuboiano nalo aju amial ka Yesu jom̃a tinien jii ka tukunu vijalo, amial kirivova, ana aju aberinavo

“Riano ga, tete na naio jidom ga tomu na kariano na jibe na, a bogo nonovio naio jidom ka riva sinano vio takurano naliko bunu. ?Peli naio mial ka kialo bajago ga naio bo, a kiado naio bova, a?”

<sup>3</sup> Mia kialo jidomiano jibe na mila ana Yesu jukunu banlo ka jamerijiano nalo namã aberii jumãbe ka napano naio binimei ea yetemeriba nei kar toro napano milaluvu m̃arabo.

### *Jamerijiano na nunu napano ba kovio*

#### *Mataiu 18:12-14*

<sup>4</sup> Yesu kiano jamerijiano na be moti ka tivelinio na naio jibe nei, napano naio ber kalo, berinavo “Toro tai, naio be toro namã bagan nunu nalo, mia kiano nunu nalo abokar toromomou takurano [100]. Kiano nunu nalo telabo mugaruei jibe na, mia ver bogo tai, nalo tai riva kovio, mia naio sidomveia ga, p̃eli mia naio sidom bijovijon kanio? Mia monoka naio tuvan kiano nunu dolu nalo na atu bo beamu vo, mia naio rivakar napano ba kovio, mia naio sirag rilealio. <sup>5</sup> Mia bogo napano naio milealio, mia saaro ve toru laka, mia naio rudular nunu tavaliki nene rimon mave ea burusovonano, ana naio rudu rimei bereio. <sup>6</sup> Ana na iorou, ka bogo napano naio batove binimei ea kiano vonuo bereio, mia rivio nalo na ea kiano m̃aratavo, p̃eli na kiano bilbilu dolu nalo bunu, ka amei. Ana mia naio tukunu vanlo, riverinavo ‘Ei, vite tai napano kito ramijikia rasaaro ve toru m̃ele riviorio. Kanaku nunu tai napano ba kovio napano ba kovio laka garuei, mia karina naban kanio, najiragio-o, namilealio. !Bogo napano namilealio, najaaro mia maka garuei!”

<sup>7</sup> Ana Yesu mila meravo ban Varisis nalo, berinavo “Mia tibe na ga bunu ea vio mave. Tomu telabo napano ajua vio yetemeriba nalo ajavukia kami, be tinielo ka aber nalo amemedu ruei, ana p̃eli mia saariano na mave rivior kamiu tomu kinkin na jibe na kovio? Mia

ver toro na kariano tai ga, naio rivilig kiano meuliano, mia ve burumãara saariano ea vio mave, riva lie vo ka mia ve burutomoruo laka. Vite na naruei mila ana tinieku jaaro ka notukunu vija tomu nalo namã kamiu maka tiniemiu tiilo.”

### *Jamerijiano na kurukuveru tai napano ba kovio*

<sup>8</sup> Ana Yesu ber jamerijiano ta bunu ea tivelinio na, naio berinavo “Be tira tai, kiano kurukuveru due-limo, napano naio miduvan batitigio bo jo joomo ea kunuano. Ana ver bogo tai, rimei ber riadu kalo mia rial ve takurano naio mijoru ruei, ba kovio tai, mia naio rila tumãbe naruei? Monoka naio rigoru yulu, rija bulag kiano saba nalo, a riakon vatitig vio ea kunuano, rivano-o mia rilealio. <sup>9</sup> Ana bogo napano rilealio, mia naio rivio nalo na ea kiano m̃aratavo, p̃eli na kiano bilbilu dolu nalo, ka amei. Ana naio tukunu kanio vanlo, riverinavo ‘Ai, abe vite tanie napano romijikia rojog rivu ve toru kanio. Kanaku burumãara kurukuveru tai nemilaluvuio mijoru banbo kovio tai, mia karina, nejiragio bano-o ana nemilealio bereio. !Bogo napano nemilealio, kiniou nomijog bo-o mia!”

<sup>10</sup> Ana na Yesu mila meravo ka Varisis nalo, naio berinavo “Naruei mia tibe na ga bunu ea vio mave. Ka bogo napano ver toro na kariano ga tai naio rivilig kiano meuliano, mia Atua kiano nailiano nalo aialio mia saariano ve toru laka ea vio mave.”

### *Jamerijiano na m̃eaku napano ba kovio*

<sup>11</sup> Mia Yesu kiano jamerijiano na maariano na tivelinio nei, naio jibe nei, napano berenio berinavo “Kulovu tai, be kenerinio sumãano juo, namã aju amimãau bijaio ea kialo borotano. <sup>12</sup> Ana ka bogo tai, maratoru na naljuo nei naio jumolu, berial ka karamãalo abe juo, berinavo ‘Teta, kiniou nejidom navar saba togio na jajumãamo ve kanaku ga.’

“Mia vite na maka rimemedu leleio ka naio rivika tibe na, bior karamālo naio meul jo kia vo. Mia karamāno maka ril, naio jan ka nonovio kiano saba nalo, mijamo ka togio ban mēaku nei, a togio be motoru kanano. <sup>13</sup> Avona bisi, ana na mēaku nei naio jomā pīlvili ka saba nalo napano karamāno bar banio, mia iorou, maka vesiou, amialio ka naio mison nonovio kiano saba nalo, bar kiano puruveru beven ka bano. Mia ba joa buruvenuto dolu tai koalabo laka, ana ea vio na, naio ba mijamo ka momon naio ban bajago na bova, jinan ka puruveru nei bano-o mia mila lelan nonovio binu.

<sup>14</sup> “Vonganei naio bitilubar ka jumāno bulati naruei, ana ea bogo na, burumāra vituiano tai binimei bokar buruvenuto neibano naio joaio, naio midu mēaku nei naio joa vio tai na kirisikili laka kanio. <sup>15</sup> Ana na naio ba jirag iñauano tai ka mia rimāukanio ka mia pēli mijikia rilarur kiano meuliano, naruei ba miñau ea toro na toru tai na vio nene, ba bagan kiano kiribue nalo. Mēaku nei naio maka rimemedu ka rila iñauano nei, bior naio bel ka kiribue jibe ka kito kulo Ju dolu nalo, mia nina be iñauano takurano ga napano naio mijikia rilealio.

<sup>16</sup> “Naruei naio miñau jibe na bano-o, mia maka avar sinaniano vanio, a maka mārabo tai ka rileal sano sinaniano eaio, mila jijer naio nañariga. Naio jijer jibe na bano-o mila naio jidom sian jumāno rivan ea basaro na sinaniano torogio na menunū bija botuotu na kon nañā kiano toro na toru naio jomā bagan ka kiano kiribue nalo ajenio. <sup>17</sup> Mia bogo napano jidom ka rila tibe na, naio bitilubar naio bereio, naio mial ka kiano bijuku mēteano ga mila lelan naio bereio. Mo naio tinien maio bereio ka karamāno bija kiano vonuo, naio berinavo ‘Riano ga, kiniou nomiavovu toru laka. Kikaku bijuku mēteano ga mila kiniou nañaro ka vituiano ea vio nei, mia kosidomii von nalo nañā atibe ka

tomu na iñauano ga na teta kanano. Naio jomā jian sinaniano novo nalo telabo banlo ka legiano nonovio ga, maka ajikia asen nonovio. <sup>18</sup> Ver tibe na, bo laka ka kiniou nalavon ka navan bereio ga, noiñau kija ga tavukialo. Mia kiniou nava naiāl teta, never kanio, neverinavo ‘Aiou teta, kiniou namila burumāra kariano va tai ban Atua, a banso bunu. <sup>19</sup> Vonganei, maka bunu rimemedu ka jau keial kiniou tibe ka nebe kenerimo tai, mia nobika denso ka tiniem riia kiniou ka noiñau kija ga tavukia nalo nañā amiñau kanamo.”’ <sup>20</sup> Mia naio mila vatitig kiano jidomiano jibe na bisi, naruei naio jumolu, binimei ju lile ju lile, binimei boru ea karamāno.

“Mia naio maka rijikia, mia karamāno naio jo tinien maio ka naio julaka ga, naio jomā jirarag lili mārabo ka pēli mia naio rimeī. Mia bogo na naio ju koalabo ka kunuano kia ga vo, mia karamāno bitilubar naio, tinien miia naio-o mia, ana jikiti ka riva rivitavo vijaio. Mia bogo napano naio binimeī bokar kenerinio nene, miabukario ka jumāno be juo, maka sidom tuvianio bereio. <sup>21</sup> Ana mēaku mil ban karamāno naruei, berinavo ‘Aiou teta, kiniou nomila burumāra kariano va tai ban Atua, a banso bunu. Vonganei, maka rimemedu ka jau keial kiniou notibe ka kenerimo.’

<sup>22</sup> “Mia karamāno berbureio, bio kiano tomu na iñauano nalo, berinavo ‘Ai, kamiū kuvila soḡeli kuva, kuvar kulumārauo na bo laka, vija kiano kulubue na jaano, a kiano pējelinio, vite nalo na jibe na, kuvar kumei kuviya eaio. <sup>23</sup> A kiribue mārāuo nañā roju rabagan vurua mādigidig kirinovo na, kamiū kuva kuvueio, ka kito rala sado sinaniano tai ka ramijikia rasaaro kitoliko keneriku maratoru nei. <sup>24</sup> Bior keneriku nei, naio māraro ruei, mia meul bereio; naio ba kovio, mia kito romileal naio bereio.’ Ana ka bogo na, nalo abukudel ka jokoluolu na mēaku neibano.

25 “Ana ka bogo nene, kiritete motoru naio bavenei ea tiniavio, ba jo miñau ruei, avona kario ana naio binimei bere vonuo. Mia bogo na naio binimei vaatara ka vonuo, naio mijog ka ajumã amioiou, a mijog joa na voluano jo jaburu bunu. 26 Ana naio mial nalo na iñauano nei tai, bika denio, berinavo ‘?Ei, venia na jibe na namã aju amila vonuo jibe na?’

27 “Ana toro neibano berinavo ‘!Ai, abe kuruamo ña na! Naio binimei bere ruei, meul bo kia ga vo. Tenene na, karamãano naio jidom rila sano sinaniano tai. Amue kiribue ñarauo namã na ruei!’ 28 Mia bogo napano motoru mijogio naio tinien mimi, maka riva joomo naliko. Naruei karamãano binimei mil banio, ka rivuru naio riva joomo, mia naio miilkue ga ka rivano. 29 Naio ber ka ga karamãano, berinavo ‘?Teta, yuka vio ruei namã kiniou nojomã nomimãau kanamo ea vio nei? Kiniou nomidu niomo batitig bo ea vite nonovio, mia jau maka lele kala titai tibe na van kiniou. Kiniou maka lele neial ka napano jau koue kirikiti nani tai van kiniou bogo tai ka nala sinaniano tai vija kanaku bilbilu nalo. 30 Mia bogo napano ga jau komial kenerimo novo na naio binimei vonuo bereio, ana kojumolu komue kiribue ñarauo novo namã rojuñã rabaganio jo mijabo ñadigdig bo na. ?Mia tete na naio mila venia bo ruei banso a? Naio bar bulag kanamo burumãara puruveru togio ruei, naio ba jen puruveru nene ka ga ña mior ka tire nalo ga, bano-o miakon batitig garuei. ?Peli bajago na naruei na jau tiniem jii, tenene na jau komila sano sinaniano kanio a?’

31 “Mia karamãano tinien miia motoru nei bunu, ana naio berkanio, berinavo ‘Ei, keneriku, kiniou maka ña noto nosidomii tibe na liki. Jau komila kiniou najaaro toru ruei, napano ña kojo bija kiniou damãariga, a kanaku saba nonovio na ju, kiniou namijamo ka nonovio ruei banso.

32 Be riano ka keneriku maratoru

na naio milaluvu ñarabo na kiano meuliano, mia bogo na naio bilig naio binimei bereio, kiniou tiniek miia naio, ana namial jibe bo ga ka kito rasaaro ka naio, rala sinaniano tai kitoliko. Kuruamo na naio ñaro ruei, mia meul bereio; naio ba kovio, mia kito romileal naio bereio.’”

Naruei Yesu ber ka Varisis nalo, naio berinavo “Mo, jamerijiano nei naio bisi naruei ea vio na. Mia jibe ka napano naio berenio, bo ka toro napano milaluvu ñarabo, naio monoka rivilig naio bereio, tavukia maratoru nei. Mia kamiu monoka kuvitkar vatitigio bunu ka mia kuvitavukia re motoru nei, napano kiano jidomiano kirisikili laka, naio mijoku ka kuruano napano bilig naio ka kiano bajag moruo ruei.”

## 16

### *Jamerijiano na bajago na aiñau vija puruveru*

1 Iorou kanio, ana Yesu mil ban kiano naiagagoano nalo, naio berii jamerijiano tai banlo, ana naio berii toro na iñauano tai. Toro nene, naio mial ka mia kiano boru rivukular naio, naruei naio jumolu miñauka vite tai ka mia iorou ana kiano meuliano rivu ga. Jamerijiano nene naio jibe nei, berinavo “Toro na toru tai, naio bitirilar kiano toro tai ka rivitkar kiano puruveru nalo. Mia bogo tai, iliano binimei bokar naio ber kiano toro nene naio jomã jen kiano puruveru nalo, jomã mila lelan kiano saba nalo. 2 Naruei naio bio kiano toro nene binimei mial naio, mil ban berinavo ‘Ei, tomu nalo amidu kanamo veriiano ban kiniou ruei. Kiniou namial bo ka mia nodu larso den iñauano na bereio, mia jau kobisi ga. Mia beamu ka na jau kavano, nojidom ka jau kavar vatitig saba nalo beamu vo, ka mia kiniou namijikia noviti jabue namã tomu nalo amila jua kiniou.’

3 “Mia toro na iñauano nei naio mijog bova, berinavo ‘Riano, vonganai bova nono naruei. Toro na toru midular iñauano novo nei den

kiniou, maka nejikia ka mia kiniou nesen venia naruei. Kiniou no-jotano ea iñauano nei kirisiou ruei, mia maka bunu ve kiaku moroano ka nava noimāuka tiniavio bereio, a kiniou maka nosidom natan ea yimo nalo kamā noiniogiog sinaniano den tomu nalo bunu. <sup>4</sup> Mo bo ga, kiaku m̄arabo naio tibe nei. Mia note vatove kija bereio tomu nalo kialo jabue nalo, mia asaaro ka kiniou-o mia monoka avitkar vatitig kiniou ka bogo na ver toro na toru rivukular kiniou den iñauano nei.'

<sup>5</sup> "Naruei naio ba bio nalo napano kialo jabue jua toro na toru nei, nalo abinimei abeve terakurano eaio, ana naio berinavo '?Mo, jau komila jabue ea venia, a bokar vio?'

<sup>6</sup> Ana naio berdoŕe, ber 'Titikivaka basidobidobi duelimo toromomou takurano [100].' Ana toro neibano berkanio, berinavo 'Mo, mia kito juo rete rivatove ga. Ninei be kanamo jabue nene, jau kototano ana koyolkon bulag soŕelia nana beamu, mia kovivitauiā kar ve duelimo va limo [50] ga.'

<sup>7</sup> "Mia naio bano, ana dolu binimei, ana naio bika denio, berinavo '?Koig a jau, kanamo jabue venia?' Ana naio berdoŕe, ber 'Bake na uiti tormomou takurano [100] ga.' Ana naio berkanio, berinavo 'Mo, mia kito ve juo rete rivatove ga. Ninei be kanamo jabue nene, jau kototano, ana koyolkon bulag soŕelia nana beamu, ana kovivitauiā kar ve duelimo va arolu [80] ga.' Naruei naio mila jibe na-o mila nonovlo abiniu.

<sup>8</sup> "Ana iorou kanio, ana toro na toru nei naio bitilubar vite nei, ana naio ber ka kanano toro namā jenen kanano puruveru nalo beamu, naio berinavo 'Riano ga, jau kobina vatitigio ka kiniou, ana namial jibe kanamo masouano tenia, jau kobe pariparimo kija ga na.'

Naruei Yesu berinavo "Kamiau kumial kulorinio nalo na yetemeriba nei, bogo namā amimāu bija puruveru, mia abe masou ka bo, nalo amijikia bajago na ala bilbilu vija

tomu nalo, ka mia tomu nalo nene ala rivu kalo iorou bereio. Mia kiniou nemial ka napano keneriku nalo na miamoiano, va telabo nalo maka ave masou batitig rivu ka aimāu vija puruveru napano Atua jian banlo.

<sup>9</sup> "Neberenio batitig ban kamiau, neberinavo, Puruveru naio be tena yetemeriba nei ga, mia verenio mijikia riijaiso ka kove bilbilu rivu vija Atua, bo ka koiñau kanio. Ver jau koiñau rivu vija puruveru ea m̄arabo na memedu nene, mia iorou kanio ana Atua naio risaaro ka mia rivurso kavan ea vio na maka puruveru toaio, naina naruei be kanamo vonuo na mave.

<sup>10</sup> "Toro na bar ka naio batitig bo ea iñauano na kiritavaso ga, mia kito ramijikia ravarkar tiniedo ea naio ka mia naio rivar naio ka iñauano na toru bunu. Mia toro na miñau maka rimemedu ea vite na telisu, mia naio rimāu rivova lie vo ea vite na toru. <sup>11</sup> Ver kamiau kuvar vatitig re kamiau ka iñauano nalo na puruveru na yetemeriba nei, mia kei bereio rivar Atua kanano tonovo nalo tua jumemiu ka ve kenemiu? <sup>12</sup> A ver kamiau maka kuvijikia kuvimāu rimemedu rivija vite nalo namā Atua mijamo ka ban kamiau ka bogo bulati ga ea yetemeriba nei, mia kei bereio rijamo ka mauo novo nalo napano ajua vio mave ave kenemiu damāriga?"

*Maka toro rijikia rimāu tubo ve juo kialo*

<sup>13</sup> Mia Yesu ber bunu, berinavo "Bereio, ver toro na iñauano tai, naio rimāu dede ga ea tubo ve juo ve vaarakurano. Ver tibe na, mia naio tinien tii tinene, mia riilkue ka dolu nene, ŕeli na mia rudu tinene, mia tuvan dolu nene. Kamiau maka kuvijikia ka kuvila ka napano kamiau kube tomu namā amimāu Atua kanano, a kube tomu na puruveru ka bogo nene bunu."

*Varisis nalo maka tinieel tii Yesu kiano iliano nalo*

<sup>14</sup> Ana na ea bogo na, Varisis nalo bunu aju kiano vo, ajumã amiagago ka iliano nalo nei. Mia nalo abe tomu namã tiniel jii m̃lelea puruveru toru bogo nonovio, naruei nalo abital lelan ga m̃arabo novo nalo na im̃auano bija puruveru napano Yesu berial ban kiano naiagagoano nalo. <sup>15</sup> Ana Yesu mil banlo berinavo “Kamiu tiniemiuji ka kuvila ka napano mia tomu nalo aial kamiu tibe ka tomu na memedu nalo, mia Atua biti dulu venia napano joa kenemiu iviso. Vite miroano napano m̃a tomu nalo amiaia, aberinavo naio bo, mia ea Atua kiano vitiiano tenalo na abova ga.”

*Atua kiano navenatuboiano binime naruei*

*Mataiu 11:12-13, 5:18; Mak 10:11-12*

<sup>16</sup> Iliano dolu tai napano Yesu berenio, naio berinavo “Beamu, Niosi Moruo jo, napano niosi nalo na Mosis kanano bija niosi nalo na naverialiano nalo kanalo juaio, bano-o binime bokar bogo na Jone Baruei. Jone miãau bano-o bisi ana vonganei Ioluano Vou na bo na Atua kanano navenatuboiano naio binime, naruei ajumã amioliolu ka janea vio reraio, mia tomu namã ajidom ka ava jouro eaio na aju amila vio jikili ka ajogkario. <sup>17</sup> Mia nina maka rila ka tuboiano na Atua kanano napano joa Niosi Moruo naio bova ruei. Peli vio mave a yetemeriba nei nalo ava kovio ga, mia kiri m̃ariliano na tuboiano nei maka rijikia riva kovio bogo tai ka tumolu tu re.”

*Maka rivu ka kito rotuvan koado nalo*

*Mataiu 5:31-32, 19:9; Mak 10:11-12*

<sup>18</sup> Iliano dolu tai napano Yesu berenio, naio berinavo “Ver toro tai riilalar koano, ana naio riva rivuru tira dolu, mia Atua mialio ka toro nei naio jo mila siakaiano bija tira dolu nei. Be verare ga bunu ka ver toro tai soro ka tira tai napano koano na

beamu miilalar naio ruei: toro nene bunu mila siakaiano.”

*Jamerijano na toro na sanibaiano bija Lasaros*

<sup>19</sup> Yesu ber jamerijano nei bunu, napano naio ber jibe nei, berinavo “Toro tai, jumãano bujo toru laka ka vite na bo nalo miroano, naio miyovovua naio bo laka bogo nonovio, a legiano nonovio amim̃auka sano burum̃ara sinaniano novo nalo. <sup>20</sup> Toro dolu tai naio bunu jo, napano m̃a bogo nonovio amidudu naio binime amidu naio jo tavio ea burusio na burum̃ara yimo na toro nei kunuano napano be kiano saba telabo. Toro nei, naio be toro tai na maka ve kiano saba tai, naio be toro tai namã jo miogiog sinaniano, niabene nalo vio bujo ka meniko, a siano be Lasaros. <sup>21</sup> Amidu naio joa vio na ka p̃eli mia naio mijikia riniog sinaniano nalo nei torogio namã toro na toru nei jen digio ju, mia makanio. Naio jo miog kuleio ga jibe na, naliko kuli nalo napano abinime amiom kanano meniko nalo.

<sup>22</sup> “Milala jibe na bano-o na tete nei naio m̃aro, ana na nailiano nalo abinime amidular naio, aba amidu jo tivelinio na Epraamo, ea vio mave. Ana maka vesiou ana na toro na toru bunu m̃aro, ana ajivinio. <sup>23</sup> Mia abuku deven naio ban ea sebi, napano mijog naio bova-o mia bova laka, mia iorou ana naio jirarag bavin, mial koalabo laka, naio mial Epraamo naio jo, a mial ka napano Lasaros jotano naljuo naio, abe juo ajumã ajinan. <sup>24</sup> Ana naio bio banlo, berinavo ‘Aue-e, karam̃aku Epraamo, kovijuku bo tiniem riia kiniou liki, jau keila Lasaros rime ruvu juluvati m̃arjukumãano titi ka kiri uei tai, ka titi ka minaku. Bior vonganei sebi jijen kiniou mia nomiogio bova toru nei.’

<sup>25</sup> “Mia Epraamo berdopeio, berinavo ‘Keneriku, jau kosidomial bereio meuliano novo nanua beamu. Ka bogo na, jau kobokar

kanamo vite nonovio napano jau kojidom m̃elea bo kaso, mia kiri tavaliki Lasaros nei, ea kiano meuliano re nua, vite nonovio maka tai rimelumu van naio. Vonganei, naio mije jogvuiano ea vio nei, ana jau komijog bova toru liki ea vio na. <sup>26</sup> Mia be vite tai ga, naio maka rijikia riviedu ka riijaso, bior Atua mila burum̃ara vio kiri bululuo tai napano jo iviso bure ka kito juo, ka rila ka toro rijikia re taluvo ea vio nei ka riviedu rialso, a maka rijikia taluvo ea vio na jau kojoaio ka rimei ea vio nei.'

<sup>27</sup> "Mia toro nei bika bereio, berinavo 'Teta, aver tibe na, kiniou nabika jikili banso ka keiila Lasaros rivatove bereio ea karam̃aku kunuano, <sup>28</sup> bior kuruaku nalo jimo aju keano vo. Bo kanio Lasaros riva ridu tiniemaiano vanlo, ver p̃eli mia nalo bunu amei ajoru ea jogvaiano nei na.'

<sup>29</sup> "Mia Epraamo berdoṽe, berinavo 'Mia bior vaio ana monoka Lasaros naio rivano? Nalo ajuṽa abar Niosi Lu ruei, napano vivitauiano lu na Mosis kiano bija navelialiano nalo juaio ruei. Bo ka avuluku nina, ka mia aleal vite nonovio juaio.'

<sup>30</sup> "Mia toro nei naio jo jikili kiano, naio berinavo 'Teta Epraamo, p̃eli mia maka ajikia ala nina na? Mia ver toro tai rimei bereio ea nam̃ariano, river vite nonovio kalo, mia monoka aviliglo kanio na.'

<sup>31</sup> "Ana Epraamo berdoṽe, berinavo 'A verenio nalo na maka asidom ajog vaio napano m̃a Niosi Lu berenio, maka bunu ve titai bereio ka napano rijikia rilalo amoneaio. Peli toro tai rimei bereio ea nam̃ariano, river vite nonovio nalo vanlo, p̃eli na venia, mia asidom re ka amoneaio ga na.'

## 17

*Bajago na ala jukujukuano rivan toro dolu*

*Mataiu 18:6-7,21-22; Mak 9:42*

17:3 Mat 18:15

<sup>1</sup> Ana Yesu ber ka kiano naia-gagoano nalo, naio berinavo "Mia jukujukuano nalo amijikia amei bogo nonovio ga, mia toro napano mila vite tai napano m̃a buru jukujukuano jo binimei vaataro, mia rivova laka vanio. <sup>2</sup> Ver aiorikar puruveru tai toa burujono ana avuku naio riva ea buluniogovu, nina na be vironiano tai napano melala ga. Mia toro nam̃a mila kanaku tete nalo nei tai juvan kiniou, mijoru ea kariano ana maka bunu tu sikili ea kiniou, mia toro nene naio rivar vironiano tai napano kirisikili laka riva lie vo tovulu ninei. <sup>3</sup> Ver tibe na, monoka kuvitkar vatitig kenemiu meuliano nalo bogo nonovio, ka mia m̃a kala re jukujukuano rimaluvo ka kiamo bilbilu nalo."

### *Bajago na koviekoko kuruamo*

Ana Yesu berenio, berinavo "Ver jau keial ka napano kuruamo naio jo mijoru ea kariano, monoka keil van naio ka kovururirio, mo ver naio rivilig naio, monoka jau koviekoko naio. <sup>4</sup> A ver naio rila rivova vanto ve va aluo ka legiano ve takurano ga, a bogo nonovio, naio mila kirivova karina naio ber vonga berinavo 'Aire koig, aua namila bulagso toru laka. Naber bo ka jau, koviekoko kiniou,' mia jau kala tuṽabe? Monoka jau koviekoko naio ve va aluo nei nonovio riviniu."

### *Moroano na viekouoiano*

<sup>5</sup> Ana atevi nalo abika den Yesu, aberinavo "Tubo, kumemi numisidom ka jau kala kenememi viekouoiano rimei sikili lie vo."

<sup>6</sup> Naruei naio berdoṽe, berinavo "Ver kamiu kuvika kiniou ve telisu ga, tavukia kurukuti m̃arabako, mia ver kenemiu viekouoiano nene naio sikili rivu, ana mia kumijikia kuver ka burupati burujou yako kuverinavo 'Jau kataluvo den jelemo na vija kanamo pati nalo, jau kava kotu koiluo ea tinia tei iviso,' ana mia naio rimonea kamiu."

*Toro na riṽau toro na toru kiano monoka saaro ga ka riṽau*

<sup>7</sup> Ana Yesu berinavo “Ver kamiu tai naio ve toro na toru tai, a kanano toro tai tomã rila kiano iñauano. Peli naio riva rimãu ea tiniavio, ðeli na rivitikar kiano temeul nalo, ðeli na venia, ana verenio kijeve bogo na naio rimeie bereie ea iñauano, mia toro na toru nei naio river venia kanio? Maka rijikia river kanio riverinavo ‘Mo, jau komeie kototano vija kiniou, kito ve juo rosinan,’ bior naio be kiano toro na iñauano ga. <sup>8</sup> Mia toro na toru monoka river kanio ga riverinavo ‘Mo, mia kava kovoroŝebi beamu vo. Verenio sinaniano rimenoko, ana kava koyovovua so rivu, ana kavar saku rimeie ka nesenio, a nomunuio, bisi, ana mo jau komijikia koviovio samo.’ <sup>9</sup> Mia bogo napano toro na iñauano nei mila nonovio vite nalo namã toro na toru ber ka naio, mia toro na toru maka rijikia river burumãara siva tai vanio, bior nina be kiano iñauano ga. <sup>10</sup> Mia kam bunu monoka tibe na. Verenio kamiu kuvila vatitig nonovio iñauano napano Atua ber ka kamiu, rivano-o riviniu, mia kuver ga tibe nei, kuverinavo ‘Aa, nina maka ve titenia na. Kito rala ga venia napano memedu ka kito ralaio, tavukia Atua kiano tomu na iñauano nalo ga.’”

*Yesu mieliel ka tomu na burumieni nalo duelimo, mia takurano ga ber siva*

<sup>11</sup> Ana ka bogo na, Yesu nalo aju amiel kia ga vo ka avavin Yerusalemo, ana kialo mãarabo jel bure tanobuku juo nei Sameria bija Kalele. <sup>12</sup> Naruei nalo amiel bano-o, vaataro ka ayotuba ea mãarkomeli tai, abitavo bija taara tai na tomu na burumieni, nalo duelimo, napano ajujumã ea ikiãarabo. <sup>13</sup> Mia bogo napano amial Yesu, abio jouo banio, aberinavo “Yesu, Tubo, nuber bo kaso tiniem riia kumemi.”

<sup>14</sup> Ana bogo napano Yesu mijogio, naio ber kalo berinavo “Kamiu kuva kuvar laka ea kulo lu nalo beamu vo, ka avitii veve niabemiu nalo ka aver niabemiu nalo ameravo ruei.”

Naruei nalo abano, ana bogo napano aju amiel abano, amiilo ka mokotenalo nalo aju abinimeie meravo. <sup>15</sup> Naruei nalo tai, bogo napano mial ka naio binimeie bo ruei jibe na, naio barðilig binimeie, miaia Atua laka, <sup>16</sup> binimeie mijorua tano ea Yesu jaano, ber siva kanio. Toro na, naio maka ve Ju tai memedu, mia naio be yati na Ju togio na Samaria. Mia nalo dolu na, nalo abe Ju memedu, mia nalo maka amei bereie.

<sup>17</sup> Ana na Yesu berinavo “Nalo napano niabelo meravo ruei, nalo duelimo, mia nalo kover dolu nene nalo be? <sup>18</sup> Naina binimeie bereie, naio be toro na vio dolu ga, mia ka venia ana naio ga takurano binimeie bere ka rivamenea Atua, ana nalo dolu nalo maka amei bereie?”

<sup>19</sup> Naruei Yesu ber kanio berinavo “Koig, jau kotumolu keiel kava vonuo. Kiamo viekouoiano milarurso ruei.”

*?Atua kiano navenatuboiano naio rimeie tumãabe?*

*Mataiu 24:23-28,37-41*

<sup>20</sup> Ana iorou, kulo Varisis nalo abinimeie abika den Yesu, aberinavo “Navenatuboiano na Atua kiano namã jau kojomã koberii vurua na mia kumemi nuvalio nagi?”

Ana na Yesu berdoŝe, berinavo “Atua kiano navenatuboiano naio maka rijikia rimeie tibe ka titai napano toro mijikia rialio ka mirano.

<sup>21</sup> Naio maka ve titai napano mia averinavo ‘O naio narueie, jau komial naio jo binimeie kia,’ ðeli na averinavo ‘Naio nei jo binimeie rueie.’ ! Kamiu maka kuvitilubario, mia Atua kiano navenatuboiano naio juo iviso ka kamiu rueie!”

<sup>22</sup> Naruei Yesu mil ban kiano naia-gagoano nalo, naio jukunu banlo ber mia tumãabe ka legiano na maaro nalo napano aju abinimeie. Naio berenio “Iorou kanio ana mia kamiu kuvilavio sikili ve toru ka kuvial bogo na mia kiniou Kulorinio Kenerinio noyotuba ea yetemeriba nei, mia nina maka ve kenemiu ka kuvialio. <sup>23</sup> Mia tomu nalo atumã averver averinavo ‘Naio nei!’ ðeli

na ‘Naio yako!’ mia kamiu kuvan re rivijalo, bior maka kiniou navo. <sup>24</sup> Mia bogo na kiniou Kulorinio Kenerinio nemei bere be riano rimonloglog legiano nene, mia aviniu avitilubarario, mia kiniou nemei tavukia vio bijiio tai napano rila niogovu rimerera ea vio tivelinio riva rivokar tivelinio dolu nene. <sup>25</sup> Mia maka ve bogo na vite nene vo, bior beamu ka nina, mia kiniou Kulorinio Kenerinio, tom na vonganei mia monoka ala kiki kiniou ka saba vetelabo, mia monoka avukular kiniou.

<sup>26</sup> “Rivano-o rivokar bogo na mia kiniou Kulorinio Kenerinio nemei bereio, mia tomu nalo atu vatitigio re rivu, rivare ga ka nanua amila ea bogo na tormoruo Noa kiano bogo. <sup>27</sup> Ka bogo nene, tomu nalo ajidel ka ña ajinan, a ajumã amunu vite nalo, ajumã amila soriano jibe na ga, binimei bokar bogo na Noa ba joomo ea kiano burumãara uako nanua naio miãaukanio. Naruei burumãara ueimia binimei burubulag nonovio kialo meuliano nalo. <sup>28</sup> A ea bogo na Lot kiano jibe na ga bunu. Tomu nalo ajumã ajinan, ajumã amunu vite nalo, ajumã aban ea yimo na viviliano a amila bijii puruveru, ajumã amimãauka tiniavio, ajumã amimãauka yimo, amila jibe na banbano-o, mia maka bunu tanielrimaio ka titai leleio. <sup>29</sup> Mia monloglog legiano napano Lot jumolu den kialo vio, mia sebi bija vovosebi na sebi jinano ajibirbil abavatove ea vio yauo, jijen nonovlo abiniu abava kovio. <sup>30</sup> Mia kiniou neber ka kamiu ka mia bogo napano mia kiniou Kulorinio Kenerinio nemei, mia tomu asidomial re titai, mia asidomialo ga, mia nalo aiilo va ka burumãara vite nalo na jibe nei amalmaluvo ea kialo meuliano nalo.

<sup>31</sup> “Ea bogo na, ver toro tai tomã rivonvon ea kunuano mave ea ino, mia naio rial tenei naio to rime, mia ver naio rivatove, mia maka rivu ka rilavon ka rivar kiano saba joomo

ea kunuano, mia naio monoka rivan ga tibe na. Mia toro namã miãau ea tiniavio, naio bunu maka rivu ka rime, bere vonuo, mia naio monoka rivan ga tibe na. <sup>32</sup> Kam tiniemiu ribobogia re Lot koano, napano jiraragodi, mia naio binime, be puruveru ju. <sup>33</sup> Toro namã jidom rilarur kiano meuliano ga, mia naio rila luvuio, mia nana ña mijamo ka kiano meuliano ba kovio, mia rilarur naio bereio. <sup>34</sup> Kiniou neber ka kamiu ka ea bogo na, peli ka bogiano napano mia toro tai naio koano amon ea ñalo jogu, mia amei avurular tinene ga, mia atuvan tinene tobo. <sup>35</sup> Peli na tira ve juo atu vio takurano avijii salo baba, mia ve takurano ga rivano, mia tinene naio tobo. <sup>36</sup> [Peli na tomu ve juo atu aiãau biju ea tiniavio, tinene tuvan vio rivan mia tinene naio sikili tumomou tu.”]

<sup>37</sup> Naruei kiano naiagagoano nalo abika denio aberinavo “?Ana Tubo, vite nalo nene mia ayotuba ea vio be?”

Ana naio berdoþelo, berinavo “Ea bogo nene, mia tavukia napano ver tena ñaro tai jo kovio tai. Ea vio na naruei, menu nalo namã ajenjen tena ñaro, mia nalo amei kano, monoka nalo ve miroano ea vio nene. Ea vio na vabe napano kariano joa, vio na naruei ve nati-bureano eaio.”

## 18

*Jamerijiano na tira na jegi ban kiano tubo bano-o mia tubo tinien miãaio*

<sup>1</sup> Ana Yesu jii jamerijiano dolu banlo, ka tunukakarlo ka ña tinielo veve juo re bereio ea kanalo volkouano, mia atu sikili damãariga eaio, abolkouo rivano-o mia avokar verdoþeiano eaio. <sup>2</sup> Kiano jamerijiano nei, naio ban jibe nei, berinavo “Be komeli tai, tubo nene naio be toro kouo tai, be toro tai namã maka rialerinio ea Atua leleio, maka rimerou kano, a maka tovon tomu nalo bunu. <sup>3</sup> Ana taanou tai bunu

joa vio na, napano toro tai joŃa mila bulag kiano saba nalo bogo nonovio ga, ana taanou nei naio jo ba jo jegi ban kanano tubo, joŃa mila kiano veriiano ka toro neibano, berinavo 'Aiou, jau monoka kala titai ka tete na, naio joŃa mila kiki mŃelea kiniou mia.' <sup>4</sup> Mia tubo nei maka tinien riia tira nei, naio miovo ka ril van tete neibano. Mia naio mila jibe na banbano-o, mia tira nei naio joŃa monmon ga ba jegi ban kanano yubo.

“Ana iorou kanio ana tubo nene berenio ‘Kiniou nebe toro tai naŃa maka nosidomial ka nala vaio naŃa Atua Ńeli toro dolu ber ka kiniou ka bo ka nalaio. <sup>5</sup> Mia tira nei naio joŃa binimei jegi vururu ban kiniou mia maka nosidom nala tena mŃa joŃa berenio. Mia naio joŃa binimei bika jibe na, mila kiki tanea kiniou toru laka, Ńeli mia nala ga venia naŃa naio joŃa bikanio. Ver Ńeli mia tinieku riŃaro ka nojog kiano tegiano.’”

<sup>6</sup> Ana Yesu mil ban nalo naŃa ajumŃa amiŃe tilinielo ka jamerijiano nei, ana naio berinavo “?Kamiu kuviagago vatitig ka toyovo nei kiano iliano naŃa berenio? Bior tira nei jegi va telabo banio, mo mia naio monoka sidomii vite naŃa tira na naio joŃa bikanio. <sup>7</sup> ?Mia tumabe ka Atua na mave? ?Bogo na naio mijog ka kiano tomu nalo naŃa bijauia bulaglo, ajumŃa ajegi ban legiano a bogiano, mia naio rijikia to vesiou tibe na rivano-o mia rila re titai vanlo? <sup>8</sup> Makanio, mia neber ka kamiu ka ver naio rijog ka mŃa kamiu kumituŃa kubolkouo jikili daŃariga banio, mia naio tumolu soŃeli ga tulaka ka rijai kamiu. ?Mia nejidom nevika kamiu bunu, ka ver bogo na mia kiniou Kulorinio Kenerinio nemei bereio ea yetemeriba nei, mia nemijikia neial ka tomu vetelabo atu sikili ea kiniou tibe na, Ńeli na mia ve re tai kovio ga?”

*Jamerijiano na toro naŃa be mŃarou ka kiano bajago na memedu*

<sup>9</sup> Bogo na Yesu jo bija tomu nalo, naio bitilubar ka napano nalo tealo ajumŃa abe mŃarou toru laka,aju aberiamŃa kialo meuliano memedu bo ruei, mia ajumŃa abitii saia tomu dolu nalo, amialo jibe ka maka avu tibe ka nalo. Naruei naio berii tomu nalo jibe nei, jii jamerijiano tai, berinavo <sup>10</sup> “Tom juo, aba joomo ea Atua kunuano monloglog bogo na volkouano. Nalo tinene, naio be Varisis, mia tinene, naio mila imŃauano tai napano tomu nalo maka tiniel tii naio riviorio, naio be toro na takis. <sup>11</sup> Mia bogo na Varisis naio jo jumolu ka rivolkouo, naio ber jibe nei, berinavo ‘Atua o, kiniou neber burumŃara sivaiano toru laka nei banso, napano kanaku meuliano naio bo lie jovulu nalo dolu nei kanalo. Nemiaiaso napano kiniou maka natavukia tomu na vinauano nalo, Ńeli tomu na amijukubin toro, Ńeli tomu naŃa amila siakaiano, Ńeli tomu na takis jibe ka ninei jumolu ju nei. <sup>12</sup> Makanio, mia kiniou nojomŃa nomila bo laka daŃariga, bior kiniou nomondulu ka nojomŃa nobolkouo banso ea legiano juo ka sude takurano, a ea vite nonovio naŃa kiniou nabokar ka jumaku, verver novokar ve duelimo mia monoka nodu ve takurano vanso daŃariga. Vite nalo na naruei naŃa kiniou nojomŃa namilaio ana mila kiniou nobo laka ea miramo.’

<sup>13</sup> “Mia toro na takis naio jo mijog bova bior kiano kariano tealo naŃa milαιο, mia niabene buru vurebure jibe Atua bitii kiano meuliano maka rimemedu leleio. Naruei naio niabene Ńili ka riva vaataro keanio, naio jumolu ju koalabo ga, mia maka sidom sirarago rivavin mave, naio jurubanini naio joŃa mijubaluba bairene, naio jegi naio berinavo ‘!Aiou Atua, jau kala luŃiluŃi kiniou, a tiniem riia kiniou, kiniou toro na kariano.’

<sup>14</sup> “Mo kamiu kumisidomii von: mia Atua naio saaro ka tomjuo nei na vabe kiano volkouano? Nao-o, toro napano bitilubar kiano kar-

iano, naio mijog bova biorio, Atua mijelar kiano kariano. Mia dolu nene, naio ban bere vonuo napano kanano meuliano jo jibe ka ga bogo na naio binimej. Toro naña jo bavavin ea naio, mia Atua rudu naio to yetano, mia toro naña jo midu naio jo yetano, mia Atua rivitiri lario.”

*Yesu milivu ka kiritete nalo  
Mataiu 19:13-15; Mak 10:13-16*

<sup>15</sup> Ana ka bogo na, nena nalo tai abar kenerilo solbouo nalo abinimej ea Yesu, ajidom naio tokol lo, rilivu kalo. Mia bogo na naiagagoano nalo amileal, aberburelo, aber avatavio bereio.

<sup>16</sup> Mia Yesu bio ban tire nalo, ber amei bo ka ga aialio, a naio ber ka naiagagoano nalo, berinavo “Kamiu kuverbure re kiritete nalo na, kuvijamo kalo amei aial kiniou, bior kiritete nalo na, tomu nalo napano ajavukia nalo, nalo ga naruei aju aba jouro ruei ea navenatuboiano na Atua kanano. <sup>17</sup> Kiniou neber be riano ban kamiu, ka toro na ver sidom navenatuboiano na Atua kanano, naio monoka rila naio tibe ka kiritete nalo nei, ver ðeli, naio maka rijikia riva jouro eaio.”

*Kulo Ju nalo kanalo toro na toru  
tai jidom rivokar meuliano*

*Mataiu 19:16-30; Mak 10:17-31*

<sup>18</sup> Avona bisi, ana tubo tai binimej bika Yesu, berinavo “Naverloglogiano novo, neber bo kaso, jau koverial van kiniou ka monoka nala venia ka mia nemijikia novokar meuliano na maka rijikia ribisi.”

<sup>19</sup> Ana Yesu berdoþe, ber “!Ei! ?Jau komijikia venia, ana kobio kiniou kober kiniou nobo? Maka ve toro dolu tai na rivu ve riano, mia Atua ga takurano. <sup>20</sup> Mia jau kobika kober juñabe ka toro tai na jibe ka jau mijikia rimej rivu ea Atua mirano. Mo, ðeli jau komijikia batitig tuboiano nene nalo ruei naña aber ka: Jau kala re siakaiano, jau koue tañaria re toro, jau kovina re, jau kala sibi re, jau kotovon karamamo naio koniomo ga.”

<sup>21</sup> Ana tete nei naio berdoþe ber “Nao, kiniou nomijikia nono tuboiano nalo naña jau kober kiana, mia nomijikia na ver ka jau ka kiniou nojomã nabokar batitiglo jikar ea bogo na kiniou nobe ñeaku kia ga vo. Binimej bokar vonganei, maka nalabelea tai.”

<sup>22</sup> Mo bogo napano Yesu mijog ka napano naio ber jibe na, naio berenio “Kirinovo, mia tivelinio na jau, vite tai ju keano vo. Jau monoka kava koñiliñili nono ka kanamo saba nalo na miroano na, mia jau kavaru puruveru nene, kavano katan ka van talimãasa nalo. Ver jau kala tibe na, mia ve kanamo vite novo nalo ve miroano ea vio mave. Mo, jau kava kalaio, avona bisi ana komej katakisor kiniou.” <sup>23</sup> Mia bogo napano toro nei mijog iliano nei, naio mijog kiano iviso jegi toru laka, kiano jidomiano kiri temi ñele, bior naio be toro na juñano bujo ka saba toru laka.

*Toro na kiano saba toru, kirisikili  
ka naio riva jouro ea Atua kiano  
navenatuboiano*

<sup>24</sup> Naruei Yesu bitii toro na toru nei bano-o, kar na naio berinavo “Ver toro tai na kiano saba toru, ver naio sidom riva jouro ea Atua kiano navenatuboiano, vite na kirisikili kija na. <sup>25</sup> Nao-o, kiniou neber ka kamiu, ver kamele tai riovídulu ea bulumirano nitil tai, nina be kirisikili laka, mia ver toro tai na be kiano saba toru mia naio sidom ka riva jouro ea Atua kiano navenatuboiano, nina naio kirisikili lie vo ka nina.”

<sup>26</sup> Mia nalo napano amijog iliano na, nalo abamenea naio kanio, aberinavo “!Tomnei! Ver tibe na, mia kei naio mijikia rijev meuliano?”

<sup>27</sup> Mia Yesu naio berdoþe, berinavo “Nao-o, toro maka rijikia rila naio rijev meuliano, mia venia naña toro maka rijikia rilaio, mia Atua naio mijikia rilaio rivu ga.”

<sup>28</sup> Ana Pitere naio bika, berinavo “? Ana mia tuñabe ka kumemi? Kumemi numituvan kenememi

vonuo nalo ruei, ana kumemi nubinimei numitakisorso.”

<sup>29</sup> Mia Yesu naio ber ka kiano naia-gagoano nalo, naio berinavo “Kamiau kuvisidomii m̄lea re tivelinio na. Ka toro kei napano ver tuvan kiano vonuo, p̄eli koano, p̄eli karam̄ano a kenieno, p̄eli na kenerinio nalo, mia ver naio tuvan vite nalo nonovio na rivior im̄auano na Atua kiano navenatuboiano, <sup>30</sup> mia naio rijeve meran bere kiano saba nalo na jibe nei ve miroano lie vo. Nina ea bogo na naruei, a iorou ka bunu ea bogo na ju binimei, mia naio rivokar meuliano na maka rijikia ribisi.”

*Yesu berial kiano m̄ariano varolu nene*

*Mataiu 20:17-19; Mak 10:32-34*

<sup>31</sup> Mia bogo na ajum̄a amiel abano, ana Yesu bio kiano duelimo ba juo [12] abinimei kean naio, naruei naio ber kalo berinavo “Kamiau kuviagago vatitig rivu. Vonganei kito roju rabavin Yerusalemo kia nei, mia bogo na kito rovoru ea vio na, vite nonovio nanua nailiano nalo abivitauiiao nua ruei ea tivelinio na Kulorinio Kenerinio, mia kamiau kuvial amalmaluvo takio.

<sup>32</sup> “Mia kamiau kuvial ka napano adu naio toa kulo Romo nalo jum̄alo, ka mia aserei niadua rivanio, ala kiki naio, a avule titia naio, <sup>33</sup> a avitiv naio, rivano-o mia auebin naio rim̄aro. Mia ka bogoti ve tolu nene, ana mia naio tumolu rimeul bereio.”

<sup>34</sup> Be kurano ka na Yesu berial vite nonovio meravo banlo jibe na, mia maka lele ajoglubarbar vatitigio rivu. Naio jibe ka napano amilavan iliano nei kalo, mila ana maka avokar batitig nioti na iliano nene.

*Yesu mim̄auka batitig merebono tai mirano*

*Mataiu 20:29-34; Mak 10:46-52*

<sup>35</sup> Mia Yesu nalo aju amiel abano, abinimei vaataro ka komeli na vio Jeriko, mia merebono tai jom̄a jotano ea ikiñarabo, naio jom̄a miogog sinaniano den tomu nalo nam̄a ajeljel ea m̄arabo nei. <sup>36</sup> Naruei merebono nei naio mijog ka Yesu nalo aju abinimei, naliko tiniobi

nalo napano ajum̄a amiel bijaio, ana naio bika berinavo “Nalo na vio be na, ajum̄a amiel ka ava be?”

<sup>37</sup> Naruei nalo aberdope aberinavo “!E, abe Yesu na vio Nasarete ga, naio miel binimei jel kean kito ga!”

<sup>38</sup> Ana toro nei bio jouo, jegi ban Yesu berinavo “!Yesu, jau Teviti kiano yati, kiniou nojidom ka jau tiniem riia kiniou!”

<sup>39</sup> Mia nalo nam̄a aju amiel jukamu ka Yesu, amijog ka m̄a naio bio jibe na, ana aberbureio, aber naio rimelumu ga. Mia tete nei naio maka sidom rijoglo, mia bio bereio, jouo lie, berenio “!Yesu, jau Teviti kiano yati, neber bo kaso, tiniem riia kiniou!”

<sup>40</sup> Mia Yesu miel bano, mebi loglog vio nene, ana ber avuru toro nene rimeu vaataro kanio. Ana aburio binimei, ana Yesu bika denio, berinavo <sup>41</sup> “?Jau kojidom ka mia kiniou nala vaio kaso?”

Ana naio berdope berinavo “Aiou, Tubo, kiniou nojidom ka miraku rivu, ka nejikia neial vite.”

<sup>42</sup> Ana Yesu berinavo “Mo, vonganei kiniou nesian kiamo siraragiano vanso tibe ka na jau kobikanio. Kiamo viekouoiano milaso kovu bereio.” <sup>43</sup> Mia monloglog bogo na, toro nene mirano binimei bo, ana naio jom̄a miel naliko Yesu, naio jom̄a miaia Atua toru laka. Mia tomu nalo bunu napano amial vite nei, amial bo laka, ajum̄a abamenea Atua siano biorio.

## 19

*Yesu biviuo naljuo Sakias*

<sup>1</sup> Mia Yesu nalo abinimei jouro ea komeli na vio Jeriko, ajum̄a amiel aban ka aiovodulio ga. <sup>2</sup> Mia ea vio na, be toro tai jo, siano Sakias. Naio be toro na toru ka nalo na takis ea tanobuku na toru na vio nei, mia bior naio jom̄a mim̄au bova, jom̄a mijukubin tomu nalo ka kialo puruveru na takis nene, mila jum̄ano bujo kanio, kiano saba nalo miroano. <sup>3</sup> Mia naio bunu binimei

ka bogo nei, jidom rial kija Yesu ka naio be toro na jumãbe, mia tomu kinkin telabo aju vaataro ka Yesu, aju kovio amila vio telisu laka, mila naio maka rijikia rial vatitigio, bior naio be toro na bulati ga tai. <sup>4</sup> Mia mial bova ga, ana jikiti jukamu ka Yesu nalo, ba bokar buruviove tai, jakioo bavin mave joa jaati tai, jororea ka mia Yesu nalo aiel amei, ka mia naio mijikia rial vatitigio.

<sup>5</sup> Mia bogo na Yesu binimej bokar buruviove nei, Sakias miilo ka napano Yesu jirarag bavin, mialio, mil banio berinavo “Sakias, jau katabulu soĥeli. Kiniou nomijoglubar ea kiniou ka banei monoka noto kija ea kiamo vonuo beamu vo.”

<sup>6</sup> Mia Sakias mijogio, jumolu jabulu soĥeli batove, naruei buru Yesu ba vonuo ea kunuano, bija burumãara saariano tai.

<sup>7</sup> Naruei bogo na tomu nalo amial tenei, nalo telabo maka asaaro, amil mumioo tertelisu, a berinavo “Toro na Sakias na, naio be toro tai namã mimãu kirivova, naio jomã mijukubin tomu nalo bogo nonovio ga, mia kar vaio ana Yesu jidom riva to naljuo ea kiano vonuo?”

<sup>8</sup> Mia bogo na aju joomo kario, ana Sakias mijog lubar ka monoka naio rivilig naio, riyelar kiano meuliano, naruei naio jumolu berial ea Tubo mirano, naio ber “Tubo, vonganei kiniou nomijamo ka kiaku saba torogio ban tomu na abe talimãasa, maka ve kanalo titai. A venia namã namila sibilili toro kanio, nebina kalo, mia navar meran bereio vokar ve va veri tukario.”

<sup>9</sup> Mia Yesu mijog bo toru laka ka venia napano Sakias mijue bulagio banio, ana berinavo “Kiniou nemial jibe ka banei ioruriano na Atua kiano naio binimej bokar mãaratavo nei memedu. Tete na naio milaluvu mãarabo na kiano meuliano, mia naio bunu naio be Epraamo kiano bajulukuti memedu, naio be toro Ju riano, <sup>10</sup> mia kiniou Kulorinio Kenerinio nebinimej ea yetemeriba

nei ka nesirago nalo namã ami-laluvu mãarabo jibe toro nei, a ka nalarurlo.”

*Jamerijano na tomu nalo na abitkar kialo toro na toru kiano puruveru*

*Mataiu 25:14-30*

<sup>11</sup> Mo tomu nalo ajumã amije tilinielo ka Yesu kiano iliano nalo nei, naruei naio mil banlo ba ber jamerijano tai kalo. Naio mial bo ka riverlogloglo ka jamerijano nei, bior naio mijikia ka tomu nalo ajumã ajidom aber bogo na naio riva rivoru Yerusalemo, mia naio rila Atua kiano navenatuboiano riyotuba kalo ve vaarakurano ga ruei. Mia vonganei aju abinimej vaataro ka Yerusalemo ruei, ana Yesu jidom riverlogloglo ka mia naio monoka tuvanlo beamu vo, karina mia naio rimej bereio. <sup>12</sup> Naio ber kalo jibe nei berinavo “Be toro na toru tai, aber ka naio ka riel riva koalabo ea vio na parinio tubo na toru joaio, ka avitirilar naio ka rimej rive parinio tubo ea tanobuku na kiano, karina, mia mijikia rimej bereio rive tubo ea kiano vio. <sup>13</sup> Mia beamu ka bogo na maka rivan vo, naio bio kiano tomu nalo, nalo duelimo, mia mije puruveru banlo abeve terakurano. Ana naio ber kalo berinavo monoka aimãu rivija puruveru nei o-o mia bogo na naio rimej bereio.

<sup>14</sup> Mia tomu nalo na tanobuku nei amiolu titig toro na toru nei, mia bogo na naio ban kario, ana aberioo aberinavo maka bunu asidom naio ka rimej rive parinio tubo kalo. Naruei amiila toru ba ban parinio tubo na toru, aber ‘Kumemi maka nuvisidom nuvial kema na rimej ka rive parinio tubo ka kumemi, kumemi maka lele garuei nuvisidom jau kodu burumãara sio na vanio.’

<sup>15</sup> Mia parinio tubo na toru nei naio mila ga, ana toro na toru nei binimej bereio ka rive tubo ea kiano tanobuku. Naruei naio binimej bio kiano tomu nalo nei napano naio bar puruveru banlo beamu ruei, naio jidom ka rial ka

amiñau eaio abokar puruveru vio bereio. <sup>16</sup> Ana toro na jukamu binimej jikili jukamu ea toro nei mirano, berinavo ‘Tubo, kanamo puruveru takurano ga naio nei, kiniou nomiñau bija bano naio milelar duelimo bereio judu kanio.’

<sup>17</sup> “Ana na toro na toru nei naio mial kanano toro nei miñau bo, ana naio berkanio berinavo ‘!Bo mia bo, komiñau bo laka. Mia bior jau kobitkar batitig iñauano telisu na nomidu joa juñamo na, vonganei nodu buruñara iñauano tai vanso, nebitiri larso ka kovitkar kanaku komeli duelimo na tortoru.’

<sup>18</sup> “Bisi, ana naliano ka binimej, naio berinavo ‘Tubo, puruveru takurano nua komidu ban kiniou, nomiñau eaio bano-o nemijev jumo bereio judu kanio.’

<sup>19</sup> “Ana na toro na toru berkanio, ber ‘Kobo, jau bunu komiñau bo, mo mia kiniou nevitiri larso ka mia kovitkar kanaku komeli jumo na tortoru.’

<sup>20</sup> “Avona bisi ana na maariano nene naio binimej, berinavo ‘Tubo, kanamo puruveru na komidu ban kiniou, nomijuvulukoio batitig ka nikulñarauo tai, nomidu van batitigio jo, naio nei nomidu ber binimej ka nodu vanso. <sup>21</sup> Kiniou nojo nomialso jibe ka kobe toro tai na komijikia kavar bulag vite na toro dolu mije batitigio jo ve kanamo, a komijikia kejinan ea tiniavio na maka komebijaio. Kiamo bajago kirisikili kija jibe na, mila na kiniou nomerou kaso, tenene na maka nala titai ka kanamo puruveru nene, nomidukar batitigio jo bo ga.’

<sup>22</sup> “Ana toro na toru nei tinien jerio, naio berinavo ‘Kaleliki, jau kober niegeniege kiniou kirivova tenia navo, napano kober nobe toro kouo tai jibe na. Mia bo ga, mo kanamo iliano na mia serso bereio. <sup>23</sup> ?Ver kiniou nobe toro na jibe na, bior vaio ana komidukar kurano ka kanaku puruveru jibe na? Bo laka ka ver jau kodu riva toa yimo

na puruveru, ka ver nemei bereio, ana nemijikia navar bulagio rivija boboti napano naio miin bulagio.’

<sup>24</sup> “Ana na toro na toru nei naio ber ka nalo dolu na ajikili aju vaataro, berinavo ‘Kuvidular puruveru na den juñano, kuvidu van nana mileal duelimo.’

<sup>25</sup> “Ana nalo aber ka toro na toru nei, aber ‘!Ana Tubo, naio bar miroano kiana, kiano duelimo ruei!’

<sup>26</sup> “Mia toro na toru ber kalo, berinavo ‘Nao-o, jibe na naruei. Nana be kiano saba telabo ruei, mia naio rivar ta bunu bereio, mia nana maka kiano titai mia naio rilaluvu venia napano be kanano telisu mugaruei. <sup>27</sup> Mia tivelinio ka kiaku uolu nalo nei, napano maka asidom neve tubo kalo, nejidom ka kuva kuvurulo amei ea vio nei, kuvuebinvinlo añarmaro kamu ea miraku.’”

Naruei Yesu kiano jamerijiano naio biniu ea vio na.

*Yesu binimej boru ea vio nei Yerusalemo*

*Mataiu 21:1-11; Mak 11:1-11; Jone 12:12-19*

<sup>28</sup> Iorou ka napano Yesu ber iliano nei bisi ana naio jumolu, miel jukamu bano, buruñarabo kalo abavin Yerusalemo. <sup>29</sup> Mia nalo abinimej vaataro ka komeli juo na tertelisu nei Betevas bija Betani, ea tivelinio ka Burusuku na Buruolivi nalo. Ana Yesu mil ban kiano naia-gagoano juo, berinavo <sup>30</sup> “Kuve juo kuviel kuvan ea komeli na telisu yako jo beamu vo. Mia bogo na ver kuva jouro eaio, mia kuvial togki tai amiorkar ju. Togki nene be ñeaku ga, maka ala kor taakano vo, mia kuvijubarlar sano teli ana mo kuvuru kumei bere ea vio nei. <sup>31</sup> Mia ver avika den kam juo averinavo ‘? Ai, kumitu kumijubarlar sano teli ka venia?’ Ana mia kamiu kuverdoþelo kuverinavo ‘Tubo jidom temeul nei ka rila kiano iñauano tai.’”

<sup>32</sup> Yesu ber jibe na kalo, naruei miilalo abano, mia nalo amial jibe ka ga napano naio ber kalo. <sup>33</sup> Ana na nalo aba ajuña amijubar bulag

temeul nei sano teli, mia bogo naña ajuña amilaiio, ana sano taanou nalo abika aberinavo “?Ai, kumijubarlar sano teli ka venia a?”

<sup>34</sup> Naruei nalo aberdoĝelo, aberinavo “Makanio, Tubo naio jidom temeul nei ka rila kiano iñauano tai beamu vo.” <sup>35</sup> Ana nalo amijamo kanio, ana na nalo aburu togki nene binimei ban Yesu, mia abisii bulag ñalo kulukoti nalo mave ea taakano, ana na amidular Yesu bavin jotano mave eaio.

<sup>36</sup> Ana Yesu midu togki nene, joña miel bano, mia bogo na naio jo bano, mia tomu nalo abisii ñalo kulukoti nalo ea ñarabo, kanio mia Yesu kiano togki mijikia riel mave ealo.

<sup>37</sup> Naruei nalo amiel ea Burusuku na Buruolivi nalo, bano-o abinimei aboru ea vio na ñarabo mialolo batove ka rivatove Yerusalemo. Mia bogo na buruñara tiniobi na na-iagagoano nalo miroano amial ka Yesu jo miel binimei vaataro ka vio Yerusalemo, mia ajidomial bereio buruñara iñauano nalo bija kijok-ijo nalo naña naio milaiio, mia amial jibe ka napano kialo buruñara parinio tubo vou tai naio jo binimei, mila na ajaaro toru kanio, aju abamenea Atua biorio. <sup>38</sup> Ajuña abiovio, aberinavo “!Atua loa laka, keilivu ka parinio tubo nei binimei ea siamo! Buruñara merivuiano ea vio mave, kamiu na ea vio na mave kuvitirilar Atua siano, kiano mermerano bo mia bo!” <sup>39</sup> Mia ka bogo na, Varisis tealo aju iviso ka tiniobi nalo nei, mia maka lele asaaro ka na abitirilar Yesu jibe na, ana na aberii kanio, aberinavo “!Naverloglogiano, koverbure kanamo na-iagagoano nalo na ka auetuba kavuru kaso re tibe na!”

<sup>40</sup> Mia Yesu berdoĝe banlo, berinavo “!Ee, vede ga. Ver nalo aviovio tibe na re, ĝeli mia puruveru rera ga nei monoka nalo aviovio.”

*Yesu jegidu ka komeli lu nei Yerusalemo*

<sup>41</sup> Mia Yesu binimei vaataro ka rivokar buruñara komeli nei

Yerusalemo, mia naio jirarag ba jouro eaio, tinien miiaio, ana jikar ka jogumirano jibirbil biorio. <sup>42</sup> Mila jibe na ana naio mil ban memedu, berinavo “Kiniou nomijog bova toru kaso. Ver jau kovitilubar ga venia miyotuba ea kiamo vio banei nei! Atua jo mila kiamo ñarabo novo tai ka kojev tuñaro eaio, mia jau maka kovitilubarario. <sup>43</sup> Mia monoka nover ka jau ka mia bogo tai rimei easo napano mia kanamo uolu nalo ve miroano laka amei kaso. Mia aseliviv easo atukoso, a mia ayuku jijii borotano rimei vio takurano, ve kialo ñarabo ka mia amijikia avavin ea kanamo buruñara tagvoru nalo. <sup>44</sup> Mia amei jouro, aue vatitigso. Mia auebinvin kenerimo nalo, a mia ala bulag nonovio kunuamo nalo, avar bulag kiamo burukis nonovio avatove mia riviniu. Vironiano na jibe na mia rimei easo bior ka napano jau maka kosidom kovitilubar ka banei be kanamo bogo memedu ka napano Atua maluvo ka rilarurso.”

<sup>45</sup> Naruei Yesu miel ba jouro ea komeli, mijaka ban ea Atua Soĝi kunuano lu, ana mial nalo naña aju amimau bior veru ea vio na. Naruei naio mijil dedade ealo, berinavo <sup>46</sup> “Atua ber ea kiano Iliano Lu, naio berinavo ‘Kunuaku Lu naio be yimo na volkouano,’ mia kamiu kubiliglar yimo nene ruei, binimei jibe ka buluvae tai na tom na vinauano nalo kunualo.”

<sup>47</sup> Ana ka bogo na Yesu joña bava joomo ea Yimo Lu legiano nonovio, naio joña berloglog tomu nalo, mia tomu na tortoru ka kulo lu nalo naliko naverloglogiano na tuboiano nalo bija tomu nalo kialo tomu na tortoru maka lele asaro kanio. Ajuña ajiravo kavuru ñarabo ka amijikia ala titai ka rila Yesu monoka rimaro. <sup>48</sup> Mia bede ga, abitilubar ka maka ajikia aleal ñarabo tai, bior tomu nalo naña ajuña amije tilinielo ka kiano verloglogiano, tiniel jii kiano iliano nalo

toru laka, ajidom naio julaka ga.

## 20

*Navurim̃araboiano na vio Israel  
ajidom averbure Yesu*

*Mataiu 21:23-27; Mak 11:27-33*

<sup>1</sup> Mia ka legiano dolu bereio, ana Yesu ban bere joomo ea Yimo Lu na Atua Kunuano yako Yerusalemo, naio jom̃a berloglog tomu nalo a jom̃a mioliolu ka Ioluano Vou na bo banlo. Ana tomu na tortoru na kulo lu nalo bija naverloglogiano na tuboiano nalo bija navurim̃araboiano dolu nalo abinimei eaio, abika denio aberinavo <sup>2</sup> “? Jau kover von ka kumemi, ka nam̃a jau kojom̃a komila jibe na ea vio nei ea kei siano? ?A kei ber kaso ka jau kala tibe na?”

<sup>3</sup> Ana Yesu berdoḡelo, berinavo “Mo, mia kiniou bunu nevika vikadeniano tai den kamiu beamu vo. Kiaku vikadeniano jibe nei, ber <sup>4</sup> ?Varueiano nam̃a Jone jom̃a mila nua ban tomu nalo, naio be vite tai napano Atua berkanio ka m̃a naio rilaio, ḡeli na Jone ga naio jidom ka rilaio? Kamiu kuver von nina.”

<sup>5</sup> Mia Yesu kiano vikadeniano nei mila amil toru banlo, ajum̃a aberinavo “?Mia kito rover tum̃abe ka naio? !Kito rovitikario vatitig rivu! Ver kito roverinavo varueiano na Atua ber ka Jone, mia tete na naio monoka rivika bere den kito riverinavo bior vaio ana maka romonea Jone. <sup>6</sup> Mia bunu, ver kito rover Jone ga jidomii ka rilaio, mia tomu nalo tinielser kito, mia atuba kito, bior nalo aju amonea Jone jikili ruei ka napano naio be Atua kiano nailiano riano tai.” <sup>7</sup> Ana jidomiano na mila ana aberdoḡe ban Yesu aberenio nalo maka ajikiaio ga.

<sup>8</sup> Mia Yesu ber kalo, berinavo “Tibe na, mia kiniou bunu, maka nejikia never ka kamiu ka kei naruei naio ber ka kiniou ka nala im̃auano nalo nei.”

*Jamerijiano na tomu na bova na-  
pano m̃a abitkar jiotilikrevi tai*

*Mataiu 21:33-46; Mak 12:1-12*

<sup>9</sup> Ana Yesu ber jamerijiano tai ban tomu nalo na ka bogo na, berinavo “Toro na toru tai, bija kiano jiotilikrevi tai. Bogo tai naio jidom riel rivan ea buruvenuo dolu tai, napano jo vaatarobe laka, ana juvan kiano jiotilikrevi nei ban tomu dolu nalo ka mia amei aim̃au eaio, ka mia avulu vanio. <sup>10</sup> Ana toro na toru nei naio ba jo-o, avona bitilubar ka be bogo na m̃arkrevi meruo naruei. Jibena miila kiano toro tai ka ban bereio ea nalo napano ajua kiano jiotilikrevi nei, ka rivar puruveru na m̃arkrevi nei togio napano monoka avulu vanio. Ana toro nei bano, mia bogo na naio miyotuba kalo, nalo maka asidom avuluio, mia amue naio ga o-o bisi ana na amiila naio ban bereio jum̃ano ravavo ga jibe na. <sup>11</sup> Ana toro na toru nei miila kiano toro dolu tai bano, mia abitivi naio bunu, amila lelan toru laka, ana amijil deven naio ban bereio jum̃ano yauo ga jibe na. <sup>12</sup> Mo varolu nene, toro na toru nei miila kiano toro dolu bereio, mia naio bunu, amueio-o bar ja, ea naio toru laka, ana abukulario den jiosi.

<sup>13</sup> “Mo toro na toru na jiosi nei naio mial bajago na kirivova nei, mia naio maka bunu rijikia naruei, berinavo ‘! Aiou! ? Bo ka mia nala tum̃abe naruei? ḡeli vongañe, monoka neiila ga keneriku rivaño. Naio be keneriku takurano ga, tinieku jii m̃elea naio, mia ver naio rivaño mia nalo monoka avitilubar avijuku rivu ka naio.’ <sup>14</sup> Naruei miila naio bano, mia bogo na tomu nalo amialio, nalo ajidomii kirivovakanio. Aberiio ealo, aberinavo ‘Naina be toro na toru kenerinio na. Toro na naruei, napano ver toro na toru na riva kovio, mia naio naruei rivar kiano borotano nene tibe kiano jajum̃ano ve kiano. Bo ka kito rouebin naio rim̃aro, kanio mia kito ga romijikia ravakar borotano nei rive kiado.’ <sup>15</sup> Naruei nalo ajumolu abokario, abukulario batove den jiosi nene, amuebinio.”

Ana Yesu berinavo “Tukunu nei naio bisi ea vio na, mia bo ka kamiu

kuvisidomii vonio. Bogo na toro na toru rijog tenei, mia naio rimei rila tumabe ka nalo nei? <sup>16</sup> Neber ka kamiu neber tomu kirivova nei, mia naio rimei ruelo, amarnaro ea bajago kouo tai, a mia naio rudu kiano jiosi nei toa tomu dolu na bo nalo jumalo.” Ana bogo na amijog Yesu naio ber jibe nei, amijog lubar ka iliano nei be ilivaniano tai, ber jibe ka kulo Ju maka asidom naio napano be Atua kenerinio, ana mia Atua rivuru tomu nalo na maka ave kulo Ju adu jelelo. Ana vite nei nalo maka asidom ajogio, naruei nalo amil jikili aberinavo “Vite na jau kojoma koberio na, Atua maka lele rijamo ka mia riyotuba tibe na.”

<sup>17</sup> Mia Yesu bitikarlo, bika ber “Kamiu maka kumisidom, ana bior vaio ana abivitauia iliano lu nei napano naio ber jibe nei, berinavo *‘Puruveru na, tomu nalo napano aminauka yimo aber naio bova, mia abuku ban ruei, mia vonganei, puruveru nene naio binime be puruveru na kirinovo tai ea sudu na yimo, ka rudukar yimo sikili.’ Iouano 118:22*

<sup>18</sup> “Tomu nonovio na mia ava aserbafe ea puruveru nei mia ajoru napano mia puruveru nene rila kokorov mokotenalo. Mia ver riva rivokar bogo na puruveru nei rijoru, toro kei napano puruveru mon kakario mia rila kitkitio rivova, naio riva kovio.”

<sup>19</sup> Ana naverloglogiano na tuboiano nalo bija tomu na tortoru na kulo lu nalo, abitulubar ka Yesu kiano jamerijiano nei jilogloglo memedu, naruei nalo tiniel jerio lie vo, ajumolu ajidom avokar naio rimemedu ea bogo nei garuei. Ajidom toru ka ala titai kanio, mia amila dede ga, bior amial ka tomu nalo ajuma tiniel jii naio ga. <sup>20</sup> Jibe na naruei ana bogo nono ga ajuma abitivitiio, a nalo tealo ajuma ajivanlo ga aba vaataro kanio, abar kokoalo ga amilalo jibe amonea naio

bo, mia tena ajuma amilaio, ajuma abarkakar kiano iliano nonovio ga. Kialo jidomiano, ka ajidom aleal iliano na naio riverenio, ana amijikia ala veriiano van toro na toru na vio Romo nene Pailat, ka naio mijikia sian vironiano tai vanio tibe ka na ajidomio.

*Tena be Atua kanano a tena be Sisa kanano*

*Mataiu 22:15-22; Mak 12:13-17*

<sup>21</sup> Ana nalo nama ajuma abar kokoalo ka napano abinime vaataro ka Yesu, bogo tai ana abika vikadeniano tai denio, ajidom ajukubinio. Aberinavo “Naverloglogiano, kumemi nubitilubar ka kiamo iliano a kiamo verloglogiano be riano a memedu. A kumemi nubitilubar ka jau maka ketibure tomu nalo aveve dolu, mia komialo abe veverare ga kojoma koberial Atua kiano marabo na memedu ka tomu nalo nonovio. <sup>22</sup> Ana numisidom nuvika denso tibe nei ka: ?Kiado tuboiano naio ber juma? ?Naio ber memedu ka kito kulo Ju nalo rovulu takis van parinio tubo na Romo na Sisa, peli na ber maka rimemedu?”

<sup>23</sup> Mia Yesu bitilubar ka ajidom ajukujuku naio, naruei naio ber kalo, berinavo <sup>24</sup> “Kuvidu puruveru sesa nene tai rimei van kinio. ?Kuvial von kei mirano na joaio? ?A sio nei ajiri joaio, be kei siano?”

Nalo aberinavo “Sisa mirano na, a siano na bunu.”

<sup>25</sup> Ana naio ber kalo, ber “Mo, tena be Sisa kanano, kamiu kuvidu van Sisa. A tena be Atua kanano, kamiu kuvidu van Atua.”

<sup>26</sup> Nalo nei ajidom toru ka avokar vatitig kija Yesu ea tomu nalo miralo ka kiano iliano tai, ana mia bogo nama amijog kiano verdopeiano nei, amiilo toru kanio, amial ka naio bokar tanealo, ana nalo aju buru ga, maka bunu ajikia aver bereio titai.

*Tomu na amaro mia ameul bereio*  
*Mataiu 22:23-33; Mak 12:18-27*

<sup>27</sup> Mia iorou ka naina, Satusis nalo tealo abinime ea Yesu, ka ajidom avika denio ka tivelinio na

vite tai namã abiekar kouo eaio, aber tomu nalo na amãarmãaro, maka bunu ajikia ameul bereio ea bogo na maaro. <sup>28</sup> Naruei nalo abika denio, aberinavo “Naverloglogiano, kumemi numisidom nuvikaso, ka jumãabe ka iliano tai namã tormoruo Mosis re nua naio bivitauiaio be kiado. Naio berinavo, ver toro tai rimãaro den koano, napano maka ve kenerilo tai vo, mia monoka nana lian ka naio rivuru taanou nene ve koano, ka mia rila ka tira nei mijikia rivar tete, ka mia rudu kuruano napano naio mãaro siano, ka mia siano rimeul to. <sup>29</sup> Mo, ka bogo tai, be kurualo aluo. Motoru kalo buru tira tai be koano, mia mãaro den koano napano naljuo maka avar kenerilo tai vo. <sup>30</sup> Ana maratoru naio kija buru tira nene, karina naio bunu mãaro denio, <sup>31</sup> karina baratoru, naio bunu milaio, bano-o bokar kurualo aluo nene, nalo abiniu amila jibe na ga, napano maka ve kenerilo tai leleio. <sup>32</sup> Ana iorou ka koano nalo nao-o abiniu, tira nene bunu mãaro. <sup>33</sup> Mo jau kover von vite na. Ea bogo na maaro, ka bogo namã ajumã aberveriio vurua na aber mia tomu nalo atumormolu bereio, mia tira nei naio ve kei koano, bior naio joro ka kurualo aluo nei abiniu ruei?”

<sup>34</sup> Naruei na Yesu berdoþelo berenio berinavo “Ea yetemeriba nei ga tomu nalo ajumã ajorjoro, <sup>35</sup> mia nalo napano Atua ber ka amijikia ameul bereio ea namãariano, ka ava jouro ea kiano vio, mia maka bunu ajikia alaio. Ka bogo na, maka bunu asorsoro kalo, <sup>36</sup> mia maka bunu ajikia amãarmãaro, bior mia amei atavukia nailiano nalo. Mia Atua rivuru meul ealo bereio den namãariano, naruei amei ave kenerinio nalo riano.

<sup>37</sup> “Mia ka tivelinio ka na meul bereio na, Mosis bunu beriio nua ruei, naina jakii tukunu na buruiesi tai napano sebi jomã bovago eaio. Ea vio na romial ka Mosis naio jomã bio Atua Soþi ber naio be Atua na Epraamo kanano, a Atua na Aisak kanano a Atua na Yakovo kanano. <sup>38</sup> Ana bogo na Mosis naio ber iliano

na, tom tolu nei amãaro ea yetemeriba nei nua bogo be ruei, jibe na amãaro ea yetemeriba nei, mia aju ameul ea Atua kiano vo. Atua naio maka ve Atua na tomu na amãaro ga, mia naio jidom ka tomu nalo na aju bija naio nalo abe tomu na ameul. Ea Atua kiano vitiiano, tomu nalo namã amãaro ruei ea yetemeriba nei, nalo ameul kia ga vo aju.”

<sup>39</sup> Ana naverloglogiano na tuboiano nalo, nalo ajumã amiagago ka Yesu kiano verdoþeiano ban Satusis nalo, ana amial ka naio be masou bo laka, ana aber “Naverloglogiano, kanamo verdoþeiano naio bo mia bo.” <sup>40</sup> Aber jibe na bior Yesu kiano iliano nei mila Satusis nalo amerou ka avika vite tai den naio bereio.

*Yesu Naverikariano naio be tormoruo Parinio Tubo Teviti kiano Atua*

*Mataiu 22:41-46; Mak 12:35-37*

<sup>41</sup> Naruei Yesu mil ba lie banlo, bika vite denlo, berinavo “Bior vaio ana nalo ajumã aberloglog kamiu, aberinavo Naverikariano naio monoka riyotuba ea tormoruo Parinio Tubo Teviti nene kiano yati, napano nua naio be Parinio tubo beamu? <sup>42</sup> Kiniou nebika naina, bior beamu, Teviti naio bivitauia niosi na Iouano kanano, berinavo

*‘Atua Soþi naio ber ka kiaku Tubo, naio berinavo “Jau kototano ea vameruo na kanaku,*

<sup>43</sup> *jau koto rorea rivano-o,*

*mia kiniou nala kanamo uolu nalo amei tibe ka yebe tai namã ko-bijankon jaamo eaio.”’ Iouano 110:1*

<sup>44</sup> “Ea vio na romial ka napano Teviti naio jomã bio Naverikariano ka kiano Tubo mugaruei. ?Mo bior Teviti naio ber jibe na, mo jumãabe ana ajumã aberenio mia Naverikariano naio riyotuba ea Teviti, rive kiano yati tai ga?”

Mia ea bogo tai bereio, amiilo toru ka Yesu kiano iliano nalo.

*Yesu mil jikili ban navurim̃araboian* na, veru telisu nei naio bokario ka rijekar kiano meouliano, naio jian nalo na nalotvano

*Mataiu 23:1-36; Mak 12:38-40; Luka 11:37-54*

<sup>45</sup> Ana tiniobi nalo aju amiagago ka kia ga vo, ana Yesu berial iliano tai, napano be kanano naia-gagoano ga nalo kialo. <sup>46</sup> Naio berinavo “Kamii kuvitkar kamii ka naverloglogiano na tuboiano nalo na nam̃a abarvar kalo m̃ele ka m̃alo burutili kulu-m̃arauo nalo na, a verenio nalo amieliel ea vioruru nalo, ajidom ka tomu nalo monoka avatove kalo, avio vatitiglo averinavo ‘!Aiou, naverloglogiano novo, kavijo bo!’ A ea bogo na jokoluolu p̃eli joomo ea yimo na volkouano nalo bunu, nalo ajidom ka dañariga atutano ea vio na tomu na tortoru nalo kanalo ga. ?Kamii kubitilubar ruei, a? <sup>47</sup> Mia ajum̃a aburu kialo volkouano nalo kiri p̃ete p̃eteli laka, mia ajum̃a amila sibi ga, bior ka bogo nene ga, nalo ajum̃a amijukubin taanou nalo, amila bulaglo. Naruei bior kialo bajago nalo na, mia kialo vironiano sikili lie vo.”

## 21

*Taanou tai buku veru sesa juo ban Atua*

*Mak 12:41-44*

<sup>1</sup> Naruei bogo napano Yesu nalo ajua Yimo Lu na Atua Kunuano, ana amial ka napano tomu tealo abinimei ka mia avuku kialo ijaiano ea basaro na Yimo Lu. Naruei Yesu bitii, ana naio mial ka nasani-baiano nalo abinimei abuku kialo ijaiano novo nalo, <sup>2</sup> ana na iorou kanio, naio mial bunu taanou tai, napano naio be talim̃asa ga, mia naio binimei buku kiri veru sesa juo ga.

<sup>3</sup> Naruei naio berii tira nei banlo, naio berinavo “? Kamii kumial taanou na, napano naio buku kiri veru sesa juo na? Kiniou neberiano ban kamii, ka naio jian loa jovulu nonovio ijaiano dolu nalo na nasani-baiano nalo na kanalo. <sup>4</sup> Nalo be kialo burum̃ara veru nalo, mia amije bena ga togio, mia taanou

na, veru telisu nei naio bokario ka rijekar kiano meouliano, naio jian nonovio ban Atua.”

*Yesu naio berial ka mia aue bulag Yimo Lu na Atua Kunuano*

<sup>5</sup> Karina iorou ka naina, tomu tealo ajum̃a aberii Yimo Lu, aberinavo naio kirinovo tai mia, bija sano veru maraiu nene nalo, a tonovo nalo napano m̃a tomu nalo abario kam̃a miyovovua tanobuku nene. Ana Yesu mijog tukunu nalo na jibe nei, ana berinavo <sup>6</sup> “? Kamii kumitum̃a kumial vite nalo na kuber bo? Neber ka kamii mia iorou ka bogo tai na jo binimei, mia ve re bunu puruveru tai totano vatitig ea jeleigio, bior mia tomu nalo tai amei aue bulag searia yimo na riviniu.”

*Jaleleano monoka mia rimei*

<sup>7</sup> Mia bogo na nalo amijog ka Yesu ber jibe na, abika denio, aberinavo “? Ana Naverloglogiano, mia aue bulag Yimo Lu nene nagi, a mia kumemi nuvijikia nuval kijokijo venia naruei naio verial ka vaataro ka vite nalo nene amalmaluvo?”

<sup>8</sup> Ana na naio ber kalo, berinavo “Bo ka kamii kuvitkar vatitig kamii rivu, ka mia ve re toro tai rimei rila sibilili kamii, bior mia tomu ve telabo napano mia adu siaku, mia nalo amei averinavo ‘!Kiniou nebe Naverikariano nei!’ p̃eli averinavo ‘!Naina naruei, bogo nene naruei!’ mia maka rivu ka kuvitakisorlo. <sup>9</sup> Ana ver ka bogo na, mia kamii kuvijog uetubiano na mira, a jaleleano nalo aju vaataro, mia kumemebiju m̃ele re. Vite nalo na monoka amalmaluvo beamu, mia naina maka ve bogo na maaro nene navo.”

<sup>10</sup> Ana naio ber bunu kalo, berinavo “A parinio tubo nalo, mia ala mira kanio parinio tubo dolu nalo, a venuo nalo atum̃olu ka venuo dolu nalo. <sup>11</sup> Mia m̃ii ve toru, mia reraio ea yetemeriba nei mia ve burum̃ara vituiano a mieiano kouo nalo, a rivija naina mia ve vite na memebijuiano ave burum̃ara kijokijo nalo ea bulu niogovu yauo

mave. <sup>12</sup> Mia bogo na ve re vite nalo nei vo, mia tomu nalo ala kiki kamiu ve toru laka. Mia nalo amei avokakar kamiu sikili, avar niajebijo rivan kamiu, ana iorou kanio mia adu kamiu kuvitua juṁano navuriṁaraboiano na yimo na volkouano nalo, ṁeli na avuku kamiu kuva kuvitua yimo na tetavokoiano, ṁeli ala kamiu kuvitumolu kuvitua mirano kialo parinio tubo nalo ṁeli na kialo navuriṁaraboiano nalo. Vite va nalo na mia kuvarilo bior kubokar siaku jikili. <sup>13</sup> Ka bogo na mia sikili laka rivan kamiu, mia rive kenemiu bogo na kuvijikia kuverial Ioluano Vou na bo vanlo.

<sup>14</sup> “Mia vonganei, bogo na vite nalo nei maka vo, kamiu kuvisidom ṁelea re ka mia kuver venia ka bogo na, <sup>15</sup> bior rimonloglog bogo nene ga, mia kiniou nesian iliano na masouano rivan kamiu. Mia bogo na kuver iliano nalo nei ka kenemiu uolu nalo, mia tovulo, mia ajikia re ka atuṁedoṁe bereio kenemiu iliano nene.

<sup>16</sup> “Ka bogo na, mia nalo na ga napano ṁa kumituṁa kubiolo ka teta ṁeli kuruemiu ṁeli tumanu ṁeli bilbilu, nalo na jibe na naruei napano mia amijikia avuru bulag kamiu kuvano, adu kamiu kuvitua tomu na tortoru nalo juṁalo, ka mia ala tanea kamiu rivano-o miṁ ṁa auebinvin kamiu tealo aṁarmaro. <sup>17</sup> Mia tomu nalo tiniel ser kamiu laka, mia nalo asian liliu iliano rivan kamiu napano siaku joa kamiu.

<sup>18</sup> “Mia kiniou neber ka kamiu ka mia vijumiu tai riva kovio deio.

<sup>19</sup> Mia kamiu kuvitu sikili rivano-o kuvitovulu juluvati na bogokouo nene, ana ea ṁarabo na naruei mia kamiu kuvokar meuliano riano na kenemiu.”

#### *Buruṁara mira ea vio Yerusalemo*

<sup>20</sup> Mia ea tivelinio na buruṁara bogokouo nei mia rimej, Yesu ber kalo bereio, ber “Telikiti na ver kuvial taara na tomu na mira atu selivivko buruṁara bulukomeli na vio Yerusalemo, mia kuvijikia ka bogo

na buruṁara sano labulagiano nene naio jo binimei vaataro. <sup>21</sup> Mia bogo na kuvial vite nei, kamiu na kuvitua vio Yutea, bo ka kuvuro, kuva kuvitivan kamiu ea suku nalo, mia ver kamiu na kuvitu jouro Yerusalemo, bo ka kumolmoluo kuvuro kilkil, ṁeli na kamiu na kuvitu mave nei, maka rivu ka kuvilavio ka kuvatove vonuo bereio. <sup>22</sup> Nina bior ka bogo na, naio be buruṁara legiano na lameraniano na Atua kiano siniabu, tavukia na vivitauiano re nua nalo aberkakario. <sup>23</sup> Ka bogo na bunu, mia ve kirivova laka rivan tire nalo na be ṁabolo, rivija bunu nalo naṁa ajuṁa amije yu ban kenerilo solbouo nalo. Ka bogo na, mia ve buruṁara najogvaiano ea kiado venuo nei, a buruṁara siniabu rimej ea kiado tomu nalo nene. <sup>24</sup> Mia iobogu na mira rila vinvin ve telabo atibirbil, mia ṁarimieni riorkar ve miroano juṁalo, avurulo ava aiṁau kurano ga ea taara dolu nalo. Mia kulo dolu nalo avie niegeniege kitkit lelan komeli lu na kito kulo Ju kiado Yerusalemo nei, mia ave tubo eaio rivano-o rivokar bogo na Atua jekar ka ve kialo bisi.”

#### *Mia Kulorinio Kenerinio rimej bereio*

<sup>25</sup> Ana na Yesu berii legiano na maaro, naio berinavo “Ka bogo na, mia amijikia aial kijokijo ea ṁerenio a ea siberio a ea ṁarvitano nalo. Ea yetemeriba nei, mia taara na tomu nalo mia niukniuku rivielo ve toru laka, asidom bijobijon ve toru, mia bogo na aial tei tumolu ve toru to rivavauro, mia nalo ajikia re ka mia tuṁabe kalo. <sup>26</sup> Telikiti na nalo abitulubarbar ka venia napano ṁa jo binimei ea yetemeriba nei, a napano vite na tortoru nalo na bul niogovu yauo amikulkulu janea vio, mia nalo amemebiju ve toru, meribobogo aṁarmariulu rivior meroano. <sup>27</sup> Mia ala tibe na rivano-o, ana iorou kanio ana mia aial kiniou Kulorinio Kenerinio noyotuba ea melijo vija kanaku bu-

rumāra moroano a vija kanaku burumāra miamoiano.

<sup>28</sup> “Ana ea tivelinio na kamiu, ver bogo na kuvial vite nalo nei atikar kañā amalmaluvo tibe na, mia kamiu kumerou re. Mia niukniuku rivie re kamiu, mia kamiu kuvitumolu kuvar bulag pariparimiu kuvisirarag mave, bior vite nalo na nioti nene ber kenemiu toro na laruriano naio jo binimeī, vaataro ka riyotuba.”

### *Kijokijo na burubilivo*

<sup>29</sup> Ana na Yesu ber jamerijiano tai banlo ea tivelinio na bogokouo na jo binimeī keano vo, naio berinavo “Kamiu kuvisidomii von burubilivo na, p̄eli na buruiesi dolu nalo na jibe na. <sup>30</sup> Telikiti na kumial jaati nalo abinimeī amemeaio, a abinimeī amelokloko, a sidiati nalo abarbovelo, ana na kamiu kumijikia ka be bogo na vio bitunu jo binimeī vaataro. <sup>31</sup> Jibe na bo ka na ver kamiu kuvial kijokijo nalo nei, ajumā amalmaluvo jibe na javukia namā kiniou naber ka kamiu ruei, mia kamiu kuvijikia ka navenatuboiano na Atua kanano naio jo binimeī vaataro kean kamiu. <sup>32</sup> Riano neber ka kamiu, mia vite nonovio na monoka ayotuba tibe na rivano-o, mia iorou kanio ana taara na tomu na ameul ea bogo na ava kovio ea yetemeriba nei. <sup>33</sup> Mia vio yauo rivija yetemeriba nei nalo ve juo bunu ava kovio, mia kanaku iliano nalo maka ajikia ava kovio bogo tai.”

### *Kamiu monoka kuvila vatitigio kenemiu meuliano nalo*

<sup>34</sup> Naruei Yesu midu iliano na banlo ka bogo na, iliderevijoiano banlo, naio berinavo “Mo ea tivelinio na kamiu, kamiu kuvitii vatitig kamiu. Maka rivu ka kenemiu meuliano tanea vio, p̄eli na kumunu m̄elea m̄arjum̄elm̄elu p̄eli na vite nalo na jibe na, a maka rivu ka kenemiu jidomiano to tulaka ea vite nalo na yetemeriba

nei ga. Aver p̄eli, mia kuvitumā kuvila tibe na rivano-o mia kuviilo ka burumāra legiano na maaro riyotuba ka kamiu vaarakurano ga tavukia viobijio. <sup>35</sup> Nao, mia tomu nalo tanea vio reraio ea yetemeriba nei, mia atu asidomialio re, atu avitilubarario re, mia legiano nei rivokarlo tibe ka na menu miilo ka buruniavo julubinio m̄aro garuei. <sup>36</sup> Mia monoka kamiu kuvitu derevijo dan̄ariga, monoka kuvitu kubolkouo ka kuvijikia kuvitu sikili ka kuvilarur kamiu ea vite nalo na mia ayotuba, rila ka mia kamiu kuvijikia kuva kuvitumolu kuvitu ea kiniou Kulorinio Kenerinio miraku.”

<sup>37</sup> Ana na Yesu jomā berlogloglo jibe na ea Yimo Lu ka legiano nalo, mia ka bogiano naio jo batavio den komeli, ba joa Suku na Buruolivi Nalo. <sup>38</sup> Mia kavijova nalo, ana tomu nalo ajumolu soṗeli, aban bereio ea Yimo Lu ka ajog kiano iliano nalo.

## 22

*Navuriṁaraboiano na kulo Israel nalo ajumā ajidom auebin Yesu keano vo*

*Mataiu 26:1-5,14-16; Mak 14:1-2,10-11; Jone 11:45-53*

<sup>1</sup> Na karina, bogo binimeī vaataro ka namā yuka nonovio, amila kialo jokoluolu juo na tortoru, jibe ka jokoluolu na najenjeniano na beskit napano maka isi toaio, bija jokoluolu na nasidomialiano na ioruriano. <sup>2</sup> Ana ka bogo na, tomu na tortoru na kulo lu nalo bija naverloglogiano na tuboiano nalo, ajumā amila vio ka auebin Yesu keano vo, mia maka ajikia aleal m̄arabo tai, bior amerou ka ver alaio, p̄eli mia tomu nalo ajikia ala titai kalo.

*Jutas jukunu bija tomu na tortoru, berkar ka mia tiveluku ka Yesu*

<sup>3</sup> Mia monloglog bogo na ga, siṁaro binimeī ba joomo ea Jutas na vio Kariot kiano iviso, napano naio be na duelimo ba juo tai. <sup>4</sup> Ana na maka vesiou, ana naio jumolu, bano ba miyotuba ka nalo napano

tortoru ka kulo lu nalo bija tomu na tortoru na kialo menumia nalo, berial kiano jidomiano, ana na nalo aberii m̄arabo na vabe napano bo ka mia naio mijikia tiveluku ka Yesu selia rivanlo. <sup>5</sup> Ana na Jutas kiano jidomiano milalo amijog bova toru laka, mia nalo amial bo ka aje veru tai rivan naio riviorio. <sup>6</sup> Mia Jutas jaaro kanio, mia jikar ea bogo na, julaka ga naio jom̄a jiravo ka vulu kiano bogo ka ver bogo tai napano ver ve re bunu tomu nalo tai eaio, ana na mia mijikia tiveluku ka Yesu rivanlo.

*Yesu miila Pitere naio Jone ka avala vatitig sano sinaniano na maaro Mataiu 26:17-25; Mak 14:12-21; Jone 13:21-30*

<sup>7</sup> Naruei abinimei monloglog legiano na beamu na jokoluolu na najenjeniano na beskit napano maka isi toaio, napano naio be bunu legiano napano monoka ala sida na nunu sesa nalo ka sidomialiano na ioruriano. <sup>8</sup> Naruei Yesu ber ka Pitere bija Jone, berinavo “Neiila kamjuo ka kuva kuvila vatitig vite nalo na sado sinaniano na jokoluolu nene.” <sup>9</sup> Ana na naljuo nei abika denio aberinavo “?Ana jau kojidom ka nuvila vatitigio to be?”

<sup>10</sup> Ana na Yesu berinavo “Kuve juo kuva kuvokar m̄aratavo na toru na vio Yerusalemo, mia bogo na ver kuva joomo von kiaga eaio, mia kuvial toro tai napano midu burum̄ara bauei tai na rimei rivetavo ka kami. Mia kuvitakisorio kuva a mia naio rivuru kami kuvan ea yimo tai. <sup>11</sup> Mia bogo na ver kuva joomo ea yimo nene, mia kuvil rivan toro nene kuverinavo ‘Kiado naverloglogiano naio bika berinavo, Kumemi valauo nalo, kenememi vajoomo naio be, ka nuvijikia nuvisen sinaniano na sidomkariano na ioruriano eaio?’ <sup>12</sup> Kuvil tibe na rivanio, naruei mia naio siloglog ka kami ka burum̄ara vajoomo tai mave, napano vite nonovio juaio ruei, ana na mo kuvila vatitig vite nonovio na sinaniano nei ea vio

nene.” <sup>13</sup> Mia Yesu ber jibe na ka naiagagoano juo nei bisi, ana na abano, mia amial ka vite nonovio miyotuba jibe ka ga napano naio berio kalo jukamu.

Jibe na naruei, ana na amila vatitig sinaniano na maaro na Yesu sano.

*Sinaniano na maaro Mataiu 26:47-56; Mak 14:2-26; Jone 18:3-11*

<sup>14</sup> Karina Yesu nalo abinimei mave ea vio nene, ana bogo na sinaniano, Yesu ba jotano ea vio na sinaniano, mia atevi nalo abinimei ajutano naliko. <sup>15</sup> Ana na Yesu mil banlo, naio berinavo “Bogo jiou ruei, kinou najom̄a nojidomii sado sinaniano na sidomkariano na ioruriano nene. Ninei naruei saku sinaniano na maaro, napano kito ga rosinan vio takurano, ana iorou kanio ana mo nemijikia navan ea kanaku bogokouo. <sup>16</sup> Kiniou neber ka kami ka joko nei nioti nene berii ioruriano. Mia kiniou nesen re bunu bereio, rivanvano-o rivokar bogo na kiaku ioruriano rimei ea yetemeriba nei, ea bogo napano mia Atua kiano navenatuboiano rimei.” <sup>17</sup> Naruei naio midu baja tai, bolkouo ber siva ban Atua biorio, avona bisi ana ber kalo, berinavo “Kamiu kuviyon burevure tanea kami, kami ga kumunio. <sup>18</sup> Nina bior jikar vonganei, mia kiniou nomunu re bunu m̄arjum̄elm̄elu rivano-o rivokar bogo na mia Atua kiano navenatuboiano naio rimei.”

<sup>19</sup> Naruei naio mije salo niajoko, naio bolkouo ber siva ban Atua kanio, avona bisi ana burekokorovio janealo, berenio “Ninei be mokotenaku, napano namijamo ka bior kami, mo mia monoka kami bunu kuvitu kuvila tibe na, tibe ka kenu miu buruka ka kiniou.”

<sup>20</sup> Ana iorou kanio, bogo napano ajinan bisi, naio mila jibe na bereio javukia napano mila ka niajoko jukamu, naio midu baja namuniano tai, berenio “Baja nei naio be kijokijo na kiaku burukija napano mia riou ka kami, ka vitirilar Atua kiano

virakariano vija kamiu. <sup>21</sup> Mia be titai bova, toro na mia tiveluku ka kiniou, naio be kito tai ga napano rojinan vio takurano nei ruei. <sup>22</sup> Mia kiniou Kulorinio Kenerinio monoka nañaro tibe ka naña aberkario nua ruei, mia toro napano mia tiveluku ka kiniou, tiniek miia naio, mia rivova lie vo van naio!”

<sup>23</sup> Mia bogo napano amijogio, ana na nalo ajuña abivika denlo amilavon ka alealio na vabe kalo napano jo jidomii ka mia rila tibe na, mia maka avokario.

*?Kei kalo na mia naio tukamu kalo?*

*Mataiu 20:25-28; Mak 10:42-45*

<sup>24</sup> Ana ka bogo na, siniabu jumolu bure naiagagoano nalo, ber mia kei kalo napano mia nalo asirarag kanio ka naio loalo lie, rive kialo navurim̃araboiano.

<sup>25</sup> Mia Yesu mijogio ana na naio berenio berinavo “Kito romijikia ruei tomu na tortoru nalo na yetemeriba nei kialo bajago, Parinio tubo nalo abe tubo ka kialo tomu nalo, a navurim̃araboiano nalo, tomu nalo monoka atovonlo, adu sio na loa laka rivanlo, abiolo aberinavo toro na bitikarlo. <sup>26</sup> Mia kamiu kiaku naiagagoano nalo, monoka kuvila re kamiu tibe ka tomu na tortoru nalo nei. Naio be kenemiu napano ðeli mia averinavo naio be toro na toru, mia monoka naio rimeĩ tibe ka kenemiu toro na kiritelisu tai, tibe kanio napano naio moluo iorou. Kamiu tai napano ver sidom ka naio rimeĩ rive kenemiu navurim̃araboiano, naio monoka rimeĩ tibe ka toro na miã riijaja kamiu.

<sup>27</sup> “Ka bogo na sinaniano, toro tai jotano ana toro dolu bar sano sinaniano binimeĩ banio. Naruei naljuo nei, na vabe nene napano amial jibe ka naio toru lie loa tinene? Kamiu kumijikia, mia kiniou maka netibe ka naio, mia kiniou nebinimeĩ ea yetemeriba nei jibe ka naio naña

mila im̃auano, miija kulo dolu nalo, bijuku bo kalo.”

*Yesu berkar ijaiano banlo*

<sup>28</sup> Ana na Yesu ber kalo, berinavo “Kamiu na, nemial kumitibe ka kiaku ikurukariano na bo nalo ea bogokouo nalo naña nabokario, binimeĩ bokar banei. <sup>29</sup> Mia jibe kanio napano teta naio bitirilar kiniou ka neve tubo ea kiano vio, mia kiniou bunu neber ka kamiu neber nevitiri bulag kamiu kumei kuve m̃artubo nalo ea kiaku vio nalo nei. <sup>30</sup> Tibe na, ana na mia kamiu naruei kuvijikia kuvitutano rivija kiniou bereio, mia kito resinan vio takurano jouro ea kanaku navenatuboiano, ana mia kamiu kuvitutano ea vio na mave loa laka bunu ka mia kuve tubo ka bajulukuti duelimo ba juo na Israel nalo.”

*Yesu berial ka mia Pitere rivar-bonbonua naio*

*Mataiu 26:31-35; Mak 14:27-31; Jone 13:36-38*

<sup>31</sup> Naruei Yesu mil ban Saimon Pitere, berinavo “O Saimon, jau monoka kovitkar vatitigso rivu. Siñaro tinien jer kamiu ruei, naio jidom toru ka rila bulag kamiu, mia Atua mijamo ka ruei ka mia naio mijikia tokol von kamiu ve telisu, a mijikia tiburelar nana naio bo a nana naio bova. <sup>32</sup> Mia kiniou nobolkouo kaso ruei, a noju jikili dam̃ariga ea kanaku volkouano ka ver jau kotuñabe, ana na mia kanamo viekouoiano rijoru nonovio denso re. Ana verenio jau komei kovu bereio, komei bereio, mia jau monoka komei kove toro tai na miã kala kuruamo nalo atumolu atu sikili lie dam̃ariga.”

<sup>33</sup> Mia Pitere naio berdoþe Yesu berinavo “Tubo, verenio avukuso kavan ea yimo na lakoiano, mia kiniou nevedu rivijaso rivu ga. Peli miã ala kikiso miã kañaro kario, miã kiniou najaaro ga ka kito ve juo.”

<sup>34</sup> Ana na Yesu berkanio, berinavo “Pitere, kiniou neber telerinio ka jau, ka bogiano nei ga, mia tormano tokoko-reko re vo, mia jau kavarbonbonua kiniou ve varolu, koverinavo jau maka kejikia kiniou leleio.”

*Bogo kouo naio miyotuba rui*

<sup>35</sup> Ana na Yesu bika denlo, naio berinavo “Kamiau kuvisidomii von nanua, ka bogo namã nemiila kamiau kubano mã kubioliolu janea vio nalo. Kiniou neber ka kamiau ka mia kuvar re kenemiu saba nalo tealò vija kamiau, jibe ka siveu na veru, ðeli na basaro, ðeli na kulubue dolu na jaamiu, ðeli na vite nalo na jibe na. ?Mia jumãbe, kamiau kumial ka jumemiu bulati ka vite nalo tai?”

Naruei nalo aberdoþe aberinavo “Tubo, maka jumememi ve bulati ka titai.”

<sup>36</sup> Ana na Yesu ber kalo berinavo “Nao, naina naruei. Mia vonganei, kito rojua bogo dolu tenia nei. Vonganei, verenio nana be kiano siveu na veru, ðeli na kiano basaro, mia monoka naio rivar vija naio rivano. Toro na ver maka kiano iobogu na mira tai, bo ka naio riðiliðililar kanio mãno saluvoiano, mia naio rivar veru nene rivar rivulu ka kiano iobogu na mira tai. <sup>37</sup> Kiniou neber naio nei ka kamiau, bior vivitauiano lu nalo re nua namã aberii kiniou, ajumã amalmaluvo abe riano naruei, ban bokar iliano namã Aisea naio berenio, napano berinavo

*‘Amila ka naio jibe ka naio bunu be toro va tai na lakokoroviano na tuboiano.’” Ais 53:12*

<sup>38</sup> Mia naiagagoano nalo ajumã ajidomii ga iliano na iobogu na mira nei, naruei nalo aberinavo “Tubo, kejiio, ninei be kiado iobogu na mira juo nei.”

Mia Yesu mial ka napano maka ajikia dulu kiano iliano nei, ana na naio berinavo “E abe, roberii vite na bare naruei.”

*Yesu ba bolkouo Ketsemani mave ea Suku na Buruolivi Nalo Mataiu 26:36-46; Mak 14:32-42*

<sup>39</sup> Mia Yesu nalo ajuvan vio nei mave, mia jibe ka napano naio jomã milaio, naio miel bavin bokar Suku na Buruolivi Nalo, naio naliko kiano naiagagoano nalo. <sup>40</sup> Mia bogo napano aba aboru ea vio napano Yesu jo ban eaio, amijilimebi eaio, naruei naio ber kalo berinavo “Kamiau monoka kubolkouo tulaka ka mia jukuano nalo ala re kamiau kuvijoru.” <sup>41</sup> Naio ber jibe na kalo, bisi ana na naio juvanlo, ba lie denlo telisu ga, naruei minie ka sudu jaano ana bolkouo ban Atua.

<sup>42</sup> Naio bolkouo jibe nei, berenio “Aiou Teta o-o, ver jau komijikia kala mia rivu ga, jau kodular baja na jogvaiano nei kanaku, ka nomunu re. Mia jau kala re kanaku sidomiano, mia kala ga kiamo.” <sup>43</sup> Ana ka bogo nei Yesu mijog temiano toru ea naio, naruei amial nailiano tai jaluvo ea vio mave binimei yetano, binimei miija Yesu ka naio ve ðirinio sikili bereio. <sup>44</sup> Mia Yesu jo mijog bova toru, jiniomo de sano titi, mia bolkouo jikili lie vo banbano-o mia sano minonoano nalo aju abadigdig jibe ka burukija bavatove ea borotano.

<sup>45</sup> Mia bogo na naio bolkouo bisi, ana na jumolu bereio, ban bereio ea naiagagoano nalo, mia mial tinieiano na monmeliano muelo rui, aju amonmelio ga. <sup>46</sup> Naruei mila bovonlo, berinavo “Ai, jumãbe ana na kamiau kumitu kumonmelio? Bo kanio kuvitumolu kuvila tibe ka na kiniou naber ka kamiau rui. Monoka kubolkouo ka mia juku-jukuano nalo amei re ka ala kuvijoru.”

*Jutas nalo abinimej abokar Yesu Mataiu 26:47-56; Mak 14:43-50; Jone 18:3-11*

<sup>47</sup> Mia bogo na Yesu jomã mil banlo kia ga vo, amial burumãara taara na tomu nalo amiyoyotuba kalo, amial ka napano toro tai

jukamu kalo abinimei vaataro, nina naio napano beamu, naio be nalo tai, be Jutas. Ana na Jutas binimei vaataro ka Yesu, bokario ana miomiom babibiniono. <sup>48</sup> Mia Yesu mil jukamu banio, berinavo “Jutas, ka vai na koniom kukulnioku jibe na mia naio bo ga, mia ka vaio ana jau kojidom kovulvulu ka kiniou Kulorinio Kenerinio ea m̃arabo na jibe na?”

<sup>49</sup> Mia bogo na nalo na Yesu kiano napano ajikil aju vaataro ka naio abitilubar venia nei Jutas nalo ajidom alaio, abika den Yesu, aberinavo “? Tubo, juñabe, mia kito retelo ka kiado iobogu na mira?”

<sup>50</sup> Mia Yesu naio maka riverdoḡelo vo mia naiagagoano nalo tai naio jumolu, burular kiano iobogu na mira, miven ea nalo tai, napano naio be toro tai na parinio toro lu kanano, mia naio jetitire ea ga meriniano ana jelar tiliniene vameruo. <sup>51</sup> Mia Yesu mil banio, berinavo “!Ee, to to to! Kito rola re bunu tibe na kalo.” Ana na naio mijiou jokol jeleig burutiliniene toro nei, mia mila vatitigio bereio bo. <sup>52</sup> Naruei naio bitikar tomu na tortoru na kulo lu nalo naliko tomu na tortoru na menu-mia nalo na Atua kiano yimo, bija navurim̃araboiano na kulo Ju nalo kialo, napano abinimei ka naio, naio mil banlo berinavo “?Juñabe ana na kubar iobogu bija kenemiu nia nalo jibe na? ?Peli kumitu kumisidom kuberiam̃a kiniou nebe toro na ḡirinio jikili ka m̃a bina ḡeli nam̃a muemue toro? <sup>53</sup> Nanua, legiano telabo ga, kiniou nojo bija kamiu ea Yimo Lu banbano-o, mia bior vaio ana maka kumei vaataro ka kiniou ka kuvokar kiniou ea bogo nalo na ruei? Mia nemial jibe ka kamiu kube tomu na melijokouo, napano kubinimei bija moroano dolu nalo na melijokouo, a vonganei be kenemiu aura memedu.”

Mo abinimei abokar Yesu, aburio bano.

*Pitere naio barbonbonua Yesu Mataiu 26:57-58,69-75; Mak 14:53-54,66-72; Jone 18:12-18,25-27*

<sup>54</sup> Bogo na abokar Yesu, aburio ban bereio naliko, abano aba jouro ea burusio na parinio toro lu kanano. Mia Pitere bunu jom̃a jakisosor vavanlo ga ka bogo nei, naio maka riva vaataro keanlo. <sup>55</sup> Mia bogo na abinimei jouro ea burusio nei, tealo aba ajovokar sebi bilvili ka atuḡalo eaio, mia Pitere bunu ba jotano naliko. <sup>56</sup> Naruei aju ana jegliiano na sebi mereralii Pitere mirano, ana na niatira tai nam̃a mim̃au napano jo bijalo, naio bitilubarario, ana berenio “!Ai, kamiu kuvialio! Kema na, naio bunu be nalo tai nam̃a bogo nonovio ajakisosor tete na.”

<sup>57</sup> Mia Pitere barbonbonua, berinavo “!Ee maka! Kuvivinieku!, kiniou neber vatitig kaso, maka nejikia kema na!”

<sup>58</sup> Karina maka vesiou ga, nalo tai mial Pitere, bitilubarario, ber “Ai, jau bunu, kobe nalo tai na.”

Mia Pitere berdoḡe berinavo “Ai kema, abe makanio.”

<sup>59</sup> Mo aju jibe na bano-o, na aura takurano barlaka bereio, dolu binimei berial bereio, ber m̃elea banlo, berinavo “Kiniou neber vatitig ka kamiu, kema na, naio naliko tete re Kalele na jukamu ruei. !Kuvial, naio bunu be toro Kalele memedu ga ruei!”

<sup>60</sup> Mia Pitere berdoḡe mila sibi bereio berinavo “Kema, abe kiniou maka nejikia tena m̃a kojom̃a koberenio na koig.”

Ana monloglog bogo nam̃a Pitere jom̃a ber iliano nei kia ga vo, tu jokokoreko.

<sup>61</sup> Mia bogo na tu jokokoreko, ana Tubo ḡilig parinio binimei, bitikar Pitere, naio bitii kilkil eaio. Naruei Pitere jidomial bereio Tubo kiano iliano nanua berial kanio nua ruei, napano berenio berinavo “Riano kiniou neber kaso, ka bogiano na legiano nene ga, bogo na tu tokokoreko re vo, mia jau kavarbonbonua

kiniou ve varolu ruei, kover jau maka kejikia kiniou.” <sup>62</sup> Mia Pitere naio mijog kirivova toru laka, naio batavio, jegi-i o-o mia jegi.

*Parinio toru lu kiano tomu nalo amila kikii Yesu*

*Mataiu 26:67-68; Mak 14:53-65; Jone 18:19-24*

<sup>63</sup> Mo nalo napano ajumña abokakar Yesu ea bogo na, amila kikii naio, a amil vulevulei eaio, ajukukikio, <sup>64</sup> ban amiorko mirano ka mia naio rijikia re rial vite, mia bogo namña ajumña amijuba biliviligio, amiyotel eaio abika denio aberinavo “Ei, aber jau kobe naverialiano tai, bo ga, jau kabagbag von ka kenia na jomña mijubaso vonga na.” <sup>65</sup> Mia amila jibe na ka banbano-o, amil niegeniege toru laka.

*Aburu Yesu ban ea komeli na toru na tomu na tortoru na kulo Ju nalo kialo*

<sup>66</sup> Aju jibe na banbano-o mērenio bavin garuei, ana na navurimāra-boiano na kulo Ju nalo, jibe ka kulo lu na tortoru nalo bija naverloglogiano na tuboiano nalo, abinimei vio takurano ea kialo komeli na toru neibano. Bogo na abinimei vio takurano bisi, ana na aburu Yesu ba jikili ju jukamu ea miralo. <sup>67</sup> Naruei amil banio abika denio aberinavo “Verenio jau kobe Naverikariano be riano, namña kulo Ju nalo ajumña amial aber mia monoka rimei, mo, numisidom ka jau koverial ka kumemi vonganei.”

Mia Yesu berdoḡe banlo, berinavo “Kiniou nemijikia neverial ka kami, mia ver neverenio, mia ḡeli kuvisaaro re ka kumonmoneaio. <sup>68</sup> Mia kiniou nejidom ka nevika vite tai den kami bunu, mia ver nevikanio, ḡeli mia kami kuverdoḡe kulu re ga na. <sup>69</sup> Mia be titai nana kiniou najaaro ka nejidom never ka kami naio ber jibe nei, ber ‘Jikar vonganei, mia

tibe ka ga napano Iliano Lu bere-nio ruei, napano berinavo mia Kulo-rinio Kenerinio riva totano mave tivelinio vameruo ka Atua na mo-roano toru.’”

<sup>70</sup> Mia bogo na amijog iliano nei, abika denio, aberinavo “!Tomnei, venia na jibe na! ?Jau kojo kober jau naruei kobe Atua kenerinio memedu?”

Ana na Yesu berdoḡelo bere “Verver kuvisidom kuver tibe na, mia tibe na ga naruei.”

<sup>71</sup> Mia bogo na amial Yesu jomña mijamo ka ber naio be Atua kenerinio, tiniel kirimimi, aber jibe nei aber “Kema na mil jibe na, kito ro-bitilubar vatitig ka burumñara tokoriano joa naio ruei. Mia kito resiravo re bunu toro dolu ka rila veriiano na naio bereio, naio kiano iliano ga jibure naio bereio ruei.”

## 23

*Aburu Yesu ba ban ea Pailat, napano be parinio toro na vio Romo namña jo bitikar Israel*

*Mataiu 27:1-2,11-14; Mak 15:1-5; Jone 18:28-38*

<sup>1</sup> Ana na nalo na komeli na kulo Ju nalo amijog Yesu kiano iliano bisi, ana ajumormolu, amioburovuronlo ba vio takurano ea burumñara taara tai, naruei aburu Yesu ba jumolu jukamu ea Pailat mirano ea kiano vio na tibureiano. <sup>2</sup> Naruei amila veriiano ban Pailat, aber bulavulag vite telabo banio, tivelinio ka Yesu. Nalo aberenio aberinavo “Kema na, jomña mila bulag tomu na kenememi venuo kialo jidomiano, naio jomña berburelo ka avulu re bunu takis van kiamo boru parinio tubo Sisa na Romo, a naio jomña miaia naio toru ber naio bar sio na Naverikariano, jibe ka naio be kenememi parinio tubo na toru. Vite nalo na naruei, kumemi numialio ka mire-memi memedu.”

<sup>3</sup> Telikiti na Pailat mijog kialo veriiano nei, naruei naio bika den Yesu, berinavo “Mo, jau kija kover kanamo vonio. ?Be riano ka jau

kobe parinio tubo ka kulo Ju nalo ðeli na makanio?"

Ana Yesu berdoþe, berinavo "Naina naruei jau kojomã koberver kiana."

<sup>4</sup> Mia bogo na Pailat mijog venia napano Yesu berenio, naio maka rial ka naio mila tena bova tai, ana ber ka tomu nalo kialo tomu na tortoru nalo, berinavo "Kema na, ea kanaku vitiiano, naio memedu ga, naio maka rila kor leleio tuboiano tai."

<sup>5</sup> Mia nalo maka asidom ka ajog Pailat kiano iliano, mia amila jibe ka tena soþeli ga tai, ajikili lie vo kanio, aberinavo "Ðeli ga, tete na naio kirivova ga. Naio jomã julu vilivilig kenememi tomu nalo kialo jidomiano, a jomã mioliolu banlo ea vio nonovio, jikar jo Kalele, binimeï midu nonovio Yutea, binimeï bokar bulukomeli na toru nei ruei."

<sup>6</sup> Mia bogo namã Pailat mijog aber Yesu jikar kiano imãuano yako Kalele, ana bikanio berinavo naio be tete re Kalele memedu ðeli na makanio. <sup>7</sup> Pailat bikanio jibe na bior naio maka mã to riadu ka tanobuku na Kalele, mia parinio tubo dolu nei Erot naio be toro na toru ka vio na, mila na ka bogo napano aberial ka Pailat ka Yesu naio be toro Kalele, naio berial ber mia monoka avuru naio riva van parinio tubo Erot ka naio rivitii veve vonio bior kiano tanobuku memedu. Ana ka bogo na, Erot bunu binimeï miadu ka Yerusalemo ruei, tenene na aburu Yesu ba ban naio.

<sup>8</sup> Mia bogo na parinio tubo Erot bitilubar ka Yesu nene, naio jaaro, bior naio mijog sano tukunu mugaruei, mila na kirisiou ruei naio jidom rialio kija, mila na naio jidom ka vonganei naruei na, ðeli mia rial Yesu rila kiano kijokijo tai rivanio.

<sup>9</sup> Naruei naio milavon ka tukunu vija Yesu, bivivika vite telabo denio, mia Yesu maka riverþe titai vanio, naio juburu ga jibe na ju, maka lele ril.

<sup>10</sup> Naruei ka bogo na, kulo lu na tortoru nalo bija naverloglogiano

na tuboiano, nalo bunu ajikil aju vaataro ajumã amil kilkil ajaamã ka mã aber bulavulag vite nalo na tivelinio ka Yesu. <sup>11</sup> Mia vite nalo nei naruei mila Erot naliko kiano tomu na mira nalo maka asaaro ka Yesu, ana amila kikio naio, amiyotel searia naio. Karina, amiya tubo nalo mãlo kulumãarauo nalo tai eaio, ka amijikia avital eaio, naruei amila banbano-o, karina Erot miila naio ban bere ea Pailat bitii bereio.

<sup>12</sup> Beamu ka vite nalo na, tomu juo na Pailat naljuo Erot abe bilbilu va kalo, mia monloglog bogo na aminãu bju jibe nei bereio ka tibureiano na Yesu, burulo abinimeï abe bilbilu bo bereio.

*Yesu jumolu jukamu bereio ea Pailat mirano*

*Mataiu 27:15-26; Mak 15:6-15; Jone 18:39-19:16*

<sup>13</sup> Mia abinimeï bere ea Pailat kiano vio, ana naio bio tomu na tortoru na kulo lu nalo bija tubo nalo bija tomu nalo ka amei aialio.

<sup>14</sup> Telikiti na nalo abinimeï joomo, naio mil banlo, berinavo "Nanua na, kamiu na kuburu toro na binimeï jikili jua miraku, kuberial ka naio jomã bilivilig niegeniege m̃lea kenemiu tomu nalo kialo jidomiano nalo. Mia kiniou nebika vite nalo denio, jibe ka namã kumijogio, mia maka neial ka naio mila vite nalo namã kumituã kuberenio na, nemial jibe ka naio memedu ga.

<sup>15</sup> Naruei nemiila naio ba mial Erot ka rivitii, mia Erot maka rialeal titaio, naruei miila binimeï ea kiniou bereio. Mo, kiaku tibureiano jibe nei, ber naio maka rila titai napano naio monoka riãaro riviorio. <sup>16</sup> Mia kiniou nala tibe na ga van naio: mia nala avitiv naio, karina mo atuvan naio rivano, rijikia rivan bereio ea kiano vio."

<sup>17</sup> Ana na bior bogo na be bogo na kulo Ju nalo kialo jokoluolu na toru, ajumã ajidom aber jibe ka namã Pailat jomã milala vururu, mia monoka tuvanlar Ju nalo tai namã amiadikakario jua kiano tetavokoiano. <sup>18-19</sup> Ana ka

bogo na, nalo tai namã Pailat miadikario, naio kema nei Barabas, napano nanua beamu naio buru tomu dolu nalo amila baravo tai yako Yerusalemo, napano amuebinvin kulo Romo kialo tomu na mira nalo amãrmãro, mila na Pailat miadikario joa kiano tetavokoiano.

Mia bogo na amial ka Pailat jidom ka tuvan Yesu rivan bereio tibe na ga, amiaga m̃erere banio, aberinavo “Ei, maka, makanio! Kumemi numisidom kesilar Barabas rimei bereio rivan kumemi. Mia toro na, kumemi nuber kaso ka numisidom jau kodular kiano meuliano ga.”

<sup>20</sup> Mia Pailat maka sidom, naio jidom ka Yesu taluvo ga tibe na bereio, naruei naio milavon ka ril, ber banlo. <sup>21</sup> Mia abuku deven ga kiano iliano, abiovio kanio, aberinavo “!Kotukukar, kotukukar toa m̃akolkolo!”

<sup>22</sup> Naruei Pailat mil banlo varolu nene, berinavo “?Ana kar venia, naio mila venia napano kirivova? Kiniou nemial vite nonovio ruei, maka neleal vovaiano tai toa nai na memedu ka mia naio rimãro riviorio. Mia kiniou nala avitivio ga, karina mia notuvan naio riva vonuo bereio.”

<sup>23</sup> Mia nalo ajuve Pailat kiano iliano bereio, amiaga jouo lie jibe na bereio banio, ajaam̃i lie, aber monoka Yesu rivan ea m̃akolkolo, mia nalo amila jibe na banbano-o na ajovulu naio. <sup>24</sup> Karina Pailat mila kiano tibureiano, berial ber naio mijamo ka kialo vikaniano. <sup>25</sup> Naio napano m̃ã joa nalakoiano bior bajago namã mila mira a bajago namã mue toro, Pailat mijamo ka naio batavio bereio ba banlo jibe ka namã abikanio. Mia tivelinio ka Yesu, naio berial ka mia kiano tomu na mira nalo ala van naio tibe ka ga na kulo Ju nalo ajidomio.

*Aburu Yesu ban ea vio napano Kalvari*

*Mataiu 27:32-44; Mak 15:21-32; Jone 19:17-27*

<sup>26</sup> Ana na aburu Yesu, amiel ban ea vio na atukukakar naio toa m̃akolkolo. Bogo na ajumã abano, amial toro na ba yeturu karina jo miel binimei vonuo bereio, nina be Saimon na nanua beamu be toro na vio Saireni, naruei ajutua naio ka rudu Yesu kiano m̃akolkolo, mia amidu joa burusovonano, miel jakisor Yesu bano.

<sup>27</sup> Amiel jibe na bano, a ka bogo na vio bujo ka kulo dolu nalo bunu ajumã ajakisor Yesu, na nalo telabo be tire nalo, napano ajumã amiel bija burumãara tegiano bija burumãara tinieiano. <sup>28</sup> Mia Yesu jomã miagago ka kialo iliano na jogvaiano nei, karina naio barpilig parinio, jiraragidilo, mil banlo, berinavo “Tire re Yerusalemo nalo-o, kuvitig re bunu kiniou tibe na. Ver kuvisidom kuvitig, mia kuvitig kamiu ga, a kenerimiu nalo bunu. <sup>29</sup> Kiniou neber jibe na ka kamiu, bior bogo na jikili tai mia rimei, ana na mia nalo na mia atua naio mia aver tibe nei averinavo ‘!Ver tire nalo ve re kenerilo ga! Mia rivu lie vo ver avar re tete ka mia m̃ã rimunu yu ealo, bior bogo nei mia sikili laka van kito rivija kanado solbouo nalo.’

<sup>30</sup> “Ana mia bogo na rimei rivova laka vanlo, rivan rivan mia atumolu ateg van burusuku nalo vija suku nalo, aver ‘Aiou, kuvitibirbilko kumemi, kuvituba kitkit kumemi, kuvitivinko kumemi.’ <sup>31</sup> Kamiu monoka kuvitikar rivu, bior vonganei buruiesi memesai kia ga vo ajumã amila kilkil ea kiniou ruei, mia iorou ka bogo na buruiesi rimei rijel bisi, mia amijikia ala rivova laka lie vo van kamiu.”

*Ajukukar Yesu ea m̃akolkolo*

<sup>32</sup> Ana na ka bogo nei, ajumã aburukakar tomu juo namã amila kokorovio tuboiano, naruei aburulo naliko Yesu, ka auebinvinlo vijaio. <sup>33</sup> Naruei amiel banbano-o, abokar kanano vio, vio tai namã abio ka Bordada na Kulorinio. Ana amidu Yesu ajuku kakario joa m̃akolkolo,

abitiri lario jumolu ju iviso, mia ajuku kakario tomu na bova juo neibano, abitiri bulaglo tinene jua Yesu jumano meruo, a tinene jua jumano mali.

<sup>34</sup> Jibe na naruei ana na Yesu jomna jaklele ea mñakolkolo, naruei naio mil ban Atua, berinavo "Aiou Teta, jau koviekokoa nalo nei. Nalo maka avitilubar vatitig vite nei ma ajumna amilaio nei."

Ana na iorou kanio, ana tomu na mira nalo aju jibe na ajumna amila jibe ka namna amiere mñabujo, ka aleal ka kei kalo na mia rivar Yesu mmano kulumnarauo tai, a kei rivar tai.

#### *Amiyotel va ea Yesu*

<sup>35</sup> Mia kulo dolu nalo ajikil aju ga koalabo, aju ga ma abitivitiio, mia kialo natukamuano nalo ajumna amil bova ka Yesu, ajumna amiyotel va eaio, aberenio "Kumialio kema na! Tomu nalo ajumna aber naio milarur tomu dolu nalo miroano ruei, mia vonganei jumabe naruei? Aber naio be Atua kiano Naverikariano, peli na naio be toro novo tai napano Atua miilaio binimei. Aver tibe na peli bo ka rilurur kija naio bereio!"

<sup>36</sup> Mia na mira nalo ajumna amil niegeniege naio bunu, abinime amiyuku mñarjumelmñelu na mijea ban naio ka rimunuio, <sup>37</sup> aberinavo "A verenio jau kobe parinio tubo ka kulo Ju riano, javukia namna aju aberenio, bo ka jau kalarurso vonganei."

<sup>38</sup> Mia ka bogo na abivitauia tiniemaiano tai, ajuku jo mave ea mñakolkolo mave ka Yesu parinio, na naio berinavo "Kulo Ju kialo Parinio Tubo."

#### *Tomu juo namna amila kokorov tuboiano amil ban Yesu*

<sup>39</sup> Ana na ka bogo nei, naljuo napano ajaklele ea mñakolkolo bija Yesu amil banio na. Tinene mil kirivova banio, javukia nalo dolu nalo, naio berinavo "?Mia jau kobe Naverikariano, peli na makanio? Bo jau kala soþeli, kalarur kito!"

<sup>40</sup> Mia tinene mil banio berbureio, ber "Kaleliki, vonganei be kiado bogo na maariano naruei, mia jau maka kotovon Atua vo. Kito tolu nei tibureiano na amije ban kito be takurano ga, <sup>41</sup> mia tivelinio ka kito juo, memedu ga ka torokoriano namna romilaio, mia tivelinio ka naio, naio maka rila titai leleio."

<sup>42</sup> Ana na mil ban Yesu, bika denio, berinavo "Yesu, bogo na ver komei kove barago, komei bereio, aiou kovijuku rivu, jau tiniemo ribobogia re kiniou."

<sup>43</sup> Ana na Yesu berdoþe banio, berinavo "Kiniou neberkar banso, neber ea legiano na banei ga, mia jau koto vija kiniou ea kiado vio vuiano."

*Yesu mñaro*  
*Mataiu 27:45-56; Mak 15:33-41;*  
*Jone 19:28-30*

<sup>44</sup> Mia vonganei, rime rivokar leri, ana tikar ea bogo na mñerenio maka bunu merera, mila na melijokouo jovuko reraio vio nonovio garuei, naio jo jibe na bano-o bokar mñerenio tolu niogoravo. <sup>45</sup> Ana iorou kanio, ana jagidago napano ajelanio jo joomo ea Atua Kunuano Lu, namna joko vio lu na be lu laka, naio buruþe mielibievi niati juo. <sup>46</sup> Mia ea bogo na, Yesu miaga maariano, ber "Teta, kiniou nomidu niunuku joa jumano." Mia naio miaga jibe na bisi, ana burumñaria kanano jegi naruei, naio mñaro.

<sup>47</sup> Ana bogo na toro na toru na mira naio mial vite nei, miolua Atua siano, berinavo "Riano ga na, kema na naio be toro tai na memedu ga!"

<sup>48</sup> Mia tiniobi na toru napano abinimeio vio takurano ea vio nei, nalo bunu amial vite nalo nei napano ma amila ka Yesu, tiniel miia naio toru laka na. Avona bisi, ana na abanvan bereio, amiel bija burumñara jogviano, abano bere ea kialo vonuo nalo.

<sup>49</sup> Mia taara dolu na tomu nalo ajua vio nei ka bogo nene bunu, ajikili aju koalabo kija ga, ajumna

abitivitii vite nalo. Nina be Yesu kiano bilbilu nalo, naliko tire nalo nanua abinimei ea vio Kalele, ajunã ajakilili Yesu banbano-o bokar vio nei, mia nalo bunu amial Yesu kiano m̃ariano.

*Yoseve jivin Yesu*

*Mataiu 27:57-61; Mak 15:42-47; Jone 19:38-42*

<sup>50</sup> Naruei toro tai na komeli na kulo Ju nalo kialo na Arimatea, mia siano be Yoseve. Naio be toro na toru tai na komeli na toru na vio Yerusalemo, be toro na memedu tai napano kiano bajago kirinovo laka.

<sup>51</sup> Naio tai napano jidom toru ka Atua kiano Navenatuboiano rimei, mia beamu ka napano aber ka mia ala vaio ka Yesu, naio takurano kiano jidomiano maka tibe na, naio milavon ka riverburelo ka ala re rivova kanio.

<sup>52</sup> Mia bogo na mijogial ka aber Yesu m̃aro ruei, naio ba jikil jukamu ea Pailat mirano, naio bika denio ka ver mijikia rudu Yesu mokotenano. <sup>53</sup> Ana na Pailat mijamo ka banio, naruei naio ba midular Yesu mokotenano ea m̃akolkolo, naio mijuvuluko ka kulum̃arauo, ana midu ba midu vatitig joa buluvae vou tai napano aje vonga, napano maka adu toro tai rimoneaio vo.

<sup>54</sup> Naruei legiano na Yesu kiano m̃ariano, naio be Vraire, jibe ka bogo na amiomon vite rorea Legiano Lu. Mia vonganei m̃erenio jo mialolo batove, vaataro ka Legiano Lu tikario, nina monloglog bogo na m̃erenio javin. <sup>55</sup> Naruei tire nalo nanua m̃a ajakisor Yesu, jikar Kalele binimei boru ea kiano m̃akolkolo, mia vonganei bogo na amidu mokotenano binimei, ajakisorio bereio. Ajakisor binimei boru ea pakeltavo naruei, amial vio na amidu mokotenano jo mon joomo ea buluvae.

<sup>56</sup> Nalo amialio avona bisi, ana aban bere vonuo ka ala vatitig sano bonotanunu vija pomat. Nalo aboru vonuo ruei, avona bisi ana Legiano

Lu jikar naruei, mila na maka bunu ve bogo tai ka avan bereio ka ayovovua Yesu niabene. Mila na nalo aju ga vonuo jibe na, jibe ka nam̃a tuboiano berenio ber monoka nalo ala ea Legiano Lu.

## 24

*Buluvae kurano ga jo*

*Mataiu 28:1-10; Mak 16:1-8; Jone 20:1-10*

<sup>1</sup> Legiano Lu barlaka ban kario, ana na viomijeni kanio, naio be legiano na be moti na sude dolu. Mia viomijeni mermeravo kia ga vo, ana na tire nalo nei tealo abar bonotanunu bija pomat nalo na amim̃auka batitiglo ruei, amiel aban bereio ea buluvae ka ayovovua vatitig Yesu niabeno. <sup>2</sup> Naruei bogo na abinimei aboru ea vio nene, amial ka burum̃ara puruveru na ajubonko kar ka buluvae, ajubon lario ruei, <sup>3</sup> ana na nalo aba joomo, mia amiilo ka napano Yesu mokotenano bakovio tai ruei.

<sup>4</sup> Mia ajikili aju ajidomii dede toru laka-o, mia amiilo ka vaarakurano ga tom juo ajikili aju bijalo. Tom juo nei, m̃alo kulum̃arauo miuvu mia miuvu batitigio bo. <sup>5</sup> Mila na tire nalo nei amerou ka avitikarlo, naruei aminie ka sudu jaalo, ajak banini tano kamu kalo. Ana naljuo amil banlo, aberinavo "Oi, tire nalo, kamiu maka kuvijikia kuvial toro na meul ea vio na m̃ariano. <sup>6</sup> Naio maka toa vio na, Atua bitirilar naio ruei. Kamiu kuvisidomii von bereio, venia naio berial ka kamiu ka bogo na naio jo kamliko nua yako Kalele, maka kumei nei vo. <sup>7</sup> Naio ber jibe nei berinavo, jibe ka naio be Kulorinio Kenerinio, mia monoka ajamo ka naio rivan ea tomu na bova jum̃alo, ka mia atukukakar naio toa m̃akolkolo, mia ka bogoti ve tolu nene, mia naio tumolu rimeul bereio. Naina naruei be iliano nanua m̃a naio berenio ka kamiu ruei."

<sup>8</sup> Mia tire nalo amijog ninei, mila na tiniel maio ka bereio Yesu kiano verikariano, nanua naio ber batitigio bo banlo berinavo mia naio mijikia rimeul bereio. <sup>9</sup> Tiniel maio ka bereio, ana na ajuvan vio nei, aban bere amial atevi duelimo ba tai bija nalo dolu nalo. Mia vite nalo namia amial ea buluvae, aberio meravo vatitig bo banlo, <sup>10-11</sup> mia nalo nei maka amoneaio, amial jibe ka tire nalo nei ajumã ajukunu vovu ga.

Mia tire nalo na amial vite nalo nei, sialo ajibe nei, Mere re Maktala, Joana, Mere na Yemesi kenieno, bija tire nalo dolu bereio.

#### *Pitere jikiti ba bitii veve buluvae*

<sup>12</sup> Mia Pitere, naio takurano jidom rileal ka tenei naio be riano ðeli na makanio, naruei naio jumolu, jikiti bano-o jidom rial vonio vajoomo na buluvae nene. Naio binimej boru ea vio nei, monkorkor ba joomo, mia mial Yesu mãano kulumãarauo nalo aju keano ga, mia mokotenano ba kovio tai ruei. Ana na naio batavio bereio miel ba vonuo, naio jo jidomii toru laka ber vite nei naio jumãbe nei, ðeli na nioti nene venia.

#### *Naiagagoano juo amiel abatove Emeas abiviuo Yesu*

<sup>13</sup> Ana iorou ka ninei bereio, ka legiano nene ga, tom juo kalo ajuvan vio Yerusalemo ka avan ea komeli na telisu tai, siano Emeas. Marabo na ban ea vio na maka ve tebievi laka, naio jibe ka sadu duelimo titai, <sup>14</sup> ana bogo namã amiel abano, ajukunu toru ka vite nalo na abarlaka ruei.

<sup>15</sup> Ajukunu abano-o, ana na Yesu miel binimej iorou kalo, jo miel nalikolo abano. <sup>16</sup> Amial naio jomã miel bijalo, amialio jibe ka valauo tai ga, bior miralo maka ajikia avitilubar naio. <sup>17</sup> Ana na Yesu bika denlo, berinavo “?Kube juo kumitumã kumiel jibe na, kumitukunu ka venia?” Mia bogo na bika jibe na, amebi ajikili aju ga jibe na, miralo bova kanio.

<sup>18</sup> Naruei nalo tinene, siano Kleopas, berdoðe ban Yesu, berinavo “Tomu nalo telabo na vio reraio ajumã amiadu ka Yerusalemo ka bogo na, mia ðeli jau takurano maka kojog burumãara vite nalo na amalmaluvo vonganei yako, a?”

<sup>19</sup> Ana Yesu bika ber “?Ana vite venia nalo namã jau kojomã koberenio na?”

Nalo aberdoðe, aberinavo “Tenei be tivelinio na tete re Nasarete nei, Yesu. Naio binimej, be naverialiano tai, naio mimãauka kijokijo telabo ea burumãara moroano na kiano, mioliolu berloglog tomu nalo bo laka, mila ajidom naio toru laka, ba bokar bunu ka namã Atua Soði berial ber naio jaaro toru laka ka naio. <sup>20</sup> Mia karina, nanua viomijeni niovo ga, kulo lu na tortoru bija kiado natukamuano nalo, tiniel jer naio, aburu naio jel ea burumãara komeli nalo banbano-o na ajibure naio aber monoka mia rimãaro, ana aban ajukakar naio joa mãakolkolo ana mãaro. <sup>21</sup> Nanua beamu, kenememi jidomiano joa naio ka mia naio naruei mia rilurur kito kulo Israel, ka mia naio rivuru bulag kito den kulo Romo nalo kialo moroano, mia vonganei vite nonovio ba bova bereio ruei. Naio buro den kumemi banei be kiano bogoti tolu nei naruei.

<sup>22</sup> “Mia be vite tai bereio mila kumemi numiilo mẽle kanio, mila numitumã numisidom bijovijonio ka kia nei vo. Banei ga napano tu tokokoreko ve vaarakurano kia ga vo, kenememi tire nalo tealo ajevijo aban bereio ea buluvae ea vio na amidu Yesu mokotenano mon eaio, aban ka ayovovuaio vatitig rivu. <sup>23</sup> Mia bogo na aboru ea vio nene, amial ka mokotenano maka bunu toa vio na jo mon eaio, naruei ajikiti abinimej bere ea kumemi, mia maka nina ga, mia aberialio ka amial bunu nailiano naljuo, napano aberial aberinavo Yesu meul bereio ruei. <sup>24</sup> Ana kumemi tealo ajidom aialio vatitig, naruei aban ea buluvae, amialio javukia napano tire

nalo nei aberenio, maka lele aial naio.”

<sup>25</sup> Naina naruei be iliano napano tom juo neibano aberiio ka Yesu, bogo na ajikili ajua m̄arabo. Naruei naio bunu mil ber kalo, berinavo “Tomnei, kamiu kube bulubau nalo ga. Naverialiano nalo aberial batitig bo vite nalo na kirisiou ruei, mia juṁabe maka kumonmoneaio vo? <sup>26</sup> Peli na kamiu kumijikia ruei, napano mia Atua rivitirilar kiano Naverikariano naio ve toro na toru ea yetemeriba nei. Mia kamiu maka kuvitilubar ka Iliano Lu nalo aju aber mia ala Naverikariano rojog rivova, ala bulag naio beamu, karina mia Atua mijikia vitirilar naio, rivokar kiano burum̄ara mermerano.”

<sup>27</sup> Naruei Yesu jo jukunu banlo jibe na naruei, berlogloglo ba lie vo. Naio jikar ea Mosis kiano niosi nalo, binimej bokar Naverialiano nalo kialo niosi nalo, naio joṁa ber bisivisii meravo banlo juṁabe napano iliano moruo nei joṁa jiloglog naio ga, ṗeli na ajum̄a aberii dam̄ariga naio. <sup>28</sup> Naruei abe tolu amiel aban bereio, mia maka vesiou ana abinimej vaataro ka komeli na tom juo nei aban kalo. Mia nalo amial jibe ka Yesu miel ka riel rijaka, <sup>29</sup> mia ajikili kanio ka naio to vijalo beamu vo. Amil banio, aberinavo “Koig vonganei, m̄erenio jo mialolo batove keano, vaataro ka vio rimelijo naruei. Jau komei koto kija vija kumemi beamu, romon ea vio nei ga vo.”

Ana na Yesu ba jo naliko ea kialo vio. <sup>30</sup> Aju bano na monloglog bogo na sinaniano, mo nalo abinimej ajutano vio takurano ea vio na sinaniano. Naruei be bogo na abolkouo ka sinaniano, mia Yesu ga naio jumolu midu salo niajoko, naio bolkouo ban Atua ber siva kanio, naio burekoko-rovio bar janealo. <sup>31</sup> Mia bogo na naio mila jibe na, memedu ka bogo na naruei ana miralo jibe ka betavo, abitilubar ka naina jo naliko na, be Yesu nene na. Ana aju amial naio,

mia bogo bulati ga, mia naio jaluvo ba kovio denlo bereio. <sup>32</sup> Naruei abe juo ajum̄a aberveriio, aberinavo “Ajerei, robe juo garuei maka rovitilubar, mia naio be kiado Tubo nam̄ariga neibano. Mia riano ga, bior bogo nam̄a roju rojukunu bija naio rojakii m̄arabo robinimej, napano naio joṁa ber bisivisii Iliano Lu nalo ban kito, kiano iliano nalo ajese laka, ajibe ka sebi jo bovago joomo ea kiado iviso.”

<sup>33</sup> Mia bogo na amijikia ka amial Yesu mirano ruei, maka bunu amonmelio, mia ajumolu soṗeli, amiel ea burum̄ara miamo aban bereio Yerusalemo ka averialio ka nalo dolu nalo.

Mia nalo aba amaluvo ka duelimo ba tai napano aju abior vio takurano kia ga vo naliko dolu nalo, <sup>34</sup> mia naljuo maka ail vanlo vo, mia nalo aberial kanalo jukamu aberinavo “! Ai, tom juo, abe bogo na ga kubano, titai miyotuba ea vio nei! Iliano napano tire nalo aber beamu, naio be riano ga. Kiado Tubo naio jumolu den nam̄ariano ruei, Pitere nei mialio ka mirano memedu.” <sup>35</sup> Ana na naljuo nei bunu ajusolio kialo iliano, nalo aberii juṁabe ka Yesu miyotuba ka naljuo ea m̄arabo, a ka napano maka avitilubar naio, banbano-o bokar ga bogo napano jan ka joko janealo.

*Yesu maluvo kean kiano naia-gagoano nalo*

*Mataiu 28:16-20; Mak 16:14-18; Jone 20:19-23; Im̄auano 1:6-8*

<sup>36</sup> Mia bogo nam̄a naljuo nei ajum̄a ajukunu banlo ka vite nalo nei kia ga vo, amiilo va ka napano Yesu jikili ju iviso kalo garuei, naio ber kalo berinavo “Tum̄aro rito vija kamiu.”

<sup>37</sup> Yesu binimej ealo jibe na, mila na ajidomii aberinavo naio be sim̄aro tai, mila na amerou toru laka. <sup>38</sup> Mia Yesu bitilubar ka amerou kanio, ana naio bika denlo berinavo “!Ai, ka venia kamiu kuvisidomii m̄lea jibe na? Kenemiu iviso veve juo re bunu! <sup>39</sup> Kuvial

vonio jumãaku vija jaaku, jeleig venia nalo nei jualo! Kam kuvialio, ninei be kiniou ga nei! Kumei kuvitokol veve niabeku torogio nalo nei, bior vite na jibe ka simãaro maka ve buruiu, a maka ve niamoiou tibe ka mokotenaku nei.”<sup>40</sup> Ana naio jomã mil banlo jibe na, naio jiloglog jumãano bija jaano kalo ka ajikia avitii vevelo.

<sup>41</sup> Ana ka bogo na, naiagagoano nalo, kialo jidomiano jomã mimãu toru jibe na, napano ajaaro toru ka amial aberii Yesu, mia ajidom deio kia ga bunu. Ana Yesu mil bereio, bika denlo berinavo “Ei kamiu kuburosebi ruei?”<sup>42</sup> Mia nalo amijege niado menoko ju ruei, ana na amidu niatai ban Yesu,<sup>43</sup> mia naio midu denlo, naruei kamu ka miralo naio jenio.

*Yesu mil maariano ban kiano naiagagoano nalo*

<sup>44</sup> Karina na, Yesu mil banlo, berinavo “Bogo na nanua mãa nojo kitoliko nua, kiniou nojomã neberii iliano miroano ea yati na nonovio na Navivitauiano Lu nalo ban kamiu ruei. Kiniou nobar iliano nalo na ea niosi na Mosis kiano, ea nave-rialiano nalo kialo niosi nalo, a ea niosi na Iouano lu nalo, naruei kiniou neberial ka iliano nalo na naruei, aberii kiniou ga, mia amei ave riano rivesiou re ga na. Tenene na kiniou neber jibe na ka kamiu, mia vonganei naruei kumial vite nonovio nalo na abinimei be riano ruei ea miremiu nalo.”

<sup>45</sup> Naruei Yesu jomã berlogloglo ba lie vo, mila kialo jidomiano nalo ba toru laka bereio joomo ea Vivitauiano Lu nalo nei, naruei vite nalo nonovio binimei meravo bo kalo.<sup>46</sup> Naio ber kalo berinavo “Nina naruei, iliano nalo nei aberii jibe na naruei, ka Naverikariano, mia aãele naio rijalele rivano-o mia riãaro, mia sano bogoti tolu nene, mia naio tumolu den namãariano rimeul bereio.<sup>47</sup> Ana iorou kanio, ea siano ga, mia kiano tomu nalo mia atikar to yako Yerusalemo, mia avan

ea yetemeriba vodolu, avan aioliolu van taara nonovio na tomu nalo, averial vanlo ka monoka aviliglo ka mia amijikia ajev viekokoano ka kialo vovaiano nalo.

<sup>48</sup> “Naruei kamiu napano mãa kumial vite nonovio nalo na ka miremiu, kamiu nene naruei kuva kuverialio van tomu dolu nalo ka vite nalo nene be riano.<sup>49</sup> Imãuano nei, naio be imãuano tai na kirisikili laka, mia kiniou nodu moroano tai toa kamiu ka mia rijai kamiu kuvituvulio. Moroano nei, Teta kiano verikariano naio jo, ka mia naio riila lario sel mave tiniabene rimei rivujo loa ea kamiu, tenene na kiniou nejidom never ka kamiu, ka kamiu kuviel dedade re den komeli nei vo, mia monoka kuvitu rorea ea vio nei beamu vo-oa, ka kuvokario.”

*Atua buru Yesu ban bere mave ea tiniabene*

*Mak 16:19-20; Imãuano 1:9-11*

<sup>50</sup> Bogo na ka mia Yesu jidom ka tuvanlo, jukamu kalo abatove ea komeli sesa na Betani. Abinimei abokar vio nene, ajumã jibe na, banbano-o na Yesu jumolu jian jumãano loalo, milivu kalo.<sup>51</sup> Naio jomã mioa vatitiglo banbano-o, jo jikar juvanlo bavin mave tiniabene bereio.<sup>52</sup> Naruei naiagagoano nalo amial kialo Tubo naio buro denlo bereio, ana na nalo aminie ka sudu jaalo abatove amilotu ka naio, karina aban bere Yerusalemo, napano ajaaro mia ajaaro.<sup>53</sup> Mia ajua vio na banbano-o ana damãariga ea bogo nalo na volkouano nalo ajumã aban ea Atua Kunuano Lu amiaiaio naio.

Naina naruei be Lilianiano Vou na Yesu Kristo napano kiniou Luka nebivitaia, maaro ea vio na.

**Yesu Kristo Kiano  
Ioluanu Vou  
Napano  
JONE  
Bivitauiaio  
Verialiano Moti**

*Tukunu bulati na niosi nei*

Niosi nei, Yesu Kristo Kiano Ioluanu Vou napano Jone jirio, naio berii Yesu, ber naio be Atua kanano Iliano napano binime'i be kulorinio, naruei jo bija kito. Ea niosi nei, Jone berinavo naio bivitauia kiano iliano nalo, ka tomu nalo napano avulukuio ajikia amonea ka Yesu naio be toro napano Atua berkario ka riila naio remei ka rilarur tomu nalo, a be Atua Kenerinio. Mia naio bivitauia jibena, ka ajikia ajev meuliano ea Yesu siano, bior napano amonea naio (20, 31).

Vite moti napano Jone berenio, naio ber ka Yesu, naio be iliano nei napano beamu laka, naio jo bija Atua. A iorou, naio berii vremesiano nalo napano Yesu milαιο, napano amijika aija kito, ka kito rovitlubar ka Yesu be Atua Kenerinio, napano Atua berkario ka riila naio rimei ka rilarur kito. A iorou ka vremesiano nalo nei terakurano napano Yesu milαιο, Jone berii nioniag nalo nene. Naio berial napano tomu tealu amonea Yesu a ajakisor naio, mia tomu tealu maka asidom amonea naio. Ea mirano duelimo ba tolu [13] ba bokar mirano duelimo ba aluo [17], Jone berii vite nalo napano amaluvo ea bogiano nei napano uolu nalo abinime'i ka avokar Yesu. Ea bogiano na barlaka na, Yesu jo mil ban kiano tomu nalo, ka ala vatitig vite nalo tu napano mia rimei rivokarlo, a ril ka ridular kialo jidomiano beamu, ana iorou kiano uolu nalo amei avokar naio.

Ea togio maaro na niosi nei, Jone berii napano uolu nalo nei abinime'i abokar Yesu, aburu naio aban ea voroniano, a iorou aba ajukukar

naio ea makolkolo, naruei naio m̃aro, a iorou, naio meul bereio a kanano tomu nalo amial naio. Ea niosi nei, Jone berii meuliano na napano jo maka jikia ribisi, napano toro mijikia rivokar ga ea Yesu Kristo. Meuliano nene jikar vonigane'i, a binime'i ea tomu nalo ga napano amonea Yesu ka naio ga be m̃arabo, a be burupati na iliriano, a be burupati na meuliano.

Mia vite burtomoluo napano kito romial va miroano ea niosi nei, naio be bajago napano bogo na Yesu jo berloglog tomu nalo, naio jo berii vite nalo napano toro jo miñauka bogoti nonovio ea kiano meuliano. Naio mil ea bajago na jibene'i bija jamerijiano nalo, ka rila kijokijo van kiano tomu nalo napano amononea naio, ka verial bajago na meuliano na moneano. Naina vite nalo jibeka uei, a joko, a miamoiano, a toro na vitikariano na nunu bija kiano nunu nalo, a telikrip nei bija marati.

*Torogio nalo na niosi nei*

Iliano moti 1:1-18

Jone Baruei bija Yesu kiano tomu nalo na beamu 1:19-51

Yesu miñauka kiano im̃auano 2:1—12:50

Yesu kiano bogoti maariano yako Yerusalemo 13:1—19:42

Yesu meul bereio bija kiano tomu nalo amial naio 20:1-31

Yesu miyotuba kean kiano tomu nalo yako Kalele 21:1-25

*Naverikariano naio jo beamu ka tiiano na yetemeriba nei*

<sup>1</sup> Beamu beamu, ea burupati, naio nañña abio ka Parinio Bajago na Atua kiano bajago naio jo, naio jo bija Atua, a naio, naio be Atua.

<sup>2</sup> Ea bogo na tiiano na vite nonovio, naio bija Atua ruei, <sup>3</sup> naio miñauka im̃auano na rim̃auka vite nonovio, maka ve vite tai na naio maka rim̃aukanio.

<sup>4</sup> Meuliano na be riano maluvo den naio ga, naruei meuliano nei binime'i jibe ka yulu na taara

nonovio na tomu nalo. <sup>5</sup> Naio binimej jibe ka yulu namã mereralii nalo na ajua melijokouo, ana melijokouo neibano naio maka rijikia tovulio.

*Jone Baruei naio binimej berial ka yulu naio jo binimej*

<sup>6</sup> Karina, Atua naio miila kanano toro tai binimej ea yetemeriba nei, naina be Jone. <sup>7</sup> Naio binimej jibe nailiano tai, ka riverial riverinavo toro na yulu nene naio jo binimej, ka rijai tomu nalo nonovio ka ajikia amonea ka toro na naio be Atua kanano yulu. <sup>8</sup> Jibe na, Jone naio maka rive yulu nene navo, mia naio be toro na verialiano ga.

<sup>9</sup> Mia iorou kanio, toro na yulu nene naio binimej miyotuba ea yetemeriba nei. Naio be yulu napano beriano, napano naio bo laka, naruei binimej ka rudu kanano yulu toa tomu nalo nonovio kanalo meuliano.

*Yulu na yetemeriba*

<sup>10</sup> Toro na yulu, naio naruei napano jii yetemeriba nei, mia bogo na binimej eaio, ana tomu nalo na yetemeriba nei maka avitilubario. <sup>11</sup> Naio binimej be moti ea kanano tomu nalo kanalo vonuo, mia nalo na ea kanano torogio nei maka asidom naio ga. <sup>12</sup> Mia tealõ ajaaro kanio, amoneaio, naruei ea nalo na abiniu, naio mijamo kalo ka amijikia amei ave Atua kenerinio nalo. <sup>13</sup> Naio milalo amiyotuba valuo bereio, napano maka tibe ka napano kiritete nalo amiyotuba jakii yati na burukija, ðeli na jidomiano na tira bija sumãano kialo, ðeli na toro kanano jidomiano, mia amiyotuba bereio jakii jidomiano na Atua kanano.

*Parinio Bajago na Atua kiano naio binimej be toro*

<sup>14</sup> Tibe na, Parinio Bajago na Atua kiano naio binimej be toro riano, naio binimej jo iviso ka kito, naruei kito romial kanano meuliano na bo nene, naio bujo laka ea bajago na

tiniememiano a bajago na iliriano. Naio be novo na bo laka be motoru na Karamãdo kenerinio, naruei kumemi numial kanano burumãara mermerano nene, napano be kanano, naio ga takurano.

<sup>15</sup> Mia bogo namã Jone Baruei berii naio nua, naio berinavo “Naina namã kiniou nojomã neberii ban kamiu, neber mia naio rimej iorou ka kiniou, naio loa laka, mia kiniou yetano ga, bior ka napano naio meul beamu laka garuei, mia kiniou nebe na vonganei ga.”

<sup>16</sup> Naio bujo ka bajago novnovo nalo, mia bogo nonovio naio jo mila bo toru ban kito, kiano burumãara tiniememiano mila kito romijog bo toru bogo nonovio. <sup>17</sup> Beamu, Atua bitirilar tormoruo Mosis, ka naio du ga kanano tuboiano binimej ban kanano tomu nalo, mia Yesu Kristo, Atua bitirilar naio ka naio naruei bar bajago na tiniememiano a iliano na ilirianiano binimej ea yetemeriba nei. <sup>18</sup> Kito kulorinio, maka kito tai napano naio mijikia Atua, a rialio ka mirano, mia toro napano naio jo damãariga ea Atua kanano jidomiano, naljuo aju vio takurano bogo nonovio, naio naruei binimej mila kito remijikia Atua bija kanano bajago novo nalo.

*Jone Baruei naio mial Naverikariano*

*Mataiu 3:1-12; Mak 1:7-8; Luka 3:15-17*

<sup>19</sup> Ana bogo na Jone Baruei naio jomã mioliolu banbano-o na, navurimãaraboiano na kulo Ju nalo na vio Yerusalemo aju ajidomii toru aberinavo naio mimãau jumãabe na, ðeli vede naio be Naverikariano, ðeli naio be kei. Naruei nalo amiila kulo Lu tealõ bija tomu na tortoru na yati lu na Livai, naruei nalo abinimej abika denio aberinavo “Jau kobe kei?”

<sup>20</sup> Naruei telikiti na abikano, naio ber bulag batitig vite nonovio banlo, naio berdoðelo berinavo “Makanio,

kiniou maka neve Naverikariano nene.”

<sup>21</sup> Ana nalo aberinavo “?Ver tibe na, jau kobe tormoruo Elaija re nua, naruei jau komeul bereio, ĩeli? Nina bior Iliano Lu berenio mia naio monoka rimei bereio beamu ka Naverikariano.”

Mia naio berdoĥe bereio, beri-  
navo “Makanio, kiniou maka neve  
toro nene.”

Naruei nalo aberinavo “?Mo, mia  
vede jau kobe naverialiano nanua  
năa Mosis naio berkario ruei?”

Ana bereio naio berdoĥe, beri-  
navo “Makanio.”

<sup>22</sup> Naruei abika bereio denio  
aberinavo “?Ana jau kobe kei bere  
na? Jau monoka kover titai van  
kumemi ka numijikia nuvan bere  
nuverialio van nalo napano amiila  
kumemi nubinimei. Jau kover  
vatitig ga van kumemi, koverinavo,  
jau kobe kenia.”

<sup>23</sup> Ana kanano verdoĥeiano na ea  
bogo nei, naio jibe nei berinavo  
“Kiniou nebe niono kurano ga ea  
vio yauo, namăa Naverialiano Aisea  
beriiio nua ruei. Kiniou nebe niono  
napano binimei ka riverial riveri-  
navo ‘Kuvila vatitig rivu măarabo  
nalo na Tubo kanano ea kenemiu  
meuliano nalo.’”

<sup>24</sup> Nalo tai kalo napano ajua bogo  
na, nalo abe Varisis, <sup>25</sup> naruei  
nalo abika bere denio, aberinavo  
“Kumemi numijog jau kober ruei  
ka jau, maka kove Naverikariano, a  
maka kove Elaija, a maka kove nave-  
rialiano namăa Mosis berenio. ?Ver  
tibe na bior venia ana jau koberenio  
kobare ka kojomăa kabaruei năele ea  
tomu nalo janea vio jibe na?”

<sup>26</sup> Ana Jone berdoĥe banlo, beri-  
navo “Kiniou, varueiano na kiniou  
nojo namilaiio ban nalo na, naio  
ea uei ga. Mia toro dolu tai mia  
naio rimei rudu jeleku, napano naio  
jo iviso ka kito ruei, mia kamiu  
maka kuvijikia naio vo. <sup>27</sup> Naio loa  
lie laka ka kiniou, jibe ka napano  
kiniou maka navare ka nava vaataro  
ka naio, neiel vijaio, ĩeli neivelar  
kanano kulubuei.”

<sup>28</sup> Naruei vio nei naruei napano  
nalo abano ka aial Jone ea, naina  
ea tanobuku na vaataro ka komeli  
na Betani, ea măarauei na Yortano  
tivelinio bano, nina ea vio namăa  
Jone naio jomăa baruei ea tomu nalo.

*Yesu, naio be nunu solbouo na  
sida na Atua kanano*

<sup>29</sup> Ana legiano dolu nene, Yesu  
naio miel ba miyotuba ka Jone  
Baruei bija kumemi naiagagoano  
nalo kiano ea vio namăa numituaio.  
Ana bogo na Jone mial Yesu, naio  
berial ka kumemi, naio berinavo “!  
Mm, kamiu kuvial toro yako naio  
jomăa miel binimei kiana! Naio,  
jibe nunu solbouo na Atua kanano,  
napano mia naio rivar bulag vironi-  
ano na kariano nalo na tomu nalo  
na yetemeriba nei kialo. <sup>30</sup> Naio  
namăa kiniou nojomăa neberiiio ban  
kamiu nua ruei, neberinavo: Iorou  
ka kiniou, mia toro na toru tai rimei  
napano mia tukamu ka kiniou, naio  
loa laka lie vo bior naio jo jukamu  
ka kiniou. <sup>31</sup> Kiniou neber iliano  
nei beamu, maka nejikia ka mia  
ve kei, maka nejikia ka naio be  
kanaku tumano ga na, mia kiniou  
nemijikia ga ka monoka navaruei  
ea kito kulo Israel, ka rila ka mia  
romijikia rovitilubar kiado toro na  
toru nei.”

<sup>32-33</sup> Ana Jone naio ber bisivisii  
vatitigio ban kumemi jumăabe ka  
na naio mijikia ka Yesu naio be  
Naverikariano. Naio berinavo “Jibe  
ka namăa neber beamu ruei, maka  
nejikia naio be kei, mia maka vesiou  
ga, ana Atua mil ban kiniou, naio  
ber jibe nei, berinavo ver bogo na  
jau keial kanaku Niununo Lu naio  
rivatove totano ea toro tai, naina  
naruei mia naio rivaruei ea tomu  
nalo ea kanaku Niununo.

“Naio ber jibe na ka kiniou, ana  
bogo na namial Yesu nene, namial  
napano Niununo juvan vio mave,  
batove ea naio javukia vaama tai,  
binimei bujo joa naio. <sup>34</sup> Bior vite na  
naruei napano namialio, nemijikia  
neverialio vatitigio van kamiu, ka

be riano ga, toro na naio be Atua Kenerinio memedu.”

*Yesu kanano naiagagoano juo na be moti abinimei ea naio*

<sup>35</sup> Ana ea legiano dolu nene bereio, ana Jone Baruei naio jo keano ea vio nei vo, naio jomãa jukunu bija kumemi liko Adru, napano ea bogo nene kumemi nube kanano naiagagoano. <sup>36</sup> Ana numial Yesu jo miel binimei barlaka jel vaataro ka kumemi. Ana Jone berial ban kumemi, berinavo “!Tom juo, kuvial toro yako, naio jibe ka kirikiti nunu na telisu na sida na Atua kanano na!”

<sup>37</sup> Kumemi juo numijog Jone naio ber jibe na, naruei vaarakurano ga nube juo numitumolu, nubano numitakisor Yesu. <sup>38</sup> Ana Yesu barpilig naio ka kumemi, berinavo “Tomu juo, kiniou namial jibe ka kam juo kumisidom titai kovio.”

Ana nuberdoŕe naio, nubio naio jibe ka kenememi naverloglogiano, ana nuberinavo “?Rapai, jau kobinimei ea vio nei, vio na vabe jau kojomãa komon eaio?”

<sup>39</sup> Ana naio berinavo “Mo, kamiu kumei, rava kuvialio.” Ana numiel nuba nubokar vio namãa Yesu joaio ka bogo na, a jikar ea titai jibe ka mrenio veri niogoravo, numitu bija naio, numitukunu banbano-o bokar vio melijo nonovio.

<sup>40</sup> Ana Andru nene napano kumemi juo numijog Jone berii Yesu numitumolu numitakisor naio jibe na, naio be Andru napano naio be Saimon Pitere kuruano na telisu. <sup>41</sup> Ana Andru nene naio ka takisor Yesu garuei, mia naio ban soŕeli ka kuruano nei beamu vo, ana bogo na naio mileal naio berii banio, berial Naverikariano, napano kulo Ju nalo abio ea iliano na Ipru aberinavo Misaea, a kulo Kris nalo abio ea iliano na Kris aberenio Kristo. Naio berial kanio, berinavo “Kuruaku, Naverikariano mãa na, kumemi numileal naio ruei.”

<sup>42</sup> Berial ka kuruano nei, ana buru binimei ea Yesu.

Ana bogo na Yesu mialio, naio berinavo “?O, jau na naruei kobe tormoruo Jone kenerinio dolu nene, siamo Saimon? Mo vonganei kin-iou nesisiaso bereio, never siamo Kevas.” Sio nei bunu naio be iliano na Ipru, napano naio ber puruveru, napano ea iliano na vio Kris aberenio Pitere.

*Yesu buru naiagagoano dolu juo abinimei ajakisor naio*

<sup>43</sup> Ana ea legiano dolu tai bereio, Yesu jidom rudu kanano m̃arabo bereio, naio jidom rivarkor vio, rivan bere ea kanano tanobuku na vio Kalele. Nubano jibe nei, ana Yesu mial toro tai bereio, berkanio berinavo “Jau komei katakisor kiniou.” Toro nene siano Vilip, <sup>44</sup> napano naio bunu ea komeli na Andru naio Pitere kanalo nei Betsaeta.

<sup>45</sup> Ana maka ve sio, Vilip naio ba jirag kanano bilbilu tai, siano Nataniel, naio ba berkanio, berinavo “Toro na toru namãa tormoruo Mosis naliko naverialiano nalo abiv-itau kakario, aberialio nuanua ruei, naio miyotuba iviso bure kito ruei. Kumemi numileal naio ruei, be toro Nasarete tai, kenerinio tormoruo tai siano Yoseve, ana toro nene, naio siano Yesu.”

<sup>46</sup> Mia bogo na Nataniel mijog ka Yesu naio be na komeli na telisu nei, naio bika berinavo “Ana jumãabe? Tonovo na toru tai na jibe na naio maka rijikia riyotuba ea komeli na telisu na Nasarete nei!”

Ana Vilip berdoŕe, berinavo “Ai, abe jau keil re tibe na, jau komei ga keial naio beamu vo.”

<sup>47</sup> Ana naljuo aban bereio ea Yesu, mia bogo na amiel abinimei vaataro kanio, Yesu mial Nataniel, berii, berinavo “Lerinio, kiniou namial toro na jibe toro novo na Israel tai memedu na, toro tai napano maka ve sibiano ea naio leleio.”

<sup>48</sup> Mia Nataniel mijog Yesu berii naio jibe na, naio bika berinavo “? Ana jumãabe jau komijikia ka kiniou nebe toro na jibe na?”

Mia Yesu berdoŕe naio berinavo “Bogo na Vilip maka riviedu kaso vo,

bogo na jau takurano kojo komijil-imebi yetano ea vamelu na buruviki, kiniou namialso rui kiana.”

<sup>49</sup> Mia Nataniel miilo va ka Yesu kiano jikiaiano, berinavo “!Naverloglogiano, jau kobe Atua kenerinio riano! !Jau kobe parinio tubo na Israel memedu kia na!”

<sup>50</sup> Ana Yesu ber banio, berinavo “!Kiniou neber iliano tai na telisu banso, ka kiniou namialso ea buruviki na, mia vaarakurano ga jau komonea kiniou jikili! Nina naio bo laka, mia neberkar banso ka mia jau kaial vite na iloiano ve telabo bereio, napano nalo tortoru lie todovulu ninei na jau komialio navo. <sup>51</sup> Nao, kiniou neber memedu, ka mia kamiu kuvial ka vio mave naio rivetavo to, vija nailiano nalo na vio mave na atu amei yetano ea kiniou atu avavin mave bereio, atu avatove bereio avavin tibe na. Vite kinkin nalo na tibe na ana mia kamiu kuvijikia kuvialio bior ka kiniou nebe Kulorinio Kenerinio, jibe napano kiniou tena vio mave, a nebinime nebe kulorinio riano.”

## 2

*Yesu kiano kijokijo na be moti, ea soriano na vio Kana*

<sup>1</sup> Mia Yesu nalo abinime aboru ea tanobuku na Kalele rui, ana ea legiano tolu nene, jokoluolu na soriano tai ea komeli na Kana. Mia Yesu kenieno naio ba miyotuba ea jokoluolu nene rui, <sup>2</sup> ana iorou kanio amiila toru binime ka Yesu naliko kanano naiagagoano nalo, abiolo bunu ka amei eaio. <sup>3</sup> Mia Yesu nalo abano amiyotuba ea jokoluolu, aju naliko tomu nalo banbano-o, mia vite tai bova, uei na amunu ea jokoluolu nei naio biniu soŕeli. Ana Yesu kenieno binime berialio ban Yesu, naio berinavo “Munuiano na toro na toru na jokoluolu mila batitigio, amunu koko kanio, biniu rui vio be teau, amila de batitigio garuei.”

<sup>4</sup> Ana Yesu berdoŕe, mil banio berinavo “? Tiramoru, venia na iŕauano na naio joa kiniou? Jau

kodu re toa juŕaku, bior kanaku bogo na nala vite nalo na jibe na, naio maka vo.”

<sup>5</sup> Kenieno naio mijog venia napano Yesu berenio, mia naio ber ka tomu na iŕauano na jokoluolu nei, berinavo “Venia na mia naio river ka kamiu ka kuvilaio, mia kamiu kuvil re, kuvilaio ga.”

<sup>6</sup> Ana Yesu mial buruŕara basidobidobi na uei tai aju vaataro, naŕa kulo Ju nalo abar ka ŕa ajekon ka vite nalo jibe ka na kanalo nalotuano naio berenio. Buruŕara basidobidobi nalo nei amiuŕauka ea puruveru, abe verare ka sadu toromomou takurano janealo, basidobidobi nene nalo biniu be ari. <sup>7</sup> Ana naio ber kalo berinavo “Kamiu kuva kuviov uei, ana kuvar kumei kuvioionio rivan ea basidobidobi nalo nei rivano-o avuvujo magmago.” Naruei nalo amila banbano-o na amisono batitigio abujovujo.

<sup>8</sup> Ana Yesu naio berenio berinavo “Mo, vonganei kuviov ve telisu eaio, ana kuvar va van toro na toru na jokoluolu nei ka naio rijikia rimunu vonvonio.” Naruei nalo abiovio, abar ba ban naio.

<sup>9</sup> Naruei toro na toru nei naio munu vonvonio, mijog jibe ka binime be ŕarjuŕelŕelu rui, mia naio miilo toru kanio, naio maka rijikia ka amileal munuiano nei ea vio na vabe. Mia nalo ga napano abiovio, amijikia, mia maka aver kanio, mia naio bio toro na joro vonga binime mial naio. <sup>10</sup> Toro nene naio binime, ana toro na toru nei berkanio, berinavo “Ea jokoluolu dolu nalo, ajuŕa abiov ŕarjuŕelŕelu nana bo naio binime jukamu, mia bogo na tomu nalo amunu kija banbano-o, karina abiov vonga ŕarjuŕelŕelu na maka rivu laka binime iorou. Mia ea jokoluolu nei ajuŕa amunu uei banbano-o, karina jau kobiov vonga ŕaku ŕarjuŕelŕelu napano naio bo laka, naio binime maariano garuei. Ka venia komila jibe na?”

<sup>11</sup> Vite nei naŕa Yesu naio mila ea bulukomeli na Kenan ea vio Kalele,

naio jibe ka burum̃ara vremesiano tai, be kiano vremesiano na be moti napano milaio. Naio mila jibe ka na naio jo jikar jo jiloglog kanano moroano na vio mave, mia bogo na naiagagoano nalo amialio, kanalo moneano na ea naio, ka naio be Naverikariano na be riano, binimej bavin lie vo. <sup>12</sup> Bisi naruei ana nalo abiniu aban bere ea Kapeneam bereio, nina be Yesu, kenieno, a kuruano nalo, bija kanano naiagagoano nalo, abinimej abokar vio nei ana aju kija jibe na ba bokar legiano nalo tai.

*Yesu mijil dedade ea nalo nam̃a aju aṗilvili ka saba joomo ea Atua kanano Yimo Lu*

*Mataiu 21:12-13; Mak 11:15-18; Luka 19:45-46*

<sup>13</sup> Mia bogo tai, vaataro ka bogo na kulo Ju nalo ala kanalo jokoluolu na toru, Jukoluolu na Sidomkariano na Ioruriano. Ana kanalo bajago tai, ber yuka nonovio nalo nonovio monoka ala vonio ka avavin Yerusalemo monloglog bogo ka ala jokoluolu nei, ka sidomkariano na korobilo nalo ajaluvo den Ijivi, ana ka bogo nei, Yesu bunu naio bavin. <sup>14</sup> Naio ba bokar vio nene, ana ba miyotuba ea Atua kanano Yimo Lu, mia naio mial ka napano nalo telabo aju napano ajuṃa aṗilvili ka buluku, nunu, bija menu nalo, mia naio mial nalo nam̃a amijebukua veru dolu nalo binimej be veru na memedu na Atua kanano Yimo Lu. Im̃auano nalo nene abe im̃auano na bo tai, bior abe im̃auano na aṗilvili ka vite na tomu nalo monoka avulu ka ala sida kanio, mia titai bova, nalo aju amijukubin tomu nalo toru, mia mave kanio, nalo aju amilaio jouro ea burusio na vio lu.

<sup>15</sup> Ana Yesu naio mial ka nam̃a amila niegeniege dolu ga yimo lu nene jibe na, naruei naio tinien mimi, bar teli nalo, buru vuronlo jibe na, ana banku kalo. Naio ba jibe na, naio ba mijil dedade ealo bija kanalo nunu a buluku nalo abava

tavio den Atua kanano Yimo Lu, mia ea tivelinio na nalo nam̃a aju amijebukua veru, naio ba miyon bulag kanalo basaro na puruveru nalo, naio bilig bulag kialo barobaro nalo bijaio. <sup>16</sup> Nalo nam̃a aju aṗilvili ka menu nalo, naio mil banlo berinavo “!A, kuvar bulag kenemiu saba nalo na ea vio na! !Kamiu kuvila re karam̃aku kunuano nei rimej ve kenemiu yimo tai na kuvokar veru eaio tibe na!”

<sup>17</sup> Ana bogo na kanano naiagagoano nalo amial Yesu naio mijil dedade ealo jibe na, mila na nalo tinie maio ka vivitauiano lu tai bereio, jibe ka na naio berii Naverikariano beamu ruei, napano berenio berinavo

*“Kanku jidomiano temi laka ea kanamo yimo lu, naio jibe ka sebi tai bovago ea kanku iviso.”*  
*Iouano 69:9*

<sup>18</sup> Mia ka tenei, tomu na tortoru na kulo Ju nalo, nalo bunu amial venia napano Yesu milaio, naruei nalo abika denio, aberinavo “Venia napano jau komilaio vonga na, naio be burum̃ara vite tai. ?Mia jau na komijikia kala vremesiano na vabe ea mirememi, ka rila kumemi nuvijikia nuvia ka naio rimemedu ka jau kala tibe na?”

<sup>19</sup> Ana Yesu berdoṗe banlo, naio berinavo “Mo, kanku vremesiano naio jibe nei: kamiu kuvue bulag Yimo Lu na, avona iorou kanio, ea legiano ve tolu ga, mia kiniou nevitiri lario bereio.”

<sup>20</sup> Ana nalo aberinavo “Nalo nam̃a amim̃auka yimo na, amim̃auka ba bokar yuka duelimo va veri ba ari [46], mia jum̃abe ana jau kober jibe na, kober komijikia kovitiri lario bereio ka legiano ve tolu ga? !Maka leleio rijikia tibe na!” <sup>21</sup> Nalo amil jibe na, a nina bior nalo maka ajikia vatitig rivu venia nam̃a Yesu naio berii ea bogo na. Nalo maka avitilubar ka bogo na naio jom̃a berii Atua kunuano na, nioti nene jibe ka mokotenano. <sup>22</sup> Ana iorou

laka garuei, iorou ka na naio jumolu bere den m̄ariano, kanano naiagagoano nalo ajidomialio bereio ka naio ber iliano nei banlo, ana mila na amonea lie vivitauiano lu nalo bija Yesu kanano iliano nalo banlo.

<sup>23</sup> Naruei Yesu nalo ajua jokoluolu na ea Yerusalemo banbano-o na, naio joṃa mila vremesiano telabo, mia bogo na tomu nalo amialio, nalo telabo amoneaio ka naio be Naverikariano. <sup>24</sup> Mia Yesu maka to rijamo ka naio laka vanlo, naio maka to rivarkar tiniene ṃele ealo, bior naio mijikia batitiglo. <sup>25</sup> Toro dolu tai rijikia re river titai van Yesu ea tivelinio na toro kanano bajago, bior naio mijikia vatitigio ruei, naio mijikia vite nonovio napano aju joomo ea toro kanano jidomiano.

### 3

#### *Nikotimas binimei mial Yesu*

<sup>1-2</sup> Ana ka bogo tai bereio, ka bogiano tai, kulo Israel nalo kanalo navuriṃaraboiano tai naio binimei ka jidom rial Yesu. Toro nene naio be Varisis nalo tai, siano Nikotimas. Mia naio binimei, naio mil bija Yesu naio berinavo “Naverloglogiano, kumemi numialso, nubitilubar ka jau kobe naverloglogiano tai napano jau kobinimei ea Atua, bior maka ve toro tai napano mijikia rila kijokijo naṃa jau kojoṃa komilaio, ver Atua to re vija.”

<sup>3</sup> Ana Yesu berdoṃe banio, berinavo “Ee, burutomoluo nalo na bo, a monokanio never ve riano bo vanso, toro na maka sidom rimoluo bereio ve terivou, mia Atua naio maka rijikia rive tubo ea kiano meuliano.”

<sup>4</sup> Mia Nikotimas naio miilo ka iliano nei, ana berinavo “!Tomnei! ? Mia toro na be tormoruo ruei naio mijikia rimoluo bere tum̄abe? Kiniou maka ve tinieku ka mia naio mijikia riva joomo bereio ea kenieno mabono, ka mia naio rimoluo ve vaarakurano bereio.”

<sup>5</sup> Ana Yesu berdoṃe berinavo “Kiniou neber riano banso, ka toro monoka riyotuba ea uei, a monoka

riyotuba ea Niununo. Ver ṃeli, mia naio maka rijikia riva jouro ea Atua kanano navenatuboiano. <sup>6</sup> Toro naio mijikia rivar bereio toro ga, mia Atua kanano Niununo naio mijikia rivar bereio niununo vou ea toro kanano meuliano. <sup>7</sup> Naina naruei be yotubaiano valuo naṃa kiniou nojo neber kaso. Tibe na, jau keiilo re bunu ka kiniou neber kaso ka jau monoka komoluo bereio.

<sup>8</sup> “Kosidomii von jegi. Jeg naio joṃa miuvuvu, naio jo janea vio jibe ka ga na naio jidom, ṃeli na kito roju romijogio, mia kito maka rejikia ka naio jo binimei jum̄abe, ṃeli na naio jo ba be. Mia ṃarabo na Niununo naio rim̄au ea toro kanano meuliano jibe na naruei, naio jibe ka jegi.”

<sup>9</sup> Mia Nikotimas naio jidomii bijon iliano nei toru laka, ana bika berinavo “?Tomnei, mia vite na naio mia tum̄abe na?”

<sup>10</sup> Ana Yesu berdoṃe banio, berinavo “Jau kobe naverloglogiano na toru tai na kulo Israel kialo ruei, mia kiniou nemial jibe ka vite nalo naṃa kiniou nojoṃa neber bisivisiio banso na, jau maka lele kejikia vo, a! <sup>11</sup> Kaiagago rivu! Javukia naṃa naverialiano nalo amilaiio beamu ruei, kiniou nojoṃa neberial ga venia na ṃa kiniou nemijikiaio, ṃeli na venia na ṃa kiniou namialio, mia tibe na daṃariga, kamiu tomu nalo na vio Israel kamiu maka kuvisidom kuvisov kenememi iliano nalo. <sup>12</sup> Kiniou nojo neberii saba nalo na yetemeriba nei ban kamiu, mia maka kuvisidom kumonmoneaio, mia ver neverii saba nalo na vio mave, mia kamiu kuvijikia kumonmoneaio tum̄abe? Kiniou namial ka mia ve deio ga. <sup>13</sup> Mia kiniou Kulorinio Kenerinio, kiniou ve takurano ga nemijikia neverloglog kamiu ka na vio mave, bior ka napano maka ve toro dolu tai riva rial vio nene, mia kiniou ga Kulorinio Kenerinio najaluvo den naio nebinimei yetano ruei, a iorou, mia navan bere eaio.

<sup>14</sup> “Beamu beamu tormoruo Moṣis nalo ajua vio yauo, maro nalo ajum̄a

ajer binvinlo, mia naio bitirilar iesi tai, midu butoto maro jo mave, ana kei kalo napano maro jerlo, mia ver sirarago ga vitikar maro na jo mave, mia Atua rilarurlo. Ana ea m̄arabo nene kia ga, mia monoka adu kin-iou Kulorinio Kenerinio bunu noto mave ea iesi tai. <sup>15</sup> Naruei toro kei na rimonea kiniou, mia naio rivokar meuliano vou nei napano naio maka ve jukuti nene.”

<sup>16</sup> Yesu ber jibe na bior Atua tinien jii tomu nalo na yetemeriba nei toru laka, naruei naio mijamo ka kenerinio na kirinovo laka, napano naio ga takurano be kanano, binimej m̄aro kar kito, naruei toro kei napano rimonea naio, mia maka rijikia riva kovio, mia rivokar meuliano na bo nei napano maka rijikia ribisi bogo tai. <sup>17</sup> ?Ana bior vaio Atua miila kenerinio nei binimej yetano ea yetemeriba nei? Maka riilaio rimej ka tibure tomu nalo na yetemeriba nei, mia miilaio binimej ka rijamo ka kanano meuliano ka rilarur kito.

<sup>18</sup> “Toro kei napano rimonea kenerinio nei ve riano, mia Atua tibure re naio, mia toro na maka rimoneaio, vironiano joa naio ruei, bior naio maka rimonea Atua kenerinio. <sup>19</sup> ?Ana vironiano nei napano mia Atua naio monoka rilaio, burupati nene be venia? Naina bior napano naio miila kanano yulu binimej ea yetemeriba nei, mia tomu nalo ajum̄a amila kikiio ga banbano-o na, maka asaaro kanio, mia ajidom ga bajago na bova tena melijokouo. <sup>20</sup> Mia nalo nonovio nam̄a aju amila bova jibe na, jibe ka napano maka asidom yulu nei leleio, a maka asidom amei vaataro kanio, bior amerou ka aberinavo vede mia naio rila kanalo vovaiano nalo ayoyotuba ea vio medave, naruei tomu nalo ajikia avitilubarario. <sup>21</sup> Mia nalo nam̄a amim̄au ea bajago na bo a memedu, nalo maka amerou ka toro na yulu nei, a nalo abinimej vaataro kanio. Nalo ajaaro kanio, bior yulu nene

naio rila meravo vatitig ka vite nalo nam̄a amilaio, nalo amim̄auka amonmonea ga jidomiano na Atua kanano.”

*Jone Baruei naio jaaro ka Yesu jikar kanano im̄auano*

<sup>22</sup> Ana iorou ka vite nalo nei, Yesu buru kanano naiagagoano nalo ajuvan vio Yerusalemo abatavio ea tanobuku na vio Yutea. Nalo aju jibe na, naruei ajum̄a abaruei ea tomu nalo. <sup>23</sup> Ana ka bogo nene nei ga Jone Baruei bunu naio joa vio dolu tai, siano Aenon, vaataro ka vio na Salim. Naio binimej ea vio na bior uei tai joaio, mia tomu nalo na aju abinimej ka naio, naio jom̄a baruei ealo ea marauei nene. <sup>24</sup> Nina ea bogo na nalo maka avokar naio, a maka avuku naio riva joomo ea yimo na lakoiano vo.

<sup>25</sup> Naruei ka bogo na Jone kanano naiagagoano nalo amila iliano tai bija toro Ju dolu tai, ea tivelinio ka m̄arabo na sekon vite nalo jibe ka kanalo nalotvano berenio, ana ea tivelinio na bunu varueiano nalo napano Jone bija Yesu kialo. <sup>26</sup> Aberii banbano-o karina abinimej amial Jone, abika denio, aberinavo “Naverloglogiano, kumemi numisidom nuvika denso ea tivelinio na toro na Yesu napano beamu, bogo na kito rojua marauei na Yortano tivelinio bano, naio binimej mialso, naruei jau koberial saba telaboio naio. Vonganei, naio bunu binimej jo baruei ea tomu nalo, mila abiniu aju ajuvarvan kito aban ea naio ga, vio bujo mia vio bujo.”

<sup>27</sup> Ana bogo nam̄a aber jibe na ka Jone, naio maka rijoku, maka rijog rivova, mia naio jaaro ga, berinavo “Kito tomu nalo nonovio monoka roim̄auka ga venia napano Atua naio midu jua jun̄ado. <sup>28</sup> Javukia napano kamiu kumijikia batitigio ruei, nam̄a kiniou nojom̄a neberial julaka ga, ka kanaku im̄auano, kin-iou maka neve Naverikariano, mia nebinimej beamu ka naio ga, ka

neverial ka naio jo binimei ruei. <sup>29</sup> Ana vonganei jibe ka namã kamiu kuberialio ban kiniou, naio binimei jo mila kanano imãuano ruei, ana vite nei najaaro kanio, namialio bo laka.

“Naio jibe ka bogo na soriano, napano naio jibe nei. Ver toro na naio soro, kanano bilbilu tai, naio riiija naio ve toru ka aiomon saba nonovio na jokoluolu, mia karina, ea legiano nene, bogo na avuru tira rimei, tira nei naio maka riva totano vija naio mia naio ba jotano bija koano ga. Mia naio maka rijog vova, kanano saariano naio bare ka toro na soriano kanano. A vonganei kiniou bunu najaaro jibe na, napano kanaku naiagagoano nalo aju ajakisor Yesu. <sup>30</sup> Nina bior Tubo Naverikariano naio monoka to rimei ve toru lie tibe na tulaka, kiniou monoka nomei nove telisu lie vo.”

*Naverikariano naio binimei miãau jumãbe ea yetemeriba nei?*

<sup>31</sup> Ana Jone Baruei naio berii Naverikariano, berinavo “Naio be na vio mave, naruei naio mave loa vite nonovio. Kito romiyotuba ea vio yetano nei, kito robe na yetemeriba nei ga ana romijikia roverii vite nalo na vio nei ga. Mia naio, jibe ka namã kiniou neberenio, naio jaluvo ea vio mave binimei yetano, naio loa lie ka tomu nonovio, <sup>32</sup> napano naio binimei jomãa berial vite nalo namã naio mialio beamu ea vio mave, a vite nalo namã naio mijogio. Naio berial vite nalo na, mia tomu nalo maka asidom kanano iliano, maka amoneaio. <sup>33</sup> Telabo na maka amoneaio, mia kito namã kito romoneaio, kanado moneano naio jekar batitigio ka Atua, kanano iliano nalo be riano, a amemedu batitigio bo ga. <sup>34</sup> Kanano iliano nene nalo, naio miila Naverikariano naio binimei berial ban kito ruei, ana romijikia ka iliano nalo nei aberiano. Nina bior bogo na Naverikariano binimei, kito romial ka napano naio mil ea moroano na Niununo na

Atua kanano, bior Atua jian kanano Niununo banio, maka ve torogio ga, mia momonio garuei. <sup>35</sup> Karamãno Atua nene naio tinien jii kenerinio nene nei naio toru laka, naruei naio bar vite nonovio jua jumãano.

<sup>36</sup> “Tibe na, kito napano romonea naio, robokar ruei meuliano nei napano naio to tobo to. Mia toro napano maka mãa rimonmonea naio, mia naio rijikia re rial meuliano nei bogo tai, mia Atua kanano tiniemimiano ve toru toa naio.”

## 4

*Yesu naio jidom rivan bereio Kalele, naio jel ea via Sameria*

<sup>1-2</sup> Ana ka bogo na, iliano jo jeliviv, ber Yesu jomãa buru naiagagoano telabo abinimei ajakisor naio, a jomãa baruei ealo. A maka ve Yesu namã naio baruei ealo, mia kumemi kanano naiagagoano nalo ga numitumã numilaio, mia tomu nalo amialio ka nalo napano Yesu kanano aju abinimei miroano, jovulu Jone Baruei kanano.

Naruei nalo ajumãa aberver iliano nei ba janea vio jibe na, ba bokar Varisis nalo, mia bogo na Yesu mijogio ka nalo bunu amijikia vite nei a mila nalo amijog bova biorio, <sup>3</sup> naio mial bo ka tuvan vio Yutea, naio rivatove bereio Kalele. Naruei kumemi numituvan vio nei, nubano jibe na, <sup>4</sup> mia Atua jiloglog ka kenememi mãarabo monoka va sel ea tanobuku na Sameria.

<sup>5-6</sup> Naruei kumemi numitu numiel nubano, numalmaluvo ea komeli na vio na tai, siano Saika. Vaataro ka komeli nene, be bulukuei tai jo, napano jikar nuanua ruei, jo binimei jibe na, abio ka Yakovo mãano uei. Borotano nene, beamu be tormoruo Yakovo kanano, ana iorou kanio ana mijamo ka ban kenerinio Yoseve.

Naruei kumemi liko Yesu numiel nubinimei nuboru ea uei nene, be bogo niogoravo memedu, naruei Yesu mijog tinien maro laka bior burutili ieliano ea burutiniano na

jikili, ana naio ba jotano mave ea tagvoru na bulukuei nene.

*Yesu bitavo bija tira re Sameria tai*

<sup>7-8</sup> Numitua uei nene bano-o, bisi ana na kumemi naiagagoano nalo numitumolu nubano ea komeli ka nuvulu simemi sinaniano, mia Yesu naio ga takurano jo mijilimebi. Mo iorou kanio tira re Sameria tai naio miel binimei ka jidom riviov uei. Naio binimei ana Yesu bika denio berenio “?Aiou, jau komijikia koviov m̃aku uei tai?”

<sup>9</sup> Ana tira nene, naio maka rijikia Yesu, mia bitilubar ka naio be toro Ju tai, mia miilo toru laka ka napano naio mil batitigio bo ban naio jibe na, bior ka bogo na, kulo Ju nalo bija kulo Sameria nalo abe bilbilu va maka avior kalo. Ana tira nei naio bika den Yesu, naio berinavo “?Jum̃abe na jau, kobe toro Ju, komil ban kiniou tira na Sameria, na jau kobika uei den kiniou?”

<sup>10</sup> Naruei ana Yesu naio berdoŕe berinavo “!Tira, verver jau komijikia ga ijaiano na bo napano Atua naio jidom sian vanso! !Verver jau komijikia ga ka kiniou nebe kei nei ga nam̃a nebika uei denso! Ver tibe na, vede maka ve kiniou na nebika uei denso, ana mia jau kovika uei den kiniou. Mia bogo na ver jau kovika uei den kiniou, nemijikia nesian uei na be uei na ridu meuliano vanso.”

<sup>11</sup> Naruei tira nei naio mijog vite na, naio bika den Yesu, berinavo “Toro na toru, jau maka ve kanamo titai ka jau koviov ka uei nene, mia bulukuei nene naio bululuo batove laka. Tibe na, uei na meuliano nam̃a jau kojom̃a koberenio na, mia jau koviovio tum̃abe, ŕeli na mia jau koviovio ea vio be? <sup>12</sup> Mia jau kojom̃a kober uei na dolu na, mia ninei jo nei naio be uei na bo tai. Korobido tormoruo nanua na Yakovo, naio kanano uei nei. Naio munu bano-o, naliko kenerinio nalo, bija kanalo temeul nalo, naruei amila lilian binimei binimei bokar banei. ?Jau kober jau kobo loa tormoruo Yakovo ana komijikia kala uei tai na bo loa ninei?”

<sup>13</sup> Ana na Yesu berdoŕe banio berinavo “Nao, uei nei naio bo, ana mia bogo na kito romunuio, mia maka vesiou ana midoujer kito bereio. <sup>14</sup> Mia toro na naio rimunu uei nei napano nemijikia nesianio vanio, karina mia naio maka rijikia midouser naio bereio. Mia uei napano naio rimunuio, mia rimeitibe ka burupati uei bereio joomo ea kiano iviso, ve uei na meuliano napano maka ve togio eaio, naio jom̃a mieraro den naio dam̃ariga, maka rijikia tabo bogo tai.”

<sup>15</sup> Mia tira nei, naio maka rijikia vatitig vo Yesu kanano iliano, naruei naio berinavo “Toro na toru, ver tibe na, bo ka jau kodu uei na ve telisu van kiniou ka nomunuio, mia nomidou re bunu, ka mia nemei re bunu noviov uei tulaka ea vio nei.”

<sup>16</sup> Ana Yesu jidom ka tira nei naio jikia ka naio be kei, a berkanio, berinavo “Kiniou never titai ka jau beamu vo. Jau kavan bereio, jau kovio koamo kovuru naio rimei bere ea vio nei.”

<sup>17</sup> Ana tira nei berinavo “Ee, maka ve koaku tai!”

Ana Yesu berkanio, berinavo “Rian ga na, jau kober memedu na, ka jau maka ve koamo tai. <sup>18</sup> Nina bior ka tomu nalo na kojoru kalo beamu ruei napano abiniu abokar jimo, mia vonganei koje bija toro tai bereio napano maka kosoro kanio. Jibe na na kanamo iliano be riano na, jau maka ve koamo tai.”

<sup>19</sup> Mia tira nei naio miilo toru laka ka napano Yesu mijikia batitig kiano meuliano jibe na, ana berinavo “Rian ga na, toro na toru. Vonganei kiniou nemijikia naruei, ka jau kobe naverialiano tai. <sup>20</sup> Naio bo laka kiana, mia ŕeli jau kobe kulo Ju nalo kanalo naverialiano ga na. Mia kumemi kulo Sameria, kenememi vio lu naio napano be burum̃ara burusuku yako Kerasim, napano korobimemi nalo amila lotuano na Atua eaio nua ruei, binimei bokar banei. Mia kamiu kulo Ju nalo, kumitu kumisikili ka kenemiu

burum̃ara komeli lu na Yerusalemo, naio ga takurano be vio na memedu ka m̃a amila lotuano ban Atua. Tibe na, kei naio memedu, kamiu p̃eli na kumemi? Kover vonio!”

<sup>21-22</sup> Mia Yesu jaaro ka rivuriri tira nei kanano jidomiano ea tivelinio na bajago na memedu na amila lotuano ban Atua, ana berkanio, berinavo “Nao kuviviniekū, jau kober be riano na, kiado lotuano kito juo naio maka rive verare. Mia nina maka rivior vio na amila lotuano ave juo, mia bior vite napano jibe na: Kamiu na ea vio na, kamiu kumitum̃a kumila lotuano, mia kamiu maka kuvijikia batitigio naio napano kamiu kumilotu banio, mia kumemi kulo Ju, Atua naio bijauialar kumemi ka toro na rilarrur tomu nalo naio miyotuba ea kenememi torogio. Naruei kumemi numijikia batitig kenememi Atua nei napano m̃a kumemi numitum̃a numilotu kanio.

“Mia kiniou nemijikia never kaso ka mia tibe na re tulaka. Mia jau monoka komonea kiniou, napano neber kaso vonganei ka bogo tai jo binimei napano mia lotuano vou tai tikario, napano ve kanado rovinu. Toro Ju p̃eli na toro Sameria, mia residomial re bunu ka vio na memedu ka rolotu ka Atua naio be suku na, p̃eli na komeli na Yerusalemo, p̃eli na vio be bereio. <sup>23</sup> Mia burum̃ara vite na mia residom, naio jibe nei, ber bogo na kolotu ka Atua, mia monoka kotuvan Niununo Lu rim̃au ea niunumo, a monoka kolotu ka naio ve riano, memedu ka kiano ilirianiano.

“Nina napano Atua Teta naio jidomio, ana vonganei ruei a ea bogo na jo binimei, mia naio rivitkar kanano taara na lotuano riano, napano amijikia alotu ka naio ea bajago novo na jibe na. <sup>24</sup> Atua naio be niununo, naruei toro na jidom rilotu kanio monoka rilotu ka naio ea kanano iviso, a vite nei naio monoka rive riano ea kanano meuliano.”

<sup>25</sup> Ana tira nei, naio jo monea ka mia Naverikariano naio rime,

naio napano iliano na vio Kris naio ber Kristo, naruei naio ber ka Yesu, berinavo “Vite nalo nei na jau kōjom̃a koberenio, vede abe riano, mia kiniou nomonea ka Naverikariano napano mia naio rime, mia naio naruei riverial vite nonovio ve riano vatitigio van kumemi.”

<sup>26</sup> Naruei Yesu ber iliano telisu nei ga banio, berinavo “Naio nam̃a jau kōjom̃a koberenio, kiniou nene nei ga nei, nam̃a nojo nojukunu bijaso vonganei.”

<sup>27</sup> Naio berial naio ban tira nei jibe na bisi, ana naiagagoano nalo abinime, aboru ea vio nene bereio. Naruei amialio ka napano Yesu jom̃a jukunu bija tira nei, jibe ka naljuo nei ga, naruei nalo amiilo kanio. Nalo amiilo, mia nalo aju buruga, maka ve nalo tai kalo napano naio rivika den tira nei ka naio jidom venia, p̃eli na rivika den Yesu river naljuo ajum̃a ajukunu ka venia. <sup>28</sup> Mo tira nei jumolu, mebi ka m̃ano bauei jo bo, naruei naio miel ban bere vonuo ea komeli. Ana bogo napano boru vonuo, naio ba berialio ka tomu nalo, berinavo <sup>29</sup> “Valauo Ju tai naio jo rove yako ea bulukuei, naio jukunu ban kiniou, naio mijikia vite nonovio ea kanaku meuliano. Kiniou namial naio jibe ka Naverikariano garuei memedu, p̃eli na? Kamiu kumei, ravatove reialio.” <sup>30</sup> Naruei nalo ajumolu ajaluvo abatove ka ajidom aial Yesu nene.

### *Jamerijiano na sinaniano na meruo jua tiniavio*

<sup>31</sup> Mia bogo na aju amiel abinime, maka ayotuba vo, ana naiagagoano nalo abar bulag salo sinaniano napano aba abuluio, aberii ka Yesu aberinavo “Naverloglogiano, komei kesinan.”

<sup>32</sup> Mia Yesu naio maka rime, mia abio bereio bano-o, karina Yesu berinavo “Kamiu kuvisinin, kiniou be saku sinaniano dolu tai naio jo napano kamiu maka kuvijikiaio.”

<sup>33</sup> Naiagagoano nalo amijogio nina, naruei nalo amil banlo,

aberinavo “? Ana kenia naio bar sano sinaniano nene binimei? !Kito maka reial toro tai leleio!”

<sup>34</sup> Ana na Yesu ber kalo, berinavo “Makanio, sinaniano na kiniou nojo neberenio na naio dolu kiana. Saku sinaniano, naio be iñauano na jogkariano na tinieiano na naio namã miila kiniou nebinimei yetano nei, a kiniou monoka noiñau ka nonovio riviniu rivanvano-o na ribisi. <sup>35</sup> Bogo namã kito romebija tiniavio, rojuñã rober bogo nonovio jibe nei, roberinavo: Siberio veri ju, ka sinaniano rimeruo. Mia vonganei ea Atua kanano tiniavio, tomu nalo aju ruei ka ajog Atua kiano iliano, jibe sinaniano nalo na amermeruo ruei. Kiniou nojidom ka kamiu kuvila vonio ka kuvetavo ea miremiu, ka kuvisirarago vatitig tanea vio, ana mia kuvijikia kuvial sinaniano nalo ameruo bo ruei, vonganei be bogo na ava avario rimei. <sup>36-37</sup> Mia nalo namã ava avario, mia nalo asaaro ve toru laka bior kanalo vuliano telisu naio jo ruei, ana bogo na avar sinaniano nene rimei vonuo na meuliano na maka ve togio nene, toro na toru na mebija, mia naio bunu saaro ve toru. Naio jibe ka ga iliano napano ber jibe nei, berinavo ‘Toro tai naio ba mebijo, mia toro dolu naio ba bario, mia burumãara saariano be tena nalo nonovio.’ <sup>38</sup> Jibe na, kiniou nojomã nemiila kamiu ka kuva kuvuru tomu nalo napano kulo dolu nalo amila burumãara iñauano kalo ruei, mia vonganei kam nonovio kuvije buron kamiu ea jogvuiano na iñauano nene.”

#### *Kulo Sameria telabo amonea*

<sup>39</sup> Mia bogo napano kulo Sameria napano ea komeli nei amijog tira nei naio berii jumãabe ka na Yesu mijikia vite nonovio ea kanano meuliano, nalo amiilo toru, naruei mila nalo telabo amonea Yesu. <sup>40</sup> Ana bogo na abinimei ka aial naio, aju ajukunu bija naio banbano-o, karina abika naio ka nuva vonuo, nuvitu kija

vijalo. Naruei nuba numitu bijalo ba bokar bogoti juo, <sup>41</sup> mia nalo telabo lie amonea naio bior kanano iliano novo nalo. <sup>42</sup> Aber ka bunu tira nei, aberinavo “Beamu, kumemi numijog venia ga napano jau kober ka kumemi, maka nuvijikia, mia vonganei, kumemi numijog kanano iliano memedu ga, kumemi numijikia ka be riano ga, kanado toro na toru nei, naio be Ioruriano na yetemeriba.”

#### *Yesu kanano vremesiano juo nene Kalele, naio mieliel ka tubo na toru tai kenerinio*

<sup>43</sup> Mia bogoti juo nei barlaka bisi ana kumemi liko Yesu numituvan vio nei nubano, numidu bere kenememi m̃arabo ka nuvatove ea tanobuku na Kalele. <sup>44</sup> Yesu jidom rivan bereio ea kiano vio Kalele, bior naio mial tomu dolu na vio dolu aberverii naio, ajirag naio laka janea vio. Nina jakii kiano iliano tai, napano berinavo “Tomu dolu nalo tiniel jii ka aiagago vatitig ka naverialiano, mia tomu na kanano vio nalo makanio, ajidom naio be iakurano.” <sup>45</sup> Mia bogo na nubinimei numiyotuba ea vio Kalele, tomu nalo na kiano vio ajaaro toru ka ala vorvoruano ka naio. Naina bior beamu, nalo telabo bunu aju ajua jokoluolu na Yerusalemo, ana amial ruei vijuku m̃eteiano na Yesu mila ea Atua Kunuano Lu ka bogo na, ana amialio ka naina bo laka.

<sup>46</sup> Naruei naio jomã miel ea vio nalo na Kalele binimei bokar bereio komeli na Kenan, nanua naio bilig uei binimei be m̃arjum̃elm̃elu. Ana ka bogo na, tubo na toru tai na komeli dolu na Kapeneam naio joa vio na, mia naio jomã mijog bova bior kenerinio tete sumãano naio mie toru laka vaataro ka ga riñaro. <sup>47</sup> Mia bogo na naio mijog ajumã aberii ka Yesu naio juvan vio Yutea binimei Kalele bereio ruei, naio ba mileal naio. Naruei naio mial Yesu, jegi banio ka riva vonuo rieliel ka kenerinio nene. <sup>48</sup> Ana na Yesu ber

kanio berinavo “Vede jau bunu jau kojibe ka tomu dolu nalo. Bogo nonovio ga ajidom vremesiano ninio nalo, mia ver noiñau kanio, mia amonea kiniou kanio. Mia bogo napano maka bunu atu aialio, nalo maka asaaro ka amonmonea kiniou.”

<sup>49</sup> Mia tubo na toru nei naio jikili kanio, berinavo “Toro na toru, neber bo kaso jau komei soḡeli, ver ḡeli mia keneriku nene naio rivakovio.”

<sup>50</sup> Mia Yesu naio jidom ka tubo nei monea kanano iliano ga, naio berinavo “Makanio, mia jau ga ve takurano kavano. Kiniou neber kaso neberinavo kenerimo nene mia naio riñaro re na, naio rimeul rivu ga.” Naruei toro nei monea iliano napano Yesu berkanio, ana na juvan vio ka riva vonuo bereio.

<sup>51</sup> Ana na viobijeni kanio, bogo na naio joñia miel ban bere ka rivano, naio bitavo bija kanano tomu nalo, napano ajunña amiel bior naio. Mia nalo aberial banio, aberinavo “Kenerimo naio mijog bo ruei jo.”

<sup>52</sup> Naruei naio bika denlo, berinavo “Kamiu kuvisidomii vatitigio: bogo na vabe naruei na kamiu kumialio jikar ka binimej bo bereio?”

Nalo aberdoḡe aberinavo “Kumemi numialio jibe ka niabene binimej menini bo ea niogoravo naniovo, jibe ka mērenio takurano.”

<sup>53</sup> Mia tete nei karamñano naio mijogio jibe na, naio mijikia ka nina naruei bogo memedu ga ka napano Yesu ber kanio berinavo “Kenerimo naio riñaro re, naio rimeul rivu ga to.” Naruei vite na mila karamñano, bija nalo nonovio ea kanano m̄aratavo, amonmonea Yesu.

<sup>54</sup> Naruei ielieliano na tete nei, Yesu mila iorou ka napano naio jaluvo den vio Yutea binimej, a naio naruei be kiano vremesiano valuo nene ea tanobuku na vio Kalele.

## 5

*Yesu mieliel ka toro tai na niabene m̄aro kirisiou laka ruei*

<sup>1</sup> Ana Yesu naio jo Kalele kirisiou kija banbano-o na bokar bogo na kulo Ju nalo kanalo jokoluolu dolu mave yako Yerusalemo. Naruei Yesu nalo aban bere mave ea jokoluolu nene. <sup>2</sup> Ajua vio Yerusalemo jibe na na ea legiano tai ana Yesu miel ba batove vaataro ka buruñara m̄aratavo na komeli nei napano abio ka Maratavo na Nunu, ana nalo aban ea vio tai napano be uei na m̄a amijeljelia naio joaio, napano ea kialo iliano, abio ka Betsata. Naruei jeliviv ea bauei nei, be m̄arsuḡiki jimo nene ju, napano amirñau kalo ea puruveru. <sup>3</sup> Mo bogo nonovio ga be tomu na mieiano nalo, be merebono nalo, be jaba nalo, a be nalo na niabele m̄arm̄aro, nalo na jibe na nalo miroano laka aju abinimej amonea m̄arsuḡiki nalo nei. Abinimej jibe na, bior uei nei, naio miyukulkulu be ve vaarakurano ga, <sup>4</sup> jibe ka Atua kanano nailiano naio binimej milaio, mo ver nalo amial jibe na, namieiano kei napano naio ba bokar uei nei jukamu, mia mieiano vaio nam̄a joa naio mia ribisi denio vaarakurano ga. <sup>5</sup> Jibe na, tomu na mieiano nalo aju abinimej ea vio nei, mia ka bogo nene nalo nene tai be toro tai napano niabene nalo biniu m̄arm̄aro bokar yuka duelimo va rolu ba arolu [38] ruei. <sup>6</sup> Ana bogo na Yesu binimej, naio mial toro nene, mia mijikia toro nei naio jo mon bior mieiano nei bogo jiou ruei jibe na, ana naio bika denio berinavo “?Koig liki, jau kojidom ka niabemo rimej rivu, ina?”

<sup>7</sup> Ana na toro na mieiano naio berdoḡe berinavo “Toro na toru, kiniou nojidom toru kiana, mia bogo nonovio, ver uei naio miyukulkulu, mia maka toro tai ka rudu kiniou navatove tii kiniou notoa ea. Ana bogo na kiniou takurano nemiel vonvon nabatove mia toro dolu naio binimej batove bokar uei nene jukamu ka kiniou.”

<sup>8</sup> Ana Yesu mil memedu ban toro nei naio berinavo “Mo, jau kotu-

molu, jau kavar m̃amo yebe, koiel kavano.”<sup>9</sup> Naruei ea Yesu kanano iliano nei, toro nei niabene nalo na abova abinimei abo nonovio, ana naio jumolu bar m̃ano yebe, jumolu miel ba vonuo.

Ana ka legiano nei na vite nei miyotuba eaio, naio be Legiano Lu tai na kulo Ju nalo kanalo,<sup>10</sup> mila na ka bogo na tomu na tortoru na kulo Ju nalo amial ka kema nei naio jo miel bija m̃ano yebe, ana amil banio biorio, aberbureio, aberinavo “!Ai, abe banei be Legiano Lu kiana! Jau kojo komidu m̃amo yebe jibe na, jau komila korov kiado tuboiano kulo kito Ju nalo.”

<sup>11</sup> Mia naio berdoḡe banlo, naio berinavo “Kiniou niabeku nalo burukokorovio, mia toro nene binimei mieliel ka kiniou, berii ka kiniou berinavo nodu m̃aku jogu navano.”

<sup>12</sup> Mia nalo ajidom ajikia vatitig lie vo, nalo abika denio, aberinavo “?Ana kenia na? ?Naio be kenia napano naio ber kaso ka jau kala tibe na?”

<sup>13</sup> Mia kema nei naio maka rijikia riverenio, bior napano naio maka rijikia ka be Yesu napano mieliel ka naio, mia maka bunu rijikia rial naio bior napano be burum̃ara tiniobi na jo, mia Yesu jo miel bure tomu nalo nene, naio jaluvo den vio nei ruei.

<sup>14</sup> Ana iorou kanio maka vesiou, ana Yesu mial toro nene bereio joomo ea Yimo Lu, ana berkanio berinavo “Vonganei na jau kobinimei kobo ruei, bo ka jau kovitkar vatitigso. Jau kotuvan nonovio kanamo kariano nalo, ver maka vede titai naio riva rivova lie kaso tovulu napano beamu.”<sup>15</sup> Ana ka bogo na kema nei naio mijikia ka be Yesu nei napano mieliel ka naio, naruei naio ba berialio ka tomu na tortoru na kulo Ju nalo kialo.

<sup>16</sup> Mia bogo na nalo amijogio ka be Yesu napano naio mieliel ka toro nei, tiniel jer naio, nalo maka asaaro ka na naio mila tenei ka Legiano Lu, naruei nalo ajikar ka amila baravo abilvili ea naio.<sup>17</sup> Ana na Yesu berdoḡelo, naio berinavo

“Karam̃aku, naio jom̃a miḡauka kanano iḡauano nalo na bo ea bogo ninio, ba bokar bunu Legiano Lu nalo, mia kiniou bunu monoka noto nala tibe na ga napano naio milaio.”

<sup>18</sup> Jibe na ga ka bogo na, navurim̃ara-boiano na kulo Ju nalo ajum̃a abitii Yesu ruei aber naio be toro nam̃a mila bulag tolu na Legiano Lu. Mia vonganei mave ka naio, nalo amijog ka napano naio jom̃a bio Atua be karam̃ano memedu, nalo amialio jibe ka naio jom̃a mila naio be verare bija Atua. Naruei vite nalo nei mila ana abinimei abitunu lie vo, ajidom toru laka ka auebinio rim̃aro.

*Atua kenerinio bija Karam̃ano naljuo amim̃au be verare ga*

<sup>19</sup> Ana Yesu ber kalo, naio berinavo “Kiniou neber be riano ka kamiu, ka kiniou Atua kenerinio, kiniou maka nejikia nela titai kiniou ga ve takurano, mia venia ga napano nemial Karam̃aku milaio, naina naruei kiniou bunu nemilaio jibe na.<sup>20</sup> Atua teta naio tinien jii m̃lea kiniou kenerinio, ana jom̃a jiloglog kiniou ka vite nonovio napano naio jidom ka mia nalaio. Abe iḡauano dolu nalo ju kiano vo napano nalo tortoru lie vo, napano mia karam̃aku sian van kiniou ka mia noim̃auka iorou, a bogo napano mia noim̃aukanio, mia kamiu kuviilo ve toru kanio.<sup>21</sup> A bunu, tibe ka napano Teta naio bitiri bulag bereio nalo napano m̃a am̃arm̃aro naio jian bere kialo meuliano banlo, mia kiniou Kenerinio bunu nemijikia nesian meuliano van toro kei nam̃a nojidom nesian vanio.<sup>22</sup> Mia Teta, maka ve naio ga nam̃a mila tibreiano, mia iḡauano na bunu naio midu joa jum̃aku,<sup>23</sup> ka rila na tomu nonovio monoka avatove ka kiniou, tibe ka nam̃a abatove ka Karam̃aku. Tibe na, toro nam̃a naio maka to rivatove rivu ka kiniou Kenerinio, jibe ka naio maka to rivatove rivu ka toro na toru napano miila kiniou nabatove.”

### *Mariano a meuliano*

<sup>24</sup> Ana Yesu mil lie vo, naio berinavo “Kamiau kuviagago vatitigio. Toro kei namã monmonea kanaku iliano, a naio monea nana naio miila kiniou nabatove, ea bogo nei memedu mia naio rivokar meuliano. Naio maka totano yetano ka tibureiano tai leleio, bior naio jumolu den bajago na mãariano, ba bokar kiano meuliano vou ruei.

<sup>25</sup> “A kiniou neber ilirianiano nei bunu ban kamiau, ka bogo na jo binimeis vonganei napano nalo namã Atua mial ka amãmaro den bajago va, mia nalo ajog jooku kiniou Atua kenerinio, mia nalo na ajogkario, mia avokar meuliano. <sup>26</sup> Kiaku Teta, meuliano na be riano joa naio ga, naruei naio mijamo ka meuliano nei na joa kiniou, <sup>27</sup> mia naio mijamo ka bunu ka kiniou Kulorinio Kenerinio, mia nala imãauano nalo na tibureiano.

<sup>28</sup> “Vite nalo nei, nalo maka ve tena kamiau kuviilo kalo, mia naio monoka tibe ga na ea bogo napano kiniou nojo noberenio ka naio jo binimeis. Mia nalo namã amonmelio ea borotano mia ajog jooku naio rivio, <sup>29</sup> naruei mia ana kialo tumoliano bereio ka aje meuliano, ana tomu nalo na imãau bova, kialo tumoliano ka avokar tibureano.”

### *Vite nalo na rijai Yesu kiano iliano nalo*

<sup>30</sup> Ana Yesu mil lie vo, naio mil memedu ban tomu na tortoru na kulo Ju nalo napano maka asidom amonea naio, naio berii vite nalo na mã ajaloglog naio ka naio be riano. Naio berenio berinavo “Ea tivelinio na tibureiano, napano mia kiniou nala, mia kiniou nala re tibe ka kanaku jidomiano kiniou ve takurano ga, mia nala ea ga venia napano nomijog Teta berenio. Tibe na, mia kanaku tibureano naio memedu ga, bior napano maka nala ka kanaku jidomiano, mia nemila ea Teta kiano na naio juvan kiniou nebinimeis. <sup>31</sup> Naruei nemil jibe

na ban kamiau, nemijikia ka nojo neberii kiniou bereio, ana vede nalo tai amial ka maka rimemedu ka neil tibe na, nalo maka ajikia amonea iliano na jibe na. <sup>32</sup> Mia naio bo ga na, naio maka ve titenia, bior napano be vite dolu nalo na mã amija kanaku iliano amijikia atumolu atu.

“Na be moti nene, naio be toro tai napano naio berial vite ninio ban kiniou napano abe riano laka. <sup>33</sup> Ninei be Jone Baruei nei, napano beamu, kamiau kumituvan iliano ba banio, kamiau kubika jumãbe ka kiniou eaio, naruei naio berial vite nonovio be riano bo ban kamiau. <sup>34</sup> Mia maka rivu ka kamiau ve tiniemiu ka iliano na toro tai jibe na Jone mila kanaku iliano tumolu tibe na. Mia kiniou nejidom kamiau kuvisidomii vatitig rivu bereio ea venia napano Jone berial ban kamiau ea tivelinio na kiniou, bior nojo namila vio ka najai kamiau ka kuvijikia kuvokar ioruriano. <sup>35</sup> Kiniou neber Jone nene ka kamiau, bior naio javukia yulu tai napano mereralii batitig kenemiu jidomiano, napano kumisaaro telisu ka naio.

<sup>36</sup> “Mia vite dolu na mã miija kanaku iliano, be toru lie ea vite nalo na mã Jone berii. Vite nei naio be kijokijo nalo napano Teta naio mijamo ka ban kiniou ka neimãaukanio ea miremiu. Imãauano nalo na tomormoruo nei na mã kiniou nojo namilaiio amiija kanaku iliano nei toru ka be riano ka napano Teta nei naruei naio miila kiniou nebinimeis.

<sup>37</sup> “Mia mave ka vite juo nei, dolu nene naio jo, naina be Karamãaku napano miila kiniou nebinimeis. Kamiau maka lele kuvijog jooona a maka lele kuvial mirano, mia naio bunu, kanano iliano nalo amiija toru ka kanaku iliano, na aberial kiniou. <sup>38</sup> Mia kamiau kumila napano maka ve jeleigio ka iliano nei ea kenemiu meuliano, bior napano kamiau maka kuvisidom kumonea

naio napano miila kiniou nebinime. <sup>39</sup> Bogo telabo kamiu kumitumã kubitii vatitig Vivitauiano Lu nalo, bior kumitumã be tiniemiu ka mia kuvileal kenemiu meuliano napano maka ve jukuti nene, ana Vivitauiano Lu nalo nei naruei napano aberial kiniou. <sup>40</sup> Aber ka kiniou ga nebe burupati na meuliano nene, mia kamiu maka kuvisidom kumei kuvokar meuliano nene ea kiniou.”

<sup>41</sup> Naruei Yesu mial kialo veribinio, mil jibe nei berinavo “Vite nalo na mã kiniou nojo nemila, maka noto nala rivior ka nejidom kamiu kuvitirilar siaku, makanio. Kiniou maka nesidomial naina, <sup>42</sup> mia be vite tai na bova, kiniou nemijikia batitig kamiu ruei, naruei nemijikia ka kamiu maka tiniemiu tii Atua leleio. <sup>43</sup> Bogo na mã kiniou nomiyotuba ka kamiu, nebinime ea karamãaku siano, mia kamiu maka kuvisaaro ka kiniou. Mia ver bogo tai toro dolu tai rimei, napano rimei ea naio ga ve takurano siano, a vede mia kamiu kuvisaaro kanio ga. <sup>44</sup> Kiniou tinieku miia kamiu toru laka, mia namial jibe kiride ka kuvijikia kuvokar moneano riano bogo tai. Naina bior napano damãariga, kamiu kumitu tiniemiu jii ka kuvidular siemiu rivavin. Kamiu maka kuvitu kuvisidom ka kuvijebukua kenemiu bajago leleio, ka kuvila vite nalo napano iorou mia Atua naio mijikia rivitiri bulag kamiu riviorio.

<sup>45</sup> “Kiniou neber iliano nalo nei ban kamiu, p̃eli kumitu kumisidom kuberinavo ‘Uerei, kema na tinien jer kito, p̃eli ea bogo na tibureiano mia naio naruei napano mia riverial kanado torokoriano nalo van Teta Atua ea vio mave.’

“Mia makanio, ve re kiniou na mia nala tibe na, mia ve dolu tai na mia naio rilai. Dolu nene, nina be tormoruo Mosis, napano mã kumitu kubarkar tiniemiu ea naio ka mia naio river iliano na mia rijai kamiu, mia kiniou neber vatitig ban kamiu, naio naruei napano mia river bulag vovaiano nalo na kenemiu na. <sup>46</sup> Kamiu kumitumã

kuberinavo kumitu kumonea jikili tormoruo Mosis kanano iliano nalo nei, mia ver tibe na bior vaio ana kamiu maka kumonea kiniou bunu, bior napano tormoruo na damãariga naio bivitauii kiniou ga. <sup>47</sup> Mia vonganai kiniou nemial jibe ka napano kamiu maka kumonea vivitauiano na kanano, mia ka tenei, kamiu kuvijikia dulu re ka kumonea kanaku iliano nalo bunu.”

## 6

*Yesu bagan tomu nalo jovulu menu jimo [5,000]*

*Mataiu 14:13-21; Mak 6:32-44; Luka 9:10-17*

<sup>1</sup> Iorou ka naina, kumemi liko Yesu numidu uako numituvan kanano tanobuku bereio, nubar kor burumãara ueiyabo nei Kalele, napano tealò abio ka ueiyabo na Taiperias. <sup>2</sup> Mia bogo na tomu nalo amial ka numitu nubano jibe na ea tivelinio, ajumolu ajakisor kumemi. Ajidom avan vija Yesu bior nalo aju amial burutomoluo na ielieliano na naio jomã mila ea nalo napano mã abokar mieiano nalo. <sup>3</sup> Ana nubano nubokar tivelinio nene, numiel nubavin ea suku tai napano joa vio na, numiel nubanbano-o na numebi. <sup>4-5</sup> Ana Yesu naio jotano jo jirarag ba laka, naio mial burumãara tiniobi napano nalo aju amiel abinime ka naio. Naio bitilubar ka nalo telabo abe tomu na vio kinkin napano ajumã amiel vei ka ava Yerusalemo. Nalo aju abano bior burumãara jokoluolu na kulo Ju nalo kanalo, Jokoluolu na Nasidomkariano na Ioruriano, napano mia ala rivesiou re.

Naruei bogo na Yesu naio mial nalo ka aju abinime, naio bika vite tai den Vilip, naio berinavo “Vilip, nalo na aju jijerlo toru laka liki kiana. ?Mia kito rovulu salo joko tumãabe?” <sup>6</sup> Vikadeniano nei Yesu kanano, naio be tena rilavon kija Vilip ga, bior Yesu naio mijikia ruei vite napano mia naio rilai van tomu nalo nei.

<sup>7</sup> Ana Vilip naio berdoŝe, bere-  
nio ga berinavo “Ver kiniou noimãu  
yuka ve takurano, mia maka nejikia  
neleal puruveru rivare ka novulu ka  
sinaniano na nalo aviniu ajevio ve  
tertelisu!”

<sup>8</sup> Naruei naiagagoano dolu nene,  
be Adru, napano be Saimon Pitere  
kuruano napano teliki, naio berial  
ban Yesu, berinavo <sup>9</sup> “Tubo, kiniou  
nemileal m̃eaku tai jo nei, naio bar  
joko sesa jimo [5] bija niado momaio  
juo [2]. Ninei naio telisu ga mia  
tomu nalo miroano laka.”

<sup>10</sup> Mia Yesu naio berinavo  
“Makanio, naio bo ga na. Kuver  
ka tiniobi nalo ka atutano yetano  
beamu vo.” Naruei nuber kanilo,  
ka nalo atutano ea m̃ajumunei,  
ana naruei numial tomu nalo nene  
bokar menu jumo [5,000] titai jibe  
na. <sup>11</sup> Naruei Yesu naio bar joko  
jimo nene ana bolkouo, ber siva  
biorio. Avona bisi ana jikar ka m̃a  
burekokorovio a jijian bulag ban  
nalo napano ajumã ajutano, naio  
mila jibe na ga bunu bija niado,  
jijianio ban nalo nonovio jibe ka na  
nalo taniel jii ka asenio.

<sup>12</sup> Naruei nalo ajenio banbano-o  
na mabolo jouo, ana Yesu ber ka  
kumemi, naio berinavo “Sinaniano  
torogio na be va ju, kito ralaluvu re,  
ana bo ka kuvar bijio riva vio taku-  
rano.” <sup>13</sup> Naruei kumemi nubano  
nubar niati joko jimo nei binimej,  
napano nalo ajen digio ju, naruei  
numisonlo ban ea basaro banbano  
bokar basaro duelimo ba juo [12]  
garuei.

<sup>14</sup> Mo bogo na tomu nalo  
abitolubar burumãara burutomoluo  
napano Yesu milaio, ajumã aber  
jibe nei kalo aberinavo “Kiado  
burumãara naverialiano na m̃a  
korobido nalo aberkario ka mia naio  
rimej riyotuba ea yetemeriba nei,  
tete na naruei naio be naverialiano  
nene memedu kiana.” <sup>15</sup> Naruei  
nalo aju ajidomii ka ava avokar  
Yesu, ajidom atutuaio ka avitirilar  
naio rimej rive kanalo parinio Tubo,  
mia bogo napano naio mijog lubar  
ea naio venia napano ajidomii ka

alaio, naio jaluvo denlo, miel naio  
takurano ga ba bavin lie vo ea  
burusuku nalo nei.

*Yesu miel mave ea niunuku tei  
Mataiu 14:22-27; Mak 6:45-52*

<sup>16</sup> Naruei kumemi naiagagoano  
nalo numial ka napano m̃erenio  
jo batove, numial bo ka nuvan  
bereio, naruei nubatove ea tivelinio  
na ueiyabo. <sup>17</sup> Nubatove mia maka  
bunu nuvial Yesu riyotuba bereio ka  
kumemi, mia bior napano vio bobo-  
gio ruei, numidu kenememi uako,  
numituvan vio bereio nubeluo ka  
nuvavin ea ueiyabo ka nuvarkor  
bereio nuvan ea vio Kapeneam.  
<sup>18</sup> Naruei numitu nubano jibe na,  
kiri jegi tai binimej jo miuvuvu kija,  
naio mila na tei jikar ka bieveluo  
laka. <sup>19</sup> Mia bogo napano nubeluo  
koalabo kija ruei, jibe sudu jimo,  
numiilo ka napano Yesu naio jomã  
miel mave ea niunuku uei jo bin-  
imej vaatara. Naruei numerou  
kanio toru laka, <sup>20</sup> mia naio mil  
ban kumemi berinavo “!Oi, kamiu  
kumerou re! Kiniou ga nei.”

<sup>21</sup> Ana numijog bo bereio, mia  
nuburu naio bavin ea uako, mia  
vaarakurano numial ka kenememi  
uako naio jologlog vio na nu-  
misidom ka nuvan ea ruei.

*Tomu nalo abinimej ajiravo Yesu*

<sup>22</sup> Naruei ea kavijo, nalo na laka  
yako ea ueiyabo nei tivelinio, na-  
pano Yesu baganlo vonga, nalo aju  
ajidom toru ka Yesu naio jo jumãbe.  
Nalo aju ajidom jibe na bior bogo  
napano kumemi liko Yesu nubin-  
imej ealo, numidu uako takurano  
ga, mia nalo amial ka napano  
kumemi numidu uako nene nubano  
bere ruei, mia Yesu naio maka ri-  
van vija kumemi, naio takurano  
jobo. Mia vonganee nalo maka bunu  
ajikia aleal naio ealo, <sup>23-24</sup> mo nalo  
abano abar uako dolu nalo tai, nalo  
abarkor ea vio Kapeneam ka asirav  
kumemi. Uako dolu nalo nei, maka  
ave kanalo, mia be kulo Taiperias  
nalo kanalo napano nalo abinimej  
aborvoru ealo, abano vauro ea vio  
na ga m̃a Yesu bolkouo ka joko

eaio, naio mila binimej bare ka nalo asenio.

*Yesu berenio ber naio be joko na meuliano*

<sup>25</sup> Naruei tomu nalo nei abinimej aboru Kapeneam, ana abavauro, naruei nalo ajiravo Yesu. Mia bogo na amilealio, abika denio, aberinavo “? Naverloglogiano, jau kobinimej bere koboru ea vio nei ka bogo na vabe?”

<sup>26</sup> Mia Yesu naio mijikia venia napano ajidom aial naio bereio riviorio, ana naio berdoŝe banlo, berinavo “Ver kamiŭ kubinimej kumisirav kavulu kiniou bereio bior kumial kanaku burutomoluo nalo ana kubitilubar ka kiniou kiniou kei, naina naio bo na. Mia kiniou nemial jibe ka kamiŭ kumitu kumisidomial ga ka naniovo kiniou nabagan vatitig kamiŭ, kumisinin banbano o mabomiu nalo abujovujo vatitigio bo, tenene na kamiŭ kumisidom ka mia tibe na bereio banei, ŝeli makanio? <sup>27</sup> Mo, kanaku ilirianiano van kamiŭ naio jibe nei: kamiŭ kuvituŝa kuvisidomii ŝele re rivior sinaniano ga napano naio be tena bogo bulati ga naio joono bereio. Mia bo kanio kuviuŝau sikili rivior sinaniano nei na ŝa naio mijikia to daŝariga to, naio mijikia to to riva rivokar bogo na meuliano nei napano naio maka ve jukuti nene. Be riano, mia kiniou Kulorinio Kenerinio nemijikia nesian meuliano nene van kamiŭ, bior ka napano teta Atua naio jekarlar kiniou takurano ga ka nela tibe na.”

<sup>28</sup> Naruei nalo abika denio, aberinavo “Ana ver kumemi nuvisidom ka kumemi nuvila vite nalo naŝa Atua naio jidomio, mia monoka nuviŝauka tuŝabe?”

<sup>29</sup> Ana Yesu berdoŝe banlo berinavo “Buruŝara vite napano Atua jidom ka kuviuŝau kanio, naio jibe nei: kamiŭ kumonea rive riano ea kiniou napano Atua miila kiniou nebinimej ea yetemeriba nei.”

<sup>30</sup> Ana nalo abika bereio, aberinavo “? Ana jau, venia naruei be kanamo burutomoluo napano ver

kumemi nuvalio, mia kumemi nuvijikia nuvimoneaso? ?Mia jau kala iŝauano vabe na bo van kumemi?

<sup>31</sup> Kumemi nubika jibe na bior ka napano numitu numisidomial kanado tormoruo nalo na beamu, nanua na ajua vio yauo. Aju jibe na, mia Mosis mila burutomoluo tai na bo banlo, napano daŝariga nalo aju abar joko na abio ka mana, mia nalo ajenio, maka lele siserlo. Vite na naio joa niosi lu, a naio berenio berinavo

*‘Daŝariga naio baganlo ka joko na vio mave!’”* *Eks 16:4*

<sup>32</sup> Ana Yesu berdoŝelo bereio, berinavo “Nao, vite na naio joa niosi lu, mia joko napano Mosis bario, naio maka ve joko na vio mave. Joko na vio mave napano be riano, karamŝaku ga naio mijikia sianio.

<sup>33</sup> Atua kanano joko be kiniou napano najaluvo ea vio mave nebinimej yetano, ka nesian meuliano vou rivan tomu na yetemeriba nalo.”

<sup>34</sup> Ana nalo aberdoŝe, aberinavo “Tubo, naina naruei be joko naŝa kumemi numisidom tulaka.”

<sup>35</sup> Ana Yesu berial banlo, naio berinavo “Kiniou, kiniou nebe joko na meuliano. Toro kei napano naio rimej ea kiniou, naio maka lele rijikia siser naio bereio, mia toro kei napano naio rimonea kiniou, naio maka lele rijikia midou ser naio bereio. <sup>36</sup> Be vite takurano ga naio bova, jibe ka napano neber ka kamiŭ ruej, napano kamiŭ kumial kiniou bija kanaku burutomoluo nalo ka miremiŭ ruej, mia kamiŭ maka kuvisidom kumonea kiniou. <sup>37</sup> Ana mia monoka tomu tai napano mia amonea kiniou, bior nalo nonovio napano teta mudulo ajua juŝaku, mia monoka amej ea kiniou, mia nalo nonovio napano mia amej ka kiniou, ve re tai kalo napano mia novukulario bereio, mia novokar vatitiglo aviniu ave kanaku.

<sup>38</sup> “Kiniou najaluvo ea vio mave nabatove yetano ea yetemeriba nei, maka ka mia nala kanaku jidomiano, mia ka nala jidomiano na kanano napano naio miila kiniou

nabatove. <sup>39</sup> Mo kanano jidomiano naio jibe nei, ka nalo napano naio mudulo ajua jumaku, mia kiniou nalaluvu re nalo tai kalo, naio jidom ka ea legiano na maaro mia kiniou nevitiri bulag nonovlo bereio. <sup>40</sup> Karamaku naio jidom toru ka tibe nei naruei, ka nalo nonovio napano ma amial kiniou, ana amonea kiniou, mia nalo avokar meuliano nei napano naio maka ve jukuti nene, a naio jidom toru bunu ka ea legiano na maaro, ka mia kiniou naruei nevitiri bulaglo bereio.”

*Navurimāaraboiano na kulo Ju nalo maka asaaro ka Yesu kanano iliano nalo*

<sup>41</sup> Naruei bogo na kulo Ju nalo kanalo tomu na tortoru aju amigago ka Yesu kanano iliano nalo nei, nalo maka asaaro leleio, naruei ajuma amil munī kano. Be kanano iliano tai napano nalo maka asidom ajogio, naina be iliano napano naio berial ber naio be joko napano naio jaluvo ea vio mave batove ea yetemeriba nei. <sup>42</sup> Nalo aberii ealo aberinavo “?Jumabe ana toro na naio joma berial ban kito ber naio jaluvo ea vio mave tiniabene naio binimei ea kito? Naio maka ve toro kokouro tenia na, kito romijikia batitig naio ruei, bija kenieno a karamano bunu. Naio be tormoru Yoseve ga kenerinio na, Yesu.”

<sup>43</sup> Ana Yesu berdope banlo naio berinavo “!Oi, ilimumiano ea kiniou naio bare, kamiu kuviagago vatitigio beamu vo! <sup>44</sup> Toro kei napano naio binimei monea kiniou vonganei, mia ea legiano na maaro kiniou nevitiri lar naio rimeul bereio. Mia Teta napano miila kiniou nebinimei, ver naio rivuru re toro na rimei ea kiniou, mia naio maka rijikia rimei. <sup>45</sup> Niosi na naverialiano Aisea kanano naio berial iliano tai, naio berinavo

*‘Nalo nonovio, mia Atua ga naio riverlogloglo,’ Ais 54:13*  
ana mia never nalo namā ajog batitigio iliano na Teta Atua kanano, namā naio berloglog batitiglo kano,

nalo naruei mia amei ea kiniou. <sup>46</sup> Ana nalo na jibe na, mia ve re tai kalo napano aial Teta Atua, bior be toro takurano ga mial naio, nina be kiniou napano nejaluvo denio nebinimei.

<sup>47</sup> “Nao, kiniou nojoma neber be riano laka ban kamiu, ka tomu nalo nonovio napano amonea kiniou, aju jouro ea meuliano ruei, na maka jikia bisi, <sup>48</sup> bior kiniou, kiniou nebe joko na meuliano. <sup>49</sup> Joko nei naio maka rive verare ka joko na mana napano kulo moruo nalo ajenio ea vio yauo. Nalo ajen banbano-o na, karina maka ve nalo tai kalo napano naio rimeul tobo to, nalo abiniu ajuma amarmaro jibe na ga. <sup>50</sup> Mia ver joko tai to, ana toro napano toma senio mia naio rijikia re rimaro bogo tai, naina naruei kito rejisia ka joko na vio mave memedu. <sup>51</sup> Mo, kiniou naruei, kiniou nebe joko napano meul mugaruei, napano jaluvo ea vio mave binimei ea yetemeriba nei, ka toro na naio senio, naio meul tobo to. Joko nene naruei be mokotenaku, napano kiniou nemijamo ka bior yetemeriba vodolu nei, nejian bior meuliano na kanano tomu nalo.”

<sup>52</sup> Naruei Yesu kanano iliano nalo nei kirisikili laka ka tomu na tortoru na kulo Ju nalo kialo nei ajikia batitigio rivu, naruei ajuma abivika aberenio “Venia na? Toro na naio ber ka mia naio sian niamoiano van kito ka kito resenio, peli na naio joma ber venia?”

<sup>53</sup> Naruei Yesu naio ber bisivisij meravo banlo ea tivelinio na nioti na kanano mariano, naio berinavo “Kiniou neber riano ban kamiu, neber kamiu monoka kuvisen niamoiano na kiniou Kulorinio Kenerinio, a kamiu monoka kumunu kanaku burukija. Ver peli, mia kanaku meuliano naio maka rijikia toa kamiu. <sup>54</sup> Mia naio napano ma jen niamonioku, a naio munu kanaku burukija, naio bokar meuliano napano maka ve jukuti nene, mo mia kiniou nevitirilar naio bereio ea legiano na maaro,

nala naio rimeul bereio. <sup>55</sup> Nina bior niamonioku, naio be sinani-ano dolu tai, a kanaku burukija, naio be munuiano dolu tai laka. <sup>56</sup> Naio napano mā jen niamonioku, a naio munu kanaku burukija, kanano meuliano momou joa kiniou, a kanaku meuliano momou joa naio. <sup>57</sup> Karamāku na be burupati na meuliano, ana naio mila kiniou nebinimei, mia kiniou nojo nomeul ea kanano meuliano napano joa kiniou, naruei naio napano mā jen niamonioku, mia naio rimeul ea kanaku meuliano napano joaio. <sup>58</sup> Naina naruei kiniou nojoma neber ea kanaku iliano ea tivelinio na joko nei napano jaluvo ea vio mave naio batove. Joko nei naio maka tibe ka joko nei nanua mā korobido moruo nalo mā ajenio mia nalo ajumā amāro jibe na ga. Naio be joko napano toro kei napano ver naio senio, mia naio mijikia rimeul to tobo to.”

<sup>59</sup> Iliano nalo nei naruei Yesu jo berloglog kalo joomo ea yimo na volkouano na vio Kapeneam.

*Naiagagoano telabo nalo ajuvan Yesu nalo abanvan bereio*

<sup>60</sup> Mia bogo na, Yesu naio ber iliano nalo nei, kumemi kanano naiagagoano nalo telabo ajidomii naio bereio, aberinavo “Kanano verloglogiano nalo nei kirisikili kiana. ? Kei bereio naio mijikia rijoglubarbar vatitigio?”

<sup>61</sup> Mia Yesu naio mijog lubar ea naio ka kanano naiagagoano tealo ajumā amil mumī ka naio tertelisu jibe na, ana naio bika denlo, naio berinavo “?Jumābe, kamiu maka kuvisaaro ka kanaku iliano telisu nei, mila kamiu kumisidom kuvituvan kiniou bereio? <sup>62</sup> Ver tibe na, maka nejikia kamiu naruei. Ver bogo tai, kamiu kuvial kiniou Kulorinio Kenerinio notuvan kamiu, navan bere ea kanaku vio mave, mia tumābe naruei? Peli mia tiniemiu bobogia kiniou naruei! <sup>63</sup> Kanaku

iliano nalo nei abe mārabo na Niununo, abe mārabo na meuliano. Kulorinio naio mijikia rivar bere kulorinio, mia kulorinio naio maka rijikia sian meuliano riano nei van kulorinio dolu. Vite na Niununo na Atua kanano ga naio mijikia sianio. <sup>64</sup> Mia nebitilubar ka kamiu tealo kumonea ruei, mia tealo makanio.”

Yesu naio ber nina, bior ka napano beamu ruei, naio mijikia kulo be nalo namā maka amonea naio, ba bokar napano naio mijikia kei kalo napano mia naio tiveluku kanio. <sup>65</sup> Ana Yesu ber kalo bunu, naio berinavo “Tealo mia amonea, a tealo mia amonea re, naina naruei kiniou neber batitigio ban kamiu iliano nei naruei, ka maka toro tai rijikia rimei ea kiniou, ver karamāku maka rijamo ka naio rimei.”

<sup>66</sup> Naruei ea bogo nei, kumemi tealo kanano naiagagoano nalo amial jibe Yesu kanano verloglogiano nalo nei, abinimei jikili lie vo, naruei amialio ka be de ga, ana nalo aban bereio, maka bunu atu atakilili kumemi.

*Pitere naio berial jikili kanalo moneano ban Yesu*

<sup>67</sup> Ana bogo napano Yesu naio mial ka napano tomu tealo ajuvan naio bereio, naio mil ban kumemi kanano naiagagoano duelimo ba juo [12] nei, naio bika berinavo “?Ana jumābe ka kamiu? ?Peli kamiu bunu tiniemiu jii ka kuan bere vija nalo na?”

<sup>68</sup> Ana Saimon Pitere naio berdoḡe, berkar jikili ban Yesu, berinavo “Tubo, ver kumemi nuvituvanso, mia kumemi nuvitakisor kei bereio? Jau takurano ga napano ioluano na meuliano na joaso, <sup>69</sup> jau ga takurano napano vonganei kumemi numonmoneaso, a kumemi numijikia ruei ka jau kobe Naverikariano Lu napano Atua juvanso kobinimei ka kolarur kumemi.”

<sup>70</sup> Ana Yesu berdoḡe, naio berinavo “Nao, kiniou nebijauia bulag

kamiu duelimo ba juo [12] na be kanaku, ka kamiu kumonea kiniou tibe na, mia iviso bure kamiu, kamiu tai naio be siñaro memedu.”<sup>71</sup> Mia Yesu naio maka riverial kumemi tai siano ka bogo na, mia iorou kanio ana nubutilubar ka ea kanano iliano nalo nei, naio jomã ber Jutas, tormoruo Saimon re Kariot kenerinio, napano naio be tai ka kumemi duelimo ba juo [12], mia naio maka ritovonio, naio jiveluku ka kanano Tubo novo nei.

## 7

### *Yesu kuruano nalo maka avijurukar batitig naio rivu*

<sup>1</sup> Iorou ka naina Yesu naio jomã miel jeliviv, jomã ban ea ga vio na be kiano tanobuku ga nei Kalele. Naio maka bunu tomã rivavin ea vio nalo na tanobuku na vio Yutea, bior navuriñaraboiano na kulo Ju na vio na nalo ajumã ajirarag ka naio ruei, ka ajidom ka ala bin naio rimãro.<sup>2</sup> Mia bogo tai, be vaatara ka bogo na burumãara jokoluolu tai na kulo Ju nalo kialo bereio, napano be Jokoluolu na Yimo Tobobo. Mia jibe ka ga bogo nonovio, nalo miroano tiniel jii ka avavin Yerusalemo kanio.<sup>3</sup> Mia ka bogo na, Yesu kuruano nalo amil banio, aberinavo “Ei, jau kojo bogo jiu ea vio nei ruei, bo ka jau kalavon ka kavavin Yutea, ka kanamo naiagagoano nalo na yako nalo kija amijikia aial kijokijo nalo namã jau kojomã komilaio.<sup>4</sup> Jau kojidom ka tomu nalo ajikia vatitigso, a kojomã kominãu lukuluku ga. Ver be riano ka namã jau komila burumãara burutomoluo nalo nei, bo kanio kava koyotuba ea yetemeriba mirano.”<sup>5</sup> Mia nalo nei kialo iliano nei jibe ka amiyotel ea ga Yesu, bior nalo abe kuruano memedu, mia nalo maka amonea naio.

<sup>6</sup> Mia Yesu berdopelo, naio berinavo “Kamiu kumijikia kuvila kenemiu vite nalo ea bogo na vabe ga napano kamiu tiniemiu jii ka kuvilaio, mia kiaku burumãara bogo naio maka rimei vo.”<sup>7</sup> Kamiu

kumijikia kuvila kenemiu imãuano nalo rivu ga, tomu nalo maka ajikia aserni ka kamiu rivorio, mia bogo na kiniou nemila kiaku imãuano, neberial ka kialo bajago va nalo na yetemeriba nei maka rimemedu, mia nalo ajerni ka kiniou toru laka.<sup>8</sup> Tibe na mia kamiu ga kuvavin Yerusalemo, kiniou notobo nei ga beamu vo. Kiniou maka nejikia nava noyotuba ea mirano tomu nalo na jokoluolu nei, bior kiaku bogo jo binimej, mia maka rimei nonovio vo.”<sup>9</sup> Naio ber iliano nei banlo, avona iorou kanio ana nalo abano ana naio jobo.

### *Iorou kanio ana Yesu bavin ea jokoluolu*

<sup>10</sup> Yesu jobo jibe na, mia maka vesiou ga, naio bunu bavin Yerusalemo, mia maka tibe ka na tomu nalo amijikia aial naio, mia naio milavan naio.<sup>11</sup> Naruei tomu na tortoru na kulo Ju nalo, ajumã ajidomiio ruei ka pãli mia naio rimei ea jokoluolu, naruei nalo ajumã ajiravo naio janea vio, abivika aber naio jo be.<sup>12</sup> A tomu nalo bunu, bogo nonovio ajumã aberverii naio, napano nalo tealo ajumã aber naio be toro na bo tai, a tealo aber naio kirivova, naio jomã mila niegeniege m̃lea tomu nalo kialo jidomiano.<sup>13</sup> Ajumã aberverii Yesu jibe na, mia maka atumã averial naio ea vio medave, bior amerou ka ver kialo tomu na tortoru ajogio, mia ala titai kalo.

### *Yesu ba miyotuba ea Atua kunuano lu*

<sup>14</sup> Mo nalo ajua jokoluolu banbano-o na, legiano tealo barlaka ruei, mia Yesu naio mial bo ka riva rivavin ea Atua Kunuano Lu ka riverloglog tomu nalo bereio.<sup>15</sup> Mia bogo na tomu na tortoru na kulo Ju nalo kialo amijog kiano verloglogiano novo nei, amiilo toru laka, aberinavo “Jumãbe ana tete nei naio mijikia vatitig Atua kiano iliano jibe na? Naio maka rivan ea yimo na verloglogiano leleio,

mia kiano verloglogiano kirinovo-omia!”

16 Ana jibe na Yesu naio berial banlo, berinavo “Venia namãa no-joãa nejilloglog ban kami, maka ve kiaku, mia be Teta na naio miila kiniou nebinimeia ea yetemeriba nei kiano. 17 Ver toro tai saaro ka rila ga Teta kiano jidomiano, mia naio rila toro nene mijikia rivitii vatitig kanaku verloglogiano nalo. Mia toro nene naio mijikia rivitilubar ka kiniou maka noto neverloglog tomu nalo selia ga siaku, mia mijikia rivitilubar ka verloglogiano nalo nei, be riano laka ka amaluvo ea Atua. 18 Ver kito reial toro tai tomãa rila iliano ea siano bereio, kito romijikia ka naio joãa midular naio ga rivavin. Mia ver toro na mãa mil, midular kiano toro na toru siano napano miila naio binimeia, romijikia ka naio be riano ga, naio maka tomãa rilasibi.

19 “Toro tai na mila jibe nei be Mosis. Atua jian kiano tuboiano banio, naruei naio binimeia jian ban kami, ana kami kumitumãa kumila kokorovio ruei. Mia jumãabe na kami kumisidom kuvuebin kiniou namãaro, bior kuberinavo namila korov tuboiano? Naio memedu jibe na?”

20 Naruei tomu nalo aberdoþe aberinavo “Jerei, vonganeei kojomãa komil vovu jibe ka simãaro tai joaso! Kei jidom rueso? Koverial vonio!”

21 Ana Yesu berdoþe, berinavo “Nanua beamu nebinimeia ea vio nei, nemila burumãara burutomoluo tai ea miremiu, nemieliel ka toro na be javuluku. Mia bogo na kumialio, maka kumisaaro kano, kuberinavo kiniou nomimãau bova ga ka napano nemila ea Legiano Lu. 22 Mo bo ka kami kuvilavon ka tiniemi rimaio bunu ka bajago na pakuveu, javukia tormoruo Mosis naliko tormoruo dolu nalo na beamu ka naio, jibe ka Epraamo nalo, ajian ban kito. Naio bunu be imãauano tai kiana, mia ver legiano na ala rijoru ea Legiano Lu,

kami maka kuvisidomialio, na kumitumãa kumila ga. 23 Kami kumitumãa kuber maka kuvisidom kuvila korov Mosis kiano tuboiano, mia damãariga kumijamo ka ala imãauano na pakuveu ka Legiano Lu nei, naio bo ga na. Mo ver kami kumijamo ka nina, ana bior vaio ana kami tiniemi mimi mēle jibe na ban kiniou bior kiri imãauano sesa novo na kanaku na takurano ga nei, napano namila batitig kiri tavaliki nei niabeno bo bereio ea Legiano Lu? 24 Kiniou nemial jibe ka kami kumitumãa kubitii vite nalo na jibe nei ea kulukuti ga, mia bo laka ka kuve masou kija, kuvilavonio ka kuvisidomii rivu vite nalo riva rivokar niamoiou.”

*Aberivonvon ka Yesu be Naverikariano þeli na maka ve naio*

25 Ana ka bogo na tomu telabo na Yerusalemo amial ka napano Yesu joãa berloglog joomo ea Yimo Lu, mia nalo amiilo, aberinavo “Ierinioga na! Toro nene kia ga nei navo, napano tomu na tortoru ajumãa aberajidom ka auebinio rimãaro. 26 Be naina joãa berial kiano iliano jibe na ga, naruei nalo maka bunu alavon ka ala titai ka leleio. Kito maka rejikia, þeli maka asidom ailvanio bior napano abitilubar batitigio ruei ka be riano ka toro nei, naio be kiado Naverikariano memedu. 27 Mia makanio, maka rejikia ka reverenio aver naio nina ga, bior napano kiado moneano tai ruei, ka Naverikariano, bogo na ver naio riyotuba, mia maka ve toro tai rijikia river naio joa vio be na binimeia na. Mia toro nei Yesu, kito nonovio romijikia kiano vonuo ruei.” Nalo aber jibe nei, aber þeli Yesu abario jo Nasarete, mia makanio, naio abario jo Betleem.

28 Mo bior nalo ajumãa aber jibe na, Yesu jaamãi ka berlogloglo joomo ea Yimo Lu, naio berial iliano nei banlo, berinavo “Kami kuberiamãa kumijikia kiniou, a kuberiamãa kumijikia vio napano nebinimeia eao,

mia nemial jibe ka maka kuvijikia batitigio rivu. Nebinimei ea vio nei, maka ea kiaku jidomiano, mia toro dolu tai miila kiniou nebinimei, napano naio be burupati na iliriano. Mia jibe ka maka kuvijikia kiniou, mia maka kuvijikia naio bunu. <sup>29</sup> Mia naio, kiniou naruei napano nemijikia naio batitigio bo, bior ka napano naio naruei miila kiniou nebinimei ea yetemeriba nei.”

<sup>30</sup> Mia Yesu kiano iliano nalo na jibe nei mila ajikili lie vo ka monoka avokakar naio, ana maka ve toro tai leleio ka napano mijikia tokolio, bior ka napano kiano bogo maka rimei vo. <sup>31</sup> Ajidom aue naio, mia tomu nalo miroano laka amonea naio ruei, bior burutomoluo nalo napano jomã milaio. Aber jibe nei aberinavo “Ana mia Naverikariano na vabe napano mijikia rimei rila burutomoluo venia bereio tovulu naio? Makanio, tete nei naio be kiado Naverikariano memedu kiana.”

#### *Amiila tomu na mira aban ka Yesu*

<sup>32</sup> Mia Varisis tealo ajumã amia-gago ka tomu nalo namã amijakar Yesu ka kialo iliano nalo, mia amila soḻeli, aba amil bija kulo lu na tortoru nalo, naruei abiorkar ka monoka ala titai ka Yesu vonganei ga. Ana amiila kialo kukuano nalo, ka ava asirago buluvio ka avokar Yesu, ka avuru naio rimei bere vanlo.

<sup>33</sup> Ana Yesu berial, berinavo “Mia kiniou nemijikia noto vija kamiu bogo ve telisu ga bereio, karina navan bereio ea naio napano miila kiniou nebinimei. <sup>34</sup> Bogo napano navan bisi, mia kuvila von ka kuvisirag kiniou rivanvano-o, mia maka kuvijikia kuvileal kiniou. Vio napano mia nava notoaiio, mia maka kuvijikia kumei eaio.”

<sup>35</sup> Mo bogo napano tomu na tortoru na kulo Ju nalo kialo amijog iliano nei, abitovitonu eaio, ajumã aber kalo, aberinavo “Kema na jo ber vio be na, ka mia naio rivan ea karina mia kito rejikia re releal naio bereio eaio? Peli naio jidom rivan ea

vio dolu nalo na yetemeriba napano kuruado Ju aburo aban ea ka bogo na burumãara vurubureiano, tenene na naio jidom riva riverlogloglo kija koviobo? <sup>36</sup> Mia naio ber venia na, ber mia kito resirag naio rivano-o mia kito releal re naio. Mia tumãbe ea kiano iliano napano berinavo naio to rivan ea vio tai napano kito rejikia re ratakisorio, maka rejikia ravan eaio?”

Mia ka bogo na, kukuano nalo maka avokar Yesu vo.

#### *Yesu mioliolui Niununo Lu, be uei na meuliano*

<sup>37</sup> Naruei amila jokoluolu nene bano-o, na binimei bokar legiano maariano nene, napano jibe ka legiano na toru nene. Mia bogo napano aju vio takurano, Yesu jumolu bio jikili jibe nei, naio berial berinavo “Kamiu kei na midou jer, bo naio rimei ea kiniou, rimunu uei na meuliano. <sup>38</sup> Toro namã monea kiniou, mia rivu laka vanio, tibe ka namã Vivitauiano Lu naio berenio, napano berinavo

“Toro na jibe na, mia tiniene rivujo ka uei na meuliano, rivano-o rio magmago lou ea naio bereio tibe ka uei namã mieraro.”

<sup>39</sup> Mia Yesu kiano iliano nei, naio jijamerji ka Niununo Lu, bior ka napano naio mijikia ka iorou, nalo na mã amonea naio, mia avokar Niununo Lu. Mia ka bogo na, Niununo Lu naio maka rimei vo, bior ka napano Yesu naio jo kia navo ea yetemeriba nei, naio maka riva totano ea kiano vio lu na mave vo.

#### *Jidomiano niukniuku ka Yesu*

<sup>40</sup> Mia bogo napano tomu nalo amijog Yesu bio jibe na, kialo jidomiano nalo ba beve dolu. Nalo tealo aberinavo “Toro na, naio be naverialiano jibe Mosis namã kito romoneaio ka mia naio rimei.” <sup>41</sup> Tealo abeinavo “Nina, jibe na kovio, ḻeli na ver maka naio be kiado Naverikariano garuei.”

Mia nalo tealo aberdoĝe, aberinavo “Makanio, maka iliano tai napano river Naverikariano mia rive toro Kalele tibe ka tete na. <sup>42</sup> Kiado Vivitauiano Lu ajumã aber ga mia Naverikariano mia naio riyotuba ea Parinio Tubo Teviti kiano yati, mia naio rive toro re Betleem.” <sup>43</sup> Mia jidomiano telabo ka naio jibe na banbano-o, mila na tomu nalo aburuburevurelo bior Yesu. <sup>44</sup> Mo tealo nalo maka lele asaaro ka naio, amial bo ka avuku naio rivan ea nalakoiano, mia iorou kanio maka tai kalo napano ava vaataro kanio ka avokario.

### *Navuriñaraboiano nalo tinieljer Yesu toru laka*

<sup>45</sup> Mia iorou ka vite nalo na, kukuano nalo na Yimo Lu aban bereio ea kulo lu na tortoru bija Varisis nalo, ka asian veriiano rivano. Ana bogo napano amiyotuba ea miralo, tomu na tomormoruo nei maka aial Yesu, ana amil banlo, aberinavo “?Ana toro nene naio be napano numiila kamiu kanio? ?Bior vaio ana kamiu maka kuvuru naio rimei?”

<sup>46</sup> Naruei kukuano nalo nei aberdoĝe, aberinavo “Kumemi numiagago ka kiano iliano nalo abo mia abo, maka ve toro dolu tai napano mijikia riverloglog kito rivu tibe ka naio.”

<sup>47</sup> Mia verdoĝeiano nei mila Varisis nalo amiilo kanio, aberinavo “!Tomnei, vonganai kamiu bunu, kema na buru kenemiu jidomiano ba be vovu! <sup>48</sup> Kamiu kumijamo ka naio milasibilili kamiu, mia jumãbe, kamiu kumial ea kumemi tomu na tortoru ĵeli na ea kumemi Varisis, be tai napano amonea naio? Makanio. <sup>49</sup> Nalo ga namã amoneaio, nina be taara kirivova dedade nalo na, mia nalo na maka ajikia vite. Maka ajikia batitig kiado tuboiano rivu, Atua berkar iliano va ka kialo vironiano ruei.”

<sup>50</sup> Ajumã amil jikili jibe na, mia nalo tai milavio jikili ka rila kialo iliano rivatove bereio. Nina be Nikotimas, napano nua beamu ea bogiano

tai, naio ba jukunu bija Yesu. <sup>51</sup> Naio ber kalo, berinavo “Kito rojumã romil ea toro na jibe na, javukia napano rojumã rejibure naio ruei. Mia kiado tuboiano berbure nina, naio ber ver kito rosidom reil van toro tai, kito monoka rotutano ea komeli kitoliko, monoka rodu bogo rivanio ka naio riverial kiano jidomiano van kito, ka kito monoka rovika vikadeniano nalo ka releal ka be riano naio mila jibe na ĵeli na jumãbe. Nina naruei m̃arabo na ala imãuano memedu.”

<sup>52</sup> Mia maka asidom aiagago ka kiano iliano nei, bior amial ka napano naio mikurukar Yesu. Amil banio, aberinavo “!Tomnei, jau komã komil jibe na jau bunu kobe toro Kalele tai bereio! Kosidomii vatitig rivu ka venia napano Iliano Lu berenio. Maka leleio ve iliano tai napano riverial ka mia naverialiano vou tai naio tumolu rove yako Kalele rimei mave ea vio nei.”

<sup>53</sup> Naruei kialo iliano nalo ba birankakario ea vio na ga, karina nalo abeve terakurano abanvan bereio ea kialo vonuo nalo.

## 8

### *Tira napano aberenio amilealio ka naio be nasiakaiano*

<sup>1</sup> Naruei Yesu juvan Yimo Lu, naio miel ban bereio ea Suku Na Buruolivi. <sup>2</sup> Naio mon ea vio na-o viomijeni kon naio, ana kavijo naio ban bereio ea Yimo Lu na Atua Kunuano. Bogo napano tomu nalo amial naio, nalo telabo abinimei eaio, naruei naio jotano jomã berlogloglo.

<sup>3</sup> Mia maka vesiou, naverloglogiano na tuboiano bija Varisis nalo, aburu tira tai binimei eaio, amila naio jumolu jua mirano na tomu nalo. Tira nene, aju abokar naio jibe na bior aberenio naio mila siakaiano bija toro tai, mia nalo tai amial, aberialio. <sup>4</sup> Ana amila naio jumolu ju jibe na, amil ban Yesu, aberinavo “Naverloglogiano, tira nei amileal naio jomã mila siakaiano.

<sup>5</sup> Mia jibe ka napano Mosis kiano

tuboiano berenio ea tivelinio na kariano nei, vonganei naruei kumemi monoka nuvitubabinio ga riñaro. Mia tuboiano na Romo berenio be lu ka nuvitubabin toro. ?Mia jumabe ka jau, kiamo jidomiano jumabe?”

<sup>6</sup> Naruei vikadeniano nei, maka avika masosoua den Yesu, mia ajumã aburu vonvonio, ka naio river belbeleia titai napano mia iorou kanio ana amijikia atibure naio rivorio.

Mia Yesu naio maka riverdoþe, naio maka river vite tai, mia jurubanini ga, bitiri mãartukuji na jumãano naio bivitauiã iliano tai ea borotano.

<sup>7</sup> Ana ajumã abivika denio jumabe ka tira neibano, ana Yesu barlar naio bereio, mil banlo, berinavo “Mo, ver kamiu tai napano maka lele ve kariano tai toa kiano meuliano, mia naina rivuku puruveru na tukamu, tuba tira nei.” <sup>8</sup> Vaarakurano bereio, naio jurubanini batove, bivitauiã iliano dolu tai ea borotano.

<sup>9</sup> Mia bogo napano amijog venia napano Yesu ber kalo, ajikar ka abeve terakurano abanvan bereio. Na naio jukamu, be kialo tormoruo tai, mia iorou ka naio, nalo dolu bunu aburu dedade ealo beve terakurano, o-oa ka tira nei ga jumolu ju ea Yesu mirano. <sup>10</sup> Mia Yesu bitikar naio bavin, naio bika berinavo “?Tira, nalo napano aju be? ?Maka bunu nalo tai sidom tibureso?”

<sup>11</sup> Ana tira neibano naio berdoþe, berinavo “Tubo, maka bunu toro tai.”

Mia Yesu berenio berinavo “Bo ga, mia kiniou bunu natiibureso re. Jau komijikia kava vonuo bereio ga, mia kola re bunu kariano bereio.”

*Yesu ber naio be yulu na yetemeriba*

<sup>12</sup> Mo iorou kanio ana na Yesu mil banlo bereio, naio berinavo “Kiniou nebe yulu na yetemeriba, toro kei napano takisor kiniou, mia naio riel re bunu ea melijokouo, ana mia yulu na meuliano toa naio.”

<sup>13</sup> Mia Varisis nalo tealo napano aju kia navo abukular kiano iliano bereio, aberinavo “Jau kober jibe na, jau ga bereio komiija kanamo iliano, jau kojomã komidular jau bereio bavin. Tibe na, kumemi maka nuvijikia numoneaso, kanamo iliano maka ve riano ga.”

<sup>14</sup> Ana na Yesu berinavo “Peli namila jibe na kovio, mia kiaku iliano nonovio þeli kiaku verloglogiano abe riano laka. Kiniou nemijikia nonovio vite na tivelinio ea kiniou, ka kiniou nojo be na nebinimei ea vio nei, þeli na nojo nei ka mia nava be bereio, mia kamiu maka kumijikia lele tivelinio na kiniou. <sup>15</sup> Kumituñã kumitibure kiniou ea jidomiano na toro, mia kiniou maka netibure toro leleio. <sup>16</sup> Mia ver bogo tai netibure tomu nalo, mia kiaku tibureiano naio rimemedu ga, bior napano kiniou re ve takurano nalaio, mia kumemi juo naina napano miila kiniou nebinimei, kumemijuo nuvila buronio.

<sup>17</sup> “Mo ea kenemiu tuboiano, abivitauiã jibe nei berinavo ver ve tomu ve juo aikurukar iliano tai, mia kamiu kumoneaio, <sup>18</sup> naruei mia monoka tibe na bunu ea kumemi juo Teta. Kiniou neber kiniou neberiano, a naio mikurukar kiniou, mila na vonganei kamiu monoka kumonea kiniou.”

<sup>19</sup> Nalo amijog iliano nei, naruei abika denio, aberinavo “Jau kojomã kober karamãmo na, mia naio jo be vonganei?”

Ana na Yesu berdoþe, naio berinavo “Kamiu maka kuvijikia naio, jibe ga napano maka kuvijikia kiniou. Ver kumijikia batitig kiniou rivu, mia rila kamiu kuvijikia vatitig naio bunu rivu, a maka kuvijikia kuvika vikadeniano tibe na, ana makanio.” <sup>20</sup> Iliano nalo nei, Yesu berlogloglo ea Yimo Lu, nina ea tivelinio na naio, vio be na mia avar vatitig kiano ijaiano na veru nalo napano ajuvan ban Atua. Ana ea

bogo nei, maka ajikia avakar naio, bior maka kiano bogo vo.

<sup>21</sup> Ana Yesu berial bunu jibe na banlo, naio berinavo “Kiniou nava kovio den kami naruei. Bogo na ver nava kovio varlaka, mia kami kuvisirago kiniou, rivano-o mia kuvial re kiniou, mia kumarmaro vija kenemiu kariano nalo. Kiniou navan ea vio tai napano mia maka kuvijikia kumei eaio.”

<sup>22</sup> Telikiti napano tomu na tortoru na kulo Ju nalo amijog iliano nei, abika aberinavo “?Kema na naio jidom rila venia? Naio ber mia naio rivan ea vio tai na kito maka rejikia ka ravan eaio, p̄eli na naio ber mia rila kuku naio rimaro bereio bo?”

<sup>23</sup> Ana na Yesu berenio berinavo “Kenemiu jidomiano a kiaku jidomiano abe dolu laka. Kamiu kube na vio yetano nei ga, mia kiniou nebe na vio mave, kamiu kube na yetemeriba, kiniou maka neve kiano.

<sup>24</sup> Ana jibe ka napano kiniou neber rui, mia kumarmaro ga rivija kenemiu kariano nalo. Ver kumonea re kiniou ka kiniou nebe naio napano jo jobo jo, mia monoka tibe na ga.”

<sup>25</sup> Ana nalo abika, aberinavo “Abe jau kover vonio bereio, ka jau kobe kei.”

Ana na Yesu buku bere iliano banlo, naio berinavo “Kiniou nebe naio ga napano nanua jikar beamu rui binimej bokar vonganei, kiniou nojo neber kiniou nebe naio ga.

<sup>26</sup> Naina ga kiniou nojom̄a neber tivelinio na kiniou. A tivelinio na ea kami, ve vite miroano napano nemijikia neverenio, mia p̄eli ver neverenio, a be iliano na tibureiano nonovio. Ana vite nalo napano nojom̄a neberial ea yetemeriba nei, naio be iliano nalo ga napano nomi-jog den naio napano miila kiniou, bior damariga, kiano iliano nalo amemedu laka.” <sup>27</sup> Yesu bisi meravo ga jibe nei, berii karamano na mave banlo, mia maka ajikia leleio.

<sup>28</sup> Naio mil bereio banlo, naio berinavo “Telikiti napano kuvitelan kiniou Kulorinio Kenerinio mave ea iesi

m̄akolkolo bisi, mia kami kumijikia ka kiniou nebe kenemiu Naverikariano. Mia kami kuvitilubar ka napano vite nonovio nam̄a namilalo, maka nala kiniou ga ve takurano, mia damariga neber ga venia nam̄a Teta naio berloglog ka kiniou. <sup>29</sup> Naio naruei napano miila kiniou nebinimej, a naio jo bija kiniou vonganei. Naio maka leleio tuvan kiniou bogo tai, bior damariga nojom̄a namila vite nonovio jibe ka ga nam̄a naio jaaro kano.” <sup>30</sup> Yesu naio jojm̄a mil jibe na, kiano iliano nalo aburu kulo Ju telabo amonea naio.

### *Ilirianiano mila m̄arimieni nalo na kariano ajibirbili bereio*

<sup>31</sup> Yesu mil ban nalo na amonea dovorovo ea naio, naio berinavo “Ver kami kuvokar sikili kiaku iliano, kuvitum̄a kuviduio, kami kuve kiaku naiagagoano riano nalo. <sup>32</sup> Mia kami kuvijikia ilirianiano, naruei mia ilirianiano rila m̄arimieni nalo atibirbili den kami.”

<sup>33</sup> Nalo aberdope banio, aberinavo “Ai, abe kumemi nube tormoru Epraamo kiano yati nalo, maka numitum̄a numim̄au kurano ea toro na toru dolu tai. ?Mia jum̄abe ana jau koberinavo mia m̄arimieni nalo atibirbili den kumemi?”

<sup>34</sup> Yesu berdope, naio berinavo “Kiniou neber riano ban kami, tomu nonovio napano m̄a amila kariano, nalo abe tomu nam̄a aju amim̄au kurano bior kariano, m̄arimieni na kariano miadikarlo jikili. <sup>35</sup> Kami kumitum̄a kumim̄au kurano ga bior toro na toru na kariano kanano, mia kami kuve kiano m̄aratavo. Mia kiniou, notobo rivija karamaku, bior kiniou nebe kiano m̄aratavo memedu. <sup>36</sup> Kiniou nebe tete na mave, mia ver novulu bulag kami, mia kami bunu kumijikia kuvitu damariga vija kiniou ea vonuo na mave.”

*Yesu berenio nalo maka ave Epraamo kenerinio, nalo abe Simaro kenerinio*

<sup>37</sup> Ana Yesu ber bunu ka tomu nalo, naio berinavo “Kiniou nemi-jikia vatitig ka napano kamiu kube tormoruo Epraamo kanano yati nalo memedu, ana Epraamo kanano yati nalo nei naruei napano bo ka ver asaaro ka kiniou. Mia makanio, kamiu tealo kube yati nene nalo naruei napano kiaku iliano maka totano batitig rivu ea kenemiu iviso, naruei kumisidom toru ka kuvue bin kiniou nañaro. <sup>38</sup> Bo ka kamiu kumonea kiaku iliano nalo, bior kiniou nojomã neberial ga venia napano kiniou nemial bogo napano nojo bija Teta, mia kamiu kumituña kumila ga venia naña kumijog karamemiu naio berenio.”

<sup>39</sup> Mia aberdoþe, aberinavo “Riano ga, bior karamememi tormoruo buo Epraamo re nua nua laka.”

Ana na Yesu berinavo “Maka leleio! Ver kamiu kube tormoruo Epraamo kenerinio riano, mia bo ka kamiu kija kuvituña kuvila von ka kuvila vite nalo avu tibe ka naña naio milaio. <sup>40</sup> Ana makanio, kamiu kumituña kumila vite kirivova laka. Jibe kiniou, nebe toro tai naña nojomã neberial ga ilirianiano nalo napano nomijog Atua naio ber ka kiniou, mia kamiu kumituña kumisidom kuvuebin kiniou nañaro. ?Peli kamiu kuberiana bajago na naruei napano kenemiu tormoruo Epraamo tinien jii ka kuvilaio? <sup>41</sup> Makanio, kiniou nemial jibe ka maka naina, mia be karamemiu dolu tai napano naio jo, kamiu kumiñau kiano.”

Mia nalo aberinavo “!Jerei, venia na! !Kojidom kala kumemi nuve tete na m̃arabo nalo, kumemi maka nuvijikia karamememi! Karamememi takurano riano ga naio jo, naina be Atua.”

<sup>42</sup> Ana na Yesu berinavo “Ver iliano na be riano, ka Atua naio be karamemiu, mia kamiu monoka tiniemiu tii kiniou ve toru mia, bior ka kiniou najaluvo den naio nebinimeis ea vio nei. Kiniou maka nemei tibe ka napano kiniou ga, mia naio naruei miila kiniou nebinimeis. <sup>43</sup> Kiniou nojomã neberii vite nalo

na ban kamiu banbano-o kiride ga, mia dam̃ariga kamiu maka kumijikia leleio. Kiniou maka nejikia den kamiu, bior vaio ana maka kuvisidom ka kuvokar vatitig rivu kiaku iliano na? <sup>44</sup> Kamiu, karamemiu Siñaro, a kamiu tiniemiu jii ka m̃a kuvila tena bova tibe ka ga napano naio jidomio. Jikar nua ea tikariano binimeis, naio be toro naña muebintoro m̃aro a naio maka tinien tii ilirianiano, naio maka tumolu tua tivelinio ka naio leleio. Bajago na memedu na kiano, naio mil dam̃ariga ea burum̃ara kenieno sibiano nei, bior naio be burupati na sibiano nalo nonovio, naio be teta na bajago na sibiano. <sup>45</sup> Naio jibe nei, mia bogo napano kiniou nebinimeis, neberial ilirianiano novo nalo ban kamiu, mia karina kamiu maka kuvisidom kumonea kiniou bereio. <sup>46</sup> Mia kamiu kei na naio mijikia riverial kiaku beleano tai? ?Mia ver kumial ka nemil be riano, bior vaio ana maka kumonea kiniou?

<sup>47</sup> “Toro na be Atua kanano, naio jo miagago vatitig ka Atua kiano iliano. Mia kamiu na ver kamiu maka kuvisidom ka kuvijog kiano iliano nalo, nemijikia ka nina bior kamiu maka kuve kiano leleio.”

### *Yesu naio Epraamo*

<sup>48</sup> Mia Yesu kiano ilisikiliano nalo nei mila tomu na tortoru na Ju nalo amijog bova, ana nalo abika denio, aberinavo “Kumemi numijog aber jau maka kove Ju rimemedu na, jau kobe niabe leri na Sameria ga tai. Ana kumemi numial napano siñaro tai joaso, naio jonã milaso kobe kodovo kija. ?Iliano nalo na aberiano, þeli na makanio?”

<sup>49</sup> Ana na Yesu berdoþelo, naio berinavo “Makanio, maka ve siñaro tai toa kiniou. Vite nalo naña nojomã nemilaio, nemila ka karam̃akusiano rivavin. Vite nalo naña kamiu kumilaio ka kiniou, kumila ka siaku vatove. <sup>50</sup> Nina maka ve titai ea kiniou, bior ka napano kiniou maka noto noim̃au ka nala siaku rivavin. Mia be toro na toru jo napano naio jidom ka tom nalo bo ka atovon

kiniou, mia naio ga ve takurano tibure vite nonovio ea tivelinio na. <sup>51</sup> Mia be iliano tai napano be riano napano nemijikia never ka kamiu jibe nei, ka ver kamiu tai rivokar kiaku iliano sikili, naio rudukario, mia naio maka rijikia rial nañariano bogo tai.”

<sup>52</sup> Ana Ju nalo amijog iliano nei, aber ka naio, aberinavo “Vonganei numijikia batitig ka Siñaro joaso ruei. Jau kober toro napano tovonso mia naio maka rijikia riñaro, mia ve re toro tai napano mia maka riñaro bogo tai. Tormoruo Epraamo naio meul banbano-o karina naio mñaro, a naverialiano nalo bunu amiñau banbano-o karina añarmñaro. <sup>53</sup> ? Peli na jau komialso jau loa laka ka kiado tormoruo lu nalo a? ?Jau koberiaña jau kobe kei bereio, m?”

<sup>54</sup> Ana na Yesu berdoñe, naio berinavo “Ver kiniou neverial ka kamiu, ðeli kumial jibe na ka napano nomidular siaku bavin bereio, mia kamiu kuvial rivova. Toro dolu tai ga napano mña jo mila siaku bavin, nina naio napano mña kuber naio be kenemiu Atua, naina be karamñaku. <sup>55</sup> Naio, kamiu maka kuvijikiaio, mia kiniou nemijikia batitig naio. Kiniou maka nala sibi tibe ka kamiu, neber vatitigio ga na, ka kiniou nemijikia batitig naio bo, a kiano iliano nonovio, nemije batitig bo monea kiaku meuliano. <sup>56</sup> Nemijikia never bunu ka korobimiu tormoruo Epraamo, naio tai napano jidom toru ka rial kiaku bogo nei. Naio jidom rial ka kiniou noyotuba ea kiano torogio, nemei nala kiaku iñauano nei, a bogo na naio rialio bisi, mia naio saaro mia saaro.”

<sup>57</sup> Ana Ju nalo abika naio aberinavo “Jau maka kove tormoruo tai tibe naio vo, kanamo yuka maka rivokar duelimo va limo [50] vo. ?Ana na juñabe ana jau kojomña kober jau komijikia tormoruo Epraamo re nua nene? ?Jau komial kovio tai?”

<sup>58</sup> Ana Yesu naio berdoñelo, naio berinavo “Kiniou neber riano ban

kamiu, ka tormoruo Epraamo re nua nei, kiniou nojukamu laka ka naio. Bogo na naio maka vo, mia kiniou nebe naio napano jo beamu ruei.”

<sup>59</sup> Ana telikiti napano kulo Ju nalo amijog ka napano Yesu jonña ber kiri iliano telisu neibano, napano naio jibe ka Atua siano lu tai, ana amijikia ka naio jo ber naio be Atua, mia nalo tiniel mimi toru. Naruei ajirag puruveru ka atuba Yesu riñaro, mia naio juvan naio bena ga denlo, juvan Yimo Lu ba tavio bereio bano.

## 9

### *Toro napano naio miyotuba naio be merebono*

<sup>1</sup> Ana kumemi naiagagoano nalo kumemi liko Yesu numiel nubano, naruei bogo na numituñña numiel nuban jibe na, numial toro tai napano bogo na naio miyotuba, naio be merebono. <sup>2</sup> Mia nubika den Yesu, nuberinavo “?Naverloglogiano, venia mila kema na? ?Peli mauo na kiano kariano ga, ðeli na mauo na kenieno naio karamñano kialo, mila naio be merebono jibe na?”

<sup>3</sup> Ana Yesu berdoñe naio berinavo “Peli ga, naio maka ve kiano kariano, a maka ve kariano na kiano tormoruo juo kialo, mia naio miyotuba jibena ka rila ga ka mia tomu nalo amijikia aial moroano na Atua kiano riñau ea kiano meuliano. <sup>4</sup> Jibe na, mia nalarur naio vonganei, bior bogo napano viomijeni kia ga vo, kito monoka roimñau sikili, monoka roimñauka naio napano miila kiniou nebinimei ka kiano iñauano nalo. Melijokouo jo binimei, napano kito maka bunu rejikia roimñau eaio.

<sup>5</sup> Mia vonganei, kiniou nojo yetano ea vio nei, kiniou nebe yulu na yetemeriba nei.”

<sup>6</sup> Yesu naio ber jibe na bisi, ana naio buvulei ea bulukievi na borotano, naio monkorkor batove mila kitkiti titinio melmeloko jibe bulukinia, karina naio bijan ea toro neibano mirano be juo. <sup>7</sup> Ana naio

mil banio, naio berinavo “Mo, jau kavano, kavatove ea bulukuei na Sailomo, kesekon batitig bereio miramo.”

Uei napano Yesu berkanio, siano naio berenio “uei na riila rivano.” Ana toro nene naio batove, mila jibe na, mia mirano abinimei abo. Ana naio binimei bereio kean kumemi bija Yesu, napano naio mijikia bitilubar vite nonovio bo.

*Iliano telabo ka tivelinio na merebono nei*

<sup>8</sup> Ana iorou, nalo na vaataro ka toro nei, bija nalo nanua beamu amial naio joña miogiog, amial naio bereio, mia aberenio aberinavo “? Merebono ña na naina ðeli, napano beamu joña miogiog sano janea vio dañariga na, ðeli na maka ve naio?”

<sup>9</sup> Mia nalo tealó aberinavo “Nao, naio ga na,” a tealó aber “Ee, toro dolu ga na napano midu mirano,” mia toro nene naio ga berial meravo banlo, berinavo “Kiniou nene nei.”

<sup>10</sup> Mia bogo napano berial naio banlo jibe na, ana abika denio, aberinavo “Juñabe ana miramo bo bereio jibe na?”

<sup>11</sup> Mia naio berdoþelo, berinavo “Toro ña na Yesu, naio naruei miñaukanio. Naio mila kitkiti bulukinia telisu ea titinio, naio miaia jeleig miraku, ana naio berenio navatove ea uei na Sailomo, nesekonio bulag den miraku bereio. Mia nemila ga jibe na, nabatove, nejekon miraku, namial jibe ka tinia miraku bo naruei.”

<sup>12</sup> Ana nalo abika Yesu denio, aberinavo “?Mia toro nene naio jo be vonganei?”

Naio berdoþelo berinavo “Maka nejikia, maka bunu naialio.”

*Varisis nalo aburubure jidomiano juo ka tivelinio na ielieliano nei*

<sup>13</sup> Ana iorou, aburu toro neibano beamu mirano bono ba ban Varisis nalo ka amijikia aialio. <sup>14</sup> Aburu naio ba jibe na bior napano legiano napano Yesu milarur toro neibano mirano eaio, naio be Legiano Lu tai, mia nalo aberinavo ðeli Yesu

mila iñauano tai napano tuboiano na legiano nei naio berbureio.

<sup>15</sup> Telikiti napano abinimei aberial ka Varisis nalo, abika den toro nene, aberinavo “Mo, jau kija kala vonio ka kover juñabe ana miramo binimei bo.”

Ana naio ber ga jibe nei, naio berinavo “Maka, toro nene bijan bulukinia melmeloko telisu ea miraku, avona bisi ana nabano nejekon bulagio bereio ga, ana kiniou nemijikia nemial vite nonovio bo.”

<sup>16</sup> Telikiti na Varisis nalo amijogio, tealó aberinavo “Toro naña mila tena, naio mila jibe na naio maka rialerinio ea tuboiano na Legiano Lu. Jibe na naio maka taluvo den Atua rimei.”

Mia tealó dolu aberenio aberinavo “Þeli ga, ver be riano ka naio be toro va tai napano mila korov tuboiano, juñabe ana naio mijikia mila burutomoluo novo nalo jibe na?” Ana nalo aberii jibe na bano-o, mila na ajua jidomiano juo biorio.

<sup>17</sup> Ana nalo abika bereio den toro nei napano beamu naio mirano miunu, aberinavo “?Ana jau, jau na naruei napano naio miñauka miramo, mia jau kover venia tivelinio ea toro neibano?”

Naruei naio berdoþe memedu ga banlo, berinavo “Naio be naverialiano riano tai.”

<sup>18</sup> Naio ber jibe na, mia tomu nalo na tortoru na Ju nalo maka amonmonea veriiano na, maka amonmonea ka beamu toro na mirano bono, vonganei naio mijikia jirarag. Karina abio karamñoano a kenieno abe juo ka amei aialo.

<sup>19</sup> Telikiti naljuo abinimei, abika denlo, aberinavo “Kuvitii vatitig toro na vonio. ?Nina be kenerimiu memedu, napano aberinavo naio miyotuba naio be merebono, ðeli na maka ve naio? ?A ver be naio, juñabe ana mirano binimei bo bereio jibe na?”

<sup>20</sup> Naruei aberdoþe, aberinavo “Kumemi numijikia ka naio be

kenerimemi, numijikia ka bogo napano nubario binimej bokar vonganei, naio be merebono batitigio. <sup>21</sup> Mia kumemi maka nuvijikia jumabe ana naio mijikia mial vite nalo vonganei, kumemi maka numijikia keinia napano mila mirano binimej bo bereio jibe na. Mia bo ka kamiu ga kuvika vonio, naio maka ve tete na, naio mijikia mil.” <sup>22</sup> Tom juo na amil jibe na, ajuvan kija ga kialo jidomiano, bior ka napano tomu na tortoru na kulo Ju nalo aberiio rui aberial ka toro kei napano naio rimonea ka Yesu be Naverikariano, mia avukular naio tusolo re bunu ea Atua kunuano lu. <sup>23</sup> Aberial jibe na, na tomjuo nei amerou, mila aberinavo maka ajikia ga, aberinavo “Bo ka kamiu kuvika naio ga, naio maka ve tete na.”

*Varisis nalo amil bereio ban toro nei napano be merebono*

<sup>24</sup> Ana vaarakurano bereio, abio bere merebono nei nua naio binimej joomo keanlo. Naio ba joomo naruei amil jikili banio, aberinavo “Jau kover Atua na mave siano, jau koverial vite nonovio na be riano ga van kumemi, bior vonganei kumemi numileal rui ka kema na naio be toro kirivova na lakoroviano na tuboiano.”

<sup>25</sup> Ana toro nei naio berdoŝelo, naio berinavo “Naio be toro na bo ŝeli maka ve toro na bo, kiniou maka nejikia. Vite takurano ga na kiniou nemijikia, jibe ka. Nua beamu, miraku bono batitigio, mia vonganei kiniou nemijikia nemial vatitig vite nonovio.”

<sup>26</sup> Mo nalo abika aberinavo “? Mia ver tibe na, naio miŝau kaso jumabe? ?Naio mila batitig miramo jumabe?”

<sup>27</sup> Ana toro nei berdoŝe, berinavo “Kiniou neber bisivisii vatitig bo vite nonovio ban kamiu vaarakurano rui, mia kamiu maka kuvisidom kuvijogio, ana vonganei kumisidom kuvijogio bereio. ?Kar venia? ?Peli tiniemiu jii ka kamiu bunu kumei kuve kiano naiagagoano nalo na?”

<sup>28</sup> Naio ber jibe na, jibe ka naio miyotel ealo kija telisu, mia nalo tiniel jer mŝlea naio, amil jikili banio, aberinavo “!A! Jau ga kove kiano naiagagoano, kumemi nube naiagagoano nalo na tormoruo lu Mosis kiano. <sup>29</sup> Mosis nei, kumemi numijikia batitigio bo ka be riano ka Atua berial kiano iliano nalo banio, mia tivelinio ka toro dolu na, kumemi maka nuvijikia naio, ka naio be toro na vio be ŝeli na naio binimej jumabe.”

<sup>30</sup> Naruei toro nei naio berdoŝe, naio berinavo “!Tomnei, kiniou nemilo va ka kamiu ka napano maka kuvijikia naio! Naio jomŝa mila burumŝara iŝauano nalo jibe na, banbano-o na naio mila batitig miraku, mia kamiu maka kuvijikia ka naio be kei ŝeli na naio be toro re be. <sup>31</sup> Kito romijikia ka ver toro va naio rivio van Atua, mia Atua maka rijikia riagago kanio, mia ver toro na be toro namŝa milotu ka naio a napano jomŝa mijogkario, ver naio rivio naio, mia naio riagago kanio. <sup>32</sup> Mia toro nene, Atua jomŝa miagago ka naio, bior jikar ea tikariano na yetemeriba nei binimej bokar vonganei, maka lele aial toro tai rilarur bereio toro napano naio miyotuba mirano bono. <sup>33</sup> Kema na naio monoka jaluvo ea Atua ga binimej ea vio nei, ver ŝeli naio rijikia re rila vite tai leleio tibe na.”

<sup>34</sup> Mia maka lele asaaro ka napano toro nei mil banlo jibe nei, aberinavo “Tomnei, jau, jau toro kiriniagiago laka. Jau komiyotuba bija bajago na kariano ga, binimej bokar vonganei. ?Mia jau kobe kei koberiamŝa komijikia koverloglog kumemi bereio, ee kamali?”

Amil niegeniege naio banbano-o na, amijil lar naio batavio bereio.

*Toro merebono nei naio balea Yesu*

<sup>35</sup> Mia maka vesiou Yesu naio mijog ka napano amijil lar tete nei jibe na, mia ba milealio, bika denio, berinavo “?Jumabe? ?Vonganei jau

komonea Kulorinio Kenerinio rueli p̄eli makan vo?”

<sup>36</sup> Mia toro nei naio bika den Yesu, naio berinavo “?Ana naina kober na, naio be kei? Ver jau komijikia koverialio ka kiniou, mia nemijikia nomonea naio ga.”

<sup>37</sup> Ana Yesu berdoḡe, naio berinavo “Jau komial naio rueli, jau komial naio vonganei. Kiniou ga nene nei, naḡa nojo nemil bijaso nei.”

<sup>38</sup> Ana naio berdoḡe, berinavo “Aiou Tubo, ver tibe na, kiniou nomoneaso vodolu.” Ana toro nei jidel dolu ka miaia Yesu.

### *Yesu mil ban Varisis nalo*

<sup>39</sup> Ana na Yesu mil, berinavo “Kiniou nebinime i ea yetemeriba nei ka nevitii tomu nalo, ka rila meravo ka tomu nalo naḡa abe merebono, amijikia aial vite, a ka tomu nalo naḡa aberiaḡa amijikia amial vite, ajikia ka abe merebono ga.”

<sup>40</sup> Mia Varisis tealu aju vaatara ga, amijog iliano nei, abika den naio aber “?Ana jau kober kumemi bunu nube merebono a?”

<sup>41</sup> Ana Yesu berdoḡe, berinavo “Ver ve riano ka kami u kuve merebono naio bo ga, kami u kuvijikia re kuvar vironiano riviorio. Mia bogo napano kumituḡa kuberinavo kami u kumijikia kumial batitigio vite nonovio, buruḡara beleano na joa kami u rueli.”

## 10

### *Jamerijiano na burusio na nunu nalo*

<sup>1</sup> Ana Yesu naio mil lie vo, naio berii jamerijiano tai banlo, ka tivelinio na burusio na nunu, napano ajuḡa amiaḡau vei ka napano mia nunu na tomu ve telabo kialo amijikia atu amon jouro eaio. Naio berenio jibe nei, berinavo “Kiniou neber be riano ka kami u, ka toro naḡa maka selia morouo ka riva jouro ea burusio na nunu nalo, mia naio mijalua burusio, toro na jibe na naio be toro va na vinauano ga. <sup>2</sup> Mia naio napano ḡa jeljel ea morouo naḡariga memedu, naio

naruei be toro na be riano na bitikar nunu. <sup>3</sup> Ver adu toro tai to ka ḡa riviti kuku ka morouo, mia bogo na toro na bitikar nunu rime i, mia morouo mijikia rivetavo ga ka naio, mia bogo napano naio ba jouro, nunu nonovio abiniu amijog jono, mia naio bio nalo na ga abe kiano sialo, mia nalo nei ga ajumolu, naruei naio jukamu kalo abava tavio. <sup>4</sup> Telikiti napano naio jukamu kalo abatavio bisi, naio miel jukamu kalo, ana nalo amiel iorou ka naio abano, bior ka napano amijikia vatitig joa na jono. <sup>5</sup> Nalo maka ajikia ala tibe na ka valauo tai, mia nalo amerou ga kanio, bior napano amijog lubar dede joa na toro dolu jono.”

<sup>6</sup> Jamerijiano nei Yesu ber kalo, mia maka ajikia yati nene.

### *Yesu ber naio be morouo na burusio na nunu*

<sup>7</sup> Jibe na, mia Yesu mil lie vo banlo ea tivelinio na burusio na nunu, naio berinavo “Kiniou neber riano ka kami u, ka morouo na burusio na nunu nalo, kiniou nene nei. <sup>8</sup> Kulo dolu naḡa abinime i jukamu ka kiniou, naḡa amila sibi aber mia avitikar vatitig nunu nalo, abe tomu kirivova na vinauano ga, a bogo naḡa aba amiyotuba ka nunu nalo, nunu nalo maka ajogilo. <sup>9</sup> Kiniou ga nebe morouo na burusio, toro na rime i selia kiniou ga, mia kiniou nevitikar vatitig kiano meuliano. Mia naio mijikia rivatavio ka sirago sano sinaniano, karina mijikia rime i rimon jouro ka bogiano, naio mijikia rime i rivan tibe na rivu ga. <sup>10</sup> Toro na vinauano naio ḡinime i ka rivuru bulag bena nunu, p̄eli na rue binvinlo aḡarm̄aro, p̄eli na ka rila lelanlo ve toru ga, mia kiniou nebinime i ka ajikia avokar meuliano, ka amijikia asaaro ka meuliano tai napano rivu laka rivanlo.”

### *Yesu naio berinavo naio be toro na vitikariano na bo na nunu nalo*

<sup>11</sup> A Yesu ber bunu, naio berinavo “Kiniou nebe toro na vitikariano na bo na nunu nalo. Toro na bitikar batitig nunu nalo, naio

monoka saaro ka rijamo ka kiano meuliano ka rilarrur nunu nalo kialo meuliano. <sup>12</sup> Ver toro na imãuano ga tai, naio maka rijikia rivitikar rivu nunu nalo tibe na, naio maka tinien tiilo tibe na, bior maka ave kiano nunu nalo. Ver bogo tai naio rial burumãara kuli deden amei rivior nunu nalo nei, mia naio rimerou ga, naio tumolu rivuro, naio tuvan nunu nalo atubo ga, naruei mia kuli deden nalo nene abinimei ajer lo ana amlabulag lo, ana amjilo aburo aba dedade. <sup>13</sup> Toro nei buro den nunu nalo jibe na, bior naio be toro tai napano mimãauka kiano veru ga, mia naio maka rialerinio ea nunu nalo leleio.

<sup>14</sup> “Mia kiniou, nebe toro na nabitikar batitig bo kiaku nunu nalo. Kiniou nemijikia batitig bo nalo napano abe kiaku, a nalo bunu amijikia batitig kiniou bo. <sup>15</sup> Kumemi numijikia batitig kumemi javukia napano kumemi juo Teta numisidom batitig kumemi juo bo. A kiniou tinieku jii kiaku nunu nalo bare ka najamo ka kiaku meuliano riviorlo. <sup>16</sup> A kiaku nunu dolu nalo miroano napano aju bunu, napano maka amei atu jouro ea kiaku burusio nei vo, naruei kiniou monoka novio nalo bunu, mia bogo na ajog jooku, mia amei. Mia kiniou nala tibe na-o mia kiaku nunu aviniu amei ave burukuti ve takurano ga vija kiniou, kialo toro na vitikariano na toru nene.

<sup>17</sup> “Rivano-o mia kiniou najamo ka kiaku meuliano riviorlo, naruei mia karamãaku naio saaro ve toru ka kiniou kanio. Mia nemijikia never bunu ka kiaku meuliano nei napano ver nesian rivano, mia nodu bereio. <sup>18</sup> Vere toro dolu tai napano mia rudular kiaku meuliano nei den kiniou, mia kiniou ga takurano nemijamo kanio. Be kiaku ga nesian rivano, a be kiaku ga ka mia nodu bere rimei. Ka noimãu tibe na, Teta ga mije monea kiniou.”

<sup>19</sup> Ana bogo tai bereio, Yesu kiano iliano na jibe nei mila na kulo Ju

nalo aburuburelo ea jidomiano juo bereio. <sup>20</sup> Telabo kalo aberinavo “Simãaroba ga joa naio, kema na miavovu tanea na! Kuviagago ka re naio!” <sup>21</sup> A tivelinio dolu aberinavo “Makanio, kiano iliano na bo nalo na maka ave iliano na toro napano simãaroba toa naio. ?A mia tumãabe, mia simãaroba naio mijikia rilarrur merebono binimei rivu bereio jibe ka napano naio mila ruei na?”

*Yesu berial naio batitig bo ban kulo Ju*

<sup>22</sup> Ana ea bogo na be bogo na jokoluolu na toru bereio, mave yako Yerusalemo. Jokoluolu nei abio ka Jokoluolu na Aioko Vatitig Atua Kunuano Lu, a ajuãa amilaio ea bogo na niavo. <sup>23</sup> Yesu bunu ba joa jokoluolu nene, ana bogo tai miel ban ea burumãara mãarsuãiki nei namã abio ka Solomon kiano Marsuãiki.

<sup>24</sup> Naruei tomu na tortoru nalo na kulo Ju napano aju, abinimei amivonlo jeliviv ea naio, abika jikili denio, aberinavo “Bogo jiou ruei kumemi numisidom nuvijikia vatitigso ka jau kobe kei, mia jau komila lukuaso ka kumemi mia! Ver jau kobe kenememi Naverikariano riano, kumemi numisidom ka jau monoka koverial vatitig rimeravo rivu van kumemi vonganei.”

<sup>25</sup> Ana Yesu berdoãe, naio berinavo “?Ana kiniou neber batitig bo ban kamiu ruei, ãeli na makanio? Kiniou neber ka kamiu ruei mia maka kumonea ga. A burumãara imãuano nalo napano mãa nemi-laio ea karamãaku siano, jibe ka napano kamiu kumituãa kumialio ruei, nalo bunu abisikon kiniou jo medave bo ka kamiu, <sup>26</sup> mia naina bunu kamiu maka kumoneaio. Peli nina bior kamiu maka kuve burukuti na kiaku nunu nalo. <sup>27</sup> Kiaku nunu nalo amijog lubar joa na jooku, a kiniou nemijikia batitiglo abiniu, a nalo ajuãa ajakisor kiniou. <sup>28</sup> Kiniou nojomãa nejian meuliano

nei napano maka ve jukuti nene banlo, ka mia ava kovio deio, a ve re toro tai napano mijikia rivuru bulaglo den jumaku. <sup>29</sup> Nina bior napano karamaku naruei napano naio jianilo ban kiniou, a naio jikili lie jovulu tomu dolu nalo nonovio, mia maka ve toro tai napano rijikia rivuru bulagio nunu nalo nei den jumano. <sup>30</sup> Nao-o, kiniou bija Teta kumemi juo nube takurano.”

### *Kulo Ju nalo tiniel jer Yesu*

<sup>31</sup> Mia bogo napano Yesu ber iliano nei bisi, ana tomu na tortoru na kulo Ju nalo tiniel jer naio bereio, abar puruveru ninio ga ajidom atuba ka naio rimaro. <sup>32</sup> Yesu mialio, ana mil banlo, bika ber “?Kiniou namila burumara imauano telabo na bo na Teta naio jidomio ka nala ea miremiu rui, ana kamiu kumisidom kuvituba kiniou tibe na bior na vabe kalo?”

<sup>33</sup> Ana nalo aberdope, aberinavo “Maka, kumemi nuvisidom nuvitubaso, maka rivior imauano na bo tai, mia bior napano jau kojoma komila niegeniege laka ka Atua siano lu, ka napano jau, kobe toro ga, mia damariga kojoma komila von ka kalaso kotibe ka Atua garuei.”

<sup>34</sup> Ana Yesu berdope, naio berinavo “Ea kiado Niosi Lu, Atua kiano iliano tai joa Niosi na Iouano, napano naio mil ban kulo Israel, naio berii jumabe abe kenerinio, ana naio mil jibe na banlo, naio berinavo ‘Kamiu kumitibe ka atua nalo ga.’

<sup>35</sup> “Tibe na, ea vio nei kito romial napano nalo napano Atua kiano iliano nene ban ealo, abe kulorinio ga nalo, mia iliano nei berinavo nalo abe atua nalo, a iliano nene naio be kiado vivitauiano lu tai, naio monoka ve riano ga. <sup>36</sup> Atua naio berii kiano tomu nalo jibe nei rui, ana mia jumabe ka kiniou, napano kiniou ga takurano naio mioa kiniou miila kiniou nebinime i ea yetemeriba nei? Memedu

ga ka neverenio ka naio be Atua karamaku, a kiniou nebe kenerinio, a mia kamiu kuber maka rivu ka naber jibe nei. Mia kamiu kuber nojoma namila niege Atua siano lu, mia maka tibe na. <sup>37</sup> Ver be riano ka kiniou nojoma nomimau maka ve karamaku kiano, mo, kamiu kumonea re ana bo ga. <sup>38</sup> Mia ver kiniou notoma nala kiano imauano nalo, peli mia kumonea kiniou peli na kamiu kumonea re kiniou, mia kamiu monoka kumonea kiaku burutomoluo nalo, ka abe Atua kiano burutomoluo riano. Ver tibe na, mia kamiu kuvijikia kuvitilubar ka Teta naio joa kiniou be riano, a kiniou nojoa naio.” <sup>39</sup> Yesu naio ber jibe na kalo, mia kialo jidomiano nalo kirisikili bare damariga. Amila von ka avokar sikili naio bereio, mia amiilo ka napano naio jaluvo iviso denlo bano.

<sup>40</sup> Naruei Yesu naio jaluvo Yerusalemo, barkor uei na Yortano nei ba tivelinio ea vio nanua Jone Baruei naio baruei ea tomu nalo. Naruei Yesu joa vio na kirisioi kija, <sup>41</sup> mia tomu nalo ajuma abinime i ka naio damariga. Abinime i, aberii Yesu aberinavo “Jone nanua na naio maka rila burutomoluo tavukia nama kema nei naio joma milaio, mia naio joma berial vite telabo ea tivelinio na naio, naruei kito rojuma romial ka mirado ka napano vite nonovio napano naio berenio na ajuma abinime i be riano ga.” <sup>42</sup> Naruei kialo jidomiano jibe na mila napano nalo telabo ea vio nei amonea Yesu.

## 11

### *Tukunu na Lasaros*

<sup>1</sup> Mia bogo napano Yesu naio jo laka kia ga vo, mieiano na jikili tai binime i bokar kiano bilbilu tai, napano naio be Lasaros. Naina be Lasaros napano kuviviniene juo be Mere naio Marita, a nalo tolu nei tena komeli na telisu na Betani vaatara ka Yerusalemo. <sup>2</sup> A Mere

nei bunu napano iorou, naio miyon bonotanunu ea Yesu, naio miolkon jaano nalo ka vijinio. <sup>3</sup> Mia bogo napano kuviviniene juo nei amial ka kuñanelo na m̃aro naio mie toru jibe na, amiila toru ka Yesu, aberinavo “Tubo, kiamo bilbilu m̃a na jau tiniemo eaio, naio mie laka.”

<sup>4</sup> Ana bogo na iliano nei binimej bokar Yesu, naio maka rivano, mia naio ber ga, berinavo “Kiano mieiano na maka ve tena m̃ariano, mia mieiano na naio jibe Atua kiano m̃arabo tai ga, ka naio riverial kiano mermerano, a ka riverial kiano burum̃ara moroano na jian ban kiniou Atua Kenerinio.” Yesu naio ber iliano na, jibe na ka naio mijikia vite na mia naio rilaiio.

<sup>5</sup> Yesu tinien jii Marita toru laka bija kulueno na telisu a kuñanelo nei, a naio mijog bova toru kalo, mia maka rimonloglog bogo na tenei vo. <sup>6</sup> Jibe na, mia naio maka rivan vo, naio jo bere legiano juo ea vio nei ea marauei na Yortano tivelinio bano. <sup>7</sup> Naio jo bere bogoti juo jibe na, bisi ana naio ber ka kumemi kiano naiagagoano nalo, naio berinavo “Kito m̃a, ravarkor ravan bere ea tanobuku na Yortano.”

<sup>8</sup> Mia kumemi numitu tiniememi maio ka kia ga vo nanua tom na tortoru na kulo Ju nalo na ea tanobuku nei tiniel jer m̃elea Yesu, mila na numerou ka nuvan bereio. Naruei nubika den Yesu, nuberinavo “? Naverloglogiano, jum̃abe? Vonganei ga napano kito roju yako, kulo Ju nalo amila vio toru laka ka ajidom atubabinso kam̃aro, mia vonganei ana jau koberinavo mia kito ravan bereio.”

<sup>9</sup> Ana Yesu naio ber ka kumemi naio berinavo “Kiaku verdoŕeiano ban kamiu naio jibe nei: Ea legiano, ea aura duelimo ba juo nene, burum̃ara inio mereralii vio, mila na toro mijikia miel bo, maka tom̃a rijorjoru taatei. <sup>10</sup> Mia toro napano mila von ka riel ea melijokouo bogiano, mia naio to rijorjoru, bior napano inio nene maka bunu mereralii kiano m̃arabo.”

<sup>11</sup> Yesu naio ber iliano nei ban kumemi, berial ka naio mijikia riel rivu ga, maka jikia vite tai na bova eaio, vano-o vokar bogo na Atua berkar ruei ka mia ajikia auebinio. Naruei naio jusol bereio, berinavo “Kiado bilbilu neibano naio monmelio ruei. Vonganei, kito ravan ka novio bonio.”

<sup>12</sup> Mia kumemi naiagagoano nalo maka nuvijikia lubar nioti na iliano nei, naruei nuberinavo “Tubo, ver naio monmelio ga, nina bo ga na, mia naio rijog rivu bereio ga.”

<sup>13</sup> Nuber jibe na bior ka napano numitu nuberiam̃a Yesu naio ber ka Lasaros naio mijilimebi ga, mia Yesu naio ber Lasaros kiano m̃ariano.

<sup>14</sup> Naruei Yesu berial meravo ban kumemi, naio berinavo “Lasaros naio m̃aro ruei, <sup>15</sup> bior bogo na naio mie, maka noto vijalo. Mia jibe na kiniou nemial mia rivu ga, ŕeli rivu lie van kamiu, bior kiano m̃ariano na mia rimej tibe ka kenemiu buluvio tai, ka kuvijikia kumonea kiniou ve riano. Mo, kito ravan eaio.”

<sup>16</sup> Mia kumemi naiagagoano nalo numitum̃a numerou ka nuvano, naruei Tomas m̃a na abio naio ka Tomas Savoro, naio ber ka kumemi, naio berinavo “Kamiu kuvitumolu, kito roviniu ravano, kiado Tubo naio jidom riva rim̃aro tibe na, bo ka kito roviniu ravano, ram̃aro vaarakurano kitoliko naio.”

<sup>17</sup> Naruei kumemi nubiniu numiel nubano, nubano numiyotuba ea komeli telisu na Betani. Ana aberial ban Yesu ka amidu Lasaros taati monea buluvae bogoti ver barlaka ruei. <sup>18</sup> Mia komeli nei Betani naio jo vaataro ga ka komeli labo nei Yerusalemo, titai jibe ka kilometa tolu ga, <sup>19</sup> mila na kulo Ju nalo na Yerusalemo nalo telabo, bogo na amijog m̃ariano nei, tiniel miia Marita naljuo Mere toru, naruei abinimej ka ateg naio vijalo. <sup>20</sup> Mia Marita naio jo naliko, ana amiila toru binimej ban naio aber Yesu binimej joa m̃arabo ruei, naruei naio jumolu ban ka rivan jum̃ano naljuo naio. Mia kuluene neibano

telisu Mere naio jo joomo ga ea yimo, a naio maka rivatavio. <sup>21</sup> Mo Marita, naio binime i mial Yesu, naio berkanio, berinavo “!Kanku Tubo liki, ver jau komei ea vio nei ga, mia kumãanememi riva kovio re na! <sup>22</sup> Mia kiniou nomonea ka be kurano ka napano naio m̃aro, mia venia na ver jau kovika den Atua, mia naio rijamo ka ga vanso.”

<sup>23</sup> Ana Yesu berkanio, berinavo “Marita, mia kumãanemo naio tumolu rimeul bereio na.”

<sup>24</sup> Naruei Marita berdoŕeio berinavo “Ee, kiniou nemijikia nina, nemijikia ka mia rimeul bereio ea burumãara tumoluano bereio ea legiano na maaro.”

<sup>25</sup> Ana Yesu berial iliano nei kanio, naio berinavo “Kiniou nebe m̃arabo na tumoluano bereio, kiniou nebe burupati na meuliano. Toro na rimonea kiniou, buriakurano naio monoka rimãaro ea yetemeriba nei, mia naio rimeul bereio. <sup>26</sup> Toro napano rivokar meuliano nei, a viekouoiano ea kiniou toa naio, naio mia rivokar re m̃ariano bogo tai. ? Marita, jau komonea jibe na a?”

<sup>27</sup> Ana naio berdoŕe, berinavo “Aiou, Tubo, nomonea. Kiniou nomoneaso, ka jau kobe Naverikariano, jau kobe Atua kenerinio, jau kobe naio namãa aber jikar beamu ruei ka mia rime i rilarrur tomu nalo na yetemeriba nei.”

#### *Yesu, jogumirano jibirbili*

<sup>28</sup> Telikiti na Marita ber jibe nei ka Yesu avona bisi, ana naio milivi joomo bereio, ban ka kuluene nei Mere, mijuvaluva banio, berinavo “Naverloglogiano nene, naio binime i ruei, naio joa m̃arabo yako, naio jidom rialso beamu vo.” <sup>29</sup> Mere mijogio, naruei jumolu vaarakurano, jidom ka rivatove ka rial Yesu, <sup>30</sup> nina rove ea m̃arabo napano Marita mial naio ruei eaio, bior ka napano naio maka rime i jouro ea komeli vo. <sup>31</sup> Mia kulo Ju nalo napano aju bija Mere joomo amial ka naio jumolu soŕeli jibe na batavio, naruei be tinielo ka naio jidom riva

teg bereio ea buluvae, naruei nalo bunu ajumolu ajakisorio.

<sup>32</sup> Ana Mere naio miel binime i bokar vio na Yesu joaio. Ana bitikario, binime i vaataro kanio, buku naio mijoru ea jaano, jegi banio, berinavo “!Tubo, ver jau komei ea vio nei ga, mia kumãane ku riva kovio re na!”

<sup>33</sup> Mia naio jomãa jegi jibe na, a kulo Ju dolu nalo napano m̃a ajakisorio, nalo bunu abinime i ajumãa ajegi. Mia telikiti napano Yesu naio mial Mere nalo kialo burumãara jogvaiano nei, naio bunu mijog bova, mijog tenei jibe ka temi laka ea kiano iviso, <sup>34</sup> ana naio bika denlo, berinavo “?Kamiu kumidu naio mon be?”

Ana nalo aberinavo “Tubo, jau komei rava raialio.”

<sup>35</sup> Mia Yesu mijogio jibe na, mila jogumirano jibirbili.

<sup>36</sup> Mia nalo amial ka naio jegi jibe na, tealo aberinavo “!Ierinio, naio tinien jii tanea kiano bilbilu nei, naruei naio tinien miiãio mia tinienmiiãio!” <sup>37</sup> Mia tealo dolu nalo, aju abivika denlo, aberinavo “Toro na naruei nanua beamu naio mila na merebono mirano binime i bo bereio. Peli verenio naio sidom, naio mijikia rila ka napano kiano bilbilu naio maka rijikia rivakovio ga ŕeli?”

#### *Yesu naio biobon Lasaros jumolu den m̃ariano*

<sup>38</sup> Mia Yesu naio miel ban bija burumãara jogvaiano nei, naliko Mere nalo aba amiyotuba ea buluvae napano Lasaros taati mon eaio. Bulukuveru nei naio be buluvae tai, napano amidu burumãara puruveru tai joko buluku tavo nene. <sup>39</sup> Ana Yesu naio berinavo atubonlar puruveru na toru nei.

Mia Marita naio mijog Yesu ber atubonlar puruveru, mia naio jidom riverbureio, ber kanio, berinavo “Tubo, maka rivu ka rala tibe na, bior naio m̃aro bogoti ver barlaka ruei, mia bonoti rivova laka na.”

<sup>40</sup> Ana Yesu berdoḡe banio, berinavo “?Ee, jau maka koto tiniemo rimaio vo ka kiaku iliano nei napano neber ka jau ruei? Kiniou neber ka ver jau komonea ga, mia keial moroano na Atua kiano naio rimāu.” <sup>41</sup> Ana ajidel ka ga, ajubonlar burumāra puruveru nei, bisi ana na Yesu naio jirarag bavin mave, naio bolkouo, berinavo “Teta, kiniou neber siva toru banso ka napano jau kajaaro ka mā komijog kanaku valeiano nei. <sup>42</sup> Kiniou nemijikia ka venia napano ver kiniou nesidom nevika denso, mia jau kojogio ga. A vite nei mia kiniou nevika denso vonganei, nebika ea tomu nalo nei ajumol aju miralo, ka nalo bunu ajikia ajogio. Naruei ver aial ka napano mia jau koverdoḡe rivan kiniou tibe ka na nobikanio, mia rijikia rijailo ka amonea ka be riano ka napano jau naruei komiila kiniou nebinime i ea yetemeriba nei.”

<sup>43</sup> Mia telikiti napano Yesu bolkouo bisi jibe na, ana naio bio jikili jibe na ba ban naio berinavo “Lasaros, jau kotumolu komei tavio.”

<sup>44</sup> Naruei amiilo ka napano toro na māro nei naio jumolu miel binime i tavio, bija kulumārauo napano abiviko ka naio, napano mā ajumā ajarakii lele gorogoro ea jumāno a jaano a parinio kia ga vo. Naruei Yesu naio ber kalo berinavo “Mo, kamiu kuvijubar bulag kulumārauo nalo nei denio, ka mia mijikia riel rivu bereio.” Ana nalo amilaio, naruei Lasaros naio meul bo naio jo naliko bereio.

*Komeli na toru naio birokar ka monoka auebin Yesu rimāro*

*Mataiu 26:1-5; Mak 14:1-2; Luka 22:1-2*

<sup>45</sup> Mia kulo Ju nalo telabo napano ajakisor Mere abinime i ea bulukuti puruveru nei, telikiti napano amial ka napano Yesu naio mila Lasaros meul bereio jibe na, amonea batitig naio bo. <sup>46</sup> Mia nalo tealo maka amoneaio, aban bereio, aba amial Varisis nalo, aberial kalo ka venia

napano Yesu milaio. <sup>47</sup> Ana telikiti na amijogio, maka lele asaaro kanio, naruei nalo bija tomu na tortoru na kulo lu nalo, abio nalo dolu na burumāra komeli na kulo Ju abinime i vio takurano. Naruei telikiti napano abinime i vio takurano bisi, aberial kalo aberinavo “?Mia kito rala venia ka toro nei naruei? Naio jomā mimāuka burutomoluo na tortoru telabo janea vio ea kiado tomu nalo miralo. <sup>48</sup> Ver kito roverbure re naio, mia naio rila tibe na rivano-o mia ve re tai napano mia rimonea naio, mia naio rivuru nonovlo atakisor naio ga. A ver nalo na mira na vio Romo aial tete na naio jomā mila von ka rila naio rime i rive navurimāraoiano na toru tai tibe na, mia ala siniabu ka kito kulo Ju rovinu. Mia amei ala mira ka kito-o mia auelar kiado taara kito rovinu vija kiado Atua kunuano lu.”

<sup>49</sup> Ajumā aber jibe na, mia kialo navurimāraoiano na toru nei Kaivas, napano ka yuka nei naio bokar sio na Parinio Toro Lu, naio ber kalo, berinavo “?Tomnei, bior venia ana kube vovu jibe na, ka napano maka bunu kuvijikia ka mia kito rala venia ka toro na? <sup>50</sup> ? Venia naio bo ka kamiu? Bo ka napano toro na ve takurano rila kito rovinu rava kovio, ḡeli na bo ka naio ga ve takurano rimāro ka rilarur meuliano na kiado taara rovinu?” <sup>51</sup> Mia ea bogo napano naio ber iliano nei, beriamā jomā berial kiano jidomiano ga. Atua mila naio bokar imāuano na Parinio Toro Lu ka bogo na, mia Atua kiaga vo naio midu iliano nei joa kiano jidomiano ka naio riverial ilirianiano tai, ka ver Yesu naio monoka rimāro ka rilarur tomu nalo kialo meuliano aviniu. <sup>52</sup> Naio maka rijikia, mia naio jo berial ka iorou kanio, telikiti napano mia Yesu naio rimāro, mia naio maka rimāro rivior taara na kulo Ju nei ga, mia kiano māriano nei naio kario Atua kenerinio dolu nalo napano aju janea buruvenuo dolu bunu, ka mia rivuru birovironlo aviniu amei ave māratavo ve takurano.

<sup>53</sup> Mia ea bogo na, Kaivas naio berial iliano nei, naio buru tomu na tortoru na kulo Ju nalo kialo jidomiano nonovio naruei, ka Yesu monoka rimaro ga. A jikar ea bogo na, ajumã aberii damariga, ka mia ajikia ala tumãbe. <sup>54</sup> Mia kialo jidomiano nei mila na Yesu maka bunu rijikia rieliel iviso ka tomu nalo na tanobuku nalo nei na Yutea, ana naio buru bulag kumemi nubano numitua komeli na telisu tai, siano Ivraem, napano naio jo yako ea tanobuku napano vaataro ka vio teauo.

*Vaataro ka bogo na Jokoluolu na Sidomkariano na Ioruriano na maaro na Yesu kiano*

<sup>55</sup> Naruei be vaataro ka bogo na jokoluolu na kulo Ju nalo kialo, napano be Jokoluolu na Sidomkariano na Ioruriano. Ana kulo Ju nalo napano ajua tanobuku dolu ninio, ajumã ajuvan kialo vio nalo abavin Yerusalemo, ajidom avan ea Atua kunuano Lu, amila sida na meravoiano nalo ka mia ajikia ameravo ea Atua mirano beamu vo, karina jokoluolu naio tikario. <sup>56</sup> Telikiti napano tomu nalo nei ajumã abavin ea Yimo Lu, ajumã amila von ka ajirag Yesu-o mia maka alealio. Ana ajumã abivika denlo, aberinavo “? Ee, kamiu kuber venia? ?Mia ver naio riyotuba ea jokoluolu nei, ðeli na naio rimei re?” <sup>57</sup> Naruei parinio kulo lu nalo bija Varisis nalo, nalo bunu ajumã ajidom ka ðeli mia Yesu rilavon ka riyotuba ea bogo nei. Naruei nalo aberial jikili ka ver aial Yesu to kovio na, monoka ala iliano rimei ealo ka amijikia amei avokakar naio sikili.

## 12

<sup>1</sup> Mia telikiti napano Jokoluolu na Sidomkariano na Ioruriano nei naio maka vo, bogoti ari ju, ana kumemi liko Yesu nubano nubokar bereio komeli na telisu nei Betani. Naruei nubano numiyotuba bereio ea Lasaros kiano vonuo,

naio napano Yesu nanua mila meul bereio den mãariano maka vesiou ga. <sup>2</sup> Kumemi numitu bijalo jibe na bano-o, ana nalo nei aber ajidom ala Yesu sano sinaniano tai. Ana telikiti na amila batitig vite nalo biniu, kumemi nubinimei numitutano, Lasaros bunu jotano bija kumemi, naruei kuviviniene nei Marita naio jomã barvar simemi sinaniano binimei. <sup>3</sup> Naruei Lasaros kuviviniene dolu nei Mere, naio bunu jo, naruei naio midu burumãara pati bonotanunu tai binimei, napano jibe mãatei, napano kidi nene bavin laka. Mo naio miduio, naio binimei vaataro ka Yesu, naio mionio jelele Yesu jaano nalo. Karina Mere nene bar burutitili vijinio, naio miolkon bereio, mia maka vesiou, bonoti bonotanunu novo nei janunu misono batitig vio joomo ea kunualo nei.

<sup>4</sup> Ana ka bogo na, Yesu kiano naiagagoano napano iorou kanio ana naio jiveluku ka naio, Jutas na Kariot, naio bunu jo mial vite nei. <sup>5</sup> Naio berinavo “? Bior vaio ana maka aviliivililar ka burumãara bonotanunu nei ga? Ver tibe na, amijikia avokar burumãara veru tai tibe ka veru na imãuano na yuka ve takurano ka rijai talimãasa nalo. !Mila kule ga na!” <sup>6</sup> Naio ber jibe na, mia naio maka sidomial talimãasa nalo. Naio ber jibe na bior naio naruei jomã bitikar kenememi basaro na veru, a jomã bina kanio, jomã jen kenememi veru, mila naio be viti bunu ka veru na bonotanunu nei.

<sup>7</sup> Mia Yesu berdoþe venia napano Jutas berenio, naio berinavo “Ee, maka rivu ka jau keil niegeniege kuviviniedo tibe na. Naio mila jibe na ban kiniou bior napano naio jo jidom m̃lea ka napano bogoti na mia navan ea buluvae jo binimei vaataro laka naruei. <sup>8</sup> Mia ve talimãasa nalo atu vija kamiu bogo nonovio, ka mia kamiu kumijikia kuvijailo tibe na, mia ka kiniou maka nejikia noto vija kamiu bogo nonovio, mia venia napano naio

milaio ban kiniou vonganei naio bo bo laka mia.”

<sup>9</sup> Ana maka vesiou, lilianiano naio ba bokar tomu nalo napano aju amidu bijiilo yako Yerusalemo bior jokoluolu, ka vonganei Yesu naio binimei jo Betani ruei. Mo nalo abatavio ka aialio, a maka ve naio ga, mia ajidom aial Lasaros bunu, nanua Yesu mila naio meul bereio den m̃ariano maka vesiou. <sup>10-11</sup> Tomu nalo aju aba amial Lasaros jibe na bisi, a venia napano Yesu mila banio mila napano nalo telabo kalo, ba bokar kulo lu na kulo Ju tealo, aburo ajuvan kialo navurim̃araboiano dolu nalo abinimei amonea Yesu. Ana ka tena, tomu na tortoru na kulo lu aberiio, abirokar ka mia aleal m̃arabo tai ka ajikia auebin Lasaros rim̃aro bo.

*Yesu naio binimei boru ea vio nei Yerusalemo*

*Mataiu 21:1-11; Mak 11:1-11; Luka 19:28-40*

<sup>12</sup> Mo Lasaros nalo amila Yesu sano sinaniano nei bisi, ana ka legiano dolu nene, iliano ba bokar burum̃ara tiniobi nei napano aju Yerusalemo bior jokoluolu, ka vonganei Yesu naio jo binimei ruei.

<sup>13</sup> Mo tomu nalo amijogio, ana nalo ajumolu aba aje m̃amali nalo, abarkakar ka jum̃alo nalo amiel abadigdig aba tavio ka aviviuo naio ko m̃arabo.

Ajidom ka ala rivan naio tibe na ka napano naio rimei ve kialo parinio tubo, naruei nalo aba tavio jibe na, ajum̃a abiovio, aberinavo

*“!Bo mia bo laka! !Kito ravamenea naio, be kiado parinio tubo vou na Israel!*

*!Atua sopi, jau keilivu ka naio napano binimei ea siamo!” Iouano 118:26*

<sup>14</sup> Ana Yesu naio jo miel binimei, naruei milalo aburu kirikiti togki tai binimei banio, ana naio jotano eaio miel binimei. Vite na napano naio mila na naio jakii memedu iliano na Iliano Lu tai napano berinavo

<sup>15</sup> *“Kamii kulo Yerusalemo nalo, kamii kumerou re bunu.*

*Kuvalio, vonganei kenemiu parinio tubo naio jo binimei ea kamii naruei.*

*Naio joa kirikiti togki ga tai naio jo binimei.” Sek 9:9*

<sup>16</sup> Ana ea telikiti na, kumemi na-iagagoano na Yesu kiano, kumemi maka nuvisidomial iliano na, mia iorou, telikiti napano naio bavin mave bisi, kumemi nubitilubar ka iliano moruo re nua nei naio berial naio memedu, ka napano naio mila vite nonovio memedu ga ka venia nam̃a Vivitauiano Lu aberialio beamu ka mia Naverikariano naio riliao.

<sup>17</sup> Naruei tiniobi toru nei aju aborvorua Yesu jibe na. Nalo miroano napano naniovo ga aju bija naio telikiti na naio bio Lasaros meul bereio den m̃ariano, ana aba aberial burum̃ara burutomoluo nei ban nalo dolu nalo. <sup>18</sup> Mia telikiti napano kulo dolu nei amijog burutomoluo nam̃a Yesu milaio, nalo ajidom aial naio, naruei abinimei bunu ka ava aviviuo naio. <sup>19</sup> Ana nalo nonovio nei, abe burum̃ara tiniobi ruei, mia bogo napano Varisis nalo amialio, amijog bova, ajubar parilo, aberinavo “Kito romila vio ka kema nao-o mia bova ga. Naio jovulu batitig kito ga, naio buru yetemeriba vodolu ga ajakisor naio ruei kiana.”

*Kulo Krik tai ajidom aial Yesu*

<sup>20</sup> Tomu nalo miroano nam̃a abavin Yerusalemo ka alotu ka Atua ka jokoluolu nam̃a, a nalo tealo maka ave Ju, nalo abe kulo Krik nam̃a amonea Atua javukia kulo Ju nalo. <sup>21</sup> Mia telikiti napano nalo nei ajum̃a amijogjog mugaruei sio nei Yesu, naruei ajidom aial naio.

Naruei aba ajiragio, amileal kiano naiagagoano nei Vilip napano be tena Betsaeta yako Kalele, ana abika Yesu denio. <sup>22</sup> Ana Vilip ba berial ka Andru, karina naljuo aba aberial ka Yesu.

<sup>23</sup> Ana bogo napano Yesu naio mijog ka napano nalo nei bunu napano maka ave kulo Ju ajidom aial naio, naio berial berinavo “Vonganei, be

aura nene memedu ka Atua rila kiniou Kulorinio Kenerinio siaku rivavin. <sup>24</sup> Kiniou neber be riano ban kamiu, ka ver kurukuti tai, ver amebija re, mia naio ve takurano to kurano ga tibe na. Mia ver amebijaio, mia naio rimei menunu, mia karina mia naio rivar m̄arati ve telabo bereio. <sup>25</sup> Jibe nei, naio napano jidom m̄lea kiano meuliano na yetemeriba nei loa ka napano naio jidom kiniou, mia rila luvuio, mia naio nam̄a maka sidomial lele naio, mia naio to rivu ga rivano-o rivokar meuliano vou napano maka ve jukuti nene. <sup>26</sup> Toro Ju p̄eli na toro Krik nam̄a ber jidom rim̄au kiaku, jidom riija kiniou, naio monoka takisor kiniou dam̄ariga. Mo ver naio to takisor kiniou tibe na, mia vio vabe nam̄a nava notoa, mia naio bunu mijikia rivija kiniou. Toro nam̄a be kiaku naim̄auano, mia Atua sian sio na bo van naio.”

#### *Yesu berii kiano m̄ariano*

<sup>27</sup> Mo Yesu naio jikar ka jidomii ka napano vesiou re, mia naio monoka rim̄aro, naruei naio mijog deio ea kiano iviso. Naruei naio berinavo “Vonganei, kiniou namijog jidomiano niukniuku joomo ea kiniou. ?Mia kiniou never venia rivan karam̄aku? ?Bo ka kiniou novolkouo, nevika den naio, neverinavo: Teta, aiou jau kovurular kiniou den aura na bogokouo nei? Mia maka rivu ka neber tibe na, bior kiniou nebinimeia ea yetemeriba nei kar im̄auano nene ga na. <sup>28</sup> Makanio, mia kiniou neber jibe ga na, neberinavo: Teta, aiou jau kala siamo rimei ve toru riano ea venia napano mia ala ka kiniou.”

Naruei telikiti napano Yesu naio ber iliano nei bisi, niono tai na mave mil batove berinavo “Kiniou nojo namila siaku bavin easo ruei, a mia kiniou nala bere navo.”

<sup>29</sup> Ana tiniobi nalo napano m̄a aju vaatara amijog jooa na niono nene, mia nalo tealo aber nina be tubaal tai ga, a nalo tealo aber “Makanio, nailiano tai na mil banio.”

<sup>30</sup> Naruei Yesu berial kalo, naio berinavo “Niono nei napano kito romijogio vonganei, naio maka rimei ka kiniou nejogio, mia naio binimeia ka kamiu, ka kamiu kuvijikia ka kiniou nebinimeia be. <sup>31</sup> Monoka tibe na bior ka napano vonganei be bogo na tibureiano na yetemeriba, be bogo na avukular parinio tubo sim̄aro na yetemeriba naruei. <sup>32</sup> Ka kiniou nala im̄auano na, mia monoka kiniou natakilele mave ea m̄akolkolo, mia bogo napano noto mave tibe na, nomijikia novuru nono tomu nalo aviniu amei ea kiniou.”

<sup>33</sup> Ana Yesu kiano iliano nei, naio berenio ka rila rimei rimeravo vanlo ka kiano m̄ariano naio ve m̄ariano na jum̄abe. <sup>34</sup> Mia bogo na tiniobi nalo amijogio, aberinavo “Kumemi numitum̄a numijog ka nam̄a abuluku Vivitauiano Lu, ber ka mia Naverikariano mia naio rimeul toboto, mia rijikia re rim̄aro bogo tai. ?Tibe na, jum̄abe jau kojo kober ka mia atelan Kulorinio Kenerinio mave ka naio rim̄aro? ?Vede jau kojom̄a kober toro dolu tai ga kovio? ?Kei Kulorinio Kenerinio na nam̄a jau kojom̄a koberenio, kober ka mia tibe na kanio?”

<sup>35</sup> Naruei Yesu berdope banlo, naio berinavo “Kiniou nebe yulu na Atua kiano, na nomijikia noto lie vo vija kamiu bogo ve telisu bere vo. Mia bogo napano noto vija kamiu, bo ka kamiu kuvitum̄a kuviel ea miamoiano nene, ver p̄eli, mia melijokouo sovoko kamiu, a toro napano jom̄a mila von ka riel naio rijikia re bunu rivitilubar kiano m̄arabo. <sup>36</sup> Telikiti napano kiniou burupati na yulu nojo kia ga bija kamiu, bo kamiu kumonea kiniou, ka kuvijikia kumei kuve tomu na miamoiano.”

Mia bogo na Yesu ber iliano nalo nei bisi, naio juvanlo aju, naio ba jo luku ea vio tai napano ajikia re amei bunu rivior naio eaio.

*Kulo Israel maka asidom amonea Yesu*

<sup>37</sup> Yesu miñauka burutomoluo na tortoru telabo ea miralo ruei, mia be iakurano maka asidom amoneaio ga. <sup>38</sup> Kialo bajago na, amila bereio javukia ga nanua ña kulo moruo Ju re nua amila ka bogo na naverialiano Aisea, napano naio beriio ea kiano iliano juo. Tai naio ber jibe nei, berinavo

*“? Atua Soñi, kumemi numitumña nuber bulavulagio banlo, mia nalo maka asaaro ka amoneaio,*

*a jau kobisiñe moroano na jumãmo banlo, mia kei kalo naio rivitilubarario? Maka tai!” Ais 51:1*

<sup>39</sup> Mia dolu nene, naio bunu ber kalo ka maka ajikia amoneaio, naio berinavo

<sup>40</sup> *“Atua jidel kalo banbano-o mia deio ga, ana naio mila miralo nalo abe merebono, naio mila kialo iviso nalo abinimej jikili laka.*

*Mia miralo nalo ajikia re bunu aial vite, ana kialo iviso maka ajikia ajoglubarbar vite.*

*Ver ðeli, mia aviliglo amei bere ea kiniou ruei, ka mia kiniou neielielilo.” Ais 6:10*

<sup>41</sup> Mia Aisea kiano iliano nei binimej ea naio, iorou ka napano naio mial miamoiano na Naverikariano joomo ea Atua Kunuano Lu, mia vonganei kito romial ka naio berii Yesu memedu, bija nalo na ea kiano bogo.

<sup>42</sup> Mia jibe ka naña iliano nei berenio, telabo maka amonea Yesu, mia tai amoneaio, ba bokar kialo navuriñaraboiano tealó. Naina bo, ana vite tai naio bova, ajumña amila vavanlo ka amoneaio, bior amerou ka Varisis nalo, amerou ka tibe ña na mia avuku bulaglo den kialo yimo na volkouano. <sup>43</sup> Nalo amerou jibe na bior napano maka bunu asidomii ka ala vite napano mia Atua rijikia saaro kalo riviorio, mia ajidom ga toru ka mia kulo dolu nalo aialo tumãbe.

<sup>44</sup> Ana Yesu naio berial burumñara ilimaariano tai ea kanano tomu nalo miralo, naio berinavo “Naio napano

monea kiniou, maka rimonea kiniou ve takurano ga, mia jibe na naio monea kumemi juo naio napano miila kiniou nebinimej, <sup>45</sup> a naio napano jomña mial kiniou, jibe na naio jomña mial naio. <sup>46</sup> Kiniou nebinimej ea yetemeriba nei, jibe ka kanano yulu, ka rila ka napano toro kei na rimonea kiniou, mia naio toa re melijokouo. <sup>47-48</sup> Mia ver tealó ajog kanaku iliano, naruei nalo ajogkar re, ðeli ver tealó ailkue ka kiniou maka asidom ajog kanaku verloglogiano, nalo na mia avar kanalo tibureiano nalo ea Legiano na maaro. Ea bogo na, ve re kiniou napano mia notumolu netiburelo, bior kiniou maka nemej ka netibure tomu nalo na yetemeriba nei, mia kiniou nebinimej ka nalarurlo, mia vite napano mia tiburelo, nina be kanaku iliano napano neber kalo ka bogo napano nojo bijalo kia ga vo. <sup>49</sup> Kanaku iliano mijikia rila tibe na, bior ka bogo napano nojomña naberial iliano nalo na, maka neil ea siaku kiniou ga ve takurano, mia nemil ea Teta siano napano naio miila kiniou nebinimej yetano. Naio ga berial batitig ban kiniou vite nonovio na monoka neverialio, <sup>50</sup> naruei jibe na, damñariga kiniou notomña never vite nonovio napano Teta naio jidom ka neveriio. A kanano tuboiano nalo na, namijikia ka be meuliano na bo nei napano maka ve jukuti nene joalo.”

## 13

*Beni be Yesu kiano bogo na maaro na meuliano, naio jekon kiano naia-gagoano nalo jaalo*

<sup>1</sup> Vonganei, vite nonovio ju batitig ruei, beni ga naruei ana ve burumñara legiano, napano Jokoluolu na Sidomkariano na Ioruriano naio tikar eaio. Naruei Yesu naio jo bitilubar ruei ka kiano bogo binimej, legiano na beni ga be kiano bogo na naio monoka tuvan yetemeriba nei ka rivavin mave ea karañano. Binimej bokar bogo nei, ea mñarabo

telabo, naio bijuku bo laka ban nalo na abe kanano napano ajua yetemeriba nei ruei, naio tinien jiilo toru laka, mia vonganei be bogo na naio tinien riialo lie vo, rivano-o rivokar napano mia kiano meuliano rivakovio riviorlo.

<sup>2</sup> Naruei naio jo kumemi liko kiano naiagagoano nalo ea vio mave, naio jo mila sano sinani-ano na maaro kumemi liko. Mia Jutas na Kariot, tormoruo Saimon kenerinio, naio bunu jo kumemi liko kia ga vo ea bogo nei, naio jo bija kanano tiniekakariano ka mia tiveluku ka Yesu, ka na Sim̃aro midu joa tiniene ruei. <sup>3</sup> Kunituṃa numisinin banbano-o mia Yesu jo tinien maio ka jum̃abe ka beamu, naio jaluvo den Atua naio binimej yetano, a jum̃abe ka napano vonganei Atua bar vite nonovio jua jum̃ano, a tum̃abe ka napano mia naio monoka tovulio, karina mia naio mijikia taluvo den yetemeriba nei ka rivavin bereio mave ea naio. <sup>4</sup> Naio mijog ka burum̃ara tinietiano ea naio ka kumemi kanano naiagagoano nalo, a naio jidom ka rila burutomoluo tai ka tinietiano nei van kumemi. Naruei naio jumolu, ba miyalar ṃano kulukoti, jukulou ka iolkoniano tai, <sup>5</sup> midu baju na uei tai, midu binimej, ana naio jikar ka jekon jaamemi nalo, naio mila jibe ka naio be kenememi toro na im̃auano tai. Naio jom̃a jekon jaamemi jibe na bano-o, ṃa miolkonlo ka iolkoniano napano naio jom̃a jukulou kanio, <sup>6</sup> banbano-o na binimej bokar Saimon Pitere jaano. Mia Pitere jo mial ka napano binimej bokar naio, naruei naio berkanio berinavo “?Tubo, venia na? Jau kobe kenememi toro na toru, maka rimemedu ka jau kesekon jaaku tibe na.”

<sup>7</sup> Mia Yesu berdoṃe, berinavo “Pitere, venia napano kiniou nojom̃a nemila vonganei, jau maka kovitilubarvo vo. Mia iorou kanio ga mia jau kejkia vatitigio rivu.”

<sup>8</sup> Mia Pitere naio jo jidom riverbure Yesu kiaga vo, naio berinavo “Makanio Tubo, najamo ka lele re so ka kasekon jaaku.”

Ana Yesu naio berinavo “Ver kiniou nesekon vatitigso re, maka ve kanaku titai toaso.”

<sup>9</sup> Naruei telikiti na Pitere naio mijog ninei, kiano jidomiano be dolu kija, naio ber ka Yesu berinavo “! Tubo, ver tibe na, najamo ka ga, nejidom ka jau kesekon kiniou maka ea jaaku ga, mia ea mokotenaku reraio, riva rivokar bunu jaaku a pariku!”

<sup>10</sup> Ana Yesu berdoṃe ban Pitere ea jamerijiano sesa tai, na berial jum̃abe na toro naio meravo ka kiano kariano. Naio berinavo “Toro napano mijeliou vonga, niabene reraio meravo nonovio ruei. Ana ver jaano riagiago bereio, mia naio maka rijikia riva rijeliou nonovio bereio, mia naio sekon ga jaano. Mia kiniou nemial kamiu kumitibe na. Kamiu kumeravo nonovio bo ruei, mia kamiu tai ga maka tibe na, naio miagiago dolu ga jo.” <sup>11</sup> Mo Yesu naio ber jibe nei, ber maka nuvinu napano numeravo, bior ka napano naio mijikia ruei ka kumemi tai napano mia vesiou re mia naio tiveluku ka naio.

<sup>12</sup> Naruei Yesu jekon Pitere jaano bija kumemi dolu nalo-o bisi na ba miya ṃano kulukoti bereio, jotano ana bika den kumemi, naio berinavo “?Kamiu kubitilubar im̃auano na namila ban kamiu na, ṃeli na makanio? <sup>13</sup> Vite na naio jibe nei. Telikiti nam̃a kubio kiniou kuber Naverloglogiano ṃeli na Tubo, kamiu kunituṃa kuber riano ga na.

<sup>14</sup> Mia ver kamiu kumial ka napano kenemiu Naverloglogiano ṃeli na kenemiu Tubo naio jekon jaamiu, bo ka kamiu bunu kuvituṃa kuvisekon jaamiu nalo, kamiu kuvilala bajago novo nalo tibe na ea kamiu bogo nonovio. <sup>15</sup> Kiniou nemila jibe na ban kamiu ka mia kamiu kuvue jaaku ea legiano nalo na ju binimej kiana, ka mia kamiu kuvila bereio

van kamiu tibe ka na kiniou nemila ban kamiu ruei. <sup>16</sup> Kiniou neber riano ka kamiu, ka toro na imauano naio maka to loa kiano tubo, p̄eli na toro na midu iliano naio maka to loa nana miila naio bano. <sup>17</sup> Mia verenio kamiu kumijikia ka kanaku iliano nalo nei abe riano, a ver kamiu kuvitum̄a kuvila venia napano m̄a neberenio, mia burum̄ara ilivuiano ve toru laka rimei rivan kamiu iorou.”

*Yesu berial ka mia Jutas rivar bonbonua naio*

*Mataiu 26:22-25; Mak 14:17-21; Luka 22:21-23*

<sup>18</sup> Ana Yesu berenio “Kiniou neber jibe na, mia maka never kito nonovio, bior kito tai naio jo, napano kiano jidomiano bilig be dolu ruei. Ierinio, kiniou nemijikia batitig kamiu kubiniu napano nebijauia bulag kamiu, mia kiniou nemijikia ka mia kamiu tai naio rila rimemedu ga takii napano Vivitauiano Lu berial nua ruei, napano ber jibe nei, berinavo

*Naina mia kumemi ve juo nuvisen bitiran saku joko,*

*naio mudular burum̄eiano ka rivuta davalar ka kiniou ruei. Iouano 41:9*

<sup>19</sup> “Vite na kirivova tai vo mia kiniou nejidom neverial ka kamiu beamu, naruei bogo napano mia kamiu kuvialio iorou kano, ana vesiou re mia kumijikia kumoneaio ka kiniou nebe riano, kiniou nobe naio napano jobo jo. <sup>20</sup> Kiniou neber riano ka kamiu, toro nam̄a mila ilivorvoruano ban toro nam̄a midu kiaku iliano napano m̄a nemilaio, naio javukia napano naio mila ilivorvoruano ban kiniou, a naio nam̄a mila ilivorvoruano ban kiniou jibe na, naio jibe ka napano naio mila ilivorvoruano ban naio napano miila kiniou nebinimei.”

<sup>21</sup> Yesu ber iliano nei ban kumemi bisi, ana naio jikar ka mijog ka napano kiano iviso bujo ka jidomiano na temi laka, banbano-o karina naio berial meravo ea mirememi,

berinavo “Ierinio kiniou neber ka kamiu, mia kamiu tai tiveluku ka kiniou.”

<sup>22</sup> Mia bogo napano naio ber jibe na, kumemi numiilo, numitum̄a nubiti kumemi jeliviv bereio, maka nuvijikia ka naio jo ber kumemi na vabe naruei. <sup>23</sup> Ana ea bogo na, kiniou Jone, jibe ka naiagagoano tai napano Yesu tinien jii kiniou m̄elea, nojom̄a nojotano vaatara lie ka naio, <sup>24</sup> naruei Saimon Pitere mil ka jum̄ano ban kiniou, berinavo “Ai koig, jau kovika vatitigio bere vo, kover naio jom̄a ber kenia.”

<sup>25</sup> Naruei nemijian kiniou telisu, nemijian paripariku ba vaatara ka Yesu, nemijuvaluva banio, neberinavo “?Tubo, jau kojom̄a kober kumemi kei?”

<sup>26</sup> Ana Yesu berdope, berinavo “Kiniou nojom̄a neber ga naina napano niati joko sesa nei, kiniou nejiti ka vaatei, karina nejian banio.” Naruei naio mila jibe ka ga nanua naio berenio, naio midu niati joko sesa tai, naio jiti ka mememi vaatei, bisi na naio midular jian ban Jutas tormoruo Saimon na Kariot kenerinio. <sup>27</sup> Mo Jutas midu jenio, mia ea bogo nene ga, Sim̄aro bunu naio binimei ba joomo eaio. Ana Yesu berkan naio berinavo “Jau, venia napano kojidom kala, jau kavan sopēli kala beamu vo.”

<sup>28</sup> Mia ka kumemi dolu nalo napano m̄a numitutano ea sinaniano nei kumemi liko Yesu nene, maka ve kumemi tai napano naio rijikia bior venia ana Yesu ber iliano nei ban Jutas. <sup>29</sup> Kumemi tealu be tinielo ka Jutas naio bitikar kenememi basaro na veru, tenene na Yesu miila naio ban ka rivulu simemi sinaniano, p̄eli na ba bar veru ban talim̄asa nalo, p̄eli na titai na jibe na. <sup>30</sup> Mia Jutas naio mijikia batitig venia napano Yesu berkanio, naruei ka bogo nei ga napano naio midu joko sesa nei bisi, kolvare ga naio jumolu ba tavio bereio, napano viobobogio laka ruei.

*Tuboiano vou na tinietiano*  
*Mataiu 26:31-35; Mak 14:27-31;*  
*Luka 22:31-34*

<sup>31</sup> Mia bogo na Jutas bisi, ana Yesu jikar berloglog kumemi bereio ka vite telabo. Naio ber ka kumemi, naio berinavo “Vonganei be bogo na Kulorinio Kenerinio kiano mi-amoiانو rimalmaluvo, vonganei be bogo na naio rila Atua kiano mi-amoiانو rimei ve toru lie vo. <sup>32</sup> A verenio venia napano mia naio rilao, mia naio rila Atua siano rivavin, ana iorou ka nina, bogo vesiou re leleio, mia Atua rivitirilar kiniou kenerinio bereio, naio rila siaku bunu rivavin.

<sup>33</sup> “Keneriku nalo, be bogo telisu ga jo napano kiniou nemijikia noto kia vo kitoliko, vaataro ga ka monoka nataluvo den kamiu. Telikiti na kamiu kuvial ka napano nataluvo den kamiu bisi, mia kamiu kuvisidom kuvila von ka kuvisirag kiniou tanea vio rera ga. Mia venia namā kiniou neber ka tomu na tortoru na kiado Ju nalo dolu, neber bere ban kamiu, ka vio vabe na mia kiniou navan eaio, kamiu maka kuvijikia kuvitakisor kiniou eaio vonganei. <sup>34</sup> Ana vonganei, kiniou nejian tuboiano vou tai ban kamiu, ka monoka kamiu tiniemiu titii kamiu ve toru, rivanvano-o mia tibe ka ga napano kiniou tinieku jii kamiu. <sup>35</sup> Mia ver kamiu tiniemiu titii kamiu mēle tibe na, naina be mārabo na rila tomu nalo na yetemeriba nei aial ka kamiu kube kanaku naiagagoano nalo riano.”

<sup>36</sup> Yesu ber burumāara iliano nei bisi, ana Saimon Pitere jo tinien maio ka napano Yesu naio berenio mia naio taluvo den kumemi, naruei naio bika, berinavo “?Ana Tubo, mia kava be na?”

Ana Yesu berdoḡe, berinavo “Kiniou noto navan ea vio tai napano kamiu maka kuvijikia kuvitakisor kiniou eaio vo, mia kamiu kuvijikia ga kumei navo.”

<sup>37</sup> Mia Pitere mijogio, naio bika bereio, berinavo “?Tubo, bior vaio

ana kiniou maka nejikia neviedu kito juo vonganei. Kiniou najaaro ga, namijamo ka kiaku meuliano riviorso vonganei.”

<sup>38</sup> Ana Yesu berkanio, naio berinavo “?Jau kober ka mia jau kajamo ka kiamo meuliano rivior kiniou? Bo ga, mia kiniou neber riano banso, neber ka bogiano nei ga, bogo na tu tokokoreko re vo, mia jau kavarbonbonua kiniou ve varolu [3] ruei, kover jau maka kove kanaku.”

## 14

*Yesu mila ililuḡiluḡiano ban kanano naiagagoano nalo*

<sup>1</sup> Mia Yesu mial ka napano kumemi naiagagoano nalo numijog bova ka na monoka mia naio taluvo den kumemi, naruei naio ber ka kumemi, berinavo “Kamiu kuvila tiniemiu rijog vova mēle re, kamiu kuvarkar tiniemiu ea Atua, ana kuvarkar tiniemiu ea kiniou bunu. <sup>2</sup> Tibe ka namā kiniou neberenio ruei, kiniou navan ka nala vatitig kenemiu vio nalo mave ea Teta, a mave ea kunuano be vajoomo miroano napano bare ka kamiu nonovio. Ver ḡeli, kiniou maka nejikia never tibe na ka kamiu. <sup>3</sup> Kiniou navan ka nala vatitig rivu kenemiu vio nene, avona bisi, mia kiniou nemei bereio yetano nei ka kamiu, novuru bulag kamiu kumei ea kiniou, ka na mia kamiu kuvijikia kuvitu damāriga vija kiniou ea vio napano mia notoaiio. <sup>4</sup> Mia mārabo na ka riva rivokar vio napano mia kiniou noto navan eaio, kamiu kumijikia ruei.”

<sup>5</sup> Ana Tomas bika denio, berinavo “Tubo, kumemi maka nuvijikia vio be na jau kojomā koberenio mia jau kavan eaio, mia tumābe ana kumemi nuvijikia mārabo na rivan eaio?”

<sup>6</sup> Ana Yesu berinavo “Kiniou nebe burupati mārabo, kiniou nebe burupati ilirianiano, kiniou nebe burupati meuliano. Maka toro tai rijikia rivan ea karamāku, ver naio

maka selea kiniou. <sup>7</sup> Ver kamiu kuvitilubar ka kiniou nebe kei, naio jibe ka kumijikia bunu karamaku ruei. Mia vonganei, kamiu kumiturna kumial naio ruei, mila na jikar vonganei, kamiu kumijikia naio beriano.”

<sup>8</sup> Ana Vilip bika denio, naio berinavo “Tubo, vite na naruei kumemi numisidomio, ka nuvia kija karamado vo. Aiou, ver jau kovisiŝe naio van kumemi, mia kumemi nuvijikia nuvisaaro-o mia.”

<sup>9</sup> Ana Yesu berdoŝe, berinavo “? Vilip, kiniou nojo bija kamiu-o bokar yuka vio ruei, mia jau maka kovitilubar kiniou vo? Jibe ka namna nojona neberenio na, ka toro napano mial kiniou, naio jo mial Teta ruei. ? Mia jumabe ana jau kojoma kobika bereio ka kiniou nevisiŝe Teta na mave van kamiu? <sup>10</sup> ?Jau komonea ka kiniou ea Teta, a Teta naio ea kiniou, ŝeli na jau maka komoneaio? Iliano nalo namna neber ka kamiu, maka kiniou ve takurano namna nemil ea siaku ga, mia Teta napano joa kiniou naio jo mila kiano inauano nalo jel ea kiniou. <sup>11</sup> Bo ka kamiu kumonea venia namna neberenio, ka kiniou ea Teta, a Teta ea kiniou. Ver kamiu maka kuvijikia kumonea kiniou rivior kanaku iliano ga, monoka kumonea rivior inauano nalo namna kumialio napano ma namilaio ruei.

<sup>12</sup> “Kiniou neber riano ka kamiu, ka toro kei napano naio rimonea kiniou, mia naio bunu rimauka inauano nalo napano nojoma namilaio. Mia notuvan vio navavin bereio ea Teta, karina iorou neiila Niununo rimei, mia naio mijikia rila burutomoluo nalo na tomormoruo bereio lie vo, tovulu nalo napano kumialio ruei.

<sup>13</sup> “Kiniou neberkar ban kamiu, ka venia napano mia kuvika ea siaku, mia kiniou nala ga rivan kamiu. Mia kiniou nala ga tibe na van kamiu, ka rila ka Teta siano naio mijikia rivavin ve toru lie vo iviso ka kamiu, ea inauano namna kiniou, nejibe ka kenerinio, namilaio. <sup>14</sup> Tibe na,

venia na kuvika den kiniou, mia nala van kamiu.”

### *Yesu naio berkar Niununo Lu banlo*

<sup>15</sup> A Yesu ber bunu ka kumemi, naio berinavo “Ver kamiu tiniemiu jii kiniou be riano, mia monoka kuvokar vatitig rivu kanaku tuboiano nalo. <sup>16</sup> Mia kiniou noto re bunu vija kamiu, ana mia nevika den Teta ka mia naio riila toro dolu tai ka riija kamiu ka mia ridu jeleku ea kenemiu. Naio napano mia rimei, mia naio to vija kamiu damariga, <sup>17</sup> naio be Niununo na ilirianiano. Tomu nalo na melijokouo na yetemeriba maka ajikia avokar naio, bior ka napano nalo maka ajikia avitilubar, maka ajikia naio ga, mia kamiu kumijikia batitig naio bo bior naio naruei napano mia rivija kamiu bogo nonovio, to vija kamiu to toboto.

<sup>18</sup> “Kanaku naiagagoano nalo, mia kiniou notuvan lelan re kamiu napano mia kuvitu tibe ka kirikiou ga. Maka leleio, mia kiniou nemei bere ka kamiu. <sup>19</sup> Bogo teliki ga jo kiano vo, vesiou lele re, karina mia tomu nalo na yetemeriba nei ajikia re bunu aial kiniou bereio. Mia kamiu ga kuvial ka napano mia nemeul bereio, a bior mia nemeul, mia kamiu bunu kumeul. <sup>20</sup> Ea legiano na naruei napano mia kamiu kuvial ka napano nemeul bereio, mia kuvijikia ka kiniou ea Karamaku, a kamiu ea kiniou, a kiniou ea kamiu. <sup>21</sup> Naina tinien jii kiniou be riano, naio be naina bokar batitig kanaku tuboiano a naio jo miduio. Naina tinien jii kiniou jibe na, mia karamaku tinien tii naio, vija kiniou bunu mia tinieku tii naio, notoma noyotuba ka naio ka rila naio mijikia rijikia kiniou lie vo.”

<sup>22</sup> Ana kumemi naiagagoano nalo tai, napano naio be Jutas napano naio maka ve Jutas na Kariot, mia naio bika den Yesu, naio berinavo “Ana Tubo, jau koberinavo mia jau kotoma komalmaluvo ka kumemi, ana mia jau kala ea marabo na

vabe ka napano mia tomu dolu nalo na yetemeriba nei bunu ajikia re aialio?”

<sup>23</sup> Ana Yesu berdoĝe, berinavo “Ver toro tinien tii kiniou, mia naio rivokar vatitig kanaku iliano, ana mia karamĝaku tinien tii naio. Ana mia kumemi ve juo nuvedu ea naio, nuvila kenememi vonuo ea kiano meuliano, mia maka rijikia tibe na ea tomu na maka amoneaio. <sup>24</sup> Mia toro na maka tinien tii kiniou, mia naio maka rimonea batitig kanaku iliano. Naina naruei be verdoĝeiano na kenemiu vikadeniano, ana iliano napano kumijogio ruei, naio maka ve kanaku, mia naio be Teta napano naio miila kiniou nebinimei ea vio nei kanano.”

<sup>25</sup> Ana Yesu naio berinavo “Tilikiti naĝa kiniou nojo kia ga vo bija kamiu, nojoĝa neber vite telabo jibe na ban kamiu ruei. <sup>26</sup> Mia bogo napano navano, mia Teta naio riila Niununo na ijaiano rimej, ana mia naio ridu jeleku, naio riverloglog kamiu ka vite nonovio, ana mia naio rudu sidomii kakarioano na kanaku iliano nalo nonovio ea kenemiu jidomiano. <sup>27</sup> Kiniou mia navano, mia notuvan tuĝaro to vija kamiu. Kanaku tuĝaro naio be tuĝaro na bo tai napano yetemeriba nei naio maka rijikia rije van kamiu. Tibe na, kamiu kuvila re ka mia tiniemiu rivujo ĝele, a kamiu kumerou ka re vite nalo. Kamiu kuvisidomi ĝele re, <sup>28</sup> bior ka napano mia tibe ka naĝa naberenio ka kamiu ruei, ka kiniou nava koalabo beamu, karina mia nemei bereio ea kamiu. Vede kamiu kuvijog vova ka na mia navano, mia ver kamiu tiniemiu tii kiniou, bo ka kamiu kuvisaaro ve toru laka ka na mia nejikia nava neial bereio karamĝaku, napano naio loa laka lie vo ka kiniou.

<sup>29</sup> “Vite nalo na nalo makan vo, mia vonganei kiniou neberial batitig bo ban kamiu ruei, mia bogo na kuvial maluvo memedu ga ka venia neberenio, ana mia kamiu kuvijikia kumonea kiniou ka nebe riano. <sup>30</sup> Mia vonganei, kiniou maka nejikia never vite ve telabo rivan

kamiu, bior parinio tubo naĝa jo mila tuboiano ea yetemeriba nei, vonganei naio jo binimej ka kiniou ruei. Kanano moroano naio maka rivare ka tovulu kanaku moroano, <sup>31</sup> mia kiniou nemijamo ka ga kiniou ea juĝano, bior monokanio nala venia napano ĝa Teta berialio ka naio jidom ka kiniou nalaio. Mia nemila jibe na, ka tomu nalo na yetemeriba nei nalo ajikia avitilubar ka kiniou tinieku jiilo.

“Kito ĝa, vonganei kiano bogo nene na ruei, rotumolu rava tavio.”

## 15

### *Yesu naio be burupati na teli napano be riano*

<sup>1</sup> Naruei ka bogo na numiel nubano, Yesu naio ber iliano ta bunu ban kumemi. Naio berinavo “Kiniou nebe burupati na telikrevi na be riano, mia Teta naio jibe ka toro na bitikar jiotilikrevi nei. <sup>2</sup> Naio joĝa bitii veve batitig tilikiti nene nalo, mia ver naio mial tilikiti nene tai napano mia maka rivar ĝarati, naio telario, a ver naio mial tai napano bar ĝarati, mia bivikon bulagio sidiati nalo denio bo, ka rijikia rivar ĝarati ta bunu bereio. <sup>3</sup> Vite na namila ban kamiu ruei, a vite napano bivikon batitig kamiu na, naio be kanaku iliano nalo naĝa nojoĝa neber ka kamiu. <sup>4</sup> Kamiu kube saku tilikiti, kamiu monoka kuvijurukar vatitig kiniou rivu, a mia kiniou novijurukar vatitig kamiu rivu. Ver tilikiti rivijurukar vatitig re burupati, mia maka rijikia rivar ĝarati naio ga, mia bare ga ka kamiu bunu, ver kamiu kuvijurukar re kiniou rivu, mia kenemiu meuliano maka rijikia rivar ĝarati na bo leleio.

<sup>5</sup> “Kiniou nebe burupati na teli, a kamiu kube saku tilikiti nene nalo. Naio napano bijurukar kiniou a napano kiniou nobijurukar naio, naio naruei kiano meuliano mijikia rivar ĝarati ve buro nalo, bior ver kiniou re ea kamiu, mia maka kuvijikia kuvila vite tai na bo leleio ea Atua mirano. <sup>6</sup> Ver toro tai vijurukar

re kiniou, naio tibe ka tilikiti tai napano binimei menoko, ka mia atelario, adu avuku rivan ea sebi, ka mia sebi sisenio. <sup>7</sup> Ver kamiu kuvitu rivu damariga ea kiniou, a kanaku iliano to rivu damariga ea kamiu, venia namã kamiu kumisidom ka kuvikanio, kamiu kumijikia kuvokario. <sup>8</sup> Bo kanio kamiu kuvar m̃arati ve telabo ea kenemiũ meuliano, nina naruei naio memedu ga ka kiaku naiagagoano naio tomã rilaio, a ve m̃arabo bunu ka rila Teta sianõ rivavin lie vo. <sup>9</sup> Teta naio tinien jii kiniou toru laka, mia javukia ga napano naio tinien jii kiniou, kiniou bunu tinieku jii kamiu, naruei bo ka mia kamiu kuvijurukar vatitig ea kanaku tinietiiano nene. <sup>10</sup> Ver kamiu kumitumã kubokar vatitig kanaku tuboiano, kumijikia kuvijurukar ea kanaku tinietiiano, tavukia namã kiniou nojomã nabokar batitig ruei karamãku kanano tuboiano, nobijurukar batitig joomo ea kanano tinietiiano nene.

<sup>11</sup> “Naruei vite nalo namã nojo nober ka kamiu, nemije ban kamiu ka kanaku saariano jikia toa kamiu, naio mila napano ve burumãara saariano tai napano bo mia bo naio mijikia toa kamiu damariga. <sup>12</sup> Ana kanaku tuboiano dolu tai na maariano na mia neje van kamiu naio jibe nei, ber kamiu tiniemiuti tii kamiu tulaka, tavukia namã kiniou tinieku jii kamiu. <sup>13</sup> Maka bunu ve tinietiiano dolu tai ka mia rivu lie tovulu tinietiiano napano mia toro tai rijamo ka kiano meuliano, naio rimãro ka rilarur kanano bilbilu. <sup>14</sup> Verver kamiu kumidukar kanaku iliano nalo, kube kiaku bilbilu nalo ruei. <sup>15</sup> Kiniou novio re kamiu bunu ka kanaku tomu na imãuano ga, bior toro na imãuano naio mimãu ga, naio maka rijikia batitig kanano tubo kanano jidomiano na kiano imãuano. Mia kiniou nemial kamiu kumitibe ka kanaku bilbilu, bior vite nonovio namã nomijog Teta ber ka kiniou, kiniou neberial meravõ

bo ban kamiu. <sup>16</sup> Kamiu maka kuvijauia kiniou ka neve kenemiũ, mia kiniou naruei nebijauia kamiu ka kuve kanaku, kiniou nebitiri bulag kamiu ka kuva kuvar m̃arati ea kenemiũ meuliano nalo, m̃arati napano mia to toboto. Ana ver bogo napano kamiu kuvitumã kuvan tibe na, venia na mia kuvika den Teta na mave ea siaku, mia naio sian van kamiu. <sup>17</sup> Mia kanaku tuboiano nene na jibe nei, ber kamiu monoka tiniemiũ titii kamiu.”

*Tomu nalo na yetemeriba nei mia nalo asermi ka Yesu kanano naia-gagoano nalo*

<sup>18</sup> Ana Yesu naio berinavo “Ver mia kuvial ka mia tomu nalo na yetemeriba nei napano maka amonmonea, nalo asermi ka kamiu, kamiu kuviilo m̃ele re kanio. Kamiu monoka kuvisidomial ka napano nalo nei ajermi ka kiniou beamu ruei, karina nalo asermi bunu ka kamiu iorou. <sup>19</sup> Ver kamiu kuvitibe ka tomu nalo na yetemeriba nei ga, mia nalo asaaro ga ka kamiu, mia kiniou nebijauia bulag kamiu kumitaluvo den meuliano na yetemeriba nei. Kamiu maka bunu kuve verare ka kanano tomu nene nalo, ana rila na mia nalo asermi ka kamiu namariga. <sup>20</sup> Mia bo ka kamiu kuvitumã tiniemiũ rimaio namariga ka kanaku iliano nalo namã naber ka kamiu ruei, napano nabinavo: Toro na imãuano naio maka loa ka kiano tubo. Iliano na jaati nene ber javukia ga namã amila kiki lelan kiniou, mia ala kiki lelan kamiu bunu. Mia tibe ka ga namã maka ajogkar kanaku iliano nalo, mia ajogkar re bunu kenemiũ iliano nalo. <sup>21</sup> Bajago va nalo na jibe na mia ala ka kamiu bior kamiu kube kanaku, mia ala bior maka ajikia naio napano miila kiniou nebinimei yetano nei.

<sup>22</sup> “Ver nemei re neverial vite nonovio rimeravo ea miralo, mia Atua rialo re river nalo amila korov kanano iliano. Mia vonganei,

maka ajikia aver soŕeiano tai rivior kanalo kariano ka rila parilo sikili ka Atua, bior amijog kiaku iliano nalo ruei. <sup>23</sup> Nao, be riano ka parilo jikili ka Atua ruei, bior napano ajermi ka kiniou, ana naio javukia ga napano ajermi bunu ka Karamaku.

<sup>24</sup> “Verver re kiaku burutomoluo nalo napano amial nemilaio, napano maka toro dolu rijikia rilaio, ŕeli mia Atua maka jikia river ka kariano jualo. Mia makanio, amialio ruei, mia maka ga amoneaio, ajidel dolu ka ga ma ajermi ka kumemi juo karamaku. <sup>25</sup> Vite na naio memedu ga ka iliano tai napano Atua mudu jo joomo ea Vivitauiano Lu, napano berinavo

*‘Ajermi mele ka kiniou kurano, maka rivior kanaku beleiano tai.’*  
*Iouano 35:19, 69:4*

<sup>26</sup> “Mia kiniou neber ka kamiu, ka mia neiila Niununo na ijaiano taluvo ea Teta mave riyotuba ka kamiu, napano naio be Niununo na jaluvo ea Atua kanano meuliano, napano be Niununo na ilirianiano. Mia naio rimej riverial kiniou lie vo van kamiu, <sup>27</sup> ana iorou, mia kamiu bunu monoka kuverial kiniou ta bunu van kulo dolu nalo. Nina bior kamiu naruei kitoliko damariga jikar ea tikariano na kanaku imauano binimej bokar vonganei.”

## 16

<sup>1</sup> Karina Yesu jo mil lie vo ban kumemi kiano naiaga-goano nalo kia navo, naio berinavo “Iliano nalo nei, neber ka kamiu na ka amijikia avokar vatitig kamiu, ka mia kenemiu moneano ajoru re bogo tai. <sup>2</sup> Nao, kamiu monoka kuvijikia ka kiado tomu na tortoru nalo, mia avuku bulag kamiu den yimo nalo na volkouano na kanado, mia rivova laka van kamiu rivano o rivokar bogo na ver auebinvin kamiu kumarmaro, mia nalo averinavo nina naio be imauano na bo tai napano nalo amila ka Atua saaro rivorio. <sup>3</sup> Mia nalo amijikia ala

tibe na rivan kamiu, bior binimej bokar vonganei maka ajikia vatitig Teta na mave, a maka ajikia batitig kiniou bunu. <sup>4</sup> Mia iorou kanio, bogo napano ver kuvial vite nene amalmaluvo ka kamiu tibe na, kuvijikia kuvisidomialio bereio, kuvijikia kuverinavo Terinio kiana, vonganei romial vite nalo na jibe ka ga napano Tubo naio ber bisivisii ban kito beamu ruei.”

### *Mia Niununo Lu rijailo*

Ana Yesu berinavo “Vite na, kiniou maka nojomna noberenio ka kamiu nua ruei, bior ea bogo na kiniou nojo kia ga bija kamiu vo. <sup>5</sup> Mia neber ka kamiu vonganei bior ka napano mia vesiou re, monoka notuvan kamiu, navan bereio ea naina nua beamu miila kiniou nebinimej. Kiniou nojomna neberver jibe na ban kamiu ruei, mia nemial ka kamiu maka kuvituma kuvivikano mia kiniou nava be, ŕeli na navan ea vio na jumabe, <sup>6</sup> bior ka bogo napano neber ka monoka notaluvo den kamiu tibe na, kenemiu iviso mijog bova toru laka biorio. <sup>7</sup> Mia makanio, naio monoka tibe na ga. Neber be riano ban kamiu, mia rivu laka van kamiu ka nataluvo den kamiu, bior ver navan re, mia Niununo na ijaiano naio maka rijikia rimej, avona ver navano, mia neiila naio rimej ea kamiu. <sup>8</sup> A Niununo na, bogo na naio rimej, mia naio rila imauano ea yetemeriba nei, rila kiano tomu nalo ka asidomlubar jidomiano na tortoru tealu, tai ea tivelinio na kialo kariano nalo, tai ea tivelinio na kanaku memeduanu nalo, a tai ea tivelinio na Atua kiano tibureiano vanlo.

<sup>9</sup> “Moti nene, be Niununo nene rila avitulubar ka burupati na kialo kariano naio be kialo bajago na maka asidom amonmonea kiniou.

<sup>10</sup> “A tinene, mia Niununo nene rilalo avitulubar ka kiniou maka nala vova, nememedu laka. Kiniou nabare ka nemijikia navan bere mave ea karamaku, mia nalo aial re bunu kiniou.

11 “A tolu nene, mia Niununo nene rilalo avitilubar ka mia Atua naio rijikia tiburelo, tibe ka ga napano naio jibure tubo kirivova nei ruei napano naio jo be tubo ka yetemeriba vonganei.

12 “Vite telabo aju kiana vo ka mia neverialio, mia nemial ka napano kumijog bova jibe na, maka nejikia never ka kamiu vonganei. 13 Mia bo ga, bior mia iorou kanio, bogo na Niununo na ilirianiano naio rimei ea kamiu, mia mijikia rivuru m̄arabo ka kamiu, mia kuvokar ilirianiano dolu nalo nei. Ilirianiano nalo na mia naio riverloglog ka kamiu, mia river re ea kiano jidomiano ga, mia na naio mijogio ea vio mave, naio naruei mia naio riverialio ka kamiu, riva rivokar napano mia naio mijikia riverloglog vatitig kamiu ea tivelinio na vite nalo napano mia amalmaluvo ka kiniou rivesiou re. 14-15 Miamoiano nalo na be Teta kiano, abe kiaku bunu, naruei mia Niununo rudu kiaku iliano nalo na rimei rije vatitig rimonea kenemiu meuliano. Ea m̄arabo na naruei mia Niununo naio rila kiano in̄auano rimemedu, ka napano rudular siaku medave.”

*Buruñara saariano ka bogo na Yesu rimei bereio*

16 Mia Yesu ber bunu ban kumemi, naio berinavo “Mia vesiou re, bogo ve teliki ga, ana mia kamiu kuvial re bunu kiniou, karina, bogo ve teliki ga bereio, ana mia kamiu kuvial kiniou bereio.”

17 Naruei kumemi naiagagoano nalo numijog iliano nei, nuberver ban kumemi nuberinavo “Kito maka rejikia vatitig rivu leleio vite nalo nei napano naio joñã berio. Beamu nua naio joñã berinavo mia naio rivan bereio riva to naljuo karamãno mave tiniabene, mia vonganei naio berinavo vesiou re, kito reial re naio, karina vesiou re bereio, mia kito reial naio. 18 A bogo ve teliki nañã naio joñã ber na, nioti nene ber venia? Kito maka ravokar kiano jidomiano leleio!”

19 Ana Yesu naio mijikia ka napano numisidom ka nuvika vatitig vite nalo nei denio, ana naio jikario, naio berinavo “Peli kamiu kumituñã kubivika ea kamiu p̄eli ea tivelinio na kiaku iliano nei? 20 Bo ga, mia kiniou neverial vatitigio van kamiu tibe nei, ka mia kuviteg, kuvijog rivova ka venia na ala ka kiniou, mia tomu dolu nalo na yetemeriba nei mia asaaro kanio, ajog rivu ve toru laka. Mia tiniemiu rivujo ka jogvaiano rivano-o, karina mia nemeul bereio ea nam̄ariano, mia kuvial kiniou bereio, mia kenemiu jogvaiano naio rivilig rimei ve jogvuiano bereio. 21 Mia nina tavukia ga tira na be m̄abono, napano ver rimonloglog kiano aura nene, mia taakano rijalele naio monoka rijog rivova-o mia ka naio rudu kenerinio. Mia bogo napano naio midu bisi, naio maka bunu sidomial kiano jogvaiano, mia naio tiniene bujo ka saariano bior kanano kiri solbouo neibano naio miyotuba ea yetemeriba nei.

22 “Naruei mia kamiu kuvitibe na ga. Vonganei mia tiniemiu nalo avujo lou ka buruñara jogvaiano, mia iorou kanio ana mia namalmaluvo ka kamiu bereio, ka na mia kamiu kumijikia kuvisaaro bereio ea buruñara saariano tai napano mia ve re toro tai naio rijikia rudular den kamiu bogo tai. 23 Mo bogo napano mia namalmaluvo ka kamiu, vede mia kuvisidom ka mia kuvika vite ve telabo den kiniou, mia makanio. Tenalo na kamiu kuvika re den kiniou, kamiu kumijikia kuvika rimemedu den Teta na mave. Kuvijikia kuvika ea siaku ga, naruei naio mia rijamo ka rivan kamiu. 24 Binimei bokar vonganei, kamiu maka kuvituñã kuvivika vite nalo ea siaku, a tikar banei, ver kuvivika ea siaku, na mia kumijikia kuvokario, a mia naio rila tiniemiu rivujo ka saariano. 25 Binimei bokar vonganei, nojoñã nober vite nalo ban kamiu ea jamerijiano nalo, mia bogo nene jo binimei ka napano

mia neilluku re bunu tibe nei rivan kamiu, ana mia neverii Teta na mave van kamiu, nemijikia neverial vite nonovio rimeravo rivu vatitigio van kamiu. <sup>26</sup> Ana ea bogo na, mia ve re kiniou ga napano kiniou monoka nevika vite nalo den Teta kar kamiu, ana mia kamiu ga kumijikia kuvika denio rimemedu ea siaku. <sup>27</sup> Kamiu kumijikia kuvika naio rimemedu, bior ka napano naio mial ka napano kumituña tiniemiu jii kiniou, a naio mijikia ka napano kumonea kiniou ka nomoluo den naio nabatove ea yetemeriba nei. <sup>28</sup> Ana ea tivelinio ka vio na mia kiniou noto navan ea, nemijikia never jibe ka na neber vonga, ka napano najaluvo ea Teta na mave nebinimej ea yetemeriba nei, naruei mia nataluvo den yetemeriba nei bereio ka navan bere ea karamñaku kanano vonuo.”

<sup>29</sup> Naruei nuberdoþe, nuberinavo “Tubo, vonganei jau maka bunu koilluku ea jamerijiano! Bogo naña kober vite nalo meravo jibe na mia kumemi numialio bo laka. <sup>30</sup> Kumemi numijog kiamo iliano nalo, mila nubutilubar ka jau komijikia vite nonovio. Bogo na maka nuvika vikadeniano vo, jau komijikia ruei vite na nuvika denso. Jibe na, vonganei numonea jikili ka beriano, ka jau komoluo ea Atua ana kobinimej ea vio nei.”

<sup>31</sup> Ana Yesu naio berdoþe kumemi, naio berinavo “Peli vonganei ga ana kamiu kumoneaio, a? <sup>32</sup> Bo kamiu kumoneaio, bior aura naña kiniou nojomña nober, naio jo binimej, ver þeli naio binimej ruei. Ea bogo nene, mia ajil kamiu kuve dedade tanea vio, þeli na kuvanvan veve terakurano bereio ea kenemiu vonuo nalo, mia ve re tai to vija kiniou, mia kiniou ga ve takurano noto. Mia naina naio bo ka ga kiniou, bior nemijikia ka mia ve re kiniou ga ve takurano mia Teta naio vija kiniou dañariga. <sup>33</sup> Kiniou neber jibe na ka kamiu ka kamiu niukniuku rivie re kamiu, a ka kamiu kuvijog re

rivova. Kenemiu meuliano na yetemeriba nei mia rivujo ga ka bogokouo, mia kiniou nojovulu vovaiano na yetemeriba nei, naruei kenemiu meuliano na ea kiniou, mia kamiu kuvileal tumaro na bo tulaka.”

## 17

### *Yesu kiano volkouano na tomoruo*

<sup>1</sup> Mia bogo na Yesu ber iliano nalo na bisi, ana naio river rivolkouo rivan karamñano. Naio jirarag bavin tiniabene, berinavo “Teta o, kiniou nemijikia ka vonganei be kiaku bogo na jogvaiano binimej naruei. Aire, jau kovitikar kiniou kenerimo siaku, naio rivatove re, mia naio rivavin, ka na mia nemijikia nodular lie siamo bunu bereio. <sup>2</sup> Nomonea ka mia jau kala tibe na, bior komidu burumñara moroano na ban kiniou ruei, ka mia neve tubo ka tomu nonovio. Mia jau komijamo ka ban kiniou ka nalo napano komije monea jumñaku, mia nemijikia najamo ka meuliano napano naio maka rijikia ribisi bogo tai rivanlo. <sup>3</sup> Mo mñarabo na meuliano nene napano naio maka rijikia ribisi naio jibe nei, kanio napano amijikia jau, Atua takurano ga napano naio beriano, bija bunu kiniou Yesu Kristo napano jau komiila kiniou nebinimej. <sup>4</sup> Kiniou nojuvanso nebinimej ka nala siamo rimej ve tomoruo ea yetemeriba nei, naruei nominñauka vite nene ruei, banbano-o vaataro ka nala nonovio imñauano nalo napano kojidom nalaio. <sup>5</sup> A Teta, nojidom novika ver kiniou neviedu notumolu notua miramo bereio, mia jau kodu kiniou bere noto vijaso kito ve juo reje tuboiano bereio ea mermerano na vio mave, tibe ka napano kito juo romila beamu naña rejii yetemeriba nei.”

### *Yesu bolkouo ka kiano naia-gagoano nalo*

<sup>6</sup> Mia Yesu jo bolkouo lie bano, berinavo “Teta, ea tivelinio na nalo na yetemeriba nei napano kobijauia bulaglo abe kiamo, jau kojianlo ban kiniou, jau komijelo amonea

juṁaku, naruei nemijikia never ka jau ka neberialso kalo ruei. Vonganei naruei nalo ajumña abokar jikili kiamo Iliano Lu.

<sup>7</sup> “Nalo abitulubar ruei ka vite novo nonovio napano ajua kiniou, nalo ajavukia kiamo ijaiano nalo ban kiniou, <sup>8</sup> bior kiamo iliano napano kojian ban kiniou, kiniou nejian solio ka banlo, naruei nalo amijeveio nonovio ruei, mila na vonganei nalo amonea jikili ka kiniou najaluvo easo nebinime, jau naruei komiila kiniou.

<sup>9</sup> “Nobolkouo banso vonganei, maka nosidom nobolkouo ka tomu nonovio na yetemeriba reraio vaarakurano, naruei nojidom nobolkouo lie vo rivior nalo napano jau komijelo ban kiniou, bior napano nalo abinime, abe kanamo ruei. <sup>10</sup> Nalo nonovio na abe kiaku, abe kiamo, a nalo nonovio na abe kiamo, abe kiaku, a nalo napano jau komiilalo ka kiniou, abe burupati na kiaku mermerano.

<sup>11</sup> “Mo vonganei binime, bokar bogo napano mia kiniou neviedu easo bereio, maka nejikia noto bunu ea yetemeriba nei, mia kanado tomu nei mia nalo atu ga. Tibe na, Karamñaku lu, bo ka jau kovitkar nalo nei napano komiilalo ka kiniou, jau kovokar vatitiglo rivu joomo ea kanado m̄aratavo, ka mia amijikia amei ve takurano, tibe ka na kito juo robe takurano. <sup>12</sup> Tilikiti napano nojo bijalo, nebitkar batitiglo, nobokar batitiglo yetano ka siamo. Nobitikuku batitiglo kalo banbano-o nalo abiniu aju batitig bo ea kiniou, mia nalo ve takurano ga kalo monoka taluvo den kiniou, tibe ka ga napano Vivitauiano Lu berialio, nina be toro napano be kenerinio navakovioano.

<sup>13</sup> “Vaataro ka ga kiniou nomei bere ea jau naruei, mia nejidom neverial iliano nalo na ka bogo napano nojo kia ga ea yetemeriba nei vo, ka rila burumñara saariano nei naña joa kiniou vonganei, mia

naio mijikia rime, ve toru bunu ea nalo dolu na. <sup>14</sup> Kiniou nejian kanamo iliano banlo ruei, mia bogo na kulo dolu na yetemeriba nei aial nalo, aserm̄i tanea kalo. Nina bior abinime, jibe ka maka bunu ave na yetemeriba nei, javukia napano kiniou maka nove na yetemeriba nei. <sup>15</sup> Mia kiniou nojomña nobolkouo bior nalo na kaso, maka noto novika ka mia kovuru bulaglo den yetemeriba, mia kiniou nobika ka bogo napano aju kia ga yetemeriba nei, mia jau kuvurukolo vatitiglo rivu, ka mia toro kirivova nei rila lelanlo re. <sup>16</sup> Aiou, jau kovitkar vatitiglo, bior nalo ajibe ka kiniou ga, kumemi nube valauo ga ea yetemeriba nei. <sup>17</sup> A nobolkouo bunu ka mia koverloglog kanamo ilirianiano rivanlo, ka naio rioko nonovio kialo meuliano nalo amei ave lu, ave kiamo jau takurano ga. <sup>18</sup> Nobolkouo kalo jibe na, bior jibe ga naña jau komiila kiniou nebinime, ea yetemeriba nei, naruei kiniou nojomña nemiila bulaglo bunu ka avanvan eaio. <sup>19</sup> Nomioko kiaku meuliano vanso riviorlo, ka mia nalo bunu aioko kialo meuliano rivanso rive riano.”

#### *Yesu bolkouo ka namoneano nalo*

<sup>20</sup> Ana Yesu jo bolkouo keano, berinavo “Teta, kiniou nojomña nobolkouo banso, maka nobolkouo rivior nalo nei ga, mia nobolkouo bunu bior nalo dolu napano mia amonea kiniou rivior kialo iliano nalo napano abe kiaku. <sup>21</sup> Kiniou neber bo kaso Teta, ka mia nalo nonovio nei amei ave takurano, rivare ga ka kito juo. Jau, jau ea kiniou, a kiniou, kiniou easo, mia nalo bunu monoka nalo ea kito, ka mia rila napano yetemeriba momou nei rijikia rimonea ka kiniou najaluvo denso, jau komiila kiniou nebinime yetano. <sup>22</sup> Burumñara mermerano naña kejian ban kiniou, ana kiniou nejianio banlo, ka na mia amijikia amei ave takurano tibe ka napano kito juo kito takurano. <sup>23</sup> Jau, jau ea

kiniou, a kiniou, kiniou ealo, ka mia amijikia amei ve takurano ea vite nonovio, a bogo napano tomu nalo na yetemeriba nei aialio, mia amijikia avitilubar ka be riano, ka jau naruei komiila kiniou nebinime, a avitilubar ka napano jau tiniemo jiilo toru laka jibe ka napano jau kojoma tiniemo jii kiniou.

<sup>24</sup> “Vonganei Teta, nemil maaro jibe nei, nejidom toru laka ka nalo naña jau kejian ban kiniou, mia iorou ajikia avija kiniou ea kanado vonuo. Kiniou nejidom avija kiniou ka ajikia aial kanaku burumara mermerano nei, napano jau komije ban kiniou beamu ea tiiano na yetemeriba nei, bior jau tiniemo jii kiniou toru laka. <sup>25</sup> Teta, jau kobe lu a komemedu, mia tomu dolu nalo na yetemeriba nei maka ajikiaso, mia kiniou nemijikia batitigso bo damariga. Naruei kiniou namila ka napano vonganei kanaku naiagagoano nalo amijikia ka kiniou najaluvo denso, jau komiila kiniou nebinime. <sup>26</sup> Kiniou nemila napano vonganei, telabo napano amijikia kanamo bajago novo ruei, a mia kiniou nala riva lie vo, ka mia burumara tinietiano na tiniemo jii kiniou kanio naio mijikia toalo, a ka mia kiniou bunu noto vijalo bogo nonovio.”

Naruei volkouano na Yesu kanano ban karamano biniu ea vio na.

## 18

*Abokakar Yesu*  
*Mataiu 26:47-56; Mak 14:43-50;*  
*Luka 22:47-53*

<sup>1</sup> Yesu berial iliano nalo nei, naio bolkouo bisi, ana na naio jumolu jukamu ka kumemi kiano naiagagoano nalo, numituvan Yerusalemo bereio, numiel ea burumelijo nubatove ea bolu na Kitron tivelinio bano. Numiel nubano nubokar jiboburuolivi tai na telisu naña Yesu joma banvan eaio va telabo ruei, naruei numitu kija ea vio na beamu vo. <sup>2</sup> Vio nei, Jutas jo jakisor kumemi liko Yesu

nuban eaio va telabo ruei, ana naio mijikia batitigio bo ruei ka bogo na a peli kumemi numitua vio na kovio. Jibe na, ka bogo nei naio ba berial Yesu ka tomu na tortoru nalo ruei, mila na amiila kialo tomu nalo ajakisorio, ana naio burumara kalo abinime, ea vio nei ka Yesu. <sup>3</sup> Nalo neibano tomu na tortoru na kulo lu bija Varisis nalo amiilalo, nina be taara tai na tomu na mira na vio Romo, bija taara tai nakukuano na Yimo Lu. Ana nalo aju amiel abinime, bija blayulu nalo, bija kialo tena mira nalo. <sup>4</sup> Abinime, ajidom avokar Yesu, mia naio joma mijikia batitigio bo ruei vite nalo napano mia riyotuba ka naio, mia bogo napano naio mial lo, naio maka riilo, mia naio miel ku kalo ga ban ka rivotavo ka nalo, ana mil banlo, bika berinavo “? Ei, kamiu kumituma kumisirag kei?”

<sup>5</sup> Naruei nalo nei ajumolu aju napano Jutas, toro na jiveluku ka Yesu, naio jo jumolu lelan bijalo, mia nalo aberdope banio, aberinavo “Kumemi numituma numisirag kema na Yesu, napano naio tena Nasarete.”

Ana Yesu berdope, naio berinavo “Naio naña kamiu kumituma kuber na, kiniou nene nei naruei.” <sup>6</sup> Naruei telikiti napano Yesu ber iliano nei kalo, amiilo mia mila amiel davarvatu vaarakurano, ajibirbili dedade ea borotano.

<sup>7</sup> A vaarakurano bereio, Yesu bika bereio denlo, berinavo “? Kamiu kuvila von ka kuver bere vonio, kamiu kumituma kumisirag kei?”

Naruei aber bereio, aberinavo “Kumemi numisirag Yesu na vio Nasarete.”

<sup>8</sup> Ana Yesu naio berinavo “Jibe ka naña kiniou neberenio ruei, kiniou nene nei naruei. A ver kamiu kubinime, kar kiniou takurano ga, bo ka kamiu kumijamo ka dolu nalo nei kanaku amijikia avano ga tibe na, kuvitokol re lo.” <sup>9</sup> Naio ber jibe na kalo, mila na kiano iliano tai napano naio berial vonga ea kiano

volkouano ban karamãano naio miyotuba, napano naio ber jibe nei, berinavo “Ea nalo napano komijelo ban kiniou, maka ve nalo tai kalo napano kiniou namilaluvu naio bano.”

<sup>10</sup> Aju jibe na, mia amiilo ka napano vaarakurano ga, Saimon Pitere naio jumolu burular kiano iobogu na mira, naio babijan ban parinio toro na iũaauano tai na parinio toro lu, naruei naio jetitire ea ga, mioplar tiliniene tivelinio va meruo. Toro nene siano Malkusi. <sup>11</sup> Ana Yesu mil ban Pitere, naio berinavo “Pitere, jau kodu vatitig bereio kanamo iobogu na mira na riva joomo ea siveu nene bereio. ?Jumãabe, jau maka kosidom ka kiniou navan ea bogokouo na jogvaiano napano Teta na mave naio mije ban kiniou? Makanio, monoka navan eaio ga.”

<sup>12</sup> Yesu naio ber jibe na avona bisi ana tomu na mira, bija kukuano nalo na Yimo Lu, abinimei abokakar Yesu jikili, amiorkar vatitig jumãano be juo, aburu naio bano.

*Aburu Yesu ban ea Parinio Toro Lu kiano vio*

<sup>13</sup> Naruei aburu Yesu bano, amaluvu ea Parinio Toro Lu kiano burusio, ana vite na jukamu napano amilaio, aburu Yesu ba miyotuba ea vio napano tormoruo nei Anas joaio. Anas nene, naio be Parinio Toro Lu nua beamu, mia naio joa vio na kia bija Parinio Toro Lu vou, bior napano Parinio Toro Lu vou nene, naio joro ka kenerinio vevinio niatira. <sup>14</sup> Toro nene siano Kaivas, mia naio naruei napano nua beamu, naio berial m̃arabo tai ban navurim̃araboiano nalo na kulo Ju kialo. Naio berinavo verver amial ka monoka auebin toro tai ve takurano ka rilarrur tomu ve telabo kialo meuliano, naio mijikia rijamo ka rivu ga.

*Varbonbonuano moti napano Pitere mila ka Yesu*

*Mataiu 26:69-70; Mak 14:66-68; Luka 22:55-57*

<sup>15</sup> Jibe nei naruei, aburu Yesu ban ea vio napano Anas joaio, ana ea bogo na, kumemi juo Saimon Pitere numitu numitakisorlo. Beamu kumemi juo Parinio Toro Lu nei nuburon vio takurano, naruei amijamo ka kiniou natakisor Yesu nava jouro, mia aberbure Pitere jo bo. <sup>16</sup> Aber naio to tavio ga ea morouo, mia bogo napano nemial jibe na, nabano bereio, nemil ban toro na toru nei kiano niatira na iũaauano tai, napano jikili jua morouo. Ana niatira nei mijamo ka kiniou ka novuru Pitere bunu riva jouro. <sup>17</sup> Mia bogo napano Pitere jo binimei jouro, niatira nei mialio, bika denio, berinavo “?Ana jau bunu kobe naiagagoano tai na toro nei kanano, ina?”

Mia Pitere naio mijogio, miilo kanio ana berdoŕe mila sibililio, berinavo “Ee, makanio.”

<sup>18</sup> Ana Pitere naio mial ka napano tomu na iũaauano bija kukuano nalo ajovokar sebi tai ka vovojulu, ana ajumolu aju jeliviv eaio amijegilo, mia naio bunu ba vaataro kalo, jo mijegi naio eaio.

*Parinio Toro Lu moruo Anas mila vikadeniano nalo den Yesu*

*Mataiu 26:59-66; Mak 14:56-64; Luka 22:66-71*

<sup>19</sup> Naruei amila Yesu jumolu ju jukamu ea mirano Parinio Toro Lu moruo nei Anas, ana naio bika vite telabo denio. Naio bika jumãabe ka naiagagoano nalo napano amonmonea naio, a bika denio ka tivelinio na verloglogiano nalo namãa naio jomãa jian banlo. <sup>20</sup> Mia Yesu maka river vite ve telabo vanio, mia naio ber vatitigio ga banio, berinavo “Vite nonovio napano nojomãa neberloglogio, kiniou maka lele neverloglog lukuvanio mia kiniou nojomãa neberialio ea vio medave meravo banlo abiniu. Dañariga nojomãa neberloglog kiado kulo Ju joomo ea yimo na volkouano, ŕeli na joomo ea Yimo Lu, naruei dañariga nalo

miroano ajumã amiagago ka kiniou.  
<sup>21</sup> ?Tibe na, bior venia ana jau kobika den kiniou ka neberlogloglo jumãbe? Ver jau kosidom kejikia, mia bo ka jau kovika von nalo nanã damãariga ajumã amiagago ka kiniou. Nalo amijikia batitigio na.”

<sup>22</sup> Mia bogo na Yesu ber iliano nei, nakukuano nalo tai kalo napano naio jikili ju vaataro kanio, naio mijogio jibe ka Yesu jomã miyotel ea toro na toru nei, naruei naio mijuba Yesu, mil banio berinavo “?Ei, jau be tiniemo ka koverdoþe toro lu na kanado ka iliano na jibe na! Jau kovitikarso.”

<sup>23</sup> Mia Yesu berdoþeio berinavo “Kovitii vatitigio vonio kanaku iliano nei. Ver nomila sibi, bo ka jau koverial ea nalo na miralo, ka namila sibi jumãbe. Mia ver maka never vite tai napano maka rimemedu, bior vaio ana komijuba kiniou?”

<sup>24</sup> Ana kario, aburu Yesu, napano amiorkakar jumãano nalo kia ga vo, ajaluvo den tormoruo Anas, aburu naio ban ea komeli na Parinio Toro Lu Kaivas kanano, ana naio mila vijagiano kanio.

*Varbonbonuano valuo napano Pitere mila ka kiano Tubo*  
*Mataiu 26:71-75; Mak 14:69-72; Luka 22:58-62*

<sup>25</sup> Mia Saimon Pitere jikili ju bijalo ea tivelinio na sebi, aju amijegilo, ana abitilubar kija naio, ana abika denio aberinavo “?Jumãbe, þeli jau bunu kobe toro na kiano naiagagoano tai?”

Ana naio berbure, naio berdoþe berinavo “Makanio, kiniou maka neve kanano.”

<sup>26</sup> Pitere berdoþe jibe na, mia nalo tai napano nã ajumolu aju na naio be Parinio Toro Lu kanano toro na inãuano tai, napano naio be torogio tai nanua Pitere jelar buru tiliniene meruo. Naio jikili lie vo ka bika bereio den Pitere, naio berinavo “?Peli jau maka kove kanano tai, mia kiniou be tinieku ka namialso bija naio yako ea buruolivi ruei?”

<sup>27</sup> Mia Pitere milavaniao jikili, naio barbonbonua varolu ka ninei, naio berinavo naio maka rijikia Yesu, mia monloglog ka aura nene ana amijog tormano jokokoreko.

*Aburu Yesu ba jikili jukamu ea Pailat mirano*  
*Mataiu 27:1-2,11-14; Mak 15:1-5; Luka 23:1-5*

<sup>28</sup> Naruei viomijeni mermeravo kia ga vo, maka viorijeni vatitig vo, mia Kaivas naio mil ban Yesu ruei, naruei aburu naio ajaluvo den vio nei bereio, aban ea Pailat kanano komeli. Pailat naio be toro na toru napano kulo Romo abitirilar naio ka rije tuboiano ea buruvenuo na kulo Ju nalo kialo.

Mia ka bogo na abinimei vaataro ka kanano komeli, kulo Ju nalo kialo navurimãaraboiano tinielo maio ka jibe ka napano abel ka ava joomo ea yimo nei, ajidomii ver ava joomo eaio mia rila amei ameravo re bunu ea Atua mirano, mia ajikia re ka avijurukarlo ka sinaniano na Jokoluolu na Sidomkariano na Ioruriano. Tenene na, aburu Yesu, abinimei aju tavio ga, mia maka ava joomo.

<sup>29</sup> Ana aberial ka Pailat, ana naio binimei tavio mial lo, bika denlo, berinavo “Mo, kamiu kuver von kema nei mila venia na bova ana kuburu naio binimei jua miraku kavijova niogoravo nei jibe na.”

<sup>30</sup> Ana nalo aberdoþe, aberinavo “Maka, kumemi numijikia nuver kaso ka toro na, naio nã mila kirivova-o mia! Ver þeli, mia kumemi maka nuvijikia nuvuru rimei vanso.”

<sup>31</sup> Ana Pailat berinavo “Ver tibe na, mia kamiu ga kumijikia kuva kuvisian vironiano na vabe van naio napano memedu ka kenemiu tuboiano.”

Naruei navurimãaraboiano na kulo Ju nalo aber kanio aberinavo “Ea kenememi tuboiano, kumemi numijikia nuvitibure naio ka atuba bin rimãaro, mia vonganei tuboiano na vio Romo naio berbure kumemi bereio ka mia kumemi maka nuvijikia bunu ka nuvila tibe na. Jau

takurano ga, kobe toro na toru na parinio tubo na vio Romo kanano, jau ga komijikia kalaio, jau ga komijikia koverinavo asian vironiano na m̄ariano rivanio ea m̄akolkolo.”

<sup>32</sup> Mia bogo napano amije iliano nei ban Pailat, maka ajikia, mia aju amila Yesu kiano iliano tai re nua naio binime i be riano. Nina bior naio berial kiano m̄ariano ruei, berenio memedu ga ea venia napano kulo Romo nalo ajum̄a amila, napano ajuk kakar toro ea m̄akolkolo.

<sup>33</sup> Mia Pailat jidom ril kija naljuo Yesu ga, ana naio ba joomo ea kiano komeli, naio bio ber Yesu rime i rial naio vo. Naruei amiila Yesu ba joomo, ana Pailat bika denio, berinavo “Kiniou nojidom ka jau koverial vatitig rivu van kiniou. Jau kobe Parinio Tubo na kulo Ju be riano, p̄eli na makanio?”

<sup>34</sup> Mia Yesu maka riverdope rimemedu rivanio, mia naio berdope liliu ea navikadeniano tai, naio berinavo “?Kanamo vikaniano na, jau kobika vatitigio, p̄eli na jau kobika den kiniou bior venia ga napano jau komijog nalo dolu ajum̄a aber niegeniege kiniou kanio?”

<sup>35</sup> Ana Pailat berdopeio, berinavo “Ii, kiniou maka nejikia den kami u kulo Ju nalo, kiniou maka neve kami u tai. Kiniou nemijikia ga ka kanamo tomu nalo naliko tomu na tortoru na kulo lu nalo na kenemi u, nalo aburuso kobinime i ka netibureso. Jibe na, nojidom nejikia ga ka jau komila venia napano nalo amialio maka rimemedu?”

<sup>36</sup> Ana Yesu berdope, berinavo “Nalo ajidom ka jau monoka ketibure kiniou, bior ka napano nalo maka asidom kiniou neve tubo kalo. Mia kanaku tuboiano naio maka tibe ka tuboiano nalo na yetemeriba nei. Kanaku tomu nalo maka ala mira vija nalo na abinime i ka avokakar kiniou ruei na, ka mia kiniou navan ea re kenememi tomu na tortoru na kulo Ju nalo jum̄alo. Kumemi maka nuve tomu na mira tibe na,

bior kanaku tuboiano naio maka ve tena yetemeriba nei.”

<sup>37</sup> Ana Pailat berkanio, berinavo “? A na m̄a ka nomijog koberii kiamo tuboiano, jibe ka napano jau kobe parinio tubo tai ruei ina?”

Ana Yesu berinavo “Naina naruei! Jau kobakario vatitigio kiana, javukia napano jau koberenio. Kiniou nebinime i yetemeriba nei, nomiyotuba eaio, kar vite na ga naruei, a ka kiniou neme i neverial ilirianiano nalo van kiano tomu nalo. Toro na m̄a naio jikili ju tivelinio na ilirianiano, mia naio riagago rivu ka kiaku iliano.”

<sup>38</sup> Naruei Pailat bika den naio bereio, berinavo “Ana kei mijikiaio, ilirianiano naio be vaio na?”

*Pailat jidom tuvan Yesu rivan bereio*

*Mataiu 27:15-31; Mak 15:6-20; Luka 23:13-25*

Telikiti napano Pailat ber iliano nei bisi, naio jumolu batavio bereio, ana naio berial ka kulo Ju napano ajikili aju tavio, naio berinavo “Tete na, kiniou nobitii ruei mia maka naleal vite na bova tai toa naio leleio. Bo kanio naio mijikia riva tavio bereio ga tibe na. <sup>39</sup> Mia ver kami u kuvitum̄a tiniemi u rimaio, ka yuka nonovio, ea jokoluolu nalo nei, nojom̄a noburular kami u tai napano joa nalakoiano, nomijamo ka naio biedu bereio ea kami u jibe na ga. Naruei kiniou nemial jibe ka ea yuka nei, naio bo ka ver kiniou notuvan toro nei, kenemi u Parinio Tubo kulo Ju nalo, naio riviedu ea kami u tibe na ga.”

<sup>40</sup> Naio berial jibe na, mia nalo maka asidomio, amiaga burelo aberinavo “Makan, maka leleio, kumemi maka nuvisidom toro na. Kotuvan dolu na Barabaş rime i maluvo kean kumemi bereio.” Barabas na m̄a aberiio, naio be toro Ju tai napano nanua mila baravo die kulo Romo nalo.

## 19

*Pailat mijamo ka avitiv Yesu*

<sup>1</sup> Mia Pailat naio jidomii ka tuvan Yesu rivano, mia tomu na tortoru na kulo Ju nalo ajikili ka aberbureio. Ana Pailat jidom rila titai ka asaaro kanio, ana naio miila kiano tomu na mira ka alavon ka avitiv naio kija beamu vo. <sup>2</sup> Mia na mira nalo aburu naio bano, abar nionoti tilikibi abili vatitigio bo, ana amidu joa pariparinio jibe ka toro na toru tai kiano batubatu. Mia abar kulukoti na bo tai napano be si, jibe parinio tubo m̃ano, amiya ea naio. <sup>3</sup> Ana aju lilie abinimei vaataro kanio, abeve terakurano amiyotel eaio, aberinavo “!Parinio tubo na kulo Ju nalo kialo, aiou! !Kumemi nubatove kaso!” Aber iliano nei kanio, ajum̃a amiubajuba kulbibinio.

<sup>4</sup> Bisi na iorou kanio, ana Pailat naio ba tavio bereio kean tomu na tortoru na kulo Ju nalo kialo napano aju tavio kiano, naio berial kalo, berinavo “Mo, vonganei kiniou nojidom kamiu monoka kuvitilubar ka kiniou maka bunu neleal ka kema nei, vovaiano joa naio leleio, naina naruei mia kiniou novuru rimeirivan kamiu bereio.” <sup>5</sup> Naio berjibe na, ana Yesu naio miyotuba tavio, jikili ju kamu ea miralo, bija batubatu na tilikibi ea parinio bija kulukoti napano amiya eaio. Naruei Pailat berial ka kulo Ju nalo, berinavo “Nainei naruei be kenemiu toro na toru!”

<sup>6</sup> Mia tomu na tortoru na kulo lu nalo, bija navitikariano nalo na Yimo Lu, bogo napano abitilubar venia napano Pailat naio jidom rilaio, nalo maka lele asaaro kanio naruei, nalo ajum̃a amiaganiaga, aberinavo “Kuvituku kakar naio ea m̃akolkolo! !Kuvituku kakar naio ea m̃akolkolo!”

Mia Pailat maka bunu rijikia tovulu lo naruei, mijamo, berinavo “Mo, ea kanaku vitiiano, kema nei naio maka rila vite tai vova lele garuei, a verver kuvisidom, kamiu ga kuvuru naio kuvituku kakario ea m̃akolkolo.”

<sup>7</sup> Mia bogo na amijogio, maka asaaro, aberinavo “E makanio! Komijikia ruei ka maka nuvijikia

nuvila tibe na. A be riano, bo ka kema na naio rim̃aro, bior naio milakorov kenememi tuboiano. Naio joña milavonio ka vavavinia naio tulaka, ka ver naio be Atua kenerinio. A jau ga naruei komijikia kala rim̃aro.”

<sup>8</sup> Mia bogo na Pailat mijogial vite nei, burum̃ara moroano tai binimei ea naio bereio, naio jo jidomii toru ka Yesu naio be toro na vabe bereio, <sup>9</sup> ana naio ba joomo ea kanano komeli bereio, naio bio Yesu binimei, bika denio, berinavo “?Jau, vio na vabe naruei naio be kanamo vio memedu?”

Naio bikanio, mia Yesu maka ril, maka river titai vanio. <sup>10</sup> Mila na Pailat naio berinavo “Ei, jau kojom̃a maka keil tibe na, jau ga komila bulagso bereio. Bo kanio jau kover titai van kiniou, bior kiniou naruei, joa kiniou ka nala venia napano nojidom nala vanso. Ver nosidom jau kava tavio bereio tibe na ga, kiniou nemijikia nalaio, p̃eli na ver kiniou nosidom kam̃aro ea m̃akolkolo, kiniou nemijikia nalaio. Vede jau komijikia vite na naruei?”

<sup>11</sup> Vonganei Yesu mil naruei, naio berdope banio, berinavo “?Peli jibe na kovio, mia be kei na naio mije moroano na banso ka kala tibe na? Verver Toro na toru na mave naio maka rijamo ka vanso, maka kejikia kala titai ka kiniou leleio. Ver koverinavo kiniou nam̃aro, nina be kiamo vovaiano tai ruei, mia naio napano midu kiniou nojoa jum̃amo, naio mila bova laka, naina be kiano burum̃ara kariano tai na.”

<sup>12</sup> Telikiti napano Pailat mijog Yesu mil jibe na, naio milavon bereio naio jidom ka tuvan naio rivan ga tibe na, mia kulo Ju nalo kialo tomu na tortoru abio bereio, aberinavo “Kema na naio barvar ka naio-o mia, berinavo naio be parinio tubo tai, naio jidom rila naio to mave, ka kanamo toro na toru nei Parinio tubo Sisa naio totano. Tibe na, ver jau kotuvan naio rivano ga tibe na, jau komila im̃auano tai napano mia Sisa naio maka saaro

ka leleio ga, mia rivuku larso den kiamo iñauano na.”

<sup>13</sup> Nalo aber jibe na, mila na Pailat kiano jidomiano beve juo bereio ana naio mila aburu Yesu ba tavio ea komeli bereio, ana ba jotano mave ea kiano vio tai na tibureiano, napano abio ka Puruveru Vodobi, ĩeli na napano kulo Ju abio ka Kapata.

<sup>14</sup> Ana ka bogo na, binimei bokar niogoravo naruei, nina ea legiano na imoniano na vite nonovio na beni nene napano be buruñara legiano na Jokoluolu na Sidomkariano na Ioruriano.

Mia Pailat naio jotano mave ruei, naio jiloglog Yesu ban tomu na tortoru na kulo Ju nalo napano ajikili aju yetano aju, naio berinavo “!Nina naruei, be kenemiu Parinio Tubo nei!”

<sup>15</sup> Mia maka asidomio, amiaga koko vio laka, aberinavo “!Kuvurular naio rivano! Kuvituku kakario mave ea ñakolkolo, kuvuebin riñaro!”

Ana Pailat naio berdoĥe banlo, berinavo “!Tomnei! ?Juñabe, kamiu kumisidom ka kiniou nala ka napano mia auebin kenemiu Parinio Tubo nei?”

Naruei tom na tortoru na kulo lu nalo aberdoĥe, aberinavo “?Kei naio ber naio be kenememi Parinio Tubo? Toro na toru Sisa naio ga takurano be kenememi Parinio Tubo.”

<sup>16</sup> Mia Pailat mial ka ajikili laka, mo naio mijamo ka Yesu banlo, midu naio joa juñalo ka atukukakario ea ñakolkolo, tavukia napano nalo ajidomio.

#### *Ajukukakar Yesu ea ñakolkolo*

*Mataiu 27:32-50; Mak 15:21-37; Luka 23:26-46*

<sup>17</sup> Pailat midu Yesu joa juñalo, naruei nalo aburular naio bano. Mia bogo napano aju abano, amila napano Yesu midu ga bereio kiano ñakolkolo, naruei ajukamu kanio aba abokar suku sesa napano sano veru nene nalo ajavukia bordada na kulorinio tai, napano abio jelea iliano na Ipru aber Kolkota.

<sup>18</sup> Ea vio nene naruei, ajukukakar Yesu ea ñakolkolo, a bija tom juo dolu bunu, tinene jo tivelinio ka naio, a tinene jo tivelinio a naio jo iviso kalo.

<sup>19</sup> A Pailat kiano iliano tai, naio berii kalo ka avivitauia bisi na atukukario to mave ka Yesu parinio, jibe napano naio ber “Yesu re Nasarete, kulo Ju nalo kialo Parinio Tubo.” <sup>20</sup> Iliano nene, abivitauia jel ea iliano tolu, Ipru na kulo Ju kialo, Latin na kulo Romo kialo, a Krik na kulo Kris kialo, naruei amidu jo mave ea Yesu kiano ñakolkolo.

Vio na ñakolkolo nei naio vaataro ga ka bulukomeli, mia tomu nalo nañña ajuñña amiel abinimei ñña abarvar laka ea vio nei amial iliano nei ana ajuñña abulukuo. <sup>21</sup> Mia tomu na tortoru na kulo lu nalo na kulo Ju nalo maka asaaro ka iliano nei. Nalo aberilubarbar ban Pailat, aberinavo “Toro na toru, jau koberenio avivitauia tibe nei aver ‘Parinio Tubo na kulo Ju kialo,’ jau kober maka rimemedu laka. Kumemi numisidom ka avilig bereio, avivitauia tibe nei, aver ‘Naina, naio ber be kulo Ju nalo kialo Parinio Tubo.’”

<sup>22</sup> Mia Pailat maka sidom, naio jidom ka tobo ga tibe ka napano naio berenio, ana naio berial banlo memedu, berinavo “Vite napano nebivitauia, nebivitauia ruei.”

#### *Namira nalo ajanika Yesu kiano kulumñarauo nalo ealo*

<sup>23</sup> Tomu na mira nalo ajuku kakar Yesu naltolu ea kialo ñakolkolo, mia amijilimebi. Tomu na mira nalo nei nalo veri, abokar Yesu ññoano kulumñarauo nalo, mia aberinavo atan kalo ea taara ve veri, tai kanano tai, tai kanano tai, jibe na. Nalo ajanka jibe na ba bokar Yesu ññoano kulukoti na toru, mia maka asidom ajede kokorovio niati ve veri ealo bior kulukoti nene, maka aiasosolio, mia amimñauka ea buruñara niati kulumñarauo takurano ga. <sup>24</sup> Mila na aberver kalo, aberinavo “Maka rivu ka rejede lelan kulukoti na, mia bo ka kito reiere ñabujo ga rivorio.” Mia maka ajikia, mia nalo ajuñña

amila memedu ga ka iliano tai ea iouano tai ea Niosi Lu na Iouano re nua ruei. Iliano nene naio ber jibe nei, naio berinavo

*Ajanka m̃aku kuluṃarauo jan ealo, mia amiere m̃abujo ka m̃aku kulukoti.* *Iouano*  
22:18

Iliano nei naio ber jibe nei, memedu ga ka venia napano tomu na mira nalo amilaio.

*Yesu mil ban kenieno*

<sup>25</sup> Nalo ajelan Yesu mave ea kiano m̃akolkolo jibe na, a ea nalo napano m̃a ajikili aju vaataro ajum̃a abitio, be tira veri. Nalo nei be Yesu kenieno, a kenieno dolu na teliki, a Mere napano koano Klopas, a Mere na vio Maktala. <sup>26</sup> Ana Yesu jirarag batove, naio mial kenieno, a naio mial ka napano kiniou bunu, napano kumemi juo nube kuruememi, nejikili noju vaataro, ana naio berial kiniou ban kenieno, naio berinavo “Tiramoruo, ninei be kenerimo nei naruei.” <sup>27</sup> Mia naio mil ban kiniou bunu, naio berinavo “Naina, be konomo nei naruei.”

Mia jikar ka bogo na, kiniou noburu tiramoruo nene binimej mon ea kiaku vonuo, kiniou nobitkar batitig naio bo jibe ka kenieku.

*Yesu naio m̃aro*

<sup>28</sup> Yesu naio mijog bova mave ea m̃akolkolo banbano-o naio bitilubar ka kiano im̃auano naio mila nonovio binu ruei, naruei naio berial berinavo “Midou jer kiniou.” Nina be kiano iliano tai bereio napano naio ber ka iliano tai ea Niosi na Iouano Lu nalo rimej rive riano. <sup>29</sup> Mia nalo amijog ka napano naio ber midou jerio, naruei nalo amidu burujumu tai, abudom ea m̃alo m̃arjuṃelñelu tai napano jua baju tai, ana nalo amiyukuru kar ka jaiesi tai, ajian bavın jokol Yesu niono. <sup>30</sup> Marjuṃelñelu nei jokol niono bisi, ana naio berial iliano tai, naio berinavo “Binu binu naruei.” Mia bogo napano naio ber iliano nei, naio jurubanini ka parinio, naio

mijamo ka niununo bano, naio burum̃aria kiano jegi ana m̃arodobi.

*Amieldulu Yesu merikono*

<sup>31</sup> Bogo napano Yesu m̃aro, nina ea legiano viovare ea legiano na lavatitigiano na vite nonovio na Jokoluolu na Sidomkariano na Ioruriano. Jibe na mia beni nene, naio be legiano lu na toru na jokoluolu nene, mia ea bogoti na, be lu laka ka atokol mokotenano kulorinio na m̃aro. Mila na tomu na tortoru na kulo Ju nalo ajidom ka monoka avar bulag mokotenalo tomu tolu nei beamu, karina m̃erenio rijoru. Mia amerou ka tibe m̃a nalo tolu nei tai maka rim̃aro vo, naruei amiila toru ba ban Pailat, abika ka ver amijikia asavokokorov jaalo ka am̃arm̃aro soṓeli. <sup>32</sup> Ana Pailat mijamo kanio, mia kanano tomu na mira nalo abinimej ajavo korovio naio jaano napano ajukar naio ea m̃akolkolo tivelinio ka Yesu, karina amila ka nalo tinene. <sup>33</sup> Mo nalo abano ka ala ka Yesu bunu, mia amial ka napano m̃arodobi ruei, mila na maka bunu ala kanio.

<sup>34</sup> Mia na mira tai midu kiano mira, julu dulu Yesu merikono tivelinio, naio miyuku ba joomo banbano-o amial ka napano burum̃ara burukija bija uei miararo batove. <sup>35</sup> Naruei vite nei naio be riano laka, bior ka napano kiniou namial ka miraku. Nomijikia ka be riano, ana neberial ka kamiu, naruei kamiu bunu kumijikia kumonea ka vite nei naio be riano ga. <sup>36</sup> Vite nalo nei ama-luvo jibe na ka rila iliano nalo na ea vivitauiano lu nalo re nua amei ave riano. Iliano tai naio ber jibe nei, berinavo

*“Maka bunu na niabene tai napano mia rivurikorovio,”* *Iouano*  
34:20

<sup>37</sup> a dolu nene naio berinavo  
*“Ajulu niegeniege lelan naio, bisi na mia atu avitii naio.”* *Sek*  
12:10

Naruei bajago na Yesu kiano m̃ariano naio jibe ga na napano iliano nalo na aberialio nuanua ruei.

*Amidu Yesu mokotenano mon ea buluvae*

<sup>38</sup> Mia toro na toru tai na kulo Ju nalo kialo, siano Yoseve, na vio bulukomeli na Arimatea, naio be Yesu kiano naiagagoano tai kirisiou kija ruei, mia naio jom̃a milavan kiano moneano ka napano naio jom̃a mermerou ga ka tomu na tortoru dolu nalo. Mia bogo napano kiano Tubo naio m̃aro, karina merouano nei bakovio, naruei naio ban ea Pailat mirano, bika Yesu mokotenano. Ana Pailat mijamo kanio, ana naio ba midular Yesu mokotenano ea m̃akolkolo. <sup>39</sup> Mia toro dolu tai naljuo Yoseve ka bogo na, nina be Nikotimas m̃a napano beamu, naio ba lukuluku ga ka riva rial Yesu ea bogiano tai ka ritukunu vijaio. Naruei Nikotimas naio binime i ka bogo nei, naio bar bunu saba tai binime i ka rujuvuluko batitig ka Yesu mokotenano, bija burum̃ara bam̃aatei tai, napano natemiiiano nene juvulu kilo due-limo va rolu [30]. <sup>40</sup> Naruei nalo amidu Yesu mokotenano, amijuvulukoio ka kulum̃arauo nalo napano mivu, bija m̃aatei nalo neibano jibe ka nam̃a kulo Ju nalo ajum̃a amialao julaka ea kialo m̃ariano nalo. <sup>41</sup> Amijuvuluko bisi, mia vaataro ga ka vio napano ajukukakar naio m̃aro ea, tiniavio tai jo, mia jouro ea tiniavio nene be bulukuṽili vou na puruveru tai jo, napano aje vonga ka adu tasim̃aro romoneaio, mia maka ve tai rivan ea vo. <sup>42</sup> Naruei amial ka vaataro napano m̃erenio rivatove, bogo bulati ga ana Legiano Lu tikario, naruei amidu Yesu mokotenano mebi joomo ea vio nene.

**20**

*Buluvae be teau jo Mataiu 28:1-8; Mak 16:1-8; Luka 24:1-12*

<sup>1</sup> Amidu Yesu mokotenano mon joomo ea buluvae nene, joa bano-o bokar legiano moti na sude dolu. A be tire nalo tealoo kalo, jibe ka Mere

na vio Maktala nalo, ajumolu kavijova niogoravo amiel ea vio bobogio abinime i ea buluvae.

Mia bogo napano abinime i vaataro, amiilo va ka napano burum̃ara puruveru maka bunu toko buluniono buluvae, amelivilivilar kanio ruei jo mon tivelinio ka ga. <sup>2</sup> Mia bogo napano Mere naio mialio, naio barṽilig jikiti ban bereio, naio binime i mial Saimon Pitere bija kiniou nam̃a kumemi juo Yesu numitibe kuruememi, naio berialio ka kumemi juo, berinavo “!Ai, abe Yesu mokotenano ba kovio tai ruei! Amidu lario ba kovio, kumemi maka nuvijikia ka naio jo be naruei.”

<sup>3</sup> Kumemi juo numijogio, naruei numitumolu nuban soṽeli ea buluvae. <sup>4</sup> Numitikiti nubano, mia nojovulu Pitere, noboru ea vio nene jukamu, mia Mere bunu jakisor kumemi binime i bereio. <sup>5</sup> Nabano naboru ea buluvae, naban vaataro neminiadu ba joomo ea vio nei napano amidu Yesu mokotenano mon eaio. Mia maka bunu neialio, mia nemial ga kulum̃arauo napano amijuvuluko ka Yesu, jibirbil jibe na ga aju, mia maka nava joomo. <sup>6</sup> Mia maka vesiou ana Saimon Pitere naio iorou binime i mijaka ba joomo ea buluvae. Naio mial kulum̃arauo nene nalo, jibe ka ga napano amijuvuluko ka Yesu nua viomijeni niovo ruei. <sup>7</sup> Mia be ielikono tai, napano amiorkar ka Yesu parinio, naio maka to vija kulum̃arauo nalo, mia amijuku batitigio bereio jo naio takurano.

<sup>8</sup> Pitere naio jom̃a bitii vite nalo nei jibe na, mia kiniou bunu naba joomo nebitio. Nubitio jibe na, numijikia naruei a numonea ka napano Yesu jumolu bereio meul den nam̃ariano ruei, be riano mia be riano.

<sup>9</sup> Beamu, kumemi naiagagoano nalo maka nuvisidomiiio ka mia tibe na, bior napano maka nuvijikia ka napano Vivitauiano Lu nalo ajum̃a aberialio ruei ka mia kiado

Naverikariano monoka rimāro karina mia naio rimeul bereio. <sup>10</sup> Beamu, maka nuvijikiaio, mia vonganei kumemi juo numialio ka mirememi. Naruei nubitiio banbano-o, bisi ana kumemi nuban bereio vonuo.

*Mere na vio Maktala mial Yesu Mataiu 28:9-10; Mak 16:9-11*

<sup>11</sup> Kumemi juo nuba vonuo bereio, mia Mere naio jikili ju tavio ea niono buluvae nei ga ju jogumirano jibirbili. Naio jomā jegi jibe na banbano, mia naio jirarag ba joomo ea buluvae, <sup>12</sup> naruei naio miilo bereio ka nailiano juo amiya kulumārauo napano miuvuruvu laka, aju ajutano mave. Tinene jotano ea vio napano beamu Yesu parinio mebi eaio, a tinene naio jotano ea vio na jaano ban eaio. <sup>13</sup> Ana naljuo amil ban Mere, aberinavo “?Koig, jau kojomā kejegi vaio?”

Naio berdoṣe berinavo “Amidular kanaku Tubo bakovio tai, maka nejkia ka amidu naio mon be naruei.”

<sup>14</sup> Naio ber iliano na, karina naio jiraragodi bereio, naio mial toro tai jumolu jikili ju. Naio maka rivitilubarario, mia be Yesu nene.

<sup>15</sup> Naruei Yesu bunu bika denio, berinavo “?Koig, jau kojomā kejegi vaio? Kojomā kejirag kei ea vio nei?”

Mia Mere naio beriamā toro na imāuano ea vio nei ga, naio berdoṣe banio, berinavo “Toro na toru, ver jau naruei komidular naio ea vio nei, aiou, jau koverial ka kiniou vio be naruei komidu mokotenano joaio. Kiniou nojidom ka nodu rimeit vatitig ea jeleigio bereio.”

<sup>16</sup> Naruei Yesu bio Mere ka siano, berinavo “Mere!”

Naio mijogio, ana bariṣiligio, bitilubar ka be Yesu, ba vaataro kanio, bioio mije kialo iliano, berinavo “Raponi!” napano nioti na iliano nei berinavo “Naverloglogiano.”

<sup>17</sup> Ana Yesu ber kanio, berinavo “Mere, to, kotokol re kiniou tibe na. Kiniou maka najikia notoa vio

nei, bior maka nava mave vo ea Teta. Mia bo jau kavan ea kuruaku nalo, koverial kalo ka kiniou neber jibe na, ka vonganei, kiniou nojo nabavin mave bereio ea naio napano be karamāku, a be karamemiu, napano be kiaku Atua, a be kenemiu Atua.”

<sup>18</sup> Ana Mere na Maktala naio mila jibe na naruei, binimei bereio ea kumemi naiagagoano nalo, berialio berinavo “Kiniou namial Tubo ka miraku,” a naio berial ka kumemi vite nalo namā Yesu berkanio.

*Yesu miyotuba ka naiagagoano nalo*

*Mataiu 28:16-20; Mak 16:14-18; Luka 24:36-49*

<sup>19</sup> Ana ea legiano moti na sude nei kia ga vo, kiev nene, na kumemi naiagagoano nalo numitu vio takurano joomo ea vio namā numitua numituluku eaio. Nubukar batitigio māratavo nalo, bior ka napano numerou ka tomu na tortoru na kulo Ju tiniel ser kumemi bunu, tavukia namā tiniel jer Yesu beamu ruei. Numitu jibe na, mia kolvare ga, Yesu maluvo binimei jikili ju iviso ka kumemi, berinavo “!Tuñaroano to vija kami!” <sup>20</sup> Naio ber jibe na, karina naio jiloglog ka kumemi ka jeleig butoto nalo ea jumāno bija burumāra niajebijo na ea merikono tivelinio. Numialio, mia bogo napano nubitilubarario ka be Tubo, numisaaro mia numisaaro. <sup>21</sup> Naruei naio ber ka kumemi bereio, berinavo “Tuñaroano to vija kami!” A naio jusolio, berenio “Javukia ga napano Karamāku naio miila kiniou ka nala kiano imāuano, naruei kiniou neiila kija kami bunu ka kuvila tibe na.”

<sup>22</sup> Iorou ka nina, naio miuvu jegi binimei ea kumemi, naio berinavo “Kamiu kuvokar Niununo Lu. <sup>23</sup> Toro kei napano ver kamiu kuviekokoa naio rivior kiano kariano, mia kariano nene taluvo den naio,

mia toro kei napano ver kamiu kuviekokoa re naio rivior kiano kari-ano, mia kariano nene to damariga ea naio.”

*Tomas mialio ana naio moneaio*

<sup>24</sup> Telikiti napano Yesu maluvo ea kumemi, kumemi tai maka to, nina be Tomas Savoro. <sup>25</sup> Iorou kanio, numial naio, nuberialio kanio, nuberinavo “!Tubo naio maluvo ea kumemi, numial naio ruei!”

Mia naio maka sidom rimoneaio, berinavo “Makanio, kiniou monoka naial naio ka miraku. Ver kiniou naial re jeleig butoto ea jumano, a notokol ka marjukujumaku nei, a ver kiniou nasian re jumaku nei ea niajebijo ea merikono, mia kiniou nomonea re ka naio meul bereio.”

<sup>26</sup> Tomas berial kanano jidomiano nei, mia sude takurano barlaka bano, na kumemi numitu vio takurano bereio ea vio nei nua. Ea bogo nene Tomas bunu jo kumemli-ko, a maratavo nalo ajetavo batitigio bo aju, mia Yesu miyotuba ka kumemi vaarakurano bereio, berinavo “!Tumaroano to vija kamiu!”

<sup>27</sup> Naio mil ban Tomas, berkanio, berinavo “Naine be jumaku, jau koyuku marjukujumamo, kotokol veveio. Naine be merikoku, jau kodu jumamo toaio. Jau kovitovtonia re bunu, koviekar kiniou sikili.”

<sup>28</sup> Tomas mijogio, bitii Yesu, naruei berdope berinavo “Kanku Tubo, jau kobe kanku Atua!”

<sup>29</sup> Ana Yesu berkanio, berinavo “?Jumabe, jau komial kiniou, ana komonea kiniou? Nina bo, mia burumara ilivuiano toa nalo napano maka aial kiniou vo, mia amononea kiniou ruei.”

*Iliano na maaro tai*

<sup>30</sup> Saba miroano napano Yesu milaio, nebivitaia jua niosi nei ruei, mia naio mila burutomoluo dolu telabo bunu ea mirememi napano maka nevivitaia bulagio. <sup>31</sup> Mia iliano nonovio na jua niosi nei, be tena rijai kamiu kumijikia kumonea ka Yesu naio be Naverikariano, naio

be Atua kenerinio riano. Naruei kenemiu moneano ea siano na, mia ve marabo na mia kuvokar meuliano ea naio.

**21**

*Yesu naio miyotuba bereio, ka kiano naiagagoano aluo*

<sup>1</sup> Iorou kanio, kumemi naia-gagoano nalo tealo numitua burumara ueiyabo nei na Taiperias, peli na Kalele, ana Yesu miyotuba.

<sup>2</sup> Kumemi napano numitu ea bogo na, be Saimon Pitere, Tomas Savoro, Nataniel na vio bulukomeli na Kenan yako Kalele, kiniou bija kuruaku na toru na Yemesi, bija kumemi juo bereio. Naruei Yesu kiano yotubaiano ea bogo na naio jibe nei.

<sup>3</sup> Beamu, Saimon Pitere naio berial berinavo “Mo, kiniou nava novuku levlevi tavio beamu vo.”

Naruei numitumolu nuberinavo “Bo ga, kitoma roviniu.” Naruei nubatove, numidu uako nuba nubuku levlevi. Naruei numitua tei bano-bokar viomijeni, mia maka lele nuvokar niado tai.

<sup>4</sup> Mia bogo napano viomijeni mermeravo, Yesu binimei jikili ju uro ea vio nei, numialio ka be toro tai ju, mia maka nuvitilubar ka be naina naruei.

<sup>5</sup> Ana Yesu bio ban kumemi, bika ber “?Keneriku nalo, kubar kija niado peli na makanio?”

Naruei nuberinavo “Maka leleio.”

<sup>6</sup> Ana naio berinavo “Mo, kuvila tibe nei. Kuva kuvuku bere kenemiu levlevi, mia kuvuku re bunu tavukia beamu, kuvila von ka kuvituvanvanio ea jumemiu meruo beamu vo, mia nomijikia ka mia kuvokar niado tealo.”

Kumemi maka nuvitilubar ka be Yesu na jo mil, mia nubano numituvanvan levlevi javukia ga napano naio berenio. Mia vaarakurano ga bujo, niado mia niado, mia bogo na kumemi nuburu vonio ka rimeimave numila deio ga, naio temi laka ka niado. <sup>7</sup> Ana vonganei

nubutilubar ka be Yesu, ana kiniou napano kumemi juo Yesu nube kuruememi, neber ka Saimon Pitere, neberinavo “Pitere, keialio. Tubo yako ju.”

Bogo napano Pitere naio mijogio jibe na, ana naio jumolu vaarakurano, miya kiano kulukoti bereio, biako batove ea tei, mia ba uro. <sup>8</sup> Maka nuvitu laka ka vio uro, titai jibe ka meta toromomou takurano [100], mia Pitere naio jukamu ka kumemi, ana numidu uako kumemi iorou, napano nuburude lilian levlevi nei bujo ka niado.

<sup>9</sup> Mia bogo napano nuboru uro, numial ka napano sebi tai jo, napano ajumã amijege niado ea vovosebi nene ruei, a numial ka napano joko nalo na terteliki bunu amenoko batitigio bo ju. <sup>10</sup> Ana Yesu berinavo “Niado napano kubokarlo naruei, kuvar tealo rimej rive sado.”

<sup>11</sup> Ana Saimon Pitere naio batove ea tei, bavin ea uako, burular levlevi, buru binimej uro. Niado nalo miroano laka, numerou ka mia levlevi naio rivurkokorovio, mia makanio, nuburu binimej bo ga. Mia bogo napano nubar bulavulag niado nalo, nubulukulo bokar toromomou takurano duelimo va jimo ba tolu [153].

<sup>12</sup> Naruei bogo napano niado nalo na aju amijegeio amenoko bo, ana na Yesu bio, berinavo “Mo, kamiu kumej kuvisinin.”

Ea bogo nei, nubutilubar ka be Tubo, maka bunu nuvila von ka nuvikanio ka naio be kei. <sup>13</sup> Naruei nubinimej numitu vio takurano naruei, ana Yesu midu joko burebove janea kumemi, bija niado nalo bunu, ana numisenio.

<sup>14</sup> Nina naio jibe ka Yesu kiano varolu napano naio miyotuba ka kumemi kiano naiagagoano nalo, iorou ka napano Atua mila naio meul bereio ea namariano.

### *Yesu naio Pitere*

<sup>15</sup> Telikiti napano numije simemi sinaniano na kavijo bisi, ana na Yesu jidom tukunu kija vija Saimon

Pitere. Naio bika denio, berinavo “?Saimon, Jonas kenerinio, jumãbe? Jau tiniemo jii kiniou loa laka, juvulu ka napano nalo dolu tinielo jii kiniou, ðeli na makanio?”

Ana Pitere berdoðeio, berinavo “Tubo, vite na jau komijikia ruei, ka kiniou najaaro toru kaso.”

Naruei Yesu berkanio, berinavo “Maraiu, mo jau kavagan kiaku nunu solbouo nalo.”

<sup>16</sup> Ana vaarakurano bereio, Yesu bika denio, berinavo “? Saimon, Jonas kenerinio, jau tiniemo jii kiniou toru laka, ðeli na makanio?”

Ana Pitere berdoðe, berinavo “Tubo, vite na jau komijikia ruei. Javukia napano neberkario, kiniou najaaro toru laka kaso.”

Naruei Yesu berkanio, berinavo “Maraiu, mia jau kovitikar kiaku nunu nalo.”

<sup>17</sup> Ana bereio, be varolu nene, Yesu bikanio, berinavo “?Saimon, Jonas kenerinio, jau kajaaro ka kiniou be riano, ðeli na makanio?”

Mia bogo napano Pitere naio mialio ka napano Yesu jomã bika den naio jibe na ba bokar varolu, naio mijog mimou, ana berkar ban Yesu, berinavo “Tubo, abe jau komijikia vite nonovio. Jau komijikia batitigio bo ruei ka napano kiniou najaaro toru laka kaso.”

Ana Yesu berkanio, berinavo “Maraiu, jau kavagan kiaku nunu nalo. <sup>18</sup> A neber riano ka jau jibe na, ka beamu, bogo na kobe mneaku kia ga vo, kojomã komila jibe ka ga namã kojidom kala. Jau takurano komiel janea vio na vabe napano kojidom kavan eaio. Mia nomijikia never kaso ka bogo na mia komei kove tormoruo, mia tomu dolu aya kulumãarauo easo, avokar jumãmo, avuruso kavan ea vio napano maka kosidom ka kavan eaio.”

<sup>19</sup> Iliano na Yesu kiano nei, naio jibe ka napano jo berialio jumãbe ka mia auebin Pitere. Ea kiano mãariano, naio mila bajago tai napano naio midu naio ju tano, mia rivitirilar Atua siano to mave.

Mia iorou ka Yesu ber ka Pitere jibe na, naio buru bere naio, ber naio takisorio bereio, berinavo “Jau komei, katakisor kiniou damñariga.”

### *Yesu naio Jone*

<sup>20</sup> Mia bogo napano Yesu jukunu bija Pitere bisi, ana Pitere barřilig naio, mial kiniou, Yesu kiano bilbilu na bo, nojo vaataro ka naljuo. Kiniou nei napano beamu, ea sinaniano na maaro, nojotano vaataro ka Yesu, nebika naio ka ea kumemi naia-gagoano nalo, kei naio mia tiveluku ka naio. <sup>21</sup> Mia bogo napano Pitere mial kiniou, bika den Yesu, berinavo “Tubo, jumñabe ka bilbilu nei?”

<sup>22</sup> Naruei Yesu berkanio berinavo “Ver kanaku sidomiano ka mia naio rivakovio re, mia mijikia to tibe na-o vokar napano mia kiniou nemei bereio, vite na be kanaku, maka ve kanamo ka mia kover titai kanio. Mia venia napano be kanamo ka kala, nober kaso ruei, ka katakisor kiniou namñariga.”

<sup>23</sup> Mia iorou ka bogo na, bogo napano namoneano dolu nalo amijog ka napano Yesu mil jibe na, amijog belea, aberiamña Yesu berii kiniou, berkar ka mia maka nejikia nomñaro bogo tai. Mia Yesu maka river tibe na, naio ber ga ka ver naio sidom, mia rijikia tibe na. Tibe na, nioti nene ber ka vite na Pitere bikanio, naio maka ve kanano, mia be Yesu kanano ga.

### *Iliano na maaro*

<sup>24</sup> Mia kiniou naruei napano nojomña nober bulavulag vite nalo nei, nojomña nobivitauiabulagio batitig bo ka kuvijikia kuvulukuio. A kito rovinu romijikia romonmonea ka iliano nalo nei abe riano laka.

<sup>25</sup> Bo ga naruei, niosi nei binimeimaaro ea vio nei naruei. Mia vite telabo napano Yesu milaio ajaio, mia vite telabo mia telabo bereio napano Yesu milaio maka atuaio. Ver kito rovivitauiario nonovio, nomial jibe ka řeli mia kiano niosi nene nalo ve miroano laka, rivanvano-o mia vio ve teliki ea yetemeriba nei.

## Atevi Nalo Kialo IÑAUANO NALO Verialiano Moti

### *Tukunuano bulati na niosi nei*

Niosi nei Atevi Nalo Kialo Iñauano Nalo, Luka bivitauia ba ban toro tai, siano Teovilas. Ninei niosi juo napano Luka jirio, a binimei iorou ka kiano niosi moti napano siano Yesu Kristo kiano Ioluano Vou napano Luka jirio. Niosi nei, Atevi Nalo Kialo Iñauano Nalo, napano siano na bulati Iñauano Nalo berii Yesu kiano atevi nalo kialo iñauano na beamu, napano Niununo Lu buru m̄arabo kalo ka ala iñauano na verialiano na ioluano vou, tikario Yerusalemo, ban ea vio nalo na Judia a yako Sameria, banbano-o du nonovio nalo na yetemeriba (Iñauano Nalo 1:18).

Niosi nei be tukunuano tai na namomeano nalo na beamu napano jikar ea taara tai na Israel napano amonea, amiluo-o binimei toru, jovoko nonovio yetemeriba. Ea niosi nei, Luka jidom ka nalo napano amonea, nalo ailikuei re Parinio Tubo na Romo, napano midururu ea vio nalo ea bogo nene. Mia naio jidom verial ka vite nalo napano taara na Israel nalo amonea naio, nalo abinimei amaluvo ea ioluano vou nei ka tomu nalo na abe namomeano nalo amonea naio.

Niosi nei be kiano yati tolu, napano berial ka ioluano vou jo maluvo ba liei ea vio nalo, a yimo lu jo miluo bogo nonovio. Beamu, berii yimo lu napano jikar yako Yerusalemo, iorou ka bogo na Yesu bavini ea tiniabene. Mia valuo nene, berii napano iñauano bunu jovoko vio nalo na Mediterenian, bano-o boru Romo.

Vite burtomoluo tai napano niosi nei beriio, be iñauano na Niununo Lu. Bogo na atevi nalo aju kea yako Yerusalemo memedu ka bogoti na Jokoluolu na Yuvi Meruo, Niununo

Lu binimei ealo, a jian moroano banlo. Mia iorou ka bogo na, Niununo Lu judu ka mija iñauano na yimo lu, a mija navurum̄araboiano nalo nei ea kialo iñauano.

Ea niosi nei, be iliano nalo na atevi nalo aberialio, a berial ka kialo iliano nalo amijevo moroano, bilig tomu nalo kialo meuliano napano amonmoneaio, amija tomu na moneano nalo ka avuron vio takurano.

### *Torogio nalo na niosi nei*

Yesu jian iliano maariano a kiano verikariano ban kiano tomu nalo 1:1-14

Nalo abijauialar nana mia tujelain Jutas 1:15-26

Nalo aberial ioluano vou yako Yerusalemo 2:1—8:3

Nalo aberial ioluano vou yako Judia bija yako Samaria 8:4—12:25

Pol kiano iñauano nalo 13:1—28:31

Pol kiano ieliano moti 13:1—14:28 Na vurum̄araboiano abokar vioriano yako Yerusalemo 15:1-35

Pol kiano ieliano valuo nene 15:36—18:22

Pol kiano ieliano varolu nene 18:23—21:16

Pol joa nalakoiano yako Yerusalemo, a yako Sisari bija yako Romo 21:17—28:31

### *Iliano na jukamu*

<sup>1</sup> Nao, kanaku bilbilu Tiovilas, kinou najaaro ka nevitavo vijaso ea niosi dolu nei. Ea kanaku niosi na jukamu napano nejiri banso, nojo nejiri tukunuano na vite nalo napano Yesu jom̄a milαιο, a napano naio jom̄a berloglogio, nina jikar ea kiano iñauano, <sup>2</sup> binimei bokar bogo napano ea moroano na Niununo Lu, naio jian kiano iliano na maaro ban kanano atevi nalo napano naio jo buru bulaglo ruei, ana iorou kanio ana Atua buru naio bavini bereio.

<sup>3</sup> Bogo napano naio meul bereio ruei ea nam̄ariano, napano maka rivavin vo, ana bogoti telabo, naio jo malmaluvo kalo ba bokar legiano

duelimo va veri [40], ka rila rimer-avo vatitigio vanlo ka naio meul bereio ea namariano be riano. Ea bogo na, nalo ajumña abitilubar-bar naio, mia naio jomña berii mñarabo nalo na Atua kanano nave-natuboiano banlo.

<sup>4</sup> Bogo tai napano naio joa vio tai naliko, ana jian iliano nei banlo, berenio, berinavo “Mia kamiu monokanio kuvituvan re vio nei Yerusalemo vo, monokanio kuvitu rorea beamu vo ka mia kuvokar Niununo Lu na Teta naio berkario rui ka mia sian van kamiu, jibe kanio namña neberii ka kamiu bunu rui.” <sup>5</sup> Beamu, Jone Baruei naio baruei ea tomu nalo ka uei ga, mia vesiou re, legiano tai avar laka, mia Atua naio rivaruei ea kamiu ve riano, nina ea Niununo Lu.”

#### *Yesu bavin ea tiniabene*

<sup>6</sup> Ea bogoti tai bereio, napano atevi nalo abinimei vio takurano naliko Yesu, abika denio, aberenio aberinavo “?Tubo jumñabe, be bogo nene memedu kanio mia jau kala kito kulo Israel nalo kito ve kiado parinio tubo bereio, ñeli na maka ve bogo nene vo?”

<sup>7</sup> Ana Yesu berdoñelo, berinavo “Maka ve kenemiu ka mia kamiu kuvijikia bogoti nene nalo ñeli na legiano nalo napano Karamñeku naio ga takurano, naio bar batitigio ju rui ka mia tibe na, tibe na. <sup>8</sup> Ana na iorou kanio, Niununo Lu naio rimeia ea kamiu, ana bogoti nei naruei kuvijev moroano, ana mia kamiu monokanio kuva kuverial kiniou ea vio Yerusalemo nei, a ea vio dolu nalo nonovio napano yako Yutea vija Sameria, rivano-o rivokar vio dolu nalo na yetemeriba reraio.”

<sup>9</sup> A bogo napano naio ber iliano nei bisi, mia nalo aju abitkar naio memedu kia ga vo, ana Atua burular naio bavin, ana melijo tai binimeid midukoio, ana nalo nei maka bunu aial naio bereio. <sup>10</sup> Bogo napano

nalo ajumña abitkar kia ga tini-abene, nalo amiilo kolvare ga ka tomu juo na kialo kulumñarauo miuvuruvu, nalo abinimeia abitirikalro aju naliko, naljuo aberinavo <sup>11</sup> “! Ai, kulo Kalele nalo! Kamiu kuvijog re rivova, ana kuvitu kuvisirarag re vavin vesio tibe na. Yesu nene napano Atua burular den kamiu bavin tiniabene, monokanio mia naio rimeia bereio, a mia rimeia bereio tavukia ga na naio bavin tini-abene rui, napano kumialio von-ganei na.”

#### *Taara na atevi nalo*

<sup>12</sup> Ana atevi nalo ajuvan suku nene, napano naio be Suku Na Buruolivi Nalo, nalo aban bereio abatove ea vio Yerusalemo, maka ve tebievi laka, mia jibe ka kilometa menu takurano ga. <sup>13</sup> Nalo abinimeia aboru Yerusalemo, ana aban bereio ea vajoomo na mave ea yimo na ajujuaio mugaruei. Mia sialo nalo nene ajibe nei: Pitere, Jone, Yemesi, a Andru; bija Vilip, Tomas, Bartolomio, a Mataiu; a bija Yemesi, napano Alveas kenerinio, bija Saimon napano naio be nalo tai napano jukamu mña amila baravo ka kulo Romo nalo, naliko Jutas, napano Yemesi kenerinio. <sup>14</sup> Ana ea bogoti nalo nei, nalo nei, naliko tire nalo, amidu buronlo bogo nonovio ka volkouano. A Mere, Yesu kenieno, bija Yesu kuruano nalo bunu, amidu buronlo nalikolo.

#### *Toro na rudu jeleig Jutas*

<sup>15</sup> Be legiano tealó abarlaka rui, ana namoneano nalo abinimeia vio takurano, nalo abokar titai jibe kanio toromomou takurano duelimo valuo [120] abiniu. Ana ea bogo na, Pitere naio jidom riverii vanlo ka mia ala tumñabe ka aleal toro na mia rudu jeleig Jutas. <sup>16-19</sup> Nina bior iorou kanio ana Jutas naio mila kanano iñauano va nei nua rui, naio bulu niatano tai bija puruveru

**1:4** Luk 24:49    **1:5** Mat 3:11; Mak 1:8; Luk 3:16; Jon 1:33    **1:8** Mat 28:19; Mak 16:15; Luk 24:47,48    **1:9** Mak 16:19; Luk 24:50,51    **1:13** Mat 10:2-4; Mak 3:16-19; Luk 6:14-16    **1:16-19** Mat 27:3-8

na naio mijevio, ana naio ga mijoru ea vio nene, ana mabono buruŕeio, naruei tinieno nalo amolmoluo, ana naio m̃aro. Mia tomu nalo na vio Yerusalemo amijogial lilianiano nei, mila ana nalo abio niatano nei kanio kanalo iliano, aberinavo “Akeltēma,” nina be iliano tai na berenio “Vio Na Burukija.”

Tenene na Pitere naio jidom riverii vite nene van namoneano nalo, naio jumolu ju kamu ea miralo, mil banlo, berinavo “Bilbilu nalo, nanua Niununo Lu mil ea Téviti niono, naio berii Jutas nene kiano iñauano, napano naio burum̃arabo ka tomu nalo abinimeĩ abokar Yesu, mia iliano nalo nei abinimeĩ abe riano ruei, kanio mia Iliano Lu monokanio rive riano bogo nonovio. Jutas nene naio be kumemi tai, napano Tubo bitirilar naio ka mia naio rivokar iñauano rivija kumemi,<sup>20</sup> mia vonganei, naio jibe kanio na iliano juo napano joa Niosi na Iouano, napano tinene naio berinavo

*‘Bo kanio mia kunuano to kurano ga, mia maka toro tai rijikia toaio,’* Iouano 69:25

mia tinene bunu, napano naio berenio

*‘Bo kanio toro dolu rudu jeleigio.’*

Iouano 109:8

<sup>21-22</sup> “Bior vite na, monokanio toro tai rimeĩ bereio tusol kumemi ka riverial ka verenio Yesu, kiado Tubo, naio meul bereio ea nam̃ariano. Toro nene naio monokanio ve nalo tai napano aju bija kumemi nanua, ea bogo nalo nam̃a Tubo naio jom̃a miel kumemliko. Naio monokanio ve toro tai napano naio joa bogo nalo nam̃a Jone miolioluii kanano varueiano, binimeĩ bokar legiano na mia Atua burular Yesu den kito, ka naio bavin bereio.”

<sup>23</sup> Naruei ana nalo aberial tomu juo nei sialo. Tinene, siano Yoseve, napano abio kanio Basabas, a be siano dolu tai bunu, aber Jastas. A toro tinene siano Matias. <sup>24</sup> Naruei ana nalo abolkouo, aberenio “Atua-o, jau ga kobe Atua Na Masosouano,

komijikia venia napano joa tomu nalo kanalo iviso. Mo, kumemi numisidom ka jau kesiloglog van kumemi tomu juo nei na vabe nene napano jau koburu naio ruei,<sup>25</sup> kanio mia naio rivokar iñauano na atevi, napano Jutas juvanio ruei ka rivan ea kanano vio na laveniano nene rimemedu.”

<sup>26</sup> Nalo abolkouo bisi, naruei nalo amila jibe kanio nam̃a amiere m̃abujo, ana Matias siano maluvo. Naruei ana nalo abitirilar naio, ana nalo abuluku naio bija nalo dolu napano duelimo ba tai [11] nei, ana mila nalo duelimo ba juo [12] bereio.

## 2

### *Niununo Lu binimeĩ*

<sup>1</sup> Ea legiano na Jokoluolu Na Uiti Meruo, namoneano nalo abinimeĩ aju vio takurano, <sup>2</sup> naruei vaarakurano ga, be malioano tai maluvo ea tiniabene, napano naio jibe ka burum̃ara jegi tai miuvuvu, ana malioano nei barko nonovio vio nalo na yimo nei napano ajutano joomo eaio. <sup>3</sup> Naruei ana nalo amial vite tai jibe kanio sebi naio bilvili, ana na sebi nene jerabo ba janea nalo abeve terakurano. <sup>4</sup> Naruei nalo nonovio, Niununo Lu binimeĩ bujo magmago ealo, milalo amil ka iliano dolu nalo, jibe ka napano Niununo nei naio milaio ana nalo amijikia amil kanio.

<sup>5</sup> Naruei ea vio Yerusalemo, be kulo Israel nalo aju, napano nalo abe tomu na volkouano nalo. Nalo na ajumolu ea vio telabo na yetemeriba nei, nalo abinimeĩ. <sup>6</sup> Naruei nalo nei amijog malioano nei, ana nalo naliko kulo dolu nalo, nalo telabo abinimeĩ ea vio nei. Mia nalo nei amiilo toru laka, bior tomu nalo neibano Niununo binimeĩ ealo, nalo ajum̃a amil, mia tomu nonovio ga aju amijog kialo iliano nalo memedu ga. <sup>7</sup> Naruei nalo amiilo binvinlo, amemebiju, aberinavo “!Uerei tomu nalo! Tomu nalo napano ajum̃a amil jibe na, mia nalo abe kulo Kalele

ga. <sup>8</sup> ?Jumñabe ana kito roju romijog ka nalo ajumña amil kanio kanado iliano nalo jibe na? <sup>9-11</sup> Kito robe tomu na buruvenuo telabo napano roju nei, na vio Patia, na vio Mitia, na vio Elamo, na vio Mesopotomia, na vio Yutea, na vio Kapatosa, na vio Pontas, na vio Esia, na vio Vrijia, na vio Pamvilia, na vio Ijivi, na vio Krit, na vio Arapia, na vio Lipia ea tivelinio ban yako Saireni, a ea burumñara bulukomeli na vio Romo bunu. Kito tealo robe kulo Israel nalo memedu, mia tealo napano maka ave kulo Israel beamu, mia iorou kanio ana abinimei amidu kanado moneano. Mia kito robiniu, roju romijog ka nalo ajumña amil ka kanado iliano nalo beve terakurano, ajumña aberii burumñara iñauano na tortoru napano Atua naio milao.”

<sup>12</sup> Naruei nalo amiilo toru, a kanalo jidomiano ba kovio, ana maka bunu ajikia ka mia atumñabe naruei, ana nalo ajumña abivika denlo, aberinavo “!Uerei tomu nalo! ?Venia na jibe na?”

<sup>13</sup> Mia nalo tealo aju bunu abital ealo napano Niununo binimei joalo ruei, aberinavo “A, tomu nalo na amunu mñelea uei ga mila ana abe kodovo jibe na.”

### *Pitere mil banlo*

<sup>14</sup> Ana Pitere naliko atevi dolu nalo duelimo ba tai [11] nalo ajumormolu abinimei ajua vio nei, ana naio mil jouo banlo, napano berial jibe nei, berinavo “Bilbilu nalo, napano kamiu kube kulo Ju, bija kamiu kulo dolu nalo napano kamiu kumitua vio nei, ea Yerusalem, kamiu kuviagago vatitigio ka kiniou ka never bisivisii vite nei van kamiu. <sup>15</sup> Tomu nalo nei makanio parilo selivivi tibe ka napano kumitunña kuberenio, makanio, bior vonganei naio be mñerenio koveri [9] kavijo kia ga nei vo. <sup>16</sup> Mia vite napano kumialio, nina vite namña Naverialiano Joel naio beriio nanua ruei, berinavo

<sup>17</sup> *‘Atua berenio “Ea legiano nalo na bogu na maaro nei, mia kiniou nesian Niunuku van tomu nalo nonovio.*

*Ana mia kenerimiu nalo aver bulavulag kanaku iliano,*

*a mia kenemiu mñeaku nalo amon derevijo aial vite nalo,*

*a kenemiu tormoruo nalo, mia amonovovuii na monovovuano nalo.*

<sup>18</sup> *Riano ga, ea bogu na, mia kiniou nesian Niunuku,*

*rime ve toru ea mñeaku nalo a merevono nalo ka kanaku iñauano,*

*ana mia nalo aver bulavulag kanaku iliano.*

<sup>19</sup> *Mia kiniou nala vite na iloiano nalo ea vio yauo,*

*vija burutomoluo nalo ea yetemeriba nei,*

*mia ve burukija a sebi a burumñara you banunu ve toru bunu atu.*

<sup>20</sup> *Beamu, mñerenio mia naio rime ribobogio, a mia siberio naio rime rivilvili tibe ka burukija.*

*Ana iorou kanio, ana legiano na toru na Atua kanano, napano mia rivu laka, naio mijikia rime.*

<sup>21</sup> *Mia ea bogu nene, ana toro kei napano verenio rivio ka Atua siano, mia Atua rilarur naio.”*

*Joel 2:28-29*

<sup>22</sup> “Tomu nalo na Israel, kamiu kuviagago vatitigio ka kiaku iliano nei. Yesu na vio Nasarete, naio be toro napano Atua jiloglogio meravo ka kamiu ka naio be Naverikariano. Atua mila jibe na nina ea iñauano nalo na moroano bija burutomoluo nalo napano naio mila Yesu mñaukanio ea miremiu nua ruei. Vite nalo na kamiu kumitu kumijikia ruei, <sup>23</sup> mia bogu na Atua midu naio joa jumemiu, kamiu kumitumolu kumuebin naio mñaro, napano mia kumijamo ka taara va nalo ajukukakar naio ea mñakolkolo. Bogoti napano kamiu maka kuvila vite nei vo, mia Atua naio mijikia ruei ka mia naio rime tibe na, ana

naio mijamo kanio, bior vite na jakii jibe na ka naio jidom kakar batitigio nua ruei ka rimaukanio. <sup>24</sup> A karina, moroano na namariano maka rivare ka rivokar Yesu sikili, mia Atua burular naio den namariano kiano taniabe jaleleano, ana na mila naio meul bereio. <sup>25</sup> Nina jibe ka Teviti kiano iliano tai re nua, napano naio berii Kristo, napano berinavo

*'Kiniou nemial ka napano Atua jo bija kiniou bogo nonovio, naio jo tivelinio vameruo na kiniou, ana mila kanaku iviso maka rimemebiju.*

<sup>26</sup> *Jibe na naruei, ana tinieku jaaro, a buruminaku miou, kiniou nebe toro ga, mia nabarkar tinieku jikili ea Atua.*

<sup>27</sup> *Ana jau Atua, mia jau kotuvan re niunuku toa vio na namariano, a mia jau kajamo ka re taniabene na kanamo Toro Lu na kanamo imauano rimenunu.*

<sup>28</sup> *Jau kobisiþe marabo nalo na meuliano ka kiniou ruei, a mia tinieku rivujo ka saariano na toru, napano jau koje bija kiniou.'* *Iouano 16:8-11*

<sup>29</sup> Banalo, kiniou nejidom neverial vite nei rimeravo van kami. Korobido nanua beamu, napano siano Teviti, naio m̃aro bogo be ruei, ajivinio nua ruei. Ninei be sano martanbo nene nei joa kanado vio, jo binimei bokar vonganei. <sup>30</sup> Mia bogo napano naio jo meul kia ga vo, mijikia ruei ka Atua berkar jikili banio, berinavo mia bogo tai, kanano yati tai naio monokanio totano bereio ea kanano jobaro na toru, tavukia napano kanano yati naio rimei ve parinio tubo ka tomu nalo, tibe ka Teviti napano naio be parinio tubo jukamu. Ana Teviti nene naio be naverialiano tai, <sup>31</sup> mia bogo napano vite nei maka riyotuba vo, naio mial ruei ka mia Atua rila Naverikariano nei naio rimeul bereio ea namariano. Tenene na m̃a Teviti naio berenio ea kanano iliano napano berenio, berinavo Atua naio

maka tuvan niununo tobo ea vio na namariano, a maka rijamo ka kanano tati tobo rimenunu.

<sup>32</sup> Vite nei naruei kumemi numituma nuber bulagvulagio, ka Atua bitirilar toro neibano Yesu nene den namariano bereio. <sup>33</sup> Atua bitirilaro, ana buru lario bavin ruei, midu jo tivelinio vameruo ka naio.

Ana jibe ka napano Atua Karamado berkario, naio sian Niununo Lu van naio, ana Yesu rion Niununo Lu van kumemi, ana Niununo Lu nei naio jo mimauka vite nalo nei napano m̃a kami kumituma kumialio a napano m̃a kumituma kumijogio. <sup>34</sup> Ea Teviti kanano iliano nene, naio maka riverii naio, bior napano maka ve naio napano rivavin tianabene tibe na, mia naio berii Naverikariano nei. A kanano iliano dolu jibe nei bunu, napano naio berinavo

*'Atua Soþi naio ber ka kiaku Tubo, berinavo*

*"Jau kototano tivelinio vameruo ka kiniou, koto damariga,*

<sup>35</sup> *mia kiniou nala kanamo uolu nalo amei atibe ka madayebe na kovulan jaamo eaio."* *Iouano 110:1*

<sup>36</sup> Bior vite nalo nei naruei, mia kiniou nejidom never bisivisii rimeravo van kami, maratavo vodolu nonovio na Israel, ka Yesu nene napano Atua bitiri lario nua beamu be kiado Tubo a be Naverikariano, ana kami kumituku kakario ea makolkolo ruei."

#### *Tomu telabo amonea Yesu*

<sup>37</sup> Mia bogo napano tomu nalo amijog iliano nei, nalo amijog jibe ka julu kanalo maravuo ba bokar kanalo buruiu memedu, naruei ana nalo abika den Pitere a atevi dolu nalo, aberinavo "?Banalo, mia kumemi nuvila tumabe naruei?"

<sup>38</sup> Ana Pitere naio ber kalo berinavo "Kami nonovio, kuvilig kami, kuan ea varueiano ea Yesu Kristo siano, ka mia Atua riviekokoa kenemiu kariano nalo. A mia Atua naio sian Niununo Lu rivan kami, tibe ka kanano ijaiano novo tai van

kamiu, <sup>39</sup> bior verikariano napano Atua mila naio mila ban kamiu, a mila ban kenerimiu nalo, a mila bunu ban kulo dolu nalo napano aju koalabo kia ga vo. Verikariano nei naio joa nalo napano kanado Atua Soġi naio joġna biolo.”

<sup>40</sup> Ana Pitere joġna ber iliano novo telabo ka mia rivurlo amei, ana naio berenio berinavo “Kamiu monokanio kuvituvan kariano na kulo va nalo na vonganei, kamiu kuvilarur kamiu den vironiano napano jo binimej ealo.”

<sup>41</sup> Naruei nalo telabo kalo napano amijog Pitere kanano iliano nei, ana nalo amonea naio kanio, ana abaruei ealo. A ea tomu nalo nonovio napano ajua legiano nei, nalo telabo laka mia titai jibe ka menu tolu [3,000] napano abinimej ajusol lo ea kanalo taara nene.

*Namoneano nalo kanalo tinieano takurano*

<sup>42</sup> Ana namoneano nalo nei nalo aju abokar jikili bajago nalo nene, napano nalo amiagago julaka ka atevi nalo aberlogloglo, a nalo amijeburonlo bogo nonovio ea tinieano takurano novo ea kanalo taara, a nalo ajunġa ajinan vio takurano bogo nonovio, a nalo abarlo ka aura na volkouano nalo bogo nonovio.

<sup>43</sup> Naruei atevi nalo amimġauka vite na iloiano telabo, bija burutomoluo telabo, mia tomu nalo amial vite nalo nene, tinielo memebiju toru.

<sup>44</sup> Mia namoneano nalo, abe tinielo takurano banbano-o, mia nalo ajunġa amijamo ka kanalo saba nalo ka ve kialo bitiravirano. <sup>45</sup> Jibe na, ana nalo aju aġiliġvili ka kialo borotano nalo a vite dolu nalo na be kialo, ka avio ka puruveru nene nalo napano abokario van nalo kei napano abe talimġasa ka vite tealu.

<sup>46</sup> Legiano nonovio, nalo nei aju amijeburonlo jibe ka taara takurano, joomo ea Atua Kunuano Lu, a nalo ajunġa ajinan vio takurano ea kunualo nalo joomo. A bogo

nonovio napano nalo ajunġa amijeburonlo jibe na, mia nalo ajaaro toru laka, a bogo nonovio aju abatove ka Atua, a damġariga nalo aber siva toru banio bior meuliano novo nei napano naio jian banlo, <sup>47</sup> ana nalo abamenea naio kanio. A ea bogo nei, kulo dolu nalo bunu ajaaro ka kialo bajago vou novo nei, a legiano nonovio, Atua Soġi naio jo milarur tomu ta bunu vo, naio jo buru bironlo ea taara na atevi nalo kialo.

**3**

*Javuluku tai jumolu miel*

<sup>1</sup> Ana legiano tai, monloglog ea bogo na volkouano na niogoravo, mġerenio tolu, Pitere naio Jone, naljuo aju abavin ea Atua Kunuano Lu.

<sup>2</sup> Naruei be toro tai napano bogo na naio moluo be javuluku, mia legiano nonovio nalo ajunġa amiduio binimej amebi kanio joa morouo napano aber “Morouo Maraiu,” nina ea Atua Kunuano Lu. Ana javuluku nei naio joġna miog ijaiano den nalo namġa ajunġa aba joomo ea Yimo Lu.

<sup>3</sup> Naruei naio mial Pitere naio Jone napano naljuo aju aba joomo, mia naio miog ijaiano tai den naljuo.

<sup>4</sup> Ana na Pitere naio Jone, naljuo abamere ea toro nei, ana Pitere naio berkanio, berinavo “Koig, jau kovitkar kumemi juo beamu vo.”

<sup>5</sup> Naruei naio bitikarlo, jidomii beriamġa mia naio rivokar vite novo tai denlo.

<sup>6</sup> Mia Pitere naio berkanio, berinavo “Koig, kiniou maka neje puruveru tai leleio, mia vite novo tai takurano ga napano nemijevio ka mia neje vanso. Vite nene ninei: ea Yesu Kristo toro re Nasarete siano, kiniou neber kaso, jau kotumolu naruei, keiel.”

<sup>7</sup> Naruei Pitere monokorkoro bokar toro nei jumano meruo, ana miija toro javuluku nei ka naio tumolu, ana vaarakurano ga, jaano be juo abinimej abo ajikili. <sup>8</sup> Naruei naio jumolu vaarakurano ga, jumolu ju,

miel vonvonio. Ana bogo napano naljuo aju abano, ana naio jo jakisorlo, ana nalo tolu abano aba joomo ea Atua Kunuano Lu, napano mia toro nei jo jaaro toru laka, jo miel, jajabujo, naio jo miaia Atua.

<sup>9</sup> Naruei nalo napano aju joomo amialio ka toro nei napano jomã miel a jomã miaia Atua, <sup>10</sup> naruei bogo napano nalo abitilubarío, nalo aberinavo “!Mm, kamiú kuvialio! Nina be toro javulukú namã na-o! Bogo nonovio naio jomã miog puruveru tavio ea morouo na ea Yimo Lu, vonganei naio binimeí bo jo mieliel ruei.” Naruei nalo amemebiju vatitigio bior vite nei napano maluvo ea toro nei.

*Pitere mil banlo joomo ea Atua Kunuano Lu*

<sup>11</sup> Mia bior tomu nalo amiilo toru, nalo ajikiti abinimeí ea nalo tolu nei ea mãrsuþiki na Atua Kunuano Lu, napano sianó “Solomon Kanano Marsuþiki.” Ea vio na, toro neibano jomã jakii Pitere naio Jone kia navo. <sup>12</sup> Bogo napano Pitere mial ka tomu nalo nei abinimeí vaataro, ana naio mil banlo, berinavo “?Ai, kito kulo Israel nalo, jumãbe? ?Ka venia ana kamiú kumiilo m̃ele ka vite nei, ana kubitii m̃elea kumemi juo jibe na? ?Peli kamiú kumisidom kuberiamã kumemi juo ga numila toro nei naio mijikia miel ea kenememi moroano ga, þeli na kuberiamã kumemi juo nube kulo lu, þeli na venia? ! Makanio! <sup>13</sup> Mia Atua ga mila vite nei naruei, Atua napano Epraamo a Aisak a Yakovo kanalo, a napano be Atua na korobido dolu nalo kanalo bunu. Naio mila vite novo nei ka rivitirilar kiano toro na iñauano nene Yesu sianó ea miremiu nalo. Mia nina be Yesu nene kia ga navo, napano kamiú kuburu naio ban ea kiado komeli na toru nei, ana Pailat mialio berenio Yesu naio bo ga, ana berinavo naio mijikia rivatavio ga bereio, mia ka bogo na ana kamiú kumil jikili ban Pailat ea mirano,

kuberinavo Yesu naio mila sibi ga, ana kamiú maka kuvisidom naio. <sup>14</sup> Bekurano ka naio bar sio na ka be Toro Lu a Toro Na Memedu, mia ea bogo napano kenemiú iliano jibe na naruei, kuber maka kuvisidom naio. Mia kuber ka ga Pailat kuberinavo kamiú kumisidom toro namã muemue toro m̃aro ruei naio mijikia taluvo, mia Yesu naio tobo, ana Pailat naio mijamo kanio. <sup>15</sup> Tenene na mia kamiú kumuebin ruei Burobati Na Meuliano naio m̃aro, mia iorou kanio ana Atua mila naio meul bereio den namariano, mia vite nei naruei kumemi numial ka mirememi, ana na numitumã nuber liliano. <sup>16</sup> Mia Yesu sianó nene naruei naio mila javulukú neibano kumijikia vatitigio naio, binimeí bo, jibe ka napano kumialio nei. Toro nei jaano be juo jikili bo bereio ga ea miremiu vonganei, bior ka ga napano kumemi numonea jikili ea moroano na Yesu sianó.

<sup>17</sup> “Mo bo, kuruaku nalo. Kin-iou nemijikia ka vite nalo nanua kamliko kenemiú tomu na tortoru nalo kumila ka Yesu, kamiú nonovio ga kumilaio bior maka kuvijikiaio. <sup>18</sup> Mia nina naio be Atua kanano m̃arabo ka rila iliano nalo napano naio berial nanua ruei nalo amei ve riano. Ea iliano na kanano naverialiano nalo, naio berialio ruei ka mia Naverikariano na kanano naio monokanio rijog rivova ea mokotenano. <sup>19</sup> Mo, ana kamiú monokanio kuvilig kamiú, monokanio kumei bereio ea Atua, ka mia naio rilkon kokoa kenemiú kariano nalo. <sup>20</sup> Verenio kuvila tibe na, mia Atua naio mijikia sian moroano vou van kamiú ea kenemiú meuliano, a naio mijikia riila kenemiú Naverikariano na naio jii batitigio ruei, nina be Yesu, napano mia naio rimeí bereio. <sup>21</sup> Mia Yesu naio monokanio to mave beamu vo, rivano-o rivokar bogo napano mia Atua sidom rila vite nalo nonovio amei ave terivou bereio, tibe ka napano naio ber bulagio ruei ea iliano nalo na kanano naverialiano lu nalo re nua beamu. <sup>22</sup> Ana

nalo nene tai napano ber jibe na naio be Mosis, napano berinavo

‘Kenemiu Atua Soñi na mia naio rila kenemiu naverialiano tai naio tumolu iviso ka kami, tibe ka napano mila kiniou nojumolu noju iviso ka kami ruei. Naverialiano nene mia naio ve toro na kenemiu vio ga, a mia kami monokanio kuviagago vatitigio ka kiano iliano nalo.

<sup>23</sup> Mia tomu nalo napano maka adu kiano iliano nalo, mia Atua rivuku bulaglo den kiano tomu nalo kar ga ruei, kanio mia nalo ava kovio.’

<sup>24</sup> Tena Mosis naio berenio, a naverialiano dolu nalo bunu, jibe ka Samuel, naliko nalo napano abinime iorou ka naio, ea kanalo iliano nalo, na nalo ajumã aberii vite nalo na kiado legiano nalo na vonganei.

<sup>25</sup> Verikariano nalo napano Atua jian nua ea iliano nalo na naverialiano nalo na kanano, nalo abe kenemiu, a kami kumitu joomo bunu ea virakariano nei napano Atua milaio ruei naliko korobido nalo re nua, jibe ka napano Atua ber ka Epraamo, naio berinavo

‘Mia kiniou nala ka mia ilivuiario rime i van tomu nalo na yetemeriba nei, rime i riyotuba ea ga kanamo bajulukuti ga.’

<sup>26</sup> Memedu ka verikariano na, Atua mila Yesu jumolu ruei jibe ka kanano toro na iñauano, ana naio maka riila naio rime i ea kulo dolu nalo, naio miila binime i ka kami jukamu. Naio miila Yesu binime i ka rila rivu laka van kami, napano mia naio rivilig kami, ka kuvituvani kenemiu bajago va nalo.”

#### 4

<sup>1</sup> Ana Pitere naio Jone, naljuoaju amioliolu kia ga vo ban tomu nalo, ana kulo lu nalo, naliko natukamuano nakukuano nalo na Atua Kunuano Lu, naliko Satusis nalo, abinime i vaataro ka naljuo nei. <sup>2</sup> Nalo nei tiniel mimi kilkil, kanio naljuo nei ajumã aberloglog

tomu nalo aber jibe ka napano Yesu meul bereio den namãariano, tomu nalo bunu amijikia ameul bereio tibe na. <sup>3</sup> Naruei nalo abokakar naljuo, aburulo aban ea yimo na tetavokoiano ka atu rorea riva rivokar beni kanio, bior be bogolu vu ruei. <sup>4</sup> Mia tomu dolu telabo napano amijog kanalo iliano, nalo amoneaio, mia mirano na sumãano nalo ga na amoneaio, vaataro ka rivokar menu jumo [5,000].

#### *Aburu Pitere naio Jone aban ea kulo Ju nalo kanalo komeli labo*

<sup>5</sup> Ea legiano dolu nene, tomu na tortoru na kulo Israel, naliko kialo navurimãaraboiano nalo, naliko naverloglogiano na tuboiano nalo, abinime i vio takurano nei Yerusalemo. <sup>6</sup> Naruei ana nalo aba ajutano ea komeli na toru naliko Anas, napano naio toru ka kulo lu nalo, a naliko bunu kulo kouo dolu tealu jibe ka Kaivas, a naliko Jone, a Aleksada, a kulo dolu nalo na mãaratavo na toru na kulo lu nalo nei. <sup>7</sup> Naruei nalo amiila atevi juo nei ajumolu aju iviso kalo, ana nalo abika vikadeniano tai denlo nei. Nalo abika aber “?Kei naio berenio ka kamjuo ka kuvila tibe na van javuluku na? ?A kami kumije vio moroano na be?”

<sup>8</sup> Naruei Niununo Lu binime i bujo ea Pitere, ana Pitere naio mil banlo, berinavo “Kiniou nojumolu nojukamu ea miremiu, kami tomu na tortoru nalo na vio Israel, a navurimãaraboiano nalo, <sup>9</sup> mia kiniou nemial jibe ka kami kumitumãa kubika den kumemi juo, ka jumãabe ka iñauano novo na kumemi juo numimãaukanio ea javuluku nei, mia jumãabe ana kumemi numimãaukanio bo bereio. <sup>10</sup> Mo, kiniou najaaro ga ka nesian verdoñeiano na kenemiu vikadeniano nene, ka mia kami kuvijikiaio, a ka mia tomu na vio Israel bunu ajikiaio. Neber javuluku nene, naina jumolu jukamu ea miremiu ju na, bija jaano novo juo nene, naio binime i bo ruei ea moroano na Yesu

Kristo na vio Nasarete siano. Yesu nene naio nanua kamiu kumuebinio m̄aro ea makolkolo, mia Atua bitiri lario meul bereio den namariano.  
<sup>11</sup> Nina jibe kanio na Iliano Lu berii naio, napano berinavo

*‘Kamiu tomu napano m̄a kumim̄aukanio yimo, kamiu kubukular belea iesi tai, napano vonganei naio binimeis be m̄arteasiovo na ju iviso kanio yimo ruei.’* *Iouano 118:22*

<sup>12</sup> Mia maka m̄arabo dolu tai bereio napano mia romijikia rovokar meuliano eaio, bior Atua naio maka sian sio dolu tai leleio van kito ea yetemeriba nei napano mijikia rilarrur kito eaio.”

<sup>13</sup> Naruei tomu na tortoru nalo nei amiilo toru, bior nalo abitulubar ka Pitere naio Jone naljuo maka ave tomu na tortoru leleio, a naljuo maka ajikia vite ve telabo, mia naljuo nei maka niukniuku rivielo leleio. Naruei nalo amileal bunu ka beamu, tomu juo nei amiel naliko Yesu bogo nonovio. <sup>14</sup> Ana nalo maka bunu ajikia aue dobi Pitere kanano iliano leleio, bior toro napano jaano be juo binimeis bo ruei naio jumolu ju naliko naljuo nei.

<sup>15</sup> Mia nalo aber kanio nalo tolu nei aberinavo nalo avatavio beamu vo, ka mia nalo amijikia averii vite nei. <sup>16</sup> Nalo tolu nei abatavio, naruei tomu na tortoru nei aberii nalo aberenio “? Mia kito rala tum̄abe ka tomjuo nei? Tomu nalo na Yerusalemo abiniu amijog vite nei ruei ka tomjuo nei amila iñauano na toru tai ban javuluku nei ruei, mia maka bunu rejikia roverbure iliano nei bereio. <sup>17</sup> Mia bo ka kito ralavon ka iliano nei riva lie re bunu van tomu nalo, mo vertibe na mia roverbure naljuo nei ka mia ail re van tomu nalo averii sio nei Yesu vanlo.”

*Komeli na toru berbure Pitere naio Jone*

<sup>18</sup> Ana nalo abio tomu tolu nei ka amei joomo bereio, naruei amil jikili ban atevi juo nei, aberenio, aberinavo “Kamjuo na mia kuverii

re bunu Yesu siano van tomu nalo, a kuverlogloglo re ka naio.”

<sup>19</sup> Mia Pitere naio Jone, naljuo aberdoḡelo, aberinavo “?Jum̄abe? ? Peli memedu ea Atua mirano ka kumemi nuvitovon re naio, mia kumemi nuvitovon ga kamiu? Nina bo na mo kamiu kuver vonio tena, <sup>20</sup> mia kumemi nei, kumemi maka nuvijikia nuviturmaro leleio ga. Saba nalo na numial ka mirememi, monoka nuverial vija nana numijog ka tiliniememi.”

<sup>21</sup> Naruei tomu na tortoru nalo nei amil jikili lie bereio ban naljuo neibano, aberburelo javukia ga nanua beamu, karina na aberenio naljuo amijikia ava tavio, bior maka bunu ajikia aleal m̄arabo tai ka mia aje vironiano van naljuo, bior ga tomu nalo ajum̄a abamenea Atua bior venia napano maluvo kanio javuluku nei, <sup>22</sup> napano bogo na, naio be kiano yuka duelimo va veri [40] barlaka ruei.

*Namoneano nalo kanalo volkouano*

<sup>23</sup> Bogo napano Pitere naio Jone naljuo aba tavio, naljuo aban bereio memedu ea taara na namoneano nalo. Naruei naljuo aberial iliano nalo na tomu na tortoru na kulo lu nalo kanalo a navurim̄araboiano nalo aberenio, <sup>24</sup> mia bogo napano namoneano nalo amijog iliano nei bisi, ana nalo abolkouo ban Atua. Nalo aberenio “Atua Soḡi, Atua Soḡi, jau kojii tiniabene, a borotano, a tei, a vite nonovio na jua yetemeriba nei. <sup>25</sup> Kumemi numisidomial kanamo Iliano Lu tai, napano korobimemi tormoruo Teviti, napano naio be kanamo toro tai, naio berialio ea moroano na Niununo Lu, napano naio berenio jibe nei, berinavo

*‘?Bior vaio ana tomu napano maka amonea aju tiniel mimi m̄ele jibe na?’*

*?Tomu nalo aju ajidom ka ala iñauano na bova, ana bior vaio ana maka ajikia alaio?’*

<sup>26</sup> *Parinio tubo nalo na yetemeriba nei, nalo ajumolu aju batitigio ka ala mira, ana tomu na tortoru nalo abinimei vio takurano biorio, mia maka ajikia ka nalo ajumã amila mira naliko Atua Soři, a bija kanano Naverikariano.*  
*Iouano 2:1,2*

<sup>27</sup> Atua Soři, kumemi numial iliano nei be riano, naio memedu ga ka kenememi bogo na vonganai, bior memedu ea bulukomeli nei, Erot naio Pontas Pailat, naliko kulo Israel nalo, naliko kulo dolu nalo nei, tiniel mimi toru ka Toro Lu na kanamo iñauano nei Yesu, napano naio be Naverikariano napano jau komioakoio, ana nalo ajidomii kakario ka mia ala lelan naio. <sup>28</sup> Nalo nei abinimei vio takurano ka ala tibe na, mia nalo amila memedu ga ka venia napano jau kojo kojidomii kakario ruei beamu, ana jau kobitirilar kober mia monokanio tibe na. <sup>29</sup> Mia Atua Soři, kumemi nubika denso ka tiemo monmaio vatitigio rivu ka iliano nalo na jikirkili nei napano nalo ajumã aberiio ka kumemi, mia kumemi numisidom ka jau kajai kumemi, tomu na kanamo iñauano, ka mia kumemi nuverial kanamo iliano, ka mia tiniememi rimemebijure, a numerou re. <sup>30</sup> Mia kumemi nubika bunu denso ka jau kesianlar jumãmo, kala tomu na mieiano nalo ajog rivu bereio, a ka mia kumemi numijikia nuvila burutomoluo nalo řeli na vite na vremesiano nalo, ea kanamo Toro Lu na kanamo iñauano nei Yesu siano.”

<sup>31</sup> Mo bogo napano nalo abolkouo bisi, ana vio napano aju abior eaio mikulkulu, naruei Niununo Lu binimej bujolou ealo, milalo abano aberial Atua kanano iliano, napano kanalo jidomiano jikili lie ea naio.

*Namoneano nalo amijja bitiraviranlo ea vite nalo*

<sup>32</sup> Naruei ea bogoti nei, taara na namoneano nalo, kialo meuliano

nalo binimej bo laka, jibe kanio tinielo takurano ga, a be kialo jidomiano takurano ga, mila ana maka toro tai napano mia sikili ka sidom riverenio ka vite nalo napano be kanano mia nalo abe kanano ga, mia nalo aju amijamo ka kanalo saba nalo be kialo bitiravirano. <sup>33</sup> Mia atevi nalo aju aber bulavulag ea tomu nalo miralo, ka kiado Tubo Yesu, naio meul bereio den namariano, mia kanalo iliano nene be moroano toru eaio, mia namoneano nalo amial ka bogo nei, Atua naio jo milivu toru kalo ea kiano tiniememiano banlo. <sup>34</sup> Maka nalo tai ea kanalo taara, napano jumãmo ve bulati ka vite tai, bior tomu nalo napano be kanalo borotano řeli na kunualo, aju ařiliřili bulagio ka vite nalo nei, ana nalo ajumã abar puruveru nene nalo abinimej, <sup>35</sup> ajuvanio joa atevi nalo jumãlo. Mia iorou kanio, ana atevi nalo abarburevure puruveru nalo nene ban namoneano nalo tealoo napano jumãlo bulati ka vite nalo.

<sup>36</sup> Nalo tai nene napano naio jakii bajago na, naio be Yoseve, napano miyotuba ea bajulukuti na Livai, abar naio ea uleule na Saipras, mia nina naruei napano atevi nalo ajisia ka sio dolu bereio be Barnabas, napano sio nei sano nioti nene berenio “Toro namã miijarlar toro dolu kiano jidomiano.” <sup>37</sup> Naio mila iñauano novo tai jibe na naruei, napano naio řiliřililar ka kanano niatano tai, ana bar puruveru nene abinimej, juvanio joa atevi nalo jumãlo.

## 5

### *Ananias naio koano Savira*

<sup>1</sup> Mia be toro dolu tai, siano Ananias, napano koano siano Savira, naio bunu řiliřililar ka niatano tai napano be kanalo naljuo, <sup>2</sup> ana naio bar puruveru nene togio, naio bar binimej juvanio jua atevi nalo jumãlo. Mia naio bar van puruveru na borotano

nei togio, bokar bokanio be naljuo kanalo, a koano tira bunu naio mijikia vite nei, naio jaaro toru kanio. <sup>3</sup> Naruei Pitere berkanio, berinavo “?Ananaias, jum̃abe ana jau komijamo ka Siñaro binimej mila lelan kiamo iviso jibe na, ana jau komila sibilili Niununo Lu, ka napano jau kobokar bokanio puruveru na borotano nei togio nene? <sup>4</sup> !Komialio kiana! Bogo na jau maka koñiliñililar ka niatano nei vo, be kei kiano? Naio be kanamo ga. Mia bogo napano jau koñiliñililar kanio, puruveru nene bunu jua kei jum̃ano? Naio ju kia ga vo ea jum̃amo. Mia bogo na jau koberkar ka kavara nonovio van Atua, jau monokanio kala tibe na naruei. ?Ana venia na mila kiamo jidomiano napano jau komila sibi ga bereio jibe na? !Mia jau maka kala sibilili ga tomu nalo, mia jau komila sibilili Atua memedu ga!”

<sup>5</sup> Bogo na Ananaias naio mijog iliano nei, vaarakurano ga naio mijoru batove ea borotano, naio ñarodobi. Mia nalo napano amijog lilianiano nene, amemebiju toru. <sup>6</sup> Naruei ana kialo ñeaku nalo ajumolu, amijuvuluko tati na naio, ana amiduio aba tavio, aba ajivinio.

<sup>7</sup> Vaataro ka ñerenio ve tolu rivarlaka, ana koano tira Savira, napano naio maka rijikia vaio napano maluvo ka koano, naio kija binimej joomo. <sup>8</sup> Ana Pitere naio bika denio, ber “Savira, jau koverial ka kiniou. ?Nina be puruveru vodolu na kenemiu niatano nene na, ñeli na makanio?”

Tira nei naio bunu mila sibi, berdoñe berinavo “Makanio, tenalo nei ga binu be kiaku.”

<sup>9</sup> Ana Pitere naio berkanio, berinavo “?Jum̃abe ana kamjuo kumila sibi jibe na? !Kamjuo kubironkar ka mia kuvila von Atua Soñi kanano Niununo! ?Kojog tomu nalo na aju amiel abinimej ea ñaratavo? ! Nalo ajivin koamo ruei abinimej,

mia vonganei na, mia nalo añierso bunu kava tavio!”

<sup>10</sup> Mia bogo napano tira nei naio mijog Pitere kanano iliano nei, ana mijoru memedu ea Pitere jaano, ñarodobi. Mia ñeaku nalo nei abinimej joomo bereio, ana bogo napano nalo amial ka tira bunu ñaro ruei, ana añier bunu taniabene ba tavio, aba ajivinio jo tivelinio ka koano sum̃ano. <sup>11</sup> Naruei namoneano nalo napano ea lotuano, a kulo dolu nalo bunu napano amijogial lilianiano nei, nalo amemebiju toru laka.

### *Burutomoluo nalo a vite na iloiano nalo*

<sup>12</sup> Mia ka bogo nei atevi nalo aju amila burutomoluo telabo na Atua kanano moroano, bija vite na iloiano telabo bunu, ea tomu nalo miralo. Mia bogo nonovio, nalo nei bija namoneano dolu nalo ajum̃a ajusol nalo vio takurano ea Solomon kanano Marsupiki, ea Atua Kunuano Lu. <sup>13</sup> Ana tomu nalo telabo aju abatove kalo, mia nalo napano maka amoneaio, nalo telabo amerou ka avan aiaburelo. <sup>14</sup> Mia ñam̃ariga, tomu tealo a tire ajum̃a amonea Yesu, nalo aju abinimej telabo telabo lie vo, mia nalo na, Atua Soñi naio jusol nalo ea taara na namoneano nalo kanalo taara. <sup>15</sup> Bior vite nalo nei bunu, tomu nalo aju aburu kialo tomu na mieiano nalo abinimej, ana amidu nalo aju amon ea ñalo jog a ñalo yebe nalo, ea ikim̃arabo. Nina nalo amila jibe na ka bogo na Pitere naio riel sel ea vio nei, mia verenio niununo nene ga tokol nalo tealo, mia nalo avu bereio. <sup>16</sup> Mia be tomu telabo bunu ea ñarkomeli sesa nalo na aju jeliñiv Yerusalemo, napano nalo abinimej bunu, a nalo aburu kanalo tomu na mieiano nalo abinimej, bija nalo tealo napano siñaro ban ealo, ana atevi nalo amilarurlo abo bereio.

### *Tomu na tortoru nalo na vio Israel amiadikakar atevi nalo*

17 Ana parinio toro lu, naliko kanano bilbilu nalo, ninei be Satusis nalo na vio na, nalo amijoku toru laka ka atevi nalo, 18 ana aba amiadikakarło, abukulo aba joomo ea yimo na teta-vokoiano, naliko tomu na bova nalo napano nalo ajua ruei. 19 Aju ga banbano-o na ka bogiano, ana Atua kiano nailiano tai binime, ana betavo ea m̃aratavo na yimo na tetavokoiano nei, ana naio jukamu ka atevi nalo aba tavio bereio. 20 Naio ber kalo, berinavo “Kamıu kuva kuvitumolu kuvıtu joomo bereio ea Atua Kunuano Lu, kamıu kuverial iliano na meuliano vou nei van tomu nalo bereio.”

21 Ana atevi nalo amonmonea iliano nei, mia bogo na viomijeni mermeravo kia ga vo, ana nalo aba joomo ea Atua Kunuano Lu bereio, nalo aju amioliolu.

#### *Komeli na toru na Israel mil ban atevi nalo*

Ana ea kavijo nene kia ga vo, ana parinio toro lu naliko kanano bilbilu nalo nei, abio navurim̃araboiano dolu na Israel nalo ka nalo amei atuano ea kanalo komeli na toru nei. Nalo nei abe tinielo ka aberiam̃a atevi nalo aju kia ea tavokoiano vo, mia bogo napano nalo abinime, vio takurano ruei jibe na, ana ajuvan iliano ban ea yimo na tetavokoiano ka mia kukuano nalo avurulo amei.

22 Mia bogo na nalo aba aboru ea yimo na tetavokoiano, mia nalo maka ajikia aleal lo. Ana nalo abinime, bereio ea komeli, amila iliveriioano, aberinavo 23 “Bogo na kumemi nuba naboru ea yimo na tetavokoiano, mia kumemi numial ka napano m̃aratavo naio birako batitigio jo, napano abukario bo ga jo, mia kukuano nalo na m̃aratavo nene ajumolu ajikili aju. Mia bogo na kumemi nubetavo, nuba joomo, mia maka bunu nuval toro tai to.”

24 Mia tomu na tortoru na kulo lu nalo, a natukamuano nakukuano na Atua Kunuano, bogo na amijog iliano nei, maka bunu ajikia jum̃abe ka atevi nalo nei naruei.

25 Mia ka bogo na, ana toro tai binime, berial lilianiano dolu tai banlo, ber “!Jerei tomu nalo! Tomu nalo napano kuburulo aban ea yimo na tetavokoiano, nalo ajumolu aju joomo ea Yimo Lu, ajum̃a aberloglog tomu nalo bereio ruei!” 26 Ana bogo napano natukamuano nei mijogio, naruei naio naliko kanano kukuano nalo aba aburu atevi nalo neibano abinime, bereio, mia nalo amila ea bajago na melumu ga, bior ka nalo amerou ka mia tomu nalo na vio nei atubalo ka puruveru riviorio.

#### *Aburu atevi nalo aban ea komeli na toru bereio*

27 Nalo nei aburu atevi nalo abinime, joomo, ana amila lo ajumolu aju kamu ea tomu na tortoru nalo nei miralo. Ana na parinio toro lu nei naio jum̃a bika denlo, berinavo 28 “?Jum̃abe? Kumemi nuberbure kamıu kirisikili ruei, ka mia kamıu kuverij re bunu sio nei van tomu nalo, p̃eli na kuverloglog tomu nalo ka naio. ?Mia vonganei jum̃abe? Kamıu kumila mia vio Yerusalemo naio bujolou ruei ka kenemi iliano nalo, a kamıu kumitu kuberenio kumemi naruei nube burupati na toro nei kiano m̃ariano.”

29 Mia Pitere naliko atevi dolu nalo aberdope, aberinavo “Mia monokanio kumemi numonmonea Atua loa ka napano numonmonea kulorinio. 30 Kamıu kumuebin Yesu ruei, kamıu kumitukukakar naio ea makolkolo, mia Atua Sofi napano naio be korobido nalo kanalo, naio mila naio meul bereio den nam̃ariano. 31 Atua nene naio bitirilar naio ruei ka naio to tivelinio vameruo na naio, ka naio ve kiado Navurim̃araboiano a ve kiado Ioruriano. Atua naio mila jibe na ka kulo Israel nalo amijikia aviliglo, a ka mia naio mijikia riviekoka kanalo kariano nalo. 32 Ana kumemi, kumemi tomu na numial vite nalo na ka mirememi ruei, a numitu ka m̃a nuverialio van tomu nalo, nina kumemi liko Niununo Lu napano

Atua naio jian ruei ban tomu nalo napano amonmonea naio.”

*Kamaliel naio mil ban komeli na toru nei*

<sup>33</sup> Bogo napano nalo na komeli na toru nei amijog iliano nei, mia iliano nei jululo ñe, mila ana tiniel mimi ñe ka atevi nalo, ana nalo ajidom ka atiburelo ka mia añaro. <sup>34</sup> Mia nalo tai kalo, napano nalo ajuña abatove ka naio, naio be Varisis, naio be naverloglogiano na tuboiano, siano Kamaliel, naruei naio jumolu berinavo avuru atevi nalo ava tavio beamu vo. <sup>35</sup> Ana naio mil ban komeli na toru nei, berenio “Tomu na tortoru na Israel, miremiu ea kami, kami monoka kuvisidomii vatitigio rivu ka vite napano kumisidom ka kuvilaio ka nalo na. <sup>36</sup> Kami kuvisidomii toro nei Tutas. Nanua beamu kano, maka vesiou laka, naio jumolu, ber naio be toro tai, a be titai jibe ka tomu nalo duelimo toromomou veri [400] napano aba abijurukario. Mia tomu nalo amuebin naio ruei, mia amijil dedade kanano tomu nalo abeve terakurano, mia kanano taara nei binimei be kurano ruei. <sup>37</sup> Iorou ka nina, nina ea bogo napano abuluku tomu nalo, Jutas nei na vio Kalele, naio bunu jumolu, buru tomu nalo ajakisor naio. Mia iorou kano, ana nalo amuebin bunu, a nalo amijil dedade ea kanano tomu nalo bunu abeve terakurano.

<sup>38</sup> “Mo ana, ea vite nei napano rojuña roberio, kiniou neber jibe nei, neber mia kito rotuvan tomu nalo na atu ga tibe na, mia rala re titai kalo. Nina bior ka ver kialo jidomiano ñe na kialo iñauano nei rimaluvo ea ga toro, mia vite nei bunu naio monoka rijoru, <sup>39</sup> mia verenio naio miyotuba ea Atua, kito maka rejikia roverbureio. Mia verenio kito ralavonio ka roverbureio, ñe mia realeal ka kito rojuko vio ka Atua kiano iñauano novo tai.”

*Abitiv atevi nalo*

<sup>40</sup> Ana komeli na toru nei mijog iliano masosouano na Kamaliel nei

kiano, napano naio berenio mia nalo ala re titai ka atevi nalo nene, mia nalo aberenio mia atakii ga tibe kano napano naio berenio. Ana nalo abio atevi nalo ka amei joomo bereio, ana ajian vironiano telisu banlo, abitivlo, amil kilkil banlo bereio, aberenio averloglog tomu nalo re bunu kano sio nei Yesu, avona bisi, ana amiila bulaglo abano.

<sup>41</sup> Ana atevi nalo aba tavio den buruñara komeli nei, mia nalo maka ajog rivova, amijog bo laka ga bior ka Atua naio mialo abe verare ka avokar imouiano ea tomu nalo miralo, kario Yesu siano. <sup>42</sup> Ana nalo maka ajogkar kialo tomu na tortoru nei, ana legiano nonovio, joomo ea Atua Kunuano Lu, a joomo ea tomu nalo kunualo, maka nalo atuvan leleio ka napano nalo ajuña aberloglog tomu nalo, napano nalo ajuña amioliolu ka Ioluano Vou na Yesu, ka naio be Naverikariano.

## 6

*Amioako tomu na ijaiano nalo aluo*

<sup>1</sup> Ana ea bogo na, Yesu kanano naiagagoano nalo aju abinimei telabo lie vo, mia baravo tai jumolu iviso kalo. Mia nalo tivelinio be kulo Ju nalo napano nalo amil jelea Kris, a tivelinio dolu naio be kulo Ju nalo napano amil jelea ga kanalo iliano napano Ipru. Ana nalo napano amil jelea Kris, nalo ajuña amila vukuleleano, nalo aberenio legiano nonovio, bogo napano nalo abio ka bulag kanalo ijaiano telisu ban taanou nalo, mia nalo maka ala rimemedu van kanalo taanou nalo. <sup>2</sup> Ana atevi duelimo ba juo [12] nalo amijog iliano nei, abio buruñara taara na naiagagoano nalo nonovio ka nalo amei vio takurano, ana amil banlo, aberinavo “Banalo, maka rivu ka kumemi nuvituvan iñauano na verialiano na Atua kanano iliano, kano kumemi nuvitu nuvitikar ga iñauano dolu nalo na. <sup>3</sup> Verenio tibe na, kami monokanio kuvileal tomu ve aluo ea

kamiu, napano sialo bo ea tomu nalo miralo, a napano abujo ka Niununo Lu, a napano abarlo ka iñauano, kanio mia kumemi nuvitiri bulaglo ka nalo ave taara sesa ka avitikar vatitig iñauano dolu nalo nei. <sup>4</sup> Ana tibe na, mia kumemi atevi nalo, kenememi iviso vodolu naio mijikia tumolu tu sikili bogo nonovio ea iñauano nana volkouano a nana verialiano na Atua kanano Iliano Lu.”

<sup>5</sup> Naruei nalo napano ea burumñara taara nei, nalo amijog jidomiano nei, mia ajaaro toru laka kanio, ana amileal tomu aluo jibe kanio napano nalo aberenio. Nalo aluo nei napano amilealo, nalo tai be Stevin, napano be toro tai napano jikili ka monmonea, a naio bujo ka Niununo Lu, bija Vilip bunu, a Pokaras, a Nikeno, a Timon, a Pamenas, a Nikolas toro na vio Antioko, napano naio maka ve toro Ju, mia naio monea kulo Ju nalo kanalo Atua ruei. <sup>6</sup> Naruei nalo aburu nalo aluo nei abinimei ajumolu aju kamu ea atevi nalo nei miralo, ka atokol parilo, a aioakolo.

<sup>7</sup> Ana vite nei napano amila, mila ka bogo nonovio, Atua kanano iliano naio jo jelviv ea tomu nalo, a taara na naiagagoano na Yerusalemo naio jo binimei telabo lie vo, bano-o bokar bunu kulo lu nalo telabo napano kulo Ju nalo kanalo, nalo bunu amijeivio moneano.

*Kulo Ju nalo tealo aburu Stevin ban ea kanalo burumñara komeli*

<sup>8</sup> Naruei nalo aluo nei tai, napano Stevin, naio be toro tai napano bujo ka Atua kiano tiniememiano, a bujo bunu ka burumñara moroano na Atua kiano, mila ana naio mimñauka burutomoluo telabo a vite na iloiano bunu ban tomu nalo. <sup>9</sup> Mia kulo Ju nalo tealo napano ajua vio na, maka asaaro ka Stevin leleio, nalo naruei ajikar ka ajidom ala siniabu kanio. Nalo nei, abe kulo Saireni, a kulo Aleksadria, napano nalo aju Yerusalemo ea bogo na, a naliko kulo Selisia tealo bunu, a kulo

Esia tealo, napano abinimei amiasol bijalo. Telabo ka nalo nei nalo ajibe ka bagaro takurano ga, napano ajuburon vio takurano julaka ea yimo na volkouano na kulo Ju nalo kialo tai. <sup>10</sup> Mia nalo nei amila vio ka averbure Stevin, bano-o mia kiri deio ga, bior Niununo Lu naio mila Stevin be masou batitigio ea kiano iliano nalo, mia kialo ilimimiano nalo nei maka ajikia atuvulu naio leleio. <sup>11</sup> Ana nalo aba amileal tomu tai bereio ka ava ala sibilili tomu na tortoru nalo, ana nalo nene aba aberial aberinavo “Kumemi numijog toro na naio mil niegeniege Mosis kiano tuboiano, a naio mila searia Atua kiano tolu bunu.”

<sup>12</sup> Ana ea bajago na, amila jibe ka navurimñaraboiano nalo, a naverloglogiano nalo na tuboiano nalo, bija tomu dolu nalo telabo, tinielo bilulu mñele ka Stevin. Ana nalo abinimei abokakar naio jikili, ana aburu ban ea komeli na toru na kulo Ju nalo kialo. <sup>13</sup> Ana ea bogo na naruei, ana ilisibiano nalo aju amalmaluvo telabo lie vo, napano amil aber niegeniege Stevin, aberinavo “Bogo nonovio ga, toro na naio jomña mili niegeniege kiado Atua kunuano Lu, bija Moses kiano tuboiano. <sup>14</sup> Mia kumemi numijog ka napano naio berii kiado Atua Kiano Yimo, napano naio berenio berinavo mia toro Nasarete na napano Yesu, mia naio rila bulag Yimo Lu nei, a mia naio rivilig bunu kiado bajago moruo nalo napano Mosis jianio nanua bogobe ruei, napano kito robokar batitiglo aju binimei bokar vonganei. !Toro nei Stevin naio jomña ber bulavulag vite nalo na, naio jo mila lelan kito toru laka nei!”

<sup>15</sup> Nalo amijog iliano nei, naruei añilig pariparilo ka avitikar Stevin, ka naio rudu kiano verdoñeiano kanio iliano nei, ana bogo napano abitikario, nalo amialio ka napano mirano binimei jibe ka mirano nailiano tai garuei.

## 7

*Stevin kiano iliano: Naio jukunu ka Epraamo jukamu*

<sup>1</sup> Naruei ana parinio toro lu nei naio bika den Stevin, naio berenio berinavo “?Ana jau, jau kober jumabe? ?Riano ka napano jau kojoma kobuku bulavulag iliano nalo na jibe ka na nalo ajuma aberenio na, p̄eli na makanio?”

<sup>2</sup> Ana na Stevin naio berdope, berenio berinavo “Karamaku nalo a kuruaku nalo, kami kuviagago ka kiaku verdopeiano beamu vo. Mia kiniou neverii korobido moruo nalo re nua tukamu vo. Nanua nanua laka, tormoruo Epraamo naio joa kanano buruvenuo napano Koltia, ea burumara vio napano Mesopotomia, ana Atua na mermerano na kiado naio maluyo ka naio, berial kanio, berenio berinavo

<sup>3</sup> ‘Jau monoka kataluvo den kiamo maratavo, a den kanamo vio, ka kavan ea buruvenuo tai napano mia kiniou nesiloglogio kaso.’ <sup>4</sup> Naruei Epraamo jaluvo den Koltia, naio ba joa bulukomeli na Aran jukamu, banbano-o karamano maro, ana Atua buru naio binimei joa buruvenuo nei napano kito rojuaio vonganei.

<sup>5</sup> “Mia bogo napano Epraamo naio binimei bokar vio nei, mia Atua maka rudu niatano tai ve telisu leleio vanio, a ea bogo na Epraamo naio maka rivar kenerinio bunu vo, mia naio bokar jikili ga verikariano napano Atua naio berkanio nanua rui, napano berkar berinavo mia buruvenuo vodolu na vio nei ve Epraamo kiano, vija kiano bajulukuti nalo napano mia nalo avavavin amei iorou ka naio.

<sup>6</sup> Iliano napano Atua berka Epraamo ka bogo na jibe nei, napano Atua berenio, berinavo

‘Mia kanamo bajulukuti nalo na mia  
ava atua buruvenuo dolu, a  
mia nalo aimau kurano ga  
van sano tubo nene nalo,  
napano bisi ana mia nalo ala  
kikilo mele rivano-o rivokar

yuka ve duelimo toromomou ve veri [400].

<sup>7</sup> Avona bisi, ana mia kiniou netibure buruvenuo nene, mia nesian vironiano van kiano tomu nene nalo, ana na mia novuru bulag kanamo bajulukuti nalo bereio,  
ka nalo amei bereio a alotu van kiniou ea kenemiu vio kar garuei nei napano nejian ban kami.’

<sup>8</sup> “Mia ka bogo na naruei, Atua berenio bajago na pakuveuano ban Epraamo, javukia tovorovo tai ka virakariano nei napano Atua mila kario bija naio, mia bogo napano kenerinio Aisak nene naio moluo, bogoti aluo barlaka bano, ana Epraamo mila pakuveu kanio. A karina, Aisak bunu mila jibe na ka kenerinio Yakovo, mia iorou kanio, Yakovo bunu naio mila ban kenerinio duelimo ba juo [12], napano vonganei kito rojuma robiolo ka parinio karamado nalo re beamu laka.”

*Stevin naio berii Yoseve*

<sup>9</sup> Mia Stevin naio joma mil kia ga vo, naio berenio berinavo “Tete nei Yoseve, naio be parinio karamado nalo nei tai, ana kuruano dolu nalo amijoku mele ka naio, ana apilivililar ka naio ban ka riva rimau kurano ea buruvenuo na Ijivi. Mia Atua jo bija naio ea vio nene,  
<sup>10</sup> mia miija naio ka kiano bogokouo nalo na jikili nei, banbano-o mila napano parinio tubo na vio Ijivi nei, napano siano Vero, naio mial Yoseve kiano masouano bo laka, ana Vero nei naio midu inauano nalo na tortoru na vitikariano na kanano buruvenuo ban ea Yoseve jumano naio takurano.

<sup>11</sup> “Ana ea bogo na, ana be burumara vitu tai ea vio Ijivi a ea vio napano korobido nalo kanalo Kenano, ana nalo amijog bova mele biorio, nalo amial ka napano abe deio naruei, nalo maka lele salo sinaniano tai bunu. <sup>12</sup> Mia tormoruo Yakovo naio mijog ka napano be sinaniano na viliviliano tealu ju

keano Ijivi vo, naruei naio miila kenerinio nalo, napano abe parinio karamñado nalo, ka nalo avavin mave Ijivi ka avar tealó ve salo. Nina be kialo ieliano motiano garuei napano aba Ijivi. <sup>13</sup> Ea kialo ieliano valuo nene, Yoseve naio jiloglog naio ka kuruano nalo, a tukunuano na Yoseve kiano m̄aratavo nalo nei bano-o bokar Vero bunu. <sup>14-15</sup> Ana Yoseve naio juvan iliano ba ban karamñado Yakovo, berinavo naio naliko kanano m̄aratavo nalo monoka amei atu naliko naio, ana na Yakovo nalo abokar duelimo va aluo ba jumo [75], napano abavin aba aju Ijivi. Nalo aju banbano-o, ana iorou kanio Yakovo nei naliko kanado tormoruo dolu nalo nei nalo am̄arm̄aro ga ea vio nei. <sup>16</sup> Mia iorou laka kanio, ana na nalo abar buriu nene nalo aban bereio ea kanalo vio nei, ea vio tai siano Sekem, ana ajivinlo ea pakeltavo tai napano Epraamo naio bululario nanua ruei den kulo Amaro.”

*Stevin naio berii Mosis*

<sup>17</sup> Mia Stevin naio joña mil kia ga vo, naio berinavo “Kanado tomu nalo ajua vio Ijivi ka yuka telabo bereio vo, naruei nalo amiluo abinimeí napano nalo telabo lie vo, ana Atua naio mialio berinavo naio be bogo memedu naruei ka naio rila tibe ka napano naio berkario ban Epraamo nua ruei, berinavo mia naio rivurbulag kanano bajulukuti nalo den kanalo iñauano kurano ga. <sup>18</sup> Ana ea bogo na, parinio tubo vou tai naio jumolu ea vio Ijivi ruei, napano naio maka rijikia tukunuano na Yoseve kanano re nua a bija kanano m̄aratavo nalo, <sup>19</sup> ana naio mila bova ñele ban kanado bajulukuti nalo re nua nei, napano bututualo ka atuvan lelan kenerilo nalo ka am̄arm̄aro ka mia amei re vetelabo.

<sup>20</sup> “Mia memedu ka bogo na, Mosis naio moluo, napano naio be tete mudomudomu kirinovo tanea. Ana karamñado naio kenieno, abe juo ajivan naio joomo ea kunualo, banbano-o bokar siberio tolu, <sup>21</sup> mia karina, maka bunu ajikia ala titai,

ana na monoka atuvanlarío. Mia karina, parinio tubo kenerinio vevinio nei ga milealío, ana na midular Mosis ana bitikar luñiluñio ka ve kanano. <sup>22</sup> Naio jo miluo bavin jibe na banbano-o, ana nalo ajumña aberloglogio ka masouano na kulo Ijivi nalo kanalo, ana naio binimeí be toro novo tai ea ilimasouano a ea kiano iñauano bunu.”

*Mosis naio milavon ka jidom rilarur kulo Israel*

<sup>23</sup> Ana na Stevin naio berenio, berinavo “Naruei ka bogo napano Mosis kanano yuka binimeí bokar duelimo va veri [40] titai jibe na, ana naio tinien maio ka kulo Israel dolu nalo napano aju keano, napano ajibe ka kuruano nalo, ana naio joña jikar ka rivano ña miamiadu kalo kijakija. <sup>24</sup> Ana bogo tai naio bano, mial ka napano toro Ijivi tai jo mue toro Israel tai, ana naio ba miija toro re Israel nei, ana milameran ban toro re Ijivi nei, ana muebinio ñaro. <sup>25</sup> Nina bior ka napano Mosis naio jidomii ruei berinavo mia Atua rivitirilar naio ka rilarur kiano tomu nalo nei, ana ka bogo na, kulo Israel nalo maka avitulubar Mosis vo ka mia naio rila tibe na vanlo.

<sup>26</sup> “Ana ea legiano na beni nene, naio mial kulo Israel juo napano ajumña ajukulo, ana naio ban ka jidom rila naljuo nei avanjuñalo bereio, ana ber kalo, berinavo ‘Ei, kamjuo kuviagago. ?Jibe ka kamjuo kube kuruemiu ga na, jumabe ana kamjuo kumue lelan kamiu jibe na?’

<sup>27</sup> “Mia nana napano mila maka rimemedu ban dolu nene, naio jubonlar Mosis, naruei berkanio, berinavo ‘?Jumabe, kei bitiri larso ka mia kove kenememi toro na toru, a ka ketibure kumemi tibe na?’ <sup>28</sup> Peli jau kojidom kouebin kiniou tibe ka napano jau komuebin toro re Ijivi naniovo, a?’”

<sup>29</sup> “Telikiti napano Mosis naio mijog iliano nei, mijog bova toru laka, ana jumolu buro den vio Ijivi, beven kanio ba joa buruvenuo dolu tai siano Mitiano, ana joa vio na

kirisiou kija, ana kenerinio naljuo amoluo ea vio na.”

### *Mosis mijog Atua mil banio*

<sup>30</sup> Ana Stevin naio berinavo “Naruei Mosis joa vio na banbano-o bokar yuka duelimo va veri [40] bereio, karina legiano tai ana naio joa vio yauo tai, vaataro ka burum̄ara burusuku na vio Sinai. Naruei naio mial nailiano tai maluvo kanio ea sebi tai napano jijen buruiesi tai. <sup>31</sup> Ana Mosis naio miilo toru ka vite nei napano mialio, ana ba vaataro ka buruiesi nei ka rivitii batitigio. Ana naio mijog Atua Soṗi joono, napano berenio, berinavo <sup>32</sup> ‘Kiniou nebe Atua ka korobumo tormoruo nalo, jibe ka Epraamo, Aisak, a Yakovo.’ Ana Mosis naio memebiju toru, naio merou ka rivitikario. <sup>33</sup> Ana Atua Soṗi nei berkanio bereio, berinavo ‘Jau keielar kanamo kulujabue, bior vio napano jau kojumolu kejikili kojuaio na, naio be vio lu tenia. <sup>34</sup> Mia kiniou neber kaso, neberinavo kiniou nebitii batitigio rui jogvaiano nalo napano kanaku tomu nalo ea vio Ijivi kanalo, a nemijog rui kanalo tegiano nalo. Naruei kiniou nojo nebinime i naruei ka novuru bulaglo, a jau keialio, kiniou nojo nemiilaso bunu ka kavan bereio ea vio Ijivi tukamu, ka jau kove kanaku toro na rila iñauano nei.”

### *Kulo Israel nalo maka asidom Mosis*

<sup>35</sup> Mia Stevin naio joṃa milili kia ga vo banlo, berinavo “Mo Mosis na, naio naruei napano beamu nalo maka asidom naio, napano nalo aberenio iliano nei naruei, aberinavo ‘?Jum̄abe, kei bitirilarso ka kove kenememi toro na toru, a ka jau ketibure kumemi?’ Mia Atua naruei napano miila nailiano binime i joa buruiesi napano jo bovago na, ka rivitirilar Mosis bereio ka naio ve tubo a rive naioruriano na kulo Israel nalo. <sup>36</sup> Ana nina be Mosis nene kia ga navo napano naio burum̄arabo ka kulo Israel nalo

ajaluvo den vio Ijivi, nalo abinime i. A bogo nonovio, ea vio Ijivi, a ea Tei Mia, a bereio ea yuka duelimo va veri [40] ea vio yauo, naio joṃa mila vremesiano ea Atua kanano moroano, a mila saba nalo na burutomoluo nalo banlo. <sup>37</sup> Mia nina Mosis nene kia ga navo, napano naio berial ka kulo Israel nalo, naio berinavo ‘Mia Atua naio rivitirilar kamiu tai ga rimemedu, tibe ka kenemiu naverialiano dolu, jibe ka napano naio bitirilar kiniou jukamu rui.’ <sup>38</sup> A ninei be Mosis nene kia ga navo napano naio jo naliko korobido tormoruo nalo a naliko kulo Israel dolu nalo, ka bogo napano nalo amiel burukuti ea vio yauo, a napano naio jo naliko nailiano nei napano mil banio mave ea burusuku na, Sinai. Ka bogo na, ana Atua jian iliano na meuliano ban Mosis nene ga, ana Mosis nene naio bar binime i jian banlo.

<sup>39</sup> “Mia korobido tormoruo nalo nei nalo maka asidom ajogkar Mosis leleio, a nalo abukular kanano iliano nalo ga, ana ea kialo jidomiano nalo, ajum̄a ajidom ka avan bereio Ijivi ga. <sup>40</sup> Mia bogo napano Mosis jaluvo denlo, ba jo kirisiou ea burusuku na Sinai, nalo ajidomii bereio kialo meuliano re nua ea vio Ijivi, naruei nalo aber ka Erono nei, aberenio ‘Kumemi numisidom ka jau monoka koiñauka kanado tavoru tai, ka mia nalo amijikia avuru m̄arabo ka kito ravano, bior Mosis nei, naio buru bulag kito ea vio Ijivi naio burum̄arabo ka kito robinime i ea vio nei, mia kito maka bunu rejikia ka naio jo be naruei, ṗeli na mia tum̄abe ka naio.’ <sup>41</sup> Naruei nalo abano amila jibe na, amim̄aukanio tavoru na kirikiti buluku napano be buruolu, ana amila sida banio, a nalo amim̄aukanio burum̄ara jokoluolu tai ka kialo tavoru nene napano nalo ga amim̄aukanio ka jum̄alo nalo.

<sup>42</sup> “Naruei bogo napano Atua mial vite nei, ana naio bilig taakano kalo, a juvanlo ka ava alotu ka m̄arivitano

nalo. Nina jibe ka Atua kanano iliano tai napano Naverialiano Amos naio berialio ea Iliano Lu, napano berenio berinavo,

*‘!Kulo Israel!*

*?Julaka ea yuka duelimos va veri [40] ea vio yauo,*

*kamiu kumue temeul nalo ka ña kumila sida,*

*mia nina be kanaku sida nalo na ñeli na kei kiano?*

<sup>43</sup> *Makanio, maka kuvila rivan kin-iou, mia kumilotu ka tavoru nalo ga napano ña kamiu ga kumiñaukanio,*

*jibe kanio Molek na,*

*napano kumiel bija kanano tobobo,*

*a javukia bunu Revano na,*

*napano kamiu kubar tavoru na kiano ñarivitano jukamu ka kamiu.*

*Kanio vite na, mia kiniou nejili bulag kamiu kuva koalabo den ken-emiú buruvenuo, kamiu kuva kuvitu laka yako Bapilono tivelinio bano.’” Amos 5:25-27*

*Stevin berii ka napano Atua mijai kulo Israel nalo toru laka*

<sup>44</sup> Mia Stevin naio berenio, berinavo “Ka bogo napano korobido tormoruo nalo napano ajua vio yauo, ana Atua mil ban Mosis berinavo naio monoka rimñauka kanano tobobo tai, tavukia kijokijo tai ka riverialio river Atua naio jo nalikolo dañariga. Naruei nalo amimñaukanio memedu ka tiiano napano Atua berial banio, ana naruei nalo ajunña amijiajian lilian tobobo nene ban taara nalo. <sup>45</sup> Nalo ajunña amila jibe na, binimeí bokar bogo napano Yosua naio jukamu ka kiado tormoruo nalo abinimeí amijil bulag kulo dolu nalo napano abinimeí ajua kanado borotano nei ruei. Ana Atua naio buru kiado tormoruo nalo abinimeí bereio jouro ea kiado buruvenuo nei, naruei ea bogo nei nalo amidu tobobo nei binimeí jouro bijalo, jo bijalo binimeí binimeí bokar bogo napano tormoruo Teviti be parinio tubo.

<sup>46</sup> “Ana Teviti naio mial ka napano Atua jaaro ñele ka naio ka saba telabo, naruei naio bika ka verenio Atua naio mijikia rijamo ka mia naio rimñauka kunuano lu tai, ka Yakovo kiano bajulukuti nalo amijikia ava abolkouo vanio eaio.

<sup>47</sup> Mia Atua maka rijamo ka Teviti ka naio rimñauka yimo tai napano jibe na, mia karina kenerinio napano Solomon naio mimñauka burumñara kunuano lu nene. <sup>48</sup> Mia kito monoka rosidomii bunu, ka Toro Na

Toru Na Mave Laka maka rijikia toa yimo tai napano tomu nalo ga amimñaukanio, jibe ka napano Naverialiano Aisea naio berenio, berinavo

<sup>49</sup> *‘Atua Soñi naio berenio, berinavo*

*“Tiniabene ga tibe ka kanaku vio na nototano eaio,*

*a yetemeriba naio jibe ka jeleigio vio na novulan jaaku mave eaio.*

*?Kamiu kuberiañña kumijikia kuvimñauka yimo venia,*

*ka kiniou nava notoaió?*

*?Peli na kamiu kuberiañña kumijikia kuvimñauka vio vaio,*

*ka kiniou nava nejilimebi eaio?*

<sup>50</sup> *Vite nalo nonovio nei napano aju, mia kiniou ga na nejii nonovio lo abiniu.’” Ais 66:1,2*

*Stevin berenio kulo Israel maka ajogkar Atua*

<sup>51</sup> Mia Stevin naio jidom ka rila nonovio kiano iliano naruei, ana naio mil ban tomu na tortoru na kulo Ju nalo napano ajua komeli, ana ber kalo, berinavo “A kamiu, kamiu kumitibe ga ka korobido tormoruo nalo nanua beamu na. Tomnei, pariparimiu jikili laka, a tiliniemiu nalo abonbono, maka asidom ajog Atua kanano iliano, a tiniemiu nalo ajavukia tiniene tomu nalo napano maka ave pakuveu ga. Kamiu kube tomu nañña aberbure ñelea Niununo Lu bogo nonovio. <sup>52</sup> Atua kanano naverialiano nalo re nua, korobido tormoruo nalo amila kiki nonovio lo abiniu, a amuebinvinlo telabo, be kurano ka abe tomu nalo napano Atua miilalo abinimeí ka averial ka Toro Lu na Atua

kiano iñauano, mia naio jo binimej. Mia kamiu kubova kitkiti garuei, bior bogo napano toro nei naio maluvo ka kito ruei, mia kamiu kubielar naio a kumuebin naio ñaro. <sup>53</sup> Kamiu naruei napano kubokar Atua kiano tuboiano nene ruei, napano beamu nailiano nalo amidu binimej, mia kamiu maka kuvijogkario, kumitumña kumila kokorovio dañariga.”

### *Nalo ajubabin Stevin ñaro*

<sup>54</sup> Stevin kiano iliano bisi ea viona, mia bogo napano tomu na tortoru na bulukomeli amiagago ka naio, iliano nalo nei ajuluborua tinielo, naruei nalo tiniel mimi ñele, ana na ajumña ajer ñarjuvolo biorio. <sup>55</sup> Mia Niununo Lu naio binimej bujolou toru ea Stevin, ana na naio jirarago bavino vionio, jo bitiviti banbano-o, ana mial burumñara miamoiano na mermerano napano joko vionio ka Atua, a naio mial bunu ka Yesu jikili ju mave ea vionio na bavino laka vaataro ka tivelinio na naio, nina ea jumñano meruo. <sup>56</sup> Naio mial vite nei ana ber kalo napano aju, berinavo “!Aioou! Kiniou nojo nemial vionio mave naio betavo jo, ana nemial Kulorinio Kenerinio jumolu ju tivelinio ea Atua jumñano meruo.”

<sup>57</sup> Mia tomu na tortoru nei amijogvionio napano Stevin berenio, a nalo amijog jibe ka iliano tai na mia rila kule Atua, naruei nalo amiaga toru, abuko burutilinielo nalo ka ajog re bunu Stevin, naruei nalo ajikiti abinimej ea naio, <sup>58</sup> mia vaarakurano ga, abokar naio jikili, ana abatete kano batavio den bulukomeli. Aba tavio den bulukomeli nene, ka atubabinio, mia aberinavo tomu nalo nanua aber bulag iliano nalo na ka mia rila ana Stevin rivar vironiano, aberenio berinavo nalo nene naruei monoka avisove ka puruveru na jukamu. Naruei nalo amiya bulag ñalo kulukoti nalo, ajuvanlo ajua ñeaku tai jumñano napano naio jo naliko ea bogo na,

napano siono Sol, ana na nalo na aju ajuba Stevin.

<sup>59</sup> Ana bogo napano ajuba Stevin ba mia naio bolkouo, bio ban Atua, berinavo “!Aue, Tubo Yesu-o, koig kajamo ka niunuku riviedu to vijaso koig liki!” <sup>60</sup> Ana naio minie ka sudu jaano, ana mil medave, berenio, berinavo “Tubo-o, koig jau koje re vironiano van nalo nei rivior kialo kariano nalo neibano nalo aju amila ka kiniou nei.” A bogo napano naio berenio iliano nei bisi, ana mijoru mon napano ñarodobi garuei.

## 8

<sup>1-3</sup> Mia Sol neibano jo ea bogo nei, naio mial vite neibano, napano ajubabin Stevin ñarodobi, naio mial jibe ka napano amila iñauano na bo tai. Ana maka vesiou, mia tomu tealoo na ñirilo ajikili ka volkouano, nalo maka amerou, mia nalo amijog bova toru laka, naruei abinimej amidu Stevin tati abano, ajigi mia ajigi, ana aba ajivinio.

### *Sol jomña mue lelan nalo napano ña amonea Yesu*

Ana jikar ea bogo na, Sol nalo amila bova lie vo ban taara na namoneano nalo yako Yerusalemo. Mia ajumña amijil kikilo bova bano-o, mila napano miroano ka nalo aburo ka vionio nei aban ea vionio dolu nalo ea vionio Yutea bija Sameria, mia atevi nalo maka avano, mia nalo aju dañariga Yerusalemo. Mia Sol nalo ajerñi ñele vo ka namoneano nalo, ba lie vo, a nalo aju aban janea kunualo nalo, naruei aburu bulaglo, abukulo aban ea yimo na tetavokoiano, nina be sumano nalo a tire nalo bunu.

### *Vilip ba mioliolu ea tanobuku na Sameria*

<sup>4</sup> Naruei namoneano nalo miroano aburovuro dedade den Sol nalo ea bogo nei, mia bogo napano ajumña ajanea vionio jibe na, nalo ajumña amioliolu ka Yesu kiano iliano abano. <sup>5</sup> Ana nalo tai kalo, be

toro nei Vilip, napano nalo abitirilar naio jibe ka tikon jukamu, naio binimej rove yako ea burumñara bulukomeli tai na vio Sameria, naio mioliolu be moti garuei ka Naverikariano Yesu ban tomu nalo na vio na. <sup>6</sup> Ana nalo na ajumña amiagago vatitigio ka kanano iliano, a nalo amial burutomoluo nalo napano naio miñaukanio, <sup>7</sup> jibe ka napano simñaro nalo ajaluvo den tomu nalo telabo, napano bogo na amoluo, nalo amiaga burutomoru laka, naruei nalo aburo kilkil. A amial bunu ka napano nalo na niabele tivervelinio nalo amñarmñaro, bija javuluku nalo, abinimej abo bereio. <sup>8</sup> Naruei ea vio nei, tiniobi nalo ajaaro mia ajaaro toru laka ka vite nalo neibano amijogio a napano amialio.

#### *Jumñaliano tai siano Saimon*

<sup>9</sup> Mia beamu, ka napano Vilip maka rimej ea vio Sameria nei vo, be jumñaliano tai naio jo, napano siano Saimon. Jikar bogo be nua ruei, naio bar semej telabo a jomña miñauka vite telabo jibe na, mila ana naio jomña berial naio ber naio be toro dolu tai, naruei tomu nalo na tanobuku na nalo aju amiilo toru bogo nonovio kanio. <sup>10</sup> Kialo tomu na tomormoru nalo, bija tomu dolu nalo, nalo ajumña amonea kanano iliano nalo, a nalo ajumña aber jibe nei, aberinavo “!Kaleliki! Toro na, Atua kiano moroano tai joa naio riano. Nina monokanio moroano na naruei napano rojumña romijog aberiio, abio ka ‘Borumñara Moroano.’” <sup>11</sup> Nalo aju amiilo toru ka naio jibe na naruei, napano jo mila vite nalo na bogo be nua ruei, nina naruei milaio ana amonea naio.

<sup>12</sup> Mia vonganei, napano Vilip binimej mioliolu banlo, ana nalo amonea kiano iliano nei naruei, napano naio mioliolii navenatuboiano na Atua kanano, a sio nei Yesu Kristo banlo. Naruei nalo abiniu amonea iliano nene, a nalo amijev na varueiano, nina sumñanalo a tire nalo bunu, <sup>13</sup> binimej bokar bunu

toro nei Saimon, naio bunu monea, naruei abaruei eaio. Ana iorou ka nina, damñariga naio jo lili ga Vilip, naio jomña miilo toru damñariga ea burutomoluo nalo a burumñara iñauano nalo na moroano na Atua kanano napano Vilip jomña milaio.

<sup>14</sup> Naruei maka vesiou ga, ana iliano na vite nalo nei napano amiyotuba ea vio nei naio ba bokar atevi nalo yako Yerusalemo, berinavo kulo Sameria bunu, vonganei nalo amonea Atua kiano iliano ruei. Naruei atevi nalo aberiio, amial bokanio nalo aiila Pitere naio Jone ka naljuo ava ayotuba kalo, ka ave juo ala vonio ka avitii veve vite nalo nene. <sup>15</sup> Naruei naljuo nei abatove ea nalo na Sameria jibe na, ana abe juo ajokol pariparilo, a abolkouo biorlo ka Atua sian Niununo Lu vanlo. <sup>16</sup> Abe juo abolkouo kalo jibe na, bior ka napano Vilip naio baruei ea nalo nei ruei ea Tubo Yesu siano, mia Niununo Lu naio maka rivatove ealo vo. <sup>17</sup> Jibe na, ana Pitere naio Jone, naljuo amila jibe na banlo naruei, ana nalo abokar Niununo Lu ka bogo nene naruei. <sup>18</sup> Naruei na jumñaliano nei Saimon, bogo napano naio jo mialio ka napano atevi nalo nei ajokol pariparilo napano ajikar vonga ka amonmonea jibe nei, mila ana nalo abokar Niununo Lu, naruei naio mijoku ka kialo moroano na. Naruei naio ba bar puruveru na toru tai binimej, mijian ban naljuo nei, jidom rivulular moroano neibano joa naljuo nei, <sup>19</sup> ber kalo, berinavo “Nina naruei kiniou nejidom ka kamiu kuvisian moroano na togio van kiniou, ka kiniou bunu nemijikia notokol tomu nalo pariparilo, ka mia amijikia ajev Niununo Lu.”

<sup>20</sup> Mia Pitere naio maka lele saaro ka vaio napano Saimon bikanio, naio tinien jerio, naruei mil jikili banio, berinavo “!Tavaliki! Maka nejikia navar kanamo veru napano jau koberiamña komijikia kovulular moroano na Atua kiano kanio. Nina naio be ijaiano ga tai napano Atua mijikia sian kurano ka ga van toro. Kiniou neber kaso, mia kanamo

puruveru mia rivano, sebi sisenio ea vio na jogvaiano, ana jau bunu katakisorio kavano. <sup>21</sup> Mia vonganei naruei kumemi numijikia vatitigso, ka maka rivu ka kala iñauano rivija kumemi, bior ka napano kanamo iviso maka to batitigio rivija Atua leleio. <sup>22-23</sup> Peli ga, kiamo iviso naio bujo ka jokvano ga, a kiamo kariano va nalo amiorkakar mēlea kanamo meuliano laka. Jau monoka koviligso ka kanamo jidomiano va nalo nene, jau monoka kobolkouo van Atua ka naio riviekokoaso riviorio.”

<sup>24</sup> Ana na Saimon naio berdoḡe, berinavo “! Inau! Verenio tibe na, kiniou nejidom toru ka kamiu kubolkouo van Tubo kar kiniou, ka mia vite kouo nalo namā kumitumā kuberenio na, mia nalo amei re ea kanaku meuliano.”

<sup>25</sup> Naruei atevi juo nei, Pitere naio Jone, nalo aju kija bere vo naliko nalo nei, nalo ajumā aberbisivisii vite nalo napano mā Kristo milαιο a Atua kanano iliano nalo, banbano-o bisi ana nalo ajaluvo ea vio nei, amidu m̄arabo na ka avan bereio mave Yerusalemo. Mia bogo napano naljuo ajumā amiel ea m̄arabo abano, ajumā amioliolu ka Iolvano Vou na Yesu ea m̄arkomeli telabo ea tanobuku na Sameria bisi, ana na nalo abinimei aboru bereio Yerusalemo.

### *Vilip mil bija torbobogio tai re Itiopia*

<sup>26</sup> Naruei bogo napano Vilip naio jo mirñau yako Sameria kia ga vo, ana Atua kanano nailiano tai binimei eaio, mil banio, berinavo “Vilip, kiniou neber ka jau, neber jau kotumolu, kava katakii m̄arabo napano jikar Yerusalemo bavin ea komeli na Kasa.” Mia m̄arabo nene be m̄arabo napano bavin jelea vio yauo.

<sup>27-28</sup> Jibe na, ana Vilip naio mijog iliano nei, ana jumolu, jikar ka ban naruei. Naio jo miel ban jibe na, mia miilo ka torbobogio tai napano joa kanano rukuruku napano parinio bue m̄arauo burio, binimei

ea m̄arabo nene. Toro nene naio jomā buluku Niosi Lu napano Aisea bivitauia. Naio be toro na toru tai na tira na toru tai na vio Itiopia, napano abio tira nene ka Kedesi, napano nioti nene berenio naio be parinio tubo ea kanalo buruvenuo. Toro nei kanano iñauano be tena rivitigar iñauano nalo na tortoru ea tivelinio na veru na tira na toru neibano kanano, a toro nene, naio be toro tai bunu napano nanua ruei amila jibe ka tumāro. Naruei ea bogo na, naio batove Yerusalemo ruei ka rivolkouo van Atua, naruei naio jo jakii kanano m̄arabo ka rivan bereio ea kiano vio. <sup>29</sup> Jibe na, ana Vilip bunu jo miel ea m̄arabo nene bano, a toro na toru nei bunu joa kiano rukuruku buro bano, naruei Vilip mialio. Mia bogo napano Vilip mialio, Niununo Lu mil banio, berinavo “Jau katakisor toro na, kava vaataro ka kanano rukuruku.”

<sup>30</sup> Naruei Vilip jikitisosorio bano, naruei naio ban vaataro, mijog ka napano toro nei naio jomā buluku niosi na Naverialiano Aisea. Naruei naio bika denio, berenio berinavo “? Jumābe, jau kobuluku lubar batitigio iliano na jau kojomā kobulukuio na, ḡeli na makanio, jau maka kovuluku lubario?”

<sup>31</sup> Ana na toro nene berdoḡe berinavo “?Koig, ana mia kiniou nejikia tumābe, ka napano maka toro tai to, ka riveribisivisii iliano nei van kiniou?” Ana na naio ber ka Vilip, berinavo “Mo verenio tibe na, mia jau komei mave beamu, kito ve juo rotu tano ea vio nei.” Ana na Vilip bavin ea rukuruku.

<sup>32</sup> Mia Iliano Lu napano Aisea naio bivitauia, napano toro na toru nei jomā milavonio ka rivulukuio ea bogo nei, nina be iliano napano ber jibe nei, berenio berinavo

*“Toro nene jibe ka nunu tai, bior ka bogo napano abokar naio ka mia aueio, mia naio melumu ga,*

*ḡeli na naio jibe kanio kirikiti nunu tai,*

*ka bogo napano aburon bulag  
vijinio napano be moti, mia  
maka rijikia riaga.*

*Toro nene naio jibe na naruei, na-  
pano ea bogokouo na kiano  
meuliano,  
naio maka rijikia riveriþe il-  
iano tai leleio, mia naio mon  
melumu dañariga.*

*33 Nalo amila burumñara iñauano  
toru laka ban naio ruei,  
mia bogo na ajibureio, nalo amila  
maka rimemedu kanio.*

*Mia nalo amial ka maka ve kenerinio  
tai ka rudu siano,*

*bior aje korovio kiano meuliano ea  
yetemeriba nei kiri bulati ga.”  
Ais 53:7,8*

*34 Mo toro na toru nei bikanio  
nioti na iliano nalo nei den Vilip,  
berinavo “Kiaku bilbilu, jau kover  
bisiviþii vonio van kiniou ka naio  
be kei napano naverialiano nei naio  
jomña berii nei? ?Naio jomña berii ber  
ga naio, þeli na naio jomña berii toro  
dolu tai?”*

*35 Ana na Vilip jukunu ka banio,  
naio jikar memedu garuei ea Iliano  
Lu neibano jomña bulukuio nei, jakii  
ba lie ana berial Ioluano Vou na bo  
vodolu na Yesu kiano banio. 36 Mia  
ka bogo na, abe juo aju aburo ea  
rukuruku kia ga vo, ajakii mñarabo  
abano, mia nalo abinimei abokar  
vio tai napano uei tai joaio. Naruei  
bogo napano toro na toru nei naio  
mial uei nei, naio mil ban Vilip,  
berinavo “Kiniou nejidom ka jau  
kavaruei ea kiniou, mo keialio, ninei  
be uei tanie jo. ?þeli maka bunu ve  
titai tokovio ka kito juo ka kavaruei  
ea re kiniou a?”*

*37 [Ana na Vilip berdoþe, berinavo  
“Jibe nei, verenio jau komonea vija  
kiamo iviso momou reraio garuei.”*

*Ana na toro nei berial ka Vilip,  
berinavo “Kiniou nomonmonea ka  
Yesu Kristo naio be Atua Kenerinio  
riano.”] 38 Naruei toro na toru  
nei mila kiano rukuruku mebi ea  
vio nei, ana abe juo amiel abatove,  
ajudobi joomo ea tinia uei, ana mo  
Vilip baruei ea toro Itiopia neibano.*

*39 Mia bogo na abavin den uei  
nei bereio, mia Niununo Lu binimei  
burular Vilip den vio nei kolvare  
ga, mila ana toro na toru nei maka  
bunu rial naio. Ana naio ba jotano  
bereio ea kanano rukuruku, jakii  
kiano mñarabo, naruei naio jo bano,  
napano tinieno jesei mia jesei toru  
laka. 40 Mia Vilip jibe ka napano  
naio jaluvo ruei, mia miilo ka mial  
ka napano naio joa bulukomeli na  
vio Asotas ruei. Mia naio jo miel  
batove, ba jelea komeli na tanobuku  
na vio na, jo mioliolu ka Ioluano Vou  
na bo banbano-o bokar burumñara  
bulukomeli na vio Sisiria.*

## 9

*Atua bilig Sol binimei be Yesu  
kanano toro*

*Iñauano 22:4-16, 26:9-18*

*1 Naruei ea bogo nene, Sol na-  
pano beamu naio jomña mila baravo  
mñele ka namoneano nalo, naio jomña  
tinien jer Tubo kiano naiagagoano  
nalo kia ga vo, a naio jomña berkar  
kia ga vo berinavo mia naio ruebin-  
vin nalo tibe na. Tenene na bogo  
tai, ana naio ba mial parinio kulo  
lu nalo, 2 naio bika ijaiano tealó  
denio. Sol jidom ka parinio kulo  
lu nei rivivitauiá niosi nalo tealó  
van navurimñaraboiano na yimo na  
volkouano na kulo Ju nalo kanalo,  
nina ea vio Tamaskas, ka riverial  
vanlo ka monoka ajamo ka Sol riva-  
tove ealo ka sirag tomu nalo napano  
aju joomo ea vaio napano mña abio  
ea bogo na kanio “Marabo Vou,”  
ninei be namoneano nalo. Sol mila  
jibe na bior naio jidomii ka riva  
rivokakarlo sikili, sumñano nalo a  
tire nalo, ana mo naio rivurlo avan  
bereio Yerusalemo, napano beamu  
nalo aburo kanio, ka rivukulo avan  
ea yimo na tetavokoiano. Ana toro  
na toru nei bivitauiá jibe ka napano  
Sol bika denio, ana midu jian banio.*

*3 Mo Sol naio bar mña niosi  
nalo nei, karina ana naio ju-  
van vio Yerusalemo naio jo batove  
Tamaskas. Mia Sol nalo aju amiel  
bano-o legiano tealó ruei, ana na*

nalo abinimei vaataro ka vio nei Tamaskas, mia naio miilo kolvare ga ka Atua kanano burumñara mi-amoiano tai maluvo ea tiniabene, mereralii vio napano Sol jomña miel eaio. <sup>4</sup> Miamoiano nene midulii Sol jibe na, mila mijoru ea borotano, ana naio mijog niono tai mil banio, berinavo “! Sol, Sol! ? Kar vaio ana jau kojomña komila lelan kiniou mēle, jibe ka na kojomña komila na?”

<sup>5</sup> Bogo napano Sol mijog vikade- niano nei, ana bikanio, berinavo “? Tubo, jau keinia?”

Ana Yesu berdoḡe jibe nei beri- navo “Yesu napano jau kojomña komila kiki naio, kiniou nene nei naruei.” <sup>6</sup> Ana Yesu naio berkanio bunu, berinavo “Mo jau, kotumolu, keiel kava jouro ea komeli na Tamaskas, ana mia toro tai rimeii riverial vanso ka mia jau kala tumñabe.”

<sup>7</sup> Naruei ana tomu nalo napano ajumña amiel naliko Sol ea bogo na, nalo amijog iliano nalo nei, mia maka aial toro tai na ber kalo, naruei nalo amiilo toru kanio, ajikili aju vovu ga aju jibe na, maka bunu kanalo iliano tai ka mia aver kalo. <sup>8</sup> Avona bisi, ana Sol naio mila jibe ka na Yesu berenio. Naio jumolu bereio, mia bogo napano bisiḡe mi- rano, mia maka rijikia rivitilubar titai leleio, jibe kanio napano mi- rano miununu ga. Vite nei naruei milαιο ana nalo abokar jumñano, ana abalavo kanio ka ava Tamaskas. <sup>9</sup> Naruei nalo aba aboru vonuo ea vio nei, mia Sol naio mirano mi- ununu jo jibe na ba bokar bogoti tolu, a ka bogo na, naio maka sen titai a naio maka rimunu titai, naio mondulu ga.

#### *Ananaias ba bolkouo ka Sol*

<sup>10</sup> Naruei ea vio neibano Tamaskas, be naiagagoano tai jo, siano Ananaias, mia naio mial ka napano Tubo Yesu bio siano, jibe ka namonvovuano tai, naio berkanio, berinavo “Koig, Ananaias.”

Ana Ananaias miolu, berinavo “Nao, kiniou nei Tubo.”

<sup>11</sup> Ana na Tubo berkanio, berinavo “Jau kotumolu kavatove iviso ea bulukomeli na, jau katakii mñarabo na telisu na abio kanio ‘Marabo Na Memedu,’ mia jau kava kovoru ea Jutas kunuano. Ana ea yimo nene, jau kovika toro na vio Tarsis tai napano naio siano Sol. Mia toro na, vonganei naio jo bolkouo, a naio mial visiḡeiano tai ruei, <sup>12</sup> ana ea visiḡeiano nei, naio mial jau naruei, napano kobinimei joomo ka naio, ana komidu jumñamo jo mave ea naio, ka mia mirano sirarag bereio rivu.”

<sup>13</sup> Mia bogo napano Ananaias mi- jog iliano nei naio miilo va kanio, ana berinavo “Tubo, kiniou nemijog tomu telabo aberii toro na kiano bajago ban kiniou ruei, a aberial jumñabe napano mña mila ka kanamo namoneano lu nalo napano aju Yerusalemo, <sup>14</sup> a vonganei, nemijog naio binimei ea vio Tamaskas ruei, bior tomu na tortoru na kulo lu nalo amidu moroano banio ruei ka mia naio rimeii rivokakar kumemi nalo napano numitumña nubolkouo ka siamo.”

<sup>15</sup> Ana Tubo naio berkanio, beri- navo “Jau komerou re, mia jau ka- van ga, bior kiniou nebitirilar toro na ruei, ka mia naio rila kanaku iñauano, ka mia naio rivar siaku riva tanea taara dolu nalo na maka ave kulo Israel, riva rivokar kialo parinio tubo nalo, a rivan kulo Israel nalo bunu kija. <sup>16</sup> Mia kiniou nala naio rivitilubar vite kouo dolu tai bunu, ka mia naio monoka rijog rivova ka vite ve telabo kario siaku, ea bogo napano mia naio tomña rive- rialio.”

<sup>17</sup> Ana Ananaias midu iliano nei, ana ban ea yimo napano Tubo berkanio, ana ba joomo naruei naio mial Sol, ana midu jumñano jo mave ea parinio. Ana mil banio berinavo “Kuruaku Sol, Tubo naio miila kin- iou nebinimei ka neialso, nina be Tubo Yesu napano miyotuba kaso ea bogo napano jau kojomña komiel ea mñarabo kobinimei. Naio miila kiniou nebinimei ka mia nobolkouo

ka miramo, ka mia rivu bereio, a ka mia Niununo Lu rimei rivujo lou easo.”<sup>18</sup> Naruei naio bolkouo kanio, mia vaarakurano ga vite nalo napano jibe ka tiririkiti niado ajibirbil den Sol mirano, mila ana mirano abo bereio. Naruei Sol naio jumolu ju, ana ea bogo nei, aburu aba abaruei eaio.<sup>19</sup> Mia naio jinano moti bere, a mijog ĩirinio jikili bo bereio.

### *Sol jikar ka mioliolu ea vio Tamaskas*

Naruei Sol naio jo legiano tealo bereio yako Tamaskas naliko naia-gagoano nalo napano ajua vio na.<sup>20</sup> Mia maka vesiou, ana naio jomña ba joomo ea kulo Israel nalo kanalo yimo na volkouano nalo na vio nei, ana naio jo joomo jomña mioliolu ka Yesu, berinavo naio be Atua kenerinio riano.<sup>21</sup> Mia tomu nalo napano amijogio, nalo amiilo toru laka, a ajumña abivika denlo, aberinavo “! Tomnei! Toro nanua beamu naio jo Yerusalemo, jomña mue lelan tomu nalo namña ajumña aberenio sio na napano vonganei naio bunu jomña mioliolu kanio bereio. Kamiu kuvialio, naio binimeĩ ea vio nei kar ga vite nene kia ga navo, ka naio riadikar tomu nalo nene, ka rivurlo avan bereio, rivan parinio kulo lu nalo yako Yerusalemo, mia vonganei naio ba be dolu ruei. ?Venia mila naio jibe na?”

<sup>22</sup> Mia Atua mija Sol ka kanano iliano binimeĩ temi lie vo, mia naio jo bokar tomu nalo telabo lie, napano jo mila meravo laka banlo ka Yesu, naio naruei be Naverikariano na memedu riano. Ana kulo Israel dolu nalo napano ajua vio Tamaskas, maka aleal verdoĥeiano na bo tai leleio ka atukovio ka Sol kiano iliano nalo, mia kanano iliano nalo amila searo ea kanalo jidomiano nalo batitigio.

<sup>23</sup> Naruei bogoti tealo barlaka bano, ana Sol jomña mioliolu jibe na, ana kulo Israel nalo ajumolu abinimeĩ vio takurano, aberii ka

aleal m̃arabo tai ka auebin naio rim̃aro.<sup>24</sup> Mia bogo nonovio, ka legiano a bogiano, nalo aju rorea naio ea burum̃ara morouo nalo napano ju bure tagvoru na komeli nei, ka mia amijikia auebin verenio rilavonio ka rivuro. Mia iliano nei binimeĩ bokar Sol,<sup>25</sup> naruei kiri bogiano tai, ana nalo napano aju bija naio amidu naio bano, amisonio ban ea burum̃ara basaro tai, ana nalo ajuvarvan naio batove-e boru yetano tavio ka tagvoru na komeli nei.<sup>26</sup> Naruei Sol buro den vio nei Tamaskas, naio bavin Yerusalemo bereio.

### *Sol ban bereio Yerusalemo*

Ana na Sol ba Yerusalemo, mia naio jidom riva rivijurukar rivija naiagagoano nalo na vio na, mia maka amonea naio ka averenio naio be Yesu kiano naiagagoano riano tai, mia nalo niabele ĩili kanio, mila na amerou m̃ele kanio.<sup>27</sup> Mia nalo tai kalo be Barnabas, naio mial ka Sol naio be riano, ana jidom ka riijaio, mila kiano m̃arabo ka mia mijikia rivan sikili tu tukamu ea naiagagoano nalo miralo. Ana abe juo abano, ana Barnabas berial kalo jum̃abe ana Sol mial kiado Tubo ea m̃arabo, a napano kiado Tubo mil banio jum̃abe, a naio berial bunu jum̃abe napano Sol jikili laka ka mioliolu yako Tamaskas ka Yesu siano.<sup>28</sup> Naruei nalo amijog iliano nei, nalo ajaaro kanio, ana na Sol naio jo naliko, jo ban ea vio nalo na Yerusalemo, a naio maka leleio rimerou, mia jomña mioliolu ka kanado Tubo Yesu siano.<sup>29</sup> Ana naio jomña mil bunu naliko kulo Israel nalo napano ajumña amijev tomu na vio Kris nalo kanalo iliano, naio jomña mila mira ka iliano naliko, banbano-o mia nalo ajidom auebin naio rim̃aro.<sup>30</sup> Mia bogo napano namoneano nalo amijog vite nei, mia nalo aburu Sol batove Sisiria bo ga, avona karina nalo aber bogiano bo kanio, ana nalo amiven naio ban ea kiano vio Tarsis bereio.

<sup>31</sup> Ana ka bogo na, namoneano nalo napano aju rorea ea vio Yutea, a ea vio Kalele, a ea vio Sameria, nalo amial bogo melumu kija kalo. Ana na Niununo Lu naio jo miijalo, naio jo mila na tumaro binimej jikili lie vo, ana jo mila mirano na namoneano nalo aju abavin lie vo, ana namoneano nalo nene nalo aju ajovon kiado Tubo damariga.

*Ea vio Lida, atevi Pitere mila batitigio Aneas jaano*

<sup>32</sup> Naruei ea bogo na, Pitere naio miel janea komeli nalo na tanobuku nei, naio jomã mioliolu, karina bogo tai bereio, batove ka riaduka namoneano lu nalo na yako ea komeli na Lida. <sup>33</sup> Ana bogoti napano boru ea vio na, mial toro tai napano niabene tivelinio m̃aro, mila naio mon ea m̃ano jogu ka yuka arolu [8] ruei. Toro nene, siano Aneas. <sup>34</sup> Mia bogo napano Pitere mialio, ana berkanio jibe nei, berinavo “Aneas, kiniou neber ka jau, Yesu Kristo rila vatitigio niabemo rivu bereio. Jau kotumolu kojukio m̃amo yebe.” Mia vaarakurano ga, Aneas jumolu, niabene bo ruei. <sup>35</sup> Ana na tomu nalo na vio Lida bija nalo na ea vio vodobi na Saron, amial toro nei binimej bo ruei, ana nalo abilig kanalo meuliano nalo abiniu amdu ban Atua.

*Pitere mila Toraka meul bereio yako Jopa*

<sup>36</sup> Mia ea vodobi nei be bulukomeli tai, siano Jopa, mia namoneano tai kalo napano joaio, naio be tira na, napano siano Tapita. Nina be sio tai napano jelea iliano na Krik aber Toraka, sano nioti nene ber temeul maraiu tai napano siano tia. Tira nei, naio mila iñauano novo nalo telabo julaka, a jomã miija talimãasa nalo damariga. <sup>37</sup> Ana ka bogo na, mieiano tai bokario, bano mia m̃arodobi, naruei nalo ajekon niabene, ana amidu batitigio joa kunuano mave, ka atigio. <sup>38</sup> Mia bogo napano naiagagoano nalo na vio Jopa amijogial ka Pitere naio jo

ga vaataro ea komeli dolu yako Lida, nalo amiila tomu juo ka avan soḡeli kanio. Ana abano amiyotuba ka Pitere, abika m̃elea ga naio, aberinavo “Kumemi numisidomso toru ka komei soḡeli kean kumemi.”

<sup>39</sup> Jibe na naruei ana Pitere bar vio jumolu, ban bija naljuo ana nalo abano. Bogo na naio binimej boru, ana aburu naio bavin ea vodobi na jo mave napano amidu batitigio tira nei jo mon eaio. Mia taanou nalo abinimej aju jelviv ea ajumã ajigio ruei, a bogo na Pitere binimej, ajian kulusoto nalo a kulutiresi nalo napano tira neibano naio jomã jululo bogo napano meul jo kia ga bijalo. <sup>40</sup> Ana iorou kanio, na Pitere ber jidom ava tavio beamu vo, a iorou ka napano aba tavio, ana na naio minie ka sudu jaano ana bolkouo. Ana barlar parinio bitikar tira nei mokotenano, mil banio, berinavo “Tapita, jau ketevijo.” Mia vaarakurano ga tira nene bisiḡe mirano, mia bogo napano naio mial Pitere, naio barlar naio jumolu jotano jo. <sup>41</sup> Ana Pitere mijiou bokar jumano, ana burular naio jumolu, bio ba tavio ban namoneano nalo bija taanou nalo. Ana nalo abinimej joomo, ana naio ber kalo, berinavo “Nainei naruei, kenemiu tira nene, Atua mila naio meul bereio.”

<sup>42</sup> Mia iliano na burum̃ara vite neibano soḡeli ga jaburu janea komeli na vio Jopa, ana mila tomu telabo amonea kiado Tubo biorio. <sup>43</sup> Naruei Pitere naio jo jiou kija ea vio Jopa, nina ea toro tai, siano Saimon, napano naio be toro na m̃a mim̃auka vite ea kulukuti bue m̃arauo.

## 10

*Atua mil ban Kornelias*

<sup>1</sup> Mo be bulukomeli dolu tai jo koyou ea tanobuku nei, napano siano Sisiria, a be toro na toru tai na be na tukamuano na kulo na mira nalo na vio Romo, naio joa vio na, naio siano Kornelias. Ana naio jomã bitikar taara tai na mira

nalo, napano abokar toromomou takurano [100] na tomu nalo, a nalo abio kanano taara nei kanio “Taara Na Vio Italia.”<sup>2</sup> Mo toro na toru nei, naio be toro novo tai, a naio naliko kiano m̄aratavo nalo dam̄ariga nalo ajum̄a abolkouo ka Atua, a amilotu kanio, a bogo nonovio nalo ajum̄a amiija tomu na vio Israel nalo napano abe talim̄asa ga, ajum̄a ajian ijaiano toru banlo.<sup>3</sup> Mo ea legiano tai, titai jibe kanio m̄erenio tolu [3], monloglog bogo na volkouano na niogoravo, ana naio mial vite tai jibe kanio visiḗeiano, napano Atua jiloglog kanio. Vite napano naio mialio, meravo batitigio bo, a mial ka napano Atua kiano nailiano tai batove binimej joomo ea kunuano, naruei bio berinavo “!Kornelias!”

<sup>4</sup> Mia bogo napano Kornelias mial nailiano nei, naio merou bin naio, naruei naio jo bitikar nailiano nei jikili, ana berinavo “?Venia na?”

Ana nailiano nei berdoḗe, berinavo “Atua naio mijog kanamo volkouano nalo ruei, a maka tiniene ribobogia bajago novo nalo napano n̄a komila ban talim̄asa nalo, naio jaaro kanio a naio jo tinien maio kaso kia ga vo.<sup>5</sup> Mo naio ber kaso berinavo jau monokanio keila kanamo tomu tai avan ea bulukomeli na Jopa, ka avio toro tai napano siano vodolu be Saimon Pitere, ka naio rimei ea vio nei.<sup>6</sup> Toro nene naio joa toro dolu tai kanano vonuo, napano siano Saimon bunu, kunuano jo koyou vaataro ka tei, naio be toro napano miñauka vite ea kulukuti bue m̄arauo.”

<sup>7</sup> Naruei nailiano nei berial iliano nei bisi, ana javin bereio. Ana Kornelias naio bio kanano tomu naim̄auano juo, a bija kanano toro na mira napano naio bunu jom̄a milotu ka Atua, napano naio jo bija naio julaka, bitikar naio, ana nalo tolu nei abinimej eaio.<sup>8</sup> Ana naio berial vite nei banlo abe tolu, avona karina miilalo aban ea vio Jopa ka avuru Pitere rimei.

### *Atua jiloglog ka Pitere bunu ka visiḗeiano tai*

<sup>9</sup> Leri ka beni nene, bogo napano tomu nalo nei aju amiel abinimej Jopa kia ga vo, Pitere naio jo, naruei naio jidom rila volkouano na legiano viovare, mia jibe na bogo nonovio ana naio ban ea vio vodobi mave ea yimo napano naio joaio.<sup>10</sup> Naio joa vio na, naruei naio mijog ka jijerio, naruei naio berenio avurosebi. Mia bogo napano nalo ajum̄a amim̄auka sano sinaniano kia ga vo, naio mial visiḗeiano tai napano Atua jiloglog kanio jibe kanio monovovuano tai.<sup>11</sup> Ana mial vio mave betavo, ana naio mial titai jibe kanio panpano na toru tai, naio jo batove yetemeriba nei. Naio mial ka napano nalo aju abokar sudu nene nalo be ver, naruei nalo ajum̄a ajuvarvan batove.<sup>12</sup> Ana joomo ea panpano nei, Pitere mial ka be temeul kinkin dolu nalo ajuaio, bija bunu vite nalo napano Atua naio milalo abe lu ka kulo Israel nalo asenio re, jibe kanio m̄aro nalo, a niobi nalo, a menu nalo.<sup>13</sup> Ana naio mijog joono tai mil banio, berinavo “Pitere, jau kotumolu, koue vite nalo nei tai ana jau kesenio.”

<sup>14</sup> Mia Pitere naio berinavo “Peli ga Tubo, maka lele rijikia tibe na. Kiniou maka lele nesen vite nalo na jibe na napano maka rimemedu ka asenio, a ka napano kumemi kulo Ju nalo kumemi nubel kanio.”

<sup>15</sup> Ana naio mijog joono nei bereio naio berenio, berinavo “Vite napano kiniou Atua neber ruei neberinavo naio meravo, jau maka bunu kejikia kover naio miagiago.”<sup>16</sup> Ana vite nei naio maluvo jibe na valuo kanio, naruei iorou kanio ana varolu nene bereio, napano Pitere naio jo berbure kia ga vo, ana panpano na toru nei naio jo bavin bereio.

### *Pitere bokar nioti na kiano monovovuano nene*

<sup>17</sup> Ana Pitere naio mijog bova, naio jidom dede nioti na vite napano maluvo kanio, mia bogo napano

jomña jidom dedeio kia ga vo, Kornelias kiano tomu tolu napano naio miilalo abano, nalo abinimei aboru Jopa. Naruei nalo abika Saimon kunuano den tomu tai, ana ajiloglog yimo nene kalo, ana nalo abinimei ajikili ajua Saimon kunuano m̄aratavo. <sup>18</sup> Naruei nalo abio jouo, aberenio “?O, be toro tai siano Saimon napano siano tinene abio ka Pitere, naio jo kamlika ea yimo na, p̄eli na makanio?”

<sup>19</sup> Ana ea bogo nei Pitere naio jotano jomña jidomii kia ga vo vite neibano mialio, ana Niununo Lu mil banio ber ka, berinavo “?Jau komijogio? Tomu tolu nalo ajumña ajiragso, nalo nene na ajikili ajutavio, ajumña abioso kiana. <sup>20</sup> Mo jau kotumolu kavatove keialo, avona verenio nalo avaleaso ka mia kavan rivijalo, mia monoka jau kosidomii re ka mia kavan re kamlika, mia jau katakisorlo ga kavano, bior kiniou nemiilalo abiedu kaso.”

<sup>21</sup> Ana Pitere jumolu jabulu batove tavio, ana mial nalo tolu nei, ana mil banlo, berinavo “Ninei be kiniou napano kami kumisiragio. ?Kami kumidom kiniou ka titai kovio p̄eli na?”

<sup>22</sup> Ana nalo nei aberdope, aberinavo “Nao, kumemi nubinimei ea kenememi parinio navurim̄araboiano na mira, Kornelias, ana naio miila kumemi nubinimei kaso, kanio jau komei ea kunuano ka naio rijog kija kanamiliano nalo tai. Atua kiano nailiano tai mil banio ka naio rivioso ka komei tibe na. Kenememi toro na toru nei, naio maka ve toro Ju, mia naio be toro na memedu tai napano dam̄ariga naio jomña bokar batitig bogo na volkouano nalo nonovio na kenemiu, a kulo Israel bunu ea kenememi vio nei nalo tiniel jii naio toru laka. Naio miila kumemi nubinimei kaso, tenene na kumemi numitu nei.” <sup>23</sup> Mo bior m̄erenio batove ruei, ana Pitere naio burulo aba amon ea yimo napano naio joaio, ka mia aviniu aiel kia ga kavijova avatove.

### *Pitere ba miadu ka Kornelias*

Viomijeni kanio bereio, ana Pitere naio bano naliko, a naliko bunu namoneano dolu nalo na vio Jopa, nalo aban bunu naliko. <sup>24</sup> Nalo aba vio melijokolo m̄arabo togio, naruei nalo amon, mia viomijeni bereio, ana nalo abatove ea vio Sisiria. Ea vio na, Kornelias naio jo naliko kiano m̄aratavo nalo, a naio bio bunu kiano bilbilu nalo ka amei atu rorea Pitere nalo. <sup>25</sup> Telikiti napano Pitere binimei boru ea Kornelias kunuano, Kornelias binimei biviuo naio, mijoru ea jaano jibe ka naio milotu kanio. <sup>26</sup> Mia Pitere burular naio jumolu bereio, berkanio berinavo “Aiou, koig, jau kotumolu kotu memedu. Kejiio, kiniou nebe kulorinio ga.” <sup>27</sup> Mo, ana Kornelias jumolu, ana nalo ajikar ka ajukunu, naruei naljuo aba joomo ea yimo, napano ka bogo nei naruei Pitere mialio ka napano tomu nalo telabo aju rorea naio joomo.

<sup>28</sup> Mo Pitere naio mil banlo naruei, berinavo “Kami kumitumña kumijikia batitigio ka napano tivelinio na nalotvano na kumemi kulo Ju nalo, maka nuvijikia nuva joomo ea kulo dolu nalo kunualo napano maka ave kulo Ju, p̄eli na nuve bilbilu vu rivijalo. Mia vonganei, Atua naio jiloglog meravo bo ban kiniou ka maka rimemedu ka nevitiva ea tomu nalo tealo neverinavo nalo abova p̄eli na nalo amiagiago ga. <sup>29</sup> Bior vite na naruei napano Atua jiloglog ban kiniou, maka never bure nalo na ka bogo napano abinimei ka kiniou, ka mia neverenio re maka nejikia nemei, mia kiniou nebinimei ga. ?Ana nejidom ka kami kuverial van kiniou, kuverinavo kami kubio kiniou ka nemei ka venia?”

<sup>30</sup> Mo ana Kornelias naio berdope Pitere, naio berinavo “Nao, koig siva tanea. Vonganei, bogoti tolu barlaka ruei, monloglog bogo nene jibe nei naruei, ka m̄erenio tolu ka niogoravo, kiniou nojo joomo ea kunuaku ga, nojomña nemila volkouano na niogoravo. Nojomña

nobolkouo, ana nemiilo ka nailiano tai binimej jumolu ju kamu ea miraku, napano ñano kulumñarauo mieg bo laka. <sup>31</sup> Ana na naio mil ban kiniou, berinavo ‘Kornelias, Atua naio joña mijog kanamo volkouano nalo, a naio joña jidomial kanamo bajago novo nalo napano ña jau kojoma komila ban talimñasa nalo. <sup>32</sup> Mo jau monokanio kala tibe nei: monoka keiila tomu nalo tai ava Jopa ka toro tai, ka mia toro nene rimej rivijalo bereio. Toro nene siano vodolu be Saimon Pitere, a naio joa toro dolu tai kunuano napano naio bunu siano Saimon, napano kanano iñauano naio joña miñauka vite nalo telabo ea kulukuti bue ñarauo. Mia kanamo tomu nalo amijikia aleal kunuano nene jo koyou vaataro ka tei.’ <sup>33</sup> Nailiano nene naio mil ban kiniou jibe na, naruei soñeli ga nemiila tomu nalo na abiedu kaso, a kiniou neber siva toru banso ka kanamo bijukuvuiano napano jau kobinimej ka kumemi ea vio nei. Mo, kito robiniu rojua vio nei, kamu ka Atua mirano, ka mia kumemi nuvijog iliano napano Atua ber kaso, ka mia jau koveriio van kumemi.”

#### *Pitere mil ban Kornelias nalo*

<sup>34</sup> Pitere mijog iliano nalo nei, ana mil banlo, berinavo “Bo ga, ana mo kiniou neberenio siva toru laka napano kami kumidu bogo nei ban kiniou, ka kiniou nemijikia neil van kami. Nejaaro toru laka, bior vonganei nebitilubar ka be riano toru laka ka napano Atua naio maka rivitisa ea kulo dolu nalo. <sup>35</sup> Toro Israel, ñeli na toro napano maka rimoluo ea bajulukuti nei, ñeli na toro be bereio, mia avona naio tovon Atua, rila ga vite nalo napano Atua naio jidomio, mia Atua naio saaro ka naio.

<sup>36</sup> “Iliano napano Atua naio mila binimej ban kumemi kulo Israel nalo, kami kumijikia ruei, napano naio be ioluano novo tai napano berial berinavo toro mijikia rivokar tumñaro napano naio be riano ea

Yesu Kristo, napano naio be Tubo ka tomu nonovio na yetemeriba nei reraio. <sup>37</sup> Ana kami kumijikia sano natukunuano nene, napano beamu, ana Jone Baruei naio binimej mioliolu ka kanano varueiano nei, ana iorou ka nina, be burumñara vite na maluvo ka kito, jikar rove yako Kalele, bano-o bokar nonovio vio reraio napano Yutea. <sup>38</sup> Burumñara vite nene, nina Yesu na vio Nasarete na bija burumñara iñauano nalo napano naio joña milαιο, napano Atua midu kanano Niununo Lu banio, bujolou batitigio toru eaio, a naio midu kanano burumñara moroano toru banio, ana Yesu jo miel jeliviv ea vio nonovio, mila iñauano novo nalo a mila batitig bunu ga nalo napano Siñaro joña mila lelanlo laka. Yesu mila vite nalo na, bior napano Atua jo bija naio.

<sup>39</sup> “Mo vite nalo nei napano naio joña mila yako Yerusalemo, a ea tanobuku dolu bunu ga nalo ea kenememi buruvenuo kumemi kulo Ju nalo, kumemi atevi nalo numitumña nuberial vite nalo nei ban tomu nalo. Numitumña nuberial ka napano kenememi tomu na tortoru nalo ajukakar Yesu ea ñakolkolo, ana na naio ñaro, <sup>40-41</sup> ana ea legiano tolu nene, Atua burumeulia naio bereio. Ana Atua mila kumemi tealo numialio, napano kumemi numitu tano, numisinin a numunu uei bijaio. Mia Atua maka rijamo ka naio rimaluvo tibe na ka tomu nalo nonovio, mia naio maluvo ka ga kumemi nalo, napano Atua bitiri bulag kumemi jibe nei, ka mia nuverial van tomu dolu nalo ka Yesu naio meul bereio ruei. <sup>42</sup> Ana bogo napano Yesu jo bija kumemi jibe na, naio mil ban kumemi, berinavo kumemi monoka nuvisivisii kiano Ioluano Novo van tomu nonovio, a monoka nuvila rimeravo vatitigio vanlo ka Atua naio bitirilar naio takurano ka naio tibure tomu nalo, nina nalo napano añaro ruei, a nalo napano mia nalo ameul kia ga vo ea bogo na tibureano. <sup>43</sup> Ninei be Yesu nene kia ga napano nave-

rialiano nalo aberial naio nanua ruei, napano aberenio aberinavo mia Atua riviekokoa tomu nalo napano amonea siano kialo kariano nalo, nina nalo napano mia avie kouo ea naio.”

*Niununo Lu mijoru burelo*

<sup>44</sup> Bogo napano Pitere jo mil kia ga jibe navo, nalo amiilo ka napano Niununo Lu binimeï batove ba bokar nalo napano ajumã amiagago kanio.

<sup>45</sup> Ana namoneano dolu nalo napano ajuvan vio Jopa naliko Pitere abinimeï, nalo abe kulo Ju nalo, naruei nalo amiilo toru manenea ka vite nalo nei, bior napano binimeï bokar bogo nei, ana nalo aberiamã Niununo Lu naio be jidomiano tai napano Atua jian ga ban kulo Ju nalo ga. <sup>46</sup> Mia vonganei, nalo amial ka napano nalo napano maka ave kulo Ju, mia nalo amil ka iliano dolu nalo, ana ajumã amiaia Atua toru laka, ana na nalo amijikia ka naio jian Niununo Lu ban nalo napano maka ave kulo Ju nalo bunu.

<sup>47</sup> Ana na Pitere ber ka nalo napano naliko naio, berinavo “!Kamii kumialio na! Vonganei, nalo abokar Niununo Lu jibe ka ga napano kito rabakario jukamu. Jibe na, mia maka rejikia roverburelo bunu ka mia ravaruie re ealo.” <sup>48</sup> Bisi ana Pitere mil ban Kornelias nalo, berinavo ajev navaruieano ea Yesu siano, ana nalo abaruie.

Naruei nalo abalea Pitere jikili bunu ka naio to rivijalo ka bogoti tai bere vo.

**11**

*Pitere mila veriiano ban namoneano nalo na Yerusalemo*

<sup>1</sup> Ana maka vesiou, na liliano nei bano-o bokar atevi dolu nalo yako Yerusalemo, bija bunu namoneano dolu nalo ea tanobuku momou na vio Yutea, berinavo be tomu tealo napano maka ave kulo Ju napano nalo amonea Atua kiano Ioluanu Vou ruei. <sup>2</sup> Ana namoneano tealo na vio Yerusalemo ajidomii kirisikili aberinavo namoneano dolu nalo napano maka

ave kulo Ju, nalo bunu monoka ave pakuveuio ka mia atibe ka kulo Ju, mia bogo napano Pitere naio bavin ea vio Yerusalemo, nalo aber niegeniege naio bova laka. <sup>3</sup> Nalo amil banio, aberinavo “?Jumãbe ana jau kaba kojo kamliko tomu kurano nalo napano maka ave pakuveulo, a kojomã kojinan kamlikolo bunu?”

<sup>4</sup> Naruei Pitere naio mil banlo, jikar ea sano burupati nene naio ber bisivisii batitigio vite nonovio banlo, jukunu banlo jibe nei, berinavo

<sup>5</sup> “Nanua beamu kiniou nojo Jopa, bogo tai nojomã nobolkouo. Nojo ñã nobolkouo bano ñã nojobobogu garuei, ana nomial titai jibe ka burumãara panpano tai, napano naio jumolu den vio mave binimeï yetano, napano ajumã abokakar sudu ver nene nalo, nalo ajumã ajuvarvan binimeï yetemeriba, binimeï yetano vaataro kean kiniou.

<sup>6</sup> Nobitii batitigio joomo ea panpano nei, naruei nomial temeul nalo na vonuo, naliko temeul nalo na yeturu, bija ñãro nalo a niobi nalo, bija menu nalo, aju joomo eaio.

<sup>7</sup> Kiniou nojomã nobitikario, ana nomijog jooon tai mil ban kiniou, naio berinavo ‘Pitere, jau kotumolu, koue vite nalo na tai, ana mo kesenio.’

<sup>8</sup> Ana kiniou neberinavo ‘! Ee, Tubo! !Peli ga, maka rijikia tibe na! Vite nalo na jibe kanio maka rimemedu ka asenio, a kumemi kulo Ju nalo nubel kalo, kiniou nojomã nebel batitigio kalo julaka ga.’

<sup>9</sup> Ana na kiniou nomijog jooon na vio mave mil bereio ban kiniou, berinavo ‘Vite napano kiniou Atua neberenio ruei ka naio meravo, mia jau maka bunu kejikia kover naio miagiago bereio.’ <sup>10</sup> Nomijog iliano na miyotuba jibe na varolu avona bisi, ana panpano nene bija saba nene nalo napano ajuaio, aburio bavin mave bereio.

<sup>11</sup> “Naruei monloglog ka bogo na, ana tomu tolu tai abinimeï aboru ea yimo napano kumemi numituaio, napano toro na vio Sisiria tai naio

miilalo abinimej ka avuru kiniou napano bereio kumemlikolo. <sup>12</sup> Naruei Niununo Lu naio mil ban kiniou, berinavo 'Jau maka kejikia kovere- nio maka kasaaro ka kava kamliko nalo tolu na,' mia kiniou naban ga, a kuruado dolu nalo ari nei na vio Jopa, nalo bunu abinimej kumemi- likolo. Kumemi nubano-o nuboru Sisiria, ana na nalo aburu kumemi nuban ea toro neibano Kornelias kunuano.

<sup>13</sup> "Naruei nuba joomo, ana naio jomġa jukunu ban kumemi, jomġa berii jumġabe napano naio mial nail- iano tai maluvo ka naio, jumolu ju kamu ea mirano joomo ea kunuano nei, ana na nailiano nene mil banio, berinavo 'Jau keiila toru riva Jopa, ka toro napano Saimon Pitere, naio monoka rimej rialso. <sup>14</sup> Toro na mia naio rimej riverial lilianiano tai van kamiu napano mia iliano nene naio mijikia rilururso rivija kanamo mġaratavo nalo.'

<sup>15</sup> "Mia bogo napano Kornelias naio mil bisi, ana na kiniou kija nemil banlo, mia monloglog bogo napano nojomġa nejikar ka nemil kia ga, ana Niununo Lu batove ealo javukia ga napano jomġa batove ea kito be moti nanua ruei. <sup>16</sup> Kiniou nemial vite nei, ana tinieku maio ka bereio kanado Tubo kanano iliano, napano berii nanua, berinavo 'Jone baruei ea kamiu ka uei, mia bogo vesiou re, ana mia kamiu kuvokar varueiano napano ea Niununo Lu.'

<sup>17</sup> Mo kito kulo Ju nalo, napano kito romonea kiado Tubo Yesu Kristo ruei, Atua jian kiano Niununo ban kito, jibe ka ijaiano tai, mia bogo napano nemial napano Atua jian ija- iano nene kia ga banlo napano maka ave kulo Ju, ana vite na mila kir- imeravo batitigio ea kiniou ka von- ganei, maka lele rimemedu ka mia neverenio tomu nalo nei nalo maka ajikia amei jouro kitoliko. !Kiniou nebe kenja, ka neielkue kanio Atua tibe na, verenio naio sidom ka rila tibe na vanlo!"

<sup>18</sup> Naruei ea bogo napano nalo nei

na Yerusalemo neibano nalo ami- jog Pitere kanano iliano, nalo maka bunu ajikia averenio titai vanio, mia nalo ajaaro ga toru, a nalo abame- nea Atua toru laka, aberinavo " !Riano ga na o-o! Vonganei ga kito robitilubar vatitigio ka Atua naio jaaro mġele ban nalo napano maka ave kulo Ju bunu, ana na naio midu buluvio banlo bunu ka mia nalo amijikia aviliglo, a ka nalo amijikia avokar meuliano riano ea naio."

*Taara na namoneano nalo na vio Antioko*

<sup>19</sup> Ana nanua, bogo napano Sol nalo amuebin Stevin naio mġaro ruei, Sol nalo nei amila lelan liki namoneano dolu nalo ea vio Yerusalemo bunu, naruei namoneano nei nalo telabo aburo dedade janea vio abeve terakurano. Nalo tealu aburo vio tebievi laka aba abokar tanobuku na vio Vonisia, tealu aburovuro lilian kalo aba abokar uleule na vio Saipras, a tealu aban lie vo aban ea burumġara bulukomeli labo tai, napano siano Antioko. A bogo napano nalo ajua vio nalo na, nalo ajumġa aberial Ioluano Vou nei, mia nalo ajumġa aberbisivisiio ban ga nalo napano abe kulo Ju javukialo.

<sup>20</sup> Mia karina, ea vio Antioko nei be namoneano dolu nalo napano ajaluvo ea tanobuku na Saireni a uleule na Saipras, nalo abinimej bunu, amioliolu, mia nalo ajumġa aber lualua Ioluano Vou na Tubo Yesu ban nalo na vio Antioko napano maka ave kulo Ju. <sup>21</sup> Naruei Atua kanano moroano jo binimej toru ea nalo na, a tiniobi toru amijog kanalo iliano nalo, ana na nalo amonea Yesu, nalo abiliglo abinimej ea naio.

<sup>22</sup> Ana na lilianiano na vite nei binimej bokar taara na namoneano nalo tilinielo ea vio Yerusalemo, berinavo Atua kiano iliano bano-o bokar nalo na maka ave kulo Ju ruei, mila ana nalo amiila Barnabas ban ea vio Antioko ka naio rial vonio vite nei vo. <sup>23</sup> Bogo napano Barnabas naio boru ea vio na, naio

mial vite nei be riano laka, napano Atua milivu toru ka tomu nalo nei kialo meuliano nalo, ana na mila naio jaaro toru laka kanio, naruei naio jusol iliano banlo ka avokar Tubo sikili, vija kialo iviso vodolu nalo, ea bogo na bo a ea bogo na bova. <sup>24</sup> Barnabas naio mila jibe na bior naio be toro novo laka, napano Niununo Lu bujolou eaio, a naio biekouo ea Atua, mo jibe na, ana tomu telabo abinimei ea Atua ka bogo na.

<sup>25</sup> Mia Barnabas naio mial ka be iñauano toru ea vio Antioko, naruei mial bo ka rila vonio ka rivan ea bulukomeli na vio Tarsis, ka rileal Sol, ka rivuru naio rimei ka rijai iñauano. <sup>26</sup> Bogo napano naio milealio, ana burio abinimei bereio aba Antioko. Abe juo amijai namoneano nalo ea vio na, aberloglog tiniobi toru, amimiau jibe na bano-o bokar yuka vodolu. Ea bulukomeli labo nei Antioko, kulo dolu nalo amilikotkotu kija ka naiagagoano nalo, abiolo ka “Kristo tomu nalo” ðeli na “Kristin nalo” a nina naruei nalo aberenio sio nei be moti.

<sup>27-30</sup> Naruei ka bogo na, namoneano tealo napano abe naverialiano, ajumolu ea vio Yerusalemo abinimei aboru Antioko, ana na nalo nene tai, siano Akabas, naio jumolu, mil ea moroano na Niununo Lu, berinavo “Mia bogo vesiou re, ana na mia vituiano tai ve toru rivokar tomu nalo nonovio ea venuo reraio na kanado tanobuku.”

Naruei bogo napano naiagagoano nalo na vio Antioko nalo amijog iliano nei, nalo aberii bisi, ana aberinavo mia aviniu monoka asuvan puruveru na vabe napano toro ve takurano naio mijikia suvanio, ka atuvan riva van kurualo nalo napano ajua tanobuku na vio Yutea, ka rijailo ka nalo atu rorea batitigio ka bogokouo nene. Naruei nalo ajuvan puruveru nei, ana amijev ijaiano nei monea Barnabas naio Sol jumalo, ka mia naljuo nei avar riva van

navurimãaraboiano na namoneano nalo na vio Yerusalemo.

A naverialiano nei kiano iliano be riano, bior napano iorou kanio, be bogokouo tai bokar vio nalo nei javukia ga napano naio berialio, ana nina ea bogo napano Klotias naio jomãa be parinio tubo ka vio Romo.

## 12

*Tomu na tortoru nalo amue kulo namoneano nalo, amila bulaglo toru laka*

<sup>1</sup> Ea bogo nei, napano naljuo abar ijaiano nene binimei yako Yerusalemo, Parinio Tubo Erot jo mue searo ea taara na namoneano nalo tealo. <sup>2</sup> Kanano tomu na mira nalo tealo aba abokar Jone kuruanonei, Yemesi, ana amuebinio ka kanalo iobogu na mira nalo.

<sup>3</sup> Ana kulo kouo nalo na kulo Ju nalo kanalo, nalo ajaaro toru ka vite nei, ana mila Parinio Tubo Erot naio mila bajago nei ba lie vo jibe na, ana naio berkanio kanano tomu nalo nei ka ava avokar bunu ga Pitere. Naio mila nina monloglog bogo na jokoluolu na kulo Ju nalo kanalo, napano nalo amila Jokoluolu Na Sidomkariano na Ioruriano, a bija bunu ga Jokoluolu Na Sinaniano Na Taba. <sup>4</sup> Erot jo jidomii berinavo verenio bogo na jokoluolu nei rivarlaka bisi, ana mia naio rivuru Pitere riva tumolu tukamu ea tomu nalo miralo, ka nalo ail vanio, a ka nalo averenio naio monoka rimãaro.

Jibe na naruei, tomu nalo nei aba abokar Pitere, ana abuku naio ban ea yimo na tetavokoiano, a nalo amidu bagaro na mira nalo veri ka asirarag kuku vatitig kanio, napano bagaro nalo nei kanalo tomu nene nalo abeve veri ealo. <sup>5</sup> Ana bogo napano Pitere jua yimo na tetavokoiano jibe na, namoneano nalo aju abolkouo jikili ka naio julaka ga ban Atua.

*Nailiano binimei burular Pitere den yimo na tetavokoiano*

<sup>6</sup> Pitere joa yimo na tetavokoiano bano-o, bokar bogiano napano Erot jo jidomii berinavo ea kavijo nene, mia rivuru Pitere riva tumolu tukamu ea tomu nalo miralo ka atibure. Ea bogiano nene, Pitere naio jo monmelio, nina iviso ka tomu na mira naljuo, napano amiadikar Pitere ban ea naljuo nei bija marimieni juo. A be tomu dolu juo na mira bunu napano naljuo aju abitikar m̄aratavo nalo na yimo na tetavokoiano nene. <sup>7</sup> Mia kolvare ga, Atua kiano nailiano tai naio jumolu ju joomo ea vio nei, ana burum̄ara miamoiano na toru laka ea vio nene. Ana nailiano nei ba mikulkulu ka burusovonano Pitere, ka biobonio, ana berinavo “!Jau kalasoṽeli, kotumolu!” Ana marimieni juo nei ajaraluvo ga jibe na den Pitere jum̄ano kolvare ga, ajibirbil batove juai borotano. <sup>8</sup> Ana na nailiano nei berinavo “Kovitirakar vatitigio kanamo kulubue na serikar mabomo, keya kanamo kulubue na jaamo a m̄amo kulusoto, ana kito ve juo ravano.” Ana Pitere mila jibe na, <sup>9</sup> ana jakisor nailiano nei naljuo abano. Ea bogo nei, Pitere maka rijikia ka vite nei naio be riano kovio, ṽeli na jum̄abe, bior naio jidom berinavo ṽeli naio monvovu kia ga vo. <sup>10</sup> Ana naljuo aju abano, ajodovulu m̄aratavo na be moti napano toro na mira juaio, aba ajovulu bunu ga m̄aratavo juo napano toro na mira juaio, naruei naljuo abinimei abokar burum̄ara m̄aratavo na maariano napano be m̄arabo na aba tavio den yimo na lakoiano. Burum̄ara m̄aratavo nene amin̄aukanio be butoto, ana bogo na abe juo abinimei vaatara kanio, naio ga betavo kanio, ana abe juo aba tavio. Ana na abe juo amiel kija ga telisu ea m̄arabo aban jibe na, ana Pitere miilo ka nailiano nei jaluvo den naio kolvare ga, ana Pitere naio ga takurano ju.

<sup>11</sup> Ana ea bogo nei ga, Pitere bitilubar ka vaio napano nailiano nei mila banio, ana berinavo “!

Tomnei! !Riano laka nei! Nemijikia naruei ka napano Atua miila kanano nailiano nei binimei ka rivinalar kiniou den Erot jum̄ano, a ka rivular kiniou den vite na bova nalo napano kulo Israel nalo aju ajidomio kia ga ka aber mia ala van kiniou.” <sup>12</sup> Pitere bitilubar vatitig vite nei naruei, ana naio ban memedu ga ea Jone Mak kenieno kunuano, siano Mere. Ea yimo nei naruei, nalo telabo napano ajua vio na ruei ka mia abolkouo rivior naio.

<sup>13</sup> Ana Pitere boru ea yimo nei, minia m̄aratavo nene, ana niatira sesa na vio nei tai, siano Rota, naio binimei ka rivetavo. <sup>14</sup> Naio maka rivetavo vatitig ka m̄aratavo nene vo, mia mijog lubar Pitere joono ka mil banio, ana jaaro mia jaaro, juvan m̄aratavo nene jo, ana jikiti ba berial banlo, berinavo “!Pitere nene nei! !Pitere nene nei naio jumolu ju tavio ea kiado bulum̄aratavo ruei!”

<sup>15</sup> Ana nalo aber kanio, aberinavo “!Jau keil vovu re tibe na!”

Ana naio ber batitigio bereio banlo, berinavo “!Maka leleio, kiniou maka nalasibi nei, neber riano nei!”

Ana nalo aber kanio bereio, aberinavo “!Makanio! Ver tibe na, ṽeli sano sim̄aro nene ga na koviobo?”

<sup>16</sup> Nalo ajun̄a amil kia ga jibe, ana Pitere naio ju kia tavio, naio ju minia dolu ka ga m̄aratavo bano-o, ana nalo aba abetavo kanio. Bogo napano abetavo, ana nalo abitilubar ka be Pitere, mia nalo amiilo toru laka. <sup>17</sup> Ana Pitere jisiu benavena ga banlo, juvan jum̄ano berinavo aturm̄aro ga, ana naio jukunu banlo ka jum̄abe napano Atua burular naio den yimo na tetavokoiano. Ana naio ber kalo berinavo “Bo ka kamiu kuva kuverial vite nei van Yemesi vonganei, a vija bunu ga kuruado dolu nalo na.” Ana iorou kanio, ana Pitere jaluvo bereio, ba joluku ea vio dolu tai.

<sup>18</sup> Mia kavijo, ana tomu na mira nalo amemebiju toru ka napano Pitere maka bunu toa marimieni nalo nei leleio, ana nalo amerou,

maka bunu ajikia mia ala tum̃abe naruei, nalo ajuña abivika denlo, aberinavo “? Ana toro nei buro jum̃abe nei a naio ba jo be na?”

<sup>19</sup> Ana iliano nei ba bokar Parinio Tubo Erot berinavo Pitere ba kovio ruei, ana Erot miila kanano tomu nalo aba ajiragio bano-o, mia nalo maka ajikia alealio. Ana Erot mil ban kiano tomu nalo napano nalo aju kuku ka Pitere, ana nalo nene maka ajikia averenio vite tai vanio, ana Erot berinavo avuku bulag nalo nene ana auebinvinlo añarñaro.

Mia iorou kanio, ana Erot juvan vio nei Yutea bereio, batove ba jua burum̃ara bulukomeli na toru napano Sisiria.

### *Tukunuano na m̃ariano na Parinio Tubo Erot kiano*

<sup>20</sup> Ana ea bogo nei napano Erot naio jom̃a mijil namoneano nalo kia ga vo, naio jom̃a mila baravo toru bunu bija tomu na burum̃ara bulukomeli juo nei Taia a bija Saiton, ban bano-o mia mila tomu na komeli juo nei amerou toru laka, aberenio aberinavo verenio baraviano nei rimej rivova mia rimej sikili kalo. Nalo na ajidom jibe na bior napano nalo aju ameul ga ea sinaniano nalo napano nalo abar ga ea Erot nene kiano borotano tai. Ana nalo amiila kanalo kulo kouo tealo ka amei ala merevu naliko Erot. Ana nalo nei abano abe bilbilu batitigio bo naliko toro kouo tai na Erot kiano, napano siano Plastas, ka naio mijikia rijailo a rila kialo m̃arabo ka amijikia ail rivija Erot ka atu rivu bereio ea tum̃aro rivija naio. <sup>21</sup> Ana Erot berial legiano tai berinavo nalo amijikia amei aial naio eaio, ana ea legiano nene nalo abinimej. Ea bogo nei, Erot miya m̃ano burum̃ara kulusoto novo nalo, jibe kanio napano naio be burum̃ara parinio tubo, a jotano ea kiano burum̃ara jobaro, ana jom̃a jian kiano iliano tai banlo.

<sup>22</sup> Ana nalo nei amijog kiano iliano nene, ana ajidom ajubolbolili naio p̃eli na tum̃abe, ana nalo abio jouo, aberinavo “!Uerei, ninei maka ve

toro na mil nei, p̃eli nina be Atua ga na, a!”

<sup>23</sup> Ana Erot mijog iliano nei, mia jaaro kanio, a barvar ka naio bunu ga ka napano nalo aberinavo naio be Atua, ana memedu ka bogo nei, nailiano na Atua kiano tai binimej mue naio, bior napano naio maka riverburelo ka aiaia ga Atua, mia aiaia re toro. Mia maka lele vesiou, ana ilo va nalo abujolou eaio, ana ajer kokorovio tiniene ana naio m̃aro.

<sup>24</sup> Ana ea bogo nei, bekurano ka napano tomu nalo na ajibe ka Erot nei nalo aju amila vonio ka m̃a auedom iñauano na Atua kiano, mia Atua kiano iliano naio jo jaburu miadu ban ea vio nonovio, a jo bar m̃arati telabo.

<sup>25</sup> Ana Barnabas naio Sol, abe juo amidu ijaiano napano namoneano nalo na vio yako Antioko nalo abuku ruei, abar ban navurim̃araboiano nalo na namoneano nalo na yako Yerusalemo, bisi ana abe juo abatove, aban bereio yako Antioko, ana ea bogo nene, aburu Jone Mak jakisorlo.

## 13

### *Amioako Barnabas naljuo Sol*

<sup>1</sup> Ea taara na namoneano nalo yako Antioko neibano, ana tomu tai nalo aju napano abe naverialiano nalo, a tealo napano abe naverloglogiano nalo. Nalo nei tai kalo kanalo sio jibe: Barnabas, a Simion Kuluniabene Bobogio, a Lusias na vio Saireni, a Manaen nei nanua m̃aratavo na Parinio Tubo Erot nalo amidular naio bogoti napano naljuo Erot abe kiritete kia ga vo, a naliko nalo na, Sol bunu. <sup>2</sup> Ana bogoti tai, ana nalo nene naliko namoneano dolu nalo amondulu, ana aju amilotu ka Atua, ana Niununo Lu mil banlo, ber kalo berinavo “Kamiu kuvurular Barnabas naio Sol den kamiu vonganai, kuvitiri bulaglo ave juo ka ala iñauano tai napano kiniou nejidom ka alaio.”

<sup>3</sup> Ana iorou, amondulu bogo tai bereio ka abolkouo, ana nalo abokar Barnabas naio Sol pariparilo, ana amioakolo abe juo, bisi ana amiila bulaglo abano ka ala Atua kiano iñauano.

*Barnabas naljuo Sol aboru yako Saipras*

<sup>4</sup> Ana jibe ka napano Niununo Lu miila bulag Barnabas naljuo Sol jibe na, abe juo ajuvan vio Antioko, ana abatove ea m̃arkomeli nei Selusia napano jotano koyou, ana nalo ajel ea uauako tai, aba aboru ea uleule na Saipras. <sup>5</sup> Ea uleule nei, abe juo abauro ea burum̃ara bulukomeli na Salamis, ana naljuo aban ea yimo na volkouano nalo na kulo Ju nalo kialo, ana ajum̃a aberial Atua kiano iliano. Ana ea bogo na, Jone Mak bijurukarlo kia ga vo, ana naio jom̃a mijailo ka iñauano.

<sup>6</sup> Ana nalo tolu nei amiel ea uleule nei, abatove abokar togio dolu nene, ea bulukomeli dolu na toru nei Pavos. Ana ea vio na, amial toro tai napano mijikia mila m̃esi ka tomu nalo jo, napano naio be toro Ju tai, siano Baryesu, a abio bunu naio jel ea iliano na kulo Kris nalo kialo, aber Elimas. Toro nei naio jom̃a mila sibi janea vio, naio jom̃a berenio naio be Atua kiano nave-rialiano tai. <sup>7</sup> Ana toro napano m̃a mila m̃esi nei, naio be toro na toru tai bunu ea iñauano na parinio tubo na uleule na, napano Sejes Poloso. Ana parinio tubo nei, naio be toro tai napano mijikia batitigio vite bo, ana bio Barnabas naljuo Sol ber amei aialio, bior napano naio jidom ka rijog Atua kiano iliano tai denlo. <sup>8</sup> Ana bogo napano naljuo abinimei, ana toro na mijikia mila m̃esi nei naio milidielo, milavio ka riverbure naljuo nei a jidom ka parinio tubo nei naio rudu re bunu moneano ea Yesu. <sup>9</sup> Naruei Sol, napano ajum̃a aber bunu siano aber Pol, naio binimei bujolou ka Niununo Lu, ana tiniamirano bitikar jikili ban ka toro nam̃a mila m̃esi nei, <sup>10</sup> ana berkanio, berinavo “!

Jau kobe Sim̃aro kenerinio memedu! Vite nonovio napano bo, mia jau maka kosidom leleio, ana jau kobujo ka sibiano a bajago va nalo ga. Atua kiano iliano nalo, jau kojom̃a kobilivilig lelario julaka ka rimei rive sibiano bereio. <sup>11</sup> Vonganei ga mia keial Atua jum̃ano rivokarso rimemedu. Vonganei ga mia jau miramo ribono, mia jau kojikia re keial legiano vesiou kija.”

Ana kolvare ga ana toro na mijikia mila m̃esi nei naio mial jibe ka napano iou tai na yeturu napano kiri bobogio laka binimei juko mirano, ana naio jo miel vovu ga jibe na ka jidom rileal toro tai ka rivokar jum̃ano ka rivurio rivano. <sup>12</sup> Ana bogoti napano parinio tubo naio mial vite nalo nei, ana naio monea Atua kiano iliano, ana bogo napano Barnabas naio Pol aberloglog naio ka iliano lu nalo nei, ana naio miilo kanio, mialio bo mia bo.

*Pol naljuo Barnabas abano Antioko dolu tai, ea tanobuku na vio Pesitia*

<sup>13</sup> Ana Pol nalo ajuvan vio Pavos, ana ajel ea uako abatove naruei abauro ea tanobuku nei Pamvilia, ana nalo amiel abano-o abokar bulukomeli nei Peka. Ana ea vio na, ana Jone Mak juvanlo, maka bunu takisorlo, mia naio ban bereio Yerusalemo.

<sup>14</sup> Ana Pol naljuo Barnabas, ajuvan vio Peka, ana amiel naruei aba aboru ea tanobuku na vio Pesitia, aba abokar bulukomeli tai napano siano Antioko bunu. Ajua vio na, ana ea Legiano Lu, ana aba joomo ea yimo na volkouano na kulo Ju nalo kialo, ana ajutano naliko tomu nalo. <sup>15</sup> Ana navurim̃araboiano nalo amila lotuano, ba bokar napano abuluku Iliano Lu, ana nalo abuluku vivitauiano tai ea Mosis kiano tuboiano, a tai ea niosi na naverialiano nalo. Ana bogo napano vulukuiano nalo nei bisi, ana kulo navurim̃araboiano nalo abika den Pol naljuo Barnabas, aberinavo “Banal, verenio kamjuo kumije iliano

tai napano mijikia rijai tomu nalo kialo meuliano, ana mo kumemi numisidom kamjuo kuverialio van kumemi.”

<sup>16</sup> Ana na Pol jumolu, ana buku jumano, ber amelumu ka aje tilin-ielo ka naio ana mil banlo, berinavo “Mia bo, ana kiniou nejidom ka kamiu kulo Ju nalo, naliko kulo dolu nalo napano kamiu bunu kumonea kenememi Atua, kamiu nonovio kuvije tiliniemiu rivu ka kiaku iliano nei. <sup>17</sup> Kiado Atua nei, naio naruei napano bitiri bulag kiado kulo moruo nalo na beamu, a naio naruei napano mila nalo abinimei miroano laka ea bogo napano aminau kurano yako Ijivi, a naio ga bereio napano buru bulaglo den bogokouo nei, ea kiano burumara moroano nei. <sup>18</sup> Ana naio burumarabo kalo aba tavio aban ea vio yauo, ana amiel ea vio na bano boka yuka duelimo va veri [400], ana va telabo ka bogo na nalo ajuma abilig taakalo ka Atua, mia naio maka lele tuvanlo. <sup>19</sup> Naruei ka bogo napano abinimei abokar buruvenuo nei Kenano, napano Atua berkar ka mia rudu vanlo, ana naio jitig bulag bajulukuti aluo na kulo dolu nalo napano abinimei ajua vio nei ruei, karina midu borotano nene ban korobido nalo, abe boru kanio, ana aba ajua bokanio. <sup>20</sup> Jikario ea bogo napano abano be moti garuei Ijivi, binimei bokar bogo napano abano bereio jouro ea kanalo buruvenuo bereio, bokar titai jibe ka yuka duelimo toromomou veri duelimo va limo [450].

“Ana ea bogo napano ajua kanalo borotano jibe na, ana Atua bitiri bulag kanalo tubo nalo, ka avurimarabo kalo ka ma atiburelo, ana tubo nalo nei aminau ma jibe na ba bokar nalo toro na maariano nei Naverialiano Samuel. <sup>21</sup> Ana nalo aberinavo maka bunu asidom tubo nalo na jibe na, mia aber ka Samuel aberinavo naio rileal toro tai napano mijikia ve kanalo parinio

tubo na toru. Ana Atua jiloglog Sol, Kis kenerinio, banlo, napano naio be bajulukuti na Beniamen kiano, ana Sol binimei be kanalo parinio tubo na toru na be moti garuei, ana naio be tubo kalo bokar yuka duelimo va veri [40]. <sup>22</sup> Karina, na Atua burular Sol bereio, ana bitirilar Teviti midu jeleigio, ana Atua jaaro toru ka Teviti, naio jo berii berinavo ‘Ea Teviti nei, Jese kenerinio, mia kiniou nemial ka nabokar toro tai napano kiano bajago jakii kiaku jidomiano memedu, ana nemijikia ka mia naio rimau tibe ka ga napano nejidomio.’ <sup>23</sup> Ana Atua naio berkar ban korobido nalo re nua nua nalo ruei, berinavo mia naio rudu toro tai ea tormoruo Teviti nei kanano bajulukuti, rudu naio van kito kulo Ju nalo, tibe kiado Ioruriano, ana vite nei Atua milaio ea toro nei Yesu ruei.

<sup>24</sup> “Beamu, bogo napano maka Yesu nei rimei vo, ana Jone Baruei jo mioliolu ban kito, berinavo ‘Kamiu monoka kuvilig kamiu, ana monoka kuan ea varueiano.’ <sup>25</sup> Ana bogo na Jone vaataro ga ka rila nonovio imauano nalo napano Atua midu banio, ana naio joma bika den tomu nalo, berinavo ‘?Kamiu kumisidomii kuberia ma kiniou nebe Naverikariano? Kiniou neber ka kamiu, kiniou maka leleio neve toro napano kamiu kumitu rorea naio nei, makanio. Mia na iorou ka kiniou, naio jo binimei kia ga nei, naio bo mia bo, a naio be lu laka, ana nemial jibe maka neve verare ka neve kiano toro na imauano, maka navare ka nava vaataro ka mia neivelar kiano kulubue na jaano.’”

*Pol ber napano tomu na tortoru na kulo Ju nalo, nalo naruei amuebin Yesu*

<sup>26</sup> Ana Pol ber kalo, berinavo “Kuru-aku nalo, kamiu tealo napano abe kulo Ju nalo memedu, napano kumaluvo ea bajulukuti na Epraamo kanano, a kamiu tealo abe kulo dolu nalo, ana kumonea kenememi

Atua kumemi kulo Ju nalo, kiniou nejidom ka kamiu nonovio monoka kuvitilubar ka kito nei naruei, napano Atua jian iliano na ioruriano ban kito ruei, mila ana kiniou nojomġa neberial ban kamiu nei. <sup>27</sup> Nalo na vio Yerusalemo naliko kanalo tomu na tortoru nalo, nalo maka lele avitilubar Yesu ea bogo napano naio binimej, a maka avitilubar ka naio be Ioruriano napano naverialiano nalo aberiio ea Iliano Lu nalo napano abuluku julaka ea Legiano Lu nalo. Tibe na, nalo maka avitilubario, mia amila ka naverialiano nalo kialo iliano telaboamei ave riano, bior nalo naruei ajibure kanalo Naverikariano nene nei aber naio monokanio riġaro. <sup>28</sup> Maka ajikia aleal titai napano rimemedu ka mia naio riġaro riviorio, mia ajikili ka Pailat ka naio monoka rijamo ka riverenio nalo amijikia auebinio. <sup>29</sup> Ana amila kikio jakii ga vaio napano naverialiano nalo aberialio bogbe nua ruei, napano aberenio mia tomu nalo ala van naio, rivano-o mia auebinio ea mġakolkolo, ana iorou kanio amidu tati nene, aba amidu joa buluvai. <sup>30</sup> Ana Atua mila naio meul bereio den naġariano, <sup>31</sup> ana ea bogoti tealu telabo kija, ana na naio jomġa mioyoyotuba ka kanano tomu nalo napano beamu naliko naio yako Kalele, a napano ajakisorio abinimej mave Yerusalemo. Ana nalo napano mġa amial Yesu jibe na ruei, mia nalo nene naruei ajumġa aberveriio ban tomu nalo aberenio naio meul bereio den naġariano ruei.

<sup>32</sup> “Mia vonganei, ea vio nei, kumemi juo nubinimej ea kamiu ka nuvar Lilianiano Novo nei rimej van kamiu. Kumemi juo nuberial ban kamiu, nuber vite novo nalo napano Atua berkario ban korobido nalo re beamu, berenio mia rila van kiano tomu nalo, <sup>33</sup> ana vonganei vite nalo nene abinimej abe riano ea kito ruei, kito kumġabilo nalo, a ea kito kulo dolu napano kito romonea

naio. Ana kito robokar vite novo nei ea kiado bogo ga, napano Atua miila Yesu binimej yetano ea yetemeriba nei, a mila naio meul bereio den naġariano kar kito.

“Ea Iliano Lu, Iouano mirano juo naio berii vite nei, napano ber *‘Kiaku tete, nemial jibe ka banej kobinimej kobe keneriku, ana kiniou nebinimej nebe karamġamo riano.’ Iouano 2:7*

<sup>34</sup> Ana ea tivelinio napano Atua mila Yesu meul bereio den naġariano, napano naio maka rijikia rivan bereio ea mġartanbo, ea tivelinio nei iliano juo na Iliano Lu aberenio ruei. Ea iliano na be moti ana Atua berii jibe nei, berinavo

*‘Ilivuiano lu nalo nei napano kiniou neberkario nua ban Teviti beamu ruei, nalo aju ajikili kia ga vo, ana vonganei mia kiniou neje van kamiu naruei.’ Ais 55:3*

<sup>35</sup> Ana iliano tinene na tivelinio nei, naio joa Iouano tai bereio, napano toro napano jirio, naio mil ban Atua, berinavo

*‘Mia jau kojikia re kajamo ka kiamo toro lu rial naġariano, pġeli na mokotenano rimenuu bogo tai.’ Iouano 16:10*

<sup>36</sup> “Ana iliano nalo nei maka atumġa averii tormoruo Teviti nanua beamu, bior karina napano naio mila Atua kiano inġauano ban kiano tomu nalo, ban bano-o mia naio mġaro garuei, ana ajivin jo bija korobinjo nalo, ana mokotenano mon ea vio na bano-o mia menuu.

<sup>37</sup> Ana iliano nalo nei aberii Yesu nei ga, aberii napano mokotenano maka riva rivova tibe na, mia Atua bitirilar naio meul bereio.”

*Pol berii viekokoano naio joa ga Yesu*

<sup>38</sup> Ana Pol naio berinavo “Kuruaku nalo, ver tibe na, kiniou nejidom ka kamiu monoka kuvijikia vatitigio vite nei, ka ea ga Yesu nene ga, ana Atua jo mila ban kitojuo berii naio biekokoa kiado vovaiano nalo bunu

**13:28** Mat 27:22,23; Mak 15:13,14; Luk 23:21-23; Jon 19:15      **13:29** Mat 27:57-61; Mak 15:42-47; Luk 23:50-56; Jon 19:38-42      **13:31** Inġauo 1:3

ruei. <sup>39</sup> Mosis kiano tuboiano maka lele rijikia rivurular kitojuo den kiado bajago na vovaiano, mia jau kei, napano verenio komonmonea Yesu sikili, ana mia naio rijelar kiamo bajago na kariano denso. <sup>40</sup> Tibe na, monoka kuvitkar vatitig kamiu rivu, bior ver makanio, mia kuvitibe ka napano naverialiano nalo kialo iliano tai berenio, <sup>41</sup> napano berinavo *!Kamiu kuvialio! Kamiu kumituña kubital niegeniege vite lu nalo, mia vonganei mia kuvitilubarío, karina mia kumãarmãaro. Bior napano kiniou nojo nemila imãuano tai iviso bure kamiu ka bogo napano kumeul kia ga kia navo, ana nalo aju aberbisivisi meravo ban kamiu, mia maka kuvisidom kumonmoneaio.”* *Apakuk 1:5*

*Tomu nalo na vio Antioko ajaaro ka Pol kiano iliano*

<sup>42</sup> Ana Pol mil banlo bisi, ana na nalo aba tavio, ana tomu nalo abinimei abika jikili den Pol, aberinavo “Kumemi numisidom nuber ea Legiano Lu nei napano jo binimei, mia kamjuo kumei nei bereio ana mo kuverloglog kumemi lie vo ka vite nalo nei.” <sup>43</sup> Naruei bogo napano Pol naljuo Barnabas aju abano, ana kulo Ju nalo telabo naliko bunu kulo dolu nalo napano abinimei ajibe kulo Ju nalo ruei, abinimei amiel ajakisor naljuo aban napano aber atukunu lie vo. Naruei atevi juo nene amil banlo, aberii kalo aberenio nalo monokanio avarkar tinielo lie vo ea Atua, a nalo monoka ala vonio ka ava joomo lie vo ea kiano tiniememiano. <sup>44</sup> Ana jibe ka napano nalo aberii ka Pol naio Barnabas ruei, ea Legiano Lu dolu napano binimei iorou, ana viobujo ka kulo Ju nalo, a viobujo bunu ka kulo dolu nalo ea bulukomeli nei abinimei vio takurano ga, ka aber aiagago ka Pol joña mioliolu ka Iliano Lu na Atua kiano. <sup>45</sup> Mia bogo napano kulo Ju nalo kialo tomu na tortoru nalo amial tomu dolu

nalo telabo nei, ana amijoku kanio, aju amil bova ka ga Pol, ajuña aberii ka tomu nalo aberenio naio joña milasibi ga na. <sup>46</sup> Mia Pol naio Barnabas naljuo maka tinielo rimemebiju, naljuo aju amil toru ga, naljuo kanalo iliano ba jikili lie vo, ana aberii ka kulo Ju nalo nei, aberinavo “Kumemi numial memedu ka mia Iliano Lu na Atua kiano napano kumituña nuber ka kamiu, rimej rivokar kamiu kulo Ju nalo ve moti, beamu ka kulo dolu nalo. Mia maka kuvisidom kumoneaio, ana kumituña kubuku searia bulagio ga bano, javukia napano maka bunu kuvijikia kuvokar meuliano na maka rijikia ribisi. Mia bo ga, jua ga kamiu, mo ver tibe na mia kumemi nuva nuviololu ga van nalo napano maka ave kulo Ju nalo. <sup>47</sup> Bior napano Iliano Lu tai berenio ruei napano kumemi monoka nuvila tibe na, napano Atua naio berenio, berinavo

*!Kiniou nebitiri larso ka mia jau komerera, kotibe ka yulu tai rimererali nalo napano maka amonea kiniou vo.*

*Mia jau kavara kiaku ioruriano riva rivokar vio reraio nalo ea yetemeriba.”* *Ais 49:6*

<sup>48</sup> Ana bogo napano nalo na maka ave kulo Ju amijog iliano nei, mia nalo amijog bo toru laka biorio, aberinavo “!Tomnei, Atua kiano iliano nei naio bo mia bo, koig kumemi tiniememi jiio-o mia!” ana nalo napano Atua berkarlo ka mia avokar meuliano napano maka rijikia ribisi, nalo nei naruei amonea Yesu ea bogo nei. <sup>49</sup> Ana jikario ea bogo nei, Tubo kiano iliano joña mijiajian janea vio nonovio ea tanobuku nei.

*Kulo Ju nalo tiniel jer Pol naio Barnabas*

<sup>50</sup> Mia kulo Ju nalo napano amijoku aba amial tire nalo na tortoru nalo ea kialo yimo na volkouano, bija navurimãaraboiano na mãarkomeli nei, ana amil banlo

amila searo ea kanalo jidomiano, ban bano-o mia tomu na tortoru nalo nei amiila tomu nalo aba amijilar Pol naljuo Barnabas den kanalo vio. <sup>51</sup> Ana bogo napano naljuo aju aba tavio, ana naljuo amila kijokijo tai ban nalo na m̃arkomeli nei, nalo amijuba kon yevi na m̃arabo napano jua jaalo.

Ana nalo ajaluvo den vio Antioko, aba abokar m̃arkomeli nei Aekoniam, <sup>52</sup> mia naiagagoano vou nalo napano aju yako Antioko, tinielo jaaro toru, a Niununo Lu binimeij bujolou vatitig ealo.

## 14

### *Pol naio Barnabas, naljuo amioliolu ea vio Aekoniam*

<sup>1</sup> Naruei ea komeli na vio Aekoniam, vite nonovio amalmaluvo javukia napano ea vio Antioko garuei. Pol naljuo Barnabas aboru ea vio na, mia iorou kanio ana abe juo aba joomo ea yimo na volkouano na kulo Ju nalo kialo, naruei amioliolu. Abe juo amioliolu bija Atua kanano moroano, naruei tomu telabo napano ajua vio na amonmonea Ioluano Vou na bo nei, napano nalo togio abe kulo Ju, a nalo togio abe kulo Kris. <sup>2</sup> Mia kulo Ju dolu nalo napano aju na, maka asidom amonmonea, naruei iorou kanio ana aba amila vonio ka avilig lelan tomu dolu nalo napano maka ave kulo Ju kialo jidomiano, nalo amila tiniel jerlo nalo napano amonea vonga. <sup>3</sup> Vite na naruei naio mila ana na Pol naio Barnabas, naljuo aju lie vo ea vio na, aju bogo tebievi kija, ka alavon ka aija namoneano nalo. Mia bogo napano nalo aju naliko jibe na, mia maka amerou ka nalo napano tiniel jerlo, mia amioliolu dolu ga ka Tubo Yesu banlo, a ka aberii kiano burum̃ara tiniememiano ban tomu nalo. Ana Tubo naio mila tomu nalo abitulubar ka kanalo iliano nalo abe riano, bior naio mijamo ka ban naljuo ka amila

burutomoluo nalo a vite na iloiano telabo bunu ea vio nei.

<sup>4</sup> Mia tomu nalo na komeli nei nalo aburuburelo ea taara juo naruei, napano tealo amijakar kulo Ju nalo, mia nalo tealo amijakar atevi juo neibano. <sup>5</sup> Tivelinio juo nei ajum̃a amila baravo kalo jibe na, ban bano-o mia kulo Ju nalo naliko kulo dolu nalo napano maka lele tiniel tii namoneano nalo neibano, bija bunu kanalo tomu na tortoru tealo, nalo naruei aber kakar ka mia atuk atevi nalo nei a atuba binvinlo am̃arm̃aro.

<sup>6-7</sup> Mia atevi juo neibano nalo amijog vite nei, ana amial aber bo kanio avuro den vio nei, ka ava aje jogvuiano ea vio tai. Jibe ga na, nalo ajumolu den vio nei, aban ea tanobuku dolu na vio Likonia, ana nalo aba aberial Ioluano Vou na bo ea tanobuku na vio na, bija sano komeli nene juo, napano sialo jibe nei, Listra bija Tebe.

### *Pol naio Barnabas naljuo amioliolu ea vio Listra*

<sup>8-9</sup> Naruei ea m̃arkomeli na yako Listra, bogo tai ana Pol naio jom̃a mioliolu ban tomu nalo, mia toro tai be javuluku naio jom̃a jojo tano, jom̃a miagago ka Pol. Toro nei jikar ea bogo napano naio moluo, naio maka leleio riel bogo tai, bior jaano be juo abuluk.

Naruei Pol mial ka toro nei jom̃a miagago batitigio ka naio, a mijog lubar ka toro javuluk nei naio jo monea Yesu ka mia naio mijikia rila vatitig jaano ve juo. Naruei Pol bitii kilkil eaio, <sup>10</sup> ana bio naio, berinavo “!Toro javuluk, jau kotumolu, kesikili kotu ka jaamo ve juo!” Naruei toro nei mijog Pol mil banio jibe na, naruei naio jumolu soḡeli ga, ana na jo miel bija jaano be juo napano abinimeij ajikirkili bo ruei.

<sup>11</sup> Ana bogo napano tomu nalo amial vite nei napano Pol milaio ea toro javuluk nei, nalo aju abiovio kanio jel kialo iliano, aberinavo “!

Aiou! !Kiado atua nalo amidu kulorinio mirano, abatove kean kito jibe ka toro garuei!” <sup>12</sup> Naruei nalo ajian sio na ban Barnabas, abio naio ka Susu, napano naio be sio na parinio tubo na kialo atua nalo, a ajian sio na ban Pol, abio ka Emis, ka naio be sio na toro napano jomã bar kanalo atua nalo kialo iliano nalo, bior amial ka Pol naio jomã mil lie jovulu Barnabas.

<sup>13</sup> Ana tavio ea morouo na komeli nei, yimo lu tai tena kialo atua nei, Susu, naio jo, bija toro lu nene, naruei na toro lu nei naio jidom riomon ka tomu nalo monoka avuru sida rivan Pol naio Barnabas, napano nalo ajidomii aber tomjuo nei abe kanalo atua. Naruei toro lu nei milalo amila soþeli aba aburu bue m̃arauo nalo abinimei, ana amiovovualo ka maniegiegi nalo, ka auebinvinlo ea burusio na yimo lu neibano.

<sup>14</sup> Naruei Barnabas naio Pol, naljuo maka atumã ajikia kialo iliano, napano ajumã aberii vite nalo nei, mia bogo napano naljuo amijog venia napano ajumã ajidomii ka alaio, naljuo amijog bova-o mia! Atevi juo neibano, naljuo maka asaaro leleio ka napano tomu nalo nei ajidom alotu kalo, mila na abe juo amijede m̃alo kulusoto nalo, ajikiti aba ajikili aju iviso ka tomu nalo nei, amiaga, aberinavo

<sup>15</sup> “!Kuverburelo, kuverburelo! ! Kamiu kuvila re tibe na van kumemi! !Kumemi juo nube toro ga javukia kamiu ga, maka nuve atua nei! Kumemi nubinimei ga bija Lilianiano Vou na bo, nubinimei ka nuverial van kamiu ka monoka kuvituvan kenemiu bajago moruo nalo na jibe na atu, kuvolkouo re bunu ka kenemiu atua nalo na telabo napano am̃arñaro ga. Mia nubinimei ka nuverial van kamiu ka Atua takurano ga jo napano naio meul, a numisidom nuvilig kamiu van naio, napano naio ga naio jii na vio yauo bija borotano, bija tei, a naio jii vite nalo nonovio napano ajua vio nonovio nalo ea yetemeriba

nei. <sup>16</sup> Ea yuka nalo na telabo þeli na terati nalo napano abarlaka ruei, Atua mijamo ka tomu nalo na vio yetemeriba, jibe ka kamiu, nalo ajumã amiel ajakii bajago doldolu nalo, a maka ajikia naio, ana na nalo amila lotuano jibe ka ga napano ajidomii aber memedu ka alaio. <sup>17</sup> Nemial ka napano kamiu kumila jibe na bior kamiu maka kuvijikia naio, mia tivelinio ka naio, naio maka ruduvan naio reraio ka kamiu, bior bogo nonovio naio jomã jiloglog naio tertelisu dam̃ariga ka kamiu, berinavo naio be riano, a napano kiano bajago ea kamiu kirinovo laka. Naio naruei naio jomã mila kiano yuo bovo jibirbili batove, a naio naruei napano jomã mila vite nonovio amiluo ea tiniavio nalo na kenemiu, nalo abar salo nioti nalo ka bogo nene memedu. Naio naruei jomã mila kamiu kumisaaro a kamiu kumijog bo toru laka ea sinaniano novo nalo napano kumitumã kubar ea kenemiu tiniavio nalo nene.”

<sup>18</sup> Pol naio Barnabas naljuo aber iliano na jibe na naruei, mia kolvare ga ka mia ajikia re ka mia averbure re tomu nalo nei napano ajidom m̃elea ka ala lotuano vanlo a napano amiomon sida kalo. Mia iorou kario napano nalo amijog tomjuo nei kialo iliano, ana na nalo maka bunu alaiio bereio.

<sup>19</sup> Avona kario, ana kulo Ju nalo tealoo napano m̃a amijil Pol naio Barnabas ea vio Antioko a ea vio Aekoniam ruei, vonganei ana nalo aba amiyotuba ea vio Listra nei bereio. Naruei nalo ajumã ajukunu ban kulo Listra nalo, ban bano-o mia aburu batitigio kialo jidomiano nalo abano be dolu bereio, avona kario, ana nalo aban ka Pol, ana ajubaio ban bano-o mia amialio aberiamã naio m̃aro ruei. Naruei nalo aburutitia taniabene ba tavio ea komeli, abuku searia naio jo jibe ga na, naruei aban bereio. <sup>20</sup> Mia naia-gagoano tai abinimei amidu batitig Pol, ana nalo aju naliko, avona

bisi, ana naio jevijo bereio, ana ban bereio vonuo nalikolo. Mia ea kavijo, ana naljuo Barnabas, abe juo amiel, aban ea m̃arkomeli dolu na telisu nei Tebe.

*Pol naio Barnabas, abe juo aban bereio, ajakii jaalo ajel ea vio nalo nei bereio*

<sup>21</sup> Naruei ea vio Tebe, Pol naio Barnabas abe juo amioliolu, mia ea vio na nalo aburu tomu telabo abinime i amonea, abinime i abe Yesu kiano naiagagoano nalo. Ana iorou kanio, ana naljuo ajaluvo ea vio Tebe bereio, ajikar ka avan bereio, naruei nalo ajakii m̃arabo nene kia ga napano nanua ajel eaio abinime i. Jibe na ga nalo avan bereio ea vio Listra, karina, Aekoniam, karina, aba aboru Antioko na vio Pesitia.

<sup>22</sup> Ana ea vio nalo nei, aberloglog namoneano nalo bereio, mia ajian iliano novo nalo ka rijailo, a nalo aberinavo “Be iakurano ka napano p̃eli mia kito romijikia roviniua bogokouo nalo, p̃eli na mia tomu nalo ail die kito, mia ka kito rava jouro ea Atua kiano navenatuboiano naio monokanio tibe ga na naruei. Verenio tibe na, kami u kumelukluku re, kuvan re bunu, mia kuvitumolu kuvitu sikili ea Kristo dam̃ariga.” Nalo aber iliano nalo na jibe na, mila ana namoneano nalo abokar jikili moneano. <sup>23</sup> Ana ea komeli nalo abiniu, ajokol tomu nalo tai parilo ka ave navagadeano nalo ka taara na tomu na moneano nalo, ana nalo ajuvan siniano ka abolkouo kalo. Naruei amidulo ajua Tubo jum̃ano, napano nalo amonea ka mia naio rijailo tulaka.

<sup>24</sup> Naruei nalo aju aban bereio jibe na, amiovodulu ea tanobuku na vio Pesitia, bisi na abinime i ea tanobuku na vio Pamvilia. <sup>25</sup> Ea tanobuku nei, amioliolu ea komeli na vio Peka, karina abatove ea vio Atalia, koyou ea tei, <sup>26</sup> ana nalo amidu uako, aba aboru bereio ea komeli na vio Antioko, nina ea vio Siria. Nina be burum̃ara komeli labo napano beamu, nalo abolkouo ka Pol naljuo Barnabas, ka mia Atua

kiano tiniememiano vija kiano vikitariano vu novo to rivijalo, ana na amiila bulaglo ka adu Lilianiano Vou na bo rivano. Mia vonganei naruei, naljuo amila nonovio batitigio burum̃ara iñauano nei, ana abinime i bereio ruei. <sup>27</sup> Naruei nalo abio ban namoneano nalo ka aviniu amei vio takurano, ana aberii iliveriioano banlo, a naljuo aberbisivisii batitigio banlo ka jum̃abe ana Atua naio betavo ka nalo napano maka ave kulo Ju, ka mia nalo bunu amijikia amonmonea, a amijikia aiasol ea navenatuboiano na kanano.

<sup>28</sup> Ana na naljuo aju bunu siberio tolu titai jibe na naliko namoneano nalo ea vio Antioko.

## 15

*?Namoneano vou nalo monoka atakii Mosis kiano Tuboiano p̃eli na makanio?*

<sup>1</sup> Ana bogu napano Pol naljuo Barnabas aju kia ga vo yako Antioko, kulo namoneano tealu na tanobuku na vio Yutea, napano abe kulo Ju, abatove ea vio nene. Ana bogu napano nalo amioliolu ban kulo namoneano dolu nalo na vio Antioko, aberial kanalo verloglogiano tai, aberinavo “Verenio kami u kulo namoneano nalo tealu, maka ave pakuveu takii vaio napano Mosis kiano tuboiano berenio, mia Atua maka rijikia rilarurlo.”

<sup>2</sup> Mia Pol naio Barnabas, naljuo maka asaaro leleio ka iliano nei, bior amijikia ka Lilianiano Vou na bo na Tubo kiano naio maka river tibe na, naruei amil jikili banlo, amila baravo naliko jiu kija jibe nei, ka amila vonio ka averbure nalo nei averloglog re bunu tomu nalo ka vovuiano na jibe nei.

Ana kulo namoneano na vio Antioko, nalo ajidomii m̃elea iliano nalo nei bano-o mia deio, ana amial jibe bo ka nalo aiila Pol naio Barnabas, a vija bunu ga nalo tealu, avavin Yerusalem, avan aial atevi nalo a navurim̃araboiano nalo, ka ajog vonio ka kulo kouo nalo nei

ajidomii jum̃abe ka tivelinio na vite neibano ajum̃a amila baravo biorio.

<sup>3</sup> Naruei, kulo namoneano nalo amiilalo abano, abatove ea tanobuku na ea vio nalo na jibe kanio Vonisia, karina vio Sameria, a ea bulukomeli nonovio napano amiovodudulu eaio, ajum̃a abior bija kulo namoneano nalo, a ajum̃a ajukunu naliko ka jum̃abe ana nalo aba ajeliviv ea bunu nalo napano maka ave kulo Ju, a aberial Lilianiano Vou na bo banlo, a jum̃abe ana viobujo kalo abiliglo abinimei ea Atua ruei. A kialo veriiano nei naio mila namoneano nalo ajaaro toru laka, a nalo abamenea Atua biorio.

<sup>4</sup> Nalo amila jibe na ban bano-o, abatove abokar vio Yerusalemo, ana aba amial taara na namoneano nalo, a bija atevi nalo a navurim̃araboiano nalo na nalotuno, mia nalo nei ajaaro ka amial Pol naliko Barnabas, amila ilivorvoruano banlo. Jibe na ana mo Pol naio Barnabas naljuo bunu amila veriiano bunu ban nalo na vio Yerusalemo, aberii jum̃abe napano Atua naio mila iñauano telabo ruei banlo, napano naljuo aba abokar nalo napano maka ave kulo Ju, a amioliolu banlo, aberinavo verenio nalo amonea ga Kristo, mia Atua naio rilarurlo.

<sup>5</sup> Ana bogo napano naljuo amila iliveriioano jibe na, kulo namoneano nalo tealoo napano abe kulo Ju, napano abe Varisis, ajumolu aberial kanalo jidomiano nene bereio, aberinavo “Bo ka nalo napano maka ave kulo Ju, avona verenio nalo tinielo ka amonea Kristo, mia nalo monoka ave pakuveu bunu ga, a monoka atakii bunu ga iliano dolu nalo na Mosis kiano tuboiano, mo verenio atakii kiado bajago kito kulo Ju nalo tibe na, mia kito romijikia roverenio mia Atua naio saaro kalo.”

*Buruñara vioriano ea vio Yerusalemo*

<sup>6</sup> Ana nalo ajum̃a aberii vite nei toru laka, mila jibe na ana atevi nalo a navurim̃araboiano nalo aberinavo monoka ala vioriano tai ka averiio. <sup>7</sup> Ana ea vioriano nei, nalo amil banbano-o mia Pitere jumolu, mil banlo, berinavo “Kuruaku nalo, kamiu kumijikia ruei ka beamu, Atua naio bitirilar kiniou ka neve moti na kito ka nava noiololu ka Lilianiano Vou na bo nei van nalo napano maka ave kulo Ju, mia vonganei kito roju romijog ka napano nalo telabo ajum̃a amonea Yesu ruei. <sup>8-9</sup> Atua naio mila jibe na bior naio maka tibure nalo nei den kito, mia naio mial tinielo beverare jibe ka napano naio mijikia vatitig vaio napano jua kiado iviso nalo. Naio berial ka naio jaaro ka nalo amijikia amonea kia ga ñarabo napano kito rojum̃a romoneaio, napano naio mije Niununo Lu banlo, a napano naio jekon kialo iviso nalo meravoo bunu, bior nalo abarkar tinielo ea naio, javukia kito. <sup>10</sup> Atua naio mila bo laka banlo ruei, mia vonganei, kito tealoo ajidom ka ala sikili vanlo bereio. Verenio kito rosidom resikili ka nalo nei ka avar vite na teremi na kiado tuboiano ea taakalo, tibe napano ajum̃a aberenio, tibe na ana kito roju ramila von Atua bereio. Korobido nalo amial kiado tuboiano nei ana aber naio kirisikili laka, mia kito bunu romialio ka maka toro tai napano rijikia rudu nonovio iliano nene nalo riviniu. <sup>11</sup> Mia nalo amoneaio, a kito bunu ga romoneaio bijalo, ka kito nonovio rabarkar tiniedo ea Tubo Yesu, a robokar bunu meuliano ea naio, binimei ga ea kiano tiniememiano ga.”

<sup>12</sup> Naruei nalo napano ea vioriano nalo maka bunu ail bereio, mia aju melumu ga, ana amidu bogo na iliano tai ban Pol naljuo Barnabas, nalo tinielo ka aber ajog kija berelie vo burutomoluo nalo a vite na iloiano nalo napano naljuo amilaio ea moroano na Atua kiano ban nalo napano maka ave kulo Ju, ea bogo

napano naljuo aba amiel jeliuiv ealo.

*Yemesi jusol kialo iliano nalo*

<sup>13</sup> Ana bogo napano naljuo ajukunu ka vite nalo nei bisi, ana Yemesi nei, napano naio be kanalo toro na toru tai yako Yerusalemo, naio jumolu jusol iliano ban tomu nalo, berinavo “Kuruaku nalo, nejidom kamiu kuviagago ka kiniou beamu vo. <sup>14</sup> Kito romijog mĉa rui ka napano Saimon nei, napano Pitere, naio ber bisivisii batitigio ban kito rui jumĉabe napano Atua malmaluvo moti ka nalo napano maka ave kulo Ju, a napano naio buru bulag nalo tealu abinimei ka ave kulo vou tai napano siano joaio. <sup>15</sup> Ana ea Iliano Lu, iliano napano kiado naverialiano nalo nanua beamu aberenio, naio ber ka mia tibe na naruei. Nalo tai napano naio ber jibe na, naio be Amos, napano naio berial Atua kiano iliano tai, berenio jibe nei, berinavo

<sup>16</sup> *‘Karina, mia kiniou nemei bereio, neiĉau vatitigio ka Teviti nene kiano bajulukuti tai napano mijoru, naio rimei rimeul bereio.*

*Bajulukuti nene javukia yimo tai napano burukokorovio bova ju nei, mia kiniou nevitirilario bereio.*

<sup>17</sup> *Ana jibe na, tomu dolu nalo napano maka ave kiaku vo, nalo ajirav kiniou Atua Soĉi,*

*a tomu nalo na buruvenuo nonovio na yetemeriba nei, napano nomidu siaku jualo rui, mia nalo amei ave kiaku tomu nalo.*

<sup>18</sup> *Kiniou nebe Atua Soĉi, napano nemila tomu nalo abitulubar vite nalo nei,*

*jikar nanua beamu laka rui, kiaku verikariano jibe na naruei.’”* **Amos 9:11,12**

<sup>19</sup> Ana Yemesi mil lie vo, ber bisivisii kiano jidomiano, berinavo “Ea kiaku vitiano, naio jibe nei naruei. Mia maka rivu ka kito rovijuku kouo ĉeli na rala mĉlea nalo napano abiliglo vonga abinimei

ea Atua, napano maka ave kulo Ju. Maka rivu ka roverenio nalo monoka ave pakuveu, ĉeli na nalo monoka atakisor kiado tuboiano tibe na a tibe na. <sup>20</sup> A vaio ga napano bo ka kito rala vanlo, tibe nei, ka mia rovivitauia mĉsi tai, roverial vite ve tolu. Vite na be moti, rovere ka, mia nalo asen re bereio sunbue nalo napano kulo dolu nalo amila ka sida ban kanalo tavoru nalo, nalo monoka aveli kalo. A tinene, nalo ala re bereio bajago va, na jibe ka siakaiano ĉeli na siakiano. A tolu nene, asen re bunu ga burukija na vite na meul, jibe sunbue na vite na meul napano burukija nene maka tabo vatitigio vo eaio. <sup>21</sup> Tomu nalo ajumĉa amijikia vite nalo nana napano maka rimemedu ka ala, bior Moses kiano tuboiano naio jo berenio, a nalo ajumĉa abuluku bulag tuboiano nene a amioliolu kano julaka ga ea Legiano Lu nalo ea kanalo yimo na volkouano na kanalo mĉarkomeli nalo, jikario nanua rui binimei bokar banei.”

*Tomu natortoru nalo na Yerusalemo abivitauia verdoĉeiano ban nalo na vio Antioko*

<sup>22</sup> Ana iorou kano, ana nalo amial jibe ka amil bare, ana atevi nalo a navurimĉaraboiano nalo, a bija bunu ga kulo na namoneano nalo nonovio, nalo amial jibe bo ka mia aila nalo tealu avan bereio naliko Pol naljuo Barnabas, avatove bereio yako Antioko. Naruei nalo ajekar kanalo kulo kouo juo na imĉauano nei, Jutas Barsabas naljuo Sailas, aberinavo mia naljuo nei avano. <sup>23</sup> Mia nalo abivivitauia bunu mĉsi tai ka naljuo amijikia adukario avatove, ana mĉsi nene berenio jibe nei, berinavo “Kumemi atevi nalo bija navurimĉaraboiano nalo na vio Yerusalemo, napano kumemi nube kuruado bija kamiu ea Yesu, kumemi numisaaro toru laka ka nuviviuo kamiu bereio ea mĉsi nei. Kumemi nubivitu ea mĉsi nei biedu ban kamiu mĉarkomeli na

vio Antioko, a sano tanobuku napano Siria, a ban kamiu bunu ga ea tanobuku na vio Silisia, ninei kamiu nalo napano maka kuve kulo Ju, napano beamu kamiu kumitua melijokouo ga. <sup>24</sup> Iliano binime i bokar kumemi ruei, berinavo beamu, kumemi tealo abiedu rove ea kamiu a nalo aberloglog kamiu aber kamiu na monoka atakisor kenememi tuboiano nalo kumemi kulo Ju, aver makanio, mia Atua naio maka rijikia rilarur kamiu. Kumemi numijikia ka iliano nei mila lelan kenemiu jidomiano nalo toru laka, a mila kamiu kumijog bova laka, ana iliano nei napano nalo aberenio, kumemi maka nuvijikiaio, kumemi maka nuver kalo ka monoka aviedu averloglogio tibe na van kamiu. <sup>25-26</sup> Ana kuruado novo juo nei, Pol naljuo Barnabas, napano nalo na maka asidomii ve temi ka kanalo meuliano, mia aju ajidom yebekavo toru ka ga averial Tubo Yesu Kristo siano, kamiu kuviila nalo na amei aial kumemi rivior vite nei. Ana kumemi nuvioro kanio, kumemi nuvitioo rivano-o, naruei nuvironkario ka mia nuviila kuruado juo na vio nei adu m̄esi nei, aviedu bereio naliko Pol naio Barnabas. <sup>27</sup> Naljuo neibano, Jutas naio Sailas, mia ave juo atukunu vatitigio lie vo van kamiu, riveverare ka ga vaio napano nubivitaui ban kamiu ea m̄esi nei. <sup>28</sup> Ana ea kenememi vitiano, a ea vitiano na Niununo Lu kiano bunu ga, kumemi numial jibe bova ka nuvututua ka monoka kuvijogkar kenememi tuboiano nalo kumemi kulo Ju. Mia kumemi numial jibe vite nalo nei tealo napano kumemi kulo Ju nalo maka nuvisidom leleio, a bo ka kamiu bunu kuvila re, ka mia rila ana kumijikia kuvitu rivu kamliko kuruado dolu nalo napano abe kulo Ju. <sup>29</sup> Vite nalo nei, tai berenio jibe nei, berinavo mia kamiu monoka kuvel ka sunbue napano kulo dolu nalo amila sida kanio ban kanalo tavoru nalo ruei. Ana na juo nene, mia kamiu kuvisen re burukija, p̄eli na sunbue na vite

na meul napano sano burukija maka riou konio vo. A na tolu nene, mia kamiu kuvila re bajago na bova nalo, jibe kanio siakaiano a siakiano.

“Verenio kamiu kuvituvan vatitigio vite nalo nei, kumemi numial ka tibe na mia ve novo laka van kamiu nonovio. Bo ga, mia kenememi iliano ribisi ea ga vio na.”

<sup>30</sup> Ana nalo amiila Pol naio Barnabas naliko naljuo dolu nene, aban bereio abatove rove yako Antioko. Bogo napano nalo nei aboru ea vio nei, abio taara na kulo na namoneano nalo abinime i vio takurano, ana amidu m̄esi nei banlo.

<sup>31</sup> Naruei nalo na vio Antioko abuluku m̄esi neibano, naruei nalo ajaaro toru laka ka iliano novo nalo napano nalo na vio Yerusalemo abivitaui binime i banlo. <sup>32</sup> A naljuo na vio Yerusalemo neibano, Jutas naio Sailas, naljuo nei abe naverialiano, mia aju m̄a amioliolu ban nalo napano Antioko, aberinavo monoka avarkar tinielo sikili ea Kristo tulaka ga, ana amila kialo iviso nalo jumolu ju jikili, ea kanalo iliano novo telabo napano aberenio.

<sup>33-34</sup> Nalo aju amil banlo jibe na ea legiano telabo, ana iorou kanio, ana nalo na vio Antioko amivenlo aban bereio ea kialo m̄arabo, abolkouo ka naljuo, aber “Tum̄aroano na Atua kiano to vija kamjuo.” Ana naljuo abavin bereio ea vio Yerusalemo. <sup>35</sup> Ana Pol naljuo Barnabas, naljuo aju bokar siberio tai bere vo yako Antioko, aju m̄a amija kulo dolu nalo napano aju m̄a amioliolu a aberloglog tomu nalo ka Atua kiano Iliano Lu.

### *Pol naio Barnabas, naljuo amila baravo*

<sup>36</sup> Mia iorou kanio, ana Pol ber ka Barnabas, berinavo “?Ei, ju m̄abe, mia kito ve juo ravan bereio ka reiadu ka kuruado a kuviviniedo nalo ea vio nalo napano m̄a rabano rabisivisii Iliano Lu na Atua kanano banlo beamu vo? Naruei kito ve juo rava ralavonio ka reial lo aju ju m̄abe.”

<sup>37</sup> Ana Barnabas berinavo “! Bo laka koig, kiniou najaaro toru kanio! Ana kiniou nejidom toru ka rovrurkar Jone Mak nei rimei vija kito.”

<sup>38</sup> Mia Pol naio jo jidomii kia ga nanua ea kialo ieliano na jukamu, Jone Mak nene naio buro denio vaarakurano ruei, nina yako Pamvilia, napano bogo napano iñauano maka riviniu vatitigio vo mia naio barpilig naio ban bereio. Tenene na, Pol mialio maka rivu ka Jone Mak rimei vijalo ea kanalo ieliano dolu nei bereio. <sup>39</sup> Vite nei naruei mila ana Pol naio Barnabas abilvili ealo memedu, naruei nalo aburuburelo. Barnabas naio ba buru Jone Mak ga, ana naljuo aba ajel ea uako tai, abe juo aba amimau yako Saipras, <sup>40</sup> mia Pol naio ba bijauia Sailas. Ana kulo namoneano nalo abolkouoko naljuo nei aberinavo mia Atua kiano tiniememiano a kiano vitikariano novo to rivijalo. <sup>41</sup> Ana naljuo amiel aba ajeliviv ea tanobuku juo na Siria bija Silisia, amimauka ala taara na namoneano nalo ka amei asikil lie vo.

Nina jibe kanio Pol kanano burumara ieliano valuo nene.

## 16

### *Timoti bunu naio bano naliko Pol naio Sailas*

<sup>1</sup> Naruei ea kiano burumara ieliano valuo nene, Pol binimej bokar bereio komeli juo nei Tebe bija Listra. Naruei ea vio Listra nei, be naiagagoano tai jo na, nina be toro mēaku nei Timoti. Timoti nene kenieno be tira re Ju tai, napano naio monmonea Yesu ruei, mia karamāno naio maka ve toro Ju, naio be toro tai na vio Kris. <sup>2</sup> Naruei kuruado nalo na Timoti kiano vio, bija nalo na komeli dolu na vaataro nei Aekoniam, nalo amial ka Timoti naio mila Tubo kiano iñauano banlo bo laka. <sup>3</sup> Naruei Pol naio jidom rivuru Timoti rivan vijaio ea kiano ieliano nei, mia be titai ga takurano naio bova, nina ga napano

Timoti naio maka rive pakuveu, nina bior karamāno naio maka rive toro Ju. Mia Pol naio mijikia ka verenio Timoti takilili naio tibe na, mia kulo Ju nalo mia averbure naio ka riva joomo re ea kanalo yimo na volkouano nalo, a mia asaaro re ka ajog kiano iliano nalo. Mia bior vite na, ana na Pol miila Timoti ba amila pakuveu ka naio, karina iorou kanio ana nalo tolu nei Pol, Sailas, Timoti, abano. <sup>4</sup> Naruei ka bogo na nalo ajumā ajeliviv ea komeli nalo, ajumā ajian iliano ban namoneano nalo, aberial banlo tuboiano napano naiagagoano nalo a navurimāaraboiano nalo re Yerusalemo aberenio ea kialo vioriano jukamu ruei, ana na Pol nalo aber kalo ka monoka atakilili iliano nalo nei naruei. <sup>5</sup> Naruei bogo napano Pol nalo ajumā amiadu a aberloglog taara na namoneano nalo jibe na, mila ana taara nalo nei ajumolu aju jikili batitigio lie vo, a nalo amial ka napano namoneano nalo aju abinimej telabo lie julaka ga.

### *Ajua vio Troas, naruei Atua mil ban Pol ea namonvovvano*

<sup>6</sup> Naruei Pol nalo ajidomii ka ayotuba ea komeli nalo na telabo ea tanobuku na vio Esia, mia Niununo Lu berburelo ka avan re, averial Iliano Lu ea vio na, mila ana na amiyotuba ea ga tanobuku na vio Vrijia a vio Kalesia. <sup>7</sup> Ajumā aban jibe na, ana bogo napano abinimej vaataro ka tanobuku na Mesia, amila vonio ka ava tove ea tanobuku na toru Bitinia, mia bogo tai bereio, Yesu kiano Niununo maka rijamo kalo ka avan tibe na. <sup>8</sup> Naruei nalo amiovodulu vonga ea vio Mesia yako ga, abanbano-o abokar komeli nene tai koyou ea tei, siano Troas. <sup>9</sup> Naruei ea vio na, ka bogiano, Pol naio monmelio mial toro tai tena tanobuku na toru na tei tivelinio yako Masetonia, mia toro nene binimej ka Pol, jegi banio, bika denio, berinavo “Aiou koig liki, kumemi numisidom toru ka jau kavarkor komej keial

kumemi, kanio mia kajai kumemi.”  
<sup>10</sup> Ana ea bogo na, kiniou Luka nojo kumemliko nalo bunu, mia bogo napano Pol berial ka naio mial toro nei mil ban naio, vaarakurano ga kumemi nubano numisirag m̄arabo ka nuvijikia nuvarkor nuva Masetonia, bior numijikia ka Atua naio bio kumemi ruei ka nuva nuviololu ka Lilianiano Vou na bo nei vanlo.

*Ajua vio Vilipai, ana tira na Litia naio monea*

<sup>11</sup> Tibena naruei, kumemi numidu uako, numituvan vio Troas, nuburo nubano-o nubokar uleule na vio Sametresi. Naruei numonmelio ea vio na, mo kavijo, ana na nubano-o nubokar tanobuku na vio Masetonia, naruei nubauro ea sano komeli na Niapolis. <sup>12</sup> Naruei ea tanobuku na Masetonia nei, burum̄ara bulukomeli dolu tai jo, napano naio jotan ka vitikariano na parinio tubo na vio Romo. Komeli nene siano Vilipai, naruei numiel nubano-o naboru eaio. Numitu legiano juo tolu ea vio na, banbano-o bokar Legiano Lu. <sup>13</sup> Mia kumemi numijog ruei ka aberenio ea Legiano Lu, kulo Ju nalo na ea vio na ajum̄a amila lotuano ea vio na volkouano tai rove yako ea uei tai, ea komeli tivelinio bano. Naruei bunu numitaluvo ka nuvatove ka nuvial lo ea vio na, naruei kumemi numitutano numitukunu kumemliko tire nalo tai napanoaju kamu abinimei ruei ajaio.

<sup>14</sup> Tire nalo nei tai, naio maka rive Ju, mia naio jo monmonea Atua. Naio be tena komeli na vio Tuatira, mia be kiano burum̄ara iñauano, naio jom̄a p̄ilivili ka kulum̄arauo na be vabolo na kirinovo nalo napano amim̄aukanio ea kiano vio. Tira nei, siano Litia. Ana ea bogo na, Tubo betavo ea kiano jidomiano, naruei naio midukar batitig iliano napano Pol jom̄a beriio banlo, mia naio bokario jikili bo ea kiano iviso.

<sup>15</sup> Ana ea bogo na, Litia nei naliko nalo na ea kiano vonuo, abiniu abokar varueiano. Avona bisi, ana naio jadia jikili ban kumemi, naio

berinavo “Verenio kamiu kumial kiniou noju jikili riano ea Tubo, kiniou nejidom ka kamiu kumei kuvitua kunuaku kija.” Jibe na naruei, ana na naio buru kumemi nuba numitua kanano vonuo.

*Abuku Pol naio Sailas aban ea nalakoiano*

<sup>16</sup> Naruei ea legiano tai bereio, ana kumemliko Pol nubatove bereio ea kanalo vio na volkouano, naruei nubitavo bija niatira tai ea m̄arabo. Niatira nei, tomu tai abulular naio ka rim̄au kanalo, mia niununo va tai joaio napano abio ka niununo na m̄aro, napano be niununo na jom̄a mial vite nalo napano mia ayoyotuba iorou. Naruei tomu nalo telabo ajum̄a abinimei abika den niatira nei kiano tomu na tortoru nalo, ka naio riverial vanlo ka mia tum̄abe ka kanalo meuliano nalo. Ana bogo napano niatira nei berial banlo, ana nalo ajum̄a abar ijaiano ban kanano tomu na tortoru nalo, mila ana bogo nonovio nalo ajum̄a jum̄alo bujo ka puruveru telabo biorio. <sup>17</sup> Naruei kumemi numiel nuban jibe na, mia niatira nei jakisor kumemi naio iorou, naio jom̄a miagiaga toru ban tomu nalo nonovio ga, jo berinavo “!Ai! Abe tomu nalo na nalo abe tomu na amim̄au Atua kanano napano meul ea vio soṗi mave. Nalo naruei amijikia averial m̄arabo na ioruriano van kamiu.”

<sup>18</sup> Karina, naio jom̄a mila jibe na ban kumemi ka legiano telabo, mila Pol mijog bova-o deio, ana bokar bogo tai ana naio tinien jer niununo va nei, ana jiraragidi, berkanio, berinavo “!E, bare! Neber kaso memedu, ea Yesu Kristo siano, jau komoluo den niatira na vonganei.” Mo vaarakurano ga, naio buro den niatira nei naio bano.

<sup>19</sup> Naruei bogo napano niatira nei kanano tomu na tortoru nalo nei amialio ka m̄arabo na na m̄a abar kanalo puruveru eaio binimei bova ruei, tiniel mimi toru ka Pol naio Sailas. Naruei nalo aburu tomjuo

nei aba ajumolu ajukamu ea natibureano na vio Romo nalo miralo ea komeli. <sup>20</sup> Naruei nalo aberial banlo, aberinavo “Kulo Ju nalo na, abinimei ea kanado vio, nalo aju amila bulag kito toru o-o mia. <sup>21</sup> Nalo ajumã ajadua kito ka ratakii kanalo bajago tealó, mia ea tuboiano na vio Romo napano roju tan kanio ea vio nei, maka rimemedu leleio ka rala tibe ka napano nalo ajumã aberenio.” <sup>22</sup> Naruei tomu nalo amila burumãara uetubaiano na, a nalo amila searia Pol naio Sailas, ajidom atukulo, naruei natibureano nalo nei aberenio ajede bulag kanalo kulumãarauo ealo ave juo, ana na avitivlo ka iesi. <sup>23</sup> Naruei nalo abitiv searialo jibe na-o bisi, ana na aburulo aba abukulo aban ea nalakoiano, mia amil jikili ban toro na bitikar nalakoiano, aberinavo monoka naio rivokar batitiglo ka avuro re bereio, ver ðeli mia rivova ka naio. <sup>24</sup> Naruei bogo napano toro nei naio mijog iliano nei, naio buru tomjuo nei aba laka joomo, ea vio kouo tai napano ña aburu nalo na parilo jikili laka aban eaio, naio miorkakar jaalo aban ea burumãara iesi napano naio joa vio na.

*Borotano memebiju, a mikulkulu ka nalakoiano*

<sup>25</sup> Naruei Pol naio Sailas naljuo aju banbano-o bokar bogiano viovare, ajumã abolkouo ban Atua ea iouano lu nalo, a nalo dolu napano aju nalikolo ea nalakoiano nalo ajumã amiagago ka bunu. <sup>26</sup> Naruei nalo amiilo toru laka, napano kolvare ga, burumãara mii tai binimei, mikulkulu ka yimo nalakoiano nei, mukulkulu ka tati nalo reraio. Ana amial ñaratavo nonovio abevetavo, a marimieni nonovio napano amiorkakar ka jumãalo a jaalo ajibirbili ga bunu. <sup>27</sup> Mia toro na bitikar yimo nalakoiano nei naio jevijo, naruei jikiti binimei mial ñaratavo nonovio abiniu abevetavo aju, mia beriamã nalo napano aju joomo, nalo abiniu aburovuro abeve terakurano ajanea vio rui. Naruei

vite nei mila naio merou toru, naruei midular kiano iobogu na mira, ka jidom rielbin naio riñaro. <sup>28</sup> Mia Pol mialio, ana bio jouo banio, berinavo “!Ei, jau kotovo kala lelanso re vo! !Kumemi nonovio nubitu kiaga ea vio nei.” <sup>29</sup> Naruei toro nei naio bio ber avar yulu rimei, naruei jikiti ba joomo ea vio napano Pol naio Sailas ajaio, mia memebiju mia memebiju. <sup>30</sup> Avona karina, naio burulo aba tavio bereio, ana bika denlo, berinavo “? Ai, tomjuo na tortoru, mia monoka nala vaio ana na mia neje ioruriano?”

<sup>31</sup> Naruei tomjuo nei aber kanio aberinavo “Jau monoka komonea Tubo Yesu, ana jau kovokar ioruriano, jau kamliko nalo na ea kanamo ñaratavo.” <sup>32</sup> Naruei nalo aberial Tubo kiano iliano banio, a ban nalo na ajua kiano vonuo, <sup>33</sup> mia memedu ka bogiano viovare ga, toro nei naio mila batitig Pol naio Sailas kanalo niajebijo na menko nalo, ana kanio bogo nei bunu, nalo abaruei ea naio naliko nalo na ea kanano ñaratavo. <sup>34</sup> Naruei naio burulo aba joomo ea kunuano, naruei bar sinaniano banlo, ana naio naliko nalo na kiano vonuo nalo ajumã ajaaro-o mia ajaaro, bior vonganei nalo amileal Atua ea kialo meuliano nalo.

<sup>35</sup> Ana ea kavijo nene ga, ana na natibureano nalo maka ajikia vite nei vo, mia nalo ajutano bereio bisi, ana amiila kialo tomu nalo abinimei aberial, aberinavo “Tomu juo na nalo amijikia ava tavio ga.”

<sup>36</sup> Naruei toro na bitikar nalakoiano nei naio binimei berial ka Pol, berinavo “Natibureano nalo amiila toru binimei aberinavo kamiu kuve juo kumijikia kuva tavio ga. Tibe na mo kamiu kumei, kuvan ga tibe na. Mia kito rela re bunu iliano van kito rivior vite nei.”

<sup>37</sup> Mia Pol naio ber ka nalo nei, berinavo “Ee, makanio, maka tibe na. Kumemi bunu numitutano ka parinio tubo re Romo nene, a ea kiano tuboiano, natibureano nalo na amila maka rimemedu ka kumemi

ga na. Maka aleal ka kumemi numila tena bova tai, ana abitiv kumemi ea tomu nalo miralo, karina abuku kumemi nuba joomo ea nalakoiano, naruei vonganei ana ajidom ajil bulagio bena ea kumemi ga tibe na. !Makanio, kuvan bereio kuver kalo kuverinavo nalo naruei monoka amei ana mo avuru bulag kumemi ea vio nei, nalo monoka amei nei averenio iliano tai van kumemi beamu vo!”

<sup>38</sup> Naruei tomu natibureano nalo abar Pol kanano iliano nalo nei aban bereio, ana bogo napano nalo amijogial ka Pol naljuo Sailas, nalo bunu ajutano ka natuboiano re Romo, naruei nalo amerou toru. <sup>39</sup> Naruei abinimei aberenio iliano tai banlo, karina aburulo aban ea m̄arabo, aberinavo ajidom ka monoka nalo ataluvo den vio nei. <sup>40</sup> Mia Pol naio Sailas, aban bereio amiyotuba ea Litia kunuano jukamu, karina iorou kanio, ana na nalo amial kuruado nalo bereio ana ajian iliano novo nalo na be tena ilivituniano banlo, a karina iorou kanio ana nalo ajaluvo den komeli nei.

## 17

### *Pol naio Sailas, ajua vio Tesalonaika*

<sup>1</sup> Naruei Pol naio Sailas, naljuo amiel abano, ana ajel ea m̄arkomeli juo nei Amvipolis bija Apolonia, abinimei abokar m̄arkomeli nei, Tesalonaika. Markomeli nei be yimo na volkouano tai na kulo Ju nalo kialo joaio, <sup>2</sup> ana jibe ka napano Pol jom̄a mila ea vio nonovio napano ban eaio, naio jusol nalo na vio nei, jo ban bijalo joomo ea kialo yimo na volkouano nei, ea bogoti nalo na volkouano. Ana ea Legiano Lu tolu, naio jom̄a mila jibe na, a mil vatelabo bijalo ea vaio napano Iliano Lu jom̄a jiloglogio. <sup>3</sup> Pol naio jom̄a jilogloglo kanio, a jom̄a berial binimei meravo bo, berinavo takii vaio napano Iliano Lu berenio, naio memedu ga ka napano kanalo Naverikariano,

tomu nalo amila searo ga banio, banbano-o naio m̄aro, ana iorou kanio monoka naio rimeul bereio den nam̄ariano. Ana Pol berial banlo, berinavo “Yesu nei napano nojom̄a neberii, naio naruei, be kiado Naverikariano nene.”

<sup>4</sup> Ana nalo tealoo napano ajum̄a amiagago, amialio aber iliano nene be riano, ana amonea Yesu, ana abinimei amiasol Pol naio Sailas. Ana ea vio na, be tomu nalo na maka ave kulo Ju, mia napano amonea Atua ruei, ana nalo telabo bunu amonea Yesu ruei, bija bunu natukamuano telabo na tire nalo kialo.

<sup>5</sup> Mia tomu na tortoru na kulo Ju nalo maka asaaro, nalo amijoku, ana naruei aberii ka mia ala von vite tai. Ana aba amial terati na parilo jikili nalo na vio nei, ana aburu nalo tealoo napano abova lie vo, ana aba aburu tomu nalo telabo bereio ana amila burum̄ara tinjibi na, ana nalo aba amila burum̄ara uetubaiano janea m̄arkomeli nei. Ana nalo aberianm̄a Pol naljuo Sailas nalo ajua yimo na toro tai kunuano, siano Jesono, ana nalo aban kalo ea yimo nene, ka avurulo ava komeli. Ana abinimei abokar yimo nei, ana amila searo mia, amila korovio m̄aratavo nene, <sup>6</sup> mia maka aleal naljuo joomo eaio. Ana abokar ga Jesono nene, bija kuruado dolu nalo, ana aburulo aba ajumolu aju ea mirano kulo navurim̄araboiano nalo na m̄arkomeli nei. Amil toru, aberinavo “Kulorinio nalo napano aju abiliglar kiado yetemeriba nei, aban ea vio dolu nalo telabo ruei, mia vonganei abinimei aju kija kitoliko naruei. <sup>7</sup> Ana toro nei, Jesono, naio burulo aban ea kunuano, ana nalo nei abova, ajum̄a amila kokorov tuboiano na parinio tubo na vio Romo nei, Sisa, kiano. Sisa nene ga naio berenio ruei ka mia rolotu ka naio ga, mia nalo nei ajum̄a aberenio aberinavo parinio tubo takurano ga ea yetemeriba nei, nina naio be toro tai napano siano Yesu.” <sup>8</sup> Ana tomu nalo bija kulo navurim̄araboiano nalo na

mãarkomeli nei, bogoti napano ami-jog iliano nei, mia nalo tinielo jikili, ana ajumãa amiaganiaga a ajumãa amil boya toru laka. <sup>9</sup> Ana na kulo navurimãaraboiano nalo nei aber Jesono nalo monoka adu burumãara puruveru tai toa jumãalo, ka rila ana mia avokar re bunu Pol to vijalo bereio bogo tai, ver ðeli mia maka ajikia avar merano bereio puruveru nene. Ana iorou ka napano amidu puruveru nene jo, ana amijamo ka nalo aba tavio bereio.

*Pol naio Sailas, ajua vio Beria*

<sup>10</sup> Ana bogiano kia ga, ana kuru-ado nalo na vio na aban amiven-bena Pol naljuo Sailas ea kanalo mãarabo, ana naljuo aban bere mave ea mãarkomeli tai bereio, nina Beria. Mia bereio naljuo aju aba joomo ea yimo na volkouano na kulo Ju nalo na vio nei kialo. <sup>11</sup> Kulo Ju nalo na vio nei nalo abo, a nalo abe kialo vijauano, maka atibe ka nalo na vio Tesalonaika, nalo abar jidomiano novo ka napano amijikia amiagago vatitigio bo ka Pol naio Sailas kialo verloglogiano. Mia legiano nonovio, nalo tiniel jii m̃elea ka avitii Tubo kiano Iliano Lu ka aleal aver naljuo aberii be riano ðeli na jumãabe. <sup>12</sup> Amila jibe na bano-o, mia maka vesiou, ana na ajikar ka amonea naruei, ana navurimãaraboiano na tire nalo re Kris nalo bunu, naliko kulo Kris nalo telabo, nalo bunu amonea.

<sup>13</sup> Mia karina, ana iliano ban bereio bokar kulo Ju nalo yako Tesalonaika nanua, ana aberenio vonganei Pol naio jomãa mioliolu ka Atua kiano iliano yako Beria bunu, ana nalo tinielo jikili bereio. Ana abinimei mave yako Beria, ana amila searo ea kulo Beria dolu nalo kanalo jidomiano bereio ka rila nalo tiniel ser naljuo ka ajil lo avano. <sup>14</sup> Ana kuruado nalo amial vite nei, aber bo ana amila Pol ka rivatove soðeli koyou bereio, mia amial aberii Sailas naio Timoti, naljuo amijikia atu beamu vo, naljuo abo ga. <sup>15</sup> Ana nalo aburu Pol ea

kiano mãarabo, abatove koyou ea tei, ana amidu uako tai ana aba abokar burumãara bulukomeli nei, Atene. Ana bogo napano nalo ajuvan Pol ea vio nei ka avan bereio, ana Pol berii kalo berinavo mia Sailas naljuo Timoti, nalo bunu monoka ava tove soðeli ea naio vesiou re, ka mia nalo aimãau vio takurano bereio vija naio.

*Pol joa vio Atene*

<sup>16</sup> Naruei Pol joa vio Atene, naio jororea Sailas naljuo Timoti ka naljuo amei, ana bogo napano naio jomãa jirarag veve vio janea mãarkomeli nei, mia naio mial ga ka napano vio bujo ga ka tavoru nalo, ana tenei mikuru kiano iviso. <sup>17</sup> Ana naio jo ban ea yimo na volkouano na kulo Ju nalo kialo, ana jomãa mila iliano nalo telabo ka vite nalo nei bijalo a bija bunu kulo dolu nalo napano amonea Atua. Ana legiano nonovio ga, naio jomãa ban bunu ea vio medave na mãarkomeli, ka tukunu vija toro kei napano ver rialio ea vio nei. <sup>18</sup> Ana yako Atene, be burumãara yimo juo na verloglogiano na m̃asosouano, napano tomu na verloglogiano nalo na yimo juo nei, abiolo ka kulo Epikururu nalo, bija kulo Stoiki nalo, ana nalo aju abior bunu bija Pol.

Mia nalo tealó ajumãa amili tertelisu ban Pol, aberinavo “!Toro na mil m̃ele mia, mia naio maka rijikia vite na bo tai ka napano mijikia riverii ka kito.” Mia tealó bereio, amijog ka napano Pol jomãa berii Yesu bija tumoluano, ana nalo ajidomiio aber nina tomu juo na, ana aberinavo “Ðeli, kumemi numial nuber toro nei naio jomãa berii atua dolu nalo a niununo dolu nalo na buruvenuo na koalabo ga tai.”

<sup>19</sup> Ana iorou kanio, ana kulo Atene nalo abio Pol aberenio naio riva totano vijalo ea kanalo burumãara komeli, mave ea burumãara burusuku na vio nei, napano siano, Areopakas. Ana abika den Pol, aberinavo “Kumemi numisidom ka jau kalavon ka koverii verloglogiano

vou nei napano m̃a kojom̃a koberial ban tomu nalo. <sup>20</sup> ?Kumemi numijog jibe verloglogiano na naio be dolu ga, ana kumemi numisidom nuvijikia ka vite nalo na kojom̃a koberenio na, salo nioti nene be venia?" <sup>21</sup> Ana bogo napano amila jibe na, ana aju ajakii kanalo bajago kouo tai, bior napano kulo Atene naliko kulo dolu nalo napano ajua vio na, nalo ajidom m̃lea ga ka dam̃ariga, ana atu ga ajog p̃eli na atukunu ka verloglogiano p̃eli na iliano vou, p̃eli na jidomiano dolu nalo, p̃eli na tomu nalo kialo moneano nalo.

<sup>22</sup> Naruei Pol jumolu jua miralo ea komeli nei napano jo mave yako Areopakas, ana mil banlo. Naio ber kalo, berinavo "Tomu na tortoru na vio Atene nalo, kiniou nemial jibe ka kamiu tiniemiu jii m̃lea nalotuano nalo toru laka, juvulu napano kulo dolu nalo tinielo jii. <sup>23</sup> Bogo napano nojom̃a nemiel ea komeli nei, ana nemial vio lu nalo a boda nalo, a kenemiu tavoru nalo telabo laka, mia bogo tai ana nemial boda tai napano aje vivitauiano tai joaio, napano berinavo 'Boda na atua napano maka rejikia naio.' Ee, kamiu kumitum̃a kumilotu ka atua nene, mia kuber be riano ga, maka kuvijikia leleio naio, ka naio be kei. Mia be Atua riano takurano ga napano naio jo, a naio naruei kiniou nejidom neverial van kamiu ka kuvijikia naio. <sup>24</sup> Naio naruei naio be Atua Tomoruo napano jii yetemeriba nei, a vite nalo nonovio napano romial ajaio. Naio naruei naio be Parinio Tubo na tiniabene a be Parinio Tubo na yetemeriba nei. Naio maka lele toa vio lu nalo p̃eli na vite lu nalo napano kulorinio nalo ga amilaio, <sup>25</sup> a naio maka to ga vain kito tomu nalo ka mia ravaganio p̃eli na rovitikario. Peli ga, bior naio naruei, naio jian meuliano, a jian jegi, a jian vite nonovio ban tomu nonovio nalo. <sup>26</sup> Atua nene naruei, naio mila tomu kinkin nalo nonovio amaluvo ea toro na jukamu napano

naio jii, ana jukamu beamu ruei, naio jekar bogoti nalo a vio nalo reraio ea mirano yetemeriba nei, napano mia kulo kinkin nalo nei amijikia ameul eaio. <sup>27</sup> Naio mila jibe na ka kito nonovio monoka rosidomii ka monoka realeal Atua nene, ana mila kito roju rojian jum̃ado ban ea vio bobogio ka rabagbago ka kiano yulu. Mia bo ka rosidomiikar bunu, ka Atua nene, naio maka to koalabo laka, mia naio jo ga vaatara ka kito terakurano. <sup>28</sup> Tomu nalo ajiri kenemiu iouano nalo aberii vite nei ruei, napano tai berii jibe nei berinavo 'Kito romeul ea naio, kito romiel ea naio, kito ea ga naio dam̃ariga,' ana dolu berii jibe nei, berinavo 'Kito nonovio naruei kito robe kiano kulo vou nalo.'

<sup>29</sup> "Ana bior ka napano kito nonovio robe Atua nene kenerinio nalo jibe na, ana maka rimemedu leleio ka rotu rosidom rover naio jibe ka tavoru tai napano jum̃ano toro ga mim̃aukanio ea niogo, p̃eli na ea verumera, p̃eli na ea puruveru, napano amim̃auka jakii vaio napano jua ga kialo jidomiano. <sup>30</sup> Beamu laka ruei, ea melijokouo, tomu nalo maka ajikia vite tai, mia Atua bijuku bo kalo, naio maka tom̃a rivuluku kanalo voviano nalo ea bogoti nene. Mia vonganei naruei, ana na Atua berial memedu ga ban kulorinio reraio ea vio nonovio, berinavo monoka nalo aviliglo, <sup>31</sup> bior ka napano naio berkar legiano nene ruei, napano mia naio tibure yetemeriba nei, tibe ka napano rimemedu ka mia naio rila, a naio berkar bunu ruei kiano toro tai napano mia rila kiano im̃auano nene. Naio mila vite nei meravo batitigio ban tomu nalo ruei, napano kiano toro lu nei, nalo amuebini m̃aro ruei, avona bisi ana Atua bitirilario meul bereio."

<sup>32</sup> Ana binimei bokar vonganei, mia nalo ajum̃a amiagago vatitigio ka Pol, mia bogoti napano amijog ka naio jom̃a berii berinavo

toro tai m̄aro, mia Atua mila naio meul bereio, mia nalo tealo abital searo ea naio biorio, mia nalo tealo aber kanio, aberinavo “Bo ga, tobo beamu vo. Peli mia kumemi nuvidu bogo vanso ka mia kotukunu bereio van kumemi bogo tai navo.”<sup>33</sup> Ana Pol mial ber nalo maka bunu tiniel tii ka aiagago kanio, ana jumolu denlo batove bereio,<sup>34</sup> ana tomu nalo na vio nei tealo amoneaio, ana aju abinimei abior vio takurano bija Pol, napano nalo tai kalo, naio be toro na toru tai na komeli na vio Areopakas nene memedu, siano Tionisia, ana tai bereio, naio be tira tai, naio siano Tamarisi, a nalo dolu bunu.

## 18

### *Pol jo yako Korin*

<sup>1</sup> Ana iorou ka vite nalo neibano Pol mila yako Atene, naio jaluvo denio, ana ban yako ea burum̄ara bulukomeli dolu na Korin. <sup>2</sup> Ana ea vio na, naio mileal toro Ju tai napano toro nene be toro tai na tanobuku na vio dolu Pontas, mia naio ba joa venuo na vio Italia, ea sano burum̄ara bulukomeli na vio Romo, mia vonganei, naio naljuo koano, abinimei vonga aju Korin, bior Parinio Tubo Klotias na vio Romo naio bukubulag kulo Ju nalo ea kiano vio nei. Mia toro neibano siano Akuila, a koano siano Prisila.

Jibe na ana Pol ba mial naljuo,<sup>3</sup> mia naljuo aberenio bo ka Pol naio to naliko, ka aim̄auka puruveru kija, bior naljuo naliko Pol, naltolu, kialo iñauano takurano, napano iñauano nam̄a ajul panpano na yimo. <sup>4</sup> Mia amim̄au jibe na banbano-o, mia ea Legiano Lu nalo, Pol naio jom̄a ban ea yimo na volkouano na kulo Ju nalo kialo, mia jom̄a mila iliano telabo laka naliko kulo Ju, a naliko bunu kulo Kris napano ajuaio, naruei naio mila jibe na banbano-o mia jo buru nalo telabo.

<sup>5</sup> Mia iorou kanio, ana Sailas naljuo Timoti nalo abinimei aboru iorou ea vio nei, ana ea bogo na, Pol naio mijamo ka momonio kiano

bogo ea Tubo kiano iñauano, ka napano naio jom̄a mioliolu, jom̄a berialio ban kulo Ju nalo berinavo kialo Naverikariano riano napano m̄a aju rorea ka naio rimei, nina be Yesu nene napano binimei ruei. <sup>6</sup> Ana iliano nei mila ana kulo Ju tealo tiniel jer Pol, mia aberdoḡe niege-niegeio kirivova laka, naruei amila banbano-o mila ana bogoti tai ana Pol mila kijokijo tai banlo, napano mijagdago bulag ka bulukievi na vio nei den m̄ano kulum̄arauo, ber kalo berinavo “Ilirianiano na Atua kiano kiniou neberial batitigio ban kamiu kulo Ju ruei. Mia verenio kamiu maka kuvisidom kuvijogkario, kuvisidom kuanvan kovio ga, kiniou neber ka kamiu ka kenemiu burukija toa jumemiu ga, maka bunu toa jum̄aku naruei. Tikar vonganei, kiniou notuvan kamiu, mia nava neverial Lilianiano Vou Na Bo nei van nalo napano maka ave kulo Ju.”

<sup>7</sup> Ana na Pol jaluvo denlo ea kialo yimo na volkouano, naruei naio ba jua ga yimo tai napano jumolu ju ga tivelinio ka yimo na volkouano neibano. Yimo nene be toro tai napano maka rive toro Ju kunuano, mia vonganei naio monea Atua ruei, napano siano Titias Jastas. <sup>8</sup> Mia navurim̄araboiano na yimo na volkouano nei, napano siano be Krispas, naio tai nene napano monea Tubo Yesu, naio naliko nalo na ea kiano m̄aratavo, a be tomu dolu nalo telabo na vio Korin bunu napano bogo napano amijog Pol kiano iliano nalo, mia nalo amoneaio, mia karina amila varueiano ealo.

<sup>9</sup> Ana iorou kanio ea bogiano tai, ana Pol monmelio ana na mial Tubo mil banio, berinavo “Pol, jau komerou re ka tomu nalo, mia jau kala bo ka ga, koto koverial kiaku iliano. Mia jau kala re ka napano tomu dolu nalo ala so koto melumu, <sup>10</sup> bior kiniou nojo bijaso. Mia ve re bunu toro tai ea komeli nei napano mia rijikia tukuso ḡeli na rijilso, bior kiniou be kiaku tomu nalo telabo ruei ea vio nei.” <sup>11</sup> Ana na Pol naio

joa vio nei bogo tebievi kija ga, ba bokar yuka vodolu a togio bereio, a bogo nonovio naio jomã berloglog Atua kiano iliano ban tomu nalo.

*Kulo Ju nalo aburu Pol ban ea komeli*

<sup>12</sup> Ana ea bogo na, parinio tubo na vio Romo naio bitirilar toro tai ka ve tubo na tanobuku reraio na kulo Kris nalo kialo, mia toro nene siano, Kalio. Naruei ea bogo na, kulo Ju nalo aberii abirakar ka monoka ala vite tai ka tokovio ka Pol ka naio rioliolu re bunu, naruei nalo aba abokar Pol, ana aburu naio ban ea komeli na Kalio nene kiano. Naruei kulo Ju nalo aberial ka Kalio bija kiano natibureano juo, nalo aberinavo <sup>13</sup> “Toro nei, naio jomã milavonio ka rivuru tomu nalo ka ava abolkouo van Atua ea m̃arabo nalo tai napano maka rimemedu leleio ea tivelinio na kenememi tuboiano.”

<sup>14</sup> Ana na Pol naio jomã jidomii ka sian kiano verdoŕeiano ea kialo iliano nei naruei, mia naio maka ril vo, ana na Kalio nei monkoyo, mil kija ban kulo Ju nalo. Naio ber kalo, berinavo “Kulo Ju nalo, verenio kami kuverii ka kiniou ka toro na naio mila bajago nalo napano abova laka, ŕeli na naio mue toro tai, ŕeli na naio bina, ŕeli na titai tibe na, mo bo ka kiniou naiagago ka kami. <sup>15</sup> Mia venia napano kuberenio, mia nemijog jibe ka maka ve titenia leleio, be vite kurano ga ea tivelinio na kenemiu tuboiano na kami kulo Ju ga. Verenio tibe na, ana na mia kami ga kuvitiio, kiniou maka nasaaro ka neiagago ka vite nalo na ŕeli na nala tibureiano tai riviorio.”

<sup>16</sup> Mo ea iliano nalo nei mia naio mijil bulaglo den kiano komeli bereio. <sup>17</sup> Naruei vite nei mila tinielmimi lie vo, mia bogo napano aba tavio, abokakar natukamuano vou na kialo yimo na volkouano, napano siano Sostinis, naruei ajuk niegeniege naio ea ga m̃aratavo na komeli nene. Naruei Kalio naio jo bitiio, mia naio maka rialerinio eaio,

naio maka rila titai leleio ka nalo nei.

*Pol naio jo yako Eveso, karina ban bereio Antioko*

<sup>18</sup> Mia iorou ka nina, ana na Pol jo bogo tebievi lie bereio vo naliko kuruado nalo na vio Korin, ana iorou kanio ana naio jaluvo denlo, jidom rivan bereio Siria, ana ea bogo na, Prisila naio Akuila, abe juo naliko naio. Naruei nalo abajou koyou ea tei, ea komeli na vio Kenkria, naruei ea vio na, ana Pol berenio avuron vijinio. Nina bior naio mila verikariano na tai jikili bija Atua beamu ruei, ana vonganei vite nonovio na ea verikariano nei abiniuviniu ruei, ana nalo aburon vonga vijinio ea bogo nene. Ana nalo abavin ea uako tai, napano naio jo ban ea vio Eveso.

<sup>19</sup> Mia bogo napano abinimei aboru Eveso, ana na nalo abauro, naruei ana Pol naio berenio mia Prisila naljuo Akuila nalo atu aim̃au ea vio na beamu vo. Mia naio juvan naljuo, ba joomo ea yimo na volkouano na kulo Ju nalo kialo ea vio nei, a mila iliano telabo bijalo. <sup>20</sup> Nalo ajaaro ka ajukunu naliko Pol, naruei nalo ajidom ka naio to kija rivijalo ka amijikia ail lie vo vijaio, <sup>21</sup> mia Pol naio ber kalo, berinavo “Siva tanea, mia kiniou monoka navan bereio ea vio Siria beamu vo. Mia verenio Atua kiano tiiano, mia kiniou nemei ea kami bereio ea vio nei Eveso vesiou re.” Naruei naio takurano jumolu den nalo nei, ana midu uako ban bereio.

<sup>22</sup> Mia bogo napano naio binimei bereio-o boru Siria, naruei bauro ea bulukomeli na vio Sisiria, ana na ba bavin Yerusalemo. Karina naio ba miyotuba ka taara na namoneano nalo, mia iorou kanio, ana na naio batove bereio yako Antioko. Nina naruei ana na Pol mila nonovio kiano burum̃ara ieliano valuo nei.

*Pol naio miel bereio, ninei be kiano varolu nene*

<sup>23</sup> Ana na Pol naio jo yako Antioko banbano-o, bisi na naio juvan vio nene bereio, ban bereio ea komeli dedade nalo na tanobuku na vio

Kalesia bija Vrijia. Naio jel ea komeli nalo nei vaarakurano ruei, mia naio ban ealo bereio ka rijai naiagagoano nalo ka atu sikili lie vo.

*Apolos naio mioliolu ea vio Eveso bija vio Korin*

<sup>24</sup> Mia bogo napano Pol naio maka rimei rivoru bereio Eveso vo, mia toro Ju tai binimei ea vio nei, naio be toro na burum̃ara komeli yako Aleksadria. Toro nei, siano Apolos, naio be toro tai napano pariparinio bo laka, napano mijikia iliano nonovio napano jua Vivitauiano Lu nalo, a naio be toro tai nam̃a mioliolu bo-o mia bo. <sup>25</sup> Nalo aberloglog naio batitig ka Tubo kiano m̃arabo ruei, naruei naio mijamo ka kiano meuliano vodolu ka mia m̃a rioliolu p̃eli na riverloglog vatitig tomu nalo ka vite nalo ea Yesu. Mia vite nonovio na m̃a naio jo m̃a berenio naio kirimemedu laka, mia vite takurano ga, naio maka rijog vo ka napano tomu nalo monoka avaruei ea Yesu siano, naio mijikia ga varueiano napano Jone Baruei milaio jukamu nua beamu. <sup>26</sup> Mia bogo napano naio jo m̃a ba mioliolu joomo ea kulo Ju nalo kialo yimo na volkouano, mia naio maka rimerou kalo, maka rialerinio. Mia bogoti tai, ana na Prisila naio Akuila, abe juo amijog ka napano naio jo m̃a mioliolu jibe na, naruei amijog lubar ka toro nei maka rijikia batitig vite nalo nei tealoo vo ea m̃arabo na Atua kiano, ana na nalo aburu naio aberloglog vatitig naio ka vite telabo bere vo.

<sup>27</sup> Ana iorou kanio, Apolos naio jidom rivano ea kulo Kris nalo kialo vio yako Akaia, naruei banalo na yako Eveso nalo aberinavo bo laka verenio rivano tibe na, naruei nalo abivitauiam̃esi tai ban naiagagoano nalo yako ka mia Apolos naio mijikia ridukario rivano, ka rila nalo asaaro ka avurukar naio to rivijalo. Mia bogoti napano naio bano-o bokar

vio na, naio miija vatitig nalo napano Atua kiano tiniememiano milalo amonea ruei. <sup>28</sup> Naio mijailo napano ea tomu nalo miralo, naio jilogloglo ka jum̃abe ana kulo Ju nalo amilaluv m̃arabo, bior naio ber meravo ka iliano telabo napano ajua Vivitauiano Lu napano aberenio meravo vatitigio ka Yesu naio be Naverikariano riano. Ana bogo napano kulo Ju nalo amijog kiano verloglogiano nei, nalo maka bunu ajikia aver titai bereio.

## 19

*Pol naio joa vio Eveso bereio*

<sup>1</sup> Naruei bogo napano Apolos naio ba jo kia ga Korin vo, mia Pol naio jo miel jel ea kiano m̃arabo napano jel ea tanobuku na mave ea suku nalo, naruei naio jakii m̃arabo nene banbano-o binimei boru Eveso. Naruei ea vio na, naio bano-o miyotuba ka taara na telisu na naiagagoano nalo kialo napano nalo aju, <sup>2</sup> ana bogoti tai, ana na naio bika denlo, berinavo “?Mia bogoti napano kamiu kumonea Yesu, mia kumijev Niununo Lu rimei ea kamiu ka bogoti na, p̃eli na maka kuvijevio?”

Naruei nalo aberdo p̃e, aberinavo “?Ana Niununo Lu na vabe na? Kumemi maka lele nuvijog kija vo ka be titai jibe na.”

<sup>3</sup> Ana na Pol naio bika denlo bereio berinavo “?Mia bogoti napano abaruei ea kamiu, mia kamiu kumial ka sano nene be venia?”

Naruei nalo aberdo p̃eio, aberinavo “Abaruei ea kumemi, numial jibe ka ga varueiano nanua Jone naio jo m̃a milaio.”

<sup>4</sup> Ana na Pol naio berloglog vatitiglo, berinavo “Nao, nina bo ga na, ana varueiano napano Jone naio jo m̃a milaio nua ban tomu nalo, naio jibe ka kijokijo ga tai ka ber ka tomu nalo nei abiliglo ruei, mia nina maka riverenio ka tomu nalo nei amonea Yesu ruei na. Mia

Jone naio mijikia vite nei bunu, bior ka napano naio binimej jukamu, mia jomã ber ka tomu nalo bere-nio monoka amonea nana mia naio rimej iorou kanio, jibe ka Yesu.”

<sup>5</sup> Mia nalo na vio Eveso amijog Pol kiano navervisivisiano nei, mia amial bo laka ka avokar varueiano ealo bereio, ana na nalo abaruei ealo ea Tubo Yesu siano. <sup>6</sup> A ka bogoti na, ana Pol naio jokol pariparilo, naruei Niununo Lu binimej ealo, mila ana nalo ajumã amijev ka iliano dolu nalo, a mila bunu ajumã aber bulavulag bunu iliano tealò napano mã Atua jian banlo. <sup>7</sup> Ea kialo taara na telisu nei, mirano nene titai jibe kanio duelimo ba juo [12] ga.

<sup>8</sup> Naruei Pol naio jo Eveso siberio tolu [3] bereio, mia bogo nonovio naio jomã ba joomo ea kulo Ju nalo kialo yimo na volkouano, mia mila iliano telabo banlo. Mia bogo tai na maka rialerinio ealo, mil kirisikili banlo, bogo tai bilvili ealo, a bogo tai jegidu kalo ka mia nalo amei jouro ea Atua kiano nave-natuboiano. <sup>9</sup> Mia naio mila jibe na banbano-o, mia mial ka napano bijuku deio, bior nalo pariparilo kirisikili ga, mia nalo maka asidomii ka amonea leleio. Ana nalo tealò ajumã aberii niegeniege lelan Marabo Vou nei ban kulo dolu nalo joomo ea yimo na volkouano nei, ana na Pol naio jumolu burubulag bereio naiagagoano nalo, ajaluvo den kulo Ju nalo nei, mia legiano nonovio nalo aba abior a amioliolu ban tomu nalo na ea yimo na teninio na toro nei Tirenas kiano. <sup>10</sup> Nina, Pol naio jomã milala jibe na banbano-o bokar yuka juo [2] bereio, naruei mila ana tomu nalo na burumãara tanobuku nei Esia, kulo Ju nalo naliko tomu dolu, nalo nonovio amijog Tubo kiano iliano.

*Tomu tealò abolkouo ea Yesu siano amilaluvio*

<sup>11</sup> Ana bogo napano Pol naio jomã mimãu jibe na yako Eveso, mia

Atua mimãu ea naio, mila burutomoluo na tortoru nalo telabo ka rijai tomu nalo. <sup>12</sup> Mia verenio niati kulumãarauo na telisu tai, ðeli na soto tai, mia tomu nalo abario ba ban Pol bu veveio jukamu vo, bisi ana abar bano, aburu ea tomu namieiano nalo niabelo, mia kulumãarauo nalo nei amijil bulag kialo mieiano nalo, ðeli na niununo va nalo napano ajualo.

<sup>13</sup> Ana ka bogo na, kulo Ju tealò bunuaju ajanea tomu nalo,aju amijidig bulag niununo va nalo denlo. Nalo nei maka amonmonea Tubo Yesu, mia bogo napano amijog ka napano Pol mimãu jumãbe, mia nalo bunu ajidomii ka mia ala vonio ka mia aimãu ea moroano na sio nene. Mia bogo napano amijidig bulag niununo va, amil banio, aberinavo “Nuber kaso memedu ea Tubo Yesu napano mã Pol jomã mioliolu kanio, ka jau kataluvo den toro na.”

<sup>14</sup> Ana be bogo tai, m̃eaku nalo tealò bunu ajidom ala vonio tibe na. Nalo na, nalo kiritete aluo na toro tai na be parinio toro lu ka kulo Ju nei, napano siano Skeva. <sup>15</sup> Naruei nalo nene abinimej abolkouo ka toro tai napano niununo va joaio, naruei amil ban niununo va nei ka taluvo denio, mia niununo va nei naio tinien jerlo, berinavo “Mo, kiniou nemijikia sio na Yesu, a nojo nemijog sio na Pol bunu, mia kamiu kenia? !Kiniou maka lele nejikia kamiu, kamiu kuvitkar kamiu vo!” <sup>16</sup> Mia kolvare ga, toro nei biako binimej ealo, midonilo bano-o jovulu nalo aluo neibano, mila niegeniege tanealo napano mijede bulag nonovio m̃alo kulumãarauo nalo. Naruei nalo aburo den vio nei napano amijeljel lulua ka salo burukija naruei. <sup>17</sup> Naruei tomu nalo aberii vite nei bano-o bokar Ju nalo naliko kulo dolu nalo, mila na nalo na vio Eveso abiniu amijogio, mia vite nei mila ana nalo amemebiju kija, ana abamenea Tubo Yesu siano lie vo.

<sup>18</sup> Ana iorou kanio, ana nalo telabo kalo napano vonganei abin-

imei abe namoneano nalo ruei, nalo abinimei aber bulavulag ka ajumña abar semei, a aber bulavulag vite nalo namña ajumña amimñaukanio ea burisolu nalo. <sup>19</sup> Mia nalo tealó napano abe tomu na burupati burisolu memedu, abarvar vite nalo namña amimñau bijaio, jibe kanio kialo niosi nene nalo binimei vio takurano, naruei kamu ea tomu nalo miralo napano aju amialio ka bogo na, abuku nonovio ban ea sebi. Niosi nalo nei miroano laka, mia bogo napano ajumña ajidomii sano puruveru nonovio nene nanua beamu abulu kanio niosi nene nalo, amialio jibe ka burutomoruo laka, jovulu taamñaka [1,000,000] puruveru telabo laka. <sup>20</sup> Mia bogo napano vite nalo na jibe nei amalmaluvo, mia nalo aju amialio ka Atua kiano moroano mimñau jikili laka, mia amialio ka napano Tubo kiano iliano jomña mikulkulu ba buru tomu ta bunu lie vo ea vio nonovio.

#### *Siniabu toru ea vio Eveso*

<sup>21</sup> Mia Pol bitilubar ka Atua kiano imñauano jo bavin, ana mijog ea naio ka monoka rimñau rivan lie vo, ka mia selivivi rivitii veve bereio tanobuku nalo na vio Masetonia vija vio Akaia, yako Kris, a karina, mia naio riva Yerusalemo bereio. Ana naio berkario bunu ea bogo na, berinavo “Mia iorou ka napano kiniou navan bereio Yerusalemo, mia monoka neiel bereio navan lie vo, monoka najaka-o novoru Romo.” <sup>22</sup> Mia naio mial ka mia naio monoka to bogo ve telisu kija bereio beamu vo ea tanobuku na vio Esia vija burumñara komeli nene nei Eveso, naruei kiano tomu juo na ijaiano nei, Timoti naljuo Erastas, naio milalo ajukamu aban ea vio Masetonia.

<sup>23</sup> Ana ea bogo na, napano Pol naio jo kia ea vio nei Eveso vo, ana burumñara siniabu tai jumolu tivelinio ka Marabo Vou na Yesu kiano. <sup>24</sup> Vite nei, burupati nene napano kulo Eveso, aberenio kanalo atua, naio be tira tai, siano Atemes,

a nalo ajumña abolkouo ka kanano burumñara tavoru na ea burumñara yimo lu na kanano. Mia toro tai na vio na, siano Timitrias, naio buru tomu telabo abinimei amimñau kiano, napano ajumña amimñauka kiri tavoru sesa nalo na yimo lu na atua na tira nei kanano, nalo amimñaukanio ea verumera, ana tomu nalo ajumña abulu denio, napano mia naio naliko kiano tomu nalo abar tanea puruveru miroano biorio.

<sup>25</sup> Ana iorou kanio, naio mial ka napano imñauano na mña Pol jomña milaio naio jomña muedom kanano imñauano nei ruei, ana bogoti tai ana naio bio ban kiano tomu nalo, naliko tomu dolu nalo napano ajumña amimñauka vite nalo ea verumera, naruei bogo napano nalo abinimei vio takurano, mia mil banlo, berinavo “Mo, tomu nalo, kamiu kumijikia ruei ka kito roju romeul ea ga kanado imñauano neibano mña kito rojumña romimñauka vite nalo ea ga verumera. Imñauano na ga mila ana kito rojumña rabar kija puruveru. <sup>26</sup> Mia neber ðeli kamiu kumijog ruei, ðeli na kito tai romial ka mirado, ka napano toro nei Pol naio jo bilig tomu nalo kanalo jidomiano nalo aju abano be dolu. Naio jomña mila ea vio na, a jomña mila bunu ka komeli nonovio na burumñara tanobuku na kanado nei Esia, napano jomña berloglog tomu nalo ka tavoru nalo napano mña jumñano toro ga mimñaukanio, nalo maka ave atua riano leleio ga. <sup>27</sup> Ana kiniou nemialio ka toro na kanano iliano na mia rila kiado imñauano nei rivatove laka, ka napano mia tomu nalo asidom re bunu ka mia avulu vite nalo napano mña kito romimñaukanio. Mia mave ka nina, kitoliko kulo Esia, a vija bunu tomu dolu reraio ea yetemeriba nei, rojumña romilotu ka kiado atua na bo nei Atemes, mia ðeli toro na naio jidom rivuku lelan naio kovio, ðeli na naio jidom rila kunuano lu rimeiri rive vite kurano ga tai kovio.”

28 Naruei bogo na nalo ami-jog iliano nei, amila legleg tinielo ana mila tiniel mimi toru laka, mia ajumã amiaia ga aberinavo “Atemes na Eveso naio bo mia, naio ga takurano kito rojidomio-o!”

29 Ana na abitunu vatitigio, naruei aba amila burumãara uetubaiano ea komeli, ana aba abokar Kaias naljuo Arestakas, tomjuo na vio Masetonia napano naljuo ajumã amiel naliko Pol abinimei ajua vio nei, ana aburulo, ajikiti kalo aba joomo ea burumãara vio na vioriano na Eveso nei, mia kulo Eveso bunu aba naliko, abano amison vio nei bujo vatitigio.

30 Naruei Pol jidom ka riva joomo bunu ka mia rilavonio ka ril van tiniobi nei, mia naiagagoano nalo na vio Eveso amerou ka mia aue beleaio, ana na aberbure naio. 31 Mia tomu na tortoru tealo na m̃atatoko komeli na kulo Esia kialo, nalo amila bilbilu bo naliko Pol, naruei nalo bunu amiila toru binimei, abika jikili den Pol ka mia naio rivan re joomo, mila ana naio maka bunu rivano bereio.

32 Naruei joomo ea vio nei, tomu naloaju amila burumãara m̃aduano, nalo telabo amil vaarakurano, tealo amil ban jibe nei, a tealo amil be dolu, a nalo telabo maka lele ajikia ka naloaju bior kar venia.

33 Naruei kulo Ju nalo amerou ka mia tibe m̃a na averenio nalo naruei abe burupati na siniabu nei, ana na nalo amiyukular nalo tai, siano Aleksada, naio ba jumolu jukamu ea tomu nalo nei miralo ka rilavon ka ril vanlo ka tiniel ser re nalo kulo Ju nalo. Naio buku jumãano ka rila atu melumu ga, mia nalo be kialo jidomiano ruei ka aberiamã naio be toro na siniabu nei tai naruei. 34 Ana karina, bogo napano abitilubar ka naio be toro Ju ga tai, mia m̃aduano nei naio maka lele rivatove, miaaju amiaga burutomoruo ea tira na be kialo atua nei siano, amiaia ga amidu buron joolo kanio, aberinavo “!Kenememi Atemes kumemi kulo Eveso naio bo-o! !Kenememi Atemes naio takurano ga bo-o laka-o!” Mia

nalo ajumã amiaga jibe na ba bokar aura juo titai jibe na.

35 Mo iorou kanio, ana tubo tai na vio Eveso nei naio jumolu jukamu ea miralo, naio milavon ka amelumu bereio bano-o bisi, ana naio ber kalo, berinavo “Tomu nalo na vio Eveso, kito nonovio romijikia batitigio ruei ka kiado komeli nei naio be burumãara komeli tai, a naio be komeli lu tai. Kito naruei, rojumãa robitikar yimo lu na kiado burumãara atua nei, Atemes, a romijikia ka kiado moneano be riano, bior nanua beamu, m̃arivitano tai mijoru, ana sano burumãara puruveru lu nei mijoru jel tiniabene binimei, napano maka rijoru ea vio dolu, mijoru ea kito ga, naruei kito roju robitikario bo. 36 Vite nalo na romijikia ruei ka abe riano ga, tomu nalo na vio dolu nalo maka ajikia aili lelan leleio. Verenio tibe na, mia bo ka kito ralavon ka rotu rivu damariga. 37 Ana ea tivelinio na naljuo nei napano kamiu kuburulo abinimei ea vio nei, kiniou maka nojog ka napano kuverenio ka aba abina ka vite lu tai ea yimo lu na kanado atua, p̃eli na amiolua siano, ana tibe na mia maka rejikia rala titai ka naljuo ea vio nei.

38 “Mia verenio tomu nalo na amimãauka verumera nei, jibe ka Timitrias nalo, verenio nalo be kanalo veriano kia navo ka ala ka tomjuo nei, mo, be kiado komeli naloaju, mia be kiado natibureano naloaju, mia verenio nalo aial ka tumãabe ana amijikia avurulo ava ail vanlo ea sano vio nene. 39 Mia verenio kamiu kuvisidomii ka be titai kia navo ka rovinu rovitio bereio, mo bo, romijikia rovitio ga ea kiado viorian tai bereio.

40 “Nina, bior ka napano bajago namãa rojumãa romilaio banei, kito raba koalabo laka ruei na. Maka lele ve vite tai rimemedu ka napano mia kito romijikia rala burumãara m̃aduano nei rivorio, a verenio makan, p̃eli ana mia tomu na tortoru nalo na vio Romo mia nalo

avuku kito ea nalakoiano navo kario kiado iñauano nana banei nene.”

<sup>41</sup> Mia bogo napano naio berenio iliano nei bisi, mia tomu nalo kanalo jidomiano nalo abavatove bo bereio ruei, naruei naio jetavoko iliano ana naio ber kalo ka nalo amijikia aieliel dedade bereio.

## 20

*Pol miadu bereio ka namoneano nalo ea vio Masetonia bija ea vio Kris*

<sup>1</sup> Mia be legiano tealo bereio, bogo napano burumñara mñaduano napano kulo Eveso nei nalo amilaio batove bereio, mia Pol naio bio namoneano nalo abinimei vio takurano, naruei naio jian iliano novo banlo ka atu sikili lie vo, naruei naio mil maariano banlo, ana juvanlo, ba Masetonia bereio. <sup>2</sup> Ana ea vio na, naio ba miel jel ea kiano tanobuku nalo, mia ea vio nonovio naio jomña mijai tomu nalo ea kiano iliano novo nalo, ana iorou kanio, bavin bere Kris, napano bulukomeli labo nene naio be Korin. <sup>3</sup> Naruei Pol naio joa vio na bano-o bokar siberio tolu, naruei naio jo jidomii ka sel ea uako tai napano naio jo, ka mia rivian ea vio Siria bereio. Mia vaataro ka avuru veru, mia iliano boru ea naio berinavo kulo Ju nalo na vio na, ajumña amila jidomiano va tai ka alavan Pol ea bogo napano naio jo ban ea mñarabo togio kia ga vo, mila ana naio maka bunu rivian ea uako nene, mia midu mñarabo na tebievi, miel barlaka ba jeliviv ea vio Masetonia bereio. <sup>4</sup> Ana ea bogo na nalo tealo napano abano naliko naio, jibe kanio Sopata na vio Beria, napano Piras kenerinio, naliko Arestakas a Sekantas, naljuo na vio Tesalonaika, bija Kaias na vio Tepi, bija Timoti, a bija bunu Tikikas a Trovimas, naljuo na vio Esia.

*Pol nalo aju yako Troas*

<sup>5</sup> Naruei nalo nei tealo kalo napano aju naliko Pol, nalo ajukamu aba aboru Troas. <sup>6</sup> Ana Pol naio iorou bano, mia kiniou Luka, nojusolo bereio ea vio Vilipai, a

kumemi numila Jokoluolu Na Sinaiano Na Taba ea vio na. Bogo napano jokoluolu nei bisi, ana numisel ea uako, nuburo bano-o nubokar bogoti jumo, naruei nubinimei nuboru Troas, napano nalo napano ajukamu aju rorea kumemi eaio. Naruei kumemi nubiniu numitua vio Troas bokar bogoti aluo [7].

<sup>7</sup> Ana ea Legiano Lu, bogo napano mñerenio batove bisi, jibe ka napano legiano na be moti na bogoti aluo jikario naruei, kumemi nubior kumemi liko namoneano nalo na vio na, nubolkouo a nubure kokorovio joko lu. Naruei Pol naio jidomii ka ber mia nuvituvan kavijova kia ga vo, mia bior ninei be vioriano na maariano kumemi liko, be iliano telabo, mila Pol bunu mil vio tebievi, ba bokar bogiano viovare vaarakurano. <sup>8</sup> Naruei ea bogo nei, kumemi numitu nubior ea vajoomo tai mave ea vio vodobi tolu, mia tomu nalo abar yulu telabo binimei, ana mila vio bituvitunu toru laka joomo.

<sup>9</sup> Naruei mñeaku tai, siano Yutikas, naio jomña jotano ea bulukujegi, mia bogo napano Pol jomña mioliolu jiou bano-o, ana mñeaku neibano mirano jouo mia mirano jouo. Naio mila jibe na banbano-o monmelio bobogu naruei, mia amiilo kanio naio mijoru ea bulukujegi nei, mijoru batove tavio ban manenea naio ea borotano. Vio nei naio jo laka mave, naruei bogo na ajikiti abatove, abokar naio, mia amialio ka napano mñaro ruei. <sup>10</sup> Mia Pol bunu batove ka rial naio, naio mon korkoro ba tove, miabukario ka jumñano be juo, naruei naio ber kalo, berinavo “Kamiau kuvijog rivova re, kuvitigio re, vonga nei kiano meuliano binimei ea naio bereio ruei nei.”

<sup>11</sup> Ana na Pol nalo abavin bereio, ana nalo amijev Sinaniano Lu nei, karina na nalo ajinan, ana iorou ka nina, ajukunu bereio bano-o viomijeni konlo, ana na Pol juvanlo bano. <sup>12</sup> Ana tivelinio ka mñeaku nei, nalo aburu naio meul batitigio bereio jo

naliko aba vonuo, a nalo amijog bo toru laka ka napano Pol mila batitigio ñeaku nei banlo.

*Pol nalo ajua ñarabo ka avan bereio*

<sup>13</sup> Mia Pol naio ber ka kumemi ruei berenio nuvitukamu nuvisel ea uako, nuva nuvitu rorea naio ea komeli na vio Asoso, mia naio rime iorou, riel ga sel uro. <sup>14</sup> Naruei kumemi nubano nuboru Asoso, karina naio binime iorou, binime ñave ea uako, naruei kumemi nubiniu nubano nuboru ea bulukomeli na vio Maetilin ea uleule sesa tai.

<sup>15</sup> Karina, kumemi nuburo-o nubokar legiano takurano bereio, mia nubauro numijaka ea uleule sesa tai bereio, siano Kiosi, a iorou kanio nina, ea legiano dolu nene, kumemi nubinime nuboru ea uleule sesa na Samoso, mia legiano dolu nene bereio, ana nuboru ea komeli na vio Maelitas ea tanolabo, naruei nubauro ea vio na. <sup>16</sup> Ea bogo na, kumemi nubarlaka ga ea vio Eveso jibe na, maka nuvauro eaio, bior Pol naio mial berinavo maka rivu ka kito rodu bogo ve telabo laka ea tanobuku nei na vio Esia, bior naio jo jidomii ka verenio nuvijikia nuvila, mia bo ka nuvoru Yerusalemo rimemedu ka bogo na Jokoluolu na Yuvi.

*Pol naio joa vio Maelitas, naio mil maariano ban navurimñaraboiano nalo na vio Eveso*

<sup>17</sup> Naruei ea vio Maelitas, Pol miila toru ban ea vio Eveso, berinavo navurimñaraboiano na nalotutano nalo amei aial naio. <sup>18</sup> Naruei iorou kanio ana nalo abinime, ana Pol berial kiano iliano na maaro banlo. Naio ber jibe nei, berinavo “Kamui, kamui kumijikia batitig kinio bo ruei, napano jikar ea bogo napano nebinime be moti garuei ea kiado tanobuku nei, na vio Esia, binime bokar vonganei, kinio nojo bija kamui bogo tebievi ruei. Mia kumijikia batitig kanaku bajago bunu a kanaku iñauano nalo

na Tubo kanano napano ña nemilaio ruei. <sup>19</sup> Kamui kumijikia ka iñauano nalo na, nojoña nemilaio napano kanaku jidomiano melumu ga, a nemilaio ea jogumiraku, a nemilaio bunu ea bogokouo naio napano kulo Ju nalo amila ban kinio, napano miyotuba ea kialo tiniemimiano nalo kar kinio. <sup>20</sup> A kamui kumijikia batitigio bunu ruei, napano iliano nonovio napano memedu ka averenio, napano mijikia riija kamui, iliano nalo na maka noimou ka naverialio van kamui, ñeli na maka nemerou ka neverloglog kamui kanio, nina ea bogo nalo napano kito rojua vio medave bija tomu telabo, ñeli na ea bogo nalo napano kinio nojoña nemiel jeliviv ea kunuemiu nalo. <sup>21</sup> Mia kinio nemil ban kulo Ju nalo ñeli na nemil ban nalo napano maka ave kulo Ju, mia maka neialerinio, mia nojo nejikili kalo, neberial banlo, neberenio nalo nonovio monoka aviliglo amei ea Atua, monoka amonea kiado Tubo Yesu Kristo.

<sup>22</sup> “Mia vonganei, kinio nojo naban bereio yako Yerusalemo, mia maka nejikia venia mia kulo Ju nalo ala van kinio ka bogo napano mia novoru ea vio na, mia nomijog lubar ea kinio ka Niununo Lu naio joña buru kinio jibe na, naruei monoka navan ga. <sup>23</sup> Mia Niununo Lu naio joña mila kirimeravo ban kinio ruei ka napano ea bulukomeli nonovio nalo napano mia notoña navan ealo, mia monoka novokar bogokouo nalo, mia tomu nalo aju rorea ga ka mia avuku kinio navan ea nalakoiano. ?Tenene na kinio nemial ka ver kinio navan yako Yerusalemo, ñeli mia tibe na ga bunu bo? <sup>24</sup> Mia naio bo ga na, bior napano maka nevitii kanaku meuliano naio rive vite tai, ñeli na mokotenaku, ka monoka nesidomii ñelea, ñeli ga. Mia kinio nejidom titai takurano ga, ka mia nemijikia novuro ga rivano-o mia novokar

juluvati na iñauano napano Tubo Yesu midu joaio jumaku, ka napano monoka neverial Ioluano Vou na Bo na Atua kiano na tiniememiano ea vio reraio ga.

<sup>25</sup> “Ana vonganei, nemijikia bunu rui ka kami napano nojomã nãjanea kami, napano nemiololu ka Atua kiano navenatuboiano ban kami, nemijikia ka mia kami nonovio maka lele kuvijikia kuvial miraku bereio bogo tai. <sup>26</sup> Verenio tai ka kami maka rudu Atua kiano iliano nalo ea kiano meuliano vo, napano mã neber ka kami rui mia naio riva kovio, mia verenio naio riva kovio, kiano burukija ritoa naio, mia ritoa re kiniou, <sup>27</sup> bior kiniou neberial m̃arabo ban kami rui, mia kiniou maka noduvan Atua kiano jidomiano leleio ka kami.

<sup>28</sup> “Naruei kami navurim̃araboiano nalo, bior Niununo Lu bitiri bulag kami javukia tomu nalo na m̃a abitkar nunu nalo na Atua kiano nalotvano nei, napano naio bulular ka burukija na kenerinio kanano, naruei kami monoka kuvitkar vatitig kami, a monoka kuvitkar vatitig nalo na. <sup>29</sup> Nao nejidom never ka kami, bogo napano ka mia kiniou nataluvo den kami bisi, mia nemijikia ka mia kuli deden nalo amei, aser niegeniege lelan kenemi nunu nalo, mia nalo ala von ka ala dedade ealo, ava aveve terakurano. <sup>30</sup> Mia kiniou nemijikia never bunu, ka mia iorou kanio, mia kami tomu na tortoru tai ka kami ga, mia nalo atumolu, mia aver ilivoviano na sibiano ve telabo, ka ala von ka avuru bulag naiagagoano nalo ava atakisorlo ga. <sup>31</sup> Tibe na, kami monoka kuvitu vatitig, a monoka kuvisirarago vatitig rivu, a monoka kuvisidomial ka kuvim̃au kouo tibe ka napano kiniou nemilaio ka bogo napano nojo bija kami bano-o bokar yuka tolu momou, napano bogo nonovio, ea legiano a ea bogiano, nojomã neberloglog tomu nalo, a neberial Atua kiano iliano memedu banlo, bano-o mia

jogumiraku m̃a jibirbili biorlo.

<sup>32</sup> “Mo vonganei, maka bunu toa jumaku ka mia nevitkar kami, miã nomidu kami kumitua Atua jumano ga. A nobolkouo ka mia lilianiano Vou na Bo na tiniememiano na kanano, mia naio tomã rijai kami, rila kami kuvitu sikili, a rila ka mia kami bunu, kami kuvijikia kuvar iliviano marai nalo napano mia Atua rivar iorou van kiano tomu lu nalo.

<sup>33</sup> “Mo nejidom kami monoka tiniemi rimaio ka bogo napano kiniou nojomã na kitoliko, kiniou nojomã nemim̃au jibe na ga, a kiniou maka neyabar ka kenemi saba novo nalo na jibe kanio kenemi puruveru nalo, p̃eli na kenemi kulum̃arauo nalo. <sup>34</sup> Mia maka neverenio ka mia kuvitkar kiniou ka saba nalo na, mia kiniou ga nebitkar kiniou ea iñauano na jumaku be juo nei, mia nebitkar bunu nalo napano ajumã amim̃au bija kiniou ea bogo nei. <sup>35</sup> Naruei ea m̃arabo na, a ea bajago dolu nalo bunu, kiniou nejiloglog ka kami, neber bo ka kito roim̃au kouo ka rajai tomu nalo napano amelukluku a abijukude, bior kito monoka rosidomial Tubo Yesu kiano iliano tai, napano berinavo ‘Verenio jau kovokar kiamo ijaiano tai, mia kojog rivu, mia verenio jau kesian ijaiano tai rivano, mia kojog rivu ve toru lie, iliviano naio toaso.’”

<sup>36</sup> Mia bogo napano Pol naio ber iliano nei bisi, ana nalo aminie, naruei naio bolkouo nalikolo. <sup>37</sup> Mo nalo ajikar ka ajegi naruei, mia abanjum̃alo naliko Pol, ajakia naio amijubaluba naio-o mia, <sup>38</sup> bior nalo ajumã ajidomial kiano iliano tai ga, napano ber mia aial mirano re bunu bogo tai. Kiano iliano nei naruei mila ana nalo amiel naliko, amiven binimeĩ bereio ea uako napano kumemi numisel eaio.

## 21

*Luka berii ka naio naliko Pol nalo, aba aboru Yerusalemo*

1 Ana kumemi numituvan nalo ajua vio nei Maelitas, ana nuburu m̄aaja, nubano memedu ga nuboru ea uleule sesa na Kos, ana numon ea vio nene. Viomijeni kavijo, ana kumemi numituvan vio bereio, nubano-o nuboru bereio ea uleule dolu na Rotis, ana numon bereio, viomijeni kavijo, ana nubano bereio, napano nuboru ea bulukomeli na Patara ea tano labo. 2 Ana kenememi uako nei naio ba boru ga ea vio na ga, ana numitabulu nubauo. Ana bogo napano numileal bereio uako dolu tai napano ban yako Vonisia, ana nubavin eaio, ana aburu m̄aaja, ana numitua kenememi m̄arabo bereio. 3 Kumemi nubano ga jibe na ea burum̄ara tinia tei na toru, ana nubitigar ga burum̄ara uleule na Saipras, ana numituvan joa kenememi va mal ga, ana nubano-o ka mia nuvoru ea tanobuku na Siria napano numisidom ka nuvan eaio. Uako nei naio bar togogo nalo ka riva tuvanlo ea bulukomeli na Taia, ana bogo napano nubano nuboru ea vio nene, ana nubauo eaio. 4 Ana nubano numisirav naiagagoano nalo ea vio nei, ana iorou kanio ana numitu kumemi liko bano-o bokar legiano aluo [7]. Ana ea bogo na, nalo amial napano Niununo Lu jiloglog nalo napano mia tum̄abe ka Pol yako Yerusalemo, ana amil banio, tinielo ka averbure naio ka mia naio rivan lie re ka mia naio rivokar vio nei. 5 Mia Pol mijog ea naio, ber p̄eli ga, monoka naio rivan ga, ana iorou kanio, kumemi nuban bereio ea kenememi m̄arabo. Ana ea bogo na, sum̄ano nalo a tire nalo naliko kiritete nalo, amiel kumemi liko nuba tavio ea kanalo bulukomeli, ana amiven kumemi nubatove bereio ea kenememi uako. Ana kumemi nubiniu numinie ea bayono, ana nubolkouo ka kumemi, bisi ana nubanijumememi kalo. 6 Ana nubavin bereio ea kenememi uako, ana nalo aban bereio aba vonuo.

7 Ana kumemi numituvan vio Taia, ana nuburo nuba ea m̄arkomeli na vio Tolimeas, ana ea vio na nuba nubitavo bija kuruado nalo, numitu kumemilikolo ea ga legiano takurano nei. 8 Ana kavijo, naruei numituvan vio nei bereio, ana nubinimei nuboru ea bulukomeli na Sisiria, ana ea vio nei naruei, nubauo nuba numitua toro na Lilianiano Vou na Bo nei, Vilip, kunuano, napano naio naruei naio be nalo aluo nei tai napano abitiri bulaglo beamu ka aija iñauano, nene yako Yerusalemo. 9 Ana Vilip nene, kenerinio vevinio nalo veri aju vonuo, nalo maka asoro vo, ana nalo nei, bogo telabo Atua jom̄a jian iliano banlo, ana nalo aberialio ban tomu nalo. 10 Ana kumemi numitua vio nei kumemilikolo ka legiano tealoe ruei, ana naverialiano tai juvan vio Yutea binimei rove ea vio nei, toro nene siano Akapusi. 11 Ana naio binimei ea kumemi, jidom rila tovorovo tai van Pol, ana bar Pol kiano kulum̄arauo tai, m̄enkar jum̄ano bija jaano kanio, ana berial, berinavo “Niununo Lu berenio berinavo ‘Toro napano kiano kulum̄arauo nei, mia kulo Ju na vio Yerusalemo, mia aiorikario tavukia ga, naruei iorou kanio, ana ala naio rivan ea nalo napano maka ave kulo Ju nalo jum̄alo, napano mia ala searo vanio.’” 12 Naruei ea bogoti napano kumemi numijog iliano nei, kumemliko nalo napano aju ea bogo na, nubitig Pol, numisikili ka naio nuberbure ka naio ka maka rivu ka rivan bereio mave yako Yerusalemo.

13 Ana Pol berdope ban kumemi, berinavo “Ee, tomu nalo, kamiu kumitum̄a kumiteg jibe na, mila nemijog jibe ka mia kiaku iviso rivurkokorovio ga. Mia vite nonovio naio bo ga, verenio nalo na vio Yerusalemo adu kiniou notoa yimo na nalakoiano rivior Tubo Yesu siano, nina naio bo ga na, ana verenio sikili ga tibe na rivano-o mia nam̄aro, nina kiniou najaaro ka ga.”

14 Ana kumemi numilavon ka nuver-bure naio tibe na-o mia nubure deio ga, ana nuberenio ga, nuberinavo “Bo ga, mia monoka tibe ka ga na Tubo naio jidomio.”

15 Ana kumemi numitu legiano tealó bunu ea vio na Sisiria, naruei iorou kanio, ana numila batitigio kenememi basaro nalo bereio, numituvan vio nei, ana numiel nubavin yako Yerusalemo. 16 Ana na naiagagoano nalo tealó na vio Sisiria ajakisor kumemi bunu ga, ana bogo napano nubinimei nuboru Yerusalemo, ana aburu kumemi nuban ea toro na vio Saipras tai kunuano, ka napano mia nuvitu kumemliko. Toro nene, naio bunu be naiagagoano tai napano be moti, napano nalo amonea Yesu garuei jukamu, a naio siano, Nasono.

*Ea vio Yerusalemo, Pol ba mial Yemesi*

17 Ana bogoti napano kuruado nalo amial kumemi nubinimei nuboru bereio ea vio Yerusalemo ruei, mia ajaaro toru laka. 18 Naruei numon, viomijeni kavijo ana kumemliko Pol, nubano numaluvo ka Yemesi, ana navuriñaraboiano dolu nalo na nalotvano na vio Yerusalemo bunu nalo aju ea bogo nei. 19 Ana nubanjumememi kalo, naruei Pol mil banlo, naio berial vite nonovio beve terakurano napano Atua milaio ruei, miyotuba ea iñauano na kanano, nina ea nalo napano maka ave kulo Ju, napano naio jomña ba jeliviv ea kanalo vio nalo.

20 Ana bogo napano nalo amijog veriiano na Pol nei kanano, ana mila nalo amijog bo laka, ana amiaia Atua biorio. Mia ka bogo nei, be iliano nalo telabo bunu yako Yerusalemo, napano kar Pol, ana nalo amijikia vite nei, naruei aberii ka Pol, aberinavo “Tavaliki Pol, jau komijikia ruei ka ea vio nei nalo menu tealó napano amonea vonga, nalo abe kulo Ju ga nalo, a jibe kanio napano jau komijikia, tomu

nalo na jibe na amijikia atumolu atu sikili laka ea kiado tuboiano moruo nalo. 21 Mia nalo amijogio ruei, ka napano tomu nalo ajumña aberveriiso kirivova, aberenio jau kojomña koberloglog kiado torogio nalo kirivova napano ajua buru-venuo dolu laka yako. Aber jau kojo koberloglog searialo, kober bo ka atuvan tuboiano na Mosis kiano vija kiado bajago moruo nalo, a bo laka ka ala re bunu pakuveu ea kenerilo nalo. 22 ?Ana mia kito rala vaio naruei, bior iliano nalo nei amila nalo tiniel jerso mñele ruei? Ana vonganei, mia vesiou re, ana mia monoka ajog bunu ka jau kobinimei kojoa vio nei ruei. 23 Mia bo ga, jau kala ga tibe ka napano kumemi nuverenio ka jau, bior numileal mñarabo tai ruei napano mia jau komijikia kala ka mia koue bulag kialo tiniemimiano nei. Mia monoka kala tibe na: ea vio nei, be kenememi tomu nalo ver napano beamu, nalo amila verikariano na jikili tai ban Atua, aberenio mia aveli ka vite tealó nalo rivano-o rivokar bogo na jibe nei. 24 Ana beni, naio be kanalo bogo ka monoka avan ea Atua Kunuano Lu, ka ala vite nalo ea tivelinio na kanalo verikariano nei, jibe ka volkouano nalo, bija ijaiano na meravo, a vite nalo na jibe nei ka rila ana amijikia avuronbijiilo bereio. Ana numial nuber bo ka verenio jau bunu kavan rivijalo, jau kava koto vijalo ea bogo napano ala vite nalo nei, ana vite reraio ga nalo napano monoka avulu ea bogo nei, bo bunu ka verenio jau ga kovitiilo. Ana verenio kala tibe na, ana mia tomu nalo aial ka jau kobe toro tai napano kojo kajaaro ga ea tuboiano na Mosis kiano bija bajago nene nalo kia ga, ana mia ajikia iliano napano amijogio, napano beriiso, naio maka rive riano ga. 25 Ana ea tivelinio na nalo napano maka ave kulo Ju, napano nalo amonea ruei, kito roberii vite nei nua ruei, ana kiado iliano

napano roberenio nanua ruei, ana kumemi nubivitauiā ea mosi tai ba banilo rui. Kumemi nuberial banlo, nuberial monoka nalo aveli ka sunbue nalo napano kulo dolu nalo amila sida kanio ban kanalo tavoru nalo ruei, a monoka asen re burukija, a asen re sunbue na temeul nalo napano sano ja maka riou kon vo, a mia monoka ala re bajago nalo napano bova, jibe kanio siakiano, p̃eli na siakaiano.”

<sup>26</sup> Naruei Pol ba mila jibe ka napano nalo aberenio, napano ea legiano dolu, ana naio buru nalo veri neibano, ba mila ijaiano na meravo nalikolo, a ba joomo ea Atua Kunuano Lu bunu bijalo, ka rijogio verenio kanalo verikariano naio riva rivokar legiano ve vio, ana monoka asian kanalo ijaiano nalo veve terakurano ka verikariano nei ea legiano vaio. Ana aberenio legiano ve aluo [7] rivar laka, ana mia atikar ka ala vite nalo nene.

*Abokar Pol jo joomo ea Atua kiano Yimo Lu*

<sup>27</sup> Ana ea bogo nei, kulo Ju tealo aju joomo ea Atua Kunuano Lu napano ajumolu ea tanobuku na vio Esia, ana abinimei, ninei ea vio nalo napano Pol jeliviv ea beamu ruei. Ana bogo napano bogoti aluo [7] na verikariano na Pol nalo kialo vaataro ga ka riviniu, ana kulo Ju nalo neibano amial napano ka Pol jo joomo ea Atua Kunuano Lu. Ana nalo amila burum̃ara m̃aduano, aba abokar Pol, ana ajukunu niegeniege naio ban tomu nalo, <sup>28</sup> amiaga ealo, aberinavo “!Ai, kamiū kulo Israel nalo, kuvijai kumemi ka toro nei! !Toro nei naruei naio ban ea vio nonovio, ana jom̃a berii niegeniege kito kulo Ju nalo, napano robe Atua kiano kulo lu nalo, a naio jom̃a berloglog niegeniege tomu nalo berkiado tuboiano bija kiado Yimo Lu nei, maka ave titenia. A kumemi numijikia bunu ka naio buru bena tomu nalo tealo napano maka ave kulo Ju nalo, abinimei jouro ea

tanobuku lu na Yimo Lu nei. !Naio binimei mila lelan tolu na Yimo Lu nei, bo ka kito rala titai ka naio!” <sup>29</sup> Nalo aber jibe nei, aberinavo Pol buru toro tai napano maka rive toro Ju binimei jouro ea tanobuku lu, bior napano amial Pol tavio ea m̃arabo ka napano naio miel naljuo Trovimas nei na vio Eveso, napano naio maka rive toro Ju, ana nalo aberiaña Pol buru naio ba joomo.

<sup>30</sup> Ana nalo ajum̃a amila jibe na joomo ea Yimo Lu, ana m̃aduano nene naio ban ea vio nonovio nalo nei ea bulukomeli bunu, ana milaio ana tomu dolu nalo ajikiti abinimei. Abinimei naruei abokakar niegeniege ga Pol, ana aburu naio ba tavio ea Yimo Lu nei, ana bogo napano aba tavio kario, ana kulo lu nalo ajetavoko vatitig m̃aratavo na tortoru nene nalo. <sup>31</sup> Naruei bogo napano ajum̃a aburu Pol ban ka ajidom ka auebinio rim̃aro, ana iliano binimei bokar toro na toru na kulo na mira nalo na vio Romo napano aju yako Yerusalemo, berinavo burum̃ara mira judolu ga mijian yako. <sup>32</sup> Ana toro na toru nene jumolu vaarakurano, bio kiano tomu nalo, naliko kanalo tomu na mira nalo, ana nalo ajikiti abatove ea vio napano ajum̃a amila burum̃ara m̃aduano nei eaio. Ana bogo napano tomu nalo amial toro na toru na mira nei binimei bokar vio nei, ana ajuvan Pol, maka bunu atukuio. <sup>33</sup> Ana toro na toru nene binimei, mil ban kiano tomu nalo, berinavo ava avokar Pol, ana avivikar jum̃ano tivelinio rivan ea nalo tai a tivelinio ea dolu tai ka marimieni. Naruei naio bika denlo, berinavo “?Ana toro nei naio be kei? ?A naio mila venia ka kamiū?”

<sup>34</sup> Ana tomu nalo telabo ajum̃a amiaga kokovio toru laka, tealo aber jibe nei, tealo aber jibe na, banbano-o mia toro na toru nei naio maka bunu rijikia rijoglubar iliano tai leleio ea tivelinio na vaio napano ajum̃a amilaio, naruei naio miila kiano tomu nalo berinavo avuru Pol

rivan bereio ea kanalo burusio.

<sup>35</sup> Ana bogo napano ajumña aban ea m̄arabo sesa tai, ana m̄arabo nene naio bujo ga ka tomu nalo napano ajumña tinielo ka ajidom atuku Pol kia ga vo. Naruei tomu na mira nalo aburu ga Pol bano, <sup>36</sup> ana taara na tomu nalo aju iorou kanio abinimei, ajumña abiovio kanio aberinavo “!Kuvuebin toro kirivova na a! !Kuvuebin ga naio rim̄aro!”

<sup>37</sup> Ana nalo ajumña abano, mia vaataro ga ka amei avokar m̄aratavo na ka mia ava jouro ea burusio na tomu na mira nalo nei, ana Pol bika den kanalo toro na toru, berinavo “Novika denso, kajamo ka kiniou nevika titai denso vo.”

Ana toro na toru nei naio miilo ka Pol mil jel Krik banio, naio berinavo “!A, jau komijikia ga komil jelea Krik! <sup>38</sup> ?Jibe na, kiniou nejidom neverii jau kobe toro Ijivi nanua maka vesiou ga ana milavon ka rila baravo, ana naio buru bulag tomu nalo menu veri [4,000] aban ea kanano taara na m̄a amuemue tomu nalo, mia nalo aburo abano ajuluku ea vio yauo? ?Jau naruei jau kobe toro nene, a?”

<sup>39</sup> Naruei Pol berdoṣeio, berinavo “Ee, makanio, kiniou nebe toro Ju ga tai memedu nei, mia kiniou nemijikia nemil jel ea Krik, bior nebe toro na burum̄ara bulukomeli na vio Tarsis, ea tanobuku na vio Silisia. Tenene na kiniou nejidom nevika denso ka jau kajamo ka kiniou ka neil kija rivan tiniobi nalo na beamu vo.” <sup>40</sup> Naruei toro na toru nei naio mijamo, ana Pol jumolu ju mave, ana buk jum̄ano ber amelumu, ana abinimei amelumu batitig bo. Ana naio mil banlo, mil jel ea kulo Ju nalo kialo iliano ga memedu.

## 22

*Pol mil ban nalo napano ajidom auebin naio rim̄aro*

<sup>1</sup> Naruei Pol naio mil banlo berinavo “Banalo, kamlika teta nalo, kiniou nejidom ka kamiu kuvijamo

ka kiniou never bisivisii vatitig vite nonovio van kamiu. Kamiu kuvia-gago vatitig rivu ka kiniou beamu vo.” <sup>2</sup> Mia bogo napano amijog ka Pol naio jom̄a mil banlo ea kialo iliano, napano mil jel Ipru, naruei nalo amelumu bo, ana ajidom ajog kanano iliano.

Ana naio berenio, ber <sup>3</sup> “Kiniou nebe toro Ju ga tai, jibe ka kamiu, a kiniou nemiyotuba ea komeli na vio Tarsis, ea tanobuku na vio Silisia. Mia bogo napano kiniou telisu kia ga vo, nebinimei ea vio nei, ea vio Yerusalemo, a nomila kakario ea naverloglogiano na Kamiliel, napano kamiu kumijikia batitigio naio ruei. Kiniou nojoa jaano, naio berloglog batitig kiniou ka tuboiano na kiado tormoruo nalo kanalo, bano mia kiniou bunu nomue jaano, nebinimei nebe naverloglogiano na tuboiano nene. A jibe ka napano kamiu banei, kamiu kumisidomii toru ka kuvila Atua siano rimei ve toru, kiniou bunu, ea bogo nanua, kiniou nemila Atua kiano iñauano bija kiaku meuliano momou. <sup>4</sup> Ea bogo na, kiniou bunu nebe toro tai napano m̄a tinieku jerlo laka napano ajumña ajakii Marabo Vou nei, napano kiniou nojom̄a nejeliviv ka nesiravo nalo na m̄a aju ajakii, ana kiniou nojom̄a nobokakarlo, a nojom̄a nobukulo aban ea yimo na tetavokoiano, sum̄ano nalo a tire nalo. Ka bogo na, kiniou nejidom ka nalo monoka am̄arm̄aro ga, a nejidom ka kialo m̄arabo nei naio ribisi soṣeli ga. <sup>5</sup> Mia vite nei, kamiu kumijikia kuvika den parinio toro lu vija navurim̄araboiano na kanano komeli, bior ka napano nalo amijikia batitig bo ka kiniou napano nemila jibe na. Ana ka bogo na, abivivitauia m̄esi tealó ka rila ka mia nemijikia nava nejili tomu nalo kario Marabo Vou nei ea kanalo vio nalo.

“Ana ka bogo tai, kiniou nomidu m̄esi tai jibe na, mia nejidom ka navatove yako Tamaskas ka no-

vokakarło ea vio na, ka noiorkakarło ka marimieni a ka novurulo amei bereio ea vio nei ka mia kanado tomu na tortoru nalo aje vironiano vanlo.

<sup>6</sup> “Ana ka bogo na, nojo nemiel nabano, mia legiano viovare, vaataro ka ga novoru Tamaskas, mia nemiilo ka napano kolvare ga buruñara mi-amioiano tai na vio mave mereralii vio napano nojoña nemiel eaio.

<sup>7</sup> Naruei vite nei mila ana nomijoru nabatove ea borotano, ana nemijog iliano tai berinavo ‘!Sol, o, Sol, o! ? Bior venia ana jau kojo komila lelan kiniou jibe na ka napano jau komila na?’

<sup>8</sup> “Ana na nebika denio neberinavo ‘?Ana Tubo, jau kobe keinia?’

“Ana kiniou nemijog mil ban kiniou bereio, berinavo ‘Yesu re Nasarete nene nei, napano jau komila bova banio, ninei be kiniou nene nei.’ <sup>9</sup> Naruei nalo napano aju iorou ka kiniou ka bogo na, nalo abitikar buruñara mi-amioiano nene, mia nalo maka ajog jooño nei napano joña mil ban kiniou.

<sup>10</sup> “Avona bisi ana nebika bereio, neberinavo ‘?Ana Tubo, mia kiniou nala tuñabe naruei?’

“Ana Tubo mil ban kiniou, berinavo ‘Jau kotumolu, keiel kava jouro ea vio Tamaskas ga, ana mia toro tai rimei riverial vanto iñauano nalo napano kiniou nemije vatitigio ju ruei ka mia jau koiñaukanio.’ <sup>11</sup> Ana nemijog iliano nei, mia maka bunu nejikia neial vite, bior buruñara mi-amioiano neibano naio mila miraku miununu garuei, naruei nalo abokar jumaku ga, aburu ñarabo ka kiniou jibe na, nubano-o nuboru Tamaskas.

<sup>12</sup> “Ana na maka vesiou ga, toro tai na vio na naio binimei mial kiniou. Naio be toro tai napano be Atua kiano riano, a naio monmonea kanado tuboiano, a kanado Ju nalo na vio nei nalo amial naio jibe ka toro novo tai laka, mia siano be Ananaias. <sup>13</sup> Naruei naio binimei jikili ju vaataro ka kiniou, ana mil ban kiniou, berinavo ‘Kuruaku Sol,

vonganei, neber ka jau miramo avu bereio.’ Ana ea aura nene ga jibe na naruei, ana nemijikia nemial Ananaias nene mirano. <sup>14</sup> Mia naio mil ban kiniou bereio, berinavo ‘Atua Tomoru na korobido nalo kanalo, naio berkarso nua ruei, ka mia jau naruei komijikia kejikia kanano sidomivaniano na toru tai, a ka mia jau naruei keial kiano Toro Memedu, a kojog kanano iliano. <sup>15</sup> Atua naio berkarso ruei, ka mia jau kava koverial ka tomu nalo ea vio nonovio, ka vite nalo na jau komialio a napano jau komijogio. <sup>16</sup> Mia vonganei ga, kito monoka rala vite tai beamu vo. Jau monoka kotumolu, kavaruie ea Yesu siano, naruei sio nei ga naio mia sekon bulag nono kiamo kariano nalo, ana mia jau komei komeravo ea Atua mirano.’

<sup>17</sup> “Avona kario, ana kiniou nebinimei ea vio nei Yerusalemo bereio, ana naban ea Atua Kunuano Lu, ka nejidom nobolkouo. Ana bogo napano nojoña nobolkouo, nemijogio jibe ka kiaku jidomiano ba kovio, <sup>18</sup> ana nemial Tubo mil ban kiniou, berinavo ‘Jau kala soñeli, kataluvo den vio Yerusalemo vonganei, bior ver nalo na vio nei, ver kotukunu vanlo ka venia napano nemila banso, mia nalo maka ajikia amonmoneaso leleio.’

<sup>19</sup> “Mia kiniou neberii ka naio, neberinavo ‘Ana Tubo, nalo amijikia batitigio kiniou ruei, bija venia napano ña nojoña nemilaio beamu. Nalo amijikia ga ka kiniou naruei nojo nejeliviv ea yimo na volkouano na kumemi kulo Ju nalo kenememi, a nojoña nobokar nalo napano amoneaso. A amial ruei napano nojoña nebitilo, a nojoña nobukulo aban ea nalakoiano, naruei nejidom neber monoka amonea kiniou ga ka nebe riano ga. <sup>20</sup> Mia nanua, bogo napano kanamo toro na Stevin, kiano burukija miou, nalo amijikia batitig ka kiniou naruei nojo bijalo ka bogo na. Bogo napano nalo

ajubabinio m̃aro, kiniou nemiijalo, a kiniou nebitikar batitig m̃alo kulukoti nalo. !Monoka nalo aiagago ka kiniou ga na!

<sup>21</sup> “Mia Tubo naio ber ka kiniou ga, berinavo ‘Jau kataluvo den vio na ga, kiniou nejidom neiilaso kavan ea vio nalo na koalabo laka, jau kavan ka nalo napano maka ave kulo Ju nalo.’”

<sup>22</sup> Ana binimej bokar aura nei, ana nalo nene napano ajum̃a amiagago ka Polaju amije tilinielo batitigio ga kanio, mia vonganei, kanalo siniabu ka naio binimej bereio, naruei naloaju amiagiaga ga bereio, aberenio “!Ei, bo ka auebin ga toro kiri bova na rim̃aro! !Kito maka rosidom toro na jibe na naio rimeul toa vio yetemeriba nei!” <sup>23</sup> Naruei nalo ajum̃a amiagiaga ga jibe na, a ajum̃a aṗilig m̃alo kulukoti nalo ea Pol, aaju ajuvu bulukievi na m̃arabo janea vio. <sup>24</sup> Ana toro na toru na mira naio ber ka avuru Pol taluvo den tiniobi nalo na, riva jouro ea kanalo burusio ga, a naio berenio nalo avitivio kija, ajikili kanio ka aleal vite venja naruei naio mila ana na tiniel jer m̃elea naio toru jibe na.

<sup>25</sup> Mia bogo napano amiorkar naio bisi, ana ajidom avitiv naio naruei, mia Pol ber ka kanalo navurim̃araboiano nei tai, beri-navo “?Jum̃abe, memedu ka kamiukuvitiv tavukia toro tai napano naio jotano ka navitikariano na vio Romo, a napano naio maka rivan ea komeli vo ka atibure vatitig naio, ṗeli na kamiukumijikia kuvitivio ga tibe na a?”

<sup>26</sup> Mia bogo napano navurim̃araboiano nei naio mijog Pol kanano vikadeniano nei, naio berenio mia avitiv re naio tukamu vo, ana soṗeli ga naio ba mial kanalo toro na toru, berinavo “?Ei, mia jau kala tum̃abe ka toro nei naruei? Naio berialio ber naio jotano ka vitikariano na vio Romo.”

<sup>27</sup> Naruei toro na toru nei binimej ka rial Pol bereio, naruei bika denio, berinavo “!Ei, jau kover vatitig rivu!

?Jau kojotano ka vitikariano na vio Romo, ṗeli na makanio?”

Ana Pol berdoṗeio, berinavo “Ee, kiniou nejibe na naruei.”

<sup>28</sup> Naruei toro na toru nei ber ka Pol berinavo “?Ana jau kojum̃abe na jibe na? Ka kiniou jibe na, kiniou nobulu burum̃ara puruveru nei.”

Ana Pol berenio jibe nei, berinavo “!i, mia kiniou, karam̃aku jibe na mugaruei, ana kiniou nemiyotuba, nejibe kanio bunu.” <sup>29</sup> Mia bogo napano nalo napano ka avitiv naio amijog iliano nei, amijikia naruei ka Pol naio be toro na toru tai jibe na. Ana ajaraluvo den naio vaarakurano, amijikia ka mia avitiv re naio naruei, a toro na toru nei bunu, vonganei naio bunu merou kija, bior ka napano naio be toro na mira na vio Romo tai, mia naio mila bova ruei ka Pol napano naio bunu jotano ka navitikariano na vio Romo.

### *Aburu Pol ea kulo Ju nalo kanalo burum̃ara komeli*

<sup>30</sup> Mia kavijo nene, ana toro na toru na mira nei naio jo jidomio ka rijikia kia na vo venia naruei be burupati na siniabu nei, ana naio bio tomu nalo na tortoru na kulo lu nalo bija navurim̃araboiano na kulo Ju nalo kialo, ber monoka atu rorea naio ea burum̃ara kanalo komeli. Naruei naio berenio ajubarbulag m̃arimieni den Pol, ana naio buru batove ea burum̃ara komeli neibano, naio bitirikar Pol ju iviso ka nalo.

## 23

<sup>1</sup> Naruei Pol naio buku mirano memedu ea tomu na tortoru nei, ber kalo, berinavo “Kuruaku nalo, ea nono kiaku meuliano binimej bokar banei, ea im̃auano nonovio na Atua kiano napano nemilaio, maka nojog titai tuluborua kiaku iviso, ka river kiniou namila maka rimemedu. !Maka leleio ga ruei!”

<sup>2</sup> Mia bogo napano parinio toro lu nei Ananias mijog iliano nei, naio tinien mimi toru laka ban Pol, a ber ka nalo napanoaju vaataro ka Pol

ber nalo ajuba niono. <sup>3</sup> Naruei Pol mil kija ban naio naruei, berinavo “!Ei, jau kovitkarso, mia Atua ruebinso navo! Jau kojo tano ea vio na kiado natuboiano, ea vio na natibureano na toro, mia karina jau na naruei komila korov tuboiano nene bereio, napano koberenio ajuba kinioiu tibe na. Jau kobe kulmedede ga tai na kojo na.”

<sup>4</sup> Mia nalo napano aju vaataro aberinavo “?Ei, jau koberiamã bo ka keil rivova tibe na van Parinio Toro Lu na Atua kanano tibe na, ðeli na tumãbe?”

<sup>5</sup> Naruei Pol naio berinavo “!Aa, riano-o! Kuruaku nalo, kiniou namijog kiano iliano mia maka nejikiaio, maka bunu nesidomiio never naio be Parinio Toro Lu na. Mia jibe ka napano kamiu kuberial batitigio ban kiniou ruei, naruei nemijikia ka nemil maka rimemedu ka naio, bior Atua kanano Iliano Lu berial batitigio ruei, ber maka rivu ka kito reil rivova van toro na toru na tomu nalo na kiado.”

<sup>6-8</sup> Naruei Pol maka bunu rijikia venia mia naio riverenio naruei, ana mial ka nalo napano aju joomo ea vioriano ka bogo na, togio abe Varisis, a togio abe Satusis. Taara juo nei ajumã amila baravo toru, bior Satusis nalo aberenio mia tomu nalo maka ajikia ameul ea namãriano, mia aberenio vite nalo na jibe kanio nailiano nalo, ðeli na niununo nalo, aberenio vite nalo nei maka titai tibe na, mia Varisis nalo amonea vite nalo nei. Ana Pol mijikia naruei ka mia river tumãbe, naruei naio bio ban tomu nalo na tortoru nei, berinavo “Kuruaku nalo, kiniou namaluvo ea yati na Varisis memedu. Karamãaku nalo abe Varisis, a kiniou bunu nebe Varisis. Naruei bija Varisis nalo, kiniou nomonea ka bogo napano toro m̃aro, karina, mia naio mijikia rimeul bereio. Naruei nejidom jibe ka kiniou nojumolu nojukamu ea miremiu bior tomu tai

ajidom ail van kiniou rivior kiaku moneano nei.”

Naruei Pol kiano iliano nei mila ana Varisis nalo napano aju ana ajikar ka amila baravo bereio naliko Satusis nalo napano aju nei, mila ana nalo nonovio na ea vioriano nei aburuburelo bereio. <sup>9</sup> Amila jibe na bano-o, binimeituru laka, a karina, nalo naverloglogiano tealoka tivelinio na Varisis nalo ajumolu, amil kirisikili laka, aberinavo “Kumemi numial ka toro na naio bo ga, maka vite tai ka napano mia kito romijikia reil vanio riviorio. ?A kei mijikia, ðeli be riano ga ka niununo tai bo ðeli na nailiano tai mil ban naio koviobo?”

<sup>10</sup> Mia siniabu nei ba toru laka naruei, nalo ajumã ajidom ka atukulo riviorio, ana toro na toru na kulo na mira kialo mialio ka bova, naio merou ka tibe m̃a na mia nalo aser niegeniege laka ka Pol, naruei naio miila kiano tomu nalo abatove, aburular Pol denlo, ana aburio ban bereio ea kialo burusio.

<sup>11</sup> Ana ka bogiano, Pol mial ka napano Tubo ju jumolu ju vaataro keanio, napano jomã mil banio, berinavo “Pol, mia komerou re. Jau koberial batitig kiniou ban tomu na abe ðirilo ea vio nei ruei, ana kiniou nejidom ka mia jau monoka kala tibe na ga, ve vaarakurano bereio, nina ea vio Romo.”

*Kulo Ju tealok abarvio ka auebin Pol*

<sup>12</sup> Ana ea kavijo, kulo Ju nalo tealok abinimeituru vio takurano ka atulukuga, ka averii ka mia tumãbe ana mia amijikia auebin Pol. Mia bogo napano amileal m̃arabo tai bisi ana aberkar ea Atua siano ka mia atuvan sinaniano vija munuiano nalo, rivano-o mia auebin Pol tukamu vo.

<sup>13</sup> Naruei nalo napano abijurukar iliano nei a napano amilakakar verikariano jibe na, nalo ajodovulu tomu nalo duelimo va veri [40].

<sup>14</sup> Ana iorou kanio ana aba amial tomu na tortoru na kulo lu nalo, naliko navurimãaraboiano nalo, ana

aberial vite nei banlo. Aberinavo “Kumemi nuberkar jikili ea Atua ruei, ka mia kumemi nuvel ka sinaniano nonovio rivano-o mia rivokar bogo napano mia numijikia nuvue bin toro na. <sup>15</sup> Mia kumemi numisidom ka kuvijai kumemi, napano kamiu kamlika nalo na ea kiado komeli, kamiu kuviila toru rivan ea toro na toru na tomu nalo na mira na, ka naio rivuru toro nene rivatove ea komeli bereio, kamiu kuvila sibilili naio ga kuver kumisidom kuvitii bereio iliano nalo na. Naruei mia kumemi nuvitu rorea ea m̄arabo ga, a bogo napano amei, mia nuvebinio, napano naio jo koalabo ka komeli kia ga vo.”

<sup>16</sup> Mia iorou kanio, ana na Pol, kuviviniene kenerinio tai naio mijogial ka napano ajum̄a aberii ka mia ala tibe na, naruei kiritete nei naio ba memedu ea burusio na tomu na mira nalo kialo, ana ba berial vite nei ban Pol. <sup>17</sup> Ana Pol bio tomu na mira nei tai kalo, berinavo “Ai, koig kobijuku bo, jau kovuru m̄eaku nei riva rial kenemiu toro na toru, naio mijikia titai napano bo ka mia toro na toru na naio monoka rijogio.”

<sup>18</sup> Naruei naio buru Pol kumerano nei ba ban kialo toro na toru, a berkanio berinavo “Pol napano jo rove yako ea nalakoiano, naio berenio novuru kumerano nei rimeitai vanso.”

<sup>19</sup> Naruei toro na toru nei naio bokar m̄eaku nei jum̄ano, ana burio ba jibe ka naljuo ga, naruei bika denio, berinavo “?Mia jau kojidom kover venia van kiniou?”

<sup>20</sup> Ana na Pol kumerano nei ber bulavulagio banio, ber “Jau keialio, tomu na tortoru nalo na kulo Ju abitirilar kanalo tiiano tai ruei, ka mia auebin kumeruaku nei, Pol. Nalo aberenio ruei ka mia aiila toru rimeitai vanso, ka nalo ajidom avitii vatitig bere vo ea tivelinio na iliano nalo nei, ka mia nalo avikaso ka beni, mia jau kovuru Pol rivatove bereio ea kialo komeli. <sup>21</sup> Mia maka rivu ka jau kala tibe na, bior nalo ajum̄a amila sibi ga na. Aberenio ruei ka bogo napano verenio

kamiu kuvitua m̄arabo, kuvitum̄a kuvatove, mia nalo tovulu duelimo va veri [40] nei aviako ea kamiu, nalo auebin kumeruaku na. Nalo na aberkario ruei ea Atua ka mia atuvan sinaniano vija munuiano rivano-o mia verenio aial ka auebinio bisi, ana nalo nei naruei ajum̄a aju rorea kamiu ruei, ka verenio jau kajamo ka mia kuva tove bereio.”

<sup>22</sup> Ana toro na toru nei naio ber ka Pol kumerano nene, berinavo “Bo ga, mia kiniou never kaso memedu, mia jau koverial re van toro tai bereio ka kobinimeitai koberial vite nei ban kiniou ruei. Mo siva toru, jau komijikia kava vonuo bereio naruei.”

### *Amiila Pol ban ea parinio tubo tai na Romo ea vio Sisiria*

<sup>23-24</sup> Mo toro na toru na kulo na mira kialo nei naio bio kiano tomu juo, naio ber jibe nei, berinavo “Vite nalo na tivelinio ka toro nei Pol, abinimeitai jikili laka. Vonganei, mia kiniou neiila naio riva toa kiado parinio tubo Veliks jum̄ano, napano naio jo rove yako Sisiria. Kamjuo, kuvila batitig taara tai na tomu na mira na kiado, ka kuvisirag kuku vatitig rivu ka Pol, kuvuru naio rivatove. Kamiu kumijikia kuvuru tomu na mira toromomou ve juo [200], vija duelimo va aluo [70] napano avar parinio bue kulorinio, vija toromomou ve juo [200] bereio napano abar mira nalo na uteute. Kuvidu Pol kanano parinio bue kulorinio tai bunu ka naio mijikia totano eaio. Kiniou nejidom ka kamiu kuvituvan baneitai bogiano, ka m̄erenio koveri [9] bogo napano vio melijo ruei.”

<sup>25</sup> Naruei toro na toru nei naio jiri m̄esi tai ka adukario rivan vijalo, naio jirio jibe nei, berenio:

<sup>26</sup> “Mesi nei, kiniou Klotias Lisias, napano nebivitaia biedu banso, Parinio Tubo Veliks, napano jau kobe toro na toru na vio Romo napano jau kobitkar kiado burum̄ara tanobuku nei.

<sup>27</sup> Kiniou najaaro toru ka nevitavo vijaso bereio ea m̄esi nei.

Toro napano aburio biedu banso na, kiano tukunu nene jibe nei: beamu, kulo Ju nalo na vio nei abokar naio, vaataro ka auebinio. Avona karina, nemijogial ka napano naio jo yetano ka kiado vitikariano na Romo, naruei kumemi nubatove, ana nuburular naio den kulo Ju nalo nei jumalo.

<sup>28</sup> Naruei kiniou nejidom nejikia ka venia naruei naio be burupati na vite nei, naruei noburu naio batove ea kialo komeli na toru.

<sup>29</sup> Ea bogo na, kiniou nemial ka napano naio maka rila titai napano rimemedu ka mia auebinio ðeli na adu vironiano rivanio, mia nemial jibe kanio nalo ajumã amila baravo naliko ka tivelinio na tuboiano na nalotvano na kanalo ga.

<sup>30</sup> Avona karina, iliano tai binimej bokar kiniou, ber aberiio ruei, amileal m̃arabo ruei ka ala vonio bereio ka auebin rimaro. Mia kiniou nemial bo ka neiila naio riviedu soðeli ga, mia neber bunu ka nalo napano tiniel jerio, neber monoka nalo aviedu averial ea miramo vite nalo napano ajidom atibure naio riviorio.”

<sup>31</sup> Naruei tomu na mira nalo amila jibe ka napano kialo toro na toru nei berenio, naruei bogiano ana aburu Pol, mia burumãara taara nei ajuvan vio Yerusalemo, aba abokar vio Antipatris. <sup>32</sup> Naruei kavijo nene, tomu na mira nalo na amiel ka jaalo ga abavin bereio Yerusalemo, mia nalo napano abar parinio bue m̃arauo, naliko kia Pol vo, aban ea kialo m̃arabo abano lie abatove Sisiria.

<sup>33</sup> Mia bogo napano abinimej aboru ea vio nene, amidu m̃esi nei ban parinio tubo nei naruei, iorou kanio ana aburu Pol ba ajuvan naio joa jumano. <sup>34</sup> Naruei parinio tubo nei naio buluku m̃esi nei bisi, ana naio bika den Pol, ber naio be toro na tanobuku na vabe. Ana Pol naio

berenio naio be toro na vio yako Silisia ga, <sup>35</sup> ana parinio tubo nei ber bereio, ber “Mo bo ga, kito monoka rotu rorea ga nalo napano mia amei ail vansom naruei bogo napano ver amei, mia kiniou novurulo ea nailivatitigiano kitoliko.” Mia naio ber ka kiano tomu nalo na mira, ber “Toro nei naio mijikia to vija kito beamu vo ea yimo moruo nei, Parinio tubo Erot kiano, ninei kito rojua vonganei, mia kamiu kuvisirarago kuku vatitig rivu ka naio ea vio na.”

## 24

### *Kulo Ju nalo abinimej ka ail van Pol ea Veliks mirano*

<sup>1</sup> Mo Pol naio jo jibe na-o, bokar bogoti jumo barlaka, ana iorou kanio ana Parinio toro lu na vio Yerusalemo neibano Ananias naio binimej rove nei Sisiria, naio naliko navurim̃araboiano dolu nalo tealu na kulo Ju nalo kialo, bija toro tai na kialo tuboiano, ka mia naio ril kanalo, siano Tetalas. Naruei nalo nei aba amial Parinio Tubo Veliks ka averial vite nalo napano ajidom ka ail rivian Pol riviorio. <sup>2</sup> Mo nalo abio Pol binimej joomo bunu, ana Veliks naio jian bogo ban Tetalas ka mijikia rivetavo ea kanalo iliano.

Mia naio mil ban parinio tubo nei naio berinavo “Parinio Tubo Veliks, kumemi numisaaro toru laka ka nuvitumolu ea miramo banei, bior ka napano numialio ka napano jau kojomã kobitkar kumemi bo laka. Jikario ea bogo napano jau kobokar iñauano nei, binimej bokar vonganei, kiamo masouano naio mila tumaro novo joa buruvenuo nei, a jau kojomã komila vite vou nalo telabo ka rijai iñauano na vio nei. <sup>3</sup> Tibe na, kumemi nuberenio kenememi burumãara siviano banso ka napano damariga jau kojomã komila batitig kumemi bo laka ea vio nei jibe na. <sup>4</sup> Mia jau, kobe kanamo iñauano telabo, maka rivu ka kumemi nuvila lelanso ka kenememi iliano nalo ve telabo laka, mia kiniou najidom ka novika denso kovijuku rivu ka kumemi, keiagago

ka kenememi iliano telisu tai napano bulati ga.

<sup>5</sup> “Mia ea tivelinio na toro nei, kumemi numialio jibe ka pariparinio kirisikili kija. Naio jomã miel janea kulo Ju nalo ea buruvenuo dolu nalo, a ea vio nonovio napano naio ban eaio, mia naio mila tomu nalo aburuburevurelo a amila baravo. A naio be navurimaraboiano tai na taara na tomu nalo neibano, napano aberenio naio miyotuba ea vio Nasarete, napano ðeli naio be nalotuano dolu tai koviobo, ðeli na ver makanio, mia nalo ajumã amila baravo ga na. <sup>6-7</sup> Ana bogo napano toro nei naio binimei jo Yerusalemo, naio mila kirivova-o mia naio jidom rila bulag tolu na yimo lu na kenememi nei, tenene na kumemi nubano nubokario. <sup>8</sup> Mia ver jau kovika den naio ga, mia komijikia kojog ka vite nalo namã nuberenio nalo abe riano ga.”

<sup>9</sup> Ana bogo napano naio jomã milili jibe na, ana kulo Ju dolu nalo ajumã aþiliþilig pariparilo, aju aberverenio aberinavo “Nina naruei, jibe na naruei, be riano ga na.”

### *Pol berdoþelo*

<sup>10</sup> Ana iorou kanio, parinio tubo nei naio bitikar Pol ana jian bogo banio ka naio mijikia river kiano verdoþeiano. Naruei Pol naio berinavo “Parinio Tubo Veliks, jibe ka napano jau kejbure kumemi ea buruvenuo nei ka yuka telabo abarlaka ruei, mia najaaro ga ka notumolu notukamu ea miramo ka nodu kanaku verdoþeiano. <sup>11</sup> Mia kiniou nejidom never kaso ga, ka nabavin yako Yerusalemo maka vesiou leleio. Ver jau kovika vatitigio ga den tomu nalo, mia jau keleal ka kiniou naban ea vio na ka ga nava novolkouo ea Atua Kunuano Lu, maka rivokar bogoti ve duelimo ba veri [14] vo. <sup>12</sup> Mia bogo napano nojoa vio na, mia maka aial ka napano kiniou

nemila vite tai. Maka nala siniabu vija toro tai, a maka neilili van tomu tai neverenio nalo amila vite tai. Ea Atua Kunuano Lu, ðeli na ea yimo nalo na volkouano nalo, ðeli na ea vio be na ea komeli, mia maka nala titai leleio. <sup>13</sup> Mia vite nalo napano nalo aberii kaso vonganei na, ka kiniou nemila jibe na jibe na, nina be iliano na kanalo taara ga na, mia nalo maka aver vite tai ka rikurukar kialo iliano vanso, ka rila kanalo iliano nei rive riano.

<sup>14</sup> “Mia vite takurano ga kiniou nemijikia najamo kanio, nemijikia never kaso neverenio, nao, kiniou nemila nina. Vite na, napano kiniou nojomã najakii Marabo Vou nei, napano mã aberenio nalotuano dolu. Mia maka tibe na, bior ea m̃arabo na, kumemi numitu nubolkouo ka Atua takurano ga, nina Atua na korobimemi tormoruo nalo kanalo, numitu numonea ga vite nalo napano kenememi tuboiano berenio ðeli napano kenememi naverialiano nalo abivitauiario. <sup>15</sup> Mia jakii vite nalo na, mia kiniou nojo ga ban Atua, be verare ga ka napano nalo bunu aju abitikuku kanio, ka mia naio rila tomu nalo nonovio ameul bereio ea namãariano, nina nalo napano amemedu ea mirano, a nalo napano maka amemedu ea mirano. <sup>16</sup> Naruei bior kiniou nemijikia ka mia Atua rila tibe na, mia maka nosidomii ka mia nela re bajago na bova tai leleio. Mia bogo nonovio ga, nemila vonvon toru laka ka mia vite tai ve telisu tul re kiniou bogo tai, river ka nemila bova ea Atua mirano ðeli na tomu nalo miralo.

<sup>17</sup> “Mia yuka tealò barlaka ruei, mia nojomã naban ea buruvenuo dolu nalo, mia karina, vonganei ga, ana nebinimei bereio ea vio Yerusalemo. Mia tomu nalo na laka yako ajuvanini ijaiano tai ka rijai kenememi tomu nalo na vio Yerusalemo, ana na kiniou nabar ijaiano nei nebinimei, nabar banlo, a nejidom nava nala sida bunu ea Atua Kunuano Lu. <sup>18</sup> Ana bogo na

mãa kiniou nojoa Yimo Lu, nemila sida na meravoano bisi, ana na nalo na abinimei amial kiniou. Ka bogona, maka bunu ve toro dolu tai atu rivija kiniou, mia maka ve iliano ðeli na uetubaiano leleio, mia iorou kanio, ana kulo Ju nalo tealoo na vio Esia abinimei, ana nalo naruei ajikar siniabu nei. <sup>19</sup> Mia nalo napano abe burupati na vite nei, ver asidomii ka kiniou namila vite tai bova, mia bo kanio ver nalo bunu atu rivija kito ea vio nei banei ka averialio kaso, mia maka neialo. <sup>20</sup> Ver ðeli, mia bo ka jau kalavonio ka kovika den nalo dolu napano aju na, ka bogona napano aburu kiniou naba nabavin ea kanalo komeli, mia amileal kiniou nemila venia. ? Kiniou nemila vite venia na maka rimemedu, ðeli na neber iliano venia na maka rivu? Nejidomiio-o, maka lele garuei. <sup>21</sup> Mia iliano takurano ga na kiniou neberenio banlo, neber jibe nei, neberinavo: Kiniou nemial jibe ka kamiu kumisidom kuvil rivan kiniou banei, rivior ga kanaku moneano nei, ka bogona napano toro m̃aro, karina mia naio mijikia rimeul bereio. Naruei kiniou neber iliano na, karina mila ana nalo ga ajuña amila siniabu kalo toru bereio.”

<sup>22</sup> Ana Parinio Tubo Veliks nei, naio mijikia kija ruei vite telabo ea tivelinio na Marabo Vou nei, mia bogona napano naio mial ka siniabu neibano, kulo Ju naliko Pol amila bior vite nei, naruei naio jetavoko iliano ga, berinavo “Bo, mia kito rotua vio nei beamu vo. Mia kiniou notororea ga toro na toru na kulo na mira nalo kanalo Lisias tu mave Yerusalemo rimei, ana mia nemijikia nojog vatitig kiano veriiano tukamu vo, avona bisi, ana nejev kanaku natibureano van kamiu.” <sup>23</sup> Mo naio ber ka kiano tomu na mira nalo ka avokar Pol vo, nalo atukuku kanio, mia naio berenio nalo ala sikili laka re rivanio, monoka ajamo ka naio rieliel kija ga, a averbure re kiano bilbilu nalo ka

amei aiadu kanio avitikario.

### *Pol berii Yesu ban Veliks naljuo kouano*

<sup>24</sup> Mia Parinio Tubo Veliks nei, kouano be tira re Ju tai, sianoo Trusila, mia naljuo nei ajidom atukunu kija naliko Pol vo. Mia legiano tealoo barlaka ruei, bisi na abe juo abinimei ea vio na Pol joaio, ana aburu Pol binimei, naruei Pol mil bijalo, naio berii kiano moneano na ea Kristo Yesu. <sup>25</sup> Mia Pol juvan iliano telabo lie vo ban naljuo, naio maka rialerinio ealo leleio, mia berii juñabe ka napano toro monoka rila bajago na memedu, a ka napano toro monoka telan vuu vatitig ka kiano meuliano, mia berii bunu tibureano napano Atua kanano ka mia rimei ea legiano na maaro. Naruei bogona napano Veliks mijog iliano nalo nei, naio mijog jibe ka juloo m̃lea kiano jidomiano, mila naio merou kija, mo naio ber ka Pol, berinavo “Mo bo, bare ga vo. Jau kava joomo nei bereio vo, mia ver kiniou neleal kanaku bogona tai, mia neilla toru riviedu kaso bereio.” <sup>26</sup> Mia bogona napano Veliks naio mijog iliano nalo nei, mia naio be kiano jidomiano va tai bunu, napano naio jidomii berinavo mia Pol sian puruveru na toru tai rivan naina, ka rila ka naio river Pol naio mijikia taluvo bereio. Naruei kiano jidomiano nei mila naio joña miilla toru ka Pol julaka ga, a naio jo jukunu va telabo bijaio. <sup>27</sup> Mia naio joña milala jibe na banbano-o bokar yuka juo, ana na naio bisi ea kanano iñauano nei. Mia naio maka rijamo ka Pol ka taluvo bereio ea vio napano naio joaio, bior naio joña jidomii ka rila kulo Ju nalo asaaro ka naio.

Mo iorou kanio, ana na toro dolu tai binimei midu Veliks nene jeleigio, napano sianoo Posias Vestas.

## 25

### *Pol berenio Sisa ga monoka tibure naio*

<sup>1</sup> Ana parinio tubo vou nei Vestas, naio binimeí yako Sisiria, binimeí ka rivitikar kanano tanobuku nei, mia iorou ka napano bogoti tolu ga barlaka, ana naio mial ka monoka riva rivitii vio mave yako Yerusalemo. <sup>2</sup> Ana bogo napano naio bokar vio nei, ana bior naliko tomu na tortoru nalo na kulo lu nalo, bija tomu dolu na tortoru na kulo Ju nalo, ana aberii niegeniege Pol banio. A nalo ajututua ka naio, <sup>3</sup> aberenio ver naio jidom rila tena novo tai vanlo, nalo ajidom naio riila Pol rimeí bereio ealo, napano amijikia avuru riva komeli ail vanio. Aber jibe na, mia nalo aju ajidomii luklukua ruei ka ver Pol rimeí, mia nalo ava atu rorea naio yako, ka mia auebin ga naio rimaro ea m̃arabo iviso viovare. <sup>4</sup> Ana Vestas naio berinavo “Bo ga, mia vesiou re ga ana kiniou bunu navan bereio yako Sisiria, ea vio napano ajum̃a abokar toro nene joaio. <sup>5</sup> Tibe na, mia kamiú tomu na tortoru tealo, kumijikia kuvitakisor kiniou ravatove, ka mia reial tum̃abe. Ver toro na mila vite nalo tai napano maka rimemedu, mia romijikia rala iliano ea bogo nene ga.”

<sup>6</sup> Naruei Vestas jo naliko yako Yerusalemo maka rivokar bogoti ve duelimo ba veri [14], ana naio batove bereio yako Sisiria, naliko nalo nei tealo. Ana ea legiano dolu nene, ana naio ba jotano ea kanano vio na tibureano, ana berinavo ava avuru Pol rimeí. <sup>7</sup> Mia bogo napano Pol binimeí joomo, ana kulo Ju na vio Yerusalemo napano ajakisor Vestas abinimeí, ajikili aju, ana ajum̃a aberial burum̃ara vite va nalo telabo napano aber Pol naio jom̃a milαιο, mia kanalo iliano nalo nei maka atu sikili leleio. <sup>8</sup> Mia bogo napano Pol naio jidom ka sian kiano verdopeiano, naio jekorov bulati ga berinavo “Kiniou maka nala titai leleio, napano nemilakorov tuboiano na kulo Ju nalo kanalo, a maka nala niegeniege Yimo Lu na vio Yerusalemo, a maka nalako-

rov leleio bunu tuboiano na parinio tubo na vio Romo nei, Sisa kiano.”

<sup>9</sup> Mia Vestas nei, naio jom̃a jidomii ka rila kulo Ju nalo ajog rivu ka naio, ana naio jidom ka rilavonio ka rila tibe ka napano nalo aberkano, ana naio bika den Pol, berinavo “?Jum̃abe, p̃eli bo ka mia kiniou novuruso rava komeli yako ga Yerusalemo, ana mia jau kotumolu kotukamu ea miraku bereio ea vio na?”

<sup>10</sup> Ana Pol berdope, berinavo “Vonganei, ea vio nei, kiniou nojumolu nojukamu nojua miramo, jau toro natibureano na tuboiano na Sisa na vio Romo ruei. Verenio vite tai napano ka mia kala van kiniou, vio nei naruei naio memedu ga ka jau komijikia kalaiio. ?Mia kiniou navavin mave yako Yerusalemo bereio ka vaio? Jau kobitilubar ruei ka napano tivelinio na ea kulo Ju nalo, maka kialo iliano tai ea kiniou tu sikili leleio. <sup>11</sup> Mia ver jau komial kiniou nemila titai bova napano memedu ka mia monoka nam̃aro riviorio, nina naio bo ga na, maka notom̃a nalavonio ka novuro denio. Mia ver nalo na, maka kanalo iliano tai bereio ka mijikia tumolu tu sikili, mia maka rimemedu leleio ka jau keiila kiniou navan bereio ea jum̃alo ka ala vaio napano ajidom van kiniou. Vonganei, jibe ka napano kiniou nemijikia nalaiio, jibe ka nojotano ka vitikariano na vio Romo, mia kiniou neber vatitig kaso, kiniou nejidom ka Parinio Tubo Sisa na vio Romo, naio ga monoka tibure kiniou.”

<sup>12</sup> Mia iliano nei mila Vestas ba mil naliko kiano vuroniano nalo beamu vo, avona bisi, ana binimeí bereio, berinavo “Jau koberenio ruei kober kojidom Sisa ga tibureso. Mia kiniou neberenio bo ga na, parinio tubo nene, naio nei naruei napano mia jau kotumolu kotukamu ea mirano.”

*Vestas jukunuii Pol ban tubo dolu na toru nei Akripa*

<sup>13</sup> Ana iorou kano, bogoti tealo barlaka bereio, ana tubo dolu tai

binimei yako Sisiria. Naio siano nei, Akripa Juo, mia binimei naljuo kuviviniene nei Benisi. Naljuo amijog ka Vestas jikar vonga kiano iñauano napano be parinio tubo na tanobuku nei, naruei nalo ajidom amei aiadu ka naio. <sup>14</sup> Mia naljuo ajua vio nei bano-o, mia bogo telabo ajumña ajukunu naliko Vestas nene, mia bogoti tai ana Vestas naio jukunu banlo ea tivelinio na Pol. Naio ber ka naljuo, berinavo “Kiniou be toro tai joa kiaku yimo nalakoiano, napano joa Veliks jumño beamu ruei, beamu ka napano kiniou nebinimei ea vio nei. <sup>15</sup> Ana iorou ka napano nebinimei, ana nabavin mave yako Yerusalemo, ana tomu na tortoru na kulo lu nalo, bija navurimñaraboiano dolu na kulo Ju nalo, abinimei aberii toro nei ka kiniou, ajidom ka kiniou neverial kiano tibureano tai kanio. <sup>16</sup> Mia kiniou neber batitigio kalo, neberinavo kiniou maka leleio nejikia nala tibe na ga, mia monoka novuru tivelinio ve juo amei vio takurano beamu vo, ana nalo napano amila veriiano, monoka averialio ea mirano toro napano amila veriiano kanio, a monoka nodu bogo van toro nei ka naio bunu rudu kanano verdoñeiano. Kiniou neberii kalo neberinavo bajago na tuboiano na vio Romo na kenememi jibe na naruei.

<sup>17</sup> “Tibe na, nemei nei bereio ea vio nei, ana kulo Ju nalo atumolu den Yerusalemo amei ka kumemi nuvila iliano. Mia bogo napano nemijikia ka nalo abinimei abokar vio nei ka vio be kijeve, maka netii lilian bogo mia kavijo ga, nabano nojotano ea vio na tibureano, ana nabio toro neibano Pol binimei joomo. <sup>18</sup> Mia bogo napano kulo Ju nalo ajumolu ka averial vite nalo na toro nei, nejidomii neberianña mia nojog aver burumñara vite va tai napano aberenio naio milαιο, mia nina maka leleio. <sup>19</sup> Nalo aber ga vite sesa nalo ea tivelinio na kanalo nalotvano ga, napanoaju amila baravo kanio naliko toro nei.

Nina ea tivelinio na kanalo bajago moruo ga nalo, a ea tivelinio ka toro tai, siano Yesu, napano naio mño ruei, mia Pol naio jomña berenio naio meul bereio. <sup>20</sup> Mia nalo ajumña aberii vite nalo napano kiniou maka nejikiaio, tenene na maka nejikia ka mia nala venia naruei, ana nebika denio verenio naio sidom ka rivan bereio mave yako Yerusalemo, ka nalo ala kanalo iliano ea vio na ga. <sup>21</sup> Mia karina, toro nei naio ber ñeli ga, mia rivan re tibe na, naruei naio jumolu ber naio jidomii ka Parinio Tubo Sisa ga naio tibureio. Kanano iliano nei mila ana nobokar naio joa vio nei kia navo, ka kiniou neleal mñarabo tai ka mia neiila rivan yako Romo, ka mia Sisa rivitii vite nei.”

<sup>22</sup> Ana Akripa ber ka Vestas, berinavo “Mo kiniou bunu tinieku jii laka ka ver nemijikia nojog kija toro na kanano iliano.”

Ana Vestas berinavo “Bo ga, beni ga, na mia kamjuo kuvitukunu.”

*Vestas buru Pol binimei ka Akripa riagago ka naio*

<sup>23</sup> Mia kavijo, amila vite nonovio ju vatitigio ea kanalo burumñara yimo na vioriano tai, amila jibe ka burumñara titai. Ana tubo na toru nei Akripa naljuo kuviviniene nei Benisi, naljuo abinimei napano amiovovualo novo batitig ruei, mia abinimei joomo napano tomu na tortoru na kulo na mira nalo bija tomu na tortoru dolu naloaju amiel iorou kalo. Ana amila vite nonovio ka naljuo nei jibe ka napano mña amila ea bogo na tortoru nalo na jibe nei. Amila bano-o bisi, ana Vestas berenio avuru Pol rimeijoomo. <sup>24</sup> Ana aburio binimei, ana Vestas jian kiano iliano, berinavo “A Parinio Tubo Akripa, bija tomu dolu na tortoru nalo napano roju nei banei, nina be toro napano kulo Ju nalo abinimei amil ban kiniou biorio. Yako Yerusalemo, a ea vio nei, nalo abinimei abika jikili den kiniou aberinavo netiburio,aju amil telabo aberinavo toro nei, maka

rimemedu ka naio rimeul riva lie vo, mia nalo ajidom ka naio monoka rimãaro soþeli ga. <sup>25</sup> Naruei kiniou nebitii vite nei bano-o, mia maka neial titai ka mia rimemedu ka naio monoka rimãaro riviorio. Avona bisi, ana toro nei naio bunu bika parinio tubo na toru na vio Romo, berinavo naio ga tibure naio, ana vonganei nojomã nebitiio ka mia monoka neiila naio rivan ga ea Sisa jumãano naruei. <sup>26</sup> Mia monoka nevivitauia mēsi tai rivan vija toro nei ea kiado parinio tubo na, mia kiniou maka nejikia vatitigio bunu ka mia nevivitauia venia tua mēsi nei. Tenene naruei, kiniou najaaro ka noburu naio biedu jikili jukamu ea miramo, tubo na toru Akripa, bija kamiu tomu dolu na tortoru nalo na, ka rovitii kanano iliano nalo nei bereio, ka þeli mia kamiu kumijikia kuvija kiniou ka mia nevivitauia venia tua mēsi nei. <sup>27</sup> !Maka rivu ka kiniou neiila toro nei rivan ea natibureano na toru, napano maka neverial vatitigio ka iliano vaio napano milaio ana nemiila naio bano!"

## 26

### *Pol mil ban Parinio Tubo Akripa ea mirano*

<sup>1</sup> Ana Akripa berii ka Pol, berinavo "Mo, kiniou nejian bogo banso naruei ka kotukunu kaso ea tivelinio na vite nalo na."

Ana Pol naio buku jumãano jibe na, ana jikar kiano iliano naruei, ka sian verdoþeiano na vite nalo nene. <sup>2</sup> Naruei naio berii jibe nei, ber "Parinio Tubo Akripa, kiniou nemial bo laka ka napano nemijikia notumolu banei ea miramo, ka mia nalavonio ka neverdoþe iliano nalo napano kulo Ju nalo amila ban kiniou. <sup>3</sup> Neber iliano na bior jau naruei, jau komijikia batitig ruei kanado bajago nalo kito kulo Ju, a jau komijikia batitig bunu ruei vite nalo napano bogo nonovio kiado tomu nalo ajumã amila baravo kalo

biorio, a napano ajumã aburuburevurelo bunu biorio. Naruei kiniou nebika denso ka jau tiniem ser re kiniou, bior mia kanaku tukunuano naio tokol vite ve telabo tibe na naruei, a ve tebievi kija bunu.

<sup>4</sup> "Kiaku tukunuano naio jikar jibe nei, kanio kiniou, jikar ea bogo napano nebe kiritete kia ga vo, nojo damãariga kumemi liko kulo Ju nalo ga, nina ea kiaku vio, mia iorou kanio, ana yako Yerusalemo bunu. Naruei nalo amijikia batitig kiaku bajago nalo re nua ruei, a amijikia ka bogo napano nebe toro mēaku kia ga vo, <sup>5</sup> mia nebijurukar taara na Varisis nalo, napano nalo naruei abokar mēlea kiado tuboiano jovulu taara dolu nalo. Naruei ver nalo asaaro ka nalo bunu atumolu atukamu ea miramo, mia nalo amijikia averialio vansom, ka vite nalo nei napano nojomã neberenio nalo aberiano ga nonovio.

<sup>6</sup> "Naruei bior vaio ana nalo tiniei jer kiniou bereio? Nina bior kiniou noju jikili damãariga ea verikariano tai napano Atua mila bija korobido nalo nua ruei, napano naio berenio mia naio rila tomu nalo napano amãarmãaro mia nalo amemeul bereio. <sup>7</sup> Verikariano nene, kiado yati nalo duelimo ba juo [12] bunu nalo ajumã abolkouo legiano a bogiano ka amijikia avokario. !Parinio tubo, jau keialio vo! Vite nei Atua berkario ban kulo Ju nalo ruei, ana vonganei kulo Ju nalo nei ajidom ail van kiniou bereio bior kiniou nomoneaio. <sup>8</sup> ?Kiniou maka nejikia, mia bior vaio naruei ana tomu nalo ajumã aber Atua naio maka rijikia rila toro napano mãaro ruei rimeul bereio?

<sup>9</sup> "Be riano, beamu nua, kiniou bunu nejibe na, maka namonea vite nalo na. Kiniou tinieku jer toru nalo napano amonea Yesu re Nasarete, a nemial monoka nalavio sikili ka rila sio nei ribisi ga. <sup>10</sup> Naruei ea vio Yerusalemo, nojomã nemila vite telabo jibe na. Tomu na tortoru nalo

na kulo lu nalo amijamo kanio ban kiniou, ana nabano nemila telabo ka namoneano lu nalo nei aban ea nalakoiano, ana bogo napano ajiburelo ka monoka añaaro, kiniou nojo joomo eaio. <sup>11</sup> A kiniou nojomña najanea yimo nalo na volkouano, bogo nonovio ga nojomña nemila kikilo, a nojoma nomila vonvonlo, nojomña nomila vonvonlo ka aiolua Yesu siano. Mia nojomña nemila jibe na banbano-o napano nebitunu mēle, naruei nemijil dedade ealo abeve terakurano janea buruvenuo dolu nalo, karina, kiniou naban kalo bereio ea komeli nalo napano aba ajualo.”

*Pol berii jumñabe napano Yesu miyotuba ka naio*

<sup>12</sup> Naruei Pol naio jomña jukunu ban kia, berinavo “Ana bogo tai, kiniou nabatove Tamaskas ka nala tibe na van nalo napano ajua vio na. Tomu na tortoru nalo na kulo lu nalo, nalo amiila kiniou nabatove, a amidu mēsi tai ban kiniou ka mia nemijikia nala tibe na. <sup>13</sup> Naruei kumemi numitu numiel nubatove, ka mērenio jo memedu, nemial burumñara yulu tai merera ea vio mave, napano merera jovulu mērenio, naruei yulu nei mijegili memedu vio napano kumemi numituaio. <sup>14</sup> Naruei miamoiano nei naio toru jibe na naruei, mila ana kumemi numitibirbili ea borotano, ana iorou kanio nomijog jooon tai, mil ban kiniou jel iliano re Ipru ga, berinavo ‘!Sol o, Sol o! ?Bior vaio ana jau kojomña komila kiki kiniou jibe ka napano kojomña komila na? Jau kojomña jaamo je bereio kiniou jibe na, mia milaio ana jaamo mijalele laka.’

<sup>15</sup> “Naruei kiniou nebika denio, neberinavo ‘?Ana Tubo, jau kobe kei?’

“Naruei Tubo mil ban kiniou berenio, berinavo ‘Yesu napano jau kojomña komila bova kanio, ninei be kiniou nene naruei. <sup>16</sup> Mia jau kotumolu bereio bior ka napano

mia jau koiñau kanaku. Kiniou nemiyotuba kaso jibe na bior vite na naruei. Banei kovitilubar kiniou ka mia kover kiniou kei, a iorou, mia keial kiniou notomña noyotuba kaso ea vite ve telabo ea legiano nalo na ju binimei kia iorou. Vite nalo napano nejiloglog kaso banei nei, naio naruei mia jau kava koverialio van tomu nalo. <sup>17</sup> Mia jau kava koverialio ka kulo Ju, a ka nalo dolu napano maka ave kulo Ju, ana mia keial ka nalo na, mia ala rivova kaso, mia niukniuku rivieso re, kiniou noyotuba kaso ea bogo nalo na jibe na, nalarurso.

“Nina naruei, kiniou nemiilaso ka kavan ealo, <sup>18</sup> ka kovetavo ea miralo nalo, ka koviliglo ataluvo den melijokouo napano ajuaio, amei ea miamoiano, a ka atuvan moroano na Simñaro kiano tobo, mia amei ka Atua ga. Naruei ka bogo napano aviekar kiniou tibe na, mia Atua rivie kokoalo ka kialo kariano nalo, a mia rivijurukarlo ea kiano taara na kulo lu nalo kialo.’”

*Pol berii kiano iñauano*

<sup>19</sup> Ana Pol naio mil kia navo, berinavo “Nina naruei, Tubo Akripa, bogo napano kiniou nemial burumñara vite napano jaluvo ea vio mave binimei ea kiniou, maka bunu nejikia nala titai bereio, mia nomonmonea ga Tubo kiano iliano ga. <sup>20</sup> Ana na-bano Tamaskas jukamu, naruei nemioliolu ban tomu nalo, neberenio monoka aviliglo rivan ea Atua, a kialo meuliano nalo monoka avu bereio aviniu, rimemedu ka viligiano nei. Ana iorou kanio, nabavin bereio ea vio Yerusalemo, nemioliolu jibe na bereio banlo, karina nabano nemila jibe na ea komeli dolu nalo ea tanobuku na vio Yutea, a karina, naban janea vio reraio nalo napano maka ave kulo Ju nalo kanalo, nomidu iliano nene ga banlo. <sup>21</sup> Naruei bior kiaku iñauano nei ga, mila ana kulo Ju nalo abinimei abokar kiniou joomo

ea Atua kiano Yimo Lu, ana ajidom auebin kiniou nañaro riviorio.

<sup>22</sup> “Mia binimei bokar banei, iji-iano napano binimei ea Atua jo bija kiniou damariga, a vonganei nemijikia notumolu notua miremiu kamiu tomu na tortoru nalo, a kamiu kulo dolu nalo ga bunu, a be kiaku bogo ka nemijikia neil van kamiu. Venia napano Mosis naliko naverialiano nalo aberiio nuanua ruei, aberinavo mia tibe na mia tibe na, vite na ga kiniou nojomã neberialio ban kamiu vonganei. <sup>23</sup> Nina naio jibe na, napano Naverikariano, na bogo napano mia naio rimej riyotuba, mia tomu nalo monoka ala rivova ka naio, mia iorou, mia naio naruei ve toro na meul ve moti den mariano bereio. A kiano tumoluano nene bereio den namariano, mia vite na naruei rive marabo ka rivar yulu na ioruriano rimej rimiamo ea tomu nalo nonovio, kulo Ju nalo a nalo napano maka ave kulo Ju.”

*Pol jidom monoka amonea Yesu tibe ka naio*

<sup>24</sup> Naruei bogo napano Pol jomã jian kiano verdopeiano jibe na, Vestas jumolu jektorov kanano iliano nalo, mil toru, berinavo “! Pol, jau komiavovu ga na! Jau kojidom ka jau kove masou ka jiki-aiano doldolu nalo, naruei milaio pariparimo banbano-o ña miavovu garuei.”

<sup>25</sup> Ana Pol berinavo “Kiniou nabameneaso, Parinio Tubo Vestas, mia monoka never kaso ka paripariku naio bo ga. Kiaku iliano nalo napano nojomã neberialio ea vio nei, abe burupati na ilirianiano napano abe riano laka garuei. <sup>26</sup> Vite nalo napano nojomã nojukunu kanio, nemijikia batitigio bo ka Tubo Akripa naio mijikia ruei, abinimej bokar kiano vitiiano, nina naruei mila ana maka nemerou ka neverialio ea mirano. Vite nalo nei, maka ayotuba ea vio na telisu ga tai napano toro maka rijikia vo, mia tomu nonovio amijikia ruei,

ajumã aberiio va telabo bunu. <sup>27</sup> ? Mia Tubo Akripa, venia naruei naio be kiamo jidomiano riano ea vite nalo nei? ?Kiniou nemial ka jau bunu, komonea iliano nalo na naverialiano nalo re nua, a?”

<sup>28</sup> Naruei Akripa ber ka Pol, bere- nio “!Ee, makanio! ?Peli jau komil ea bogo kiri bulati ga, jau koberia- ña komijikia kovuru kiniou bunu neviedu neve Kristo kiano, na?”

<sup>29</sup> Ana Pol berdope, berinavo “Ee, kiniou maka nejikia, neil bogo ve bulati ga peli na ve tebievi, mia vite takurano ga nobolkouo ka mia Atua rila banei, nejidom ka jau, kamli- ko nalo dolu na, napano kumituña kumiagago ka kiaku iliano, nejidom ka mia kamiu kumej kuvitibe ka kiniou. Maka never ka mia kamiu kuvar marimieni nalo na tibe ka napano nabario, mia neberenio bo ka kamiu kumej kuvitibe ka kiniou, napano nemijev Yesu Kristo ea ki- aku iviso, nebinimej nebe toro vou ea naio.”

<sup>30</sup> Mo Tubo Akripa naio jetavoko iliano ea vio na, ana naio naljuo Vestas, bija Benisi, naliko tomu dolu nalo na tortoru napano ajumã ajutano mave naliko, nalo ajumormolu, abava tavio bereio. <sup>31</sup> Ana bogo napano abava tavio bisi na, ajumã aberverii kalo aberinavo “Toro na maka rila titai rivova leleio, napano rimemedu ka mia naio rimaro peli na mia rivar vironiano riviorio.”

<sup>32</sup> Ana Akripa ber ka Vestas, beri- navo “!Ver toro na river re Sisa ga tibure naio, mia naio mijikia riva tavio ga tibe na ruei!”

## 27

*Aburu Pol ajuvan vio Sisiria ka ava Romo*

<sup>1</sup> Ana ea bogo na, kiniou Luka, kiniou bunu nojo bija Pol ea vio Sisiria, ana neberenio kiniou bunu navan vija naio Romo. Naruei bogo napano tomu na tortoru nalo amial ka bogo na ka mia nuvano, aburular Pol naliko nalo dolu napanoaju

joomo ea nalakoiano, amidulo jua toro na toru na mira tai juñano. Toro na, naio siano Julias, a naio be navurim̄araboiano na taara na tomu nalo na mira nei napano abio-olo ka “Taara na Okastas.”<sup>2</sup> Naruei naio buru kumemi nubano, nubajou koyou ea tei, naruei nalo amileal uako tai na vio Atramitiam ana nubavin eaio. Ana ea bogo na, Arestakas na vio Tesalonaika na tanobuku na Masetonia, naio bunu kumemliko. Ana kumemi numidu uako nene nubano, napano m̄arabo nene ka mia riva sel ea bulu yaniniobi nalo na tanobuku na vio Esia.

<sup>3</sup> Ana ea kavijo, kumemi nubinimei nubokar vio nei Saiton, ana ea vio na, Julias mila bo ka Pol toru laka, napano naio mijamo ka bauro ka rial kiano bilbilu nalo, a naio mijamo ka nalo amijai Pol ka vite nalo tai ka kiano m̄arabo.<sup>4</sup> Naruei kumemi numituvan vio nei bereio, nuburo ea tei banbano-o, ana numitupē jegi ka bogo na, mila ana bogo napano nubokar uleule na vio Saipras, mia numisel ea taakano tivelinio, tivelinio bano.<sup>5</sup> Naruei nubar korovio burum̄ara tei neibano jo tavio ea tanobuku juo na vio Silisia bija vio Pamvilia, naruei nuburo nubinimei nubokar komeli na Maera, ea tano-buku na vio Laesia.<sup>6</sup> Ana uako nei naio miyon kumemi ea vio na, naruei toro na mira nei Julias naio ba jirag m̄arabo dolu. Ana naio mileal uako tai na vio Aleksadria napano naio jo ban ea buruvenuo napano kumemi numisidom ka nuvan ea na, Italia, ana naio mila kumemi nuban ea uako nene kija.

<sup>7</sup> Ana kumemi nubatavio bereio ea tei, mia jegi bova ga, mila ana nuburo melmelumu ga nubano-o nubokar legiano nalo tai, naruei numila vio toru, numiaveve ka jegi jibe na ga ba bokar jelati na vio Nitas, mia jegi juko kumemi batitigio garuei. Naruei nubariṣilig, numiakar jelati dolu na vio Salmone ea uleule na vio Krit, ana numisel ea taakano tei melumu.<sup>8</sup> Kumemi

numiaveve ga uleule nene, numitum̄a numitakii nubano-o napano jegi joṁa mue kumemi bova kia ga vo, ana nubano-o nubokar bulu yaniniobi tai napano abio kanio “Bulu Yaniniobi na Maraiu,” vaataro ka komeli na vio Lasea.

<sup>9</sup> Ana kumemi numitua kija vio na telisu, mia nalo amial ka bova laka naruei, bior jegi joṁa mila jibe na ka kumemi, mia numitua m̄arabo kirisiou ruei, mia m̄arabo tebievi jo keano vo, a vonganei, be bogo na jegi bija burum̄ara niavo ruei. Bogo nonovio ga ajuṁa aberenio bogo kirivova nei joṁa jikario ea siberio na Jokoluolu Na Viekoano, mia vonganei, jokoluolu nene barlaka ruei. Naruei Pol naio mijog bova ka vite na, naio ber vatitigio banlo, berinavo<sup>10</sup> “Tom na tomoruo nalo, kiniou nemijog lubar ka ver ravano, mia rivova laka, mia vite nalo nonovio avavakovio ga. Kiniou nemial jibe ka mia uako nei naio mijikia rimadudu ga vija sano vite nalo, a kito bunu, kiado meuliano nalo amijikia avavakovio ea tei.”

<sup>11</sup> Mia toro na mira nei naio maka riagago ka Pol, mia naio miagago ka toro napano jilanivu ka uako, bija nana boru na uako nei. Mia naljuo aberinavo “Peli ga, mia rivu ga na, mia kito ravan ga,<sup>12</sup> bior kito maka rejikia rotua vio nei rivano-o rivokar napano rotua bogo na bo bereio.” Naruei nalo aberiio, ana nalo telabo amial bo ka kumemi nuvituvan vio nei, aber kumemi nuvuro ga ka nuva nuvokar bulu yaniniobi dolu tai, siano Viniks, ea uleule nei kia ga vo, napano amialio ka aber naio naruei bo ka nuvituaio, rivokar bogo na burum̄ara jegi na niavo nei tubabinio.

*Burum̄ara jegi tai miuvu titig searialo abano*

<sup>13</sup> Naruei bogo napano amial ka napano jegi biligio, be jegi na saut naio jumolu kija naruei, amialio ana aberenio bo naruei, ana nalo ajidom aber jegi na naruei mia naio riuvu kumemi nuvan ea bulu yaniniobi

napano numisidomio ka mia nuvan eaio. Naruei nalo aburu veru binimeí mave, ana na nuburo nubano, numisel veve vio uro ga. <sup>14</sup> Mia maka vesiou, ana kumemi numiilo ka burumñara jegi uro tai naio jumolu binimeí miuvu kumemi. <sup>15</sup> Jeg nei miuvuvu toru jibe na, naruei maka bunu nuvijikia nuvuro ka napano numidu jegi nei, mia nalo abilig ga uako ana ajuvanio, amijamo ka ga jegi nei joñã miuvu lilian kumemi nuba tavio ga, naruei jegi nei joñã miuvu titig kumemi nubano jibe na. <sup>16</sup> Ana na kumemi nuburo nubano, numitoluku vonio kija ga ea uleule sesa tai, siano Kaoda, mila naruei ea vio na ga kumemi numiñau bijon ka uauako nene bano-o, ana aburu lario binimeí mave. <sup>17</sup> Naruei nalo ajumña amerou aber tibe ñã mia uako nei naio rivuruboñe na, ana nalo aburu teli na tortoru nalo ajel yetano ka uako, ana na amiorkar kanio ka rivokar vatitigio.

Ana amial ka napano jegi joñã miuvu titian kumemi nubano dolu ka ga, ana nalo amerou ka aju aban vaataro kanio barañã nalo na vio Saitis, vaataro ka vio Lipia, naruei nalo aburu bereio ñãaja. Naruei jegi miuvu titian kumemi nubano numitovulu vio nei, ana na vio melijo, mia kumemi nuburo nunu ga jibe na nubano.

<sup>18</sup> Ana ea kavijo, ana jegi joñã miuvuvu biloulo kia ga vo, a tei joñã buku bilivilig kumemi, naruei nalo ajikar ka abuku bulavulag togogo nalo banvan ea tei. <sup>19</sup> Naruei ea legiano dolu nene bereio, vio bova kia ga vo, ana nalo abano amijubar bulag teli nalo a ñãaja nalo a vite nalo na jibe na, abuku lo abanvan ea tei bunu. <sup>20</sup> Jibe na kanio legiano telabo bereio, napano mia vio yauo na mave naio kiri bobogio ga jo, maka nuvial ñarivitano a maka nuvial mirano ñerenio. Kumemi numial ka napano numitu kokouo ea jegi tai nei napano mia maka bunu ve toro tai sidomii ka river mia

numeul.

<sup>21</sup> Mia tomu nalo na uako nei maka bunu asinan legiano telabo ruei, nalo amijog bova toru laka, naruei Pol naio binimeí mialo, ana ber kalo, berinavo “Tomu nalo, vereñio kamiú kuviagago batitig ka kinioú nanua ruei ka bogo napano kito roju kia ga yako Krit, mia burumñara jogvaiano a burumñara laluviano nei maka rijikia rivokar kito. <sup>22</sup> Ana vonganei, mia kiniou never titai van kamiú bereio, mia kamiú kuvijikia kuvijog rivu eaio. Neberial ban kamiú, ka mia kiado uako nei mia naio rimadudu navo, mia maka kito tai leleio napano mia rivakovio. <sup>23</sup> Kiniou nemijikia vite nei bior ka napano bogiano ga, nemial kiaku Atua napano nojoñã nobolkouo ka naio, nemial miila kiano nailiano tai binimeí maluvo ka kiniou. Nailiano nei binimeí jumolu ju vaataro ka kiniou, <sup>24</sup> ana naio berinavo ‘Pol, komerou re. Mia jau monoka kavano-o kovoru Romo, monoka kotumolu kotua mirano Sisa kia ga navo, ana nemijikia never kaso, ka nalo napano ajua uako na kamliko kialo meuliano, Atua jidom rijamo kanio vanto ga ka mia nalo ameul ga, nalo tai rivakovio re.’ <sup>25</sup> Naina naruei, tomu nalo, kamiú kuvijog rivova re bereio, kiniou nebiekar ñelea Atua ka mia tibe ka ga napano kiano nailiano berialio ban kiniou. <sup>26</sup> Mia vite takurano ga, mia kito monoka rovilig kiado uako riva sel uro ea uleule na telisu tai.”

*Nalo abinimeí vaataro ea uleule tai*

<sup>27</sup> Mia jegi nei joñã miuvu titig lelan kumemi nubano kia navo, bokar sude juo ruei napano numitumña nuburo janea burumñara tei na Metetireniano nei. Naruei ka bogiano tai, tomu nalo na uako nei abitulubar ka kumemi numitu nubinimeí vaataro ka uleule tai kovio tai. <sup>28</sup> Naruei ajuvarvan teli batove, abuluku bululuoiano na tei bano-o bokario meta duelimo va veri [40], karina, aju kija ga telisu, karina amila bereio, abulukuio aber meta

duelimo va rolu [30]. <sup>29</sup> Naruei nalo amerou ka mia nuvuro nuva nuvijivi ea buruñara puruveru nalo tai ñeli na venia, naruei nalo ajuvan veru na teremi veri iorou ea barenou uako, ana na nalo ajuña abolkouo ka veru teremi nalo nei monoka avokar kumemi, a ka viorijeni monoka rimej soñeli.

<sup>30</sup> Ana tomu nalo na uako aberiio, aberenio mia ala sibilili kumemi dolu nalo, ka mia ala vonio ka adu uauako nei ga avuro avauo eaio. Naruei nalo amila sibilili kumemi, aberinavo “Oi, mia kumemi nuvidu von veru temi nei rivau yako beamu vo, ka nuvila vonio ka rivurukar kiado buruako.” Naruei nalo ajuvarvan uauako batove ea tei.

<sup>31</sup> Ana Pol bitilubario, ana ber ka tomu na mira nalo, berinavo “Ver kami kuvisidom ka kami kumeul, nalo na monoka kuverburelo ka atu vija kito ea uako ga.” <sup>32</sup> Naruei na mira nalo nei amijogio, ajumolu vaarakurano ga abano aje kokorov teli nalo na uauako nei, ana naio mialalo den uako bano.

<sup>33</sup> Naruei vaataro ka viorijeni mermeravo, ana Pol jidom asen titai, ana ber kalo berinavo “Ei, binimej bokar banei, be sude juo naruei napano kito rojua bogo na bova nei, maka rosinan batitigio rivu. <sup>34</sup> Ana bo ka banei, kito rosinan vatitigio kija rivu bereio, kanio niabedo nalo amijikia amei sikili bereio, tibe na ana mia kito romijikia romeul. Tibe ka napano neberenio ruei, mia maka lele kiri vijudo tai rijikia rivakovio, mia kito roviniu rovu ga.”

<sup>35</sup> Naruei iorou ka napano naio berii vite nei bisi, naio ba midu joko tai, naruei bolkouo ea miralo, ber siva ban Atua biorio, karina burekokorovio joña jenio. <sup>36</sup> Ana bogo napano nalo dolu amialio ka napano Pol joña jinan jibe na, nalo bunu amonea ka be riano, mia nalo avu ga, naruei nalo bunu ajaaro ka asinan bereio, ana ajinan. <sup>37</sup> Mia kumemi nonovio napano numitua uako nei, kumemi nubokar toromomou juo duelimo va aluo ba ari

[276]. <sup>38</sup> Mia bogo napano abiniu ajinan bisi, amialio bo ka ala uako rimelala lie vo, naruei nalo abar bulag ñarauti nalo napano jibe ka sememi sinaniano, abukuvukulo banvano ea tei.

*Uako ba ijel tavio ga, ana amijeljelio ga abauo*

<sup>39</sup> Naruei telikiti napano viomijeni kario, ana kumemi numial vio uro jo vaataro ga ruei, mia maka nuvijikia vio be nei. Ana amial bulu yaniniobi tai jo, a be bayono novo uro, ana na nalo aberiio, aberinavo mia ala vonio ka ala kenememi uako rivuro rivauro ea vio nene. <sup>40</sup> Naruei nalo aje bulag teli nalo na veru teremi nalo, ajuvanlo ajubo ea tei, a nalo amijubar bulag teli nalo napano amior kakario ka vuu na uako, ana aburu ñaaja sesa na buruako, ka mia jegi riuvu kumemi nuva nuvia yono.

<sup>41</sup> Kumemi numitu nuburo bano, naruei numiilo ka uako ba miakar belia ga buruñara yonovoro tai napano tei buru bijiilo juo vio takurano yetano. Buruako na uako miakar bayono nene, naruei naio birakar jo jikili batitigio jo, maka bunu rijikia rikulkulu leleio. Naruei buruñara niatava nalo ajumormolu abinimej amidon boñe baren uako garuei.

<sup>42</sup> Mia na mira nalo ajuña aberii ruei, ka vere vite tai tibe nei mia auebinvinlo ga, nalakoiano nalo napano ña aju kuku kalo, ver makanio ñeli mia nalo tai ala vonio ka aviaako avatove ea tei, ajelio ava uro, mia avuro kilkil. <sup>43</sup> Mia kialo toro na toru naio berburelo ka nalo ala re, bior napano naio jidom ka Pol naio monoka rimeul ga. Mia naio ber ka kumemi nubiniu, berinavo “Mo, kito napano romijikia romijeliou, kito rotukamu, ratabulu ea tei ana reia vonio ka rovoru uro. <sup>44</sup> Ana kito napano maka rejikia reia, mia kito ravar ñabulu, ñeli na venia napano romijikia relealio ea uako nei ka romijikia romonmonea mave eaio, ana kito iorou rava uro.” Naruei ea ñarabo nei ga, kumemi

nonovio nubano-o nuboruvoru uro ea vio nei, napano kumemi nonovio numeul bo ga, maka kumemi tai rivakovio.

## 28

### *Pol nalo ajua uleule na Molta*

<sup>1</sup> Mia bogo napano kumemi nubiniu nubinimei numitu batitig uro bo ruei, ana na tomu nalo na vio nei abinimei amial kumemi, ana aber ka kumemi aberenio vio nei naio be uleule tai, siano Molta. <sup>2</sup> Naruei nalo amila batitig kumemi bo laka, nalo abijuku bo ka kumemi mia. Ea bogo na, yuo joña bovo, naruei nalo amial ka napano kumemi numijog niavo toru laka, ana nalo ajovokar sebi, mia abitikar vatitig kumemi jibe na. <sup>3</sup> Ana na Pol naio ba miabu bagaro na yeto tai, naio jidom rivukuio rivan ea sebi, ana bogo napano naio bar jakou ea sebi, mia kiri maro sesa tai mijukukar jo bure yeto nalo nene, mia naio mijog sebi mijegio bitunu, naruei naio mijujo den yeto nalo nei, mia mēnkakar naio ea Pol juñano, mia jerio. <sup>4</sup> Mia bogo napano tomu nalo na vio nei amial maro na ña jer binvin tomu joña jakilele ea Pol juñano jibe na, ana nalo amijuvaluva melumu ga ealo, aberinavo “!Keialio, toro na yimo nalakoiano nei, ñeli naio be toro tai na ña muemue tomu dolu nalo telabo ruei! Tei jidom rila bin naio riñaro, mia naio buro kilkil ga, mia vonganei, mia maro na rila ka naio rimemedu na.”

<sup>5</sup> Mia Pol ñiliglar bere maro nei den juñano ban ea sebi, mia naio maka rijog titai, juñano maka rijalele leleio. <sup>6</sup> Mia nalo aju abitivi-tiio, aberiaña mia niabeno nonovio monoka aturobi ve tortoru, ñeli na ver maka ana mia monoka naio rijoru riñaro ga, mia nalo aju rorea jibe na, banbano-o mia amial ka napano maro neibano maka ruebin naio leleio. Mia bogo napano amialio ka Pol naio bo ga, nalo ajidomii be dolu naruei, aberinavo ñeli Pol naio be atua tai koviobo.

<sup>7</sup> Ana vio neibano kumemi nubauo eaio, nina naio vaataro ka tubo na uleule nei kiano tiniavio, siano be Puplias. Ana naio buru kumemi nuban ea kiano vonuo, mia bitikar vatitig kumemi ka bogoti tolu, napano numitua juñano. <sup>8</sup> Ana bogo napano numitu kumemliko nalo na, tubo nei karamano tormoruo naio jomon ea ñano jogu, naio mieyulu, napano niabene bitunu, a barbulo bunu. Ana Pol naio ba mial tormoruo nei, ana midu juñano joaio, bolkouo kanio, mila naio binimei bo bereio. <sup>9</sup> Mia bogo napano tomu dolu nalo amijogio ka napano Pol mila vite nei jibe na ka tormoruo nei, nalo bunu napano amie abinimei, naruei kanalo mieiano nalo ajaluvo. <sup>10</sup> Naruei nalo ajaaro toru ka vite nalo nei, naruei ajuña abar kurano ka vite telabo ban kumemi. Ana kumemi numitua uleule nei bano-o bokar siberio tolu, ana bogo napano mia kumemi numitaluvo bereio, mia nalo abar sinaniano telabo a ijaiano nalo abinimei, abar jua kenememi uako dolu ka rijai kumemi ea kenememi ñarabo bereio.

### *Pol nalo abano-o aboru Romo*

<sup>11</sup> Mo uako dolu na mia kumemi nuvisel ea naio be uako tai na Aleksadria kanano napano naio bunu jo kirisiou ea uleule nei, naio jo rorea ga ka bogo na jegi nei rivarlaka kario. Mia uako nene, ajisia kanio “Kasto a Polakis,” napano sio juo nei be tena atua juo na kanalo napano naljuo abe savoro, napano aje tavoru nene nalo jua buruako na uako nei. <sup>12</sup> Ana numituvan vio, nuban nuboru ea vio tai bereio, siano Sairakius, numitua vio na bogoti tolu. <sup>13</sup> Karina nuburu veru bereio, numisel tivelinio taakano nuburo jibe na bano-o nuboru Rejamo. Mia numitua vio na bogoti takurano bisi, karina jegi saut novo tai miuvuvu, naruei nuburo ñasosou ka bogoti juo, mia kumemi nuboru ea bulu yaniniobi na vio

Puteol. <sup>14</sup> Ana na kumemi numitabulu den uako ea vio na naruei, ana numileal namoneano nalo tealó, ana aburu kumemi nuban numitu kumemilikolo ka bogoti aluo [7]. Ana iorou ka nina, numial ka kene-memi burumãara ieliano nei vaataro ka ribisi naruei, numitu nubinimei vaataro ruei ka burumãara komeli na yetemeriba nei, Romo.

<sup>15</sup> Naruei namoneano nalo napano aju Romo, iliano bano-o bokarło ka numitu numiel nubinimei rove ealo, naruei amielko mãarabo ka kumemi. Nalo abinimei koalabo laka, nalo tealó abinimei aju rorea kumemi ea komeli nei napano burumãara yimo na vıl̃vıliano na Apias kanano naio joaio, a tealó abinimei lie vo bereio, abinimei namãariga-o abokar komeli na yimo tolu na valauo nalo ajaio. Ana bogo napano Pol mial ka napano nalo aju rorea jibe na, naio jaaro toru laka, a naio ber siva ban Atua ka napano vite nei mila ana naio mijog bo, mila ana mijog be p̃irinio bereio. <sup>16</sup> Ana bogo napano kumemi numiel nubinimei nuboru Romo, nalo maka adu Pol toa nalakoiano, mia amijamo ka naio ka mijikia rileal yimo tai ka naio toaio, mia nalo amidu toro na vitikariano tai jo bijaio.

### *Pol naio jo Romo ka yuka juo*

<sup>17</sup> Ana Pol naio jo Romo bogoti tolu bisi, ana miila toru ba ban kulo Ju nalo kialo navurimãaraboiano nalo napano ajaio vio nei, ana bogo napano abinimei vio takurano, Pol jukunu banlo. Naio ber kalo, berinavo “Banalo, kiaku tukunuano jibe nei: kiniou nebinimei ea vio nei bior ka yuka nanua beamu, kiniou nojo Yerusalemo, ana kiado tomu na tortoru nalo na vio na abuku kiniou naban ea nalakoiano, karina amidu kiniou nojoa natibureano nalo na vio Romo jumãalo napano abitikar kiado buruvenuo. Ea tivelinio na kiniou, maka nala vite tai ka kiado tomu nalo, a maka nala titai napano maka rimemedu ea kanado bajago

þeli na ea korobido nalo kanalo iliano nalo, mia nalo amila jibe na ka kiniou damãariga. <sup>18</sup> Ana bogo napano natibureano nalo na vio Romo abitii batitigio vite nei, bisi ana nalo ajidom ka kiniou nava tavio bereio ga, bior maka aial vite tai napano rimemedu ka mia asian vironiano van kiniou riviorio, ka river kiniou monoka namãaro. <sup>19</sup> Mia karina, nalo na navurimãaraboiano na kiado kulo Ju nalo amil vaarakurano bereio biorio, mia naio ba bova ga vo. Nalo amila jibe na, naruei ana kiniou nemial ka maka bunu ve kiaku vio tai naruei ka mia nemijikia nesel eaio, mia mãarabo takurano ga nemijikia nesel eaio, naruei kiniou neberial ka nejidom ka Parinio Tubo Sisa na Romo ga, naio ga tibure kiniou. Maka notomãa nesidomii ka novuru nalo na ea kiado buruvenuo avan ea burumãara komeli na vio nei, þeli ga, mia bior ka napano amila jikili laka ban kiniou jibe na, tenene na mila ana neberenio nalo monoka avuru kiniou nemei ea vio nei ea vio Romo. <sup>20</sup> Tenene na kiniou nojoa vio nei naruei, ana nejidom kamiu monoka kuvijikia vite nalo nei, ana nebio ka rotu vio takurano tibe na ka nemijikia notukunu van kamiu kanio. Kiniou nejidom ka monoka kuvijikia ka mãarimieni nalo nei aju amior kiniou jibe nei, nina maka rivior kiaku vovaiano tai, nina bior ga Naverikariano na kanado, naio napano kito kulo Israel nalo nonovio roberenio ka roju ga ban naio.”

<sup>21</sup> Naruei navurimãaraboiano nalo na kulo Ju nalo nei napano aju Romo nalo aber ka Pol aberinavo “Vite nalo na napano jau kojomãa koberenio, mia kumemi nubitovitionia. Kumemi maka nuvial m̃esi tai napano tomãa riverii jau napano kotaluvo Yerusalemo komei ea kumemi, a namoneano tealó napano ajumolu eaio abinimei, mia maka averii jau van kumemi ka jau komila jibe na jibe na. <sup>22</sup> Mia kumemi numijog kiamo iliano nalo, naruei numisidom ka nuvijog kija

bere vo kanamo jidomiano nalo p̃eli na kanamo moneano, bior ka napano be riano, kumemi numituña numijog kijakija ga ka tivelinio ka nalotuano vou nei, mia numijog ga ka tomu nalo ajum̃a aber niegeniege janea vio nonovio.”

<sup>23</sup> Ana nalo aji bogo tai ka mia amei aial Pol bereio ea vio nei napano naio joaio. Ana iorou kanio, bogo napano nalo abinimei, abinimei nalo miroano mia miroano, naruei nalo ajum̃a amiagago ka Pol, ka napano jikar kavijo ga bano-o bokar m̃erenio batove mia naio jom̃a mil banlo. Naio berial banlo ka jum̃abe ana toro mijikia ba jouro ea navenatuboiano na Atua kanano, a naio jom̃a berlogloglo jum̃abe ka napano tuboiano nalo na Mosis kanano, bija naverialiano nalo re nua kanalo iliano nalo, nalo amila meravo bo ka Yesu naruei, naio be kiado Naverikariano, ka napano nalo bunu ajum̃a aju rorea naio ka mia rimei rilarurlo. <sup>24</sup> Naruei nalo tealo amijog Pol kiano iliano jibe ka be riano, mia nalo tealo maka amoneaio. <sup>25</sup> Vite nei naruei mila ana nalo ajua taara juo kanio, ajum̃a ajidom bijovijonio-o, deio ga, aberenio bo ka abisi ga, ava vonuo beamu vo. Ana Pol naio ber vite tai maariano banlo, berinavo “Ei, kiniou nemial ka napano Niununo Lu ber riano laka ga na, ka napano nanua, naio ber iliano tai ban korobido nalo, ka napano naverialiano Aisea naio berial banlo. Naio berinavo

<sup>26</sup> *Jau kavan ea kanado tomu nalo nei, koverial vanlo tibe nei, kover*

*“Mia kamiu kuvijogio-o mia kuvijog kulu re bogo tai, mia kamiu kuvialio-o mia kuvial kulu re bogo tai,*

<sup>27</sup> *bior kamiu kumitibe ka tomu nalo napano kanalo jidomiano nalo am̃arñaro ruei,*

*jibe ka ajiko burutilinielo, p̃eli napano miralo kiri bono ga ju.*

*Mia verenio nalo ala re tibe na,*

*p̃eli mia miralo nalo avitilubarario, a burutilinielo nalo ajoglubario, a kialo jidomiano nalo amijikia avokar jikiaiano ruei, tibe na amijikia aviliglo amei ka kiniou ka mia nalarurlo.” Ais 6:9,10*

<sup>28-29</sup> Mo vonganei, neberii ka kamiu, neberinavo kamiu monoka kuvijikia ka Atua kanano Ioruriano naio jo miadu ba tavio ba bokar ruei nalo napano maka ave kulo Ju, nalo naruei ajum̃a amijogio a mia nalo nene naruei ajogkario.”

Naruei bogo napano Pol berial kiano iliano na maaro nei banlo bisi, ana na nalo ajumormolu abava tavio, napano mia nalo aju tiniel jer tanealo kar iliano nei.

<sup>30</sup> Ana Pol naio joa vio na jibe na ka yuka juo, a naio ga jom̃a bulu kunuano, naio jo bitikar naio. A ver toro kei napano binimei mial naio, mia Pol jaaro ka rivurukar naio rivan ea kunuano, <sup>31</sup> ana jibe na, na naio jom̃a mioliolu ka Atua kanano navenatuboiano bogo nonovio ban tomu nalo nonovio napano naio milealo. A naio jom̃a berlogloglo ka Tubo Yesu Kristo, ka napano mia maka bunu ve toro tai ka ril van naio riviorio, p̃eli na riverbure naio ka mia rila re bunu.

## **Mesi Napano Pol Bivitauiaio Ban Namonoeano Lu Nalo Na ROMO Verialiano Moti**

*Tukunuano bulati na niosi nei*

Pol bivitauia mēsi nei ka rila vatitig kiano m̄arabo, napano jidom riva rial namoneano nalo na Romo. Ea kiano jidomiano, naio jidom ka riñau bogo ve bulati vija tomu na moneano nalo na vio nei, ana iorou mia nalo aija naio, ka naio rijika riva voru Spen. Naio mijikia vatitigio bo ver toro rimonea Yesu Kristo, a rimei ve kiano toro napano takisor vatitig kiano bajago ea kiano meuliano, toro na mia rimemedu ea Atua mirano. Naruei bior vite na, naio bivitauia mēsi nei ka riverial bajago na moneano nei van tomu na moneano nalo yako Romo. Niosi nei bokar burupati Pol kiano jidomiano ea marabo napano toro rijikia monmonea Kristo.

Beamu, naio ber ilivorvoriano ban tomu nalo na yimo lu na Romo, a berial banlo ka naio jo bolukouo kalo. Ana kario, naio berial burupati jidomiano na mēsi nei napano bernavo “Toluano vou nei jo berial Atua kiano bajago ka rila tomu nalo ave tomu memedu ea mirano. Bajago nei jo maluvo ea kito ea moneano, jikario ea kiano tiiano rivano-o rivokar juluvati nene.” (1:17)

Ea mēsi nei, Pol judu ka berii kiano burupati jidomiano nei. Naio ber ka tomu nalo be iakurano napano abe yati na Israel, p̄eli maka ave yati na Isreal, mia abe veverarei ga, aju yetan ka moroano na kariano. Mia toro mijika ga rimei memedu ea Atua mirano, ver naio rimonea Yesu Kristo. Vite dolu, Pol berii meuliano na napano toro to riasol vatitigio ea Kristo, bija meuliano vou nene napano toro binime i be memedu ea Atua mirano. Toro napano monea Kristo, naio

joa tuñaro bija Atua, a Atua kiano Niununo mila napano naio be teau, moroano na kariano bija m̄ariano maka bunu vokar naio. Mia jikario ea mirano jimo [5] ba bokar mirano arolu [8], Pol berial bior vaio Atua jian tuboiano ban kiano tomu nalo, a berii bajago napano Atua kiano Niununo jo miñau ea tomu nalo kialo meuliano napano amonmonea Kristo.

Mia naio judu kia ka berii bajago napano taara na kulo Israel, a nalo napano maka ave taara na Israel, amijikia avuron ea verikariano nei napano Atua mila be tomu nalo na yetemeriba kialo ka atakio. Bogo na naio jidom rila nonovio kiano iliano, naio berinavo bajago na napano taara na Israel nalo abilig taakalo ka Yesu, naio be togio na Atua Kiano Verikariano napano naio tinienmiia tomu nalo na yetemeriba, naruei miila Yesu binime i, ka toro napano rimonea naio, naio mijikia rimei rive toro memedu ea Atua mirano.

Mia Pol monea ka taara nalo na Israel, mia maka ajikia avilig taakalo bogo nonovio ka Yesu. Ea togio maariano na mēsi nei Pol berii bajago napano memedu ka tomu na moneano nalo atakio ea kialo meuliano, a mave liei, naio berii bajago na toro monoka tinien riia toro dolu. Naio berii bajago napano toro monoka takio ea Atua kiano iñauano, a bajago napano tomu na moneano monoka ala van parinio tubo a van toro dolu. Mia naio berii bajago napano toro na moneano monoka sidomiio vatitig ka rilabulag re toro dolu kiano jidomiano. Ea kiano juluvati mēsi nei, naio ber iliano nalo na ber kiano ilivorvoriano bija kiano bilbilu nalo, ba ban kialo bilbilu dolu nalo, a berenio iliano nalo na aiaia Atua.

*Torogio nalo na niosi nei*

Iliano moti bija burupati jidomiano na mēsi nei 1:1—17

Tomu nalo adu meuliano vou napano Atua jianio 1:18—3:20

Atua kiano m̃arabo ka rilarur toro  
3:21—4:25  
Toro kiano meuliano vou napano  
miasol ea Kristo 5:1—8:39  
Atua kiano verikariano ban taara  
nalo na Israel 9:1—11:36  
Bajago novo napano namoneano  
monoka takiio 12:1—15:13  
Iliano maariano 15:14—16:27

### *Iliano moti*

<sup>1</sup> Bilbilu nalo na Romo:

Kiniou Pol neber kavijo bo p̃eli bogiano bo ban kamiu ea Yesu Kristo siano, na nebe kiano toro na im̃auano, nebe atevi nei na Atua bio kiniou, naio bijauia kiniou ka noĩmau ka neverial kiano Ioluano Vou.

<sup>2</sup> Ioluano Vou nene, naio ju joomo ea iliano nalo na vivitauiano lu nalo na Atua kanano ruei, nina ea verialiano nalo na napano kanano naverialiano nalo aberialio nua nua binimei. <sup>3</sup> Burum̃ara vite napano Ioluano Vou nei naio berialio, naio be Yesu Kristo kiado Tubo, napano naio be Atua kenerinio napano naio miila naio miyotuba ka kito ea yetemeriba nei. Naina naruei napano ea tivelinio na yati na m̃aratavo na kanano, kito romijikia roverinavo naio moluo ea yati na tomoruo Parinio Tubo Teviti memedu. <sup>4</sup> Mia ea tivelinio na kanano niununo, naio be lu laka, naio miyotuba memedu ea Atua kanano yati ga. Amuebin naio m̃aro, ana ea kiano burum̃ara moroano, Atua mila naio jumolu meul bo bereio, naruei romijikia rovitilubarario batitig ka be riano, kiado Tubo nene naio be Atua kenerinio memedu.

<sup>5</sup> Naio naruei bitirilar kiniou nebe atevi, a miila kiniou ka nava noioliolu van taara dolu na tomu nalo napano maka ave Ju, ka nalo bunu amijikia amonea Atua, ana amijikia amonmonea kanano iliano nalo. Im̃auano na jibe nei naio be ijaiano novo tai napano Tubo naio jian ban kiniou, naruei najaaro ka nala ka siano rivavin.

<sup>6</sup> Mia vonganei, kiniou nojo nomila im̃auano nei ea kamiu, bior ka napano kamiu bunu siemi joa vio na, kamiu bunu kamliko nalo dolu nei napano Atua biolo ka amei ave Yesu Kristo kiano tomu nalo. <sup>7</sup> Kamiu bunu tomu nalo napano naio tinien jii kamiu toru, napano naio bitiri bulag kamiu kube kanano namoneano lu nalo ea burum̃ara komeli nei Romo, naina naruei najaaro ka nebivitauia m̃esi nei biedu ban kamiu.

Nebivitauia jibe nei, nobolkouo ka tiniesese a tum̃aro na karam̃ado Atua vija kiado tubo Yesu Kristo kanalo, naio to ve tomoruo ea kene-miu meuliano nalo veve terakurano.

### *Pol jidom toru ka riva rimaluvo ka nalo na Romo*

<sup>8</sup> Beamu ka neverial vite tealo rivan kamiu, kiniou nobolkouo ea Yesu Kristo siano, neber siva toru ban kanado Atua bior kamiu. Nojidom nela tibe na, bior napano vonganei, iliano nalo ea tivelinio na kenemiu bajago novo nalo, napano kuvitumolu kuvitu sikili ea mon-eano ea Kristo, naio jo ban ea vio miroano ruei. <sup>9</sup> Tenei naruei mila kiniou najaaro toru, bior napano kirisiou ruei nojo nomĩmau Atua kanano bija kanaku meuliano momou, nomĩmauka neverial Ioluano Vou napano beriio kenerinio. A naio mijikia ruei ka napano nojo tinieku maio ka kamiu ea kanaku volkouano dam̃ariga, <sup>10</sup> a nojo nobika den naio bunu ka river memedu ea kiano jidomiano ga, mia naio rila kiaku m̃arabo ka nomĩm̃auka namaluvo ka neadu ka kamiu. <sup>11</sup> Nojidom laka ka neviedu neial kamiu, ka verenio nemijikia nejev ijaiano tealo na moroano na Niununo Lu juvan ban kamiu ka rila kuvisikili lievo, mia naio rivu laka. <sup>12</sup> Kiniou nomonea ka kiaku viekouoiano naio mijikia tunukakar kamiu, a nojidom nomei ka kenemiu viekouoiano mijikia tunukakar kiniou bunu, a tibe na kito roju romija bitiraviran bo ea kito bereio.

<sup>13</sup> Banalo, nojidom kamiu kuvi-jikia ka va telabo ruei kiniou nemila vio jikili ka nevedu kean kamiu, mia dañariga m̄arabo bisaro ea vite tealó, mila na maka nevedu vo. Mia nojidom toru ka nevedu, ka kanaku im̄auano mijikia rivar m̄arati tai bunu ea kamiu napano kumonea ruei, jibe na napano bar ruei ea nalo napano maka ave Ju ea vio dolu nalo.

<sup>14</sup> Im̄auano napano joa juñaku naio jibe nei, berinavo monoka noioliolu ea kiado tomu nalo memedu kulo Ju, a tomu dolu bunu, a monoka noioliolu ea tomu nalo napano amijikia vite ruei a nalo napano maka ajikia vite vo, <sup>15</sup> naina naruei mila na nojidom nevedu neverial Ioluano Vou van kamiu ea buruñara komeli na kenemiu nei, Romo.

<sup>16</sup> Ioluano Vou nei, naio be m̄arabo takurano ga napano Atua kanano moroano jo miñau eaio ka ridu ioruriano riyotuba ea tomu nalo, mila na maka noimou leleio ka neverialio bogo nonovio. Ioluano nei naio miyotuba ea kito kulo Ju beamu, karina naio ba tavio ea nalo napano maka ave kulo Ju, naruei toro kei napano rimoneaio, mia rileal meuliano eaio.

<sup>17</sup> Ioluano novo nei, naio be kiado m̄arabo ka remijikia romei memedu ea Atua mirano bereio, ka maka bunu rovokar vironiano na kiado kariano nalo, mia bo romijikia ka monoka retikar vija viekouoiano, a mia rala nonovio rivija viekouoiano, bior napano naio jibe ka iliano moruo tai napano Naverialiano Abakuku berenio, berinavo “Toro napano ver ga naio rivarkar tiniene ea Atua, mia Atua rila naio rimei rimemedu rive riano, a nina ga naruei naio be m̄arabo na ajev meuliano.”

<sup>18</sup> Marabo na aje meuliano naio jo, mia veribinio bija vovaiano abujo laka ea tomu nalo na maka ave Ju reraio ea yetemeriba nei, mila

nalo aju aberbure m̄lea Atua kiano ilirianiano, ana jibe na kito romialio ka napano Atua naio joa vio mave, kiano siniabu monoka riyotuba rilalo ajikia. <sup>19</sup> Naio jo berloglog kiano bajago vu nalo amiyotuba medave ea mirano tomu nalo ruei, naruei bo ka abitulubario, mia maka asidom ajikia. <sup>20</sup> Be riano ka Atua naio maka ve kulorinio, a toro maka rijikia rial naio, mia jikar ea tiiano na yetemeriba binimej bokar vonganei, tomu nalo aju amial kiano bajago novo nalo, ana amijikia avitulubario ka naio be Atua riano. Ver aial kiano tiiano nalo ga, maka bunu ajikia avika aver ka naio be kenja. <sup>21</sup> Ver makanio, amijikia ka Atua naio jo, mia maka lele asidom ala kialo jidomiano rivatove ka naio, maka lele asidom aver siva van naio rivior kiano tovu ealo. Nalo maka asidomial titai, banbano kialo jidomiano nalo bujo ka melijokouo batitigio. <sup>22</sup> Nalo be tinielo ka aber abe masou, mia nalo abano aba vovu batitigio, <sup>23</sup> a nalo maka bunu alotu ka Atua napano naio maka rijikia rim̄aro bogo tai. Nalo maka asidom naio, mia amim̄auka tavoru napano midu mirano toro p̄eli mirano menu p̄eli mirano temeul nalo jibe niobi p̄eli venia, ana nalo be tinielo bo ka alotu ka tenalo nei naruei.

<sup>24</sup> Bogo na amila jibe na, Atua naio binimej tinien maro laka ea kialo veribinio nalo nei, naruei naio juvanlo ka avan bo kanio vija sidomvaiano venia napano tinielo jii. Ea bogo nei naruei kito releal ka napano tomu nalo aju amila bajago na imouiano ea mokotenalo nalo, <sup>25</sup> mia naina monoka tibe na, bior napano abar bulag Atua kanano ilirianiano, amidu sibiano ju keano, a maka bunu alotu ka Atua napano bo ka aiaia siano lu dañariga, mia abatove ga ka vite nalo napano naio jiilo.

<sup>26</sup> Nalo abilig dabu lelan vite nonovio na jibe na, mia Atua maka bunu riverburelo, mia juvanlo aba

amila pariparilo ea kialo sidomiano va nalo. Jibe ka tire nalo maka bunu avan vija suĉano nalo, mia aban bija tire nalo bereio, <sup>27</sup> a suĉano nalo bunu, nalo maka bunu asidom aver bo ka asoro ka tira, tibe ka napano Atua naio berenio berinavo bo ka alaio, mia nalo ajidom suĉano ga, aju aban bija nalo bereio ea bajago napano romimouo ka roveriio. Imauano nalo na jibe nei maka amemedu leleio, mia nalo napano ajumĉa amilaio, ea kialo meuliano nalo ga, aial vironiano napano memedu ka toro napano mila jibe na monoka rivario.

<sup>28</sup> Tomu kinkin na jibe na, maka aialerinio ea Atua ea kialo meuliano nalo, maka asidom titai kanio, ana Atua maka tokovio kalo, mia naio juvanlo ka kialo sidomsearioano nalo aburulo aba amidu momou ea bajago va. <sup>29</sup> Amila jibe na banbano komial kialo meuliano binimej bujo ka bajago nonovio na lakorov tuboiano, bija vovaiano nalo, jokoluolu nalo, bija sidomvaiano ea kulo dolu nalo. Amijoku, amuebinvin tomu nalo amarmaro, abilvilialo, amila sibi, ajermi ka kulo dolu nalo, aberveriilo, <sup>30</sup> ajian merano kanalo iliano nalo, a ea tivelinio na Atua, nalo maka asidomialio ga. A bija bajago nalo na bova nei, parilo kirisikili laka, abarvar kalo, amil vevavin, amila verikariano bior imauano vou na voviano napano nua makanio, mia bogo napano kialo tormoruo nalo amil banlo, amilkuei ga. <sup>31</sup> Tomu nalo na, romijikia roverinavo nalo maka aje masouano, maka adukar vatitig kialo verikariano nalo, maka ave tinievuiano rivu, maka tiniel riia toro leleio.

<sup>32</sup> Nalo amijikia vatitig bo Atua kiano iliano ruei, amijikia ka Atua naio berkar mariano ban tomu nalo na jibe na, mia maka atovonio. Nalo aju ajidel dolu ka amila jibe na, mia mave ka nina, aju ajaaro lie vo ver amial kialo bilbilu dolu nalo aju amila bova jibe nei bijalo.

## 2

### *Atua naio takurano tibure tomu nalo*

<sup>1</sup> Jibe na, ver jau toro Ju tai napano koĉo komial vovaiano nalo na kulo dolu nei kialo, mia jau kosidomii tumabe kanio? Peli jau kosidomii ka jau kobo, nalo abova, mia maka leleio, vovaiano na joaso be verare ga, mia maka bunu kojikia kover titai. Jau kobe toro na tibure kulo dolu na, a koĉo kojibureso bereio kar napano jau koĉo komila tena javukia napano koĉo kojibure dolu nalo kanio. <sup>2</sup> Mia jibe napano kito romijikia, Atua naio rije vironiano van tomu nonovio napano amila bova jibe na be verare ga.

<sup>3</sup> Peli jau tai napano koĉo kojidom ka jau kobo bior napano koĉo komil ban toro napano mila korovio tuboiano, a jau bunu koĉo komila korov, mia bova jau koĉo kojidom ka vironiano na mia Atua sianio mia maka rijikia rivakarso. <sup>4</sup> Peli koĉo kojidom ka Atua naio tiniene bo laka, tinien miia toro, a kiano jidomiano tebievi, ana kober peli maka rijikia rila titai kaso?

Ee, Atua naio bo laka jibe ka napano koĉo koberenio, mia kiano tiniememiano maka rijamo kaso ka kala du ka kalakorov tuboiano, mia naio ga rivurso koviligso kataluvo ea kariano nalo napano koĉoiaio.

<sup>5</sup> Ana jau, maka kosidom koviligso leleio, jau pariparimo jikili ga bano, ana jibe na koĉo komila ka koĉo komivon kakar kiamo vironiano nalo banbano bokar bogo napano mia Atua kiano tiniemimiano tibure memedu tomu nalo. <sup>6</sup> Ea bogo nei naruei mia naio rivar bulag van tomu nalo rivare ga tavukia venia napano nalo aju amilaio.

<sup>7</sup> Jibe na, tomu tealoo, nalo ajurmaro ga, nalo aju ajudu bogo nonovio ka amila bajago na bo napano mijikia rila sialo rivu ea Atua mirano, a mijikia rilalo avokar mermerano na vio mave. Venia na mia

Atua sian vanlo, naio be meuliano napano maka rijikia ribisi.

<sup>8</sup> Mia tealo, tomu na baravoiano, nalo maka amonea ilirianiano, a nalo aju yetano ka moroano na vo-vaiano. Venia napano Atua mia sian vanlo, nina vironiano napano riyotuba ea kiano burumãara tiniemimiano ga. <sup>9</sup> Mia bogokouo bija jogvaiano rimei rivokar tomu nalo nonovio napano amila bova, jikar ea nalo napano Atua bijauia bulaglo beamu, nina Ju nalo, ba bokar tomu nalo na vio dolu napano maka ave Ju.

<sup>10</sup> Ana nalo napano kialo meuliano bo, mia avokar Atua kiano ilivuiiano novnovo nalo, sialo nalo mia atu rivu vijaio, kiano tumãaro to vijalo. A nina bunu tikar ea nalo napano abe Ju, ba bokar tomu nalo na maka ave Ju, <sup>11</sup> bior ka napano Atua naio maka rivitii tomu nalo ve dolu, a naio mila memedu bare abiniu.

<sup>12</sup> Kulo Ju nalo aju yetano ka tuboiano napano Atua jian banlo ruei, ana verver amila korov tuboiano nene, mia Atua rije vironiano vanlo. A tomu nalo na maka ave Ju, nalo maka avokar tuboiano nene, mia ðeli nalo maka ajikia venia napano tuboiano naio berenio, a ver nalo amila bova, mia amãarmãaro. Jibe na, kariano joa kito robiniu robe verare ga, a mia Atua monoka tibure kito rovinu. <sup>13</sup> Tomu nalo na amemedu ea Atua mirano, maka nalo napano amijikia ga venia napano tuboiano berenio, mia nalo napano Atua jaaro ka rivurlo, nina mia nalo napano kialo meuliano jakii vatitig bo venia napano tuboiano berenio. <sup>14</sup> Tomu tealo maka ave Ju, maka ajikia Atua kiano tuboiano, mia bekurano, kialo meuliano bo bano-o, kialo bajago jibe ka ga napano verver Atua kiano tuboiano jo bijalo ruei. <sup>15</sup> Nalo jibe ga napano venia na tuboiano jo beriio, naio joa kialo iviso ruei. Jibe na, bogo napano amijog iliano nalo reraio aberinavo jau kavan na, ðeli

jau kavan nei, kialo jidomiano novo jo ber vatitigio kalo venia na bo a venia na bova.

<sup>16</sup> Jibe napano ioluano napano nojo nomioliolu kanio berenio, bogoti na toru nei naio jo binimei, a ea bogo na, mia Atua sian van Yesu Kristo ka rivitii veve tomu nalo kialo jidomiano nalo, riva rivokar venia na amilavano joa kialo iviso, mia naio tibure tenalo napano amilaio, ba bokar naio napano aber ðeli toro tai maka rijikiaio.

### *Kulo Ju nalo bija Atua kiano tuboiano*

<sup>17</sup> Nemialio bo ka noil lie bereio ea tivelinio na vite nalo napano kito kulo Ju roju reberenio. Kito roju reberii jumãabe napano kito naruei rajakii Atua kiano tuboiano, reberiamãa kito naruei Atua jidom lie kito, ana mila napano kiado jidomiano bavavin laka. <sup>18</sup> Kito roju rober ka kito romijikia vite bo ea Atua kiano tuboiano, mila roberiamãa kito ga romijikia vatitig Atua bija kiano tinieiiiano, kito ga romijikia vatitig vite nalo napano be riano a memedu bo. <sup>19</sup> Kito roju rober kito kulo Ju ga naruei bo ka kito rovuru mãarabo ka nalo napano maka ave Ju, kar napano rober nalo abe merebono napano maka ajikia mãarabo. Kito roberiamãa kito ga kito robe yulu ka nalo napano ajua melijokouo, <sup>20</sup> kito ga bo ka rala toro rimemedu napano milaluv mãarabo, kito ga romemedu ka roverloglog vatitig nalo napano ajibe kiritete nalo, maka ajikia vite.

Mo nojidom never ea vio nei, bo ka napano robitilubar ka Atua kiano tuboiano bujolou ea jikiaiano novo a ilirianiano novo nonovio ruei, mia maka rivu ka rotu rosidomii ka rover kiado ga. <sup>21</sup> A titai bereio na bova lie vo mave kanio, kito rosikili ka roverloglog kulo dolu nalo, mia nemial jibe maka rotu roverloglog vatitig kito bereio. Verver koto koioliolu ka toro ka rivina re, a bo ka jau kojo kobina kia ga vo? <sup>22</sup> Jau na kojo koberloglog ka toro

monoka rila re siakaiano, ka venia jau bunu komilaio? A jau na kober ka tavoru napano nalo dolu aminaukanio, nalo abova laka, jau kober be riano na, mia jau bunu, ðeli jau kojo kobina ka niogo vite nalo na abar joa kialo vio lu nalo, ina?

<sup>23</sup> Ea vio nei, monoka kito rover aua ve toru laka, bior kito tomu nalo napano rabarvar ka napano romidu Atua kiano tuboiano, mia roju romila niegeniege kiado Atua siano lu bereio, ka napano roju romila kokorov kiano tuboiano nalo na. <sup>24</sup> Iliano Lu naio berenio kiado bajago naruei, berenio jibe na, ber “Kamiu tomu nalo na Atua kiano, kenemiu sibiano mila na tomu dolu nalo aju amilkue bova ea siano.”

### *Toro napano be toro Ju riano*

<sup>25</sup> Jau kober ka apakuveuso ruei, ana kobe Ju tai riano, nina bo laka. A tena mijaso verver ga jau kojo komonea Atua kiano tuboiano. A ver jau kolakorov tuboiano na, jau kobe Ju ka iakurano ga, jau kobova ea Atua jibe ga nalo napano maka abakuveulo. <sup>26</sup> A ðeli toro tai naio maka tibe ka kulo Ju nalo napano apakuveuio, naio maka apakuveuio ga, a ver toro na rimonea vatitig tuboiano nalo, ea Atua kiano vitiiano naio binimei bare ka toro Ju ruei. <sup>27</sup> Toro Ju naio apakuveu ruei a midu tuboiano, a ver naio maka rijogkario, naio monoka rivitikar vatitigio, ver makanio, Atua rivukular naio vatitig, mia rivuru toro dolu na maka avakuveuio ana napano mijogkar kiano tuboiano.

<sup>28</sup> Nina ka ea Atua kiano vitiiano, nina be Ju riano, maka nana be Ju ea kuluniabene ga. A pakuveu napano Atua bitiio be riano, maka nana tavio ea toro niabene ga. <sup>29</sup> Toro na Atua kiano riano, maka nana bokar ga vivitauiano lu nalo ka juñano, a naio be toro napano Niununo Lu jo miñau ea kiano iviso, napano kiano meuliano mijulu kon bo. Toro na jibe na, ðeli tomu nalo maka

asidomiiio ka naio be toro tai, mia Atua naio jaaro laka kanio.

## 3

### *Tonovo na bo laka na joa Ju nalo*

<sup>1</sup> Kiniou nojomã nemil jibe nei, ðeli vikadeniano tai miyotuba, bika jibe nei, ber “Verver toro Ju be verare ga ka tomu dolu nalo, jibe ka na kojo koberiio, ka venia na sio na Ju naio bo, roberiamã ka nina naio be titai? Roju romila pakuveu ea kito, ka romei rove kulo Ju riano, a ðeli na ka iakurano ga?”

<sup>2</sup> Vikadeniano na naio memedu, a neberdoþeio jibe nei neber, Makanio, robarkar sio na Ju, naio be burumãara tolu tai napano mila bo laka ka kito. Bajulukuti vabe bereio na tomu nalo napano Atua midu kiano iliano lu joa juñalo nalo? Maka nalo dolu tanea vio, mia kito kulo Ju nalo ga. <sup>3</sup> Be riano ka kiado tomu tealò nalo maka amonmonea Atua kiano iliano nalo nei, naruei vikadeniano naio jo ber jibe nei, ðeli mia Atua maka bunu riilivu ka kito tibe napano naio berkar ka rilaio? A makanio, maka tibe na. Be iakurano napano tealò nalo maka avokar vatitig Atua kiano iliano, mia Atua maka rijikia leleio tuvan bogo tai kiano verikariano na ban kito. <sup>4</sup> ðeli kito tomu nalo romila sibi bogo nonovio, a Atua naio be riano bogo nonovio jo, jibe na napano Parinio Tubo Teviti naio ber ea Niosi na Iouano nalo, napano ber

*Mia nalo aialio napano jau kobe riano ga ka kanamo iliano nalo ka kotiburelo,  
a mia nalo ajidom atibureso bereio, mia jau komemedu ga  
kojo. Iouano 51:4*

<sup>5</sup> Kiado tokoriano nalo bova ga, a titai napano bo kija, tokoriano nalo na amila meravo ea tomu nalo miralo ka Atua kiano tuboiano nalo napano juko vio ka tokoriano nalo na, nalo amemedu mia amemedu. Kiniou neber jibe na, ðeli mia kelvovu nalo tai atumolu averinavo “A verver kiado tokoriano

nalo amila tenalo na bo nei, ka venia Atua tinien jer kito jidom sian vironiano van kito bereio riviorio?" Mia makanio, nina toro kiano jidomiano ga, <sup>6</sup> maka tibe na leleio! Verver Atua naio maka tibure kito kulo Ju, p̄eli maka rivu ka naio tibure kulo dolu napano maka ave Ju, mia makanio, naio memedu a naio takurano ga be natibureano.

<sup>7</sup> Vikadeniano dolu jibe nei mijikia rimei bereio, napano naio ber jibe nei, berinavo "Beamu neber nomonea Atua, mia iorou maka neiagago ka naio, naruei jibe nojo nemila sibi ga. Mia kiaku sibiano na jo berialio ka Atua kiano iliano ga be riano, a jibe na jo rila siano ka rivavin. Ana ver tibe na, ka venia naio jidom to tibure kiniou kia na vo ka nobova?" <sup>8</sup> A mia tomu nalo dolu aviligvilig iliano kinkin nalo tibe na riva vova lie vo, nalo aver "Verver bajago va berialio ka Atua kiano iliano be riano, bo ka kito rotu raladu bogo nonovio ka rala kariano ve miroano, ka rila Atua kiano iliano ve riano lie vo." Nalo tealu aber nojo nomioliolu ka jibe nei, a nina be sibiano ga, a nalo na napano aju aber, mia nalo avar vironiano rimemedu ka kialo iliano va nalo nene.

<sup>9</sup> Kiniou nejidom navan bere ea tena roju roberii, na rober toro na bar sio na Ju, mia tum̄abe ka naio? Peli tomu tealu be kialo vikadeniano ka mia bo lie ka naio jovulu toro napano maka rivar sio na jibe na, p̄eli makanio? Bo ga, kiaku verdopeiano, neber maka tibe na. Jibe ka napano neber ruei, kulo Ju nalo bija kulo Kiriki, abiniu aju yetano ka moroano na kariano bare ga. <sup>10</sup> A jibe ka iliano nalo na niosi lu aberenio,

*Maka lele toro tai na kiano meuliano memedu.*

<sup>11</sup> *Makanio, maka toro tai na bitilubar m̄arabo, maka tai na jo milavio jikili ka rial Atua ea kiano meuliano.*

<sup>12</sup> *Tomu nalo ajitetere den m̄arabo na memedu, nalo abano bova laka, maka lele tai na miñau memedu bo. Iouano 14:1-3*

<sup>13</sup> *Kialo iliano nalo bova, jibe tanunu na jono,*

*buruminalo aju amim̄auka sibiano nalo, ililelaniano nalo aju amiyotuba ea kuluniolo nalo, jibe ka maro va naio jerbin toro. Iouano 5:9*

<sup>14</sup> *Riano ga, niolo ju bujo ka ilikakar-ioano va bija ilijaleleiano nalo ga. Iouano 10:7*

<sup>15</sup> *Jaalo nalo aju abarlo ajikiti jan ea vio ka ala burukija riou,*

<sup>16</sup> *kanalo ieliano nalo aba amila bulag vite nonovio, amila tomu nalo amijog bova.*

<sup>17</sup> *Maka asidom asidomii ka m̄arabo tai na tum̄aro jo, Ais 59:7,8*

<sup>18</sup> *miralo maka leleio abitulubar ka Atua naio jo bitikarlo. Iouano 36:1*

<sup>19</sup> Ee, iliano nalo na amiyotuba ea Atua kiano tuboiano, a kito romijikia ka venia napano Atua kiano tuboiano berenio, naio jo jiloglog kito kulo Ju. Kito roju yetano ka tuboiano na, a toro na bitilubar venia na tuboiano na berenio, naio maka bunu iliano ka verenio, naio mijikia ka yetemeriba reraio amila kokorovio, monoka aviniu ka avar vironiano kanio. <sup>20</sup> Maka toro tai rijogkar ka tuboiano na Atua kanano rivare ka naio rimemedu ka Atua mirano, a tuboiano na mila na abiniu amijikia vatitig ka kariano joalo.

<sup>21</sup> Jibe ka, m̄arabo na mononeano ea tuboiano, maka toro tai rijikia takii rivanvano-o rimei rimemedu ea Atua mirano, a nina mila na Atua mial bo ka naio mila vatitig m̄arabo vou dolu tai napano romijikia ratakiio.

Marabo vou dolu na naio bo laka, bior napano maka ve kiano tuboiano nalo napano mia toro monoka rijogkarlo. Marabo na,

ilivivitauiano lu moruo nalo bija naverialiano nalo kialo iliano, nalo aberiio ruei tertelisu beamu nua, a vonganei Atua berialio ka kito ruei.

<sup>22</sup> A m̄arabo nene jibe nei: naio be m̄arabo na moneano. Jibe na, toro kei napano biekouo ea Yesu Kristo, mia Atua rila naio rimemedu ea naio mirano kario. Marabo na maka ve tena tomu tealogo, a tena tomu nonovio, <sup>23</sup> ka napano abiniu amila kariano, maka tai na kiano meuliano rimemedu rivokar jeleig meuliano novo napano Atua jidomio.

<sup>24</sup> Mia bo ga, bior Kristo Yesu naio bulu bulag kito ruei, mila na Atua rila kito romemedu ea mirano, jibe ka jidomiano tai napano naio jian ban kito, binimeia ea kiano tiniese-seiano ga. <sup>25</sup> Naio bulu bulag kito ka napano Atua bitirilar naio jibe ka sida napano kiano burukija miou ka sekon bulag kiado kariano nalo kito napano romonea naio.

A juñabe ka tomu nalo na jikar yuka nalo re nua binimeia, bogo na Yesu maka rimeia vo? Maka reialio napano Atua rije vironiano vanlo ka kialo kariano nalo, ana p̄eli be jidomiano ka p̄eli Atua mije vironiano na kariano na tomu tealogo, a tomu tealogo maka rije vironiano na kialo kariano? Mia makanio, nina maka river tibe na. Bogobe nua ruei, na Atua jo mila kiano jidomiano tebievia ga, a jo jokokovio ka kiano tiniememiano, a naio mila jibe na ba bokar bogo na Yesu m̄aro ka kialo kariano na re nua bunu. <sup>26</sup> Jibe na, Atua berloglogial ka kito vonganei ka naio miñau memedu bogo nonovio ga, mila na toro kei napano balea ga Yesu, mia naio meravovio rivu ea mirano.

<sup>27</sup> Ver tibe na, mia kito romijikia ravarvar ka kito kar venia bereio? Maka titai, bior venia mila kito robo bija Atua bereio? Maka bajago na bo na jogkariano na kiano tuboiano napano rojidomii ka romila, mia maka leleio, bulapati nene, kiado

moneano ea Yesu ga. <sup>28</sup> Kenememi iolioluano aber jibe nei vonganei, ka toro rimeia rimemedu ea Atua mirano, joa ga naio kiano viekouoiano ea Kristo. Naio maka rijikia balea kiano iñauano novo nalo, napano naio rijogkar rivu tuboiano nalo nonovio na kulo Ju nalo kialo bogo nonovio, kar napano maka toro tai rijikia rila tibe na.

<sup>29</sup> Jibe na, romial napano Atua maka ve kiado Atua ga kulo Ju nalo, a be Atua na kulo dolu nalo bunu. <sup>30</sup> Ee, Atua naio takurano ga, a be tomu nonovio kanalo, a verver toro Ju, naio mijikia rimeia rimemedu ea Atua mirano verenio ga riviekouo eao, a p̄eli verver toro napano maka ve Ju, naio bunu mijikia rimeia rimemedu ea Atua mirano verenio ga riviekouo ea naio.

<sup>31</sup> Ana iliano nalo na maka river ka bajago na viekouoiano ea Yesu rivuku bulag Atua kiano tuboiano moruo napano ju, ka naio maka bunu kiano iñauano ka rilao. Naio maka river tibe na, naio ber ka bogo napano roju romomea Yesu, roju rabamenea vatitig tenalo napano tuboiano nei naio berenio, roju romilaio be riano.

## 4

### *Epraamo barkoro yeturu jiloglog m̄arabo na viekouoiano ka kito*

<sup>1</sup> Roju roberii jibe ka bajago na viekouoiano ea Kristo naio ga be m̄arabo na robokar ioruriano, a juñabe ka korobido nalo re nua, jibe korobido na toru nei ea kiado yati na tormoruo Epraamo? <sup>2</sup> Naio mila iñauano novo telabo napano Atua jaaro kanio, a iñauano nalo nene na maka ala naio rimemedu ea Atua mirano. Verver naio rimeia rimemedu kar kiano iñauano, p̄eli naio mijikia rivarvar ka naio bereio, mia maka tibe na. Maka toro tai napano mijikia rivarvar ea Atua mirano bior iñauano napano naio milao, <sup>3</sup> a viekouoiano ga mijikia rila toro rimemedu vija Atua, jibe ka

napano Epraamo kiano tukunuano naio berenio ea Niosi na Tiiano, napano berenio

*Epraamo naio biekouo jikili ea Atua kiano verikariano nalo, ana Atua jaaro, midu Epraamo kiano viekouoiano na, mila naio binime memedu bo ea mirano kario. Jen 15:6*

<sup>4</sup> Kosidomii vonio, ver toro na miñauka veru, bogo na siberio burukorovio naio monoka rivar kiano veru. A kito rover re ka veru nei naio be jidomiano tai napano kiano toro na toru jian ban miyotuba ea tinieno vu, mia veru nei, toro na miñau nei naio miñau jikili kanio, nina naio memedu ka rivar ve kiano.

<sup>5</sup> A tivelinio ka toro rimei rimemedu ea Atua mirano, naio maka ve titai tibe veru napano romijikia roimñaukanio, napano romijikia rovar tibe titai napano kito ga romijeivio be kiado. Kito, kiado iñauano nalo abova ga, tenena monoka ravalea Atua, napano naio ga mijikia rivar bulag vovaiano ea kiado meuliano. Verver ga ravalea naio, mia naio rila kito romemedu ea mirano.

<sup>6</sup> Tormoruo Burubati Parinio Tubo Teviti naio mijikia tena nua ruei, mia kiano iouano tai beriio jumabe mia rivu laka ka toro napano maka rivalea kiano iñauano nalo bereio, mia balea ga Atua ka mia naio saaro ka rila naio rimemedu ea mirano. Iouano nene ber jibe nei, ber

<sup>7</sup> *Toro na Atua biekokoa kiano vovaiano nalo, napano miolkon bulag kiano karriano nalo, naio be ilivuiano tai napano mia bo laka kanio.*

<sup>8</sup> *Toro napano Atua mial naio jibe ka napano maka bunu miamiamo tai toaio, napano monoka rivakar vironiano kanio, mia naio mijikia rijog rivu mia rijog rivu. Iouano 32:1,2*

<sup>9</sup> Ana nalo napano amijikia ajog rivu jibe napano iouano nei berenio, nalo kei na? Ilivuiano nei, mia maka

rijikia rimei ea tomu na apakuveulo ga, jibe kito kulo Ju ga, a mia rimei bunu ea nalo na maka ave pakuveulo. Nina meravo bo, bior jibe ka napano roberio, Epraamo binime memedu ea Atua mirano, maka ka napano naio be pakuveu ga, a binime memedu ea Atua mirano ka napano ga naio baleaio jikili.

<sup>10</sup> A kito romijikia tena jumabe? A Atua naio ber Epraamo naio memedu ea mirano ea bogo vabe? Naio berenio ea bogo napano Epraamo naio be pakuveu ruei, ðeli berenio ea bogo napano naio maka ve pakuveu vo? Verver ravan bereio ea kiano tukunuano, mia reial ka Atua ber mia Epraamo memedu ea mirano bogo na naio maka ve pakuveu vo.

<sup>11</sup> Jibe na, Epraamo kiano viekouoiano ea Atua, naina ga mila naio memedu ea mirano. Ea bogo neibano, naio maka ve pakuveu vo, a iorou, Atua jian pakuveu ban naio jibe kijokijo tai napano berial ka viekouoiano ea Atua ga be ñarabo ka toro rimei memedu rivijaio.

Epraamo naio be toro na beamu napano jibe nei, ana tomu telabo abinime iorou napano maka ave pakuveulo ga, a nalo amonea Atua ana Atua mialo jibe amemedu ea mirano kanio. Nalo maka amoluo memedu ea Epraamo kiano torogio, mia vonganei nalo aju amial naio jibe naio be korobilo tai bunu, <sup>12</sup> be verare ka naina be korobilo napano aju amila pakuveu kalo.

Beamu kito kulo Ju nalo roberiamña toro napano be pakuveu jibe tormoruo Epraamo, be riano ka miyotuba ea kiano torogio. Mia vonganei, jidomiano vou tai moluo napano jibe nei, berinavo toro napano mijikia river ka Epraamo be korobinio riano, nina toro napano naio biekouo ea Atua be verare ka Epraamo naio biekouo ea Atua, bogo napano maka rive pakuveu vo.

*Toro kiano viekouoiano mila Atua kiano verikariano binime be riano*

<sup>13</sup> Nua nua beamu Atua berkar ban Epraamo ka mia kiano ilivuiano nalo amaluvo ea naio vija kiano torogio nalo, avan ea tomu nalo na yetemeriba reraio. Ana ka venia Atua jaaro ka rila verikariano nei van Epraamo? Maka ka napano Epraamo mijogkar vatitig kiano tuboiano, bior ka bogo napano Atua mila verikariano na, maka tuboiano to vo, bogo na Atua jian tuboiano ban Mosis naio jo koalabo kia ga. Jibe na, romijikia rover ka Epraamo kiano viekouoiano ga mila naio memedu ea Atua mirano, ana Atua jaaro ka sian verikariano novo nei rivanio. <sup>14</sup> Verver verikariano na ve tomu nalo na aju amijogkar tuboiano ga, mia rila ka toro napano moneaio, rimoneaio ka kurano, mia rila ana Atua kiano verikariano sikili re tu. <sup>15</sup> Mia bereio, titai dolu mila meravo ka kito berenio Atua kiano verikariano novo nalo maka ajikia amaluvo ea bajago na jogkariano ea tuboiano. Nina bior ka bogo napano tuboiano jo, bajago na lakokoroviano na tuboiano monoka riyotuba, a iorou kanio, monoka vironiano tai kanio, ka napano maka toro tai napano jilimebi ka rilakorovio tuboiano bogo tai.

<sup>16</sup> Jibe na, tuboiano maka rijikia rijai kito ka kiado vovaiano nalo amei memedu ea Atua mirano, mia Atua kiano tinieseseiano laka ea kito ana naio ga milαιο. Naio mial ka roju ban naio, ka rabalea naio ga, ana naio mila robokar kiano verikariano nalo na bo. Nina maka Ju nalo ga napano tuboiano binimeiealo beamu ruei, a tomu dolu nalo bunu napano amiasolo. Nalo abe tomu na vio ninio, a ver abar bajago na amonea Atua bare ka Epraamo monea naio, naina jibe napano nalo bunu amiyotuba ea kiano torogio. Mia bunu, kito robiniu ea taara na namoneano nalo ea yetemeriba reraio roju romial naio jibe korobido na toru.

<sup>17</sup> A nina memedu ga ka venia napano Atua berkar ka Epraamo nua ruei, napano berkanio berinavo *“Kiniou nebitiri larso, jau kobe burupati na torogio na tomu nalo na venuo miroano.” Jen 17:5*

Bogo napano Atua berkar jibe nei ban Epraamo, Epraamo maka rimemebiju, a bokar vatitigio bo, kar napano naio mijikia ka Atua nei napano mil banio, naio be Atua napano mijikia rila venia napano m̃aro rimeu rimeul, mijikia tii venia napano maka to, rimaluvo. <sup>18</sup> Beriano, Atua ber titai kanio napano jikili laka ka rimoneaio, bior berkar ka naio, berinavo

*“Kiamo torogio nalo mia ave miroano mia ave miroano laka ea yetemeriba nei.” Jen 15:5*

A bogo na Epraamo mijogio, naio moneaio jikili ka mia monoka tibe na ga naruei. <sup>19</sup> Ea bogo nei, naio mijikia ka naio bija koano tira Sera, kialo m̃erenio vaatara ka rijoru naruei, napano kiano yuka bokar toromomou [100], a koano tira maka lele rivar tete kija vo, mia kiano viekouoiano maka leleio rijoru.

<sup>20</sup> Naio maka sidomial titai mia kiano jidomiano jua ga venia napano Atua berkario. Kiano viekouoiano jo binimeie jikili lie, a bogo nonovio jo miaia Atua a ber siva toru kanio ka venia napano mia rilaio. <sup>21</sup> Naio maka lele sidomii bogo tai river p̃eli Atua maka rivare ka rim̃auka takii kiano verikariano, <sup>22</sup> a kiano bajago na viekouoiano nei naruei mila na Iliano Lu berial naio bereio, berinavo Epraamo biekouo ea Atua, naruei Atua berial ka naio memedu bo ea mirano.

<sup>23</sup> Ana iliano nei berial Epraamo naio takurano ga, <sup>24-25</sup> mia bo ka rodu tibe iliano tai napano berii kito nonovio, kar napano kito bunu romonea Atua ka mia naio rila kito romei romemedu ea mirano tibe napano naio mila ka Epraamo. Kito

romonea ka naio naruei napano mila Yesu binimej ka rivokar m̃ariano kar kiado kariano nalo, a romonea ka Atua naruei midular Yesu den nam̃ariano ka rila rimeravo rivu ka kito romerevu bereio bija naio na ruei.

## 5

*Kito romerevu bija Atua bereio ruei, remial tuñaro a saariano*

<sup>1</sup> Bo ga, vonganei naio meravo bo ban kito ka tenalo napano mila kito romerevu bereio bija Atua, naio be kiado viekouoiano ea venia napano Yesu mila ka rijai kito. A bogo napano romijikia ka romerevu bija Atua jibe na, mila napano romial ka tuñaro jo iviso ka kito bija naio, <sup>2</sup> a mila napano roju bo joomo ea kiano tinieseseiano bogo nonovio. Jibe na naruei, kiado jidomiano jikili ka iorou, mia monoka rove togio joomo ea Atua kiano mermerano, mia rasaaro laka.

<sup>3</sup> Mia maka rasaaro ga ka meuliano novo nei napano mia rimej iorou, mia rasaaro bunu ka bogokouo napano roju robiviuo vonganei. Peli romijog bova, mia rasaaro ga ka napano romijikia ka jogvaiano mijikia rila jidomiano rive tebievi lie, <sup>4</sup> a jidomiano tebievi rila bajago rimej rivu laka lie ea Atua mirano, a bajago nei bo rila baleano ea Atua rimej lie vo, <sup>5</sup> a baleano ea Atua rila kiado jidomiano maka rijikia rijoru leleio kar titai bogo tai. Nina bior ka Niununo Lu napano naio jian ban kito, bogo nonovio jo mison vatitig Atua kiano burum̃ara tinietiano ba joomo ea kito banbano-o kito robujo vatitig eaio.

<sup>6</sup> Romijikia ka Atua naio tinien jii kito laka jibe na naruei bior napano nua, romijoru ea ðili tai napano maka rejikia rala titai bereio ka rijai kito, mia memedu ka kiano bogo napano naio bijauialario, naio miila Kristo binimej m̃aro kar kito tomu va nalo.

<sup>7</sup> Ea kito, maka roial m̃elea napano toro tai mijikia rijamo ka kiano

meuliano ka rilarur toro dolu kiano meuliano, ðeli bogo terakurano ga toro tai mijikia rijamo ka kiano meuliano ka rilarur toro tai napano aberiam̃a naio bo laka, mia tena naruei Yesu mila ka kito nonovio napano kito tomu va nalo ga. <sup>8</sup> Atua kiano tinietiano toru laka jibe na naruei, kar bogo napano kito tomu na kariano nalo roju parido jikili kia ga, Kristo binimej m̃aro kar kito. <sup>9</sup> Kiano burukija miou jekon kito romeravo ruei, ana robinimej romemedu ea Atua mirano a mila napano maka bunu titai toa kito napano naio mia ridu vironiano van kito kanio. <sup>10</sup> Nua, bogo napano kito robe Atua kiano uolu kia ga, kenerinio kiano m̃ariano mila kiado merevuiano bija naio, a vonganei, kar napano romila bilbilu bo bija Atua ruei, mia kenerinio kiano meuliano mila kito bunu romeul to to dam̃ariga. <sup>11</sup> Jibe na naruei, kito rajaaro laka napano Atua bitirilar kiado Tubo Yesu Kristo, kar napano naio rila kiado m̃arabo na merevuiano vija naio, rotu vio takurano vijaio bereio.

*Atam mila m̃ariano binimej, Kristo jian meuliano*

<sup>12</sup> Mia tenalo juo nei m̃ariano bija meuliano, naljuo abinimej ea yetemeriba jum̃abe? Toro na beamu ea yetemeriba naina Atam, a naio be toro na beamu napano mila kariano, a mila vironiano na kariano, jibe m̃ariano, monoka rimaluvo ea yetemeriba. Mia tomu nalo napano abinimej iorou, nalo bunu abokar kariano, a m̃ariano bokar nalo abiniu bunu.

<sup>13</sup> Beamu nua, ea Mosis kiano bogo, Atua maka sian tuboiano vo, mia be iakurano napano maka tuboiano, bajago na kariano jo ruei. Jibe na naruei, Atua maka tiburelo ka bogo na ka nalo amila kokorov kiano tuboiano, kar napano ea bogo na, tuboiano makan vo, mia kialo kariano nalo naruei mila na monoka avar vironiano na m̃ariano navo. <sup>14</sup> Romijikia ka jibe na,

bior napano jikar ea bogo na Atam, binimeĩ bokar Mosis kiano bogo, maka tuboiano, mia tomu nalo aju aĩarmĩaro ga, kar vironiano na kariano jo rui ea yetemeriba. Peli tealo amila bova jibe Atam milaio, ĩeli amila todolu nalo, mia ea Atua kiano vitiiano, kialo vovaiano nalo nene abiniu abe kariano be verare ga.

Jibe na ga, romial ka venia napano toro takurano na ga Atam milaio, bokar tomu nonovio kialo meuliano ea yetemeriba, jibe ka ga venia napano Kristo naio takurano mila iorou, naio bunu bokar kiado meuliano robiniu napano romoneaio.

<sup>15</sup> Mia iĩauano novo na Atua milaio napano maluvo ea kiano tinieseseiano naio bo laka, mijikia tovulu iĩauano va napano Atam milaio napano maluvo ea kiano kariano. Atam kiano kariano naio takurano mila tomu nalo monoka aĩarmĩaro, mia Yesu Kristo kiano tinievuiano naio takurano mila kito romemedu ea Atua mirano. Tenei jibe jidomiano vu tai napano kito romidu ga jibe na ga. <sup>16</sup> Atam kiano kariano na maka rila titai rivu leleio, mia jidomiano nei naio bo laka ka kito. Atua jibure toro takurano nei kiano kariano, naio ber ka kiano vironiano rivan ea tomu nonovio, a iorou, Atua mial jidomiano napano Yesu jian ban kito, napano bulu bulag kiado kariano nalo, ana berenio ka kito romemedu bo ea mirano bereio.

<sup>17</sup> Be riano napano toro takurano kiano kariano ga, nina Atam, mila namĩariano jo juvulu kito, napano mia mijikia rivar bulag tomu nonovio kialo meuliano. Mia iorou, toro dolu kiano tinievuiano, nina Yesu Kristo, jian jidomiano novo nei ban kito napano vonganei, romemedu ea mirano Atua, a rojuvulu mĩariano rui, a mia iorou robokar meuliano novo vija naio. <sup>18</sup> Ver tibe na, berial ka kariano takurano neibano Atam kiano midu tomu nonovio ajua vironiano, mia iorou, Yesu kiano iĩauano memeduoano tai mijikia rivuru bulag nonovlo den vironiano nene a ridulo

atua meuliano napano maka rijikia ribisi bogo tai. <sup>19</sup> Mia ber bereio ga, toro takurano parinio jikili, maka riagago ka Atua, ana mila tomu nonovio abe tomu na amila kariano, mia iorou, toro dolu miagago ka venia napano Atua berenio ka naio, ana mĩaro ea mĩakolkolo mila ka kito ve miroano romei romemedu rivu ea Atua mirano.

<sup>20</sup> Nua, Atua jian tuboiano ban Mosis, mia tuboiano nene jo berial ka tomu nalo ka kialo kariano nalo ju bujo laka. Mia bogo napano kariano nalo aju abinimeĩ miroano lie bogo nonovio, Atua bunu ban lie vo, mila napano kiano tinieseseiano binimeĩ toru lie vo. <sup>21</sup> Beamu, kariano buru mĩariano binimeĩ, mia mĩariano nene na naio jo mila kariano jo juvulu bogo nonovio. Mia iorou, Atua mila kiado mĩarabo ka romei memedu ea mirano, mia nina mila ka vonganei kiano tinieseseiano naio juvuluio, kar napano jo mila ka kito rovinu napano romonea Tubo Yesu Kristo, mia rovokar meuliano napano maka rijikia ribisi.

## 6

*Bo laka ka kito robisi ka kariano, kito romeul vija Kristo*

<sup>1</sup> Jibe ka napano neber vonga, kito robe tomu nalo na romila kariano, mia Atua tinien jii kito biekokoa kito. Ana ka nina, bo ka kiado meuliano vonganei mia tumĩabe? Peli tomu tealo nalo aber mia bo ka rotudu ka rola kariano ve miroano, ka rila mia Atua kiano tinieseseiano bunu to rimeĩ lie bereio ka naio todou ka riviekokoa kiado kariano nalo nei? <sup>2</sup> Mia makanio, maka rijikia tibe na leleio! Kito romijikia rover ka tivelinio na sidomiano va na laiano na kariano, kito rojibe tanunu, monoka robisi ka naio na rui, bo ka rotu re rolaio.

<sup>3</sup> Kosidomii vonio bogo napano abaruei ea kito ka rove takurano vija Kristo Yesu. Ea bogo na, venia napano maluvo ea kito bare ga ka venia napano maluvo ea naio nua rui. Jibe beamu, naio mĩaro bior

kiado kariano, a vonganei, bogo napano abaruei ea kito, kiado meuliano moruo na kariano bunu naio monoka riñaro. <sup>4</sup> Beamu, nalo atuvan mokotenano mon luku ea vio na ñariano, a vonganei, bogo napano abaruei ea kito, monoka rotuvan bajago na kiado kariano nalo, a bo ka robisi vatitigio eaio. Mia beamu bunu, Atua mila iñauano na iloiano napano mila Kristo meul bereio, a vonganei, bogo napano abaruei ea kito, rojumolu bereio ka roiel ea meuliano vou tai.

<sup>5</sup> Jibe na, kito robe takurano bija Kristo ruei kar napano naio juvan kiano meuliano ea yetemeriba nei naio ñaro, a kito bunu monoka rotuvan kiado meuliano moruo nalo. A romijikia be riano ka mia rove takurano vija naio bereio navo, kar napano naio midu bereio meuliano vou tai, a mia kito bunu rodu kiado meuliano vou.

<sup>6</sup> Mia kito monoka rosidomii bogo nonovio, ka bajago na laiano na kariano napano romoluo bijaio, jibe napano ajuku kakario joa ñakolkolo bija Kristo. Tibe na, naio mila na maka bunu rala kariano nalo napano mokotenado ajidom ala, a kariano maka rijikia rive boru ea kiado meuliano jibe ka napano kito tomu nalo na kiano iñauano ga. <sup>7</sup> Bo laka kito romñaro ka kariano ruei, mia moroano na sidomiano na laiano na kariano monoka ribisi ea kito, bior rojibe ka tanunu napano sidomiano va na kariano maka rijikia rila titai ka kito leleio. <sup>8</sup> Be riano ka beamu, jibe ka napano romñaro bija Kristo ruei, ana vonganei, kiado moneano jikili ka mia rotu romeul vija naio rivano.

<sup>9</sup> Kito romijikia ka bogo napano Atua mila Kristo meul bereio den ñariano, mila ka Kristo mia meul rivanvano-o mia maka rijikia leleio riñaro bogo tai bereio, ñariano kiano moroano maka rijikia rivokar naio bogo tai. <sup>10</sup> Kiano ñariano nua na, naio be ñariano tai na rivar bulag vironiano nonovio na kariano,

a kiano meuliano vonganei, naio be meuliano tai napano ka ridular Atua siano, <sup>11</sup> a mia monoka tibe na ga ea kito. Monoka rosidomii ka kito bunu bo ka robisi vatitig ka bajago na kariano, a dañariga monoka rodular Atua siano to mave ea meuliano vou nei napano rojuao bija Kristo Yesu.

<sup>12</sup> Jibe ka, kiaku iliano na temi tai ea vio nei jibe nei, ber kamiu kuvituvan re jidomiano na laiano na kariano rimei tibe ka moroano na jikili tai napano to rive boru ka kamiu. Ver makanio, mokotenu emiu nalo, napano nalo be tena yetemeriba nei ga, mia nalo atu aiagago ga ka sidom vovaiano na bajago napano kito tomu nalo romoluo bijaio. <sup>13</sup> A mia ver tibe na, maka rimemedu, kar torogio nalo na mokotenado, maka rivu ka amei tibe tenalo na iñauano napano vovaiano miñau bija ka rila kiano bajago va nalo. Beamu, kito jibe tanunu nalo, napano meuliano na Niununo maka toa kito leleio, mia vonganei Atua mila kito romeul bereio, ana monoka rodu kiado meuliano vou nei ea naio bereio ka naio rivuru ka rila kiano iñauano. Jibe na, mia torogio na mokotenado nalo amei tibe vite nalo na iñauano napano Atua miñau bija ka rila kiano bajago memeduanano nalo.

<sup>14</sup> Nua, roju yetano ka tuboiano napano Atua jian ban Mosis, bija kiano vironiano nalo, mia romilavio ka rojogkar bano-o mia maka leleio, maka rovere ka rovokar ioruriano eaio. Jibe na naruei, Atua tinien jii kito a vonganei jo mijai kito ka jidomiano na laiano na kariano maka bunu rijikia vurudidig kito leleio.

*Kariano maka bunu vurudidig kito, mia kito tomu nalo na iñauano na bajago memeduanano*

<sup>15</sup> Neber vonga ruei ka kito maka rotu yetano ka tuboiano napano Atua jian ban Mosis kar rojev ioruriano eaio, mia nomerou ka ñeli tomu nalo tealo adu kiaku iliano nei riva

rivova. Peli ajidomiio aberiaña, O, Pol jo ber ka kito maka rotu yetano ka tuboiano, mia vonganei romijikia rala venia na bova napano rojidom rola, naina bo ga na, mia Atua tinien tii kito viekokoa kito. Mia makanio, maka never tibe na leleio. <sup>16</sup> Kamiu monoka tiniemiu maio ka bogo napano toro tai ju yetano ka tubo tai, naio monoka takii tubo nene kiano iliano a monoka rimei tibe kiano toro na iñauano. A jibe na ga bunu ea kiado meuliano. Verver sidomiano va to rive boru ka kiamo meuliano, mia jau monoka kala kariano nalo napano naio jidom ka kalaio. A verver kiamo tubo naio be Atua, mia koto koimauka kiano iñauano novo nalo. Marabo juo nei, tai mia rila jau vija Atua kuvitibure kamiu to tobo to, ana dolu nene mia rilaso komemedu rivu vija naio.

<sup>17</sup> Beamu, kamiu bunu kube tomu nalo na iñauano na yetano ea moroano na kenemiu sidomiano va ga, mia siva toru ban Atua napano neberloglog kamiu, ana kamiu kumidu damariga vatitigio ea kenemiu jidomiano, kumitakiio vatitig ea kenemiu meuliano. <sup>18</sup> Jibe na, kamiu kuvitaluvo den tubo va nei re nua, maka bunu kuve kiano tomu na iñauano, mia vonganei kube tomu na Atua kiano iñauano napano kumitumã kumila tenalo na memedu jibe napano naio jidomio. <sup>19</sup> Nemijikia ka verloglogiano nalo nei ajikili kija kar napano toro kiano jidomiano maka tibe Atua kiano jidomiano, nina naruei mila na nemijai kamiu nemil ea kijokijo napano berii tomu nalo na yetemeriba nei ga, jibe tubo nalo bija kialo tomu na iñauano nalo.

A kamiu monoka kuvitilubar vatitig nioti iliano nalo nei, ka beamu, jidomiano na laiano na vovaiano naio toru laka ea kamiu, napano ju miyuku kiki ea torogio na mokotenemiu nalo amila kariano nalo napano kirivova mia kirivova, mia vonganei maka bunu tibe na. Vonganei, jidomiano na laiano na bajago na memeduano monoka ve

toru ea kamiu, napano mijikia rila ka kenemiu meuliano rimei ve lu mia ve lu.

<sup>20</sup> Bogo napano kumitibe ka tomu na amimauka kariano ga, moroano na jidomiano na laiano na bajago memeduano maka rijikia rimau ea kamiu, <sup>21</sup> ana kamiu kumila iñauano va nalo. A tenalo na, maka rijai kenemiu meuliano nalo leleio, a nalo amidu kamiu kumitua m̃arabo na m̃ariano memedu, mia vonganei, ver kuvitu kuvisidomiilo bereio, kuvimou laka ka venia napano kumilaio. <sup>22</sup> Mia vonganei, Atua naio midular kamiu den bajago na sidomiano na laiano na kariano neibano, kubinimei jibe naio kiano tomu na iñauano nalo, mila napano bo laka ea kenemiu meuliano napano kubinimei kube lu bo ruei, a vonganei kuvitua m̃arabo na meuliano na maka rijikia ribisi.

<sup>23</sup> Vuluiano napano kariano rila ka toro rijeivio, naio be m̃ariano napano maka rijikia ribisi, mia kiado Tubo Yesu Kristo mila napano robokar meuliano na maka rijikia ribisi, napano maka rovulio, a naio be jidomiano tai napano Atua jianio ban kito jibe na ga.

## 7

### *Kito namoneano nalo rotu re reseltano ka Tuboiano*

<sup>1</sup> Bilbilu nalo, nemijikia napano kamiu kumijikia vatitig tuboiano nalo ea kenemiu buruvenuto, a mia neberii tenalo tai ea tivelinio na tuboiano nalo nei napano mijikia rijai kiado jidomiano nalo ea tivelinio na Atua kiano tuboiano napano roju reberio.

Tenalo na jibe nei, ka ea tuboiano, bogo napano kito roju romeul kia ga vo, monoka romoneaio, a ver rom̃aro, maka bunu rotu reseltano kanio. <sup>2</sup> Kosidomii vonio bajago na toro buru tira, naljuo ajoro. Ver tira tai, bogo napano koano meul kia ga jo, tuboiano jikili ka tira nei monoka to vatitigio tulaka vija

koano suṁano nene. A bogo napano ver toro ṁaro, tuboiano maka bunu riverii titai ka tivelinio na tira neibano, ka naio monoka to tibe na koano na toro nei kia ga vo. <sup>3</sup>Jibe na, ver tira nene, koano suṁano meul kia ga ana naio ba bina ka toro dolu, mia tuboiano ber ka naio mila siakaiano. A ver koano suṁano ṁaro den naio ruei, tuboiano maka bunu sikili tu ka river titai vanio. Naio mijikia riva soro ka toro dolu tai bereio bo ga na, mia maka siakaiano na.

<sup>4</sup>Bo ga, bilbilu nalo, jidomiano na jibe ka kijokijo tai ga ka verial van kito ea tivelinio na tomu nalo vija tuboiano napano Atua jian ban Mosis. Nua, tomu nalo aju ajeltano ka tuboiano na, napano monoka amonea naio ka avokar ioruriano, mia vonganei, tuboiano nene naio ṁaro den kito namoneano nalo. Vonganei kito maka bunu rotu roseltano ka tuboiano, a romijikia rava rotu roseltano ka toro dolu, nina Kristo napano naio ṁaro kar kito. Atua burumeul ea naio bereio, mia rila ka kito tarati nene nalo mia rovar ṁarati nalo na bo bo laka napano naio jidomio.

<sup>5</sup>Beamu, bogo napano roju rojeltano ka bajago va kiano moroano napano abar kito bijaio, kiado sidomiano va nalo amiṁau ea mokotenado, amila romila kariano telabo. A bogo napano romijikia ka Atua kiano tuboiano naio jo juko vio ka kariano nalo nei, ber ka kola re nina, kola re nina, tenena mila kiado sidomiano va nalo abavavin lie. Jibe na naruei, tuboiano na verbureiano na bajago va nei ju mila ka kito rovova lie, a midu kito rojua ṁarabo na ṁariano memedu. <sup>6</sup>Tuboiano na bokar jikili kito jibe na, mila robinimej robe tomu nalo na iṁauano kurano na tuboiano moruo nalo napano abivitaualo nalo miroano aju. Mia vonganei, roṁaro vatitigio ea ṁarabo nene, rojaluvo denio, ana robinimej robe tomu na iṁauano kurano ka ṁarabo vou novo nei Niununo Lu kiano.

<sup>7</sup>Ana kamiu kumisidomii juṁabe ka kiaku iliano nei, napano neber

Mosis kiano tuboiano ju mila kiado sidomiano va nalo abinimej abavavin lie? Peli kamiu kuvitu kuvisidomii ka jibe nei kiniou nojo neber ka Atua kiano tuboiano bova?

Mia makanio, maka never tibe na, kar napano tuboiano kiano iṁauano novo ka rilao. Verver maka tuboiano, mia maka rejikjikia ka navurikoroviano na tuboiano naio juṁabe. Jibe tuboiano ber jikili berinavo “Tiniem tii re tomu dolu kialo saba” a ver tuboiano maka riverenio, mia maka rejikia tinietitiano naio be venia, ṁeli tinietitiano naio be bajago na bova juṁabe.

<sup>8</sup>Riano ga, bogo napano tuboiano juko vio ka tinietitiano nei, vonganei ana jidomiano na lakoroviano na tuboiano jumolu mial vio tai ka sel eaio, mila tinietitiano nalo abinimej telabo joomo ea kito. Jibe na, tuboiano kiano iṁauano ju, ka ver maka tuboiano, mia maka rejikia rovitilubar bajago va na laiano na kariano napano abar kito bijaio.

<sup>9</sup>Jibe beamu, maka nejikia tuboiano, ana maka nosidomialio, noju jibe na ga. Mia iorou kanio, nebitilubar ka tuboiano ber ka “Jau tiniemo tii re tomu dolu kialo saba,” ana vonganei nobitilubarario naruei ka nojo nomila korovio tuboiano, <sup>10</sup>a nobitilubar ka monoka novar vironiano riviorio, naṁaro.

Jibe na, bajago na moneano ea tuboiano naio maka ve ṁarabo na vokariano na meuliano, mia tuboiano binimej jibe ṁarabo na ṁariano na kanado ruei. <sup>11</sup>Beamu, roberiaṁa tuboiano naio be ṁarabo na meuliano, a nina kiado jidomiano va na laiano na kariano napano mila lelan kito ga, mila rosidomii tibe na. Mia maka tibe na, ka napano romila korovio tuboiano nene, ana midu kito rojoa ṁarabo na ṁariano ruei. <sup>12</sup>Naina naruei iṁauano napano tuboiano jo milao, a maka never ka bova, kar tuboiano nei be lu mia be lu, a kiano iliano nalo amemedu a abo.

<sup>13</sup>Ana ṁeli mia tealó avika vikadeniano, averinavo ver be riano ka tuboiano be tonovo tai, a juṁabe

jo mila tomu nalo monoka avokar vironiano na m̃ariano? A makanio, maka never ka tuboiano na mila kito monoka ram̃aro, mia kiado jidomiano va na lakoroviano na tuboiano nei, naio ga milαιο. Iliano na tuboiano nalo abo, mia bogo na kiniou nemila kariano, kiniou ga nojo nomidu kiniou nojua m̃arabo na m̃ariano. Verver maka tuboiano nei, mia maka rejikia ka kariano naio be venia, a mia maka rejikia venia na bo a venia na bova. A bogo napano tuboiano jikili ju, mila meravo bo ka kito ka bajago na laiano na kariano napano jua kito, bova mia bova.

*Tivelinio juo amila siniabu joomo ea tomu nalo kialo jidomiano*

<sup>14</sup> Jibe napano neber, Mosis kiano tuboiano be lu laka, maluvo ea Atua kiano Niununo, a nemial napano kiaku bajago maka lele ve lu, nojo nomim̃au jakii kiaku sidomiano va nalo ga. <sup>15</sup> Tenalo na bova napano nojo nomilaio, maka nejikia vatitigio nojo nomila jum̃abe, p̃eli nemila kario venia, bior tenalo novo napano nojidom nala, maka noto nalaio, mia tenalo na bova napano maka nosidom nalaio, naina naruei nojo nemilaio.

<sup>16</sup> Naina naruei neber ka Atua kiano tuboiano bo, kar napano monoka tuboiano tai to ka tokovio ka kiaku vovaiano nalo na, napano jibe ka neberii ruei, maka nosidom nalaio, a nojo nomilaio ga. <sup>17</sup> Jibe na ga naruei, maka kiniou napano nosidomii ka nala vovaiano nalo nei, mia bajago na sidomiano na laiano na kariano napano jo mim̃au toru ea kiaku meuliano, naio naruei jo milαιο. <sup>18</sup> Mia kiaku bajago na sidomiano na laiano na kariano na, maka neial ka naio rila tonovo tai vo na joa kiaku meuliano. Bogo telabo kiaku sidomiano naio ber monoka nala saba memedu, a iorou kanio, maka bunu nalaio.

<sup>19</sup> Naina naruei jibe nam̃a nojo neberenio: maka noto nala tonovo

nalo napano nojidom nalaio, a vovaiano nalo napano maka nosidom nalaio, tenalo na naruei nojo nomilaio. <sup>20</sup> A verver noto nala vovaiano nalo napano maka nosidom ka nalaio, naina berenio ka kiniou maka nala rivu na, todolu tai jo miyuku ea kiniou ka nalaio, naina bajago na laiano na kariano napano joa kiaku meuliano.

<sup>21</sup> Bajago na laiano na kariano neibano, nemialio jibe tuboiano na jikili tai bereio napano jo mim̃au ea kiniou. Peli bogo tealoo nojidom nala tonovo tai, mia jidomiano va jo vaataro ga, milavon ka rivuru kiniou navan vova bereio. <sup>22</sup> Bogo telabo, ea kiaku jidomiano kiniou takurano, nojo nojidomii vite nalo na Atua berenio, a nemial kiano iliano nalo abo laka, <sup>23</sup> a nomijog ea kiniou jibe iliano dolu tai bereio naio bunu jo mil. Nina bajago na kariano, napano jo miyukyuku kiniou ka noto neseltano ka moroano na kiaku sidomiano va nalo. Jibe napano kiaku sidomiano va nalo nei, ajua mokotenaku,aju amila burum̃ara mira bija kiaku sidomiano novo nalo napano nalo ajua kiaku jidomiano.

<sup>24</sup> Tomnei, sidomiano novo bija bajago va, naljuoaju amila baravo ka naljuo ea kiniou jibe na, kiniou nomijog bova, nemial kiado meuliano ea yetemeriba na vokariano na m̃ariano nei jikili laka.

A mia kei naruei mia mijikia rijai kito, kei mia mijikia rivar bulag kito den jogvaiano nei? <sup>25</sup> Kiado meuliano jikili kija, kar napano ea tivelinio tai, kiado jidomiano jidom rimonea Atua kiano tuboiano, a ea tivelinio dolu nene, bajago na laiano na kariano jo mim̃au ea mokotenado.

A riano ga, siva toru ban Atua, kar napano naio miila Yesu Kristo kiado Tubo binimei, napano mia rijai kito, ridular kito den jogvaiano neibano, a rilarrur kito.

## 8

*Meuliano novo bija Niununo Lu*

<sup>1</sup> Kristo Yesu binimei ka rilarrur kito, naruei mila ka kito napano kiado meuliano jo bo bija naio ruei, mia Atua maka leleio rijikia ridu vironiano van kito bogo tai.

<sup>2</sup> Nina kar napano beamu, kito rojua meuliano va tai napano bajago na kariano bavavin a napano berkar m̃ariano ban kito, a iorou, Yesu Kristo midu kito rajaluvo meuliano na, midu kito rojua m̃arabo vou dolu tai napano romijikia rovokar meuliano nabo napano Niununo Lu jiano.

<sup>3</sup> Tomu nalo amila vio ka amonea vatitig Atua kiano tuboiano ka avokar ioruriano eaio, a maka ajikia ala kar toro parinio kirisikili laka. A venia napano maka ajikia alaio, Atua naruei milaio. Naio miila kenerinio Yesu binimei ea yetemeriba, mila mokotenano a kiano meuliano, be verare ka kito tomu na kariano. Mia Yesu binimei mijamo ka mokotenano a kiano meuliano nei jibe sida tai ka uelar vironiano na kiado kariano. <sup>4</sup> Vironiano na kiado lakoroviano na tuboiano, naio ga bario, mila kito romemedu ruei ea Atua kiano vitiano, naruei maka bunu roi el ea bajago napano kariano jo buru didig lelan kito, a romijikia roi el ea bajago napano Niununo Lu jo buru vuru kito ga eaio.

<sup>5</sup> Toro na jo miel jakii bajago na kariano napano abar naio bijaio, kiano jidomiano jo bujo ka sidomiano va nalo na yetemeriba nei, mia toro napano jo miel jakii Niununo Lu, kiano jidomiano jo bujo ka tonovno nalo napano Atua jidomio. <sup>6</sup> Sidomiano laka bajago va nalo na yetemeriba nei, naio be m̃arabo na m̃ariano, a sidomiano laka bajago novo nalo na Niununo, naio be m̃arabo na tum̃aro, be m̃arabo na meuliano. <sup>7</sup> Toro napano kiano jidomiano jidom bajago

na sidomiano na laiano na kariano, naio be Atua kiano uolu memedu. Peli naio maka sidom rivatove ka Atua kiano tuboiano leleio, p̃eli ver makanio, p̃eli naio jidom rivatove kanio, mia bior naio bano-o bova laka ruei banbano-o ana maka bunu rijikia rivatove ka naio, a mia naio be toro na jibe na naruei. <sup>8</sup> Nalo napano amiel ajakii bajago na kariano napano abarlo bijaio jibe na, maka ajikia ala titai napano mia Atua rijikia risaaro ka nalo kanio.

<sup>9</sup> Mia jau napano Atua kiano Niununo joaso, jau maka koiel ea bajago na kariano napano abariso bijaio, mia monoka koto koiel ea Niununo nei kiano moroano napano Kristo jian banso. Mia verver toro tai naio jo napano Niununo nei maka toaio, toro nene maka ve Atua kiano. <sup>10</sup> Bajago va na yetemeriba nei naio mila ka mia mokotenado riviniu monoka rim̃aro bogo tai, a kito napano Kristo joa kito, naio mila kito romemedu ea Atua mirano ruei, naruei mia niunudo ameul to to-boto. <sup>11</sup> Atua Niununo napano mila Yesu meul bereio den nam̃ariano, nina naruei Niununo napano joa kito ruei, a mia rila vatitig tibe na ea kito bunu. Bekurano napano mokotenado rim̃aro, ana Atua kiano Niununo napano joa kito mia rila kito romeul bereio.

<sup>12</sup> Bilbilu nalo, Atua mila bo laka ban kito jibe nei, mila jibe napano kiado burum̃ara jabue joa naio vonganei. Tibe na, bo rodumiran tonovo tai rivanio, mia bova ver rotu reiel ratakii bereio kiado bajago na sidomiano va na kariano. <sup>13</sup> Bajago na kariano naio be m̃arabo na rovokar m̃ariano, mia toro napano jidom riel takii m̃arabo na meuliano, naio monoka tuvan Niununo rim̃au ea naio, rijai ka te bulag sidomiano va na laiano na kariano den kiano meuliano.

<sup>14</sup> Mia kito napano romonea Atua Niununo jono jibe na, kito naruei robe Atua kenerinio riano. <sup>15</sup> Nina bior napano Atua Niununo maka

rila kito romei tibe ka tomu nalo na amināu Atua kanano kurano ga, a naio mila jibe na napano Atua bar bulag kito, robe kenerinio nalo. Jibe na, monoka romerou ka re Atua, a bogo napano roil vanio, romijikia rovio naio tibe karamādo, rover “Teta.”<sup>16</sup> Kito robio naio jibe na memedu ga na, kar napano Atua kiano Niununo jo berloglog kito ana niunudo bunu mijikia ka be riano, kito Atua kenerinio nalo.

<sup>17</sup> Vonganei kar napano robe Atua kenerinio jibe na, ilivuiano novo nalo napano Atua bar ju rorea kenerinio memedu nei Kristo, mia kito kenerinio dolu nalo bunu, mia kito ravar rotiburevure vija naio. Be riano ka mia monoka ravar bunu jogvaiano tibe napano naio bario, a ver rasaaro ga, mia Atua rila rivu van kito ve verare ka naio mila bo ban Kristo.

*Mia rivu laka rivan Atua kiano tomu riano nalo*

<sup>18</sup> Banei, ea yetemeriba nei, roju robiniua bogokouo telabo nalo nei, mia ver kiado jidomiano jo dañariga ea mermerano napano mia rimaluvo iorou, nemijikia never ka ea kiaku vitiano, jogvaiano nalo na vonganei, nalo ajibe tena iakurano ga.<sup>19</sup> Jogvaiano nalo nei aju abokar tenalo nonovio napano Atua jiio, vonganei tenalo nonovio aju rorea, ajidom mñlea ka bogo maaro rimei, ka Atua riverial vonga ka kenerinio riano nalo abe kei.<sup>20</sup> Beamu, jogvaiano maka to, kar napano Atua jii tenalo nonovio bo, mia iorou, nalo aju abinimei aminunu, aburu kokorovio, abova jibe na banbano-o napano tenalo nonovio maka bunu aimāu rivu tibe napano naio jidomio. Naio mijamo ka tibe nei ea yetemeriba nei, ka rila ka mia tomu nalo monoka kialo jidomiano ve takurano ka monoka avalea naio ga.<sup>21</sup> Jidomiano na mia monoka toa kenerinio nalo, napano nalo monoka amonea ka mia saba nalo maka ajikia atu rivova tibe

na bogo nonovio. Nalo monoka tiniel maio ka bogo tai, mia naio rila saba nonovio napano naio jii amei rivu bereio, nalo abokar kiano mermerano, jibe ga napano mia kito kenerinio nalo nei bunu rotu rovokario.

<sup>22</sup> Mia vonganei, kito roju romial yetemeriba nei kiana, napano jikar ka nua binimei, saba nalo napano ajuajo aju amijog bova jibe ga na tira tai jidom rivar kenerinio.<sup>23</sup> A be verare ga ka kito napano robokar Niununo Lu, napano naio jibe jidomiano tai na beamu napano Atua jian ban kito ka rila rosidomii ka mia jidomiano na toru mia rimei iorou navo. Kito bunu, tegiano jua kiado iviso kia ga vo, a romijikia ka mia kito rotu rojog rivova rivano-o vokar bogo napano Atua ridu bulag kito den yetemeriba. Rojidom nina laka, kar napano rojibe ka tete nalo napano naio bar bulagio ga, a ea bogo na, mia rojog rivu vatitig jumābe kenerinio riano nalo, napano rova rotu vija naio ea kiano vio memedu.

<sup>24</sup> Tenene na naruei naio milarur kito kario, a jikar ka bogo na binimei roju romonea jikili ka kiano verikariano napano ber mia naio rila rivu van kito tibe na. Roju romonea jikili eaio bior napano maka reialio vo, a bogo na ver maluvo, mia maka rejikia rover romonea ka mia tumābe, kar napano jibe na ruei.<sup>25</sup> A maka reial tenalo na vo, naruei monoka romoneaio sikili ka mia tibe na, a monoka rala kiado jidomiano rivetebievi ka rotu rorea vanvano-o mirado rialio garuei.

<sup>26</sup> Bogo napano roju rorea jibe na, bogo tai tiniedo mñaro pñeli roburu didig, mia bogo nonovio Niununo Lu jo miija kito. Bogo tai, rojidom robolkouo kar jogvaiano nalo, a romijog bova laka ana romil vonio, maka rejikia reial iliano memedu ka rever. A ea bogo na Niununo Lu mijikia rimei, ridu kiado vio ana naio ga bolkouo kanado ka

tegiano nalo napano aberial kiado jidomiano nalo napano iliano nalo maka avare ka averenio. <sup>27</sup> Ea bogu jibe na, Atua mijikia tenalo nonovio napano ajua kiado iviso kito kiano namoneano lu nalo, a mijikia napano Niununo jo bolkouo kanio kito, napano jo ber tenalo memedu ga ea venia napano joa Atua kiano jidomiano ruei.

<sup>28</sup> Ana ea bogokouo nalo napano robiniua, ea tenalo venia napano mia rimaluvo ea kito, romijikia ka mia Atua rila ka ea juluvati nene, mia rivu ga van kito napano tiniedo jii naio. Naio mila jibe na kar napano naio bijauia bulag kito beamu ruei ka naio mijikia rimauka kiano imauano novo nalo ea kiado meuliano. <sup>29</sup> Naio mijikia vatitig kito nua beamu binimei, jiloglog bulag vatitig kiado marabo kirisiou ruei, mia rila ka kiado meuliano rivar kijokijo na kenerinio nei Yesu. Jibe na, kito kuruado a kuviviniedo nalo ea maratavo takurano, napano Yesu naio be motoru ka kito.

<sup>30</sup> Nina naruei imauano novo napano Atua mila ban tomu nalo napano naio jiloglog bulaglo ka ave kiano maratavo. Naio biolo ka amei eaio, naio mila abe merevuiano bijaio, a mila ka mia avokar kiano mermerano ea bogoti napano mia rimei.

#### *Atua kiano tinietiano novo*

<sup>31</sup> Tenalo na amila meravo ka Atua to vija kito, jo mila bo ban kito, a jibe na mia kito rover venia bereio? Verver Atua jidom ridular kito, mia kei mijikia rila kito rojoru bereio? <sup>32</sup> Kito romial ka Atua tinien jii laka ka kito banbano-o mijamo ka auebin kenerinio memedu kar kito, ana ver jaaro ka rila burumara tonovo nei ban kito jibe nei, mia jaaro bunu ka sian tenalo dolu novnovo nalo rivan kito. <sup>33</sup> A nina Atua naio jo mila ka kito ruei. Naio bijauia bulag kito ka rove kiano ruei, mia kei bereio mia river ka kito maka ravare ka roytuba ea mirano? Atua naruei jo berial ka kito romemedu bija naio

ruei, <sup>34</sup> ana kei bereio mia river ka kito monoka ravar vironiano kar kiado kariano nalo?

Maka toro tai, kar napano Naverikariano Yesu mila vite nonovio nalo ruei. Naio maro kar kito, iorou meul bereio den namariano, karina bano bereio jotano ea kiano vio lu mave bija Atua, a vonganei jo berial kito ban Atua ka Atua naio viekokoa kito. <sup>35</sup> Kristo tinien jii melea laka kito jibe na, venia naruei mia mijikia vuru bulag kito den kiano tinietiano nei bereio? Maka titai.

Bogu tealu, imauano nalo temi ka kito, peli tomu nalo amila bova ka kito. Bogu tealu, kito robokar bogokouo, peli maka sado siniano, peli maka ve kiado kulumarauo. Bogu tealu, kito romerou kar kiado meuliano, peli rojen iobogu na mira, a makanio, bogu nonovio ga Kristo tinien jii kito a kiado meuliano jo bo ea jumano. <sup>36</sup> Nina jibe na Parinio Tubo Teviti berenio beamu, ea bogu napano naio bunu bar bogokouo, napano ber

*“Siamo joa kumemi, ana nalo aju ajidom auebinvin kumemi numarmaro bogu nonovio ga, nalo amial kumemi jibe nunu nalo napano ajil bulaglo ka ativi bulag tilijolo.”* *Iouano 44:22*

<sup>37</sup> Tenalo kinkin na jibe nei nalo amijikia amaluvo ea kito, mia be iakurano ga. Ea tenalo nonovio na jibe na, Kristo kiano tinietiano joa kito, ana kito roju loa, roju rojovulu danariga. <sup>38</sup> Nemijikia never memedu van kamiu bereio, ka maka titai leleio napano mijikia rila ka Atua maka bunu rijikia tinien tii kito. Verver romeul peli romarmaro, verver nailiano nalo atu vija kito peli simaro nalo atu amei ka kito, verver kito roviniua tenalo napano aju amidu vio vonganei peli roviniua tenalo na napano mia adu vio ea bogoti nalo napano amei, <sup>39</sup> a verver moroano novo nalo ea vio mave nalo atu vija kito peli moroano va na vio yetano

nalo atukovio ka kito, a maka leleio titai napano Atua jii napano mijikia vurular kiano tinietiano den kito. Kristo Yesu kiado Tubo midu Atua kiano tinietiano joa kiado meuliano ruei, ana mia to toboto.

## 9

*Pol mijog bova napano kulo Ju nalo maka asidom amonea ka Yesu naio be kialo Naverikariano*

<sup>1</sup> Bilbilu nalo, vonganei nojidom noverii ea tivelinio napano kito kulo Ju, rober ka kito robe Atua kiano tomu nalo, mia kito miroano maka asidom Yesu. Mia tumabe ka nalo na? Bo ga, kiniou maka nejikia nola sibi, monoka noverial ka kamiu jidomiano novo nalo tai napano Niu-nuno Lu jian ban kiniou ea tivelinio nei ruei, <sup>2</sup> mia be riano, iliano nalo na, nalo amila ka kiaku aua a kiaku jogvaiano toru laka, naio maka rivatove leleio.

<sup>3</sup> Nina kario napano vonganei, kiku meuliano miasol bo bija Kristo ruei, a nemial jibe yati dolu nalo na Ju napano robe burukija takurano, kialo meuliano maka riasol rivu vija naio vo. Verver nemijikia nodular kiniou bereio ka nalo amijikia amei adu jeleku, mia nasaaro ga, mia maka rijikia tibe na.

<sup>4</sup> Kosidomii von tenalo na bo napano Atua mila ruei ka kito kulo Ju, napano nalo jibe nei:

kito naruei napano Atua bijauia korobido yati na Israel nalo ka ave kiano tomu nalo,

kito naruei napano Atua berialio ka naio bijauia bulag kito jibe kenerinio nalo,

kito naruei napano Atua midu yulu na kiano mermerano burui kiado tomu nalo ea vio kurano nua,

kito naruei napano Atua jo mila virakariano nalo bija kiado tormoruo nalo,

kito naruei napano Atua midu kiano tuboiano joa kito,

kito naruei napano burumbara Atua kunuano na lotuano jo bija kito,

kito naruei napano Atua berkar ilivuiiano telabo ban kito,

<sup>5</sup> kito naruei napano kito rovio tormoruo lu re nua jibe Epraamo, Aisak, a Yakovo, ka nalo abe korobido,

a mave ka tenalo na, kito naruei napano Yesu maluvo ea kiado yati, naio miyotuba ea yetemeriba nei jibe napano naio be toro, mia naio bunu be Naverikariano, napano naio be Atua napano be tubo ea vio reraio, napano bo ka roiaia naio bogo nonovio rivano-o maka ribisi.

Nina naruei tenalo na bo napano Atua mila ban kito kiano tomu nalo, mia kito telabo amial jibe titai kurano ga.

<sup>6</sup> Nina nalo napano maka aiasol rivu vija Kristo, a p̄eli tomu tealoo nalo aber p̄eli vite nene mila ka verikariano napano Atua jian beamu maka bunu riyotuba tibe napano naio berenio, bior ka naio berkar ber mia kiano ilivuiiano toa tomu nonovio na yati na Ju nalo. Mia maka tibe na, bior todolu tai, napano ban jibe na, ka nalo napano amiyotuba ea Yakovo kiano yati, napano robio ka kulo Israel, maka nalo aviniu napano Atua ber ka nalo ave kiano tomu nalo riano.

<sup>7</sup> Peli romijikia rover iliano na ea marabo dolu bereio, ka rover ka nalo napano aber ka Epraamo naio be korobilo, maka nalo aviniu napano rover ka amiyotuba ea kiano yati na bo naruei. Iliano tai napano joa Vivitauiano Lu nalo naio ber jibe nei ruei, napano Atua mil ban Epraamo ea tivelinio na kenerinio juo na Ismael bija Aisak, a naio ber Kiamo yati nalo memedu mia nalo amoluo ea kenerimo nei Aisak ga.

<sup>8</sup> Ana iliano na jo ber kalo napano Atua mial ka aju joomo ea taara na Epraamo kenerinio nalo a memedu,

nalo kenia? Maka tomu nalo aviniu napano amoluo ea yati nalo na kiritete nalo dolu napano naio bario, a naio be nalo napano amoluo ea kiritete nei Aisak kiano yati napano Atua bijauiaio, naio berkar ka mia kiano ilivuiano nalo atualo.

<sup>9</sup> Kito romijikia ka naio jibe na, kario napano beamu, Epraamo be kenerinio bija kialo tira na iñauano na Aka, mia tete na maka naio napano Atua ber ka mia Epraamo kiano yati nalo memedu ayotuba eaio. Mia Atua berkar vatitig ka Epraamo bereio, berinavo “Epraamo, mia kiniou nala kamjuo koamo na Sarai ka yuka yako, ea bogu tibe nei ga, mia naio rivar kenemiu kiritete suñano tai.” Mia iorou, tibe ga napano Atua berkario, a Epraamo kenerinio nene Aisak, naio naruei yati memedu napano kito kulo Ju romoluo eaio.

<sup>10</sup> A kito romial napano bogu napano Aisak nene naio toru, naio be kenerinio, a jibe na bereio. Koano Repeka bar savoro juo nei Yakovo bija Isau, <sup>11</sup> a bogu napano naljuo maka amoluo vo, Atua berialio venia napano naio berkario ka naljuo. Naio maka sidonii ka rila takii kialo iñauano ka ala rivu ðeli rivova, a naio mila jakii ga kiano jidomiano.

<sup>12</sup> Naruei bogu napano naljuo amoluo, Isau moluo beamu, a Yakovo moluo iorou kanio, a Atua ber ka kenielo, berinavo

*“Naio napano moluo iorou mia naio maka riagago ka naio napano moluo beamu, a naio napano moluo beamu, naio monoka riagago ka naio napano moluo iorou.”* **Jen 25:23**

Jibe na, maka takii kiado bajago moruo, mia mila meravo ka Atua bitirilar toro maka takii toro kiano jidomiano, a jakii venia napano Atua berkario ga.

<sup>13</sup> A vite na meravo laka ea tivelinio na savoro juo na, kar napano iliano dolu tai joa Vivitauiano Lu ruei, napano Atua berialio ber

*“Kiniou nomidu Isau na napano moluo beamu, jo yetano, mia nomidu Yakovo na napano moluo iorou, jo mave.”* **Malakai 1:2,3**

<sup>14</sup> Bo ga, Atua berial kiano jidomiano meravo bo jibe na, naruei mia kito rover venia bereio? Mia romijikia rover ka Atua kiano bajago na bova, mila maka rimemedu ea tivelinio na tomjuo nei? Mia makanio, maka rejikia roil niege-niege Atua tibe na.

<sup>15</sup> Nina jibe kiano iliano dolu tai bereio napano naio ber ka Mosis nua, napano berinavo

*“Kiniou nebe Atua, mia joa kiniou ka nemijikia tinioku riiaio toro kei napano nojidom ka tinioku riaio.”* **Eks 33:19**

<sup>16</sup> Jibe na, Atua jo bijauia kiano tomu nalo maka rivior napano nalo ga naruei aber ka naio monoka rivijauialo, a maka kar napano nalo amila vio ka ala tenalo napano ðeli naio jaaro kalo kario, a naio bijauia tomu nalo jakii ga kiano tinieriaiano ea nalo napano aju amijog bova.

<sup>17</sup> Atua kiano bajago na, napano mila ka toro takii ga kiano jidomiano, romial naio mila bunu ka Parinio Tubo Vero na Ijivi, ea Mosis kiano bogu nua. Vero na naio be toro tai napano naio tinien jer Atua kiano tomu nalo, mia Atua bijauialar naio bunu ka rila kiano iñauano tai, jibe napano Vivitauiano Lu berenio, napano Atua mil ban Vero, ber

*“Kiniou nomidu larso ka kovar moroano ea kiamo buruvenuo. Mia nemijamo kaso ka kovarvar ka kiamo moroano beamu vo, mia nela ka mia jau koialio ga napano kiaku moroano lie laka ka kiamo moroano, a kiniou nojidom ka tomu nalo na vio nonovio mia ajikia ka moroano nonovio joa kiniou.”* **Eks 9:16**

<sup>18</sup> Jibe na, kito romial napano toro napano Atua jidom tinien sesei ka

naio, mia monoka tibe na, mia ver toro tai napano jibe Vero nei napano Atua jidom rila kiano jidomiano sikili, mia tibe na bunu.

*Atua kiano tiniemimiano bija kiano tinieseseiano*

<sup>19</sup> Kiniou neber jibe nei, mia monoka jidomiano tai vavin napano mia toro mijikia vika tibe nei, river “Ver tomu tealo, Atua ve tiniesesei rivano, a tomu dolu tealo, naio jo milalo napano kialo jidomiano jikili, mia tumabe naruei? Verver Atua naio ga naruei jo mila ka kito romei rivu peli rova rovova, ana maka rivu ka naio to tibure kito bereio. A ver Atua jidom rila ka kito takii kiano sidomiano, mia maka rejikia rotuko vio kanio ka rila re.”

<sup>20</sup> A mia kiniou noverdoŝe ka iliano nalo na, kiniou neber: Koig, makanio, jau kobe toro ga, jau kobe titai napano Atua jiio, mia jau kola vonio re ka kodukian kiamo iliano mave ka naio bereio. Naio jibe ka napano toro tai jo miŝauka baju na tano nalo. Bogo na naio miŝauka baju na tano tai karina, ana baju nei maka rijikia tumolu ril vanio bereio riverinavo “E, kar venia jau komiŝau kirivova ka kiniou jibe na?”

<sup>21</sup> Mia maka rijikia tibe na, bior naio napano miŝauka baju na tano, joa naio ga ka riŝauka takii kiano jidomiano. Ver naio ridu kulati tano tai, naio mijikia riŝauka baju na tano ve juo kanio. Takurano, naio be baju novo na jokoluolu, a dolu, naio be baju na vonuo ga.

<sup>22</sup> Ana Atua bunu miŝau jibe nei, a naio bunu be kiano tenalo juo napano jidom rilao. Naio jidom rila tomu nalo avitilubar napano naio tinien jer kialo kariano nalo, banbano-o mia mijikia rije vatitig vironiano vanlo vija kiano moroano na toru. Bogobe ruei, naio mila kiano jidomiano ealo tebievi, a vonganei joa naio ka rila rivanlo venia napano naio jidom rilao.

<sup>23</sup> A todolu napano naio jidom ka riverialio, naina kiano bajago novo nalo napano naio jidom rila ka kito napano naio be tiniesese ka kito. Nina jibe napano nua beamu ruei, naio mila vatitigio kiano ilivuiano novo nalo, a vonganei miŝauka kito jibe basidobidobi na misonlo ban eaio.

<sup>24</sup> Naio mila bo ka kito jibe na bior napano kito naruei napano naio bio kito, napano kito tealo romiyotuba ea yati na Ju nalo, a tealo romiyotuba ea yati na nalo napano maka ave Ju.

<sup>25</sup> A bajago na jibe ka Atua kiano iliano tai napano Osea Naverialiano berialio ea kiano niosi, napano Atua ber jibe nei, berinavo

*“Taara na tomu nalo, napano beamu maka ave kiaku, a vonganei, kiniou nobiolo ka kiaku tomu nalo.*

*Venuo napano beamu maka tinieku maio kanio, vonganei neber nojidomio laka.” Osea 2:23*

<sup>26</sup> A bogo tai bereio, Osea berial Atua kiano iliano dolu napano ber

*“Beamu, neber ka tomu nalo ea vio nei ka nalo maka ave kanaku tomu,*

*a vonganei, mia ajog napano aju abiolo ka nalo abe keneriku, kiniou Atua na moroano, kiniou Atua napano nemeul.”*

*Osea 1:10*

<sup>27</sup> A iliano dolu tai ber jibe nei bunu, napano joa niosi napano Naverialiano Aisea bivitauia. Ea vio na, naio mijog bova bior tomu na Israel, ber

*“Taara na tomu nalo na Israel kialo yati miroano, nalo miroano mia miroano, nalo a jibe kurukuti yono napano toro maka rijikia rivulukuio.*

*Mia aua toru, nalo telisu ga napano mia Atua rilarurlo.*

<sup>28</sup> A ea bogo na tibureiano, mia naio rije vironiano van tomu nalo na yetemeriba, mia naio rila nalo na maka kialo moneano tai ka ajikia.” *Ais 10:22,23*

29 A nina jibe ga iliano dolu tai napano Aisea bivitauia beamu ruei, napano berii bogo na tibureiano napano mia rimei, napano ver Atua maka tinien riia toro, mia tomu nonovio amarmaro. Iliano na ber jibe nei, ber

“Atua binimei bija kiano tomu na mira nalo, vaataro ruebinvin kito nonovio. Ver maka tinien riia kenerido tealo, mia tuvanlo atu, mia kiado yati ribisi vatitigio.

Vaataro naio rila ka kito ve verare ka venia napano mila ka tomu va nalo ea vio na tortoru juo nei nua, Sotomo bija Komora, karina iorou mila ka kiado tomu ve telisu amijikia atu ameul kia ga.” Ais 1:9

30 Bo ga, iliano nalo na aber jibe nei, aber nalo napano maka ave Ju, nalo maka ala vonio ka atakii Atua kiano tuboiano ka amei amemedu ea mirano, a iorou, bogo napano nalo amonea Yesu, Atua mila vonga nalo ka amei memedu ea mirano.

31 A kulo Ju nalo, amila vonio jikili ka amonea tuboiano ka rila amemedu ea Atua mirano, a nalo abijukudeio ga, ana mia rivova vanlo. 32 Kiniou neber bova ka nalo na jibe na, nina kar napano amila vonio jikili ka amei amemedu ea Atua mirano, a nalo ajel ea m̃arabo dolu, aba ajibirbil vatitig eaio. Nalo ajel ea m̃arabo napano ajidomiio aber kialo im̃auano novo nalo amijikia alalo rivu vija Atua, mia maka tibe na. Kito monoka rosikili rotua ga venia napano Yesu milaio, nina naruei be kiado m̃arabo na romei rovu vija Atua bereio.

33 Iliano tai joa niosi na Aisea bereio, napano Atua berial jamerijiano tai, napano berii burupati puruveru tai, ana puruveru nene be Yesu, jibe Naverikariano napano Atua miila naio binimei. Iliano nene berii jibe napano tomu tealo maka asidom puruveru nene, mia tealo amoneaio, ana naio ber jibe nei, berinavo

“Kamii kubitii batitigio!

Nojo nebitirilar puruveru novo tai na yimo burupati, nina mave ea burusuku na Saion ea kiaku tomu nalo kialo burum̃ara komeli na Yerusalemo.

Puruveru nene jikili bo, ana mia tomu ve telabo asidomio re, nalo jaalo je puruveru nene bano amijorjoru janea vio.

Mia tomu nalo napano amonea puruveru nene, nalo aju jikili eaio, mia nala rivu laka kalo.” Ais 8:14, 28:16

## 10

Yesu ga mijikia rila kito romemedu ea Atua mirano

1 Bilbilu nalo, kiniou nomijog bova napano kiaku yati nalo memedu, jibe kulo Ju nalo, maka amonea ga. A kiniou nojidom laka ka nalo monoka avokar ioruriano, nina naruei kiniou nojo nobolkouo jikili ban Atua kalo.

2 Nalo aju amila vonio laka ka asira-rag ka Atua ea kialo meuliano, a neber be riano, nalo maka ajikia m̃arabo, mia maka ajikia aleal naio.

3 Nina bior napano nalo aju ajakii kialo jidomiano ga, a nalo maka asidom atakii m̃arabo napano Atua mir̃aukanio ka toro rijikia rimei rimemedu ea mirano bereio.

4 Nalo aju ajikili ka aber ka ajogkar tuboiano, naio ga be m̃arabo, mia m̃arabo nene bova ruei, kar napano kito robiniu romila korovio tuboiano nalo. Marabo napano kito rober ka romemedu bija Atua bior napano romijogkar tuboiano, Kristo juko ruei, a naio mir̃auka kiado m̃arabo vou tai. A vonganei, ver romonea ka Kristo bar bulag kiado kariano nalo, naruei Atua mijikia rila kito romei romemedu ea mirano.

5 Ver kito rala korov re tuboiano, mia rivu ga, romijikia romemedu ea Atua mirano, bior napano ga romijogkar tuboiano, kar napano Mosis berenio iliano tai ea tivelinio nei ruei, berinavo

*“Toro napano jakii vatitig bo tenalo napano tuboiano nei berenio, mia mijikia rivokar meuliano.”* **Lev 18:5**

Mia maka toro tai napano kiano meuliano bo jibe napano Mosis berenio, ana maka rejikia rovakar meuliano sel ea tonovo nalo napano romilaio.

<sup>6</sup> Ka rila tibe na, naio jikili laka, a ver romonea ga Kristo romijikia romei romemedu ea Atua mirano, a nina maka titai napano jikili. Jibe iliano tai napano Mosis berenio, napano beriio

*Maka rivu ka kamiu kuvisidomii ka tenei naio jikili laka, ana kuvitu kuvivika kuver kei mia rila m̄arabo beamu ka kamiu riva mave ea tiniabene?* **Tiut 30:12**

Vikadeniano nei berenio ka kei mijikia riva rivokar tiniabene rivuru Kristo rimei yetano ea vio nei ka rilarrur kito, a jidomiano jibe nei naio maka rimemedu.

<sup>7</sup> Peli nalo avika vikadeniano dolu tai napano joa Iliano Lu, napano ber *A kei mijikia rivatove riva rivokar vio na tomu na am̄arm̄aro a rimei bereio?* **Tiut 30:13**

Vikadeniano na ber ka nalo ajidom ka Kristo naio m̄aro ea m̄akolkolo, ana nalo aber p̄eli maka toro tai rijikia riva ridular naio ea vio na bereio ka rijikia rimei rilarrur kito, a mia romijikia ka iliano nalo na maka rimemedu. Kito romijikia vatitig ka Kristo jaluvo ea tiniabene batove ea yetemeriba rui, a iorou ka napano naio m̄aro, naio jumolu meul bereio a ban ea tiniabene rui.

<sup>8</sup> Jibe na, kito romijikia rosian verdopeiano na vikadeniano nalo na, rover iliano dolu tai napano Mosis ber nua, napano berinavo

*Atua kiano iliano ban kito kulorinio naio jo bija kito rui. Jua jum̄ado rui, ana romijikia rodu toa niodo, romijikia rodu vatitigio toa kiado jidomiano.* **Tiut 30:14**

A Atua kiano iliano napano iliano nene beriio, nina Ioluano Vou napano kumemi numitu numiololu kanio, napano berialio ka tomu nalo monoka amonea Yesu Kristo.

<sup>9</sup> A jau kei napano komonea Yesu Kristo ea kiamo iviso, kober ka Atua mila naio meul bereio ea m̄ariano, a kojaaro ka koverialio ea vio reraio ka jau komidu Yesu jibe kiamo Tubo, mia jau kovokar meuliano. <sup>10</sup> Nina bior napano toro na biekouo ea kiano iviso ka Yesu meul bereio ea m̄ariano, a berialio ea vio reraio ka Yesu be kiano Tubo, mia Atua sian re bunu vironiano van naio kar kiano kariano nalo, mia rilarrur naio.

<sup>11</sup> Nina jibe iliano tai ea Vivitauiano Lu re nua, napano jibe ka napano beriio napano romonea Kristo, napano berinavo

*Toro napano monea naio, naio maka rijikia rijog kiano jidomiano rijoru bogo tai.* **Ais 28:6**

<sup>12</sup> Mia toro napano monea ka naio be Ju, p̄eli maka rive Ju, mia Tubo naio takurano be kialo tubo abiniu, mila bo kalo abiniu ga napano ajegi banio naio.

<sup>13</sup> Nina jibe iliano tai napano Naverialiano Joel nua bivitauia, napano berinavo

*“Toro kei napano bio Tubo siano, mia rilarrur naio.”* **Joel 2:32**

<sup>14</sup> Be riano, kulo Ju miroano maka avio van Kristo ka rilarrurlo, a jum̄abe jibe na? Nina bior napano maka ajikia avio naio verver maka amonea naio, a maka ajikia amonea naio verver maka leleio ajog siano vo, a maka ajikia ajog siano verver maka toro tai rioliolu ka vanlo.

<sup>15</sup> A maka jikia toro riva rioliolu verver Atua maka riilaio ka rivano, a verver naio jaaro ka rivano, mia tibe na napano Vivitauiano Lu berenio rui, napano ber

*“Siva toru ka Atua napano kiano naverialiano nalo, romijog jaalo aju amijubariva ea kialo m̄arabo ninio nalo ka avanvan tanea vio vija kiano Ioluano Vou.”* **Ais 52:7**

<sup>16</sup> Nina naruei iliano napano tom tealo aberenio, a nemijikia never makanio, Atua jo miila kiano naverialiano nalo abanvan ruei, mia aua toru napano Ju nalo miroano maka asidom ajogio ga. Nina jakii iliano tai ea Vivitauiano Lu bereio, napano Naverialiano Aisea jegi ban Atua, ber

*“O Tubo, kumemi numitu numiololu ka kiamo iliano banbano-o, mia jibe napano maka toro tai rive tinieno ka rijogio.” Ais 53:1*

<sup>17</sup> A banei kumemi jibe nei naruei, numitu numiololu ka Yesu Kristo banlo, a bogo napano kumemi numitu numiololu, tealo amijog, a bogo napano amijog, tealo amonea.

*Kar vaio jau komiololu ban kulo Ju nalo napano abuluku Vivitauiano Lu nalo ruei?*

<sup>18</sup> Nina naruei kiniou nojo nomioliolu ban Ju nalo, a vikadeniano tai mijikia rimei mave ea vio nei, ber ĩeli kojo komiololu banlo kar napano kojidomii ka nalo maka ajog venia napano Vivitauiano Lu nalo aberenio? Vonganei mia neverdoĥeio never, makanio, Atua kiano iliano bokarlo kirisiou ruei. Nalo abiniu amijikia bare ga napano nalo abiniu aju abiti mĕrenio a siberio bija mĕravitano nalo, jibe napano iliano tai ea Niosi na Iouano berenio, berinavo

*“Tomu nonovio na yetemeriba amial tenalo na ea vio yauo mave, a nalo abitulubario ka Atua jo, ba bokar tomu nalo reraio napano aju koalabo, nalo bunu abitulubar ka kiano moroano toru laka.” Iouano 19:4*

<sup>19</sup> Jibe na, kulo Ju nalo abitulubar tenalo miroano ruei, a mia titai bova, nalo aber ĩeli Atua jidom rilarurlo nalo ga.

Nalo maka avitulubar ka Ioluano Vou be tomu nonovio kialo, kar napano Atua jidom rilarur bunu tomu dolu nalo napano maka ave Ju. Mia bo ka avitulubar vite nei, bior kialo naverialiano moruo juo aberiio nua

ruei ea Vivitauiano Lu, aber mia tibe nei. Mosis be motoru, napano berial iliano tai napano Atua ber ka kulo Israel, napano ber

*“Kamii kubitii bova ka nalo napano maka ave Ju, jibe napano abe iakurano ga, a mia kamii kuvijoku ka ilivuiiano nalo napano mia kiniou nala kalo.*

*Kamii kuber nalo maka ajikia ala titai na bo leleio, a mia kamii tiniemiu serlo bogo napano kuvial napano kiniou nelarurlo bunu.” Tiut 32:21*

<sup>20</sup> A juo nene kanio, naio be Naverialiano Aisea, naio bunu jumolu berial memedu Atua kiano iliano dolu tai ban korobido nalo kulo Ju miralo, napano Atua berii nalo napano maka ave Ju, berinavo

*“Beamu, nalo maka asirarag ka kiniou, a iorou, mia nalo amijev kiniou,*

*nua maka avika kiniou, a mia iorou, ajidom ka nava noyotuba keanlo.” Ais 65:1*

<sup>21</sup> A Aisea bivitauialar Atua kiano iliano dolu tai bereio, napano Atua berii nalo na abe Ju, berinavo

*“Tomu nalo na aju maka amonmonea kiniou, nalo aju abukular kiniou bogo nonovio.*

*Kirisiou ruei kiniou nebetavo ka juĕaku kalo, nojidom nalo amei bereio kean kiniou, mia maka garuei.” Ais 65:2*

## 11

*Kulo Ju nalo maka asidom Yesu, mia Atua maka vilig taakano kalo*

<sup>1</sup> Vikadeniano dolu tai jo, nina ea tivelinio na kulo Ju nalo, ka bogo na nalo maka amonmonea Atua, naio bunu jumolu, bilig taakano kalo, ĩeli makanio?

Nemijikia never makanio, naio maka rila tibe na, bior napano kiniou nebe toro Israel nojo, kiniou bunu napano tormoruo Epraamo be korobiku, a kiniou nomiyotuba ea tormoruo Beniamen kiano yati, a

nemijikia bo ka kiniou tai napano Atua maka rivukular kiniou.

<sup>2</sup> Jibe na, nemijikia never makanio, Atua maka rivukular kito tomu nalo napano bijauia bulag kito robe kiano. Bo ka rosidomii iliano tai na Vivitauiano Lu nalo re nua ruei, ea bogo na Naverialiano Elaija. Ea bogo na, Elaija mijog bova laka ka veribinio na Atua kiano tomu nalo kialo, naruei naio mil mĩmĩ ban Atua, ber

<sup>3</sup> *3 Tubo, kiamo naverialiano nalo, kiamo tomu nalo aju amuebinvinlo,*

*a kiamo vio lu nalo, aju aburu kokorovio,*

*a ba bova laka, nemial jibe kiniou ga takurano nojo nabame-neaso,*

*a vonganei kiniou bunu, aju ajusosor kiniou ka adular kiaku meuliano.*

*1 Par Tubo 19:1*

<sup>4</sup> Mia ea bogo nene, Atua berdoŕe naio, ber

*Makanio Elaija, maka jau ga ve takurano. Jau maka kojikia, a ea vio nei kiaku tomu nalo menu aluo [7,000] aju napano abo jibe so, napano maka alotu ka tavoru sibisibi na Baal. 1 Par Tubo 19:18*

<sup>5</sup> A vonganei, ea kiado bogo, be verare ga jibe na ga. Tomu telabo maka amonea, a kito naruei roju, kito robe bagaro telisu tai na Ju nalo, napano Atua be tiniememi ka kito, bijauia bulag kito, ana kito romonea naio. <sup>6</sup> A bo romijikia vatitig ka Atua bijauia bulag kito kar venia, bior ŕeli tealo nalo aber ŕeli naio bijauia bulag kito bior napano romilala iĩauano novnovo nalo miroano napano naio jaaro kanio. A makanio, bior napano ver tibe na, ver ŕeli ka Atua kiano tiniememiano maka rila titai leleio. A Atua maka bijauia bulag kito kar napano romila tonovo nalo miroano, a naio bijauia bulag kito ea kiano tiniememiano ban kito ga.

<sup>7</sup> Kito romijikia ka kito kulo Ju nalo, robiniu roju rojirag kiado mĩarabo ka romei rimemedu vija

Atua, a kito telisu ga romialio. Ana ver tibe na, mia tumĩabe ka nalo dolu na?

Nina berenio ka nalo miroano napano nalo pariparilo jikili laka, ana nalo maka aial mĩarabo nene vo.

<sup>8</sup> Iliano tai ea Vivitauiano Lu berenio nalo jibe nei, ber

*“Atua juvanlo aju bija kialo vovuiano, Ais 29:10*

*ana binimei bokar banei, nalo jibe napano be miralo, a maka ajikia avitilubar vite, be tilin-ielo, a maka ajikia ajog lubar vite.” Tiut 29:4*

<sup>9</sup> A jibe ka bunu Parinio tubo Teviti kiano iliano tai re nua, bogo na naio jidom Atua ridular kiano uolu nalo kialo moroano napano aju ajusosor naio. Ea bogo nene, naio bika den Atua, ber

*“Tubo, kiaku uolu nalo nei nalo aju amijog bo bogo nonovio ea kialo buruĩara jokoluolu nalo,*

*a nebika denso ka kola kialo jogvuiano nei rimeĩ tibe vite tai napano mila bulag vatitiglo, senlo bere,*

*mila ka nalo maka ajikia avitilubar ka kialo uolu nalo aju vaataro kalo ga.*

<sup>10</sup> *Bo ka jau kolalo tibe miralo rimeĩ ribono, ka nalo maka ajikia avitilubar vite,*

*a jau kola napano kialo uolu nalo ayukyukulo ka airĩau kurano, nalo avar vite nalo na temi ea taakalo.” Iouano 69:22,23*

<sup>11</sup> Ana ea tivelinio na Ju nalo, Atua maka rivuku bulaglo, be riano, nalo abano bova kija. A kialo vovaiano na mila Atua milarur tomu nalo na maka ave Ju, a bogo napano Ju nalo amialio napano Atua tinien miiia bunu nalo dolu na, amialio kirivova, amijoku kalo, ana mila amila vonio ka nalo bunu monoka amei rimemedu vija Atua bereio.

<sup>12</sup> Ana nina berenio ka kulo Ju kialo bajago, napano maka amonea Yesu, naina mila mĩarabo na Atua kiano viekokoano a kiano ioruriano mijikia rimeĩ rivokar tomu nalo

na maka ave Ju. A ver Ju nalo bunu amonea, nalo amonea vanvan rivokar napano Atua berenio, mia mijikia rila napano kiano ilivuiano nalo amei ve toru lie.

<sup>13</sup> Bo ga, vonganei nojidom nesian iliano ve telisu ea tivelinio na kamiu napano maka kuve Ju. Kiniou nebe atevi napano Atua bitirilar kiniou ka navan reraio ka neverial kiano Ioluanano Vou van kamiu, a nina imauano tai napano nojo nomila von vatitig ka nalaio, bior napano namial bo laka.

<sup>14</sup> Nina bior napano nemial ka bogo napano nomioliolu ka ban kamiu napano maka kuve Ju, kamiu kumitu kumonea, a mila napano kumemi kulo Ju nalo tealo ajidom ka nalo bunu monoka atu joomo, ana nalo bunu amoneaio.

<sup>15</sup> Nua, Atua bilig dabu naio ka kulo Ju, a nina mila vonganei naio bitii nalo napano maka ave Ju, jidom ka rila kialo m̄arabo ka ajikia amei ave merevu vija naio bereio. A ver Ju nalo aviliglo a nalo bunu amei bereio ea Atua, mia rivu mia rivu, bior napano vonganei nalo ajibe tanunu, a ver amonea Yesu, mia atibe ka napano abinimei ameul bereio.

<sup>16</sup> Mia kiniou never jamerijiano tai ea vio nei ea tivelinio na m̄ariesi moti nalo napano roju robario ban ea yimo na volkouano, rober siva ka Atua biorio, romioa rive lu. Mia bogo napano rojian m̄ariesi moti ban Atua, mila na m̄ariesi dolu nonovio napano maka rosiano, nalo bunu abe lu, abe Atua kiano. Ana kulo Ju kialo tormoruo nalo ajibe m̄ariesi moti nalo napano aban ea Atua kunuano beamu, a nina mila ka Ju dolu nalo napano abinimei iorou, nalo bunu ave Atua kiano. A bereio, tormoruo nalo nei ajibe burupati iesi tai napano ju miluo joomo ea Atua kiano tiniavio, a verenio burupati ve Atua kiano, mia jaati nalo napano amei iorou, nalo bunu ave Atua kiano.

<sup>17</sup> Ver tibe na, burupati na bija jaati nalo aberenio ga Atua kiano

tomu nalo, jibe Ju nalo. Mia iorou, Atua mial jaati tealo abova, naruei burekokorovlo, a ba je vatitig iesi dolu tai jerati nalo napano jo ga yeturu, ana midu binimei, je vatitiglo a miasol lo aba vio takurano ea burupati napano jo jouro ea tiniavio, nalo amidu jeleig jerati dolu nalo napano burekorovlo ruei. Jerati dolu nalo napano abinimei amijurukar burupati nei, naio berenio kamiu nalo napano kamiu maka kuve Ju. Kamiu maka kuviyotuba ea burupati na Atua kiano tomu nalo memedu, a naio jidom ka kamiu bunu monoka kuvijurukar vija nalo joomo ea kiano tiniavio, ka kamiu nonovio kuvokar kiano ioruriano nalo.

*Nalo napano maka ave Ju, maka ajikia avarkalo ka Atua burulo*

<sup>18</sup> Jibe na, kamiu napano maka kuve Ju, monoka kuvarvar re napano Atua miasol kamiu bija kiano tomu nalo, bior napano maka kuve burupati, a kube jerati nalo ga napano Atua miasol kamiu ea burupati nei napano jo beamu ruei. Jerati nalo maka ala burupati meul, a burupati naruei jo mila jerati nalo ameul.

<sup>19</sup> Bereio, maka rivu kamiu kuvisidomii ka kamiu kubo, naruei kuver O, Atua jidom m̄ilea kumemi, ana bure kokorov jerati tealo na burupati neibano ka rila kumemi nuvijikia nuviasolio.

<sup>20</sup> Be riano napano Atua burkokorov jerati tealo, a mila ga ban Ju nalo napano maka amonea Yesu, a be riano napano naio jidom kamiu kuviasol, a nina maka rivior napano kumila vite novo nalo tai, a bior napano kumitu jikili ea kenemiu viekouoiano ea naio. Jibe na, kamiu kuvarvar ka re napano kubinimei jibe Atua kiano tomu nalo, a monoka kuviturmaro ka kuvisidomii vatitig vite novo nei napano Atua mila ban kamiu. A kamiu monoka kuvitikar vatitigio bunu, <sup>21</sup> bior jibe napano Atua buku bulag jerati moruo nalo

nene, napano kiano tomu nalo na maka amonea, mia naio mijikia rivuku bulag kamiu bunu jerati vou nalo be verare ga, ver maka kuvitu kuvar m̄ariesi novo nalo.

<sup>22</sup> Jibe na, ea vio nene romial tivelinio be juo na Atua kiano bajago. Ea tivelinio takurano nene, kiano tiniemimiano jikili napano jikili ea nalo napano ajibiribil, napano maka atu sikili ea naio, tibe kulo Ju nalo. Mia tivelinio dolu nene, naio tinien vuui laka ea nalo napano maka ave Ju, nina nalo napano ajaaro kanio a aju ajakii vatitig naio. Mia nalo bunu, ver nalo atu re sikili, naio mijikia telarlo bereio den burupati novo nei napano aju amiasol eaio.

<sup>23</sup> Nina naio mila ka kulo Ju nalo ruei. Nalo maka amonmonea, ana je bulaglo, a ver aviliglo, amijikia amei bereio ana Atua mijikia riasol vatitiglo ea burupati bereio tibe kiano tomu nalo riano.

<sup>24</sup> Naio mila jibe na ka kamiu napano maka kuve Ju nalo, bior napano kamiu jibe jaati iesi na yeturu, a naio buru kamiu kubinimei, misol kamiu ea burupati napano joa kiano tiniavio, ana kumijurukar bija ilivuiano nalo napano naio jidom sian van kiano tomu nalo. A ver mila ka kamiu ruei, mia mijikia rila bunu ka Ju nalo napano naio je bulaglo, bior ka naio jaaro ka riasol vatitiglo bereio ea burupati nene napano amiasol vatitigio eaio beamu ruei.

#### *Atua jidom ka kulo Ju nalo avokar ioruriano*

<sup>25</sup> Bilbilu nalo, kiniou nojidom neverial van kamiu napano maka kuve Ju nalo, ka monoka kuvitilubar ka Atua maka rivukular kiano tomu nalo nei kulo Ju.

Be riano ka nalo aju pariparilo jikili keano a maka asidom amonmonea, ana naio juvanlo kija ga beamu, a jo mila ka kamiu napano maka kuve Ju nalo kumijikia kumonmonea, kumijikia kumei ve miroano joomo riva vokar bagaro

na toru napano Atua jidomio. Vite na jibe vite luku tai napano tomu nalo maka ajikiaio beamu, a vonganei Atua mila meravo. Mia kamiu monoka kuvijikia vite nei, bior bova ka kamiu kuvarvar ka kamiu kuveriam̄a Atua jidom kamiu ga, naio maka bunu saaro ka Ju nalo.

<sup>26</sup> Maka tibe na, a mia naio rilarlurlo kean navo, tibe iliano tai ea Vivitauiano Lu, napano beriio jibe nei, ber

*“Toro na rilarlur kito Atua kiano tomu nalo, mia riyotuba ea kiado vio ga, ea kiado komeli na toru Yerusalem̄o mave ea burusuku nei Saion.*

*Kito Yakovo kiano yati, kito kulo Ju napano kiado vovaiano nalo telabo laka, a naio naruei mia rime rivar bulagio nonov kiado vironiano, rila kito rovu bereio.”* *Ais 59:20,21*

<sup>27</sup> Iliano dolu tai ea Vivitauiano Lu berialio Atua kiano verikariano tai ea tivelinio na bunu, napano ber jibe nei, ber

*“Kiaku verikariano ealo ju ruei, ka mia navar bulag kialo kariano denlo, noviekokoalo aviniu.”* *Ais 27:9*

<sup>28</sup> Bogo napano Ioluano Vou maluvo ea Ju nalo, nalo maka asidomio, ana ea tivelinio tai nina bo, bior napano rila ka kamiu napano maka kuve Ju, Atua midu bogo ka kamiu kija ka kumoneaio. A ea tivelinio dolu nene, nina bova bunu, bior ka mila na Ju nalo abinimei jibe na abe Atua kiano uolu nalo bereio. A Atua maka rijikia rivitiilo ka ave kiano uolu dam̄ariga, naio monoka tinien riialo bereio, bior naio maka rijikia tiniene ribobogia verikariano novo nalo napano naio mila ban korobilo moruo nalo na kiano tomu nalo nei, kulo Ju nalo.

<sup>29</sup> Atua berkar ilivuiano nalo banlo ruei, a naio bio nalo na abe kiano ruei, a mia maka jikia tibukua bereio kiano jidomiano bogo tai.

<sup>30</sup> Jibe na, naio miñau ea kito jibe nei. Beamu, kamiu napano maka

kuve Ju, kamiu maka kumonmonea Atua, a bogo napano kumemi Ju kumemi maka numonmonea Ioluanou Vou, nina mila kiano m̄arabo ka tinien riia kamiu.

<sup>31</sup> A bogo napano naio tinien miia kamiu jibe na, mila napano kumemi numonmonea Ioluanou Vou, ana mia naio mijikia tinien riia kumemi bereio.

<sup>32</sup> Nina naruei Atua kiano jidomiano jibe na naruei. Beamu, naio mijamo ka kito robiniu roieli ea m̄arabo na maka rosidom rojog kiano iliano, mia rila ka naio rijikia tinien riia kito, rijikia rivuru kito nonovio ka romei rove kanano.

<sup>33</sup> Bilbilu nalo, Atua kiano ilivuiiano nalo ea kito tortoru laka! Kiano masouano nalo a kiano jikiiano nalo abavavin mave! Kiano jidomiano nalo bululuo tanea, a kiano bajago nalo abo julaka! <sup>34</sup> Jibe napano iliano tai ea Vivitauiano Lu berenio

*“Maka lele toro tai napano vare ka rivakar venia napano joa Atua kiano jidomiano, maka lele toro tai napano mijikia sian iliano na ijaiano van Atua.*

<sup>35</sup> A *maka lele toro tai napano mila bo ban Atua bare napano rijikia rila Atua saaro ka ridu kiano ilivuiiano novo nalo vanio, tibe napano naio jo jian ban kito.”* *Jop 41:11*

<sup>36</sup> Mia kiniou neiasol iliano na, neber: Kiado Atua, naio takurano be burupati na vite nonovio, naio takurano be moroano na vite nonovio, naio takurano be juluvati na vite nonovio, ana bo ka kito rovinu roiaia naio to toboto.

## 12

### *Bajago novo na toro napano monea*

<sup>1</sup> Bilbilu nalo, jibe ka Atua tinien miia vatitig kamiu, mila bo laka ka kamiu, nojidom novika sikili van kamiu ka monoka kuvijamo ka kenemiu meuliano momou van naio. Kamiu monoka kuve lu rivu, tibe

napano kumioa mokotenemiu ban naio jibe sida tai napano kumidu banio. Naio maka sida tai na jibe temeul tai napano amuebin m̄aro, a naio be sida tai napano meul, a mia Atua mijikia saaro laka kanio. Nina naruei bajago novo na ala lotuano van Atua napano memedu ka kuvilaio.

<sup>2</sup> A kamiu kuvijamo ka re voviano na yetemeriba nalo nei avuru kamiu kuvitakii kiano bajago nalo, a bogo nonovio, monoka kuvijamo ka Atua rila kenemiu jidomiano to rimei rive terivou bereio. Tibe na, mia kenemiu bajago mijikia riviligio, mijikia rimei rivu bogo nonovio, a mia kamiu kumijikia kuviel kuvitakii Atua kiano tinieiano, napano bo, kirinovo, a memedu mia memedu julaka.

<sup>3</sup> Kiniou neberial iliano nalo na ka kamiu bior napano Atua ve tiniesese ka kiniou, bijauialar kiniou midu iñauano nei naruei joa jum̄aku. Mia nojidom never vite tai bereio ka kamiu, napano bova kuvitu kumila kenemiu jidomiano bavin laka. Kito rola kiano iñauano nalo tum̄abe, a kiado jidomiano monoka rimemedu, monoka to yetano ga.

<sup>4</sup> Kito maka rojikia rosidomii ka robo lie ka dolu nalo, bior napano rojibe mokotenano toro takurano ga, napano be yati nalo nene a yati nalo nene, be kialo iñauano terakurano ka alaio.

<sup>5</sup> Jibe kito miroano, mia Kristo midu kito robiniu robinime i robe takurano, ana jibe napano kiniou nojo banso, jau kojo ban kiniou.

<sup>6</sup> Atua be kiano tinieseseiano ka kito, mijamo ka jikiiano dolu nalo ban kito, napano jibe jidomiano nalo na naio jian bulagio ban kito ka kito roim̄au vijaio. A kito terakurano monoka rosikili ka roim̄au vija venia napano naio jian ban kito. Jibe nei

ver Atua rijamo kaso ka rive kiamo ka koverial iliano napano

- naio jian banso, ana monoka kolaio vija moneano ve toru ka kiano iliano nei be riano laka,
- 7 ĩeli ver rive kiamo ka koiĵau ea yimo lu, monoka kolaio vija kiamo moroano momou, ĩeli ver rive kiamo ka koverloglog tomu nalo ka Atua kiano iliano, monoka kovarso vatitig ka kolaio,
- 8 ĩeli ver rive kiamo ka kotunukakar tomu nalo kialo jidomiano, monoka kosidomii ve temi ka kolaio, ĩeli ver rive kiamo ka kosian jidomiano nalo ka ijaiano, monoka kovario ve miroano, ĩeli ver rive kiamo ka kovuru ĵarabo ka Atua kiano iĵauano, monoka koyovo re, ĩeli ver rive kiamo ka keija nalo napano ajua bogokouo, monoka kosaaro ka kolaio.
- 9 Ana ninei naruei bajago novo dolu nalo na mia kuvilaio: kenemiu tinietiano ea tomu dolu nalo monoka rive riano, monoka kuvitaluvo ea bajago va nalo, monoka kuvakar vatitig rivu bajago novo nalo,
- 10 monoka kuve tiniemiu titii ea kamiu tibe kube torogio takurano, monoka kuvila vio sikili ka kuvial ka kei naruei mijikia rila bajago na vameneano rivan lie,
- 11 monoka kuvijamo re ka kenemiu jidomiano sikili na laiano na tonovo nalo rivakovio bereio den kamiu, monoka kuvila ka sebi na Niu-nuno Lu to meul rivu ea kamiu, monoka kuvimau Tubo kiano tulaka,
- 12 monoka kuvisaaro ka Atua kiano verikariano nalo napano kenemiu jidomiano balea naio ka mia naio rila rivu ka kamiu tibe ga napano naio berenio, bogo napano kubiniua jogvaiano, monoka kuvila kenemiu jidomiano rive tebievi, monoka kubolkouo tulaka,
- 13 bogo napano namoneano dolu nalo maka ve kialo tenalo tai, monoka kuvisaaro ka kuvisian saba vanlo, a monoka kuvisaaro ka kuvitkar tomu dolu nalo ea kunuemiu.
- 14 A nina naruei vite nalo tealo napano monoka kuvisidomii ka kuvimaukanio van tomu dolu nalo: ver tealo aju amila niegeniege kamiu kar napano kumonea Yesu, monoka kuvila rivu kalo. Kuvil re rivova vanlo, a kuvika Atua ka rilivu kalo,
- 15 ver tealo amijog bo kar vite novo tai, kamiu bun u monoka kuvisaaro vijalo, ver tealo aju ajegi bior vite tai, kamiu bunu monoka kuviteg vijalo,
- 16 ver kamiu kuvija kulo dolu nalo, kamiu monoka kuvitu vatitig vijalo, napano ve kenemiu jidomiano ve takurano ga, ver kuvimau vija kulo dolu nalo, kuvidu re kamiu kuvitu mave kalo kuver kamiu kubo, a kamiu kuvisaaro ka iĵauano na tertelisu nalo a kuvisaaro ka kuviasol vija tomu nalo na tertelisu, ver kuvila titai nalo, a kuvisidomii re ka kube masou, a kuvila kenemiu jidomiano to yetano,
- 17 ver tomu tai ala rivova ka kamiu, a kuvila meran re rivova vanlo, a bogo nonovio monoka kuvisidomii ka kuvila vite nonovio napano mia tomu nalo amijikia avitilubarario ka bo a memedu,
- 18 a ver kenemiu vite va tai jo iviso ka kamiu bija tomu dolu nalo, monoka kuvila vite nonovio napano ajua jumemiu ka ridu tumaro to bereio ea kamiu kuviniu.
- 19 Bilbilu nalo, tinieku jii kamiu laka, naruei nojo neber tenalo nei ban kamiu. Tealo lie ajibe nei, berinavo ver tomu tealo ala rivova ka kamiu, kuvila vonio re ka kuvije vironiano vanlo. Kumijikia

kuvituvan rivan Atua ka naio tiburelo iorou, bior napano iliano tai joa Vivitauiano Lu ruei, napano Atua berenio ber

“Kiniou naruei mia nesian *vironiano van tomu nalo, kiniou naruei mia nodu kean van nalo napano amila bova.*” *Tiut 32:35*

<sup>20</sup> ver be kenemiu uolu nalo aju, kami monoka kuvila rivu kalo, jibe napano iliano dolu tai ea Vivitauiano Lu berenio, napano ber

“*Ver kiamo uolu jjerio, kodu sinan-iano rivanio, ver midou jerio, kodu uei rivanio.*

*Verver kola tibe na, mia jau kola naio rimou laka ka kiano bajago va,*

*rivano ĩeli naio jaaro ka rila bilbilu rivu vijaso bereio.*” *Ilimasou 25:21,22*

<sup>21</sup> Takiiano na tenalo nei, kiniou neber jibe nei ka kami, neber kami kuvijamo ka re bajago va tovulu kami, a monoka kuvitovulu bajago va vija ga kenemiu bajago novo nalo.

## 13

*Namoneano nalo monoka avatove ka parinio tubo nalo napano Atua bitiri bulaglo*

<sup>1</sup> Vonganei kiniou nojidom naver iliano nalo tai ea tivelinio na navurim̃araboiano nalo. Kito romijikia ka Atua naio jo mave laka, naio be Tubo ka vite nonovio, a naio naruei bitiri bulag parinio tubo dolu nalo napano aju, a midu moroano banlo. Jibe na, kito namoneano nalo robiniu monoka ravatove ka parinio tubo nalo nene, monoka romonmonealo.

<sup>2</sup> Tomu nalo napano ver aju amila vonio ka atukovio ka parinio tubo nalo, nalo aju ajukovio ka tena Atua bitirilario, a mia Atua mijamo ka parinio tubo nalo amijikia asian vironiano vanlo kario.

<sup>3</sup> Parinio tubo nalo, Atua maka vitiri bulaglo ka ala tomu novo nalo

ka amerou, a naio bitiri bulaglo kar nalo napano aju amila kokorov tuboiano. Nalo na naruei monoka amerou, bior napano ver parinio tubo nalo avokarlo mia asian vironiano vanlo. A ver jau kosidom ka komerou ka re parinio tubo nalo, mia monoka kola memedu ga ka venia napano tomu na tortoru aberenio, naruei mia nalo maka ala rivova kaso, mia ajaaro kaso.

<sup>4</sup> Atua midu bulaglo ajibe kiano tomu na im̃auano nalo, ka ala im̃auano novo ka avitkar tomu nalo, a ver jau kojidom kola pariparimo, monoka kovitkar vatitigio, bior napano aju abar nia bunu, a maka atu avar kurano. Atua bitiri bulaglo, midu joa jum̃alo ka asian vironiano van nalo napano amila bova.

<sup>5</sup> Jibe na, bo ka kito ravatove ka parinio tubo nalo, bior bova ka rola rivova ana nalo aje vironiano van kito. A nemijikia ka kiado jidomiano jo bitilubarario ruei bunu ka bo laka ver roju romila vite nalo memedu ga julaka.

<sup>6</sup> Jakii iliano nalo nei, memedu ka rosaaro ka rovulu takis napano monoka rosian van parinio tubo, bior ka bogo napano parinio tubo mila ka kiano im̃auano, jo mila im̃auano napano Atua jian banio ka rim̃aukanio.

<sup>7</sup> Jibe na, monoka rola vite nonovio napano memedu ka rolaio. Ver takis tai ea tivelinio na veru napano roju robario, ĩeli veru kinkin nalo napano monoka rovukuio ka vite nalo, kito monoka rovuluio. A nalo napano abar im̃auano nalo na tortoru ĩeli abar sio na tortoru joomo ea parinio tubo nalo, memedu ka kito rovatove kalo, monoka rosaaro ka rovamenealo.

*Namoneano nalo monoka ala rivu ka tomu dolu nalo*

<sup>8</sup> Todolu tai, naina ea tivelinio na jabue nalo na tomu nalo aju amilaio. Ver komila jabue ea toro tai, jau monoka kodukian ka vanio

rimemedu ga ka venia napano kam juo kubernario. A bo jau tiniemo maio ka bunu ka kiamo jabue tai joa Atua bunu, bior ka napano naio jian titai banso naio toru laka ruei. Tenena naio be tinietiano, ana monoka koto kovar keano vatitigio van tomu dolu nalo. Jau monoka tiniemo tii nalo napano aju vaataro kaso, kar toro napano jo mila jibe na, naio jibe napano naio monmonea nonovio Atua kiano tuboiano nalo garuei.

<sup>9</sup> Iliano dolu nalo miroano ju joomo ea tuboiano, jibe nalo na aber jibe nei, aber jau kola re siakaiano, a jau kouebin re toro rimaro, a jau kovina re, a jau tiniemo tii re tenalo na toro dolu kiano, a iliano dolu nalo na jibe nei. A iliano nalo na tuboiano nonovio, aju yetano ka burupati tuboiano na toru tai, napano naio ber jibe nei, berinavo: Jau monoka tiniemo tii toro dolu napano jo vaataro kaso, kala rivu ka naio jibe napano koje komila kaso bereio.

<sup>10</sup> Toro napano ver naio tinien jii toro dolu be riano, mia naio maka leleio rijikia rila titai napano bova kano. Jibe na, bajago na tinietiano na toro naio mijikia rila ka jibe napano komonmonea nonovio iliano na tuboiano berenio.

<sup>11</sup> Kito monoka rola bajago novo nalo na, bior vonganei bogo jo bano. Monoka rovitilubar ka vaataro ka bogo na monoka rotumolu vatitigio, romonmelio re bereio. Bogo na kito romonmonea vonga beamu, rober p̄eli mia Atua rilarr bulag kito ea yetemeriba nei kirisiou kia ga vo, a vonganei, binimei vaataro ruei.

<sup>12</sup> Kiniou nemijikia never tibe nei, never bogiano vaataro ka ribisi, legiano jo binimei, ana bo ka robisi ka bajago va nalo na melijokouo, a monoka ravar tenalo na bajago vu na miamoiano, ka romijikia ravan ka rola mira kean tenalo na bova.

<sup>13</sup> Kiado meuliano monoka rimemedu vatitig, tibe napano kito

tomu nalo napano roju romieliel ea legiano, a mia monoka rotuvan bajago va nalo. Kito rola re bunu jokoluolu kinkin nalo napano abujo ka saariano nalo na yetemeriba a tomu nalo amun uei banbano amilaluv pariparilo. Kito rotu re rola ka tomu nalo vija tire nalo atu avuruvurulo tanea vio a atu ala bajago na be soro nalo. Kito rotu re rola baravo, a rotu re roiasol ea jokuano nalo.

<sup>14</sup> Kito monoka rotuvan bajago va napano romiyotuba bijaio, a rosidomii re bunu ka rotakii kiano sidomiano nalo, a jibe na roju romiya kiado kulumarauo meravo bo ea tomu nalo miralo, monoka roya bajago na memedu nalo na Tubo Yesu Kristo ea kiado meuliano, ka tomu nalo aialio ka kito kanano tomu nalo be riano.

## 14

*Bo ka namoneano nalo atu re ail niegeniegelo bereio ka tenalo na tertelisu ga*

<sup>1</sup> Bilbilu nalo, nojidom ka kamiu kuvijikia ka kiniou nomijog ruei ka iliano na toru tai joa kamiu vonganei.

Jibe tealoo, kialo jidomiano telabo ea tenalo tealoo, aber p̄eli bo ka ala p̄eli bova ka ala, mia nalo amerou ka verver alaio, p̄eli mia Atua maka bunu saaro kalo.

Kiniou nojidom never ka nalo jibe nei, nomial nalo jibe maka atu sikili vo, mia bogo na nalo aju bija kito, kito monoka rala vonio re reilkuei laka kalo, mia rosaaro ka rovilulo.

<sup>2</sup> Jibe na, tomu tealoo amijikia asen non sinaniano ninio vija bunu sunbue nalo, mia tomu tealoo ajidomii aber Atua jidom ka monoka aveli ka sinaniano tealoo, p̄eli aveli ka sunbue.

<sup>3</sup> Vonganei nojidom never ka kamiu, verver jau tai napano kojen sunbue, jau kovitio rivova re ka toro dolu napano naio bel kano, a ver jau tai napano jau kobel ka

sunbue, jau kotibure re naio napano jo jenio, kober mia Atua ridu vironiano van naio kario. Atua naio jaaro ka kamiu nonovio, mia kamiu bunu monoka kuvisasaaro ka kamiu.

<sup>4</sup> Namoneano nalo abiniu aju abitii Atua ga ka naio be kialo tubo, ka naio ga mijikia river kalo ve terakurano ka nalo ala nina p̃eli nalo ala re ninei. Ana jibe na, maka rivu kito ga rotu rotibure kito bereio. Atua mial napano kiano tomu tealo nalo ajen sunbue, a tealo maka asen sunbue, mia naio jaaro ga ka nalo abiniu, kar napano naio mijikia ka mia Tubo Yesu mijikia to rijailo bogo nonovio ka asikil atu sikili ea naio.

<sup>5</sup> Mia nina naio bare ka bunu ea tivelinio na bogoti nalo. Tomu tealo nalo amidu bogoti tai ka be kialo bogoti lu, a tomu tealo nalo amial bogoti nonovio aber abiniu abe verare ga. Nina bo ga, mia kito roviniu ve terakurano monoka rala kiado jidomiano, a resikili rotuaio, a mia royuku re toro dolu ka takisor kiado jidomiano.

<sup>6</sup> Toro na jikili ka ridu bogoti tai tibe kiano bogoti lu, naio mila kar napano jidom ridular Atua siano eaio. Toro na jaaro ka sen tenalo ninio, naio jo ber siva ban Atua kario, ana jibe na, bogo na jinano, jo midular naio siano. Toro na mila naio bel ka sinaniano tealo, naio bunu jo mila ka ridular Atua siano, a naio bunu jo ber siva ka Atua ka sinaniano dolu nalo na jo jenio.

<sup>7</sup> Kito monoka rosidomii ka maka kito tai napano rijikia toa yetemeriba nei tibe naio takurano ga, ka rila tenalo nonovio tibe ga napano naio takurano jidomio, a maka kito tai napano ver riñaro, mia nina kiano tena naio takurano.

<sup>8</sup> Maka tibe na, bior ver romeul, kito romeul ka rodular Tubo siano, a ver rom̃aro, rom̃aro ka rodular siano. Jibe na, tenalo na kito romilaio, monoka rolaio vija jidomiano napano maka rala kiado sidomiano,

mia robe Atua kanano, mia ratakii kiano sidomiano.

<sup>9</sup> Nina kar napano nua na, iorou ka Kristo m̃aro, naio jumolu meul bereio, mia nina mila naio binime be Tubo ka nalo na am̃arm̃aro a be Tubo ka nalo na ameul, mia bogo nonovio monoka rotutano ka kiano sidomiano.

<sup>10</sup> Mia jibe na, bogo na namoneano tai jo mila tenalo jakii Ju nalo kialo bajago moruo, a naio jo jibure namoneano dolu napano maka to rilaio, nina bova laka. A bunu, bogo na namoneano tai maka rila tena jibe na, mia naio jo bitii va ea tai napano milαιο, napano naio jibe kuruano tai joomo ea Atua kiano bajulukuti, nina be bajago na imouiano tai na.

Kito rotu rotiburevure re kito, kar napano mia kito roviniu rosikili rotu kamu ka Atua mirano na vo, a naio naruei mia rivitii veve vatitig venia napano kito robiniu romilaio.

<sup>11</sup> Tena joa Vivitauiano Lu nalo ruei, napano Atua mil, berenio

*Kiniou nemeul nei nojo, mia nemijikia never memedu ka bogo na rime i napano mia tomu nonovio anietano kamu ka miraku,*

*a mia tomu nonovio averial ka kiniou takurano nebe Atua.*

*Ais 45:23*

<sup>12</sup> Tibe na, mia kito roviniu monoka remei kamu ka Atua mirano, a mia monoka reverii veve terakurano veriiano nalo na tenalo napano roju romilaio, a naio naruei mia rivitii veveio.

*Jau monoka kala re kiamo bilbilu dolu, kiano viekouoiano rijoru*

<sup>13</sup> Jakii jidomiano nalo nei, kito monoka rotu re roviiii laka kito bereio ka roverii venia na toro dolu milαιο, rober bo p̃eli bova. Mia venia na kito namoneano nalo monoka rosidomii ka rala ea kito bereio, mia jibe nei, monoka rala re titai napano p̃eli rila namoneano dolu tai rijikia rila luvu m̃arabo p̃eli rijikia rivuru naio riva rijoru ea kariano.

14 Jibe verver kiniou nosidomii ea kiniou, nemijikia never ka nojo noju jikili vatitig bija Tubo Yesu, ana nomonea jikili ka maka titai napano monoka reveli kanio, maka resenio. Mia ver namoneano tai rivar jidomiano ka sinaniano tai maka rimemedu ka naio senio, nina bo ga, mia nioti nene ber monoka rivel vatitigio kanio, a kito kulo dolu nalo monoka rojamo ka naio takii kiano jidomiano na.

15 Ana verver jau kojidomii ka sinaniano nalo abo ka asenio, komijikia koto kalala ga, mia ver kuruamo dolu naio bel kanio, jau kala vonio re ka naio bunu monoka senio. Ver maka, mia komijikia kola bulag vatitig kiano jidomiano, a nina maka bajago novo tai na kito tomu nalo napano tiniedo titii kito ka rolaio. Jau monoka tiniem maiio ka Kristo m̃aro ka rila kiado meuliano rivu, mia maka rivu rotuvan jidomiano tertelisu nalo tivelinio na sinaniano nalo amei ve tena tortoru nalo napano atu ala bulag kiado meuliano bereio.

16 A bereio, ver vite tai napano jau komialio ka bo ga ka kolaio, nina bo ga, mia maka rivu ka koto kolaio ana rila bulag namoneano dolu kiano jidomiano, rivanvano-o rila tomu dolu ail niegeniege kito namoneano nalo siado riviorio. 17 Ea vio na roberenio ka iliano nalo na tivelinio na ka mia romijikia romunu venia p̃eli rosen venia, p̃eli monoka roveli ka uei p̃eli sinaniano vabe, mia monoka tiniedo bobogia re ka nina maka ve tena toru tai joomo ea Atua kiano navenatuboiano na. Mia kiano tenalo na tortoru, naina rala bajago novo ea meuliano napano memedu, a rotua tum̃aro vija tomu dolu nalo, a rovakar jogvuiano napano Niununo Lu jo jiano.

18 A bogo napano rodu tenalo na rimei ve toru ea kiado jidomiano, romila iñauano memedu napano Kristo jidomio, ana mia Atua risaaro laka ka kito riviorio, a mia tomu dolu nalo aialio ka bo laka.

19 Jibe na, bogo nonovio kito roviniu monoka rala vonio sikili ka roim̃auka bajago novo nalo napano amijikia adu tum̃aro toa kito namoneano nalo, a napano aijaja kito ka roviniu kiado jidomiano rimei rimeruo vatitigio.

20 Sinaniano naio jibe titai kurano, mia maka rivu ka rola naio rimei ve tena tai mia rila bulag bereio iñauano novo napano Atua milaio ea namoneano dolu nalo kialo meuliano ruei. Kiniou neber jibe na, ka sinaniano nonovio ga bo a memedu ka asenio, mia bova ver jau kosen vite tai ana toro dolu rialio a rila naio rijoru, naio rila tena napano naio ber p̃eli maka rimemedu ka naio rilaio.

21 Mia bajago novo na rola tibe na, ka mia kosen re sunbue, p̃eli mia komunu re m̃arjum̃elm̃elu, p̃eli mia maka kala todolu tai bereio, ver bogo napano kuruamo rialio, mijikia rila bulag naio, mijikia rila naio rijoru.

22 Tibe na, ver jau kiamo jidomiano nalo tai ea tivelinio na vite nalo tertelisu napano kojidomii kober bo ka alaio p̃eli kojidomii kober bova ka alaio, naio bo, mia jau kovakar vatitigio rivu atu ve kamjuo Atua ga, jau kavan re koioliolu ka tanea vio. Toro napano mila ga vite napano naio mijikia ka memedu ka rilaio, mia Atua jaaro kanio, a naio maka rijog rivova ka naio rila vite va tai.

23 Verver toro na m̃a jidom veve juo ea tivelinio na venia napano mijikia senio, mia jenio kia ga ruei, mia Atua risaaro kanio re. Nina bior toro na be kiano jidomiano ruei ka p̃eli maka rimemedu ea Atua mirano ka alaio, be iakurano, naio milaio. Tibe na, naio mila kariano ruei na, bior naio maka rim̃au vija jikiaiano ea venia napano bo p̃eli bova ea Atua kiano vitiiano.

## 15

*Kamiu kuvila von ka kuvijuku rivu van kamiu bereio*

<sup>1</sup> Kito miroano roju jikili ea Kristo ga, a maka rotua jidomiano ve juo ea tivelinio na vite tertelisu napano namoneano nalo dolu aju amila baravo kanio. Mia kito jibe nei monoka rotu re rala venia ga napano rojidom ka ralaio, mia monoka rola kiado jidomiano rive tebievi rivu ka namoneano nalo dolu napano ajidomii ka maka ajikia ala vite tai napano rojidomiio rober bo ka ralaio.

<sup>2</sup> Kito robiniu, monoka rosidomii namoneano nalo dolu napano aju vaataro ka kito, a monoka rola venia napano nalo ajidomiio aber bo, ka nalo asaaro kanio, a ka rijai kialo meuliano vija Tubo.

<sup>3</sup> Ver kito rosidomii Kristo, naio joa yetemeriba maka rila venia napano naio jidom ka rilaio, mia naio binuia bogokouo telabo, amila ka naio jibe napano iliano tai ea Niosi na Iouano nalo berenio, napano toro tai mil ban Atua, berinavo

*Iliano va nalo napano abuku banso, abuku bunu bare ea kiniou.* **Iouano 69:9**

<sup>4</sup> Iliano nalo jibe na napano ajua Vivitauiano Lu re nua, abivitaui ka averloglog vatitig kito napano robinime iorou, mia rovlukuio amijikia ala kiado jidomiano sikili vatitigio ka kito bunu romijikia ka rovar dulu bogokouo nalo. Iliano nalo nei atunukakar kito, nalo ala kito rojikia vatitig ka mia monoka rotovulu vite nonovio napano Atua berkario.

<sup>5</sup> Jibe na, kiniou nojo nobolkouo ban Atua ka kami, kar naio naruei be burupati na jidomiano tebievi, naio naruei mijikia tunukakar toro kiano meuliano. Nebika ka naio rila ka kami kuvitu kuvitakii Kristo Yesu kiano bajago, kuvitu rivu vio takurano vija bajago na vironiano, <sup>6</sup> napano kenemiu jidomiano ve takurano ga, a kenemiu iliano ve takurano ga, naruei kumijikia kuvi-aia vatitig Atua, napano kiado Tubo Yesu Kristo karamano.

<sup>7</sup> Jibe na, kami kulo Ju bija kami napano maka ave Ju, bogo napano

kumitu kubinimei vio takurano, a kumisaaro ka kumil vorvoru kami nonovio kubinimei jouro, jibe napano Kristo jaaro ka rilivorvorua kito. Bogo napano kumila jibe na, naio be marabo tai bereio ka adular Atua siano.

<sup>8</sup> Mia bo ka rola tibe na, bior napano Kristo binime i ea yetemeriba, maka rila imauano rivan kulo Ju nalo ga, mia mila bunu ban nalo napano maka ave Ju.

Jibe ea tivelinio na kulo Ju, naio mila nonovio vite napano Atua kiano Iliano Lu nalo aberenio, mila napano verikariano nalo napano Atua mila ban Ju nalo kialo baju-lukuti, nalo amolmoluo abe riano.

<sup>9</sup> Mia ea tivelinio na nalo napano maka ave Ju, naio berial Atua kiano tinieseseiano banlo, mila ka nalo aiaia naio, bare ga ka iliano na Vivitauiano Lu nalo aberenio. Nana beamu kalo jua Niosi na Iouano nalo, ber

*“Kiniou nojo iviso ka valauo nalo, nemiaia siamo, mia kiniou nolotuso ka iouano lu nalo.”* **Iouano 18:49**

<sup>10</sup> Mia dolu, ea Niosi na Tuboiano nalo, berinavo

*Kami valauo nalo, kami kuvijurukar vija Atua kiano tomu nalo memedu nei kulo Ju, ka mia kuviniu kuvisaaro!* **Tiut 32:43**

<sup>11</sup> A tai bereio ea Niosi na Iouano nalo bereio, berinavo

*Kami napano maka kuve Ju, kuvidular Atua siano mave, kami tomu nalo dedade, kuvi-aia naio.* **Iouano 117:1**

<sup>12</sup> A tai na maaro miyotuba ea Niosi na Aisea, naio berii Ju nalo kialo Naverikariano, ber mia naio tukamu bunu ka nalo napano maka ave Ju. Naruei iliano nene ber jibe nei, berinavo

*Mia tormoruo Jese kiano torogio tai rimoluo, napano mia Atua ridu naio to mave rive tubo ka nalo dolu nei napano maka ave Ju,*

*naruei mia nalo avalea ea naio ka naio rije Atua kiano ilivuiano rimaluvo ealo. Ais 11:10*

<sup>13</sup> Naruei nobolkouo bior kamiu bereio ban Atua, napano romijikia ravalea ea kanano verikariano nalo, nebika ka kamiu kuvitu kumon-monea naio rivanvano-o kanano saariano nalo a kanano tumaro rimej rivujo rivu ea kenemiu meuliano nalo, rila napano Niununo Lu kiano moroano mijikia rimau tanea kamiu ka rila ka kuvitu kuvalea kiano verikariano nalo, jo binimej toru lie riva rivan tibe na.

*Pol berii banlo ea tivelinio na kiano imauano ban nalo na maka ave Ju*

<sup>14</sup> Bilbilu nalo, maka nosidomii veve ka kamiu, mia nemijikia vatitig kamiu, kenemiu iviso bo laka, kumijikia vatitig vite nalo miroano ruei, a kubare ka kuvijikia kuverloglog kamiu bereio ea Atua kanano iliano novo nalo.

<sup>15</sup> Jibe na, p̄eli kamiu kuviilo kija ka m̄esi nei, kumial ka nojumolu neberial vite telabo ban kamiu jikili kija, a neberenio bereio vite tealo napano p̄eli kamiu kumisidomii kuber kumijikia ruei. Mia nemialio monoka nala tibe na, kar napano Atua midu jikiaiano na laiano na imauano nei joa jumaku, jibe jidomiano kirinovo tai, <sup>16</sup> ka nomej tibe Yesu Kristo kiano toro na imauano ka noverial Atua kiano Ioluano Vou ka nalo napano maka ave Ju. Nomila imauano na, nojibe toro lu tai napano nomimau joomo ea Atua kunuano Lu, nomila nalo napano maka ave Ju abinimej abe lu vatitig, nomioalo ea Niununo Lu siano, ka amijikia amei tibe ijaiano novo tai napano ban ea Atua napano mia naio saaro ka vatitigio.

<sup>17</sup> Tibe na, kumemi juo Kristo Yesu nuvitu nuvimau vio takurano, a nemijikia nasaaro laka ka kiniou bunu nemijikia nala Atua kiano imauano togio.

<sup>18</sup> Maka neil varvarka vovu, mia nemijikia never ka nabarvarka laka

ka venia napano Kristo mimauka miopdulu ea kiniou, bior vonganei, kumemi juo numidu nalo napano maka ave Ju nalo abinimej vaataro ka Atua, aju abatove kanio. Kiniou neberial iliano nalo, kiniou nemila imauano miroano, <sup>19</sup> Atua mila vremesiano kinkin nalo, a Niununo Lu kiano moroano mimau, ana mila na Kristo kiano Ioluano Vou ba reraio nonovio ea vio miroano, jikario Yerusalemo ban yako, mijaka ba boru ea tanobuku na toru Lirikam.

<sup>20</sup> Mia nemialio ka maka rivare vo, kiaku jidomiano tai jikili joa kiniou ka monoka navan lie vo. Mia maka nosidomii ka navan ea vio napano Kristo siano bokario ruei, bior napano maka nosidom neiasol imauano napano nalo dolu ajikar ruei, mia nojidom navan ea vio napano tomu nalo maka ajikia naio vo.

<sup>21</sup> Nina jibe iliano tai napano naverialiano Aisea ber beamu, napano berii Naverikariano, berinavo

*“Nalo napano tomu maka avelial naio ka nalo vo, mia nalo avitilubario vonga,*

*nalo napano maka lele ajog siano, mia nalo ajoglubario.”*

*Ais 52:15*

*Pol jii vatitigio ka riva riyotuba ea nalo napano Romo*

<sup>22</sup> Jibe napano nober ruei, bogo miroano nojidom neviedu ea kamiu na Romo, mia nojo nomila imauano ea vio dolu, a todolu nalo miroano banbano-o maka bunu neial bogo tai kanio vo.

<sup>23</sup> Mia vonganei, nemial jibe kaku imauano ea tanobuku nalo na Esia biniu ruei, a jidomiano napano joa kiniou yuka miroano ruei, ka nojidom neviedu noyotuba kean kamiu kija, nojidom ka p̄eli mia rimej rivu naruei. <sup>24</sup> Nojo nomila vatitig ka nataluvo den vio nei nava nejaka yako ea buruvenuto napano Speni, naruei nojidomii ka mia nesel

ea kamiu, ka romijikia rotu vio takurano ka ravar bogo novo vija kito kija beamu.

Mia maka nejikia noto vesiou tibe napano nojidomio, mia ver kamiu kuvijikia kuvila vite tealo ka rijai kiniou ka kiaku m̄arabo, mia netikar nodu kiaku m̄arabo bereio nataluvo navano.

<sup>25</sup> Mia nina maka vonganei ga, bior napano beamu monoka nava nesel Yerusalemo, kar napano kiaku kiri im̄auano tai ka nala ka Atua kiano namoneano nalo napano ajua vio na beamu.

<sup>26</sup> Nalo ajua bogokouo tai vonganei napano nalo miroano abe taliṃasa, maka ave kialo vite, naruei taara na namoneano nalo na vio nalo nei na Masetonia a Kris, nalo amijogio, ana nalo ga amidu jidomiano nei aberinavo bo ka avuku veru tai ka rijailo.

<sup>27</sup> Nina vite novo tai napano amila jakii kialo jidomiano ga, mia nemial jibe naio be tena memedu tai ka nalo monoka ala bunu. Nalo na maka ave Ju, mia ea kialo meuliano bija Tubo, nalo abar Atua kiano ilivuiano miroano miopdulu ea kulo Ju nalo ban ealo, ana bogo napano Ju nalo na abiniua bogokouo bereio, bo ka nalo napano maka ave Ju adu kiano kija vanlo, aijalo ka tenalo tai napano maka ve kialo.

<sup>28</sup> Mia veru nei napano nalo amila bijiio, nalo abar jua juṃaku ka kiniou navario navano, ana bogo napano naba nabar ju vatitig ea nalo na Yerusalemo ruei, mia nataluvo bereio ka nemei nesel ea kamiu na Romo, karina mia nejaka nava Speni.

<sup>29</sup> Mia nomijog ruei ka bogo napano neyotuba kean kamiu, mia rivu mia rivu ka kito nonovio, mia neviedu vija Kristo kiano ilivuiano novo ve miroano ka neveriio van kamiu.

<sup>30</sup> Bilbilu nalo, nojidom nevika sikili van kamiu ea kiado Tubo Yesu Kristo siano, ka kamiu kumitu tiniemi maio ka kiniou ea kenemi

volkouano. Nemijikia ka kamiu kubujo ea tinietiiano napano Niu-nuno Lu jianio, ana bo ka kubolkouo sikili ka kiniou, kuvasol kenemi volkouano vija kiaku volkouano napano nemila vonio jikili ka nobolkouo julaka kanio.

<sup>31</sup> Bogo napano nava novokar tanobuku nei Yutea ka nava Yerusalemo, telabo napano maka asaaro ka amonea Ioluanou Vou nei aju, ana maka nejikia ka mia nalo ajidom ka ala tum̄abe ka kiniou, mia neber bo ka kamiu ka kubolkouo van Atua ka tukovio ka kialo jidomiano va nalo ea kiniou. Mia monoka kubolkouo bunu ka namoneano lu nalo napano aju Yerusalemo, mia nalo asaaro ka avar veru ve telisu napano mia kiniou nesiano vanlo.

<sup>32</sup> Ana verver vite nonovio memedu tibe Atua kiano tinieiano, mia kiniou nemijikia neyotuba ka kamiu vija buruṃara kiaku tiniesaareiano a mia nemijikia noto rivu vija kamiu, nojilimebi ve telisu beamu.

<sup>33</sup> Mia kiniou bunu nojo nobolkouo ka kamiu, ka mia kiado Atua, burupati na tum̄aro, to vija kamiu rivanvano-o maka rijikia ribisi.

## 16

### *Pol berial vite tealo ban namoneano nalo na Romo*

<sup>1</sup> Bilbilu nalo, nojidom netetavoko kiaku ṃesi ea iliano nalo tai ea tivelinio ka kamiu nalo tealo. Ea tivelinio na kuviviniedo nei Vipi, napano naio naruei ridu ṃesi nene riviedu ea kamiu, nejidom kuvijikia ka naio be ijaiano novo tai ea taara na namoneano nalo na ea komeli na Kenkria, <sup>2</sup> naruei bo ka kamiu kuvisaaro ka kuver iliano vorvorua vanio, kuvuru naio tibe kuviviniemi tai ea tivelinio na Tubo kiano torogio, jibe napano memedu ka kito namoneano nalo monoka ralaio van kito. Bo ka kamiu kuvijai naio ka venia napano mia juṃano bulati kanio, ka napano

naio be tira tai napano be bilbilu novo ea kumemi miroano, miija vatitig kumemi.

<sup>3</sup> Nejidom bunu ka kami kuver kiaku kavijo bo a bogiano bo rivan tira novo dolu nene Priska, rivija koano sumãano Akuila, napano kumemi nube tomu na imãauveiano ea Kristo Yesu kiano imãauano. <sup>4</sup> Riano ga na, bogo tai nua na, kiniou nojoa juluvati na mãariano, ana naljuo amila napano vaataro ala luvu kialo meuliano ka amei alarur kiniou, mia nojo nober sivaiano laka biorio. A maka kiniou ve takurano ga, mia taara na namoneano dolu nalo na tanobuku nei nalo bunu aber sivaiano kalo bior venia napano amila nei.

<sup>5</sup> Mia kavijo bo a bogiano bo napano nober ka naljuo, nojidom nover bunu van ea nalo dolu napano aju joomo ea taara na namoneano na tertelisu napano aju abiviuo vio takurano ea naljuo kunualo.

Mia neber jibe nei bunu ka nalo nene, jibe kiaku bilbilu novo nei Epanetas, napano naio be moti na ea burumãara tanobuku na Esia napano monea Kristo, <sup>6</sup> mia Mere, napano naio mila imãauano novo nalo miroano iviso ea kami, <sup>7</sup> mia naljuo dolu na kiaku vio nene, Adronikas naio Junia, napano nua na kumemi nubiniu numitua tetavokoiano vaarakurano. Atevi juo nei, naljuo amonea Yesu nua ruei, beamu ka kiniou, a abar sio novo laka ea atevi dolu nalo miralo.

<sup>8</sup> Tealo bereio, nina Ampliata, napano Tubo mila ka kumemi ve juo nuve bilbilu novo, <sup>9</sup> a Upanas, napano numimãau vio takurano bija naio ea Kristo kiano Ioluano Vou, a kuruaku novo nei Stakis, <sup>10</sup> a Apelesi, napano be iakurano ka juboluboiano toru binimei ea naio, mia naio jikili ju kirisikili ea Kristo.

Mia bunu, neber kavijo bo a bogiano bo ban Aristobiulas kiano mãaratavo nalo, <sup>11</sup> a toro dolu na kiaku vio nei Erodiano, a namoneano

nalo na Narsisas kiano mãaratavo, <sup>12</sup> a tira juo novo na amimãau Tubo kiano na, Traevina bija kulue Traevosa, a kuviviniedo dolu nei bunu Pesis napano tiniedo jii naio toru, a naio mila Tubo kiano imãauano toru laka ruei, <sup>13</sup> a Ruvus, ñavurimãaraboiano na Tubo kiano imãauano, bija kenieno napano naio bijuku ban kiniou jibe napano nebe kenerinio.

<sup>14</sup> Mia tealo bunu bereio, nina Asinkritas, Vlekono, Emesi, Patropas, a Emas, bija bunu kuruado dolu nalo napano aju bijalo, <sup>15</sup> a bereio maka tinieku bobogia Vilokas, Juliano, Nereas bija kuviniene, a Olimpasi, bija namoneano lu dolu nalo napano amila lotuano vio takurano bijalo.

<sup>16</sup> Kiniou nejaaro ka nebiviuo kami nonovio ea kiaku mñesi nei, a kami bunu monoka kuvorvorua vatitig van kami bogo nonovio, kuverial kenemiu tinietiano van kami, tibe kami kumiom babibiniomiu ea tinievuiano. Mia bunu, taara nalo na Kristo kiano namoneano nalo ea tanobuku nalo nei aberial ka nalo aju ajidomii kami ea kialo volkouano nalo.

<sup>17</sup> Bilbilu nalo, nebika jikili ban kami bereio ka monoka kuvitigar vatitig ka nalo napano aju ajikar baravoiano nalo, ðeli aju amila namoneano nalo abeve terakurano, a aju amilkue ka verloglogiano nalo napano kumijevo. Mia bogo napano kuvitigar vatitiglo, kuvitu re kuva vaataro kalo. <sup>18</sup> Nina bior tomu nalo kinkin na jibe na, nalo maka atu ala kiado Tubo Kristo kiano imãauano, mia nalo aju amila jakii ga kialo sidomiano va nalo. Nalo amijikia averial vite nalo na bo mia bo ve miroano, mia be seseiano ga na, a nalo aju ajubolbo vatitig tomu nalo kialo jidomiano napano nalo maka ve kialo jikiaiano rivu.

<sup>19</sup> Tomu nonovio amijikia vatitig ruei ka kumituãa kumijogkar vatitig Atua kiano iliano, a naina mila kiniou nejaaro laka, mia

monoka kuvitu kuvitkar vatitigio. Ea tivelinio na vite nalo napano abo, kamiu monoka kuvilala m̄sasouaio, mia ea tivelinio na vite nalo napano abova, ve re leleio soro nene tai toa kamiu.

<sup>20</sup> Mia verver kuvila tibe na, mia kiado Atua na tum̄aro naio be kiano m̄arabo ka rila Sim̄aro to yetano ka jaamiu ka kuvila tanea vatitig naio. Mia kiaku volkouano ka mia kiado Tubo Yesu Kristo kiano tinieseseiano to vija kamiu.

<sup>21</sup> Bilbilu nei Timoti, napano kumemi juo numitu numim̄au vio takurano, naio berenio kavijo bo p̄eli bogiano bo ban kamiu, a nalo tolu nei na kiaku vio, Lusias, Jasoni bija Sosipata, nalo bunu aberenio.

<sup>22</sup> Kiniou napano nobokar vovojulu, nobivitauialar m̄esi nei Pol kiano na ban kamiu, siaku Tesias, a kiniou bunu nejidom neverenio ka nejaaro laka ka nebiviuo kamiu ea m̄esi nei, ea Tubo siano.

<sup>23-24</sup> Bo ga, kiniou Pol nei naruei nebivitauiia nei, mia vaataro nala nonovio kiaku m̄esi naruei, mia kavijo bo a bogiano bo jo biedu binimei ea nalo tolu nei, Kaias, napano nojoa kunuano, napano lotuano na vio na nalo aju abinimei vio takurano ea kunuano, bija Erastas, napano naio be navitikariano na veru na komeli nene, bija kuruado nei Kotas.

<sup>25</sup> Vonganei ea kiaku iliano maariano, nejidom nedular bereio ilivuiano nonovio nalo van Atua. Nobolkouo ka mia naio ridu iliano nalo na Ioluano Vou, vija verloglogiano nalo novo napano aberii Yesu Kristo napano nejian ban kamiu ruei, ridu vatitig tua kenemiu meuliano nalo, ka kuvijikia kuvitu sikili ea bogoti napano ju binimei. Ilirianiano novo nalo na, tomu nalo maka ajikiaio ea yuka miroano napano barlaka ruei, mia vonganei ga Atua berialio ka kito. <sup>26</sup> Beamu, tomu nalo abuluku naverialiano nalo kialo iliano nalo, nalo maka ajikia ka ilirianiano nalo

nene aju joomo ealo, mia vonganei, kumemi nuberialio meravo, kito robiniu romijikia rojoglubario. A Atua, jibe naio jo nua a mia to toboto, naio berialio Ioluano Vou nei monoka rivan ea tomu nalo na buruvenuo nonovio, ka nalo bunu ajikia ajogio, ajikia amonmoneaio.

<sup>27</sup> Naio ga takurano be Atua, naio ga takurano be burupati na masouano, a naio ga takurano napano Yesu Kristo mila kiado m̄arabo ka rolotu naio, ravano-o maka rijikia ribisi bogo tai.

**Mesi Moti Napano Pol  
Bivitauiaio  
Ban Namoneano Lu  
Nalo Na  
KORIN  
Verialiano Moti**

*Tukunuano bulati na niosi nei*

Mesi moti napano Pol jirio ba ban namoneano nalo na Korin, naio jirio bior napano be vite va nalo jumormolu ea namoneano nalo kialo meuliano ea vio na, a naio juvan mēsi nene ban ka rijailo. Yimo lu na Korin, Pol naruei jikario.

Korin be burumāra komeli tai na tomu nalo na Kris kialo, a be bulu komeli na tanobuku nei Akaia, napano jo yetano ka Romo. Be tomu miroano na venuo doldolu nalo ea vio na, a naio be vio tai napano tomu nalo amijikia vatitigio ea tivelinio na vioruru, a ea tivelinio na kialo bajago moruo nalo. Tomu nalo na yetemeriba amijikia vatitig tomu nalo na vio na bior kialo bajago va nalo a bior kialo lotuano napano aju amilotu ka atua miroano doldolu nalo.

Vite burtumoruo nalo napano Pol beriio ea mēsi nei jibenei:

- jo berii vite va napano tomu nalo na yimo lu aju beve terakurano,
- jo berii vite va nei napano nalo aju amila bova bija tira,
- jo beridoŕe kialo vikadeniano nalo ea tivelinio na soriano,
- jo berii tivelinio na sinaniano napano toro jo jiano ban tavoro nalo. Mia naio berii mārabo memedu ka atakiio ea lotuano ea yimo lu,
- jo berii moroano nalo napano Ninuno Lu jian ban yimo lu,
- a jo berii bajago nene na napano toro mijikia meul bereio.

Pol berial ka naio mijikia vatitig kialo vite va nalo bija kialo vikadeniano nalo, a berial ka Yesu kiano

ioluano vou ga jian veridoŕeiano banlo.

Ea mirano duelimo ba tolu [13] naio berii bajago na tiniedo titii Atua vija tomu nalo laka, nina bajago na bo laka ka Atua kiano tomu nalo atakiio. Yati nei tomu nalo amijika vatitigio, jovulu torogio nalo na niosi nei.

*Torogio nalo na niosi nei*

Iliano moti 1:1-9

Tomu nalo ea yimo lu abeve terakurano 1:10—4:21

Bajago va bija tira, a meuliano na māratabo 5:1—7:14

Namoneano nalo bija tomu nalo napano maka ajikia Atua 8:1—11:1

Namoneano nalo kialo mārabo nalo na atakiio ka alotu 11:2—14:40

Yesu meul bereio, a tomu nalo napano amonea naio amijikia ameul bereio 15:1-58

Veru na asian va van namoneano nalo na Yutea 16:1-4

Iliano maariano 16:5-24

*Pol jo Eveso, naio berenio vorvoroano ban tomu nalo na Korin*

<sup>1</sup> Bilbilu nalo na Korin, kiniou napano nebivitaia mēsi nei biedu ban kamiu, kiniou Pol, napano Atua jidom ka nemei neve Kristo Yesu kenerinio kiano atevi tai, ana naio bio kiniou, bitirilar kiniou ka navakar imāuano tibe na.

Kiniou nojoa vio nei bija kiado bilbilu nei Sostinis, ana kumemi juo nuberenio kavijo bo ŕeli bogiano bo ban kamiu nonovio, <sup>2</sup> ea Atua kiano namoneano nalo ea burumāra komeli na Korin. Kamiu na naruei Atua bio kamiu ka kumei kuviadol vija kiano namoneano lu dolu nalo, napano vio reraio ea vio nonovio nalo aju amilotu naio napano mila kito robe lu vatitig bo ruei, nina Yesu Kristo napano naio be kito nonovio kiado Tubo.

<sup>3</sup> Kumemi juo kenememi volkouano ka Tubo Yesu Kristo kiano tiniememiano a karamādo Atua kiano tumāroiano atu vija kamiu.

*Pol berenio siva ka Atua kar tomu nalo na Korin kialo viekouoiano*

<sup>4</sup> Nemial jibe ka bogo na kube Kristo Yesu kiano tomu nalo, Atua kiano tiniememiano jo miñau toru ea kenemiu meuliano, ana bogo nonovio nojo neber siva laka kanio.

<sup>5</sup> Kamiu kumitu kubinimei bo laka ea tivelinio na verialiano na Ioluanou Vou, ana kumitu kubinimei mave ea tivelinio na kenemiu jikiano, a ea tivelinio na bajago novo nonovio dolu. <sup>6</sup> Bogo napano nemial tena, nemialio jibe napano kiaku iñauano nalo re nua na, napano neberloglog Kristo ka kamiu, vonganei naio jo bar m̄arati toru.

<sup>7</sup> Jidomiano nalo a moroano nalo napano Niununo Lu no jo jianio, maka tai napano maka kuvokario vo, ana kumitu kumiñau bijalo bo laka, bior napano kumitu kumisirarag ka kiado Tubo Yesu Kristo mijikia riyotuba bereio ea vio yetano nei.

<sup>8</sup> Naio maka riyotuba vo, mia jo miija kito julaka ka rotu sikili rivano-o rivokar legiano maaro nene, mia bogo napano rotua Atua mirano naio mila napano maka tokoriano toa kito.

<sup>9</sup> Atua berkar ruei ka riviekokoa kito, mia romijikia rovarkar tiniedo rivu ea kiano iliano nei, bior napano naio bio kito, midu kito miasol kito robe bilbilu novo nalo bija kenerinio, kiado Tubo Yesu Kristo.

*Namoneano nalo aju aburuburevurelo laka*

<sup>10</sup> Kiaku m̄aratavo, Yesu Kristo kiado Tubo kiano terati nalo, kiniou nojidom nevika sikili van kamiu ea siano, ka kamiu kuvila von ka kuvila kamiu ka kumei ve takurano bereio. Bova napano kumitu kuburuburevure kamiu, mia kenemiu jidomiano a kenemiu iliano monoka ve takurano ga.

<sup>11</sup> Neber iliano nalo na, kar nalo napano aju kea ea toro nei Kloe kiano vio nalo abinimei aberial ban kiniou ka siniabu nalo aju iviso kean

kamiu, kuruaku nalo a kuvivinioku nalo.

<sup>12</sup> Nomijog napano kamiu terakurano kumitu kuber kenemiu bagaro nalo. Peli tai berinavo “O, kiniou natakisor Pol,” p̄eli dolu river “O, kiniou Apolos kiano,” p̄eli tai bereio, river “O kiniou neiasol Kevas kiano bagaro.” Ana tealo bereio nalo abitirilar kialo bagaro dolu na tertelisu nalo, abuku bulag dolu nalo, aberenio “O, kumemi ga nube tomu na Kristo kiano riano.”

<sup>13</sup> ?Ei, venia na kamiu kumila jibe na? Peli bo ka rotivirivi Kristo ea niati, ratankanio ea kenemiu bagaro na tertelisu nalo tibe na? Peli tealo ajidomii aber nalo abe kiniou Pol kiaki, tibe napano aber kiniou naruei napano najakilele ea m̄akolkolo ka nalarurlo? Peli tealo tinielo bobogia napano abaruei ealo ea Yesu siano, mia nalo ajidomii aber abaruei ealo ea siaku?

<sup>14-16</sup> Jibe na, nemial bo ga ka nanua na kiniou nala re varueiano ea kamiu tai leleio, p̄eli naljuo nei Krispas naio Kaias ga, a riano, tinieku bobogia, nabaruei bunu ea Stevanas bija nalo na ea kiano m̄aratavo, a maka bunu nosidomkar vonganei ka nalo na ga p̄eli ta bunu bereio. Kiniou neber jibe na bior napano ver nala varueiano ea kamiu ve va moroano, p̄eli nalo atumolu atu ail vevavin ka garuei, atu averinavo “!O, kumemi naruei, Pol baruei ea kumemi ea siano!”

<sup>17</sup> Jibe na bova na, bior napano Kristo maka tuvan kiniou nemei navaruei ea tomu nalo, mia miila kiniou nebinimei ka noioliolu ka kiano Ioluanou Vou vanlo. A bogo napano nojo nomioliolu jibe na, maka nala vija moroano na masouano na yetemeriba nei, mia nemila bija moroano na Kristo kiano m̄akolkolo.

*Kristo berial Atua kiano masouano a kiano moroano*

<sup>18</sup> Ana tomu nalo napano aju ajakii m̄arabo na vakovioiano, amijog iliano na, Kristo kiano

mãakolkolo, jibe titai na vovuiano ealo, mia kito napano roju rajakii m̃arabo na meuliano, romijog iliano na, Kristo kiano m̃akolkolo, jibe Atua kiano moroano ka rilarur kito.

<sup>19</sup> Nina jibe iliano tai ea Vivitauiano Lu, napano Atua berenio jibe nei, berinavo

*Mia kiniou nouedom masouano den nalo napano ajidomii aber abe masou,*

*mia notuko vio ka jikiaiano ea nalo napano ajidomii aber amijikia vite.*

*Ais 29:14*

<sup>20</sup> A iliano na be riano laka, bior napano robittii yetemeriba, romijikia rovika tibe nei, rever: ?Kiano tomu na masouano nalo, nalo be? Tomu nalo napano amilakakar vatitig jikiaiano nalo napano ajua niosi nalo, nalo be? ?Tomu nalo napano amijikia aberii jidomiano dolu nalo napano aju jeliviv vonganei, nalo be? Romial jibe maka atu na, a romial jibe Atua mila masouano na yetemeriba nei binimej jibe tena vovuiano tai bereio ruei.

<sup>21</sup> Atua ga naio be masou, a ea kiano masouano, naio mila ka masouano na yetemeriba nei maka rijikia rila toro rijikia naio. Mia naio mial bo lie ka rila napano kenememi ioluano nalo napano tomu nalo aju ajidomiiio aber be vovu ga, mijikia rilarur toro kiano meuliano napano moneaio.

<sup>22</sup> Kulo Ju miroano maka asidom amonea, aju aberenio ver nuvila aial vremesiano nalo, mia atikar ka amoneaio, a kulo Krik miroano maka asidom amoneaio, aju aberenio ver nuvil rimemedu ea kialo jikiaiano moruo nalo, mia nalo atikar ka amoneaio, <sup>23</sup> mia maka nuvitu nuvila tibe na kalo. Kumemi numitu numioliolu ka Yesu ga banlo, nuber naio m̃aro ea m̃akolkolo kar kialo kariano nalo, mia iliano na, kulo Ju nalo aber maka ajikia amoneaio, a kulo Krik nalo, aber nina iliano vovu ga na.

<sup>24</sup> Mia ea tivelinio na nalo napano Atua biolo ka ave kiano, jibe kito, napano kito tealoo kulo Ju a

kito tealoo kulo Krik, maka tibe na. Kito rosidomii re ka reial kijok-ijo dolu, bior napano robittelubar Atua kiano moroano ea Kristo kiano im̃auano ruei, a rosidomii re ka rotakii jikiaiano dolu, bior napano robittelubar Atua kiano masouano ea Kristo kiano m̃arabo na milarur kito.

<sup>25</sup> Tomu dolu nalo amial ka Atua mijamo ka Kristo m̃aro ea m̃akolkolo, ajidomii aber Atua melukluku ga, mia makanio, tenei berial kiano moroano napano jikili lie loa toro kiano moroano. Nalo amial tenei, ajidomii aber Atua miavovu ga, mia makanio, naio berial kiano masouano napano bo laka loa toro kiano masouano.

<sup>26</sup> Kuruaku a kuvivinioku nalo, kuvila von ka kuvisidomii ver kamiu jibe venia na, napano Atua bio kamiu be kanano? Maka kito ve miroano napano ea tivelinio na vitiano na yetemeriba robe masou, p̃eli kito tomu na be p̃irido, p̃eli kito tomu na tortoru.

<sup>27</sup> Yetemeriba nei ber kito romiavovu, mia Atua buru kito, ana mĩau jel ea kito, jo bar bulag masouano na yetemeriba. Yetemeriba nei ber kito romilukluku, mia Atua buru kito, ana mĩau jel ea kito, jo miladom sikiliano na yetemeriba.

<sup>28</sup> Yetemeriba nei ber kito robe tomu kurano napano roju yetano ga, mia Atua buru kito, ana ea mĩau jel kito, jo muedom tenalo na burutomoluo napano aju, mila tenalo na abinimej be kurano.

<sup>29</sup> Jibe na, maka toro tai leleio napano mijikia ridular naio toa Atua mirano, river naio be masou, p̃eli naio jikili, p̃eli naio be toro tai, <sup>30</sup> mia Atua ga be burupati na kiado meuliano vou bija Kristo Yesu. Naio naruei miila Yesu binimej jiloglog m̃arabo ban kito, ana Yesu bulu bulag kito mila romemedu ea mirano, robinimej robe kiano tomu lu.

<sup>31</sup> Ana bior tenalo na, romial ka iliano tai ea Vivitauiano Lu be riano laka, napano berenio jibe nei, ber *Toro napano jidom rive m̃arou, naio mijikia rive m̃arou ga ea venia*

*Tube milaka naio. Jeremaia*  
9:24

## 2

*Pol mioliolu ka Yesu kiano  
ñakolkolo ea Niununo Lu kiano  
moroano*

<sup>1</sup> Bilbilu nalo, nua na kamiu maka kuvijikia Atua kiano iliano nalo, mia kiniou nebinimei neberialio ban kamiu. A jibe na napano kumialio, bogo napano nebinimei nomila, maka nola napano navarvar ka iliano terebievi nalo ðeli toro kiano masouano nalo.

<sup>2</sup> Nemila kiaku jidomiano jikili ka bogo napano nojo iviso kean kamiu, mia maka nosidomii tenalo dolu leleio, a mia noioliolu ga ka Yesu Kristo, vija kiano ñariano ea ñakolkolo.

<sup>3</sup> Nojo bija kamiu, nomijog ka nemelmeluku laka, nojo nomerou, nojo nomemebiju, <sup>4</sup> a kiaku iliano a kiaku tukunuano nalo maka avujo leleio ka masouano ðeli toro kiano jikiaiano. Mia ea bogo na, kumijog napano kiaku iliano nalo abujolou ka moroano na Niununo Lu, <sup>5</sup> ana mila na kenemiu viekouoiano maka sikili tua toro kiano ilimasosouano, mia jikili jua Atua kiano moroano.

*Atua kiano masouano*

<sup>6</sup> Be riano napano kiaku iliano maka rivujo ka ilimasosouano na yetemeriba nei, ðeli jikiaiano ninio nalo napano tomu na tortoru na yetemeriba nei ajaaro kanio, mia naio bo ga, bior napano yetemeriba nei bija kiano tomu na tortoru mia ava añaro ga. Mia kamiu napano kenemiu jidomiano meruo bo, kubitilubar napano kiaku iliano bujo vatitig ka Atua kiano masouano nalo.

<sup>7</sup> Kiano masouano na, naio midu vatitigio bo ju beamu karina jii yetemeriba nei, mia masouano na juluku ju vatitigio banbano-o, mia tomu nalo maka ajikia leleio, a vonganei ana maluvo ea kito medave

jibe ilivuiiano na toru tai napano Atua jianio ka rila rivu ka kito.

<sup>8</sup> Ana kiano masouano na maluvo ea kito ea ñarabo napano Yesu binimei milarur kito, mia tomu na tortoru na yetemeriba nei maka avitilubar tenei, ana amidu Yesu, napano naio be Tube na toru na mermerano na tiniabene, ajilan naio jaklele ea ñakolkolo ñaro.

<sup>9</sup> Tomu nalo maka avitilubar Atua kiano jidomiano tibe na, naio jibe Vivitauiano Lu tai, napano berenio jibe nei, berinavo

*Tenalo na bo napano toro mirano  
maka lele rialio, ðeli maka lele  
toro tiliniene rijogio, ðeli toro  
kiano iviso maka lele sidomii,  
mia tenalo na naruei Atua mila vatitig  
ju ka kiano tomu nalo  
napano tinie jii naio. Ais*  
64:4

<sup>10</sup> A kito, romijikia ilivuiiano nalo na, bior napano Atua Niununo napano bitilubar tenene nonovio, a mijikia Atua kiano jidomiano lukluku nonovio, naio berialio ban kito.

<sup>11</sup> Jibe ka ga kito kulorinio, napano toro dolu maka rijikia venia joa kiado jidomiano, mia niunudo ga mijikia vatitigio bo, mia be verare bunu ka Atua. Kito maka rejikia venia na jua kiano jidomiano, mia Niununo mijikia, ana berialio ka kito.

<sup>12</sup> Maka niununo tai na yetemeriba nei ga napano riverialio ka kito, mia Niununo Lu nei napano jaluvo den Atua binimei, naio naruei mila kito robitilubar vatitig jidomiano nonovio nalo napano Atua jo jian ban kito.

<sup>13</sup> Tibe na, bo ka kuvitilubar bunu ka kenememi iliano nalo napano abinimei ea kamiu, maka ea toro kiano masouano, mia Atua kiano Niununo ga berloglog ka kito. Jibe na, numitu numidu Niununo Lu nei kiano ilirianiano nalo, ana numisian ban kamiu napano Niununo nene joa kenemiu meuliano ruei.

<sup>14</sup> Toro napano Niununo maka toa

kiano meuliano, naio maka rijikia rivitilubar tenalo na Niununo, naio jibe joa kia ga melijokouo, ana maka rivokar leleio moroano nalo napano Niununo jiano. <sup>15</sup> Toro napano Niununo joaio, mia mijikia rivitilubar vatitig vite nonovio, mia toro napano Niununo maka toaio, naio maka rijikia rivitilubar vatitig venia joa toro kiano meuliano napano Niununo joa naio. <sup>16</sup> Iliano Lu berenio jibe nei, ber

*Maka toro tai leleio napano naio mijikia venia joa Atua kiano jidomiano,*

*maka toro tai leleio napano mijikia verloglog vite van Atua. Ais 40:13*

Iliano nei be riano laka, mia ea kito napano Niununo joa kito, romijev Kristo kiano jidomiano ruei.

### 3

*Bova ver baravoiano jo iviso kean namoneano nalo*

<sup>1</sup> Ea bogo napano nojo bija kamiunua na, nojidom neil vatitig vija kamiu, tibe napano kamiu tomu nalo napano Atua kanano Niununo joa kenemiu meuliano ruei, mia makanio. Namial ka maka kuvare vo, ana mila nemil ban kamiu jibe ka kamiu tomu nalo na yetemeriba kia ga vo, napano ea tivelinio na kenemiu meuliano bija Kristo, ajibe kiritete nalo kia ga vo.

<sup>2</sup> Jibe na, nabagan kamiu ka yu ga, maka nejikia nesian sinaniano na jikili van kamiu, bior napano maka kuvare. Mia bokar banei, nemial jibe maka kuvare vo, <sup>3</sup> bior napano bajago miroano na yetemeriba aju iviso kean kamiu kia ga. Peli kamiu maka kuvitilubar, mia bogo napano jokuano a baravoiano ju kean kamiu, ber peli kumitua melijokouo kea ga vo, kenemiu bajago ajibe toro ga kiano bajago.

<sup>4</sup> Meravo laka ka kamiu jibe na, bior napano kumitu kuburu vurevure kamiu kea ga. Kamiu tealo kumitu kuberii kiniou, kuberinavo “O, kumemi numisidom Pol, kumemi nuvitakisor naio,” a kamiu tealo aju aber bilbilu navagadeano nei Apolos, aberenio “O, kumemi numisidom Apolos, kumemi nuvitakisor naio,” mia jidomiano kinkin jibe na naio be toro kiano jidomiano ga.

<sup>5</sup> Verver kuvisidom kuververii kumemi juo Apolos siememi, bo ka kuvisidomiiio vatitig ka kumemi juo nube toro na jumabe? Kumemi juo nube Tubo kiano toro ga, ka nuvila imãuano napano naio midu joa jumememi, ka rila ka kamiu kuvijikia kumonea naio. <sup>6</sup> Ea tivelinio na imãuano nei, kiniou naruei napano nemebija kurukuti, a Apolos naruei napano naio se toti nene, mia Atua ga napano mila burupati binimei toru bar m̃arati. <sup>7</sup> Naruei monoka rovitilubar ka toro napano mebija kurukuti a naio napano se toti nene, naljuo maka leleio ala titai na toru, mia naio napano mila burupati binimei toru bar m̃arati, naio naruei mila titai na toru. <sup>8</sup> Mia kumemi juo, napano tai mebija kurukuti, a tai se toti nene, kumemi juo numimãu be verare ga, a mia kumemi juo nuvijev kenememi jidomiano rimemedu ka kenememi imãuano. <sup>9</sup> Maka tibe napano kumemi tai naio bo, tai naio bova, mia kumemi juo nube tomu na imãuano vei na Atua kiano, a kamiu jibe borotano napano kumemi juo numitu numimãu eaio.

Peli kijokijo dolu tai nene bereio, nemijikia never ka kamiu jibe yimo tai napano Atua naio jo mimãukanio.

<sup>10</sup> Atua mije jikiaiano novo ban kiniou, ana nomimãu jibe toro tai napano bari nai ka imãuano, nomimãuka burupati yimo novo tai nene napano jikili bo ju. Mia iorou, maka kiniou napano nevi-

tirilar yimo toa burupati neibano, mia bilbilu dolu nei binimei jo mi-ija ka riũaauka yimo. A kamiu tealu dolu bereio kumijikia kuvijija ka kuvimũaauka yimo toa burupati neibano, mia toro napano mila jibe na monoka vitikar vatitig kiano bajago na iũaauano. <sup>11</sup> Naio monoka rila von re ka ridu burupati dolu tai bereio, bior napano kiniou nomidu burupati na memedu ruei ju, napano naio be Yesu Kristo. <sup>12</sup> A bogo napano amimũaauka yimo mave ea burupati yimo nene, řeli tealu amimũaauka niogo řeli veriniogo řeli veru jikili, řeli tealu amimũaauka iesi řeli surukiaro řeli maburi. <sup>13</sup> Mia iorou, sebi na legiano maaro rila von sisen veve kialo iũaauano nalo, rila iũaauano napano nalo amimũaaukaio, rimaluvo ea vio medave. <sup>14</sup> Ver sebi rivokar yimo napano toro tai bitirilar joa burupati neibano, ana ver maka rijikia sisen lele ga, yimo jikili ju bo ga ju, mia toro nene rijev jidomiano novo tai. <sup>15</sup> A ver toro dolu tai, sebi sisen nonovio kiano iũaauano, mia toro nene milaluvu nono vite. Vaataro mia sebi mijikia sisen bin naio toro na iũaauano nene bunu, ana řeli milarur naio buru den sebi nei, milarur kiano meuliano.

<sup>16</sup> A kamiu monoka kuvitilubar ka yimo neibano napano abitirilar joa burupati nene, naio be kamiu namoneano nalo, a jibe yimo na volkouano lu tai na Atua kanano, napano kiano Niununo jo joa joomo eaio. <sup>17</sup> Atua kunuano na volkouano nene, naio be kamiu ga, a ver toro tai jidom rila bulag yimo nene, mia Atua rivelar naio garuei, bior napano kiano yimo na volkouano nene be lu laka.

<sup>18</sup> Monoka kuvidu venia napano nojo neberenio nei, maka rivu ka kuvisidomii kuver be titai iakurano ga. Ver kamiu tai ber naio be masou bo ea jikiaiano nalo na yetemeriba nei, bo lie ka naio tuvan jidomiano sibusibiano nalo na atu. Ea tivelinio

na jikiaiano nalo na yetemeriba nei, naio monoka rila naio tibe toro vovu tai ga, ana ver rila tibe na, mia naio mijikia ve masou vatitig ea Atua kiano jikiaiano. <sup>19</sup> Ea Iliano Lu, kito romial iliano tai napano jiloglog ber masouano na yetemeriba nei jibe vite vovu tai ea mirano Atua, napano berinavo jibe nei, ber

*Nalo napano ajidomii aber abe masou bo ea yetemeriba nei, ajidomii aber amijikia vite, mia ea Atua mirano, nalo abe vovu ga, naio bitilubar vatitiglo ruei.*

*Jop*

*5:13*

<sup>20</sup> A iliano dolu tai bereio jibe nei, napano berenio

*Tabo bitilubar vatitig kulo masouano na yetemeriba nei kialo jidomiano, ber nalo abe kurano ga.*

*Iouano 94:11*

<sup>21</sup> Tibe na, monoka rove m̃arou re ka jidomiano nalo na yetemeriba. Nalo maka ajikia ala vite tai rivu ka kamiu leleio, bior napano Atua jian nonovio kiano ilivuiano novo ban kamiu ruei.

<sup>22</sup> Kiniou Pol bija Apolos a Kevas, kumemi numila iũaauano novo ban kamiu ruei, a vonganei yetemeriba nei joa jumemiu. Peli kumeul řeli kumarm̃aro, řeli kumitu vonganei řeli kuvitu ea bogoti napano ju ka rimei, mia vite nonovio be kenemiu ruei, <sup>23</sup> a kamiu kube Kristo kiano, a Kristo naio be Atua kiano.

## 4

*Pol bija Apolos kialo iũaauano, jibe Yesu kiano atevi nalo*

<sup>1</sup> Tibe na, kamiu kuvidu re kumemi nuvitu mave, mia bo ka kuvitii kumemi tibe tomu nalo na Kristo kiano iũaauano ga, napano naio bar Atua kiano ililukuano nalo ban kumemi, ka nuverialio ka nalo napano maka ajikiaio.

<sup>2</sup> A vite tortoru napano jua kenememi jidomiano, kumemi numijikia ka monoka nuviekar vatitig ea

iũaauano nei napano kenememi toro na toru midu jua jumememi.

<sup>3</sup> Maka nosidomii m̃lelea ka ðeli kamiu kumisidomii jum̃abe ea kin-iou, ðeli tomu nalo atibure kiniou tum̃abe, a kiniou bunu maka noto nevitvitij kiniou bereio ka kiniou jibe na ðeli jibe nei.

<sup>4</sup> Ee, ðeli nebitii ka nomim̃au bo ga, mia nina kiaku jidomiano na ga na. Kiaku jidomiano na maka rijikia rila kiniou ka nomemedu, mia Tubo ga naio be toro memedu ka tibure kiniou.

<sup>5</sup> Tibe na, kito rala soðeli re ka rotibure toro dolu, mia monoka rotu rorea Tubo ka rimei bereio ea kiano legiano nene na tibureiano. Ea bogo na, mia naio rivar vite nalo napano ajuluku ea melijokouo, rila amalmaluvo ea mermerano, a mia naio rivar jidomiano nalo napano ajuluku ea toro kiano iviso, rila amalmaluvo ea mirano vio. Mia Atua rivitivitii vite nalo na, ana mia sian iliano van tomu nalo rimemedu ka venia napano naio mialio ea kialo meuliano.

<sup>6</sup> Bilbilu nalo, iliano nalo napano nojo neber ruei na, nojo neberii laka kumemi juo Apolos ga, ana nemila jibe na bior napano nojidom neverloglog vatitig kamiu, ka kuvitii re ve dolu ea kenemiu naverloglogiano nalo. Kamiu tealo abe m̃arou bior naverloglogiano ea kialo burukuti, a nalo aju abitii bova ea naverloglogiano na nalo dolu kialo, mia maka rimemedu tibe na.

<sup>7</sup> Kamiu kubiniu kube verare ga, maka kuvu lie tovulu nalo dolu, a ver vite tai na bo joa kamiu, maka kamiu napano kumim̃aukanio. Atua ga mijevio ban kamiu jibe jidomiano tai, ana tibe na bo ka kuvil re m̃arou riviorio bereio.

<sup>8</sup> Ee, nemijikia ka kumitu kuber ðeli kube sanibaiano ka vite novo nalo na Atua kiano ruei, a kumijog bo, kuber ðeli kamiu kube kiano tomu na tortoru ea yetemeriba nei

ruei, napano kubuku kumemi numitu iorou laka. Ver be riano ka kubinimej jibe ka Atua kiano parinio tubo nalo ea yetemeriba nei, bo lie vo, mia neber ðeli maka tibe na.

Ana ver bogo tai tibe na, ðeli maka kamiu ga na, mia Atua rial ka kumemi juo bunu nubare ka nuvitutano mave vija kamiu ka rotilan vuu ka kiano tomu nalo.

<sup>9</sup> Ana vonganei, kumemi atevi nalo maka nuvitua vio novo na jibe na. Jibe napano Atua midu kumemi numitutano maariano laka, napano tomu nalo na yetemeriba bija agelo nalo bunu abiti niege kumemi, jibe napano kumemi nube verare ga ka tomu na bova nalo napano amijev vironiano na m̃ariano banlo.

<sup>10</sup> Numitu nubamenea Kristo, numila kiano iũaauano, ana kulo dolu nalo amial kumemi jibe vovu kija ga, ana aju aberii kamiu aber kube masou vatitig ea Kristo kiano meuliano. Nalo abitii ka kumemi niabememi mave, ana aberenio kamiu be ðirimiu. Nalo amilkuei ka kumemi, ana amidu kamiu kumitu mave.

<sup>11</sup> Kumemi maka tibe kamiu leleio, bior napano jikar nua binimej bokar vonganei jijer kumemi, midoujer kumemi, maka kenememi kulum̃arauo novo tai, numitu nubiniua bogokouo nalo, maka kunuememi novo nalo ka nuvituaio, <sup>12</sup> a numitu numeul ea iũaauano na jumememi ga. Tomu nalo amiolua kumemi, ana numilivu kalo ga. Nalo amila bulag kumemi, mia numituvan ga. <sup>13</sup> Nalo amil bova ea siememi, ana numila von ka nuvila bilbilu rivu vijalo ga. Numila bo jibe na, mia nalo amila kumemi jibe niamiamo tai ga na yetemeriba nei. Be riano, binimej bokar vonganei nalo amial kumemi jibe kurano ga.

#### *Pol bika ka nalo aue jaano*

<sup>14</sup> Bo ga, maka never iliano nalo na ka rila kamiu kuvimou, bior kumitibe ka keneriku nalo, napano tinieku jii kamiu laka, ana nojidom neverloglog vatitig kamiu.

<sup>15</sup> Nemijikia ka tomu na tortoru nalo miroano napano abitikar kamiu a amijai kenemiu mon-eano ea Kristo, ana bo tiniemiu maio ka kiniou takurano ga jibe karamemiu. Kiniou nebe moti na nomidu Kristo kiano Ioluano Vou binimej ea kamiu, ana kiniou nojibe karamemiu ea kenemiu meuliano bija naio.

<sup>16</sup> Jibe na, nemialio memedu ka noil van kamiu, nejikili ka kamiu ka kuvila von kuvue jaaku kija beamu.

<sup>17</sup> Jidomiano na naruei mila nojidom noiila Timoti riviedu ea kamiu. Nemial jibe Tubo juvan naio ban kiniou jibe keneriku tai ga, bior napano naio biekouo julaka ea inĉauano nalo a tinieku jii naio laka. Naruei bogo napano mia naio rimaluvo kean kamiu, nojidom ka naio rila kamiu kuvisidomii vatitig bereio kiaku bajago nalo na nemiel najakisor Kristo, jibe napano nojo neberloglog ka tomu nalo ea taara na nalotvano nalo napano nojo nejeliviv ealo.

<sup>18</sup> Kiniou nemijikia ka bogo napano kumial ka maka bunu namaluvo kean kamiu, kamiu teaload amila von ka adulo atu mave ruei.

<sup>19</sup> Mia bo ga, bior napano ver Tubo rijamo ka van kiniou, mia namaluvo kean kamiu vesiou re. Ea bogo na naruei, mia maka nosidom nojog nalo na kialo iliano, ana mia nojidom neial ka kialo moroano ka ala inĉauano jikili jumĉabe.

<sup>20</sup> Nina bior napano toro kiano iliano maka ve titai ea Atua kiano navenatuboiano, mia Niununo kiano moroano naruei naio be vite na toru.

<sup>21</sup> Bo ga, nojidom ka kamiu kuvisidomii vatitig beamu, ver bogo napano namaluvo kean kamiu, mia tumĉabe? Ver kuvisidom, nemijikia neviedu vija iliano kouo nalo na baravoiano van kamiu, mia bo ka kuvidu kenemiu jidomiano totano beamu vo, naruei mia nemijikia

neviedu vija iliano na melokloko nalo ga, ea bajago na tinietiiano.

## 5

### *Bajago va ea taara na nalotvano*

<sup>1</sup> Iliano binimej bokar tilinieku ber vite tai jo iviso ka kamiu napano kiriniagiago laka. Nalo aber kamiu tai, karamĉano ba joro ka tira dolu tai, ana iorou, toro na bina ka karamĉano koano tira neibano binimej jo bijaio. Be riano na, tomu na melijokouo maka ajikia ala bajago na, mia jumĉabe kamiu namoneano nalo tai jomĉa milαιο?

<sup>2</sup> Kamiu namoneano nalo kumitu kumidular kamiu, kuber kumitu kumimĉau bo, mia jumĉabe kumitu kumituvan bajago na jibe na jo ba iviso kean kamiu? Bo ka kuvijog rivova ka vite nei, a bo ka kuvukular toro na den kenemiu taara na nalotvano.

<sup>3</sup> Ee, be riano napano vonganei kiniou nojo ea vio nei koalabo den kamiu, ana ea niunuku nomijog jibe nojo bija kamiu ga. Jibe na, ea Tubo Yesu siano, noberial toro na kiano tibureiano tai jibe napano nojo nejikili noju ea miremiu.

<sup>4</sup> Jibe na, bogo napano kamiu kubinimej vio takurano bereio, monoka kuvitii ka jibe niunuku jo bija kamiu, a monoka kuvijikia ka Tubo Yesu bunu jo bija kiano moroano, <sup>5</sup> naruei monoka kuvukular toro na den taara na nalotvano. Naio monoka taluvo bereio, rivan bereio ea yetemeriba ea Simĉaro jumĉano, ana bo ka bajago na kariano nalo na yetemeriba ala naio rijog rivova rivano-o, pĉeli iorou mia naio rimej bereio, ka Tubo saaro ka rilarrur niununo ea bogoti na maaro.

<sup>6</sup> Bilbilu nalo, maka rivu napano kumitu kube mĉarou laka ka kamiu, kuber kumeravo, bior napano ni-amiamo nei jo keano vo ea kamiu. Kamiu kumijikia ruei ka isi telisu ga, mia mijikia rila joko nonovio nalo riyuku.

<sup>7</sup> Tibe na, bo ka kuvar bulag isi na bova nei napano jua kamiu, ka kamiu nonovio kumijikia kumei kumeravo vatitig bereio. Kito monoka rosidomii jibe ka ga napano kulo moruo nalo aju amila sida ka nunu kenerinio ka avar bulag kialo kariano, vonganei Kristo binimeĩ m̃aro ea m̃akolkolo ka kiado kariano, ana maka rivu ka niamiamo toa kito kia ga vo.

<sup>8</sup> Ana bogo napano kulo moruo nalo amila sida kario, be jokoluolu nene, ana kito bunu namoneano nalo be kiado jokoluolu. Mia maka rivu rotua jokoluolu na, resen joko tai napano isi moruo tai joaio. Iliano nei berii bova ka kariano bija bajago va na meuliano moruo aju kea ea kito, bior joomo ea meuliano na taara na nalotuoano, vite nonovio monoka rimeravo rivu, rive riano rivu, a ve lu rivu.

<sup>9</sup> Kiaku iliano tai ban kamiu jibe nei ruei. Ea m̃esi dolu na napano nebitauia biedu ban kamiu nua, neberial ban kamiu monoka kuvitu re vio takurano vija tomu nalo napano aju amila bajago va, ðeli aju aburovuro janea vio ka tire nalo.

<sup>10</sup> Ana ðeli kamiu tealó kumijog belea kiaku iliano nei, bior maka never tivelinio na tomu nalo napano maka amonea. Ea nalo, miroano aju amila siakaiano, miroano abe buruviti, miroano abe navinauano, a miroano aju amilotu ka kialo tavoru nalo, mia ver rosidom ka rotu laka kalo, ðeli monoka rotuvan yetemeriba nei ga, bior napano kito nonovio roju yetemeriba, a roju robiviuo tomu ðiliðili nalo na jibe nei bogo nonovio.

<sup>11</sup> Maka notuko vio ka nina, napano roju robiviuo tomu ðiliðili nalo jibe nei ea kiado ieliano nalo, mia venia napano nojidom neveriio, nojidom never ka ver toro tai to napano river ka naio be namoneano riano tai, mia kuvialio napano ea kiano meuliano naio jo mila siakaiano, ðeli jo be buruviti julaka, ðeli jo milotu ka tavoru nalo, ðeli jo

mioluolu, ðeli jo munu uei, ðeli jo bina. Toro na jibe na naruei mia kuvila vite tai re leleio vija naio, kuvan re vaataro kanio, kuvisinan re vijaio.

<sup>12</sup> Tibe na, ea tivelinio na nalo napano aju tavio ea taara na nalotuoano, maka ve kiado ka rotibure kialo meuliano nalo, mia ea tivelinio na nalo napano aju joomo ea taara na nalotuoano, monoka rovitii vatitiglo. Ver tealó aju amila kariano na kirivova jibe napano neberii, monoka rotiburelo, a monoka rala vite tai kalo.

<sup>13</sup> Atua ga mia tibure nalo napano maka atu joomo ea taara na nalotuoano lu,

*mia ea tivelinio na toro na napano jo mila bajago va iviso kean kamiu, kamiu ga naruei monoka kuvukular naio rivano.*  
*Tiut 17:7*

## 6

*Bajago novo ka ala vatitig baravoiano*

<sup>1</sup> Kiniou nomijog bunu aber bogo tai, kuruado tai ea taara na nalotuoano naio mila baravo bija dolu tai, naruei naio jumolu buru dolu napano na ban ea komeli na toru ka ail vanio. Kiniou nemial ka vite na maka rimemedu leleio, bior napano maka rivu ka tomu nalo napano amonea Atua ava asikil atua mirano tomu na tortoru nalo napano maka amonea Atua, ka tomu na tortoru nene atiburelo.

<sup>2</sup> Bogo napano namoneano nalo be kialo baravo, bo ka namoneano dolu nalo ga ala vatitigio, bior napano monoka rosidomii ka kito namoneano nalo naruei napano mia rotibure tomu nalo na yetemeriba ea legiano na maaro. Ana ver kito na naruei napano mia rala im̃auano ve toru tibe nei, ðeli mia kamiu kubare ka kuvila vatitig kene-miu baravoiano na tertelisu nalo ea kamiu bereio.

<sup>3</sup> Mia Atua jii kito roju ka rotibure agelo nalo na tiniabene, ana bogo

napano namoneano nalo dolu amil bior vite nalo na yetemeriba nei, jumabe? Kamiu kumial ka jikili laka, maka kuvijikia kuvila vatitigio?

<sup>4</sup> Makanio, monoka kuvilaio na. Ver makanio, p̃eli kamiu kuber p̃eli bo kamiu namoneano nalo kubar kenemiu iliano nalo jua tomu dolu jumalo napano maka atu amei ea taara na nalotuanano?

<sup>5</sup> Kiniou nemil jikili kija jibe na bior napano nojidom nala kamiu kuvimou kija! Ee, nomiilo laka ka nemialio ka jibe napano maka lele kamiu tai napano be masou, napano mijikia rila vatitig kenemiu baravoiano nalo na.

<sup>6</sup> Peli nina naruei mila kuruado tai ea taara na nalotuanano jumolu buru dolu nene ban ea komeli, naruei jo berial kiano vovaiano nalo ea mirano tomu na tortoru nalo na komeli na, napano maka amonea Atua?

<sup>7</sup> Kiniou nojo nemil ban kamiu jibe nei ea tivelinio na m̃arabo napano monoka kuvitakio ka kuvila vatitig baravoiano nalo napano aju iviso kean kamiu, mia bo lie bunu ver maka bunu baravoiano nalo na tu. Baravoiano nalo na ju jibe na, berenio ka Sim̃aro jo jovulu kamiu ruei. Peli maka kuvijikia vo, ka ver kuruado tai mila bova banso, p̃eli bina ka kiamo titai, kotovonio re, kotuvan ga, bior kiano kariano na ga.

<sup>8</sup> Ana ver kotumolu kojidom kovuru toro na ea komeli labo ka adu vironiano vanio, jau naruei jau bunu koje komila bova bereio ban kuruamo.

<sup>9</sup> Monoka kuvisidomii ka nalo napano kialo meuliano maka rimemedu, mia maka ajikia aial Atua kiano navenatuboiano riyotuba keanlo. Maka rivu ka kuvila von tibe na napano maka kuvijikia vite na kiana vo, bior kumijikia ruei ka Atua maka saaro leleio ka nalo napano aju amiel vuru ninio vio, p̃eli nalo napano amilotu ka atua

sibisibi nalo, p̃eli nalo napano amila siakaiano, p̃eli nalo napano aju aṗilvili ka mokotenalo, p̃eli sum̃ano napano ju bano bija sum̃ano bereio, p̃eli tira napano ju bano bija tira bereio <sup>10</sup> p̃eli nalo napano abina ga, p̃eli nalo napano maka atu atan ka vite rivan toro dolu, p̃eli nalo napano aju amunu uei, p̃eli nalo napano aju amioluolu, p̃eli nalo napano aju amiñau kotkoti.

<sup>11</sup> Riano ga, beamu na kamiu tealo ajibe na ruei, mia siva toru napano Niununo Lu jekon kamiu kumeravo, mila kube lu, a kiado Tubo Yesu Kristo mila kito romemedu vatitig bereio ea Atua mirano.

### *Mokotenado monoka rimeravo vatitig*

<sup>12</sup> Kiniou neberial bajago va nalo na, napano maka rivu ka ralaio, mia tomu tealo maka asidom ajikiaio. Nalo aber jibe nei, aberinavo “Ee, kiaku meuliano nei, kiniou nemijikia nala venia napano kiniou nojidom nalaio.”

Mia neverdoṗelo, never “Ee, p̃eli kiamo meuliano, mia kovitikario, bior vite telabo napano kojidom kalaio, nalo amijikia ala kiamo meuliano rivova laka. Mia vite telabo napano kojidom ka atua kiamo meuliano, kober mia komijikia kotelan vuu liliglo, mia maka leleio, mia koial napano vite nalo na naruei mia atelan vuu lilig kiamo meuliano bereio.”

<sup>13</sup> Tealo bereio napano ajidom ka ala venia napano ajidom ea mokotenalo, aju aber iliano dolu tai, aber “Sinaniano, naio be tena maboku, a maboku, naio be tena sinaniano.”

Ee, be riano, mia kuvitigar vatitig bereio, bior napano mia Atua rila tenalo juo nei riva rivakovio navo. Jibe na, Tubo jian mokotenado ban kito, ana kito monoka resian mokotenado rivan bereio van naio. Mokotenado tena rim̃auka kiano im̃auano, mia maka ve tena rivan tanea ninio vio.

<sup>14</sup> Ver kito rojamo ka mokotenado rila iñauano novo nalo ga, mia ea bogoti na maaro Atua mijikia vitirilar mokotenado bereio, jibe napano naio bitirilar Tubo Yesu mokotenano garuei, ea kiano buruñara moroano.

<sup>15</sup> Kito monoka tiniedo maio kanio ka mokotenado nalo ajibe niati nalo na Kristo mokotenano. Ana jumabe, bo ka niati na Kristo mokotenano tai riva riasol vija tira tai na m̄arabo bereio? Maka rijikia tibe na leleio!

<sup>16</sup> Iliano Lu berenio jibe nei, ber “Mia suñano a tira, abe juo abinimei takurano,” ana suñano napano ban bija tira na m̄arabo, mila napano mokotenano binimei takurano bija tira nei mokotenano.

<sup>17</sup> Maka rivu ka toro tai rila tibe na, mia monoka roiasol kito vija Tubo, napano niunudo binimei takurano bija niununo.

<sup>18</sup> Monoka rovitikar vatitig ka kariano va nalo napano tomu nalo amijikia ala vija mokotenalo, ea tivelinio na suñano bija tira. Kariano dolu nalo napano ajum̄a ami-laio, aju amila bova ban toro dolu mokotenano, ana toro napano mila kariano bija tira, jo mila bova ban mokotenano naio takurano bereio.

<sup>19</sup> Kito tiniedo bobogia re, mokotenado jibe yimo lu tai na volkouano napano bujolou ka Niununo Lu napano Atua midu ju joomo ea kito. Mia mokotenado na, maka ve kiado, <sup>20</sup> mia be Atua kiano, bior napano naio bulular kiado meuliano ruei ea Yesu kiano m̄ariano. Jibe na, monoka roim̄au vija mokotenado ka rala ga vite nalo napano atum̄a adular siano.

## 7

### *Soriano*

<sup>1</sup> Bo ga, vonganei mia neverial jidomiano tealó ea nina napano kamiu kubika den kiniou ea tivelinio na soriano, ber bo ka rosoro, p̄eli bo ka rotu ga tibe na? Bo ga, mia never tibe nei. Verver toro

6:19 1Kor 3:16; 2Kor 6:16

tai jo jidom ka soro re, nina bo ga na, maka ve titai.

<sup>2</sup> Mia bior napano romial ka juku-jukuano jikili, a siakiano telabo, p̄eli bo lie ver tomu nonovio nalo ave koalo nalo.

<sup>3</sup> Jibe na, bogo napano suñano jidom riva vaataro ka koano tira, koano tira monoka saaro kanio, a bogo napano tira jidom riva vaataro ka koano suñano, koano suñano monoka saaro kanio.

<sup>4</sup> Tira napano joro maka jikia river mokotenano be kanano naio takurano, mia koano suñano mijikia river be kiano bunu. Mia suñano napano joro maka rijikia rivere mokotenano be kanano naio takurano, mia koano tira mijikia river be kiano bunu.

<sup>5</sup> Jibe na, tai monoka tukovio re ka dolu rimei re vaataro kanio.

Ee, p̄eli bogo tai ave juo averiio, ajamo ka mia atuvanlo, abe juo maka amon vio takurano ea bogo ve telisu, ka rila amijikia abolkouo sikili rivior vite tai beamu, a nina naio bo ga. Mia iorou, ave juo monoka asaaro ka amei vio takurano bereio, bior napano ver makanio, p̄eli Sim̄aro bitilubar napano tai melukluku, maka bunu rijikia rivokar naio, ana mila mijoru ea jukujukuano ea vio tai.

<sup>6</sup> Vite nalo na napano nojo nebrenio, maka never tibe tuboiano tai na jikili, ka tomu nalo monoka asoro, p̄eli monoka asoro re, mia nejian von jidomiano tealó ka ijaiano ga.

<sup>7</sup> Ver tomu nonovio amijikia atu tibe kiniou, napano maka nosoro, nojo jibe na ga, p̄eli mia bo mia bo, mia nemijikia ka tena joa ga jidomiano napano Atua jian ban kito tarakurano.

<sup>8</sup> Nojidom never iliano tai van nalo napano aju ga jibe na, jibe nalo napano maka asoro vo, bija taanou nalo. Kiniou nemial jibe ver kamiu kumijikia kuvitu tibe na ga, jibe napano kiniou bunu nojo nomilaio, mia rivu mia rivu. <sup>9</sup> Ana ver tealó

aialio aver makanio, mia sikili laka ka nalo ka avokarlo tulaka tibe na bogo nonovio, mia bo ga na, bo lie ka aleal tai napano amijikia asoro kanio. Maka rivu ka jukujukuano to serlo rivano-o atu ajog rivoa tulaka.

<sup>10</sup> Iliano dolu tai napano nojidom neverenio, naio rivan ea nalo napano ajoro rui, napano maka kaku jidomiano tai ga, mia iliano tai napano Tubo jian jibe iliano tai na jikili ban kito. Naio ber jibe nei, ber tira monoka rivuro den re koano sumano. <sup>11</sup> A ver bogo tai tira tai juvan koano sumano, jaluvo denio bereio, naio monoka rivan re soro bereio, mia monoka to ga tibe na. A ver p̄eli, bo ka naio vija koano sumano ave juo ala merevuiano vanlo, atu vio takurano bereio. Mia sumano nalo bunu, monoka ajil bulag re koalo tira nalo.

<sup>12</sup> Bo ga, mia neverial vite dolu nalo tai. Nalo maka atibe ka Tubo kiano tuboiano tai, mia nalo ajibe kaku jidomiano tealo ka rijai kamiu.

Vite na beamu, nina ea tivelinio na napano toro tai bija tira tai, naljuo ajoro, ana toro neibano naio monea Yesu mia koano tira naio maka rimoneaio. Mia ver tira nei jaaro ga ka nalo ve juo atu vio takurano, maka rivu ka toro neibano sidomii ka rivukular koano tira nei. <sup>13</sup> Mia bare ka bunu ver toro tai bija tira tai, naljuo ajoro, ana tira neibano monea Yesu mia koano sumano maka rimoneaio. Verver sumano neibano jaaro ga ka nalo ve juo atu vio takurano, maka rivu ka tira neibano sidomii ka rivukular koano sumano neibano. <sup>14</sup> Nina bior napano naljuo tai napano monea naio mijikia rila vite novo tai ea napano maka rimoneaio, a bajago novo nei mijikia rila kialo soriano ave juo rimej rivu laka tibe tomu juo kialo soriano napano nalo abe juo amoneaio. A bunu, naljuo tai kialo napano monea naio mijikia rila vite novo tai ea kenerilo abe juo, bior napano naio mijikia ridu vatitig kenerilo ave juo atu ea m̄arabo na

meuliano lu, nalo ailuo joomo ea taara novo tai tibe kiritete dolu nalo napano karamalo bija kenielo nalo abe juo amonea. <sup>15</sup> Mia ea tivelinio na naljuo nei napano tai monmonea mia tinene maka monmonea, ver naio napano maka monmonea jidom tuvan koano napano monmonea, kito namoneano dolu nalo monoka rojamo ka tibe na ga. Ver napano maka monmonea maka bunu sidom napano monmonea, maka rojikia rola von ka royuku napano monmonea ka to vija koano neibano napano juvan naio, bior napano Atua jidom ka rotua meuliano tai napano bujo bija bajago na tumaro.

<sup>16</sup> Jau tira napano komonmonea, p̄eli jau sumano napano komonmonea, p̄eli kojidomii kober jau komijikia kotuvulu koamo napano maka monmonea, mia makanio, jau maka kojikia vatitig ka mia tumabe, bior p̄eli jau maka kojikia kotuvulu naio leleio.

*Kito monoka rotu rimaro vatitig ea meuliano napano Atua midu rojuo*

<sup>17</sup> Mia venia ga napano monoka rolaio, kito nonovio monoka rotii vatitig kiado meuliano veve terakurano to rivu ea vio na napano Tubo jii kito rojua eaio rui, p̄eli monoka rotu roieliel ga ea m̄arabo napano Atua bio kito ka roiel eaio. Nina naruei be iliano tai napano nojo nojii ea kiado yimo lu nalo. <sup>18</sup> Iliano nei nioti nene ber vio vabe kojua beamu komonea, monoka kosaaro ka kotoa kea ga bogo napano komonmonea. Tibe na, verver tealo abe Ju, a aju ajakii kialo bajago moruo nalo, jibe pakuveu p̄eli venia bereio, naio bo ga, kiniou maka never ka bogo napano amonmonea nalo monoka ajulu bajago moruo nalo napano aju ajakii. Mia be verare bunu ka nalo napano maka ave Ju, napano maka ala pakuveu a nalo aju ajakii kialo bajago

moruo dolu nalo. Ea tivelinio na nalo bunu maka never ka bogo napano nalo amonmonea nalo monoka ajulu kialo bajago moruo nalo nei. <sup>19</sup> Toro jakii bajago moruo venia, jibe abe pakuveu ĩeli maka ave pakuveu, naio maka ve tena toru tai ea Atua kiano vitiiano, mia Atua jidom ga ka rotakii kiano tuboiano nalo. <sup>20</sup> Nina naruei neber ka bogo na jau komonmonea, jau kotormaro ga ea vio nei napano kojoaio bogo na maka komonmonea vo. <sup>21</sup> Jibe, ver beamu jau kojo komiĵau kurano toro tai kiano, karina komonmonea, nina bogo na, monoka kosaaro ka koto koiĵau kurano tibe na ga. Mia be riano, ver bogo tai koleal ka be kiamo bogo ka kotaluvo den iĵauano kurano nei, nina bunu bo ka kobisi kanio. <sup>22</sup> Verver jau komiĵau kurano ea toro tai, monoka kosidomkar ka bogo napano Tubo bioso, naio miiĵa larso jiiso vatitig joomo ea kiano mĵaratavo memedu. Mia ea tivelinio dolu nene, ver maka koiĵau kurano toro tai kiano, jau kojo vatitig jibe na ga, jau bunu monoka tiniemo maio ka bogo napano Kristo bioso, monoka komei tibe kiano toro tai na miĵau kurano, kala nonovio kiano iĵauano. <sup>23</sup> Nina bior napano Kristo bulu bulag kito ka vite toru tai, jibe kiano burukija, ka kito rove kiano, ana monoka rovitilubarario ka memedu ka roinĵau kiano kurano ga, maka rivu ka roinĵau kurano toro dolu kiano ĩeli roju yetano ka toro dolu kiano jidomiano napano romiĵau kiano.

<sup>24</sup> Naina naruei bilbilu nalo, vio napano jau kojoa bogo napano maka kojikia Atua vo, vio na naruei mia monoka kotoaio kia ga, mia vonganei napano jau komonmonea naruei, mia Atua jo bogo nonovio bijaso bunu ea vio na.

*Vikadeniano ea tivelinio na nalo napano maka asoro vo, vija taanou nalo*

<sup>25</sup> Bo ga, kiniou nojidom nesian iliano ve telisu van kamiu ea tivelinio

na nalo napano maka asoro vo. Iliano nene, maka nejikia never ka naio be Tubo kiano tuboiano tai napano naio ber ka kiniou, mia iliano nene jibe kiaku jidomiano tai ga. Mia kamiu kumijikia ruei ka Tubo mijukubo ban kiniou, ĵian masouano nalo ban kiniou napano kumijikia kubalea vatitigio eaio, mia bo ka kuvisidomii ve temi ea kiaku iliano nalo nei.

<sup>26</sup> Vonganei, kito roĵua bogo va tai napano roju robiniua laka vite kouo eaio, mia bo ka never bereio iliano nei napano kiniou nober beamu mave, nober bo ka kito rotu riĵaro ga ea meuliano vaio napano roĵuaio ruei. <sup>27</sup> Tibe na, ver jau toro tai napano koĵoro ruei bija tira tai, jau koto riĵaro tibe na, kosidomii re ka kotuvanio. Verver jau toro tai napano maka ve koamo vo, jau bunu koto riĵaro tibe na ga, kosidomii re ka kosoro ka tai.

<sup>28</sup> Mia verver kosidomiiio kober makanio, kojidom mĵlea ka kosoro vija tira tai, maka nover bova, a verver tira mĵeaku tai soro vija toro tai, nina bunu maka tibe kiano kariano tai, nina bo ga na. Mia nalo napano ajidom ka asoro, nalo monoka avitilubar ka mia kialo meuliano maka melumu, mia nalo aviniua bogokouo ve telabo ea yetemeriba nei, a verver kotakii kiaku iliano, ka kosoro re, mia nasaaro laka.

<sup>29</sup> Bilbilu nalo, kiniou neber jibe nei bior napano bogo bulati ga ju ka Tubo rimeĵ bereio, mia maka tomu ve telabo ka ala kiano iĵauano. Tibe na, bo lie verver tomu nalo napano abe koalo nalo ala tibe maka asoro, mia nalo amijikia ala Tubo kiano iĵauano ve telabo. <sup>30</sup> A bunu, nalo napano aĵu aĵegi bior vite tai, bo ka nalo tinielo bobogia vite nene napano nalo aĵu aĵegio, a nalo napano aĵu amijog bo ea jogvuiano na yetemeriba, bo ka asidomiiio re bunu. Nalo bunu napano aĵu amiiĵau bior veru, bo ka nalo ala napano ĵuĵalo beteauo ga. <sup>31</sup> Nalo napano amila iĵauano dolu na yetemeriba nei, bo ka nalo ala

tibe napano maka ve kialo vite nalo toaio, bior napano yetemeriba nei bija kiano vite nonovio nalo jo ban ka rivakovio garuei.

<sup>32</sup> Kiniou neber iliano nalo nei ka kamiu bior napano nojo nojidomii laka ka kamiu, maka nosidom ka vite ve telabo napano kenemiu jidomiano jo jidom laka kanio bogo nonovio. Toro napano maka ve koano, naio mijikia sidomii ve temi ea Tubo kiano iñauano bogo nonovio ga, ber mia naio rimñauka tumñabe napano mia Tubo risaaro kanio. <sup>33</sup> Mia toro napano be koano, naio jo jidomii ka vite nalo na yetemeriba, ka monoka rila tibe venia napano mia koano saaro kanio, <sup>34</sup> a mijikia rila ka kiano jidomiano beveve juo. Mia tira mñeaku ðeli tira kulovu napano maka ve koano, naio bunu kiano jidomiano mijikia sikili vatitig ka rila Tubo kiano iñauano nalo, a kiano ieliano bija kiano meuliano mijikia ve lu vatitigio laka. Mia tira napano be koano, kiano jidomiano monoka toa iñauano nalo na yetemeriba nei, tibe napano monoka rimñauka vite nalo na rila koano rijogio rivu.

<sup>35</sup> Kiaku iliano nalo nei, maka nosidom notuko vio ka kamiu ka vite ninio napano kamiu kumisidom kuvilaio, mia neber ka rila von ka rijai kenemiu meuliano. Nojidom ga ka vite nonovio na lotuano riva rivu, a nojidom ka kito namoneano nalo ravan re tanea vio, mia rovitii ga Tubo naio ve takurano.

<sup>36</sup> Kito tealó amila napano amila ko koalo tai, mia nalo aber ðeli bo ka nalo atu vesiou tibe na ga beamu, nalo maka asidomii ka asoro bior napano ajidom ala Tubo kiano iñauano. Mia ver tai rial ka jo jidomii laka ka tira nei napano aberkoio be kiano, a jidom laka kanio banbano-o maka rijikia rivakar naio, nina bo kanio ga ka ala naljuo asoro. Nina bo ga na, naio maka ve kariano tai leleio. <sup>37</sup> Mia ver tai rila kiano jidomiano rivu napano jikili ka naio jidom ka naio

vija tira neibano aberkoio ka naio, ka nalo ve juo atu tibe na ga beamu, a ver naio bitilubar ka naio mijikia vokar vatitig naio, nina naio mila bo laka ver naio maka soro vija koano nei. <sup>38</sup> Jibe na, naio napano joro von ka koano nei napano aberkoio ka naio, naio mila vite novo tai, mia nina napano jo jibe na, maka rila soriano vija tira nei napano aberkoio ka naio, naio mila bo lie mia bo laka. <sup>39</sup> Ea tivelinio na nalo napano ajoro ruei, nalo monoka atuvanlo re. Tira napano joro ruei monoka to rivu vija koano suñano napano koano nene meul jo kia ga. Mia verver toro neibano rimñaro, tira neibano mijikia soro bereio, a naio mijikia soro ka toro kei napano jidomio, mia monoka tai napano monmonea bunu Tubo. <sup>40</sup> Jibe napano neber, naio mijikia soro, mia nemial jibe mia bo lie ka naio ðeli mia kiano saariano ve toru lie ver naio soro re bereio ga. Nina be kiaku jidomiano ga, mia neber ðeli Atua kiano Niununo naruei jian jidomiano masosouano nalo nene ban kiniou, ana bo ka kamiu kuvisidomii vatitig kanio.

## 8

*Juñabe ka sunbue nalo napano amue ka ala lotuano van tavoru nalo?*

<sup>1</sup> Vonganei kiniou nojidom neverdoþe kenemiu vikadeniano ea tivelinio na sunbue nalo napano tomu nalo na maka amonmonea amila sida kanio ban kialo tavoru nalo. Kamiu kumitu kubika kuber bo ka kito namoneano nalo rosen sunbue nalo na, ðeli na makanio.

Bo ga, mia kiaku verdoþeiano beriio tenalo juo nei, bajago na jikiaiano, a bajago na tinietiano. Ea tivelinio na jikiaiano, tomu telabo napano aberenio aber amijikia vatitig verdoþeiano na kenemiu vikadeniano nei, a nalo amijikia avarvar kalo kija napano ajidomii aber nalo amijikia vite. Bajago na jikiaiano mijikia rila toro ridu kiano

jidomiano to mave, mia bajago na tinietiano maka tibe na, naio jo miija vatitig toro kiano meuliano ga.

<sup>2</sup> Toro napano jidomii laka ber naio bokar bajago novo na jikiaiano, naio maka rijikia vatitig Atua vo jibe napano naio bo ka rijikiaio.

<sup>3</sup> A toro napano bokar vatitig bajago na tinietiano, nina naruei napano Atua bitilubar vatitig naio.

<sup>4</sup> Bo ga, nina naruei kiaku iliano juo bereio ea tivelinio na sunbue nalo napano amila sida kanio ban tavoru nalo. Nana be moti ber jibe nei, ber kito romijikia vatitig ka tavoru nalo na abe toto ga, ana maka ave toto ka vite na be riano tai leleio. A juo nene jibe nei, ber kiado Atua naio takurano ga be riano ju. <sup>5</sup> Tomu nalo aju aberii kialo atua dolu nalo ĩeli kialo tubo dolu nalo, aberinavo ajua tiniabene ĩeli ea yetemeriba nei, a nalo aju aberiilo jibe nalo miroano aju, <sup>6</sup> mia ea kito, romijikia vatitig ka Atua takurano ga jo. Nina naruei Atua karamado, napano naio be burupati ka vite nonovio, napano kito robe kiano. A Tubo takurano ga ju, nina naruei Yesu Kristo, napano naio jii vite nonovio, napano kito romeul eai.

<sup>7</sup> Nina naruei jikiaiano novo napano kito miroano namoneano nalo robokario ruei, mia titai bova, kito tealoka ajikia vatitig vite nalo nei vo. Nalo nene, beamu laka nalo bunu aju amilotu ka tavoru nalo, ana binimej bokar banei, jikili kanilo ka avitilubar ka nina be vite na sibiano ga. Jibe na, bogo napano tomu nalo aborosebi bija sunbue nalo napano amila ruei sida kanio ka tavoru nalo, kito romijikia rosenio tibe napano maka ve titai ga, mia kito dolu nalo neibano, bogo na asenio, ajenio bija jidomiano ka sunbue nei be tena tavoru nalo, ana kar niabelo ĩili kanio bereio, amijog jibe amila vite tai napano maka rimemedu ea Atua mirano.

<sup>8</sup> Mia monoka rojikia ka sinaniano maka ve vite tai napano mijikia rila

Atua rial ka robo ĩeli robova. Ver rosen re sunbue na, maka river ka robo ea kiano vitiano, ĩeli ver rosenio, maka river ka robova.

<sup>9</sup> Joa ga kito ka rojedom rosenio ĩelina maka rosidom rosenio, mia maka rivu rala vite tai napano namoneano dolu asidomii aver maka rimemedu ka alaio. Peli kito romijikia rala vite na rivu ga, mia maka rivu ka naio rialio napano romilaio, ana rila bulag kiano jidomiano.

<sup>10</sup> Jibe tivelinio na sunbue nalo neibano, ĩeli ea kiamo jidomiano, komialio ka bo ga ka asenio, ana jau komijikia kala tibe maka ve titai. Mia ver bogo tai koto vija tomu nalo napano abolkouo ka tavoru nalo, a nalo asian sunbue vanso a jau kosenio vijalo, mia tumabe ver namoneano dolu tai rialso. Peli naio tai napano berkar ka naio bel ka sunbue nalo nene, mia bogo napano mialso ka kojo kejenio, mia naio riverenio "E, toro na be taara na nalotvano nalo tai napano mijikia vatitig vite, mia naio jo jen sunbue nalo na ga. Tibe na, bo ka kiniou bunu nosenio." Mia ber jibe na, mila naio bunu jenio mia iorou mia mijikia rijog rivova laka bior napano ber ĩeli naio mila burumara kariano tai.

<sup>11</sup> Nina berenio ka jau kojo kojakii kiamo jikiaiano novo, kobitilubarika komijikia kala vite na. Mia monoka tiniemo maio ka toro dolu na, napano naio be kuruamo tai napano Kristo mvaro ka rilarur kiano meuliano, bior naio merou laka ka rilaio. Tibe na, ver naio rial napano bogo tai komilaio, mia mijikia rila ka napano komila bulag kiano viekouoiano novo.

<sup>12</sup> Ver tibe na, mia Atua rialso tibe jau naruei komila kariano ea kuruamo nene, bior napano komila naio mila vite tai napano ea kiano jidomiano kirivova ka rilaio. Nina naio bova, jibe ka napano jau komila kariano ea ga Kristo.

<sup>13</sup> Bior vite nei, nomila kiaku jidomiano tai, ka ver kiaku bajago

ka nosen sunbue nene naio be titai napano mila bulag kuruaku kiano viekouoiano, mia notuvanio ga. Mia notokolio re bunu, bior napano maka nosidom ka mia nola kuruaku rijoru.

## 9

### *Pol berii kiano bajago na iñauano*

<sup>1</sup> Bilbilu nalo, nojidom never ka kami ka kiniou maka noto yetano ka toro dolu kiano jidomiano, mia nojo nomimāu jakii venia napano nemijikia ka memedu ka nalaio. Kiniou atevi tai napano nomial Yesu Kristo kiado Tubo ka miraku, a kami naruei ajibe mārati na kiano iñauano napano nomilaio.

<sup>2</sup> Nemijikia ka tomu tealo maka asidom avitilubar kiniou ka nebe atevi tai, mia kami maka kuvitibe na. Vonganei, kenemiu meuliano ju vatitig bija Tubo ruei, mia vite na mila kami kubitilubar ka nomimāu ea kami jibe kiano atevi riano tai.

<sup>3</sup> Mia ea nalo napano ajidom atibure kiniou ka nemila bova jibe na jibe na, kiaku verdopeiano nalo aju.

<sup>4</sup> Nemijikia ka nalo aberenio ka aju abitkar kumemi bano-o tinielo m̄aro, mia jum̄abe? Nalo abitkar nalo dolu ruei nua na, ana maka ail tibe na, ana bogo na napano nebinimei, ajikar ka amildie. Peli aber mia ver kumemi nuvidu re sinaniano p̄eli munuiano mia numijikia numeul tibe na ga ka nuvila iñauano ea nalo?

<sup>5</sup> Mia nalo amil ea kumemi tealo napano ajoro ruei, nalo abika aber bior vaio koalo nalo bunu abinimei aju ajakisor kumemi? Mia kei berenio ka nina naio kirivova? Atevi nalo dolu napano abinimei beamu, bija Tubo kuruano nalo, bija Kevas, bogo napano amieliel ka iñauano jibe na, koalo tire nalo aju ajakisorlo, mia ea bogo na, tomu nalo nei maka aildielo.

<sup>6</sup> Mia bereio, nalo ajidom atukovio ka kumemi ka monoka nuvimāu re rivior veru ka nuvulu kenememi

vite nalo. Ver kumemi juo Barnabas nuvimāu re mia bo ga, mia bior vaio na aju aber jibe nei ban kumemi juo ga, mia maka aver ka nalo dolu?

<sup>7</sup> Kuvila von kuvisidomii tomu na mira nalo na venuo tai. Bogo na aba amila mira, mia kei jo bulu kialo vite nalo? Nalo ga abuluio, p̄eli kialo parinio venuo naio bululo?

Mia kuvila von kuvisidomii nalo napano amebija sinaniano ea tiniavio. Verver nalo asinan ea tiniavio nene, maka toro tai napano mia ril vanlo riviorio.

A bunu, jum̄abe ka toro napano jo bagan temeul nalo? Peli naio maka leleio sen sunbue nene nalo?

<sup>8</sup> Kiniou neber vite nalo na ka rila kami kuvitilubar ka toro tai rila iñauano tai, bo kanio nalo napano mimāu kialo nalo monoka avitkar vatitig naio. Mia kiniou neber jibe nei, maka riyotuba ea kiniou kulorinio kiaku jidomiano, mia kiado tuboiano lu naio jo berenio jibe na bunu.

<sup>9</sup> Iliano tai ju joomo ea Mosis kiano tuboiano ruei, napano ber jibe nei, berinavo

*Bogo napano kiamo bue m̄arauo jo miel jelviv mave ea kiamo boboseru nalo, ka vita bulag kurukuti nalo nene, jau monoka koiadikar re niono, mia monoka kotuvan naio sinano kija riel rivano. Tiut 25:4*

Ana bogo napano Atua ber iliano nei, naio maka to tinien maio ka temeul nalo, <sup>10</sup> mia naio jidomii kito napano romimāu, ka nalo napano romimāu kialo, nalo monoka avitkar vatitig kito. Toro napano mimāu ea tano, memedu ka naio sidomii ka bogo tai mia naio sen venia napano jo mebijaio, a toro napano ban ea tiniavio ka rivar sinaniano rimej, memedu ka naio bunu sidomii ka mia ajev ve telisu rivanio.

11 Mia tivelinio na kenememi iñauano ea kamiu, kumemi numebija kurukuti novo ruei ea kenemiu meuliano, mia bo ka kamiu kuvisaaro ka kuvitakar kumemi a kuvitanka vija kumemi ilivuiano nalo tealo napano Atua bario jua jumemiu.

12 Kamiu kumitu kumijja tomu dolu nalo ruei jibe na, mia bo ka kuvisaaro lie ka kuvila ea kumemi napano numila bo laka ka kamiu nua ruei.

Ee, bo ka kuvila tibe na ka kumemi, mia bokario vonganei maka nuvitu nuver leleio van kamiu nuver monoka kuvilaio. Kumemi numerou ka ver nuverialio tibe na, mia kenemiu jidomiano rivova kean kumemi, mia ver p̄eli tukovio ka m̄arabo na Ioluano Vou rimej ea kamiu. Tibe na, kumemi nuvil re bunu, a ver numijog bova ka kamiu maka kuvitakar kumemi, nina bo ga na.

13 Mia bo ka kamiu kuvisidomii bunu ka ea Atua Kunuano Lu, nalo napano amim̄au joomo eaio, bija nasidaiano nalo, aju ajen tenalo nei, a aju ameul ea vite nalo napano tomu nalo aju ajianio jibe jidomiano nalo ban Atua.

14 Mia Tubo berial jibe na ga bunu ea tivelinio na kiano tomu napano aju amioliolu ka Ioluano Vou. Nalo bunu, memedu ka amijikia ameul ea jidomiano nalo napano tomu nalo neibano amijog Ioluano Vou nene aju ajianio.

15 Bo ga, kiniou naruei kiniou tai kalo na jibe na, mia jikar nua binimei maka leleio never ka tomu nalo monoka asian venia rivan kiniou, p̄eli monoka ala tum̄abe ka kiniou. Mia nojo neberii vite nalo nei ea m̄esi nei, maka rivior ka nojidom novika vite tealo den kamiu. Maka nosidom ka kuvitakar von ka kuvisian vite nalo van kiniou, mia kamiu kube m̄arou kuber kamiu naruei kubagan kiniou, mia nojidom ka nomijikia noto nove m̄arou ka Atua ga jo bitikar kiniou bogo nonovio. Bogo napano nemijikia ka

kiaku meuliano joa jum̄ano ga, nojo nomijog bo laka, a verenio naio re napano jo bitikar kiniou, p̄eli mia nojog ka bo ka ga nam̄aro.

16 Neber ka nebe m̄arou ka napano naio bitikar kiniou jibe na bogo napano nojo nomioliolu ka kiano Ioluano Vou, mia ea tivelinio na kiniou, be riano ga na ka maka vite tai leleio napano nemijikia neve m̄arou kano. Maka nejikia nosidomii vevavin ea siaku bereio never kiniou naruei nebe naiolioluanano na Ioluano Vou, bior napano Atua naruei bitirilar kiniou, mia nemial jibe monoka nala ga. Ver bogo tai novuro nala re bunu, mia rivova laka rivan kiniou na.

17 Maka noto nala iñauano na rivior kiaku jidomiano tai ga, maka kiniou ga neber bo ka nala ka Atua saaro ka kinion, p̄eli naio rijikia sian jidomiano van kiniou riviorio. Maka tibe na, mia Atua ga naio berialio, midu joa jum̄aku, mia monoka nomonea, monoka nala tibe na ga.

18 A jibe na, neber p̄eli mia kiniou nodu re jidomiano tai riviorio, mia nina bo ga, bior ka Atua jo mila todolu tai napano jibe vuluiano novo tai ban kiniou ruei. Vite na, naio be burum̄ara jogvuiano na nabar bogo napano nojo nomioliolu ka Ioluano Vou ban ea tomu nalo, napano nomila kurano ga jibe na banlo. Peli nemijikia never bo ka ajian vite ban kiniou bior, p̄eli avitakar vatitig kiniou bogo napano nojo nomilaio, mia maka nosidom nina, nojidom napano amijikia avokario tibe na ga, maka ve titai leleio napano tukovio kalo.

*Pol be nakuraniano na tomu nalo jibe naiolioluanano novo tai na Atua kiano*

19 Jidomiano jibe nei naruei joa kiniou, a mila nojo nomim̄au ea bajago tai napano mia nevisivisi vatitigio van kamiu vonganei.

Jibe nei, maka noim̄au toro tai kiano, a maka toro tai napano ve kiaku boru, mia nojo namila kiniou

nebinimej jibe nakuraniano ga na kulo dolu kialo, ka rila nemijikia novokar nalo ve telabo amei amonea.

<sup>20</sup> Ea tivelinio na Ju nalo, nojo namila kiniou nebinimej jibe toro Ju novo tai, ka rila na nemijikia novuru nalo tealo amei.

Ea tivelinio na nalo napano maka ave Ju, mia ajakii Mosis kiano tuboiano, nojo nomila kiniou nebinimej jibe tai napano jakii tuboiano nei bunu. Maka neial ka noto yetano ka tuboiano nene, mia najaaro ka nabamenea tuboiano nene jibe na, ka nomijikia novokar nalo na napano ajidom atu yetano kanio.

<sup>21</sup> Ea tivelinio na nalo dolu napano maka ave Ju, napano maka atakii Mosis kiano tuboiano, nojo nomila kiniou nebe takurano bijalo. Maka never ka nomila kor Atua kiano tuboiano moruo, makanio, mia bogo napano nojo bijalo, nojo najakii Kristo kiano tuboiano vou ka rila ajikia aleal meuliano.

<sup>22</sup> Ea tivelinio na nalo napano nemialo ka maka atu sikili rivu, maka neil sikili vanlo, mia nomila jibe kiniou bunu bijalo, nojo nemijialo, ka ĩeli nemijikia novurulo. Jibe na, nojo najakii ĩarabo nonovio ka nala vite nonovio napano nemijikia nala van tomu nonovio, ka rila rivano-o mia nemijikia nalarur nalo tealo amei amonea Yesu.

<sup>23</sup> Nemila jibe na, maka nala rivior kiniou ga, ĩeli rivior vite dolu ninio, mia nomila bior ga nojidom ka Ioluano Vou monoka rivar ĩarati ea tomu nalo kialo meuliano, a bogo napano neial ilivuiano nalo napano Ioluano Vou rila kalo, nojog rivu mia nojog rivu.

<sup>24</sup> Kuvisidomii von bogo napano tomu na tikitiano aju ajikiti bijalo. Ea bogo na, nalo nonovio monoka ala von ka atuvanono ka atikiti avano, mia ve vio kalo amijikia amei atukamu beamu, atuvulu nalo dolu? Ve takurano ga mijikia rivuku nalo dolu, tikiti riva tuvululo rijej jidomiano riviorio. Mia tibe na, kamiu nonovio monoka kuvisikili ka Tubo

kiano iĩauano, monoka kuvila von ka kuvitikiti kuvan ka kuva kuvijej kenemiu jidomiano.

<sup>25</sup> Tomu na sereiano aju amila von kirisikili, aju amilakakar vatitigio bogo nonovio, a nalo aju abel ka vite nonovio napano ĩeli amijikia ala mokotenalo sikili re vatitig. Nalo aju amila jibe na bior kialo jidomiano jikili ka ajidom atuvulu ka ajev jidomiano. Mia bogo na ajilan maniegieg ea tomu na sereiano nalo nei, bogo bulati ga maniegieg neibano bova bereio, mia maniegieg napano bo ka rola vonio roimĩau sikili ka atilano ea kito, naio naruei jo jobo jo.

<sup>26</sup> Jibe na ga, nojo nomimĩau jibe na naruei ea Tubo kiano iĩauano napano nojo nomilaio. Maka noto netikiti kurano tanea vio, a maka noto nesere ga, <sup>27</sup> mia nojo nobokar kiniou, nojo nojilanvuu vatitig ka mokotenaku bogo nonovio, bior napano bova nojo nomioliolu vatitig ban tomu dolu nalo, neber nalo jibe nei jibe nei, mia iorou kiniou naruei nolaluvu ĩarabo ĩeli maka navare ka nala nonovio vatitig tikitiano napano nojo nejikitio.

## 10

*Nalo napano aber amemedu, amijikia alaluvu ĩarabo, jibe Ju nalo korobilo nalo*

<sup>1</sup> Bilbilu nalo, bo ka kito tiniedo maio ka venia napano korobido nalo amilaio. Nina ea bogo napano tormoruo Mosis burulo ajaluvo den Ijivi, ajakisor melijo na napano jo ban beamu kalo, banbano burulo abarkor burumĩara tei nei napano betavo kalo.

<sup>2</sup> Nalo abiniua bogokouo nalo nene, mia Mosis burulo abar duluio, a nalo abinimej jibe kiano tomu riano.

<sup>3</sup> Yuka miroano aju amiel ea vio yauo, nalo nonovio ajen sinaniano na napano Atua jian banlo, <sup>4</sup> a bogo midoujerlo, Atua mila uei miyotuba ea bulukuveru ga, ka amunuio. Ea

bogo na, jibe napano Kristo ga jo bijalo, jo bitikar vatitiglo ea vite nonovio.

<sup>5</sup> Atua mila bo banlo jibe na banbano, mia maka asidom atu sikili ea naio. Nalo abilig taakalo kanio, naruei naio maka bunu rijamo kalo ava joomo ea vio napano naio berkario banlo, naruei mila amarmaro garuei janea vio ea vio yauo ga.

<sup>6</sup> Mia kito banei, maka rivu ka parido sikili tibe korobido nalo nei, mia ver rosidomii vatitig rivu ka venia na maluvo ealo, romijikia rolakakar vatitig vite eaio.

<sup>7</sup> Tibe na, monoka rodu re vite dolu to tukamu ka Atua ea kiado meuliano, jibe tavoru tai napano romilotu kanio, jibe napano korobido nalo nei amilaio. Iliano tai napano berii kialo bajago ea bogo na, berinavo

*Nalo maka asidomii vite dolu, ajidom ga ala jokoluolu, bija munuiano na torogiano, a asiraragii tira ea voluano, nina ga.* Eks 32:6

<sup>8</sup> Nalo aber ka naina naruei meuliano novo, mia monoka tiniedo bobogia re bogoti nene napano Atua mila maro va nalo abinimei ajer tomu nalo a tire nalo napano amila siakaiano, mia ea bogoti tai ga menu duelimo valuo ba tolu [23,000] kalo amarmaro vaarakurano, jibe kialo vironiano na jikili tai. Jibe na kito monoka rovitikar vatitigio, maka rivu ka kito tealo atu avan tanea vio tibe na.

<sup>9</sup> Toro na be m̄arou, mila kariano jibe na, a beriam̄a bo ga na, naio jo julu m̄lea Tubo. Mia Tubo rila vite tai kanio, mia toro na ritabujo, maro rimei kanio jibe nalo dolu neibano.

<sup>10</sup> Mia maka rivu ka roserm̄ii ka Atua, jibe napano aju amilaio nua, ea korobido nalo kialo bogo. Ea bogo na, Atua miila nailiano tai na verikariano na m̄ariano binimei ealo, muebinivinlo.

<sup>11</sup> Romial napano aju amila kariano jibe na, a romial ka vironiano

nalo amalmaluvo ealo jibe na, naio be vite tai na rilabon kito. Abivitauia bulag tukunuano nene nua beamu, mia romijikia ralakakar vite eaio banei, ea bogo maaro nalo napano rojuaio.

<sup>12</sup> Jibe na, ver toro tai jo jidom veve naio ve takurano kiano meuliano bereio, a beriam̄a naio jo jikili ju kirisikili vatitig ruei, bo ka naio vitikar vatitigio, bior maka rivu ka bogo tai naio rila vite va tai, ana rijoru.

<sup>13</sup> Kumial jukujukuano nalo binimei, mia kumemebiju re laka. Maka kamiu ga napano kubiniua jukujukuano nalo nei, mia aju amaluvo ea tomu nonovio kialo meuliano. Mia kumijikia kuvalea Atua, bior napano mia naio maka rilaso ka koviniua jukujukuano napano maka kovare ka kotuvuluio, mia bogo napano jukujukuano rimei rila vonso, mia naio riverial kiano m̄arabo tai kaso ka kosikili koviniua jukujukuano nalo na, rivano-o kotaluvo den kiano moroano.

<sup>14</sup> Kiaku bilbilu novo nalo, monoka kuan re vaataro leleio ea bajago na napano tomu nalo aju amilotu ka tavoru sibilibi nalo. <sup>15</sup> Nemijikia ka kube tomu nalo napano kumijikia vite, mia bogo napano nomil kirimemedu ban kamiu jibe nei, nomonea ka kumijikia kuvitii vatitig venia napano nojo neberenio.

<sup>16</sup> Neber iliano nei bior napano bogo na komiasolso bija tomu nalo napano aju amilotu ka tavoru tai, jibe ka napano jau bunu koje komilotu kanio ruei.

Nina be verare ga ka tivelinio na kito napano romonea Kristo. Ea bogo na sinaniano lu, robolkouo ka munuiano lu, romidu, a nina jibe ka roberialio ka romiasol bagaro na tomu nalo napano kiano burukija miou karlo. A iorou, rovurekokorov joko lu, romidu, a nina jibe ka napano robija nalo napano amila

bulag mokotenano napano jaklele mave ea ñakolkolo.

<sup>17</sup> Nina be riano ka kito nonovio napano roju robinimej vio takurano ea sinaniano lu nei, bior ka robinimej jibe bajago takurano, a rojen ga joko takurano nei.

<sup>18</sup> A jibe na bunu ea kulo Israel, bogo napano amue kialo sida nalo. Tealo maka ala sida, mia ajaaro ka asen sunbue na sida nalo nei napano nalo dolu amilaio, naruei mila jibe na napano abe bagaro takurano ga amila lotuano jibe na ban Atua.

<sup>19</sup> Bo ga, iliano nalo na berenio venia? Nojo neberii tavoru nalo bija sida nalo nei, mia maka neverenio ea kiaku jidomiano ka vite nalo nei abe riano, ñeli abo.

<sup>20</sup> Maka tibe na leleio, mia bo ka nala meravo van kamiu ka nalo napano aju amila lotuano kinkin nalo jibe na, maka amonea Kristo, a sida nalo napano aju amilaio, maka atu ala van Atua napano be riano, mia aju amila ban ea siñaro nalo ga. Tibe na, maka rivu ka kuva vaataro kalo napano aju amilaio, bior napano maka nosidom ka kuviasol vija siñaro nalo.

<sup>21</sup> Jau napano kojo kojotano ea Tubo kiano barobaro lu, kojo komunu ea kiano baja lu, a kojinan ea kiano sinaniano lu, maka kojikia kova kototano ea siñaro nalo kialo barobaro ka kodu kialo munuiano a sinaniano.

<sup>22</sup> Toro napano naio mila jibe na jo julu Tubo, mijikia rila Tubo rijokua laka, tinien ser naio. Peli na toro nene beriamña ber ver Tubo tinien jer naio jibe na, maka ve vite tai na, bior ka naio kirisikili lie loa Tubo? Maka nesidom ver tibe na.

*Namoneano nalo monoka ala re vite napano mijikia rila namoneano dolu nalo ajog rivova*

<sup>23</sup> Iliano tai jo, napano tomu miroano aju aberenio, aber toro mijikia rila venia ga napano naio jidomio. Peli iliano na be riano, mia vite nalo tai ju ka nemijikia

nalaio, mia maka nosidom ga nalaio, bior ka kiaku vitiano, nalo maka atu aija kiniou ka kiaku meuliano, a maka atu aija tomu nalo kialo meuliano nalo napano aju vaataro kean kiniou.

<sup>24</sup> Neber jibe nei bior napano maka rivu ka toro to sidomii naio ve taku-rano ga, mia naio monoka sidomii bunu tomu nalo napano naio jo vaataro keanlo.

<sup>25</sup> Bo ga, vonganei mia neber tenalo tai ea tivelinio na sunbue na temeul nalo napano amila sida ruei kanio ka kialo tavoru sibisibi. Verver avar sunbue nene amei, avar tu vija sunbue dolu nalo ka aivilvili kanio, romijikia rovulu ka resenio nina bo ga. Nina bior napano maka rotu rovitilubar ka sunbue nalo nei ajumabe, nuber sunbue vabe na amila sida kanio, ñeli sunbue vabe na maka ala sida kanio, mia rosidomio ñelea re, rovika re vikadeniano, rovulu ga. <sup>26</sup> Rodu, rosenio, bior nina jibe ka iliano tai napano ber jibe nei, berinavo

*yetemeriba nei, bija vite nonovio napano ajuaiou, abe kei kiano? Abe kiado Tubo kiano ga. Iouano 24:1*

<sup>27</sup> A ver toro tai napano maka rimonea rivioso ka kova kosinan ea kunuano, ñeli komerou ka kovano, kojo kober ñeli avar sinaniano tai vanso napano amila ruei lotuano kanio ban kialo tavoru nalo. Mia makanio, ver koto kosidomii ka kovano, kavano ga, a koto kovivika re vikadeniano tibe na, kodu ga venia napano ajanio banso.

<sup>28</sup> Mia, vite tai ga, ver jau kova koto yako ruei, a namoneano dolu tai to, naruei ñeli naio riverialio vanso tibe na, river, Kuruaku, sunbue na, kito juo monoka rovel kanio, bior napano nomijikia ka amila ruei sida kanio ban kialo tavoru nalo. Ver naio river tibe na vanso, naina naruei mia jau bunu kosenio re.

<sup>29</sup> Ee, ea tivelinio na kiamo jidomiano, kojaaro ka kosen ga, mia ea

tivelinio na kuruamo dolu nei napano ber vite na kaso, bova ka naio, naruei bo ka kotokol re bunu, bior verenio makanio, mia jau kola vite tai napano kiano jidomiano maka rimemedu kanio leleio.

Mia ver jau ga takurano, a maka toro tai riverial vite tai vanso tibe na, jau komijikia ka kola venia napano komijikia ka memedu kaso ka kolaio.

Naina naruei kiaku jidomiano jibe na ka vio na. Kiniou neber ĩeli maka rimemedu ka toro dolu kiano jidomiano ga jo miyuku kiniou ka monoka nala nina ĩeli nala re ninei.

<sup>30</sup> Ver sinaniano kinkin vaio, mia nemialio ka ver beamu, nobolkouo kanio, mia nemijikia nosenio rivu ga. Maka rivu ka toro dolu tinien seri kiniou ka nojo nejen sunbue tai napano neber siva ban Atua bior ruei.

<sup>31</sup> Bo ga, nina berenio jibe nei, ber verver kito rosen titai, ĩeli romunu titai, ĩeli vaio bereio napano romijikia ralaio, mia monoka ralaio nonovio ea bajago tai na ridular Atua siano. <sup>32</sup> Kirivova ver kamiu kuvila titai napano mia rila bulag kulo Ju nalo kialo jidomiano, ĩeli kulo Kris nalo, ĩeli kiado namoneano dolu nalo, <sup>33</sup> mia bo ka kuvila von ka kuvila tibe na kiniou nojo nemilaio kalo. Ea vite nonovio napano nojo nemilaio, maka nala von ka nala ka rivu van kiniou, mia namila von ka nala rivu vanlo, ka rila ka ĩeli nalo tealoo amijikia avokar ioruriano.

## 11

<sup>1</sup> Ee, bilbilu nalo, jibe ka napano kiniou nojo nomila von ka neiel noue Kristo jaano, bo ka kamiu kuvila von kija ka kuviel kuvue jaaku.

*Tomu nalo kialo bajago novo bogo na aban ea lotuano*

<sup>2</sup> Bilbilu nalo, nomijog ka kumitu kumisidomii kia ga iĩauano nalo napano nomĩauka ban kamiu, a

kumitu kubakar batitig bajago nalo na iĩauano nei napano neberloglog ka kamiu. <sup>3</sup> Mia ea vite nalo nei, nalo tai jo keano napano nojidom ka kamiu monoka kuvijikia vatitigio, napano berii toro bija tira, napano naljuo kialo iĩauano maka rive verare. Jibe ka napano Atua karamĩado naio be parinio ka Kristo, a Kristo naio be parinio ka toro, naruei sumĩano be parinio ka koano tira.

<sup>4</sup> Mia jakii kiado bajago, ver toro tai rivolkouo, ĩeli ril ea mirano namoneano nalo, naio monoka riyare batubatu joa parinio. Verver riyao, romial naio jibe vovu tai napano maka rijikia rila bajago na vameneano. <sup>5</sup> Mia ea tire nalo naio be dolu. Verver tira tai bolkouo, ĩeli ril ea namoneano nalo miralo, romialio rober bo naio jovuko parinio ka batubatu ĩeli kulumĩarauo tai tibe na. Verver sovoko re vatitig parinio tibe na, naio bunu mila bova, romial naio be verare ga ver ve boromo ga, to sikili tu ea mirano tomu nalo.

<sup>6</sup> Ver tira tai parinio sikili, maka sidom sovoko parinio tibe na, bo ka kamiu kuver kanio ka taĩig kon parinio ga tukamu, ana karina mijikia sikili tu ka rivolkouo joomo ea lotuano. Ana mia naio monoka rimou laka ka rila tibe na, bior maka rivu ka tira rivuron vijinio ve bulavulati laka, ĩeli taĩig vijinio ve boromo. A verenio ve vite na imouiano ka tira jibe na, bo ka tire nalo asaaro ka avokar kiado bajago na vameneano, nalo monoka asovoko parilo tibe na, bogo na abinimeĩ ka avolkouo ea lotuano.

<sup>7</sup> Mia ka venia tomu nalo maka asovoko parilo? Nina bior Atua jo mave, a naio be boru ruei, mia mila sumĩano jibe nei, bitirilar sumĩano mila naio loa ka tira. Jibe na naruei sumĩano monoka re rilavan parinio, mia tira monoka sovoko parinio. <sup>8</sup> Romijikia ka sumĩano monoka to mave tibe na, bior napano Atua jii sumĩano beamu, karina jii tira

den merikono tai na mokotenano suṁano, mia maka tii suṁano den tira, <sup>9</sup> a naio jii tira ka rijai suṁano, maka tii suṁano ka mia rijai tira. <sup>10</sup> Tibe na, tira monoka sovoko parinio, ka verialio ka naio bamenea koano. Mia bogo na naio mila jibe na, nailiano nalo na tiniabene amialio, a mila abitulubario ka jibe ka tira jaaro ka vatove ka koano, mia nalo bunu monoka asaaro ka avatove ka kialo toro na toru, napano Atua. <sup>11</sup> Ierinio napano tira monoka rivatove ka suṁano tibe na, mia nina maka riverenio ka naljuo maka ave verare. Kito napano roju joomo ea bagaro na Tubo, romijikia ruei ka tira maka rijikia to naio ve takurano, a suṁano maka rijikia to naio ve takurano, mia naljuo monoka atu aimāu vei ka aijajalo ve verare ga. <sup>12</sup> Beamu laka, ea tiiano, tira moti moluo ea suṁano mokotenano, mia iorou ka naina, tomu nonovio aju amolmoluo ea tira mokotenano bokar banei, mia romijikia ka burupati riano nene, napano vite nonovio malmaluvo eaio, naio be Atua ga.

<sup>13</sup> Peli tealó maka asaaro ka kiau iliano, napano neber bo ka tira napano bolkouo monoka sovoko parinio, mia kamiu kuvila von ka kuvisidomii vatitig kanio. Ea kenemiu vitiano, kubitii ka tira napano maka sovoko parinio, memedu ka naio tumolu rivolkouo van Atua? Maka leleio, ea kiado bajago maka lele rimemedu. <sup>14</sup> Ea kiado meuliano na yetemeriba nei, meravo vatitigio ka kito ruei, ber bogo napano suṁano juvan vijinio terebievi laka, maka rivu laka ka naio. <sup>15</sup> Mia bogo napano tira juvan vijinio terebievi kirinovo, bo laka ka naio, a vijinio na terebievi nei, Atua jian ban naio jibe ka vite tai ka riiovvua vu mokotenano.

<sup>16</sup> Mia jibe napano neberenio, namoneano tealó aju amil laka, maka asaaro ka jidomiano nene napano ber ka tira napano jidom rivolkouo monoka sovoko parinio. Bo ga,

kiaku iliano jibe na, ber kumemi naverloglogiano nalo, nuberloglog jibe nei ga, maka nuvisaaro ka bajago dolu, a Atua kiano bagaro na lotuano p̄lilip̄ili dolu nalo, nalo bunu aberenio jibe na.

*Marabo na memedu ka ala sinaniano lu*

<sup>17</sup> Vite tai bereio jo kia napano nojidom never jidomiano tealó ka van kamiu. A maka rivu ga, bior napano maka ve vite tai napano nemijikia nodular kamiu riviorio, mia be vite tai napano monoka noil van kamiu riviorio. Nina ea tivelinio na bogo na lotuano, napano bo ka tibe na vite tai napano rijai kenemiu meuliano, mia kumila tibe na binimei be burupati jaleleano tai bereio. <sup>18</sup> Neber jibe na bior napano nomijog ruei aber bogo napano kamiu namoneano nalo kuburon vio takurano, maka kuve takurano, mia vuruburevureiano jo binimei judu iviso kean kamiu. Ver iliano nalo nei be sibiano, bo, mia makanio, nemi-alio jibe monoka be riano ga. <sup>19</sup> Mia maka nejikia ka vaio kumisidom kuvila tibe na? Peli tai jidom tovulu tai, tai jidom tovulu tai tibe na? Peli kojidom kotuvuluio, ka mia tomu nalo aver jau naruei kobe riano, p̄eli jau naruei Atua jo bijaso?

<sup>20</sup> Mia ea tivelinio na sinaniano lu, nomijog aberenio nina bunu kumitu kumila bova. Bogo napano kuburon vio takurano ka kuvila sinaniano lu nei, maka bunu kuvila ka kuvisidomiikar kiado Tubo, mia kumila jibe semiu sinaniano dolu nalo. <sup>21</sup> Verenio tai rimei rijog vitu, mia tumolu riyuku jum̄ano rivar joko ve telabo naruei dolu nalo ve re salo, p̄eli dolu rimunu m̄arjum̄elm̄elu ve toru! <sup>22</sup> Peli maka ve kenemiu yimo na vorosebiano, ana kubinimei ea lotuano ka kuvisinan eaio? Peli kamiu kumila jibe na bior napano kumitu kumisidomii kurano ea Atua kiano yimo na lotuano, p̄eli kumitu kumisidomii kurano ea namoneano bilbilu dolu nalo? Maka nejikia mia never venia ka kamiu rivior vite nei,

a mia neber ga maka nasaaro kanio leleio.

<sup>23</sup> Marabo na memedu ka ala siniano lu, Tubo naruei ber ka kinio, a iorou, kiniou naruei nojuvan biedu ban kamiu. Bano jibe nei, ber Tubo Yesu, ea kiano bogiano maaro na, napano Jutas jiveluku naio eaio, naio midu joko nei, <sup>24</sup> ana bolkouo ber siva biorio, burekoko-rovio, ana berenio “Ninei naruei be mokotenaku, napano nomijamo bior kamiu. A kamiu monoka kuvisen joko tibe na tulaka, tibe vite tai ka kuvisidomii kiniou.” <sup>25</sup> A iorou, bogo napano ajenio bano-o bisi, naio midu baja na m̄arjuñelm̄elu, mila jibe nene bereio, ber kalo berinavo “Baja nei, naio be kiaku burukija, napano mila Atua kiano verikariano vou napano mila bija toro jikili ju. A bogo nonovio napano kamiu kuvidu baja nei tibe na, neber bo, kamiu monoka kuvisidomial kiniou.”

<sup>26</sup> Bilbilu nalo, naina naruei Tubo kiano iliano ea tivelinio na, a mila ver bogo napano rosen joko vija rodu baja tibe nei, roju romila sidomkariano na kiano m̄ariano, a mia kito monoka rotu rala tibe na vokar bogo napano naio rimaluvo kean kito bereio.

<sup>27</sup> Tibe na, ka rodu Tubo sano joko nei, vija m̄ano baja nene, naio be vite tai napano be lu laka. Ver toro tai ridu ea bajago tai napano maka rimemedu, toro na mila kirivova, mila bulag vijauano na mokotenano Tubo bija kiano burukija, jibe ka naio ga muebin naio. <sup>28</sup> Tibe na, bogo na ala siniano lu nei, monoka rovitii vatitig kiado meuliano veve terakurano, karina, rodu joko vija baja nene. <sup>29</sup> Mia bogo na rodu, monoka rovitilubarío ka vite nei, nioti nene toru jo, napano berial ka kiado Tubo mijamo ka kiano meuliano bior kito. Naruei, ver toro tai senio, ana maka sidomii ve temi ka kito nonovio robe toro takurano ea Kristo, midu ka iakurano ga, a mia naio rialio napano rivova lie ka naio. <sup>30</sup> Vite na naruei jo mila kamiu ruei, napano miroano

ka kamiu amelmeluku ðeli amie, ba bokar napano tealó añarn̄aro.

<sup>31</sup> Mia ver rotu rovitii vatitig kiado meuliano bogo nonovio, mia Atua sian re vironiano van kito tibe nei.

<sup>32</sup> Mia kito napano Atua mila ka kito jibe nei, maka rodu tibe vironiano tai, rodu tibe jidomiano tai napano Atua mila ka rilabon kito, ka sian bogo van kito ka ea bogo maaro, mia avukular kito re rovan vija tomu dolu nalo na yetemeriba napano mia avan ea vio na jogvaiano.

<sup>33</sup> Bilbilu novo nalo, naina naruei kiaku iliano ea tivelinio na ala siniano lu. Bogo kumei vio takurano tibe na, mia kuvila ea bajago novo. Ve re tai napano rila von ka ridu soðeli ka senio ve toru beamu, mia kuvitu rim̄aro ga, kar bogo napano aviniu atu, kamiu kuvilaio. <sup>34</sup> Toro napano jijerio ana jidom laka siniano, bo ka tobo ga vonuo, sinan vatitig ea kiano vio. A monoka kuvitakii kiaku iliano ea tivelinio nei, ver ðeli, bogo na mia kumei vio takurano, mia maka lele vite tai rivu van kamiu.

Vite nalo dolu ju ka neverialio van kamiu, mia rotukunu kalo bogo na namaluvo kean kamiu.

## 12

### *Moroano nalo napano Niununo Lu jianio jibe jidomiano tai*

<sup>1</sup> Bo ga kuruaku a kuvivinioku nalo, kiniou nojidom neverii moroano nalo napano Niununo Lu mijikia sianio van kito namoneano nalo jibe jidomiano tai. Ea tivelinio na, maka rivu kamiu kuve taboso, mia nojidom ka monoka kuvijikia vatitig kija kalo. <sup>2</sup> Beamu, bo ka kuvisidomii nua ea bogo na maka kumonmonea vo. Ea bogo na, moroano nalo na niununo dolu nalo aju amim̄au ea kamiu, aburu kenemiu jidomiano ba be vovu vatitig ka kuvilotu ka tavoru nalo ninio napano maka ajikia ail. <sup>3</sup> Nina naruei niununo kinkin nalo napano amijikia ala toro ril rivova ka Yesu,

riolua siano, mia Atua kiano Niununo Lu maka rijikia sian iliano na jibe na. A niununo nalo na, maka ajikia ala toro river iliano novo, verial Yesu be Tubo riano, mia toro napano ber jibe na, romijikia ka Niununo Lu jo miñau ea naio, bar iliano nei banio.

<sup>4</sup> Jibe na, bogo napano romial moro-ano novo nalo napano namoneano nalo amijikia aiñau vijaio, romijikia ka jibe jidomiano nalo napano Niununo Lu jianio banlo. Moroano telabo ka ala iñauano aju, mia Atua kiano Niununo naio takurano be burupati ka nonovio. <sup>5</sup> Jibe ka ga napano bajago telabo ka ala iñauano aju, mia kiado Tubo naio takurano be parinio ka nonovio, <sup>6</sup> a jidomiano novo telabo ka ala iñauano aju, mia Atua naio takurano jo mila abavavin ea kito nonovio. <sup>7</sup> Jibe ka, ea tivelinio na moroano nalo napano Niununo Lu jianio, namoneano nalo amijikia ajevio beve dolu, jakii venia ga napano Atua bitii ka mia riija lie taara na namoneano nalo.

<sup>8</sup> Ea tai, Niununo jian iliano nalo napano abe masou laka. Ea tai, jian navitilubariano novo nalo. <sup>9</sup> Ea tai, jian viekouoiano toru. Ea tai, jian napano mijikia milarur namieiano nalo. <sup>10</sup> Ea tai, jian napano mijikia miñauka vremesiano nalo. Ea tai, jian verialiano na vite nalo na ju ka rimei. Ea tai, jian napano mijikia rijidig bulag siñaro nalo. Ea tai, jian napano mijikia rijev ka iliano dolu. Ea tai, jian napano mijikia bilig iliano nalo napano amijeivio ka iliano dolu. <sup>11</sup> Nina naruei ijaiano nalo napano Niununo Lu naio takurano ga mijikia ridu toa toro kiano meuliano, jo jian bulagio ban kito terakurano jakii ga venia napano naio jidomio.

<sup>12</sup> Namoneano nalo abar ijaiano nalo beve dolu jibe na, jibe ka napano mokotenado nalo be tarati dolu nalo miroano. Terati dolu nalo

na, amiasolo aju amiñau vei ea mokotenano takurano ga, a jibe ka bunu joomo ea taara na namoneano nalo, napano ajibe ka terati nalo ea Kristo mokotenano. <sup>13</sup> Peli kito kulo Ju ðeli kito kulo Krik, ðeli kito tortoru ðeli roju romiñau kurano toro na toru tai kiano, mia Atua kiano Niununo midu kito nonovio, mila kito rabaruei ka romei rove terati na Kristo mokotenano, a Niununo na naruei napano naio takurano ga joa kiado meuliano nalo beve terakurano.

<sup>14</sup> Bo ka kito rosidomii lie ea kijo-kijo nei napano roju roberii, rober kito namoneano nalo rojibe Kristo mokotenano. Naruei ea tivelinio na mokotenado, romijikia ka terati nalo miroano. <sup>15</sup> Tibe na, maka rimemedu ka terati tai, tibe jaano, rijog rivova, tumolu riverinavo “O, kiniou jaano ga, kiniou maka noiñau rivu tibe napano juñano miñau. Peli maka bunu rivu ka neve terati na mokotenano.” Mia makanio, jaado maka rijikia river tibe na, bior naio be terati na toru ea mokotenado ruei. <sup>16</sup> Mia maka rimemedu ka tiliniedo rijog rivova, tumolu riverinavo “O, kiniou tilinieno ga, kiniou maka nejikia nevitii vite tibe napano mirano milαιο, ðeli maka navare ka noto noiasol ea mokotenano.” Mia makanio, tiliniedo maka ver tibe na, bior napano naio, kiano iñauano novo napano mila ka mokotenado jo ruei. <sup>17</sup> Nina bior napano verver mokotenado rive mirano ga, mia maka rejikia rojog lubar vite, a ver mokotenado rive tilinieno ga, mia maka rejikia rojugunu vite. <sup>18</sup> Mia ea mokotenado, Atua mila jakii kiano jidomiano, bar vatitigio nonovio terati nene ajua vio nalo nene memedu terakurano, ka ala kialo iñauano memedu veve terakurano. <sup>19</sup> Ver terati mokotenado nalo aviniu averaverarei ga, mia kito maka rejikia rovitii tibe ka na mokotenano jibe ka takurano ga, <sup>20</sup> mia terati dolu nalo

abiniu monoka aiasol vio takurano ka ve mokotenano toro. <sup>21</sup> Mirado maka rijikia ril rivova van jumado, river "O, maka bunu nosidomso," a pariparido maka rijikia rijil jaado, river "O, maka bunu tinieku tiso." <sup>22</sup> Maka leleio tibe na, a! Terati mokotenado tealo amelmeloko laka, mia romijikia ka aju amila burumara imauano. <sup>23</sup> Terati dolu na mokotenado nalo, rosidomii re rever abo jumabe, mia rotu rovitikar vatitiglo. Terati dolu tealo na mokotenado, maka rosidom toro dolu rialio, naruei rojidom temi ka roiako vatitiglo. <sup>24</sup> A terati dolu na mokotenado, abo ka tomu nalo amijikia aialio, naruei maka roiakolo. Jibe ka, romial ka Atua bar vatitig terati nonovio memedu ga, a midu jidomiano tai joa kito ka napano bekurano terati tealo amelmeloko, p̃eli maka ala imauano ve toru, mia rosidomii ve temi kalo a rovitikarlo rivu. <sup>25</sup> A nina mila napano terati nalo nonovio maka ail niegelo, mia aju bo ga, aju amijajalo bereio bogo nonovio. <sup>26</sup> Ver terati na mokotenado tai rijog rivova ka vite tai, terati nonovio dolu nalo monoka ajog rivova vija naio, a ver aijalar terati tai, amila bo banio, terati dolu nonovio amijikia ajog rivu vijaio.

<sup>27</sup> Naruei iliano nalo nei aberenio jibe nei, aber kito naruei namoneano nalo, rojibe ka Kristo mokotenano, a kito terakurano robe kiano terati nalo nene. <sup>28</sup> A Atua bitiri bulag kito terati nalo na Kristo mokotenano, ka rola imauano nalo na lotuano. Na beamu, Atua bitiri bulag tealo abe navagadeano, na juo nene tealo abe atevi, na tolu nene, tealo abe naverloglogiano, a iorou kiano, nalo napano amimauka vremesiano, p̃eli amilarur mieiano nalo, p̃eli abitikar imauano ea lotuano, p̃eli amijev iliano dolu nalo, jibe na. <sup>29</sup> Naruei, ea taara na namoneano nalo, kito romialio napano abiniu abe atevi? Peli abiniu abe naverialiano? Peli abiniu abe naverloglogiano? Peli abiniu amimauka

vremesiano? Maka leleio tibe na. <sup>30</sup> A abiniu amijikia ala rur mieiano nalo? Peli abiniu amijikia ail ka iliano dolu nalo, p̃eli avilig iliano dolu nalo? <sup>31</sup> Maka leleio tibe na, mia bo ka tomu nonovio asaaro ka avokar burumara moroano vabe napano Niununo mijikia sianio vanlo.

A ea moroano nalo na, tai jo napano monoka rimei ve moti ea kiado meuliano nonovio, napano bo lie laka ka nalo dolu, napano kiniou nojidom noveriio van kamiu, nina bajago na tinietiano.

## 13

### *Tinietiano*

<sup>1</sup> Tinietiano, naio be vite tai napano monoka ve vite moti ea kiado meuliano. Peli nemijikia neil sel kulo dolu kialo iliano, p̃eli nemijikia neil ka agelo nalo kialo iliano, nina bo, mia ver kiniou tinieku tii re tomu nalo, mila napano kiaku iliano nonovio ajibe ka p̃i tai napano amue vovu, miolu kurano ga. <sup>2</sup> Peli burumara moroano joa kiniou ka neverial Atua kiano iliano, p̃eli na nemijikia vatitig vite telabo napano tomu dolu nalo maka ajikiaio, p̃eli na kiaku viekouoiano toru laka bare ka nobolkouo ka tenalo na tortoru mia amaluvo, vite nalo na abo laka, a ver tinieku tii re tomu nalo, nebe iakurano ga. <sup>3</sup> Peli nejian kiaku saba nonovio ban talimasa nalo, ver p̃eli noju jikili banbano amisebi mokotenaku bior napano nebe Kristo kiano toro, nina bunu bo, mia ver maka tinieku titii tomu nalo, nemila ka iakurano ga.

<sup>4</sup> Naruei burumara vite nei, bajago na tinietiano, naio jumabe? Jidomiano nene tebievi, a be tinievuiano. Naio maka rijokua, naio maka rivarvarka, a naio maka to ridular naio bereio. <sup>5</sup> Kiano bajago kirinovo, naio maka rive viti, maka tinien mimi soṗeli, a maka rivokar jidomiano va vesiou. <sup>6</sup> Naio maka sidom vite va, mia jaaro ka vite novo. <sup>7</sup> Tinietiano naio jikili ju julaka, tinietiano naio

be riano julaka, tinietiiiano naio tinienekar julaka, a tinietiiiano naio juvulu julaka. <sup>8</sup> Tinietiiiano maka tinien maro leleio bogo tai.

Be riano laka, moroano dolu nalo, jibe verialiano nalo, þeli iliano na ka iliano dolu nalo, þeli jikiaiano nalo, mia nalo maka ajikia atu tulaka, mia tinietiiiano ga naio jo julaka ga, naio maka rijikia ribisi bogo tai. <sup>9</sup> Ea kiado bogo, aju aberial Atua kiano Iliano nalo, a aju aberloglog jikiaiano nalo jibe nei, mia venia napano aju amila banei, be torogtorogio nene ga, maka rivokar kiano vujoano leleio. <sup>10</sup> Vite nalo nei abe tena vonganei ga, a ea bogo napano mia Atua rila vite nalo rimei rivu nonovio, vite dolu nalo nei mia abisi, mia tinietiiiano ga mia to.

<sup>11</sup> Nina be verare ga ka kiado meul-iano. Bogo napano robe kiritete kia ga, kiado iliano bija kiado jidomiano bar kiritete kiano bajago. Mia bogo na robinimei tortoru, maka bunu rotibe ka kiritete, kiado bajago meruo vatitigio. Naruei kiado meuliano bija Niununo Lu monoka tibe na bunu.

<sup>12</sup> A naio be verare bunu ka mermerobi nalo napano roju robittii mirado eaio. Bogo tealó, ver mermerobi nei miagiago þeli be mñadati, mia maka rejikia rovitilubar vatitig mirado eaio. Mia bogo napano Atua rila vite nonovio rimei rivu, mia romijikia rovitilubar vatitig vite nonovio, a mia roial Atua mirano rimemedu ka mirado ga. Mia bunu ea tivelinio na kiado jikiaiano, vonganei romijikia telisu ga, mia ka bogo na ju ka rimei, mia Atua rila kito rojikia vatitig naio, vija vite dolu nonovio, ve verare ka ga naio mijikia vatitig kito nua ruei binimei bokar banei. <sup>13</sup> Tibe na, vite dolu nalo mia abisi, mia vite tolu ga amijikia atu tulaka, nina naviekouoiano, baleaiano, a tinietiiiano. Mia ea vite tolu nei, nana napano toru laka kalo, naina neberenio maariano na, naio be tinietiiiano.

## 14

*Pol jo berii bereio moroano nalo na Niununo Lu, jibe napano amil jel iliano dolu nalo*

<sup>1</sup> Naruei bior napano tinietiiiano naio burumñara vite laka jibe na, kamiu monoka kuviduio to ve vite moti ea kenemiu meuliano. Mia bija nina, monoka kuvidu kenemiu jidomiano toa moroano nalo napano Niununo Lu jomña jianio, kamiu kuvisaaro ka kuvakarlaro. Mia ea moroano nalo nei, tai napano bo laka, nina napano toro berial Atua kiano iliano nalo.

<sup>2</sup> Ver toro tai tumolu verial iliano jel iliano dolu tai napano Niununo Lu jianio banio, þeli bo ka naio, mia jibe ka napano jo mil ban Atua ga, maka to ril ka tomu dolu nalo ajikia ajog lubar naio. Peli jo berial burumñara iliano nalo napano Niununo Lu jian banio, mia iliano nalo na ajuluku ka kito, maka rejikia rovokarlo. <sup>3</sup> Mia ver toro tai riverial Atua kiano iliano nalo van kito, ril van kito sel ea kiado iliano, kiano iliano novo nalo nei amijikia ala kito rosikili, amijikia adular kiado jidomiano, amijikia adururu kiado iviso. <sup>4</sup> Jibe na, toro napano mil jel iliano dolu napano Niununo Lu jian banio, jo bagan naio takurano ga, mia toro napano berial Atua kiano iliano napano tomu nalo amijoglubario, naio jo bagan lotuano nonovio.

<sup>5</sup> Ee, kiniou najaaro ver kamiu kuvil sel iliano dolu jibe na, mia nemialio ka bo lie ver kuvitu kuverial Atua kiano iliano van kulo dolu nalo. Naio napano jo berial Atua kiano iliano nalo, kiano imñauano bo lie loa ka napano jo mijev jel iliano dolu. Nina bior naio napano jo mil jel iliano dolu, kiano imñauano maka jikia rivar mñarati ea kulo dolu kialo meuliano. Kiano imñauano maka rijikia vagan lotuano ver maka tai napano jo bilig kiano iliano nalo ka kulo dolu nalo ajikia ajoglubario.

<sup>6</sup> Bilbilu nalo, kuvisidomii vonio ver kiniou, bogo nojo nebinimei ea

kamiu nojo nomioliolu ban kamiu jel iliano dolu tai napano Niununo Lu jianio ban kiniou. Tibe na, mia kiaku iliano nalo maka ajikia aija kamiu leleio. Mia bogo na nemil ban kamiu jel iliano napano kumijoglubario, mila na venia napano nejianio ban kamiu, jibe vite vou tai napano Atua berloglog ka kiniou, p̄eli jikiaiano tai, p̄eli verialiano tai na Atua kiano iliano, p̄eli verloglogiano tai, mia mijikia rijai vatitig kenemiu meuliano.

<sup>7</sup> Nina jibe ka p̄i m̄arauo tai, ver kiano terati jooa nalo avova, mia bogo na aserei kanio, maka rojikia rojog lubar vatitig iou venia napano ajerei kanio. <sup>8</sup> Peli ver tubo tai jidom rue p̄i, mia p̄i minunu, maka jikia riolu m̄lelea, mia tomu nalo maka ajikia ajoglubario ka tubo mue p̄i bior vaio. <sup>9</sup> Mia jibe ka ga na lotuano na kenemiu yako bunu. Ver toro tai jo ber iliano nalo jel iliano dolu tai napano tomu nalo maka ajikiaio, mia maka ajikia avokar niati tai leleio ea venia napano naio jidom river kalo. Kiano iliano mia riva kovio ea vio yauo ga.

<sup>10</sup> Jibe napano romijikia, iliano miroano ju janea yetemeriba, a kialo iliano nalo abe nioti aju. <sup>11</sup> Mia ver nava kovio tai, maka nejikia kialo iliano, nejibe ka valauo kalo ea vio nei, a nalo ajibe ka valauo ea kiniou bunu. <sup>12</sup> Ana iliano nei be nioti ban kamiu napano kumitu kumila vio jikili ka moroano nalo na Niununo Lu aim̄au iviso ea kamiu. A nioti nene jibe nei, ber kamiu kuvila re napano kubeve terakurano kuvitu kubavavini ea kamiu ga, mia monoka kuvilavio sikili ka kamiu nonovio kuvitu kuvidular lotuano rimei sikili vatitig nonio. <sup>13</sup> Tibe na, ver kamiu tai mijikia ril sel iliano dolu tai napano Niununo Lu jianio ban naio, bo ka rivolkouo van Atua ka sian moroano van naio ka vilig kiano iliano nalo nei avan ea kenemiu iliano. <sup>14</sup> Kiniou neber jibe na bior ver noto nobolkouo sel iliano dolu tai tibe na, nemial jibe ka

nojo nobolkouo ea niunuku ga, mia joomo ea kiaku jidomiano, maka nejikia venia napano nojo neberenio.

<sup>15</sup> Ver tibe na, mia bo ka rala tum̄abe? Ea kiaku vitiiano, bo ka rala ea tivelinio ve juo. Ver kiniou noto nobolkouo, p̄eli noto noiou, mia bo ka nala ea iliano napano miyotuba ea niunuku, a bo ka nala bunu ea iliano napano miyotuba ea kiaku jidomiano. <sup>16</sup> Ver makanio, p̄eli koje kobolkouo jel iliano napano maluvo ea niunumo, koje kober siva ka Atua bior vite tealoo, mia toro dolu napano maka rijev moroano ka rijoglubar iliano nei, mia naio maka jikia rijikiaio, mia maka jikia riverenio “Jibe na ga naruei” ea kiamo volkouano. <sup>17</sup> Peli koje kobolkouo jibe na, koje kober vite novo miroano, mia kiamo volkouano na maka jikia rijai kiamo bilbilu kiano jidomiano leleio.

<sup>18</sup> Kiniou najaaro laka ka Atua jian moroano ban kiniou ka noil ea iliano napano Niununo Lu jianio, neber siva laka kanio, a nemial jibe nemila toru jovulu laka kamiu nonovio. <sup>19</sup> Mia kiniou nojo nemila ea bogo napano nojo kiniou takurano ga, maka noto nala ea mirano tomu nalo ea bogo na lotuano. Ea kiaku vitiiano, verver never iliano na telisu tai ga sel iliano napano tomu nalo amijikiaio, napano mijikia verloglog kialo meuliano, nina kirinovo laka jovulu napano nejian iliano telabo jel iliano dolu napano maka ajikia ajoglubario.

<sup>20</sup> Bilbilu nalo, neber bo ka kamiu kuvila von kuvisidomii vatitig ea vite nalo nei, kuvisidomii re bunu tibe kiritete. Be riano ka ea tivelinio na bajago va nalo, bo ka kuvitibe kiritete nalo, napano maka ajikia vite ve telabo kanio. Mia ea tivelinio na bajago novo nalo, kenemiu jidomiano monoka meruo vatitigio. <sup>21</sup> Iliano tai joa Vivitauiano Moruo, berial iliano tai napano Atua ber jibe nei, berinavo

*Mia novuru tomu nalo napano abinimeia ea venuo dolu nalo, na-*

*pano ail sel iliano dolu, neilalo avan ka averial kiaku iliano van kiaku tomu nalo.*

*Mia kiaku tomu nalo pariparilo kirisikili laka, mia maka ajikia aiagago ka kiaku iliano napano valauo nalo nei averialio kalo.*

*Ais 28:11-12*

<sup>22</sup> Ea iliano na, romial ka Atua berialio ka moroano na ail ka iliano dolu napano Niununo Lu jianio, ka vaio? Moroano na, maka van kito na romonea ruei, mia ka rijai nalo napano maka amonea vo. Bogo napano ajogio, avitulubario ka beriano. Mia moroano nei ka riverial Atua kiano iliano, rijai laka ka kito napano romonea ruei, ka romijikia rojoglubario meravo bo. Mia moroano na maka jikia rijai laka nalo napano maka amonea vo, bior napano maka asidom aiagago ka Atua kiano ilirianiano.

<sup>23</sup> Tibe na, bogo na kumei vio takurano ka kuvila lotuano, maka rivu ka kuvitu kuvil laka sel iliano dolu nalo napano Niununo Lu jianio ban kami. Ver bogo tai tibe na, ver tai napano maka jikia vatitig vite nei, ðeli maka rimonea, ver rimei joomo ea kenemiu lotuano, mia naio rial tumabe? Mia monoka sidomii ver kami nonovio kumiavovu garuei.

<sup>24</sup> A ver rimei joomo, rial ka kami kumitu kuberial Atua kiano iliano jel iliano tai napano kami nonovio kumijikiaio, mia riagago ka kenemiu iliano novo nalo, naruei mijikia rikuru tinieno, mijikia rila naio rivitilubar kiano kariano. <sup>25</sup> A bogo napano naio riagago rivano-o, mia rijog ka Atua kiano iliano bokar kiano meuliano, bar dulu ea vite nalo napano milavano ajua kiano jidomiano, a mia rila naio rijog rivova, rinie tano rilotu van Atua, riverialio riverinavo be riano ga, Atua jo iviso ka kami.

*Monoka kuvimau vija moroano nalo na Niununo Lu ea bajago na memedu*

<sup>26</sup> Jakii iliano nalo nei ea tivelinio na moroano nalo napano Niununo

Lu jianio, mia kami kuvila tumabe ka bogo nalo na kenemiu lotuano? Bogo na kumei vio takurano, bo ka kuvitiburevure imauano nalo nene ea kami. Tibe ka, tai sian iouano, tai sian verloglogiano, tai sian jidomiano vou napano Atua berialio ban naio, tai sian iliano sel iliano dolu napano Niununo jianio ban naio, a dolu tai rijikia vilig iliano nei ka tomu nonovio ajikia nioti nene. A vite nonovio napano kumila jibe na, monoka vagan vatitig namoneano nalo kialo meuliano napano aju na.

<sup>27</sup> Naruei jibe na napano nebereonio, ver ea bogo na, tai jidom sian iliano tai sel iliano dolu tai napano Niununo Lu jianio banio, nina bo ga na. Ver juo ðeli tolu tibe na, bo ga na bunu, mia monoka tuvulu re ve tolu. Mia ail re ve vaarakurano, mia adu bogo vanlo, tai tukamu, karina tai bereio, tibe na. Mia bunu, bogo napano tai ril bisi, toro dolu tai monoka vilig kiano iliano, ka tomu nonovio ajikiaio. <sup>28</sup> Mia ver asidom ka ail sel iliano dolu tibe na, mia maka tai to napano be kiano moroano ka verial nioti na iliano nei, mia ail re bunu sel iliano dolu nalo nei tibe na ea tomu nalo miralo. Mia toro na jibe na tormaro ga, a mijikia ril sel iliano kinkin nei joomo ea niununo ga, napano Atua ga mijikia rijoglubario ave juo.

<sup>29</sup> Ea tivelinio na nalo napano aberial Atua kiano iliano, bo ka nalo ve juo ðeli ve tolu ga ail. Mia bogo napano asian bulag kialo iliano nalo karina, bo ka namoneano dolu nalo aver kialo jidomiano kanio. <sup>30</sup> Ver tai to rioliolu jaka, ana Atua jilogloglar jidomiano vou tai ban namoneano dolu tai napano jotano jo, nina jo mil monoka ribisi beamu ka ridu bogo van dolu na. <sup>31</sup> Tibe na, kami nonovio kumijikia kuvar bogo ka kuverial Atua kiano iliano, napano tai berial tai, karina tai berial tai, jibe na. A mia iliano nalo na amijikia adular tomu nonovio kialo jidomiano, a tomu nonovio amijikia alakakar vite novo ealo.

<sup>32</sup> Iliano novo tai jo, napano memedu ka nalo na abokar moroano nalo nei napano Niununo Lu jianio. Iliano na ber jibe nei, ber Niununo napano jian iliano ban toro, naio maka tutua toro na, mia monoka takii toro nei kiano masouano, napano mia verial iliano nei. <sup>33</sup> Iliano nei ber ka kito monoka roimāu ea bajago novo na jibe napano Atua jidomio, bior napano naio maka rimāu pīlīpīli vija kiano moroano nalo, mia jo miṁauka vite nonovio memedu ea bajago na tumāro.

Mia bo ka kamiu kuvitu kuvila tibe ka napano taara dolu na namoneano lu nalo ajuṁa amilaio, <sup>34</sup> napano ea bogo na lotuano, amila ka tire nalo atu aturmāro ga. Maka ajamo ka tire nalo atumolu ka aver iliano ea sumāno nalo miralo, bior napano jibe ka tuboiano moruo berenio, tire nalo monoka atu mave re atuvulu sumāno nalo. <sup>35</sup> Ver tire nalo ajidom ajikia vite, maka rivu ka avika vikadeniano ve miroano pēli averial kialo jidomiano nalo ve miroano joomo ea lotuano, mia bogo napano ava vonuo karina, amijikia avika von den koalo nalo.

<sup>36</sup> Naina naruei kiaku iliano tealo van kamiu, a maka rivu kamiu tealo aber pēli neber maka rimemedu. Maka kamiu napano Atua kiano iliano lu biedu ea kamiu jukamu, a maka kamiu ga napano kuvijeio. <sup>37</sup> Ver kamiu tai ber pēli naio be toro na verial Atua kiano iliano, pēli naio be toro napano jidomii jo jakii mārabo na Niununo Lu mila meravo banio, naio bo, mia ver jibe na be riano, mia naio monoka rivitilubar ka vite nalo napano nojo nojiri kakario ban kamiu, abe Tubo kiano ilirianiano. <sup>38</sup> Mia ver naio maka vitilubarīo ka kiaku tirikariano nalo abe Tubo kiano ilirianiano, mia kamiu kuvijamo ka re rimāu vija kamiu.

<sup>39</sup> Bo ga, kamiu monoka kuvisidomii vatitig kiaku iliano nalo,

ka kuvisikili ka kuvijev moroano ka kuverial Tubo kiano iliano, mia ver tealo amijev moroano ka ail sel iliano dolu napano Niununo Lu jian banlo, monoka kuvituko vio re ka nalo kuver ala re. <sup>40</sup> Mia ver ala nina, pēli venia bereio, mia monoka ala vite nonovio takii mārabo napano bo a memedu.

## 15

### *Jikili ju bere den mārīano*

<sup>1</sup> Bilbilu nalo, kiniou nojidom noverii bereio Ioluano Vou nei napano nebinimei nomioliolu ka ban kamiu ruei, napano kumijeio, kumitu kumitua kirisikili eaio, ka rila tiniemiu bobogia re. <sup>2</sup> Ioluano Vou nei naruei napano ver kuvitu kuvokar sikili rivu kia ga, naio to rila kamiu kuvokar kenemiu ioruriano. Mia ver maka bunu kuvokar sikili ve verare ka venia napano nomioliolu ka ban kamiu, pēli ver kuvilig van ve dolu, nioti nene ber kumonmonea beamu na ka iakurano ga.

<sup>3</sup> Ioluano Vou nei napano ajian ban kiniou nua beamu, naina naruei nemijeio, neberialio ban kamiu. Kiano iliano na tortoru nalo aberii Kristo, napano naio mila be verare ga ka Tirikariano Moruo berialio nua ruei ka mia naio rilaio, bogo napano naio maka rimeī vo. Ban jibe nei, ber Kristo, naio mārabo bior kito kar kiado kariano nalo, <sup>4</sup> karina amidu naio joa buluvae, mia iorou ka kiano bogoti tolu nene naio jumolu meul bereio, <sup>5</sup> a iorou ka naina naio miyotuba beamu kean Kevas mirano, karina, miyotuba bereio kean nalo duelimo ba juo [12] miralo. <sup>6</sup> Kar iorou ka naina, bogo tai naio miyotuba bereio kean taara tai na namoneano nalo miralo, jovulu toromomou jimo [500], napano miroano ka nalo ameul kia bokar banei, mia tealo amārmāro ruei. <sup>7</sup> Bisi na, naio miyotuba bereio kean Yemesi mirano, karina miyotuba kean atevi nalo miralo,

15:4 Mat 12:40; Imāuo 2:24-32

15:5 Luk 24:34, Mat 28:16,17; Mak 16:14; Luk 24:36; Jon 20:19

15:8 Imāuo 9:3-6

<sup>8</sup> a iorou ka nina ban bereio ea vio mave. Kiniou maka noto ka bogo na, mia siva toru napano kario, Tubo miyotuba vaarakurano bereio, napano naina maariano laka, miyotuba kean miraku. <sup>9</sup> Maka nememedu ka naio rila tibe na van kiniou, bior napano ea atevi nalo nonovio, kiniou nojo yetano kanio, a maka navare ka sio na leleio, bior napano nua, kiniou naruei nojo nomijil nalo na taara na Atua kiano namoneano nalo. <sup>10</sup> Mia Atua be tiniememi toru ban kiniou, bitirilar kiniou ea vio nei napano nojoaio vonganei, a naio be tiniememi ka kiniou jibe na bior titai, bior napano nela kiano imãuano telabo na tortoru. Ee, ðeli nemijikia never ka nemila imãuano nalo jovulu nalo dolu nonovio, mia maka kiniou napano nomiãau, mia Atua kiano tiniememiano nei naruei napano joa kiniou, naio naruei mila imãuano jel ea kiaku meuliano. <sup>11</sup> Mia maka noto nosidomii laka never nomiãau jumabe, ðeli atevi dolu nalo amiãau junãabe, mia vite na toru na jibe na, ka kumemi numiololu ka Ioluano Vou ban kami, a kami kumoneaio.

<sup>12</sup> Naruei bogo napano numiololu ka ban kami jibe na, nuberialio meravo vatitig nuber Kristo, naio mãaro, mia karina meul bereio. A bior napano numila jibe na, nomiilo toru ka nomijog ka kami tealo aju aberver bogo napano ramãaro, ativin kito, a mia ramãaro bo garuei, maka rojikia romeul bereio bogo tai. <sup>13</sup> Jidomiano na maka rimemedu, bior napano ver atu aver ka maka toro tai rijikia tumolu bereio, nioti nene berinavo Kristo bunu maka tumolu bereio. Mia maka leleio, Atua bitirilar naio meul bereio ruei. <sup>14</sup> Ver naio vitirilar re Kristo, rila na numitu numiololu ka Kristo ban kami ka kurano, a kami bunu, kumonea naio ka kurano ga. <sup>15</sup> A ver tibe na, rila na bogo napano numiololu ban kami nuber Atua bitirilar Kristo meul bereio, ðeli numila sibi toru ea Atua siano, ðeli

numitu nuberloglog kami ka vite tai napano maka ve riano. <sup>16</sup> Ver be riano ka toro napano mãaro maka rijikia rimeul bereio, nioti nene ber ka Kristo bunu maka rijikia rimeul bereio. <sup>17</sup> A ver Kristo rimãaro to kia ga tibe na vo, nioti nene ber kenemiu viekouoiano be kurano, a berenio ka kenemiu kariano nalo aju keano ea kami. <sup>18</sup> A bunu, ver Kristo rimeul re bereio den namãariano tibe nei, nioti nene ka kiado bilbilu nalo napano amonea mia amãarmãaro ruei, aban ea vio kouo ruei, bior napano maka toro tai napano rijikia rilarurlo. <sup>19</sup> A verver kiado moneano ea Kristo mijikia rijai kito ea yetemeriba nei ga, mia maka rijikia rijai kito ka bogo napano romãarmãaro eaio. Ver Kristo maka rijikia rilarur kito ea bogo napano romãarmãaro ea yetemeriba nei, mia rivova lie van kito, mia tiniedo riia kar kito mia tiniedo riia kar kito.

<sup>20</sup> Mia makanio, maka tibe na leleio. Nemijikia never rimemedu ka be riano, Atua mila Kristo meul bereio den namãariano, a bitirilar naio jibe mãariesi moti na namoneano nalo nonovio, napano ver ava kovio bogo tai mia Atua mijikia rilalo bunu ameul bereio den namãariano. <sup>21</sup> Nua ea tikariano, toro moti nei Atam buru namãariano binimei ea yetemeriba, mia vonganei, toro dolu nei Kristo mila meuliano bereio den namãariano binimei. <sup>22</sup> Jakii venia napano Atam milαιο, tomu nonovio na yetemeriba monoka amãarmãaro, mia jakii venia napano Kristo milαιο, tomu nonovio na yetemeriba amijikia aleal meuliano. <sup>23</sup> Mia vite nonovio be kialo bogo memedu, bior napano Kristo be moti ka jumolu den namãariano, mia kito namoneano nalo, mia rotu vo rivano-o vokar bogo na naio rimei bereio, naruei mia kito bunu rotumolu den namãariano. <sup>24-25</sup> A kario ka ninei, mia naio rivar bulag niununo va bija simãaro nalo na yetemeriba, a mia naio ve takurano

rive parinio tubo ka vite nonovio rivano-o tovulu moroano va dolu nalo, atu yetano ka jaano. Kario mia naio sian nono navenatuboiano na vite nonovio rivian bere Atua karamãano. <sup>26</sup> A ea uolu nalo napano Kristo mia tuvululo ea bogo na, nina napano naio tuvulu maariano, nina vite nei na namãariano, bija kiano moroano va nalo. <sup>27</sup> Kristo monoka tuvulu namãariano nei, bior napano iliano na beamu mave ber jibe na ruei, ber mia Atua ridu vite nonovio atu yetano ka naio. Naruei iliano nei maka river ka Atua ridu naio bereio to yetano ka Kristo, mia berii vite dolu nalo, napano mia Kristo tuvulu nonovlo. <sup>28</sup> Mia bogo napano Atua ridu vite nonovio atutano ka Kristo tibe na, mia Kristo, tibe Atua kenerinio, ridu naio takurano bereio totano ka Atua, ana mia rila ka Atua naio ve takurano ve Atua ka vite nonovio.

<sup>29</sup> Navan ea bere iliano nei napano berii ber ver kito ramãarmãaro, mia iorou rotumolu bereio. Ana tealó napano amonea jibe nei, aju ajidomii laka kialo bilbilu nalo napano maka lele avaruei ealo ana amãarmãaro. Nalo aju aber ðeli nalo nei maka ajikia ajev meuliano, mila na nalo abaruei bereio ea kialo bilbilu nalo na sialo, napano amãarmãaro ruei. Aju amila jibe na bior napano ga amonea jikili ka kito ramãarmãaro, mia rotumolu bereio.

<sup>30</sup> Mia be verare bunu ka kumemi. Ver kuvisidomii vonio ka venia numitu nubiviuo bogokouo nalo bogo nonovio, numitu nubar jogvaiano jibe na bior ga romonea jikili ka toro na mãaro, mia mijikia rimeul bereio den namãariano. <sup>31</sup> Ee bilbilu nalo, kumemi numitu numimãau jibe na, nemijikia never memedu never kiniou nomijog jibe ka nojo nojuvan kiaku meuliano bior kamiu bogoti nonovio ga. Mia naina bo ga na, bior napano najaaro mia najaaro ka meuliano na kubokario bija kiado Tubo Yesu Kristo. <sup>32</sup> Mia bogo napano nojoa komeli na Eveso, veribinio nalo na vio nei ajibe ka

kuli deden nalo, aju amiaboluo ka kiniou banbano-o, ana bior vaio nojo nojoko vio kalo? Nojo nomila jibe na, maka nejev vite na bo tai leleio na meuliano na yetemeriba nei, mia nojo nomila bior napano nojo nojidomii meuliano nei napano rimeu iorou.

Ver meuliano nei re, bo lie kito rotibe ka kulo dolu nalo ninio napano maka amonmonea, ana aju aber jibe nei, aberinavo “Banei, kito rola jokoluolu, rosidomii re vite tai, bior napano beni, kei mijikia? Ver romãarmãaro, nina bisi naruei, mia maka rejikia vite tai!”

<sup>33</sup> Mia kamiu monoka kuvitakii re jidomiano vovu nalo tibe na, ver makanio, mia iliano dolu nei rimeu rive riano ea kamiu, napano ber jibe nei, ber “Jau koiel vija bilbilu va nalo, mia kialo vovaiano rila niegeniege kiamo bajago novo.”

<sup>34</sup> Kamiu monoka kuve masou, a monoka kuvituvan kenemiu kariano nalo. Neber jibe nei, ðeli kuberianãa nemila niegeniege siemiu, mia monoka never ga, bior napano kamiu tealó maka ajikia vatitig Atua kiano mãarabo na memedu nalo leleio.

<sup>35</sup> Mia ea tivelinio na meuliano bereio den namãariano nei, mia tealó abika jibe nei, aber “Mia ala tomu namãariano nalo atumolu bereio tumãabe?” Peli mia avika tibe nei aver “Nalo napano amãarmãaro kirisiou ruei, mia atumolu bereio vija mokotenalo nalo na jumãabe bereio?” <sup>36</sup> Mia vikadeniano nalo na jibe nei, abe toro kiano vikadeniano napano maka jikia vite. Ver rosidomii kurukuti likiliki nalo napano roju romebijaio, mia rojev verdoðeiano nene. Bogo napano jau komebija kurukuti na vite tai ban ea borotano, komijikia ruei ka mia kurukuti nene monoka rimumunu, monoka rimãaro, mia iorou, mia toti vou mijikia moluo eaio. <sup>37</sup> Vite napano komebijaio, naio be kurukuti tai ga napano mia toa borotano, mia vite napano mia rimoluo rive terivou bereio, naio be todolu tai.

<sup>38</sup> Jibe napano koje komebija kurokuti kinkin nalo, naruei Atua mila abe kialo toti vou kinkin nalo, <sup>39</sup> a beverage bunu ka tenalo napano ameul, napano mokotenalo nalo abe ve dolu kalo. Sunbue dolu tai joa toro mokotenano, a temeul nalo na tano, na tei, ħeli na vio yauo, nalo abe kialo sunbue kinkin nalo. <sup>40</sup> Ana temeul nalo nei, mokotenalo kinkin nalo abe dolu laka ka mokotenano vite kinkin napano aju tiniabene, <sup>41</sup> jibe mĕrenio, a siberio, a mĕarvitano nalo. Ea nalo tolu nei, tai mirano dolu ka tai, a be verare bunu ka tivelinio na mĕarvitano nalo, napano tai, mirano dolu ka tai.

<sup>42</sup> Mia vite nalo nei nonovio, romial ka Atua mila abeve dolu laka, a tena jibe kijokijo tai na mokotenado vou, napano kito napano ramarmĕaro, napano romijikia rodu bogo ka rotumolu romeul bereio. Mokotenado rivan ea bulukuĥili na borotano, tibe kurokuti tai napano amebijaio, napano monoka riminunu, mia iorou, mokotenado vou napano riyotuba, mia maka rijikia rimeu rivova bogo tai. <sup>43</sup> Mokotenado napano ban ea borotano, romialio bova, a buru kokorovio, ana mokotenado vou napano riyotuba iorou, mia roialio kirinovo, jikili vatitigio. <sup>44</sup> Vite napano van ea borotano, naio be terati na kito ea tivelinio na mokotenado ga, mia vite napano riyotuba iorou, naio be terati na kito ea tivelinio na niunudo. <sup>45</sup> A bunu, romijikia rosidomii toro moti nei napano Atua jii, napano be Atam, bija Atam na maariano napano midu joa yetemeriba, napano be Kristo. Iliano tai berenio ber Atam, Atua jii naio binimeu bija mokotenano tai napano meul, ana Kristo, Atua miila naio binimeu bija niununo tai napano be burupati na meuliano.

<sup>46</sup> Jakii nina, romial ka vite na tivelinio na mokotenano, binimeu beamu, mia vite na tivelinio na niununo, binimeu maariano. <sup>47</sup> Toro na beamu nei Atam, Atua mijilar

naio ea borotano na yetemeriba nei, mia toro juo nene nei Kristo, Atua miilalar naio ea vio mave binimeu. <sup>48</sup> Naruei kito tomu dolu nalo, kito napano robe na yetemeriba nei, romidu toro moti na yetemeriba nei kiano bajago, mia kito napano robe na vio mave, romidu nana binimeu ea vio mave kiano bajago. <sup>49</sup> A kito napano romonea, beamu romidu toro na yetemeriba nei mirano, mia vonganei, romidu toro na vio mave mirano. <sup>50</sup> Bilbilu nalo, tenalo napano maluvo ea yetemeriba ga, jibe ka mokotenado, maka rijikia riva joomo ea Atua kiano nave-natuboiano mave, a tenei napano mia rivakovio, maka jikia riva rivokar vio napano mia to tobo to.

<sup>51</sup> Ana mia tumĕabe ka namoneano nalo napano ameul kia ea bogo napano Kristo rimeu bereio? Vite na, tomu miroano maka ajikiaio, ana mia kiniou neberii memedu ban kamiu. Ee, be riano ka kito namoneano tealo mia ramarmĕaro re ea yetemeriba nei, mia ea bogo na, vaarakurano ga, tibe vio bijio, ni-abedo viligio. <sup>52</sup> Jibe ka napano rojetavoko mirado bogo bulati kirisopeli ga, mia rotabujo ka vaarakurano ga simeduo rivio, a mia namoneano nalo napano amarmĕaro ruei mia atarabujo ameul bereio vija mokotenalo vou, a kito bunu napano romeul kia ea bogo na, mokotenado bunu rive terivou. <sup>53</sup> Mokotenado moruo monoka riviligio tibe na, bior napano tena borotano monoka rimeu rive tena vio mave, a tena mĕariano monoka rimeu rive tena mia rimeul tulaka. <sup>54</sup> Mia bogo napano kito rojev mokotenado vou tibe na, mia rila iliano tai na Vivitauiano Moruo rimeu rive riano laka, napano berinavo

*“Meuliano na Atua kiano moroano bar bulag moroano na mĕariano nalo.” Ais 25:8*

<sup>55</sup> Ea bogo na, mia kito reielkuei vite nei mĕariano, rover tibe nei, rover *“Mariano, jau kojidom koto mave, mia vonganei kiamo sebi mĕaro*

garuei. *Kiamo m̄arbutoto ka tulu kumemi jo be vonganei?"*

*Osea 13:14*

<sup>56</sup> Mia kito roil tibe na bior ka tubo-iano napano jo, naio jian moroano ban bajago na kariano joomo ea kiado meuliano, napano mila na robinimej jibe tomu na lakokorov tuboiano, a bajago na kiado kariano nei jian moroano ban m̄ariano na jibe m̄arbutoto napano mijikia tulu kito rañarñaro. <sup>57</sup> Mia siva toru ka Atua, bior napano naio mila kiado Tubo Yesu Kristo napano mije loa moroano na tuboiano a moroano na kariano a moroano na m̄ariano, mila robokar meuliano nei napano maka rijikia ribisi bogo tai.

<sup>58</sup> Bilbilu novo nalo, bior napano Atua mila kirinovo ban kito jibe nei, kamiu kuvitu sikili, kuvikulkulu re tanea vio, a kuvikar rivu ka kuvim̄au Tubo kiano vija kenemiu moroano momou. A bogo na kumitu kumila jibe na, bo ka kuvitu kuvisidomii ka kenemiu im̄auano nei maka tena iakurano, ana mia monoka rivar m̄arati tibe napano Tubo naio jidomio.

## 16

*Veru na asuвано van namoneano nalo na vio Yerusalemo*

<sup>1</sup> Kiniou nojidom nesian iliano tealoo van kamiu ea tivelinio na kuvarbijio veru na ka rijai tomu na moneano nalo na Yerusalemo, napano abiviuo bogokouo, abe talim̄asa laka ea bogo nei. Nejian iliano jibe na ban lotuano nalo reraio ea tanobuku nei Kalesia ruei, mia vonganei nojidom neverial ka kamiu bunu. <sup>2</sup> Nojidom never tibe nei, ka kuvitu re ga tibe na kario kuvisuvan veru bogo napano noyotuba kean kamiu, mia nojidom ka tikar vonganei, ea bogoti moti na sude nonovio, kamiu veve terakurano monoka kuvar torogio ve telisu na venia napano kumije vio, a monoka kuvar vatitigio tu. <sup>3</sup> Mia

bogo napano neviedu, mia rotikar ka rovarvar veru nalo nene rimej vio takurano, a mia kuvitan ea kamiu tealoo ka avar jidomiano nei riva Yerusalemo. A mia kiniou novivitaui m̄esi nalo tai ka avario riva van namoneano nalo na yako, ka verial kamiu vanlo. <sup>4</sup> Maka nejikia vo mia bo ka kiniou vijalo p̄eli makanio, mia neial vonio tena iorou.

*Pol kiano m̄arabo*

<sup>5</sup> Bo ga, kiaku m̄arabo jibe nei, ber kiniou nojidom nesel ea tanobuku nei Masetonia beamu, a karina mia noyotuba kean kamiu. <sup>6</sup> Maka nejikia vatitig vo ka mia noto vija kamiu rivokar bogo vaio, ana nojo nojidomii ka noto vija kamiu ea bogo na niavo napano ju ka rimej, a kario ka nina, kumijikia kuvitii kiniou bereio ea kiaku m̄arabo, ka navan ea vio vabe bereio na navan eaio. <sup>7</sup> Maka nosidom nesel ea kamiu vonganei napano nojo naba Masetonia, bior tibe na mia noto bogo ve telisu laka, ana mia navan yako beamu, karina neviedu, bior ver Tubo rijamo, nojidom ka noto vija kamiu vesiou kija. <sup>8</sup> Vonganei nojo Eveso, a mia noto kea ea vio na navo, rivokar bogo na Jokoluolu na Marayuvi Vou ribisi. <sup>9</sup> Be bogo dulu miroano laka kia ga ka nala im̄auano novo ea vio nei vo, a vite tai bunu, mia uolu nalo miroano ajua vio nei, mia maka nejikia mia netaluvo den vio nei nagi.

<sup>10</sup> Ver kamiu kuvial napano Timoti riyotuba kean kamiu, neber bo, kamiu kuvijuku rivu ka naio, kuvila rijog rivu ka to vija kamiu, bior napano naio jo mila Tubo kiano im̄auano, beberarei ka na nojo nemilaio. <sup>11</sup> Kamiu kuvituvan re ka tomu tealoo avitii rivova ka naio, ana mia kuvitikar vatitig naio ea bajago na tum̄aro, karina kuvidu naio toa kiano m̄arabo ka naio mijikia rimej ea kiniou rivu, bior napano nojo

rorea naio bija kuruado dolu nalo ka asel ea vio nei.

<sup>12</sup> Ea tivelinio na kuruado nei Apolos, nebika kirisikili ban naio ka takisor kuruado dolu nalo nei ayotuba kean kamiu, mia kiano jidomiano kirisikili ka nina maka kiano bogo rimemedu ka rimei. Ana verver ve kiano bogo, ꝑeli mia naio riviedu vonga iorou.

<sup>13</sup> Bilbilu nalo, vaataro ka kiaku iliano ribisi, mia nojidom nover ka kamiu ka kuvitkar vatitig kamiu, kuvitu sikili vatitigio ea kiado mon-eano, kumemebiju re ka vite ninio, a kuvisikili. <sup>14</sup> A vite nonovio napano kumilaio, monoka kuvilaio ea bajago na tinietiiano.

<sup>15</sup> Bo ka kamiu kuvitilubar Stevanas nei vija kiano torogio nalo, vija iñauano napano aju amilaio. Ea tomu nonovio nalo ea kenemiu tanobuku nei Akaia, nalo na naruei napano abe moti ka amonmonea. Mia karina, iorou ka amonea, aju amila iñauano novo laka, aju amija namoneano nalo toru binimej bokar banei. <sup>16</sup> Tomu novnovo nalo jibe nei, bo ka kuvitiri bulaglo ka avuru m̃arabo ka kamiu, a bo ka kuvatove bunu ka tomu dolu nalo napano kumiñau vei bijalo. <sup>17</sup> Stevanas nei jel ea vio nei ruei, naio binimej bija Vojunatas naljuo Akaikas, a nejaaro toru ka nalo tolu. Nalo aju amija vatitig kiniou ka vite telabo, beberare ga ka napano kamiu bunu kumijikia kuvila ver kamiu kuvitua vio nei. <sup>18</sup> Nalo tolu nei amila bo ban kamiu ruei, mia bogo na abinimej ea vio nei amila kiniou bunu nomijog bo laka, amidular kiaku jidomiano. Bo ka kamiu kuyer siva ve toru vanlo bior kialo iñauano jibe na.

<sup>19</sup> Lotuano nalo reraio ea tanobuku na Esia, aberinavo aju ajidomii kamiu laka. A kiado bilbilu juo nei, Akuila naio koano Prisila, bija taara na lotuano na ea kunualo, nalo aber kavijo bo ꝑeli bogiano bo ban kamiu ea Tubo siano. <sup>20</sup> Kiado bilbilu nalo ea

vio nei ajaaro ka aviviuo kamiu ea m̃esi nei, a kamiu bunu, bogo nonovio napano kuviviuo kamiu, bo ka kuvitu kuvanjumemiu van kamiu a kuviniomo babibiniomiu, ka kuvisaaro ka kamiu vija jidomiano novo.

<sup>21</sup> Mia jikar ea vio na telisu nei, kiniou Pol nojo nobokar vovojulu nojo nobivitau ka nesian kiaku iliano maariano van kamiu. <sup>22</sup> Kamiu monoka tiniemiu tii Tubo ve riano, ver makanio, toro napano maka tinien tiio, verikariano na m̃ariano joa naio. Nojo nobolkouo jibe nei, neber Tubo Yesu, neber bo jau komei soꝑeli, <sup>23</sup> a nojo nobolkouo bior kamiu bunu, ka Tubo Yesu kiano tiniememiano to vija kamiu. <sup>24</sup> A jibe bogo nonovio, nemijikia never ea Kristo Yesu siano ka kiaku tinietiiano ban kamiu toru laka ju.

Kiaku m̃esi maaro ga ea vio nei, Kiniou, Pol.

**Mesi juo Napano Pol  
Bivitauiario  
Ban Namoneano Lu  
Nalo Na  
KORIN  
Verialiano Moti**

*Tukunuano bulati na niosi nei*

Mesi juo nene nei napano Pol jirio ba ban namoneano nalo na Korin, naio jirio ea bogo napano binua bogokouo bija namoneano nalo ea yimo lu yako Korin, napano nalo tealó taniel jer naio laka, ana amilkuei keano naio. Mia Pol berloglog kalo ka naio jo jidom jikili ka rila vatitig vovaiano nei, ka rila mia naio vija nalo amijikia ave bilbilu vatitig bereio. Mia iorou, bogo napano abe bilbilu vatitigio bereio naio berial banlo napano naio jaaro mia jaaro.

Ea mēsi nei togio beamu, Pol berii bior vaio naruei naio mil jikili laka banlo ea mēsi tai napano bivitauiario ba banlo. Mia naio ber kalo napano naio jaaro laka ka mijog napano nalo amijog kiano iliano, ana abilig kialo jidomiano ka kialo kariano, a amila vatitig vovaiano nei napano joalo, mia abe bilbilu vatitig bija naio bereio. Mia iorou, naio ber kalo, ber monoka asuvan veru ka asian van kialo namoneano bilbilu nalo na Judia napano nalo maka ve kialo saba.

Ea mēsi nei togio maariano, Pol milkuei jikili ban tomu tai na Korin napano aber ka nalo abe atevi riano mia nalo aju amila bulag namoneano nalo na vio na bija kialo verloglogiano napano maka rimemedu. Nalo aju aber ka Pol maka ve atevi riano, mia naio mil kirsikili ka tukovio kalo, a berial ka naio be Yesu kiano atevi riano.

*Torogio nalo na niosi nei*

*Iliano moti 1:1-11*

*Pol bija namoneano nalo na Korin  
1:12—7:16*

Veru napano ka riva van namoneano nalo na Judia 8:1—9:15

Pol berialio ka naio be atevi riano 10:1—13:10

Iliano maariano 13:11-14

*Iliano moti*

<sup>1</sup> Bilbilu nalo, kiniou Pol bija kuruado nei Timoti, kumemi juo numisaaro ka nubiviuo vija kamiu bereio ea mēsi nei, nina kamiu ea Atua kiano yimo lu, ea komeli na toru na Korin, bija kamiu namoneano lu dolu nalo napano kumitu janea vio ea burumñara tanobuku nei na Kris.

Ea kiano verikariano, Atua bitirilar kiniou Pol ka nemei tibe Yesu Kristo kiano atevi tai, mia vite telabo ka noverialio van kamiu ea mēsi nei, mia beamu ka nina, <sup>2</sup> neber jibe nei ka kiaku volkouano ka mia karamñado Atua bija Tubo Yesu Kristo, naljuo atuvan kialo tiniememiano a tumñaroano toa kamiu nonovio.

*Pol ber siva ban Atua bior kiano tinievuiano*

<sup>3</sup> Kiniou nojidom noilivu laka van kiado Atua nei napano naio be kiado Tubo Yesu Kristo karamñano, a naio be teta novo tai napano be burupati na bajago na tinietiano, a naio be Atua novo napano bujo ka bajago na ililuñiluñiano. <sup>4</sup> Bogo ninio napano kito robiviuo bogokouo, Atua jo mililuñiluñi vatitig kito, ana mila kito rojikili bereio. A kario, romijikia rodu bajago na ililuñiluñiano napano naio mila ka kito, rolaio kija van kiado bilbilu dolu nalo napano aju abiviuo kialo bogokouo nalo, roijalo tibe na.

<sup>5</sup> Be riano laka ka bogo telabo roju robar jogvaiano nalo beberare ka Kristo bario, mia naio mila na romijikia rovar bunu kiano ililuñiluñiano novnovo nalo. <sup>6</sup> Mia bogo napano nubiviuo bogokouo nalo, numijamo ka ga, ka rila ka kamiu kumijikia kuvijog rivu a kuvijikia kuvijev

meuliano. Mia bogo na numialio ka Atua mililupuŝiluŝi kumemi, naio bunu bo laka, bior napano mila ka numijikia nuvilupuŝiluŝi kamiu bereio, a numijikia nuviija kamiu ka kamiu kuvila kenemiu jidomiano ve tebievi ka kuvijikia kuvar dulu vovaiano nalo napano kamiu bunu kuvijikia kuviviuo. <sup>7</sup> Kumemi numisidomii venia napano kubar dulu ruei, mila na ea tivelinio na kamiu, kenememi jidomiano maka rimemebiju leleio, ka mia kamiu tumabe. Nina bior napano numijikia vatitig ruei ka bekurano napano monoka kuviviuo jogvaiano veverare ka napano kumemi nubiviuo, a mia kuvijikia kuvokar burumara ililupuŝilupuŝiano ea Atua bunu, veverare ka napano nubokario ruei.

<sup>8</sup> Peli kamiu maka kuvijoglubar vatitig vo burumara bogokouo nalo napano kumemi nubinua bogo napano numitu numimau janea tanobuku na toru nei Esia, mia nemijikia never ka bova mia bova laka. Vite nalo teremi laka ka kumemi, maka nuvare kalo, banbano numisidomii nuber nina naruei monoka nuvial juluvati na kiado meuliano vonganei. <sup>9</sup> Ee be riano, numijog jibe napano ver toro na toru na komeli tai berial ka mia auebinvin kumemi, mia numialio ka bo laka, bior napano numial ruei ka maka nuvijikia nuvituvan kumemi ga bereio ka mia nuvisikili tumabe. Ea bogo na, numitu numidu kenememi meuliano joa Atua jumano ga, nubalea naio bior napano naio ga takurano be Atua napano mijikia rila toro napano maro binimei meul bereio. <sup>10</sup> A numonea naio jibe na, numial ka be riano, naio milarur kumemi, a vonganei kenememi jidomiano jikili vatitig ka naio mijikia rilarrur kumemi bereio, maka rive vaarakurano ga, a mia naio to rila bogo nonovio.

<sup>11</sup> A kamiu monoka kuvija kumemi napano kuvisidomii

kumemi bogo nonovio ea kenemiu volkouano nalo. Tibe na, bogo napano mia Atua rijog volkouano miroano nei, ana mia rilivu ka kumemi vatitig, rilarrur kumemi den bogokouo nalo nei bereio, a mia kamiu ve miroano kuver siya laka vanio bior venia napano mia naio rila van kumemi.

*Pol bervisivisii vatitig vite na mila naio maka bunu rimei riel ealo*

<sup>12</sup> Kumemi nubar jogvaiano nalo jibe nei, mia vite tai napano jo mila numijog bo laka ea kumemi. Nina jidomiano tai napano joa kumemi napano ber jibe nei, ber ea tivelinio na kenememi bajago kamu ea miremiu, a kamu ea tomu dulu nalo na yetemeriba nei miralo, kumemi numila vite nonovio be lu vatitig, a kenememi meuliano be riano vatitig, jibe napano Atua jidomio. Maka numimau vija jidomiano na yetemeriba nei, mia numimau bija Atua kiano tiniememiano. <sup>13</sup> Vite nonovio napano nubivitauiio ban kamiu ea kenememi mēsi nalo nei, nina vite nalo napano numijikia ka kamiu kuvijikia kuvulukuio, a numijikia ka kamiu kuvijikia kuvuluku lubario. Ana ver vite nalo tai napano kumitu kumijikia beve torogio ga, nejidom ea bogoti nalo napano ju binimei, mia kamiu monoka kuvila von kuvijog vatitig nonovio. <sup>14</sup> Verver tibe na, bogo napano kito nonovio rotu vio takurano ea bogoti na toru nei napano Tubo Yesu rimei bereio, mia kamiu kuvisaaro laka ka kumemi, a mia kumemi nuvisaaro laka ka kamiu.

<sup>15</sup> Mia bior napano nomijikia vatitigio ka jidomiano novo na jibe na ju iviso ka kito ruei, nojidom laka ka bogo napano nojo ka navan ea tanobuku na Masetonia, mia nomei ka namaluvo kean kamiu. <sup>16</sup> Riano, nojo nojidomiiio ka nesel ea kamiu ea bogo ve va juo ruei, beamu ea bogo napano nojo nabano

Masetonia, a juo nene ea bogo napano nojo nebinimeĩ bereio, napano neberiaña mia kamiu kuvitii kinioiu noto vatitig ea kiaku m̃arabo ka navan yako Yutea, mia be deio. Nojidom nola rivu ka kamiu tibe na, mia tibe napano kumijikia ruei, maka bunu nejikia nalaio.

<sup>17</sup> Mia nejidom ka kamiu monoka kuvijikia vatitig ka bogo napano nojo nojidomii ka neviedu kean kamiu, naio be vite tai napano nojidom laka ka nalaio, napano kiaku jidomiano jikili laka kano. Naio maka ve vite tai napano nobitoviton eaio, napano nojo nojidomii ka navan p̃eli mia navan re. Makanio, kiniou maka netibe tomu ninio napano maka kojikia komonmonea kialo iliano, <sup>18</sup> mia jibe napano kumijikia kumituvan ga Atua kiano iliano, kumijikia kumituvan ga bunu kenememi iliano. Kenememi “Ee” maka verenio “Makanio” p̃eli “tibe na kovio,” <sup>19</sup> mia bogo numitu nuberenio “Ee” be “Ee” ga. Kumemi monoka nuve riano tibe na, rila ka nuveverare ka Atua kenerinio Yesu Kristo, nina napano kumemi tolu Silvanus a Timoti, nubinimeĩ numioliolu ka ban kamiu nua ruei. Ea bogo na nuberial ka kiano iliano nalo abe riano bogo nonovio, bior “Ee” kiano be “Ee” bo garuei, <sup>20</sup> a verikariano nonovio napano Atua berialio ruei ea tivelinio na Yesu, maka tai napano rimeĩ tibe sibiano, mia abiniu abe riano. Vite na naruei mila na bogo napano roju roboldkouo ban Atua, ea kiano tikariano banbano-o bokar napano rober “Mm,” kito rotu rola ea Yesu Kristo siano. <sup>21</sup> Kristo na naruei napano numioliolu ka ban kamiu, a Atua ga bitiri bulag kumemi ka nuvila kiano iñauano. A bija naina, Atua mila kumemi bija kamiu, kito robiniu robinimeĩ vio takurano ea naio. <sup>22</sup> Atua bijauia kito ka robe kiano, naruei naio jian Niununo ju joomo ea kito, jibe verikariano tai ka mia kitoliko naio ea bogo nonovio

napano ju ka rimeĩ.

<sup>23</sup> Kiado Atua nei be riano bogo nonovio, a naio mijikia rijai iliano nei napano nojidom noverialio van kamiu. Jibe napano beamu neberio ruei ka mia noyotuba kean kamiu yako Korin, mia karina maka neviedu, a p̃eli kumisidomii niegeniege kiniou biorio. Mia nojidom noverial van kamiu ka naio maka rivior kiaku vite tai, mia bior kamiu ga, ka napano nemijikia ver neviedu, mia monoka neil sikili van kamiu rivior kenemiu bajago tealó. Mia maka nosidom ka mia nola kamiu kuvijog rivova, naina naruei mila na maka bunu neviedu. <sup>24</sup> Kiniou nemil ban kamiu jibe na, neber bo ka kuvisidomii re kuver nuvisidom nuvitu loa kamiu, ka nuvidu tuboiano loa kenemiu moncano. Maka tibe na, mia kumemi numisidom roim̃au vio takurano ga, ka rila kamiu kuvijikia kuvijog rivu bogo nonovio, kuvisikili kuvitu sikili rivu ea kenemiu viekouoiano.

## 2

<sup>1</sup> Jibe na napano neberenio, nua na nebinimeĩ beamu, tenalo tai napano monoka noil van kamiu riviorio, napano mila kamiu kumijog bova. Mia vonganai maka nosidom noviedu nala kamiu kuvijog rivova ve vaarakurano bereio, a jidomiano na naruei mila maka neviedu noyotuba kean kamiu na vo. <sup>2</sup> Ver neviedu neil van kamiu, nala kamiu kuvijog rivova, mia kiniou bunu monoka nojog rivova, ana bogo napano kito roviniu rojog rivova tibe na, mia maka bunu tai napano mijikia rijai tai ka rijog rivu bereio. <sup>3</sup> Jidomiano na naruei neberialio ea m̃esi tinene na napano nemijiano biedu beamu ruei. Kiniou nojidom ka kuvila von vovaiano nalo na rimemedu beamu ka rila ka verver bogo napano neviedu, mia maka bunu tenalo tai tu iviso kean kamiu napano mia monoka nojog rivova ka kamiu riviorio. Ana ver kamiu kuvila kenemiu iñauano rimemedu,

mia nemijikia neviedu neialio napano kubinimei bo bereio ruei, mia tibe na, nasaaro laka, a mia kiaku saariano nene rila kenemiu saariano bunu rive toru laka.

<sup>4</sup> Neber jibe na bior napano bogo na nebitau biedu ban kami nua na, nomijog bova laka garuei. Nomijog jibe kiaku iviso vaataro vuru kokorovio, a jogumiraku aju ajibiribil. Iliano na jikirkili nalo napano neber ka kami ea mēsi nei, maka nala rivior napano nojidom ka nala kami bunu kuvijog rivova, mia nojidom nala ka kami kuvitilubar ka kiniou nojo tinieku jii laka kami bogo nonovio.

<sup>5</sup> Naruei jibe napano kito nonovio romijikia, toro tai jo iviso ka kami napano naio mila buruñara jaleleano nei. Nojidom never ka jaleleano napano naio milai, mila kiniou nomijogio bova, mia maka kiniou ga, mila kami miroano kumijog bova bunu. Mia maka nosidom never ka kami monoka kuvijev vironiano laka van naio bereio, <sup>6</sup> bior napano nemijikia ka kami nonovio kumil ban naio ruei. <sup>7</sup> Kami kumil ban naio bare bo naruei, mia vonganei be kenemiu bogo ka kami kuviekokoaio, tiniemiu riia naio bereio. Ver makanio, mia naio rijog rivova laka bereio, rivano-rivova ka naio. <sup>8</sup> Ee, nejikili ka nebika den kami jibe na, ka kami kuvila meravo rivu van naio ka kami tiniemiu jii naio keano vo.

<sup>9</sup> Kiniou nejirii mēsi dolu nei nua na, nojidom nevitii veveio ka mia kami kumisaaro ka kumonea kiaku iliano nalo napano juaio, pēli makanio. <sup>10</sup> Bogo napano neber bo ka kuviekokoa toro tai, nomonea ka mia kuvilaio, a nana napano kubiekokoaio, kiniou bunu nebiekokoaio. A maka nejikia, pēli naio mila vite nalo tai bova kean kiniou bunu, mia kiniou najaaro ka noverial ea Kristo mirano ka nebiekokoa naio, a tibe na, rijai kami bunu ka kuvisaaro ka kuviekokoa

toro dolu. <sup>11</sup> Kito monoka rovtikar vatitig bior napano romijikia ruei Siñaro kiano jidomiano va nalo ka rila bulag kito, ana ver rotu roviekokoa kito bogo nonovio, mia naio maka rijikia tuvulu kito leleio.

*Pol berii kiano m̄arabo ka rivan yako Troas bija Masetonia*

<sup>12</sup> Ana bogo napano maka bunu neviedu kean kami yako Korin, naba nomioliolu ka Kristo kiano Ioluanou Vou ea komeli na Troas, a ea vio na, nemial jibe m̄aratavo betavo bo ban kiniou ka nala Tubo kiano im̄auano. <sup>13</sup> Ana vite va tai ea bogo na, nojidomiio ka mia neial kuruaku nei Taitas ea vio nene, mia naio maka to. Ana kiaku jidomiano jidom dede laka ka naio, mila na maka vesiou nojuvan nalo nei, nojoa kiaku m̄arabo bereio nemijaka ea tanobuku na Masetonia.

<sup>14</sup> Kiaku ieliano ban jibe nei naruei, mia siva toru ban Atua, bior napano bogo nonovio naio ji Kristo ju ka vurim̄arabo ka kito. Beamu, kito robe kiano uolu ga, mia naio buru bulag kito ruei, ana rotakisor naio ravan ea vio nonovio, ana bogo na tomu nalo aial kito, mia avitilubarario ka Kristo naio be kiado Tubo. Peli nemijikia never tibe na, kito rojibe ka bonotanunu novo tai napano amisebi, napano jo miou janea vio reraio, ana bogo na tomu nalo amijugunio, mia amijugun lubario ka Kristo jo moluo ealo. <sup>15</sup> Atua mila bonoti nene ban ea tomu nonovio, ba bokar nalo napano aju aban ea m̄arabo na ioruriano, a ba bokar nalo napano aju aban ea m̄arabo na nakovioiano. <sup>16</sup> Ana ea nalo napano aju aba kovio, bonoti nene bova jibe vite tai na m̄aro joo, mia ea nalo napano aju amijev meuliano, naio jibe bonoti novo na tanunu na meuliano.

Nina naruei romial ka im̄auano na numitu numilaio, naio be im̄auano na toru tai, bior nomioliolu ka Atua kiano iliano napano rijikia rila ka toro rijev meuliano pēli rijev

ñariano. <sup>17</sup> Verialiano tealo dolu maka asidomiio ve temi ka iñauano nei, nalo aju amioliolu ka Atua kiano iliano amila von ka ajev veru eaio ga, mia kumemi maka tibe na. Atua bitiri bulag kumemi, a nimiñau ea vio medave kamu ea mirano, nuberloglog Kristo kiano ilirianiano nalo, ban tomu dolu nalo maluvo ea moroano napano naio jian ban kumemi.

### 3

#### *Kumemi nube tomu na nuvila iñauano na verikariano vou*

<sup>1</sup> Kiniou neberii kenememi iñauano na toru mave nei, maka rivu ka kuver ðeli numitu numil ðarou jibe naverloglogiano sibisibiano dolu nalo nei. Nalo na abinimei ea kamiu bija ðesi nalo napano aberiilo ana aber ka monoka kuvivitau ea ðesi nalo tealo bereio ka averii kialo iñauano, napano amijikia avario avano. Mia ver kumemi nuvisidom nuvan ea vio dolu tai, maka nuvisidom ðesi ninio tai na jibe na ka verial kumemi. <sup>2</sup> Ver toro tai jidom rijikia ka kumemi juñabe, bo ka rimei rial ðarati na kenememi iñauano ea kenemiu meuliano nalo ga. Kamiu na jibe ðesi tai ruei, napano Kristo ga bivitauia berial kenememi iñauano. Tomu dolu nalo amijikia amei avulukuio, ka ajikiaio venia napano naio jirio ea kenememi iviso nalo. <sup>3</sup> Mia aial kamiu jibe kamiu ðesi tai napano Kristo jiano, a kumemi nubario binimei, a mia ajikia avitulubario ka be riano, numila iñauano ea kamiu bo laka. Mia ðesi nei maka ðesi napano uei na vovojulu jirio ea ðati niosi, mia be ðesi napano Atua kiano Niununo jirio ea toro kiano iviso.

<sup>4</sup> Jibe na, kiaku iliano nalo nei maka ave ilimoruoiano, mia kumemi numijikia nuvil tibe na bior napano Kristo ga naio mila napano nubalea ga Atua toru laka. <sup>5</sup> Verver kumemi ga, mia maka nuvijikia nuver ka nubare ka nuvila vite

tai, bior napano vite nonovio na numilaio, Atua ga mila na nubare ka nuvilaio. <sup>6</sup> Naio naruei jian moroano a jikiaiano ban kumemi, mila kumemi nubinimei nube tomu nalo na kiano iñauano ea tivelinio na verikariano vou napano naio mila bija kito tomu nalo na yetemeriba. Verikariano na beamu, ajiri bulag kiano iliano nalo ea niosi lu nalo na Mosis kiano tuboiano, mia iliano nalo nene amijia kija kito telisu mia maka rivare. Nalo abo, mia venia napano amilaio, amilaio meravo ga ka kito tomu nalo na lakoroviano na tuboiano, napano mia monoka roviviuo ðariano rivorio. Mia verikariano vou, kiano iliano nalo amaluvo ea Niununo Lu, a Niununo nene naruei mila kito romijikia rojev ioruriano.

<sup>7</sup> Marabo moruo re nua nene, napano aje kiano tuboiano nalo ea subaveru nalo, naio jo berkar ðariano ga ban kito, mia be vite lu tai laka. Bogo napano Mosis ba bar subaveru nalo nei, Atua kiano mermerano binimei eaio, ana bogo napano bar veru nalo nei ban tomu nalo na Israel, moroano na mermerano nei jo batove ruei, mia nalo maka ajikia avitii mirano bior napano merera mia merera kilkil laka. <sup>8</sup> Jibe na, ver Atua kiano mermerano miñau kirisikili ea bogo napano aberial ðarabo na avokar ðariano, mia riñau tuñabe ea bogo napano mia averial ðarabo na avokar meuliano? <sup>9</sup> Mia Atua kiano mermerano monoka riñau ve toru laka garuei ea bogo na, a kito roju romial ruei napano miamoiano na ðarabo vou jo merera janea vio, jo juvulu miamoiano na ðarabo moruo nei napano jo batove ruei. <sup>10</sup> Ee, miamoiano na ðarabo moruo nei merera vatitig nua, mia von-ganei, romialio ka kiano miamoiano jibe ka maka bunu merera vatitig leleio, bior miamoiano na ðarabo vou mijedulu, jo merera toru laka ea vio nalo. <sup>11</sup> Miamoiano napano jo batove nei, be riano ka naio binimei beamu, binimei bija

kiano burum̃ara mermerano. Mia vonganei, miamoiano vou napano binimeĩ vonga iorou, mia naio to tulaka, a kiano mermerano toru laka garuei.

<sup>12</sup> Ver kito rosidomii nina, mia rila kiado jidomiano sikili vatitig, a romerou re ka rala Tubo kiano miamoiano rimerera ea vio reraio. <sup>13</sup> Mia rosidomii bunu tormoruo Mosis, napano bavin ea burusuku, ana Atua binimeĩ vaataro kanio, mila mirano merera laka. Mia maka rivu ka rotibe ka naio, bior bogo napano naio batove binimeĩ bereio ea tomu nalo na Israel, naio jovuko mirano bija kulum̃arauo ka aialio re, vano-o rivokar bogo na kiano miamoiano to rivatove rivano-o ribisi. <sup>14</sup> Ea bogo na, makalele aial miamoiano nene, bior napano pariparilo kirisikili laka, mia romial bokar banei, ajibe na kia bunu. Nalo aju abuluku iliano nalo na niosi moruo napano aju, mia jibe napano kulum̃arauo nene jo keano, jo joko kialo jidomiano. Mia ver amonea Kristo ga, mia naio mijikia ridular kulum̃arauo nene ka ajikia avitilubar kiano miamoiano vou. <sup>15</sup> Bogo napano abuluku Mosis kiano Tuboiano, jibe napano vite tai jo jetavoko pariparilo, <sup>16</sup> mia bogo napano toro tai binimeĩ ea Kristo, amidular vite na napano joko kiano jidomiano, ana naio mijikia rivitilubar vite. Jibe ga iliano na Vivitauiano Lu nalo napano berii tormoruo Mosis nene, berinavo “Bogo napano Mosis bilig naio bitikar Tubo, kulum̃arauo nene jaluvo den naio bereio.” <sup>17</sup> Ana bogo napano iliano nei ber ka Mosis bilig naio bitikar Tubo, iliano nei Tubo jo ber ka nina napano Atua kiano Niununo Lu. A kito romijikia ka vio vabe Atua kiano Niununo joaio, tomu nalo amijikia ataluvo den mo-roano na vovaiano, ana amijikia ajev meuliano.

<sup>18</sup> Jibe na, kito nonovio napano romonea ruei, maka bunu kulum̃arauo tai to toko mirado, mia roju robitii memedu burum̃ara Atua

kiano mermerano. A bogo napano roju robitii, Atua kiano mermerano nene jo binimeĩ bujovujo ea kito bano napano robinimeĩ jibe mermerobi ka merera bulag kiano miamoiano van tomu dolu nalo. Mia miamoiano nene maka taluvo den kiado meuliano, miyotuba den kiado Tubo, napano naio be Niununo na napano joa kito.

## 4

*Pol naliko atevi nalo amioliolu ka miamoiano na Ioluanu Vou*

<sup>1</sup> Kumemi numitu numerera bulag Atua kiano miamoiano jibe na, naio be kenememi iñauano na toru tai ka nuviija tomu dolu nalo. Atua kiano iviso bujo ka tinievuiano, a naio naruei jian iñauano nei ban kumemi, a bogo napano numisidomii nina, mila na maka lele tiniememi maro ka nuvilaio. <sup>2</sup> A bogo napano numim̃au, numitu numim̃au memedu bo bogo nonovio. Tomu tealo amijikia amim̃au lukluk bena ga na amila sibisibiano ga ka avuru tomu nalo kialo jidomiano, a amijikia bunu aviligvilig Atua kiano iliano riva rive dolu, mia kumemi maka nuvila bajago kinkin nalo na jibe na. Kumemi numijikia ver bogo na numitu numim̃au, numitu numila ea Atua mirano, ana monoka nuvila vatitigio. Tomu nalo dolu bunu aju abitivitii kenememi iñauano, a aju amijog bo kanio, bior napano aju abitilubar ka numitu nuberial Atua kiano ilirianiano nonovio nalo me-medu ga.

<sup>3</sup> Kumemi numioliolu jibe nei, maka toro tai napano mijikia river ka naio maka rijikia rijogkar Ioluanu Vou napano numitu nuberialio. Mia ver tai river ka maka meravo ka naio, nina maka tai napano jo barlaka ka legiano, mia monoka tai napano jo barlaka ka melijokouo ga, napano monoka ve vite tai ka toko kiano jidomiano, jibe kulum̃arauo neibano roberii ruei. <sup>4</sup> Ea tivelinio na nalo napano maka amonea vo, tubo va na yetemeriba nei naio

jetavoko kialo jidomiano ruei, naio milalo jibe abe merebono, bior napano naio maka sidom ka avitii burumara miamoiano na Kristo kiano Ioluano Vou. Kristo nene kiano mermerano merera laka, bior napano naio bar mirano Atua ga memedu.

<sup>5</sup> Kumemi numitu numioliolu ka nina naruei, ninei Yesu Kristo, kiado Tubo. Maka nuvitu nuvidular kumemi ka kamiu bereio, mia kumemi tomu na imauano na kenemiu ga, ka nuvioliolu ka Yesu van kamiu ka kuvijikiaio.

<sup>6</sup> A vite nonovio nei be Atua kiano imauano ga. Ea tiiano, Atua ber jibe nei, berinavo “Mia miamoiano rimei mereralii melijokouo napano jo,” a jo mila jibe na kea ban kito. Nina ga Atua nei napano jo miñau vonganei, mila kiano miamoiano merera ba joomo nonio ea kito, mila robakar miamoiano nei napano jo merera binimei den Kristo mirano, napano miyotuba nonovio ea Atua kiano mermerano napano joaio.

<sup>7</sup> Jikiaiano nalo na miamoiano na Atua kiano mermerano joa kito jibe na, be vite novo tai napano be lu laka. Ea kumemi napano numila Tubo kiano imauano, numial jibe kumemi nube vite kurano tai ga, a maka nuvare ka kiano tolu novo nalo nei ajua kumemi, mia Atua naio bo, jo misonio ea kenememi meuliano julaka. A nina mila ka ver bogo tai nuviñauka vite tealo na bo, ana mia nuvitilubar ga ka moroano ve toru ka nuviñauka vite nalo nei maka moroano tai na yetemeriba nei napano maluvo den kumemi, mia be moroano tai na tiniabene napano maluvo den Atua ga.

<sup>8</sup> Naruei numitu numiñau bija moroano nene mijai kumemi toru, bior napano numitu nubiviuo bogokouo telabo, ana maka nuvitibirbil vo. Vite telabo amila kumemi numisidomii vonvon laka, mia kenememi jidomiano maka riva kovio.

<sup>9</sup> Tomu telabo amila bulag vatitig kumemi, mia Atua bitikar kumemi julaka. Kumemi nubar jaleleano nalo, mia maka ajikia aue bulag

kumemi, numeul kia vo. <sup>10</sup> Be riano, bogokouo ban kumemi jibe na naruei, rivano-o jogvaiano na marioano nalo ajua mokotenememi nalo jibe napano Yesu bario ea kiano marioano. Mia kumemi numituvanio ga, bior napano ver Yesu kiano marioano joa kumemi, mia kiano meuliano toa kumemi bunu. <sup>11</sup> Kumemi numiñau Yesu kiano jibe na, mila na bogo napano numitu numeul ea yetemeriba nei, mia bogo nonovio numitua ga juluvati marioano, ana mia mila ka kamiu bunu kumijikia kuvitii ka Yesu kiano meuliano jo malmaluvo toru ea mokotenememi na marioano nalo. <sup>12</sup> Be riano numitu nuban ka nuvokar kenememi marioano, mia numila jibe na ka kamiu kuvijikia kuva kuvokar kenemiu meuliano.

<sup>13</sup> Iliano tai joa Niosi na Iouano Lu nalo, napano toro tai mil, ber

*“Kiniou nomonea ruei, naruei mila na kiniou nemijikia neverial iliano,”*

*Sam 116:10*

a numialio jibe niununo na viekouoiano napano joa toro na, vonganei binimei toru ea kumemi bunu. Kumemi numitibe ka naio ga, napano kumemi bunu numonea, a vite venia napano numonmoneaio, nina naruei numijikia nuverialio.

<sup>14</sup> Mia maka numerou ka nuverial leleio, bior napano numijikia vatitig ka kiado Atua napano mila Tubo Yesu meul bereio den namarioano, mia naio mila kumemi bunu numeul bereio jibe Yesu, a mia kamiu bunu kumeul bereio tibe kumemi, ana mia naio rivuru kito nonovio ravan rotu vijaio. <sup>15</sup> Ee, kumemi nubardulu bogokouo telabo jibe na, mia bo ga, bior napano naio be kenememi marabo tai ka nuvijikia nuviiija kamiu. Kumemi numisidom ga ka Atua kiano tiniememiano monoka to rivanvano-o tulaka ea tomu nalo ea vio nonovio, ka rila aiaia Atua bogo nonovio, atu aver siva ka naio rivano-o rila kiano mermerano to rimei ve toru lie.

<sup>16</sup> Jidomiano novnovo nalo nei mila buriakurano napano bova ban

kumemi jum̃abe, mia numitu jikili bo ga numitu. Ea tivelinio na mokotenememi, jo binimeis be kulu moruo, jo binimeis burukokorovio, mia tivelinio na niunumemi, Atua jo mila binimeis be terivou, jikili vatitigio ea bogoti nonovio ga. <sup>17</sup> Bogokouo tertelisu nalo na yetemeriba nei nalo abe tena bogobulati ga, mia aju amila kitoroju vatitig ka ravar dula ka rotua mermerano na tiniabene, napano toru laka, bo laka juvulu loa, napano mia roturojog rivu kanio to toboto. <sup>18</sup> Vonganeikiado jidomiano maka toa vite nalo napano mirado jo bitikario, mia kiado jidomiano toa vite nalo napano mirado maka rijikia aialio, kario napano vite na mirado mijikia rialio, nalo abe tena ga bogobulati ea yetemeriba nei, mia vite na mirado maka rijikia rialio, nalo abe tena tu dañariga ea vio mave.

## 5

### *Kiado vio ea vio mave*

<sup>1</sup> Kitoromijikia ruei ka mokotenado ea yetemeriba nei, maka rijikia to tulaka. Naio jibe tabobo tai na telisu napano roju rojuluku eaio, napano mia bogotai monoka mom̃avu garuei, ðeli tomu dula nalo amijikia amei aue bulagio. Mia romijikia bunu ka kunuado dula tai na jikili toru jo, napano maka aim̃aukanio ea vio yetemeriba nei, mia Atua ga mila vatitigio ju be kiado ea vio mave, ana iorou romijikia rava rotuaio. <sup>2</sup> Yetemeriba nei jibe vio na tegiano ga, a rajaaro ga ka rataluvo denio, rojidom rava rotoluku ea kunuado na mave. <sup>3</sup> A bogonapano mia rava rotuaio, mia maka bunurojog ka maka ve kunuado tai, mia roialio navo ka kiado vio memedu jo.

<sup>4</sup> Ee, mokotenado jibe tabobo tai napano rojuluku eaio ea yetemeriba nei, be riano ga, bogonapano roju jibe na roju rejerjerm̃i julaka bior jidomiano kokouro nalo na bogokouo nalo napano roju rabarduluio.

Peli bova ka amei auebinvin bulag mokotenado, mia jidomiano tai monoka toa kito ka ver alaio, bo ga na, bior napano bo laka ka rotaluvo den tabobo nene, rava rotua yimo novo tai beamu. Monoka rovitilubar ka bo laka mokotenano na m̃ariano nei ribisi, ana mia mokotenano vou tai na meuliano mijikia rimeis ridu jeleigio. <sup>5</sup> Bogobe ruei, Atua jo mim̃au ka rila vatitig kito ka ravan ea kiano vio tibe na naruei. Naio midu Niununo joa kito ka rila rosidomial tulaka ka kiano verikariano ka rila tibe na ka kito mia rimeis ve riano ga.

<sup>6</sup> Kitoroju rojidomial nina, mila na bogononovio ga kitorojikili. Romijikia ka vonganei, roju romilakiado vonuo ea tabobo nene, napano be mokotenado, mia maka rotua kiado vonuo novo na vija Tubovo. <sup>7</sup> Tibe na, bogonapano roju kia ea yetemeriba nei, monoka rola von re roturotua venia napano mirado ga mijikia rialio, mia monakorotusikili ea viekouoiano. <sup>8</sup> A ea tivelinio na kumemi, numitu kirisikili vatitig kea ka nuvitua yetemeriba nei ka nuvila kiano im̃auano, mia nubitii ka bo lie bunu ver nuvijikia nuvituvan mokotenememi na yetemeriba nei, nuva nuvitua kenememi vonuo memedu vija Tubo. <sup>9</sup> Jibe na, ver kitorotua yetemeriba nei, ðeli rotumave, mia tulaka monoka rola von ka rola venia napano mia naio saarokanio. <sup>10</sup> Monoka rosidomii ka bogonapano Kristo riva totano mave ea kiano jobaro lu na tibureiano, mia kito ve terakurano monoka rava rosikili rotua mirano. Naruei ea bogona, mia naio ga rila ka mia rivuvan kito, ðeli rivova van kito, takii ga venia napano roju romilaio bogona rojua mokotenado na yetemeriba nei.

### *Kristo mila kiado merevuiano bija Atua*

<sup>11</sup> Bogonapano tiniememi maio ka Kristo tibure tomu nalo, numerou, a numial jibe bo ka nuviñau sikili

ka nuvuru tomu nalo ka avakovio re. Atua bitilubar batitig bajago na kenememi iñauano nalo nei, a neber ðeli kamiu bunu kubitilubar ka numiñau jibe na ga napano naio jaaro kanio. <sup>12</sup> Kiniou nojo neberii vite nalo nei, maka nala rivior napano nojidom ka kamiu kuvidular kumemi bereio, mia bo ka kuvijikia kuvisaaro ka venia napano numitu nuberenio. Ver kubakar vatitig kenememi iliano nalo, mia rila na iliano nalo nene amijikia atua kamiu, ana mia kumijikia kuverdoþe nalo napano aju aber ðeli abo ruei. Mia nalo aju amil vavavin ealo ka venia napano aju amilaio ea tomu nalo miralo, mia maka tiniel maio ka venia na ju joomo ea kialo meuliano.

<sup>13</sup> Nemijikia ka bogo napano neber iliano nene, mia ve tealo napano atu vija kamiu napano monoka aver nomiavovu, mia nina bo ga na. Ver be riano ka numiavovu, numiavovu bior napano numila Atua kiano iñauano nalo ñelea, mia ver numitu parimememi bo ga, parimememi bo ga bior napano tiniememi maio ka kamiu, ana kamiu monoka kuviagago ka kumemi. <sup>14</sup> Vite takurano ga jo jilanvuu ka kenememi meuliano ka nuvila Kristo kiano iñauano novo nalo, naina kiano tinietiano. Kumemi numonea jikili ka kiano ñariano naio takurano mijikia rilarur kiado meuliano nonovio, ver ðeli, mia kito nonovio monoka romarmaro ga, mia maka kito tai na rijikia rimeul. <sup>15</sup> A naio ñaro kar kito nonovio jibe na, naio jidom ka kito napano romonea naio a roju romeul kea ea yetemeriba nei, maka bunu roiñau kiado ga, mia roiñau kiano napano naio ñaro ka rilarur kiado meuliano nalo, karina Atua bitirilur naio bereio.

<sup>16</sup> Jibe na, bo ka rovitii re bunu tomu nalo takii jidomiano na yetemeriba nei. Beamu, bogo napano Kristo joa yetemeriba nei, tomu nalo aju abitii naio jakii jidomiano na yetemeriba nei, ana vonganei, rovi-

tii re bunu naio tibe na, a maka rivu rotu rovitii tomu dolu nalo takii jidomiano na yetemeriba nei bunu. <sup>17</sup> Nina bior napano toro kei napano ver rimonea Kristo, naio rimei tibe toro terivou tai garuei. Kiano meuliano moruo na re nua ba kovio, a vonganei, kiano meuliano vou maluvo ruei. <sup>18</sup> Atua ga rila ka romijikia rovilig kiado meuliano tibe na, bior napano naio miila Kristo binimei ea yetemeriba ka rila kiado ñarabo ka romei bereio ea naio, a jidom ka kito monoka rovuru tomu dolu nalo bunu amei eaio. <sup>19</sup> Jibe na, Atua miñau jel ea Kristo ka rivuru tomu nalo na yetemeriba amei ka ave takurano vija naio bereio, napano maka bunu sidomii ka sian vironiano vanlo bior kialo kariano. A bija nina, naio jidom ridu kiano iliano toa juñado, ka rodu rivan ea kulo dolu nalo ka nalo bunu amei bere eaio. <sup>20</sup> Vite na naruei mila na kumemi nubinimei nube Kristo kiano tomu nalo ka nuvar Atua kiano iliano rivano. Tibe na, bogo napano nuberial iliano ban kamiu, jibe napano Atua ga jo mil, ana numisidom laka ka nuvika sikili van kamiu nonovio bereio nuber bo, ea Kristo siano, kamiu monoka kumei bereio eaio. <sup>21</sup> Naio naruei tinien miia laka kito, ana midu kenerinio nei Kristo, napano maka leleio rila kariano, miila naio binimei jibe toro na bar kiado kariano nonovio robiniu. Atua mila jibe na ban naio ka rila kito tomu na romila kariano, romijikia romei rove tomu memedu nalo ea Atua mirano.

## 6

### *Meuliano jikili ban Atua kiano naiñauano*

<sup>1</sup> Kumemi numiñau jibe tomu nalo na amimau vei bija Atua, a numijikia juñabe ka naio be tinievu laka ban kito robiniu. Tibe na, numisidom nuvika sikili van kamiu, ka kiano tinievu novo napano binimei ea kamiu, maka rivu ka rimei kurano ga. Kamiu monoka kuviduio, a monoka kuvituvan rila

kiano iñauano ea kenemiu meuliano. <sup>2</sup> Iliano tai napano joa Niosi Moruo ber jibe na ruei, napano Atua ber jibe nei, berinavo.

*Memedu ea bogo napano bo ka kamiu, kiniou nomiagago ka kenemiu tegiano nalo,*

*a memedu ka bogoti na ioruriano, kiniou nemei neiija kamiu.*

*Ais 49:8*

Naruei ea kenememi vitiiano, numijikia nuverial ka vonganei be kenemiu bogo memedu naruei, vonganei naruei be bogoti na kenemiu ioruriano.

<sup>3</sup> Ea tivelinio na kenememi iñauano, numitu numila von kirisikili ka nuviñau kanio rimemedu tulaka, ka nuvituko m̄arabo re ka tomu ninio napano ajidom amei. Maka nuvisidom ka kulo dolu aver ka numila vite tai kirivova, p̄eli numilaluvu iñauano tai kovio. <sup>4</sup> Numitu numila vite nonovio ga ka riverial ka numitu numiñau memedu jibe tomu novo nalo na Atua kiano iñauano, naruei numitu numijamo ka nuviviuo vite ve miroano. Numitu nubakar kumemi ka nuvar dulu ka nuvila nono vatitig iñauano nalo, kumemi nubinua jaleleano nalo, bogokouo nalo, a jogvaiano nalo.

<sup>5</sup> Nalo ajumolu amilkuei kumemi, a abitiv kumemi, a abuku kumemi ea nalakoiano. Bogo miroano, numiñau mia numiñau, maka numonmelio rivu, a maka simemi sinaniano rivu.

<sup>6</sup> Bova laka ka kumemi jibe na, mia numitu numiñau memedu ga, a numitu numiñau bija jikiaiano, bija jidomiano na tebievi, a bija tinievuiano. Tomu nalo amial ka kenememi meuliano bujo ka Niu-nuno Lu, a kenememi bajago bujo ka tinitiiiano na be riano, <sup>7</sup> napano nuberial iliano nalo napano maka ave sibiano, napano numiñau ea Atua kiano moroano, a napano ea jumememi nalo, ea vameruo a vamali, nubokar vite nalo na mira ka rila memeduanu tovulu nonio vovaiano. <sup>8</sup> Tomu tealo

amidular kumemi, a tealo amidu kumemi numitu yetano garuei, tealo aberii vatitig kumemi, a tealo aberii kumemi bova laka, mia kumemi maka nuvisidomialio, nuban ga. Maka nuvila sibilili toro tai, mia aju amial kumemi jibe maka nuve riano leleio. <sup>9</sup> Nalo amijikia vatitig kumemi ruei mia aju amila jibe maka asidom ajikia kumemi lele. Kumemi numeul vatitig bo numitu keano, mia aju ajidom ver numarm̄aro garuei.

Nina naruei jo ban jibe na ea kumemi vonganei, mia be iakurano napano nubar vironiano nalo, maka ajikia adular kea kenememi meuliano. <sup>10</sup> Be iakurano napano jogvaiano nalo abujo laka, mia kenememi iviso jaaro julaka ga. Be iakurano napano bogo nonovio jumememi beteauo, mia numitu numila tomu dolu nalo abar vite miroano. A be iakurano napano maka ve kenememi titai, mia nubitii ka vite nonovio be kenememi ga.

<sup>11</sup> Bilbilu nalo na Korin, kumemi maka jidomiano va tai bere ea kamiu napano numila luku ju. Nuberial nonovio jidomiano ban kamiu ruei, a tiniememi maio ka kamiu laka. <sup>12</sup> Maka numila vite tai napano mia p̄eli tukovio ka kiado bilbilu novo, a ver tukovio ea vio tai, nina bior napano kamiu ga kubakakar jidomiano va tealo ea kumemi aju. <sup>13</sup> A ver tibe na, kiniou monoka noil van kamiu tibe keneriku nalo ga naruei. Nojidom novika den kamiu tibe nei, neber bo, kamiu kuvilavan re bunu kenemiu jidomiano luk-lukuano tai bereio, mia kuvila von ka kuvila kenemiu iviso rivetavo ka kumemi.

*Kuvitkar vatitig ka nalo napano maka amonmonea*

<sup>14</sup> Kiniou nojidom never ka kamiu mia kuvitu re kuvila von ka kumei ve takurano vija nalo napano maka amonmonea. Bo ka kuvisidomii kario ka bajago na memedu bija bajago na kariano, naljuo maka

ajikia amei avuron vio takurano, a legiano maka jikia rila bilbilu vija melijokouo. <sup>15</sup> Kristo maka rijikia rive kiano jidomiano tai vija Siñaro, a toro napano monmonea maka lele kiano vite tai vija toro napano maka monmonea. <sup>16</sup> Tavoru sibilibi nalo maka ajikia atu joomo ea Atua kunuano Lu bogo tai, a iliano nei be nioti nene bior napano Kunuano Lu naio maka ve yimo tai ga, mia naio be kito, Atua na meul kiano namoneano nalo. Nina jakii ga kiano iliano tealo, napano naio berenio jibe nei, berinavo

*“Kiniou mia notoalo, ka mia naiel iviso kalo.*

*Kiniou mia neve kialo Atua, mia amei ave kiaku torogio nalo rimemedu. Lev 26:12*

<sup>17</sup> *Jibe na, jibe kialo Tubo, neber ka kiaku nalo nei ka monoka ataluvo den nalo dolu.*

*Monoka atiburei nalo den tomu va nalo.*

*Monoka amei aveli vatitig, a monoka atu re vaataro ka niamiamo nalo,*

*tibe na mia nemijikia nojamo kalo ka amei atu vija kiniou.*

<sup>18</sup> *Mia kiniou, jibe Atua Soři, nemijikia never kalo never*

*‘Kamii kumei ka neve karamemii, a ka kamii kuve keneriku nalo rimemedu.’”*

## 7

<sup>1</sup> Bilbilu nalo, naina naruei Atua kiano verikariano novo nalo napano ber ka mia rivuru kito tibe kiano m̄aratavo nalo. Naio mila jibe na ka kito bo laka, ana bo ka kito ravatove ka naio tulaka, a monoka rolakon niamiamo ea kiado meuliano. Kariano tealo romila ea mokotenado, a tealo romila joomo ea kiado iviso ga, ana monoka ro-bisi kalo nonovio, a monoka romei roveli vatitig mia roveli vatitig, tibe napano naio jidomio.

*Pol jaaro laka ka Atua miñau ealo*

6:16 1Kor 3:16, 6:19 7:5 2Kor 2:13

<sup>2</sup> Kiniou nojidom nevika bereio den kamii ka tiniemii ser re kumemi, mia kuvidu kenememi vio tai ea kenemii iviso nalo, ka nemijikia never vite tealo van kamii bereio. Bo ka kuvila tibe na, bior napano maka kamii tai napano numila bova kanio, řeli numila bulagio, řeli nubilivilig lelar naio. <sup>3</sup> Ana bogo na neber iliano nalo na, řeli kamii kuberiam̄a nojo nojidomii va ea kamii, řeli nojidom neil niegeniege kamii, mia maka tibe na leleio. Makanio, jibe ga napano neber ka kamii ruei, nuber kumitua kenememi iviso ruei, a roju robinimeii takurano riva rivokar napano jibe rojua meuliano takurano ga, ka verenio tai riviviuo m̄ariano, mia rojog jibe robiniu rom̄arm̄aro. <sup>4</sup> Ee, nemijikia never tibe nei never kiniou nojo ban kamii toru laka mia toru laka, nobe m̄arou laka ka kamii, a bogo napano nojidomii kenemii im̄auano novo nalo, aju amijakar laka kiaku jidomiano. Be riano napano nobiviuo jaleleano laka, ana kumitu kumila ban kiniou napano jogvuiano a saariano bujo laka ea kiaku iviso.

<sup>5</sup> A jibe na ga bunu nanua na, bogo napano nubano numoluo ea tanobuku na Masetonia. Ea vio na, nubiniua bereio baravoiano nalo na jikirikili, mila na numerou kija, a mokotenememi maka bogo ka jilimebi leleio. <sup>6</sup> A kiado Atua be Atua na duřiliřili nalo napano amijog kirivova ea kialo iviso, ana naio tinien maio ka kumemi, mila bilbilu novo nei Taitas maluvo kean kumemi, a bogo napano numial naio bereio, numijog bo laka. <sup>7</sup> A bogo napano naio jukunu ban kumemi, naio berial tonovno nalo napano kumilaio, mikurukar kumemi toru laka. Naio berii juñabe napano naio bunu, bogo napano maluvo kean kamii, mileal vite miroano ea kamii napano mikurukar naio, a be-realio ka kamii kumila merevuiano bior kenemii iliano nalo nanua

na, napano vonganei, kubilig kenemiu jidomiano, kumitu kumisikili ea tivelinio na kiniou. Berialio ka kumisidom laka monoka noviedu neadu ka kamiu, mia banalo, bogo napano nomijog nina nomijog bo mia nomijog bo.

<sup>8</sup> Bogo napano nobivitauiã mēsi dolu nei biedu kean kamiu, nejuvan bano ana maka vesiou nojidomiikar bereio, nojidom ver notuvanio re ga. Nina bior napano nemijikia ka kiaku iliano nalo ajikirkili, mia monoka ala kamiu kuvijog rivovakija. A bogo napano nomijog Taitas kiano veriiano, nomialio ka be riano, kiaku mēsi mila bulag kenemiu jidomiano nalo. Ana nina tena bogo bulati ga, iorou kamiu kuvilig kamiu bereio, ana mila na tinieku jaaro bereio napano nejuvan mēsi neibano biedu. <sup>9</sup> Jibe maka neverenio ka nejaaro napano mēsi neibano mila kamiu kumijog bova, mia nejaaro ga napano jogvaiano nei mila kamiu kubilig kamiu. A kenemiu jogvaiano nei, maka kumemi napano nuvilaio rimaluvo kean kamiu, mia Atua naruei milaio maluvo. <sup>10</sup> Tibe na, jogvaiano nei naio be jogvaiano novo tai napano binimeĩ mave, napano mila toro bilig naio ka rijikia rijeveioruriano. Mia jogvaiano dolu, napano jogvaiano na yetemeriba nei, naio be jogvaiano va tai napano mia rila toro rijog rivova ga riva rivokar m̃ariano. <sup>11</sup> Kamiu bunu kuvijikia kuvitilubar ka jogvaiano napano Atua jianio maluvo kean kamiu, naio mila im̃auano novo tai. Mila kamiu kumisidomii temi laka ea kenemiu meuliano, a kumila vonvon laka ka kuvila siemiamei rivu bereio. Beamu, tiniemiu mimi napano aberii vovaiano napano jo iviso kean kamiu, a bogo napano nomil ban kamiu biorio, kumial von m̃arabo ana kumerou. Kamiu ga kuvitumormolu kuvil van kamiu bereio, a kuvisian vironiano van nalo napano amila bova, ka vova-

iano tai re bunu toa kamiu.

<sup>12</sup> Nojidom never ka mēsi neibano, nejuvanio bior napano nojidom noil van naljuo napano amila bova, a tinieku miia bunu tormoruo nei napano naljuo amila bulag laka naio. Nejuvanio bunu bior napano nojidom ka monoka kuvitilubar ka be riano, kamiu tiniemiu jii kumemi, ana bogo napano nuvil van kamiu ea Atua siano, kamiu kuvisaaro ka kuvamenea venia napano nuberenio. <sup>13</sup> Bogo napano Taitas binimeĩ berial ban kumemi ka kumila jibe na ruei, mijalar kenememi jidomiano toru laka.

Kumemi numisaaro laka ka nina ruei, mia bogo napano Taitas jukunu lie ka ban kumemi, berii jum̃abe ka kumila bo laka kanio, numisaaro lie vo garuei. Naio berii napano jo bija kamiu, kumijia naio, a kumila naio jaaro laka bereio. <sup>14</sup> Kiniou neberii kamiu ban naio beamu ruei, neber ka nabarvar ka kiniou laka ka kenemiu bajago novo nalo, mia bogo napano naio maluvo kean kamiu, naio milealio ka maka nala sibi, mia neber be riano ga. Jibe nanua, nojo neber vite na be riano ga ban kamiu bogo nonovio, a vonganei kumila napano kiaku iliano ban Taitas ea tivelinio na kamiu binimeĩ be riano vatitig bunu. <sup>15</sup> Naio maka rijikia tiniene bobogia ka bogo napano naio biedu, kamiu kumerou laka a kumemebiju, mia bogo napano naio mil ban kamiu, kumiagago kanio, kubatove vatitig ka kiano iliano. Kenemiu bajago novo jibe na mila ka bogoti na naio binimeĩ bereio, jo jidomii laka ka kamiu bogo nonovio ga. <sup>16</sup> A ea tivelinio na kiniou, neber ga ka kiniou najaaro mia najaaro, a vonga nei nemial jibe ka mia nemijikia notuvan kamiu vatitig ea vite ninio ea bogo ninio ga.

## 8

### *Bo kanio asian jidomiano*

<sup>1</sup> Bilbilu nalo na Korin, kumemi numisidom kamiu kuvijog ioluano

na vite novo tai napano jo mal-maluvo ea yimo lu nalo na burumara tanobuku na Masetonia, napano Atua jo miãau ea kiano tiniememiano. <sup>2</sup> Ea vio na, nalo abar dulu kija bogokouo nalo napano vite miroano amila von niegelo, a ba bokar napano maka bunu ve kialo vite tai, mia nalo na, maka lele abisi ka asaaro ga ka venia napano abiniuaio. Juãalo yauo ga, mia numiilo laka ka bogo napano amijog ka namoneano dolu nalo na Yerusalemo abiniua bogokouo bunu, ana tiniel miialo a jibe ka juãalo nalo na abinimei abujo vatitig bija vite nalo na ajianio jibe kialo jidomiano tai ban kulo dolu nalo nei. <sup>3</sup> Maka toro tai napano river ka monoka ala tibe na, mia nalo ga aberii ka alaio, a nomiikia vatitig ka ajian vite nonovio napano amijikia asianio, bano-o napano tealoo ajian jovulu venia napano amijikia asianio. <sup>4</sup> A bogo napano abar bulag nonovio kario, abar jua jumememi, nalo ajikili ka nuviai m̃arabo tai ka nuvituvan jidomiano nei rivano, bior napano aber ka ver ve bogo tai ka ajikia aija namoneano lu dolu nalo tibe na bereio, mia rive vite novo tai laka kalo, napano mia asaaro laka kanio. <sup>5</sup> Nalo abo laka, bior napano beamu nalo amidu momou kialo meuliano jibe jidomiano tai ba ban Tubo, amidulo aju yetano ka kenememi iliano, ana iorou, amidu vite venia napano be kialo jibe jidomiano tai binimei ka namoneano dolu nalo. Nalo amila bo lie jovulu venia napano kumemi numisidomii ka mia alaio, a be riano, amilaio memedu ga ka Atua kiano tinieiiiano.

<sup>6</sup> Ana bogo napano numial ka tomu dolu nalo na Masetonia amila jibe na, nuber ðeli bo ka nuvila Taitas rimei bereio ea kamiu, ka rikurkar kamiu ka kuvila tibe na bunu. Numijikia ka bogo napano naio binimei nua, naio jo mil ban kamiu, a kumitkar ka kuvila iãauano novo na tinievuiiano na naruei, mia bo ka naio rimei

rila nonovio vatitig vija kamiu. <sup>7</sup> Numial napano iãauano dolu nalo, kumitu kumilaio vatitig ruei, napano kenemiu viekouoiano toru laka, kumitu kuberial ilirianiano bo laka, kumijikia vite miroano ruei, kumitu kubarvar vatitig kamiu ka iãauano, a kumitu tiniemiu-jii kumemi namoneano dolu nalo toru laka. Kamiu kumila iãauano nalo na ba jovulu venia napano numisidomii nuber bare ka kuvilaio, ana bo kuvila tibe na bunu ea tivelinio na iãauano na asian jidomiano nene.

<sup>8</sup> Kiniou neber jibe na, mia iliano na naio maka tibe ka tuboiano tai napano mia monoka atakiio. Vite na joa ga kamiu, ðeli bo ka noverii nalo dolu tealoo van kamiu tibe na, neverial vite novo nalo napano amilaio ruei. A bogo napano mia kuvijogio, mia rila kamiu kuvitii kija kamiu bereio, kuver kenemiu tinietiano toru bunu, beberare ka nana kanalo, ðeli na makanio? <sup>9</sup> A bo ka rosidomii bogo nonovio Yesu Kristo kiado Tubo kanano burumara tiniememiano, napano beamu, naio jibe ka be kiano vite nonovio, ana tinien maio ka kito ea yetemeriba, naio binimei jibe napano maka ve kiano titai, ka rila romijikia romei tibe napano be kiado vite nonovio. <sup>10</sup> Bo ga, nina naruei kiaku jidomiano tai ea tivelinio na. Kiniou neber ga ka nemial jibe ka vite na, kumisidom kuvilaio ka yuka na barlaka ruei, a kumitkar ka kuvilaio, mia bo lie ka kuvitumolu bereio ka kuvila nonio vatitigio. <sup>11</sup> Bogobe ruei, kenemiu jidomiano ka kuvila tibe na naio jikili batitig bo, mia vonganei bo ka kuvisikili vatitig ka kuvimãaukanio, a ka kuvimãaukanio rivoru ea julu-vati napano kamiu kubare kanio. <sup>12</sup> Atua maka river ka monoka reje jidomiano todovul venia napano joa juãado ka rosian, mia jidom ga ka rosaaro ka roiija toro dolu, a reje jidomiano rimemedu ea venia napano rabare ka rosiano.

<sup>13</sup> Ana bogo napano nobika kamiu

ka kuvisaaro ka ijaiano tibe na, maka nosidomii ka nala ka mia im̃auano rimei ve temi ka kamiu mia rimei rimonmaio ga ka kulo dolu nalo. <sup>14</sup> Kiniou nojo nojidomii ga bo ka kito nonovio roveverare ga. Ea bogo na, kenemiu vite miroano, mia nalo maka kialo tai, mia tibe na, bo ka kenemiu vite torogio riva rila ka nalo ve kialo vite nalo ve telisu, a p̃eli bogo tai ver kamiu kuvokar jogvaiano ea yuka nalo napano ju ka rimei, kialo vite torogio mijikia rimei rila ka kamiu kenemiu ve telisu. Bogo napano roju romijaijai kito jibe na bo, mila na kito nonovio roju beberare, <sup>15</sup> a mia tibe iliano tai na Niosi Moruo napano ber jibe nei, berinavo

*“Toro napano bar sinaniano  
miroano binimei,  
naio jenio ba biniu koko, mia iorou  
kano maka bunu sano sinani-  
ano tai to,  
a nina napano ba bar sinaniano  
telisu ga, napano mialio ka  
bare ga,  
mia maka jum̃ano ve bulati ka vite  
tai.”* Eks 16:18

#### *Mia Taitas rivan bereio Korin*

<sup>16</sup> Beamu ruei binimei, nojo nojidomii laka kamiu, a vonganei, neber siva laka ban Atua ka naio mila ban Taitas ka vonganei, jidomiano na jikili novo tai joa naio ruei, ka naio monoka riviedu rijai kamiu. <sup>17</sup> Ana bogo napano kumemi nubika naio ka riviedu riyotuba kean kamiu, naio jaaro ga, bior napano jidomiano tai ka rila tibe na joa naio ruei. <sup>18</sup> A maka naio ga ve takurano, mia nuviila kumemi dolu tai rimei vija naio, napano be kuruado tai napano namoneano lu nalo ea vio miroano amijikia vatitig naio, bior napano naio be toro na bo tai na mioliolu ka Ioluanu Vou. <sup>19</sup> Namoneano lu nalo ajaaro ka kiano im̃auano, ana nalo abijauialar naio ka to riel seliviv vija kumemi ea kiado tanobuku nalo, bogo napano numitu nubar biji veru na jidomiano nei napano ka rijai

namoneano nalo ea vio Yerusalemo. Kumemi numila im̃auano nei bior napano tiniememi jiilo laka, a bogo napano mia avokar jidomiano nei mia aiilo vatitig ka bajago novo na ijaiano napano rolaio vanlo, mia adular Tubo siano rivavin. <sup>20</sup> A numisaaro laka ka kuruado dolu nei jakisor kumemi, bior napano naio mijikia rijai kumemi ka vitarik veru na toru nei napano aju ajuvanbijio. Numisidom nuvitikar kano takii kiano m̃arabo novo nalo ga, maka nuvisidom nuvijog iliano ninio rimei iorou. <sup>21</sup> Numisidom nuvila im̃auano nei tibe napano mia rimemedu vatitig ka Tubo kiano vitiano, a mia rimemedu vatitig ka tomu dolu nalo kialo vitiano bunu.

<sup>22</sup> Ana ea tivelinio na Taitas naljuo nei, mia nuviila kuruado dolu tai bereio rimei ka rial kamiu. Naio bunu be toro tai napano nubar vite miroano ajua jum̃ano ruei, a numila von naio jibe na bano-o numialio ka naio biekouo vatitig ea vite nonovio. Naio be toro na bo tai ka rim̃au, a bogo napano kiniou nojo neberii kenemiu bajago novo nalo banio, naio monea kamiu laka ka ver rimei kija rim̃au vija kamiu mia rivu laka. <sup>23</sup> Tibe na, ea tivelinio na kiaku bilbilu novo nei Taitas, kamiu monoka kuvitii naio kuver kumemi juo naruei numim̃au vio takurano ka nuviija kamiu, a ea tivelinio na kuruado juo dolu napano mia amei vija naio, monoka kuvitiilo kuver nalo abinimei ka kamiu ea namoneano lu dolu nalo na tanobuku nei sialo, a abinimei ea Kristo siano napano kialo meuliano jo berial kano bajago novo nalo. <sup>24</sup> Naruei nojidom nover ka kamiu ka bogo napano nalo nei amei ayotuba kean kamiu, kenemiu meuliano nalo monoka atu averial bunu kenemiu bajago novo nalo. Kiniou nojo nomioliolu kamiu ka nalo ruei, ana bo ka mia avitilubar vatitig ka miralo ka kiniou neber be riano ga, ka kenemiu tinietiano toru laka, a mia ajikia asian veriiano novo tai napano riverii kamiu riva

van namoneano lu dolu nalo.

## 9

### *Jidomiano na ijaiano ban namoneano dolu nalo*

<sup>1</sup> Kiniou nebitauia bulag iliano miroano ruei ea tivelinio na ijaiano na veru napano roju robarbijiio ka rijai Atua kiano namoneano dolu nalo nei, a neber ðeli kamiu kumitu kumisidomii vite nalo na kia ga vo. <sup>2</sup> Nemijikia vatitig ruei ka kumisaaro ka kuviasol ea iñauano na abarvar veru na ijaiano nei bior napano ka yuka na barlaka ruei, kumitu kumila bijii vite ka kuvijev kiano veru ve telisu. A bogo napano naban ea tanobuku nei Masetonia neberii kamiu banlo, neber kamiu kulo Akaia, kumitikario ruei, a bogo napano amijogio jibe na mikurlo kija, mila na kialo jidomiano ajevijo ka nalo monoka asikil lie ka ala kialo togio. <sup>3</sup> Nojo neberii kamiu ban tomu dolu nalo ruei, neber kamiu kumiñau bo jibe nei jibe na, ana ver maka kuvilaio, mia kirivova ga! Naina naruei mila kiniou nojidom neiila kuruado tolu nei ka aviedu avitii vatitig kamiu, bior napano neber banlo neber monoka kuvarvar veru nalo nei ruei, naruei amijikia amei alealio ka jibe napano neberenio ðeli na makan vo. <sup>4</sup> Ver makan vo, monoka kuvila soðeli ka kuvilaio, bior napano vaataro mia kiniou bunu noviedu, a mia noviedu vija tomu tealó na Masetonia, napano neberii kamiu banlo ruei. Naruei ver nuviedu a aialio ka napano maka kuvila vite rivu vo, mia ve burumñara imouiano van kiniou, a van kamiu bunu, mia nalo monoka averii kiniou nomila soðeli laka ka nomiaia kamiu banlo. <sup>5</sup> Nina naruei nemialio ka monoka nevika Taitas nalo ka aviedu beamu ka kiniou, ana amijikia aimñau vija kamiu ka kuvarvar veru nalo napano kuberkarío ka kuvario, kuvarbijii vatitigio tu, ana kario numei nuvar nuvano. Kiniou neber jibe nei, ana kamiu kuvisidomii re kuver nojo nomiyuku kamiu ka monoka

kuvar jidomiano nene. Ijaiano na jidomiano jibe nei, naio be vite tai napano kube tinievuiano, mia kene-miu jidomiano ga asaaro ka alaio.

### *Ilivuiano nalo na bajago na asian vite*

<sup>6</sup> Mia iliano tai napano nemijikia never sikili van kamiu jibe nei, ber toro napano mebijo telisu, mia naio rivar ve telisu, mia toro napano mebijo toru, mia naio rivar ve toru. <sup>7</sup> Ea tivelinio na reje jidomiano van toro dolu, kito terakurano monoka rosian venia ga napano kiado jidomiano berkario ka ralaio, mia maka rivu ka kosian napano maka kosaaro ka kosiano, ðeli kosian bior napano toro dolu miyukuso ka monoka kosiano. Atua maka sidom nina, mia naio jidom laka toro napano jian vite miyotuba ea tinievuiano a ea kiano jidomiano naio takurano. <sup>8</sup> Naruei ver jau tai napano koje kojian jidomiano bano, jau kosidomial re kano, bior napano Atua mijikia sian kean jidomiano novo nalo amei easo, ve miroano mia ve miroano. Naio mijikia rila napano bogo nonovio ga kovar vare ea vite nonovio napano kojidomio, a mave ka naina vare ka kosian bereio ka ijaiano na iñauano novo dolu nalo. <sup>9</sup> Nina jibe iliano tai na Niosi na Iouano Lu nalo, napano berii Atua kanano tinievuiano, berinavo.

*Naio jo jijian bulag jidomiano novo nalo ban tomu nalo napano juñalo beteauo, kiano bajago novo aju julaka. Iouano 112:9*

<sup>10</sup> A Atua, naio naruei napano jian kurukuti ka romebija ea borotano, a naio naruei napano mila kurukuti bar mñarati ka roimñauka sinaniano eaio, a jibe nei, mia naio jian venia napano kumisidom ka kuvimñau eaio, a mia rila kenemiu saba nalo amei ve miroano, a mia rila ka kenemiu iñauano nalo rimemedu ka avar mñarati ve miroano. <sup>11</sup> Mia naio rivitilubar vatitig kenemiu bajago novo nene, napano bogo nonovio

kumisaaro ka kuvisian vite, naruei mia naio sian kean meran vite ve miroano rimei van kamiu, a bogo napano nuvar kenemiu ijaiano rivan ea nalo dolu nei, mia rila napano kito nonovio rosian sivaiano tai na toru van Atua bior ilivuiano novnovo nalo napano naio jo jianio binimei ban kito. <sup>12</sup> Jidomiano nene napano mia kuvituvanio rivano, mia rijai ve toru namoneano lu dolu nalo nei napano aju abiniua bogokouo, a mia rila aiaia Atua ve toru bunu, aver siva laka vanio. <sup>13</sup> Mia aiaia Atua tibe na bior napano mia aialio ka kamiu maka kuvitu kuvioliolu ka Kristo kanano Ioluanou Vou ga, mia kumitu kumijogkar bunu ka venia napano naio beriio, a mia aial ka jidomiano napano kumijianio bano toru laka, napano mia mijikia rijai nalo ve toru a rijai nalo dolu bunu. Naruei bogo napano amialio vite juo nei, mia abitilubar von bunu ka kenemiu iñauano jo berialio ka kenemiu viekouoiano kirisikili vatitig ga a be riano jo. <sup>14</sup> Mia nalo aial napano Atua kiano tiniememiano bujo lou laka ea kenemiu iviso jibe na, naruei mia tiniel maio ka kamiu bano-o, mia tiniel miia kamiu, mia aju abolkouo ka kamiu julaka. <sup>15</sup> Bo ka aver siva ka kamiu bior kenemiu jidomiano novo na jibe na, mia bo bunu ka kito nonovio rover siva laka van Atua tulaka bior jidomiano novnovo napano naio jianio ban kito, napano kenerinio nei, Yesu Kristo.

## 10

### *Pol berdože nalo napano amil niege kiano iñauano*

<sup>1</sup> Bilbilu nalo, kamiu kumijikia ka kiniou nei Pol ga nojo nobivitaubiedu, mia nojidom kamiu kuvijevkiaku iliano ea bajago na beberare ka Kristo kiano bajago, napano naio be tuñaro bo a melokloko bo. Naina naruei bajago napano nojo nomila von ka nala van kamiu nua, mia nemijikia ka tomu tai napano aju

amilkue kiniou biorio. Nalo aju aber bogo napano nojo bija kamiu, kiniou nomelmeloko laka, a nomerou ka noil, mia nalo aber bogo napano nobivitauia mēsi biedu, nomila kiniou jibe toro tai napano nomijikia nomil jikili, bior napano ga nojo koalabo den kamiu. <sup>2</sup> Nina bo ga na, mia kamiu monoka kuvijikia ka bogo napano namaluvo kean kamiu, ver neial ka bo noil sikili, nomijikia nala ga. Mia vite na naruei nojidom never ka kamiu, a neber bo ban kamiu, nebika jikili den kamiu ka kuvila von vovaiano nalo nei amei rivu kija, bogo napano maka nomaluvo kean kamiu vo. Ver tibe na, bogo napano neviedu, mia ve re vite tai napano monoka noil sikili riviorio, ana ver makanio, maka nomerou ka novuku iliano tealonapano jikirkili mia jikirkili van nalo napano aju joomo ea vovaiano nalo nei, a napano aju amil niegeniege kumemi, aber ka kumemi numitu numiñau jakii jidomiano na yetemeriba ga.

<sup>3</sup> Ee, kito nonovio rojua yetemeriba nei, mia kumemi maka nuvitakii kiano bajago. A be riano, numitu numila mira tai ea yetemeriba nei, mia mira nene maka na vio na. <sup>4</sup> Kumemi numitu numiasol ea mira tai napano moroano nalo na vio mave aju amila die moroano nalo na vio na jogvaiano, a tenalo na mira napano numitu nubokario, nalo maka tena yetemeriba nei, mia numitu numila mira ea moroano na Niununo Lu napano mijikia riolkon bulag vio na jikirkili nonovio napano vite va nalo aju ajulukueaio. <sup>5</sup> Ver nalo aver ilivovaiano nalo die Tubo kiano iñauano, mia kumemi numijikia nuvituvulu lo ga. Ver abe mñarou, amila von ka atukovio ka kanano iñauano, mia kumemi numijikia nuvar dulu ka nuvila tomu nalo ajikia naio ea kialo meuliano. Ver nalo atumolu vija kialo jidomiano va nalo, mia kumemi numijikia nuvilig tomu nalo nei amei napano kialo jidomiano rimei sikili

ka atakisor Kristo ga. <sup>6</sup> Numijikia nuvila tibe na ka kamiu rivano-o kuvilig kamiu, kuvijamo ka kuvidu kamiu kuvitu yetano ka Tubo kiano iliano, a iorou mia nuvila rivan ea vio dolu nalo napano tomu nalo na jukujukuano ajuaio.

<sup>7</sup> Naruei ea tivelinio na toro nei napano be burupati na jaleleano nei, p̄eli kamiu kumitu kuberiam̄a vite nonovio bo ga, bior napano toro nei naio ber be namoneano tai. Mia neber bo ka kamiu kuvitii re ea kuluniabene ga, kuvila von ka kuvitii vatitigio ea vite napano be riano napano joa miremiu ruei. Naio ber ka be namoneano, mia bo ga, mia naio jo mila bova, a bo ka naio rivitii vatitigio kiano meuliano bereio. Kumitu kumisidom kuvia-gago ka naio kia ga, mia jum̄abe, kiniou bunu nebe namoneano, ana bior vaio maka kuvisidom kuvia-gago ka kiniou? <sup>8</sup> Kiniou neber jibe na, p̄eli mia kamiu tealo ailkue ka kiniou bereio, averinavo kiniou nojidom notovulu lie ga, mia maka tibe na. Peli be riano ka bogo tealo nebe m̄arou laka, p̄eli nojo noberii laka ka kumemi naruei numitu nubitkar kamiu, mia maka nala titai rivova napano monoka noimou riviorio. Kiniou nojo neberii jibe na bior napano Tubo ga midu kamiu kumitua jumememi nua ruei ka nuvila kenemiu meuliano rivija naio rimej mave. Ver kamiu kuberka kumemi numitu numil ban kamiu ka nuvila bulag kenemiu meuliano bereio, maka tibe na leleio. <sup>9</sup> A ver kamiu kuberiam̄a kiniou nebe toro na tiniemimiano napano nojo nobivitauiā ea m̄esi nalo biedu ka rila kamiu monoka kumerou ka kiniou, nina bunu maka rimemedu.

<sup>10</sup> Kiniou nomijikia ka tealo aju aberii kiniou jibe na ruei, aberinavo “O Pol na, kiano m̄esi nalo abujo ka iliano na teremi nalo napano ajikili laka, mia ver koial naio, jibe toro ninio tai na melukluku ga, a ver kojog naio mil, melala ga.” <sup>11</sup> Mia nojidom never ka nalo na never bo ka avitilubario ka venia napano nojo

nobivitauiā bulag ea m̄esi, bogo napano maka nuvitu vija kamiu, naio bare ga ka venia napano mia nuvitu nuvila ea miremiu, bogo napano numitu bija kamiu. <sup>12</sup> Neber jibe nei, mia maka nosidom never m̄elea vite ka ridular siememi bereio. Maka nosidom ka nomei tibe tomu dolu nalo, napano aju abe m̄arou laka ka averial kialo vite novo nalo bereio. Tomu kinkin nalo nei aju abitii veve kialo bilbilu nalo, p̄eli aju abitii veve tomu dolu nalo, ana aber p̄eli nalo abo lie ajovulu lo, mia nina be im̄auano tai na vovuiano ga, bior napano p̄eli nalo nonovio na abova beberare ga.

<sup>13</sup> Tibe na, mia neverii re laka ka kumemi riva lie laka, mia monoka noverii vite tealo van kamiu napano amemedu ka im̄auano nalo napano Atua midu joa jumememi, a joomo eaio, ba bokar vite tealo ea tivelinio na vitikariano na kamiu napano kumemi numitu numilaio. <sup>14</sup> Kumemi maka nuvisidom ka nuva laka ka nuvila von ka nuvitu mave ka kamiu, mia memedu ka numial ka numijikia nuvisian iliano tealo napano monoka kuvatove kanio, bior napano monoka tiniemiu ribobogia re ka kumemi naruei nube moti ka numidu Kristo kiano Ioluanou Vou binimej lilian bokar kamiu. <sup>15</sup> Ver tealo dolu nalo abinimej ruei ea kamiu beamu, mia maka nuvisidomii ka nuvisirarago ka kamiu p̄eli ka nuvisian iliano van kamiu tibe nei. Mia kar napano numitkar im̄auano bija kamiu, monoka nuva lie vija kamiu. Numisidom ga ka kenemiu viekouoiano to riluo bogo nonovio, a numisidom laka ver tanobuku na vio na kenememi im̄auano mijikia rimej ve toru lie, maka ea kenemiu vio ga, <sup>16</sup> a mia kumemi nuvisaaro m̄elea ver kuvijikia kuvija kumemi ka rila ka kito rava lie roioliolu ka Ioluanou Vou ea venuo dolu nalo tivelinio ka kenemiu ban lie, ka ravan rotepe viomoruo ea vio nalo napano tomu dolu nalo maka avan aioliolu eaio vo. Tibe na, ver bogo kito roverii

iñauano nalo napano mia rola ea vio nalo na, mia maka ajikia averii niegeniege kito ka roju rabarvar kito ka m̄arati napano miyotuba ea toro dolu kiano tiniavio! Ea bogo na, mia amijikia ka roju roberii m̄arati napano miyotuba ea kiado tiniavio napano kito ga roba romebijaio.

<sup>17</sup> Jidomiano nalo nei abo laka, ana bova ver robe m̄arou ka vite tai napano romilaio, bior napano Niosi Lu berenio ruei, berinavo

*Toro napano jidom ve m̄arou ka vite tai, monoka ve m̄arou ka venia ga napano Atua milaio. Jer 9:24*

<sup>18</sup> A bova kito roiaia kito bereio, bior toro na bo be riano, maka nina napano naio bereio ga ber ka naio bo, ana naio be naina napano Atua ga ber ka naio bo.

## 11

*Tomu na Korin ajakisor atevi sibiliano nalo*

<sup>1</sup> Peli kamiu kubuluku iliano tealo napano nobivitaui ruei, kuber p̄eli nomil vovu, mia nojidom kuvila kenemiu jidomiano rive terebievi kija van kiniou, ana mia nala von never tealo lie bereio. <sup>2</sup> Monoka never iliano nalo nei bior napano bogo nonovio nojo nojidomii laka ka kamiu. Mia never tibe nei, never nemial kamiu jibe kube kiaku niatira novo tai, napano neberkarikoio ka risoro ka koano napano Kristo. Nomijog jibe nomijukua vatitig ka kamiu, nojidom novitkar vatitig kamiu ka kuve riano ea verikariano nei, a nina jibe bunu Atua, napano naio mijukua vatitig ka kito, maka sidom ka rotuvan naio rava iorou bereio. <sup>3</sup> Mia kiniou bunu nomerou kija ver toro dolu rimei rivuru kenemiu jidomiano riva ve dolu bereio. Jibe nua na, maro nei binimeii mila sibilili tira nei Iv, mila vonvon vatitig naio mila mijoru ea kariano, naruei maka nosidom leleio ka bogo tai kamiu kuve riano

re bunu ea Kristo, tiniemiu tii vatitig re bunu naio ga ve takurano.

<sup>4</sup> Neber jibe na bior napano nobitilubar pariparimiu kija ruei. Bogo napano verialiano tai binimeii berii Yesu dolu tai napano maka Yesu na kito romioliolu kanio, a vonganei ga kamiu kumoneaio. A bogo napano niununo dolu tai maluvo ea kamiu napano maka Niu-nuno na Atua jiano, kamiu kuviako kirisop̄eli ka kuviduio. P̄eli bogo na mia Ioluano Vou dolu tai rimal-maluvo ea kamiu, nemijikia ka mia kuvisaaro ka kuvijogkar naio tibe na ga. <sup>5</sup> Atevi dolu nalo aju amila sibi vatitig ban kamiu ka vite nalo nei, mia nemial ka kumitu kumisidomii mave laka kalo. Kamiu kumila jibe napano nalo ga abe atevi na kiado yetemeriba nei, a kumitu kumidu kiniou nojo yetano, naruei maka nosidomii ka nina naio memedu. <sup>6</sup> Ee, nemijikia ka tomu tealo aber ka kiniou maka nejikia noioliolu rivu laka, ana nemijikia ka maka tai napano mijikia vite laka lie ka kiniou, mia neberian̄a kamiu kubitilubar vite na ruei, bior jo maluvo binimeii meravo bo ea iñauano nonovio napano nomim̄aukanio ea miremiu.

<sup>7</sup> Kiniou nemijikia ka ea tivelinio na abarvar veru nei, tomu tealo maka asaaro kanio leleio, mia maka nejikia bior vaio jibe na. Peli nalo aberian̄a nobika veru nei ka ve kiaku ga? Mia makanio, bior bogo napano nebinimeii nomioliolu ka Atua kiano Ioluano Vou ban kamiu, maka lele never ka kamiu kuvisian vite tai van kiniou. Nomidu kiniou nojo yetano garuei, ka nemijikia nodu bulag kamiu rivavin, mia p̄eli kamiu tealo tiniemiu jer kiniou ka nomila jibe na? Peli kuber kiniou namila bova ka maka novika vite ninio den kamiu ea bogo na? <sup>8</sup> Nemijikia never rimemedu van kamiu ka bogo na, namoneano dolu nalo aju ajian jidomiano binimeii ka aija kiniou, a nojo nojen veru nene ga bogo napano nomim̄au ea kamiu. Mia maka

nala vite novo tai vanlo ea bogo na, naruei nomijog jibe ka nobena ka kialo veru ga. <sup>9</sup> A bogo napano nojo bija kami, jumaku bulati o-o, mia kuruaku nalo juo na abinimei Masetonia abitulubario napano nojo nemije jaleleano jibe na, ana abitikar vatitig kiniou. Maka lele nemei neteg van kam tai rivior vite tai, a neberkar ka mia maka lele nejikia nala niegeniege kami napano nomiyuku kami ka monoka kuvila tibe nei p̄eli tibe na van kiniou.

<sup>10</sup> Neberkar jibe nei bior napano tinieku m̄aro ka tomu nalo aju amil niegeniege aber ka jjer kiniou bior kialo veru, a mia neverial kiaku verikariano nei ea vio nonovio nalo ea tanobuku na Akaia. Maka lele nomerou, bior neber kar ea Kristo siano napano kiano ilirianiano joa kiniou ka mia nala garuei. <sup>11</sup> Naruei bogo napano neber jibe na, p̄eli tomu tealo mia aver ka kiniou nojidom nala niegeniege siemiu ga, p̄eli aber ka maka tinieku tii kami, mia maka tibe na leleio. Atua mijikia vatitigio ka tinieku jii kami toru laka. <sup>12</sup> Mia monoka nosikili ga ka verikariano napano nojo neberio, mia monoka nala ga, bior napano nojidom nouebin nalo dolu nei kialo sebi napano aju abarvar kalo janea vio jibe na. Nalo aju amila von ka aber ban kami aber nalo amim̄au vio takurano bija kumemi, aju amila im̄auano napano bare ga ka nana numitu numilaio, mia maka tibe na.

<sup>13</sup> Tomu nalo na jibe na, abe atevi sibilibiano nalo ga, amim̄au maka rimemedu leleio, mia aju amila vonvon kami namoneano nalo, jibe abar Kristo kiano atevi riano nalo miralo. <sup>14</sup> Mia monoka roiilo re napano amila jibe na, bior ka kialo toro na toru nei napano Sim̄aro, naio bunu jo mila jibe na ruei. Naio mijikia rila ka nailiano novo tai na yulu, <sup>15</sup> naruei romialio ka tomu nalo na kiano im̄auano abilivilig tomu nalo bunu, amila lo jibe tomu nalo na im̄auano na bajago memedu. Mia bogo na, romijikia ka

mia avano ga abisi ea vio napano memedu ga ka kialo im̄auano va nalo.

<sup>16</sup> Mia jibe na napano neberenio ruei, maka nosidom ka noil tibe na ana mila na tealo aber ka nomiaovovu, mia ver asidom averenio, kuvituvanlo averenio. Mia ver tibe na, bo ka ala ka kiniou tibe napano amila ka vovu nalo, ka atukovio re ka kiniou beamu, mia atuvan kiniou ka never venia napano nojidom neverenio. <sup>17</sup> Bogo napano nojo noberii kenememi im̄auano, ver nojo nomil m̄arou laka kanio, rila ka be riano ka nojo nomil vovu ga na, a mia Tubo saaro re kanio. <sup>18</sup> Maka rivu roil m̄arou laka, mia kiniou maka netibe ka kulo dolu nalo napano aju amil m̄arou ea kialo vite nalo na yetemeriba nei, bior napano ver noil m̄arou, nojo noberii vite novo nalo ga. <sup>19</sup> A nomialio napano kami kumitu tiniemiu jii tomu dolu nalo napano kuber p̄eli abe vovu, bior napano kubitilo abe dolu, nalo maka avokar masouano rivu nei napano kumisidomiio kuber kuvitoaio. Mia ver kuvisidomii kuver kiniou bunu nomiaovovu, bior vaio kami maka kuvijikia kuvila kenemiu jidomiano ve tebievi kija ea kiniou bunu?

<sup>20</sup> Kiniou nomial ka kami kumituvan ban atevi sibilibiano dolu nalo nei ka ala vite va ve miroano van kami. Amila jibe ka kami kialo tomu nalo na im̄auano, nalo amila niegeniege kami, abar kenemiu saba nalo, amidulo aju mave ka kami, a ver asidom amijikia ajuba miremiu. Kami kumitu kumituvanlo amila jibe na, mia jum̄abe? Bogo napano neber iliano tai ga, bior vaio maka kuvisidom kuvijog leleio? <sup>21</sup> Peli bo kanio ver kiniou bunu nojo ga nomila bajago ninio nalo jibe nei ban kami, p̄eli mia rila kami kuvisaaro ga ka kiniou? Mia aua, p̄eli nomelukluku laka, maka navare ka nala nina na.

Bo ga, nober iliano na, nomijikia ka tomu tealo mia aver ka nojo nomil vovu bereio. Mia nejidom

never ka verver atevi dolu nalo nei ajidomii aber amijikia ailivarvar bior napano aber vite tealo ea tivelinio na nalo abo, mia kiniou bunu nomijikia noilivarvar ka vite nalo na. <sup>22</sup> Ver atu adu bulaglo mave ka abe Ipru, mia kiniou bunu nobe Ipru. Ver avitiri bulaglo aver nalo abe tomu na tanobuku na Israel, mia kiniou bunu tena vio na. Ver adulo atu mave bior napano aber ka nalo memedu ka Epraamo kanano taara, mia kiniou bunu nobe taara nene. <sup>23</sup> A mia novika vikadeniano van kamiu vonganai, neber nalo na amimãau Kristo kiano ba bokar imãauano napano kiniou nomimãaukanio? Makanio, neber ðeli kiniou nomila bo lie loa ka nalo. Maka rivu noto noverii kiniou bereio tibe na, mia pariparimiu kirisikili laka mila na kiniou bunu vaataro paripariku rive vovu, ana nojumolu nomil jibe na. Mia vite na be riano laka, napano nomila imãauano na tortoru nalo loa kalo, tomu na tortoru abuku kiniou ea nalakoiano va miroano jovulu lo, abitiv kiniou va vio maka nejikia novolukuio, a bogo miroano bunu napano ka mia namãaro ga. <sup>24</sup> Kiniou nemijikia ka va jimo ruei, tomu na tortoru na kulo Ju nalo abitiv kiniou napano ea va terakurano ea va jimo nei, teli jaburu ea niabeku va duelimo va rolu ba koveri [39]. Maka ajamo ka alaio riva rivokar va duelimo va veri [40], bior verver makanio, nina tena mãariano ga. <sup>25</sup> Mia va rolu amue kiniou ka iesi nalo, a bogo tai bereio ajuba kiniou banbano-o vaataro ka namãaro. Va rolu ruei nojoa tei uako madudu, a ea bogo nalo na tai, nojo nemialalo ea tei bogiano momou tai a legiano momou bereio. <sup>26</sup> Kiaku ieliano nalo terebievi miroano laka, a ea bogo nalo na nobinua bogokouo telabo na mãariano. Uei nalo na bolu nalo vaataro ka adular kiniou, tomu na amue van toro amijil kiniou, kiaku tomu nalo ga jibe Ju nalo amilkuei

kiniou, a nalo napano maka ave Ju amila bulag kiniou bunu. Kiniou naban ea vio vabe, jibe ea komeli, ðeli yeturu, ðeli ea tei, mia nubinua bogokouo, a bogo nonovio, kuruado sibilibiano nalo nei aju amilkuei kiniou. <sup>27</sup> Bogo nonovio nabano bija imãauano kouo a bogokouo, napano maka nejikia nomonmelio, napano midoujer laka kiniou a jijer kiniou napano sinaniano maka leleio, a naban napano maka noial vio na notoluku eaio ka burumãara vio menini. <sup>28</sup> A mave ka bogokouo nalo nei, bogo nonovio ga nojo nojidomii laka ka kiaku imãauano bija namoneano lu nalo, napano jibe vite tai napano teremi mia teremi ka kiaku meuliano. <sup>29</sup> A nojo nojidomii kamiu laka bunu, napano ver neial ka kamiu namoneano tai rime melmeluku, mia mila napano tinieku mãaro laka garuei, a ver nojog ka tai mijoru ea kariano, mia rila napano tinieku mijalele laka.

<sup>30</sup> Naina naruei vovaiano ninio nalo napano nojo nobinuaio, a nomialio ka nomelmeluku laka ka nola Tubo kiano imãauano, a maka nola vite novo tai ka noilivarvar kanio, mila na noilivarvar ka bogokouo nalo nei napano nebinuaio. <sup>31</sup> A kiado Atua, napano naio be Yesu Tubo karamãano, napano mia roiaia siano to toboto naio, mijikia ka maka nala sibi, vite nalo na napano nojo neberenio abe riano nonovio ga.

<sup>32</sup> A jogvaiano toru dolu tai bereio napano nobinuaio, napano maka noverio mave ea vio nei, nina ea bogo napano naban ea komeli na toru nei Damaskas. Ea bogo na, parinio tubo na tanobuku nei naio be toro nei Aretas, a kiano toro na toru napano bitirilar naio ka vitikar komeli nei, jidom rivakar kiniou, naruei miila kiano menu-mia nalo aba ajuko morouo nonovio na vio na ka maka nejikia novuro. <sup>33</sup> Vaataro ka avokar kiniou, mia

bilbilu tealo amiiija kiniou amiduvan kiniou joomo ea burum̃ara basaro tai, ana amiorkar teli eaio ajikili aju mave ea burum̃ara basio na vio na, ajuvarvanio melmelumu tavio ka basio, batove bokar yetano ana nomoluo den basaro nei noburo denlo nabano.

## 12

*Vite nalo napano Pol bitii ea monovovuano*

<sup>1</sup> Bo ga, nemial ka ver nojo noberii kiniou jibe nei kia ga vo, mia maka nejikia nevilig kenemiu jidomiano rimej rivu ka kiniou bereio, mia bo ga na, nomijog jibe nojidom neiasol iliano bereio ka neverii vite nalo napano nemialio a vite nalo napano Tubo jiloglogio ka kiniou ea monovovuano nalo. <sup>2</sup> A mia nojukunu ka Kristo kiano toro tai beamu, napano nomijikia vatitig naio, napano yuka duelimo ba veri [14] barlaka ruei bokar vonganei, naio jo mia jabujo ka aburu naio ba miyotuba mave ea vio sofi tai mave. Maka nejikia ka naio ban bija mokotenano nonovio p̃eli ga mijikia. <sup>3</sup> Buriakurano napano ver naio rivan ea mokotenano p̃eli rivan ea niununo ga, nomijikia ka be riano, toro na ba mijaka bitii joomo ea kiado vonuo novo ea vio na. <sup>4</sup> Naio mijog vite miroano napano maka ka averialio bereio, napano maka bunu iliano nalo na yetemeriba nei tai napano vare ka averiio.

<sup>5</sup> Naruei bogo napano neberii toro nei, p̃eli kumiilo, kuber ka toro nei, be riano ga na, nina toro tai na. Mia jum̃abe, ver never ka maka toro dolu, mia nojo noberii kiniou ga, p̃eli mia kamiu kuver von ka nina maka vite tai ga na? Tibe na, nomial ka ver nojidom noil m̃elea ka vite na tortoru tealo van kamiu, bo ka neverii ea toro dolu siano ga, ka kuvisaaro ka kumoneaio, mia ea siaku, noverii vonvon kiaku vite nalo na tertelisu ga. <sup>6</sup> A mia ver nojidom noil m̃arou ka vite na tortoru nalo napano nomilaio, mia toro tai re

rijikia river ka kiniou nojo nomil vovu, bior vite nalo abiniu abe riano. Mia maka nosidom noil laka ka vite nalo na tibe na, bior napano bova nomila von ka nala kamiu kuvidu kiniou noto mave rivior vite tealo napano maka kuvialio kija a maka kuvijogio kija, mia kiniou ga nojo noberii. Kiniou nojidom ka kuvitu kuvitii kiniou ea im̃auano venia napano kumial nomilaio ka kamiu, a ea iliano venia napano neberio ka kamiu.

<sup>7</sup> A nemial jibe Atua bunu maka sidom ka kiaku jidomiano rimej to mave laka ea monovovuano nalo a vite nalo napano naio jo berialio ban kiniou, ana naio jian jaleleano tai joa mokotenaku napano nomijog jibe nionoti molu tai napano Sim̃aro jo julu kiniou bijaio julaka, napano jo mila mokotenaku mijalele, a jo mila kiaku jidomiano jo ga yetano. <sup>8</sup> Kiniou nebika den Tubo ka ridular vite nei den mokotenaku, ana maka rilaio, kario valuo nene nobolkouo ka naio biorio, kario varolu nene bereio, mia maka garuei, <sup>9</sup> naruei naio mil ban kiniou ga, ber jibe nei ber “Mia kiaku tinietiano ga bare ka rivokar vatitigso, bior napano kiaku moroano mijikia rim̃au ve toru lie bogo napano rim̃au rivija kiamo meluklukuano.” Iliano nei naruei mila na kiniou nojaaro ka noverii kiniou lie bereio, mia noverii kiaku meluklukuano nalo ga, ka rila na Kristo kiano moroano mijikia rim̃au lie ve toru ea kiniou, jibe napano naio berenio. <sup>10</sup> Tibe na, ka rila na siano rimej ve toru lie, nomijamo ga ka neber nojaaro ka meluklukuano nalo ajua mokotenaku, p̃eli ka avitii kiniou rivova, p̃eli nobinua bogokouo nalo, p̃eli amila bulag kiniou, p̃eli nubardulu jaleleano nalo, bior napano nomijikia ka bogo na nomelmeluku, Kristo naruei mia rila kiniou nesikili.

<sup>11</sup> Banalo! Nojidomii iliano nalo napano neber bulagio ban kamiu ea vio nei, nomialio ka be riano, nojo nomil jibe nomiavovu laka. Kamiu

kuviekokoa kiniou, mia bo ka kuvitilubar bunu ka kamiu naruej kumila kiniou jibe na. Neber ĩeli mia kamiu naruei kuvitu kuverii vatitig kiniou, napano kumisaaro ka vite novnovo nalo napano nomila ban kamiu ruei, mia makanio, kumitu kuberii niegeniege kiniou ga. Nemijikia ka kiniou nebe iakurano ga, mia neber ĩeli maka nobova loa atevi sibusibiano dolu nalo, naruei bior vaio kamiu kumitu kumiaia laka nalo?

<sup>12</sup> Bo ka kuvisidomii bereio vite nalo napano nomilaio iviso kean kamiu, napano aberialio ka kiniou naruei nobe atevi riano. Bogo nonovio ga, kiaku jidomiano tebievi bo ka noĩũau melmelumu vija kamiu, a nomila kamiu amial vremesiano nalo, bija vite nalo na iloiano, bija kijokijo nalo na Atua kiano moroano. <sup>13</sup> Nemila vite nonovio ban kamiu bo laka, beberare ga ka venia napano nomila ban namoneano lu dolu nalo, naruei maka ail muĩũio, mia kamiu kumil muĩũio. Vite tai ga napano nomilaio banlo, a maka nala van kamiu, maka nevika ka kuvitu kuvitkar kiniou ĩeli kuvijai kiniou, jibe napano nalo amila ruei, mia ĩeli ea vio na naruei nomila bova? Ver tibe na, kamiu kuviekokoa kiniou, bior napano ĩeli ver kiniou novika vite ve miroano ruei den kamiu mia kamiu, kuvisaaro ga ka kiniou naruei?

<sup>14</sup> Bo ga, vonganei naruei nojo ka noviedu noial kamiu bereio, napano varolu nene naruei. Kiniou neberkar ka mia nola re burĩũauano van kamiu, bior napano maka noviedu ka kenemiu vite nalo na aija kiniou, mia neviedu ka kiniou naruei neijja kamiu. Nina jibe teta nalo a nena nalo bija kialo kiritete nalo, napano maka kiritete likiliki nalo kialo iĩũauano ka avitkar kialo tormoruo nalo, mia tomoruo nalo naruei monoka avitkar vatitig kialo kiritete nalo.

<sup>15</sup> Naruei jibe na, kiniou najaaro ga ka nesian kiaku vite nonovio, vija kiaku meuliano bunu, ka

rijai kamiu. Nemijikia nala tibe na bior napano tinieku jii kamiu laka, mia nomijog kirivova bior napano nomial ka bogo napano kiaku tinietiano ea kamiu jo bavin lie, mia kenemiu tinietiano ea kiniou jo batove ga. <sup>16</sup> Kiniou neber jibe na bior napano nomijog kenemiu iliano dolu tai ruei. Kamiu kubitilubar ka bogo napano nojo bija kamiu, maka nala burĩũauano ka kamiu ka kuvitkar kiniou, a maka nesen kenemiu veru leleio, mia jidomiano tai joa kamiu kia ga. Kuber kiniou nebe masou vatitig ka bajago nalo na ala sibilili toro, naruei kumitu kuber nojo nomila lukua mĩarabo tai ka nola sibilili kamiu bior kenemiu togogo nalo. <sup>17</sup> Mia maka tibe na leleio. Kamiu kuvila von kuvisidomii vatitigio ka nalo napano nojo nomiilalo ka aviedu kean kamiu. Kumial napano amila niegeniege kamiu ka vite tai, ĩeli abar kenemiu vite nalo tealo be kiaku? Neber ĩeli makanio. <sup>18</sup> A juĩũabe bunu bogo napano nojikili ka Taitas ka naio naliko kuruado dolu nei, naljuo monoka ayotuba kean kamiu? Kumialio ka amila sibusibi ka kamiu ka kenemiu veru tealo? Maka leleio, bior napano kumemi jibe taara takurano ga, napano Niununo takurano ga joa kumemi, a kumemi numitu numitakii mĩarabo tai na iĩũauano ga, napano maka leleio nuvisidomii ka nuvila Tubo kiano iĩũauano ka nuvar saba ve kenememi.

### *Pol jidomii laka ka bogo napano riva Korin mia tuĩũabe?*

<sup>19</sup> Kiniou nojo noberii kiaku iĩũauano jibe na, ĩeli kamiu kuber ĩeli nojo nomila von ka nodular siaku mave ea miremiu ka rila kamiu kuvisidomii re rivova ka kiniou. Mia makanio, maka noto tinieku maio ka kiniou, mia nojo tinieku maio ga ka kamiu, a iliano nalo napano neberio, neberenio jibe Kristo kiano toro tai, ea Atua mirano, ka rijai kenemiu meuliano nalo. <sup>20</sup> Neber iliano nalo nei bior

napano nomerou laka ka maka rivu kiniou namaluvo kean kami, ana noial ka kami kumitu ea vio tai napano maka rivu leleio ea kiaku jidomiano, a nomerou bunu ka maka rivova ka kami maka kuvisidom kiniou. Ver tibe na mijikia rila ka kito rala baravo ka kito, ĩeli rosidomii rivova kean kito, ĩeli tiniedo seri kito, ĩeli rosidomii re toro dolu mia rosidomii kito ga veve terakurano bereio. Ea bogo na jibe na toro mijikia rioliolu, mijikia ril ea toro dolu, mijikia ril varvar, a mijikia rila yotubaiano laka. Ver rivan tibe na, bova ga ruei. <sup>21</sup> A nomerou laka bunu ka bogo napano noviedu bereio ea kami na mia nomial napano kiaku imauano nalo ea kami ajibirbil vatitig garuei. Ver tibe na, mia rila noimou laka ea Atua, rila kiniou nojog ka naio burudobi kiniou toru ea miremiu. Mia nomial ka mia monoka tibe na ga, bior napano burumara kariano napano kami tealo aju amilaio, naio be bajago va tai na siakaiano napano amila korov tuboiano na Atua midu jo ka toro a tira monoka atakio, a nalo maka aviliglo kanio leleio, a kuvitu kuvituvanlo ga ka nalo atu alaio rivano.

### 13

#### *Iliano maaro na rilabonlo*

<sup>1</sup> Bilbilu nalo, jibe napano neberenio, nina naruei ieliano varolu napano mia nala ka neviedu ea kami, a ĩeli mia bogo varolu na monoka noil van kami ka jaleleano nei. Nina mila kiniou nojidomii iliano tai ea Vivitauiano Lu nalo napano berenio jibe nei, ber

*“Bogo napano amil ban toro tai ea komeli ka kariano tai, monoka ve juo ĩeli ve tolu napano amijikia averial kiano kariano, ka rila avitii ve riano.”* *Tiut 19:15*

<sup>2</sup> Kiniou nojidomiikar nina bior ka bogo na nomaluvo kean kami ea bogo valuo nene nua na, nomil

ban kenemiu tom juo napano amila kariano nei, naina naruei bogo moti napano nomil banlo jibe na. A vonganai nojo nomil valuo nene bereio ea ĩesi nei, a ver nomei noil bereio, nina mila varolu nene. A kiniou nojidom never ka nalo nei, vija nalo dolu napano aju tivelinio na nalo, ver nomei noil bereio, nina mia tinieku tii re lo, mia notiburelo ka vironiano na jikili tai. <sup>3</sup> Kami kumitu kuber bo ka kiniou noverial kija kiniou ka be riano ka Kristo jo mil riano ea kiaku iliano nalo, ana ver kami kuvisidom tibe na, bo ka kami kumei kuviagago ka kiniou ea bogo na, naruei mia kami kuvialio. Mia kuvitii ka bogo napano Kristo jidom rila kiano imauano ea kami, naio maka lele melmeluku, a mia mijikia rimau vija kiano moroano nonovio. <sup>4</sup> Bogo napano ajukar naio mvaro ea mĥakolkolo, romial ka mokotenano binimei melukluku garuei, mia bogo napano naio jumolu meul bereio, naio bujo vatitig ka Atua kiano moroano nonovio. A kumemi numelmeluku bunu javukia naio, mia bogo na numila kiano imauano ka rijai kami, numitu numimau bija moroano napano Atua mijamo ka ban kumemi.

<sup>5</sup> Kiniou nojidom nover bunu ka nomial napano kumitu kumitibure kiniou laka, ana jumabe, kami maka kuvijikia kuvitibure kija kami bereio, ka kenemiu viekouoiano jo jikili vatitig kiano ĩeli jumabe? Kuvitii vatitig kami, kumitu ku-bitilubar ka Yesu Kristo jo mimau ea kenemiu meuliano kiano, ĩeli makanio? Verenio makanio, ĩeli tealo ajua meuliano napano Tubo maka leleio toaio, a nalo maka ave namoneano napano abe riano. <sup>6</sup> A ver bogo tai kuvisidom kuvitii veve kenememi meuliano bunu, mia bo ga, a nojidom laka ka mia kuvitilubar ka Tubo jo mimau ea kenememi meuliano, naruei maka nuvila luvu niati nene tai. <sup>7</sup> A kumemi numitu nubolkouo ban Atua ka rimau ea

kenemiu meuliano ka kamiu bunu maka kuvilaluvu vite tai. Ver kamiu tibe na, mia mijikia rila siememi rivu bunu, bior napano kumemi naruei nuberloglog kamiu, mia kumemi maka nubolkouo ka kamiu bior siememi ga. Ver tomu nalo aial ka kumemi numiñau bova jumñabe, nina naio bo ga, mia kenememi jidomiano na toru, numisidom ka kamiu monoka kuvitu kuvila rimemedu bogo nonovio. <sup>8</sup> A kumemi bunu, numisidom ka kenememi iñauano nonovio bunu monoka memedu ga ea Tubo kiano ilirianiano, maka nuvisidom nuvila vite tai napano riuedom kiano ilirianiano nei bereio. <sup>9</sup> Kumemi numitu numiñau kiano ga, naruei ver bogo tai rila numei numelmeluku, numisaaro ga, bior napano numijikia ka bogo napano numelmeluku, a kamiu kumitu kubinimei jikili. Numitu nubolkouo bior nina ga, ka mia kuvitu kumei rivu lie bogo nonovio. <sup>10</sup> Jidomiano nei naruei mila nobivitauiã mñesi nei biedu ban kamiu vonganei ea bogo na nojo koalabo den kamiu kia ga. Kiniou nojidom kamiu kuvijogkario, a ver kuvilaio, mia bogo na noviedu, noil sikili re bunu van kamiu. Tubo midu kamiu kumitua jumñaku ka novitkar kamiu, maka ka rila bulag kamiu, mia ka rila kamiu kuvavin maye. A ver noviedu a noial jumñabe, mia monoka nala sikili van kamiu ka venia ga memedu ka nalaio.

*Pol berenio bogiano bo kalo*

<sup>11</sup> Bilbilu nalo, nebinimei ea kiaku iliano maaro naruei, nober bogiano bo ga ban kamiu. Neber bo, kamiu kuvila von ka kuvila kenemiu mñarabo rivu vatitigio. Kumonea vatitigio ea vite nalo napano nobika den kamiu. Kamiu nonovio kuberakkar jidomiano novo tai ga. Kuvitu bo ga ea bajago na tumñaro, naruei mia Atua na tiniememiano a tumñaroiano to vija kamiu. <sup>12</sup> Bogo napano kumitu kubiviuo kamiu, kuvan jumemiu vatitig van kamiu, kuviniom babibiniomiu ea saariano lu. <sup>13</sup> Namoneano lu nalo na vio nei

aber kialo bogiano bo binimei ban kamiu bunu.

<sup>14</sup> Naruei kiaku volkouano ka mia kiado Tubo Yesu Kristo kiano tiniememiano, bija Atua kiano tinietiiano, bija voroniano na Niununo Lu, atu vija kamiu nonovio.

Kiniou, Pol.

**Mesi Napano Pol  
Bivitauiāio Ban  
Namoneano Lu Nalo Na  
KALESIA  
Verialiano Moti**

*Tukunuano bulati na niosi nei*

Kalesia, naio be tanobuku tai napano jo yetano ka Parinio Tubo na Romo, a joa venuo nei napano banei siano Teki.

Ea bogo na napano Yesu kiano tomu nalo ajikar ka aba aberiel ioluano vou nei, tomu telabo na maka ave kulo Israel, ajaaro toru laka kano. Mia tomu tealō aju, napano ea kialo jidomiano, nalo aberinavo ver toro sidom rimeī ve namoneano riano, naio monoka rimonea tuboiano napano Atua jianio ban Mosis. Naruei Pol milkuei kirsikili kean jidomiano na, berinavo bajago na maka rimemedu leleio. Naio berinavo ver toro sidom rivokar meuliano ea Kristo, burupati vite nei, naio monoka rimonea Kristo. Ea bajago na ga, tomu nalo amijikia amei memedu ea Atua mirano.

Mia ea yimo lu nalo na tanobuku nei Kalesia, tomu tealō abinimeī, aju amilkuei Pol, nalo aberinavo ver toro jidom rimeī rimemedu ea Atua mirano, naio monoka takisor Mosis kiano tuboiano nalo.

Mesi nei Pol jirio ba ban tomu nalo napano aju ajakisor verloglogiano va nalo nei, ka rivurulo amei bereio ea moneano napano be riano a ea bajago napano memedu. Ea kiano tikariano na mēsi nei, naio berial ka naio be kiano meruoiano ka tomu nalo avio naio, ka Yesu Kristo kiano atevi. Naio judu berinavo tomu nalo maka adu meruoiano van naio ka naio rimeī ve atevi, Atua naruei bitirilar naio, bio naio ka verial ioluano vou van tomu nalo napano maka ave taara na Israel. Mia naio jokia milkuei keano verloglogiano va nei, berinavo toro kiano moneano ga mijikia rila naio rimeī

memedu ea Atua mirano. Ea mirano nalo maariano na mēsi nei Pol berial ka bajago novo napano namoneano nalo ajuā amilaio, miyotuba ea bajago napano toro tinien jii kuruano a kuvivinieno nalo, bior napano naio monea Kristo.

*Torogio nalo na niosi nei*

Iliano moti 1:1-10

Pol be kiano meruoiano bior napano naio be atevi tai 1:11—2:21

Atua jo miija kito ea kiano tinievuiano 3:1—4:31

Tomu nalo na moneano abinimeī bo, mia imāuano jo kiaga 5:1—6:10

Iliano maariano 6:11-18

*Pol jikar kiano iliano banlo*

1-2 Kiniou Pol nebivitauiā mēsi nei biedu ban bagaro na moneano nalo ea tanobuku na vio Kalesia, mia kumemiliko kuruado nalo na vio nei, kumemi nubika den kamiū ka kamiū kumitu bo ga, pēli na kumitu juābe? Kiniou nei naruei napano Yesu Kristo naljuo Atua karamādo, napano naio bitirilar Yesu bereio ea namāriano, naljuo nei abitirilar kiniou nebe atevi, jibe na ana mia maka ve toro napano bio kiniou, pēli na bitirilar kiniou jibe nei. Nao, mia monokanio kamiū kuviagago ka iliano nalo napano mia kiniou never ka kamiū.

<sup>3</sup> Nejidom mēlea ka mia Atua karamādo naljuo Tubo Yesu Kristo, nalo ve juo amidu tiniememiano bija tumāroiano ban kamiū.

<sup>4</sup> Nao, Yesu Kristo naio mila memedu ga jibe ka napano Atua karamādo jidomio, ka napano naio rijamo ka mia naio riāro ka rila bulag kiado kariano nalo, ka mia naio mijikia rivuru bulag kito den bajago na bova na bogo nei napano kito rojuaio vonganei. <sup>5</sup> Mia tibe na, bo ka kito rodular Atua siano rivavin medave tulaka, rivano-o mia ribisi deio, ee mia tibe na.

*Ioluano Vou takurano ga*

<sup>6</sup> Kiniou nomiilo toru ka kamiū, napano Atua bio kamiū, a Kristo

mila bo laka ban kamiu ruei, ana mia maka vesiou ga ana kuburo den Atua bereio ana kubokar iliano tai napano jibe ka Ioluano Vou dolu tai bereio. <sup>7</sup> Mia maka rijikia ve Ioluano Vou dolu bereio, mia be ga ioluano takurano ga na jo. Kiniou neberii jibe na, bior nomijog ka tomu tai ajumã amila bilivilig kenemi iviso nalo ka mia, nalo ajidom avilig Ioluano Vou na Kristo kiano rimei ve dolu. <sup>8</sup> Ana verenio kito tai, ðeli na nailiano na vio mave, ðeli na toro kei bereio, naio river lua liliiano tai napano maka riveverare vija nana kumemi nuber lua ban kamiu nanua ruei, memedu ga ka toro nene avukuio rivian ea jeleig vio na jogvaiano. <sup>9</sup> Nao, neber iliano nei vaarakurano bereio ban kamiu, ka verenio toro tai kei napano rioliolu ka iliano tai napano be dolu ka ioluano napano kamiu kumiduo jukamu ruei, mia toro na aviron naio rivova laka ea sebi.

<sup>10</sup> ?Nemijikia ka tomu tai aber niegeniege kiniou, aber nejidom ga tomu nalo ajog rivu ka kanaku iliano, mia kamiu kumijog kanaku iliano napano jikili nei jumãbe? Peli mia, tomu tai tiniel ser kiniou koviobo! Mia bo ga, bior venia napano nojidomio, kiniou nejidom ga ka Atua naio saaro ka kanaku iliano, ka napano ver kiniou noto never lua ga ka mia tomu nalo aiaia kiniou kanio, jibe na maka bunu neve Kristo kiano toro na imãauano ve riano.

### *Pol berii ka napano Atua bio naio*

<sup>11</sup> Kuruaku nalo a kuvivinioku nalo, monoka neverii rimeravo van kamiu, ka Ioluano Vou na nojomã neberii luaio, naio maka ve iliano tai napano toro ga to tikario. <sup>12</sup> Kiniou maka nejevio den toro tai, a maka toro tai riverloglog kiniou kanio, mia Yesu Kristo ga, naio jiloglog Ioluano Vou nei meravo ban kiniou.

<sup>13</sup> Nina jibe ka napano kamiu kumi-jog ruei, ka beamu kanaku

meuliano jumãbe, ka bogo napano nojo joomo ea kenememi nalotuno kumemi kulo Ju. Ka bogo na kiniou tinieku jer bagaro na namoneano nalo na Yesu kiano toru laka bogo nonovio, ana nemijil lo nemila lelanlo napano mia maka leleio bunu tinieku riialo, bior nejidom ka mia namoneano nalo ta re bunu to. <sup>14</sup> Ka bogo na, najakii vatitig bajago na nalotuno napano kenememi kulo Ju, juvulu tomu dolu nalo na kumemiliko kenememi terati takurano ga, mia kiniou nabokar jikili iliano moruo nalo napano korobimemi nalo kanalo, napano tomu nalo aju ajakii binime batove bokar banei.

<sup>15</sup> Kiniou nojomã nemila jibe na bano-o mia maka nejikia ka Atua naio berkar kiniou ruei, bogo na maka nomoluo vo. Naruei ea ga kiano tiniememiano, naio bio kiniou ka neve kanano, a ea kiano jidomiano novo <sup>16</sup> naio miila kenerinio Yesu, maluvo ka kiniou ka nemijikia novitilubarario, ka nava noioliolu kanio van nalo napano maka ave kulo Ju. Ka bogo na, maka nava neial kulo dolu nalo ka mia novokar jikiaiano tai denlo tivelinio ka Ioluano Vou nei. <sup>17</sup> A maka navavin Yerusalemo bunu ka neial atevi nalo napano nalo abe atevi jukamu ka kiniou, ka nevika denlo, ka mia kiniou neioliolu ka venia, ðelina kiniou neverial iliano tumãbe? Makanio, maka nava nevika tibe na, bior Kristo naio mila vite nonovio meravo ban kiniou ruei. Ka bogo na, najaluvo soðeli ga, naban yako laka ea buruvenuo na vio Arapia, mia iorou kanio ana nebinime bereio, nemijaka garuei naban ea komeli na vio Tamaskas. <sup>18</sup> Karina iorou kanio napano yuka tolu barlaka bano, naruei ka bogo na ga, ana nabavin bereio Yerusalemo naba nemiadu ka Pitere, mia maka noto vija naio vesiou, nojo bogoti duelimo ba jimo [15] ga. <sup>19</sup> Mia ka bogo na maka neial atevi dolu nalo bunu, mia

takurano ga na nemialio, nina kialo navurim̃araboiano napano Yemesi ga, napano naio be kiado Tubo kuruano. <sup>20</sup> Nina naruei mia venia napano nojo neberio ka kamiu naio be riano. Kiniou maka nala sibi, Atua naio mijikiaio.

<sup>21</sup> Tenene na naruei, nojo Yerusalemo jibe na maka bogo vesiou leleio. Ana karina nejeliviv ea vio nalo napano ea tanobuku juo napano Siria bija Silisia, <sup>22</sup> mila na ka bogo na, namoneano nalo na tanobuku dolu na mave ea vio Yutea, bija kiano komeli labo napano Yerusalemo, nalo na maka ajikia vatitig kiniou vo. <sup>23</sup> Nalo amijog ga vaio napano tomu nalo aju aberenio, aber "Toro nanua jom̃a mijil lelan kito vururua na, vonganei naio jom̃a mioliolu jikili ka kiado moneano nanua naio jom̃a milavio jikili ka ruedomio." <sup>24</sup> Ana bior vite na, nalo aju amidular Atua toru kario napano naio jo bilig kiaku meuliano jibe nei.

## 2

### *Atevi dolu nalo abirokar naliko Pol*

<sup>1-2</sup> Bogo na yuka duelimo ba veri [14] barlaka bano, ana Atua jiloglog ka kiniou ber monoka navavin ea vio Yerusalemo bereio. Nomijog Atua mil jibe na ana kiniou Barnabas nubano, mia noburukar Taitas bunu binimei bija kumemi.

Kumemi nuboru Yerusalemo, ana numitutano ea vioriano tai napano kumemi liko ga tomu na tukamuano na tum̃aro ga abinimei joomo eaio. Ea vioriano nei, neber bisivisii iliano nalo napano m̃a nojo nomioliolu kanio ban tomu nalo na maka ave kulo Ju. Neber bisivisii vatitig vite nalo nonovio nei napano nojom̃a nemilaio banlo, bior maka nesidom ka aver kiniou nemiñau maka rimemedu, ka mia nalo aitava re ea kanaku im̃auano binimei bokar bogo nei, mila ana kanaku im̃auano rimei ve iakurano bereio. <sup>3</sup> ?Beamu

neberiam̃a mia nalo ail sikili ka kiniou, ka mia never tomu nalo na maka ave kulo Ju, monoka nalo bunu ava joomo, mia vioriano nei naio ber venia? Tivelinio ka kiaku bilbilu nei Taitas, naio maka ve toro Ju tai, naio be toro na vio Kris tai, napano naio maka riva joomo, mia maka nalo atutua naio ka aver naio monoka riva joomo. <sup>4</sup> Ea vioriano nei naio beve terakurano napano nalo ajidom ka Taitas riva joomo, ana mia namial nalo nei jibe ka napano aberenio nalo abe kuruado, mia nalo amila sibi ga. Nalo na abinimei joomo ea vioriano kar ga ajidom atuluku ga avitiv kumemi ga. Ajidom avitivitii kumemi tibe na bior nalo maka asaaro ka napano numitu nuberloglog ka kumemi numijurukar bija Yesu Kristo ruei, ana na bajago moruo re nua maka bunu avokario m̃lea kumemi, mia kumemi nubisi kalo. Mia nalo nei maka asaaro ka kenememi iliano nalo, mia ajidom ala ka napano ka tuboiano na nalotvano na kulo Ju nalo kanalo monokanio rivokar kito nonovio sikili dam̃ariga. <sup>5</sup> Mia kumemi numisidom nuvakar vatitig ilirianiano na Ioluano Vou, ka mia kamiu kumijikia kuvakario rimemedu ga, naruei nuberburelo, ana maka nuvijamo kalo leleio, napano aju ajidom ayuku kinimemi iliano rivatove.

<sup>6</sup> Ea vioriano nene, tomu nalo tai napano aberenio nalo abe navurim̃araboiano nalo, mia kiniou maka neial lerinio ealo ver abe tomu na tortoru nalo p̃eli na maka ave tomu na tortoru. Nina buriakurano ga na, bior Atua naio maka lele tovon sio nalo na jibe na. Mia navurim̃araboiano nalo na, maka lele averloglog kiniou ka vite vou tai leleio ka noioliolu kanio. <sup>7-8</sup> Makanio, maka tibe na. Nalo abitulubar ka Atua, ea ga kiano sikiliano, naio bitirilar kiniou ka mia neve atevi tai, ka mia neverial ioluano vou nei van nalo na maka ave kulo Ju nalo, jibe kanio napano

ea kiano moroano bunu napano naio bitirilar Pitere ruei, ka naio bunu rive atevi tai ka naio riverial Lilianiano Vou van nalo napano abe kulo Ju nalo. <sup>9</sup> Naruei Yemesi naio Pitere a Jone, napano tomu nalo aberenio ka nalo ve tolu nei abe kialo navurim̃araboiano, nalo abitilubar ka Atua midu im̃auano maraiu nei joa jum̃aku ea kiano tiniememiano. Ana nalo tolu nei abinimei abanjum̃alo kumemliko Barnabas, jibe ka napano kumemi nube taara takurano kumemliko nalo, mia nubiniu numijamo ka nuvitibure im̃auano nalo, jibe ka napano mia kumemi ve juo nuva nuviololu ea vio nalo na tomu nalo napano maka ave kulo Ju, a mia nalo avan aioliolu ea kulo Ju nalo kialo vio. <sup>10</sup> Mia nalo na amijev iliano takurano ga ban kumemi juo, aber monoka kumemi juo tiniememi rimaio ka kanalo talim̃asa nalo yako Yerusalemo, ka mia nuvijailo, mia nina be titai napano nejidomii bogbe ruei ka mia neim̃aukanio tivena.

### *Pol berbure Pitere jikili*

<sup>11</sup> Iorou ka nina, kiniou nabatove bereio, naba nojoa komeli napano Antioko, naruei ka bogo na Pitere naio malivo ka kumemi ea vio na, ana kiniou nejikil noju kamu ea namoneano nalo miralo, neberbure naio, bior meravo batitig ka vaio napano naio mila maka memedu. <sup>12</sup> Beamu, Pitere naio mila memedu ga, kanio napano naio jo jinan ga naliko kuruado nalo napano nalo maka ave kulo Ju, mia iorou kanio, Yemesi miila kiano tomu tai abinimei Yerusalemo, ana nalo amil ban Pitere, nalo ajum̃a aber jibe nei aberinavo “Nalo napano maka ave kulo Ju, nalo bunu monoka avakuveulo, ver p̃eli, mia Atua maka rijikia rilarrulo.” Iliano nei maka takii vaio napano vioriano na toru nei berenio beamu, mia mila lelan Pitere kiano jidomiano, mila naio merou, ana kario naio maka bunu

saaro ka sinan vio takurano naliko namoneano nalo na napano maka avakuveulo. <sup>13</sup> Mia maka Pitere naio ve takurano, mia kuruado dolu nalo na vio na, napano nalo abe kulo Ju, binimei bokar Barnabas bunu, nalo na ajakisor Pitere ea jidomiano na merouano nei.

<sup>14</sup> Mia bogo napano nemial napano nalo aju amiel jibe na ea m̃arabo tai napano maka rimemedu tibe ka napano Lilianiano Vou naio berenio, nemil jikili ban Pitere ea nalo na miralo, neber jibe nei, neberenio “Pitere, be riano ka napano jau kobe toro re Ju, mia bo laka napano beamu ruei, jau kojo kojaaro ka nalo napano maka ave kulo Ju kialo bajago ruei, napano jau kojinan vio takurano kamliko ruei. ? Mia jum̃abe naruei, ana jau kojidomii kotutua bereio nalo ka monoka atakii kiado bajago kulo Ju, napano jau kober nalo monoka avakuveulo?”

### *Kei napano verenio rimonea Yesu, Atua rilarrur naio*

<sup>15</sup> A ka bogo na, kiniou neber vatitig ka nalo jibe na neberinavo “Kito romiyotuba ea bajulukuti na kulo Ju, kito maka ve kulo dolu nalo, tibe ka nalo napano kulo Ju nalo aju ajidomii aber nalo amia-giogo ga.” <sup>16</sup> Makanio, kito robe kulo Ju memedu nei, mia vonganei, kito romijikia ruei, ka toro maka rijikia rimemedu vija Atua, napano naio jo mijogkar vatitig ga Mosis kanano tuboiano. Toro napano monea Yesu Kristo, naio ga mijikia rimemedu rivija Atua. Jidomiano nei naruei mila kito kulo Ju kito monoka romonea Yesu ga bunu, ka kito romemedu vija Atua. Kamiu monoka kuvijikia vatitig iliano napano Atua kiano iliano lu bere-nio, napano berinavo maka toro tai leleio napano rimemedu vija Atua bior naio jakii batitig tuboiano na.

<sup>17</sup> Mia kito kulo Ju nalo, kito roju rojidomii roberiam̃a tuboiano nei

mila kito romemedu kitoliko Atua ruei na, mia maka tibe na. Mia verenio be riano ka kito kulo Ju bunu, monoka romonea ga Yesu Kristo bunu ka romemedu kitoliko Atua, neber ĩeli tomu tealu amijog bova ka iliano nei. Peli nalo alavon ka aver iliano na mila ana kito kulo Ju robinimeĭ robe tomu na kariano beberare ga tomu nalo napano maka ave kulo Ju. ? Ana ĩeli nalo amila von ka aver bunu ka tibe na, nina sano nene berenio Kristo nei naruei mila kito kulo Ju robinimeĭ robe tomu na kariano ga? Mia makanio, nina maka tibe na leleio garuei. <sup>18</sup> Nina bior nanua, kiniou nojomã nomue dodom bajago moruo na tuboiano na ruei, mia verenio vonganei nevitirilar bereio bajago na takiiano na tuboiano moruo na, napano nebrenio monoka ravakuveu a monoka rala tibe na tibe na ka romemedu vija Atua, nina mila ka beamu na, kiniou bunu nebe toro na nemilakorov tuboiano ruei. <sup>19</sup> Ee, tuboiano na naio jidom rila ka kiniou namãaro, mia vonganei tuboiano na naio javukia tasiãaro tai ga ea kiniou, kiniou nebisi eaio ruei. Kiniou nojuvan tuboiano na ruei, kano kanaku meuliano toa ga Atua. <sup>20</sup> A vonganei, maka bunu ve kiniou napano nojo nemeul, mia Kristo naio jo meul ea kiniou, mia kanaku meuliano na vonganei, naio moluo bior napano nomonea Atua Kenerinio, napano naio tinien miãa kiniou toru laka, naio mijamo ka kiano meuliano, naio mãaro kar kiniou. <sup>21</sup> Ea bajago na, romial Atua kiano tiniememiano toru laka, naruei maka nejikia nala kiano tiniememiano nei rimeĭ rive vite kurano ga tai, bior ver toro mijikia rimeĭ memedu vija Atua bior ga naio mijogkar tuboiano, nana ĩibe na ĩibe Kristo naio mãaro kar iakurano ga.

### 3

#### *Kulo Kalesia amilaluvu mãarabo*

3:6 Rom 4:3    3:7 Rom 4:16

<sup>1</sup> Kiniou nemial kamiu kulo Kalesia ĩibe ka pariparimiu amiavovu ga. ?Peli tomu nalo tai amila mali ea kamiu bo, tenene kamiu kubano kumilaluvu mãarabo? Neberial meravo ea miremiu ruei, ka ĩumãabe ana Yesu Kristo naio mãaro ea mãakolkolo, mia vonganei kamiu kuba kube dolu bereio. <sup>2</sup> Kiniou nejidom nevika vikadeniano tai van kamiu beamu vo. Vikadeniano nene ĩibe nei “?Kamiu nanua kumijev Niununo Lu ruei, kumijevio kar vaio? ?Kumijevio bior kumonea Mosis kiano tuboiano nalo na?” Makanio, kamiu kumijevio kar ga kumijog Ioluano Vou ana kumitu kumoneaio. <sup>3</sup> ?Kamiu kubitikar kenemiu meuli-ano vou bija Kristo ea moroano na Atua kiano Niununo Lu, mia vonganei ana kumisidom ka kuvila nonovio ea kenemiu moroano ga? Maka leleio, kamiu kumiavovu tanea ga ruei. <sup>4-5</sup> Ea kenemiu meuliano vou nene, vite novo telabo amaluvo ka kamiu ruei, ĩibe ka napano Atua mijev kanano Niununo Lu ban kamiu, mia naio jo mila jamerijiano nalo ea miremiu, mia ĩumãabe, ĩeli kamiu maka kuvitilubar vo ka vite nalo na abinimeĭ ea kamiu kar venia? Monoka kuvijikia vatitig ka Atua mila ĩibe na, maka rivior kumitakii tuboiano, mia kar ga beamu kamiu kumijog Ioluano Vou, mia bogo napano kumijogio ana kumoneaio.

*?Vaio naio bo? ?Tuboiano, ĩeli viekouoiano ea Kristo?*

<sup>6</sup> Kamiu kuvisidomii von tormoruo Epraamo napano Atua kiano Iliano Lu berii naio, ber

*“Bior ka napano naio barkar tinieno ea Atua, ana na naio binimeĭ memedu bija Atua.”*  
*Jen 15:6*

<sup>7</sup> Mia tomu nalo na abinimeĭ iorou napano abarkar tinielo ea Atua ĩibe na, nalo abe tormoruo Epraamo kiano bajulukuti nalo memedu.

<sup>8</sup> Bior Atua kiano Iliano Lu berial Ioluano Vou nei nuanua laka ruei, napano naio berii Epraamo berenio

“Ea jau mia Atua rilivu ka yati na tomu nalo nonovio na vio yetemeriba nei.”

Takii iliano nei, Iliano Lu berkario bunu ruei berinavo mia Atua to rila nalo na maka ave Ju mia amemedu naliko, verenio avarkar tinielo ea naio. <sup>9</sup> Ana na nalo napano abarkar tinielo ea Atua jibe na, mia naio jo milivu kalo vonganei, jibe kanio napano naio milivu ka tormoruo Epraamo re nua, ka naio barkar tinielo eaio.

<sup>10</sup> Mia nalo napano aju ajidom kavulio ka amijikia avokar meuliano bior amila von ka amonea tuboiano nalo, nalo na ajutan ka vironiano tai ruei, bior maka toro tai napano naio ridukar vatitig tuboiano nalo nei riviniu, ana Atua kiano iliano lu berenio,

*“Tomu nalo napano maka amonea vite nalo nonovio napano ajua niosi na tuboiano, mia nalo monokanio avokar vironiano.”*

<sup>11</sup> Tenene na meravo vatitig ban kito ka napano maka toro rijikia rimej rimemedu vija Atua kar ga naio monea tuboiano na, mia jibe ka Atua kiano Iliano Lu berenio, napano berinavo

*“Toro napano memedu bija Atua kar ga barkar tiniene ea Atua, naio ga mijikia rimeul.”*

<sup>12</sup> Iliano nei naruei naio berij bajago na viekouoiano, mia romijikia reial bajago na viekouoiano nei vija bajago na moneano na tuboiano, naljuo maka aveverare leleio. Nina bior bajago na moneano na tuboiano, naio jumolu jua tivelinio vite nalo napano toro ga mijikia mimaukanio, jibe ka napano Iliano Lu berenio berinavo

*“Toro napano mila saba nalo nonovio napano tuboiano berenio, mia naio mijikia rivokar meuliano eaio.”*

<sup>13</sup> Mia maka ve kito tai napano rila nonovio vite nalo napano tuboiano berenio, ana tuboiano berkar vironiano bija marioano ban kito robiniu.

Mia Kristo naruei naio binimej buru bulag kito ruei den tibureiano nene, mijamo ka naio midu jeledo, ana naio ba jotan yetano kanio. Nina jibe ka napano Iliano Lu berenio, napano berinavo

*“Toro napano amiorkario jaklele ea iesi mave ka rimaro, amiorkar naio bior napano naio jotano yetano ka Atua kiano tibureiano.”*

<sup>14</sup> Kristo naio mijamo ka naio jibe na, ka tomu nalo napano maka ave kulo Ju, nalo amijikia avokar bunu ka ilivuiiano nalo napano Atua berkario ban Epraamo, ana vite nei mila ana vonganei, kito napano robiekouo ea Kristo, romijikia rejev Niununo Lu napano Atua berkario ka mia rije van tomu nalo.

*Atua kiano verikariano binimej jukamu, tuboiano binimej iorou*

<sup>15</sup> Kuruaku nalo a kuvivinioku nalo, mia kiniou neverii tukunu tai ea kiado meuliano ga napano sano nene vaatara ka ga ea Atua kiano verikariano ban Epraamo. Verenio toro tai riverial kiano ilimaariano river bogo napano naio mia rimaro, mia kanano saba nalo monoka atibe nei atibe nei, naruei naio rila mēsi tai ka river verikariano nei ka mia ver naio maro, mia toro dolu maka rijikia rudular kanano iliano, a maka rijikia tusolio. <sup>16</sup> Ana Atua mila kiano verikariano ea Epraamo, bija kiano bajulukuti. Iliano nei maka river ga ea tomu nalo napano ea kiano bajulukuti nalo, napano naio ber toro takurano ga, mia toro nene naruei naio be Kristo. <sup>17</sup> Kanaku iliano ea vio nei sano nene jibe nei. Beamu Atua birakar kialo virakariano nei jikili, naruei iorou kanio yuka duelimo toromou veri duelimo va rolu [430] barlaka na tuboiano na Mosis kanano naio maluvo. Mia tuboiano nei naio maka rijikia rila korov verikariano nei, a maka rijikia riolkon bulag Atua kiano iliano. <sup>18</sup> Verenio ramijikia ravokar Atua kiano ilivuiiano kar ga roju rajakii tuboiano napano

naio binime iorou, nina jibe ka ber Atua kiano verikariano na jo jukamu naio bekurano ga. Mia romial Epraamo bokar Atua kiano ilivuiano nalo bior ga naio bokar Atua kiano verikariano bo, maka rivior tuboiano.

### *Tubeiano naio be kiano imãuano jo*

<sup>19</sup> Bo ga, ana ðeli vikadeniano tai jo, napano berinavo “?Jibe na, Atua jian Mosis kiano tuboiano na kar vaio ðeli bior vaio?” Boga, kiniou neverenio ka kamiu voniganei, ber Atua naio mijeduka bereio tuboiano nei mave ea kiano virakariano, ka rijai kito tomu nalo ka rovitilubar kiado kariano. Atua naio midu tuboiano nei ka tumolu tu rivano-o rivokar bogo napano toro napano naio be yati na Epraamo kiano bajulukuti, napano Atua berkario, rimoluo ea kito.

Mia romial napano tuboiano be kiano imãuano novo tai jo, mia kito monoka rosidomiikar tuboiano nei, ver bogo naio rimaluvo, naio rime i ea nailiano nalo tukamu, karina ajianio ban toro tai, naina be Mosis, ana naio bario binime ban tomu nalo. Mia bogo napano Atua mila virokariano na bija Epraamo, nina maka tibe na. <sup>20</sup> Bogo na naliuo nei aju vio takurano, maka nailiano tai ðeli toro dolu tai napano jo iviso ka naljuo ka rivar iliano, mia Atua naio takurano ga berial kiano verikariano memedu ea Epraamo mirano.

<sup>21</sup> A nina maka river ka tuboiano rilavio ka riverbure Atua kiano verikariano, makanio. Ver Atua naio mijikia sian tuboiano dolu tai bereio napano ver kito ro-jogkar nonovio, ana mijikia rila kito romeul, ðeli naio jian tuboiano nene ban kito ruei ka romijikia romemedu vija naio naruei. <sup>22</sup> Mia maka titai tibe na, bior Iliano Lu naio berenio ruei ber kito nonovio rojutano ka moroano na kariano, kito roju romila korov tuboiano ga.

Mia Atua kiano ilivuiano nalo napano berkar ka mia sianio, nalo amijikia amaluvo ea kito bior napano ga kito rabarkar tiniedo ea Yesu Kristo.

### *Bogo na ravarkar tiniedo ea Kristo naio miyotuba ruei*

<sup>23</sup> Nanua ruei, binime bokar vonganei napano romijikia rabarkar tiniedo ea Kristo, Mosis kiano tuboiano na naio jomã miadikar m̃lea kito, jibe ka napano rojua yimo na lakoiano ruei. <sup>24</sup> Tubeiano na naio jibe kano jo bitikar kito, jibe kano kiado naverloglogiano tai, binime bokar bogo napano Kristo naio binime, ka ea bogo na, romijikia ravarkar tiniedo ea naio ana romijikia romei romemedu vija Atua. <sup>25</sup> Mia vonganei, tuboiano na maka bunu rivitikar kito, bior bogo na napano ravarkar tiniedo ea Kristo miyotuba ruei.

### *Kamiu nonovio kube takurano ea Kristo naruei*

<sup>26</sup> Ana bior napano kamiu kubarkar tiniemiu ea Kristo Yesu, kamiu nonovio kamliko naio kube Atua kenerinio nalo. <sup>27</sup> Abaruei ea kamiu ruei, ana kubinime kube takurano bija naio, jibe kano napano kumijev ko bajago novo nalo napano Kristo kiano ea kamiu jibe kano kumiya kuluniabemiu ko mokotenemiu. <sup>28</sup> Mia kamiu nonovio kubinime kube takurano ga ea Kristo Yesu, mia jibe na naruei, kamiu nonovio kube veverare. Bokanio kito monoka rotiburevure re tomu nalo, rover ninei be toro Ju, mia nina be toro dolu ga, ðeli na rover ninei naio be toro na toru, mia nina be toro na imãuano ga, ðeli na rover ninei be tubo, mia nina be toro na imãuano ga, ðeli na rover nina be sumãano, ana ninei be tira ga. Mia bajago na monoka toa re bunu kamiu. <sup>29</sup> Mia bior kamiu kube Kristo kanano jibe na, kamiu naruei kube Epraamo kiano bajulukuti memedu, mia tibe na, ilivuiano nalo napano Atua naio berkario ka

Epraamo kanano bajulukuti nalo, mia kamiu naruei kuvarilo.

## 4

### *Kito robe Atua kenerinio nalo*

<sup>1</sup> Naruei mia neil ta bunu vo ea bajago na kito ka nevisivisii lie vo ea tivelinio ka tuboiano na. Verenio toro tai, ana naio riñaro, mia kenerinio mijikia rivar kiano saba nalo. Mia ver kiritete nene naio telisu kia ga vo, mia naio maka rijikia rivitikar saba nalo nei. Mia jibe ka naio be karamñoano kanano toro na iñauano ga, <sup>2</sup> ka mia naio monoka totano ka kulo dolu nalo ga juñalo, jibe ka karamñoano dolu nalo, rivano-o rivokar bogo memedu napano karamñoano berialio nua ruei ka mijikia rivitikar saba nalo na. <sup>3</sup> Ea kito naio jibe na bunu, napano beamu, rojibe ka kiritete nalo, napano kiado jidomiano jutano ka siñaro nalo na jukamu ea vio yetemeriba nei. <sup>4</sup> Mia binimej bokar bogo nene memedu, Atua miila kenerinio binimej, napano tira tai bario, naio moluo ea vio yetemeriba nei, a napano naio moluo yetano ka kulo Ju nalo kialo tuboiano. <sup>5</sup> Naio moluo yetano ka tuboiano na, naio miluo eaio, ka naio mijikia rivuru bulag kito napano rojutano ka tuboiano nei naruei, ka mia Atua rivuru bulag kito romei rove kenerinio nalo.

<sup>6</sup> Mia vonganei, jibe napano robe kenerinio nalo, naio juvan kenerinio kiano Niununo binimej ea kiado iviso, napano naio mila na kito romijikia rovio Atua, rover “Teta, Teta.” <sup>7</sup> Bior vite na, kamiu maka bunu kuve tomu na iñauano nalo ga, mia kamiu kube Atua kenerinio nalo riano, napano mia naio sian van kamiu vite novo nalo, napano naio berkar berinavo mia kenerinio nalo avario.

### *Pol tinien miia kulo Kalesia*

<sup>8</sup> Nua na, ka bogo napano kamiu maka kuvijikia Atua vo, kumitutano ka moroano na siñaro nalo napano

maka ave atua leleio, <sup>9</sup> mia vonganei, kumijikia Atua ruei, ðelina bo ka never tibe na, never vonganei, Atua mijikia kamiu. Mia kiniou nejidom nevika den kamiu, nenerinavo “?Kar vaio ana kumisidom kuva iorou bereio ea siñaro nalo nanua na, napano maka ve kanalo moroano tai, a napano maka ajikia avijuku rivu ka kamiu bogo tai? ?Kar vaio ana kumisidom kuvitutano ka kialo moroano bereio? <sup>10</sup> ?Juñabe ana kamiu kumitu kumisidomikar kanalo legiano lu nalo, a kanalo siberio lu nalo, a kanalo bogo lu nalo, a kanalo yuka lu nalo jibe na? Kamiu kuberianña mia Atua saaro ka kamiu kario?” <sup>11</sup> Tomnej, kiniou nemerou ka kamiu toru bior kamiu? !Nemialio jibe ka nomimau toru laka ka kurano!

<sup>12-13</sup> Kuruaku nalo a kuvivinioku nalo, nanua beamu kamiu maka kuvitutan ka tuboiano, ana na ka bogo napano nobinimej nojo bija kamiu, nomila kiniou bunu najavukia ga kamiu. Mia vonganei, nomijogio ka napano kumisidom ka kuvan bere ea bajago na tuboiano bereio, tenena nebika jikili den kamiu ka kumei tibe ka kiniou bereio ga, napano kiniou maka bunu nototan yetano ka tuboiano. Kamiu kuvisidomii vonio bogo napano nomioliolu beamu ban kamiu, napano kiaku mieiano ga mila napano be kiaku bogo ka noto vija kamiu, mia bekurano ka nemie ka bogo na, kamiu maka kuvila kiniou nojog rivova. <sup>14</sup> Makanio, mia kanaku mieiano nei mila lelan kamiu toru laka, mia maka kuvijog rivova ka kiniou, maka kuvisidom va ea kiniou, makanio, kuburu kiniou naban ea kunuemiu, jibe ka napano ver kiniou nebe nailiano tai na Atua kanano, ðelina nejibe napano nebe Yesu Kristo ga. <sup>15</sup> Nanua kumisaaro mñlea ka kiniou, nomial jibe kanio napano ver kumijikia kuvila, ðeli kumisaaro ka kuvurular miremiu ka riverei ka miraku ka rijai kiniou, mia juñabe vonganei? <sup>16</sup> Peli von-

gane, kanaku ilirianiano nalo nei, nalo amila kiniou nebinimej jibe ka kenemiu bilbilu va tai bereio. ?Mia venia na?

<sup>17</sup> Kulo dolu nalo na napano nomi-jog aber aju kamliko vonganei, nalo na aju abilvilig Kristo kiano Ioluanou Vou, nalo na aju abijurukar kamiu ka ave bilbilu rivu kamliko, mia kamiu kuvisidom sofi ealo, mia nina be tena aju kubijukubin kamiu ga, bior ajidom ga ka avuru bulag kamiu den kiniou. <sup>18</sup> Mia maka never tibe na ka mia kiniou ga ve takurano nomijikia noto vija kamiu, p̄eli na kiniou ve takurano ga ka kito rove bilbilu vatitig rivu, bior bajago na bilbilu vu rivija toro dolu naio bo bogo nonovio, mia bo ga verenio ka ga rila vite na bo.

<sup>19</sup> Keneriku nalo, kiniou nejavukia tira tai napano mabono mijalele ka naio rivar tete, napano nojo nomi-jog bova toru ka kamiu, ka kamiu kuvijev Kristo vija kiano bajago na bo nalo ea kenemiu meuliano nalo. <sup>20</sup> Riano, ver nomijikia noto kitoliko vonganei, mia nojog rivu laka. Verenio tibe na, mia nevilig kanaku iliano rivatove kija ve telisu, mia vonganei napano nojo laka ka kamiu jibe nei, maka bunu nejikia ka kamiu jum̄abe naruei.

### *Viginiano na Ekara naio Sera*

<sup>21</sup> Nalo na kamiu napano ajidom ka kito monoka rodukar kiado tuboiano rimemedu vija Atua, nejidom ka nalo averdope kanaku vikadeniano tai, ka “?Tuboiano nei napano ajun̄a aberiio, nalo aju amijoglubar venia na tuboiano nei jom̄a berenio, p̄elina maka ajoglubar?”

<sup>22</sup> Iliano Lu nei berii tormoruo Epraamo, napano naio be kenerinio tete sum̄ano juo, napano tinene, tira na Ekara, napano miñau ea koano, naio bario jukamu, mia tinene, koano memedu, napano Sera, naio bario iorou. <sup>23</sup> Nana napano moluo iorou, naio be Aisak, naio moluo bior Atua berkario, mia dolu napano moluo beamu, napano Ismael, naio

moluo jibe na ga. <sup>24-25</sup> Naruei mia romijikia reial viginiano nei jibe kanio jamerijiano tai, napano tira juo nei, a jibe ka verikariano napano Atua milaio.

Tira nei Ekara naio jibe ka virakariano napano Atua milaio ea burusuku na toru na Sinai, nina ea buruvenuto na Arapia, vio na naruei napano Atua jian tuboiano ban Mosis eaio. Ekara nene, naio be tira na im̄auano ga, mia kenerinio nalo, nalo bunu abe tomu na im̄auano ga. Tenene na Ekara naio bunu jibe kanio komeli labo na Yerusalemo, napano tomu nalo nene abokar tuboiano nene nalo jikili, mia nalo abe tomu na im̄auano ga bunu, bior nalo ajutan ka tuboiano nene naruei.

<sup>26</sup> Mia tira dolu nene naio be Sera, napano naio maka toro rivokar naio kanano im̄auano naio ga jo, mia nina javukia Yerusalemo dolu napano naio be Yerusalemo na mave. Sera kenerinio nalo, nalo bunu maka toro na toru tai rivokarlo ka im̄auano mia nalo bunu aju ga jibe na, tenene na milaio ana na Sera nene jibe ka be keniedo napano rabarkar tiniedo ea Kristo. <sup>27</sup> Iliano Lu naio ber vite nalo nei kija ruei, berenio

*“Tira nei napano beamu jau maka kejikia kavara tete bogu tai, jau kajog rivu, kasaaro, koiou.*

*Jau na koamo naio juvanso, vonganei kenerimo nalo amei ve telabo,*

*tovulu nalo na tira nana koano jo bija ga naio julaka bario.” Ais 54:1*

<sup>28</sup> Iliano nei javukia napano Atua berkar berinavo mia kenerinio nalo ve miroano, a kamiu kuruaku nalo a kuvivinioku nalo, kito naruei kito robe tete nalo na Atua kiano verikariano nei, jibe kanio kiano verikariano re nua mila Sera nene bar kenerinio nei napano Aisak. <sup>29</sup> Ana bogu na Aisak nene moluo, tete dolu nei Ismael napano naio moluo ga jibe na, mia naio jo mila titig kiritete napano Aisak, napano naio moluo

ea Atua kiano Niununo Lu. Mia binimei bokar banei, kito romial tomu nalo ajumã amila bajago na jibe na kia ga vo. <sup>30</sup> ?Mia Iliano Lu naio berenio venia? Naio berenio Atua mil ban Epraamo, berenio “Jau monoka kovukular nana napano be tira na imãuano ga, naljuo kenerinio, bior kenerinio nei maka rimemedu ka mia rijikia rivar kanamo saba tai. Saba nalo na mia riviniu rivan ea kiritete na tira napano naio jo ga jibe na, napano be koamo memedu.”

<sup>31</sup> Nao, banalo, Atua naio ber jibe nei, ana kiniou neber ka kamiu naruei neber kito maka rove kenerinio tira na imãuano na, napano rojutan ka Mosis kanano tuboiano mia ðeli ga, mia kito robe kenerinio tira napano jo ga jibe nei, jibe ka napano romonea Yesu, a vite nalo napano Atua berkar ban kenerinio nalo memedu, mia nei naruei mia kito rovokario.

## 5

### *Yesu buru bulag namoneano nalo ruei*

<sup>1</sup> Bogo napano Kristo buru bulag kito, naio mila jibe na ka mia rataluvo na mia rataluvo batitig garuei, maka ka mia ravan bereio ka rovan rotutan ka tuboiano napano Mosis kiano bereio. Tibena, kamiu monoka kuvitu sikili, ka nalo atutua re kamiu ka kumei tibe tomu nalo na imãuano bereio, napano tuboiano nei riadikar vatitig kamiu sikili bereio.

<sup>2</sup> Kamiu kuviagago vatitig ka iliano napano kiniou Pol nojo nober ka kamiu. Verenio kamiu kuvijamo ka nalo avututua kamiu napano monoka kuvakuveu, mia imãuano napano Kristo mimãukanio ruei naio maka rijikia rijai kamiu leleio.

<sup>3</sup> Ee, tenene napano neber bereio iliano na jikili nei ka kamiu, ka toro napano verenio naio rijamo ka naio rivakuveu, naio jo midu naio jo yetan ka tuboiano nei bereio, a mia toro napano naio jotan ka tuboiano

nei jibe ka naio monoka rivitigar vatitig ka rijogkar vite nonovio napano tuboiano nei berenio, ver ðelina mia rije vironiano. <sup>4</sup> Kamiu tealoo napano kumitumã kumila vio ka kumonmonea tuboiano na ga ruei, ka kamiu kumemedu vija Atua kano, kamiu na kumitu kumite bulag kamiu ruei den Kristo, kamiu kubilig takaamiu ka Atua kanano tinievuiano ruei. <sup>5</sup> Mia kito roju rojidom mñlea laka ka mia Atua naio rila kito romemedu rivu vija naio, bior ga napano kito rabarkar ga tiniedo ea naio, ana Niununo Lu jo mijai kito romonea jikili ka bogo napano roju rorea kia ga vo, mia Atua monoka rila tibe na van kito. <sup>6</sup> Bogo napano robinimei takurano kitoliko Kristo Yesu jibe na, bekurano ka toro be pakuveu, ðeli maka rive pakuveu mia tena burutomoruo loa laka nina be kiado viekouoiano ea Kristo, napano viekouoiano nei naruei naio mila kito rojidom Atua a bija tomu dolu nalo bunu.

<sup>7-8</sup> Beamu kiniou nemial kamiu kumitikiti bo laka, ana vonganei, maka bunu tibe na. Atua naio bio kamiu beamu ruei, ana nejidom nevika ka keinia toro napano naio berbure mñarabo ka kamiu bereio, mila ana maka bunu kumonea ilirianiano? !Kiniou nemijikia maka ve Atua na! <sup>9</sup> Verloglogiano na bova napano naio jomã mila lelan kenemiu jidomiano, naio jibe ka iliano tai napano berinavo “Soromi tai napano naio kiritelisu ga ana naio mijikia mila lelan niamoiou reraio amijea.”

<sup>10</sup> Ana jibe kano kamiu kamliki kiniou kito robe takurano ea Atua, kiniou nojo nomonea kamiu jikili kiano vo ka mia kiado jidomiano ve takurano ga, ka kito monoka rovutua re namoneano nalo napano maka ave kulo Ju, ka monoka nalo ave pakuveu. Mia nojo nabarkar tinieku jikili ea kamiu bunu ka toro napano naio jomã mila lelan kamiu jibe na, bekurano ka naio be toro kei mia Atua rudu vironiano vanio.

<sup>11</sup> Kuruaku nalo a kuvivinioku nalo, be iliano nalo tai napano berka kiniou bunu, najo mña nomiolu kia ga vo neber namoneano nalo monoka ave pakuveu bunu ka mia Atua naio mijikia rilarurlo, mia iliano na naio maka rive riano. Vereño kiniou noto noioliolu tibe na, mia tomu nalo napano aju kamiliko nalo asaaro ka kiniou ga na. Ana kamiu kuvial, nalo aju tiniel jer kiniou kia navo, bior kanaku ilivisivisiano na mñakolkolo napano Kristo kanano, naio jo miolkon bulag kanalo verloglogiano nalo. <sup>12</sup> Kiniou nojo nojidom ka tomu nalo napano ajuña amila bilvilig kamiu, a mila tiniemiu memebiju kanio ajidomii toru ka monoka kuve pakuveu, bo ka nalo adu iobogu ana nalo ga ativi kalo bereio ka mia ala niegeniegelo.

<sup>13</sup> Mia kamiu kanaku bilbilu nalo, Atua naio buru bulag kamiu ruei, riano ga ka maka bunu kuvitan ka Mosis kiano tuboiano na. Mia kamiu kuvisirarago vatitig rivu, mia kuvisidomii re bunu ka kuver “Bo na, kiniou najaluvo ruei den tuboiano nei ruei, kiniou ga naruei. Ana kiniou nemijikia nala vite nonovio nalo napano kanaku jidomiano naio jidomiiio.” Kamiu kuver re bunu tibe na, ana mia monoka bajago na kenemiu tinievuiano naio monoka rila kamiu kuvisaaro ka kuvijaija toro dolu bunu. <sup>14</sup> Bajago na jibe na jakii iliano tai na tuboiano, napano naio barko vatitig iliano dolu nalo na tuboiano, napano naio berenio “Mia kosidomii tomu nalo napano aju vaataro kaso, jau kovijuku rivu kalo rive verare kanio napano jau kojidomiiso.” <sup>15</sup> Mia vere kamiu kuvitumña kuvilivil ea kamiu, a kuvitumña kuviser niegeniege kamiu tibe ka tededen nalo, mia monoka kuvitkar vatitig kamiu rivu, kenemiu bajago na jibe na naio mijikia rila lelan kamiu nonovio bereio.

### *Bajago na Niununo Lu a bajago*

5:17 Rom 7:15-23

### *na toro*

<sup>16</sup> Kiniou nejidom never iliano nei van kamiu. Kamiu na monoka Niununo Lu tukamu ka kamiu, a kamiu kuvitu re kuvitakii bajago moruo na kenemiu ga napano kumoluo bijaio. <sup>17</sup> Bior bajago napano romoluo bijaio, naio miilkue ka bajago na Niununo Lu kiano, a nana napano na Niununo Lu nene, naio maka saaro leleio ka nana napano kito romoluo bijaio. Vite nei naruei jibe ka napano bajago juo nei, abe juo ajuña amila baravo ka naljuo. Tenene na jibe na ver Niununo Lu jo jukamu ka kamiu, maka bunu kuvijikia kuvila ga vaio napano kenemiu jidomiano milavio kanio. <sup>18</sup> Mia monoka tiniemiu ribobogia re bunu ka ver Niununo Lu to tukamu ka kamiu, mia kamiu maka bunu kuvitutan ka tuboiano nei.

<sup>19</sup> Imãuano nalo na bajago na tomu nalo amoluo bijaio naio meravo ga. Imãuano nalo nene, ajibe ka tomu nalo amila nasiakiano, nalo amila vite nalo na imouiano, a bajago na kiriniagiago nalo, <sup>20</sup> bija volkouano na tavoru, a bija navarsemeiano. Bereio, be navilviliano, tukurukuano, jokuano, tiniemimiano, buruvitiano, vuru vurevureiano, ilidieiano kean tomu nalo, <sup>21</sup> na tinietukuniano, a bija nalo nei be namunu mñelea uei, bija namaduano, bija vite dolu nalo na jibe nei. Naruei nomidu tiniemiano bereio ban kamiu, javukia napano neberii ka kamiu nua ruei, ka kamiu kuvitkar kamiu, bior toro napano mña jo mila bajago nalo na, mia naio maka lele rijikia toa Atua kanano navenatuboiano bogo tai.

<sup>22</sup> Naruei kurukuti napano Niununo Lu mila miluo ea toro kanano meuliano jibe nei: tinietiano, nasaarioano, tumãaroano, jidomiano tebieviano, natinievuiano, nanovoiano, niabetitiano, navatoveiano, a natelan vuuiano. <sup>23</sup> Bajago nalo na abo laka, mia maka iliano tai ðeli na tuboiano

tai napano riverbure kamiu ka kuvila re vite nalo nei. <sup>24</sup> Ana bajago napano romoluo bijaio, bija kiano nasidom vovaiano nalo, rojukukakarło ea m̃akolkolo ruei. Nina kito nalo napano robe Kristo kanano, kito rojuvan saba nalo na ruei.

<sup>25</sup> Bior kito romeul ea Niununo Lu mia bo ka kito reiel ea kiano bajago na bo bunu. <sup>26</sup> Maka riyu ka kito rotum̃a ravarvar ka kito, p̃eli na kito ga rotum̃a rotulutulu kito, p̃eli na rojoku ka kito.

## 6

### *Kamiu nonovio monokanio kuvijai kamiu*

<sup>1</sup> Kiaku bilbilu nalo, averenio kamiu tai rijoru ea kariano mia bo ka kamiu napano Atua kiano Niununo Lu joa kamiu, kamiu monoka kuvijai naio ka kuvuriri naio bereio. Mia monoka kuvil m̃asosou ga vanio tibe ka tiniemiu m̃iaiao, mia monoka kuvitkar vatitig kamiu bunu ka mia vite napano kumila vatitig toro dolu kanio naio rimei re bunu ka rilavon kamiu bereio. <sup>2</sup> Monoka kamiu kuvijai kamiu tibe na naruei, ka kuvar bitiraviran toro dolu kiano bagaro nalo napano teremi. Tibe na, ana kamiu kumitu kumonea venia napano Kristo kiano tuboiano naio berenio. <sup>3</sup> Ana mia kamiu kuvarvar ka re kamiu tibe ka toro tai napano naio jo jidom naio ga ber “Kiniou riano, kiniou nebe toro tai.” Ver tibe na, toro nene naio jo mijubolibolili naio bereio, bior naio maka rivitilubar ka naio be toro kurano ga. <sup>4-5</sup> Mia kamiu monoka kuyeve terakurano kuvitii veve kenemiu im̃auano nalo napano kumim̃aukanio. Ver tibe na, toro tai maka rijikia rilavon ka rivitii veve von kanano im̃auano nalo abo loa tomu dolu nalo kialo ana monoka naio rivitii veve ga naio ga kanano im̃auano. Ver kiano im̃auano bo mia naio mijikia saaro ga kar kiano im̃auano novo nei. Bior tomu nonovio maka ave verare, bior nalo kialo vite dedade nalo napano

teremi napano abario ea kialo meuliano.

<sup>6</sup> Kamiu napano ajum̃a aberiloglog kamiu ka iliano na moneano, mia ver bogo tai kamiu kuvileal vite na kiritavaso tai, bo ka mia kuvio kanio kamliko kenemiu naverloglogiano nalo.

<sup>7</sup> Mo ana kamiu kuvitikario, ka kuvila sibilili re kamiu bereio. Jau maka kejikia kala dovorovon Atua. Mariesi vaio napano komebija ea kanamo tiniavio, m̃arati nene ga napano mia jau kesenio. <sup>8</sup> Mia toro napano mebija kanano bajago napano naio moluo bijaio jibe ka kurukuti tai ea kanano meuliano, mia naio rivar kurukuti tai napano menunū bova ga ea kanano bajago nene, be na maariano, ana ver naio rimebija bajago na Niununo Lu ea kiano meuliano, Niununo Lu naio mijikia rivar sinaniano novo nalo napano meruo bo ea naio, be meuliano napano maka rijikia ribisi deio. <sup>9</sup> Ana mia kito romijikia ravar sinaniano novo nalo rimemedu ka bogo na marimeuano nene, ver rotuvan re im̃auano. Tibe na ana mia kito tiniedo rim̃aro re ka rala bajago novo nalo na bo, <sup>10</sup> ana mia monoka rovijuku rivu ka tomu nalo bogo nonovio, ana monoka tiniedo vu rivu lie vo van nalo napano robe m̃aratavo takurano kitoliko ea Kristo.

### *Pol kanano iliano na maaro banlo*

<sup>11</sup> Mo, mia kiniou nevitauia kanaku ilim̃aariano nalo ka jum̃aku ga, tenene nei mia kumijikia kuvial kanaku m̃arati iliano nalo ave tomormoruo tibe nei. <sup>12</sup> Nejidom never ka nalo napano ajidom avututua kamiu ka kuve pakuveu, nina jibe ka nalo ajidom avarvar kalo ga rivior vite na kuluniabene toro ga. Ana nalo ajidom ala tibe na kar vite takurano ga, napano amila von ka atuvan ioluioluiio napano Kristo kanano m̃akolkolo ga mijikia rilarur kito. Iliano na nalo maka asidomio, bior nalo amerou ka napano ver aioliolu ka Lilianiano nabo ka Yesu

kiano m̃ariano rimemedu tibe na, mia kulo dolu nalo ajil lo. <sup>13</sup> Nalo napano ajidom ka kamiu monoka kuve pakuveu, nalo ajidom tibe na bunu ka mia amijikia ail vevan ka aver nalo ajudovulu kamiu ruei, ka nalo aburu kamiu kubano iorou bereio jeltan ka kulo Ju nalo kialo tuboiano. Mia kamiu kuvitii vatitig, bior napano nalo na bunu maka atu adukar vite nalo nonovio napano tuboiano naio jo berenio.

<sup>14</sup> Naruei ea kiniou, maka bunu ve titai ka nesidom navarvar ka kiniou kanio, mia kiado Tubo Yesu Kristo kiano m̃akolkolo ga napano nabarvar kiniou kanio, bior kiano m̃ariano mila bajago nalo na vio yetemeriba nei nalo abinimei jibe ka vite nalo napano am̃arm̃aro ga ea kiniou ruei, ana mila kiniou bunu nebinimei nejibe ka toro na m̃aro tai ea bajago na tibolboiano nalo na vio yetemeriba nei ruei.

<sup>15</sup> Ka toro tai rimei rimemedu vija Atua, bekurano ka toro nene be pakuveu p̃eli na maka rive pakuveu, ana ver Atua naio tii toro nene rimei rive toro vou bereio tukamu vo, karina toro nene naio mijikia rimei rimemedu vija naio. <sup>16</sup> Naruei kiniou nobolkouo ka nalo napano mia adukar iliano nei, napano mia amei ave Atua kiano kulo Israel nalo garuei rimemedu, neberenio mia Atua kiano tum̃aroano a natinieiano to vijalo.

<sup>17</sup> Ninei naruei be kanaku iliano. Mia kiniou maka nesidom ka napano toro tai rila yebekavo ka kiniou tibe na bereio, bior kiniou nabar niajebijo kar Kristo ea mokotenaku ruei, jibe ka napano ajuba kiniou a abitiv kiniou.

<sup>18</sup> Nao kuruaku nalo a kuvivinioku nalo, kiniou nobolkouo ka mia kiado Tubo Yesu Kristo kiano tiniememiano naio to rivija niunumi nalo nonovio,

Mm tenene na.

## Mesi Napano Pol Bivitauiaio Ban Namonoeano Lu Nalo Na EVESO Verialiano Moti

*Tukunu bulati na niosi nei*

Burupati jidomiano napano Pol berio ea mēsi nei napano naio jirio ba ban namoneano nalo na Evesas, nina iliano na mirano takurano togio duelimo (1:10) napano berii Atua kiano tiiano. Naio berinavo Atua jidom ka vite nalo napano naio jילו, mia amei vio takurano. Naio jidom ka vite nalo na tiniabene a na yetemeriba mia amei aiasol lo ea Kristo, napano naio jibe ka be parinio ka vite nalo nonovio. Mia Pol berii burumāra Atua kiano tiiano, napano tiiano nene be tomu nalo na vio nonovio ka nalo aiasol vatitigio ea voroniano ve takurano ga, a amijikia ala tibena ver amonea Yesu Kristo. Mia naio ber vatitigio bo ban Atua kiano tomu nalo ka averial tiiano nene ea kialo meuliano.

Ea mēsi nei togio na beamu, Pol berii mārabo napano Atua Karmado mila ka tomu nalo amei ve takurano. Naio berii bajago nei napano Atua bijauia bulag kiano tomu nalo, a berii napano ea Yesu Kristo Atua Kererinio, Atua nai biekokoa kanano tomu nalo, ana barbulag kialo kareano nalo, milalo amilala. Mia naio berii bunu napano Atua jian Niununo Lu ban kiano tomu nalo, ka averial napano naio mia sian vite nalo vanlo, tibe napano naio berkario ka rilao. Ea mēsi nei togio juo [2] nene, Pol ber ka tomu nalo ka mia avuluku mēsi nene, ka nalo monoka averial ka abe takurano bija Kristo, ea bajago na mia amijikia aiasol vatitig vija namoneano dolu nalo.

Pol berii jamerijiano nalo, ka verial bajago na Atua kiano tomu nalo aju amiasol vatitig ea Kristo. Naio

berinavo yimo lu naio jibe mokotenado napano Kristo be parinio kanio, a jibe yimo napano Kristo be martea novo na sudu nene, a jibe tira napano Kristo be koano. Atua tinien miia laka tomu nalo na yetemeriba, a tomu nalo amial tinietiano nei ea Kristo. Atua kiano burumāra tinietiano nei julu Pol kiano jidomiano, naruei naio berial kiano moneano ea mēsi nei. Mesi nei berial Kristo kiano bajago napano naio tinien miia kito, mārō ka rivulu bulag kito, a jo miija kito ea kiano tinieseseiano ka kito romemedu vatitig ea Atua mirano.

*Torogio nalo na niosi nei*

Iliano moti 1:1—2

Kristo bija kiano yimo lu 1:3—3:21

Meuliano vou ea Kristo 4:1—6:20

Iliano maariano 6:21-24

*Pol jikar kiano iliano banlo*

<sup>1</sup> Kiniou Pol, napano Atua naio bitirilar kiniou ka neve kiano toro tai napano nojomā ber bulag Ioluanō Vou nei, napano nebe Kristo Yesu kiano atevi, kiniou nejirii mēsi nei viedu ban kamiū namoneano nalo na komeli labo na vio Eveso, napano kamiū na kubiekouo ea Kristo Yesu.

<sup>2</sup> Kiniou nobolkouo ka kamiū ka mia tiniememiano a tumāro na Atua karamādo kiano a na kiado Tubo Yesu Kristo, to vija kamiū bunu.

*Atua milivu ka kito ea Kristo*

<sup>3</sup> Bo kanio kito reiaia Atua, napano naio be Atua ka kiado Tubo Yesu Kristo, a napano naio be karamāno bunu, bior kito napano robe takurano bija Kristo, Atua naio mila vatitig kito bo laka ka ilivuiāno novo nalo ea vio mave. <sup>4</sup> Nina jibe bogo na vio yetano nei naio makanio vo, ana Atua naio berko kito ruei kan romei rove takurano kiteaku Kristo, ka rove kanano, a kan kiado meuliano naio rimeravo rivu ea mirano, napano mia maka niamiamo tai toaio. <sup>5</sup> Beamu laka, bior kiano burumāra tinietiano, ana Atua naio

midu kito roju kanio mia naio riv-iobulag kito rove kenerinio nalo ea Yesu Kristo. Vite na, Atua naio mila memedu ka nana naio mialio ber bo ka mia naio rilajo, a naio jaaro toru bunu ka rilajo. <sup>6</sup> !Reiaia Atua rivior kiano buruñara tiniememiano nei, a ka kiano ijaiano novo nei na naio jian kurano ga kanio ban kito, miyotuba ea kenerinio na naio jidom mēlea naio!

<sup>7</sup> Ja na kenerinio naio miou, mia kario vite na kito napano robe takurano kitoliko Kristo nene, ana Atua naio buru bulag kito, napano naio biekokoa kiado kariano nalo. !Ri-ano ga, Atua kanano tiniememiano ka kito naio toru laka, ba lie vo! <sup>8</sup> Atua naio be masou laka, mia naio bitilubar vite nonovio, <sup>9</sup> ana naio jaaro ka rijamo ka kito rejikia kiano jidomiano tai napano beamu naio be navigivaniano tai ka kito. Naio mila jidomiano nene binime mer-avo batitig bo ka kito, a kiano jidomiano ka rimāuka vite novo nalo ve telabo ea Kristo ga. <sup>10</sup> Ea jidomiano nei naruei, mia Atua naio riasol vatitig vite nalo napano naio jiilo atuvio ve takurano, nina ea vio mave a ea vio yetano, nalo amei yetano ka Kristo, a mia Atua naio rimāuka batitig vite nonovio rimemedu ka kiano jidomiano, rivano-o rila nono batitig rivu ea bogo nene rimemedu.

<sup>11</sup> Vite nalo nonovio monoka amalmaluvo rimemedu ga ka na Atua naio jidomkakar ka rilajo. Mia jakii kiano jidomiano nei nanua beamu, naio berkar berinavo kumemi kulo Israel ka kumemi nuve kiano, ka kumemi nuve takurano kumemi liko Kristo. <sup>12</sup> Kumemi nei naruei, Atua bitiri bulag kumemi ka mia nuvitu tukamu ka mia nuvidu kenememi jidomiano to sikili ea Kristo, tenene na, bo ka kumemi monoka nuviaia Atua bogo nonovio, bior naio bo laka.

<sup>13</sup> Mia kami kulo dolu nalo bunu, napano kami maka kuve kulo Ju nalo, kami kumijog iliano riano nei ruei, napano be Ioluan Vou napano

kubokar kenemiu ioruriano eaio. Kami kumonea Kristo ruei, ana kubinimei kube Atua kiano tomu nalo ruei. Ana bior kami kube kiano, Atua naio midu tovo na vite na monea kami, napano naio jian Niununo Lu ban kami, jibe ka napano naio berkario. <sup>14</sup> Ana Niununo Lu nene, naio jibe ka Atua kiano verikariano togio na jukamu nene ban kito, ka mia kito rejikia vatitigio ka mave ka Niununo napano, kito rovokar nono jajumano na be kiado, nina ea bogo na mia Atua naio rivuru bulag tomu nalo avan eaio, nina nalo ga napano naio bul bulaglo ruei abe kiano. !Kito reiaia Atua, bior naio bo laka!

### *Pol kiano volkouano*

<sup>15-16</sup> Bior ka vite nalo na, bogo nonovio, ea kanaku volkouano, kin-iou nojo nojidomial kami, a nojo nober siva toru ban Atua bior kami. Bajago na, nejikar ea bogo napano nomijog ka kami kumonea jikili Yesu, kiado Tubo, a kumisidomii toru namoneano lu dolu nalo, naruei binimei bokar banei, kiniou nojo nobolkouo jibe na. <sup>17</sup> Bogo nonovio na nojomna nobolkouo ban Atua, napano naio be Atua ka Yesu Kristo kiado Tubo, a napano naio be karamado na mermerano na toru, nojo nobika denio ka naio rudu Niununo na masouano a Niununo na verialiano van kami, ka kuvijikia Atua ve toru lie vo.

<sup>18</sup> Ana na nojomna nobika denio ka naio rivetavo ea kenemiu jidomiano, ka mia kuvitilubar kiano yulu, a ka kuvijikia vite nalo napano Atua naio bio kami kanio, a ka kenemiu jidomiano naio monoka sikili lie vo ka mia kuvokar vite nalo na. Vite nalo napano, naio be kenemiu jajumano, jibe ka vite na bo telabo napano Atua mila batitigio ju, ka ve namoneano lu nalo kanalo. <sup>19</sup> A vija naio bunu, kami monoka kuvitilubar a monoka kuvijikia batitig kanano buruñara mo-roano na toru, napano naio jo

miñau ea kiado meuliano napano romonea naio. <sup>20</sup> Nina buruñara moroano nene kia ga navo napano Atua naio miñau eaio, bogo napano naio bitirilar Kristo naio meul bereio den namariano, karina, naio buru naio ba midu naio jotano ea vameruo na naio ea vio mave. <sup>21</sup> Moroano nene, naio mave loa ka moroano dolu nalo, a vite dolu nalo na jikirikili, a tomu na tortoru dolu nalo, a navuriñaraboiano dolu nalo na mave. Mia Kristo siano naio jo mave laka laka loa sio dolu nalo, maka ea vio yetano nei ga, mia ea yetemeriba dolu bunu na mia rimei. <sup>22</sup> Atua naio midu vite nalo nonovio aju yetano ka Kristo jaano, a naio bitirilar Kristo ea tum̃aro lu na kiano, ka mia naio ve parinio ka saba nonovio. <sup>23</sup> Mia kiano tum̃aro lu nei, naio jibe ka tati na Kristo, napano bujo batitig ka Kristo, napano naio bujo batitig ea saba nalo ea vio nonovio.

## 2

### *Vonganei kito romeul ea Kristo*

<sup>1</sup> Nanua beamu, jibe ka kamiu kuñarm̃aro ga bior kenemiu vovaiano nalo a kenemiu kariano nalo, <sup>2</sup> naruei ea bogo na, kamiu kumiel ea bajago va nalo na yetano nei. Beamu, kamiu kumitakisor tubo na moroano nalo na vio yauo, kumonmonea naio ga, napano naio be niununo napano jo mila kiano iñauano ea nalo napano m̃a maka amonmonea Atua. <sup>3</sup> A nanua beamu, kumemi kulo Israel nalo bunu, kumemi nubare ga ka kulo dolu nalo, napano numitum̃a numiel jakii ga kenememi tinietiano nalo na bajago va na toro ga. Kumemi bunu, numitum̃a numila ga vite nalo napano kenememi jidomiano jidomio, vite nalo napano m̃a numijog bo kanio. Bior saba nalo na, numitavukia tomu dolu nalo na, napano Atua tinien ser kumemi bunu, rivan rivano bisi ana mia naio maka rijikia rila vite tai ea kumemi

nei, ana monoka sian vironiano van kumemi bunu.

<sup>4</sup> Mia Atua, kiano tiniememiano a kiano jidomiano naio toru laka ban kito, <sup>5</sup> ana bogo na naruei jibe ka napano ram̃arm̃aro ruei kar kiado vovaiano nalo, mia naio mila kito romeul bereio kitoliko Kristo. Beriano ga, Atua naio milarur kito ea ga kiano tiniememiano. <sup>6</sup> Ana jibe ka kito romeul kitoliko Kristo, mia Atua naio bitirilar kito bija naio bunu, a naio midu kito rojutano bija naio ea vio mave.

<sup>7</sup> Atua naio mila jibe na bior bogoti nalo napano ju ka rimei, mia tomu nalo amijikia avitilubar kiano tiniememiano nei naio toru laka, naio jidom kito jibe na miyotuba ea Kristo Yesu. <sup>8</sup> Atua naio milarur kamiu ea ga kiano tiniememiano, bior kamiu kubarkar tiniemiu ea naio. Vite na maka rimaluvo ea kenemiu iñauano novo tai, makanio, mia Atua ga naio jian kurano ka ga ban kamiu. <sup>9</sup> A vite na maka ve vite tai napano mia toro mijikia rim̃au riviorio, bior ver tibe na mia ravarvar kito kanio, reil vevavin rover “O kiniou, kiniou ga nemilarur kiniou ea kiaku iñauano.” <sup>10</sup> Mia kito rajavukia tonovo tai napano Atua miñaukanio bo laka, ka napano naio ji kito robinimej robe kulo vou nalo ea Kristo Yesu, a Atua naio mila jibe na ka mia kito bunu rala kiano iñauano novo nalo, napano naio bijauialo kar beamu ruei, ka kito roim̃aukanilo ea kiado meuliano nalo.

### *Kito robe takurano ea Kristo*

<sup>11</sup> Mia kamiu monoka tiniemiu rimaio ka bogo na kumoluo, kamiu maka kuve Atua kiano tomu nalo tavukia kulo Ju nalo, kamiu kube kulo dolu nalo ga. Kanio tena, kulo Ju, nalo napano aber nalo abe kulo lu, bior nalo abokar pakuveu jikili, amiyotel ea kamiu, aberenio “Kulo momou” ea kamiu. Mia pakuveu na, naio be vite kurano ga tai ea kuluniabene toro ga. <sup>12</sup> Mo, ana nanua beamu, kamiu kumitibe na

ruei. Kamiu tiniemiu ribobogia re nanua, kumitu koalabo ka Kristo, kumitu tavio ka taara na kulo Israel nalo, a kube valauo ga, mia maka kuvijikia kuvokar vite nalo napano Atua naio berkario ban kiano tomu nalo. Kamiu kumitua vio yetano nei, kube iakurano ga liki, a maka kuvijikia Atua leleio. <sup>13</sup> Mia kamiu, napano beamu kumitu koalabo, mia vonganei kubinimei vaataro ruei ea Kristo kiano burukija, vonganei ana kube takurano kamliko naio.

<sup>14</sup> Kristo naio be kiado tumaroano, naruei naio mila kiado taara juo nei abinimei abe takurano. Beamu kumemi kulo Ju bija kamiu tomu dolu nalo, rojuña tiniedo jer kito bogo nonovio, jibe ka buruñara tagvoru tai jibure kito, mia Kristo naio mila bulag vite nei ea kiano namariano. <sup>15</sup> Naio berbure kulo Ju nalo kialo tuboiano bija yati nene nalo, naio mila jibe na ka mia rila kiado taara juo nei amei ve toro takurano ea naio, tibe kanio naljuo amei ave vite vou tai. Jibe na naruei, Kristo naio mila tumaro bija kito. <sup>16</sup> Ea kiano mariano napano ea makolkolo, naio muekorov kiado tiniemimiano, ana naio burubiron kiado taara juo nei abinimei abe tomu takurano, ana naio mila robokar jumado bereio kitoliko Atua, mila kito robe merevu bereio bija naio. <sup>17</sup> Mo, ea bajago na naruei, Kristo naio binimei, berial Ioluanou Vou na tumaro nei ban tomu nalo, nina kamiu napano maka kuve kulo Ju, napano kumitu koalabo ka Atua, bija kumemi bunu kulo Ju nalo napano numitu vaataro ruei. <sup>18</sup> Ana bior vite nalo nei napano Kristo naio mila ruei, vonganei kito nonovio robe kiado marabo tai ea Niununo tai ga, ka romei ea karamado mirano.

<sup>19</sup> Jibe na, ana kamiu maka bunu kuve valauo, a maka bunu kuve toro na maka ve kiano vio tai, makanio. Mia vonganei kamiu kube matatoko bija namoneano lu dolu nalo ea

Atua kiano vio, ana kumitua kiano maratavo. <sup>20</sup> Kamiu kumitavukia martea na yimo tai, napano atevi nalo a kulo naverialiano nalo, nalo ajibe ka martea na sudu na yimo nene. A ea yimo nei, Yesu Kristo naio jibe ka martea siyovo napano kirisikili bo napano juo iviso, <sup>21</sup> napano naio jo bokar jikili batitig martea dolu nalo nei. Naio bokarlo naruei, ana nalo ajumolu aju jikili, ana na yimo nei naio jo binimei jibe ka Atua kiano yimo lu tai. <sup>22</sup> Atua naio jo mimauka kamiu jibe na naruei, ka ea Kristo kamiu tomu namoneano riano nalo, kamiu kuvitu kumei kuvitibe ka yimo tai, napano naio mijikia riva to joomo bogo nonovio eaio ea kiano Niununo.

### 3

#### *Pol naio jo mila imauano na Tubo kiano banlo ruei*

<sup>1</sup> Mia ka vite nalo napano nebereio ruei, kiniou Pol, nojo nobolkouo ban Atua bior kamiu. Mia vonganei nojoa yimo na tetavokoiano, bior nojomña nemila imauano napano Kristo Yesu kiano ban nalo napano maka ave kulo Ju, jibe ka kamiu, mia nojomña nobolkouo kia ga vo ka kamiu ban Atua. <sup>2</sup> ?Peli kamiu kubitilubar ruei ka nojomña nomimau jibe na kar kamiu, peli na makanio? Imauano na kiaku ka rijai kamiu, Atua naio jianio ban kiniou ea kiano tiniamemiano, <sup>3</sup> ana naio jibe ka kiano jidomiano tai napano beamu naio bigivanio, avona kario ana naio jiloglogio ka kiniou.

A vite na kiniou nejirio ruei, <sup>4</sup> a ver kamiu kuvulukuio, mia kumijikia kuvokar kiaku jikiaiano tivelinio nene ea jidomiano na Atua kiano, napano vonganei naio jo binimei malmaluvo meravo ea Kristo. <sup>5</sup> Ea terati nalo na beamu, tomu nalo maka ajikia vite nalo na jibe ka vonganei, napano Atua naio jiloglog vonganei ban atevi lu nalo bija kiano naverialiano nalo maluvo ea Niununo Lu. <sup>6</sup> Mia iliano napano

binimej meravo nei jibe na naruei, napano naio ber jibe na berinavo, kulo dolu nalo bunu naliko kulo Ju nalo, abe juo abokar Atua kiano ilivuiano nalo, napano ajibe ka torogio na tati takurano ga, a ka Atua kiano naverikariano nalo abe kialo bitiravirano abe juo. Saba novo nalo na amaluvo bior Kristo Yesu kiano Ioluano Vou.

<sup>7</sup> Mia Atua naio mila kiniou nobe atevi na imauano na Ioluano Vou nei, a imauano nei naio be ijiano novo tai napano Atua jiano ban kiniou, napano kiano moroano nene naio jo mimau maluvo ea kiniou. <sup>8</sup> Kiniou kiritavaso loa namoneano lu dolu nalo, mia najaaro toru laka napano ea tiniamemiano napano Atua kiano, naio mije monea jumaku ka kiniou noioliolu ka Ioluano Vou nei van nalo napano maka ave kulo Ju. Jibe na naruei, na kiniou neber lualua banlo vite novo nalo napano be Kristo kiano, napano mia maka ajikia avulukuio, <sup>9</sup> mia nojo nejiloglog bunu banlo jumabe napano Atua naio mila kiano jidomiano nei maluvo. Jikario ea bogo napano Atua naio ji saba nonovio, binimej bokar bogo nalo napano abarlaka ban ruei, Atua naio bigivaniao kiano jidomiano nei jo. <sup>10</sup> Ana ea kiado bogo nei naruei, Atua mila nailiano nalo bija moroano nalo napano vio mave, amijikia avitulubar kiano masouano dolu nalo ea vite nalo napano naio mimaukanio ea Yesu kiano nalotvano. <sup>11</sup> Saba nalo na, amemedu ga ka Atua kiano jidomiano, napano naio joma jidomii kakarlo beamu, ka bogo na vio yetano nei naio makanio vo, a naio mila saba nalo nei amalmaluvo ruei binimej ea Kristo Yesu, kiado Tubo. <sup>12</sup> Mia bior kito rabarkar tiniedo ea Kristo, a robe takurano kitoliko naio, naruei romijikia romei rotumolu rotukamu ea Atua mirano, a maka rejikia romemebiju, a kiado iviso sikili ea naio ka mia naio saaro ka kito. <sup>13</sup> Tenene na, kiniou nojo nobika jikili den kamiu, nober bo

ka kamiu tiniemiu rijoru re rivatove bogo tai, napano kumijog bova toru ea kiniou ea jaleleano nalo napano nojoma nabokario bior kamiu ea yimo na tetavokoiano nei, napano ajuma amilavon kiniou toru. Saba nalo nei, nalo abe tena rijai kamiu ka mia kuvokar mermerano na Atua kiano.

### *Pol kiano volkouano*

<sup>14</sup> Jibe na, bior vite nalo napano nojoma neberenio, na kiniou neminie, nobolkouo ka kamiu ban Karamado, <sup>15</sup> napano naio be Karamado riano garuei memedu, a napano karamalo dolu nalo na maratavo nalo na ea vio mave a ea vio yetano, nalo ajuma abar kialo bajago novo a sialo novo nalo ea naio ga.

<sup>16</sup> Kiniou nojoma nobika den Atua, napano kiano mermerano naio toru laka, ka mia naio rudu kiano moroano toa kenemiu iviso nalo riyotuba ea ga kiano Niununo, ka kenemiu iviso nalo atumolu atu sikili vatitig damariga. <sup>17</sup> Nojo nobolkouo bunu ka mia Kristo naio to kamliko damariga bogo nonovio ea kenemiu iviso nalo rimej ea kenemiu viekouoiano nalo, a nobolkouo ka kamiu bunu bajago na jidomiano, naio rimej tibe ka burupati na kenemiu meuliano nalo. <sup>18</sup> Jibe na, ana kamiu kamliko namoneano lu dolu nalo, mia kamiu kuvare ka mia kuvijikia kuvitulubar burumara jidomiano na toru napano Yesu kiano, peli jagati, peli tebievi, peli vaviniano, peli na bululuoiano nene tumabe. <sup>19</sup> Riano ga na, kiano tinietiano nene naio toru, mia maka garuei, kito maka rejikia rover romijikia batitig naio ruei. Mia bekurano, kiniou nobolkouo ga ka mia kamiu kumijikia kuvial kiano jidomiano nene ea kenemiu meuliano nalo, rivano o mia Atua kiano bajago novo nalo, a kiano meuliano novo, avujolou batitig ea kamiu.

<sup>20</sup> Mia vonganei, kito reiaia Atua, bior ea kiano burumara moroano napano jo mimau ea kiado iviso

nalo, naio mijikia rimāu tovulu venia napano romijikia rovika denio, ĩeli venia na mia romijikia rosidomiio. <sup>21</sup> Mia vonganei, Atua kiano lotuano reraio aiaia naio rivior Kristo Yesu, vonganei, a bunu ea terati nalo nonovio napano ea bogo nalo na aju abinimei, rivano-o mia ribisi deio. Mm.

#### 4

*Kito rojibe ka tati takurano ea Kristo*

<sup>1</sup> Jibe ka kiniou nojoa yimo na tetavokoiano, bior kiado Tubo kiano iñauano, nejikili ka kamiu, ka kenemiu meuliano nalo monoka rimemedu ka bajago nalo napano Atua naio bio kamiu kanio, mia kamiu kuviel eaio. <sup>2</sup> Tibe na ana mia kamiu kuvatove ga ka kamiu, a kumelumu ga bogo nonovio. A kenemiu jidomiano monoka rimelokloko ka kamiu, napano mia tiniemiu rimimi soĩeli re van kamiu. Nina naruei naio be bajago na tinietiano. <sup>3</sup> Kamiu kuvilavio sikili ka kuvokar batitig tumāro nei napano riasol kamiu, tibe na ana kumijikia kuvitikar batitig burukutiano napano Niununo Lu naio jo jianio ban kamiu. <sup>4</sup> Kamiu kumitibe ka tati takurano ga, a be Niununo takurano ga bunu joa kamiu, mo ea bajago nene, be verikariano takurano ga napano kenemiu jidomiano naio mijikia tu sikili eaio, napano Atua bio kamiu biorio. <sup>5</sup> Ana Tubo Yesu takurano ga, a kiado moneano ea naio be takurano ga, a varueiano bunu be takurano ga, <sup>6</sup> a Atua takurano ga napano jo, napano naio be kulorinio nonovio karamālo, a naio mije tuboiano ka vite nonovio, a naio mila kiano iñauano miyotuba ea vio nonovio, a naio joa kulorinio nonovio kialo meuliano.

<sup>7</sup> Mia ea kito nonovio robeve terakurano, Kristo jian ijaiano dedade nalo ban kito ea kiado meuliano, napano nalo kirinovo laka, memedu ka kiano tiniamemiano napano toru

nei. <sup>8</sup> Nina javukia napano Iliano Lu berenio nanua ruei, berinavo

*“Bogo napano naio jo bavini ea vio mave na bavini laka,  
naio burukar kiano uolu nalo napano naio jovululo ruei, nalo iorou ka naio,*

*a naio jian ijaiano ban tomu nalo napano abe kiano.” Iouano 68:18*

<sup>9</sup> ?Mia iliano napano berenio berinavo “naio bavini,” naio berii venia? Iliano na naio berenio beamu, naio batove laka ruei, napano naio binimei ea vio yetano nei, naio batove ea kiano vio bululuo nene nalo. <sup>10</sup> Mia toro napano beamu naio binimei yetano, toro nene kia ga na vo napano mia iorou kanio ana naio bavin laka mave, a bereio, naio bavini lie bereio vo, ka naio mijikia rison batitigio rivujo vio nalo na Atua naio mila vatitigio aju. <sup>11</sup> Mia naio naruei toro nene kia ga na vo napano naio joñā jian ijaiano ban kiano tomu nalo, napano tealō, naio bitiri lualua nalo abe atevi, a tealō, naio bitiri lualua nalo abe naverialiano, a tealō, naio bitiri lualua nalo abe naieliano ea Iouano Vou, a dolu nalo, naio bitiri lualua nalo abe tomu navitikariano na namoneano nalo, a tealō, ka averlogloglo. <sup>12</sup> Kristo naio mila jibe na ka mia namoneano lu nalo amijikia ala kiano iñauano, ka taara na namoneano nalo na vio yetano nei, napano ajavukia tati na naio, mijikia riluo lie vo a rimei sikili lie vo. <sup>13</sup> Tibe na, ana mia kito nonovio romijikia romei ve takurano ga ea kiado viekouoiano ea Atua kenerinio, a romei rove takurano ga bunu ka robitilubar batitig naio ea kiado meuliano nalo. Tena naruei, ana romijikia rotu romei rotibe ka toro na naio meruo, riva rivokar napano mia romeruo tibe ka Kristo, napano mia romei rove toro na toru riano tibe ka naio.

<sup>14</sup> Tibe na, mia kito rotibe ka re bunu kiritete, napano naverloglogiano dolu nalo na tomu na sibiano

nalo aburu kiado jidomiano aba be dolu, kialo jukujukuano nalo abilvilig kito, jibe ka napano jegi naio joma miuvuvu kito, ĉeli na tei joma buku bilvilig kito janea vio reraio, makanio. <sup>15</sup> A kito monoka rovokar ilirianiano ea bajago na tinietiano, a ea kiado ĉarabo nonovio nalo, monoka reiluo ka mia romei rove Kristo kiano tomu nalo, napano naio be parinio ka bagaro na namoneano nalo na kiano. <sup>16</sup> Mia kito rojibe ka torogio nalo na tati na naio, napano naio jo mila torogio nalo nei abinimei abe takurano ga ea naio, ka kiano meribuku nalo atu aiasosol vatitig torogio nalo nei van ea pariparinio. Mia bogo na torogio na tati nei nalo atakii vatitig kialo imauano nalo rimemedu, mia nalo atuma tinielo tiilo bereio, mia tati nene naio mijikia riluo, mijikia rimei sikili lie vo.

### *Meuliano vou ea Kristo*

<sup>17</sup> Ea kiado Tubo siano, nejkili ka kamiu bereio, ka kamiu kuvitkar kamiu, mia kuvitakii re bunu bajago napano nalo na maka amonea Atua. Nalo na, kialo jidomiano kirivova rui, a be ĉadati rui, <sup>18</sup> a joa melijokouo ga. Tenene na, nalo aju koalabo laka den meuliano napano Atua naio jiano, bior pariparilo kirisikili laka, jibe kano puruveru, maka ajikia ajogluar vite. <sup>19</sup> Tinielo maka bunu rijikia rimou ka kialo vovaiano nalo, naruei nalo ajidel dolu ga ea siakaiano, a bajago nalo na kiriniagiago, napano maka asidomialio leleio.

<sup>20</sup> Mia ea Kristo, maka averloglog kamiu ka bajago na jibe na tai leleio, makanio. <sup>21</sup> Mia aberii kiano saba novo nalo telabo ban kamiu rui, napano kamiu kumitakisorio, mia aberloglog vatitig kamiu ka ilirianiano nei napano jua Yesu. <sup>22</sup> Tenene na, kamiu monoka kuvilar bajago moruo na kumoluo bijaio. Bajago na naio joma mila kenemiu meuliano

re beamu abova, mia nanua, kenemiu sidomvovaiano nalo na bajago nene, nalo ajuĉa amiju bolbo lili kamiu, a nalo aju amila lelan kenemiu meuliano nalo toru toru laka. <sup>23</sup> Mia vonganai, kenemiu iviso nalo a kenemiu jidomiano nalo monoka amei ave terivou nonovio, <sup>24</sup> ana mia kamiu monoka kuviya bajago vou nalo na kenemiu meuliano vou ea Yesu napano Atua naio jiio ea kamiu, javukia kiano, ka mia tomu nalo amijikia aialio ka naio memeduriano, a be lu.

<sup>25</sup> Tibe na, ana sibiano re bunu, bior kito robe torogio na tati na Kristo, monoka rove riano ga van kiado na vaataro nalo bogo nonovio.

<sup>26</sup> Mia ver bogo tai tiniemiu rimimi, mia kuvila re ka tiniemimiano na rivuru kamiu kuvan ea kariano, mia kenemiu tiniesereiano monoka rivatove beamu vo, karina ĉerenio rijoru. <sup>27</sup> Mia kamiu monoka kuvijamo ka re buluvio van Siĉaro ka rimei rilaso kovova laka.

<sup>28</sup> Toro napano beamu naio be toro na vinauano, naio monoka tuvan vinauano. Naio monoka rimau ĉele ka juĉano ea bajago na memedu, ana mia naio mijikia rivitkar naio, a rijai talimasa nalo bunu.

<sup>29</sup> Ea kenemiu iliano nalo, kamiu kuve re ilimenunuano, mia kuvrenio iliano nalo napano mia rijikia rijalar kialo jidomiano nalo, ka nalo amijog kenemiu iliano nalo, napano josonu bare, a memedu bo, a ka rijailo. <sup>30</sup> Kamiu kuvila re Niununo Lu riumou, a rijog rivova, ea kenemiu ilivovaiano nalo, bior Niununo Lu napano, Atua midu joa kamiu jibe ka kiano tovo, napano naio berial berinavo kamiu kube kiano, a ka riverial bunu, ka mia naio rivuru bulag kamiu ea bogo na tagaĉiano. <sup>31</sup> Mo tibe na na, bo ka tiniemiu rimimi re bunu, ala re bunu siniabu, a tiniemiu ajea re bunu. Kamiu kuvituvan bajago na ĉeĉeiano, a

bajago na ilivovaiano, a bajago na bilbilu vaiano.

<sup>32</sup> Mia kamiu kuvijuku rivu ka kamiu, tiniemi rimelokloko van kamiu, a kamiu kuviekokoa kamiu tavukia napano Atua naio biekokoa kamiu maluvo ea Kristo.

## 5

### *Kamiu kuviel ea miamoiano*

<sup>1</sup> Bior kamiu kube Atua kenerinio novo nalo, kamiu kuvilavon ka kuvar nonovio kiano bajago. <sup>2</sup> Monoka kuviel ea jidomiano, tibe ka napano Kristo naio jidom kamiu, ana naio mijamo ka kiano meuliano kar kamiu, jibe ka bonotanunu novo tai ban Atua, a sida tai napano Atua naio jaaro kanio.

<sup>3</sup> Bior kamiu kube Atua kiano namoneano lu nalo, maka rimemedu leleio ka bogo tai saba nalo tai amalmaluvo ea kamiu tibe ka siakaiano, p̄eli vite na imouiano, p̄eli na bajago na sidonii vite ta bunu, mia vite nalo na maka ve tena kuva kuvituña kuvil sosol kanio. <sup>4</sup> Maka rimemedu ka kamiu kuver ilivovuiano nalo p̄eli ilinia-giangoano nalo, p̄eli iliserevaiano nalo. Memedu ka kamiu kuvituña kuver siva ga van Atua. <sup>5</sup> Kiniou nejidom never rimeravo van kamiu, ka nalo napano ajum̄a amila siakaiano, a nalo napano ajum̄a amila vite nalo na imouiano, a nalo napano ajum̄a ajidom aiobua saba ta bunu ta bunu bogo nonovio, nalo na mia ava kovio. Toro napano naio jidom m̄elea saba bogo nonovio, naio jibe ka toro napano milotu ka atua dolu nalo. Kamiu kumijikia kumonea iliano nei ruei, napano berinavo nalo napano ajum̄a abokar bajago va, mia maka leleio ajikia ava jouro ea navenatuboiano napano Kristo naio Atua kanalo.

<sup>6</sup> Kamiu kuvijamo re ka tomu nalo avuru kamiu kuan ea m̄arabo dolu nalo, napano nalo amijubolbolili kamiu ea kanalo iliseseiano nalo. Vite nalo nei naruei, mila ana Atua tinien jerlo ruei, jibe ka napano nalo

maka amonmonea naio ruei, ana na mia naio rudu vironiano vanlo. <sup>7</sup> Mia kamiu kuva kuve re taara ve takurano leleio vija tomu nalo na jibe na.

<sup>8</sup> Nanua beamu, ana kamiu kube tomu nalo na melijokouo ga, mia vonganei, napano kumitua kiado Tubo, kamiu kumitua kiano miamoiano bunu. Tibe na, monoka kuviel tulaka ga tibe ka kamiu kube tomu na miamoiano nene nei ruei, <sup>9</sup> bior ea miamoiano nei, mia naio mijikia rila kenemi meuliano rivu, rimemedu, a naio rive riano, ana mia naio rijikia rivar m̄arati novo nalo ve telabo. <sup>10</sup> Kamiu monoka kuvilavio sikili ka kuvileal bajago vaio napano kiado Tubo naio jaaro kanio. <sup>11</sup> Mia kamiu liko re tomu nalo na amila vite nalo na bova, napano abe im̄auano kurano na melijokouo ga. Mia bo verenio kamiu kuvar saba nalo nene amei ea miamoiano. <sup>12</sup> Kito romimou kija ga ka rover vite nalo napano m̄a aba amila luklukaio, <sup>13</sup> mia bogo napano Atua naio rivetavo ka vite nalo nonovio amei ea miamoiano, mia miamoiano nei naio rila bajago nalo nei amalmaluvo. <sup>14</sup> Mia bogo na miamoiano mila vite nalo amalmaluvo medave jibe na, vite nene nalo bunu amijikia amei tibe ka miamoiano. Vite nei javukia iou napano berii jibe nei, berenio

“Jau napano komonmelio ruei, ketevijo, kotumolu ea nañariano, komeul bereio,

ana mia Kristo naio rimereraliso.”

<sup>15</sup> Bior tena ana kamiu monoka kuvitkar vatitig kamiu rivu, ka mia kamiu kuviel tum̄abe. Mia kuvitibe ka re nalo na maka ve pariparilo, mia kuvila bajago nalo na tomu nalo na abe masou bo. <sup>16</sup> Kamiu monoka kuvisel ea buluvio nonovio napano kuvilealio, ka kuvila im̄auano na bo ea, bior kito rojua bogo na vovaiano nei. <sup>17</sup> Mia kamiu kuvivovu re, ana monoka kuvilavon ka kuvijikia vite nalo napano kiado

Tubo naio jidom kamiu ka kuvi-  
 laio. <sup>18</sup> Mia kamiu kumunu re  
 bunu m̄arjũm̄el̄m̄elu rivano-o mia  
 m̄a kuvilaluv pariparimiu, ka bajago  
 na naio mijikia rila bulag kenemiu  
 meuliano vodolu bereio. Mia kamiu  
 monoka kuvujo ga ka Niununo Lu.  
<sup>19</sup> Bo ka kamiu kuvitukunu van  
 kamiu ea iliano nalo napano ea  
 Niosi na Iouano Nalo, vija iouano lu  
 nalo, a iou navameneano van kiado  
 Atua, mia kamiu monokanio kuvio  
 ka iouano lu nalo nene, ka kuvame-  
 nea kiado Tubo, ea kenemiu iviso  
 vodolu. <sup>20</sup> Mia bior vite nonovio,  
 tulaka ga kamiu kuvituña kuver  
 siva van Atua karam̄ado, ea kiado  
 Tubo Yesu Kristo siano.

### *Bajago na soriano*

<sup>21</sup> Kamiu nalo napano abe  
 namone-ano, suñano nalo a tire  
 nalo, kamiu monoka kuvatove ka  
 kamiu, tibe ka ga napano kamiu  
 kubatove ka Kristo.

<sup>22</sup> Kamiu tire nalo napano  
 kumisoro, monoka kuvatove ka  
 kouemiu nalo, tibe kanio napano  
 kamiu kubatove ka kiado Tubo,  
<sup>23</sup> bior ka suñano naio be parinio ka  
 koano, jibe ka Kristo naio be parinio  
 ka kiano nalotuano napano kiano,  
 napano be tati na naio napano naio  
 milarurio. <sup>24</sup> Bior vite na, tire nalo  
 monoka avatove ka koalo nalo ea  
 vite nonovio, tibe ka Yesu kiano  
 nalotuano jo batove ka naio.

<sup>25</sup> Mia kamiu suñano nalo na-  
 pano kumisoro, monoka kamiu ku-  
 visidom m̄lelea kouemiu nalo, tibe  
 ka napano Kristo naio jidom m̄lelea  
 kiano nalotuano, ana naio mijamo  
 ka kiano meuliano biorio. <sup>26</sup> Naio  
 mila kiano nalotuano meravo, a  
 naio je ka uei a ka kiano il-  
 iano, naruei naio miokoio ban Atua.  
<sup>27</sup> Kristo naio mila jibe na, ka naio  
 mijikia rivuru kiano nalotuano nei  
 rimei ea naio, napano naio rive  
 lu mia rive lu batitigio to, tibe ka  
 niatira sesa napano naio ju rorea  
 ka mia soro, naio meravo bo, maka  
 vite tai rila niegeniege naio, a

amiovovua batitig naio bo mia bo.  
<sup>28</sup> Ea bajago nene ga, toro monoka  
 to sidom m̄lelea koano, naio rivi-  
 tikar batitigio tibe ka napano naio  
 jo bitikar vatitig niabene. Suñano  
 napano jidom m̄lelea koano, naio jo  
 jidom m̄lele naio bereio. <sup>29</sup> Maka  
 toro tai to rivitii va kanio taniabene,  
 p̄eli na rila lelanio bereio, mia tomu  
 nalo aju abagan batitiglo, a aju  
 abitikar vatitig taniabele nalo. Nina  
 jibe kanio napano Kristo mila ban  
 kiano nalotuano, <sup>30</sup> mia kito romi-  
 jikia batitig vite nei, bior kito robe  
 torogio na kanano taniabene nalo.  
<sup>31</sup> Iliano Lu naio berioo bunu ruei na-  
 pano suñano bija koano, naljuo abe  
 taniabele takurano ga, napano naio  
 berenio, berinavo “Bior vite na, mia  
 suñano naio tuvan karam̄ano naio  
 kenieno, riva rivijuru kar koano.  
 Naruei mia nalo ve juo amei tibe ka  
 taniabene takurano ga.”

<sup>32</sup> Iliano Lu nei, be iliano na temi  
 tai joaio, napano beamu naio be  
 navigivaniano ga tai, mia vonganei,  
 nemijikia ka iliano nei naio jo berial  
 Kristo bija kiano nalotuano. <sup>33</sup> Mia  
 kamiu kuvisidomii re iliano nei ku-  
 ver naio maka to riverii kamiu  
 bunu, makanio, naio jo berenio  
 na. Riano ga, kamiu suñano nalo  
 nonovio, monoka kuvisidom m̄lelea  
 kouemiu nalo, tibe ka na kamiu  
 kumisidom kamiu ga, a kamiu tire  
 nalo nonovio, monoka kuvatove ka  
 kouemiu nalo.

## 6

### *Bajago na kiritete nalo naliko karam̄alo nalo a kenielo nalo*

<sup>1</sup> Kiritete nalo, kamiu kube nataki  
 na Tubo kanano, kamiu kumonea  
 karamemiu bija koniomiu nalo, vite  
 nei naruei naio memedu ka kamiu  
 kuvilaio. <sup>2</sup> Tuboiano tai ea Iliano Lu  
 napano Atua kiano naio berenio jibe  
 nei, napano naio berinavo,

“Kamiu kuvatove ka karamemiu  
 a koniomiu nalo,”

mia nina naio be natuboiano  
 jukamu napano be verikariano

mave ea naio, napano naio berinavo,

<sup>3</sup> “*Verenio kamiu kuvila tibe na, mia vite nalo na kenemiu meuliano nalo amijikia avuro rivu, a mia kenemiu meuliano nalo ea borotano nei ve tebievi.*” *Tiut 5:16*

<sup>4</sup> Kamiu karamalo nalo a kenielo nalo, tiniemiu riviluludie re kenerimiu nalo tulaka, rivano-o mia ajikia tiniel ser kamiu bereio. Mia kamiu monoka kuvisavoriri batitiglo rimemedu rivu, kuverlogloglo, a kuvisiloglog vanlo m̃arabo nalo na kiado moneano ea Kristo.

*Bajago na tomu na iñauano, naliko kialo tubo nalo*

<sup>5</sup> Kamiu tomu na iñauano, kamiu kuvitovon ka kenemiu tubo nalo na vio yetano nei, tibe ka napano kumerou kalo, a kuvatove kalo, mia monoka kuvila tibe na ea kenemiu iviso momou nalo, tibe kanio kamiu kumitu kumiñau Kristo kiano. <sup>6</sup> Maka rivu ka kamiu kuvitu kuvila tibe na ea bogo napano ga nalo aju kamliki, ka mia kuvilavon ka kuvilalo asaaro ka kamiu, mia monoka bogo nonovio kuvila vite nalo napano Atua naio jidomio, vija kenemiu iviso rianiano nalo, tibe ka napano kube Kristo kiano tomu na iñauano nalo. <sup>7</sup> Monoka kuvisaaro ka kenemiu iñauano, mia bo ka kuvila re bunu iñauano na tavukia napano kumiñau toro kanano ga, mia kuvila tibe ka kumiñau kiado Tubo kanano. <sup>8</sup> Kamiu kuvisidomii von, toro tai naio be tubo, p̃eli na naio be toro na iñauano ga tai, be kurano, mia Atua sian meran bereio van rimemedu ka kiano iñauano novo nalo.

<sup>9</sup> Mia kamiu tubo nalo na tomu na iñauano nalo kanalo, kamiu bunu kuvila rimemedu van kenemiu tomu na kenemiu iñauano nalo, mia kuvil re ka tiniesereiano tulaka vanlo. Monoka kuvitu tiniemiu rimao ka kamliki nalo, kubiniu kenemiu Tubo takurano ga, napano joa vio mave, a napano naio jom̃a mila be verare ga ban tomu nalo.

*Kito roju romila mira ka Sim̃aro*

<sup>10</sup> Vaataro kanio nala nonovio kiaku iliano naruei, mia nejidom never ka kamiu, ka kamiu kuvilavio sikili ka mia kuvisikili ea kiado Tubo, vija kiano burum̃ara moroano na toru nene. <sup>11</sup> Kamiu kuviya kulu niabemiu kouo nalo na mira napano Atua jianio ban kamiu, ka mia kuvijikia kuvitu sikili, a ka kuvituko vio ka buruniavo nalo napano Sim̃aro kiano, vija kiano juboluboiano va nalo napano naio jom̃a mijukujuku kamiu kanio. <sup>12</sup> Nalo napano m̃a kito roju romila mira kalo, ea kiado meuliano, nalo maka ave kulorinio. Mia roju romila mira ka moroano dolu nalo, a sim̃aro nalo kialo tomu na tortoru nalo, a kialo tubo nalo napano abe burupati na melijokouo na vio yetano nei vonganei, ana rojuñia romila mira die semei va nalo na telabo napano aju janea vio. <sup>13</sup> Mo bo kanio kamiu kuviya vatitig saba nonovio nalo na tena mira na Atua nei kiano naruei, mia bogo nonovio ga a ea legiano nonovio ga napano Sim̃aro naio rimei ka rila mira ka kito, mia romijikia rala mira ka uolu nalo na, rivano-o mia rotovululo, rivano-o riviniu, mia kito rotumolu rotu sikili kia na vo rotu.

<sup>14</sup> Bogo napano kamiu kumitumolu ka kuvila mira tibe na, kenemiu vite na mira nalo ajibe nei naruei. Kulubue napano kuburukario ea m̃ariñimiu nalo, nina jibe kanio napano kubokar bajago na ilirianiano. Kuluniabemiu kouo napano juko vio ka mokotemiu nalo ka buruniavo, nina jibe kanio kubokar bajago na memeduanano ea kenemiu meuliano vodolu nalo. <sup>15</sup> Kulubue na toru tena ieliano na jaamiu, nina jibe ka kumitu vatitig ka kuva kuverial Ioluano Vou na tum̃aroano. <sup>16</sup> Burum̃ara selap napano kumidukario ka kuvituko vio ka buruniavo nalo na Sim̃aro kiano, napano sebi bilvili ealo, nina jibe ka kenemiu viekouoiano na jikili ea Atua. <sup>17</sup> Basaro na mira na

pariparimiu, nina javukia ioruriano napano Atua jianio ban kamiu, a iobogu na mira na Niununo Lu napano kubokario, nina naio javukia Atua kiano Iliano Lu.

<sup>18</sup> A vija vite nalo na, kamiu monoka kubolkouo bunu, monoka kuvika den Atua ka rijai kamiu. Bogo nonovio ga, monoka kuvituña kubolkouo ea moroano na Niununo Lu, mia kuvitu tiniemiu rimaio ka namoneano lu dolu nalo tulaka ea kenemiu volkouano nalo, napano mia miremiu nalo ve temi re bogo tai.

<sup>19</sup> A bereio, monoka kubolkouo rivior kiniou bunu, ka mia Atua naio sian bogo na iliano van kiniou, ka nesidomdeio re ka mia neverial Ioluano Vou na Kristo kiano, napano beamu, naio joluku ka tomu nalo, mia vonganei, mia nesikili ka neverialio vanlo. <sup>20</sup> Kiniou nobe toro na berial iliano na Ioluano Vou nei, mia nojoa yimo natetavokoiano, mia monoka kubolkouo ka mia kiniou nesidomdeio re kano mia neverial Ioluano Vou nei ea vio nei, tibe napano memedu ga ka nalaio.

*Pol kiano iliano na maaro*

<sup>21</sup> Kiniou nejidom ka kamiu kuvijikia kanaku lilianiano nalo, naruei ka tena nemiila kiado bilbilu novo nei, Tikikas, biedu ea kamiu. Naio jomña be niabene ea iñauano nalo na kiado Tubo kiano ea vio na, <sup>22</sup> ana mia naio riverial van kamiu ka kumemi numitu jumabe, ka mia kumijikia kuvijog rivu ea kumemi bereio.

<sup>23</sup> Ana tumaroano, a jidomiano, a viekouoiano binimei den Atua Karamado a Yesu Kristo kiado Tubo, aju bija kito a namoneano nalo nonovio. <sup>24</sup> A tiniamemiano napano Atua kiano naio toa kamiu, a ea kito bunu, napano kito nonovio rosidom mēlea kiado Tubo Yesu Kristo, napano mia kito rosidom naio rivano-o ribisi deio.

Kiniou, Pol.

**Mesi Napano Pol  
Bivitauiiao Ban  
Namoneano Lu Nalo Na  
VILIPAE  
Verialiano Moti**

*Tukunuano bulati na niosi nei*

Pol jiri mēsi nei ba ban yimo lu na Vilipae napano abe tomu moti na Yurop napano Pol mioliolu banlo, ana abinimeī abe namoneano. Vilipae na buruvenuo na toru tai na tanobuku na Masetonia napano jo yetano ka Parinio Tubo na Romonua. Pol jiri mēsi nei ea bogo tai napano naio joa nalakoiano, a ea bogo nene namoneano tealō napano aju amilkuei keano naio. Mia naio mijog bova bunu ka kialo verloglogiano sibusibiano napano jo joomo ea yimo lu na Vilipae. Mia mēsi nei berial ka Pol moneakar Atua, a jaaro mia jaaro, ana kito romijikia ka naio mila jibena bior napano naio monea Yesu Kristo kirsikili.

Pol bivitauiā mēsi nei ka river sivaiano van namoneano nalo na Vilipae napano ajumā amija naio ka kiano sidomiano nalo. Nalo na ajumā ajuvan veru tealō ba ban naio ka rijai naio. Mia naio jiri mēsi nei ba banlo, ka ridular kialo jidomiano, ka atu amonea Yesu Kristo sikili. Naio mila jibena bior napano maka rivu ka ajog napano naio joa nalakoiano, naruei mia ajog rivova laka rivorio. Naio ber kalo ka monoka ala kialo jidomiano vatove, jibe Yesu Kristo kiano jidomiano. Maka rivu atu ave m̄arou, a atu asidomii nalo ga. Naio ber kalo ber meuliano vou nei napano amijevio ea Yesu Kristo, naio be vite napano Atua jian ga banlo ea kiano tinieseseiano, a abokario ga ea kialo moneano. Maka avokario rivior napano amonea tuboiano na kulo Israel kialo, makanio, abokario bior napano amonea Yesu Kristo. Pol

jidom ka namoneano nalo na Vilipae monoka avokar Kristo kiano bajago. Naio berinavo nalo napano amiasol vatitig ea Yesu Kristo amijev tum̄aro na be riano a aju ajaaro bogo nonovio, bior napano Atua ga jian tum̄aro nei banlo, a mila lo ajaaro.

Vite burtumoruo tai napano Pol beriio ea mēsi nei, nina napano namoneano nalo monoka aiasol vatitig ea Kristo, a napano monoka asaaro, a napano kialo jidomiano bija kialo moneano monoka atu sikili ea naio bogo nonovio. Mesi nei berial ban kito napano Pol tinienmii laka namoneano nalo na yimo lu na Vilipae.

*Torogio nalo na niosi nei*

Iliano moti 1:1-11

Vite nalo napano aju amaluvo ea  
Pol 1:12-26

Namoneano nalo kialo meuliano  
monoka takii Kristo kiano meuliano  
1:27—2:18

Pol mila tiiano ka riila Timoti  
rivan ea tomu nalo na Vilipae  
a riila Epavrotaitas rivan berei  
vonuo 2:19-30

Namoneano nalo na Vilipae  
monoka avitigar vatitig ka kialo  
uolu nalo 3:1—4:9

Pol bija kiano bilbilu nalo na Vilipae  
4:10-20

Iliano maariano 4:21-23

*Iliano na be moti*

<sup>1</sup> Mesi nei, tomu juo namā amim̄au kurano ga Yesu Kristo kanano, naina be kumemi juo kinio Pol bija Timoti, kumemi juo nubivitauiā biedu ban kamiū, napano kamiū kumitua komeli na vio Vilipae, nina kamiū namā kenemiu meuliano naio jo bo bija Kristo, jibe ka kamiū kube namoneano lu nalo, bija kenemiu navagadeano nalo a kenemiu ijaiano nalo.

<sup>2</sup> Kumemi juo numisaaro ka nuviviuo kamiū bereio ea mēsi nei, ea Atua karam̄ado siano, a ea kanado Tubo Yesu Kristo siano, a kumemi juo nubika nalo abe juo ka mia adu

tiniememiano vija tumãaroano toa kamiu vonganei.

*Pol kanano volkouano biorlo*

<sup>3-4</sup> Kiniou nojomãa tinieku maio ka kamiu julaka ga ea kanaku volkouano nalo, a najaaro toru ka notomãa nobolkouo ka kamiu van kiado Atua, a ka naver siva ve toru vanio ka kamiu. <sup>5</sup> Nojo tinieku maio ka kenemiu vitikariano nalo ea kiniou, bija bunu kiado imãauano vei nalo na Ioluano Vou na bo, jikario ea bogo na kiniou nejikar kanaku imãauano ea kamiu, binimei bokar vonganei, mia nober siva toru biorio. <sup>6</sup> Kiniou nomonea ka Toro na Toru, na naio jikar kanano imãauano na bo tai ea kamiu ruei, mia naio mijikia rimãau rivanvano-o rila nonovio batitigio riviniu ea bogo na maaro, nina ea Yesu Kristo kanano burumãara legiano nene. <sup>7</sup> Tibe na naruei ana kamiu kuvialio ka kiniou nojo nojidomii kamiu toru, mia nomialio ka nina naio memedu ga, bior kito raba jouro vio takurano ea Atua kanano tiniememiano ruei, naruei kamiu kitoliko ruei ea vite miroano, ea bogo na bo a bogo na bova. Vonganei, kiniou nobokar batitig kamiu kumitu jouro ea kiniou, naruei mila na vonganei na nojoa nalakoiano, naio javukia na kam liko kiniou. Mia ver avuru kiniou nava komeli ka ail van kiniou rivior Ioluano Vou na bo na nojomãa neberialio, mia kam bunu kuvitu vija kiniou keano vo. <sup>8</sup> Naina be riano na, mia Atua naio mijikia bunu ka nejidom toru ka neial miremiu nalo bereio. Aue, kiniou tinieku jii kamiu na toru ea tinietiano nonovio na Yesu Kristo kanano. <sup>9</sup> Kiaku volkouano na ka kamiu naio jibe nei, neberinavo kenemiu tinietiano mia naio monoka to riluo damãariga, mia ver jikiaiano na bo a mãsosouano a vitii veveiano bunu nalo atua kamiu, nalo mijikia rijai kenemiu tinietiano nei rime ve toru lie vo. <sup>10</sup> Mia ver kamiu kuvitibe na, mia kumijikia kuvitu kuvidu ga bajago nonovio na naio bo

laka, a kuvituvan nana naio bova, ana mia kenemiu meuliano mijikia to rimeravo rivu, mia ve re titai na naio toa kamiu ea Legiano na Kristo kanano na jo binime. <sup>11</sup> Ana mia kenemiu meuliano nalo amijikia avar na memeduano mãarati nene napano Yesu Kristo naio jian biedu, na naio jibe ka mãarabo tai namãa kito romijikia rovamenea Atua kanio, a napano Atua bunu naio rimerera kanio.

*Pol naio joa nalakoiano mia naio mimãau Tubo kanano*

<sup>12</sup> Kuruaku nalo a kuvivinieku nalo, kiniou nojidom neverial vite nei van kamiu, ka bogo va nalo na amiyotuba ka kiniou, nalo maka atokovio ka kanaku imãauano, makanio. Mia aju amijai toru ka rila Ioluano Vou na bo nei rivan lie ea vio telabo dolu nalo. <sup>13</sup> Ea tivelinio na vio nei na kiniou nojoaio, neialio ka tomu na mira nalo amijog Ioluano Vou na bo nei ruei, a naio ba bokar nalo na mira na ea yimo na parinio tubo Sisa kunuano, bija tomu dolu nalo bunu. Vonganei, nalo nei abitulubario ruei ka nojomãa nabar mãarimieni nei bior Kristo ga. <sup>14</sup> Mia kiniou najaaro toru bunu ka nemial ka bogo na abokar kiniou ea nalakoiano jibe na, mia vite nei naio maka rila namoneano dolu nalo na vio nei amerou, mia mila nalo aju ajumolu ajikili lie vo ea Tubo, mia nalo aju ajidel dolu ka ga aberial Atua kanano iliano.

<sup>15</sup> Nalo amioliolu ka Atua kanano iliano, naio be vite novo tai, mia vite tai ga, kiniou nemijikia ka nalo tealó amioliolu ka Naverikariano Kristo ea jidomiano na bo, mia tealó amioliolu kanio ea jidomiano na jokuano a ea jidomiano na varvariano. <sup>16</sup> Nalo namãa amimãau bo, nalo abitulubar ka kiniou nojoa nalakoiano nei bior ka na nemimãau ea Ioluano Vou na bo, naruei tinielo miiãa kiniou a tinielo miiãa nalo na maka ajogio vo, naruei amioliolu bija jidomiano na bo. <sup>17</sup> Mia nalo dolu na, amioliolu ka Kristo mia

maka ave riano ga, abe m̄arou m̄ele, naruei ajidom ka ala ka nalo na kija avavin. Jidomiano na bova na jibe na naio joalo, naruei bogo na amial ka amior batitig kiniou ka m̄arimieni nene na nojoa vio nei, mia amial ka vonganei kanalo bogo na ala bulag niegeniege vatitig siaku ea mirano tomu nalo, ka ala sialo rimei rivavin. <sup>18</sup> Mia kei naio mijikia, vede naina maka ve vite tai. Vede kanalo jidomiano na bo ga p̄eli nana bova, p̄eli na abe riano, p̄eli na amila sibi, mia vite na toru, Kristo siano naio monoka riva rivatavio lie vo dam̄ariga.

*Pol berinavo naio rimeul vede na riṁaro, mia jidom Yesu ga*

<sup>19</sup> Naina naruei, bogo na kiniou nomijog ka siano jo batavio ruei, najaaro toru, a ver bogo tai nojog ka kanano iṁauano naio jo jidel dolu bo kiano vo, mia nojog rivu lie vo eaio. Vonganei nojoa vio tai na namial jibe ka amidu kiniou nojoa juluvati na nam̄ariano, mia maka ve kanaku m̄arabo na nemijikia nataluvo den bereio, mia bogo na nomijog ka kanano iṁauano jo bavini jibe na, miijalar kanaku jidomiano bereio, mila na nabarkar tinieku lie ea kenemiu ilivolkouano nalo, bija ijaiano nalo na Niununo na Tubo Yesu Kristo kanano, ka mia rivu van kiniou keano na vo. <sup>20</sup> Tibe na, vonganei kiniou nojom̄a nomonea jikili ka ala venia ka kiniou, mia maka ajikia ala kiniou nala titai na maka rimemedu, p̄eli never iliano tai napano karina mia noimou kanio ea Atua mirano bereio. Ver kiniou nemeul p̄eli na namaro, mia maka notovon, ana tibe ka bogo nonovio, nejidom ga ka nesikili ka Kristo siano naio mijikia rivavin lie vo, ea venia na mia riyotuba ka kiniou p̄eli na ea mokotenaku.

<sup>21</sup> Venia na joa kiniou naio jibe nei, berinavo ver kiniou nemeul, mia Kristo kiano meuliano na bo naio to vija kiniou, mia ver kiniou nam̄aro, nava noto vija naio, naio bo lie vo bereio. <sup>22</sup> Ver kanaku ka nemeul

ea yetemeriba nei keano vo, naina nioti nene ber be kanaku iṁauano novo keano vo ka mia naio rijikia rivar sano m̄arati na bo nene. Tibe na, namial jibe ka ver kiniou noto, mia rivu ga, mia nemial bunu ka ver navano, naio bunu bo. Naruei maka bunu nejikia ka mia rivu lie ka navan ea na vabe. <sup>23</sup> Kirisikili laka ka neviti veve kanaku m̄arabo juo ka nevijauia tinene, bior ea tivelinio nene, tinieku jii toru ka kiniou nemijikia notuvan yetemeriba nei, ka nava noto vija Kristo, naio rivu laka keano vo, <sup>24</sup> mia nemial bunu jibe ka monoka noto kija bereio ea vio nei keano vo, ka neiija kamiu lie vo.

<sup>25</sup> Jidomiano na jibe na naio jo jikili vatitigio ea kiniou ruei, mila na vonganei nemial jibe nemijikia neverikar van kamiu ka mia noto vija kamiu bereio kija vo, ka rila na kuvijikia kuvijog rivu ve toru ea kenemiu viekouoiano ea Kristo Yesu, ka mia kumijikia kuvan lie vija naio. <sup>26</sup> Tibe na, ver bogo tai nemijikia noyotuba ka kamiu, nomonea ka mia naio rila ka kamiu kuvisaaro lie ea Kristo, a mia naio rivu laka van kamiu, rila ka mia kenemiu saba ta bunu lie vo bereio ka kuver siva van naio, a ka kuvamenea naio riviorio.

*Kito monoka raiasosol kito, rove takurano ea mira die uolu nalo*

<sup>27</sup> Mia kito maka rejikia rimemedu vo ka mia tum̄abe ka kiniou, naruei nojidom ka mia kuvisidomial re kiniou, mia kuvisidomial ga kamiu. Kuviel ea m̄arabo na bo naio memedu ka kamiu tomu na Ioluano Vou na bo na Kristo. Vede nemijikia noyotuba ka kamiu, p̄eli na maka nejikia neviedu, mia bo ka lilianiano naio bokar burutilinieku ber kumitum̄a kumitu jikili bo, ka niunumi nalo be takurano, kenemiu jidomiano takurano ga ka kuvitumolu kuvitu vio takurano ga, kuvila vio sikili ka namoneano na Ioluano Vou na bo naio monoka tovulu. <sup>28</sup> Mia kamiu kumerou re, tiniemiu ribobogia venia na vede mia uolu nalo ala van kamiu. Ver nojog ka na kamiu kumitu kumila jibe na, mia rivu mia

rivu, bior ka mia naio be kijokijo na Atua rivan uolu nalo ka riuedomlo, a ve kijokijo na Atua rivan kamiu ka mia naio rilarur kamiu. <sup>29</sup> Nao-o, mia kamiu monoka kuvila mira ka uolu nalo na jibe na, bior ka bogo na Kristo buru kamiu abe kanano, naio maka ka kumonea ga, mia ka kuvijikia kuvar jogvaiano rivior naio bunu. <sup>30</sup> Naio monoka tibe na, bior vonganei kito rojuña rabarbitiran buruñara mira na nanua kumial ka na kiniou nabario, a napano ðeli kumitu kumijog ka nojo nabar keano vo.

## 2

### *Bajago na bo napano rola van kito*

<sup>1</sup> Kiniou nojidom ka kamiu kuvisidomii von kanado meuli-ano na bo kitoliko Kristo. Kanano bajago naio jo mijalar kanado jidomiano, a! Kanano tinieruru naio mila kito romijog bo laka, a! Niununo naio mila kito roju bo bija kito, a! Ana naio mila melmeloko a tinieiano naio bujo ea kito, a! <sup>2</sup> Naruei bior naio mila bo laka ban kito jibe na ruei, nejidom notusol iliano, nebika den kamiu ka kuvan lie vo. Neber bo ka kamiu, kuvijamo ka kenemiu bajago na rivan kamiu, mia naio rive verare ka Kristo kanano bajago na rivan kamiu. A mia kamiu tiniemiu titii kamiu naio rive verare ka na naio tinien jii kamiu, a mia kenemiu iliano vija kenemiu jidomiano ve takurano. Ver neial ka kuvila tibe na, mia nojog rivu, nasaaro mia nasaaro. <sup>3</sup> Tibe na, mia kito roimau re bunu ea bajago na ve vitiano, mia rala re bunu vite vija jidomiano vevavin nalo, mia romomavo, rala kito rotutano, reial kulo dolu nalo avu loa ka kito. <sup>4</sup> Kito rosidomial re ga kito, vija venia na be kanado, mia rosidomial kulo dolu nalo bunu, vija venia na be kanalo. <sup>5</sup> Bo ka jidomiano na bo a bajago na bo naio toa kito tulaka, rivior naina naña kito romial ea Kristo Yesu ruei, napano bo mia bo.

<sup>6</sup> Naio jibe ka na iouano nei na naio ber, napano berinavo, Naio be tovorovo na Atua, jibe ka nono Atua, mia naio maka sikili ka rivare ka naio tulaka.

<sup>7</sup> Naio juvan kanano mermerano joa vio mave, naio binimej jibe ka vite batravavo tai ga, naio miyotuba ea yetemeriba nei be kulorinio, binimej jibe ka toro na iñauano tai na maka ve siano.

<sup>8</sup> Toro na vio mave naio binimej be toro na yetemeriba, naio mila naio batove, naio jotano yetano ka sidomiano na Atua kanano, banbano-o na naio bokar mariano ea makolkolo.

<sup>9</sup> Naio monmonea Atua, naruei Atua bitirilar naio bereio, mila kanano sio naio bavin loa laka lie ka sio dolu nalo nonovio.

<sup>10</sup> Nalo na vio mave, nalo na yetemeriba, a nalo na vio yetano, mia aviniu avatove ka sio nei, mia anie ka naio

<sup>11</sup> mia niolo nalo nonovio avamenea Atua Teta, averial ea miralo, aver ka Yesu Kristo naio takurano be Tubo.

<sup>12</sup> Banalo, ea vio nei romialio jibe ka naña Yesu naio monmonea karamano, a kamiu bunu, nanua kiniou namial jibe ka kumitu kumonea naio bo bunu ruei, bo mia bo. Mia maka kumila ga ka bogo na kiniou nojo bija kamiu, mia vonganei, maka bunu noto vija kamiu, maka bunu neial ka kamiu juñabe naruei, mia nojidom ka kuvitu kuvisikili dolu ga ka rila rivano-o rivu lie tibe na.

Kamiu kubokar ioruriano ruei, tibe na naio maka rivu ka kuvitutano kule vijaio, mia monoka kuvisidomii rivu laka ea naio. Monoka kuvitilubar vatitig buruñara iñauano novo naña Atua naio mila, naruei monoka kuvimauka kija ka iñauano novnovo nalo na meuliano vou naña naio

jian ban kamiu. <sup>13</sup> Mia kiniou nomonea ka romijikia ralaio, bior ka Atua ga na naio jo miñau ea kiado meuliano terakurano, naio jo miija batitig kito ka rila kanado sidomiano nalo ajaaro ka rila kanano sidomiano, mia naio rila kito ravare ka rala tenene.

<sup>14</sup> Tibe na, venia naña naio joa jumãmo ka mia kala, jau kala ka mia keil munii re, ðeli kover re bunu iliano tai riviorio. <sup>15</sup> Mia kito roju iviso ka tomu nalo naña amilaluvu m̃arabo, kanalo jidomiano nalo abe dolu, mia monoka roimãuka kanado imãuano nalo avu a rimemedu. Kito robe Atua kenerinio nalo naña bo ka ve re niamiamo toa kito, mia monoka rotibe ka yulu na mereralii m̃arabo ka tomu nalo na yetemeriba nei. <sup>16</sup> Kamiu kuvar batitig iliano na meuliano rivanlo, rivan rivano-o rivokar burumãara legiano na mia Kristo rimeĩ bereio. Tibe na, mia nemijikia neial ka netikiti kule re, mia nemijikia neve m̃arou ka kamiu, na nasaaro ka kamiu tibe ka abe burumãara m̃arati na kanaku imãuano. <sup>17</sup> Vede mia naio rivano-o rivokar na mia kanaku burukija monoka riou rivior kamiu, mia ver tibe na, nemialio bo-o ga. Neber jibe na bior ka nemial jibe ka na m̃a kamiu kubarkar tiniemiu ea Yesu, kumila kamiu jibe ka jokoluolu tai ban naio ruei, mia bo ka mia kiniou bunu nasaaro ka najamo ka kiaku meuliano rivior Tubo kanano imãuano. <sup>18</sup> Naina naruei neber ka mia nasaaro ka tibe na, mia naio bo ka kamiu bunu kuvisaaro kano, bior ver Atua naio saaro ka nemijikia nalaluvu kiaku meuliano rivior toro dolu, naio be tena bo laka tai neibano naio mila ka kiniou.

*Pol naio jidom riila Timoti rivan keanlo*

<sup>19</sup> Kiniou nojidom neverial van kamiu bunu ka ea tivelinio na kuruado nei Timoti, kanaku jidomiano naio jikili ea Tubo Yesu ka mia vesiou re, mia nemijikia neiila naio riviedu ea kamiu. Tinieku jii toru ka naio mijikia riviedu rial kamiu,

karina mia naio rivar kenemiu iliano rimeĩ bereio van kiniou ea vio nei, nina ka mia rila nejog rivu ve toru laka. <sup>20</sup> Nemialio ka maka bunu ve toro dolu tai toa vio nei napano naio bo jibe ka naio ka mia nemijikia neiila riviedu kean kamiu. Be kiano jidomiano takurano bija kiniou, naruei nemijikia ka ver naio to vija kamiu, nabarkar tinieku ea naio ka mia naio to sidomii ve toru ka rila rivu lie van kamiu tulaka. <sup>21</sup> Nalo dolu aju keano, mia nalo maka atavukia naio. Kiniou nobitilubar nalo ruei, ka venia napano naio toru ea kanalo jidomiano, nina vite nalo naña be kanalo ga, mia vite nalo na be Kristo kanano, ajidom be iakurano ga, maka atu asidomii naio ve temi. <sup>22</sup> Mia Timoti kito romijikia vatitig ka naio bo laka. Kumijikia ruei jumãbe ka napano kumemi juo numimãu burukuti vio takurano ea Ioluano Vou na bo banbano-o na m̃a kiniou namial naio jibe keneriku, naio bio kiniou tata. <sup>23</sup> Jibe na, namial naio be toro na memedu ka neiila naio riviedu kean kamiu, mia maka rijikia riviedu vo. Nojidom ka neial von ka mia tumãbe ka kiniou ea vio nei beamu vo, ana naio mijikia riviedu riverial van kamiu. <sup>24</sup> Verenio mia rimeĩ rivu ka kiniou ea vio nei, nemijikia never ka mia naio re ga ve takurano napano mia riviedu riyotuba ka kamiu, mia nodu joa kanaku volkouano, nomonmonea Atua ka mia vesiou re ana mia kumijikia kuvial miraku bunu neyotuba ka kamiu.

*Pol naio mial bo ka Epavrotaitas naio rivan bereio ealo*

<sup>25</sup> Vite dolu tai bereio ka neverial van kamiu, ka kuruado nei Epavrotaitas naio mie toru laka banbano-o na namial jibe bo ka neiila riviedu bereio rial kamiu beamu vo. Kumila binimeĩ tibe ka kenemiu ijaiano tai ban kiniou, naruei numimãu burukuti bo, numisikili numitu vio takurano na bo mia bo ea mira. <sup>26</sup> Mia vite takurano ga mieiano nei bokar naio milalelan naio batitigio, mila jidom toru ka riviedu vonuo

ea kamiu bereio. Mia bogo na naio mijog ka lilian na kiano mieiano nei bokar burutiliniemi ruei, mila na mijog bova kija, tiniene ka jidom rial kamiu. <sup>27</sup> Riano ga, mieiano nei mila naio bova banbano-o kumemi numial ka mia tovulio, mia Atua tinien miia naio, naruei naio maka rimaro. Mia nojo nojidomiio ka maka Atua tinien riia naio ga, mia naio tinien miia kiniou bunu, bior ver naio rimaro mia sikili laka van kiniou, mia naio rijedu ka burumara jogvaiano mave ka jogvaiano na ma kiniou nojo nabar ruei. <sup>28</sup> Mia bogo na ma naio jo mie jo bija kiniou ea vio nei kia ga vo, nojomia nojidom biroveron toru ka naio. Tenena nojidom nober bo ka neiila naio riviedu rial kamiu bereio vo, mia nomonea ka mia kamiu bunu kuvisaaro ve toru ka kuvial mira bereio. <sup>29</sup> Kiniou nojidom ka kamiu kuvila kanano ilivorvoruano ea Tubo siano, kuvitigar vatitig naio tibe ka na kubitilubar naio bija imauano nalo na ma naio minaukanio ea vio nei. Tomu nalo na jibe na, bo ka rovitii veve batitiglo rivu, peli kito rotovonlo, <sup>30</sup> bior ka ma nalo amila Kristo kanano imauano naio bo laka. Epavrotaitas naio jibe na naruei, napano jidomii melea imauano nei, mila na maka bunu sidomial kanano meuliano, vaataro ka rimaro. Naio mila jibe na bior ka naio jidom ka monoka tiniene ka rila venia na ma kamiu kumidu joa jumano. Kamiu maka kuvijikia kumei kuvija kiniou, mia kumiila naio ju jeleig kamiu, binimei mimau bija kiniou. Naina naruei kuvuru naio kuvila rur naio.

### 3

*Kiniou nejidom nejikia vatitig Kristo lie vo vija kanano moroano*

<sup>1</sup> Mo kuruaku nalo a kuvivinioku nalo, nejidom netikar ka netetavoko kanaku iliano naruei. Iliano na maaro tai na naio bo ka never ka kamiu naio jibe nei, berinavo kamiu kuvisaaro tulaka ea meuliano na bo

napano Tubo naio jian ban kamiu ruei.

Vede iliano nene neber ka kamiu bogo telabo ruei, mia tiniemi ser re kiniou, maka nasidom rivova ka never vite na bo van kamiu ve vatelabo. Naio bo ga ka kiniou, mia nejidom jibe ka naio mijikia rijai kamiu ve burutomoruo bunu.

<sup>2</sup> Mia be iliano vou tai na tinieku maio kanio ka never ka kamiu naio jibe nei, berinavo monoka kuvitigar batitig nalo na ma aju amioliolu mele ka pakuveuano. Nina kario aju ajikili aberinavo pakuveuano nei naruei, naio ga be marabo ka toro mijikia riasol Atua kanano maratavo, mia nina maka ve riano. Kiniou maka lele nasaaro kalo, namial lo jibe ka aju abior janea vio jibe ka kuli deden nalo ga.

<sup>3</sup> Venia napano kito rojuao, naio maka tibe na lelejo. Kito maka rotu rovitii venia ma joa kuluniabedo riverinavo naina naruei naio mila kito robo ea Atua mirano, kar kito roju romilotu ka naio ea niunudo, mia rajaaro julaka ka tiniedo rimaio ka Kristo Yesu ga naio mila batitig kanado marabo. !Ver nalo atuma asidom aver ka pakuveuano naio mila Atua jaaro ka kulorinio, mia monoka rover roverinavo naina be kanalo tena mokotenalo ga, mia nana be riano nene, naio nei naruei kito rojuao, napano rojuma reje bulag bajago a jidomiano na bova nalo den kanado meuliano!

<sup>4</sup> Mia ver nalo atu sikili averinavo mia Atua naio saaro ka kito ea venia ga na ma joa kito, vede kiniou nemijikia neverial kanaku mia naio rivu tovulu kanalo bereio.

<sup>5</sup> Ver never bulag kanaku tukunu, mia kuvialio ka abiniu nono naio jakii ga venia napano bajago na memedu a tuboiano aju aber aberinavo naio bo laka. Vite na jukamu, ea kanaku yati nalo, nomiyotuba memedu ea burumara yati na kulo Israel, nebe jameul na memedu ea yati na tormoruo buo na Beniamen. Teta naio nena naljuo abe kulo Ju,

mila na kiniou bunu nebe Ju riano. Ta bunu, kiniou nomiyotuba bokar sude takurano nene amila pakuveu ea kiniou. A dolu, ea tivelinio na kulo Ju kanalo tuboiano, kiniou nebinimei toru, nebe Varisis nene, nojomãa neberloglog ka kulo dolu. <sup>6</sup> Mia beamu, ea tivelinio na iukurakar nalotuanano na kulo Ju sikili, kiniou naruei kiniou loa ka nalo nonovio, nojo namila namoneano nalo amijikia. A na maariano nene na nemijikia neverenio, ea tivelinio na bajago kirimemedu, maka ve iliano na tuboiano tai na kulo Ju kanalo leleio napano namila korovio ðeli na namilaluvio.

<sup>7</sup> Mo vite nalo nene, amila na amial kiniou bo laka, amidu kiniou nojo mave laka. Mia bogu na Kristo bio kiniou, maka bunu neial vite nalo na never ave tena bo tai ea kiniou, namial abe tena vakovio ga, naruei nojuvan nonovlo aju, najakisor naio. <sup>8</sup> Nao-o, nemijikia never tibe nei naruei, neverinavo nojo namial vite dolu nalo nonovio abe tena vakovio ga, mia nojidom ga ka nejikia vatitig Kristo Yesu tibe ka tubo na kanaku meuliano, riva lie tibe na. Vite takurano na ga na namial naio bo, napano bo lie vo jovulu vite dolu nalo nonovio, naruei naina ga nojidomio. Kiniou nojidom toru ka novokar naio ea kanaku meuliano, mia namilaluv kanaku saba dolu nalo nonovio bior ruei, mia naio bo ga, kiniou namial vite nalo na jibe soro ga ea kiniou.

<sup>9</sup> !Ver kanaku meuliano naio mijikia riasol vatitig ea kanano meuliano mia rivu mia rivu! Nina, kiniou takurano maka nejikia noimãau kanio, bior ka ver nomonmonea tuboiano, mia tuboiano naio maka jikia rila ka navare ka nememedu ea Atua mirano. Mia kanado mãarabo dolu ka rovokar memeduanano nei naio jo. Nene be viekouoiano ea Kristo, a naio be mãarabo na memeduanano takurano napano Atua ga naio betavo ea ban kito napano romonea kenerinio.

<sup>10</sup> !Ver namijikia nejikia vatitig naio ga rivu, vija Atua kanano burumãara moroano napano mila naio meul bereio den mãariano, mia naio rivu mia! Kiniou najaaro ka navar burovuron jogvaiano na mãa naio bario, mia ver kiniou nejikia rivare ka mia namãaro ea mãariano tai na jibe ka kanano mãariano, mia naial rivu laka van kiniou. <sup>11</sup> Vite kouo venia na jibe na na mia monoka noiopdulu eaio, rivu ga, mia monoka nala venia namãa nemijikia ka rila ka novokar meuliano vou ka notumolu bereio den mãariano.

### *Vite na mãa rojumãa romilatii von damãariga*

<sup>12</sup> Kiniou nojomãa neberii kiniou bereio jibe na, mia maka nosidom ka kuverinavo be tinieku ka nojo neber ka kiniou nebinimei nobo nonovio, ðeli na nobokar buruka ruei. Kiniou bunu kiniou maka vo, mia bior nemijikia ka Kristo Yesu naio buru kiniou ruei nebe kanano, mia nojo nojidom nalaii damãariga bogu nonovio ka mia novokar vio tai napano mia naio mijikia saaro kanio. <sup>13</sup> Mo kuruaku nalo a kuvivinieku nalo, monoka never vatitig van kamiu ka namial kiniou jibe ka maka novokar vio nene vo, mia be imãauano tai ga na naio joa kanaku jidomiano julaka, ka mia monoka tinieku ribobogia venia napano naio ju iorou ka kiniou, a monoka nesikili damãariga dolu ka notovulu venia napano jo kamu ka miraku. <sup>14</sup> Vite nei na mãa nojomãa nejikili kanio, naio jibe nei, berinavo kanaku meuliano naio jo bo bija Kristo Yesu damãariga, rivanvano na mia kiniou bunu tai na mia nojog vioano noyo na bo na Atua kanano nei na mia naio river ka kiniou, riverinavo “!Mo, jau komei mave koto vija kiniou naruei!” Vite na naio jibe ka jidomiano na sereano tai na mãa amidu batitig naio jo ana na kito rojumãa rojikitii biorio, ka rotovulu ve kanado. <sup>15</sup> Ver kito tealu, kanado jidomiano naio meruo

ruei, bo ka rotuṃa roimāu tibe na naruei, p̄eli na ver ea vite tealo, mia kito tealo kialo jidomiano maka rimeruo tibe na vo, kiniou nomonea ka mia Atua naio rila vite nalo na ameravo rivu vanlo. Vede ea vite telabo na maka romei rivu ea vo, mia naio rijai kito kanio na vo. <sup>16</sup> Mia kito monoka rovokar batitig naina napano robinimei robo eaio ruei, kanio maka rivu ka rojoru retitiravolar denio bereio.

### *Kuvitakii jaaku*

<sup>17</sup> Kuruaku nalo a kuvivinieku nalo, neber bo ka kamiu ka kuviasosol vatitig kamiu, ka kuvilavon kuviel takii jaaku ea m̄arabo na kanaku meuliano. Ver kuvitilubar ka kamiu tealo ajuṃa amila bo jibe na ruei, mo kamiu dolu nalo kija, kuviel takii jaalo. <sup>18</sup> Kiniou neberial iliano na ban kamiu va telabo ruei, mia vonganei neverial ve varakura bereio napano nomijog kirivova laka, jogumiraku na jo jibir-bili. Nina kario nojo nemial kam tealo napano abar sio ka abe namoneano nalo, mia kanalo meuliano nalo naio jiloglog berinavo nalo abe Kristo kiano uolu nalo ga vija sano m̄akolkolo nene. <sup>19</sup> Kanado uolu nalo nei, vite na amilotu kanio, naio be mabolo ga. Kanalo vovaiano nalo bo ka aimou kanio, mia abarvar kalo laka. Vite na m̄a bujovujo ea kanalo jidomiano nalo, abe tena yetemeriba nei, mia kanalo jukuti, naio avakovio rivova.

<sup>20</sup> Mia kito maka rove tomu na vio yetemeriba nei, kiado buru-venuo memedu, naina tiniabene mave. Toro na toru na vio na, nina be Tubo Yesu Kristo, kanado loruriano, mia rojua yetemeriba nei, roju rorea keano, a roju rojirarago kuku ka mia naio rimei bere vesiou re rivior kito. <sup>21</sup> Mia bogo na ver naio rimei, mia rimāu vija kanano buruṃara moroano napano bare ka rila vite nonovio atu yetano ka kanano tuboiano, naruei naio mia rivilig kito. Vonganei, roju bija kuluniabedo moruo nalo na yetemeriba

nei, napano amenunu, aburu kokorovio, abe tena m̄ariano ga, mia naio sian kuluniabedo vou tai, na naio bo jibe ka niabene, napano naio meravo, naio merera, naio jikili, naio jobo to tobo to.

## 4

<sup>1</sup> Ver tibe na, kuruaku nalo a kuvivinieku nalo, bo ka kamiu kuvitumolu kuvitu sikili tibe na ea kanado Tubo. Neber jibe na bior ka tinieku jii kamiu, nojidom kamiu toru, kamiu kumila kiniou najaaro laka, nabarvar toru ka kamiu, tenene na nojidom ka mia rivu van kamiu tulaka.

### *Iliano tai na tomu nalo tai kanalo*

<sup>2</sup> Kiniou nomijog bova ka nami-alio ka monoka neil ve telisu van kanado tira juo nei, Yuotia naio Sintike. Naljuo ajuṃa abilvilii ealo toru laka, tenene na neber ka kamiu ka nojidom ka naljuo monoka ala kanalo jidomiano rivatove, rimei ve takurano ea kanado Tubo. <sup>3</sup> Tira juo nei, nanua numiṃau vio takurano kumemi liko bo laka, bija bunu tom nei Kleman a tomu na iṃauano dolu nalo, na numiṃau jikili bior Ioluano Vou na bo banbano-o na nubiniu nube jidomiano takurano ga. Kiniou nemijikia ka tomu na iṃauano nalo nene sialo abiniu abivitauiabulagio jua niosi na meuliano ruei, mia bogo na be vuruvureiano jo iviso kalo bereio, nomijog bova toru. Jibe na, kanaku vikadeniano tai biedu banso, kanaku bilbilu na robe juo robe tomu na romiṃau vio takurano nua ruei binimei. Nebika denso ka jau naruei kajai tira juo nei ka amei ave bilbilu na bo bereio.

### *Iliano nalo na tunukakariano*

<sup>4</sup> Naruei kanaku iliano tai van kam nonovio bereio, neberinavo kamiu kuvisaaro ea Tubo, kuvisaaro ea naio tulaka. <sup>5</sup> Bogo na m̄a kamiu kubiniua bogokouo, kumelumumu, kuvila ka tomu nalo ajikia ka avitilubarario ka kenemiu jidomiano naio tebievi bo. Kuvisidomii von

tulaka ka vesiou re ga mia Tubo rimei bereio. <sup>6</sup> Kamiu kuvila re kenemiu jidomiano rivova tulaka ea vite nalo, mia ea vite venia na mia naio riyotuba ea kenemiu meuliano, kuver siva van Atua riviorio. Kamiu kuverial ka naio vite venia na jumemiu bulati kanio, kubolkouo kanio, kuviteg vanio riviorio, a nina monoka kuvila vija jidomiano na sivaiano tulaka.

<sup>7</sup> Naruei ver kamiu kuvidu vite nonovio toa jumano tibe na, mia kuvial ka na mia Atua rudu kanano tumaro loa kamiu, naio rijai kamiu. Kanano tumaro nene naio burutomoruo laka, mijikia rila rivu laka van kito tovulu venia namia romijikia rosidomio, rivanvano-o rila napano mia rivokar vatitig kanado iviso p̄eli kiado jidomiano naio to sikili ea Tubo Yesu.

<sup>8</sup> Kuruaku nalo a kuviviniekulo nalo, vede vaataro ka nala nonovio kanaku iliano van kamiu naruei, mia nojidom notunukakar kamiu ka kuvila kenemiu jidomiano naio rivujo ga ea vite nalo namia Atua naio jidomiio. Vite venia na beriano, p̄eli vite venia na naio loa, p̄eli vite venia na naio memedu, p̄eli vite venia na naio meravo bo, p̄eli vite venia na naio kirinovo, p̄eli vite venia na naio be navijukuvuiano, p̄eli vite venia na naio ka aiaia, p̄eli vite dolu venia na naio bo, naina naruei be vite kinkin nalo naruei napano bo ka atua kanado jidomiano tulaka. <sup>9</sup> Naina naruei be bajago nalo na nojomia namila vio jikili ka naverloglog ka kamiu, p̄eli kuvokar den kiniou, p̄eli mave ka nina, kamiu kuvial ea kanaku meuliano. Naruei ver kamiu kuvial ka beriano ka bajago na bo nalo nene tealoo na ajua kanaku meuliano, neber bo ka kamiu neberinavo kamiu bunu kuvije batitiglo amonea kenemiu meuliano nalo. Mia ver kuvila tibe na nomonea ka mia kanado Atua na tumaro mia naio to vija kamiu, rijai kamiu.

### *Siva ka ijaiano*

4:16 Im̄auo 17:1; 2Kor 11:9

<sup>10</sup> Kiniou nojidom never ka kamiu never burumara saariano na ea kiniou, ka kirisiou kija maka naial vite tai, mia nobokar ijaiano telisu nei ga kamiu kumituvan binimei. Nomonea ka kamiu kumitu tiniemiu maio ka kiniou, mia nemijikia ka maka ve kenemiu marabo ka kuvila vite rimei rivokar kiniou ea vio nei. Mia bogo na nemial ijaiano nei binimei vonga, namial jibe ka na kenemiu jidomiano na ijaiano na ea kanaku im̄auano naio meul vatitig bereio, nabamenea Atua bio-rio. <sup>11</sup> Kiniou neber jibe na, mia maka ve tena noto nala vukuleleano ka maka ve kanaku titai, bior vite na namila kakario mugaruei, ka vite venia na mia riyotuba ka kiniou, p̄eli na kiniou noto tumabe, mia nasaaro ga. <sup>12</sup> Kiniou noto tano p̄eli noto mave, siseri kiniou p̄eli na saku sinaniano ve telabo, jumaku ve teau p̄eli jumaku rivujo, kiniou nomiovo dulu ea vite nalo nonovio ruei. Bogo na bova vede bogo nabo mia Atua kanano marabo ka noiopdulu ea naio bo jo, mia naio berloglog kiniou kanio, mila na namila kakar vite nalo na ea naio ruei. <sup>13</sup> Tibe na, vonganei namial jibe nemijikia notovulu vite nonovio napano mijikia rimei ea kiniou, naina ea burumara moroano na Kristo naio jo mila nejikili eaio.

<sup>14</sup> Kiniou nojidom neverinavo kamiu kulo Vilipae, kumisidomii ka kuvijai kiniou ea kanaku bogokouo tibe na, kamiu kumijuku bo toru laka. <sup>15</sup> Jibe ka napano kamiu kubitilubaroo ruei, ka bogo na nejikar nemiel bior Ioluano Vou nei, bogo na najaluvo ea vio Masitonia nabano, maka ve lotuano tai napano naio rijai kiniou leleio, mia kamiu ga. Nejian vite nalo na telabo banlo, mia maka nalo tai napano naio ve tiniene ka sian vite rimei ka rijai kiniou ea kanaku marabo p̄eli na kanaku im̄auano. <sup>16</sup> Mia kamiu kubo laka, kumitu kumijai kiniou ea bogo na jumaku bulati, kumituma

kumituvan ijaiano binimei ban kiniou va telabo kija, bano-o bokar bogo na naba nojo nomiñau laka yako Tesalonaika. <sup>17</sup> Nojoña nemil jibe na, maka ka noto nosidom navar ijaiano tulaka, mia bior ka nojidom neial ka lotuano nalo atu aija Tubo kanano iñauano. Naina bior napano ver kuvila rivu van toro dolu tibe na, ana kenemiu bajago novo nene mia naio rivar marati nene rila vite nonovio rivu lie van kamiu bunu. <sup>18</sup> Tibe na, neber siva toru laka ka ijaiano nalo naña kamiu kumiila Epavrotaitas naio bar binimei, nobokar nonovio rui. Ijaiano nalo na binimei, naio ba loa ka napano nojidom, ana nemial ka vonganei naio bo laka ban kiniou. Kenemiu ijaiano nalo nei, ajibe ka bonotanunu tai napano naio be sano bonoti nene bo laka, ajibe ka jokoluolu tai na ña kumisian ban Atua napano naio mial bo laka, naio jaaro toru kanio. <sup>19</sup> Mia nemijikia ka ver jumemiu rive bulati bogo tai, mia kanaku Atua naio rivitii ea kamiu tulaka, bior ka Kristo Yesu naio mila rui Atua kanano mermerano na mave nalo burutomoruo laka. <sup>20</sup> Tibe na, mia rotu rodular karamado Atua siano tulaka, mia ravamenea naio rivan rivano-o mia maka rijikia ribisi bogo tai, Mm.

Kiniou, Pol.

### *Iliano nañaro*

<sup>21</sup> Kuver lilian kanaku iliano nei van namoneano lu nalo naña aju na, a kuverial vanlo ka nojo tinieku maio ka nalo bogo nonovio. A kuruaku a kuvivinieku dolu nalo naña aju bija kiniou ea vio nei, nalo bunu ajidom aver kavijo bo vede na bogiano bo van kamiu. <sup>22</sup> Nalo ta bunu ka atuvan iliano tibe na van kamiu, naina be namoneano lu nalo abiniu ea vio nei, bija bunu nalo naña amiñau parinio tubo nei Sisa kanano ea kunuano na toru. <sup>23</sup> Kanaku volkouano, ka Tubo Yesu Kristo kanano tiniememiano naio toa niunumi nalo, naio to iviso ka kamiu bogo nonovio.

## Mesi Napano Pol Bivitauiaio Ban Namonoeano Lu Nalo Na KOLOSIA Verialiano Moti

*Tukunuane bulati na niosi nei*

Kolosi be bulukomeli tai na tanobuku nei Esia napano nua jo nuayetano ka Parinio Tubo na Romo, ea venuo nei napano banei siano Teki. Bulukomeli nei jo tevelinio yetano na Evesas ea tivelinio na ban kamu kean kito. Mesi napano Pol jirio ba ban namoneano nalo na Kolosia, naio juvan ba ban tomu nalo na yimo lu na vio na. Paul nai maka tikario yimo lu na vio Kolosi, mia vio na joa ga tanobuku na vaataro ka Evesas napano be burupati bulukomeli na tanobuku nene, ana Pol naio jo miñau ea vio na bogo nonovio. Mia bogo napano Pol jo Evesas, naio jo miila kiano tomu nalo abanvan ka averial ioluano vou ea vio nalo ea tanobuku nei, a Kolosi be vio nalo nene tai. Naruei bior vite na, naio mialio ka be kiano iñauano ka vitikar nalo na Kolosi bunu.

Pol mijog verioiano ka be naverloglogiano nalo na yimo lu ajua vio nei napano aju aber ilisibisibiano nalo a aju aberinavo tomu nalo monoka alotu kanio tomu tortoru a vija siñaro nalo kialo navurum̄araboiano nalo, ka ajikia ajikia vatitig Atua, a ka ajikia avokar meuliano napano bujo batitig ka vite nonovio. Mia atu averloglog tomu nalo ka monoka atakii tuboiano moruo ea tivelinio na sinaniano, a vite tealoo bereio, a monoka ave pakuveu.

Naruei Pol jiri m̄esi nei ka rikuei keano jidomiano va nalo nei, a berial kalo Yesu Kristo kiano ilirianiano nalo. Burupati jidomiano napano naio berenio jibenei, ber Yesu Kristo mijikia sian meuliano van kito napano bujo vatitig ka vite nonovio, a verloglogiano dolu nalo

nei ber Yesu Kristo naio mijikia ridu meuliano van kito napano robujo vatitig ka vite nonovio, a verloglogiano dolu nalo amijikia avurlag tomu nalo den meuliano nene. Kristo miñau Atua kiano ka rila yetemerba nei, a naio miñau Atua kiano ka rivuru tomu nalo amei bereio ea naio. Toro monoka riasol ea Kristo ka rijikia rijev meuliano, a maka bunu m̄arabo dolu tai bereio. Iorou Pol berial banlo vite nalo na amijikia ajevio ea kialo meuliano bior napano amonea Yesu a amiasol vatitig eaio.

Bo kito romjikia ka toro nei Tikikas, napano Pol jian m̄esi nei banio ka ridu riva van namoneano nalo na Kolosi, naio be toro nene kiaga napano ban bija Onesimas, buru bereio naio ban ea kiano vio. Onesimas, naio be toro na iñauano kurano tai, a naio be toro nene kiaga napano Pol beriio ea kiano m̄esi napano juvan ba ban Vailimon a bika den Vailimon ka viekoko naio.

*Torogio nalo na niosi nei*

Iliano moti 1:1-8

Kristo kiano bajago, bija kiano iñauano 1:9—2:19

Meuliano vou ea Kristo 2:20—4:6

Iliano maariano 4:7-18

*Pol jikar kiano iliano banlo*

<sup>1-2</sup> Kiniou Pol, kiniou nebe atevi napano Kristo Yesu kiano, napano Atua naio bitiri lar kiniou, najaaro ka neviviuo kamiu ea m̄esi nei, napano nejiriio biedu ban kamiu namoneano lu nalo na Kolosia, napano kamiu kuruaku nalo a kuvivinioku nalo ea Kristo, napano kumitu jikili eaio.

Kumemi juo Timoti, napano naio jo bija kiniou, nubolkouo ka mia Atua karam̄ado kanano tinievuiano a tum̄aroano to vija kamiu.

*Pol naio berenio siva ban Atua kar nalo*

<sup>3</sup> Bogo nonovio ea kenememi volkouano, kumemi juo nuber siva bior kamiu ea Atua, Yesu Kristo kanado Tubo karam̄ano. <sup>4</sup> Nina bior kumemi juo numisaaro toru

ka kamiu, bior lilianiano bokar kumemi ber kamiu kumitu kubiekouo jikili ea Yesu Kristo, a kumitu tiniemi jii namoneano dolu nalo. <sup>5</sup> Bajago novo na jo maluvo ea kenemi meuliano bior kumitu kumisidomii m̄lea ka kumijikia kuvokar saba novo nalo napano Atua bar batitiglo aju tiniabene ka ve kenemi. Saba nalo na jibe na, kumijog Ioluano Vou berenio ruei. <sup>6</sup> Mia Ioluano Vou nei biedu ban kamiu ruei, a vonganei, jo ba tavio keano vo ea vio dolu na yetemeriba. Naio jo ba tavio jibe na, naruei jo miluo a bar m̄arati novo nalo, jibe ka napano mila ea kamiu, jikario ea bogo napano kumijog beamu, napano kubitilubar ka Atua kiano tiniememiano ea kito burutomoruo a be riano laka. <sup>7</sup> Vite nalo na, Epavras naio berloglogio ka kamiu ruei, ea bogo napano naio midu jelememi biedu berial ioluano vou nei ka kamiu na be moti. Naio be toro tai napano numim̄au biju vio takurano, a naio biekouo vatitig ea Kristo kiano im̄auano novo nalo. Kumemi numisidom naio toru, <sup>8</sup> mia vonganei, naio binime bereio ea kumemi ruei, jian veriiano novo tai ban kumemi, napano berii burum̄ara tinietiano napano Niununo Lu midu joa kenemi meuliano nalo.

<sup>9</sup> Kanio tena, bogo napano kumemi juo numijog Epavras kiano iliano, kumemi juo numitu nubolkouo ka kamiu julaka ga binime bokar vonganei, a numitum̄a nubika den Atua ka Niununo naio sian m̄asosouano a jikiaiano vu van kamiu, ka mia kumijikia kuvijikia nonovio Atua kanano tinieiano nalo. <sup>10</sup> Tibe na ana mia kumijikia kuviel rimemedu ea m̄arabo napano bo ka tomu nalo na Tubo kanano amiel eaio, a mia kumijikia kuvilaio ka mia naio rijikia saaro m̄le ea kenemi bajago nonovio nalo. A mia bo ka kurukuti na bo mijikia rimaluvo ea kenemi meuliano

nalo a ea kenemi im̄auano nalo bunu, a mia kenemi jikiaiano ea Atua mijikia riva ve toru lie vo. <sup>11</sup> Kumemi juo nubolkouo ka mia Atua kanano moroano na toru rila kamiu kuvokar moroano bunu, ka mia kumijikia kuvitumolu kuvitu sikili ea bogokouo, a mia kenemi iviso nalo amijikia ave tebievi, a asaaro ga ka bogo nalo na tibe na. <sup>12</sup> Monoka rover siya van Karam̄ado, napano naio mila kito bunu, kitoliko namoneano lu dolu nalo, romijikia ravar kiano jajum̄ano, jouro ea kiano navenatuboiano na miamoiano, <sup>13</sup> bior naio buru bulag kito ruei den moroano na melijokouo, naio mijian bulag batitig kito raban ea navenatuboiano na kenerinio kiano, napano tinien jii naio bo laka. <sup>14</sup> Nao-o, Atua naio buru bulag kito ruei, napano naio biekokoa kito bior kanado kariano nalo.

*Kristo naio be parinio ka vio nonovio yauo*

<sup>15</sup> Nina be kenerinio na, naio be Kristo nene, napano naio be tovorovo tai napano romijikia reialio, ka Atua napano maka rojikia roialio, napano naio be motoru ka vite nonovio nalo na Atua jiilo.

<sup>16</sup> Ea Kristo nene, Atua naio jii vite nonovio, na vio mave a na vio yetano, napano romijikia reialio p̄eli na nana maka rejikia reialio, bija vite nalo napano abe natuboiano ea vio yauo, jibe ka parinio tubo nalo, moroano nalo, a tomu na tortoru nalo, a nailiano nalo.

Atua jii vite nonovio ea Kristo, a Atua jii vite nonovio be Kristo kanano.

<sup>17</sup> Kristo naio jo ruei jukamu ea vite dolu nalo nonovio, mia naio bar batitig saba nalo nene ajum̄a amim̄auo bo ea jelelo

- memedu. <sup>18</sup> Kristo naio be burupati na meuliano na torogio nalo na kiano nalotuano, a naio be parinio ka lotuano nene jibe ka lotuano nene tibe mokotenano.
- Naio be toro na jukamu ka nalo na ameul bereio ea m̃ariano, ana jibe na mila ka vonganei naio jo mave lie vo loa vite dolu nalo nonovio.
- <sup>19</sup> Kristo naio jo mave laka jibe na, bior Atua naio mijamo ka kiano mermerano joaio, javukia meuliano a moroano na kanano joaio.
- <sup>20</sup> Ea Kristo nene kia ga vo, Atua bar bereio vite nalo na vio mave bija na vio yetano abinimeia eiao.
- Ana na naio mila nonovio yauo amijikia ave merevuiano rivija naio bereio, nina ea Kristo kiano burukija napano miou ea m̃akolkolo.

*Kamiu kuve merevuiano bereio kamlika Atua*

<sup>21</sup> Nanua beamu, kamiu kube valauo ga, a kumitu koalabo ka Atua, a kube kiano uolu, bior jidomiano va nalo a bajago va nalo na kenemiu. <sup>22</sup> Mia vonganei, napano Kristo binimeia jibe ka kito, kiano m̃ariano mila kito robe merevuiano kitoliko Atua bereio. Atua naio mila jibe na, ka mia naio mijikia rivuru kamiu kumei keano naio napano kuve lu batitig rivu, kumeravo vatitig rivu, a napano maka niامية va tai toa kamiu leleio. <sup>23</sup> Mia nina naio mijikia tibe na, verenio ga kamiu kuvitumolu kuvitu sikilia ga vo ea Kristo, a ver kumonea naio kia ga. Bo verenio kamiu kumelukuluku re ka kuvokar sikili moneano na Atua kiano verikariano nalo, monoka kumonea ka mia naio monoka sian vite nalo van kamiu napano kumijogio ruei ea Ioluano Vou nei, napano tomu nalo na vio yetano nalo ajum̃a amijogio ruei, a napano kiniou Pol nebe toro na mioliolu kanio.

*Pol naio miñau jikili bior ka namoneano nalo*

<sup>24</sup> Vonganei kiniou nojo nomijog jaleleano ea mokotenaku bior kamiu, mia najaaro ga kanio. Nina jibe ka napano nojo nomiñau nonovio kanio ea jogvaiano na mokotenaku nalo, napano Kristo ber lua ka mia navario, jibe ka ga napano naio bario ruei, ka najai taara na namoneano nalo ka atu sikili. <sup>25</sup> Atua bitiri lar kiniou ka mia nemei neve toro na iñauano tai na bagaro na moneano nalo, mia vonganei nemijikia najai kamiu ea iñauano napano Atua naio miduio joa jum̃aku, nina ka neverial iliano na kiano van tomu nalo ka mia ajikia nonovio eiao. <sup>26</sup> Kiano iliano nene nei, jibe ka iliano tai re bogo be nua, joluku ga ea tormoruo nalo, napano nalo maka ajikia leleio, mia vonganei Atua mila meravo ban kiano namoneano lu nalo. <sup>27</sup> Kiano jidomiano ka rila tibe na naruei, berinavo iliano na napano kiano tomu nalo, kulo Ju, maka ajoglubario, mia naio riverial kiano vite novo nalo, napano abo laka, ea nalo napano maka ave kulo Ju. ? Mo ana ililuklukuano nei naio ber venia? Naio ber jibe na naruei, berinavo Kristo naio mijikia toa kenemiu iviso nalo, ana kamiu kumijikia kumonea kuver mia Kristo mijikia rila kamiu kuvitusol ea meuliano novo na Atua kiano ea vio mave.

<sup>28</sup> Kumemi juo numitu numioliolu ka Kristo nene ban tomu nalo, a numitu numil banlo nuber nalo monoka avitikarlo rivu, ana numitu nuberlogloglo ka masouano nalo. A ver tomu tai napano kialo jidomiano a kialo moneano rimeia rimeruo vatitigio, amijikia amei atumolu atu kumemi liko ea Atua mirano. <sup>29</sup> Kiniou nojo nobukudeli bijonio bior vite na, mia bogo nonovio nojom̃a nemiñau ea moroano na toru napano Kristo naio jo misonio ban ea kiniou.

## 2

### *Monoka kumonea Kristo sikili*

<sup>1</sup> Nao-o, javukia na kiniou nebere-  
nio, ka napano nobu-kudeli toru  
bior kamiu, a bior nalo na vio Leote-  
sia bija tomu dolu nalo bunu napano  
maka aial miraku kija bogo tai vo.  
<sup>2</sup> Nejidom ka nala kialo jidomiano  
nalo atu sikili, a ka kialo tinietia-  
niano mijikia rila aiasol kialo iviso  
nalo amei ve takurano ga. Nejidom  
melea ka mia avokar burumara iliri-  
aniano na vite luku nei napano  
beamu nalo maka ajikiaio, napano  
naio be Kristo memedu, naruei mia  
kialo jidomiano nalo maka rijikia to  
veve juo. <sup>3</sup> Nina bior ea Kristo, tomu  
nalo amijikia aleal vite novo nalo  
na Atua kiano masouano a jikiaiano,  
napano naio bar vanio jua Kristo.

<sup>4</sup> Kiniou nojo neber iliano na ban  
kamiu, ka mia tomu nalo tai re  
ave niosesei van kamiu rivano-o  
avuru kenemiu jidomiano riva rive  
dolu, ea kialo masouano lubolubo  
nalo. <sup>5</sup> Nemil jibe nei bior kanaku  
jidomiano joa kamiu jikili damariga.  
Bekurano ka mokotenaku jo koalabo  
ka kamiu, mia kanaku iviso naio jo  
miasol kamiu damariga ruei. Mia  
najaaro toru ka kamiu bunu, na-  
pano nomijog ka maka kuve dedade  
ga, mia kubiekouo jikili buronio  
damariga ea Kristo.

### *Kiado meuliano monoka sikili tu ea Kristo*

<sup>6</sup> Jibe na, bior kito romidu Kristo  
Yesu be kanado Tubo ruei, bogo  
nonovio mia reiel damariga ea  
naio ga, <sup>7</sup> mia naio monoka tibe  
ka pelilikiti na kanado meuliano,  
peli na yimo na kanado meuliano,  
monoka sikili tu mave ea naio. Tibe  
na ana na kiado viekouoiano ea  
Kristo naio mijikia rimei sikili lie  
bogo nonovio, tavukia napano aber-  
loglog kito kanio ruei. Mia bogo  
nonovio, kito monoka rotu rover  
siva vanio. <sup>8</sup> Kamiu monoka mia  
kuvitakar rivu, ka mia tomu tai re

amei ka mia aiadikar kamiu ka il-  
iano nalo na jelea masouano na toro  
ga kanano, peli ka verloglogiano  
nalo napano abujo ka masouano  
na yetemeriba nei ga. Ilikuraniano  
nalo na be tena sibiano ga, a nalo aju  
amaluvo ea tomu nalo kialo jidomi-  
ano moruo, a maluvo ea tivelinio na  
simaro nalo a semei nalo, nalo mia  
maka amaluvo ea Kristo.

### *Kristo naio be parinio ka vite nalo nonovio*

<sup>9</sup> Atua naio midu kiano meuliano  
a moroano nonovio nalo ajua moko-  
tenano toro nei Kristo, <sup>10</sup> napano  
naio be parinio ka vite nonovio, a  
naio loa ka moroano dolu nalo. Ana  
ea bajago nene, Atua midu kiano  
tonovo nalo napano kiano ajua ken-  
emiu meuliano nalo, kamiu napano  
kumitua Kristo. <sup>11</sup> Mia bior kamiu  
kumitua Kristo, naio je bulag bajago  
va nalo a jidomiano va nalo den  
kamiu, jibe ka naio mila pakuveu  
ea kamiu, mia maka never paku-  
veu na tomu nalo ajumã amilaio,  
nojo neber pakuveu dolu tai napano  
Kristo naio milaio, jibe ka napano  
naio jo bar bulag vovaiano den ken-  
emiu meuliano nalo. <sup>12</sup> Naruei ka  
bogo napano abar uei ea kamiu,  
jibe ka ga napano Atua jivinko  
kamiu kamliko Kristo, a ka naio mila  
kamiu bunu kumeul bereio kamliko  
Kristo, nina bior kamiu kubarkar  
tiniemiu ea Atua kanano burumara  
moroano napano naio mila Kristo  
meul bereio ea namariano. <sup>13</sup> Ana  
kamiu na, beamu Atua naio mial  
kamiu jibe ka kenemiu kariano nalo  
amila kamiu kumaro ruei. Maka  
kamiu kuve pakuveu tavukia kulo ju  
nalo, mia Atua mial kamiu jibe ka  
kenemiu meuliano maka rive paku-  
veu bunu, jibe ka napano kenemiu  
meuliano maka rijulukon vatitigio  
vo, a bajago va nalo aju kiano ea  
kamiu vo. Mia vonganei, napano  
kamiu kumijuru kamiu bija Kristo,  
Atua jian meuliano vou ban kamiu  
ruei. Kito robokar meuliano vou  
nei bior Atua biekokoa nono kito

bior kiado kariano nalo, <sup>14</sup> a naio miolkon bulag ruei kanado jabue nalo. Beamu, jabue nalo nei ajua niosi napano Atua kanano tuboiano nalo napano kirisikili ajuaio, napano amiadikakar kito m̃ele, mia Atua naio bar bulag vite nalo na bija niosi nene ruei, jibe ka napano naio jukkakar nonovio ea m̃akolkolo naliko Kristo, ana na maka bunu ve jabue nalo nene. <sup>15</sup> Ea m̃akolkolo nei, Kristo jovulu vite jikili dolu nalo, naio mila kokorov siṃaro nalo kialo buriu kouo nalo, jibe ka napano naio jovulu nalo ea buruṃara mira tai, naruei naio mila kiano uolu nalo nene abinimei abe iakurano ea mirado kito tomu nalo, ka mia rosidomii yebekavo re bunu mave ealo.

### *Kristo naio be parinio ka kamiu*

<sup>16</sup> Tibe na, ana mia kamiu kuvijamo re ka toro tai riverbure kamiu river kuvisen re tena p̃eli na kumunu re tena. Mia kamiu kuvijamo re ka toro tai riyuku kamiu ka kuvitakii kialo bajago moruo nalo ea tivelinio na vite nalo tibe legiano lu nalo na yuka, p̃eli na ea tivelinio na jokoluolu na siberio vou, p̃eli na ea tivelinio na bogoti aluo. <sup>17</sup> Tuboiano nalo na jibe na, tomu nalo aber ka ala vonio ka aleal m̃arabo na memedu, mia nalo ajavukia ga vamelu na vite na maka rimaluvo vo, mia burupati riano na vite nonovio nene, naio be Kristo ga. <sup>18</sup> Be tomu tealó ajidomii aber nalo abo loa kamiu, bior nalo ajum̃a amial vite telabo ea kanalo monvoviano nalo, ana nalo ajidomii aber ka amijikia lie vo tivelinio na nailiano nalo. Mia nalo ajidom aber nalo abo, ajum̃a amilakialo jidomiano nalo, jotano dobi, jovulu kulo dolu nalo, mia maka leleio, nalo na ajibe ka sieso. Nalo ajum̃a abarvar ga ka kanalo iliano nalo, napano nalo ga ajum̃a aberii nalo m̃ele bereio, mia kialo jidomiano

nalo bujo ka varvariano ga bija jidomiano kurano dolu nalo, banbano o bokar napano nalo ajum̃a amialo bereio. Jibe na mia kamiu kuvijamo ka re nalo na atibure kamiu aver kamiu maka kuvokar vite nalo napano ajua ruei, <sup>19</sup> bior nalo na ajuvan Kristo ruei, nalo maka bunu avokar vatitig naio sikili rivu napano naio be parinio kalo. Mia Kristo naio jo bitikar batitig ga nalo napano ajibe ka niabene torogio nalo, a naio jo baganlo, jo jelanvuu batitigio ka burubuku nalo a kiano vaiu nalo, naruei tati nei naio mijikia rim̃au rivu a mijikia riluo rivu tibe ka napano Atua naio jidomio.

### *Kuvijev meuliano vou ea Kristo*

<sup>20</sup> Kiniou nemijikia Kiniou nemijikia never ka jibe ka Kristo naio m̃aro nanua ruei, kamiu bunu kum̃aro bija naio, mila napano ea tivelinio na bajago va, kum̃aro eaio ruei, mia maka rimemedu ka bajago va ritokol kenemiu meuliano bereio. Mia Kristo naio buru bulag kamiu ruei bunu den moroano nalo na jukamu na vio yetano nei, bija siṃaro nene nalo. Jibe na naruei ana na nejidom nevika den kamiu, ka: ?Jum̃abe kamiu kumitu kumiel kia ga jibe kamiu kube na vio yetano nei kia ga vo? ?A ka venia ana kamiu kumitum̃a kumonmonea tuboiano moruo napano aberloglogio ka kamiu nua, napano aberenio <sup>21</sup> “Kamiu kuvokar re vite na,” p̃eli na “Kamiu kuviniomo von re tena,” p̃eli na “Kamiu kovitokol re vite na?” <sup>22-23</sup> Naruei be riano ka napano tomu nalo amijog iliano nalo nei, ana na nalo ajidom aber tuboiano nalo na jibe na abe masou bo, mia tuboiano nalo na amiyotuba ea toro ga, maka ave Kristo kiano verloglogiano. Aberiio vite nalo na vio yetano nei ga, jibe kanio siniano, p̃eli vite na munuiano, mia vite nalo na maka ajikia ajai kamiu, a maka ajikia ala bulag kenemiu

meuliano bunu, bior bogo napano komiduoio ħeli na komilaiio, karina abiniuvinuio bereio ruei.

Ĥeli tomu nalo abitiri bulag tuboiano nalo nei ka ala von ka ala iñauano novo nalo tai, napano aberenio toro monoka rivolkouo tibe na ħeli tibe nei, a napano aberenio ka toro monoka rilavon ka rila kiano jidomiano vatove tibe na ħeli tibe nei, a napano aberenio toro monoka rilavon ka telanivuu batitig ka tiniabene tibe na ħeli tibe nei ka vite nalo napano jikili ka naio.

Mia kiniou neberii ka kamiu, ka tuboiano nalo na jibe na, maka leleio ve kanalo moroano ka tokovio ka jidomiano na bova nalo a bajago na bova nalo napano mña ajua toro kanano iviso.

### 3

*Meuliano napano naio meravo a be lu bo*

<sup>1</sup> Kamiu na Atua naio bitiri bulag kamiu kumeul bereio ea namariano bija Kristo, ana tibe na monoka kuvilavio sikili ka kuvan ka vite nalo na vio mave ga, ea vio napano Kristo naio jotano tivelinio vameruo ea Atua. <sup>2</sup> Monokanio mia kuvisidomkar vite nalo na vio na ga, mia kuvisidomi re bunu vite nalo na vio yetano nei, <sup>3</sup> bior jibe ka napano kamiu kuñaro ruei ea naio. Vonganei kenemiu meuliano vou joluku bija Kristo ea Atua, <sup>4</sup> bior ka Kristo naio naruei be burupati na kiado meuliano vonganei, mia iorou kanio, bogo napano mia naio riyotuba ea tomu nalo miralo, mia kito bunu roytuba vija naio ea kanano burumñara mermerano.

*Kenemiu meuliano moruo naio monoka ribisi*

<sup>5</sup> Monoka kamiu kuvuekon bulag bajago nalo na vio yetano den kenemiu meuliano nalo, jibe kanio nasiakaiano, vite nalo na imouiano, nasidomvaiano, natitii kariano nalo, a natitiiiano. Bajago nalo na bova, a natitiiiano jibe na, naio jibe ka

napano toro mila saba nalo na naio jidom mñelealo abinimej jibe ka kanano atua dolu nalo. <sup>6</sup> Bior bajago nalo nei naruei Atua tiniene mimi mñele, ana kanano natibureano jo binimej ea nalo napano maka amonmonea naio. <sup>7</sup> Beamu kenemiu meuliano jibe na naruei, napano kamiu kumituñia kumiel ea bajago nalo na, <sup>8</sup> mia vonganei, be bogo na kuvituvan bajago nalo na, be bogo na abisi ea kenemiu meuliano nalo. Tibe na, ana mia tiniemiu rimimi re, a kuvilvilea re toro dolu, a kuvitu re mña kuve nabilbiluvaiano van kamiu. Mia kamiu kuvil die re a kuvitu re mña kuvila nailimumñiano va ka toro dolu, a kuvila re iliniamiamoiano nalo. <sup>9</sup> Mia kuvituñia kuvila sibilili re kamiu bunu, nina bior kubielar ruei kenemiu bajago moruo napano kumoluo bijaio, <sup>10</sup> mia kuvidu bajago vou tai ea kamiu tibe ka meuliano vou tai napano Atua naio jiio ea kamiu. Mia bogo nonovio, Atua jo mila meuliano na binimej be terivou bereio, ka rila kamiu kuvijikia naio ve riano, a ka rila kumej lie vo tibe ka kube kanano natovorovoiano na naio. <sup>11</sup> Bior vite nalo na, kito maka bunu rejikia retiburevure tomu nalo, ka mia rover tealo abe kulo Ju, mia tealo abe tomu na vio dolu nalo ga, ħeli na tealo abe navakuveuiano, mia tealo maka atibe na, ħeli tomu tealo abe tubo, a tealo abe tomu na iñauano na tubo kiano ga. A maka rejikia rover tom tealo roverinavo aberloglog batitiglo tenene na amijikia vite, a nalo tealo abe kulo yeturu ga napano maka ajikia vite. Mia be burumñara vite tai ga napano mia romijikia rovitii toro kanio, rober naio rimonea Kristo ħeli maka rimoneaio, bior Kristo naio joa vite nonovio a ea tomu nalo nonovio.

*Kamiu kuviya meuliano vou nei ea kamiu*

<sup>12</sup> Mm, jibe ka napano Atua naio jidom mñelea kamiu, ana naio bijauia bulag kamiu ka kuve kanano

kulo lu nalo, monoka kuviya bajago vou nei ea kamiu tibe ka napano naio jidomio. Bajago vou nei jibe ka vite nalo nei ajua kenemiu meuliano, javukia tinieiano ban toro, tinievuiano, navatoveiano, namomavoiano a namelumulumuano. <sup>13</sup> Kamiu monoka kuvitu re tiniemiu rivavavin soĝeli ka kamiu, mia bogo napano verenio kamiu ve juo nene ala titai iviso bure naljuo nei, mia naljuo nei monokanio avieviekokoalo ave juo. Kamiu monoka kuvieviekokoa kamiu, ea bajago na ga mña kido Tubo naio jomña biekokoa kito. <sup>14</sup> Mia vija bajago dolu novo nalo na napano monoka kuviyaio ea kamiu, mia monoka kuviya bunu tinietiano ea kamiu, bior tinietiano naio mijikia rivitirasol batitig bajago novo nalo na mia aimñau bijuviju rivu, ka mia amei ave takurano. <sup>15</sup> Mia tuñaro napano Kristo jianio naio mijikia rivitikar kenemiu iviso nalo, bior Atua naio bio burovuron kamiu kanio mia kumei ve takurano, napano mia kuviniu kuvijurukar rivu vija naio ea tati ve takurano napano naio be parinio kanio, ka mia tuñaro neibano naio mijikia to vija kamiu. Ana bogo nonovio kamiu kuver siva ka vite nonovio nalo.

<sup>16</sup> Mia bogo nonovio Kristo kanano iliano novo nalo monoka ameul ea kenemiu iviso nalo, bior kiano iliano nalo abo tanea. Kamiu monoka kuvitu kuverloglog kamiu ka naio, mia kamiu ga kuvitu kuvuriri kamiu bereio ea kenemiu mñasosouano novo nalo. Bo ka kuvitu kuviou van Atua ea Iouano nalo, a iouano lu nalo, a iou nalo na vameneano ban Atua, ka napano ea bogo na kumituña kumiou jibe na, mia kenemiu iviso nalo avujo lou ka sivaiano vanio. <sup>17</sup> Mia vite nonovio napano kumilaio, mia iliano nonovio napano kuberenio, mia monokanio kuvilaio ea Yesu kanado Tubo siano, mia bogo nonovio monoka kuver siva sel ea

naio van Atua karamñado.

*Tomu nalo kialo meuliano vou*

<sup>18</sup> Kamiu tire nalo na mña kumisoro, monoka kuvatove ga ka kouemiu nalo, tibe na kanio mia rimemedu ka tira napano naio be namoneano naio milaio.

<sup>19</sup> Mia kamiu sumñano nalo na mña kumisoro, monoka tiniemiu riia tanea kouemiu nalo, mia kuvila re kenemiu bajago nalo ajea mñele vanlo bogo nonovio.

<sup>20</sup> Kamiu kalse nalo, monokanio mia kuvijogkar karamemiu a koniomiu nalo, bior kanado Tubo naio jaaro ka bajago na.

<sup>21</sup> Mia kamiu teta nalo a nena nalo mia tiniemiu nalo avilulu re van kenerimiu nalo tulaka, bior ver kuvila tibe na, ala lelanlo, ala kialo jidomiano nalo atibirbili.

*Tubo nalo a kialo tomu na imñauano nalo*

<sup>22</sup> Kamiu tomu nalo na mña kumimñau tubo nalo kanalo, ea bogo nonovio monoka kuvidu kenemiu tomu na tortoru nalo nei niolo. Mia kuvila re tibe na ga ea bogo napano nalo aju bija kamiu, ka mia kuvilavon ka mia nalo asaaro ka kamiu, mia bogo nonovio monoka kuvimñauka mia kenemiu jidomiano nalo ave riano batitigio, tavukia napano ea imñauano na kumitu kumitovon kanado Tubo julaka. <sup>23</sup> Ea imñauano vaio napano kumituña kumimñaukanio, monoka kuvilaio napano mia kuvisaaro kanio, tavukia napano kumituña kumimñau Tubo kanano, mia ka re tomu nalo ga.

<sup>24</sup> Bo ka mia tiniemiu rimaio ka Tubo nei naruei mia naio sian kiano jajumñano van kamiu, tibe kanio kenemiu vuliano, bior toro na toru riano napano kumimñau eaio, naio be Tubo Kristo. <sup>25</sup> Mia toro napano naio jomña mila maka rimemedu, mia naio rivar meran bereio rimemedu takii kanano vijuku vovaiano nalo, bior Atua naio bitii tomu nalo nonovio kanalo imñauano ga memedu.

## 4

<sup>1</sup> Mia kamiu tomu nalo na toru, kamiu bunu monoka kuvila rimemedu rivu van tomu nalo napano ma aju aminau kenemiu, bior kamiu bunu kenemiu Tubo na toru tai joa vio mave napano mia naio tibure kenemiu bajago nalo.

### *Pol berloglog nalo*

<sup>2</sup> Kamiu kuvisikili ka volkouano bogo nonovio, mia monoka kubolkouo napano mia kuvisidomii vatitig vite nalo ka kuverenio ea volkouano, a ka mia kenemiu iviso river sivaiano van Atua. <sup>3</sup> Kiniou nejidom bunu ka monoka kubolkouo ka kumemi, ka mia Atua naio rivetavo ea marabo ka numijikia nuviololu ka vite novo nei napano beamu naio joluku, napano Kristo kiano iliano, napano vonganei no-joa nalakoiano biorio. <sup>4</sup> Neber bo, nejidom bunu ka kubolkouo ka mia nemijikia neil rivu, ka mia rila iliano nalo nei rimeravo, rimemedu tibe ka ga na mia monokanio nalaio. <sup>5</sup> Ea bajago nalo na ma kumituma kumilaio ea tomu nalo miralo napano maka amonea Kristo, monoka kuve masou rivu ka kuvitakii kenemiu buluvio nalo, ka mia kuvurulo amei ea Kristo. <sup>6</sup> Monoka kuvil rivu vijalo, ea iliano nalo napano ga be nailitinevuiano a ajese bo, ana mia ajog rivu ka iliano nalo nene, a monoka kuvijikia marabo ka kuvisian verdopeiano vanlo napano avika vikadeniano ninio ea tivelinio na kenemiu viekouoiano.

### *Pol miila tomu juo aban keanlo*

<sup>7-8</sup> Kuruado novo nei Tikikas napano naio jo bija kiniou, mia neiila naio rudu mesi nei riviedu kean kamiu ka naio riverial ka kumemi numitu jumabe, ka kumijikia kuvijog rivu. Kiniou najaaro toru ka kuruado nei, ka napano bogo nonovio naio jikili ka mijai kiniou ea Tubo kanano imauano. <sup>9</sup> Mia kuruado dolu nei napano kiado bilbilu novo

nei Onesimas, mia naio bunu takisor Tikikas riviedu kean kamiu. Onesimas, naio be kamiu tai na kenemiu vio, a naio bunu joma monea Kristo. Mia naljuo averial van kamiu vite nalo napano amalmaluvo ea vio nei.

### *Pol kanano ilimaariano banlo*

<sup>10-11</sup> Arestakas napano naio joa yimo na nalakoiano bija kiniou, a toro napano Mak napano naio be Barnabas kuruano, a Jisas napano abio naio ka Jastas, nalo tolu aberinavo aju ajidomial kamiu toru. Mak nei, kubokar iliano ea tivelinio ka naio ruei, ka ver naio riviedu sel ea kenemiu vio mia monoka kuvisaaro ka kuvuru naio tusol kamiu.

Ea kulo Israel nalo napano amonea Kristo ruei, nalo tolu nei ga naliko kiniou kumemi numimauka imauano nalo na Atua kanano navenatuboiano, mia nalo tolu nei nalo ajidel ka amijai kiniou toru laka ea bogo na jikirkili nalo.

<sup>12</sup> Epavras nei napano naio bunu be kamiu tai, naio be toro vu tai na imau Kristo Yesu kanano, a naio bunu berenio kavijo bo a bogiano bo ban kamiu, berenio bogo nonovio naio joma bolkouo jikili damariga bior kamiu, ka kumijikia kuvitu sikili, ka kumeruo rivu tibe ka siyovo ea Kristo, a ka kuvitu sikili ka kuvila ga vite nalo napano Atua naio jidomio. <sup>13</sup> Kiniou nejidom never rimemedu ka kamiu ka toro neibano Epavras jo imau jikili laka bior kamiu, a kulo Leotesia a kulo Ierapolisi bunu. <sup>14</sup> Kiado bilbilu novo nei, nakulekuleano nei Luka, bija kuruado dolu nei Timas, naljuo bunu aju aberenio naljuo aju ajidomii bijon kamiu toru laka.

<sup>15</sup> Kiniou nejidom kamiu kuvisian lilian kanaku iliano riva van kuruado a kuviviniedo nalo napano ajua Leotesia, vija tira napano Nemeva naliko bagaro na namoneano nalo napano aju abior ea kunuano, ka kiniou nojo nejidomiilo toru laka.

**4:1** Eves 6:9, 5:16    **4:5** Eves 5:16    **4:7-8** Inauo 20:4; 2Timo 4:12    **4:9** Vaili 1:10-12    **4:10-11** Inauo 19:29, 27:2; Vaili 1:24, Inauo 12:12,25, 13:13, 15:37-39    **4:12** Kolo 1:7; Vaili 1:23    **4:14** 2Timo 4:11; Vaili 1:24, 2Timo 4:10; Vaili 1:24

<sup>16</sup> A mia bogoti napano kamiu kuvuluku kanaku m̃esi nei ribisi, ana neber bo, kamiu kuvituvan rivan ea kulo Leotesia, ka mia avulukuio van bagaro na namoneano nalo ea vio na, a kamiu monoka kuvuluku kanaku m̃esi dolu bunu napano nalo na vio Leotesia atuvan rimei rivan kamiu. <sup>17</sup> Mia kanaku iliano tai ba ban Akipas, neberenio “Jau kovitkar vatitig rivu iñauano napano Tubo miduio joa jum̃amo, koim̃auka nonovio batitig garuei.”

<sup>18</sup> Mia vonganei, kiniou nodular vovojulu den toro nam̃a jo bivitauia m̃esi, naruei kiniou Pol nejirii kanaku iliano na maaro biedu ban kamiu ka jum̃aku ga, neber kavijo bo p̃eli na bogiano bo ban kamiu. Kamiu tiniemiu ribobogia re marimieni nalo na amiadikar kiniou kanio, mia Atua kanano tiniamemiano naio to vija kamiu nonovio.

Kiniou, Pol.

**Mesi Moti Napano Pol  
Bivitauiaio  
Ban Namoneano Lu  
Nalo Na  
TESALONAIKA  
Verialiano Moti**

*Tukunuano bulati na niosi nei*

Bulukomeli nei Tesalonaika be parinio komeli na tanobuku na Masetonia, napano jo yetano ka Parinio Tubo na Romo nua. Bogo na Pol jalivo yako Vilipae, naio ban yako Tesalonaika berial ioluano vou ea vio na, naruei yimo lu jikario ea vio na. Mia iorou maka vesiou, taara na Israel tealo amilkuei naio. Nalo amijalukua naio bior napano amial ka tomu miroano na maka ave taara na Israel, napano beamu aju amiagago ka kialo ver-loglogiano nalo, amijog ioluano vou napano Pol berialio, ana amonea Yesu.

Naruei taara nalo na Israel nei tiniel jer Pol, a amijilario ea vio nei, ana naio ban ea bulukomeli nei Berea. Iorou, naio ba boru yetano Korin, naio mijog verioiano na namoneano nalo na Tesalonaika ea kiano bilbilu Timoti, napano jo miñau bija naio.

Naruei Pol jiri mēsi nei beamu ba ban namoneano nalo na Tesalonaika ka ridular kialo jidomiano, a ka verial van namoneano nalo na vio na ka naio jo jidomiilo, a Atua jo bijalo. Naio ber siva ban Atua bior napano mijog ka aju amonea Atua kirisikili, a aju tiniel miia tomu nalo, a ber kalo ka asidomii bereio kiano bajago novo ea bogo na naio jo bijalo.

Mia naio berdoŕe kialo vikadeniano nalo napano abika denio, aber mia Yesu rimei bereio tumābe. Nalo ajidom aialio ka toro napano m̄aro beamu be Yesu maka rimei bereio vo, mia mijikia rivokar meuliano napano maka rijikia bisi, ŕelina makanio. Mia ajidom ajikia ka mia Yesu rimei bereio ea bogo vaio. Mia

Pol ber vatitigio banlo, ber monoka aiñau jaka, ka kialo jidomiano ju jurmaro, a ka aburu kialo jidomiano ju jikili ea Yesu ka aturorea naio vano-o naio mia rimei bereio.

*Torogio nalo na niosi nei*

Iliano moti 1:1

Pol jaaro kalo bija ber sivaiano ban Atua bior nalo 1:2—3:13

Pol berlogloglo ka Namoneano kiano bajago 4:1-12

Pol berlogloglo ka mia Kristo rimei bereio 4:13—5:11

Pol mila nonovio kiano verloglogiano 5:12-22

Iliano maariano 5:23-28

*Iliano na be moti*

<sup>1</sup> Kiniou Pol bija Sailas a Timoti, kumemi tolu numisaaro laka ka nuvivitauia niosi nei riviedu ea kamiu taara na namoneano na ea komeli na Tesalonaika. Kumemi numonea ka kenemiu meuliano nalo aju vatitig ea karamādo Atua bija kiado Tubo Yesu Kristo, naruei kumemi nubolkouo ka tiniememiano a tumāroano to vija kamiu nonovio.

*Pol nalo ajaaro bior viekouoiano novo na kulo Tesalonaika nalo kialo*

<sup>2</sup> Nao, bogo nonovio kumemi numitu nubolkouo ban Teta Atua, monoka nuver siva van naio rivior kamiu.

<sup>3</sup> Kumemi numitu tiniememi maio ka kamiu ea kenememi volkouano jibe nei, maka nuvijikia tiniememi ribobogia kenemiu moneano, napano kumiñau jikili jakiiio, a napano kenemiu tinietiiano, jo miyoyotuba ea kenemiu bajago novo nalo, a napano kenemiu jidomiano tebievi, naio mila kamiu kumitu jikili batitig ea kiado Tubo Yesu Kristo.

<sup>4</sup> Banalo, kumemi numijikia ruei ka Atua naio maka tinientii ga kamiu, a naio bijauia bulag kamiu bunu ka kamiu kuve kanano riano, <sup>5</sup> bior bogo napano kumemi numiololu nuber lilianiano vou na bo ka kamiu, naio maka tibe toro kiano iliano kurano, a naio binimei ea

kamiu jibe iliano na temi tai na jikili. Sikiliano na Niununo Lu kiano joaio, a naio julio kenemiu iviso rivinvano-o kamiu kumoneaio.

Kumijikia kenememi bajago nalo bogo na numitu bija kamiu, numijog bin laka ka nuviñauka saba nalo riviniu nina numijikia nuviñaukanio ka rijikia rijai kamiu ka kumonea, <sup>6</sup> a iorou, kamiu kuvivevio, kumei tibe ka kenememi natakisoriano nalo, a maka ve tena ga kenememi, mia kumei kuve Tubo kiano natakisoriano nalo. Bekurano ka ver nalo dolu amila burumñara jaleleano ban kamiu a ajian bogokouo laka ban kamiu ka bogo nei, a mia kumila borvorua ka ioluano, naruei Niununo Lu midu kiano burumñara saariano joa kamiu. <sup>7</sup> Ea kenemiu bajago novo nalo na, maka kumisidomii vovaiano nalo, kuvitu kamu ka kuburu mñarabo ka namoneano dolu nalo ea tanobuku na Masetonia a Kris. <sup>8</sup> Tubo kiano lilianiano vou nabo naio jo jaluvo ea kamiu bano, maka ea vio juo nei ga, a ea vio dolu nalo na laka bunu, mila tomu nalo amijog kenemiu viekouoiano ea Atua ruei.

Nina naio bo laka, a vonganei jibe ka ea vio be na nuvan ea bereio, a maka bunu kenememi titai ka nuvijikia nuver kalo, bior ka napano iliano nonovio biedu ea kamiu ruei ba bokar nalo ruei. <sup>9</sup> Kumemi maka bunu nuvitukunu rivankulo dolu nalo na, mia nalo ajukunu binimeii ban kumemi bereio, ajukunu jumñabe ka napano kamiu na vio Tesalonaika kuburu kumemi numitu bija kamiu, a jumñabe na kubilig kamiu, kubuku bulag kenemiu tavoru nalo na mñarmñaro, kumei tibe tomu nalo na Atua na meul riano kiano. <sup>10</sup> A bija nina, nalo aju ajukunu bunu napano kumitu jikili, kuvitu rorea Atua kenerinio nei, Yesu. Naio riyotuba ka kito bereio, bior napano Atua bitiri lario meul bereio ea namñariano ruei, a mia naio riila riyotuba bogo ve valuo nene, ka naio toko kito ka bogo na

tibureiano.

## 2

*Pol jukunu ka kiano imñauano, bogo napano jo Tesalonaika*

<sup>1</sup> Banalo, kumemi numijog iliano tai aber numimñau kirivova, mia be tinieku ka kubitilubar ka kenememi yaduiano ea kamiu bar mñarati mo-roano na bo. <sup>2</sup> Beamu laka, bogo na numitu numimñau Vilipai, nalo aju amil bova jibe na ka kumemi ruei, aju amila bulag laka kumemi, a jibe na kumijikia ruei, bogo na numiyotuba ea kamiu, nalo amil ea kumemi laka bereio bunu. A numial ka Atua naio jo mija kumemi, naruei maka bunu numerou ka vovaiano, numimñau dolu ka ga ka nuverial kiano lilianiano vou nei van kamiu. <sup>3</sup> Kumemi numiololu ban kamiu, a nemijikia never ka kiano iliano nalo maka tibe tomu nalo tai na aju aber. Nalo maka ayotuba ea kenememi labeleiano tai ga, ðeli ea kenememi jidomiano va tai, a naio maka ve titai na kumemi nuvilavon nuvatete ka kamiu, maka leleio.

<sup>4</sup> Maka lele tibe na, a ea bogo nei, kumemi numitibe ka tomu nalo na Atua bitiri bulag kumemi, naio midu kiano lilianiano vou na joa jumememi, ana nubinimeii nuberial kiano iliano riano ban kamiu. Kumemi maka nuviñau ka tomu nalo aial kumemi tumñabe, a numisidom ga ka Atua rijikia saaro ka venia na numila, bior naio ga mijikia rivitii venia na joa kiado iviso terakurano. <sup>5</sup> Kamiu kumijikia batitigio ka maka numei ka nuvuku iliseseiano ðeli na ilivevaviniano ka kamiu, a Atua mijikia batitigio bunu ka maka tiniememi ka kenemiu saba nalo, ðeli nuvila sibilili kamiu kanio. <sup>6</sup> A ea bogo na bunu, maka lele kenememi jidomiano tai ka rila kamiu ðeli tomu dolu nalo kuvidular siememi mave.

<sup>7</sup> Be riano ka kumemi numaluvo ea kamiu jibe naiagagoano na Kristo kiano, na ðeli memedu ga ka

kuvila saba ve miroano ka kuvitkar kumemi, a maka numisidomial saba nalo na. Nubinimej numidomdom ga, numila ka kamiu jibe nena tai bagan kenerinio domdomu. <sup>8</sup> Kumemi numisaaro mēle ka kamiu jibe na, numisidom mēle ka nuververial Atua kiano lilianiano vou na ka kamiu, a numijog numisidom mēlea kamiu, banbano numitumā numijamo ka kenememi meuliano ka nuvijai kenemiu meuliano nalo.

<sup>9</sup> Banalo, neber jibe na maka nalsibi, bior kumijikia jumābe numinonou ka imāuano nalo na jikili ka jumememi ka bogo na. Kumemi numimāu legiano a bogiano, ka rila bogo na kumemi nuvitu vija kamiu ka nuvioliolu ka lilianiano vou na Atua kiano, maka numila ve temi van kamiu. Kumemi ga numitumā nubitkar kumemi, maka bunu kam tai bereio vitikar kumemi leleio.

<sup>10</sup> Kumemi numisidomii ka ea miremiu, a ea Atua mirano, numijikia nuverial ka ea bogo na numitu iviso ka kamiu na moneano nalo, maka lele titai rivova ka kumemi kenememi meuliano memedu ga, a be lu vatitigio. <sup>11</sup> Peli kamiu kumitu kumisidomii kia ga, napano numila ka kamiu jibe teta tai napano jo mila batitig laka ka rijai vatitig kenerinio nalo kialo meuliano. <sup>12</sup> Kumemi numila kenemiu iviso nalo melumu bo, nubar iliano nalo na ilivituniano ban kamiu, a numidular kenemiu jidomiano bavin ka monoka kuvila kenemiu meuliano rimej rimemedu rivu ea kiado Atua kiano bajago, na naio naruei bio kamiu ka kumei jouro ea miamoiano na bo ea kiano navenatuboiano.

<sup>13</sup> Titai dolu bunu nuber siva ban Atua bogo nonovio biorio, naina kenemiu bajago na bogo na lilianiano miyotuba ea kamiu. Kumijog, a maka lele kuvukulario ka kuvertoro ga kiano iliano, a kumitu kubitii kuber be riano, be Atua kiano iliano memedu. Mia kamiu na kumonea, kubetavo ea kenemiu iviso ka mia

naio to rimāu ea kenemiu meuliano rivokar banei.

<sup>14</sup> Kuruaku a kuvivinieku nalo, nemi-jikia ka iorou ka kumonea, maka vesiou tomu nalo na kenemiu vio bereio ga ajumolu amila bova ban kamiu, kubiviuo bogokouo laka. Jibe na bova, a ea vio nei kuvitu kuviel ea mārabo na ga moneano na Yesu Kristo kiano nalo na ea Atua kiano yimo lu nalo na ea tanobuku na Yutea nalo amiel ea nua ruei. Nalo bunu, bogo na amoneaio, ana kulo Ju nalo aju amila bulaglo toru laka! <sup>15</sup> A bajago na, Ju nalo aju amila nua ruei binimej. Beamu, maka asidom naverialiano nalo, a iorou, nalo naruei amila amuebin kiado Tubo Yesu mārō, a nalo bunu ga na aju amijil kumemi bogo miroano ruei. Saba nalo na aju amila na, Atua maka tiniene saaro kalo leleio, ka nalo aju amilkuei bogo nonovio ga. <sup>16</sup> Kumemi numitu numioliolu ka lilianiano vou na ban tomu nalo dolu na maka ave Ju, be iakurano ka be bogo ka ajikia ala vatitigio kialo meuliano, a Ju nalo nene aju amila vonvon ka atukovio ga ka kumemi, maka asidom ka nuverial kalo.

Kialo bajago va nei misonson bavin laka bija kialo kariano na amila nua ruei binimej, mila vonganai kialo vovaiano bavin jovulu laka. Amila jibe na banbano-o maka asidomial titai, a remijikia ka Atua kiano tiniemimiano bujo jo binimej kalo ruei.

*Pol jidomii toru laka ka rial lo ve vaarakurano bereio*

<sup>17</sup> Banalo, kumemi numisidom nuverial ka kamiu, numituvan kamiu bogo nua ga na, nubano teliki ga, nuber aua toru ka kamiu, numisidom nuvial miremiu bereio. Be riano ka robeve terakurano ka mokotenado, a ea kiado iviso, kito roju robe takurano ga. <sup>18</sup> Kumemi numitu jibe nei, numisidom ka nuvial mārabo ka nuvedu nuvial kamiu bereio, a kinio Pol nojo nomilavon vatelabo

laka, mia toro va nei Sim̃aro, naio jo jokoko vio julaka ga. <sup>19</sup> Ana ka venia numisidom laka ka nuvial bereio kamiu? Nina ka kei bereio numijikia nuvar tiniememi ealo? Kei bereio na mijikia rila kumemi nuvisaaro? Kei bereio nalo abe m̃arati na bo na kenememi iñauano, napano nuvijog rivu kanio ea bogo na kiado Tubo Yesu riyotuba bereio? Maka toro dolu tai, mia kamiu na ga! <sup>20</sup> Be riano, kamiu jibe ka kenememi jidomiano na sereano novo tai napano numitovulio, kubinimej jibe buruñara burupati na jogvuiano na meuliano na kenememi.

### 3

*Pol beriio juñabe miila Timoti ba miyotuba kalo beamu ruei*

<sup>1</sup> Kumemi numitu tiniememi maio ka kamiu jibe nei banbano, numial jibe maka, kumemi tai monoka riviedu riyotuba ka kamiu bereio. Ana nuber mia monoka kumemi juo Sailas numitu Atenisi beamu vo, <sup>2</sup> mia Timoti mijikia riviedu bereio ea kamiu. Kuruado nene, kumemi numiñau Atua kiano vio takurano bija naio, ka rila lilianiano vou na Kristo kiano rivanvano-o tavio, ana namial jibe naio be toro na bo tai ka riyotuba ea kamiu. Namijikia ka mia naio mijikia riilikakar kamiu, a mia mijikia rijai kamiu ka kenemiu moneano to sikili bogo nonovio, <sup>3</sup> ka mia maka kuvijikia kumermerou laka ka bogokouo nalo na kumitu kubiviuo. Bogo kouo nalo jibe na, remijikia batitig ka abe togio tai na kiado meuliano kito namoneano nalo na maka rejikia rataluvo denio.

<sup>4</sup> A verver kumitu tiniemiu maio ka kia ga vo, kumijikia bogo na kumemi numitu bija kamiu, numitu nuberial bogo nonovio ka kamiu nuber numial ruei ka mia vesiou re, ana mia monoka ala vova ka kito. A vonganei, tenalo nei miyotuba jibe na ga ruei, na kamiu naruei kumitu kubokar toru laka.

<sup>5</sup> Nina naruei mila nomijog ka maka nejikia noto tibe na ga, a monoka nala titai ka nojog iliano tai river kumitu juñabe. Kiniou nemerou kija ka toro va na rila vonvon toro nei, p̃eli naio mial kiano m̃arabo tai ka rila kamiu kuvijoru ruei, mia nojidom nojog kamiu kumitu jikili kia ga vo p̃eli na juñabe, bior maka rivu ka kenememi iñauano novo nalo napano ea kamiu rimei rive iakurano bereio. Jibe na naruei, nomiila Timoti biedu.

*Timoti binimej bereio ea Pol bija veriiano novo nalo na ea tivelinio na kulo Tesalonaika nalo*

<sup>6</sup> Timoti biedu mial kamiu, a vonganei ga naio binimej bokar kumemi. Bogo na binimej, bar iliano nalo na bo laka, berial juñabe kenemiu moneano bija bajago na tinietiano na kenemiu jo kia ga toru, ju bo ga ju, ana mila tinieku jaaro toru laka. Naio midu kenemiu iliano binimej ban kumemi, ka kumitu tiniemiu maio ka kumemi julaka, a kumisidom m̃ele ka kuvial mirememi bereio, jibe ka ga kumemi numisidom nuvial miremiu. <sup>7</sup> Mia be iakurano ka numitu numijog jaleleano laka ea vio nei ka tenalo na bova amila ka kumemi, mia bogo na numijog lilianiano na kenemiu moneano kuruememi nalo, numijog jibe midular kenememi jidomiano bereio. <sup>8</sup> Kumemi numijog ka kumitu jikili bija Tubo, ana mila jibe na numijog jibe numeul vatitigio bereio.

<sup>9</sup> Bogo na numitu nubolkouo ka kamiu, numial jibe maka kumemi nuvila titai na bo laka ka kamiu, a kamiu naruei kumitu kumila tena bo tai ka kumemi, bior kumila kumemi nubar jogvuiano ea kenememi iviso, banbano kumemi maka bunu iliano vare ka nuver siva van Atua kanio. <sup>10</sup> Naruei mila numitu numisidom laka ka nubolkouo legiano a bogiano, ka verver nuvijikia nuvial kamiu bereio ga, ver vio tai na kenemiu moneano mijoru

eaio kija ga, nina mia numisaaro laka ka nuviija ka rimei to sikili vatitigio bogo nonovio.

<sup>11</sup> Nina naruei be tena nojo nobolkouo jikili kanio vonganei, ka mia karamãado Teta Atua bija kiado Tubo Yesu, nalo avetavo ea m̃arabo ka kumemi ka numei bereio nuviakamiu. <sup>12</sup> Bano bokar bogo na, nojo nobolkouo ban Tubo, nebika ka mia naio rila kenemiu tinietiiano to riluo rivan tibe nei, rison vatitig kenemiu meuliano rivanvano-o rivokar bunu tomu nalo dolu, rimei ve toru laka rive verare ka kenememi tinietiiano ea kamiu.

<sup>13</sup> A bija nina, nobolkouo ka mia naio ridu jidomiano tai na bo a jikili vatitig ea kamiu, ka kuvijikia kuvokar vatitig kenemiu meuliano nalo vanvano vokar bogo na kiado Tubo Yesu riyotuba vija kiano kulo lu nalo, ana bogo na mia kuvijikia kuvisikili kuvitu ea Atua Karamãado mirano na kamiu kumeravo rivu, kube lu vatitigio ga kumitu.

## 4

### *Bajago na meuliano napano Atua naio jidomio*

<sup>1</sup> Banalo, bogo na numitu bija kamiu, kumemi nuberloglog vatitig kamiu juñabe ka kuviluo lie ea bajago na meuliano na Atua naio jidomio, a numitu numijog kumila kija ruei, naio bo laka. A ea Tubo Yesu siano, nubika numisikili den kamiu ka kuvitu van re, kuvitu kuvijedu ka rila rivan lie bogo nonovio. <sup>2</sup> Tubo Yesu midu kiano verloglogiano nalo joa jumememi ka nuverial ka kamiu, mia kumijikia batitiglo ruei. Tibe na, bo ka kuvitakii.

<sup>3</sup> Bo ga, ninei naruei saba tealo napano Atua jidom kiano tomu nalo monoka alaio. Kiado meuliano monoka ve lu rivu, jibe monoka rala re bajago na bova ea tivelinio na sumãano bija tira. <sup>4</sup> Kito nonovio monoka retakisor vatitig m̃arabo na memedu na soriano, ka toro rijikia to vija koano tira memedu ea bajago

na meravo bo, na maka rijikia rila bulag nalo ve juo sialo bereio. <sup>5</sup> Jibe na, bova ka toro soro soḡeli, jakiiio kiano tinietiiano jikili ea tira ga, bior nina naio be bajago tai na tomu nalo na melijokouo ga, napano maka ajikia Atua leleio.

<sup>6</sup> Verenio tomu nalo na aju amila bajago na bo laka bogo nonovio ea vio nei, mia bo laka, ka mia nalo maka avina ala bulag re saba novo na kurualo kialo. Kamiu monoka kuvitilubar vio na, ka Atua jo midu vironiano bogo nonovio ban tomu nalo na amijoru ea kariano kinkin nalo jibe nei, jibe na nuberial ban kamiu bija iliano tiniemaiano na jikili ruei.

<sup>7</sup> Kuvilavon ka kuvisidomii ninei vonio. Bogo na Atua rivio kito ka rove kiano tomu nalo, naio maka la ka kiado meuliano rimei rivujo ka bajago nalo na maka rimeravo, a naio mila ka kiado meuliano rimei rivujo ka bajago nalo na be lu vatitigio. <sup>8</sup> Tibe na, toro napano maka tinien saaro ka verloglogiano nalo nei, naio monoka rivitilubarario ka maka toro kiano iliano ga na naio jo bukular, a naio jo bukular Atua kiano iliano ga na, nina napano midu kiano Niununo joa kito, napano naio be Niununo napano be Lu.

<sup>9</sup> Titai bereio napano nojidom neveriio ka kamiu, kito namoneano nalo kiado bajago, napano monoka rosidom kito tibe na robe m̃aratavo takurano ga. Tena kumijikia vatitigio ruei, maka tena ka nevivitauiabulagio bereio van kamiu, bior Atua naio berloglog kito robiniu ruei ber nina naio be tena bo tai na bo kirinovo laka. <sup>10</sup> Nemijikia ka kumitu kumila jibe na ruei ka namoneano nalo na Masetonia bo laka, a nojidom never bereio, ka kuvokar vatitig bajago na bo nei, kuvila rimei ve toru lie iviso ka kamiu.

<sup>11</sup> Vonganei nojidom nevivitauiasaba nalo tealo bereio na bo ka kuvisikili ka kuvilaio. Na beamu, jau katanea re vio, jau koto melumu

ga damãariga. Juo nene, koyuku re sunumo rivan ea re toro dolu kiano burusio, a kovitii ga kiamo meuliano. A tai bereio, koyovo re, a koiñauka kiamo iñauano na joa jumãamo sikili rivu, tibe ka na nuberial ka kamiu nanua ruei. <sup>12</sup> Verver kala tibe na ea kiamo meuliano bogo nonovio, mia nalo dolu napano maka amonea, nalo amijikia avitii vatitigso, avitilubarario napano maka nalo dolu ka abitikarso, mia jau ga kojomãa kobitkar vatitigso.

### *Tube kiano liliuano*

<sup>13</sup> Mia banalo, nemial bo ka kuvijikia kija saba nalo tealó ea tivelinio na nalo na kito na amonmelio ruei, jibe abano kovio ea yetemeriba. Tomu nalo telabo na maka ave namoneano, amerou laka ka mãariano, aber ðeli tomu nalo abano kovio mia rivova laka ka nalo, ana mila ka bogo na nalo tai bakovio, nalo ajegi toru kanio.

<sup>14</sup> A kito maka tibe na, bior romonea ka iorou ka Yesu naio mãaro ea mãakolkolo, naio jumolu meul bereio, a ea bajago na naruei, kito na romonea bunu ka nalo na abinimej takurano bija naio amãarmãaro, mia Atua naio rilalo amei ave takurano vija naio ameul bereio, a mia amei bereio vijaio.

<sup>15</sup> Nemijikia never riano ka kamiu, ka iliano tai na Tube ga naio berenio nua, kito na roju remeul kia ga rivokar bogo na naio mia rimej bereio, kito maka rejikia ravavin beamu ka nalo na abano kovio ruei. <sup>16</sup> Makanio, a venia mia rimoluo ea bogo na jibe na. Mia parinio nailiano na tiniabene rivio souo vija verialiano tai na toru, a mia Atua kiano simeduo riolu, a mia kiado Tube taluvo ea tiniabene mave rivatove nei. Naio rivatove, mia namoneano nalo na amãarmãaro aju, mia atumormolu bereio beamu. <sup>17</sup> Iorou ana mia kito na remeul roju kia ea vio yetano, mia naio rivuru kito bunu ravavin mave vija nalo roviniu, ravan bure melijo nalo

na mave ea tiniabene, ravan roviviuo kiado Tube mave ea vio yauo. Rovan tibe nei, a mia rotu vija naio maka rijikia ribisi bogo tai.

<sup>18</sup> Verikariano na bo laka, mia bo ka kito rotu reijaja kito bogo nonovio ea jidomiano novo nalo nei.

## 5

### *Kito monoka rotevijo rotu batitigio, vesiou re ga naio rimej*

<sup>1</sup> Banalo, nemijikia ka tomu miroano nalo ajidom ajikia ka saba nalo nei mia riyotuba ea bogoti vabe, ðeli ea bogo venia. A nina maka kiaku ka novivitau kanio van kamiu na, <sup>2</sup> bior kumijikia ruei ka tena maka toro kiano ka rijikiaio. Mia tibe ka ga toro na vinauano mila kiano iñauano bogiano. Naio maka rijikia verial beamu bogo venia ana mia naio riyotuba!

<sup>3</sup> Vede naio rimej ea bogo tai na tomu nalo aju aberver kalo, aberinavo “O, vonganei be bogo na tuñaro ruei” ðeli aber “O, vonganei rojua bogo tai na bo!” Nalo maka ajikia, ana tenej jibe tira tai na vaarakurano ga mijog ka mia kenerinio rimoluo naruei. Mia bogo na naio rimej bereio mia tibe ka ga, napano tomu nalo amiilo kanio, maka asidomii, mia burumãara bogo na jaleleano riyotuba kalo, nina maka ajikia avuro den leleio.

<sup>4</sup> A kamiu bilbilu nalo, maka bunu kuvitua melijokouo, a ver bogo na toru nei riyotuba, neber ðeli mia kuvijikia kuviilo kanio re, jibe ka naio be toro na vinauano tai binimej ka kenemiu saba nalo. <sup>5</sup> Kito maka bunu rove tomu na melijokouo na bogiano, a rove tomu na miamoiano na legiano ruei. <sup>6</sup> Tibe na naruei, mia kiado jidomiano ritevijo vatitigio rivu bogo nonovio, rovokar vatitig rivu kiado meuliano, ka rotibe ka re tomu nalo dolu na melijokouo. <sup>7</sup> Iñauano nalo na aju amimãaukanio, aju amun uei amun banbano-o muelo, karina

aju ga amonmonmelio ga, <sup>8</sup> a kito na miamoiano, monoka rala kiano inãauano rimemedu. Mia kito rala kiado meuliano rimemedu rivu, mia reiako niabedo ea bajago na viekouoiano a bajago na tinietiano, a rosovko parido ea moneano na jikili, ber ka mia Atua monoka rilarrur kito.

<sup>9</sup> Nina maka rivu ka kiado jidomiano veve juo ka mia Atua rilarrur kito, ðeli mia rilarrur re kito, bior ka maka kiano jidomiano ka kiano moneano nalo mia avokar vironiano, a naio bijauia kito ruei ka rovokar ioruriano napano Tubo Yesu Kristo naio jovulu be kiado. <sup>10</sup> Naio ñaro kar kito, mila ka ver bogo na naio rimei bereio, be iakurano napano romonmelio, jibe na rabakovio ruei, ðeli rotu rotevijo, tibe na romeul keano roju, a kiado meuliano mia to vatitigio vija naio bogo nonovio.

<sup>11</sup> Iliano nalo na naruei bo ka kuvitu kuverver ka ridular kenemiu jidomiano mave, kuvitu kuvijaija kamiu ka kuvinãauka kenemiu moneano rimei sikili rivu, tibe napano nemijikia ka kumituña kumila ruei.

### *Iliano na maaro*

<sup>12</sup> Banalo, nojidom nevika kamiu bunu ka kuvisikili kuvitilubar vatitig nalo na aminau ñele ka inãauano na Tubo kiano iviso ka kamiu. Nina bior napano naio midulo aju ka aje tuboiano van kamiu, averloglog kamiu. Kamiu monoka kuvamenealo rivu, <sup>13</sup> a kuvidulo atu mave ea kenemiu jidomiano, tiniemiu tiilo, ka inãauano na nalo aju aminaukano. A bunu, kuvitu re kuvila baravo, a monoka tiniemiu memi ka kamiu bogo nonovio.

<sup>14</sup> Nebika jikili ban kamiu kuruaku nalo a kuviviniekunalo, verver kamiu tai amiyovo, bo ka kuvil vanlo ka avarlo kija. Ver kamiu tai amerou, kuvil vanlo ka rila nalo atu asikil. Ver kamiu tai niabelo mave, kuvil vanlo ka riijailo. A ea nalo abiniu, kuvila ka kenemiu jidomiano rive tebievi vatitigio rivu.

<sup>15</sup> Kamiu kuvisikili ka kuvila ka ver toro tai rila vova ka kamiu, mia kuvila kean re bunu vanio. Kito monoka resikili ka rala ka rove tiniememi vatitig ka kito, a rove tiniememi vatitig ka tomu nalo dolu bunu.

<sup>16</sup> Bekurano ka venia na mijikia riyotuba ka kito, a monoka rasaaro bogo nonovio, <sup>17</sup> robolkouo bogo nonovio, <sup>18</sup> rover siva ka Atua bogo nonovio. Nina naruei kiano sidomiano ka kito roinãaukano, ea tivelinio na kito robe Yesu Kristo kiano.

<sup>19</sup> Bereio, verver sebi na Niununo na Atua kiano jo bilvili bo ea vio tai, mia kuvuebin re rimãaro, <sup>20</sup> a verver toro tai jo berial verialiano nalo, mia kuviyotel ea re naio, <sup>21</sup> a kuvitivitii veve saba nalo riviniu vatitigio rivu. Vite na bo, kuvokar sikili, <sup>22</sup> a vite na bova, kuvituvanio.

<sup>23</sup> Ana nobolkouo ka Atua ga, napano be Atua na tunãaro, rila kenemiu iviso vija jidomiano a meuliano bunu rive lu mia rive lu vatitigio. Nojidom laka ka bogo na kiado Tubo Yesu Kristo rimei bereio, mia niunomiu, tiniemiu, vija mokotemiu nonovio maka lele kiri soro tai toalo. <sup>24</sup> Naio napano bio bulag kamiu, naio be viekouoiano riano, a mia naio rimãauka tibe na ga rivano.

<sup>25</sup> Tena maariano na neverial ka kamiu bilbilu nalo, nebika ka kamiu tiniemiu ribobogia re kumemi ea kenemiu volkouano nalo. <sup>26</sup> Kuver kavijo bo a bogiano bo ka namoneano lu nalo dolu na aju, <sup>27</sup> a ea Tubo siano, never niosi nei, kamiu kuvuluku bulagio ea miralo.

<sup>28</sup> Kiado Tubo Yesu Kristo kiano tiniememiano jo bija kamiu.

Kiniou, Pol.

**Mesi Juo Napano Pol  
Bivitauiaio  
Ban Namoneano Lu  
Nalo Na  
TESALONAIKA  
Verialiano Moti**

*Tukunu bulati na niosi nei*

Tomu nalo na yimo lu na Tesalonaika ajua jaleleiano bior amijog iliano telabo, aber Yesu binime bereio rui, a maka ajikia ka iliano vabe naruei na be riano. Ana Pol jiri kiano mesi juo nene ba ban namoneano nalo na Tesalonaika ka verial ilirianiano vanlo. Naio berinavo Yesu mia rime bereio, mia beamu bajago va nalo monoka rime rivova laka yetano ka tuboiano na toro tai napano mia rimaluvo, napano siano "Toro na lakorov Tuboiano," a naio mia rilikuei ka Yesu.

Pol berial meravo ber tomu nalo napano abuluku mesi nei monoka atu sikili ea kialo moneano, ver vaio peli mia ajevio jaleleiano ve telabo, a ajog rivova laka. Mia naio berinavo monoka aimau sikili tulaka ka ajevio. Vite nalo napano maka ajevio ea kialo meuliano, jibe napano naio bija tomu nalo na amimau bija naio aju amilaio, a monoka ala ga imauano novo nalo.

*Torogio nalo na niosi nei*

Iliano moti 1:1-2

Pol jaaro kalo bija naio miaia lo 1:3-12

Pol berloglog tomu nalo ka Yesu mia rime bereio tumabe 2:1—17

Pol berlogloglo ka namoneano kiano bajago 3:1-15

Iliano maariano 3:16-18

*Iliano na be moti*

<sup>1</sup> Taara na namoneano nalo na karamado Atua kiano a kiado Tubo Yesu Kristo, napano kumitua komeli na Tesalonaika, kumemi tolu Pol, Sailas a Timoti, kumemi numisaaro toru laka ka nuviviuo kamiu ea niosi

nei. <sup>2</sup> Tiniememiano a tumaroano na karamado Atua kiano bija kiado Tubo Yesu Kristo to vija kamiu.

*Pol jikar kiano vivitauiano bija volkouano ka ver sivaiano*

<sup>3</sup> Titai napano bo ka nuvila bogo nonovio, monoka nuver siva ka Atua ka kamiu nalo na kenememi bilbilu nalo. A vonganei, kumemi numisaaro toru ka nuvila tibe nei, bior kumemi numijog lilianiano nalo na kenemiu, aber kenemiu moneano binimei bavin laka bogo nonovio, a kamiu tomu nalo binu aju tinielo jiilo bavin toru lie. <sup>4</sup> Nina bo laka, ana bogo na numitu numiselviv ea taara nalo dolu na Atua kiano namoneano, numitu numiaia kamiu toru banlo. Kumemi numitu nubisivisii banlo ka kumitu kubar bajago nalo na jikili na uolu nalo kialo, a kumitu kumidu ruru bogokouo tai na mila bulag kamiu laka, a kamiu kuvikulul re, kenemiu moneano rijoru leleio re.

<sup>5</sup> Bogo na kumitu jikili jibe na, ana numial ka bogo na Atua bijauia ga kamiu naio mimauka memedu batitigio, bior mijikia ka kamiu kube tomu nalo napano maka kuvijikia kuvijoru. Vonganei, naio mijikia rui ka kamiu kumitu kubar jogvaiano nalo bior kiano nave-natuboiano, a iorou, mia naio vititii kamiu ka kubare ka kuva joomo eaio.

<sup>6</sup> Naio, bogo nonovio naio mimauka memedu ga, a mia naio rila meran vovaiano van nalo na aju amila bova ban kamiu. <sup>7</sup> Nalo amila kamiu kumitu kubar bogokouo laka, a mia naio rila ribisi, mia naio rijai kamiu yako, a rijai bunu kumemi ea vio nei napano kumemi bunu numitu nubinua saba tealo. Bogo na reial ka burumara sebi vilivili ea vio yauo, remijikia ka mila marabo na Atua kiano ka riila Tubo Yesu taluvo ea tiniabene rime ea yetemeriba, vija kiano nailiano nalo na jikili, ka mia naio rivuru bulag kito den jaleleano nalo na yetemeriba. <sup>8</sup> Naio

riyotuba, mia naio tibure nalo na maka asidom ajikia Atua, maka asidom ajogkar Ioluano Vou na kiado Tubo Yesu kiano.

<sup>9</sup> Kialo vironiano na mia nalo avario, mia nalo ava koviobo garuei, mia nalo atukovio kalo maka ajikia atu vija Tubo bogo tai ea vio novo napano kiano moroano miñaukanio bo jo ruei. <sup>10</sup> Ea bogoti napano mia naio rimaluvo, mia kiano tomu lu nalo aiaia naio ve toru laka, mia nalo na amonea naio aial naio tibe naio bo bo laka, a mia kamiu bunu vijalo, kuvitakisior naio. Kumijikia kuvila tibe na bior kumonea kenememi Ioluano nalo, mia nalo dolu napano na, mia maka ajikia atakisior naio leleio.

<sup>11</sup> Kumemi numitu numisidomii saba nalo na banbano-o, ana mila numisikili vatitigio bo ka nubolkouo bogo nonovio bior kamiu. Numitu nubika den kiado Atua ka riijaja kamiu, kubare ka meuliano lu nei napano naio bio kamiu kanio. Nubolkouo ka kenemiu verkariano novo nalo napano kumitu kumisidomii ka kuvitakiio, bija iñauano nalo na bo napano kenemiu viekouoiano mijikia rila, mia Atua rimāu ea kiano sikiliano ka mia monoka avar mārati. <sup>12</sup> Numitu nubolkouo jibe na ka kamiu kuviaia kiado Tubo Yesu siano rimei ve toru bure kamiu, a ka kuviluo lie vija kiano bajago nalo na bo. Ver kumijikia kuvila tibe na rivan rivano-o rive verare ka tiniememiano novo napano Atua kiado Tubo kiano, nina be Yesu Kristo, mia rivu mia rivu.

## 2

*Toro va na, Uolu na tuboiano, mia rimei*

<sup>1</sup> Kiniou nojidom neverii bereio Tubo kiano liliuiano bereio, bijaio jumabe ka mia rivuru kito rotu vija naio. Banalo, ea vio nei, nojidom never tibe nei, <sup>2</sup> mia niukniuku rivie re kamiu laka, kumerou re. Nemi-jikia ka iliano tai jo jelviv ber tomu tai aju aberial ruei p̄eli aju amioliolu

ka legiano na Tubo kiano liliuiano maluvo ruei, a nalo dolu aberverial aber kumemi naverloglogiano nalo naruei nuberial tena ea kenememi niosi tai ruei. A kamiu kumonmonea re iliano nalo na, <sup>3</sup> kuvijamo kalo re ala sibilili kamiu tibe na.

Venia na nalo aju aber, maka jikia tibe na leleio, bior burumñara nailidieiano van Atua monoka rimei mave beamu vo. Mia iorou kanio toro va na rivakovio nei, napano abio ka Uolu na Tuboiano, naio bunu monoka riyotuba medave. <sup>4</sup> Toro na naio bova laka, naio jo mil die tenalo na bo, a naio jo midu naio jo mave ka tenalo abiniu na Atua siano joalo bija tenalo lu dolu na tomu nalo ajovon vatitigio. Mia naio rila tibe na rivan rivano-o, naio ga takurano ridular naio bereio toa vio lu joomo ea Atua kunuano, naio riverial naio river naio be Atua ruei. Mia bogo na naio rila tibe na, nina bogo na naruei mia romijikia roytuba ea legiano na maaro.

<sup>5</sup> Ver kumitu tiniemiumaio kia ga vo ka bogo na nojo bija kamiu, nojo neberial vite nei va miroano ban kamiu ruei. <sup>6</sup> A jakii venia na nebisivisii vonganei, kumijikia kuvitilubar ka toro na, kiano bogo memedu ka riyotuba jo, a nalo aju koko vio ka naio bior kiano bogo nene na makam vo.

<sup>7</sup> Mia be iakurano ka Uolu na tuboiano na naio maka riyotuba vo, a kiano sikiliano jojomā mimāu lukuluku kiano bajago va nalo ea vio yetemeriba nei ruei. Naio maka rijikia riyotuba medave ea kiano sikiliano nonovio vo, ka Niununo Lu joko vio ka naio, a bogo na Niununo Lu taluvo bereio rivano, <sup>8</sup> mia naio tumolu vija kiano sikiliano nonovio. Mia naio rila mira rivan riva vaataro ka tovulio, a iorou Tubo Yesu mia rimaluvo, mia jegi na kiano iliano naio riyuvu lar toro va nei ve vaarakurano, mia mia-moiano na toru na binimei bija, rijilar toro nene riva kovio ea melijokouo.

<sup>9</sup> Bogo napano Uolu na Tuboiano nene maluvo, mia naio rimāu vija Simāro kiano sikiliano, a mia naio rila vremesiano nalo vija tovo nalo vija vite nalo na iloiano, a abe sibiano nalo ga. <sup>10</sup> Mia naio rila tibe na bior jidom rijukujuku tomu nalo nei kialo jidomiano, ka nalo avakovio. A mia naio rila bunu bajago va na ajikia avurudom kialo jidomiano ve dolu, bior nalo abe tomu na maka asidom Atua kiano ilirianiano, nalo maka asidomii leleio ka mia naio rijikia rivuru meul ealo.

<sup>11</sup> Ana bogo na Atua mial kialo jidomiano jikili jibe na, mia naio tuvanlo ga, mia naio mijamo ka ga burumāra sibiano nalo ka tovalu kialo jidomiano tibe nei ga, mia amonea vatitig sibiano nalo na. <sup>12</sup> Ana iorou, mia naio tiburelo memedu garuei, ber abe tomu na maka amonea kiano ilirianiano, mia venia na ajaaro kanio, naio be bajago va nalo nañā aju amila ruei.

#### *Kamiu kuvitu sikili vatitigio rivu bogo nonovio*

<sup>13</sup> Vite tai napano monoka nuvila bogo nonovio, kumemi monoka nuver siva ka Tubo Atua rivior kamiu kuviniu kuruememi a kuviviniememi nalo, napano naio jidom kamiu toru laka. Jikar nua ruei, naio bijauia bulag kamiu ka mia kuve mārati moti ka kumonea kiano ilirianiano, a Niu-nuno mimāu ea kenemiu meuliano, kumei kumeravo ea mirano, ana mia naio rijikia rilarrur kamiu.

<sup>14</sup> Naio bio kamiu ea lilianiano vou na napano kumemi numidu binimei, bior ka naio jidom ka kamiu bunu kuviasol miamoiano na toru ka ridular kiado Tubo Yesu Kristo siano mave. <sup>15</sup> Jibe na banalo, maka rivu ka kam tai rila luvuio. Monoka kuvitu sikili vatitig bogo nonovio, a monoka kuvokar vatitigio verloglogiano na nuberial ban kamiu ruei ea kenememi iliano nalo p̄eli ea niosi nalo nei.

<sup>16</sup> Karamādo Atua tiniene jii kito, kiano tiniememiano ka kito midular

kiado jidomiano ea kiano verikariano tai na bo, ka kito rotu rivu vija naio bogo nonovio maka rijikia ribisi bogo tai. Ana nobolkouo ka naio, ka mia kenerinio, kiado Tubo Yesu Kristo, <sup>17</sup> naio tunukakar kenemiu iviso, rila kamiu kuvisikili vatitigio rivu ea iliano nonovio nalo na bo a imāuano nonovio nalo na bo laka.

### 3

#### *Pol bika ka abolkouo ka naio*

<sup>1</sup> Kulou nalo, beamu ka navokar juluvati na kiaku iliano nojidom nevika den kamiu nonovio ka kamiu tiniemiu bobogia re kumemi ea kenemiu volkouano nalo, ka nuvijikia nuvimāu sikili lie, ka Tubo kiano iliano rijikia rivavvano-o tavio soṣeli ea vio nalo. Verver tibe na, mia tomu nalo bunu amijikia ajog kiano ilirianiano, amijikia adular siano, jibe na ga kamiu kumila bogo na naio miyotuba ea kamiu beamu nua. <sup>2</sup> A bogo na kubolkouo, bo ka tiniemiumaio ka bunu ka maka tomu nonovio na amonea, a tomu va nalo tai na kialo jidomiano dolu, ana kubolkouo ka Atua tokovio vatitig ka kumemi ka nalo ajikia re atokol kumemi.

<sup>3</sup> Remijikia ka remijikia ravarkar tiniedo ea Tubo bogo nonovio, ana be iakurano p̄eli Parinio Toro Va na naio jidom rila venia ka kito, a nomonea ka Tubo mia rila kito resikili vatitigio rivu, mia vitikar kito rivu laka. <sup>4</sup> Be tinieku ka mia naio saaro ve toru ka rijai kamiu tibe na, bior tenalo na kumemi nuberial ka kamiu, nomonea ka kamiu kumitu kumila ruei, a nomonea ka mia kuvitu kuvila tulaka ea bogoti nalo na ju ka rimei. <sup>5</sup> Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rimei rive tebievi riano tibe ka kiano, a na kenemiu iviso rivujo ea Atua kiano tinietiano.

*Iliano na tivelinio na yoviano a bajago napano aju kurano janea vio*

<sup>6</sup> Banalo, ea Tubo Yesu Kristo siano nojidom neverial ka kamiu ka ver kuruado tai maka rimāu vatitig p̄eli naio maka takii verloglogiano nalo na kumemi numisian, bo ka kuvitu koalabo kija ka naio. Tomu na yoviano na jibe na, kamiu kuan re vaataro kalo, <sup>7</sup> bior bogo na kumemi numitu iviso ka kamiu, maka numitu kurano tibe na. Kumemi nuberial m̄arabo na bo ka kamiu, a kumijikia vatitig ka bo ka kuvitakiio. <sup>8</sup> Bogo na verver numidu sinaniano tai, a kumemi nubul ga, bior napano numimāu legiano a bogiano ka nubar veru ve teliki ka nubul venia na numisidom. Kumemi numinonou jibe nei ka rila nuvila re buru imāuano van kamiu ka kuvitakar kumemi. <sup>9</sup> Peli memedu ga ka monoka kuvitakar kumemi ve teliki, a numisikili ka nuvitakar kumemi ga, ka nuverloglog kamiu ka bajago tai na bo nina kuvijikia kuvitakiio. <sup>10</sup> Bogo na numitu bija kamiu, kumijog numitu nuberial tenei ruei, jibe ka kenememi tuboiano tai, napano numisian bunu ban kamiu, ver toro na maka sidom rimāu, mia naio maka rijikia sinano.

<sup>11</sup> Nemil jibe nei bior iliano telisu tai binimei bokar tilinieku ber kam tealoo maka ala titai leleio, aju kurano ga jibe na, mia aju amilkue laka ka tenalo na tomu dolu nalo aju amimāukanio. <sup>12</sup> Kenememi iliano ban nalo na jibe na ban jibe na, ber kamiu maka bunu tena kuvitan ea vio tibe na, kuvilavon ka kuviturmaro ga ve telisu beamu, a kuvisikili ka kuvila imāuano kija vare ka kuvokar semiu sinaniano na kumisen ka bogoti bogo nonovio. <sup>13</sup> Ana iliano ban kamiu kuruememi nalo a kuviviniememi nalo abiniu, ver maka kito tai na river ka naio rijog tiniemo m̄aro ka imāuano novo nalo na ju ka roimāukanio.

<sup>14</sup> Kumemi nuberial saba nalo miroano ea niosi nei, ana ver toro tai maka tiniemo saaro kanio, bo ka kuvitilubarioro toro na. Mia kuvitu re kuvila vonvon ka kuvimāu vija toro na beamu, ka rila naio rimou ve telisu, naio rivitilubar kiano

beleiano. <sup>15</sup> A mia kuvila re titai vanio tibe kenemiu uolu tai, a kuvila bon naio tibe na ka naio rime rive kuruemiu novo tai.

#### *Iliano na maaro*

<sup>16</sup> Kiaku iliano na maaro, nobolkouo ka mia Tubo na tum̄aro rudu kiano tum̄aro to vija kamiu ea kenemiu m̄arabo nalo riviniu, nobolkouo ka naio rivija kamiu kuviniu bogo nonovio.

<sup>17</sup> Vio nei telisu yetano nei mia keial ka kiniou ga nobivitaui iliano nalo ka jum̄aku. Nojidom ka nala tibe nei ea kiaku niosi nalo ka kuvitu kuvitilubar jum̄aku ka kiniou naruei nojuvan niosi nei biedu. Naio naruei kiaku vivitauiano jo, beriio:

<sup>18</sup> Kiado Tubo Yesu Kristo kiano tiniememiano jo bija kamiu nonovio.

Kiniou, Pol.

## Mesi Moti Napano Pol Bivitauiaio Ban TIMOTI Verialiano Moti

*Tukunu bulati na niosi nei*

Timoti, naio be namoneano vou tai napano naio tena komeli nei Listra. Kenieno tena taara na Israel a karmano be toro Kris. Timoti be Pol kiano bilbilu tai napano jo ban bija naio ea vio nalo na jo ban ea ka verial kiado Tubo Yesu Kristo kiano ioluanu vou. Pol jiri mēsi nei ea bogo napano naio ba joa tanobuku na Masetonia, a Timoti jo yako Evesas.

Pol jiri mēsi nei ban Timoti berkanio ka vitikar ka verloglogiano sibilibi nalo napano amijikia amei joomo ea yimo lu. Verloglogiano sibilibi nei miyotuba ea jidomiano ga tai napano berinavo vite nonovio ea yetemeriba abova nonio. Tomu nalo na aberloglog tomu nalo ea iliano na sibilibiano nalo, aberinavo toro mijikia rivokar meuliano, verver ga naio mijikia verbulag kialo ililukuano nalo, a ajuvan sinaniano tealu a ajen sinaniano tealu ga napano memedu ka asenio, a mia naio maka soro, a vite tealu dolu jibena bereio.

Mia ea mēsi nei Pol berii bajago novo nalo napano namoneano nalo amijikia atakio ka ala lotuano, a ka avitikar yimo lu. Mia naio ber bajago novo nalo napano navurum̄araboiano na yimo lu nalo a namoneano dolu nalo monoka atakio. Mia vite maariano napano Pol berenio, naio ber ka Timoti ber naio monoka rimei ve toro novo tai na Yesu Kristo kiano im̄auano. Naio berial bajago napano naio monoka toa naio bogo na naio to rivija taara dolu ninio na namoneano nalo napano naio to verlogloglo.

*Tukunu nalo na niosi nei*  
Iliano moti 1:1-2

Verloglogiano ea tivelinio na yimo lu bija kialo navurum̄araboiano nalo 1:3—3:16  
Iliano nalo na ijaiano ban Timoti ea kiano im̄auano 4:1—6:21

*Iliano na be moti*

<sup>1</sup> Nao Timoti, kiniou atevi Pol nei nebivitauia ea mēsi nei biedu banso, napano Atua na Ioruriano na kiado bija Kristo Yesu kiado siraragkuiano abitirilar kiniou ka noim̄au ka Ioluanu Vou na bo. <sup>2</sup> Kiniou najaaro toru ka nevitavo easo bereio ea vio na, bior nabano nemialso jibe ka napano jau kobe keneriku riano tai joomo ea m̄aratavo na viekouoiano na kiado. Nojo nobolkouo biorso, ka Atua karam̄ado, bija Kristo Yesu Tubo na kiado, mia nalo aje tiniememiano, a tinieliano, a tun̄aro na kanalo to rivijaso.

*Kotokovio von ka verloglogiano na sibilibiano nalo*

<sup>3</sup> Kiniou nojidom neverial bereio vanso vite nei napano kito roberii beamu, bogo napano nojo bijaso yako Eveso, beamu ka napano nojo najaluvo ka navan ea Masetonia. Ka bogo na, roju remial ka napano veribinio tealu aju, romijikia batitiglo, tenene na neberinavo bo ka jau koto ga ea vio na beamu vo, ka kalavon ka koverburelo. Vite na naruei nojidom neverial vanso bereio, ka kotoa vio na beamu vo, bior napano nalo na, ajuñā aberloglog vite nalo napano maka amemedu ga. <sup>4</sup> Bogo nonovio kialo jidomiano nalo ju bujo ka kialo tukunu moruo nalo, a aju tinielo jii ka averii ga torogio na kialo buo nalo re nuanua laka, mia bo ka atuvan vite nalo na tu. Iliano kinkin nalo na jibe na ju mila tomu nalo kialo jidomiano beve juo bereio, a maka ajikia aijalo leleio ka avokar meuliano na bo napano Atua naio jidom, napano romijikia rovokar ea moneano ea naio ga.

<sup>5</sup> Tibe na bo ka kito roverburelo, ka rila na mia kiado tomu nalo, kialo

iviso mijikia rimeravo rivu, kialo jidomiano mijikia memedu rivu, a kialo viekouoiano ve riano to, bior napano ver tibe na, mia bajago novo na tinitii kito naio mijikia rimei rive toru laka bure kito bereio.

<sup>6</sup> Mia vonganei naio bova, bior napano nalo na vio na tai, ajitiravo ajaluvo den m̄arabo na bo nei, amiel ban ea m̄arabo na ilivovuiano nalo. <sup>7</sup> Nalo abarvar kalo, a ajidom ka amei ave naverloglogiano na tuboiano lu, mia aju aber bulavulag sano iliano nalo na jikili nene, a maka ajikia vatitig rivu venia napano nalo ga bereio ajum̄a aberenio, maka ajikia aver bisivisii vatitigio leleio.

*Atua kiano tuboiano naio be tena venia?*

<sup>8</sup> Nalo na aju amila baravo ka Atua kiano tuboiano, mia kito romijikia ka tuboiano, ver kito ralaio rimemedu, naio be kiano burum̄ara im̄auano nene. <sup>9</sup> Kito monoka rejikia ka tuboiano, maka avitirilar ka rijai tomu nalo napano amemedu ruei, mia ka rila kulo dolu nalo amemedu, tibe ka nalo nam̄a amila korovio, bija nalo napano maka asidom aiagago kanio. Nalo na be nalo napano maka taniel tii Atua, napano amila vite nalo napano naio maka sidomio, napano ajidom be iakurano ea vite lu nalo, napano pariparilo kirisikili ga, a napano amuebinvin karam̄alo bija kenielo, p̄eli na amuebinvin tomu dolu nalo.

<sup>10</sup> Bija nalo nei, abe nalo nam̄a amila siakiano, bija nam̄a sum̄ano buru sum̄ano bereio p̄eli tira buru tira bereio, bija nalo tai napano abina ka kiritete ka avilvil kanio rivano, a nalo na tena sibiano, bija bunu nalo napano aju amilavan kanalo beleano va nalo. Tuboiano nei naruei be kanalo, bija nalo napano ajum̄a amila bajago dolu nalo na bova na jibe na, bior napano nalo abijukudie toru laka ka kiado verloglogiano na bo. <sup>11</sup> Nalo maka atakii leleio lilianiano novo napano

kiado Atua lu novo kiano, napano naio mije monea kiniou ka neverial van kamiu.

*Yesu kiano tiniememiano ban Pol*

<sup>12</sup> Im̄auano nei naio joa jum̄aku ka nala, mia nojidom never burum̄ara siva van Kristo Yesu kiado Tubo. Naio naruei bitii kiaku meuliano, mialio ka nemijikia nebiekouo ea im̄auano nei, naruei naio bitirilar kiniou ka nalaiio, mia monoka neverial ka naio ga jo mije moroano ban kiniou dam̄ariga ka neiim̄auka tavukia napano naio jidomio. <sup>13</sup> Beamu, kiniou nebe toro tai napano m̄a nojo nomioluolu niegeniegeio ea sio lu nei Yesu, a nojo nomila lelan naio toru, napano nojo nomila bova laka ea namoneano nalo na kanano, napano memedu ga ka naio rije mauo van kiniou riviorio. Mia makanio, naio bitilubarario ka nojom̄a nemiel ea melijokouo ga, maka nomonea naio, maka nejikia vite venia napano m̄a nojo nemila, naruei naio mila bo laka, be tiniememiano ka kiniou.

<sup>14</sup> Jibe na, nemial ka napano kiado Atua naio mije kanano tiniememiano novo ban kiniou burutomoruo laka, mison kanaku meuliano ka viekouoiano a tinitiiiano napano be kiado robiniu napano robe takurano bija Yesu Kristo.

<sup>15</sup> A iliano tai jo, napano romijikia ravarkar tiniedo eaio, napano bo ka aviniu ajev ea kialo meuliano, napano ber jibe nei, berinavo

Kristo Yesu naio batove yetano ea yetemeriba nei ka rilarur nakariano na vabe kiano meuliano.

Mia ea tomu nalo na m̄a amila kariano jibe na, nemial jibe ka kiniou nebe natukamuano kalo, kiniou nobova loa ka nalo abiniu, <sup>16</sup> mia siva ban Atua napano tinien miia kiniou. Nemial jibe ka maka nememedu ka naio viekokoia kiniou tibe na, napano nebe natukamuano na tomu na kariano nalo. Mia naio mila jibe na ka kiniou, ka mia tomu

nalo amijikia avitulubario ka Yesu Kristo, kiano jidomiano tebievi laka ka naio rijikia tinien riia tomu nalo na bova. Naruei bogu napano nalo na aju ka amei iorou aialio ka napano Atua naio jaaro ka rivuru kin-iou tibe na, mia rila nalo avitulubario ka nalo bunu amijikia amonea naio ka avokar meuliano napano maka ve jukuti nene.

<sup>17</sup> Nojidomial kanano bajago novo nei mila nemiaia naio, neberinavo naio be parinio Tubo ka bogu nalo re nua, a naio meul jobo jo. Naio joa vio nonovio mia toro maka rijikia rialio, naio takurano ga be Atua a maka dolu tai bereio. Tibe na, bo ka ravatove ka naio, rodular siano rivano-o rijikia re ribisi bogu tai, mm.

#### *Jau kotu sikili kojorjoru re*

<sup>18</sup> Timoti, nojo nemialso jibe kobe keneriku, a nojo nojidomial verialiano napano aberiiso beamu kiana, napano aberialso ban kiniou. Amila nebitilubarso ka jau kobe toro tai napano nemijikia navar tinieku easo. Tibe na, iliano tealo na teremi p̄eli verloglogiano tealo na tortoru ju, napano nojidom nesian mon-easo. Iliano nalo na mia amijikia ala jau kesikili m̄ele ea mira lu na Atua napano rojuṃa romila, <sup>19</sup> bior napano mia aijaso ka kavakar vatitig bajago na viekouoiano, a amijikia ala napano kanamo jidomiano mijikia meravo tulaka.

Tomu tealo, jibe ka aju ajelan vuu ka uako, naruei kialo jidomiano na bo berial kalo ber m̄arabo ninei, mia nalo maka asidom aiagago ka naio, ana amilaluvio, kanalo viekouoiano riva rivavin ea baraaṃa tai. <sup>20</sup> Peli komijikia tomu juo nei Aemeneas bija Aleksada, naruei kiniou neber aua ka neverial ka tomu juo nei ajibe na ruei. Amila bova banbano, maka asidom aiagago, ana nobuku bulaglo aban bereio ea Siṃaro juṃano, ana vede naljuo abitulubario kiana vo ka atu

re bunu ala bulag lu na Kristo siano tavukia napano ajuṃa amila.

## 2

### *Verloglogiano tealo ea tivelinio na amila lotuano*

<sup>1</sup> Mo, kiniou neverial naverloglogiano nalo nei naruei. Na be moti, nojunu kakar kamiu ka ea bogu na volkouano nalo, monoka aver siva van Atua riviorlo dolu nalo, a monoka kuvolkouo sikili rivior nalo, a monoka kuvika sikili den Atua ka riijailo. <sup>2</sup> Nina monoka kuvila bunu ea tivelinio na tomu nalo na tortoru, jibe ka parinio tubo nalo bija navuriṃaraboiano nalo napano aju mave ka kito, bior napano ver nalo aiṃau rivu, mia rivu lie van kito. Mia romijikia rotua meuliano nabo, napano momavo a tuṃaro joaio, a romijikia rala iṃauano lu nonovio na Atua kanano, ea bajago novo jibe ka napano naio jidomio. <sup>3</sup> Bajago nalo na jibe na abo laka, naio be bajago napano Atua na ioruriano na kiado naio jaaro ka vitioo ka mirano, <sup>4</sup> bior napano naio jidom ka tomu nonovio avokar kiano ioruriano, naio jidom ka tomu nonovio ajikia kiano ilirianiano. <sup>5</sup> Maka ve m̄arabo dolu, bior napano naio takurano ga be Atua naio jo, a toro takurano ga naio mijikia rila kiado merevuiano rivija naio, nina be Kristo Yesu, <sup>6</sup> napano naio binimei be toro, karna naio mijamo ka kiano meuliano bereio, midu jeleig kito, bul bulag tomu nonovio na yetemeriba den toro na bova juṃano.

Iṃauano nei napano Yesu naio miṃaukanio, naio mila Atua kanano verikariano nalo na beamu abinimei abe riano, amaluvo ea bogu nene memedu, <sup>7</sup> naruei naio mijoru ea kiniou naruei ka neverial van tomu nalo. Vede tealo be tinielo ka nojo nemila sibi, mia makanio, neber be riano ga. Abitirilar kiniou jibe toro tai na bar iliano p̄eli na atevi tai, ka neverloglog taara na

tomu nalo ea bajago na viekouoiano a ea m̃arabo na ilirianiano.

<sup>8</sup> Bior jidomiano nalo na, nojidom ka tomu nalo monoka atu abolkouo tulaka ea vio nonovio, a bogo napano atumolu ka avolkouo monoka ave lu rivu, napano tiniemimiano maka toalo, siniabu maka to iviso ka nalo rivija tomu dolu.

### *Tire nalo kialo bajago*

<sup>9</sup> Ea tivelinio na tire nalo, kin-iou nojidom ka bogo napano amei joomo ea yimo na lotuano, bo ka nalo ayovovu vatitigio ve kirinovo, mia maka rivu ka ava loa, monoka rivare ga ea vio lu napano aju aba joomo eaio. Maka nosidom ka ala m̃lea vijulo veve dolu nalo, p̃eli na atelan m̃lea niogo nalo tanea niabelo nalo, a maka rivu ka avarvarlo m̃lele ea kulum̃arauo napano abululo ka burum̃ara puruveru. <sup>10</sup> Vite takurano ga naio mijikia riovovualo rivu laka, nina be kanalo iṃauano novo nalo, napano amemedu ga ea tira kiano meuliano napano milotu ka Atua. <sup>11</sup> Tire nalo monoka avatove rivu, atu melumu ka aiagago ka verloglogiano nalo napano aju aberialio ban tomu nalo.

<sup>12</sup> Maka noto najamo ka tire nalo averloglog sum̃ano nalo, p̃eli na aje tuboiano mave loa nalo, mia monoka atu melumu ga. <sup>13</sup> Nina naio memedu ga, bior napano Atua jii toro na jukamu be Atam, karina tira nei Iv, <sup>14</sup> a maka ve Atam napano Sim̃aro mijukubin naio, mia be Iv, naio be moti napano milakorov tuboiano.

<sup>15</sup> Sim̃aro mijukubin Iv, mia Atua tinien miia tira nalo keiano vo, jian iṃauano novo tai banlo, ka avar kiritete vou nalo amoluo ea yetemeriba nei. Ana ver tira tai, naio ve kiano viekouoiano, kiano bajago rivujo ka tinietiano, kiano meuliano rive lu vatitigio, a kiano jidomiano to tano, mia Atua naio risaaro ka rilarurio.

## 3

### *Navurim̃araboiano nalo na tum̃aro*

<sup>1</sup> Ver toro tai, jidomiano tai toaio ka tinieno ka rudu sio na navurim̃araboiano, naio bo na, bior be riano, naio be iṃauano novo tai laka nei napano naio jo jidomii ka rila. Naruei kanado navurim̃araboiano nalo, mia kiniou neverial ka nalo monoka ave toro na jum̃abe.

<sup>2</sup> Vite na jukamu, navurim̃araboiano naio monoka ve toro tai napano maka ve vite tai na bova toa kiano meuliano.

Mia naio monoka rivuru tira ve takurano ga, a rive riano tu laka vijaio.

Mia naio monoka telan vuu vatitig ka kiano bajago nalo,

mia naio monoka ve masou, mia tomu nalo monoka aialerinio eaio,

mia naio saaro ka rivitigar toro dolu ea kunuano,

a mia monoka naio rijikia vatitig bajago na verloglogiano.

<sup>3</sup> Bija vite nalo na, monoka ve toro napano maka tom̃a munu uei m̃lea mijorjoru tatei,

mia naio maka tom̃a tukuruku, mia kiano jidomiano tebievi,

mia kiano iviso melokloko.

Naio monoka rila siniabu re,

mia monoka tinientii m̃lea re puruveru.

<sup>4</sup> Mia tai bunu jibe nei, monoka rive tubo vatitig ka kiano vonuo, napano kenerinio nalo aialerinio eaio, avatove kaio ea vite nonovio, <sup>5</sup> bior napano ver toro tai tibe na rijikia re rivitigar vatitig kiano vonuo,

tum̃abe mia rijikia rivitigar vatitig Atua kiano tum̃aro?

<sup>6</sup> Mia toro nene monoka rimeruo ve teliki, tibe ka naio rudu Kristo ea kiano meuliano jiu kija teliki ruei, ver makanio mia parinio rimei rivujo ka m̃arouano, rila naio rilaluvu

m̃arabo, rijoru ea bulukuṣili napano Siṃaro naio mijoru ban ea beamu.

<sup>7</sup> Mia navurim̃araboiano na tum̃aro nalo monoka ave tomu napano tomu nonovio, riva rivokar nalo napano maka ave namoneano, nalo aberinavo nalo abe tomu na amemedu, bior napano Siṃaro naio jo mila vio jikili ka rijukubinlo, naio jidom rila napano tomu nalo na be tinielo ka vovaiano tai joalo.

<sup>8</sup> Ninei be navurim̃araboiano nalo, mia vonganei navan tivelinio ka ijaiano nalo. Toro napano naio bokar iṃauano na ijaiano,

mia kiano jidomiano monoka rivamenea rivu,  
mia naio be toro na ber iliano na memedu ga, mia maka to ve minano ve juo.

Mia naio monoka to re rimunu m̃arjum̃elm̃elu bogo nonovio, mia monoka naio sidom m̃elea re vite nalo,

<sup>9</sup> a mia naio monoka rivokar sikili ga bajago na viekouoiano ea kanano iviso, jovulio napano tomu dolu nalo abokario.

<sup>10</sup> Mia toro napano ka mia naio rivokar iṃauano na ijaiano, monoka avitilubar naio rivu, alavon naio beamu vo, mia ver naio riṃau rivu, kiano bajago bare ka iṃauano nei, mo amijikia adu siano ka riṃau.

<sup>11</sup> Mia ijaiano koano bunu, kiano jidomiano nalo monoka rimelumu rivu, a monoka to re m̃a ilisosol m̃ele rivan kulo dolu nalo, mia monoka ve tira na mijikia telan vuu vatitigio ka kiano bajago nalo, a monoka viekouo ea iṃauano nonovio.

<sup>12</sup> Mia ijaiano nalo monoka avuru tira ve takurano ga, a ave riano tu laka vijaio,

mia monoka ave tomu naṃa amijikia avuru m̃arabo rivu ka kenerilo nalo, a amijikia avitakar vatitig kialo vonuo.

<sup>13</sup> Mia ijaiano nalo naṃa abarlo vatitig bo ka kialo iṃauano mia

aialio ka napano tomu nalo asaaro ve toru kalo, a mia ajog tibe ka Kristo Yesu naio jo mijailo ka mia amerou re ka atumolu atu sikili ea kialo iṃauano nei.

#### *Buruṃara jidomiano lukuano na kiado moneano jo*

<sup>14</sup> Timoti, nojidom noviedu nealso vesiou re ka noverial vite nalo na rivanso, mia nomial jibe ka bedega, monoka novivitauiā ga rivanso beamu vo.

<sup>15</sup> Vede vite tealo abokar kinioū ea vio nei kiana vo, mia nejidom ka jau monoka kovokar soṣeli verloglogiano nalo nei, ka kojikia vatitig rivu bajago nalo napano amemedu ka alaio joomo ea m̃aratavo lu na Tubo kanano. Maratavo lu nei, be Atua napano meul kiano namoneano nalo, napano avokar sikili kiano ilirianiano tulaka, tibe ka burupati ivoniano na yimo tai naio bokar jikili m̃artea nalo nene.

<sup>16</sup> Nao, kiado lotuano naio jikili juaio ea moneano tai napano naio jibe ka vite na lukuano tai napano bululuo bo, naio temi batitigio laka. Kito rojo roberial kiado moneano na jibe na, roberinavo

Yesu, naio be Atua napano miyotuba ea yetemeriba nei ea mokotenanano toro,

Niununo kiano moroano miṃau toru ea naio, a nailiano nalo aju bijaio,

aberial naio ba bokar taara dolu na tomu nalo, mila na amonmonea naio janea vio reraio ea yetemeriba,

karina Atua buru naio bavın bereio ea kiano buruṃara mermerano ea vio mave.

## 4

#### *Kovitkarso ka naverloglogiano nalo na juboluboiano*

<sup>1</sup> Niununo Lu naio berial iliano tai naio meravō laka, napano naio berinavo ea bogo nalo na maaro, mia nalo tealo kalo naṃa amonea beamu ruei, mia nalo aiagago ka niununo nalo na juboluboiano, mia

atakiŝor ŝiŝaro nalo kialo verloglogiano, ana rila avuro avan ea meuliano na maka memedu.

<sup>2</sup> Verloglogiano nalo na kiri niagiago tibe na, mia amalmaluvo ea tomu na jubolubo na ŝna be tinielo ka aber amijikia vite, mia kialo jidomiano nalo kiri bobogio jibe ka vovojulu.

<sup>3</sup> Vite tealo napano mia averenio naio jibe nei, ka toro maka bunu rijikia soro, a mia ala veliano lu ve telabo ea sinaniano novo nalo napano Atua naio jiilo be sado ka romijikia rasaaro ka rejevio. Bior kito napano romonea a romijikia vite napano be riano, kito roju rejen julaka, roju reber siva ban naio biorio.

<sup>4</sup> Naina bior napano vite nonovio naŝna Atua jiio, maka rejikia rover naio bova, mia romial ka naio bo mia bo. Maka ve vite tai napano robitisaia naio, mia rajaaro ka rejev vite nonovio, rover siva van Atua rivior. <sup>5</sup> Ana bogo napano romila jibe na, mila na napano vite nalo nei abinimej abe lu. Atua kiano iliano bija kiado volkouano mila ameravo ruei.

<sup>6</sup> Verloglogiano nalo na, ver jau koverial naio rimeravo rivu van namoneano nalo, naio jibe ka napano jau koberialso ka jau toro novo tai a toro na viekouoiano na iŝauano Naverikariano Yesu. Tilikiti napano amial ka napano jau komiŝau jibe na, mia ajikia ka kobinimej mave ruei jibe ka toro tai napano naio meruo bo ea ilirianiano nalo na kiado viekouoiano. Mia avitilubarso ka napano jau bunu koje kajakii vatitig verloglogiano novo nalo nei napano koje koberial banlo, naruei mia nalo asaaro ve toru.

<sup>7</sup> Ea tivelinio na tukunu moruo vovuiano nalo na beamu, napano aberii vite dedade nalo, maka ve kanamo vite tai toalo. Jau kotuvanlo atu bo, mia monoka kalakakarso kosikili rivu ea meuliano lu. <sup>8</sup> Tomu nalo tinielo jii ka alakakar niabelo asikil, mia nina naio bo ka tivelinio tealo, mia bogo napano jau koje komilakakarso kosikili rivu ea meu-

liano lu, naio mia rila rivu lie vo ea tivelinio nonovio. Ea tivelinio na meuliano na banei, meuliano lu naio mijikia rijaiso, a ea tivelinio na meuliano vou napano naio jo binimej iorou, mia meuliano lu naio rila kiamo ŝarabo ka kojikia kava jouro eaio.

<sup>9-10</sup> Vite na kito roju robukudeli toru, romila bijon toru biorio, bior napano romije kiado jidomiano monea Atua na meul naio takurano ga, napano naio be ioruriano na tomu nalo abiniu, jibe nalo napano amoneaio. Iliano nei naio be riano toru ga, komijikia komonea naio ka tiniemo momou.

<sup>11</sup> Kanaku iliano nalo nei napano nojo neber ka jau nei, naina naruei vite nalo napano jau monoka koverloglog ka kulo dolu nalo, kesikili kalo ka monoka ajogkario. <sup>12</sup> Ver tomu tealo atu avitso rivova bior napano jau kobe ŝeaku ga, mia komerou re, koiŝau ŝilinio ga. Lerinio jau kobe ŝeaku ga, mia jibe ka napano koje komila, monoka kesiloglog ŝarabo ka namoneano dolu nalo. Mia bo ka aue jaamo, napano koberloglog vatitiglo bo ea meuliano kirinovo, ea tivelinio na iliano, ea tivelinio na bajago novo, a ea tivelinio na tinietiano, viekouoiano, a meravoiano.

<sup>13</sup> Rivan rivakar napano ver kinio nemijikia namaluvo ka jau, kovakar sikili bogo na lotuano nalo. Kovulukulu bulag iliano lu ea tomu nalo miralo, koioliolu, koverloglogio vanlo.

<sup>14</sup> Jau tiniemo bobogia re moroano lu naŝna Atua jian banso ea bogo napano taara na vurimŝaraboiano nalo amioa parimo. Naverialiano tai ka bogo na, kiano iliano naio berial moroano nei be kanamo, naruei monoka kesikili ka koiŝau vija. <sup>15</sup> Jau monoka koto kalakakarso ea iŝauano napano mijoru joa juŝamo, monoka kalavio sikili tulaka ka kalaiio, naruei mia tomu nalo aviniu amijikia avitilubarso ka koje kabano lie bija Atua ea kiamo

meuliano. <sup>16</sup> Monoka kovitkar vatitigso rivu, a jau bunu monoka katakii batitig verloglogiano nalo namãa kojejian ban tomu dolu nalo. Ver jau kovokar rivu, mia kala napano jau kamliko nalo napano ajumãa amia-gago ka jau, kam nonovio kuvijikia kuvokar ioruriano.

## 5

### *Bajago na bo ka ala van namoneano nalo*

<sup>1</sup> Timoti, ver jau keial tormoruo tai rila vite tai na maka rimemedu, jau keil siniabu re rivanio. Jau komelok-loko ga van naio, kala vanio tibe ka napano naio be karamãamo. Bo ka kala tibe na van nalo dolu bunu. Keial m̃eaku nalo atibe ka napano abe kuruamo, <sup>2</sup> keial tiramoruo nalo atibe ka napano abe koniomo, a keial niatira nalo atibe ka napano abe kuviviniomo. Ver jau kala tibe na, mia kanamo jidomiano rimeravo rivu damãariga.

### *Taanou nalo*

<sup>3</sup> Ea tivelinio na taanou nalo, kito na tumãaro monoka roviao vatitigio vanlo, monoka rovitikar rivu nalo napano aju abe terakurano ga, maka ve koalo tai ka rijailo. <sup>4</sup> Mia ver taanou tai kenerinio nalo atu, p̃eli na kumãabinio nalo, mia nalo na naruei monoka avitikar naio. Ea m̃arabo na, amijikia ala meran van naio vitikariano novo nalo a ijaiano napano naio mila banlo ea yuka nalo napano barlaka ruei. Nalo monoka avitilubario ka nina be imãauano na memedu tai, p̃eli vite lu tai, ka ala van tai kalo napano memedu ka kialo m̃aratavo ga, a naio be bajago na bo tai napano Atua tiniene jii toru.

<sup>5</sup> Taanou napano maka toro dolu tai rivitikar naio, napano nalo amãarmãaro nonio den naio banbano naio takurano ga jo, monoka naio jo bar tiniene ea Atua naio ga takurano. Naio mijikia to tiniene rimaio ka Atua legiano a bogiano ka rivolkouo rivanio naio ka rivitii naio rivior vite venia napano naio

jidom. <sup>6</sup> Mia ver taanou tai ver naio to sidomii ga ka seseiano na meuliano na yetemeriba nei, naio tibe ka napano naio m̃aro den Tubo ruei, javukia ga koano m̃aro den naio beamu ruei.

<sup>7</sup> Nomijog ka kamiu namoneano nalo kumitu kumisidomii ka kuvila m̃arabo tai ka rijai taanou nalo. Nina bo laka, mia nomerou ka vede tealó avilvil ealo riviorio, mia nojidom nesian iliano nalo tai van kamiu ea tivelinio nei beamu vo.

<sup>8</sup> Iliano na beamu, naio ber jibe na, berinavo ver namoneano nalo tai naio maka to vitikar batitig nalo na ea kiano yati, na toru nene, naio maka vitikar vatitig nalo na ea kanano m̃aratavo memedu, toro na naio jibe ka napano naio maka ve toro tai na ve Kristo kiano. Naio kirivova laka, a kiniou nemial naio jibe ka naio bova laka jovulu nalo napano maka amonmonea vo.

<sup>9</sup> Mo juo nene, ea tivelinio na taanou nalo, naio jibe nei. Taara na taanou nalo napano mia tumãaro naio rivitikarlo, taanou napano jidom ka siano riva joomo, monoka be tiramoruo ga, jibe ka napano kiano yuka jikar ka bakar duelimo va ari [60] jo bavin.

Dolu nene, be tire napano mijoro vaarakurano ga, buru sumãano takurano ga, a be riano tu laka bijaio. <sup>10</sup> Bereio, naio monoka ve tira napano tomu nalo abitilubario ka naio mila imãauano nalo bo laka, napano naio mia berloglog batitig kenerinio nalo, naio be tai napano naio jaaro ka rivitikar rivu toro dolu ea kunuano. Tilikiti napano namoneano lu dolu nalo abinime amiadu ka naio, naio jekon jaalo, a naio jo bitiri bulag nalo napano amijoru ea jogvaiano tedade nalo. Tiramoruo taanou napano naio mimãau jikili ea imãauano novo nalo na jibe na, naio naruei siano mijikia riva jouro.

<sup>11</sup> Mia ver taanou tealó atu napano maka ave tiramoruo vo, bo ka jau kodu re sialo vo. Naina

bior napano amijikia averikar van Kristo ka mia atu tibe na ga vija naio rivokar jukuti na kialo meuliano, mia karina, maka vesiou, vede sidomiano na soriano binimei jikili laka bereio, naruei mia aiilo ka taanou nei naio jumolu buru suñano tai bereio. <sup>12</sup> Ver naio rila tibe na mia aial rivova kanio, bior napano naio milaluv kiano verikariano, naio mila korovio bereio. <sup>13</sup> Mo bija naina, mia taanou mēaku nalo na amijikia aivo, p̄eli maka atu ala iñauano na bo, mia aju amidu nono vio jeliviv, ajum̄a amalmaluvo ea tomu nalo kunualo, a mave ka nina ajum̄a amil ea kulo dolu nalo, ajum̄a amiyuku sunulo ban ea vite napano maka ve kanalo iliano naio to joomo eaio.

<sup>14</sup> Naruei ea kiaku vitiiano, kiniou neber ka taanou napano nalo abe niatira kia ga vo, naio bo laka ka rajamo ka nalo asoro bereio ga, bo ka nalo avar kiritete, avitkar kialo vonuo nalo, naruei mia ve re titai napano tomu nalo amijikia atu ail rivova kalo rivorio. <sup>15</sup> Kiniou neber nina bior napano nalo tealo amilaluv m̄arabo ruei, aju ajakii m̄arabo na m̄ariano napano aban kean Sim̄aro.

<sup>16</sup> Tibe na, ver kito tai naio ve namoneano tai, mia taanou tai joa kanano m̄aratavo, naio ga monoka rijai batigio. Ver naio rila, mia tum̄aro naio rila bijon re naio bunu, mia naio mijikia rivitii ga taanou dolu nalo napano maka ve toro tai ka rijailo.

### *Navurim̄araboiano nalo na tum̄aro kialo veru*

<sup>17-18</sup> Ea tivelinio na ijaiano teliki napano rojum̄a rejian ban kiado navurim̄araboiano nalo, kiniou neberii ban ea iliano juo na Iliano Lu. Tai berii bue m̄arauo nalo napano roburulo amiel jeliviv mave ea bagaro na boboseru ka riviebove bulag kurukuti nene. Iliano na naio ber jibe nei berinavo

*Jau koyorko re kanamo bue m̄arauo niono napano naio jo biebove bulag kanamo boboseru, jau kajamo ka naio sen ve tertelisu rivano. Tiut 25:4*

A iliano juo nene ber jibe nei

*Toro napano naio miñau, memedu ka naio rial titai rimei ea jum̄ano rivior. Luka 10:7*

Tibe na, bo ka kito rala bunu van navurim̄araboiano na tum̄aro. A nalo napano m̄a amim̄au bo, a amim̄au jikili ka amiololu ka Ioluanano Vou na bo a ka aberloglog tomu nalo, bo ka nalo avar ve toru likiliki, rivan ve valuo.

<sup>19</sup> Ver toro tai rimei riverial navuri-m̄araboiano tai, ver naio mila vite tai na bova napano monoka ail van naio ea komeli rivorio, iliano na toro takurano ga kanano naio maka rivare ka ver ala tibe na. Iliano na jibe na, monoka tomu ve juo p̄eli ve tolu ka aikurukario, naruei amijikia adu rivan komeli. <sup>20</sup> Mia ver navurim̄araboiano tai naio to rimonmon rila kariano, mia jau monoka koverbure naio sikili ea taara na namoneano nalo miralo, naruei bogo napano navurim̄araboiano dolu nalo aialio, merouano rivokar vatitiglo ka maka rivu ka nalo bunu ajoru tibe na.

<sup>21</sup> Kito juo remijikia ka Atua bija Kristo Yesu bija nailiano lu nalo na kanalo ajum̄a amial kito, naruei ea miralo kiniou neber ka jau ka kovokar vatitig kanaku iliano nalo na. A neber bunu ka bogo napano jau kojo komila vite nalo nei, jau kovitii re tomu nalo aveve dolu, mia monoka kala rive verare ga ka nalo aviniu.

<sup>22</sup> Majigidulu tealo jibe nei, berinavo jau kala soḡeli re ka koyoa toro ka rimei ve navurim̄araboiano, mia kovitii kiano meuliano rivu beamu vo. Maka rivu ka mia kavan re vaataro ka kariano napano toro dolu naio jom̄a mila, mia koto kuku ka kanamo iviso naio rimeravo, ve lu dam̄ariga.

<sup>23</sup> Javukia napano nojo nomijog, nemijikia ka jau kojomãa komiemie tertelisu, naruei never ka jau komijikia kovelikar re na munuiano na m̃arjum̃elm̃elu. Jau koto komunu uei re ga, mia kalavon ka komunu m̃arjum̃elm̃elu ve tertelisu bogoto tai, naruei vede naio mijikia rijai mabomo.

<sup>24</sup> Tai bunu jibe nei, berinavo tomu tealo, amila napano kialo kariano naio joa mirado medavo ga, naruei robitilubar ka mia avar viro-niano riviorio. Mia tomu dolu nalo, amila napano kialo kariano naio joluku vatitigio jo, mia karina, naio bunu mia rimaluvo ea vio meravo iorou.

<sup>25</sup> A im̃auano novo nalo bunu ajibe na. Tealo ajua mirado kirimeravo bo, a tealo, ajoluku vatitigio bo, maka rejikia. Mia naio napano joluku jo, naio maka rijikia toluku bo kanio, mia naio bunu monoka rimaluvo ea mirano tomu nalo miralo.

## 6

### *Tomu nalo nam̃a amim̃au kurano ga toro tai kanano*

<sup>1</sup> Nobivitau naruei ea tivelinio na kanado tomu nalo napano aju napano maka ve kanalo titai, dam̃ariga ajua toro na toru tai ka aim̃au kanano kurano ga.

Meuliano na jibe na naio jikili, naio jibe ka napano vite na temi tai naio jorimaro ga ea taakalo, mia monoka aserm̃i re ka kialo toro na toru, monoka aial naio tibe ka memedu ka avatove kanio. Ver ala tibe na, mia kialo toro na toru maka rijikia rivitii vova ea Atua siano napano joalo.

<sup>2</sup> Kiniou nemijikia ka tomu tealo napano amim̃au kurano ga jibe na, kialo tomu na tortoru bunu amonmonea. Jibe na, toro na im̃auano bija toro na toru naljuo abe kuralo ea Kristo, mia nina naio maka riverenio toro na im̃auano naio mijikia sereserei ka toro na toru kiano im̃auano. Peli monoka aim̃au rivu lie vo tibe na, monoka asaaro ka aija toro nam̃a aju amim̃au kanano, bior

napano naio be tai ea kialo taara na namoneano javukialo, a naio bunu be tai napano monoka tinielo tiio.

### *Verloglogiano lubolubo*

Naina naruei be verloglogiano tai ka mia kotuvan rivan nalo dolu, napano mia monoka kotunukakarlo ka mia atakii vatitigio rivu.

<sup>3</sup> Toro napano naio berloglog jakii jidomiano dolu, naio juvan iliano novo nalo na kiado Tubo Yesu Kristo, kiano iliano maka vare bija verloglogiano napano mijikia ridu toro kiano bajago binimei jibe ka Atua kiano bajago.

<sup>4</sup> Toro napano naio jakii kiano jidomiano ba be dolu jibe na, kitoromial naio, naio barka naio, naio parinio toru laka, mia naio maka rijikia titai leleio. Mia naio mila jibe ka toro tai na jidom m̃elea baravoiano nalo, bija bajago kilkil, mia maka tonovo tai rimaluvo ea vio nene. Mia bajago na bova nalo amalmaluvo ea naio, jibe ka jokuano, jupe iliano, ilidieiano, bija jidomiano sorosoro na bova ka tomu dolu nalo. <sup>5</sup> Tomu nalo napano amila nina aju abilvil ealo janea vio, napano jidomiano napano bo a iliano napano be riano naio maka bunu toalo leleio. A abano bova kitkiti lie vo, bior napano aju ajidom verver aiasol tum̃aro naio be m̃arabo na bo ka avuru veru. <sup>6</sup> Mia maka tibe na, bior napano toro na kanano bajago naio bo jibe ka Atua kanano, a naio jaaro ga ka venia napano Atua jian banio ea kiano meuliano, toro na naruei naio buru vite novo tai napano naio bo laka ruei.

<sup>7</sup> Bogo na kito romiyotuba ea yetemeriba nei, niabedo yauo ga robinimei, jum̃ado be teau ga, mia rotuvan bereio vare ga, maka ve titai napano romijikia ravarkario ravano. <sup>8</sup> Mia bogo napano roju romeul ea yetemeriba nei, ver releal sinaniano ve teliki vija kulum̃arauo ve teliki rotukuloko kito, nina naio bare ruei,

romijikia rasaaro ga, rojidom venia bereio?

<sup>9</sup> Mia nalo napano ajidom m̄lea vite nalo, ajidom ka ave sanibiano, vede nalo maka avitilubarior, mia ajua vio na juboluboiano ruei, Sim̄aro naio jo bokarlo ea kiano jukujukuano nalo ruei.

Mia sidomsearioiani nalo napano amila lelan toro kiano meuliano amei ve telabo ealo, rivanvano adulo avan rivova laka, mia alaluv vite nonovio, a ava amadudu ea vio na vakovioiano.

<sup>10</sup> Nao, bajago na sidom m̄lea puruveru naio be burupati tai napano bajago va kinkin dolu nonovio mijikia maluvo eaio. Sidom m̄lea ka rivar veru ve telabo naio jen kito tealoo kialoo iviso, a naio burulo amiel tertelisu abano, naruei amiilo napano amolmoluo nonovio den m̄arabo na viekouoiano ruei. Karina, abar jaleleano miroano biorio, a mila jogvaiano nalo bokarlo, naruei abitilubarior vonga, ajidomial bereio mia bova ga.

### *Bajago na bo*

<sup>11</sup> Mia Timoti, jau kojibe ka Atua kiano toro tai riano, mia monoka kovilig taakamo ka juboluboiano nonovio na jibe na. Venia napano naio bo ka jau kodu toa meriniamo tulaka, naio be bajago na memeduanoo, bajago napano toro naio rimei rivu tibe Atua, bajago na viekouoiano, bajago na tinietiano, bajago na vokar vatitig im̄auano, a bajago na melumuiano.

<sup>12</sup> Jau monoka kotumolu kotu sikili ea mira lu na kanado moneano. Tiniemo bobogia re bogo napano kojumolu ea namoneano nalo telabo miralo, napano koberial kanamo verikarianoo novo na beamu nei. Atua naio bioso ka kodu meuliano nei napano maka rijikia ribisi, ana naio jian banso ea bogo nene, naruei monoka kovokar sikili rivu rivan rivano-o mia rijoru den re bereio jum̄amo. <sup>13</sup> Atua naio be burupati na meuliano na vite nonovio,

a Kristo Yesu, tilikiti napano abur naio ba ban toro na toru nei Pontas Pailat, mia naio maka rimerou, naio jikili ka ga berial kiano verbulagianoo novo, naruei jibe ka napano kito juo rojua naljuo miralo, nojidom nesian burum̄ara iliano dolu tai vanso.

<sup>14</sup> Kiniou neber jibe na, nejikili kaso ka jau monoka kovokar sikili vatitig Atua kiano iliano nalo, napano maka ve kanamo niamiamo tai p̄eli na kanamo beleano tai, riva vokar napano kiado Tubo Yesu Kristo naio riyotuba bereio. <sup>15</sup> Kiano yotubaiano na, mia naio riyotuba ka kito ea kiano bogo nene rimemedu, tibe ka napano Parinio Tubo Lu na mave naio jidom, bior napano Parinio Tubo Lu nene, naio takurano ga be tubo ka tubo kinkin nalo, naio be yoro na toru ka tomu na tortoru nonovio. <sup>16</sup> Naio takurano ga meul jo jobo jo nam̄ariga, napano naio jo joomo ea kiano burum̄ara mermerano napano joko naio ka toro rijikia re riva vaatara kanio, napano maka lele toro rial naio vo, a maka lele toro rijikia rial naio bogo tai. Kiado Atua nene, kito ravatove ka naio, a bo ka navenatuboiano ka vite nonovio na be kanano naio takurano ga, rivan rivano-o rijikia re ribisi bogo tai.

### *Namoneano nalo napano be kialo saba miroano*

<sup>17</sup> Be riano napano kito tealoo, kialoo veru nalo miroano, jum̄alo nalo bujovujo vatitig ka saba nalo. Nina naio bo ga, mia jau monoka koverlogloglo sikili ka avarvarlo m̄le re, ave m̄arou re kalo bereio riviorio. A maka rivu ka avarkar tinielo ea ga kialoo veru nene, napano vede bogo tai aiilo, aial riva kovio nonovio, mia monoka avarkar tinielo ea ga Atua. Naio ga be burupati na tonovo nalo nene, naio jo bar ijaiano toru ga amalmaluvo ka kito, miroano laka, ka ajai kito rasaaro m̄le ea kiado meuliano.

<sup>18</sup> Nalo napano jum̄alo bujo ka veru, kialoo meuliano naio monoka

rivujo vatitigio ka iñauano novo na aju amila bijaio. Maka asidomii ve toru ka monoka avokar vatitig veru nei na be kialo ga, mia bo ka asaaro ka avio ka van toro dolu napano kiano maka vare. <sup>19</sup> Verenio ajian ba jibe na, mia Atua mila napano aju amiyobijii kialo ilivuiano mave, jibe ka napano aju abitiri kunualo novo tai ju ka bogo na rimei. Ea ñarabo na, aju aba amiyotuba ka avokar meuliano na be riano.

*Iliano na maaro*

<sup>20</sup> Nao Timoti, kovokar vatitig rivu iliano novo nonovio napano neber biedu banso, napano nomidu joa junãamo ka kesian rivian lie vo.

Jau kava joomo re ea iliano nalo napano maka ajikia aija kanamo meuliano vija Atua. Tomu telabo aberloglog ka jikiaiano na yetemeriba ga, karina aberinavo kiado moneano, bija Atua kiano iliano lu, vite nalo napano maka ave riano ajuaio. Mia kialo jikiaiano na naio naruei maka rive riano ga, naio jubon lili kialo jidomiano bereio.

<sup>21</sup> Tealo abokar vatitig masouano na yetemeriba nei, aju amioliolu vatitig janea vio, mia be vite tai ga, amilaluv ñarabo na moneano napano amilaluv batitigio.

Kanaku iliano bisi ea vio na, naruei jibe ka bogo nonovio, kiniou nobolkouo ka Atua kiano tiniememiano naio to vijaso.

Kiniou, Pol.

## Mesi Juo Napano Pol Bivitauiaio Ban TIMOTI Verialiano Moti

*Tunukuano bulati na niosi nei*

Mesi juo nene napano Pol jirio ba ban Timoti naio bujo ka iliano novo nalo ka rijai Timoti napano naio be kiano bilbilu mēaka napano jo mijai naio. Burumāra jidomiano ea mēsi nei, Pol ber ka Timoti ka sikili tu sikil ka riverial Yesu Kristo kiano ioluano vou. Mia naio ber kanio, ber naio monoka rivakar sikili verloglogiano riano na ioluano vou nei, vija Verikariano Moruo. Naio ber ka Timoti ka to rila iñauiano nei bogo nonovio ka verloglog tomu nalo, bija riñau ka rivur tomu nalo amei, be iakurano ga aver aiili rivova ka naio bija iñauiano na yimo lu na nai jo milαιο.

Pol jidom Timoti ka rivan re riasol iliano vovu nalo bija baravoiano nalo na maka ajikia ala vite novo tai leleio, mia be tena rilabulag tomu nalo ga.

Ea mēsi nei bunu Pol ber ban Timoti taki bajago novo na kiano meuliano. Nine Pol kiano bajago na moneano a kiano bajago napano kiano jidomiano tebievi, a kiano bajago na tinienmiia tomu nalo, a kiano bajago napano naio bardulu bogokouo nalo na tomu nalo amila naio mijog kirvova laka ea mokotenanano, mia naio jokea berial ga Yesu Kristo kiano ioluano vou.

*Torogio nalo na niosi nei*

Iliano moti 1:1-2

Pol miaia Atua bior Timoti bija mil  
ka verloglog naio 1:3—2:13

Pol jian ilikakariano ban Timoti  
2:14—4:5

Pol berii naio bija kiano iñauano  
4:6-18

Pol kiano iliano maariano 4:19-22

*Iliano moti*

1:2 Iñauo 16:1

<sup>1</sup> Koig keneriku Timoti, kiniou Pol nojo nebivitauia mēsi nei biedu banso, napano jibe ka Atua kiano sidomiano, naio bitirilar ruei kiniou nebinimeinei nebe atevi na Kristo Yesu kiano. Kristo Yesu nene naio be bulapati na meuliano nene napano Atua berkar ka nalo napano amonea naio.

<sup>2</sup> Timoti, kiaku volkouano ka mia karamādo Atua a Yesu Kristo kiado Tubo, naljuo adu burumāra tiniememiano, tinieiiiano a tumāroano to vijaso damāriga.

*Iliano na sivaiano ban Atua*

<sup>3</sup> Jibe na napano korobiku nalo amila nua ruei binimeinei, kiniou nojoma nomila Atua kiano iñauano damāriga, nojoma nomilotu ka naio ea kiaku iviso momou. Ana ea legiano a bogiano, ea aura na volkouano nalo, nojo tinieku maio kaso, nojo neber siva toru laka banio kaso. <sup>4</sup> Nojo nojidomii jogumiramo nalo na jogvaiano, ana mila na nojidom mēlea ka monoka nevedu namaluvo kaso bereio. Ver nejikia neial bereio miramo ga, mia kiaku iviso saaro mia saaro! <sup>5</sup> Nojo nejidomii bunu kiamo viekouoiano riano, napano joa korobimora napano tiramoruo Loes, karina joa koniomo na Yunis, a jibe napano nebitilubarario ruei, vonganei mia joaso.

<sup>6</sup> Naina naruei nojo nojidomii bunu ijaiano napano Atua mije banso bogo napano nomidu jumaku joa pariparimo ka nomioakoso. Nojidom never kaso mia kola re sebi na ijaiano nei rivatove, a mia jau monoka kala vilivili vatitigio rivu damāriga. <sup>7</sup> Monoka tiniemo rimaio ka Niununo napano Atua jian ban kito, naio maka ve Niununo na morouano na kulorinio, a naio be Niununo na meroano, be Niununo na tiniememiano, a be Niununo na mila kulorinio naio rila vatitig kiano meuliano rimeinei memedu.

<sup>8</sup> Verver be riano ka Niununo nei naio joa kiamo meuliano, jau

koimou leleio re ka koverial Tubo kiano Ioluano van tomu nalo, a koimou re ka koverial kalo ka be riano, ka jau kobe kiaku bilbilu novo tai. Nalo abuku kiniou ea yimo na tetavokoiano bior kiano iñauano, mia koimou re ka kiniou kanio. Vite na mia kala, mia jau monoka tiniemo saaro vija kiniou rivior jogvaiano na Ioluano Vou, rivanvano-o rivokar venia na Atua kiano moroano milaso kobe verare ka koimaukanio. <sup>9</sup> Atua, naio milarur kitojuo ruei, a bio kitojuo ka reiel ea kiano m̄arabo na meuliano lu, mia bogo nonovio naio mijikia rijai kito. Nina maka bior ka kitojuo romiñau kiano bo p̄eli kitojuo romila venia, mia naio mila miyotuba ea kiano jidomiano bija kiano tiniememiano novo ban kito. Kiano tiniememiano na, naio mila vatitigio jo bija Kristo Yesu beamu ruei, nua ea bogo na tikariano na kito tomu nalo na yetemeriba. <sup>10</sup> Mia tiniememiano nene jo jibe na banbano bokar vonganei kia navo, napano naio binime miyotuba ea yetemeriba, maluvo ea mirado jelea kiado naioruriano Kristo Yesu. Naio binime ea yetemeriba, naio mila nonovio moroano na m̄ariano binime be tekurano tai, a kiano Ioluano Vou mila napano bogo na rojua yetemeriba kia navo, remijikia rejev meuliano na bo. A mila ka iorou, ana mia romijikia rava jouro bunu ea meuliano na mia maka rijikia ribisi bogo tai.

<sup>11</sup> Ioluano nene, naio nei naruei napano Atua bitirilar kiniou nebe kiano naverialiano, nebe kiano atevi, nebe kiano naverloglogiano. <sup>12</sup> Kiaku iñauano nei naruei mila na kiniou nojo nabar bogo nalo napano jikirkili joomo ea yimo na tetavokoiano nei kanio, mia naio bo ga, naio maka ve titai ea kiniou. Maka noimou, bior nemijikia ka naina nomoneaio, naio be riano, a kiaku moneano ea naio jikili vatitigio ka venia na nomidu joa jum̄ano, mia naio bokar vatitigio vokar bogoti na

maaro.

<sup>13</sup> Tibe nei Timoti, kiniou nojidom never kaso ka jau monoka katakii vatitig m̄arabo na iliano na memedu nalo na nejian banso, monoka kesikili kotu sikili ea Yesu Kristo bogo nonovio, a monoka kodu vatitig kiano tinietiano to rivujo ea kiamo meuliano. <sup>14</sup> Niununo Lu naio jo bujolou vatitig ea kiado iviso, mia kotuvan re ilivuiano nalo na naio midu jo vatitig ea kiamo meuliano ruei, a koto kovitkar vatitigio.

### *Pol berii Onesiporas*

<sup>15</sup> Kiniou nemijikia ka jau komijog ruei lilianiano tai na bova, napano namoneano nalo na tanobuku na toru ea vio Esia, nalo abilig taakalo ka kiniou ruei, a bija nalo na abe kiado bilbilu nalo, Paekelus bija Emojenis.

<sup>16</sup> Mia kuruado novo nei Onesiporas, naio mila bo laka. Be iakurano ka nalo amiorkar kiniou ka m̄arimieni nalo na lakoiano nei, mia naio maka rimou ka rimei riyotuba ka kiniou, naio bitikar kiniou ea saba nalo miroano, ana nobolkouo ban Tubo ka naio rilivu ka naio rive toru rivija kiano bajulukuti nalo. <sup>17</sup> Naio binime miyotuba Romo nei, maka vesiou lele vo mia naio milavio ka rial kiniou, banbano na naio binime bokar kiniou ea vio nene. <sup>18</sup> Ana naio jo mila tenalo na bo ban kiniou bereio ea vio Romo nei, jibe ka ga napano naio mijai vatitig kiniou beamu ruei ka bogo napano nojo Eveso nua kia ga vo, jibe ka napano kumijikia vatitigio ruei. Naio bo ka kiniou jibe na, namonea ka mia Atua naio tinien tii naio ka bogoti maaro.

## 2

### *Yesu kiano toro na mira naio monoka rivar jogvaiano*

<sup>1</sup> Keneriku Timoti, nojidom never kaso, bo ka kodu tiniememiano na Kristo Yesu kiano ve toru ea kiamo meuliano, a mia komijikia kosikili vatitig ka kotu bogo nonovio. <sup>2</sup> Bogo

telabo ruei jau komiagago ka kiaku iliano nalo na nojomãa nober ea mirano tomu nalo, ana vonganei monoka keial tomu nalo tai na nalo abe viekariano ka iñauano, kavari iliano nalo nei rivanlo, a iorou, ana nalo bunu amijikia averloglog lilian riva rivan tomu dolu nalo. <sup>3</sup> Kito tomu nalo na mira na Kristo Yesu kanano, mia kito rove terakurano, kanado bogo napano monoka ro-viviuo vija bogokouo to. Mia ver vonganei kiamo bogo, jau kajamo ka ga tibe ka togio na kiamo iñauano tai.

<sup>4</sup> Kalavon ka kosidomii vatitig tomu na mira. Kialo iñauano ka aue kialo toro na toru kiano uolu kanano moroano rivatove ga, mia maka atu aiasol lo ea iñauano ninio nalo tibe napano tomu dolu nalo aju amila.

<sup>5</sup> A kalavon ka kosidomii bunu m̃eaku nalo napano amila tikitiano. Nalo amilavon jikili ka atovulu, ka avokar kialo ijaiano tai, mia ver nalo amilakorov tuboiano, mia avuku bulaglo, maka ajikia avokar titai leleio.

<sup>6</sup> Mia kosidomii bunu tomu nalo na amim̃auka tiniavio. Toro na mim̃au jikili mebijo toru, nina naruei toro napano bo ka naio rivar sinaniano eaio.

<sup>7</sup> Saba nalo na kiniou nojomãa neberenio, verver jau kosidomii vatitigio rivu kalo, mia Tubo riijaso ka kovokar kiano masouano nalo na bo a kiano jikiaiano nalo eaio.

*Bo ka namoneano nalo asidomii Yesu tulaka*

<sup>8</sup> Ana nana monoka jau kosidomii loa kanio bogo nonovio, naio be Yesu Kristo. Naio miyotuba ea vio yetemeriba, miyotuba ea Tormoruo Parinio Tubo Teviti kiano yati, a iorou, amuebinio, karina naio meul bereio, jibe napano Ioluano Vou berenio. Nina Ioluano Vou napano nojo nomioliolu kanio, <sup>9</sup> a nina Ioluano Vou na nobokar jogvaiano toru kario ea vio na, nina mila na vonganei amiorkar niabeku nalo ka m̃arimieni nalo, jibe ka kiniou nebe toro tai na bova na lakoroviano na

tuboiano nalo. Mia be titai napano tomu nalo maka ajikia aiorkario, naio be Atua kiano iliano lu, ka naio jo kia jaluvo ba maka ajikia atukovio kanio.

<sup>10</sup> Kiniou nojo tinieku miia toru tomu nalo napano Atua bijauia bulaglo, ka nalalo amei avokar meuliano selia Kristo Yesu. A jidomiano nei naruei mila na bogokouo ninio na nojo naban ea, nina nojo nobokar kiniou jikili ga ka noto nala vite nonovio, ka nalo bunu ajikia avokar mermerano na vio mave na maka rijikia ribisi bogo tai.

<sup>11</sup> Iouano tai berii tenei, kiano iliano nalo be riano laka, napano ber jibe nei, berinavo

“Verver ravan ea m̃ariano vija naio, mia romeul vija naio.

<sup>12</sup> Verver rotu sikili ea bogokouo, mia roje tuboiano vija naio.

Verver rovilig taakado ka naio, mia naio tuvan kito,

<sup>13</sup> a verver ralaluv kito rojoru, mia naio to rivokar kito sikili to, bior naio midular kito be kiano, ana naio maka rijikia rila sibi, naiomaka rijikia rivuklar kito bereio.”

*Toro na bo ka rim̃au Atua kiano monoka rivokar sikili ilirianiano*

<sup>14</sup> Namoneano nalo napano aju, monoka koto koverlogloglo ka nalo tinielo ribobogia re tenalo nei. A jau monoka keil sikili vanlo ea Atua siano, ka mia nalo avilvil ea re bunu lo. Nalo aju tinielo jerlo ka nioti na iliano nalo jibe ka na nalo aju amila, maka atu ala titai na bo, a maka atu aija lele nalo dolu na aju amiagago.

<sup>15</sup> Venia nalo na m̃a jau komijikia kala tibe ka toro na bo tai na iñauano na Atua kiano, monoka kala nonovio aviniu ka rivu laka ea kiano siraragiano. Verver koim̃au rivu tibe na naruei, ana mia maka kejikia koimou ka m̃arati na kiamo iñauano bario, a komijikia komei kove toro tai na naverloglogiano

na ilirianiano na Atua kanano van tomu nalo, rimemedu a rivu.

<sup>16</sup> Kovitkar vatitig rivu ka ilikurani-ano na tomu nalo ajuña aberverenio janea vio. Iliano nalo na jibe na maka ve tena toa namoneano nalo kialo jidomiano, bior amijikia avurulo avan lie vo ea bajago nalo napano Atua naio maka sidomiio. Bo ka kavan re vaataro ka tomu nalo na ajuña amila jibe na, <sup>17</sup> bior kialo iliano nalo na jibe na, naio jibe ka menko va tai, napano jo jer toro mokotenano maka rijikia rimei rivu bogo tai.

Nemial jibe monoka never ka tomjuo nei Aemeneas bija Vaelitas, naljuo jibe na kija ruei, <sup>18</sup> bior nalo ajaluvo den m̄arabo na ilirianiano ruei, aju amioliolu ka kialo namoneano tai napano maka rive riano leleio. Nalo aju aber ka bogo maaro na yetemeriba, mia meuliano bereio den maariano to re bunu, bior ea kialo jidomiano, aber p̄eli Atua naio jo mila ruei, nina ea bogo na naio miñau ea kiado meuliano. Mia bogo na aju amioliolu ka kialo sibiano nei, nalo aju amila niegeniege tomu nalo miroano kialo moneano, mila na kialo jidomiano beve juo bereio. <sup>19</sup> A jau bunu monoka komemebiju re, bior yimo napano Atua naio jo miñaukanio, kiano bulapati burupati nalo ajikili aju jikili bo aju. Iliano nalo na ea Atua kiano Vivitauiano Lu aju, mia naljuo na memedu ka tivelinio napano nalo na ajuvan kito nei. Tai naio ber jibe nei, berinavo

Atua naio mijikia vatitigio kei nalo napano abe kiano,

mo juo nene, ber jibe nei, ber

Toro na midu Tubo ea kiano meuliano,

naio monoka tuvan bajago va nalo na m̄arabo na lariano na kariano kanano.

<sup>20</sup> Kalavon ka kosidomii tomu na saba toru kialo yimo nalo na tortoru. Joomo ea yimo nalo nene, remijikia reial baju na sinaniano nalo, napano

tealo, amim̄au kalo ea niogo p̄eli puruveru na miuvu, a tealo, amim̄au kalo ea borotano p̄eli ea iesi ga. Nalo na amial lo bo, aju abio ka sinaniano ban ea kialo burum̄ara jokoluolu nalo, a nalo dolu, aju ajinan janea vio ga. <sup>21</sup> Mia kito tomu nalo jibe na ga. Toro na mila kiano meuliano meravo bo, a be lu, a maka rim̄auka im̄auano na bova, mia kiano toro na toru rudu naio ka rim̄auka kiano im̄auano ve telabo napano bo ea mirano tomu nalo.

<sup>22</sup> Verver kosidom ka jau kotibe na, monoka kotokovio ka tiniekariano nalo na jikili a tinieiiano nalo na bova napano m̄eaku nalo kialo jidomiano mijikia rivujo kanio. Jau monoka kalavio sikili ka kiamo meuliano rivujo ka memeduanio, a viekuoiano, a tinietiiano, a tum̄aro, mia tibe na mia rivu laka vanso vija nalo dolu napano kenemiu jidomiano takurano, napano kumitu kubolkouo ka Tubo ka kiano ijaiano.

<sup>23</sup> Bogo telabo, tomu nalo amijikia ala baravo ka nalo ka kialo vite vovuiano p̄eli kialo jidomiano kinkin nalo, jibe ka maka ajikia vite. Bogo tai baravoiano nalo nei amijikia ava avokar napano nalo atuktuklo, ava dedade bereio, ana mia bo laka ka jau kava joomo re ea iliano nalo na jibe na. <sup>24</sup> Toro na miñau kiado Tubo kiano im̄auano, naio monoka ve re toro na rila baravo ka toro dolu, mia monoka rivijuku rivu kalo, monoka rijikia m̄arabo nalo na verlogloglo riva melmelumu. Naio monoka re tinieno mimi soḡeli, a kiano jidomiano ve tebievi rivu kalo.

<sup>25</sup> Peli bogo tai mia nalo tealo tinielo ail die naio, ana ver naio rilavio ka rila kialo jidomiano to rimemedu, mia naio rimelumu rivanlo ga. Ea m̄arabo na naruei p̄eli mia Atua mijikia rudu bogo ve telisu kalo ka avilig kialo jidomiano bereio, amijikia avokar kiano ilirianiano. <sup>26</sup> Nalo napano jibe nei, Sim̄aro jo bokarlo jikili ruei, naio jo mikurlo ka ala venia na naio jidom, ana ver amijikia avokar bereio kialo

jikiaiano na bo, mia amijikia avuro den kiano saba a kiano sibiano nalo.

### 3

#### *Bajago nalo na parilo jikili ka bogo na maaro*

<sup>1</sup> Timoti, monoka tiniedo bobogia re ka ea bogo maaro nalo na, mia monoka bogokouo ve miroano ayotuba. <sup>2</sup> Mia monoka tibe na ga, bior ka bogo na mia tomu nalo kialo bajago riva rivova lie vo. Ea bogo na, mia nalo tibe nei:

mia ave tomu na asidomii nalo ga bereio

mia asidomii ve toru ka veru  
mia avarvar kalo a ave m̃arou  
mia ave tomu na baravo  
mia maka ajikia ajogkar iliano na korobido nalo kialo

mia maka ajikia aver siva ka vite tai

mia ajidomii be iakurano ga ka vite nalo na be lu

<sup>3</sup> mia maka tiniel tii tomu nalo dolu

mia parilo jikili laka  
mia amioluolu a amil bova ka vite nalo na bo

mia tiniel jer tomu nalo, atukulo  
mia maka asidom tenalo na bo

<sup>4</sup> mia ala sibilili kialo bilbilu nalo  
mia maka asidomial ka titai  
mia ajidomii ka aber nalo ga abo  
mia maka tiniel tii Atua, a tiniel jii meuliano novo venia na ajidomio,

<sup>5</sup> a verver alavon ka avokar kija iñauano nalo na tertelisu na Yimo Lu, nina ea kuluniabelo ga, bior ka napano kialo meuliano berial ruei ka moneano ea Atua, kiano moroano riano na maka toalo leleio.

Nina naruei bajago nalo na tomu na bogoti na maaro kialo, a monoka koto rava vaataro re kalo.

<sup>6</sup> Kiniou neber aua laka bunu ka tire nalo napano naverloglogiano nalo na sibiano nei aju ajeliviv ea kunualo. Tire nalo nene, tealu aju abar temiano na kialo kariano ruei, a tealu, jidomiano dolu nalo na jualo, mila mia bogo na tomu nalo

abinimei bina ga jibe na, tire nalo nene tiniel m̃aro laka, maka kialo moroano ka tokovio kalo. <sup>7</sup> Venia na tomu nalo nei aberiio, mia nalo amonea ga vonganei, a aju amila jibe na banbano mia maka lele avokar jikiaiano na bo na Atua kiano ilirianiano.

<sup>8</sup> Tomu nalo na aju abinimei nei, kiniou nemial lo ajibe ka uolu na ilirianiano memedu, jibe tormoruo Mosis kiano bogo re nua, napano naljuo nei Sanesi bija Sampres, abinimei aberloglog niegeniege tomu nalo miroano kialo jidomiano. Iñauano na naruei tomu nalo na aju amila kia navo, napano kialo jidomiano bilig ba bova, maka bunu avokar kiado viekouoiano, a ajaluvo aban ea dolu. <sup>9</sup> Venia napano nalo amila, naio bova laka, mia bogo na avar vironiano nene mia riyotuba bogo tai navo, tibe ka na miyotuba ka naljuo na neber vonganei. Bogo tai, nalo aילו ka kialo sibiano nalo riyotuba ea vio medave, mia tomu nalo avitulubario.

#### *Pol kiano bajago novo nalo*

<sup>10</sup> Timoti, roju vio takurano bogo be ruei, mia nemijikia ka jau ko-bitikua vatitig kiniou. Jau komijikia kiniou jibe na, napano:

komijikia vatitig venia na nojom̃a neberloglog ka tomu nalo

komijikia vatitig kiaku bajago komijikia vatitig venia na nojidom

ka noim̃auka ea kiaku meuliano komial ka kiaku viekouoiano ea Kristo naio toru jum̃abe

komijikia ka kiaku jidomiano tebievi

komial ka tinieku jii toru tomu dolu nalo

komijikia ka bogokouo na vabe na binimei ea kiniou, mia nejikili noju ga

<sup>11</sup> komijikia vatitig vovaiano nalo na kiaku uolu nalo amila ban kiniou, jibe ka ea komeli tolu na tortoru nei Antioko, Aekoniam, bija Listra

ana komijikia niabe jalele na nabar ea juṁalo ea bogo nene.

Jogvaiano nalo nei ajikili laka, mia nobokar kiniou ga banbano nemial ka Tubo naio binimej burular kiniou den bogo na jogvaiano nalo nei nonovio.

<sup>12</sup> Nao, kito nonovio nalo napano rojidom Kristo Yesu ka toa kito, ṽeli roje meuliano na bo vija naio, monoka rejikia ka mia ravar jogvaiano ea kulo dolu nalo. <sup>13</sup> Nina naio bo ga, mia jogvaiano dolu na jo na bova, nina napano tomu nalo na kirivova bija tomu nalo na sibiano mia avario. Vonganei aju amila bova laka ruei, a mia ala rivova tibe na rivan riva rivova lie vo, rivan riva rivova nonovio.

<sup>14</sup> Mia jau Timoti, koiṁau ga vija jikiaiano nalo na bo napano kobokar ruei, a koiṁau rivan tibe na vija moneano nalo nabo napano kejikili koju jikili vatitigio eaio ruei. Tiniemo bobogu ea re ka kumemi kei napano nuberloglogso, <sup>15</sup> jikar ea bogo napano jau telisu kia ga vo ea kanamo vonuo, binimej bokar banej, mia mila na komijikia vatitig Niosi Lu, na naio berloglog ṁarabo na ioruriano na tomu nalo napano amonea Kristo Yesu.

<sup>16</sup> Vivitauiano Lu nalo nei, Atua Niununo joalo, mia amijikia aija kito ve toru laka. Nalo averloglog vatitig kito rivu, alabon kiado jidomiano, ala vatitig kiado bajago, a ala kiado meuliano rimej rimemedu rivu, <sup>17</sup> rivanvano-o mia kito Atua kiano tomu nalo romej rovu a reve verare ka rala kiano iṁauano novo nalo.

## 4

### *Pol mila ilivituniano ban Timoti*

<sup>1</sup> Timoti, jibe ka kitojuo rojua Atua mirano, a ea Kristo Yesu siano, nebika denso ka jau kovar vatitig tenalo tai na nojidom nover kaso. Kitojuo remijikia ka be kiado Tubo, mia naio tibure nalo na aṁarṁaro ruei vija nalo na ameul, a kitojuo roju rojidom temi laka ka kiano

liliuano bereio, vija kiano nave-natuboiano napano mia naio rivitiri lario, naruei mia monoka kojog vatitig iliano nei rivu.

<sup>2</sup> Venia na ka jau kala naio jibe nei: bogo nonovio monoka jau koioliolu ka Iliano Lu. Verver bogo rivu ṽeli bogo rivova, mia monoka kesikili kotu ka koverialio. Monoka kalavon ka kovuru tomu nalo, monoka kovururiri nalo napano aban ea ṁarabo dolu, a monoka kotunukakar nalo napano amonea.

Mia bogo na kala iṁauano nalo na, bogo nonovio kiamo jidomiano monoka rive tebievi rivu, mia maka lele kejikia tiniemo riṁaro ka koverlogloglo. <sup>3</sup> Bogo nalo aju abinimej ka mia tomu nalo maka asidom ka ajog verloglogiano nalo nabo, a mia tilinielo rivilulu bior jidomiano doldolu nalo, a mia atu avuru naverloglogiano ve miroano ka ṽeli mia amijikia aver tenalo na bo kalo ka ajog rivu kanio. <sup>4</sup> Mia nalo atuvan jog kariano na ilirianiano, a mia alaluvuio ṁarabo, ava atakisur tukunuano nalo na tomu nalo ga amirṁaukanio.

<sup>5</sup> Mia jau monoka tibe na re, a kala kiamo jidomiano to melumu ga, kovokarso ea bogokouo, kala kiamo iṁauano ka koioliolu ka Ioluano Vou, a koiṁau takii venia na Atua bioso ka koiṁaukanio.

### *Pol mial vaataro ka auebin naio riṁaro naruei*

<sup>6</sup> Ea tivelinio na kiniou, nomijog jibe vonganei nebinimej vaataro ea juluvati, nebinimej ea vio tai na mia monoka nala sida ka kiaku meuliano rivior Ioluano Vou, nemial jibe kiaku bogo ka notuvan vio na naio jo binimej kiana ruei. <sup>7</sup> Mia naio bo ga, ka nemijikia ka kiniou nojo nemila mira, nejikili vatitig bo; kiniou nejikiti, nejovulu nono bo; a kiniou nobokar moneano, maka notuvan bogo tai.

<sup>8</sup> Tomu na memedu nalo na Tubo kiano mia nalo avokar batubatu lu, a be tinieku ka kiaku naio midu

vatitigio jo mave ruei, ka mia rudu van kiniou ea legiano na maaro.

Ea bogo na, naio tibure tomu nalo rive memedu, a mia naio sian jidomiano van kito roviniu napano kiado jidomiano naio jikili ka rasir-arago kuku ka kiano rimeiduluiano.

### *Iliano na maaro*

<sup>9</sup> Timoti, kiniou nojidom laka ka kalavio sikili ka kalasoḡeli komei kean kiniou ea vio nei. <sup>10</sup> Kiniou nojidomso laka, kuruado nei Dimas, vite nalo na vio yetemeriba abur kiano jidomiano banbano buro ba Tesalonaika. Ea kiado dolu nalo, Kresens bunu jaluvo ba Kalesia, a Taitas maka bunu to vija kiniou, naio ba Telmasia. <sup>11</sup> Bilbilu tai ga naio jo bija kiniou vonganei, nina be Luka. Ana verver jau komijikia ke-leal Mak, mia kovuruio rimej vijaso, bior nemial ka naio jo miija kiniou toru ea iñauano na Tubo kiano napano nojidom nala. <sup>12</sup> Tikikas, kiniou nemiila naio ba Eveso ruei.

<sup>13</sup> Mia never kiaku tenalo tai, ver bogo na komei ea vio nei, mia jau kovarlo amei. Kiaku kulukoti na niavo, nabar ju bija Karpas bogo na nojo Troas, a kiaku niosi nalo bunu a kiaku mēsi nalo, saba nalo na nojidom verver jau kavarlo amei.

<sup>14</sup> Jau komijikia toro na mimāuka tano ḡili marau nei Aleksada, naio mila iliano bova telabo laka ban kiniou. Mia Tubo ga naio rivitii ka rila venia ka naio, <sup>15</sup> a monoka neverial ka kojikia ka naio jo mil die toru kiado Ioluano Vou, vonganei monoka kovitkar vatitigso ka naio.

<sup>16</sup> Tomu nalo na tortoru na vio Romo nalo amila vioriano ka kiniou ea komeli vaarakurano ruei. Ea bogo na, bilbilu dolu nalo abiniu aburovuro, maka lele tai rimej to ka tivelinio na kiniou. Mia nina bo ga, bo verver Atua naio rila siniabu re kalo rivior. <sup>17</sup> Ea bogo na, Tubo naio takurano bija kiniou, mia nomijog

jibe naio midu moroano toru ban kiniou, ana nejikili ka neberial vite nonovio na Ioluano Vou ea tomu nalo miralo, mila taara na nalo napano maka amonea Atua amijog. Ea bogo na, be riano, kiniou nojo joomo ea niono laeon ruei, mia naio midular kiniou denio bereio.

<sup>18</sup> Maka nejikia mia noviniua venia na bova bereio, mia nomidu kiniou nojoa Tubo juñano, ka naio mia rilarrur kiniou ka noto vija naio ea kiano vio na bo mave ea tiniabene, a bogo nonovio mia kiniou neje bereio kanano mermerano vanio, rivano-o mia maka rijikia ribisi bogo tai. Mm.

<sup>19</sup> Vite tealo bereio ka never, aua kover kavijo bo ḡeli bogiano bo ka tira nei Prisila bija koano Akuila, a bunu van nalo na Onesiporas kiano torogio nalo. <sup>20</sup> Erastas naio maka bunu rimej ea vio nei, naio jo Korin ga, a bogo na kumemi numitu nubinimej, nuboru Maelitas, ana Trovimas naio mie, nojuvan naio jobo ea vio na.

<sup>21</sup> Timoti, nojidom laka vonganei ka jau komei soḡeli ea vio nei, bior bogo na niavo jo binimej vaataro.

Nalo na vio nei aberinavo neverial kaso ka nalo aju tinielo maio kaso laka, nina Yubulus, Putensa, Linas, Klotia, bija bilbilu nalo dolu.

<sup>22</sup> Namaaro ea vio na, neber Tubo to vija niunumo, kiano tiniememiano to vija kamiu kuviniu.

Kiniou, Pol.

**4:10** Kolo 4:14; Vaili 1:24, 2Kor 8:23; Kale 2:3; Taitas 1:4      **4:11** Kolo 4:14; Vaili 1:24, Iñauo 12:12,25, 13:13, 15:37-39; Kolo 4:10; Vaili 1:24      **4:12** Iñauo 20:4; Eves 6:21,22; Kolo 4:7,8      **4:13** Iñauo 20:6      **4:14** 1Timo 1:20, Rom 2:6      **4:19** Iñauo 18:2, 2Timo 1:16,17      **4:20** Iñauo 19:22; Rom 16:23, Iñauo 20:4, 21:29

## Mesi Napano Pol Bivitauiario Ban TAITAS Verialiano Moti

*Tukunuano bulati na niosi nei*

Taitas, naio be toro m̄eaku tai napano maka ve taara na Israel, mia naio binime i be namoneano, naruei jo jakisor Pol ka rijai naio ka iñauano na aberial Yesu Kristo kiano ioluano vou. Pol midu Taitas joa uleule nei Krit ka vitikar iñauano na yimo lu ea vio na, a naio bivitauiario m̄esi nei ba ban naio ka verii vite tolu.

Nana be moti, Pol ber ban Taitas ka sidomkar bajago na navuri-m̄araboiano nalo na yimo lu monoka atakiio. Naio ber jibena, bior ka tomu miroano na Krit, kialo bajago bija kialo meuliano maka rimemedu. Mia juo nene Pol berial m̄arabo ban Taitas napano naio monoka takiiio ka verloglog tomu nalo ea taara dolu nalo joomo ea yimo lu. Nina tormoruo nalo a tiramoruo nalo a m̄eaku nalo bija naiñauano kurano nalo. Mia naio berinavo tiramoruo nalo monoka averloglog tira m̄eaku nalo.

Mia maariano nene, Pol berial ban Taitas verloglogiano nalo napano naio monoka sian van tomu nalo, napano memedu ka namoneano nalo atakiio. Nalo monoka atu rivu vija tomu dolu nalo, a monoka ave bilbilu vatitig vijalo napano maka atu ala baravo, bija tomu na yimo lu nalo monoka ave re terakurano.

*Torogio nalo na niosi nei*

Iliano moti 1:1-4

Navurim̄araboiano nalo na yimo lu 1:5-16

Taara dolu nalo kialo iñauano joomo ea yimo lu 2:1-15

Iliano na verloglog tomu nalo 3:1-11

Iliano maariano 3:12-15

*Pol ber ilivorvoruano ban Taitas*

<sup>1</sup> Keneriku Taitas, kiniou Pol, na-jaaro laka ka nebiviuoso bereio ea m̄esi nei, ea Atua siano, napano nebe toro na kiano iñauano, a ea Yesu Kristo siano, napano nebe kiano atevi.

Nojoa vio nei, nojo nomim̄au kia ga vo bija tomu nalo napano Atua bijauia bulaglo ruei abe kiano, kar napano nojidom ka kialo viekouoiano rime i sikili lie, a kialo jikiaiano ea ilirianiano rime i ve toru lie vo. Verver tibe na, mia kialo bajago mijikia rime i memedu tibe ka bajago na Atua kiano tomu lu dolu nalo, <sup>2</sup> a mia amijikia avokar meuliano napano maka rijikia ribisi bogo tai.

Kiado jidomiano ju jikili ruei ka mia kito rovakar meuliano na, kar napano Atua berkar nua beamu ka mia naio rila tibe na, a romijikia ka naio maka leleio rila sibi bogo tai. <sup>3</sup> Naio be kiado Atua na Ioruriano, ana bogo napano naio mial ka kiano bogo memedu, naio midu kiano iliano maluvo ka rila kiado m̄arabo na meuliano, a vonganei midu joa kiniou ka nava noioliolu tanea vio.

<sup>4</sup> Ana Taitas, nina naruei kiaku m̄esi banso. Nemialso jibe jau kobe keneriku memedu napano kitojuo kiado viekouoiano ve takurano ga, mia kiaku volkouano karso naio ban jibe nei, ka Atua karam̄ado bija kiado Kristo Yesu na Ioruriano kialo tiniememiano a tum̄aroano to vijaso.

*Taitas kiano iñauano ea venuo nei Krit*

<sup>5</sup> Nebivitauiario biedu, nojidom nala iliano vitunu vanso ea iñauano napano koje komila ea Krit kia ga vo. Beamu laka, kitojuo naruei robe moti ka romidu ioluano binime i ea vio nei, a bogo napano najaluvo, iñauano na togio toru jo kiano vo, ana nomiduso koje ka kala iñauano nalo rime i rivu lie beamu.

Jibe napano neber kaso ea bogo na, nojidom koselviv ea komeli nalo,

koioua tomu tealo ka nalo amei ave navurim̄araboiano lu.

<sup>6</sup> Nalo na, monoka ave tomu napano maka tokoriano tai toa kialo meuliano, monoka asoro ka koalo tira ve takurano ga, napano aberiano tulaka bijaio, a kenerilo nalo, nalo bunu monoka amonea Yesu, maka lele rimemedu kito reial parilo nalo sikili, ðeli atu atuðe kialo tormoruo juo kialo iliano. <sup>7</sup> Monoka tibe na bior napano tomu na tortoru na tum̄aro, abe tomu na vitikariano na Atua kiano in̄auano lu, ana nalo monoka ave tomu na memedu. Nalo asidomii re ka aver nalo abe toro tai, nalo monoka tinielo mimi soðeli re, nalo monoka amun m̄elea re uei na jikili, nalo ave re toro na tukurukuano, a nalo monoka asidom m̄elea re saba, maka leleio.

<sup>8</sup> A ver tibe na, mia navurim̄araboiano kiano meuliano naio monoka mia tum̄abe? Bo ka naio vitikar valauo nalo ea kunuano, bija bajago novo nalo dolu na jibe nei. Bo ka naio rivuru vatitig in̄auano nalo, naio be masou laka, kiano jidomiano meravo bo, a naio jilanvuu bo ka kiano meuliano. <sup>9</sup> Ilirianiano nalo napano aberloglog ka naio, naio monoka rivakario sikili rivu, ka rila ka naio kija mijikia riverloglog lilie kanio rivano.

#### *Kuvitkar ka namoneano sibiliano nalo*

Tomu tealo aber ðeli kiado mononeano be sibi, mia kiado verloglogiano novo nalo mijikia rila kialo iliano nalo maka rijikia sikili tu rivu leleio.

<sup>10</sup> Tomu telabo nalo aju napano maka asidom ajog kito, ana aju amil miroano laka, ana aju amila dede ga ka avuru tomu dolu kialo jidomiano rive dolu. Ea Krit na, kitojuo rajaaro toru ka tomu miroano na Ju napano roburulo abinimei abe Yesu kiano tomu nalo, mia vonganei nalo dolu nei ajidom ka avurulo avan rivova bereio. <sup>11</sup> Jibe na, bo ka titai tokovio ka niolo, napano nalo aju amila bulag nono m̄aratavo tealo ruei. Nalo aju aberloglog tenalo

napano maka amemedu ka averiio, a nalo aju amila dede ga laka ka alaio, maka rivior jidomiano novo, a kar jidomiano va nei ga ka ðeli nalo ajikia avar veru ve telisu kario.

<sup>12</sup> Ver ðeli tomu nalo na Krit, kialo bajago jibe nei ga, bior toro tai ka rivivitau ea tukunuano re nua, napano naio be toro tai na kialo vio memedu, bogo tai naio beriilo, berinavo

Tomu na Krit nalo abe tomu na sibiano, nalo abova jovulu kiribue,

nalo abe tomu na yoviano, nalo abe tomu na ajidomii mabolo ga.

<sup>13</sup> Toro nene, kiano iliano na jikili kija, a nemial jibe ðeli be riano ga na, ana bo ver koil sikili vanlo, ver ðeli, mia kialo moneano maka leleio rijikia rimej rimemedu rivu bogo tai. <sup>14</sup> Vonganei, nalo aju abokar jikili kulo Ju re beamu kialo tukunuano moruo nalo, a nalo aju ajaaro ka tomu tortoru dolu nalo kialo iliano napano nalo aju abukular ilirianiano, a kar venia nalo maka asidom amonmonea Atua kiano iliano lu novo nalo napano roju rejian banlo?

<sup>15</sup> Toro napano kiano jidomiano meravo bo laka, tenalo napano miagiago maka rijikia rila kiano jidomiano rimej riagiago, mia saba nonovio meravo bo ka naio. Ana toro napano maka rimonmonea, napano kiano jidomiano miagiago, ðeli titai meravo, mia maka rila kiano jidomiano rimej meravo, mia maka bunu titai napano meravo bo ka naio. Nina bior napano kiano jidomiano a kiano iviso nalo aba abova ruei.

<sup>16</sup> Tomu nalo napano nojo nebitaia nei, nalo aju aberial ka nalo amijikia Atua, a kialo in̄auano nalo na amila meravo ban kito ka nalo maka ajikia leleio. Kialo iviso minunu a mijalele, parilo kirisikili laka, nalo maka avare ka ala in̄auano novo tai leleio.

## 2

### *Verloglogiano novo mila bajago novo miyotuba*

<sup>1</sup> A Taitas, nemijikia ka mia kotibe na re, a mia monoka koto koverial kalo iliano nalo napano amemedu ka verloglogiano na memedu nalo.

<sup>2</sup> Iliano tealó na resian van tormoruo nalo jibe nei, ber nalo monoka aikulkul re, atu sikili m̃ariga, a bo ka asidomii ve temi ka kialo meuliano, bija kialo jidomiano ve masou vatitigio. Ea tivelinio na amonea Yesu, ea tivelinio na tinietii toro dolu, a ea tivelinio na sikili tu ea iñauano, monoka avujo ka bajago na memedu bogo nonovio.

<sup>3</sup> Tiramoruo nalo bunu kialo iliano tealó jibe nei ju, ber monoka avujo ka bajago na abatove ka Atua, nalo maka atu ail vova tanea vio van nalo dolu, a jidomiano ka amun uei na jikili maka rivakar m̃elealo. Iñauano napano bo ka ala naio tibe na, monoka averloglog ka nalo dolu tenalo venia na bo ka aim̃aukanio.

<sup>4</sup> Toru ea telikiti na tira m̃eaku nalo napano ajojoro vonga, nalo monoka averlogloglo ka m̃arabo vu nalo ka asidom vatitig koalo nalo vija kenerilo nalo. <sup>5</sup> Tiramoruo nalo nei, kialo jidomiano nalo monoka ave masou, kialo meuliano nalo monoka rimeravo, monoka avitigar vatitig kunualo nalo, kialo iviso abe tiniememi, a nalo aju abatove ka koalo nalo. Verver nalo ala tenalo nei, mia tomu nalo avitilubar ka Atua kiano iliano napano berial m̃arabo novo nalo nei, naio be vivitauiano lu tai napano bo laka.

<sup>6</sup> Ea bajago nei kia ga vo, nojidom ka kosikili ka tete m̃eaku nalo, ka monoka atilavuu vatitig ka kialo meuliano. <sup>7</sup> Bo ver bogo nalo aialso, nalo aial napano koje komieliel beamu ka nalo ea m̃arabo na meuliano napano bo, napano bujo ka iñauano novo nalo, ana nalo amijikia aue jaamo ea jaalo.

Venia napano koverloglog ka nalo, monoka toa kiamo meuliano rui, a

monoka amijikia avitilubar ka jau bunu koje kojidomii temi bereio eaio.

<sup>8</sup> Venia napano amijog ka koje koberial, monoka iliano nalo napano mia nalo maka ajikia ail vanso bereio kario. Ver tibe na, tomu nalo napano aserm̃i ka kito, mia nalo alavon ka atukovio ka kito, ana mia nalo ava ave vovu ga, mia maka bunu kialo iliano nalo napano mijikia sikili tu.

<sup>9</sup> Ea tivelinio na nalo napano amim̃au kurano toro na toru kiano, monoka kala ajikia vatitigio ka nalo monoka avatove ka naio, a nalo monoka asikil ka ala napano naio mijikia saaro ka iñauano napano amila be kiano. Nalo maka ajikia ailkuei van naio bereio, <sup>10</sup> a maka rivu nalo asidomii ka amijikia avina van kiano tenalo tertelisu tai rive kialo. Nalo monoka ave riano vu laka, ka ala napano kialo toro na toru mijikia rimonmonealo ka kiano tenalo nonovio. Bogo napano namoneano nalo aim̃au memedu rivu tibe na, amijikia ala kiado verloglogiano ea telikiti na kiado Atua na Ioruriano binimei mave toru laka ea kulo dolu nalo kialo vitiano.

<sup>11</sup> Bo ka tomu nalo avitilubar kiado moneano, bior napano Atua naio be tiniememi ea yetemeriba nei, jian ioruriano maluvo ea taara nalo na tomu nonovio nalo.

<sup>12</sup> Naruei kito napano robakario, robitilubarío napano Atua jo berloglog kito ka kiado meuliano, ka monoka rotuvan bajago va na tomu napano maka ajikia naio, a monoka rovilig taakado ka sidom vovaiano nalo na yetemeriba nei. Yetemeriba nei naruei naio be vio napano romeul rojuao, a kiado meuliano monoka melumu rivu, monoka memedu, monoka rivare ka Atua kiano tomu nalo. <sup>13</sup> Monoka rotu tibe na ga, monoka rotu rorea ga bogo na bo napano kiado jidomiano joaio, napano kiado burum̃ara Atua, kiado Naioruriano Yesu Kristo mia maluvo eaio, bija kiano burum̃ara

miamoiano. <sup>14</sup> Naio naruei napano mijamo ka kiano burukija miou kar kito, buru bulag kito den moroano na vovaiano, jekon kito romeravo robinimej robe taara lu tai ka rovar ka kito ka iñauano novo nalo jibe napano naio jidomio.

<sup>15</sup> Iliano nalo na naruei mia koto koverialio. Toro napano bo ka atunukakar naio, jau kotunukakario, a toro napano bo ka ail van naio, jau koil vanio. Bogo nonovio jau koiñau vija moroano a sikiliano, a jau kotuvan re ka aikueso ðeli asidomii iakurano easo.

### 3

#### *Bajagvuiano na toro napano naio monea Yesu Kristo*

<sup>1</sup> Bo jau koverloglog namoneano nalo ka asidomii bogo nonovio bajagvuiano ka alaio. Ea tilikiti na tubo nalo kialo, bija kialo tomu na tortoru nalo, napano aju, nalo monoka avamenealo, amonealo, a asaaro ka ala kialo iñauano novo nonovio. <sup>2</sup> Mia jau monoka koverlogloglo bunu, ka nalo na, nalo maka ka atu averii niegeniegelo bereio, a maka rivu ka ava jouro ea baravoiano nalo. A bajago napano nalo monoka ala ka toro dolu naio jibe nei, ka nalo monoka amelumu, nalo ala re bajago napano ajikili, a monoka ala buruñara vameneano bogo nonovio.

<sup>3</sup> Iliano nalo jibe na abe kiado robiniu, kar napano maka nalo dolu ga, ana beamu nua, kito bunu rojua meuliano va. Kito romila vovu ban Atua, a kito romila parido jikili ka naio. Bajago va buru bova kito banbano-o robinimej robe toro na jo yetano ka moroano na sidomi-vaiano nalo a saariano va na yetemeriba. Ea bogo na, sado sinaniano na bogoti bogo nonovio naio be tiniemimiano bija tiniekakariano nalo. Kiado iviso jermii tomu dolu nalo, a mave kanio, roju rejermii kito bereio.

<sup>4</sup> Kito rojua meuliano va jibe nei banbano-o, a iorou, Atua kiado Naioruriano, kiano tinievuiano a tinietiano novo maluvo ea kito, <sup>5</sup> naio milarur riano ga kito. Naio milarur kito jibe nei, maka kar kiado iñauano tealo na memedu napano ðeli kito romilaio, mia bior ga kiano tiniememiano lu ea kito.

Naio tinien miia kito, ana naio jekon kito, mia Niununo Lu mila kito romoluo bereio ea meuliano vou. <sup>6</sup> Yesu Kristo kiado Ioruriano kiano burukija miou jovuko kito.

<sup>7</sup> Naina naruei ñarabo na kiano tiniememiano, kito robinimej romemedu bo ruei ea mirano. Mia maka naina ga, mia mave kanio, naio mila kito robinimej robe kenerinio nalo, napano mia romijikia rovar buron kiano jajumñano napano mia jian ban kito, naina meuliano napano maka rijikia ribisi.

<sup>8</sup> Siva toru kanio, iliano nalo na be riano laka.

#### *Pol junukakar Taitas*

Nojidom ka jau kosikili ka Atua kiano namoneano nalo ka nalo avokar vatitig iliano nalo nei, a monoka nalo alavon sikili bogo nonovio ka avokar iñauano novo nalo, napano amemedu, a napano amijikia aija kulo dolu nalo. <sup>9</sup> Bogo tai aju aberver iliano kurano nalo napano maka ajikia aija toro kiano meuliano, jibe napano aju amila baravo vovu ea jidomiano nalo napano maka ve sinaniano tai toaio, ðeli aju amila baravo kar korobilo kialo saba nalo napano abokar vatitig sialo ju. Bogo tai aju amiolualo, banbano-o bokar napano kialo jidomiano mijikia tiburevure bunu ea iliano nalo napano Atua kiano tuboiano berenio. Mia bo ka kover ka namoneano nalo ka avuron re lo vija iliano nalo na jibe nei.

<sup>10</sup> Ver toro tai to riasosolio, jo juþe iliano bogo nonovio, amijikia ail vanio ea bogo tai, ver makanio bogo ve valuo, a ver naio maka sidomial, jo mila duio ka mila, bo

ka nalo avior re bunu vija naio ea tenalo tai.

<sup>11</sup> Kito romijikia tomu nalo jibe na ruei, ka kialo meuliano nalo bilig bova, a kialo jidomiano nalo bujo ka kariano. Maka kito napano rober ka naio bova, mia kiano iñauano nalo ga berial kiano vovaiano ea mirado robiniu.

*Iliano maariano nalo*

<sup>12</sup> Taitas, nojidom noverenio kaso ka ver jau keial napano neiila tomjuo nei Atemas a Tijikas nalo tinene rimaluvo easo, ea bogu na naruei jau komijikia kataluvo ea vio na, komila vio jikili ka komei keial kiniou ea Nikopolis. Nina bior napano maka ve sio, mia nataluvo den vio nei, nojidom nava notoa vio na riva rivokar bogu na niavo rivar laka ruei.

<sup>13</sup> Naljuo dolu nei napano aju bijaso vonganei, naina toro na tuboiano neibano Sinas, bija Apolos, mia kolavon ka naljuo amijikia adu kialo m̄arabo ave juo bereio ve sio re, ka avan lie ea vio dolu nalo. Aua, jau kojai naljuo ka vaio napano juñalo bulati kanio.

<sup>14</sup> Joaso bunu ka kotunukakar kiado tomu nalo tibe napano neber vonga, nalo monoka alavon sikili ka avar iñauano novo nalo. Verver tibe na, bogu napano titai na iloiano, a nalo be kialo vite nalo ruei napano mijikia riijailo, a mila bunu napano kialo meuliano mijikia rivar m̄arati lie vo tibe napano Atua jidomio.

<sup>15</sup> Nalo napano aju bija kiniou vonganei aberenio kavijo bo p̄eli bogiano bo banso. A bilbilu nalo napano aju bijaso napano aju ajidomii kumemi ka kito roviniu ea taara na kiado moneano ve takurano, aua kover kalo ka kumemi bunu numitu numisidomiilo.

Kiaku volkouano ka mia Atua kiano tiniememiano to vija kamiu kuviniu tulaka.

Kiniou, Pol.

## Mesi Napano Pol Bivitauiiao Ban VAILIMON Verialiano Moti

*Tukunuano bulati na niosi nei*

Vailimon naio be namoneano tai, napano tomu miroano ajidom naio be toro tai na yimo lu na rove Kolosi, a naio be tubo na naimãuano tai na siano Onesimas. Onesimas buro nua den kiano tubo Vailimon, ba jo yako Romo, bururvenuo na Pol joa nalakoiano eaio na naio biviuo Pol, a bogo na naio binime be namoneano. Pol jiri mēsi tai ba ban Vailimon, bika naio ka monoka rivuru Onesimas rivan bere to vija naio bereio. Pol ber ban Vailimon, ber vonigane be Onesimas binime be namoneano ruei, mia bo ka naio tinien ser re naio, mia viekoko naio a rivuru bere naio ka ve kiano naimãuano kurano bereio. A mia naio ve re ga naimãuano kurano, rime ve kuruano riano tai bior napano naljuo amiasol ea Yesu Kristo.

*Torogio nalo na niosi nei*

Iliano moti 1-3

Pol miaia Vailimon bior kiano imãuano 4-7

Pol bika kirisikili ban Vailimon ka rivuru bereio Onesimas 8-22

Iliano maariano 23-25

*Pol jikar kiano iliano ban Vailimon*

<sup>1</sup> Kiniou Pol, nojomã nejirii mēsi nei biedu banso, Vailimon. Vonigane be kiniou nojoa komeli labo na vio Romo, mia bior nojomã nemila imãuano napano Yesu Kristo kiano, tenene na nalo amila kiniou nojoa yimo na tetavokoiano ea vio nei. Kuruado nei Timoti naio jo bija kinou ea vio nei, naruei kumemi juo nuber kavijo bo pēli na bogiano bo banso, napano kito tolu rominãu ea ga Tubo takurano ga, <sup>2</sup> a kumemi juo kenememi iliano nei jibe nei naio rivan bunu kuviviniedo na, Niavia,

a van bunu toro na kiado bagaro na, Akipas, napano naio be toro kouo na mira na Tubo kiano imãuano, bija bagaro na namoneano dolu nalo napano ajumã abior ea kunuamo.

<sup>3</sup> Naruei kumemi juo nubolkouo ka mia Atua Karamãdo, a kiado Tubo Yesu Kristo, nalo ve juo adu kialo tiniememiano a tumãaroano to vija kamiu ea vio napano kumituaio.

*Vailimon kiano tinietiano a viek-ouoiano toru laka*

<sup>4</sup> Kuruaku Vailimon, bogo napano nojomã nejidomialso ea kanaku ilivol-kouano nalo, bogo nonovio nojomã nober siva damãriga ban Atua biorso. <sup>5</sup> Nina bior nomijog ruei ka napano ajumã aberii kanamo bajago novo, napano kanamo viekouoiano ea Tubo Yesu naio jikili vatitigio bo, a kanamo tinietiano ban namoneano nalo bunu, naio toru laka. <sup>6</sup> Ana nojomã nobolkouo kaso ka bogo napano kojomã kobiovio bulag kiamo viekouoiano ban kulo dolu nalo, mia rila nalo ajikia ve telabo lie vo ilivuiano novo nalo napano romijevio, napano romidu Kristo ea kiado meuliano. <sup>7</sup> Nao, Vailimon, kanamo tinietiano novo na naio jomã mila namoneano lu nalo, kialo iviso amijog bo-o mia, mia bogo napano nomijog vite nei mila kiniou nomijog bo bereio, a mila najaaro toru kanio.

*Pol balea Vailimon ka naio rivuru bereio kiano toro na imãuano nei Onesimas*

<sup>8</sup> Nao Vailimon, kiniou nejidom novika titai denso. Ea burumãara imãuano na Kristo kiano napano nojomã nemilaio, pēli memedu ga ka mia kiniou never batitig ga ka jau ka mia jau kala tibe na tibe na, <sup>9</sup> mia takii bajago na tinietiano, maka nesidom neil sikili tibe na vanso. Vonigane be binime be nebe tormoruo ruei, nojoa yimo na tetavokoiano bior Yesu Kristo, naruei nejidom nevika denso ga, verenio jau kajaaro ka kajamo ka vite napano ver nevika denso.

<sup>10</sup> Mia toro tai joa vio na, ka bogo napano nojoa yimo na tetavokoiano jibe na naruei ana nobur toro nene binimeia ea Kristo, mia vonganei nojo nemial naio jibe ka keneriku tai. Toro nene, Onesimas ga, napano beamu naio be toro napano jomā miñau kanamo, karina naio buro binimeia ea vio nei. <sup>11</sup> Nao, toro nene, siano nioti nene be “Rila iñauano na bo,” mia nemial jibe ka nanua beamu, naio maka tomā rimāu batitig kanamo rivu laka. Mia vonganei, napano kiano meuliano mijulio ruei, mia kiniou nomonmonea naio ka mia naio mijikia rila iñauano novo nalo ka mia rijaso, a naio mijikia rila iñauano ka mia rijai kiniou bunu.

<sup>12</sup> Mo, vonganei nejidom neila bereio Onesimas riviedu rialso bereio naruei, jibe ka nomidular kiaku meuliano togio ga nemiila biedu banso. <sup>13</sup> Najaaro ver naio toa vio nei vija kiniou ga, ka rijai kiniou ea bogokouo nei, napano kiniou nojoa yimo na tetavokoiano bior Ioluano Vou, mia ver naio rila tibe na, javukia napano naio midu jelemo, naio mila iñauano tai napano memedu ka mia jau kala van kiniou. <sup>14</sup> Mia maka rivu ka mia nesikili kanio ka mia naio to vija kiniou tibe na, bior jau maka kejikia. Nejidom ka vere jau kala iñauano novo tai tibe na van kiniou, mia nina maka bior notutuaso kanio, mia bior kanamo jidomiano novo a kanamo tinievuiano ga. Venia napano mia Onesimas naio rilao, ve kanamo ga ka mia jau koverialio.

<sup>15</sup> Riano ga ka napano Onesimas naio buro denso, ana mia kei rijikia, p̄eli Atua ga mila naio jaluvo denso ka bogo na bulati tai jibe na, ka vere naio riviedu easo bereio, mia naio ve kiamo bo kanio naruei, rivano-o mia to toboto. <sup>16</sup> Nina bior vonganei, mia naio riviedu easo bereio maka bunu tibe ka toro na kiamo iñauano ga, mia naio riviedu bereio tibe kanio kuruamo tai ea Yesu, napano

jibe na naruei naio bo laka. Tinieku jii naio toru ruei, jibe ka kuruaku tai, ana nomonmonea ka mia jau tiniemo tii naio riva lie riva lie vo laka, bior naio be kanamo toro ruei, ana mave kanio, vonganei naio binimeia be kuruamo bunu.

<sup>17</sup> Vite na naruei nojomā nobika denso. Ver jau komial nejibe ka kuruamo, a ka robe juo robe tomu na romila iñauano takurano ga, nejidom ka mia kovuru bereio Onesimas riviedu easo, rive verare ga ka napano ver neviedu easo, mia jau kasaaro ve toru laka ka mia kovuru kiniou neviedu ea kunuamo. <sup>18</sup> Mia vero Onesimas bina ka kiamo titai, p̄eli na naio mila bulag kiamo vite tai, p̄eli na vaio, mia kiniou ga nevitii vite nalo nene.

<sup>19</sup> Iliano nei kiniou Pol nei nojomā nejiriio ka jumāku ga, javukia kanaku verikariano tai banso, ka ver kosidomii, mia kiniou novulu bulag nonovio kiano jabue denso. Mia p̄eli jau kotomā kosidomii ve dolu kia ga ka jau bunu be kiamo jabue tai napano toru joa kiniou, napano be kanamo meuliano vodolu, bior kiniou nemilaso kobokar meuliano nei ea bogo napano nomioliolu ka Ioluano Vou banso. <sup>20</sup> Tibe na, ana mia nejidom ka jau kala iñauano novo na rivan kiniou napano nojomā nebika denso ea Tubo siano. Kuruaku liki, ver kala tibe na, mia nojog rivu ve toru laka bereio ea kiaku iviso, napano Kristo kiano meuliano novo naio jomā miñau ea kiado meuliano nalo jibe na.

<sup>21</sup> Maka nemerou ka netiri iliano nalo nei vanso tibe na, bior nemijikia batitig ruei ka napano mia kala takii napano nebika denso. Nao, nemijikia bunu ka p̄eli mia kala rivu lie bunu, rivano-o mia tovulu kanaku vitiano.

<sup>22</sup> A nejidom nevika vite dolu tai denso bunu, ka neber bo kaso ka kala batitig kiaku vajoomo tai ea kunuamo, bior kiniou nebe kiaku jidomiano kouo tai ka vesiou re, mia Atua naio rijamo ka neviedu

ea kamiu bereio, javukia napano kumituña kubika denio ea kenemiu volkouano nalo.

*Pol kiano iliano maaro ban Vailimon*

<sup>23</sup> Epavras nei, napano naio bunu kumemi juo numitua yimo na teta-vokoiano ea vio nei bior Yesu Kristo, naio berenio Atua riilivu ka jau.

<sup>24</sup> Ana nalo dolu na, Mak a Arestakas a Timas a Luka, napano nalo ajuña amijai kiniou toru ea iñauano, nalo bunu aber ajuña tinielo maio kaso ea kanalo volkouano nalo.

<sup>25</sup> Mia vonganei, kanaku volkouano jibe nei, ber tiniememiano napano Tubo Yesu Kristo kanano, naio toa kenemiu iviso nalo nonovio.

Kiniou, Pol.

## **Mesi Napano Ban Namoneano Nalo Na ABE KULO JU Verialiano Moti**

*Tukunuano bulati na niosi nei*

Toro napano jiri mēsi nei, naio jirio ba ban taara tai na namoneano nalo napano aju abiniua bogokouo ea kialo meuliano, bior napano tomu nalo na maka ave namoneano aju amilkueilo. Bajago nei napano tomu nalo na aju amilkuei ealo laka mila na nalo amial jikili, a vaataro atuvan kialo moneano ea Yesu Kristo. Naruei toro nei ber kalo ber monoka asikil atu sikili ea kialo moneano nene. Naio ber kalo ber Yesu Kristo ga naio be toro napano jiloglog Atua ban kito. A ka verial vite nei, naio berii vite tolu.

Vite na be moti, Yesu be Atua Kenerinio riano, a mia naio to bogo nonovio rivano maka rijikia ribisi. Mia be riano laka napano be Atua Kenerinio, mia naio mila kakar nio-niag na bajago nei napano naio monea Atua, ea vite nalo na amila mijog bova eaio. Naruei bior napano naio be Atua Kenerinio, naio jo loa liei naverialiano nalo, a agelo nalo, bija bunu Mosis.

Vite juo nene, Atua berial ruei ka Yesu, naio be Parinio toro lu napano mia to o-o maka rijikia ribisi. Naio be Parinio Toro Lu napano loa laka ka toro lu nalo re nua.

Mia vite tolu nene, ea Yesu kiano imāuano napano naio be Parinio Tubo naio m̄aro ka rilarrur tomu nalo, bar bulag kialo kariano nalo milalo maka bunu amerou, a jian meuliano napano maka rijikia ribisi banlo. Sida nalo re nua abe kijokijo ga na sida napano Yesu Kristo milaio.

Ea mirano duelimo ba tai [11] toro na jiri mēsi nei, naio berii tomu tealoo na Verikariano Moruo napano amonea Atua kirisikili. Mia naio ber ka tomu nalo napano bivitaia mēsi nei ba banlo, ber boka

atakii kialo kijokijo nei, ka ajikia atu sikili bogo nonovio. Mia ea mirano duelimo ba juo [12], naio ber banlo, ber monoka asikil atu sikili ea kialo moneano, rivano-o rivokar juluvati na kialo meuliano. Mia bogo nonovio monoka aviti Yesu, ka amijikia avardulu bogokouo nalo, napano nalo aju abokario ea tomu nalo na aju amila jikili laka banlo. Mia ka rila nonovio kiano iliano, naio mil vatitig ban kiano tomu nalo, berkakar banlo ka monoka avitikar vatitig kialo meuliano.

*Torogio nalo na niosi nei*

Iliano moti, Kristo berial Atua ban kito 1:1-3

Kristo loa laka ka agelo nalo 1:4—2:18

Kristo loa laka ka Mosis naio Yosua 3:1—4:13

Kristo loa laka ka parinio toro lu nalo 4:14—7:28

Verikariano vou loa laka ka verikariano moruo 8:1—9:28

Sida napano Kristo mila loa laka ka sida re nua nalo 10:1-31

Bajago na moneano bo laka 11:1—12:29

Iliano nalo napano ka rila tomu nalo asikil atu sikili, bija iliano maariano 13:1-25

*Yesu naio loa laka ka naverialiano nalo*

<sup>1</sup> Bilbilu Ju nalo, beamu beamu laka binimei, ea m̄arabo telabo a ea bajago kinkin nene nalo, Atua na naio jom̄a berial kiano iliano vatelabo ban kiado tormoruo nalo, binimei ea kiano naverialiano nalo. <sup>2</sup> Mia voniganei, ea legiano na maaro nalo na kito rojua nei, naio mil ban kito jel ea kenerinio memedu Yesu. Kenerinio nene naruei napano beamu, ea tiiano na yetemeriba nei, Atua mir̄au eaio, ana na nalojuo ajii bogo nalo a vio nonovio, avona iorou kanio ana na Atua naio bitirilar kenerinio nei, naio mije vite nonovio monea jum̄ano be parinio kalo. <sup>3</sup> Kenerinio nene nei, Atua kiano mermerano mereralii kiano meuliano, jibe ka

napano naio bar nonovio Atua mirano-o mia memedu garuei, naio be tovorovo na Atua kiano bajago. A moroano na kiano iliano naio jikili laka, naio ga bokar masosoua vite nonovio nalo na yetemeriba nei bija vio dolu nalo bunu aju bo. A bereio, naio naruei mijamo ka naio binimei milakon nono kido kariano nalo biniu, mia bogo na mila nonovio kiano iñauano na yetemeriba nei, ana naio bavin bereio tiniabene, ba jotano tivelinio vameruo na karamāno jumāno, napano be Barago na tiniabene.

*Yesu naio loa laka ka nailiano nalo*

<sup>4</sup> Yesu jotano jibe na, naio toru mave loa ka nailiano nalo napano mā aju, bior siano na midu bior kiano iñauano naio bo laka loa sialo. <sup>5</sup> Verver kito reial ea vivitauiano lu nalo, iliano miroano napano ju na mā aberenio Atua mila kenerinio naio loa lie vo ka nailiano nalo. Ea iliano nalo nei tai kalo, Atua mil ban kiano Naverikariano, naio berinavo

*“Jau na, kiniou namial jibe ka banei jau kobinimei kobe keneriku riano, a kiniou nebe karamāno riano.”* *Iouano 2:7*

A tai bereio jibe na bunu, naio berinavo

*“Mia kiniou nemei neve karamāno, a mia naio rive keneriku.”* *2Sam 7:14*

Iliano juo nei, Atua maka lele river ka kiano nailiano nalo nei tai, river naio be kenerinio lu, mia ber ka Yesu ga. <sup>6</sup> Ana be iliano tai bereio, na naio berii bogo na Atua jidom riila kenerinio motoru nene rimei ea yetemeriba nei, ana na naio berenio

*“Mo bo ka nailiano nonovio alotu ka naio.”* *Tiut 32:43*

<sup>7</sup> Mo tivelinio ka nailiano nalo, nalo amila iñauano na bo telabo, naruei Iliano Lu beriilo berenio

*“Atua kiano nailiano nalo, abar kiano iliano, ajibe ka jegi, amiñau Atua kanano, ajibe ka sebi.”* *Iouano 104:4*

<sup>8</sup> Mia bogo na Iliano Lu ber Atua kenerinio, ber naio loa laka ka nailiano nalo, berii jibena ka naio bevirare ka Atua, bio naio ka Atua. Berii naio berinavo

*“Atua o, kanamo vio lu na mā kojojo tanea mia naio ritobo to. Nasitogo na kiamo navenatuboiano, na bajago memedu.”*

<sup>9</sup> *Jau kajaaro mēle ka bajago na bo, mia maka kosidom keial bajago na kirivova, naruei na kanamo Atua Soñi midu larso kojo mave kojo loa ka kanamo bilbilu nalo,*

*naio mila burumāra saariano banso jibe ka amiovovuaso batitig ka bonotanunu maraiu tai.”* *Iouano 45:6-7*

<sup>10</sup> Ana ea iliano tai bereio, romial ka napano Atua Soñi bio kenerinio berenio Tubo, a naio berii vite nalo na mā naio milalo, berinavo

*“Tubo, jau na naruei jau kobitirilar burupati na yetemeriba, jumāmo ga miñauka vio iauo mave.”*

<sup>11</sup> *Vite nalo nei, mia amdagdago, rivanvano-o mia avavakovio, mia jau kotobo koto.*

<sup>12</sup> *Tavukia mādayebe moruo tai, mia jau kojukilo a keyabulaglo, a tavukia kanamo māda kulumārauo tai, mia jau kovarvar bulaglo,*

*ana mia jau koto kove terivou damāriga, mia kanamo yuka nalo mia ribisi re bogo tai.”* *Iouano 102:25-27*

<sup>13</sup> Mia bereio, Atua kiano iliano dolu tai naio jo, napano maka leleio river ka kiano nailiano tai, mia naio berka kenerinio naio takurano ga, naio berinavo

*“Jau koto tano ea jumāku tivelinio vameruo, jau koto tibena, rivanvano-o mia nala kiamo uolu nalo amei atavukia mādayebe tai na mā kovijankon jaamo eaio.”* *Iouano 110:1*

<sup>14</sup> Naina naruei be iliano na maaro ea tivelinio nei, na mā berii jumābe ka Atua kiano nailiano nalo na

aimāu kanano ga, nalo abe niununo nalo na mā abar kanano iliano, a nalo na ka mā ajai kito na mā rojev ioruriano, mia be toro tai jo napano naio loa lievo kalo, nina naio be Kenerinio Lu na Yesu, napano Atua mil maariano ban kito eaio.

## 2

*Ioluano Vou na bo na Yesu kanano naio loa lie ka Mosis kiano tuboiano moruo*

<sup>1</sup> Ver tibena, iliano riano novo nalo na Ioluano Vou na bo na mā kito rojūma romijogio ruei, mia monoka rosidomii vetemii lievo kalo, monoka rovokarlo sikili rivu, ver p̄eli na, mia vier rivuru kito reielalo denlo bereio. <sup>2</sup> Tivelinio na tuboiano moruo re nua, nailiano nalo ga amidu binimei, mia iliano nene nalo amemedu ga bo, a ajikili. Nalakokoroviano na iliano nene nonovio, a jog volvoliano nonovio nene, sano mauo nene memedu jo ruei.

<sup>3</sup> Mia voniganei, Ioluano Vou na bo na terivou naio binimei bokar kito ruei, mia naio toru lie loa ka Tuboiano moruo na beamu. Jibena, ver kito rosidomii kurano ea māarabo na kiado ioruriano napano joaio, mia maka rejikia rovuro den kanano vironiano leleio. Kanado Tubo nene naruei naio mila Ioluano Vou na bo naio miyotuba jukamu, mia nalo na mā amijog naio ka mā berialio ea tilinielo nalo, nalo kija aberial sosolio binimei boru ea kito, amila meravo ka be riano.

<sup>4</sup> Mia Atua bunu miija iliano nei, napano mā mila vremesiano ninio nalo, a vite na vameneano nalo, a imāuano nalo na kiano moroano, mia mave ka nina, naio biovio ka bulagio Niununo Lu kiano ijaiano nalo ban kito kei napano naio jidom rudu vanio. Ana na kito romial vite nalo nei ana romijikia ka Ioluano Vou na bo na Yesu Kristo kiano naio be iliano tai napano bo-o laka loa ka tuboiano moruo na kito kulo Ju kiado.

*Yesu be tubo ka yetemeriba na mia rimei navo*

<sup>5</sup> Kito romijikia ka Yesu naio loa lie ka nailiano nalo bior ea tivelinio na yetemeriba na to rime keano, mia Atua rudu re kiano nailiano nalo ka ave tubo eaio, mia naio rudu totano yetano ka kenerinio. <sup>6</sup> Vite na niosi moruo berenio bunu, ea Barago Teviti kiano iliano tai napano berka Atua, naio berinavo

“?Vite novo venia na joa toro, mila na jau kojidomii mēlea naio jibe na?

?Pelina venia mila na jau kōjo mā komiyotuba ka kulorinio kenerinio?

<sup>7</sup> Beamu, jau komidu naio jotano ka nailiano nalo, mia nina naio be tena bogo bulati ga, mia voniganei, jau kobitirilar naio bereio ruei,

jau komidu naio joa vio na loa laka tai mave bija kiano burumāra mermerano a kiano mārouano,

<sup>8</sup> jau kabar vite nonovio ajutano ka kiano moroano.” *Iouano 8:4-6*

Mia bogo na Atua mila kiano toro be parinio ka vite nonovio, mila na maka ve titai leleio napano naio maka rive tubo kalo. Naio mila ka mia tibena, mia binimei bokar vonganei, mia maka reial ka mirado vo ka vite nonovio nalo na yetemeriba nei naio rivokar jeleigio na Atua naio jidomii kanio. <sup>9</sup> Mia vite nalo naio makanio vo, mia damāriga kito rotu resirarago ka Yesu, napano Atua bitirilar naio loa loa laka. Beamu, Atua naio tinien miia kito toru laka, ana na naio miila Yesu naio batove telisu ka bogo tai ga, mila naio batove yetano ka nailiano nalo, ana mila naio jen tanea jogviano napano māro ka kito nonovio, mia iorou kanio, ana naio bitirilar naio bereio, miyovovua batitig naio bo bija mermerano na vio mave.

*Yesu naio be kiado ioruriano, naio be kiado parinio toro lu*

<sup>10</sup> Atua kiano bajago na iñauano na ka naio rilarur kito naio memedu, bior naio jii vite nonovio, a vite nonovio be kiano, naruei naio jidom ka mia naio tovulu meran bereio buruñara taara na kenerinio nalo ataluvo den yetemeriba nei, amei ave kiano bereio. Naio jidom ka rila tibena, mia ka rimauka tibena naio kirisikili laka, naruei naio mial m̃arabo tai ga ka rilaio, naio jibenei: be Yesu kiano m̃arabo na jogvaiano, napano mia Atua mila naio binimei be toro, naio be toro na m̃a je dulu m̃arabo ka tovulu kiado ioruriano. <sup>11</sup> Yesu naio mijikia tukamu ka kito tibena bior naio na m̃a milakon kito romeravo, mila na naio jaaro ka rial kito tibe ka robe m̃aratavo takurano ga kitoliko naio. <sup>12</sup> Kiano iliano tolu ban Atua ber jibenei. Tai joa niosi na Iouano, naio ber jibenei, naio berinavo

*“Mia kiniou naverial siamo na bo van kuruaku nalo, mia kiniou navameneaso tukamu ka kulorinio nalo.”* Iouano 22:22

<sup>13</sup> Mia dolu nene naio berial ka Yesu naio monea Atua jibeka na kito romonea naio, be iliano na joa naverialiano Aisea, naio berinavo

*“Kiniou nei, kanaku monmoneano nomidu joa naio.”* Ais 8:17

Mia nana maariano, iliano tai bereio ea Aisea, naio ber Yesu bija kuruano nalo, naio berinavo

*“Ninei be kiniou nene nei nojo nei kumemlika Atua kenerinio dolu nalo napano naio barlo ajua juñaku.”* Ais 8:18

<sup>14</sup> Mia kito robiniu robe Atua kenerinio nalo kia nei, kito robiniu robe kulorinio, bija niabedo a kiado burukija, mia ka Yesu rime i rive kuruado be riano, naio binimei ea yetemeriba nei, midu niabene a kiano burukija jibe ka kito ga. Tibena, mia bogo na naio mijamo ka bereio, naio m̃aro bior kito, naruei kiano m̃ariano nei naio muelar moroano na parinio tubo na kirisikili na m̃ariano kiano, nina be Sim̃aro. <sup>15</sup> Naio muelar Sim̃aro

kiano moroano, ana naio mijubar bulag teli nalo na merouano na m̃ariano na amiorakakar tanea niegeniege kito, napano mila kito romijog bova biorio ea kiado meuliano momou. <sup>16</sup> Riano ga na, Yesu kiano iñauano novo na ijaiano nene, naio maka rila rivan nailiano nalo na vio mave, mia naio mila ban kito tomu na yetemeriba nei. Iliano telabo na m̃a aber vite na jibena, aberinavo

*“Naio joñã miija batitig tormoruo Epraamo kiano bajulukuti nalo.”* Ais 41:8-9

<sup>17</sup> Naina naruei be Atua kiano jidom-iano naio jibenei. Naio mial bo ka mia Yesu naio rime i tibeka ga kito kuruano nalo ea vite nonovio, rivanvano-o mia mijikia rijikia vatitig kito rivu, naio mijikia tinien riia kito. Ana mia kito ravarkar tiniedo ea naio, ka mia naio riviekouo ea iñauano na mia naio rila van Atua rivior kanado kariano nalo, napano naio mila kiado merevuiano bija Atua, jibeka naio be kiado parinio toro lu. <sup>18</sup> Naio mial buruñara lavoniano na miyotuba ka kiano meuliano, naio mijog bova bano-o na naio jovulio, mila naruei naio mijikia rijai vatitig kito bereio rivu ka bogo na lavoniano naio binimei jikili bunu ka kito.

### 3

*Yesu naio loa laka ka tormoruo Mosis*

<sup>1</sup> Kuruaku a kuvivinioku lu nalo, na m̃a kamiu kumonea vioano na mave ruei, kiniou neber ruei ka kamiu ka Yesu naio mijikia rijai vatitig kito rivu, mia naruei nejikili ka kamiu, nejidom na ver bo ka kuvilavon ka kuvisidomial naio lie vo, tibeka na naio be atevi a naio be parinio toro lu na kanado moneano. <sup>2</sup> Ralavon ka revitii vatitig Yesu naljuo tormoruo Mosis re nua nei. Tormoruo Mosis re nua, naio biekouo laka ea kiano iñauano ea Atua kiano m̃aratavo, a Yesu bunu naio biekouo laka ea

kiano iñauano, na ña Atua bitirilar naio ka rilao. <sup>3</sup> Nalo abiekouo ea iñauano, mia Atua bitirilar Yesu naio loa lie laka ka Mosis, bior naio jibeka na Mosis naio jo joomo ea Atua kunuano naio jomña mila kiano iñauano sesa nalo eaio, mia iñauano na toru ka avitirilar yimo nei, Yesu naio takurano mimaukanio. <sup>4</sup> Yimo nonovio, monoka ve toro tai na ka ña riimaukanio, ana Yesu nene naruei naio miñauka Atua kunuano, mia Atua naio be parinio ka iñauano na ga. <sup>5</sup> Jibena, Mosis naio be toro na iñauano, na kirimemedu bo ea kiano iñauano nonovio na jouro ea Atua kiano ñaratavo, rivanvano-ovokar ka na ña naio be toro na ña berverial Atua kiano iliano nalo na burutomormoruo na ña ajumña aberial lilianlo binimej bokar voniganej, <sup>6</sup> mia Kristo naio mila lievo, bior ka naio biekouo ka rivitakar iñauano na burutomoluo nonovio ea yimo nei, jibeka na naio be kenerinio motoru kar garuei ka naio be napano boru na yimo nene.

?Ana yimo nei naio jomña ber venia, ñelina ber kei? Naio jo ber kito ga, bior ka na ver romerou re, a ver rajaa-ro ka kiano verikariano nalo, rovokar vatitig rivu kiado verikario ealo, mia kito rove kiano ñaratavo lu memedu.

*Yesu naio loa ka Mosis, a kito monoka romonea van lievo tuvulu nalo na Mosis jukamu kalo*

<sup>7</sup> Be iliano tai joa vivitauiano lu, napano naio be iliano na Niununo Lu ka labon kito, napano naio ber jibenei, naio berinavo

*“Banei, ver kamiu kuvijog joono,*

<sup>8</sup> *maka rivu ka kenemiu jidomiano rimej sikili bereio, tavukia na kenemiu tormoruo nalo amilaio.*

*Beamu ea vio iauo, ajua bogo tai na lavoniano toru laka, aju banbano-o karina ajumolu amila pariparilo bereio.*

<sup>9</sup> *Naruei Atua mial lo, ana naio ber jibenei, berinavo.*

*Ea kialo ieliano ka yuka duelimo va ver [40] nei, damariga kiniou nojo bijalo, amial kanaku ijaiano novo na banlo, mia kialo bajago nalo na aju amilavon kiniou laka.*

<sup>10</sup> *Kialo veribinio nei naio mila tinieku bilulu ñele, ana namial jibe makanio, nalo na julaka ga ajumña aburvuru dedade ealo ajanea vio ajumña ajaluvo den kiaku ñarabo na memedu nalo.*

<sup>11</sup> *Tinieku ñaro ka nalo na jibe na ruei, tinieku kiri seri tanealo, naruei nojumolu namila verikariano tai, neberinavo buruvenuo na jilimebiano novo na kiniou namila batitigio bo jo kalo, mia maka ajikia ava jouro ea bereio.”* *Iouano 95:7-11*

<sup>12</sup> Kuruaku nalo bija kuvivinieku nalo, bior vite nalo na mia bo ka mia kamiu kuvitakar kamiu rivu. Maka rivu ka mia kamiu tai, jidomiano na bova toa naio, ñeli kiano iviso rimonea re bunu, ka mia rila naio rivan bereio taluvo den meuliano nabo na Atua na meul kiano. <sup>13</sup> Maka rosidom ka mia kito tai rijoru tibena, naruei monoka rotunukakar kito damariga ka legiano nonovio, ka mia ve re tai ka kito napano bajago na kariano atumña atubolbolili lelan naio rivano-o mia rimenini nonovio. Iliano na mave na ber “Banei, ver kamiu kuvijog joono Atua,” mia naio be iliano na beamu tai, mia naio ju jikili kia ga vo, joono naio jomña bio kiaga vo, kito rojua legiano nalo na jogvaiano kiaga vo. <sup>14</sup> Bokanio kito rovokar vatitig sikili kiado mon-eano ea naio tavukia ga na ña rojumña romonmonea jukamu, bo ka kito rotu sikili rivanvano-o rivokar jukuti. Ana vere rotumña ralala ga tibena, mia kitoliko Kristo, kito tomu nalo na ña ravar bitiran Atua kiano mermerano novo nalo rivija naio. <sup>15</sup> Rian ga na, iliano lu na mave naio ber jibenei ber maka rivu ka kenemiu jidomiano rimej sikili

bereio, tavukia nanua m̃a kenemiu tormoruo nalo amilaio ea kialo bogu na lavoniano beamu ea vio iauo, napano ajumolu bereio amildie Mosis.

<sup>16</sup> ?Mo nalo na m̃a amila parilo jikili jibena, nalo abe kenia? Nalo na m̃a amila jibena, nalo na m̃a beamu ajaaro ka m̃a amidu Atua joono ruei, abatove ka kialo tor na toru Mosis, naio jukamu kalo ajaluvo den Ijivi. Naio jukamu kalo abatavio, mia maka vesiou, ana amildie naio bereio.

<sup>17</sup> ?Mia nalo na m̃a amilavon Atua, ajuljulu tiniene ka yuka du-elimo va veri [40] nei ea kialo burutili m̃arabo nei, banbano-o na naio tinien jerlo toru, nalo nene kiaga nei vo, a? Ee nalo na m̃a amila jibe nei, nina nalo kiaga nene kiana vo na, napano naio milarurlo, mia iorou kanio ana ajum̃a amila kariano dam̃ariga ea mirano, mia iorou kanio ana naio milalo napano am̃arm̃aro ga, salo buriu nalo abe dedade ea vio iauo.

<sup>18</sup> ?A nalo na m̃a naio berkar ber mia nalo ajikia lele re ka mia ava jouro ea kiano buruvenuo novo na jilimebiano napano naio mila batitigio be kanalo, nalo abe tomu na ajum̃abe? Nalo na maka ajikia avano, nina nalo na m̃a amila pariparilo, a nalo na m̃a maka adu niono.

<sup>19</sup> ?Mia venia na mila napano maka ajikia ava jouro ea vio novo na jilimebiano nene? Maka ajikia avano, bior maka amonea kar Atua, maka avarkar tinielo ea naio.

## 4

### *Jilimebiano lu na Atua kanano tomu nalo kialo*

<sup>1</sup> Naruei beamu, Atua naio mila batitig kiado tormoruo nalo kanalo vio novo na jilimebiano tai, mia voniganei naio mila batitig ber ga bunu kiado jilimebiano lu tai ruei jibe na. Verikariano na jilimebiano na naio meul batitig bo jo kiana vo, naruei maka rivu ka kito rotibe ka kiado tormoruo nalo nei, napano

amilaluvu kialo jilimebiano nene, nalo miroano maka ava jouro eaio. Peli bo ka kito rotu rovitii vatitig kito rivu, maka rivu ka rotu ga o-o mia kito tealo nalo bunu alaluvu kialo bogu, avitiilo ka maka ajikia avokar kialo jilimebiano. <sup>2</sup> Nina bior kito rabare ga ka kiado tormoruo nalo nei, ka lilianiano na bo na Atua kiano binimei bokar kito, javukia napano bokarlo, mia nalo amila jibe ka amijogio, mia maka ajedu mon-eano mave kanio. Nalo maka aje batitigio rimon ea kialo meuliano, naruei iliano nei maka riyar m̃arati ealo. <sup>3</sup> Naruei ea tivelinjo na nalo na maka amonea naio jibe na ana na Atua mil jikili ruei, naio berenio iliano na kiniou nebivitaui mave vaarakurano garuei. Iliano nene naio berinavo

*“Nalo na amila m̃a tinieku jerlo toru laka, naruei neberkar ka mia ajikia re avokar kanaku jilimebiano nei.”* *Iouano 95:11*

Mia kito na ga kito romonea naio riano, jilimebiano nei naruei naio be kiado, ka rava jouro eaio.

Atua kiano jilimebiano nene, naio mila batitigio bogobe ruei jo be kiado, bior ka bogu na tiiano, naio mir̃auo ea legiano ari nei o-o biniu, <sup>4</sup> ana jibe ka Iliano Lu naio ber kovio tai navo, ka legiano aluo, mia naio mijilimebi ka kiano im̃auano nalo, maka bunu rim̃aukalo bereio.

<sup>5</sup> Ana vite takurano bereio, be iliano na mave naio berii Atua ka naio berinavo mia tomu tealo ajikia re avokar kanano jilimebiano, <sup>6</sup> ana na iliano nei mila kirimeravo ka monoka ve tomu nalo na vio dolu tai bereio na mia Atua naio rijamo kalo ava jouro eaio. Nalo na beamu, amijog Atua kiano lilianiano vou na bo, bija buruvenuo na berkario ka ve kialo, mia maka atu sikili, maka amonmonea, mia nalo amilaluvu tanea garuei, maka ava jouro eaio. <sup>7</sup> Mia kiado jilimebiano jo kiano vo, a Atua jekar legiano nene memedu ka mia rovokario, bior yuka miroano barlaka ruei, avona

bisi, ana na parinio tubo Teviti naio berial iliano nalo na aju mave ruei, napano naio ber jibe nei, berinavo

*“Banei, ver kamiu kovijog jooon, maka rivu ka kenemiu jidomiano nalo amei sikili bereio.”*  
*Iouano 95:7,8*

Bo ka rovitilubar ka “banei” napano naio berenio ea vio nene nainei naruei kito rojua nei ruei, napano Atua jekar ka ber bogo nene memedu ka rovokar ioruriano eaio.

<sup>8</sup> Kuvisidomii von tormoruo Yosua nei nua. Naio jukamu ka kiado tormoruo nalo nei togio abano jouro ea buruvenuo novo napano Atua berkario, a ver naina naruei naio be Atua kiano jilimebiano na amijeivio ruei, mia Atua maka bunu rijikia riverii bogo dolu tai bereio ka Teviti, ka river be legiano na va jouroiano ea kiano jilimebiano. <sup>9</sup> Ana makanio, naio jomãa ber be jilimebiano lu tai naio jo keano be kiano tomu nalo kanalo, <sup>10</sup> mia ver kei na riva jouro eaio, mia rivu mia rivu ka naio, naio mijikia rijil mebi ka kiano imãauano nonovio, tavukia na Atua naio mijilimebi ka kanano.

<sup>11</sup> Ver tibena, bo ka kito resikili ka ravokar jilimebiano lu novo na, maka rivu ka mia kito tai bunu rimonmonea re Atua, ka mia rilaluvuio.

### *Atua kiano Iliano na bo laka*

<sup>12</sup> Kito rojutano ka Atua kiano iliano, bior kiano iliano naio meul, naio jomãa miãauo jikili laka, naio mijikia julu dulu toro kiano meuliano, naio mali laka jovulu iobogu na mira napano mali ea ikiti be juo. Atua kiano iliano naio mijikia riovídulu riva joomo ea kito, riva tibure venia napano joa kiado jidomiano, ðeli vitii venia napano joa niunudo. <sup>13</sup> Nao, naina mia rivitii kiado meuliano, mirano joa vite nonovio, maka kito tai napano mijikia toluku ka naio.

### *Yesu be kiado parinio toro lu*

<sup>14</sup> Atua mijikia vite nonovio ea tivelinio na kito, mia siva ga kanio

ka napano kenerinio, kiado parinio toro lu na toru na Yesu, naio juvan vio nei naio mijaka ban ea kiano vio mave niogovu, naio ba mila merevuiano ban Atua kar kito bereio. Mo bior naio jomãa mila batitig kito bo bija Atua jibe na, mia bo ka rovokar sikili kiano moneano, bo ka rotuvan re naio bogo tai leleio. <sup>15</sup> Kiado parinio toro lu nei, naio maka ve tai na mãa maka rijikialubar kiado mijikikiano, mia naio mijikia vatitig ka kito maka mãa rotumolu rotu sikili laka. Naio tinien miia kito, mia naio rijai kito, bior beamu naio bunu, juboluboiano nalo abinimei kirisikili laka ban naio ka tivelinio nonovio, jibe ka ga napano mãa ajumãa abinimei ea kito. Naio javukia ga kito, mia vite takurano ga, juboluboiano maka rivuru naio rijoru ea kariano leleio kija garuei. <sup>16</sup> Jibena, ana kito romial ka napano robe kiado mãarabo naruei napano romijikia ralavon ka rojian kija kito romei vaataro ka Atua kanano jobaro lu, napano be burupati na tiniememiano. Kito romerou re bunu, rasaaro ga ka romei ea Atua, ana na mia rovokar kiano tinieiano ea kiado meuliano, rovitio ka kiano tinievuiano naio mijai kito ea bogokouo vaio na rojoaio.

## 5

### *Yesu be parinio toro lu na mãa tinien miia ea toro*

<sup>1</sup> Nalo namãa abokar imãauano na parinio toro lu, abitiri bulaglo den kulo lu dolu nalo ka aimãau tibena naruei. Parinio toro lu naio be toro tai na mia tumolu to iviso ka tomu nalo a Atua, ka mia sian ijaiano nalo ðelina sida nalo na kialo riva naio, ka naio mijikia riviekokoa kialo kariano nalo. <sup>2</sup> Parinio kulo lu nei naio bitilubar batitig bo ka na mãa tomu nalo amimãau bova, ajumãa amiel belbele amilaluvu mãarabo, bior naio bunu be sunbue, mijikia jikia, naruei naio mijikia tinien miia tomu dolu nalo riano, mijikia melokloko vanlo. <sup>3</sup> Naio a javukia ga tomu

dolu nalo, naruei bogo na m̃a mila jokoluolu nalo, monoka rila, maka ka tomu nalo ga kialo kariano, mia bior kiano kariano bunu. <sup>4</sup> Bior vite na, maka rivu ka tor tai ga rivijauia naio bereio ka naio river bo ka naio rimeĩ rive parinio toro lu, makanio, mia Atua ga mijikia rivijauialar toro na mia mijikia rudu sio na toru na jibena, jibeka naio bijauialar tormoruo Erono re nua naio be kiado parinio toro lu na be moti garuei.

<sup>5</sup> Ana tivelinio na Kristo kanano naio jibena bunu. Naio be kiado parinio toro lu na toru, mia maka rivevavinia naio ka river naio jibena, mia Atua ga bitirilar naio. Atua kiano iliano na m̃a ber jibena naio jikili jua vivitauiano lu moruo nalo re nua, napano tai ber jibe nei, naio berinavo

*“Jau na, kiniou nemial jibeka banei jau kobinimeĩ kobe keneriku riano, a kiniou nebe karam̃amo riano.” Iouano 2:7*

<sup>6</sup> Mia dolu naio ber jibe nei ber

*“Kiniou nomiduso koju javukia tormoruo Melkeseteki, jau kobe parinio toro lu na maariano na ea kiano bajulukuti, ka na mia jau kovokar im̃auano nei rivan mia ribisi deio.” Iouano 110:4*

<sup>7</sup> Atua midu im̃auano nei ban Yesu, naruei romial ka bogo na kiano meuliano na ea yetemeriba nei, naio milaiio ruei. Dañariga naio jom̃a jidom yetemeriba nei toru laka, naruei naio jegi ban Atua, sano jogumirano miou biorio. Naio jom̃a biekouo jikili ea Atua ka ver kiano meuliano rivakovio, mia Atua rila naio rimeul bereio, naruei naio jikili lie ka m̃a bolkouo bior kito ban naio.

Ana na Atua naio tinien miia, bitii kiano bajago novo na namelumvano a navatoveiano na Yesu kiano, ana na mijog kiano viiano. <sup>8</sup> Be riano ka Yesu be Atua kenerinio ruei, mia Atua naio mijamo ka jogvaiano na jikili nalo amiyotuba kanio, jidom ka

riverloglog Yesu ka rivokar vatitig rivu bajago na monmoneano ea kiano meuliano. <sup>9-10</sup> Naio batove ka karam̃ano kanano sidomiano nalo abiniu, bano-o na mila nonovio im̃auano na Atua midu banio, mila na Atua bitirilar naio javukia tormoruo Melkeseteki. Jibena, Yesu binimeĩ be Atua kiano parinio toro lu, binimeĩ be burupati na meuliano na maka rijikia ribisi, na kiado robiniu napano romijogkar naio.

*Bo ka romei romeruo rivu ea Kristo*

<sup>11</sup> Naruei sio nei Melkeseteki, naio be kiano tukunu moruo na bo nalo aju, napano amijikia ala rimeravo rivu van kamiu jum̃abe ka tete na bija kanano im̃auano. Kirisikili ka avisivisii rivan kamiu, bior be bogo tai napano m̃a burutiliniemiu nalo abonvono kija. Mia ver kamiu kuvilavon ka kuvijoglubarbario, <sup>12</sup> mia rivu, bior kamiu kumonea bogbe ruei, mia memedu ka kumei kuve naverloglogiano na iliano lu na Atua kanano ruei. Ana makanio, kumitu jibena ga, ka mia averloglog ka kamiu bereio, tikar bereio ea burupati na iliano nalo na kiano.

!Riano ga na, kamiu na ka mia kuvisen sinaniano na jikili ruei, mia jibeka napano kumitum̃a kumisidom kumunu yu kia ga vo! <sup>13</sup> Kulo be na m̃a ajum̃a ajidom amunu yu jibena kia ga vo, nalo abe kiritete kia ga vo, tenene na maka ajikia ave masou rivu ka iliano na m̃arabo na memedu, <sup>14</sup> mia nalo na m̃a ajum̃a ajen sinaniano nalo na kirisikili, na ameruo bo ruei. Nalo na ajibe nei, kialo jidomiano nalo amim̃au bo bano-o abitii lubarbar vite nalo nonovio, naruei amiluo abinimeĩ abo bokar nana abitulubar vatitig vite venia nalo na bo a vite venia nalo na bova.

## 6

*Bo ka rovitikar vatitig kito ka rava iorou re bunu*

<sup>1</sup> Bior jidomiano nalo na, mia bo ka kito rotuvan bajago na kiritete naio to, rava lie rivija Kristo kiano verloglogiano na jikirkili jibe na, napano amemedu ka jidomiano nana mermeruo bo. Kito robilig kito den im̄auano va nalo na m̄ariano ruei, kito robokar viekouoiano ea Atua ruei, ana maka rivu ka rotum̄a rajalao bereio. Naio jibe ka na romilakon jeleig yimo ruei, mia be bogo na rotu rovitirilar tu sikili naruei. <sup>2</sup> Ajiloglog kito ruei ka varueiano, a ajokol pariparido ruei, romonea ruei ka mia rotumolu bereio den m̄ariano, a romijikia ruei ka tibu-reiano tai jo bija kiano vironiano napano mia tomu na bova mia avokar rivano-o mia rijikia re ribisi bogo tai. Mia vite nalo na kito romiovo dulu ealo ruei, mia maka rivu ka rotum̄a rataki jaado ka m̄a reseliviv ea vite nene dam̄ariga, mia bo ka rotu rava lie vo vija kiado Tubo. <sup>3</sup> Vite na kirisikili, mia ver Atua naio rijamo ka ga rivan kito, mia romijikia ga ka roim̄aukanio. <sup>4</sup> Nao, mia kito monoka ralavon̄ ka rotu rava lie vo rivija naio dam̄ariga, mia tum̄abe ka nalo na amijoru, aban bereio ruei? Nalo na beamu amiel bo ea miamoiano, a ajum̄a ajinan ea tini-avio na vio mave ruei, a Niununo Lu binime i ealo bunu, mia bogo na m̄a aban bova bereio jibe na, mia maka bunu ajikia aviliglo amei bereio ea meuliano na bo. <sup>5</sup> Atua kiano Il-iano Lu naio m̄ija batitiglo bo ea kialo meuliano, ana abokar kija moroano na navenatuboiano napano jo binime i, <sup>6</sup> mia bogo na m̄a abilig bereio taakalo, amila pariparilo jibe na, mia tum̄abe ana ajikia amei bereio rivu? Makanio, mia rivova laka vanlo, bior ajum̄a amila jibe ka napano ajukukakar Atua kenerinio mave ea m̄akolkolo bereio, ka jum̄alo nalo, tibe ka napano ajum̄a amidular naio ea tomu nalo miralo ka aiolua searia siano bereio.

<sup>7</sup> Kuvisidomii von ninei. Borotano na m̄a jo munu yuo nam̄a jibirbili julaka eaio, mia naio bar m̄arati miroano ka nalo napano aim̄au eaio,

ana mia Atua jaaro toru kanio, kiano ilivuiano joaio. <sup>8</sup> Mia borotano na na maka rivar tena bo, bar ga soro na bova, naio jibe ka napano aberkar m̄ariano ga banio, mia maka ajikia ala tena bo tai eaio, mia aisebio ga. <sup>9</sup> Be riano laka banalo, iliano nalo na jibe na ajikili laka, mia tivelinio ka kamiu, maka rosidomii ka kumitibena. Peli ga, kiniou nabarkar tinieku ea kamiu, ka m̄arati na bo nalo na meuliano vou ajum̄a amiluo bo ea kenemiu meuliano kia navo. <sup>10</sup> Kiniou nomonea Atua ka mia naio tiniene ribobogia re kenemiu im̄auano na bo nalo ka mia naio sidomii ve iakurano re ea kenemiu bajago na bo na tinietiano a au-iano ka na kumila banio, ka bogo na m̄a kumijai kiano namoneano lu dolu nalo. Kamiu kumim̄au bo jibe na mila na Atua jaaro toru laka kanio, mia naio bunu rila rimemedu a rivu ka kamiu. <sup>11</sup> Tibe na, ana mia nojidom notunukakar kamiu bereio, ka kamiu kivan re bunu, kuvisikili ka kuva lie vo rivano-o rivokar jukuti nene, ka mia monoka kuvokar vatitig vite nonovio na m̄a kenemiu jidomiano joaio. <sup>12</sup> Kamiu kuviovo re, niabemiu rimelukluku re, mia kuvim̄au sikili rivare ka kiado tormoruo novo nalo nanua m̄a abokar masosoua im̄auano nalo, napano kialo jidomiano nalo terebievi bano-o na abokar vite nonovio na Atua berkario beamu ruei banlo.

### *Atua kiano verikariano be riano laka*

<sup>13</sup> Verikariano tai na jibe na, Atua mila ban Epraamo, napano naio berkar jikili banio ea tivelinio na yati nalo na mia ayotuba eaio. Maka ve sio dolu napano Atua naio mijikia river ka rila kiano verikariano nei naio sikili, bior siano naio loa laka ka sio dolu nalo, naruei Atua berkar ea siano bereio, naio berinavo

<sup>14</sup> “Kiniou Atua, kiniou neilivu kaso ve toru, ka mia nala kiamo bajulukuti amei ve miroano laka ea yetemeriba nei.”

<sup>15</sup> Mia vaataro ka Epraamo rimeonea re iliano nei, mia naio mial ka napano Atua mila kiano verikariano nei jikili bo laka, mia be kurano Epraamo bokar bogokouo miroano, mia naio maka tuvan verikariano nei, naio bokario bo bano-o na naio jikar ka bokar venia na ña Atua berkar banio.

<sup>16</sup> Ka tivelinio na bajago na ala verikariano jikili, tomu nalo ajumã aberii tor lu tai siano ðelina vite lu tai. Mia bogo na tomu dolu amijogio, monoka amonea ga, maka bunu ajikia ail murñii ka bereio, bior sio na aber naio mila iliano nene tu sikili. <sup>17</sup> ?Mia jumãbe ka Atua? Naio bunu tinien jii ka rila kiano iliano ea kito sikili rivu, ka mia romonmonea, maka rejikia rovitovitonia naio kanio. Kito rojibe ka kiritete nalo na mia ravar kiano jajuñano, naruei naio jidom ka rejikia rive riano ka kiano jidomiano na bo ka kito naio maka rijikia ribisi bogo tai, naruei naio milakar verikariano nei ban kito naio jikili bo laka. <sup>18</sup> Atua kiano verikariano ka kito jibe na naio bo, naio jikili ruei, bior naio maka rila sibi bogo tai, kiano iliano maka rijikia rive dolu bogo tai, mia mave ka kiano verikariano, berkar bija siano lu bereio. Ana vite juo nei, kiano verikariano bija siano, naljuo aminãu biju ka rila kito rotumolu rotu sikili ea kiano iliano. Kito roburo den vio na bova nanua ña rojujua mugaruei, rojumã rojiravo vio na tolukuano, naruei Atua kiano verikariano na bo nalo amila kiado jidomiano rimej rive tebievi rivu. Tibena mia kito romijikia rava rovokar vatitig rivu vio novo nei napano Atua naio mila batitigio bo midu jo kamu ea mirado.

<sup>19</sup> Mia kiado moneano kouo nene, napano rober ka mia Yesu rilarrur kito, naio be jidomiano tai napano jibe ka veru na ña bokar batitig uako jo. Mia naio rivokar vatitig kiado meuliano rivu, ka mia ve re titai napano mia rijikia rivurular kito bereio, rivano-o rivokar bogo na

kito rava resel iorou ka burumãara jagidago joomo ea vio Lu napano be Lu laka. Ea Vio na, mia rotumolu rotua Atua mirano rimemedu, mia kiado jidomiano mijikia sikili rivu kianavo ka mia rivu ga van kito. <sup>20</sup> Nina bior Yesu naio jukamu ka kito ban ea vio lu nene ruei, naio ba mila kiano inãuano jibe ka parinio toro lu na kiado, ka rila kiado merevuiano rivija Atua.

Jibe ka na ña kito roberii beamu ruei, naio javukia parinio tor lu na maariano na yatì na tormoruo toro lu na Melkeseteki, naruei naio bulu bulag nono kiado kariano nalo ruei, ana mia rimonmon bo ka kiano inãuano na kar kito rivano-o mia maka rijikia ribisi bogo tai.

## 7

*Melkeseteki re beamu naio loa laka ka toro lu dolu nalo*

<sup>1</sup> ? Ana tormoruo Melkeseteki nene, naio be kei, a sano tukunuano nene jumãbe? Niosi na Tikariano berii naio, berenio naio jo ka bogo na tormoruo Epraamo re nua, na naio be parinio tubo ka komeli lu moruo na Salemo, mia naio be toro lu na toru na Atua kiano. Ana ka bogo tai, ana tormoruo Epraamo ba mila mira ka kiano uolu nalo, ka parinio tubo dolu nalo, karina naio jo binimej bereio, ana naio biviuo naljuo Melkeseteki mia naio batove kanio, ana Melkeseteki mialio, ana milivu kanio. <sup>2</sup> Ana Epraamo mije ijaiano banio, duelimo jaluvo den tormomou ea vite nonovio nalo na naio mijevilo ea mira, napano naio jomã bar ban bere ea kiano vio. Mia burumãara toro lu nei naio be toro tai, na jibe ka siano juo nei aberenio. Siano na na jukamu nene, be Melkeseteki, nioti nene ber “Parinio tubo na memedu,” ana, siano juo nene naio ber jibe nei ber “Parinio tubo na tumãaro,” bior naio be parinio tubo na komeli na Salemo, napano nioti nene ber tumãaro. <sup>3</sup> Kema na, kiano tukunuano naio be dolu, bior ka maka romijog ka napano ña

aberenio ka kiano tormoruo juo nei ajumabe, p̄elina korobinio nalo yati re be. Maka averenio ka kiano meuliano naio jikar jel jumabe, a tukunuano na kiano m̄ariano maka tai. !Jibe napano naio maka rim̄aro kulio, mia naio jom̄a bokar dolu ka ga kiano im̄auano vo! Jibe na naio jibe ka Atua kenerinio, napano naio be kiado toro lu riva vano-o mia ribisi re bogo tai. <sup>4</sup> Bior vite nalo na, romial ea Atua kiano iliano moruo, ka napano sio nei Melkeseteki naio be sio tai na loa laka, banbano-o na korobido tormoruo Epraamo, na m̄a ajidom sopeia naio ruei, naio bunu batove kanio, naio jian ijaiano banio ea togio na vite nalo na barlo ea bogo na jovulu mira.

<sup>5</sup> Mia bajago na asian ijaiano na jibe na, naio be bajago tai na m̄a tuboiano berenio berinavo kulo Israel monoka ala tulaka. Nalo na abe tomu lu na kanalo yati na Livai, monoka ava avitikar vatitiglo, monoka asian duelimo taluvo den tormomou na kanalo saba nalo nonovio vanlo, bior nalo ajibe ka m̄aratavo takurano ga, abe bajulukuti na Epraamo. <sup>6</sup> Mia Melkeseteki nene, naio maka ve m̄aratavo na Epraamo, mia tormoruo Epraamo naio bitilubar ka naio be toro lu tai, ana naio bio ka togio na ijaiano banio. Tormoruo Epraamo nei naruei nanm̄a Atua berkar tonovo nalo banio, mia naio batove ka Melkeseteki.

Mia bogo na Melkeseteki bokar ijaiano nei, naio jaaro milivu ka Epraamo, a nina naio mila kirimeravo ban kito ka naio loa lie kanio, <sup>7</sup> bior toro na bare ka rilivu ka toro dolu, naio monoka loa lie ka toro nene. <sup>8</sup> Mo na Melkeseteki naliko kulo lu dolu nalo nei, nalo nonovio abokar ijaiano na bevirare ga, mia abe dolu ka titai. Vite na jibe na, aber kulo lu nalo abokar kanalo, iorou kanio ana am̄arm̄aro, mia Melkeseteki naio bokar kiano, aberinavo naio jo bano-o na maka rim̄aro kulio. <sup>9</sup> Mo na jibe ka napano Melkeseteki naio loa lie ka tor-

moruo Epraamo, naio loa lie bunu ka sio dolu na tortoru napano Livai. Be riano ka na Livai naio be korobido moti garuei na yati na kulo lu memedu, mia naio bunu miyotuba ea yati na Epraamo, ana bogo na Epraamo naio batove ka Melkeseteki, naio jian ijaiano banio, jibeka ga na m̄a Livai bunu batove ka Melkeseteki jian ijaiano banio. <sup>10</sup> Vite na jibe na javukia bogo na Epraamo biviuo Melkeseteki, mila banio, Livai naio maka riyotuba ea korobinio nei navo, mia jibe ka napano naio bunu miliao.

*Yesu maka moluo ea yati na kulo lu nalo, mia moluo ea yati vou tai*

<sup>11</sup> Ana iliano nalo na mave nei aberial burum̄ara vite tai. Amila kirimeravo ka na Atua midular bajulukuti na kulo lu na Livai nalo, naio bitirilar bajulukuti dolu tai na kulo lu nalo, midu jo jeleig naio. Tormoruo Erono bunu naio bitirilar im̄auano na bajulukuti na kulo lu nalo, a Mosis naio bar kiano tuboiano miyotuba, mia ver Atua rial ka vite juo nei bevirare ka rila kito romemedu rivu vija naio, mia naio tuvan tobo. Mia makanio, naio mijebukua, naio miila parinio toro lu vou tai miyotuba ka kito, napano naio be bajulukuti na tormoruo dolu nei Melkeseteki. <sup>12</sup> Ana bior Atua bitirilar parinio toro lu vou nei, memedu bunu ka ver rivitirilar kiano tuboiano nene. <sup>13</sup> Naio monoka tibe na, bior vio nei naio berii kiado Tubo, napano naio miyotuba ea yati tai napano maka lele tai ka nalo sikili tu ea boda ka rila toro lu kiano im̄auano. <sup>14</sup> Yati napano Yesu naio miyotuba eaio, romijikia ka naio be yati na Yuta, ana bogo na Mosis berial sio na bajulukuti na tomu lu nalo, naio maka riverial leleio sio na Yuta.

<sup>15</sup> Mia Yesu, be yati dolu na toro lu jo napano naio miyotuba eaio, naina naruei be Melkeseteki kiano bajulukuti nene napano rojum̄a robere-nio. Vite na naruei mila na romial ka Yesu maka tavukia kulo lu dolu nalo, mia naio jibe ka Melkeseteki

garuei. <sup>16</sup> Nalo dolu nei, abinimei abe kulo lu bior ka ga ajakii jameul na kiano bajulukuti, jibe ka na tuboiano moruo naio berenio, mia Yesu naio binimei be kiado parinio toro lu ea burum̃ara moroano na kiano meuliano nei na maka ajikia ala lelanio, napano mia naio to tobo to. <sup>17</sup> Kito romijikia ka mia naio toboto tibe na, bior Atua kiano iliano naio berenio ruei, napano naio berinavo

*“Kiniou nomiduso koje jibe ka tormoruo Melkeseteki, jau kobe toro lu na maariano ea kiano bajulukuti, ka na mia kovokar iñauano rivano-o mia maka rijikia ribisi.”*  
*Iouano 110:4*

<sup>18</sup> Ea vio na, binimei meravo bo ban kito ka Atua biebukua m̃arabo na kiano iñauano. Marabo moruo, na be Mosis kiano tuboiano re beamu, napano jumolu ju bogo be ruei, mia javukia napano maka rijevo moroano tai ka mia rila vite novo tai van kito. <sup>19</sup> Naio bijuku deio ka rila kito romei romemedu, tenene na Atua juvan m̃arabo moruo nene jobo garuei, ana mila jidomiano vou tai binimei medave, midu jeleigio. Marabo vou nei naruei romijikia romonea sikili ka naio be m̃arabo na be riano, napano mia naio mijikia rivuru m̃arabo ka kito ka mia romei vaataro ka Atua.

<sup>20</sup> Ana m̃arabo vou nei, Atua kanano verikariano tai naio mila jumolu ju jikili ju. Kulo lu dolu nalo re beamu, bogo na ajokol parilo, amioakolo ka kialo iñauano nalo, maka ve verikariano tai tibe na. <sup>21</sup> Mia bogo na Atua bitirilar Yesu be kiado parinio toro lu, naio milakar bija kiano verikariano na jikili tai. Javukia napano iliano tai ea niosi lu na iouano naio berenio, napano naio berinavo

*“Atua soṗi naio berkar ruei, mia naio maka rijikia river bukua kanano iliano bereio, naio berinavo*

*‘Jau mia kovokar iñauano na parinio toro lu na kanaku tomu nalo, rivano-o mia jau*

*kobisi ka re bogo tai.’”*  
*Iouano 110:4*

<sup>22</sup> Mia Yesu naio bokar batitig kiano iñauano jibe na, be kijokijo na verikariano vou na Atua kanano bija kito, napano naio bo lie vo loa ka nana beamu, a naio be tikariano na vite dolu nalo na Atua berkario ban kito, mia na rila nonovio ea kito iorou.

<sup>23</sup> Kulo lu nalo na beamu nalo miroano, bior nalo tai miñau bano-o bakovio, ana na dolu midu jum̃ano, miñau banbano-o, naio bunu bakovio, nalo amila jibe na naruei. Nalo maka ajikia avokar tobo to, <sup>24</sup> mia Yesu, naio be na toboto nañariga, mia naio ga ve takurano na mia rivokar kiano iñauano tibe ka kiado parinio toro lu rivanvano-o mia rimebi re bogo tai. <sup>25</sup> Jibe na naio jo dañariga ea Atua mirano, naio jo bolkouo dañariga banio ka kito, mila na kito na voniganei, ðelina kito tomu na romei iorou, mia naio naruei mijikia rilarrur nono kito na m̃a rejelea naio robinimei vaataro ka Atua.

*Yesu naio be parinio toro lu kar garuei*

<sup>26</sup> Kito rajaaro toru ka na Atua mial bo ka tuvan parinio toro lu tai na naio bo laka jibe na rimebi rivior kito. Naio be toro tai na be lu laka, napano maka vijukubeleano tai rimonea naio leleio, naio meravo nonovio, kiano bajago naio maka tibe ka tomu na m̃a amila kariano leleio, siano jo mave loa laka ka vite nonovio nalo na tiniabenei.

<sup>27</sup> Mia kulo lu dolu nalo nei, nalo monoka atum̃a ala sida na meravoiano tulaka ea legiano nonovio. Beamu, monoka ala rivior kialo kariano nalo bereio, ana iorou, amijikia ala rivior kariano na tomu dolu nalo kanalo, mia Yesu naio maka tibe na. Naio mila sida na meravoiano na kariano na yetemeriba nei reraio ve vaarakurano ga, nina, ka bogo na naio mila jokoluolu ka mokotenano bereio kar kito. <sup>28</sup> Be riano ka tuboiano moruo binimei beamu, mia kiano parinio kulo lu

be kulorinio ga, melokloko ga, mia verikariano vou na binime iorou, kiano parinio toro lu naio memedu dañariga, be Yesu Atua kenerinio.

## 8

*Virakariano vou: Imãuano na parinio toro lu kanano naio bo lie vo*

<sup>1</sup> Naruei verloglogiano nalo nei aber vite telabo ea tivelinio na parinio toro lu nalo. Mia burumãara burupati iliano tai na naio jo, napano temi bo ka rosidomii ve temi eaio, napano berenio kiado parinio toro lu novo tai jo ruei. Naio be Yesu na naio ban bere mave tiniabenei, naruei toro na toru na vio mave naio midu naio jotano tivelinio na jumãano meruo. <sup>2</sup> Naio joa vio na, naio mila kiano imãuano lu, javukia napano parinio toro lu nalo re beamu amila lotuano joomo ea yimo lu panpano nei ea vio yauo. Mia vio na lotuano nei, tomu nalo ga amimãaukanio, mia kiado parinio toro lu Yesu, naio jomãa mimãau joomo ea vio na lotuano na bo laka, nana be riano, napano Atua ga mimãaukanio. <sup>3</sup> Mia parinio kulo lu dolu nalo nei, kialo imãuano nalo, napano dañariga abitiribulaglo ana mãa ajumãa ajan ijaiano ban Atua, a napano mãa amila sida banio, mia bo ka rovika rover kiado toro lu nei, ðeli naio bunu midu ijaiano ban Atua, mila sida kanio? <sup>4</sup> Verver yetemeriba nei ga, mia naio maka aial naio tibe toro lu tai, bior naio maka riyotuba ea yati na Livai, na mãa tuboiano mije moroano banlo ga ka amijikia asian ijaiano rivan Atua. Jibe na, kiado parinio toro lu nene naio jomãa mimãau ea vio lu na mave ga.

<sup>5</sup> Vio lu na yetemeriba nei, bija imãuano na na mãa amimãau kalo eaio, naio javukia melukuti nene ga, ðelina kijokijo ga, mia na na ea vio mave, naio be telerinio nene. Atua bunu ber jibe na ga, tilikiti na naio berlubarbario ban Mosis, naio berkanjo ber mia tumãabe ka mia naio rimãauka yimo panpano lu

nei, naio berinavo mia naio monoka rimãauka takii tiiano nene rimemedu ka na mãa naio mialio bogo napano naio bavin ea burusuku. <sup>6</sup> Mo jibe na na kito romial ka Yesu kiado parinio toro lu naio be riano, a kanano imãuano nonovio nalo abo lie vo. Naio jotano iviso ka kito bija Atua, naio mimãauka virakariano vou tai ea kito bija naio napano bo lie vo, napano jikili jua Atua kanano verikariano napano abo lie vo, o-oa na nalo romial naio jo mave mila imãuano tai ea vio lu napano naio bo lie laka. <sup>7</sup> Verver virakariano na beamu naio rivu kia ga vo, mia ve re bunu tinene bereio, mia makanio, milαιο ana na Atua bitirilar virakariano vou bija kito napano naio bo bo laka garuei.

*Virakariano vou: Atua naio berkario beamu ruei*

<sup>8</sup> Virakariano na jukamu, Atua naio jo mial ka maka rimãau rivu, ana naio maka rivare vo ea kiano jidomiano, mila na naio berkar na na terivou dolu bereio. Naio berial jibe nei ea iliano tai nanua jian ban naverialiano Jeremaia ka naio riverialio. Ea iliano nene, Atua berkar jibe nei, berinavo

*“Kamiu kuvije tiliniemiu vatitig rivu. Kiniou nojidom never ka kamiu ka bogo tai jo binimei kiana, ka mia kiniou nala virakariano vou tai vija kamiu kanaku tomu nalo, kamiu na kube bajulukuti na Yuta bija bajulukuti na Israel.*

<sup>9</sup> *Mia virakariano nei naio rivevirare re ka nanua namila kar bija korobimiu nalo re nua. Virakariano moruo nene, nina ea bogo na kiniou tinieku miialo, kiniou noburu bulaglo den bogokouo ea vio Ijivi, mia iorou kanio, ana maka bunu asidomial virakariano nene, a maka bunu amonmoneaio, mila na kiniou bunu nobilig taakaku kalo.*

<sup>10</sup> *Mia vonganei, kiniou nevitirilar virakariano vou tai vija keniemiu bajulukuti nalo bereio. Ea*

*virakariano nene, mia kiniou  
nala tibe nei:*

*mia nevitiri bulag vatitig kiaku  
tuboiano nalo tua kialo jidomi-  
ano nalo,*

*mia nevivitauia kanaku iliano  
nalo tua kialo iviso nalo,*

*mia nemei neve kialo Atua riano,  
mia nalo na amei ave taara na  
kanaku tomu nalo.*

- <sup>11</sup> *Ka tilikiti na, mia alavon re bunu  
ka m̃a aververlogloglo bereio,  
ka na mia tai river ka kiano  
bilbilu riverinavo ‘E, m̃arabo  
naio nei,’ p̃elina tai river ka ku-  
ruano, riverinavo ‘Atua, naio  
jibene jibene.’*

*Makanio, mia ala re bunu tibe  
na, bior mia aviniu ajikia  
vatitig kiniou ea kialo meu-  
liano nalo aviniu koko, tikar  
ea nalo na tertelisu laka, riva  
rivokar kialo tomu na tortoru  
nalo.*

- <sup>12</sup> *Kiniou neberkar ka kialo vovaiano  
nalo, mia nevie kokoalo ga,  
a kialo kariano nalo, mia nosido-  
mialo re bunu.*

*Naina naruei be kanaku virakariano  
vou bija kanaku tomu nalo.”*  
*Jeremaia 31:31-34*

<sup>13</sup> Ana ea kanano iliano nene nei,  
Atua berii virakariano vou nei, mila  
kito robitilubar ka naio jo mial vi-  
rakariano na beamu nei naio be  
termoruo ruei. Mia jidomiano tai  
na jo ber vite na m̃a Atua ber be  
termoruo ruei, vonganei jo batove  
lilie ka mia riviniuviniu nonovio.

## 9

*Virakariano vou: Kiano jeleig na  
lotuano naio bo lie vo*

<sup>1</sup> Mia kito romijikia ruei bo ka  
virakariano moruo, naio be kiano  
m̃arabo nalo ka rila kanano lotuano  
eaio, a be bunu vio tai na rila  
kanano lotuano nei eaio, napano joa  
ga yetemeriba nei. <sup>2</sup> Vio na lotuano  
nene, be kiano yimo panpano lu  
nene, napano aburuko ka buruñara  
jagidago eaio, a amuebure togio juo.  
Ea togio, na abio ka Vio Lu, be bu-  
rupati na yulu tai juñano aluo, bija  
barobaro na joko duelimo ba juo

napano abio ka “Joko na asiloglog ka  
Atua.”

<sup>3</sup> Ana iorou ka jagidago nei, to-  
gio na bano ba yesobi nene, naina  
abio ka vio Lu na be Lu Laka.

<sup>4</sup> Joomo ea Vio nei, naio be boda  
na bonotanunu na m̃a amim̃auka  
niogo, bija basidobidobi na tuboiano  
nei. Basidobidobi nei, abijan niogo  
ea kulukuti, vajoomo a tavio bunu,  
mia vajoomo nene, be vite tolu  
napano abar batitiglo ajuio. Nana  
jukamu, naio be baju na niogo tai  
napano niati sinaniano na vio iauo  
na abio ka mana naio joaio, a vite  
juo nene, naio be tormoruo Erono  
kiano nasitogo napano toti bar-  
boñeio nua, a vite na maariano naio  
be puruveru na mierivin juo na-  
pano Atua bivitauia kiano tuboiano  
ealo. <sup>5</sup> Ana mave ea basidobidobi  
na tuboiano nei, naio be sikmirano,  
napano abio ka vio na totaniano  
na Atua kanano tinieijiano. A be  
tovorovo na nailiano juo ajumolu  
aju mave eaio, napano sibialo ami-  
aveveko tivelvelinio vio na m̃a Atua  
kiano mermerano jom̃a batove eaio.  
Naruei vio lu na lotuano na virakar-  
iano termoruo nene naio be vite  
novo nalo nei naruei, mia maka  
rejikia rover vite ve miroano bere  
vo ea tivelinio na nalo. Mia vite  
takurano ga na roverenio, ka vio  
na lotuano nene, vija kiano saba  
nalo, nina amim̃auka ga ea tenalo na  
yetemeriba, naio maka rijikia tobo  
to kanio ga, naio maka rivu tibe ka  
vio na lotuano na virakariano vou.

*Virakariano vou: Jokoluolu nene  
naio bo lie vo*

<sup>6</sup> Vite nalo na mave nei, naina  
naruei vite nalo na m̃a abar batit-  
iglo aju joomo ea yimo panpano  
lu na beamu nei, mia bogo na  
kulo lu nalo aba joomo, amim̃au  
bijalo. Mia dam̃ariga, ajum̃a aba  
joomo ea ga vio lu na jukamu nene,

<sup>7</sup> ana ea vio lu juo nene, na be  
vio na mia be lu laka, kulo lu nalo  
maka leleio ava joomo eaio. Vio  
nei, toro takurano ga mijikia ba  
joomo eaio, nina be kialo parinio  
toro lu, a naio maka m̃a to riva

joomo tulaka, mijikia ban vaarakurano ga ka yuka takurano. Ana bogo na m̃a ver naio bano, maka rijikia riva juṃano yauo ga tibe na, mia monoka takii m̃arabo nene. Beamu ka naio rivano, monoka ala jokoluolu ka temeul tai, ka mia naio monoka rivar basidobidobi tai na burukija nene riva joomo tibe ka ijaiano tai, naina ea tivelinio na kiano kariano, a bija tomu nalo kanalo. <sup>8</sup> Mia bogo na ajum̃a amila jibe na, javukia kijokijo na Niununo Lu napano mila meravo ban kito ka bogo na ver yimo panpano lu naio tumolu tu kia ga vo, mia kito tomu ninio kito ve re kiado m̃arabo tai leleio ka ravan rovokar vio na m̃a Atua naio joaio. <sup>9</sup> Panpano na yimo lu nei, bija sano jagidago nene napano jakilele jo joomo, a sano vite nalo, abe tena vio beamu ruei, mia aber burum̃ara titai ban kito banei. Amila kito robitilubar ka ijaiano nalo na m̃a kulo lu nalo ajajian ban Atua a jokoluolu nalo na m̃a ajum̃a amilaio, nalo abo ga, mia vite nalo nei maka ajikia ala tomu nalo ajog ka kialo iviso meravo reraio ea vitiano na Atua kiano. <sup>10</sup> Amila vite nalo na, bija venia napano tuboiano sesa nalo aberenio ea tivelinio na m̃arabo na amim̃auka sinaniano bija munuiano, a ea tivelinio na bajago na sekoniano na saba. Mia vite nalo na naio be tena vio tavio ea toro niabene ga, mia maka atokol toro kiano iviso p̃eli kiano jidomiano. Mia kiado tormoruo nalo ajum̃a abokar bajago nalo jibene bano-o, abe navokariano nalo ga rivano-o rivokar bogo na Atua mila kiado m̃arabo vou, napano naio be kiano virakariano vou napano maluvo ruei.

*Yesu kiano burukija naio jekon batitig kito ruei*

<sup>11</sup> Mo bogo na Kristo miyotuba, naio binimej jibe ka kiado parinio toro lu, napano naio maka ve tena bajago moruo, mia naio be tena m̃arabo vou, ka rila napano romijikia rovokar ilivuiano na kirinovo

nalo na Atua bar batitiglo bo aju. Naio maka riva rim̃au joomo ea yimo panpano lu na beamu, mia naio mim̃au ea tai napano bo lie vo, a loa lie vo. Vio lu napano naio jom̃a mila im̃auano eaio, maka ve toro juṃano napano milaio, mia maka toa yetemeriba nei, mia naio joa vio medave kamu ea Atua mirano mave. <sup>12</sup> Ana bogo na Kristo ba joomo ea vio lu nei, naio banbano bokar vio nana be lu mia be lu lakanio, mia naio ba vaarakurano ga, maka ka mia naio riva ve vaarakurano bereio. Ana bogo na naio ba joomo, burukija na bario naio maka ve burukija na nani, p̃elina burukija na kirikiti bue m̃arauo, mia be kiano burukija ga napano miou ea m̃akolkolo. Naruei kiano burukija nei naio joa Atua mirano jibe na, naio bokar vulbulagiano na kiado kariano ka ritoboto. <sup>13</sup> Monoka tibe na, bior ea bajago moruo, ka ver toro tai mila titai na bova, ana amidu burukija na nani p̃elina bue m̃arauo, bija bulum̃aroro na kirikiti bue m̃arauo napano amisebio, amidu ban ea vio lu. Ana ea bogo na, ajidom aber ka ijaiano na jibe na mijikia rila toro neibano naio rimeravo bereio ea Atua mirano. <sup>14</sup> Mo na ver burukija na temeul ga mijikia rila tibe na, mia Kristo kiano burukija naio mijikia rila riva lie vo ve toru laka. Kristo naio be toro lu tai, naio meravo nonovio, maka ve niajebijo tai toaio, naruei naio mijamo ka kiano meuliano ka Niununo Lu mijikia rudu van Atua tibe ka ijaiano tai, ana naio binimej be kiado naioruriano. Tibena na mia burukija na Kristo mijikia rila tiniedo rimeravo, rivurular kito den kiado im̃auano na m̃ariano nalo rivitiri bulag kito, ka romila Atua na meul kiano im̃auano.

*Yesu kiano ja mila verikariano vou jikili ju jikili*

<sup>15</sup> Ana bior Yesu mila im̃auano na bo nalo jibe na, romijikia reial naio, naio be toro na m̃a bar tenalo novo na virakariano vou nalo amaluvo

ka kito. Nina naio milaiio ea kiano m̄ariano, napano be m̄ariano tai napano bular meuliano nonovio na tomu nalo na lakokoroviano na tuboiano na virakariano na beamu. Ana bior naio bulbulag kito jibe na, mila na kito kei napano Atua bio ka kito, romijikia rovokar kiado jajuñado neibano mia maka rijikia ribisi bogo tai. <sup>16</sup> Ver Yesu riñaro re, mia kito maka rejikia rovokar kiado jajuñado nene, mia bogo napano be riano ka naio m̄aro, verikariano nonovio na virakariano nei binimej jibe ka Yesu kiano iliano na maaro, naruei vite nonovio binimej ea juñado. <sup>17</sup> Bior ver toro tai riverkar vite tai tibe na naio kiano iliano na maaro, ka bogo na naio meul kia ga vo, ajum̄a abokar batitigio bo kanano verikariano nei jo, mia maka alaiio tibekovio kanio bano-o bokar bogo na ver naio riñaro, ana mia alaiio. <sup>18</sup> Naio jibe ka ga ea virakariano na beamu na Atua mila bunu, napano burukija na jokoluolu miou, ana na iliano nalo na virakariano na atumolu atu.

<sup>19</sup> Tena Mosis bunu mila, napano Atua jian tuboiano banio mave ea burusuku, ana naio batove berial iliano nonovio na kanano ban tomu nalo, ana ka bogo na naio berialio bisi, naio muebinivin sida nalo, ka rila ka iliano nalo na tuboiano nei ameul, atumolu atu. Amuebinvin kirikiti bue marauo bija nani nalo, naruei naio midu kija kialo burukija telisu, mion kija uei telisu ban ea, ana midu jaiesi tai na telisu, abio ka isop, bija vijinio sipsip na bilvil, ana budomio ban ea burukija nene, bukio tertelisu mave ea niosi na tuboiano nene, a bukio bunu ea tomu nalo, karina naio berial banlo, naio berinavo

<sup>20</sup> *“Naina naruei be burukija na temeul napano naio m̄aro ka rila Atua kiano tuboiano rimeul. Naruei kito rotovonio, kito romonmoneaio.” Eks 24:8*

<sup>21</sup> Ana jibe ka napano p̄iligv̄ilig burukija nei ealo, naio p̄iligv̄ilig

bunu tertelisu ea yimo panpano nei, bija vite nalo na aju joomo eaio napano m̄a abar amila kialo lotuano bijaio. <sup>22</sup> Marabo na iñauano na tuboiano moruo nei naio jibe na naruei, napano mia vaatara ka vite nonovio na m̄a amim̄au bijaio, monoka ap̄iligv̄ilig burukija eaio dam̄ariga ka rilalo ave lu. Nina jiloglog burum̄ara titai na rivan kito, ka ver burukija riou re, viekokoano na kariano maka tai.

*Virakariano vou: Jokoluolu nene naio bar bulag nonovio kariano na yetemeriba*

<sup>23</sup> Tibe na, vite nalo na m̄a kulo lu nalo amim̄au bijaio, bogo nonovio monoka ala bunu rimeravo ea m̄arabo sesa nalo nene. Mia yimo panpano lu nene, bija sano tenene nalo, nalo abe tena yetemeriba nei ga, ana jum̄abe ka vio lu nana be riano, napano Atua joaio ea vio mave? ?Naio bunu monoka ve jokoluolu tai na viekokoano na naio? Nao, naio bunu monoka burukija riou ka rila kiano saba nalo riviniu rive lu, vija bunu nalo na m̄a aju aban eaio. Mia jokoluolu na vio lu na tiniabene naio maka tibe ka temeul nalo na m̄a amila jokoluolu kalo ea vio lu na yetemeriba nei, naio be jokoluolu tai na toru lie vo, a bo lie vo laka. <sup>24</sup> Ana burukija na jokoluolu nei naio joa Atua mirano ruei, bior kiado parinio toro lu Kristo naio ban ea vio lu nei ruei, napano maka ve vio lu na tomu nalo ga amim̄aukanio, mia be vio lu na be riano, nina ea vio mave tiniabene. <sup>25</sup> Mia bogo na mila kiano jokoluolu jibe na, naio maka tavukia nalo na m̄a parinio kulo lu dolu nalo amilaio. Nalo amila jokoluolu ka burukija na temeul nalo, mia naio mila jokoluolu ka kiano burukija bereio. Mia nalo, aba amila ea vio lu vaarakurano ga ka yuka nonovio, monoka mia ala tibena rivan dam̄ariga, ana naio mim̄au ka nonovio varakurano ka bogo tai na ga, bisi, ana maka ka mia aim̄au ka bereio. <sup>26</sup> Ver Yesu monoka tom̄a rila kiano jokoluolu

tulaka rivior kariano nalo na m̃a tomu nalo ajumon ka m̃a amilaio, nina jibe ka ber jikar ea tikariano na yetemeriba binimeĩ bokar vonganei, naio jo jaklele ea m̃akolkolo ga, naio mijog bova ka napano kiano burukija jom̃a miou bogo nonovio ga.

Mia ea tiiano na Atua bitirilar naio maka tibe na. Naio mial jukuti na bogo nei rojua voniganei naio binimeĩ lilie vaataro, ana na mila napano Yesu binimeĩ miyotuba ka kito maka vesiou. Naio maluvo ka kito naruei naio mila jokoluolu ka nono kiano meuliano, mijil lar bajago na kariano. <sup>27</sup> Ea tivelinio na kito tomu nalo, Atua mila ka kito romeul ea yetemeriba, karina rava kovio denio karina romeul bereio ka ravan ea tibureiano, <sup>28</sup> mia ea tivelinio na Kristo, naio jibe na bunu. Naio binimeĩ miyotuba ea yetemeriba nei, karina mila jokoluolu ka naio ka rivar vironiano na kiado kariano nalo, karina mia riyotuba bereio ve valuo nene, maka ka mia rivulu bulag kariano bereio, mia ka rivuru bulag kito den vironiano na kariano na kiado, na m̃a rabarkar tiniedo eaio, rojidom ka mia naio rimeĩ rilarur kito.

## 10

### *Jokoluolu na Yesu kanano naio bolaka*

<sup>1</sup> Kito rosidomii von bereio tuboiano moruo na Mosis kanano. Naio ber saba novo nalo tealõ tai, ana mia naio maka riverial nonovio ilivuiano novo nalo na m̃a Atua naio jidom ka Kristo rila riyotuba ka kito, mila na tuboiano nei naio jibe ka vaiunu ga, maka ve niosunbueriano nene. Tuboiano moruo nei naio jom̃a beve torogio mugaruei jibe na, naio jiloglog ka kanano jokoluolu nalo, napano m̃a ajum̃a amilaio ka yuka nonovio, maka avare, maka ajikia ala rimeravo vatitigio rivu nonovio nalo na m̃a amila lotuano bijaio. <sup>2</sup> Aver tibe na, mia nalo nam̃a amila lotuano jibena, p̃eli mia nalo amei ameravo nonovio ruei na, ajog re bunu ka

kariano joalo, ka na mia asidomii re bunu ka mia ala jokoluolu, mia makanio, amonmon ga amila jibe na. <sup>3</sup> Jokoluolu nalo na monoka ala ka ajog ka nalo maka ve kariano tai, mia makanio, yuka nonovio amialio ka napano jokoluolu nalo nei amila nalo ajidomial bereio vovaiano nalo na kanalo, ana amijog ealo ka niamiamo na kariano jo kia ealo vo napano ba bova lie vo. <sup>4</sup> Ajum̃a amijog jibe na bior kialo jidomiano tai jo, aber burukija na buruolu bue marauo p̃elina burukija na nani naio mijikia sekõ bulag kialo kariano tum̃abe? Vite na, ajidom bitovitonia toru laka kanio, ban bano-o na abitiidieio, kialo kariano jo keano vo.

<sup>5</sup> Ana bior tenalo na, bogo na Kristo riyotuba ka kito ea yetemeriba nei, naio berial kiano m̃arabo vou naruei. Naio midu iliano tai napano joa niosi na Iouano Lu, naio ber ka karam̃ano Atua, naio berinavo

*“Jau maka bunu kosidom jokoluolu nalo a ijaiano nalo, mia jau komim̃auka batitig mokotenuka ka najamo ka vanso.*

<sup>6</sup> *Vite nalo na m̃a aju amisebio jijenio ba biniuviniu, jau komial bova ga, a ijaiano nalo na meravoiano na kariano, maka lele tiniem tiio.*

<sup>7</sup> *Karina, kiniou nojumolu neberial batitig banso, neber ‘Atua, kiniou najaaro ka nala kanamo sidomiano, nina ga kiniou nebinimeĩ biorio, nina tibe ka ga napano Niosi Moruo naio berenio ber mia kiniou nalaio.’” Iouano 40:6-8*

<sup>8</sup> Mo bo ka kito rovitii vatitig rivu iliano na Kristo berenio nei. Vite na jukamu napano naio berenio, ber napano jokoluolu nalo bija ijaiano doldolu nalo na m̃a ajum̃a amilaio, be kurano ka na m̃a tuboiano naio berenio ber monoka alaio, mia Atua naio maka tom̃a rijog rivu kalo, mia naio maka bunu sidom ka mia alaio. <sup>9</sup> Karina, vite juo na m̃a Kristo

berenio, berinavo naio mijamo ka naio naruei, ka naio rimei rila Atua kiano sidomiano.

Ea vio na, romial napano m̄arabo na jukamu na m̄a amila jokoluolu bior kariano, Atua midu lario ruei, kanano m̄arabo juo nene, naio jakio. <sup>10</sup> Ea m̄arabo vou nei naruei, Kristo naio mila jibe ka na Atua kiano sidomiano naio berenio, naio jian nonovio mokotenano, ana mila napano kito robinimei romeravo a robe lu ea Atua mirano, naio jo jibe na dañariga.

### *Jokoluolu na Yesu kiano naio toboto*

<sup>11</sup> Kulo lu nalo na m̄a ajum̄a amin̄au ea bajago moruo, monoka ve tealu na m̄a legiano nonovio ga atumolu atua Vio Lu. Nalo ajum̄a amila jokoluolu sesa nalo dañariga, napano abe vevirare ga bogo nonovio. Jokoluolu nalo nei ajum̄a amila bior kariano na tomu nalo ajum̄a amilaio, mia maka lele ajikia avare ka avar bulag bajago na kariano den tomu nalo kialo meuliano.

<sup>12</sup> Mia kiado parinio toro lu nei Kristo, kiano jokoluolu naio maka tibe na. Naio mila jokoluolu ka kiri vite takurano ga bior kariano nalo nonovio, mia naio mila vaarakurano ga, ana bogo napano mila bisi, ana naio ba jotano mave ea tivelinio vameruo na Atua. <sup>13</sup> Atua naio mial Yesu ka mila jibena, berenio ber mia rivar Yesu kiano uolu nalo, rudulo atutano ka naio tibe ka yebe tai napano bijankon jaano eaio. <sup>14</sup> Maka ver in̄auano dolu tibe na ka Yesu monoka rila, bior ka napano naio jian ijaiano ruei, kiano burukija mila kito romeravo, vonganei robo ea Atua mirano ruei, rivanvano-o mia ribisi deio. <sup>15</sup> Niununo Lu bunu naio miasol iliano ban kito ea vio na, ea iliano tai nanua binimei ea naverialiano Jeremaia. Ea iliano nene Atua naio ber jibe nei berinavo

<sup>16</sup> *“Ana vonganei mia kiniou nevitir-ilar virakariano vou tai vija kanaku tomu nalo bereio.*

*Ea virakariano nei, mia nala tibe nei. Mia nodu vatitigio kanaku tuboiano nalo atoa kanalo jidomiano nalo, mia nevivitaia kanaku iliano nalo toa kanalo iviso nalo.” Jeremaia 31:33*

<sup>17</sup> Atua naio ber jibe nei, ana ba lie telisu ga naio miasol bereio, naio ber jibe nei berinavo

*“Mia kialo kariano nalo, vija kialo vovaiano nalo, mia nosidomialo re bunu.” Jeremaia 31:34*

<sup>18</sup> Iliano nei naio berial burum̄ara viekokoano napano Atua naio mila ban kito ruei, ana ver tibe na, ve re ijaiano dolu bereio napano romijikia resian ka rivokar viekokoano rivior kiado kariano p̄elina kiado vovaiano nalo, bior ka napano Atua naio mila batitigio bo ruei.

### *Kito romerou re ka rava vaataro kean Atua*

<sup>19</sup> Kuruaku nalo a kuvivinioku nalo, jibe ka na m̄a iliano nalo nei aberenio, Yesu kiano burukija betavo ea kiado m̄arabo ruei, naruei bo ka romerou re ga, mia resel ea naio rava joomo ea Vio Lu napano Atua joaio. <sup>20</sup> Beamu, burum̄ara jagidago na jaklele ko kanado m̄arabo, mia Yesu mokotenano naio buruṗe, jagidago nei bunu buruṗe niati juo, naruei naio betavo ka kito rava joomo. Vonganei kito rojua m̄arabo novo nei naruei, napano be m̄arabo vou tai, a be m̄arabo na ban kar meuliano. <sup>21</sup> Naruei Yesu naio mila kiado m̄arabo ba joomo ea vio lu jibe nei, naio binimei be kiado burum̄ara toro lu, napano bitikar kito nonovio ea m̄aratavo na Atua kanano. <sup>22</sup> Kiano burukija naio milakon niamiamo na bova napano ju joomo ea kito, kiano uei na meravo novo naio jekon niabedo binimei meravo nonovio, ana maka bunu roimou, mia romijikia rava joomo. Romijikia rava vaataro kean Atua napano kiado iviso be riano, rotu sikili laka ea naio rober mia naio rivuku bulag kito re, ka na mia

naio rila vorvoruano van kito ga.  
<sup>23</sup> Kito romijikia romonmonea rivu vatitig ka mia Atua rila rivu tibe na van kito, bior dañariga, naio jomã mila memedu ga ea venia napano m̃a naio berkario. Kito maka bunu rosidom dede kanio, mia robokar batitig iñauano na ka roverial van kulo dolu nalo vite novo nei na m̃a naio milaio ban kito. <sup>24</sup> Ana ea tivelinio ka kito bereio, bo ka rotu rosidomii vatitig rivu, roseravo m̃arabo na tutuliano na kiado jidomiano nalo ka tiniedo tii kito rivu lie, a ka ralala iñauano novnovo nalo van kito rivan lie tibe na. <sup>25</sup> Maka rivu ka kito rotuvan bajago na reiasosol vatitig kito rivu, tavukia na tealo ajumã amila ruei, mia bo ka na kito rotumã rotunukakar kito tulaka dañariga. Bajago novo nalo nei monoka rotumã rala van kito dañariga, ana ver bogo tai kito reial ka bogokouo na legiano na maaro atu vaataro, bo ka rovu ka kito tibe na dañariga lie vo.

*Kito rosidomii kurano re ka Atua kiano tibureano*

<sup>26</sup> Bo ka kito rovika vikadeniano ea tivelinio na kito napano robokar jikiaiano nalo na ilirianiano ruei. Rovika tibe na, rover ver kito rotovon re, rotumolu rotumã rala tanea kariano lie, mia tumãbe ka kito? Sano verdopeiano nene, naio jibe nei, ka kariano nalo na jibe na, maka bunu ve jokoluolu tai napano mijikia rivar bulagio bereio. <sup>27</sup> Venia napano ga jo, nina Atua kiano verikariano ka mia sian vironiano na jikili riviorio, vija burumãara jeleig sebi napano mia sisen nonovio kiano uolu nalo. Naina be vite na merouano toru laka na. <sup>28</sup> Ea tuboiano moruo na Mosis kanano beamu, ver toro tai rila korov iliano nei tai, mia tomu ve juo p̃elina ve tolu bereio avirokarlo ka be riano, ka toro na mila jibe na jibe na, mia ve re bunu m̃arabo na tinieiano bereio, mia toro nene mia atelar kiano meuliano ve vaarakurano ga. <sup>29</sup> Ver ala tibe na ka toro na mila korov Mosis kiano tuboiano, mia

tumãbe ka toro na bilig taakano ka Atua kenerinio? Mia kanano vironiano naio ve burutomoluo laka na, bior naio mila lelan burukija na virakariano vou napano beamu mila naio meravo ruei ea Atua mirano. Mia Niununo na tiniememiano naio rijog rivova ka bajago na mia naio tinien ser m̃elea toro na m̃a mila. <sup>30</sup> Mia monoka naio rudu vironiano nene bior Atua naio berkario jibe na ruei. Kiano iliano lu tai naio joa niosi na tuboiano moruo, napano naio ber jibe nei, naio berinavo  
*“Ka tibureiano na kariano, be kanaku kiniou ga takurano.*

*Nesian meran sikili mia sikili rivior kialo vovaiano nalo.” Tiut 32:35*

Ana ea vio nene kia ga vo iliano dolu naio ber jibe nei bereio, naio berinavo

*“Mia Atua sofi naio tibure kanano tomu nalo.” Tiut 32:36*

<sup>31</sup> Kito monoka rovitikar vatitig rivu, bior toro na m̃a milala kariano, ka bogo na adu naio toa Atua jumãano ka rivitii naio, naina maka ve tena telisu tai, mia naio be tena merouano memedu.

*Bo rotu sikili ka roviniua venia na mia rijikia rimaluvo iorou*

<sup>32</sup> Kito maka rejikia ka mia tumãbe ea legiano nalo na aju abinimei, mia bo ka rotu rosidomial m̃arabo novnovo nalo namã Atua mijaja kito kanio ea legiano nalo napano abarlaka ban ruei. Bogo na kito romiyotuba ea miamoiano nanua beamu na, maka vesiou ana romidu bogo na jikili laka, napano aju amila kirivova ban kito napano romonea Yesu. <sup>33</sup> Bogoti tealo, kamu ea tomu nalo miralo, abuku iliano na bova ban kito, bogo tealo añele tanea kito ea bajago va nalo napano kirivova-o mia kirivova. Ana bogo tealo, maka rivan kito mia amila ban kanado bilbilu nalo, ana robano rejikili roju bijalo, romijailo.

<sup>34</sup> Kito tealo, abukulo aban ea yimo na lakoiano, ana tiniedo mialo toru laka, roju raba romilavon ka rejailo ka ravar bulag kanalo

burum̃ara jogvaiano napano aju abiniua ea vio nene. Ana bogo tealó bereio, nalo na m̃a ajerm̃i ka kito abinimeí kar kiado saba nalo, ka avar bulavulag lelan kito, be burum̃ara laluvuiano ea kito laka. Ana ka bogo na, mia tiniedo serlo re, rajamo ka ga, bior be saariano tai napano joa kito, ka vite nalo na abar bulagio abe tena yetemeriba nei ga, mia kanado tonovno nalo napano abo laka aju, napano maka ajikia avakovio bogo tai, mia ave kiado bo kanio.

<sup>35</sup> Naina naruei burum̃ara kanado vulaviano napano mia Atua naio sian van kito, ana bior ka ijaiano novo nei naio jokamu ea mirado, maka rivu ka ralaluv bereio burum̃ara jikiano riano napano joa kito rui, <sup>36</sup> mia monoka rotu sikili dam̃ariga ea Atua. Kiado jidomiano monoka ve tebievi rivu ka rotu rala naio kiano sidomiano nalo, ka mia romijikia rovokar vite nalo na m̃a naio berkario ban kito. <sup>37</sup> Ana bogo na ka rovokario, p̃eli mia ve sio re ga na mia naio riyotuba ka kito, tavukia na Atua kanano iliano tai napano naverialiano Abakuku naio berialio, napano naio berinavo

*“Bogo ve telisu kija bereio, ve sio re ga na, mia toro na toru nei napano ka mia rimeí naio maka rijikia tuliliei va lie vo, ana mia naio riyotuba.*

<sup>38</sup> *Ka bogo na, kanaku tomu na memedu nalo mia amijikia ameul rivu ga, bior ka na m̃a amonmonea kiniou,*

*mia ver neial nalo tai kalo na maka asidom kiniou, vurudidig naio, mia kanaku iviso risaaro re ka naio leleio.”* **Apakuk 2:3-4**

<sup>39</sup> Ana naina maka ve kito nei. Kiniou Maka ve tinieku ka kito ka tomu kinkin na m̃a romerou ka Atua. Nalo na m̃a aburu didiglo jibe na, mia monoka ava kovio mia kito, tomu na m̃a roju jikili ea naio, mia monoka ravokar meuliano.

## 11

*?Viekouoiano naio be venia?*

<sup>1</sup> ?Kiado viekouoiano nei, mia roverenio naio be vite venia? Romijikia roverenio naio be bajago na romonmonea vatitig Atua rivu sikili, ka naio mijikia rila kiado jidomiano riluo rivu ea naio ga, mia mijikia rila kiado moneano tu sikili ka rover vite nalo na m̃a maka rejikia reialio, abe riano aju. <sup>2</sup> Viekouoiano naio be burum̃ara vite laka ea Atua kiano vitiano. Jikario ea kanado tormoruo nalo na beamu binimeí, nina be m̃arabo takurano ga napano Atua mila ka naio rijikia saaro ka tomu nalo. <sup>3</sup> Bajago na viekouoiano nene naio naruei mila kito robitilubar ka be riano, Atua kanano iliano ga naio jii vite nonovio, a naio mila kanado yetemeriba miyotuba. Kiano moroano naruei midu vite napano toro maka rijikia rialio, mim̃auka vite nonovio na m̃a roju robitii joaio.

<sup>4</sup> Bo ka kito rosidomial korobido nalo tealó, ka jum̃abe nalo bunu abalea Atua bogo na beamu.

Nalo tai be tormoruo Epel. Ea kiano viekouoiano ea Atua, naio milotu ban naio ka ijaiano tai napano memedu, ana Atua jaaro ka rijeivio, naio mial bo loa ka ijaiano na kuruano Ken naio jiano. Mia Ken tinieno mimi, ana naio muetam̃aria kuruano nene, mia Epel kiano bajago bo na viekouoiano ea Atua, mila Atua mial naio be toro na memedu tai, mia vite nei mijikia rija kito rimeí rivokar banei keana vo.

<sup>5</sup> Tormoruo dolu, naio be Inok. Ea kanano viekouoiano ea Atua, naio maka rivokar m̃ariano. Naio be tormoruo laka ana Atua ga naio binimeí burulario jaluvo den yetemeriba nei, naio bavin mave, ana ajiravo naio mia maka alealio. Atua mila jibe na ka naio bior jibe ka na m̃a aju aber, ka bogo na naio joa yetemeriba nei, naio be toro novo tai na m̃a Atua naio jaaro toru laka kanio. <sup>6</sup> Be riano, ver viekouoiano ea Atua naio toa re kito, maka rejikia

rala ka na mia Atua naio saaro ka kito. Toro kei napano naio jidom rijikia Atua ea kiano meuliano, jidom rimei vaataro ka naio, monoka riviekouo sikili ea naio tibe na. Naio monoka rimonmonea ka be riano laka, Atua naio jo, a monoka rivarkar tinieno eaio ka mia naio rila rivu laka van nalo na ma ajumã abitkar naio.

<sup>7</sup> Tormoruo tai bereio naio be Noa. Ea kiano viekouoiano ea Atua, naio mila venia na ma naio berkanio. Atua berial burumãara ueimiya nei banio, ana bogo na Noa naio makarial kijokijo na tenei tai leleio vo, mia naio mila ga venia napano Atua naio berkanio, mimãauka burumãara kanalo uako ka sano maratavo nene amijikia ameul eaio.

Noa kiano viekouoiano na ea Atua milarur nalo nene, mia mila bunu burumãara vironiano maluvo ka nalo dolu nonovio ea yetemeriba nei, bior nalo maka amonea. Mia Noa be nalo tai ea taara nei na ma amonea Atua, ana Atua milalo amemedu ea mirano.

<sup>8</sup> Dolu, naio be tormoruo Epraamo. Ea kanano viekouoiano ea Atua, naio monea naio batitigbo, naio jumolu den vio nanua naio joaio, naio ban ea vio dolu tai, napano Atua berkario ka mia rudu vanio. Naio jo miel ban ea vio nene, maka rijikia ka naio jo ba be na, mia bior Atua bio naio, naio ban ga. <sup>9</sup> Naio miel banbano-o mia bogo na naio miyotuba keanio, mia naio javukia ga valauo tai, mia buruvenuo nei naruei napano Atua berkario ban naio. Ana naio jonã buru kunuano panpano ea vio nene, naio joaio naliko kanano maratavo nalo, jibe ka kenerinio nalo napano Aisak nalo bija kumabinio sesa nalo, napano Yakovo nalo, napano nalo bunu aborkar borotano nei nanua ma Atua naio jian banlo ka ve kanalo tobo to. <sup>10</sup> Ana Epraamo naio boru ea vio nene, naio joaio, mia naio maka rimãauka mano yimo na toru tai, naio jonã mon ea ga yimo panpano nei ga. Naio ga

bior ka napano naio monmonea ka maka ve kiano vonuo riano vo, mia naio jo ga jibe na, ka mia riva jouro ea burumãara komeli na Atua kanano, napano Atua naio bitirilario a mimãaukanio bija kanano burupati na jikili napano mia maka ajikia avurukorov bereio bogo tai.

<sup>11</sup> Tai bereio, naio be tiramoruo Sera. Ea kiano viekouoiano ea Atua, naio be mabono ka kenerinio motoru neibano Aisak. Beamu, naio maka rijikia rivar kiritete banbano-o binimei be tiramoruo, mia naio biekouo ju jikili ea Atua ka mia Atua rive riano ea kanano verikariano van naio vija kanano tormoruo Epraamo, ka mia naljuo avar kenerilo tai. <sup>12</sup> Mia tormoruo Epraamo nene bunu, jibe ka merenio batove ruei, mia kiritete neibano naio bario mila na kanano maratavo nalo binimei telabo. Karina abar sosolilo batove binimei jibe na banbano-o na kanano yati nalo abinimei miroano javukia marvitano nalo na vio iauo, maka bunu ajikia avulukulo ajavukia kurukuti yono na koyou ea tei. <sup>13</sup> Mia tormoruo nalo nonovio nei na ma amonmonea Atua jibe na, mia Atua naio berkar tonovno nalo banlo, mia nalo amijev togio telisu ga, mia amarmaro ajaluvo den yetemeriba nei. Mia nalo amijikia ka mia Atua rijev togio ga vanlo, mia sian nonovio togio na toru nene vanlo iorou, naruei naio mila abitulubar ka nalo abe valauo ga ea vio nene. <sup>14</sup> Vio yetemeriba nei naio maka ve kialo vio rimemedu, mia kialo jidomiano jua kialo vonuo riano tai. <sup>15</sup> Ana ver vio neibano ajumã ajidomii melea, naio be buruvenuo nei napano beamu ajuvanio abinimei, ver nalo asidom, amijikia avarpiliglo avan ea naio bereio ga. <sup>16</sup> Ana makanio, mia nalo maka atu tinielo rimaio ka naio bereio, nalo ajumã ajidomii ka mia avokar vio dolu tai napano naio bo laka, ajidom vonuo na vio mave ga. Atua naio mila batitig kanalo komeli novo nene ruei, ana naio tinien jiilo toru

ka rijog ka na mia atumã averenio ka naio be kialo Atua riano, a napano ajuã aber kiano vonuo, naio be kialo vonuo damãariga. <sup>17</sup> Ana ea tivelinjo na tormoruo nalo nei keana vo, kito rover tormoruo Epraamo bereio, naina ea lavoniano kouo napano naio biniuaio. Ea kanano viekouoiano ea Atua, naio mijamo ka kenerinio takuranolar ga nei Aisak, naio mijamo ka mia rila jokoluolu ka naio bereio. Naina be Aisak nene nanua beamu, Atua naio berkar jikili ban karamãano, naio berinavo

<sup>18</sup> *“Riyotuba ea kenerimo na mia kanamo bajulukuti nalo amei ve miroano.”* Jen 21:12

<sup>19</sup> Ana ka bogo napano Aisak vaataro ka naio rimãaro, Epraamo naio maka vitovtonia ea Atua kanano verikariano nei, mia naio jo monmonea ga ka ver naio monoka ruebin kenerinio nene rimãaro, mia Atua mijikia rila naio rimeul bereio. Ana Atua mial kiano viekouoiano ea naio be riano jibe na, ana Aisak naio maka bunu mãaro, mia karamãano naio mial ka napano Atua mila kenerinio kiano meuliano ban ea jumãano bereio.

<sup>20</sup> Mo be tormoruo nene tai bereio, naio be Epraamo kenerinio Aisak. Ea kiano viekouoiano ea Atua, naio jian kiano iliano na maaro ban kenerinio juo nei Yakovo naio Isau, naio monmonea ka mia iorou ana mia ilivuiano rimei ea naljuo tibe ka ga napano naio berkario banlo.

<sup>21</sup> Ana Yakovo nei bunu naio jibe na. Ea kiano viekouoiano ea Atua, mia naio barkar tiniene ea naio ka mia naio rila rivu van kiano bajulukuti nalo na mia amei iorou. Naio bar kenerinio nei Yoseve, ana Yoseve nene naio bar kenerinio nalo juo. Ana ka bogo titai, bogo napano vaataro ka korobilo tormoruo Yakovo nene rivakovio, mia naio jumolu ka kiano nasitogo naio jurubanini ka parinio naio milotu ka Atua, ana naio berial kanano verikariano na ilivuiano ban kumãabinio sesa nalo abiniu.

<sup>22</sup> Karamãalo tormoruo nei Yoseve, naio bunu bo ka rosidomial naio. Ea kiano viekouoiano ea Atua, naio monmonea jikili ka mia Atua tuvan re kulo Israel atubo ea vio Ijivi, mia naio rivuru bulaglo avan bereio ea kialo buruvenuo rimemedu. Naio berial jibe na, ana bogo napano kiano meuliano vaataro ka ribisi, naio ber bunu ber, ver naio rimãaro mia ativin re naio to Ijivi, mia monoka adu riva ativin toa kanalo vio.

<sup>23</sup> Tai bereio be tormoruo Mosis, kanano tormoruo juo nene. Ea kanalo viekouoiano ea Atua, naljuo maka amerou ka parinio tubo Vero kanano tuboiano na kirisikili nei, mia bogo na naljuo nene kenerilo Mosis naio moluo, amial naio kirinovo tai vo, ana maka ajamo ka naio ka auebinio, mia amidu van batitig naio jo banbano-o bokar siberio tolu.

<sup>24</sup> Ana Mosis nene, naio bunu, bogo napano naio miluo bavin naio toru ruei, naio bunu be toro na moneano. Ea kiano viekouoiano ea Atua, naio maka sidomii melea ka sio novo na amidu banio jibe ka parinio tubo Vero kenerinio vevinio kenerinio, <sup>25</sup> mia naio jidomii temi laka ka kiano bajulukuti dolu nalo, tomu nalo na abe Atua kanano mãaratavo. Naio juva vonuo na tor na toru kanano, bija yetemeriba nei kiano bajago nene nalo, napano kanano saariano nene naio be tena banei ga, ana naio ba miasol kanano tomu nalo, ea meuliano na bogokouo napano mãa kulo Ijivi nalo ajuã amila banlo. <sup>26</sup> Ea bogo na, naio jomãa bitikuku ilivuiano nalo napano rijikia rimaluvo kanio, ea bogo na jo binimei iorou. Naio bitii ka ver naio jo bar jogvaiano bijalo bior Naverikariano kiano imãauano, naio bo loa ka naio rivar kanano tonovno nalo ea kiano meuliano na monmaio ea tor na toru na Ijivi kunuano. <sup>27</sup> Ea kiano viekouoiano ea Atua, naio maka rimerou ka venia napano parinio tubo Vero mijikia rila vanio, mia juvan vio

Ijivi, jibe ka napano Atua ber kanio. Naio maka bitikar Atua mirano, mia naio jom̃a monmonea ka ga jibe ka napano naio jom̃a bitikar naio ka mirano memedu ga. <sup>28</sup> Bereio bunu, ea kiano viekouoiano ea Atua naio bokar batitig m̃arabo na ioruriano napano Atua ber kanio, ana naio mila kiano tomu nalo aṗiligṽilig burukija na nunu ea kialo m̃aratavo, ana bogo napano Atua naio mila kiano nailiano na m̃ariano binimei ka rudu vironiano van Vero, naio bar laka jel mave ka kialo vonuo nalo, mia naio ba muebinvin nonovio kiritete motoru ea vonuo nonovio na ea vio Ijivi.

<sup>29</sup> Ana iorou ka naina kulo Israel nalo aburo den Vero, amiel aba abokar tei napano be Teimia. Ea kialo viekouoiano ea Atua, abarkor aba tivelinio ea burum̃ara tei nei, amiel aba jibe ka ga na m̃a amiel ea borotano ga. Mia nalo na Ijivi aju abinimei iorou kalo, naruei nalo amilavon ka aiel avarkor tibe na bunu, mia burum̃ara tei nei naio binimei miasol bereio, miladomdomlo am̃arm̃aro nonovio. <sup>30</sup> Ana bogo napano kulo Israel nalo amiel aba lie vo, aba aboru ea burum̃ara komeli na vio Jeriko, bija kiano kulo na mira nalo napano aju jouro ea kanano burum̃ara tagvoru napano burutomormoruo napano amivon be puruveru jeliviv. Ana ea kialo viekouoiano ea Atua, kulo Israel nalo amiel abulan jaalo jeliviv ea komeli nei ba bokar bogoti ari, banbano-o bogoti aluo nene, amialio ka napano Atua mila tagvoru nalo nei ajibirbili vaarakurano. <sup>31</sup> Ana na jouro ea komeli nene, be tira tai napano jo, napano beamu naio be tira na m̃arabo, siano be Reavo. Beamu tomu juo na Israel amiilalo ka ava aviti venalulua kulo Jeriko kialo vio, nalo abano ajoluku jouro Jeriko, ana bogo napano ajuaio, tira nei milavanlo ajua kunuano, naio miija tomu juo nei toru. Mia nalo, aba amila ea vio lu vaarakurano ga ka yuka nonovio, monoka mia ala tibena rivan dam̃ariga, ana naio

mir̃au ka nonovio varakurano ka bogo tai na ga, bisi, ana maka ka mia aim̃au ka bereio.

<sup>32</sup> Naina naruei be kiado tormoruo tealo napano abe burupati toro na viekouoiano re nua. Mia romijikia rava lie vo, bior ka sio miroano ju keano vo, javukia tormoruo nalo nei Kition, Barak, Samson, Javta, bija parinio tubo Teviti bunu a Samuel bija naverialiano dolu nalo, mia namial jibe ka bare beamu vo, maka bunu ve bogo na rovivitauia bulag kialo tukunuano nalo riviniu riveve terakurano. <sup>33</sup> Be riano keana, ver romijikia rojog tukunuano nalo nei ga, nalo bo mia bo. Ea kialo viekouoiano na ea Atua kiado tormoruo nalo amila burum̃ara vite nalo telabo. Reialio ka napano amila mira, ajovulu buruvenuo dolu na jikili, amila napano tomu na vio ga nalo monoka aim̃au takii tuboiano memedu, mia ajikili ka avokar venia napano amijikia ka Atua naio berkario banlo. Kulo dolu nalo abukulo aban ea bulukuṗili na laion ka aserlo, mia maka ajikia aserlo. <sup>34</sup> Mia abukulo aban ea burum̃ara kenieno sebi na, ana mia maka rijikia sisenlo leleio. Bogo tai ana abiniua iobogu na mira, mia aburo denio bo ga, mia bogo tealo uolu nalo amila kikilo banbano-o na kialo moroano batove, vaataro ka ribisi. Ana iorou kanio, ana amial ka napano abavin bereio, abinimei jikili laka, naruei amila mira ka kialo uolu na ea buruvenuo dolu nalo, banbano-o na ajovulu lo, amijil bulaglo aban bereio.

<sup>35</sup> Nalo tealo kalo am̃arm̃aro ea bogokouo nei, naruei koalo nalo ajum̃a ajiglo toru, mia amiilo ka napano Atua jian bereio niunulo banlo, bar bulaglo ameul bereio. Nalo tealo bereio, uolu nalo amila jaleleano telabo ea mokotenalo, a amilavonlo ka ver aber maka bunu amonea ga Atua, mia nalo atuvanlo avan bereio. Mia verver nalo aber ka aju amonmonea, mia ala kilkil ealo liei vo.

Mia ea bogo na, Atua kiano tomu

nalo aberver ver nalo ala sikili liei kalo, mia bo ga, mia nalo maka ajikia atuvan kialo Tubo. Nalo tinielo maio ga ka bogo na mia naio rilalo asikil atu bereio, nalo ajidom asikil atua mirano napano asaaro, a nalo aimou re bunu kanio. <sup>36</sup> Nalo tealo amiorkakarlo ana abitivlo ea vio medave kamu ea tomu nalo na m̃a aju amilkuei kalo m̃elei. Mia nalo tealo, bogo na amiorkarlo, nina ea m̃armieni na teremi, naruei abukulo bijaio ban ea nalakoiano. <sup>37</sup> Tai bereio, ajubabinvinlo ka puruveru, a tealo abijikokorov mokotenalo beve juo ka so, a tealo ajebinvinlo ka iobogu na mira. Nalo napano ver maka am̃aro, nalo bunu vite nonovio kirisikili banlo. Nalo maka ve kialo titai, jum̃alo bulati laka, naruei amijulu bulag kulukuti nani p̃elina nunu bunu ka mia mila niabele bitunu, mia vite nonovio bova ga banlo julaka ga, mia tomu dolu nalo maka aialerinio ealo, amila lelanlo toru laka. <sup>38</sup> Nalo na maka ve kialo vonuo, maka ve kialo vio na mia avan eaio, naruei amiel janea vio nalo na be teauo p̃elina ea burusuku, aju janea buluvai nalo.

Nina be tomu na viekouoiano nalo, nalo ajibe na naruei. Yetermeriba nei naio bijuku bova toru kalo, jibe ka napano romijikia roverenio roverinavo yetemeriba nei naio maka bunu rivare ka kulo novo nalo na jibe nei atuaio, tomu nalo nei bo ka atua ga kanalo vonuo na jo mave. <sup>39</sup> Romial ka nalo nonovio napano roberiilo ruei, abiniua bogokouo telabo laka mia maka ajoru, aju jikili dam̃ariga, mila kito robitii kialo viekouoiano ea Atua naio burutomoruo, a be riano. Nalo abe tomu na virakariano moruo na beamu ga, ana ajum̃a amijog Atua kanano verikariano novo nalo, ka mia naio rila m̃arabo na ka mia ajikia avokar meuliano napano maka ve jukuti nene tai, mia maka aial m̃arati na verikariano nene maluvo keanlo.

<sup>40</sup> Mia Atua naio jo bitii boka

rila m̃arabo vou tai van kito. Mia naio miila Yesu binimei mila kiano im̃auano bisi, mila na nalo na beamu nei, bija kito, kito nonovio robar m̃arati na Atua kanano verikariano nei ea m̃arabo takurano ga a ea bogo takurano ga.

## 12

*Rovitii Yesu ga, ka naio jikili juvulu bogokouo nalo*

<sup>1</sup> Mia nalo nonovio napano roberiilo ruei, nalo ajibe ka burupati tormoruo nalo na burum̃ara viekouoiano, napano be kialo burum̃ara taara na ajumolu ajum̃a amial kito, naruei ajum̃a abitii kanado viekouoiano ka kito rejikiti jum̃abe. Vite venia na m̃a monko kiado m̃arabo, monoka rovukulario, a kariano nalo na m̃a abivikakar tanea kito, monoka ravar bulagio, ka mia ve p̃irido ka retikiti ea burutuli m̃arabo na tebievi na jokamu ea mirado, ka na jidomiano na tuvaniano maka toa kito leleio, mia kiado jidomiano ve tebievi ga rivu.

*Sirarago ka Yesu ga*

<sup>2</sup> Kito rovuku mirado ea Yesu sikili, napano m̃a jikili ju ea juluvati m̃arabo iako. Naio be burupati m̃arabo na viekouoiano, a naio be jukuti nene, mia bogo na tiniedo maio ka naio, mia naio riye mo-roano van kito. Romijikia rosidomii jum̃abe ka bogo na m̃a naio jom̃a bar niabejalele nalo a mijog kirivova mave ea m̃akolkolo, naio jidom bea ga ka bogokouo na naio jo biniuaio. Naio midu kiano jidomiano jo jikili ea burum̃ara saariano napano jokamu ea mameriniano, rivano-o mia naio tovulio, napano vonganei naio jom̃a jotano ea Atua jum̃ano vameruo, ea kanano vio lu napano loa laka tiniabene. <sup>3</sup> Mia bo ka rotu tiniedo rimaio ka Yesu, ea bogo na tomu na bova nalo nei ajum̃a ajuba naio ka iliano na bova nalo, a tinielo jer m̃elea naio jibe na, mia naio mijamo ka naio ga ba bokar jukuti nene. Jibe na,

kito bunu bo ka tiniedo rimaro re soĝeli ka imauano, maka rejikia romerou, maka rosidomii ka mia rovuro ka venia napano monoka ralaiio. <sup>4</sup> Peli roberiamãa romijog bova ka ña romila mira ka bajago na bova bare, tiniedo m̃aro, mia kito maka rovokar vo venia namãa Yesu milaiio, maka rotuko vio ka kariano-o mia sado burukija riio lele niabedo kario. <sup>5</sup> Mia bo bunu ka maka tiniedo ribobogia iliano na tunukakariano na karamãado Atua naio ber ka kito, na naio bio kito jibe ka robe kenerinio, napano naio berinavo

*“Keneriku, ver kiniou neial rivu ka jogvaiano tai rimei rivokarso, mia jau keiakurano ea re, ðeli na ver bogo tai neial ka monoka nodu vironiano vanso, mia kanamo jidomiano rijoru re, bior kanaku bajago na mia ña noverloglogso kanio naio jibe na naruei.*

<sup>6</sup> *Ver nalo na ña kiniou tinieku jiilo, bogo tealo monoka nalalo ajog rivoa, a nalo na ña nebe karamãalo, mia bogo tealo monoka nevitivilo.”*  
*Ilimasou 3:11-12*

<sup>7</sup> Tibe na, ver bogo tai jau keial ka jibe nei banso, mia monoka kodu ga tibe ka m̃arabo tai napano Atua naio jidom ka mia riverloglogso kanio, naio jidom rivuririi kanamo meuliano. Kito nonovio na ña robe teta, roju ña romila jibe na ka kenerido nalo, naruei ver Atua rial kito tibe ka kenerinio, naio monoka rila tibe na ka kito bunu. <sup>8</sup> Tena be kiado ka mia kito roviniu rovokar, mia ver rila re ka kito tai, tibe na mia naio rial toro na tibe ka maka bunu memedu ka ve kenerinio, mia be tete nalo na karamãalo toro dolu na kovio tai bereio. <sup>9</sup> Mia beamu, kito robiniu, bogo na karamãano ajumãa amila vironiano ban kito, maka rosidomio, be riano, voniganeĩ ro-bitilubarío ka nalo amemedu ga, mia mila na rabamenealo loa laka. Tibe na ana bo ka ravatove ka ni-unudo na naio be karamãalo, rasaaro

ka venia na naio mila miyotuba ka kito, bior naina naruei be m̃arabo na meuliano.

<sup>10</sup> Karamãado nalo ajumãa amije vironiano ban kito ka yuka nalo na ña robe kiritete kia ga vo, amila jibe na ka ajidom aber mia rivu kalo bereio, mia bogo na Atua midu vironiano ban kito, naio mila ka mia rivu lie van kito vo, ka mia kito bunu rojikia rovokar kiano meuliano lu.

<sup>11</sup> Vironiano naio be titai na ka bogo na ravario, mia naio maka sese leleio, naio mijeja laka. Mia iorou kanio, ver kito rajamo ka naio river-loglog vatitig rivu kiado meuliano, mia naio rivar sano m̃arati na bo, napano bajago na melumuiano vija tumãaroano, vija bajago na be lu a memeduano. <sup>12</sup> Tibe na, be kurano ka venia na ña kubiniualo, mia kamiu kuvila von ka kuvila tavukia na ña naverialiano Aisea naio ber beamu ruei, na ña naio berinavo

*“Kuvitiri bulag jumemiu na ña melukluku jaklele, kuvilalo aikulkulu bereio, a sudu jaamiu na ñaaju ameme-biju na, kuvilalo asikil bereio.”*  
*Ais 35:3*

<sup>13</sup> Jibe na, kamiu bunu kuvila kenemiu m̃arabo nalo amemedu rivu, ana kenemiu jaba nalo napano amiel jakio, mia jaalo riva rivoa lie re, mia amijikia amei asikil bereio.

<sup>14</sup> Vite juo na ña ratamĩ ka rovokar tulaka atibe na. Tai, naio bajago na bilbilu na bo vija kulo dolu nalo, a tinene, naio be bajago na meuliano lu na ña toro monoka toaio ver naio jidom rial Atua na loa laka mirano. <sup>15</sup> Ana monoka kuvimãauka imauano m̃ele ka mia ve re kamiu tai tikiti mia rijoru rimebi ea m̃arabo togio, napano maka rivokar Atua kanano tiniememiano vo. Kuvitikar vatitig bunu rivu ka kiri pati na mijeja tai na telisu ga rimei re ka rivijurukar kiamo iviso. Verver makanio, bisi mia riluo rivar m̃arati na bova nalo ve telabo ea kiamo meuliano, a napano niamiamo nene rila niegeniege namoneano lu dolu nalo kanalo meuliano na bo

nalo. <sup>16</sup> Monoka ve re bajago va na suṁano vija tira rimonea kamiu, a monoka ve re bajago na tiniel ribobogia batitig Atua, tibe ka Isau re nua naio milaio. Isau nene, Atua bijauialario be motoru na karamṁano ka mia mijikia rivar nonovio kiano jajumṁano, mia ka bogo tai ana naio jijerio, mijugun bonoti vaatei na bo, napano kuruano maratoru Yakovo naio jonio, ana naio piliṁvililar ka Atua kanano tiiano na kiano meuliano, berika kuruano ber “Ei kodu vaatei nei van kiniou voniganei ga, a teta jajumṁano napano kanaku, mia nesian vanzo.”

<sup>17</sup> Ana jibe ka kito romijikia ruei, ka iorou kanio ana Isau naio berenio mia rivar bereio kiano jajumṁano nene, mia aberbureio ga, bior ka naio piliṁvililaro ka ruei. Mia naio mijog bova o-o jidom riviligio, jegi mia kiride ga. Naio jidomii bereio, ber ver naio rila re ga, ana bo, mia voniganei bano bisi.

*Sinai burusuku na yetemeriba, bija Saion burusuku na tiniabene*

<sup>18</sup> Bo ka kito rosidomii ve telisu kija bereio ka tivelinio na tuboiano moruo na beamu vo, rivija Ioluano Vou na bo na Yesu kanano napano binimei voniganei. Vite juo nei abe dolu laka garuei, mia vite nei kito romijikia rovitilubar ea salo burusuku nene ve juo.

Burusuku na tuboiano moruo, nina naio be burusuku Sinai, napano ea yetemeriba nei ga. Kiado tormoruo Ju nalo amijikia amialio ka miralo, naruei amial ka naio be burumṁara jeleigio vio na miroano, napano sebi joaio, a be bolu nene napano vio nene kiri bobogio ga, bija kiano suku nalo napano melijokouo jovukoio jo, mia jegi tai napano jomṁa miuvuvu jan eaio. <sup>19</sup> Mia kiano burumṁara pasimeduo miaga mṁeleia, mia amijog joono tai mil napano kiri temi kar ga jo, mila amerou mia amerou mṁa ajegi aber mia naio river re bunu titai vanlo. <sup>20</sup> Nalo amial ka vio nene be lu

laka, ajerako jikili mia kirisikili, ka temeul venia namṁa ban vaataro ka burusuku nei, tokol luvluru ga, mia monoka atubabinio ka rimṁaro. <sup>21</sup> Mia tormoruo Mosis naio mial vite nalo nene, mia naio bunu merou, naio berinavo “Lerinio, kiniou nememebiju ka namṁaro.”

<sup>22</sup> Naina naruei be burusuku lu na tuboiano moruo re beamu, mia vonganei kito maka bunu mṁa ravan eaio, robinimei ea burusuku lu na Ioluano Vou na bo burusuku Saion nei. Naina jo tiniabene, napano be burumṁara bulukomeli na Atua na meul kanano naio joaio, naio be Yerusalemou vou na vio mave. Naio bujo magmago ka nailiano nalo, miroano mia miroano napano maka ajikia avulukulo, napano abitiri bijilo aju janea vio ka ala iouano na saariano. <sup>23</sup> Mia iviso kalo, kito taara na namoneano lu nalo rotu vio takurano, napano rojibe Atua kenerinio motoru nalo, napano romidu jajumṁano ruei. A bija kito bunu, niununo na kanado mṁariano nalo aju, nina nalo napano amemedu bo ruei ea yetemeriba nei, ana bogo na mṁa amṁaro, abur bulaglo aba aboru ea jukuti na mṁarabo na ioruriano, napano aju bo ea vio nei. Mia toro na tibureiano tai bunu naio jomṁa jotano mave ea vio nene, nina be Atua na vite nonovio. <sup>24</sup> A bija vite dolu na bo nene nalo napano ajua kiado burusuku lu na Ioluano Vou na bo nei, mia romijikia reial Yesu, vija kiano burukija na miou, napano mṁa aṁiligvilig ea kiado iviso nalo ka rila romeravo. Kiano burukija nei, naio maka tibe ka burukija na tormoruo Epel re beamu, na mṁa ajumṁa aber naio be burukija na mṁa weṁaren toro, aber bunu be burukija na riuemeran na bova, mia Yesu kiano naio be burukija na milarur toro a naio be burukija na viekokoano. Yesu mila tanea keana, ka naio jikili ju iviso ka Atua bija toro, naio mila virakariano vou ka tom juo nei ju jikili bo, naio milalo aju burukuti bo bereio.

### *Iagago Vatitig ka Atua joono*

<sup>25</sup> Tuboiano moruo re beamu, naio jibe ka ililaboniano tai napano miyotuba ea yetemeriba nei, a ioluano vou na bo, naio jibe ka ililaboniano tai na miyotuba ea vio tiniabene. Nalo na m̃a abilig taakalo ka tuboiano moruo, maka ajikia avuro ka kialo vironiano leleio, naruei ver tibe na, mia tum̃abe ka nalo na m̃a abilig taakalo ka ioluano na bo? Mia nalo avuro kulu kija re na. Tibe na, mia bo ka raiagago vatitig ka Atua joono, bo kito roduio. <sup>26</sup> Ka bogo na m̃a Atua mil ban nalo nanua na, kiano iliano kiritemi tanea naio mila borotano mikulkulu, avona bisi, ana kiano verikariano tai naio berenio bavin lie ka naio bereio, naio berinavo

*“Bogo tai bereio mia kiniou noikulkulu vatitig ka vio nalo, maka yetemeriba nei ga, mia vija rera garuei mave vaarakurano.” Akai 2:6*

<sup>27</sup> Mia iliano na ea vio nei na ber “Vaarakurano bereio,” naio ber tite-nia. Naio berenio Atua mikulkulu ka vio vaarakurano ruei, ana kiano jidomiano jikili ka mia rikulkulu vitii bereio saba nalo. Ka legiano na maaro mia naio rijagdag boŵeio ka yetemeriba nei, vija vite nalo nonovio na m̃a jiilo ajuaio, naruei mia vite na m̃a maka rijikia rijagdag boŵeio kanio mia naio tumolu tu sikili tubo tu. <sup>28</sup> Titai ga naio mijikia tu sikili tubo tu jibe nei, naina be kiado Atua kiano navenatuboiano nene, a siva toru laka ka na m̃a naio midu kiado meuliano jo bo joomo eaio. Bo ka bogo nonovio rodu lotuano na bo tai vanio ka mia naio mijikia saaro kanio, mia robitilubar ka naio be lu laka, a rotovon naio. <sup>29</sup> Bior kanado Atua naio be sebi napano jum̃ano nalo amijikia asisen nonovio vite nalo rivano-o riviniu kokoio.

## 13

*Bajago nalo na m̃a Atua naio jaaro kanio*

<sup>1</sup> Iliano tealó bereio ka rijai kamiú ajibe nei. Bo ka kamiú kuvitum̃a tiniemiú riia kamiú dam̃ariga, tibe ka na m̃a kamiú kube m̃aratavo takurano ga bija Kristo. <sup>2</sup> Mia kamiú tiniemiú riia re kamiú ga, mia tiniemiú riia bunu valauo nalo, kuvisaaro ka kuvitikarlo ea kene-miú vonuo nalo. Bo ka kuvila tibe na, bior ka na m̃a bogo tealó, maka ajikia, mia valauo nalo na m̃a kumitu kubitikarlo, nalo abe Atua kanano nailiano nalo. <sup>3</sup> Kuvisidomial nalo na m̃a ajua nalakoiano, kuvar bitiran kanalo jogvaiano nalo, na tavukia ga napano abuku kamiú bunu kumitu bijalo. Mia kamiú tiniemiú ribobogialo re bunu nalo na m̃a kulo dolu nalo amila lelanlo, bior ka kito robiniú rojua vio yetemeriba nei ga, monoka rajai kito ka ravar bitiran bogokouo nalo nam̃a robiniuaio. <sup>4</sup> Bo ka rovinu rovitii vatitig bajago na soriano naio be kirinovo tai a be vite lu, ana bior vite na, maka rivu ka niamiamo tai rimei rila niegeniege jogu novo napano aboeio ban naljuo neibano ajoro, bior napano aberkar ka mia nalo avuru re bunu dolu. Mia Atua riye tibureiano van nalo na m̃a amiel janea vio, jibe nalo napano ajoro amila siakaiano ŵelina m̃eikuú bija niatira amila siakiano. <sup>5</sup> Kuvitigar vatitig ka kodu re veru naio to tukamu ka kanamo meuliano. Bo ka mia kala jau kasaaro ga ka venia na telisu napano naio joa jum̃amo ruei, bior verikariano na Atua kanano napano naio jom̃a ber jibe na, berinavo

*“Mia kiniou notuvanso re bogo tai, maka nejikia novilig taakaku kaso.” Tiut 31:6*

<sup>6</sup> Ana bogo na m̃a tiniedo maio ka nina, naio mije moroano ban kito bereio, ka romijikia roverial iliano na niosi na Iouano, na binimei be kiado iliano, roberinavo

*“Toro na miija batitig kiniou naio be Atua soŵi ga naruei, mia kiniou nomerou re bunu,*

*toro dolu naio mijikia rila venia  
na vova van kiniou bereio?"*  
*Iouano 118:6*

<sup>7</sup> Vite dolu, bo ka kamiu kuvitu tiniemi rimaio ka kenemi navu-rim̄araboiano nalo, napano ajukamu ka aberial Atua kanano iliano beamu ban kamiu. Kuvilavon ka kuvitii vatitig m̄arati napano naio miyotuba ea kialo bajago novo na kialo meuliano, a kuvilaii kialo mon-eano na jikili ea kenemi meuliano nalo. <sup>8</sup> Nalo amonmonea bo, ana kito bunu romijikia romonea, bior Tubo Yesu Kristo naio rive dolu re bogo tai, naio bare ga ka naniovo, a banei, a beni bunu rivano-o mia maka rijikia ribisi.

<sup>9</sup> Bo ka rover bunu ka kamiu, ka kuvitkar vatitig kamiu rivu, ka iliano dedade nalo a verloglogiano vovu nalo amei re avuru bulag kamiu den burusio na bo neibano kumituaio ruei. Tomu tealo ajidomii m̄elei ka jokoluolu lu nalo, bija salo bajago lu likiliki nalo, mia m̄arabo nalo na amim̄auka sinaniano nalo nei maka ajikia ajai kialo meuliano nalo. Vite takurano ga na naio mijikia rila kiado iviso nalo sikili rivu vatitig, nina be Atua kiano tiniememiano na bo ban kito. <sup>10</sup> Sinaniano nalo tai na jibe na, nina be sunbue na jokoluolu napano kulo lu nalo ajum̄a abuku jua boda. Abolkouo kanio, amila im̄auano bisi ana iorou kanio ana ajen jibe ka salo sinaniano nalo. Kulo lu nalo nei nalo ameul ea sinaniano na boda nei, mia kito na m̄a romonea Yesu, maka rotum̄a rosinan ea boda nene, mia be kiado boda dolu tai na naio jo, napano romeul ea jokoluolu napano abuku joaio, napano kulo lu nalo maka avitilubario, mia maka ajikia asinan eaio. <sup>11</sup> Nalo ajum̄a amila kialo jokoluolu nalo nene, naruei tai naio be dolu kija, jibe ka napano jidom rila tovorovo na Yesu kiano m̄ariano. Jokoluolu nene naio na m̄a aberenio be ijaniano na viekokoano rivior kariano, naruei bogo napano parinio toro lu mila nina, naio maka rudu momon

temeul niabene riva joomo ea vio na be lu laka, mia naio bar ga burukija nene ba jua boda nene. Mia niabene temeul nei, abar ba tavio ea komeli bereio, ana amisebio. <sup>12</sup> Nina jibe ka ga na m̄a Yesu milaio, napano naio bunu amidu naio ba tavio ea burusio na komeli, amila naio mijog bova banbano-o na kanano burukija miou dabo nonovio, napano maka riou kurano, mia miou ka rila kito kiano tomu nalo romei rove lu rivu kamu ea Atua mirano. <sup>13</sup> Ana bior Yesu naio jaaro ka rila tibe na rivior kito, kito bunu monoka rasaaro ka ravavin vija naio ea vonuo tavio, napano tomu nalo ajum̄a abitiidie kito jibe ka na m̄a ajum̄a abitidie naio, mia kito ravar jogvaiano jibe ka na m̄a naio bario bunu. <sup>14</sup> Verver rivova van kito ea yetemeriba nei tibe na, mo bo ga, bior maka rotum̄a rosidomii ka mia rotua komeli tai ea vio nei napano jo julaka ga, mia rojum̄a romidu kiado jidomiano joa kiado vonuo memedu ea komeli vou napano roju raban ka keana.

<sup>15</sup> Jibe na, bo ka rosidomial ka Yesu, naio bijuku bo laka ban kito, naio betavo ea kiado m̄arabo, mia rodular Atua siano tulaka kanio. Rala re sida ka temeul nalo vanio, tibe nalo re nua, ana iliano nalo na amiyotuba ea niodo ka rudular naio ajibe ka m̄arati tai napano jesei bo laka banio. <sup>16</sup> Ana kito tiniedo ribobogia re ka rala im̄auano na bo nalo, bior nalo ajibe ka sida napano romijikia ravar van Atua. Mia tai napano naio jo jaaro toru kanio naio jibe ka ver kito rala rivu dam̄ariga van kulo dolu nalo, rasaaro ratan ka kiado saba nalo vijalo.

<sup>17</sup> Vite ta bunu bereio, na naio bo ka kito monoka romonmonea kiado navurim̄araboiano nalo, a monoka rasaaro ka rotutano ka kanalo iliano nalo. Nalo aju amila vio jikili ka abitkar batitig kito bo, bior kanalo tomu na tortoru nalo na mave kalo ajum̄a abitii kialo im̄auano nalo a kialo bajago nalo bunu. Verver kiado navurim̄araboiano nalo, kialo jidomiano nalo am̄arm̄aro, ana mia

iũaauano nonovio rivova, mia ver romonmonea nalo rivu, ana mia rila iũaauano ve temi laka re vanlo. Mia asaaro kanio ana mia rivu lie bunu rivan kito tomu na iũaauano nonovio.

<sup>18</sup> Bo ga, ana vaataro ka iliano nonovio riviniuviniu naruei, mia kumemi numisidom nuvika bunu den kamiu ka kuvisidomial kumemi ka kenemiu volkouano nalo, rivior vio na kirisikili nei na m̃a kumemi numituaio voniganei. Kumemi maka nuvial kar ka torokoriano naio joa kumemi, mia kenememi jidomiano naio meravo bo ga, ana numitum̃a numisikili ga numitua bajago na bo napano memedu ea tomu nalo miralo. <sup>19</sup> Mia kiniou nojidom laka ka kuvolkouo ka ala iliano nalo nei amemedu vatitig soṕeli, ka mia nejikia notumolu den vio nei neviedu kean kamiu rivesiou re. <sup>20</sup> Kiniou nojom̃a nobolkouo ka kamiu bunu, ka mia Atua rijai kamiu. Naio be Atua na tum̃aro, a be Atua na tinien miia kito kiano nunu nalo, naruei naio miila kiado Tubo Yesu naio binimei ea yetemeriba nei, naio binimei be kiado toro na toru na bitikar nunu nalo, kiano burukija naio miou ka rivitirilar virakariano vou nei napano mia naio to toboto. Naio be Atua nene kiaga vo bunu napano Yesu mijamo ka kiano meuliano banio, naruei naio burulario den m̃ariano, bitirilaro meul bereio. <sup>21</sup> Ana kiniou nabarkar tinieku ea naio ka mia naio sian vite novnovo nalo riviniu napano kamiu kuvisidom ka kuvila kanano iũaauano ea yetemeriba nei tibe ka na naio jidomio. Naio jo miũaau ea kanado meuliano nalo beve terakurano ea ga Yesu Kristo, ana naio jo miũaauka batitig kanado bajago binimei jibe ka na naio jaaro kanio, ana mia kito reiaia naio ve toru laka riviorio, rivanvano-o na mia rijikia re ribisi, Mm.

<sup>22</sup> Kanaku m̃aratavo nalo na ea Kristo, nebivitauiã m̃esi nei biedu ban kamiu, be kurano ka maka ve tebievi laka, mia ver kuvial tum̃abe ana mia tiniemiu ser m̃elea re kinio, mia kuvidu tibe ka kanaku

iliano na ijaiano ka rijai kamiu ga. <sup>23</sup> Kiniou nojidom neverial van kamiu ka kuvijog ka kuruado nei Timoti, amijamo ka naio batavio bereio ruei den nalakoiano, ṕeli mia naio rimei sel ea vio nei vesiou re ga, mia kumemi ve juo nuviedu ka nuviadu ka kamiu. <sup>24</sup> Kumemi numisidom ka kuverial van kenemiu navurim̃araboiano nalo, vija Atua kanano tomu dolu nalo, ka kumemi numitum̃a nubika ka nalo ajum̃abe na, aju bo ṕelina jum̃abe, a nalo na vio Italia napano m̃a ajua vio nei nalo ajidom aver bogiano bo van kamiu bunu. <sup>25</sup> Kanaku iliano na maaro ea vio nei naruei, neberinavo mia Atua kanano tiniememiano novo a kanano tinievuiano naio to vija kamiu nonovio.

**Mesi Napano**  
**YEMESI**  
**Naio Bivitauiaio**  
**Verialiano Moti**

*Tukunuano bulati na niosi nei*

Yemesi kiano mēsi, naio bar iliano novo nalo napano ka verloglog Atua kiano tomu nalo napano aju beve terakurano ea vio nalo ea yetemeriba nei. Yemesi ber jamerjiano miroano ka rijai tomu nalo, ka ajev jidomiano a jikaiano novo bunu. Ea mēsi nei naio berii vite miroano napano namoneano nalo monoka asidomkario a monoka alaio. Naio berinavo napano be talimāsa, naio monoka saaro bogo na Atua midular naio binimeī mave, a namoneano napano be sanibaiano, naio monoka saaro bogo na Atua midu naio jo yetano. Naio berii bajago novo napano toro monoka rilaio, a naio berinavo namoneano moneano bija iñauano monoka ava vio takurano. Naio berinavo toro napano jo mila bajago novo nalo ka rijai tomu dolu nalo, mia kanano moneano jikili. Mia Yemesi berii vite nalo na amila vonvon toro, a naio berinavo toro napano vite nalo abinimeī amila vonvonio jo ana naio bokar bajago memedu, naio mijikia rijog rivu. Mia naio berii bajago napano namoneano monoka re rila ea niono ka river vite va nalo, mia naio monoka rila ka riiāia Atua. Mia naio berii masouano napano Atua jiano, a bajago napano tomu nalo aju amila baravo, a bajago napano tomu nalo abe mārōu laka, a bajago napano toro kiano jidomiano tebievi, a berii volkouano napano be kiano veridopeiano.

Vite burtumoruo napano Yemesi berii ea mēsi nei, nina iñauano bija moneano, napano naljuo monoka avior biju ea namoneano nalo ka amijikia ala vite ka atakii Atua kiano jidomiano.

*Torogio nalo na niosi nei*

Iliano moti 1:1

Bajago na moneano bija na māsouano 1:2-8

Talimāsa nalo bija sanibaiano nalo 1:9-11

Vite nalo na lavonvoniano na toro kiano moneano 1:12-18

Toro monoka rijog Atua kiano iliano vija monoka rila vite nalo napano iliano nei berenio 1:19-27

Iliano na tukovio ka toro napano bitii va ka toro dolu 2:1-13

Moneano bija iñauano novo 2:14-26

Namoneano monoka vitikar vatitig ka kiano iliano 3:1-18

Namoneano bija bajago nalo na yetemerba 4:1—5:6

Vite dolu nalo napano Yemesi berenio 5:7-20

*Iliano na be moti*

<sup>1</sup> Kiniou Yemesi, kiniou nobe toro na mña nemila Atua kiano iñauano, a kiado Tubo Yesu Kristo kanano, napano nejirii mēsi nei biedu ban kamiu, napano mña kube bajulukuti duelimo ba juo [12] na Israel, napano mña kumitua taara dedade nalo ea vio yetemeriba nei. ?Kiniou nebika neber jumabe, kamiu kumitu bo ga pēli na kumitu jumabe?

*Viekouoiano bija māsouano*

<sup>2</sup> Kuruaku nalo a kuvivinioku nalo, mia bogo na vite na lavonvoniano nalo amei ea kamiu ka alavon kamiu, mia kumijikia kuvial lo tibe ka vite na jogvuiano ga. <sup>3</sup> Nina jibe ka kamiu kumijikia, ver bogo namña vite milavon kenemiu viekouoiano, mia kumitu jikili damariga, nina rila kenemiu viekouoiano sikili lie vo ka mia kuvitumolu kuvitu bogo nonovio. <sup>4</sup> Mia bogo na mña kamiu kumitumolu kumitu jikili jibe na, nina mijikia rila kenemiu meuliano rimemedu rivu vatitigio, a rimeruo vatitigio, mia rivujo ka vite maraiu nonovio na abo, mia maka bajago novo tai na mia naio toa re.

<sup>5</sup> Mia ver kamiu tai napano naio river kiano m̄asouano telisu ga mia monoka naio rivika den Atua ea kanano volkouano, ana mia Atua mijikia sian vanio. Bior ea Atua, kanano bajago maka rivitisa ea toro napano jom̄a bika vite nalo denio, naio jo jian ijaiano novo julaka ban tomu nalo ea kiano tinievuiano. <sup>6</sup> Mia ver bogo na m̄a toro naio jom̄a bika vite na jibe na ea kanano volkouano, monoka naio rimonea sikili, ka mia naio sidomii dede re bereio, bior toro na kiano jidomiano jibe na naio jibe ka tei napano m̄a bieveluo, napano m̄a jegi jom̄a jubon titigio janea vio reraio ga. <sup>7-8</sup> Toro na jibe na, kanano jidomiano beve juo, a kanano bajago nalo maka ajikia avu ga. Toro na jibe na maka rijikia sidom river mia naio rivokar tonovo tai ea Tubo.

*Tomu na m̄a abe talim̄asa a tomu na sanibaiano*

<sup>9</sup> Kuruado nalo tealoo, abe talim̄asa, maka ve kialo saba, mia nalo amijikia avarvarlo m̄ele bior Atua naio midular kialo jidomiano abavin mave. <sup>10</sup> A kuruado tealoo bunu, nalo kialo saba toru, mia bo ka nalo avarvarlo m̄ele bunu, nina bior Atua mila kialo jidomiano ajutano ga. Amijikia asaaro tibe na bior abitilubar ka toro na be kanano saba toru, naio javukia niaiesi napano be tena bogo bulati ga. <sup>11</sup> Bogo napano m̄erenio bavin, naio bitunu m̄ele, mia naio tunu niaiesi nalo nei mia amekekeu, atibirbil, naruei niabene na bo avakovio. Mia ea bajago nene kia ga vo, ea bogo napano tomu na saba nalo ajum̄a amin̄auka abarbijii kanalo veru nalo kia ga vo, mia nalo ajoru avakovio.

*Vite nalo napano m̄a amila lili kito*

<sup>12</sup> Toro napano jumolu ju jikili ea nalavonvoniano nalo napano abinimeiaio, ilivuiiano joaio, bior ka bogo napano naio jovulu vite nalo nei ruei, mia Atua riyovovua vatitig naio ka ijaiano na bo laka,

nina be meuliano napano Atua naio berkar ban kito ruei, ka kito napano tiniedojii naio toru. <sup>13</sup> Ver nalavonvoniano nalo nei amei ea kamiu, ana nalo ajukujuku kamiu, mia kamiu kuver re “Uerei, najukujukuano nei amaluvo ea Atua.” Mia maka kuvijikia kuver tibe na, bior maka vite tai naio mijikia rijukujuku Atua, a bajago na milavonvon toro, nina maka ve kiano bajago. <sup>14</sup> Najukujukuano nalo nei abinimeijikili ea toro ea ga bogo na ga kanano sidomvovaiano ga mijubolbolili naio ana buru naio bano. <sup>15</sup> Karina sidomvovaiano nei naio riluo rimeive toru ana naio rivar kenerinio vijuku vovaiano, karina bogo napano vijuku vovaiano naio bunu riluo rimeive toru, mia naio bunu rivar kenerinio be m̄ariano.

<sup>16</sup> Kuruaku novo nalo, bo ka kamiu kuvitikar kamiu rivu ka kuvijamo ka re tomu nalo amei ka ajubolbolili kamiu. <sup>17</sup> Monoka kuvijikia ka vite novo nalo nonovio a ijaiano maraiu nonovio nalo, ajumolu den vio mave abinimeiaio kito. Ajumolu den Atua napano m̄a jo jii yulu nalo nam̄a aju mave tiniabene, a yulu nalo nei, amijikia ajum̄a amijiajianilo julaka. Atua kiano bajago maka lele rivilig ve dolu bogo tai, bior naio maka lele rijikia riverenio rivilig taakano ka kito bogo tai leleio, ka mia tuvan kito ea melijokouo. <sup>18</sup> Ninei be Atua nene ga napano ea kiano jidomiano ga, naio mila kito robinimeirobe kenerinio, bior kito romonea kiano ilirianiano, ka kito rojibe ka m̄ariesi na be moti garuei jukamu ka tomu telabo napano mia nalo amonea Kristo iorou.

*Kito monoka romonmonea Atua kanano iliano*

<sup>19</sup> Kuruaku a kuvivinioku novo nalo, mia kamiu tiniemiu ribobogia re iliano nei, ka tomu nonovio monoka ala soṽeli ka aiagago ka tomu nonovio monoka ala soṽeli ka aiagago kanio, ana monoka aviju kiki ka aili. Ana ala sopeli

re ka tinielo rimimi, <sup>20</sup> bior toro kiano tiniemimiano maka rijikia rila bajago na Atua kanano rimaluvo leleio. <sup>21</sup> Ver tibe na, kamiu monoka kuvuku bulag bajago va nalo a iñauano va nalo den kenemiu meuliano, a monoka kuvidu kenemiu jidomiano ritotano yetano ka Iliano Lu napano naio mijikia rivurumeul ea kamiu, napano Atua mebija kar ea kenemiu iviso nalo ruei.

<sup>22</sup> Kamiu monoka kuvila vaio napano Iliano Lu na naio berenio, maka rivu ka kuvitu kuvijubolbolili bereio kamiu ga a kamiu napano kumitu kumiagago kurano ga ka Iliano Lu nei, karina maka kuvila vite nalo napano naio berenio. <sup>23</sup> Nina javukia toro tai napano naio joña bitii mirano ea mermerobi, <sup>24</sup> mia bogo napano naio barlaka bano, ka bogo bulati ga, mia naio tinieno bobogia bereio mirano juñabe. <sup>25</sup> Mia toro napano naio joña bitii veve vatitig va joomo ea tuboiano novo nei napano mijikia rivuru bulag kito den kariano nalo, a naio riagago vatitig ka mia naio riagago re ga ka mia tinieno ribobogia, mia naio rimonmonea a naio riñaukanio, toro na naruei mja Atua riilivu ka naio ea kanano iñauano nonovio.

<sup>26</sup> Verver toro tai river naio be toro na moneano napano memedu, mia naio telanivuu vatitig re ka buruminano, naio joña mijubolbolili naio ga bereio, mo kanano moneano be iakurano ga. <sup>27</sup> Ana bajago na moneano na memedu bo, a napano be riano bo ea Atua mirano, jibe nei: mia jau keiel selivivi ka keija kirikiou nalo a taanou nalo ka keijalo ea kialo meuliano kouo nalo, a kovokar kouo rivu kiamo meuliano, ka napano niamiamo nalo a bajago na kiri niagiago nalo na vio yetemeriba atokol lelanso re.

## 2

### *Kamiu Kuvitisaia Re Tomu Nalo*

<sup>1</sup> Kuruaku nalo a kuvivinioku nalo, jibe ka napano kamiu kumonmonea kiado Tubo Yesu Kristo, napano naio be Tubo na mermerano, mia kamiu kuvitisaia re tomu tealo ka ave dolu, napano kuvila rivu ga ka tealo, a kuvila rivova ka nalo tealo. <sup>2</sup> Jibe ka ver tomu ve juo amei joomo ea kenemiu yimo na volkouano, tinene naio be kiano saba telabo napano kiano kuluniabene minieg bo a naio miya ñejelinio na ñarjukujumñalo napano amñaukanio ea niogo joa ñarjukjumoño, a tinene naio be talimñasa, napano mñano kuluniabene buruboñeio, mia kamiu kuvila re ve dolu ka naljuo nei. <sup>3</sup> Maka rivu ver kamiu kuviaia nana naio miya kuluniabene maraiu mia kuvudu naio toa vio napano bo laka be sudoyu ana kuver kanio kuver “Barago, ninei be jelemo na bo nei, kumemi numisidom nuver bo kaso kototano ea vio nei,” mia kanio dolu nene ana mia kuver kanio ga kuver “Mia jau kotumolu kotu iorou yako, aver maka ana jau koto tano yetano ga.” <sup>4</sup> Bogo napano kumituña kumila bajago na jibe na, kumitu kubitii tomu tealo abova a tomu tealo abo, nina bior ga vite napano nalo amiyaio, mia vitiano na kenemiu na maka lele riyotuba ea jidomiano na bo.

<sup>5</sup> Kuruaku nalo, kuviagago ka kin-iou. Tomu nalo na yetemeriba nei napano abe talimñasa, mia Atua naio buru bulagio abe kanano, ka rila nalo ave kialo saba novo nalo ea tivelinio na kialo moneano. Ana Atua mila jibe na bunu ka nalo amijikia ava jouro ea kialo jajumñalo napano Atua kiano tuboiano berkar ruei ban nalo napano tiniel jii naio. <sup>6-7</sup> Mia kamiu kumituña kubitii tomu na jumñalo yauo napano abe talimñasa ajibe ka tena miagiago ga tai. Mia kamiu kuvisidomii vonio. ? Kulo be nalo na ña aju amijil kamiu vururu napano ña aju abur kamiu kuba komeli? ?A bunu kei nalo napano ajumña amiolua kamiu ea sio

novo na tortoru napano ña Atua midu joa kamiu? Nina maka ve tomu nalo napano jumñalo beteauo abe talmñasa, mia nina tomu nalo napano be kialo saba telabo.

<sup>8</sup> Kenemiu ñarabo napano memedu ka kuvitakii ea vio nei naio jibe ka burupati tuboiano na Atua kanano navenatuboiano naio berenio, napano berinavo “Mia kovijuku rivu van tomu nalo napano ña aju vaataro kaso, rive verare ka napano jau kojomña kojidomiiso.”

<sup>9</sup> Mia ver kamiu kuvitisaia ga tomu nalo ave dolu tibe na, nina kumila kariano ga na, mia Atua kanano tuboiano naio tibure kamiu river kamiu kube tomu na ña amila kokorov tuboiano. <sup>10</sup> Bior toro napano mila korov iliano takurano ga ea tuboiano nei, naio mila kariano ea Atua kiano vitiano, jibe ka napano naio mila korov nonovio iliano nalo ea tuboiano biniu kokoio.

<sup>11</sup> Bior Atua naio berenio berinavo “Mia kamiu kuvila re siakaiano,” nina Atua nene kia ga navo napano naio berenio berinavo “Mia kamiu kuvuebin re toro.” Ver maka kuvila siakaiano mia kumue toro, mia kube tomu napano ña amila kokorov tuboiano rui.

<sup>12</sup> Ea bogo na tibureiano, mia Atua naio ridu re vironiano van kamiu, tibe ka napano mia naio rudu van tomu na bova nalo, mia naio rivuru bulag kamiu den vironiano nei ga. Ka vite nei naruei, kenemiu iliano nalo, a kenemiu imñauano nalo, monoka tibe ka napano maka kuvila vite tai napano memedu ka kuvar vironiano riviorio. <sup>13</sup> Nina bior Atua tinien miia kamiu, a kanano tinieiano nene, mia riolkon bulag tibureano napano memedu ka mia kuvokario. Mia bogo napano mia Atua tibure tomu nalo napano maka tinieil riia toro dolu, mia naio bunu maka rijikia tinien riia nalo.

*Viekouoiano bija imñauano novo nalo*

<sup>14</sup> ?Kuruaku nalo jumñabe, ver toro tai tomña river naio biekouo ea Kristo, karina naio maka rila bajago

nalo napano abo? ?Mia kanano viekouoiano nene naio mijikia rilarur naio? !Peli ga! Nina maka lele titai napano bo rijikia riyotuba ea toro na kiano viekouoiano libolibo na jibe na. <sup>15</sup> ?Mia jumñabe bunu ver ve kuruado tai a kuviviniedo tai napano nalo abe talmñasa ka kulu niabelo a amijubavio ka sinaniano? <sup>16</sup> ?Ve re kamiu tai ril siniabu vanlo riverinavo “Atua riilivu ka kamiu, ka mia niavo sen re kamiu, a siser re kamiu,” mia naio maka sian vite tai lele vanlo ka riijailo, nina jibe na na bo ñeli maka rivu? Peli ga, kiano iliano napano jibe naio mil kurano ga. <sup>17</sup> Kanado viekouoiano naio jibe nei naruei, ver naio ga ve takurano to, a ve re imñauano nalo na bo tai to vija naio, viekouoiano nei naio rimñaro ga.

<sup>18</sup> Peli mia tomu tai ajog iliano nei, ana mia alavon ka averdoñeio averenio “Bo ga, mia naio maka tibe na. Naio jibe ka ga napano tomu tealó, abe tomu na viekouoiano, a tomu tealó, abe tomu na amila imñauano novo nalo.” Mia kiniou neverdoñelo neverinavo “Ver kiniou neialso napano koberenio kober jau kobe toro na viekouoiano ga, tibe na mia maka nejikia neial kijokijo tai ka river kanamo viekouoiano naio be riano. Mia ver komial napano kiniou nojomña nemila bajago vu nalo, nina mijikia rila rimeravo vanto ka kiaku viekouoiano be riano.” <sup>19</sup> Nao, nemijikia ka jau komonea ka napano be Atua takurano ga naio jo, nina bo laka. Ana neber kaso, neberinavo simñaro nalo bunu amonea jibe na, a nalo ajumña amemebiju toru kanio. <sup>20</sup> Javukia napano rojumña roberenio, toro napano naio jomña ber be kiano viekouoiano, mia naio maka rila bajago nalo na memedu, kiano viekouoiano naio be tena iakurano ga, toro na jibe na naio miavovu ga na. ?Mia kamiu kumisidom ka nalavon never vite nei rimei rimeravo vatitig? <sup>21</sup> Boga kamiu kuvisidomii von korobido na nanua Epraamo. ?Atua naio

mila Epraamo memedu bija naio jum̃abe? Nina bior Epraamo midu kenerinio Aisak, naio miorikario ea boda, naruei naio mijamo ka risebi kenerinio Aisak ve sida van Atua. <sup>22</sup> Kamiu kuvialio, ea vio nei romial ka Epraamo kanano viekouoi-ano, a kanano im̃auano nalo na m̃a mĩaukanio, vite juo nei amĩau biju vio takurano ga. Kanano im̃auano, mila ana kiano viekouoiano be riano mia be riano batitigio. <sup>23</sup> Naruei vite nei naio mila ana Iliano Lu nei naio be riano bunu, napano naio berinavo “Epraamo naio biekouo ea Atua, a kar vite na ana Atua mila Epraamo naio binimei memedu bija naio.” Mo vonganei, rojũma robio Epraamo kia ga vo roberenio naio be Atua kiano bilbilu. <sup>24</sup> Bior vite nalo na, romijikia ka releal ka Atua naio mila toro memedu bija naio bior kiano bajago novo na kanano meuliano bunu, a maka ka ga kiano viekouoiano ga.

<sup>25</sup> Mo kamiu kuvisidomii von Reavo nei, na nanua beamu naio be tira na jom̃a jaano jeregii ga ea m̃arabo. ?Mia Atua mila naio memedu bija naio jum̃abe? Nina bior naio bitikar batitig tomu juo na vio Israel nei, napano naljuo abinimei benalukluku ga ka avitilubarbar vio Jeriko. Naio buru van tomu juo nei ea kunuano, avona bisi ana iorou ana naio jiloglog m̃arabo dolu ka naljuo ka amijikia avuro avan bereio.

<sup>26</sup> Mo bo ga, jibe ka napano tati na toro napano maka niununo toaio, naio m̃aro, viekouoiano bunu, napano maka ve bajago novo nalo aiñau biju vio takurano vijaio, naio bunu m̃aro.

### 3

#### *Monoka kito retelanvuu vatitig ka buruminado*

<sup>1</sup> Nao kuruaku nalo a kuvivinioku nalo, maka rivu ka kamiu ve telabo kuvilavon ka kuvokar im̃auano tavukia naverloglogiano ea yimo nalotuano, bior jibe ka napano

kumijikia, ea bogo na tibu-reiano, mia Atua naio tibure kumemi naverloglogiano nalo sikili laka. <sup>2</sup> Ver toro tai maka lele rilaluvu kanano iliano bogo tai, toro na naio bo mia bo, naio mijikia telanvuu vatitig ka kiano meuliano momou. Mia p̃eli ga, kito nonovio roju romila kokorov kanado iliano julaka ga. <sup>3</sup> Bo ka rosidomii m̃aributoto napano romidu joa bue kulorinio niono. Bogo napano romidu joaio, romijikia romila bue kulorinio nei monmonea kito, mia romijikia robilig kiano burum̃ara tati nei ban ea vio napano rojidom naio rivan eaio. <sup>4</sup> Mia kito tiniedo rimaio ka uako bunu, bekurano ka naio kiritemi laka, a p̃eli na jegi na toru jo jidom riuvio a jubon titigio bano, mia sano vuu nene kiritavasus ga, ana mijikia rila burum̃ara uako nei rivan ea vio na vabe na toro napano bokar vuu naio jidom ka rivan eaio. <sup>5</sup> Buruminado nalo ajibe na naruei, napano nalo abe vite na kiritavasus nalo ga, mia amijikia amil vevavin m̃ele laka.

Kamiu kuvisidomii von, ka napano morogo na sebi kiri tavasus ga, mia naio mijikia sisen iesi nalo napano tomormoruo ea burum̃ara vio yeturu. <sup>6</sup> Nao, be riano, buruminado javukia sebi tai. Buruminado nei naio be torogio na mokotenado napano vite va nalo nonovio na yetemeriba nalo abujo magmago vatitig eaio, mia kanano vovaiano nalo ajum̃a amila lelan kanado meuliano momou garuei. Mene nei naio jo mijev sebi ea vio na jogvaiano, ana naio jo mila sebi nei naio bilvili janea nonovio kanado m̃arabo na meuliano nalo. <sup>7</sup> Mia romial napano toro naio mijikia milaluṗiluṗi teden nalo amom̃avo, jibe ka temeul nalo napano yeturu, menu nalo, maro nalo, a niado nalo, <sup>8</sup> mia maka toro tai rijikia rila buruminano to dam̃ariga. Buruminado nalo abova laka, mia maka rejikia roverbureo, a kanalo iliano nalo ajavukia maro

semei napano mijikia muebin toro. <sup>9</sup> Kito rojuña romil ka buruminado romilivu ka Atua Lu napano naio be karamado, mia iorou kanio ana romil kanio bereio ka romiolua kulo dolu nalo, napano maka rosidomial ka Atua naio jiilo jibe ka tovorovo na naio. <sup>10</sup> Naruei ea niodo takurano ga, rojuña romil bo a rojuña romil bova bunu. Kuruaku nalo, vite nei naio be vovu laka. <sup>11</sup> Maka bulukuei tai ga to napano ea bulukuei ve takurano ga mia uei vija tei nalo ve juo amoluo eaio. <sup>12</sup> Mia jibe na bunu napano buruviki maka rijikia rivar m̄arolivi, a telikrevi maka rijikia rivar m̄arati buruviki. Jau maka kejkia kava kovioviou uei ea buluniogovu.

#### *Masouano novo napano Atua jianio*

<sup>13</sup> Ver kamiu tealo napano nalo abe masou, a nalo amijikia batitig vite, bo ka mia nalo ala vite nei rimaluvo rimeravo rivu, tavukia kanalo meuliano, monoka naio rimemedu, kialo jidomiano, monoka naio totano, a kialo bajago monoka rimeruo rivu. <sup>14</sup> Mia ver kuvituña kuvisidomi kuver kube masou, mia kenemiu iviso nalo abujovujo ka jokuano, bija varvariano bunu, jibe na kumituña kumila sibi ga. Kamiu kuvil vevavin re bunu ka masouano libolibo na kenemiu, bior nina maka lele ve bajago na masouano na leleio. <sup>15</sup> Nina naio maka ve masouano na mave, mia naio be masouano na yetemeriba nei ga, a naio be tomu va ga kialo, a naio be masouano na miyotuba ea Setano memedu. <sup>16</sup> Bior bogo napano tomu nalo ajum̄a amijoku, a abarvar kalo, mia ka vite nonovio maka bunu ajikia aiasol rivu, naruei bajago va nalo ajum̄a amaluvo. <sup>17</sup> Mia toro napano mije masouano na mave, kanano bajago naio be dolu. Loa ka vite dolu nalo, kanano meuliano meravo batitig, mia naio be bunu toro tum̄aroano, a naio be toro namelumulumuano naio bijuku bo ka kulo dolu nalo. A bunu be toro

naio na tinien miia toro dolu. Naio be bunu toro na bar m̄arati na bo ea kiano meuliano, a maka naio rivitisa ea tomu dolu nalo, mia kanano jidomiano maka veve juo. <sup>18</sup> Toro na jibe na, vite nonovio ea kiano meuliano naio memedu bo laka, mia javukia bunu rivan tomu nalo nonovio napano abe tomu na tum̄aroano, napano amim̄au ea bajago na tum̄aro.

## 4

### *Toro napano jidom rila bilbilu vu vija yetemeriba*

<sup>1</sup> ?Mo ver tum̄aro nei naio toa re kamiu, mia kuvituña kuvila mira ka kamiu ga, a kuvituña kuvilivili ea kamiu, mia venia naruei naio be burupati nene? Nina naio miyotuba ea kenemiu sidomiano nalo, napano ajum̄a amila ana kumituña kumim̄au m̄ele ka kuvilavon ka mia kuvijog rivu ka vite nonovio na yetemeriba nei. <sup>2</sup> Mia kumisidom m̄elea vite nalo napano m̄aaju yetemeriba nei, mia maka kuvijikia kuvokarlo. Tenene na, milaio ana kumisidom kuvue toro riviorio. A kamiu kumituña tiniemiu jii m̄elea toro dolu kanano saba nalo, mia maka kuvijikia kuvarilo bunu, tenene na milaio ana kubilivili ea kamiu a kumila mira biorio. Kamiu maka kuvokar vite nalo nei tealo napano kumisidomiio, bior maka kuvika den Atua. <sup>3</sup> Mia bogo tealo napano kubika den Atua, mia ka bogo na maka kuvar bunu, a nina bior kubika belea ga. Kamiu kumitu kubikano ga ka rila ka kenemiu sidomiano nalo amijikia avar venia napano ajidomio ka mia ajog rivu kanio.

<sup>4</sup> Kamiu kumitavukia tomu nalo napano maka avijuku rivu ka koalo nalo, javukia napano maka bunu kuvijuku rivu ka kenemiu Atua, napano maka bunu kuver riano vanio. Toro napano naio jidom ka rila bilbilu rivija yetemeriba nei a rivija kanano bajago nalo, naio jom̄a mila bilbilu va naljuo Atua, jibe ka naio be Atua kanano uolu

ruei. <sup>5</sup> Iliano riano tai napano joa Iliano Lu naio berenio “Niunudo napano Atua midu joa kito naio jo jidom ka riel bele bogo nonovio ea kiano sidomiano va nalo.” Mia nina maka ve iliano kurano na, <sup>6</sup> mia Atua naio jomã mijai kito toru ea kiano tiniememiano ka mia rotibe na re bunu. Nina jibe ka napano Iliano Lu naio berenio berinavo “Atua naio juko vio ka navarvariano mia naio tinien jii toro napano kanano jidomiano batove.” <sup>7</sup> Bior vite na, monoka kamiu kuvidu kamiu totano yetano ka Atua jumãno. Monoka kuverbure Setano ana mia naio rivuro den kamiu. <sup>8</sup> Monoka kuvitu lie rimei vaataro ka Atua ka naio to lie riviedu vaataro ka kamiu, a kamiu kulo va nalo, mia kuvisekon jumemi nalo, a kamiu napano kenemi jidomiano beve juo, monoka kuvila kenemi iviso nalo ameravo rivu. <sup>9</sup> Vonganei be kenemi bogo na tiniemi riia kamiu rivior kenemi kariano nalo, napano kumijog bova kano, napano kumituã kumiaga ka tegiano. Bo ka kuvila kenemi vitaliano rimei ea kenemi tegiano, a kenemi saariano rimei ea kenemi tinieiano. <sup>10</sup> Ana monoka kuvila kenemi jidomiano rivatove ea Atua mirano napano mave laka, naruei mia naio rivitirilar kamiu.

#### *Kamiu kuvitibure re kuruemi nalo*

<sup>11</sup> Kuruaku nalo a kuvivinioku nalo, maka rivu ka kuvituã kuver niegeniege kamiu a kuvitiburevure re kamiu bereio. Bajago na, Atua kanano tuboiano naio berbure ruei, naruei toro napano naio jo mila jibe na ka kuruano naio jo mila niegeniege tuboiano nei bunu, a naio jo jiburevure tuboiano nei ber naio bova. Mia bogo napano kumitu kubitii tuboiano nei kuber naio bova jibe na, kumitu kumidular kamiu jo mave loa naio, maka bunu kuvitu yetano ka naio. <sup>12</sup> Atua nene naio ga mijikia rivurumeul ea toro a mijikia rila toro rivakovio, naio ga takurano memedu ka naio sian tuboiano to a tibile toro. ?Mia kamiu kuberiamã

kamiu kube Atua ka mia kuvitiburevure kuruemi nalo tibe na?

#### *Kamiu kuvitkar vatitig kamiu rivu, kuvarvar ka re kamiu*

<sup>13</sup> Mia kamiu tealò amijikia aver “Banei ãeli na beni mia kumemi nuvan ea mãrkomeli dolu tai. Naruei ea vio na mia nuvitu yuka vodolu, mia nuviãauka iãauano napano mia nuvokar puruveru ve telabo.” Mia kamiu kuviagago ka kiniou. <sup>14</sup> Kamiu maka lele kuvijikia venia napano mijikia riyotuba ka kenemi meuliano beni. Kenemi meuliano javukia mavo na burusuku napano naio miyotuba ka bogo bulati ga mia iorou kano ana naio ba kovio bereio. <sup>15</sup> Iliano na memedu ka mia kamiu kuver, kuver tibe nei “Ver Atua napano jo mave laka naio sidom tibe na, mia numijikia numeul nuvitu kija bere vo, ana mia numijikia nuvila tibe na nuvila tibe na.” <sup>16</sup> Mia maka kamiu kumituã kumil vevavin ga a kubarvar ka kamiu kurano laka, mia nina bova ga na. <sup>17</sup> Toro napano naio mijikia batitig vite novo nalo napano memedu ka mia naio rila, mia naio maka rilao, naio jomã mila kiano kariano ga na.

## 5

#### *Kamiu kuvitkar kamiu rivu, kamiu napano kube tomu na saba*

<sup>1</sup> Tomu na saba toru, bo ka kamiu bunu kuviagago ka kiniou. Bo ka kamiu kuviaga ka nategiano ka bogo na jikili nalo napano ajumã abinimei ka mia avokar kamiu. <sup>2</sup> Ea Atua mirano, naio jomã mial kenemi saba novo nalo jibe ka amenunu ruei, a kenemi kulumãarauo novo nalo bunu jibe ka sivinia nalo ajer dudulilo ruei. <sup>3</sup> Ana kenemi veru nalo bunu, ajibe ka abijauialo ruei, bija mokotenemi bunu abijauialar lo ruei, jibe ka sebi jijenio, mia nina mila meravo ber kamiu kumimãu bova bija kenemi puruveru nalo. Kito rojua legiano na maaro nalo, mia kamiu kumitu kubiobijii

kenemiu puruveru nalo bavin lie vo. <sup>4</sup> Tomu na imãauano amimãau ruei ea kenemiu tiniavio nalo, mia kamiu maka kuvulu lo. Mia kanalo vuliano napano kubokario ju, jibe ka napano miaga jikili ka berial ka kamiu kumitumãa kumila saba nalo na bova. Tomu na imãauano nei bunu ajumãa ajegi, mia kanalo tegiano bano-o bokar Atua na sikiliano tilinieno. <sup>5</sup> Ea vio yetemeriba nei kenemiu meuliano monmaio ga, kumijikia kuvul ga vite nonovio napano kumisidomiilo ka kuvijog rivu kanio. Kamiu kumisen sinaniano novo nalo bogo nonovio, mia kinio neber ka kamiu, kamiu kumitibe ka temeul nalo napano tomu nalo abaganilo bano mãa amijabojabo kirinovo, ana temeul nalo nei amijog bo, mia maka ajikia ka bogo na mia auelo jo binimei vaataro. <sup>6</sup> Kamiu kumitumãa kubitisa ea nalo napano abe talimãasa, jumãalo yauo, kumisian tibureiano nalo napano kiri sikilikili banlo, bekurano ga ka ver nalo amemedu ga. Kamiu kumila kikilo mia kumuebinvinlo amãarmãaro garuei. Vite nalo na, kamiu kumila ban nalo napano maka ajikia averbure kamiu leleio.

#### *Kamiu monoka kumelumu ga*

<sup>7</sup> Kuruaku nalo, kamiu monoka kuvitu melumu ga ka mia kuvitu rorea kiado Tubo-o mia naio rimei bereio. Nina javukia toro na tiniavio napano naio jo melumu rorea bogo napano memedu ka mia naio rila imãauano ea kiano tiniavio, a ka yuo rimei rivovo eaio, a ka naio rivar sinaniano na meruo eaio. <sup>8</sup> Ana kamiu monoka kumelumu ga tibe na bunu naruei ka kuvitu rorea kiado Tubo naio rimei bereio. Mia kenemiu jidomiano naio monoka tu sikili, bior mia naio rimei berevesiou re ga na.

<sup>9</sup> Kuruaku nalo, mia kamiu kuvil mumii re van kamiu tulaka, ka mia Atua naio tibure re kamiu rivorio. Bior naio be toro na tibureiano nene, a jibe ka naio jumolu ju ea mãaratavo ka mia naio rimei joomo.

<sup>10</sup> Kuruaku nalo, bo ka kito tiniedo rimaio ka Atua kiano naverialiano nalo re nua. Nalo aberloglog mãarabo napano bo tai ka kito, ka bogo napano tomu nalo amila kikilo nalo amelumu ga, a kanalo jidomiano nalo maka rijoru. <sup>11</sup> Nalo aju jikili bano-o ana nalo ajovulu vite nalo nei, ana tenene na kito romial ka Atua naio milivu kalo toru laka. Toro nei Jov naio bunu ga be nalo tai napano naio ju jikili ea bogo na jikili jibe na, mia romijikia ruei vite novo nalo napano Atua naio mila banio iorou kanio. Nina riano, Atua naio be tiniememi toru ka tomu nalo a tinien miialo toru laka.

#### *Bajago napano aber iliano napano be riano*

<sup>12</sup> Kuruaku nalo a kuvivinioku nalo, mave ka vite dolu nalo, bogo napano kuberkar ea vite tai, ðeli na kuber iliano na toru tai, mia kamiu kuvijekakar re rivija mave siano, yetemeriba nei siano, ðeli na vite dolu siano kanio rila ana kenemiu iliano sikili. Verenio kamiu kuver "Mo" mia monoka kamiu kuver "Mo" ga. Mia ver kuver "Makanio" mia monoka kuver "Makanio" ga. Ver kenemiu iliano be riano bo jibe na, mia Atua naio maka rijikia tibure kamiu rivorio.

#### *Volkouano napano be verdoþeiano nene miyotuba eaio*

<sup>13</sup> Ver kamiu tai napano naio mijog bova ka vite tai, bo ka naio rivolkouo, a ver kamiu tai naio saaro, bo ka naio riilivu ka Atua ea iouano. <sup>14</sup> A ver kamiu tai rimie, nina memedu ka naio rivio nava-gadeano na lotuano ka amei aialio, naruei mia nalo amijikia abolkouo kanio, a amijikia aion titikivaka ve telisu ea parinio ea kiado Tubo siano. <sup>15</sup> Ana bior mãa aju jikili ea kialo Atua, ana abolkouo koio bija viekouoiano, mia Atua rilarrur toro na mieiano nei, rila naio rivu bereio. Ana ver mieiano na mãa bokario toro na bior kiano kariano tai, ana ver toro nene naio river bulag kariano

nene, mia Atua naio riviekokoa naio ka kariano na bunu.

<sup>16</sup> Bior vite na, bo ka kuvitu ku-ver bulavulag kenemiu kariano nalo van kamiu, mia bo ka kuvitu kubolkouo ka kamiu, ka mia Atua naio rila kamiu kuvu bereio. Bogo na toro na memedu naio bolkouo jikili, kanano volkouano naio mijikia rivar m̄arati ve telabo. <sup>17</sup> Elaija naio be toro tai jibe ka kito ga, mia naio bolkouo jikili ka mia yuo rivovo re, naruei ka yuka tolu a togio bereio [3½] maka yuo tai leleio ea kiano vio.

<sup>18</sup> Ana iorou kanio ana naio bolkouo bereio, ana yuo bovo bereio, ana tiniavio nalo abar sinaniano bereio.

*Rovuru nalo napano amielibele amei bereio*

<sup>19</sup> Kuruaku a kuvivinioku nalo, ver kamiu tai jaluvo den nailiriani-ano, karina kamiu tai ba burio binimeis bereio, nina naio be im̄auano novo tanea. <sup>20</sup> Monoka kuvisidomii kario, ver toro tai bilig toro va tai jaluvo den m̄arabo na bova binimeis bereio ea m̄arabo na memedu, naio milarur toro na bova neibano kiano meuliano, ana na mia toro na bova nei maka rijikia rivakovio. Ana ea bajago na, toro dolu nei naio mila jibe na ka mia Atua mijikia rivuku bulag nonovio kariano na toro na bova nei kiano.

Kiniou, Yemesi.

## Mesi Moti Na PITERE Naio Bivitauiaio Verialiano Moti

*Tukunuano bulati na niosi nei*

Pitere kiano mēsi moti, naio bivitau ba ban tomu nalo napano abe namoneano ruei, napano naio biolo, ber “Atua kiano tomu nalo, napano naio ga bijauia bulaglo.” Nalo nene aju beve terakurano janea vio jibe valauo ga ea tanobuku nalo ea vio nei napano banei binimei be buruvenuo nei Teki. Buruñara jidomiano ka mēsi nei ka ridular namoneano nalo kialo jidomiano napano tomu nalo aju amila kirisikili laka banlo, a napano abiniua bogokouo nalo bior ka amonea Yesu. Naio ber banlo ka asidomii ioluano vou nei, napano Yesu Kristo m̃aro kar kito, a meul bereio, a mia naio rime i bereio ka rivuru kiano tomu nalo. Jidomiano nei mijikia rija kialo jidomiano ka ajikia asikil atu sikili, a kialo moneano mijikia to sikili ea Yesu Kristo. Mia bior ka vite na, bogo na ver avakar bogokouo, ana tomu nalo mia ala sikili vanilo, amjikia asikili atu dam̃ariga, kialo jidomiano maka rijikia rijoru, be iakurano ver ala rivova vanilo. A ver ala tibe na, mia berial ka amonea riano Yesu, a mia avokar vite novno nalo nei napano Atua bar vatitig bo jua tiniabene, ber kiano tomu nalo kialo, ea “Bogoti nene napano Yesu Kristo mia rimaluvo eaio.” Bija iliano nalo na ka ridu bulag kialo jidomiano, naio ber kirisikili banlo bunu, ber monoka ala kialo meuliano rimemedu rivu, bior napano abe Kristo kiano tomu nalo.

*Torogio nalo na niosi nei*

Iliano moti 1:1-2

Marabo napano Atua midu ka rilarur kanano tomu nalo 1:3-12  
Namoneano kanano meuliano monoka ve lu 1:13—2:12

Namoneano nalo kialo im̃auano bogo na ajua jaleleiano 2:13—4:19

Namoneano kiano jidomiano monoka to rimelumu 5:1-11  
Iliano maariano 5:12-14

*Iliano na be moti*

<sup>1</sup> Banalo, kiniou Pitere neber kavijo bo a bogiano bo ban kamiu ea Yesu Kristo siano, napano nebe kanano atevi.

Mesi nei biedu ban kamiu Atua kanano tomu nalo, napano nanua kumitua kenemiu vio na Yerusalemo, a karina amijil dedade ea kamiu banbano vonganei kube valauo ga kumitu janea vio ea tanobuku nalo na tortoru nei Pontas, Kalesia, Kapatosa, Esia, bija Pitinia. <sup>2</sup> Kamiu kumijog bova biorio, mia nojidom neverial van kamiu, ka karam̃ado Atua naio mijikia m̃arabo nonovio na kenemiu meuliano na beamu beamu ruei. Naio bijauia bulag kamiu beamu ruei, naruei Niununo naio miñau ea kamiu, mia kuvijogkar Yesu Kristo kuvidu naio ea kenemiu iviso, kiano burukija jekon kamiu kumeravo, a naruei kubinime i kube kanano kulo lu nalo tai.

Kanaku volkouano ka mia naio rudu tiniememiano a tum̃aroano na kanano atu ajai kamiu ve toru lie dam̃ariga.

*Ioruriano napano m̃a namoneano nalo abokario*

<sup>3</sup> Bo ka kito rosidomii jum̃abe ka napano Atua na Yesu Kristo kiado Tubo karam̃ano, naio mila bo laka ban kito. Kito romiaia naio toru laka, bior napano naio tinien miia kito, mila kito romoluo rebe terivou bereio jouro ea kiano m̃aratavo. Naruei jibe ka napano naio mila kenerinio Yesu Kristo naio meul bereio den nam̃ariano, romijikia rejikia vatitig ka vite napano naio jukamu kean kito, maka bunu rive nam̃ariano, mia naio be nameuliano napano maka ribisi bogo tai. <sup>4</sup> Nina naio javukia Atua kanano jajum̃ano novo napano mia ravario iorou.

Naio mila batitig ju ruei, naio bar batitigio ju mave tiniabene, napano mia maka rijikia rimenunu, a maka rijikia rimeĩ rivova, maka rijikia riva kovio bereio bogo tai. <sup>5</sup> Vite nei kito maka rovokar vo, mia romonea Atua ka mia kanano moroano toko batitig kito, rivokar vatitig kito rivan riva rivokar legiano na maaro. Ana ka bogo na, mia naio rivetavo ea mirano kulo dolu nalo ka rilarrur kito.

<sup>6</sup> Nemijikia ka vonganei, kamiu kumitu kubar vite teremi na jogviano nalo ea juboluboiano napano m̃a kubokario, a p̃eli jo jibe ga na bunu ea bogo tealoo napano naio rimeĩ kia navo. Mia jidomiano nalo napano neberenio ruei na, naio bo ka rila kamiu kuvisaaro, kenemiu iviso nalo ajog rivu bereio. <sup>7</sup> Juboluboiano nalo na, abinimeĩ ga ka ala kenemiu viekouoiano atevijo kija, amei asikil lie. Nina naio jibe ka vite nalo tai javukia niogo, ka napano ver asidom rimeĩ rimeravo rivu, monoka ajie ea sebi ka sisen bulag niamiamo napano joaio, p̃eli na rojie tilibuemia ka meravo a memedu, mia kito bunu rabare kanio. Juboluboiano nalo nei napano robokario, ajavukia sebi tai ka sisen kon kiado viekouoiano rimeravo rivu, a sikili rivu. Ver bogo napano Yesu Kristo riyotuba bereio, naio rial kiado viekouoiano rimeravo rivu tibe na, naruei mia kito nonovio romijikia rasasaaro-o mia, romijikia rovitii vatitig kito, rojog rivu laka.

<sup>8</sup> Nojo neberii Yesu na, tinieku maio bereio ka nanua, nojo bija naio, nemijikia batitig naio, mia kamiu makanio. Be riano ka napano kamiu maka kuvija naio nua, bekurano, vonganei tiniemiu jii naio toru laka, a maka lele kuvial naio ka miremiu leleio, mia kuvitu kumonea naio jikili bo, a kenemiu iviso nalo ajaaro kanio ka burum̃ara saariano tai napano toru laka, iliano maka rive verare ka riverii vatitigio. <sup>9</sup> Kenemiu saariano nei,

naio be m̃arati novo tai ea kenemiu moneano napano kuvijikia kuvisenio vonganei, mia maka ve nina ga, bior bija naio, ea bogo napano jo binimeĩ, mia kuvijikia kuvisen tai napano jesei lie vo, nina ioruriano na kenemiu meuliano.

<sup>10</sup> Vite na napano roberii, ioruriano na tom nalo kanalo meuliano, naio be vite tai napano m̃a naverialiano nalo re nua amila vio jikili ka ajikia. Amijikia vatitig Atua kanano verikariano, ka mia naio tinien riia kanano tomu nalo, ka mia rilarrurlo, a atu averial tibe na. <sup>11</sup> Aju m̃a aberenio, mia maka ajikia batitig ka mia naio rim̃auka tum̃abe, p̃eli mia naio rim̃auka ea bogo na vabe. Amijog ga ka napano Niununo na Naverikariano na kanano naio jo betavo ea banlo ka beamu, mia nalo ala kiki naio ve toru, mia iorou, ilivuiiano novo nalo amijikia amalmaluvo, mia ajikia re ka mia Naverikariano naio ve toro na jum̃abe, p̃eli naio be kenia. <sup>12</sup> Beamu be tinielo ka naio be toro na toru tai ea kialo bogo ga, avona iorou, abitilubar ka vite nalo nei napanoaju aberialio, maka ve kialo bogo, mia ka ve kiado na iorou. Naruei kamiu bunu kubitilubar ka vite nalo nanua m̃a naverialiano nalo aju m̃a aberialio beamu binimeĩ, nina naruei abinimeĩ abe riano ea iliano nalo na Ioluanu Vou nabo napano kumemi numiololu ka ban kamiu ea Niununo Lu na mave kanano moroano ruei.

Mia maka ve naverialiano nalo ga, mia nailiano nalo bunu ajidom ajikia vite nalo nei, mia makanio, maka ve kialo ka ajikia. Tenalo nei amalmaluvo vonga meravo ea kiado bogo ga.

*Kito monoka rove lu rivu bogo nonovio*

<sup>13</sup> Naruei bior napano Yesu Kristo miyotuba ea yetemeriba monloglog kiado bogo, kito naruei monoka rala vatitig kiado jidomiano ka resikili vatitig ka rala kanano im̃auano.

Monoka rotilan vuu vatitig ka kiado meuliano, a rosidomial re yetemeriba nei, mia rosidomkar ga ilivatitigiano na bo napano rejikia ro-vokar ka bogo na mia Yesu rimei riyotuba ea yetemeriba nei ve vaarakurano bereio. <sup>14</sup> Mia monoka romei rotibe ka kiritete novo nalo na mā aju amonea batitig karamālo nalo, a mia sidomiano va na kulo vovu kialo, maka rivu ka rajamo kalo ka ave tubo ka kiado meuliano tibe ka na beamu, ea bogo na maka rojikia vite tai leleio.

<sup>15</sup> Karamādo, naio naruei bio kito, mia monoka rovitilubar ka naio napano jidom romei vaataro kean naio, naio be lu laka, naruei kito bunu monoka rove lu vatitig ea māarabo nonovio nalo na kiado meuliano. <sup>16</sup> Atua kanano iliano tai ea kanano Tuboiano moruo naio ber jibe nei ruei, naio berinavo

*Kiniou nebe lu, kamiu monoka kuve lu bunu. Lev 11:44,45*

<sup>17</sup> Ana bereio, Karamādo, vatelabo roju mā robio ban naio ka rijai kito, mia monoka rovitilubar ka naio jo bitii veve tom nalo memedu ga ka kialo imāuano beve terakurano, naruei monoka reiel ea yetemeriba nei napano kiado jidomiano rivatove ka naio, romerou kanio. Naio midu kito rojua vio nei ka bogo telisu ga, rojibe ka valauo nalo ga eaio, mia monoka tiniedo rimaio ka karina, mia rava rotumolu rotu ea mirano rimemedu.

<sup>18</sup> Nanua beamu, kiado kulo moruo nalo maka ajikia Atua, tenena ajian lilian kanalo meuliano na melijokouo batove ba bokar bogo na Yesu Kristo naio binimej buru bulag kito denio. A jibe ka napano kumijikia, naio mila jibe nei, maka rivulu bulag kito ka tena yetemeriba tibe ka puruveru p̄eli niogo p̄eli vite venia bereio tibe na napano mia mijikia rivakovio.

<sup>19</sup> Maka leleio, naio bul bulag kito ka kanano burukija lu memedu, bior ka napano naio jian kiano meuliano jo jeleig kito, mijamo ka naio javukia kirikiti nunu solbouo

tai napano maka ve niajebijo eaio ka ala jokoluolu kanio.

<sup>20</sup> Atua naio bijauia Yesu ka rijai kito tibena nanua beamu ruei. Beamu ka bogo na naio jii yetemeriba, mia naio bokar kenerinio nei bija naio jibe na ba tinien miia kito laka, naruei naio miila naio miyotuba vonganei ga ea legiano nalo na maariano nei. <sup>21</sup> Naio miyotuba, naruei ea kanano māariano naio betavo ea kiado māarabo ka rovan bereio ea Atua naio bo laka. Mia bogo napano romial ka Atua mila naio meul bereio, midu naio jo mave bijaio ea kiano mermerano, kito be tiniedo ka Atua nei naruei, bo ka romonea naio, resikili rotuaio, a ravarkar tiniedo eaio.

<sup>22</sup> Jikario ea vio nei naruei kamiu kumonea ilirianiano na Atua kanano, a kenemiu meuliano jo binimej memedu bo, a kumitu tiniemiumaio lie vo ka kuruemiu dolu nalo. Mia kamiu kuveve re torogio ea naio, monoka kuvila vio sikili ka tiniemiurii kamiu kuviniu ea kenemiu iviso nalo ka rimei ve toru lie laka.

<sup>23</sup> Kamiu kumuluo kube terivou bereio, kumidu meuliano vou tai ruei, mia nina maka tibe nena nalo abar tete. Kiado meuliano vou nei, naio miyotuba ea Atua ka iliano ga, iliano napano meul, iliano napano mia rijikia re rivakovio bogo tai.

<sup>24</sup> Kulorinio kiano meuliano maka rijikia to vesiou, bior ka napano miluo bo javukia māaiesi, mijikia rimei ve novo laka tibe niaiesi, mia iorou kanio māaiesi nei mijikia rijeli, a niati mijikia tibiribili. <sup>25</sup> Mia vite tai ga naio mijikia tobo to, nina be Tubo kiano iliano.

A iliano nei naruei, naio ga napano numioliolu ka ban kamiu jikar nua ruei binimej bokar banei.

## 2

<sup>1</sup> Naruei bior ka napano iliano vou na bo bokar kamiu ruei, monoka kuvituvan bajago na bova nalo. Ivivo va nalo, sibiano nalo, kariano luklukuanano nalo, jokuanano nalo, ililelaniano nalo, bajago nalo na jibe na

monoka kuvila bulaglo den kenemiu meuliano nalo. <sup>2</sup> Jibe ka napano tete domdomu ajidom m̃lea m̃lo yu ka amijikia ameul eaio, kamiu bunu monoka kuvisikili ka kuvakar sinaniano a munuiano novo napano mijikia rila niunumi riluo rimei rimeruo rivu, rimemedu ka bajago na tomu nalo napano Atua milarurlo. <sup>3</sup> Kamiu kuvisen vonvon Tubo sano sinaniano telisu ruei, a ver kumisen kumijog bo, bo ka kuvisen bogo nonovio, mia mabomiu rivujo vatitig damariga eaio.

*Yesu naio be burupati puruveru na tagvoru napano meul*

<sup>4</sup> Atua naio jidom rivitirilar yimo lu tai, naruei naio bijauialar puruveru tai napano naio meul tena tagvoru na yimo nei, napano naio mial bo laka, nina be Yesu. A kulo dolu nalo maka asidom naio, abukulario, mia kito tiniedo jii naio toru, rotakiio. <sup>5</sup> Naruei Atua naio buru kito, naio bitiri bulag kito mave ea puruveru nene, naio miasosol kito jibe ka puruveru nalo napano ameul ea kanano yimo lu nene. Naio mial kito jibe ka taara na kulo lu nalo ka roim̃au kanano, napano romijikia ravar novo nalo van naio napano mia naio saaro kalo, napano romijikia resian vanio rivior im̃auano ga napano Yesu Kristo naio mila ruei. <sup>6</sup> A javukia ga iliano tai joa niosi na tormoruo naverialiano Aisea kanano nua ruei, napano Atua naio ber berinavo

*Kamiu kubitilubar ruei p̃eli makanio?*

*Kiniou nemijauialar puruveru na bo tai tena tagvoru na kunuaku ruei, napano tinieku-jii naio toru.*

*Mia nevitiri naio memedu ea kanaku komeli lu na, Saion.*

*Toro kei napano rivitirilar kanano meuliano ea naio, mia naio rijikia re rijoru rimei rivova bogo tai. Ais 28:16*

<sup>7</sup> Mia kito na m̃a romonea puruveru nene, rober naio bo laka ea kanado vitiano, mia tealo maka asidom,

abukular naio ga bano. Mia iliano dolu tai na Atua kanano ea tivelinio nei joa Niosi na Iouano nalo, napano naio berinavo

*Bekurano ka napano tomu nalo na amim̃auka yimo aberenio puruveru nei naio bova, abukulario,*

*mia kiniou nomidu puruveru nene, nemila naio be burupati puruveru na tagvoru na kunuaku yimo lu. Ais 8:14*

<sup>8</sup> A ea Niosi na Aisea bereio, be Atua kanano iliano tai naio berii puruveru nei keano vo, naio ber jibe nei, berinavo

*Puruveru nei, mia tom ve telabo jaalo nalo ser baŕeia naio, rila aiel vovu.*

*Naio be puruveru tai napano mia rila tom nalo na yetemeriba nei atibirbil. Ais 8:14*

Ver revika venia milalo na ajibirbil jibe na, nina bior ga maka amonea ilirianiano nei napano amijogio, a mia atibirbil avatove laka ea vio na vakovioiano napano naio jo mon kalo.

<sup>9</sup> Mia tibena re van kito, bior napano robe taara takurano napano Atua naio bitirilaro, robe taara takurano na parinio kulo lu tai na rovitikar kiano vio, roju jouro ea kanano buruvenuo lu, robe tom nalo na kanano m̃aratavo memedu. Kito naruei napano robe tomu na memedu nalo ka ravamenea naio, ka roverial kanano tinienovioiano na mila ban kito, napano naio buru bulag kito den melijokouo, ana jii kito rojua kiano miamoiano na bo laka. <sup>10</sup> Beamu nua robe tomu p̃ilip̃ili, mia vonganei robinimei robe taara takurano na Atua kanano. Beamu nua kito maka rovokar kanano lup̃ilup̃iano, mia vonganei kiano lup̃ilup̃iano naio bujolou ea kanado meuliano.

<sup>11</sup> Banalo, ver tibe na, bo ka kamiu kuvitilubar ka yetemeriba nei naio maka ve kiado vonuo rimemedu. Kito rojibe ka tomu na vio dolu nalo, rojibe ka valauo nalo ga,

naruei monoka rotuvan bajago natiniekakariano nalo na yetemeriba nei kanano, bior ka napano kanano vovaiano nalo abe uolu memedu ka niunudo. <sup>12</sup> Dañariga roju iviso ka nalo napano ña maka asidom amonmonea, ka napano ña aju abijukudie kito, mia bogo napano rojua miralo, kanado meuliano monoka rivu mia rivu. Ver tibe na, mia amijikia avitilubarlo ka venia na ña rojuma romila naio memedu, mia nalo bunu ver amonmonea, mia amijikia avija ka kito, roviniu ravamenea Atua ea bogo na mia naio riyotuba ka kito bereio.

*Bajago novo na namoneano nalo bogo na ajua yetemeriba nei*

<sup>13</sup> Jibe ka kito robe namoneano nalo ea Tubo ruei, kiado bajago, bogo napano rojua yetemeriba nei naio monoka rimemedu ea naio siano na ña roju romioliolu kanio.

Namoneano nalo monoka atovon tomu na tortoru nalo napano abitiri bulaglo ka avitikar vatitig tomu nalo. Vede tubo nalo, ðeli navurimãaraboiano na tortoru nalo, <sup>14</sup> ðeli na parinio tubo nalo, mia kito monoka rovitilubarlo ka Atua naruei naio mije monea jumalo ka atibure tomu nalo, ka asian vironiano van na ña mila maka rimemedu, a ka aiaia na ña miãau bo. <sup>15</sup> Atua naio jidom ka kanano tomu nalo monoka ala rivu, bior ka napano ver rotu rala tibe na tulaka, mia tomu nalo na ña maka ajikia vite, napano ajuma abuku iliano vovu die kito, mia ajikia re bunu ka aver titai leleio.

<sup>16</sup> Ka tivelinio, be riano ka kito romijikia romila venia ga na ña kito rojidom, mia ka tivelinio nene, toro na ña be namoneano naio maka rijikia sidom melea tibe na. Vede naio jidom ka river tibe na, ver O, vite na naio joa kiniou ga na, kiniou nemijikia nala vite va venia napano kanku jidomiano ga naio jidom. Mia maka tibe na leleio, bior ka napano monoka rovitilubar ka kito namoneano nalo robe tomu na

amiãau Atua kanano, mia monoka rala venia ga na ña naio jidomio.

<sup>17</sup> Namoneano nalo monoka atovon kulo dolu nalo, monoka tiniel tii kurualo dolu nalo a kuvivinielo nalo na ea Atua kanano ñaratavo. Monoka amerou ka Atua, avame-neiao, a monoka avatove bunu ka kialo tubo nalo.

<sup>18</sup> Ea taara na namoneano nalo, tealo abe tom na tortoru kanalo, ka aiãau kanalo kurano ga. A kanalo tomu na tortoru tealo amijuku bo, mia tealo ajikili laka, naruei bekurano ka napano toro na toru bijuku bo ðeli bijuku bova jibe na, mia toro na miãau kanano monoka tovon naio rivu. <sup>19</sup> Bogo tealo, vede toro na imãuano naio miãau bo ga, mia kanano marauo naio mijikia rila siniabu vova kanio, naio mijikia rila vova kanio dolu ga. Toro nei mia naio rijog rivova rivior kanano marauo kanano bajago napano maka rimemedu, mia bo laka ka naio river bare ka rijamo ka ga, napano kanano iviso jo bar tiniene ea Atua ga, ana mia naio rijikia rijoglubar ka napano Atua jo bija naio ka riiaio. <sup>20</sup> Mia ver toro na imãuano mila vite na bova telabo, ðeli mia kanano toro na toru monoka river asian vironiano vanio. Mia ver bogo napano aje vironiano van toro nei, ana naio jo buru ga, mia kito rover re ka naio jo buru bior ka napano naio be toro novo tai, mia romijikia ka naio maka ril bior ka napano naio bitilubar kiano vovaiano.

Mia ver jau kotoña kala ga vite nalo na bo tibe ka napano Atua naio jidom, naruei nalo ajumolu amila siniabu kaso, ajian vironiano na kirisikili tai banso biorio, ana jau koto buru ga, nina naruei bajago na bo nanãa Atua naio tinien jii melea laka.

<sup>21</sup> Vite na napano toro na bo naio mijog bova bior ka napano amila bova kanio, naio monoka ve yati tai na kiado meuliano na ña Kristo bio kito robinimeiaio, bior ka napano beamu naio jibe na ruei ban naio. Naio maka rila titai, ana amila naio

bar jogvaiano laka, mia naio mijamo ka ga, bior kito. Naruei jibe ka m̄arabo na m̄a kiado Tubo naio miel ban ea beamu ruei, mia kito roue jaano iorou kanio.

<sup>22</sup> Iliano Lu moruo berii naio beamu ruei, napano ber jibe nei, berinavo

*Naio maka lele rila kariano bogo tai, iliano na sibiano maka lele riy-otuba ea niono.* Ais 53:9

<sup>23</sup> A jibe ka bunu napano kito romijikia, bogo na m̄a abuku iliano na bova nalo banio, naio maka bimerano, a bogo na amue niege-niege niabeno, mia maka naio river titai leleio vanlo. Naio jo buru ga, naio midu vite nonovio joa Teta Atua jum̄ano napano dam̄ariga kanano tibureiano nalo memedu batitig bo ga.

<sup>24</sup> Bogo napano Yesu naio jaklele ea m̄akolkolo, vironiano na kanado kariano nonovio mijoru ea niabene, a kiano m̄ariano mila na bajago na lakariano naio m̄aro den kito, mila napano bajago na mila memedu naio meul bo naio joa kiado meuliano. Ierinio, kiano niabejalele nalo amila kiado niabejalele nalo amiije ioruriano na bo.

<sup>25</sup> Beamu, kito roju romiel vovu jibe ka nunu nalo napano m̄a amilaluvu kanalo m̄arabo, mia vonganei toro na m̄a bitikar nunu naio mileal kito bereio ruei, vonganei robinimej ber roju batitig bija naio napano jukuku ka kiado meuliano.

### 3

*Nalo na m̄a ajoro ruei monoka atovon koalo nalo*

<sup>1</sup> Jibe ka napano kito namoneano nalo monoka rotovon parinio tubo na buruvenuo, kito na m̄a rojoro monoka rotovon bunu koado nalo.

Nemil beamu ban kamiu tire nalo, ka kamiu monoka kuvitovon vatitig kouemiu nalo. Vede tira tai koano naio maka rimonmonea iliano lu, naio maka sidom rijog kanano tira

nei verii kanio, mia ver kanano tira rila rivu ka naio dam̄ariga, p̄eli mia mijikia rivuru naio bunu rimej rive namoneano tai. <sup>2</sup> Iliano telabo maka rijikia tovulu toro nei, mia bogo napano naio bitii vatitig koano kiano bajago lu na tovoniano na meuliano nei, mia naio saaro ka rimonea.

<sup>3</sup> Tire nalo, bo ka kuvitilubar ka burupati na yovovuano na kenemiu, maka rivior na m̄a kuvijukon vijumiu tibe na tibe na, p̄eli na m̄a kumive yomu niogo nalo, p̄eli na m̄a kuviya kulum̄arauo nalo na bo.

<sup>4</sup> Vite na, naio maka rivior napano m̄a kumiyovovua batitig niabemiu nalo jibe na, mia venia na m̄a mila kamiu kumadigdig bo riano, naio be bajago na bo na joomo ea kamiu. Nao, kenemiu tiniememiano a kenemiu iviso na melumu, nina naruei naio be kenemiu novonovoiano riano, a mia nina naio maka rijikia rimej ve terimoruo bogo tai, naina naruei be bajago napano Atua naio mial bo laka.

<sup>5</sup> Korobido tire nalo re nua, nalo bunu kanalo bajago jibe na ga. Nalo abarkar tinielo ea Atua, naruei amonea ka naio ga mijikia riijailo ka amei ave novo laka ea mirano a ea mirano na kulo dolu nalo. Bogo napano koalo nalo bunu amial ka napano kanalo tire nalo nei abatove batitig jibe na, nalo amial bo laka.

<sup>6</sup> Tira tai napano naio jon̄a mila jibe na, naio be tiramoruo Sera, napano naio jaaro ka tovon batitig koano tormoruo Epraamo, banbano naio jo bio ka naio be kiano tubo. Tiramoruo Sera nene, roju romial naio jibe ka kiado nena novo tai, naruei kamiu tire nalo re banei, ver kamiu kuvitu kuvila memedu van kouemiu nalo, tibe ka napano naio milao, kamiu kumej kuvitibe ka kenerinio niatira nalo memedu. Vede tealo amerou ka ver ala tibe na van koalo nalo aver mia tum̄abe ka nalo, mia makanio, kamiu monoka kuvatove kalo tibe ka na m̄a Atua naio jidomio.

<sup>7</sup> Mia iliano rimei ka kamiu suṁano nalo, ber ka kamiu monoka kuvisidom bukua kouemiu tire nalo ve toru. Vere toro tai toa kanano vonuo vija koano, naio monoka riv-  
itilubar ka naio be suṁano, naio jikili bo, mia koano naio be tira, maka sikili laka tibe ka naio. Naio monoka tinieno maio tulaka ka Atua naio jian meuliano novo maka van suṁano ve takurano ga, mia naio jian banlo abe juo, suṁano bija tira abe veverare ga.

Mia ver toro tai rila re sikili ṁele van koano tira, mia kanano jidomiano rivatove kanio, melmeloko rivu vanio, mia naljuo kialo volkouano nalo maka ajikia ava avoru ea ṁarabo togio ga, mia amijikia ajaka ava avoru ea vio na ṁa Atua naio jojoaio.

*Kamiu monoka kuvatove ka kamiu ka kenemiu jidomiano nalo mia amei ave takurano*

<sup>8</sup> Iliano na maaro tai ea tivelinio na, kiniou neber bo ka kamiu kuvidu jidomiano nalo napano neberenio mave ruei. Kamiu kuviniu, monoka kuvila vio sikili bogo nonovio ka kuvitu batitig vija kamiu napano kenemiu jidomiano ve takurano ga. Kamiu tiniemiu riiaia kamiu, kamiu tiniemiu titii kamiu tibe ka kube ṁaratavo takurano ga, kuvijuku rivu, kuvidu kamiu kuvitutano ka kamiu bereio. <sup>9</sup> Nana ṁa mila lelanso, mia jau kovimerano re vanio, a nana ṁa mioluaso, mia jau koyolua merano re naio. Venia napano vede rimei easo, mia koto kesian merano ilivuiano na bo ga rivanio. Bajago na bo jibe na naruei napano Atua naio bio kito biorio, ka rala tibe na daṁariga, a ver resian ilivuiano rivan toro dolu, mia Atua naio rudu kanano ilivuiano toa kiado meuliano. <sup>10</sup> Verikariano na Atua kanano na jibe na naio joa Niosi na Iouano nalo ruei, napano naio ber jibe nei, berinavo

*Toro na ṁa tinien jii ka toa yetemeriba nei rivu, ṁeli naio jidom*

*ka kiano meuliano mia rivuro rivu, ve tebievi, naio monoka riverbure ilivoviano nalo amei re amolmoluo ea niono, monoka rivitigar vatitig ka naio toṁa rilasibi re.*

<sup>11</sup> *Naio monoka rituvan na bova, rila na bo ga.*

*Naio monoka ritakisor tuṁaro, monoka rilavio sikili tulaka ka rivuru rimei vaataro ka iviso na tomu nalo.*

<sup>12</sup> *Tubo mirano naio jo bamere jikili vatitig ea toro na ṁa jo mila vite memedu, naio jo mije tiliniene ka volkouano na tomu nalo na bo jibe na.*

*Mia tomu nalo napano ṁa aju amirṁauka vovaiano, mirano jikili ealo, bilig taakano kalo. Iouano 34:12-16*

*Bogo na ṁa amila bova ban Atua kanano tomu nalo na bo*

<sup>13</sup> Ver kito rotu rala vio sikili ṁele ka rala vite nonovio naio rivu mia rivu, mia rover re ka mia tomu tai amijikia ala siniabu ka kito riviorio.

<sup>14</sup> Mia vede bogo tai aial kito roju romila bo jibe ka napano Atua naio jidomio, naruei romiilo ka napano ajumolu amila bova ban kito biorio. Ana ver tibe na, monoka reial jogviano nei naio maka ve vite tai, naio be ilivuiano tai ga napano Atua naio mije ban kito. Romijikia rosidomial iliano tai na niosi na tormoruo naverialiano Aisea, napano naio ber jibe nei, naio berinavo

*Atua kanano toro, jau komemebiju re, jau monoka komerou ka re venia na ṁa tomu nalo na yetemeriba amijikia amerou kario. Aesaea 8:12*

<sup>15</sup> Iliano na ber ka mia kito romerou re, mia venia napano mia monoka rala, ea kiado iviso, monoka rodu Kristo naio loa vite nonovio, naio takurano be kiado tubo. A bogo nonovio monoka rotu batitig rivu, jibe ka napano ver vikadeniano tai rimei rivika ka bior vaio romonea, a bior vaio ana rabar

tiniedo ea Yesu, naruei monoka rejikia vatitig tumabe mia romijikia resian verdoŝeiano na bo rivano. <sup>16</sup> Mo bogo napano verdoŝeiano bano, naio monoka rivan vija bajago na melumuiano, a nana tovoniano na toro. Nalo na nã tinielo jii ka nã ala lelan Kristo kiano namoneano nalo, amijikia avuku iliano na bova ve miroano rimei ea kamiu, mia kuvitkar, maka rivu ka kuvuku bereio iliano na bova nalo rivan ealo bereio. Ver kuvila tibe na, mia iorou kumijikia kuvimou ve toru laka ea ilisikiliano nalo na kenemiu bereio, mia ver kumelokloko ga kalo, mia nalo naruei monoka aimou rivior kanalo iliano nalo na jikirkili nã na.

<sup>17</sup> Ver Atua kanano sidomiano naio rijamo ka bogo tai jogvaiano naio mijikia riyotuba ka kito, mia maka rivu ka jogvaiano nei naio rimaluvo rivior vite tealò na bova na nã kito ga romilaio. Mia bo lie ver jogvaiano nei naio riyotuba ka kito rivior ga imãuano novo nalo na nã kito roju romilaio. <sup>18</sup> Kamiu tiniemiu maio ka Kristo, napano naio jibe na. Naio be toro na memedu laka tai, mia naio mijog jaleleano burutomoruo laka bior tomu nalo napano maka amemedu. Kariano na kito tomu nalo na yetemeriba kiado telabo laka, mia ea kanano m̃ariano takurano nei, naio mila vite nonovio bo ruei ka rila ka ve kiado m̃arabo ka mijikia rivuru kito rava vaataro ka Teta Atua. Amila lelan Yesu niabene jibe na bano naio m̃aro garuei, mia bo laka ka napano iorou, naio binimeis meul bereio ea moroano na Atua Niununo.

<sup>19</sup> Beamu ka naio meul bereio jibe na, napano naio joa vio na m̃ariano kia ga vo, moroano na Niununo na Atua kanano nei binimeis bujo magmago eaio, mila na naio ba mioliolu memedu ban niununo dolu nalo napano ajua vio nei, ka vonganei naruei Atua naio jovululo ruei, ana Sim̃aro naio bijukude garuei. <sup>20</sup> Niununo nalo nei, naio be tomu nalo na nã maka

asidom amonmonea Atua, ajavukia nalo na ea bogo na tormoruo Noa re nua. Ea bogo na, Atua naio jororealo ka aviliglo, naio midu bogo tebievi banlo. Aju jibe na, bano na Noa naio jo miñauka burum̃ara kanano uako nei banbano, mia maka asidomio ga, naruei bogo napano ueimiya jovukolo nalo amadudu. Nalo miroano aba kovio ka bogo na, mia tomu telisu ga amije ioruriano joomo ea uako, nina be Noa nalo arolu ga.

<sup>21</sup> Naruei burum̃ara uei nei napano burulo ameul ea kialo uako nei, naio be nioti venia ban kito banei? Naio mila kito rojidoimii uei dolu, uei na kanado ioruriano, naina be uei na nã amila varueiano ea kito eaio. Uei na varueiano nei, naio maka ka rila ka niabedo rimeravo, mia naio jekar vatitig kito ka Atua biekokoa kariano nalo na kiado, naruei kito maka bunu roimou ea naio riviorio.

Varueiano naio midu kiado meuliano jo bo bija Atua jibe na, mia bo ka kito rosidoimii bunu ka kei naio mila kiano m̃arabo jibe na? Yesu Kristo ga na naio milαιο, binimeis ea kanano tumoluano bereio den nam̃ariano. <sup>22</sup> Mia iorou ka nina, naio bavin bereio ea vio mave, naio ba jo jotano mave bija Atua ea jum̃ano tivelinio vameruo nene, napano nailiano nalo, kulo kouo nalo na tortoru, bija moroano nalo, abiniu ajutano ka kanano nave-natuboiano.

## 4

*Atua kanano sidomiano naio to tukamu ka kiado meuliano*

<sup>1</sup> Jibe ka na neberenio ruei, Kristo naio mijamo ka naio bar jogvaiano miroano ea mokotenano, mia kito bunu monoka rala kiado jidomiano riveverare ga. Toro na nã naio rijog vova ea mokotenano, monoka naio river re river bova, bior ka bogo napano naio miyotuba ea jogvaiano jibe na, mijikia rila naio sikili lie vo ka naio ribisi vija bajago na kariano nalo. <sup>2</sup> Toro na jibe na,

naio maka bunu todū ka kanano meuliano na yetemeriba nei, napano tinieiano va nalo na bajago na tomu, nalo ve toru laka ea kiano jidomiano, mia naio jidom ga vite na memedu nalo na mā Atua naio jidomio. <sup>3</sup> Burumāra togio na kanado meuliano, kito romila kule laka bogo be ruei napano roju rejeliviv bija bilbilu nalo nei na mā maka amonmonea. Kitoliko nalo ea meuliano va napano bujo ka veribinio nalo, najiliano na tire nalo, namunuiano na uei ba parilo jeliviv, tinielo mimi a ajukuruku, amila uetubaiano janea vio bokar viomijeni, amila korov tuboiano, bija amila lotuano ea tavoru sibisibiano nalo.

<sup>4</sup> Nina kiado meuliano na beamu na, mia vonganei bilbilu nalo na maka bunu ajikia ka kito roju jumābe. Amial ka napano maka bunu ga rosidom ka ratakisorlo ka ravan rovudomdom kiado meuliano ea kialo bulumirano bulukinia, mia maka asaaro leleio, mila na tinielo jer kito toru laka. <sup>5</sup> Mia kito rosidom dede re, tomu kinkin nalo na jibe na mia atumolu kia navo kamu ka Atua mirano, napano mia naio tibure tomu nalo na ameul vija bunu nalo napano amārmāro beamu ruei. Mia monoka nalo averial kialo veriano vanio, naruei ea bogo nei, mia avitilubar kanalo torokoriano nalo. <sup>6</sup> Mia tibe na re van namoneano nalo. Vede tomu nalo na yetemeriba atiburelo asian vironiano na yetemeriba van mokotenalo, mijikia riva rivokar napano mia alaluvu kialo meuliano, mia bogo na napano atumolu ea mirano Atua, mia naio sian ijaiano na meuliano rivan niunulo. Mia meuliano nei naruei naio be burumāra vite na mā mila kito roju romiololu ka Ioluano Vou na bo ban tomu nalo.

*Bajago na namoneano nalo kanalo ka bogo na maaro vaataro ka rimei*

<sup>7</sup> Kiniou nojidom never tibe nei, ka vonganei vaataro ka kito rovokar jukuti na vite nonovio. Ea bogo na jibe na, namoneano nalo monoka

atumolu batitig rivu ka napano kialo jidomiano nalo ameravo rivu, ka amelukluku re ka volkouano. <sup>8</sup> A mave ea vite nonovio dolu nalo, monoka tinielo titiilo bereio ve toru laka, bior ka napano bogo na tiniedo jii toro tai, mila na romijikia robiekoko kiano kariano monmaio ga. Iliano tai naio ber jibe na ruei, berinavo kariano toru laka, mia tinietiano naio mijikia rivariko nonovlo.

<sup>9</sup> Vite dolu, namoneano nalo monoka asaaro ga ka avitiikarlo bereio ea kunualo nalo. <sup>10</sup> A bunu, nalo veve terakurano monoka ajikia vatitig veve moroano a jikiiano nalo napano Niununo jian banlo, a monoka aimāu rivu vija ka rijai batitig kanalo bilbilu dolu nalo. Ver aviekouo rivu, amijikia ala ka napano mia tiniememiano novo na Atua kanano riyotuba kalo. <sup>11</sup> Toro napano jikiaiano na iliano joa naio, naio monoka ril rivu tibe ka napano Atua kanano iliano na memedu ga naio jo moluo ea niono. Toro napano jikiaiano na ijaiano na imāuano joa naio, naio monoka rila rivu vija sikiliano nonovio napano Atua jian banio. Ver bogo nonovio rala vite nonovio rivu laka tibe na, mia tomu nalo amijikia avamenea Atua ve toru rivorio, avamenea naio ka Yesu Kristo siano, napano mermerano nalo a moroano nalo abe kanano ga rivan riva ribisi re bogo tai.

*Jogvaiano na nalo na mā amonea*

<sup>12</sup> Banalo, nemijikia ka vonganei kamiu kumitu kubiniu bogo tai na jaleleano napano naio mila kamiu kumijog bova toru. Mia nejidom never ka kamiu, ka kuviilo mēle re kanio, maka kuvial vite na tibe vite tai napano be tiniemiu ka kuver maka rijikia riyotuba ka kamiu bogo tai. <sup>13</sup> Mia venia ka ala, kuvisaaro ga ka napano kuvijikia kuvitu burukuti vija Kristo ea jogvaiano nalo na kanano. Ver tibe na, mia iorou kanio ve burumāra kenemiu saariano, napano kuvijikia kuvitu burukuti vija

naio bereio ea bogo napano naio rimaluvo vija kanano mermerano. <sup>14</sup> Ver dolu nalo amijikia ka Kristo siano joaso, mia amijikia avuku ioluliano va amei easo, mia kosidomii mēlea re kanio. Mia buruñara ilivuiano na Atua kanano naio toaso ga, bior Niununo na mermerano na Atua na mave naio jo joa kanamo meuliano.

<sup>15</sup> Ver ala vironiano tai p̄eli jogvaiano tai rimei easo, maka rivu ver ala rivior napano jau kobe toro tai na mue toro, p̄eli kobe toro na vinauano tai, p̄eli kobe toro na mila korov tuboiano, p̄eli kobe toro tai na mila jaleleano. <sup>16</sup> Mia ver ala rivior napano ga amijikia ka komonmonea Kristo, mia kala re tibe ka na jau komimou, mia monoka kovamenea Atua napano naio mialso kabare ka Yesu Kristo siano naio toaso.

<sup>17</sup> Vonganei bogo na tibureiano naio jikar ruei, a mia riva rivokar na moti Atua kanano m̄aratavo. A romial ka napano naio mijikia rijamo ka bogokouo tealu amaluvo ea meuliano na kenerinio nalo kanalo, mia ver naio rila tibe na van nalo napano amonea, maka rejikia ka mia tuñabe ka nalo napano maka asidom amonmonea kiano Ioluano Vou? <sup>18</sup> Nina naio javukia iliano tai na niosi moruo na Ilimasouano nalo na m̄a naio berenio jibe nei, naio berinavo

*Toro na ajidomii aber naio memedu ruei, be vite jikili tai ka Atua mijikia rilarur naio.*

*Mia ver tibe na, kuvilavon kuvimidomii nalo na m̄a maka asidom Atua, abe tomu na kariano ga. Mia tuñabe kalo?*

*Ilimasou 11:31*

<sup>19</sup> Mo, ea vio nei never iliano telisu tai van kamiu napano Atua mijamo ka jogvaiano maluvo ka kamiu. Neber kamiu kuvitu bogo nonovio ka kuvila rivu van tomu nalo nonovio, a kamiu kuvidu kenemiu meuliano toa Atua jum̄ano. Naio naruei be Atua na jii vite nonovio, naio be Atua na biekouo

laka, naio be Atua napano romijikia rovarkar tiniedo rivu ea naio dam̄ariga.

## 5

*Iliano ba ban navuriñaraboiano nalo*

<sup>1</sup> Mo vonganei nojidom neverial jidomiano tealu rivan kamiu navigadeano nalo na lotuano. Kiniou be tinieku ka nabare ka neil van kamiu tibe nei, bior kiniou bunu nebe navigadeano tai, a mave ka naina, nobe nalo tai na m̄a numial Kristo ka mirememi bogo na naio bar jogvaiano nalo mave ea m̄akolkolo. A nemijikia batig bo ka kiniou bunu nove tai napano mia noto jouro ea mermerano nalo napano mia amolmoluo iorou, tenene na nemial bo ka nesian iliano nalo nei ka rijai kamiu.

<sup>2</sup> Nebika jikili ban kamiu jibe na, ka kuvitkar rivu taara na nunu nalo napano Atua barlo aju yetano ea vitikariano na kenemiu. Nina be buruñara im̄auano tai na, mia riano, maka rivu ka ver kuvitu kuvila napano kenemiu iviso maka sidom rilaio. Mia bo ka kuvilaiio vija jidomiano na saariano, jibe ka na Atua naio jidomio. Mia im̄auano venia na m̄a kuvila, maka kuvila rivior ga ijaiano telisu tai napano vede kuvijikia kuvario, mia monoka kuvila rivior ga jidomiano tai joa kamiu ber bo laka ka ala im̄auano nalo na rijai tomu dolu nalo. <sup>3</sup> A nalo napano m̄a ajua jumemiu ka kuvitkarlo, kuvila re ka kuvitu kuvilavon kuve boru na jikili vanlo, mia monoka kuvitukamu rivu kalo, kuvisiloglog m̄arabo vanlo, ka mia amijikia aue jaamiu. <sup>4</sup> Ver kamiu kuvin̄au rivu tibe na rivano, mia parinio toro na bitikar Atua kanano nunu nalo mia naio saaro rivior kamiu. Bogo na mia naio riyotuba bereio, mia naio rivitiri bulag kamiu tibe ka kiano parinio tubo nalo, mia naio riyovovua vatitig kamiu

napano mia kiano burum̃ara mi-amoiano na kiano mermerano mermeralii kamiu napano maka rijikia rivatove bogo tai.

### *Iliano ba ban kulo dolu nalo*

<sup>5</sup> Vonganei iliano biedu ban kamiu m̃eaku nalo. Nebika jikili den kamiu ka monoka kumisaaro ka kuvatove ka tormoruo nalo vija kenemiu navuriñaraboiano nalo. Iliano na jibe na kamiu kuviniu monoka kuviduio, bior ka napano naio bo ka bogo nonovio monoka rola bajago na vatoveano van kito. Naina jibe ka iliano tai napano Niosi na Ilimasouano naio ber nua ruei, napano berinavo

*Atua naio berbure bajago na m̃arouano,  
mia naio miija bajago na vatoveano.* *Ilimasou*  
*3:34*

<sup>6</sup> Tibe na, bo ka kito rala kiado jidomiano totano ka Atua bogo nonovio. Rodu kito rotua juñano, naruei ea kanano moroano mia naio mijikia vitiri bulag kito bereio bogo tai. <sup>7</sup> Kito ravat kiado bagaro nalo tua taakano, bior napano naio jidom kito toru laka, naio jaaro ka rijai kito.

### *Kuvitokovio ka Siñaro*

<sup>8</sup> Kiniou nojidom nover bunu iliano tai ka rilabon kamiu, ka monoka kuvitakar vatitig kamiu, monoka kuvitilubar m̃arabo kija. Kiado uolu nei Siñaro, naio joñã jelliv ea kito dam̃ariga, naio javukia burum̃ara temeul deden tai napano jijer naio toru kar namoneano nalo ka tumolu ser niadualo. <sup>9</sup> Mia kamiu kuvijamo ka re naio ka rila tibe na, monoka kuviekouo sikili ea kenemiu viekouoiano ka kuvitoko vio vatitig ka naio. A maka ve kamiu ga napano naio joñã milavon kamiu, mia kumijikia ruei ka kiado bilbilu dolu nalo miroano na aju jelliv ea yetemeriba, a jogvaiano nalo aju amiyotuba ealo bunu, naruei bo ka

kito roviniu rotumolu rotu sikili ka Siñaro naio tovulu re kito tai.

<sup>10</sup> Ierinio ka napano kamiu kumitu kumijog jaleleano kija ea bogo na, mia kanado Atua na tiniememiano nonovio mia rijai kamiu. Naio naruei napano bijauia bulag kamiu ruei ka mia kamlika Kristo joomo ea kiano mermerano, mia naio naruei napano mia ridururu kamiu vonganei. Mia kumemebiju re bunu, mia kuvikulul re, ana ea kiano moroano, mia kuvijikia kuvitumolu vatitig bereio.

<sup>11</sup> Tibe na, kito rovamenea kiado Atua, bior ka napano kanano moroano naio jo jovulu nono vite nalo, a mia naio to tovulu vanvan rijikia re bisi bogo tai, tibe na naruei.

### *Iliano na maaro*

<sup>12</sup> Kiniou nojoa vio nei bija kuroado novo nei Sailas, nojo nabalea naio ka vite miroano, a naio naruei miija kiniou bivitauia kar bulag kenemiu m̃esi nei. Nemijikia ka m̃esi nei naio bulati laka, neber vite telisuga, mia venia napano naio joa vio nei, nemijikia ka naio berial bajago novo nalo na tiniememiano na Atua kiano be riano, napano naio memedu ka kamiu ea vio napano kumituaio vonganei. Tibe na, kuvulukuio, kuvidu ka rijai kenemiu jidomiano, kuvitu sikili eao dam̃ariga.

<sup>13</sup> Nalo namoneano nalo na vio nei Romo, bija bunu Mak, napano nobur naio jibe ka keneriku ruei, aber kavijo bo p̃eli bogiano bo ban kamiu. Numitua vio na, numial bova kija, numijog jibe napano numitua burum̃ara komeli va na beamu nei napano abio ka Bapilon. Mia naio bo ga, bior napano numijikia ka Atua bijauia bulag kumemi ruei, nubija kamiu, kito rove kanano.

<sup>14</sup> Kanaku iliano maaro ga ea vio nei, neber bogo na kamiu kubinimei vio takurano, kuvila vorvoruano bo van kamiu, kuviniomniom kamiu tibe napano tiniemiu jijii kamiu.

A kanaku volkouano, ber  
tuñaroano novo na Yesu Kristo  
kanano naio jo bija kamiu kubiniu  
napano kube kanano.

Kiniou, Pitere.

## Mesi Juo Na PITERE Naio Bivitauiaio Verialiano Moti

*Tukunuano bulati na niosi nei*

Pitere kiano mēsi juo nene, Pitere bivitau ba ban namoneano nalo ea kiano bogo. Ea bogo na naverloglogiano nalo aju, napano kialo verloglogiano nalo maka rimemedu, a tomu nalo napano ajakisorlo aju ajibirbili ea kariano. Naruei Pitere berkakar ban namoneano nalo nei ka monoka avitakar vatitig ka tomu nalo na jibenei aviligviliglo re.

Mia ka atukovio ka bajago va nei, toro monoka rijikia vatitig Atua, a monoka rijamo ka Yesu Kristo, napano be kiado Tubo, rimei to tukamu ea kiado meuliano. Namoneano nalo ea bogo na, ajog ioluano vou ea tomu nalo napano amial Yesu ka miralo, a napano amijog kiano iliano, bogo na naio jo berloglog tomu nalo.

Pitere bivitauia mēsi nei ka ridu bulag namoneano nalo kialo jidomiano, bior napano ea bogo na, naverloglogiano nalo nei napano kialo verloglogiano maka rimemedu, aju aberial aber Yesu mia maka rijikia rimei bereio. Mia Pitere berinavo Yesu maka rimei vo bior napano Atua “maka sidom toro tai rivakovio. Naio jidom rudu bogo rivan tomu nalo nonovio ka amijikia aviliglo.” (3:9) A mia naio monoka rimei bereio vesiou re.

*Torogio nalo na niosi nei*

Iliano moti 1:1-2

Namoneano nalo kialo meuliano  
1:3-21

Naverloglogiano nalo bija kialo  
verloglogiano na maka memedu  
2:1-22

Yesu mia rimei bereio 3:1-18

*Iliano na be moti*

<sup>1</sup> Mesi nei, kiniou Saimon Pitere nebivitauia, jibe ka nebe Yesu Kristo

kiano naimāuano, a nebe kiano atevi. Nojo nebivitauia biedu ban kamiu napano kubokar viekouoiano ea naio bo laka, be verare ga ka kumemi nanua, nubakar beamu ruei. Naio naruei be Atua a be ioruriano na kiado robiniu, naio jo mila memedu bo ban kito damāriga. <sup>2</sup> Jibe na, nojidomial kamiu, kanaku volkouano ka mia kuvijikia vatitig Atua kiado Tubo napano Yesu na riva lie tibe na, vanvan rila napano kiano tiniememiano a tumāroano to rivujo ve toru ea kenemiu meuliano nalo.

*Yesu bio kito ka rove kiano*

<sup>3</sup> Yesu naio bijuku bo laka ban kito, napano ea moroano na mermerano a tinievuiano na kanano, naio bio kito ka rejikia vatitig naio tibe na. A bogo napano romijikia vatitig naio, naio ga rila vite nonovio ea kanano moroano lu nene ka rila Atua kanano meuliano a kanano bajago lu avujo lou ea kito. <sup>4</sup> Yesu naio mila ka napano roju robokar ijaiano novo nalo nei napano kirinovo laka, romial ka jakii memedu ga kiano verikariano nalo. A ea mārabo nene, romial ka napano naio mila kiado meuliano jo miasol meuliano lu na Atua kiano, a naio jo jian ban kito ka rovuro den niamiamo na sidomvovaiano nalo na yetemeriba nei.

<sup>5</sup> Bior vite na, kamiu monoka kuvukdeli ka rila kenemiu meuliano rimei rivu lie tibe na. Ea viekouoiano napano naio joa kamiu ruei, bo ka kuvijedu ka tinievuiano bereio. Ea tinievuiano nei, bo ka kuvijedu ka jikiaiano a masosouano. <sup>6</sup> Ea jikiaiano a masosouano nei, bo ka kuvijedu ka telanvuiano, a ea telanvuiano nei, bo ka kuvijedu ka jidomiano na tebievi, a ea jidomiano na tebievi nei, bo ka kuvijedu ka bajago lu. <sup>7</sup> Ea bajago lu nei, bo ka kuvijedu ka sidomiano, a ea sidomiano nei, bo ka kuvijedu ka tinietiano.

<sup>8</sup> Bajago novo nalo nei, ver atua kamiu, a ver atu ailuo lie damāriga,

mia kenemiu meuliano mijikia rivar m̄arati ve miroano napano aje-sei laka. Peli kamiu kumijikia kiado Tubo Yesu Kristo ruei, mia ver bajago nalo nei atua re kamiu, mia kamiu maka kuvijikia kuvila kanano iñauano na bo tai leleio. <sup>9</sup> Toro na jibe na, mirano mi-unu, maka rijikia rivitilubar vite, a kanano jidomiano bulati ga. Naio tiniene bobogia vatitig ka ajekon bulag kiano kariano moruo nalo, a maka bunu tinien rimaio ka naio joa meuliano vou tai ruei.

<sup>10</sup> Kiaku bilbilu nalo, maka rivu ka toro tibe na, mia nejkili ka kamiu kuveve terakurano monoka kuvukdeli dam̄ariga ka kuvila iñauano nalo na bo ka riverial ka Yesu naio bio kamiu ka kuve kanano, naio maka ve tena sibiano tai, a maka ve tena seresereiano ga tai, mia naio be tena riano tai. <sup>11</sup> Ver kamiu kuvitu kuvila tibe na, mia kuvijikia re kuvijoru bogo tai, a m̄aratavo na riva joomo ea Yesu Kristo kiano navenatuboiano napano naio be Tubo a Ioruriano na kiado, mia naio rivetavo ea batig van kamiu. Mia ala vorvoruano na bo van kamiu ka kuva kuvitu vija naio to toboto.

<sup>12</sup> Kiniou nemijikia ka iliano nalo nei, maka rive terivou van kamiu, bior kumitu kubokar batig bogo tebievi kija ruei. Mia maka nejkia notuvan ka napano monoka noto neververial ilirianiano nalo nei rivan kamiu ve vatelabo bogo nonovio. <sup>13</sup> Nina naio be iñauano na kanaku meuliano, ka neiila kamiu ka tiniemiu ribobogia re, a nemijikia ka napano mia monoka nala tibe na riva rivokar jukuti na kanaku meuliano. <sup>14</sup> Tubo Yesu Kristo naio berial ban kiniou ruei ber rivesiou re, mia notuvan ni-abeku nei navano, <sup>15</sup> mia beamu ka nina, nojidom nevitauia bulag vite nonovio batitig ruei tu. Tibe na, ver navano, mia m̄arabo naio jo ka kuvijikia kuvisidomiikar iliano nalo nei dam̄ariga.

### *Pitere kiano iliano bija atevi dolu nalo be riano*

<sup>16</sup> Kumemi atevi nalo nuberloglog kamiu ka kiado tubo Yesu Kristo mia naio rimei bereio vija kanano burum̄ara moroano. Tealo aberii verloglogiano nalo nene, aberinavo nina be iliano nalo na jidomiano na tomu nalo ga, p̄eli na aberinavo nina javukia tukunuano moruo re nua nalo, mia kumemi numijikia nuver memedu nuver maka tibe na, bior napano Yesu kanano moroano naio be vite na be riano napano kumemi numial ka mirememi ruei. <sup>17</sup> Nanua na, kumemi numitu bija naio memedu ka bogo na napano Atua Teta jian mermerano nalo na vio mave ajaio, abamenea naio, napano kanano iliano tai jaluvo mave batove, berii naio berinavo

“Nina naio be keneriku memedu napano tinieku jii naio toru laka, napano najaaro toru ka naio.”

<sup>18</sup> Kumemi naruei numijog joono na vio mave naio berial iliano nei, nina ea bogo na m̄a kumemi numitu bija Tubo mave ea burusuku lu napano na.

<sup>19</sup> Ana bior vite nalo nei napano numial p̄eli numijog, numijikia vatitig bo napano meravo bo ea kenememi jidomiano, ka nina be vite memedu nalo napano naverialiano moruo nalo na beamu aberialio. Kanalo iliano nalo ajibe ka yulu na bo tai ka merera ea vio na bobogio napano rojuaio, naruei bo ka rotu rovlukuio a roduio. Tibe na mia vetavo ea m̄arabo van kito riva rivokar bogo na legiano vou naio riyotuba ka kito, a Mejegi na kavijo rivavin rijivi ea kiado vio yauo ka rimererali kiado jidomiano.

<sup>20</sup> Mia kiniou nojidom never vite tai bereio ea tivelinio na verialiano nalo na naverialiano moruo nalo kialo, napano abivitauia joa niosi lu. Naio jibe nei, berinavo verialiano nalo nei, toro maka rijikia tumolu riverial river naio ga takurano mijikia vatitig nioti nene nalo.

21 Nina bior napano verialiano nalo nei, maka lele amaluvo den toro kiano jidomiano, mia Atua kiano Niununo naio miñau ea tomu nalo, naio jukamu kalo ka averial Atua kanano verialiano.

## 2

### *Naverloglogiano na jukujukuano nalo*

<sup>1</sup> Mia jibe ka na ña kito romijikia, ea bogo na naverialiano na bo nalo na beamu nei, bogo tealo naverialiano sibusibi nalo bunu ajumña amalmaluvo ea mirano Atua kanano tomu nalo. A mia mijikia tibe na ga van kito banei bunu, napano bogo tai, ñeli mia naverloglogiano sibusibi nalo amijikia ayotuba. A naverloglogiano na jibe na, mia avar parinio verloglogiano napano maka rive riano amei, mia amijikia averinavo amonea Tubo na vio mave, ka aver naio milarurlo, mia kialo verloglogiano nalo ajumña amildie naio bereio. Verloglogiano nalo nei amijikia ala lelan namoneano nalo kialo viekouoiano, mia verloglogiano sibusibi nalo nei maka ajikia avitilubar ka kanalo vironiano naio jo binimej soñeli biorlo rui.

<sup>2</sup> Nalo abova laka, a romimouo ka roverii venia na ña nalo ajumña amilaio. Naloaju aberenio aberinavo abe namoneano, mia amila ka bogo napano tomu dolu nalo abitilubar kialo bajago, ajumña amiyotel toru ea kiado ñarabo na iliriano. <sup>3</sup> Tomu nalo na sibiano nei, ajidom vite nalo toru, naruei amijikia avuku iliseseiano ve miroano van kamiu. Mia alavon ajukubin kamiu ea tukunuano nalo napano abujo ka vite nalo napano maka rive riano. Mia naio bo ga, Atua naio maka to rimonmelio. Naio jiburelo, naio mila batitig kanalo vironiano jororealo bogbe rui ju.

<sup>4</sup> Bo ka kito rovitilubar Atua kiano bajago na tibure tomu a na milarur toro ea meuliano na nanua beamu. Moti, kuvilavon ka kuvisidomial Atua kiano nailiano nalo

na beamu, napano tealo ajumolu amilavon ka atu loa naio. Naio maka riverenio maka ve titai, mia naio jumolu buk bulaglo vaarakurano abatove ea bulu joomo nalo na melijokouo ea sebi na lakoiano, ka atua vio na riva rivokar burumñara legiano na tibureiano na maariano.

<sup>5</sup> A kuvisidomial bunu tomu nalo na beamu nua laka nei, nina ea tormoruo Noa kiano bogo. Bogo napano naio jomña mioliolu ka Atua kanano bajago na memedu banlo, mia parilo jikili laka, maka asidom leleio ga. Naruei Atua mila burumñara ueimiya binimej buru bulaglo, mia Noa ga bija kanano ñaratavo aluo, naio milarurlo.

<sup>6</sup> A bereio, kuvisidomial burumñara komeli juo na Sotomo bija Komora. Atua mial kialo vovaiano nalo naruei naio misebikolo abe burumaroro ga naruei, a nina naio betavo ea venia na mia naio rila ka nalo nonovio napano ajua meuliano na bova.

<sup>7</sup> A na maariano ka rosidomial nalo nanua beamu, nina toro nei Lot. Naio be toro na memedu tai, a naio jo mijog bova damariga ea bajago na kiriniagiago nalo na tomu na ña amila korov tuboiano, napano naio jo iviso kalo. <sup>8</sup> Legiano nonovio ga naio jo mial kanalo meuliano va nalo, a naio jo mijog kanalo ioluoliano nalo, mia Atua naio mila jumñabe? Naio mije mauo ban kulo va nalo nei, mia naio milarur meuliano na kanano toro na bo nei, Lot.

<sup>9</sup> Naruei ver kito rosidomial vatitig ka nalo na, mia realeal Atua kiano bajago tai, napano jibe nei. Naio mijikia batitig jumñabe ka rivuku bulag kiano tomu nalo na bo ataluvo den lavoniano nalo, a naio mijikia rivokar sikili tomu na bova ka avar kanalo vironiano nalo. Mia naio rila avar ve tertelisu vonganei beamu vo, mia ea legiano na tibureiano mia avokar nonovio nana ju nene.

<sup>10</sup> Iliano nei ba ban tomu nonovio, mia jokol batitig nalo napanoaju ajakii sidomvovaiano nalo na bajago na kariano napano amoluo bijaio,

a jokol bunu nalo napano maka asidom aiagago, parilo jikili laka. Tomu kinkin na jibe na abe m̃arou ka kialo veribinio nei, a parilo toru laka ea kanalo vovaiano nalo, banbano maka bunu amerou ka vite tai, mia aju amil niegeniege Atua kanano kulo soḻi nalo. <sup>11</sup> Nailiano nalo na vio mave ajikili lie loa tomu nalo na, mia amijikia ka aju jukamu ea Atua mirano ea vio mave, mia amerou m̃ele ka ail niegeniege tomu nalo na, mia nalo na maka atibe nei, maka aial lerinio. <sup>12</sup> Vite miroano napano kito romial ka abe lu ḻeli abe soḻi m̃ele, mia tomu nalo na maka avitulubar leleio, aju amila lelan tolu nalo na. Kialo bajago nalo ajibe na, mila na ajibe ka temeul deden nalo ga, napano amila pariparilo ga, mia maka ala tonovo tai. Aju amiel janea vio jibe na banbano tomu nalo amilivi kalo amuebinvinlo, a mia tibe ga na bunu ban tomu nalo nei ga, aiilo ga ka aial kanalo m̃ariano.

<sup>13</sup> Tomu nalo na jibe na, ajidom ka ala kialo jokoluolu nalo na parilo selivivi ea vio nonovio legiano ga, a ea bogo na kuvila sinaniano lu nalo na kenemiu, nalo amei atu jouro napano kialo jidomiano nalo rivujo ka jogvuiano na kialo vovaiano nalo ga. Nalo ajibe ka tukei nalo ḻeli menko nalo napano amila lelan mokotene-miu novo nalo, mia maka asidomial leleio ka kialo vovaiano nalo mia ala nalo bereio ajog rivova m̃elea iorou.

<sup>14</sup> Miralo nalo bujo ka tira ka ala siakaiano, a ajum̃a ajidom asen kariano nalo rivan rivano maka niabelo mave bogo tai kanio. Ba loa, ajum̃a abur kamiu dolu nalo napano amijikiki aban bijalo, a abe tomu na aberlogloglo bunu bereio ka m̃arabo nalo na tinietii m̃elea vite nalo. Ierinio, nalo na abe taara tai napano Atua kanano siniabu na jikili mia naio riakonlo vatitig n avo!

<sup>15</sup> Ajuvan m̃arabo na memedu ruei aba ajum̃a ajajakisor m̃arabo na tertelisu nalo na m̃a romijikia rover ka be m̃arabo nalo na toro nei

Palam Peor kanano, napano Iliano Lu berii naio jibe toro tai nanua beamu be naverialiano tai, mia ba tinien jii m̃elea ka sen m̃ariesi nalo na vovaiano. <sup>16</sup> Mia kolvare ga, naio miilo manenea ka napano Atua miila togki na telisu tai mil ban naio bior kanano vovaiano nalo. Togki nalo maka ajikia ail, mia ninei naio mil jel ea toro joono, buriri kija kiano bajago vovu nalo nei.

<sup>17</sup> Tomu na bova nalo na m̃a nojo neberiilo na, nemijikia never bunu ka nalo ajibe ka bulumirano uei napano naio jabo ruei, napano toro na m̃a midoujer naio maka rijikia rileal uei eaio. Peli nalo ajibe ka mavo ḻeli vio melijokolo napano rojaaro kanio, reberiam̃a yuo rivovo, mia makanio, jegi miuvu bulagio bano. Mia tomu nalo na, kanalo vio na memedu tai napano be burumelijo laka jo kia na vo, nina ea vio na jogvaiano. <sup>18</sup> Mia monoka avar vironiano tibe na, bior ka napano niolo bujo ka sibiano nalo a ilivevaviniano nalo, napano jo buru m̃elea tomu dolu nalo kialo jidomiano. Tomu dolu nalo nei, aburo den yetemeriba vonga abinimei jouro maka vesiou, mia vonganei tomu na bova nalo nei ajum̃a aber iliano nalo na vaganiano na tinieiiano va na bajago na kariano napano joalo, mila binimei burutomoruo lie vo, naruei ea m̃arabo na aju aburvuru bulaglo bereio.

<sup>19</sup> Kanalo meuliano jo yetano ka moroano na toro na toru nalajano na kariano kanano ruei, ana jum̃abe ajum̃a amila sibilili tomu nalo ka aver atakisorlo, mia aleal meuliano na bo? Maka rijikia tibe na, bior napano moroano na jum̃abe naio jo be tubo ka kanamo meuliano, mia jau kobe kanano toro na im̃auano kiana, javukia nalo na, napano vonganei abinimei ajibe ka tomu na im̃auano na moroano na kariano kanano ruei.

<sup>20</sup> Ver be riano ka amileal Tubo Yesu Kristo kiado Ioruriano ea kialo meuliano nalo, abitulubar ka napano

bajago na yetemeriba nalo ajumã amila lelanlo, mila aburo den naio abinimei, nina naio bo laka. Mia ver bogo telisu ga na naruei aban bereio ea kialo meuliano napano ajaluvo denio ga abinimei, nina naruei bova lie laka. <sup>21</sup> Ver maka lele ajikia bajago na m̃arabo na memedu p̃eli bo kija ve telisu banlo, mia bogo napano amijikia batitigio bo ruei, amiel ea kija bogo bulati, kar na iorou kanio abar p̃iliglo aban bereio, naina bova laka. Atua kanano iliano lu nalo na m̃a ajan banlo, beamu ruei ajaaro ka adu ea kialo meuliano, mia vonganei aju abilig taakalo ka naio bereio.

<sup>22</sup> Tomu nalo na jibe na, iliano juo naio jo beriilo napano tai, naio ber jibe nei, berinavo

*“Kuli ga naio mijikia ba jen bereio sano juluoiano,” Ilimasou 26:11*

a juo nene naio ber jibe nei, berinavo

*“Ver jau kesekon batig kanamo bue, mia naio monoka rijaka riva rijokolke ea bulukinia bereio.”*

### 3

*Tube kiano bogu na toru ka naio rimeu bereio*

<sup>1</sup> Banalo, jibe ka napano kamiu kubitilubar ruei, nina naio be kanaku m̃esi juo nene nei na biedu ban kamiu. Venia napano joa kanaku jidomiano ka nevitauia buron m̃esi juo nalo nei, nojidom neverial iliano novo tealu napano mia amijikia avavavin ea kenemiu jidomiano tulaka ka rijai kenemiu meuliano nalo. <sup>2</sup> Nojidom never bo ka kamiu kuvitu tiniemiu maio dam̃ariga ka iliano nalo na naverialiano lu nalo re nua, bija bunu tuboiano vou napano kiado Tube Naioruriano naio jian ban kumemi kenemiu atevi nalo, ka kumemi never lilian van kamiu.

<sup>3</sup> Titai na be moti ka napano nojidom never naio jibe nei, ber

kamiu monoka kuvijikia ka ea bogu na maaro nalo, mia tomu na amiyotel ea Atua kiano im̃auano amijikia amaluvo. Tomu nene kanalo bajago nalo, ajumã ajidom venia ga napano nalo tinielo jiio, mia aju amiakurano ea toro dolu kanano jidomiano. <sup>4</sup> Vite tai napano mia amijikia atu avital ea kito rivior, naio be tivelinio na tubo kanano iliano napano naio berenio mia naio rimeu bereio rivior kito. Mia atumã avivika aver “Ana liliuano bereio nei napano kenemiu toro na toru berkario ban kamiu, nibe? Jikar ea bogu na korobido nalo binimei, vite nonovio ea yetemeriba aju aba bavarare dam̃ariga. Kumemi maka numial vite tai leleio kija vo, p̃eli kamiu ga kumialio?”

<sup>5</sup> Telikiti na m̃a aber iliano na, maka asidom tiniel rimaio ka napano Atua kiano verikariano nalo abe riano dam̃ariga, a kanano iliano be kiano burum̃ara moroano eaio. Javukia bogu na tiiano na yetemeriba, kanano iliano ga mila vio tiniabene jo, a mila yetemeriba bija borotano nene nalo a tei nene nalo.

<sup>6</sup> Mia iorou ka nina, kanano iliano bereio naio mila burum̃ara ueimiya jovuko yetemeriba nei bereio, napano burukon vatitig vite nonovio napano ajuaio ka bogu na. <sup>7</sup> A kanano iliano nene naio jo mir̃au vonganei kiana, naio jo bokar vatitig vio tiniabene a borotano na yetemeriba, ka atu rivian riva vokar bogu na sebi na toru ea legiano na tibureiano mia naio rimeu ka sisen bulag meuliano na tomu nalo na m̃a maka asidom Atua ea kanalo meuliano. Nina naruei be moroano na Atua kanano iliano, mia tomu nalo nei maka asidom ajikia.

<sup>8</sup> Mo bilbilu nalo, ea tivelinio na verikariano na Tube kiano bogu na rimeu ea bereio, bo ka kito tiniedo ribobogia re ka Atua naio maka vuluku yuka nalo p̃eli legiano nalo tibe ka kito. Ea Atua kanano vitiano, yuka menu takurano bija legiano tai abe veverare ga. <sup>9</sup> Peli tomu tealu be tinielo ka aber Atua jo jii liliano

laka ka rila venia na naio berkario, mia naio maka tibe na. Naio maka rivijuku kiki, mia jo mila kiano jidomiano ba tebievi laka, bior napano maka sidom toro tai rivakovio. Naio jidom rudu bogo rivan tomu nalo nonovio ka amijikia aviliglo.

<sup>10</sup> Be riano, bogo tai mia burumara legiano na Tubo kiano riyotuba ea yetemeriba. Mia rimej tavukia toro na bina, napano yetemeriba maka rijikia ka naio jo binimej, mia riilo ka ga napano binimej bokar vio ruei. Ea bogo na, ea vio yauo nalo na tiniabene asaraburuburu tavukia tubaalo, ana avakovio nonovio, a mia sebi sisen vite nonovio rivan riva vokar napano yetemeriba vija vite nonovio napano ajua naio, abisi.

<sup>11</sup> Naruei bior napano yetemeriba nei mia naio rimej kurano tibe na, kiniou nojidom nevika den kami, ka bogo napano kuvitu kea eaio, bo ka kuve tomu nalo na jumabe, a bo ka kami kuve lu ŝeli kuvimau Atua kanano tumabe? <sup>12</sup> Kami monoka kuvisaaro ka legiano na rimej, a ver kami kuvu, a kuvitu kuvimau sikili, mia kuvijikia kuvila riyotuba soŝeli.

Bogo napano naio rimej, mia sebi rivilvili ea vio mave, sisen kokoa nonovio, mia naio sisen vite nonovio na yetemeriba riiou bulagio. <sup>13</sup> Mia kito rotumolu rotu sikili ea kiano verikariano, napano naio berenio berinavo ve kiado vonuo vou tai, nina vio mave vou a yetemeriba vou, napano naio be burupati vio na bajago na memedu nonovio.

<sup>14</sup> Bilbilu nalo, nina naruei roju rorea naio ka rimej rivuru kito ravan ea vio nene, mia bogo napano maka rovokar vo, monoka ralavon ka rove lu, rotu romeravo, a rotua tumaro.

<sup>15</sup> Be riano ka Tubo naio maka rimej vo, mia kito ve tiniedo re ka naio bova, monoka rasaaro ka napano naio midu bogo ban kito ka rovilig kito, a jian buluvio ban bilbilu dolu nalo bunu ka amijikia

avokar ioruriano. Jidomiano na, kuruado novo nei Pol naio bunu ber ka kami ea mēsi tai beamu ruei, napano bivitauia bija masouano na bo nalo napano Atua jo jian banio. <sup>16</sup> Mia nina iliano nene kia ga napano naio jo jian ea kanano mēsi dolu nalo, bogo napano ver naio berii liliuano bereio na Tubo kanano.

Kiano mēsi nene nalo kirinovo laka, mia bogo tai kiano verloglogiano nalo teremi kija, mila na iliano tealoo napano naio bivitauiaio, tomu tai maka ajikia avuluku vatitigio. A bogo tai, tomu nalo napano maka ve parilo rivu, ŝeli napano maka ajikia vite nalo, abuluku abilivilig kiano verloglogiano ba be dolu bereio, javukia na mā aju amila ea iliano dolu nalo telabo ea Vivitauiano Lu nalo na. Mia bogo napano amila jibe na, mia ve re toro dolu napano mia naio rijog eaio, naio mila nalo ga aju aban ea marabo na laluvuiano.

<sup>17</sup> Kanaku bilbilu nalo, bior vite nalo na kiniou nojo tinieku maio ka kami julaka. Nemijikia ka kumijikia batitig vite nalo nei ruei, tenene na nojidom nesian iliano na jikili van kami bereio, ka monoka kuvitkar batitigio. Kuvijamo ka re jidomiano na sibiano na tomu nalo napano maka atakii Atua kanano tuboiano ka mia amei avuru bulag kami bereio. Maka rivu ka kuvijoru bereio den vio na bo napano kumitua jikili eaio ruei.

<sup>18</sup> Kanaku iliano na maaro, ber kami kumiluo kumei kumeruo bo ea bajago na bo nalo na tinie memiano a masouano na Tubo Yesu Kristo kanado Ioruriano kanano. Ana kito rejian meran mermerano van naio, vonganei, a ea bogo nalo napano aju abinimej, rivan riva ribisi deio, Mm.

Kiniou, Pitere.

**Mesi Moti Na  
JONE  
Naio Bivitauiaio  
Verialiano Moti**

*Tukunuano bulati na niosi nei*

Jone kiano mēsi moti, naio be kiano burumāra jidomiano juo. Nana beamu, ka ridu bulag namoneano nalo kialo jidomiano napano abuluku mēsi nei, ka bogo nonovio atu aiasol lo vatitig ka kialo jidomiano ve takurano ga, a ka aiasol lo vatitig vija Atua, a kenerinio Yesu Kristo.

Mia juo nene ka ilikakarło ka atakisor re naverloglogiano nalo napano kialo verloglogiano nalo maka rimemedu, bior napano naverloglogiano nalo nei amijikia ala bulag yimo lu ea kialo ilisibiano nalo, ana mia namoneano nalo maka bunu ajikia aiasol lo vatitig ea jidomiano ve takurano ga.

Naverloglogiano nalo na aju aberloglog tomu nalo, aber bajago va nalo amaluvo bior napano tomu nalo ajua yetemeriba, a aju amila vite nalo na yetemeriba nei, a vite na berial ka Yesu, napano Atua kenerinio, naio maka ve toro kario tibe kito. Nalo aju aberinavo ver Atua rilarur toro, toro nene mia maka bunu rijikia tinien maio ka meuliano na yetemenba nei bereio, a buru iakurano ver toro jibe na rila kariano ũeli rila re kariano, a buru iakurano ver naio tinienmīa toro dolu ũeli maka tinien riiaio, mia vite nalo na barei ga. Jone bivitauia mēsi nei, berial meravō napano Yesu Kristo be toro kario jibe kito. Mia naio ber kirisikili ber tomu nalo napano amonea Yesu, a tinielo Atua, nalo monoka tinielo titiilo bunu.

*Torogio nalo na niosi nei*

Iliano moti 1:1-4

Miamoiano bija meljokouo 1:5—  
2:29

Atua kenerinio nalo bija Siŕnaro kenerinio nalo 3:1-24

Niununo na burupati ilirianiano bija niununo na burupati ilisibiano 4:1-6

Toro kiano bajago na tinien jii toro 4:7-21

Bajago na moneano na mijikia tuvulu tulaka 5:1-21

*Toro na berial Atua kiano meuliano ban kito naio jo binimeī rui ea yetemeriba nei*

<sup>1</sup> Vite tai, re nua ea bogo na tiiano, mia vonganei ga na kiniou nomijog, a nemial ka miraku, nobitii batitig bo banbano-o na nojokol ka jumāku, vite nene siano jibe nei berinavo Burupati Meuliano na Maka Rijikia ribisi bogo tai, mo tenene na kiniou nejidom novivitauiaio van kamiu.

<sup>2</sup> Tenei, na nanua kito maka rejikia naio, naio jo ga naljuo Atua Teta o-o, mia vonganei ana miyotuba medave ea mirado ea yetemeriba nei rui, naruei kumemi miroano numialio, ana numiturnā nuberialio ka tomu nalo. <sup>3</sup> Numijog memedu ka burutiliniememi, a numialio memedu ka mirememi, naruei numisidom nuerial ka kamiu ka mia kamiu bunu kuvijikia kumoneaio. Ver kamiu kumonea, mia kuvijikia kumei ve takurano rivija kumemi, tibe ka kumemi nube takurano bija Atua teta a bija kenerinio Yesu Kristo rui. <sup>4</sup> Tena mila burumāra saariano joa kumemi damāriga nei, a ver kamiu kuvidukar batitig iliano nei na mā nojidom nover ka kamiu ea mēsi nei, mia burumāra saariano nei toa kamiu bunu, ana mia rila kito roviniu rojog rivu ve toru laka.

*Atua naio be burubati na miamoiano*

<sup>5</sup> Iliano na Atua kenerinio midu ban kumemi, ber monoka kumemi nuverial ka tomu dolu nalo, naio jibe nei berinavo. Atua naio be burupati na miamoiano, maka lele

kiri melijokouo tai ritoaio. <sup>6</sup> Tibe na, ana ver kito rotumã roverial ka kito robe takurano bija Atua, mia rojumã romila bajago na melijokouo keano vo, nina rojumã romila sibi ga na, kito maka rotumã rala tena be riano. <sup>7</sup> Mia ver rotumã reiel damariga ea miamoiano na mã Atua naio joaio, mia naio rila ka rotua natinie takuraniano na bo tulaka vija kito, ana mia reial ka kenerinio Yesu, kiano burukija naio mijikia to sekon kito romeravo ka kiado kariano nalo.

*Ieliano ea miamoiano na Atua kiano: Monoka rotuvan nonovio bajago na kariano*

<sup>8</sup> Toro na mã jo mila bonua, ka ber maka ve na bova tai toa kiano meuliano, kiano iliano nei naio maka rive riano leleio, naio jomã mila sibilili naio bereio. <sup>9</sup> Mia ver kito roverial ga kiado kariano nalo, mia Atua naio riviekokoa kito, mia naio rivar bulag kiado vovaiano nalo den kito, rila kito romeravo. Naio ga mila batitig m̃arabo ka mia naio rila tibe na ruei, a romijikia ravarkar tiniedo ea naio ka mia naio rila van kito rivare ga napano naio berkario. <sup>10</sup> Mia ver kito rotumã rala bonua, roverinavo kito maka mã rala kariano tai, nina jibe ka rober Atua naio be sibiano ga, a romila jibe ka napano kanano ilirianiano novo, maka bunu rodu to vatitig ea kiado meuliano leleio.

## 2

<sup>1</sup> Keneriku nalo, nojidom novivitauiã iliano nalo nei van kamiu ka riija kamiu ka kuvitilubar ka bo ka mia kamiu monoka kuvila re bunu kariano bereio. Mia ver bogo tai, toro tai rila tena bova tai, kito monoka tiniedo rimãio ka Yesu Kristo naio ju rorea ju, jibe ka toro lu tai ka rivar kiado iliano. Naio kiri memedu, a naio meravõ, ka mia naio mijikia riva sikili tua Atua Teta mirano rimemedu, ka mijikia rivika denio ka naio tinien riia kito, a riviekokoa kito. <sup>2</sup> A m̃arabo na ka mia Atua riviekokoa kito naio

jibe nei, nina be Yesu ga na, bior naina be jokoluolu ka mia rivar bulag kiado kariano nalo, kito tomu nalo nonovio na yetemeriba nei.

*Ka reiel ea Atua kiano miamoiano: monoka romonmonea kanano tuboiano nalo*

<sup>3</sup> A ver toro tai rivika tibe nei, riverinavo: ?Kiniou maka najikia, kiniou nojo nomijikia batitig Atua, p̃eli na maka noto nojikia batitig naio rivu? ?Kiniou nobe kanano, p̃eli na maka nove kanano? Ver tibe na, bo ka rovika den naio bereio, roverinavo: ?Jumãbe, jau kojomã komonmonea kanano iliano nalo, p̃eli na maka kotoã komonmoneaio? <sup>4</sup> Nina bior ver toro tai naio riverenio river naio mijikia batitig Atua, a naio be kanano, mia naio maka tomã rila vite nalo na mã Atua kanano tuboiano nalo aberenio, toro na naio maka to river riano na, naio mila sibi ga na. <sup>5</sup> Mia toro na mã jo monmonea batitig Atua kanano iliano nalo bo, naio jo berial ka naio jomã tinien jii naio riano, tinien jii naio jo binimei lie vo bogo nonovio. Naruei ea m̃arabo nalo na jibe na naruei, kito romijikia rejikia batitig ka kito robe Atua kanano riano. <sup>6</sup> Toro na ber naio be Yesu kanano, mia kito monoka rejikia reial ka naio miaia Yesu ea kiano meuliano.

<sup>7</sup> Banalo, ea tivelinio tai, tuboiano na mã nojo nobivitauiã ban kamiu naio maka ve iliano na terivou na vonganei ga na, mia naio be iliano tai na beamu mugaruei, naio be Atua kanano iliano na mã kumijogio mugaruei. <sup>8</sup> Mia ea tivelinio dolu nene, be riano bunu, ka tuboiano nei, naio jibe ka naio be terivou laka ban kito, bior rojumã romial kanano miamoiano naio jo mila melijokouo naio jomã buru didig naio bano, ana naio jo buru yulu riano binimei ruei. Naio jibe ka ga ea Yesu kiano meuliano ruei, a vonganei naio jo binimei jibe na bunu ea kiado meuliano nalo, ana naio jo mila kito

robitilubar ka iliano vou nei naio riano mugaruei.

<sup>9</sup> A verver toro tai naio tomãa river naio jomãa miel ea miamoiano ruei, mia romial ka naio jomãa jermãi ka kuruano, jomãa mila bova kanio, toro na naio jo keano vo ea melijokouo.

<sup>10</sup> Mia toro na tinien jii kuruano, mila bo kanio julaka, toro na naio jo miel ea miamoiano ruei, naio maka bunu riel vovu ea melijokouo mia naio to rijoru re bereio bogo tai. <sup>11</sup> Mia naio na mãa jo jermãi ka kuruano, naio maka tibe na. Naio jo keano vo ea melijokouo, melijokouo mila jibe ka mirano miunu, naruei naio jomãa miel vovu ea vio bobogio damãariga, naio maka rijikia rivitilubar batitig kiano mãarabo, naio maka rijikia vio na mia riagago sel eaio.

*Ka reiel ea Atua kiano miamoiano: maka rejikia tiniedo tii yetemeriba nei*

<sup>12</sup> Kamiu keneriku nalo, kamiu kanaku solbouo nalo ea kiado mon-eano, kiniou nojomãa nobivitauia iliano nalo nei biedu ban kamiu bior kamiu naruei napano Atua karamãado naio biekokoa kenemiu kariano nalo kar Yesu Kristo siano, mila kumijikia naio.

<sup>13</sup> Kenemiu kulovu nalo, kiniou nojo nobivitauia iliano nei ban kamiu bior kamiu naruei kumijikia batitig naio lie ruei, napano naio meul jo beamu mugaruei, beamu ka tiiano na yetemeriba nei.

<sup>14</sup> Kenemiu m̃eaku nalo, kiniou nojomãa nobivitauia iliano nalo nei ban kamiu bior kamiu naruei na mãa kumisikili bo, kamiu kumidu batitig Atua kanano iliano joa kenemiu meuliano ruei, a kumitovulu toro na kirivova na ruei.

<sup>15</sup> Kiniou nojidom never tibe nei ka kamiu nonovio, ka mia tiniemiu tii m̃ealea re yetemeriba nei, bija kanano saba nalo. Toro na mãa tibena, naio maka rijikia tinientii vatitig karamãado. <sup>16</sup> Naina bior saba nalo na yetemeriba nei, p̃eli na kiano bajago nene nalo, abe kiri

dolu, maka atibe ka saba nalo na karamãado Atua kanano vija kiano bajago nene nalo. Vite nalo na yetemeriba nei nalo ajibe nei, abe burupati na nasidom m̃ealea vite nalo, abe burupati na mãa abur mirado, a abe burupati na varvariano na kiado meuliano nalo.

<sup>17</sup> Yetemeriba nei, vija kanano saba nene nalo na mãa tomu nalo ajumãa ajidom m̃ealea julaka, naio jo barlaka ban ka mia rivakovio ga mia toro na mãa jo mila memedu ka Atua kanano sidomiano, naio to tobo to.

*Ka reiel ea Atua kiano miamoiano: monoka rovitikar rivu uolu nalo*

<sup>18</sup> Keneriku nalo, vonganei kito rojua bogo maariano nei ruei, mia jibe ka na mãa kumijog ruei, toro napano siano Jermãii ka Kristo, naio mijikia riyotuba ea bogo nene. Maka reial naio vo, ana kito rojekar ka romial sermãiano sesa ea Yesu nalo telabo ruei, naruei mila na robitilubar ka mia vesiou re, mia legiano na maaro rime. <sup>19</sup> Uolu nalo na mãa nojomãa noberiilo na, kamiu kumijikia kiana. Beamu, nalo aju bija kito iviso ka kito, mia iorou ana ajumolu, ajuvan kito aburo den kito bereio. Vonganei, robitilubar batitiglo, ka nalo maka amei ve takurano rivu vija kito, bior ver maka, mia atu rivu vija kito kia navo. <sup>20</sup> Mia kamiu na mãa kumitu bo kia navo, Toro Lu Kristo naio mioako kamiu ruei, naruei kamiu kubitilubar kanano ilirianiano, mia maka kuvijikia kuvitaluvo den naio bereio. <sup>21</sup> Kamiu kuver re ka kiniou nojidom neil van kamiu rivior jidomiano tai na berinavo kamiu maka kuvijikia vite, bior naio maka tibe na. Kiniou nomial ka kamiu kumijikia kuvitii veve masosoua ilirianiano a iliano na be sibiano mugaruei, kumijikia batitig ruei ka ilisibiano maka rijikia riyotuba ea ilirianiano, naruei kiniou nojidom neil van kamiu ka notunukakar kamiu ga.

<sup>22</sup> ?Ana venia naruei be ilisibiano na m̃a dolu nalo na m̃a ajum̃a aberialio? Naina be iliano nam̃a berenio jibe nei, ber Yesu naio maka ve Naverikariano na Atua miila naio binimei ka rilarur yetemeriba nei. Iliano nei naio be iliano na toro na siano Jerm̃ii ka Kristo ga, a toro na m̃a ber iliano nei jibe na, naio jom̃a miitava ea Atua Teta, a jom̃a miitava ea kenerinio. <sup>23</sup> Toro na m̃a bilig taakano ka Atua kenerinio, Atua maka rijikia toa naio, mia toro na m̃a berial batitig bo ka ber naio midu Atua kenerinio ea kiano meuliano, mia Atua bunu rimonmon ga to vija naio dam̃ariga.

<sup>24</sup> Ioluano Vou na bo nanua kamiu kumijog be moti ruei beamu, naina naruei be iliano na bo a be riano, naruei bo ka kuvidu batitigio to rivu ea kenemi meuliano. A ver tibe na, mia kenemi meuliano mijikia to rivu vija Atua a kenerinio bogo nonovio, <sup>25</sup> naina naruei kumijikia kuvokar meuliano na m̃a naio berkario ka mia sian van kito, na mia maka rijikia ribisi bogo tai.

<sup>26</sup> Naina ga nojidom nover ka kamiu ea tivelinio ka nalo na m̃a aju amila sibilili kamiu, napano ajidom avuru kamiu kuan ve dolu bereio. <sup>27</sup> Kristo naio mioako kamiu ruei, a Niununo Lu na kumijeivio ruei ka bogo na naio jo kia ga kamlika vo. Naio mijikia riverloglog kamiu ka saba nonovio na be riano a memedu, mo kamiu kuvilavon re ka kuvisirago toro dolu ka riverloglog kamiu ka saba tai bereio. Mia kamiu kuvilavon ga tibe ka na Niununo Lu naio berloglog ka kamiu ruei, na m̃a naio ber bo ka na kamiu kuvidu batitig kenemi meuliano to rivu ea Kristo tulaka.

<sup>28</sup> Naina naruei, keneriku nalo. Verenio kiado meuliano naio to rivu ea Kristo nam̃ariga, mia maka rejikia rojog rivova ka bogo na ver mia naio riyotuba ka kito bereio. Mia ver maka, mia ve burum̃ara kenieno imouiano, mia rosidom rodu van mirado ka bogo na raial naio to

rime. <sup>29</sup> Kito romijikia ka Kristo, kiano bajago nonovio naio bo a kirimemedu tanea, naruei toro na naio bunu jibe na, romijikia rover ka kema na bunu naio be Atua kenerinio javukia Kristo.

### 3

#### *Kito robe Atua kenerinio*

<sup>1</sup> Kamiu kuvisidomii von tinietiano na Atua Teta kanano na ban kito tomu na bova. Naio tinien jii kito toru laka-o mia, banbano-o na mila ban kito jibe ka na kito romial kito robe kenerinio nalo ga. Mia maka ve kito ga na ramial kito jibe na, bior naio bunu, naio buru kito robinime jouro ea kiano m̃aratavo ruei, jibe ka kenerinio nalo memedu ga. Nalo dolu nalo na yetemeriba nei nalo maka ajikia batitig karam̃ado vo, jibe ka na m̃a kito romijikia naio, naruei vite na mila na nalo maka ajikia kito bunu, ka kito robe kenerinio nalo. <sup>2</sup> Kanaku bilbilu nalo, romijikia rover vonganei kito robe Atua kenerinio nalo, mia maka rejikia vo, ka iorou kanio, mia naio rila kito romei rove vaio ga bereio. Mia be titai ga romjikia batitigio. Bogo na Tubo Yesu Kristo rime bereio, mia rovitikar naio ka mirado rimemedu, mia rovitilubar naio garui memedu, mo bogo na reial naio tibena, mia romei rotibe ka naio ga. <sup>3</sup> Naruei toro na sidom ka mia naio tai na mia rime tibe ka Tubo Yesu tibe na, naio monoka to rivokar vatitig rivu kiano meuliano rimeravo a rive lu, tavukia Yesu ga.

#### *Kito Atua kenerinio nalo: monoka rotuvan bajago na kirivova*

<sup>4</sup> Toro na m̃a mila kariano, naio jom̃a mila korov Atua kanano tuboiano, bior burupati na bajago va, naio be bajago na maka sidom rimonmonea tuboiano. <sup>5</sup> Mia bogo na Yesu naio binimei ea yetemeriba nei, naio binimei napano maka kariano toa naio leleio, naruei naio binimei ka rivar bulag kiado

kariano nalo. <sup>6</sup> Tibe na, toro na m̃a kiano meuliano jo bo ea Yesu, mia ve re bunu kariano tai toaio, mia naio rivijuku rivova re bunu. Mia toro na m̃a kariano joa naio julaka, naio maka rivitii Yesu vo, naio maka rijikiaio vo. <sup>7</sup> Kanaku kiritete sesa nalo, maka rivu ka mia nalo ala sibilili kamiu. Toro na ver kiano meuliano bo, naio be tor memedu javukia Kristo. <sup>8</sup> Toro na kanano meuliano bova, naio be Siñaro kiano toro, na naio be burupati na kariano ea yetemeriba nei jikar ea kiano tiiano binime i bokar vonganei. Bajago va na Siñaro nei kiano naio mila na Atua kenerinio miyotuba ea yetemeriba nei, ka ruekon bulag kanano im̃auano na bova nalo a ka rila kanano burum̃ara moroano naio ribisi. <sup>9</sup> Toro na jo jouro ea Atua kanano m̃aratavo, mia naio rila re bunu kariano, bior Atua kiano meuliano joaio ruei. Naio be Atua kenerinio, naruei monoka naio rivar karam̃ano kiano bajago na bo nei, ana naio maka bunu rijikia rila na bova. <sup>10</sup> Ea m̃arabo nei naruei kito romijikia ka rovitilubar batitig ga kei na be Atua kenerinio, a kei naio be Siñaro kenerinio. Toro na maka rila rimemedu p̃eli na toro na maka tinien tii kiano m̃aratavo, toro na jibe na naio maka ve Atua kenerinio leleio.

*Kito Atua kenerinio nalo: Monoka romonmonea tuboiano na tinietii toro dolu*

<sup>11</sup> Ioluanu navm̃a kamiu kumitum̃a kumijog mugaruei jikar ea burupati binime i, naio jibe nei, na m̃a naio berenio ber kito monoka tiniedo titii kito rivu bogo nonovio ga. <sup>12</sup> Kuvisidomii Siñaro kanano toro na nanua beamu na, Ken, na naio maka tinien tii batitig kuruano kar garuei Epel, naio muebinio m̃aro. Maka rivu ka kito rala tibe na, mia bo ka rosidomii ka venia na naio mila jibe na? Nina bior kanano im̃auano nalo, Atua mialio abova ga, mia kuruano kanano,

nalo amemedu bo, mia Atua naio jaaro kanio, tenene na mila na Ken mijoku m̃ele ka kuruano nei Epel, naio tinien jerio, ana naio muebinio m̃aro.

<sup>13</sup> Kiaku bilbilu nalo, bajago bova na jibe na, tomu nalo ajum̃a amilala mugaruei binime i bokar banei, naruei maka rejikia reiilo ver reial ka nalo amijoku ka kito bunu, a ajerm̃i ka kito bior Atua kiano im̃auano novo nalo na ver romim̃aukanio. <sup>14</sup> Mia kito na m̃a kito maka m̃a reserm̃i ka toro, mia tiniedo tii kiado m̃aratavo nalo rivu, nina be m̃arabo na mila meravo ka rojuvan m̃ariano, robinime i ea meuliano ruei. Mia toro na tinietiiano maka toa naio, naio jo keano ea m̃ariano vo. <sup>15</sup> Toro na m̃a jerm̃i ka kiano m̃aratavo tai, naio jibe ka toro na muebin toro m̃aro ruei, a jibe ka na romijikia ruei, ka toro na m̃a muemue toro, meuliano na maka ve jukuti nene naio maka toa naio leleio.

<sup>16</sup> P̃eli kito tai naio jom̃a bika ber, ana tena m̃a ajum̃a aber, tinietiiano, na naio be tena jum̃abe? Mo kito romijikia tinietiiano na be riano jibe na: Yesu Kristo mijamo ka momou kiano meuliano bior kito, a ver tinietiiano na toa kito, mia kito bunu rajamo ka kiado meuliano rivior kuruado nalo. <sup>17</sup> Toro tai, naio jum̃ano bujo ka saba novnovo nalo, mia kuruano tai naio maka ve kiano saba tai, naio jum̃ano bulati liki. Mia naio bitilubar kia ka kuruano nei jibe na, mia naio mila kiano iviso jikili lie vo kanio, naio maka sidom riijaio, Toro na jibe na, Atua kanano tinietiiano maka toa naio leleio.

<sup>18</sup> Kanaku tete nalo, kiado tinietiiano naio monoka ve re iliano ga. Tinietiiano na be riano, naio maka ve tena ververenio ga, mia be tena roim̃aukanio a ve tena ralaiio. <sup>19</sup> Ana ver kiado tinietiiano rivokar batitig jeleigio nene tibe na, naio mila m̃arabo na rejikia ka Atua kanano iliano naio bar m̃arati ea

kiado meuliano. Ana tibe na, romijikia rojog rivu ga ka rava vaataro ka Atua, romerou ka naio re bunu. <sup>20</sup> Mia bogo tai ana mia romerou ka naio, bior kiado jidomiano ga tibure kito bereio, rila na rotũa rosidomial bere kanado vovaiano, mia Atua naio mijikia nonovlo binu rui, a kiano viekokoano naio buru tomoruo laka, naio bar bulaglo den kito rui. <sup>21</sup> Banalo, a ver tiniedo nalo ameravo rivu, mia nalo maka ajikia atibure kito bereio, rila na maka lele romerou ka romei rotumolu rotua Atua ka rovika vite den naio. <sup>22</sup> Ver romonmonea naio, a rotũa rala tena naio ga jidomio, mia romijikia rovokar vite venia na mña robika denio. <sup>23</sup> Atua kanano tuboiano ea kito naio jibe nei, ka ber: kito monoka romonea kenerinio Yesu Kristo siano, amonoka tiniedo titii kito bogo nonovio, tibe ka na naio ber ka kito. <sup>24</sup> Toro na mña naio monmonea Atua kiano tuboiano, naio joa Atua, mia Atua naio joa kanano iviso. ?Mia romijikia rejikia ka naio joa kiado iviso jumabe? Tena, Niununo na naio jian ban kito, naio mila romijoglubar ka vite nei be riano laka.

## 4

*Kito Atua kenerinio nalo: monoka ravitkar uolu nalo na Kristo kanano a bajago nalo na yetemeriba*

<sup>1</sup> Banalo, ver toro tai ver Niununo Lu joa naio, mila na naio jomña berial kanano iliano, bo ka kamiu kuvitii veve vatitig niununo neibano joaio, be riano ka be Atua kanano, pñeli na maka ve Atua kanano. Kito monoka rovitii vatitig rivu, bior be naverialiano sibilibi miroano aju aban janea yetemeriba nei rui. <sup>2</sup> ?Ana mia kito romijikia rovitii niununo na tumabe? Romijikia rovitilubar Atua Niununo bior naio jomña berial ber Yesu Kristo naio binime be toro, naio binime miyotuba ea yetemeriba nei. <sup>3</sup> Mia ver niununo tai tomña river re tibe na, niununo

na naio maka ve Atua kanano. Niununo na jibe na naio miyotuba ea uolu na Kristo kanano, na mña kamiu kumijog mugaruei ka naio jo binime, pñeli naio joa yetemeriba vonganei rui. <sup>4</sup> Mia keneriku nalo, mia kamiu kumerou ka re naverialiano sibilibi nalo na, bior kumitu tivelinio ka Atua, kumijikia kuvituvul ga. Be riano ka mugaruei, naina joa kamiu naio jikili lie loa ka na naio jo yetemeriba nei. <sup>5</sup> Tomu na sibiano na, nalo abe tomu na yetemeriba nei, a iliano nalo namña aju aberenio amolmoluo ea jidomiano na yetemeriba nei, a kulo dolu nalo na yetemeriba nalo ajomña amiagago kalo. <sup>6</sup> Mia kito namoneano nalo, kito maka rove tomu na yetemeriba nei, robe Atua kanano. Toro na naio mijikia batitig Atua, naio jaaro ka riagago ka kito, ana na nana naio maka ve Atua kanano, naio maka sidom riagago ka kito. Ea mñarabo nalo na naruei romijikia rovitii lubar ka niununo na iliano na be riano, a niununo na ilisibiano.

### *Bajago na tinietiano*

<sup>7</sup> Banalo, bo ka kito tiniedo riia ea kito tulaka ga, bior ka tinietiano naio be Atua kanano bajago. Toro na tinien jii toro, naio be Atua kenerinio, naio bar bajago na Atua kanano memedu, a naio mijikia batitig Atua bo ea kiano meuliano. <sup>8</sup> Toro na mña maka tinien tii toro, naio maka rijikia Atua vo, bior ka Atua naio be burupati na tinietiano. <sup>9</sup> ?Ana kito romial Atua kanano burumñara tinietiano nene ea bogo na vabe? Kito romial kiano tinietiano nene ka bogo na naio miila kenerinio takurano mñanono garuei naio binime ea yetemeriba nei, ka mia rila ka mia kito romeul. <sup>10</sup> Naina naruei be tinietiano na naio be riano laka. Naio maka na mña kito tiniedo jii Atua, mia nina na naio tinien jii kito, banbano-o na mijamo ka kenerinio binime mila sida ka rila merevuiano ka kanado kariano nalo.

<sup>11</sup> Banalo, jibe ka namã Atua naio tinien jii kito, naio bijuku bo ka kito julaka, bo ka kito bunu monoka tiniedo titii kito tulaka, rovijuku rivu ka kito. <sup>12</sup> Toro maka lele rial Atua, mia ver rotumã tiniedo titii m̃lea kito, mia reial ka na Atua naio joa kiado iviso, a bajago na kanano tinietiiano mia naio to rimei ve toru lie vo tulaka ea kanado iviso momou nalo.

<sup>13</sup> Kito romijikia ka Atua naio joa kiado iviso, a kito roju bo ea kanano iviso, bior naio jian Niununo memedu ban kito, ka rila ka rojogluar ka tenei be riano. <sup>14</sup> Ana robitilubar bunu ka be riano ga ka Atua Teta naio miila kenerinio nene naio binimei ka rive ioruriano na yetemeriba nei, jibe ka na romial ruei ka mirado a bunu ka na m̃ rojumã roberial janea vio nonovio. <sup>15</sup> Toro na m̃ jo berial ber Yesu naio be Atua kenerinio memedu, Atua joa kanano iviso, a naio joa Atua kanano iviso bunu. <sup>16</sup> Kito ramijikia rejikia vatitig ka Atua naio tinien jii kito, bior ka romijikia rojog batitig ea kiado meuliano nalo, mia kito romijikia romonea kanano iliano na m̃ naio berial ban kito.

Atua naio be burupati na tinietiiano, mia toro na bajago na tinietiiano binimei mison batitig kiano iviso, naio joa Atua kanano iviso, ana Atua bunu joa kiano iviso. <sup>17</sup> Atua naio jidom rila bajago na tinietiiano to rimei ve toru lie tulaka ea kanado meuliano, ka rila ka kiado bajago na yetemeriba nei na tavukia Kristo kanano na nanua na. Naruei ver kanado bajago naio rimei rivu tibe na, mia naio rivu laka rivan kito, bior ka mia kito romerou re a roimou re ka legiano na tibureiano na naio jo binimei. <sup>18</sup> A ver toro tai rimerou, naina bior naio mial kanano vironiano tai jo binimei, mia naio maka rijogluar ka na m̃ Atua kiano tinietiiano naio mila batitig kanano meuliano ruei. Mia bajago na tinietiiano na bo naio mijikia rijil deven merouano

na burutomoruo nei, rivanvano-o ribisi.

<sup>19</sup> Verenio kito rotumã tiniedo tii toro dolu, naina bior Atua naio tinien jii kito beamu ruei. <sup>20</sup> Toro na m̃ jo ber naio tinien jii Atua, mia naio jo kia ga m̃ jerm̃ii ka kanano m̃aratavo tai, naio jomã milasibi ga. A ver naio maka tomã tinien tii kiano m̃aratavo neibano naio mial ka legiano nonovio ga, naio maka rijikia tinien tii Atua na naio maka lele rial kija naio. <sup>21</sup> Kristo kiano tuboiano napano ban kito naio jibe nei, ber toro na m̃ jidom ka naio be toro na m̃ tinien tii Atua, naio monoka tinien tii vatitig bunu kanano m̃aratavo.

## 5

<sup>1</sup> Mia toro napano naio monea ka Yesu naio be Naverikariano, toro na naio be Atua kenerinio riano. Ana verenio Atua kenerinio nei naio riverenio riverinavo naio tinien jii Atua kiano Teta, ana na naio monoka tinien tii Atua kenerinio dolu nalo bunu. <sup>2</sup> ?Mia naio rijikia ka naio tinien jii batitig nalo tumãbe? Verenio naio tinien tii Atua, a naio rimonmonea kanano tuboiano nalo, mia naio rial ka na m̃ naio jomã tinien jii Atua kenerinio nalo memedu ga. <sup>3</sup> Bajago na tiniedo tii Atua naio jibe nei: kito robokar batig kiano iliano. Kanano tuboiano nalo maka ave temi laka van kito ka ralaio, <sup>4</sup> bior kito rabe kiritete nalo namã romiyotuba ea Atua, mia ver kito rotumolu rotu sikili ea kiado viekouoiano, kito robe tomu na ratovulu yetemeriba nei ruei. <sup>5</sup> Kiniou nebika den kamiu bereio: ?Toro na mia tovulu yetemeriba nei, naio be kei? ?Naina ga napano naio jumolu jo jikili ber ka Yesu naina be Atua kenerinio memedu.

<sup>6-8</sup> ?Mia jumãbe ka kito romijikia ka Yesu naio be Atua kenerinio? Tomu tolu aberial iliano nei ban kito: tai naio be Niununo Lu, tai naio be uei, a tai naio be burukija, a nalo tolu nene, aberial jibe ka iliano

takurano ga. Uei naio berenio bajago na Yesu Kristo kiano, ka napano naio miyotuba yetemeriba nei jibe ka venia, a naio bokar varueiano jumabe, mia romijikia rovitilubarario ka naio be Atua kenerinio. Mia maka naina ga, mia burukija bunu naio ber bajago na Yesu kanano bereio, napano naio m̃aro jumabe, mia romijikia rovitilubarario ka naio be riano. Ana mave ka naio bereio, Niununo Lu, napano kanano iliano naio be riano julaka, naio berialio kiri meravo ban tomu nalo re nua ea miralo bunu ruei. <sup>9</sup> Mia iliano nalo nam̃a Niununo Lu berialio nalo temi laka, tibe na monoka romoneaio, bior naina naio maka ve kulorinio kanano iliano, mia naio be Atua kiano ilivervisivisiano, ka naio mial kenerinio jibe venia. <sup>10</sup> Toro na m̃a monea Atua kenerinio riano, mia iliano nalo nei aju jikili bo-o ea kiano jidomiano napano naio maka sidom dedeio ka bereio, mia toro na maka rimonea Atua kenerinio, naio maka rimonea vite napano Atua ber bisivisii ban kenerinio, naio jibe ka napano naio mial Atua, ber naio mila sibi ga. <sup>11</sup> Ana iliano napano mia kito monoka rotumolu rotu sikili ea bogo nonovio, naio jibe nei, ber: Atua naio jian meuliano napano maka ve jukuti nene ban kito, ana burupati na meuliano nene miyotuba ea kenerinio ga. <sup>12</sup> Toro na m̃a Atua kenerinio joa kanano meuliano, naio bokar meuliano ruei, mia naina Atua kenerinio maka toa kanano meuliano, naio maka rivokar meuliano nene vo.

*Iliano na maaro: Meuliano na maka ve jukuti nene*

<sup>13</sup> Kiniou nojo nebivitauia m̃esi nei biedu ban kamiu na na m̃a kamiu kumonea Atua kenerinio siano ruei, ka rijai kamiu ka kenemiu jidomiano veve juo re, mia ka kuvijikia rivu ka kubokar meuliano napano maka ve jukuti nene. <sup>14</sup> Bogo na maka tiniedo veve juo, romijikia rotumolu rotu sikili ea naio, naruei vite venia na rovika

den naio rimemedu ka kiano sidomiano, mia naio rijog kito. <sup>15</sup> Naruei ver kito romijikia batitig ka naio mijog kito ruei, romijikia rejikia vatitig bunu ka vite napano kito robika denio, robokar ruei.

<sup>16</sup> Ver kito reial kuruado tai napano naio jom̃a mila kariano, napano kar-iano nene maka ve toru laka, maka ka toro rim̃aro riviorio, p̃eli ka rivuru bulag tomu den Kristo bereio, romijikia robolkouo van naio, ana mia Atua mijikia jaamo ka naio to joomo ea meuliano ga. Mia maka kiniou never bo ka kito robolkouo ka toro na m̃a mila buruñara kariano bova, bior ka napano kariano tealó abe tena m̃ariano ga, ana ver toro tai rila, mia maka rejikia rever titai bereio. <sup>17</sup> Vite nonovio na amila bova naio be kariano, mia kariano tealó ga abe tena m̃ariano, mia tealó maka ave tena m̃ariano.

<sup>18</sup> Mia kito romijikia ruei ka toro napano naio binimei be Atua kenerinio ruei, p̃eli kariano na maka ve tena m̃ariano p̃eli be tena m̃ariano, maka ka mia naio rila bereio. Mia toro na jibe na monoka naio rivitikar batitig naio, naio rivel ea vatitig kiano meuliano, naruei Toro na Bova nei naio maka rijikia rila bulag naio bereio. <sup>19</sup> Yetemeriba momou nei naio jotano ka moroano na Toro na Bova nei kanano, mia kito namoneano nalo, romijikia ka robe Atua kanano ga. <sup>20</sup> Kito romijikia ka Atua kenerinio naio binimei, naio jian vitilubariano ban kito ka mia rejikia Atua napano naio be riano, ana kito rojua ga naio naruei, vija kenerinio nene nei, Yesu Kristo. Kanado Atua nei naio be riano, mia meuliano na naio jian ban kito naio maka ve jukuti nene.

<sup>21</sup> Keneriku nalo: Kamiu kuvitikar vatitig kamiu rivu, mia kuvilotu ka Atua nei naio takurano ga tulaka, kuvijamo ka re tavoru dolu nalo amei ka adu jeleig naio ea kenemiu jidomiano nalo.

Kiniou, Jone.

## Mesi Juo Na JONE Naio Bivitauiaio Verialiano Moti

### *Tukunuano bulati na niosi nei*

Jone kiano mēsi juo nene, naio bio bere naio ber naio be “Navagadeano,” ana naio bivitauia ba ban “tira tai na Atua bijauialar naio” a bija “kenerinio nalo”, mia romijikia ka naio berenio ga “yimo lu bija kiano namoneano nalo.” Mesi nei ber kalo ka nalo tinielo titiilo, a berkakar banlo ka monoka avitakar vatitigio, ka naverloglogiano nalo na kialo verloglogiano maka rimemedu amei re ala bulaglo ka kialo verloglogiano sibusibi nalo.

### *Torogio nalo na niosi nei*

Iliano moti 1-3

Namoneano nalo monoka tinielo tii tomu nalo 4-6

Iliano na ilikakariano ban namoneano nalo 7-11

Iliano maariano 12-13

### *Iliano na be moti*

<sup>1</sup> Kiniou tormoruo navagadeano, nebivitauia mēsi nei biedu banso, javukia tira tai napano Atua bitirlarso, a ea kenerimo lu nalo. Kiniou najaaro toru laka ka neviviuo kamiu ea mēsi nei, bior ka kiniou tinieku jii kamiu toru laka, mia maka kiniou ga ve takurano, mia namoneano dolu nalo bunu nalo aju tinielo maio ka kamiu dañariga. <sup>2</sup> Kito roju tiniedo titii kito jibe na bior Atua kiano ilirianiano naio joa kanado meuliano ruei, a mia naio toa kito rivano-o na maka rijikia ribisi bogo tai.

<sup>3</sup> Kiniou nobolkouo ka kamiu, ka tiniememiano, tinieiano, a tumāroano binimei den Atua karamādo, vija Yesu Kristo na naio kenerinio, a joa kito, mila na bajago na ilirianiano a tinietiano naio jo

binimei burutomoruo lie ban kito dañariga.

### *Takii bajago na tinietiano dañariga*

<sup>4</sup> Kiniou nejidom neverial vanso, ka namial kenerimo tealoo ea vio nei ruei, mia najaaro toru laka ka nemial ka nalo aju amiel ea bajago na ilirianiano bo laka, javukia na Teta naio ber ka kito. <sup>5</sup> Nena, kiniou nemial tenei, naruei nojidom notunukakar kamiu bereio, ka kumonmonea kanano tuboiano nei napano robokario nua ea burupati nene ruei. Tibe na, maka never vite vou tai van kamiu, neberial iliano tealoo ga, ka kito monoka tiniedo titii kito dañariga. <sup>6</sup> Ver kito rosidom rala tibe na, māarabo nene naio jibe nei: monoka romonmonea Atua kanano iliano. Ana kanano burumāra tuboiano napano naio jo beamu ruei binimei bokar vonganei, romijog naio ber jibe nei ber: kito monoka reiel dañariga ea bajago na tinietiano.

<sup>7</sup> Tomu na juboluboiano miroano, aju aban ea vio yetemeriba nei ruei ka avilig tomu nalo kanalo jidomiano. Nalo ajumā aberinavo Yesu naio be toro tai ga jibe ka kito, maka ajidom ka tomu nalo amonmonea ka Yesu naio be Naverikariano na naio binimei ea Atua ka rilarur kito. Tomu nalo na jibe na, abe tomu na māa amilavon tomu, a nalo abe tomu nalo na Kristo kiano uolu kanano. <sup>8</sup> Tibe na, ana mia kamiu monoka kuvitakar vatitig kamiu rivu ka iliano kinkin nalo na jibe na, ka mia kuvilaluvu re bereio meuliano na bo napano numila vio jikili ka ban kamiu. Monoka kuvitumolu kuvitu sikili dañariga, ka na mia kumijikia kuvokar momou ijaiano novo nonovio na kenemiu iorou. <sup>9</sup> Toro na tumolu, riviako loa rivatavio den burusio, rimonea re bunu verloglogiano nalo na Kristo, naio maka bunu ve Atua kanano. Mia toro na jo bo dañariga jouro ea ilirianiano na

kiado, Atua Teta bija kenerinio ajoa naio.

<sup>10</sup> A vere kamiu kuvial ka nalo tai rimei riyotuba kean kamiu, mia naio maka toña riverenio iliano nalo na memedu takii kanado, kamiu kuvilalar naio rivan bereio. Kamiu kuvuru re naio riva joomo ea kunuemi, a kuviluku re naio to vija kamiu, <sup>11</sup> ver ðeli, na kuvitu kuvijakar naio ka rila kanano imãuano na bova nei rivavin na.

*Iliano na maaro*

<sup>12</sup> Iliano miroano na jo ka neverenio, mia maka nosidom nodu toa mñesi. Mia nalavon ka neviedu ga neial kamiu ka mia rejikia reil vatitig van kito ea mirado ga. Ver naio tibe na mia naio rivu laka, mia rila kito nonovio romijikia rojog rivu ve toru laka.

<sup>13</sup> A kuluemo dolu na, napano Atua bitirilar naio jibe ka jau, a kenerinio nalo bunu ajua vio na, ajumã aberenio aberinavo Atua milivu ka kamiu.

Peli naina ga na kiniou nejidom neverenio, iliano bisi ga ea vio na.

## Mesi Tolu Na JONE Naio Bivitauiaio Verialiano Moti

*Tukunuano bulati na niosi nei*  
Jone kiano mēsi tolu nene, naio bio bere naio ber naio be “Navagadeano” ana naio bivitauia ban toro tai, siano Kaeas, napano be navurum̄araboiano tai ea yimo lu. Naio miaia Kaeas bior napano naio jo mijai namoneano nalo, a berkakar banio ka takisor re bajago na toro va tai napano siano Diotreves.

*Torogio nalo na niosi nei*

Iliano moti 1-4

Navagadeano miaia Kaias 5-8

Navagadeano milkuei ka Tiotrivis 9-10

Navagadeano jaaro ka Dimitrius kiano bajago 11-12

Iliano maariano 13-15

*Iliano na be moti*

<sup>1</sup> Kiniou tormoruo navagadeano, nebivitauia mēsi nei ka riviedu vansom, kuruaku Kaias. Peli kito tealo ajum̄a amiliaso kija, mia kiniou nojidom nover kaso never kiniou najaro toru ka neviviuoso ea mēsi nei, bior kiniou tinieku jiiso toru, jakii bajago novo na ilirianiano na Tubo kanano.

<sup>2</sup> Kanku bibilu novo, nemijikia ka jau kojom̄a komijog bo dam̄ariga napano kanamo meuliano naio jo bo ea Atua jum̄ano ruei, mia nojom̄a nobolkouo kaso julaka, ka kanamo im̄auano nalo atu aiel rivu, a ka ve re mieiano tai ka rila bulag mokotename. <sup>3</sup> Vonganei maka vesiou laka vo, ana kuruado nalo tealo abinimei aboru ea vio nei, ana nalo ajukunu ban kiniou jum̄abe ka jau kojom̄a kajakii Tubo kanano ilirianiano, a jau kojom̄a komila kanano im̄auano novo nalo banbano-o na tomu nalo abitilubar ka kanamo meuliano naio

memedu riano ga. Kanalo veriiano nei naio mila tinieku jaaro-o mia jaaro toru laka. <sup>4</sup> Maka ve todolu tai napano mia mijikia rila kiniou nojog rivu tibe nei, mia bogo na ga nomijog ka keneriku nalo aju ajumolu aju jikili ea Tubo kanano ilirianiano, naina naruei namial bo laka.

*Kaias naio be toro tai na m̄a amijikia ka abarkar tinielo ea naio*

<sup>5</sup> Kiaku bilbilu na bo, siva toru banso ka im̄auano nalo na m̄a jau komila ka mijai nalo na m̄a aju amial bija Ioluano Vou na bo, na abiedu aboru ea kamiu. Nalo abiedu jibe ka na nalo abe valauo ga, naruei tealo maka asidom avitikarlo, mia jau komijuku bo toru laka banlo.

<sup>6</sup> Nalo abinimei aberialio ea mirano namonea nalo na lotuano na vio na ruei, aju ajukunu ka kanamo im̄auano na bo na kanamo tinietiano. Naruei tomu ta bunu abiedu bereio aju kamliko vonganei, naruei nebika denso ka jau kajailo bunu. Ana vere ala nonovio im̄auano ribisi, mia bo ka ver kamiu kuvitii kiri titai ve telisu ka riijailo ea kanalo m̄arabo, tibe ka na memedu ka ala van toro na mila Atua kanano im̄auano. <sup>7</sup> Nalo na, amiel bior vite na ga, ana bogo na m̄a aju aba amioliolu ban nalo na m̄a maka amonea vo, nalo maka atu asidom ka nalo na monoka avitikarlo ka vite tai, bior nalo maka ave namoneano vo. <sup>8</sup> Mia kito namoneano nalo, tenei joa kito ka rajailo. Bo ka kito rotunukakarlo, a roikurkarlo, ka rila ka mia kito bunu reiasol vijalo, kito nonovio robe tomu na romim̄au vei ka Tubo kanano ilirianiano.

*Tiotrivis naio bitikar lotuano maka rimemedu*

<sup>9</sup> Peli jau komijikia ka kiniou nebivitauia mēsi tai bior vite na ban namoneano nalo ea lotuano ruei, mia Tiotrivis nei, napano naio jidom ka naio rive tubo kalo, naio maka rivitilubar kiniou, naio maka sidom riagago ka kanku iliano, naio jokovio ka Tubo kanano im̄auano

napano m̃a kumemi numitu numila.  
<sup>10</sup> Naio jom̃a mil m̃ele, a jom̃a ber iliano telabo na bova ii kumemi, naio mila sibi niegeniege kumemi toru laka. A maka ve iliano na bova ga, mia be im̃auano na bova bunu, bior bogo na m̃a Atua kanano tomu nalo amiyoyotuba ka kamiu, naio maka sidomlo, naio ber avan bereio ga. Mia mave ka naina, bogo na kam tealó ka kamiu, kubitikar nalo, kumijailo ka ala im̃auano na abinimei kario, mia kema nei naio jumolu buk bulag kamiu den lotuano bunu. Vite nalo nei na m̃a naio jo mila nei naio maka rimemedu na, mia bogo na kiniou neviedu nomiyotuba kean kamiu, mia roviniu rava vio takurano ka roverii ka mia rala venia van naio. <sup>11</sup> Kanaku bilbilu, nojidom never kaso ka kema nei mila kirivova kaso mia maka rivu ka rila jau bunu, jau kala rivova van naio bereio. Monoka kito rovijauia re bajago na bova ga, mia bo ka rovijauia bajago na bo. Toro na m̃a mila bo ban toro dolu, naio be Atua kiano toro riano, mia toro na m̃a mila bova ban toro dolu, naio maka rial Atua vo, naio jo koalabo kia ga vo.

*Dimitrias naio be toro na bo laka tai*

<sup>12</sup> Mia Dimitrias nei, naio mia rii-jaso. Tomu nalo tinielo ea naio, nalo aberenio aberinavo naio mim̃au bo laka, mia Atua kanano iliano naio jom̃a berii bajago na joa kanano meuliano, berinavo abo laka. Mia kiniou bunu nemial naio be toro na bo tai, ana nemijikia ka jau komon-monea kanaku iliano, ka monoka never ve riano ga vanso.

*Iliano na maaro*

<sup>13</sup> Vite miroano na ka never kaso aju kiano vo, mia maka nosidom nevivitauiá toa m̃esi von-ganei. <sup>14</sup> Mia nojidom ka mia neviedu neial kamiu rivesiou re, naruei mia romijikia rovitii mirado, reil van kito.

<sup>15</sup> Tum̃aro to vija jau Kanado bilbilu nalo na ea vio nalo nei aberen aberinavo Atua milivu kaso. Aiou

koig, jau kover ka kanado bilbilu nalo aviniu na m̃a kumitu na, ka mia Atua riilivu bunu ka kamiu.

Peli naina ga na kiniou nojidom noverenio, iliano bisi ea ga vio na.

## Mesi Napano JUT Bivitauiaio Verialiano Moti

*Tukunuano bulati na niosi nei*

Jut kiano mēsi, naio jirio ea bogo na naiolioliano miroano bija naverloglogiano nalo aju, napano aberinavo amonea Yesu, kialo verloglogiano maka memedu mia. Naruei bior vite nei naio milikakar namoneano nalo, ka monoka avitkar vatitigio ka tomu nalo na jibena ala sibilililo re. Mesi bulati nei, kiano jidomiano vaataro varei ka Pitere kiano mēsi juo nene, napano ber namoneano nalo monoka avokar sikili bajago nei na moneano napano Atua jian banlo, na mia to tobo rivano-o maka rijikia ribisi.

*Torogio nalo na niosi nei*

Iliano moti 1-2

Bajago bija verloglogiano na Naverloglogiano nalo napano maka rimemedu, vija vironiano napano mia avokario 3-16

Iilaboniano na Moneano nalo 17-23

Iliano maariano 23-25

*Iliano na be moti*

<sup>1</sup> Kiniou Jut, nebe toro na m̃a neminau Yesu Kristo kanano, a nebe Yemesi kuruano, kiniou nebivitauiā mēsi nei biedu. Nojuvan binimeī ban kamiū, tomu nalo na m̃a Atua karam̃ado naio bio kamiū ruei kube kanano, napano naio tinien jii kamiū toru, ka napano kumitutano ka Yesu Kristo kanano vitikariano novo. <sup>2</sup> Kanaku volkouano ber tinieiiāno, tum̃aroano a tinietiiāno amei avujo lou ea kamiū, atu amei ve toru lie dam̃ariga.

*Mesi nei naio ka tivelinio na nalo na m̃a abilig niegeniege Atua kanano iliano*

<sup>3</sup> Banalo, beamu kiniou nejidom nevivitauia mēsi tai van kamiū ka

neverial jidomiano tealo ea tivelinio na ioruriano novo na m̃a kito nonovio robokario, mia vonganei ga iliano tai binimeī bokar kiniou jelea kamiū, naruei namial ka monoka nevivitauii vite dolu naruei.

Kiniou nomijog jibe vite tealo abova kija, tenena nejidom never ka kamiū ka kuvitumolu kuvitu sikili, kuvisikili ka p̃irimiū rivalo ka kuvokar vatitig kiado moneano. Kiado moneano nene, Atua naio jian binimeī ban namoneano lu re nua vaarakurano ruei, naruei maka ve tena aje bukua p̃eli aiasol dolu tai mave kanio bereio. <sup>4</sup> Ana vite na m̃a nomijog, namial jibe ka tomu nalo na m̃a abinimeī ajusol ka kamiū, nalo amijejebukua kiado moneano ruei. Nalo na, maka amemedu ka atusol kamiū, abinimeī bena ga, maka asel ea morouo, mia vonganei aju bija kamiū ruei. Nalo na abe uolu na kanado lotuano, nalo maka asidom Yesu Kristo napano naio takurano be toro na toru, a naio be kanado Tubo. Atua berenio berinavo, ea kanano tiniememiano, naio jaaro ka riviekokoa kito ka kanado kariano nalo, mia nalo nei abilig kiano iliano bereio, aju aberinavo ver tibe na, amijikia ala kariano venia napano ajidom, naio maka ve titai na, mia Atua riviekokoa nalo ga na. Iliano na kiriniagiago laka, mia nalo na m̃a ajum̃a aberenio, Iliano Lu berkar kanalo vironiano beamu ruei.

*Tomu na bova nei monoka aje vironiano*

<sup>5</sup> Bo ka kamiū kuvisidomii von nalo tealo na m̃a amila kirivova jibe na, naruei Atua mije batitig kanalo vironiano banlo. Tukunuano nalo na aberloglog batitig kamiū kanio ruei, mia p̃eli tiniemiū bobogia ruei, ana mia never bereio van kamiū.

Nana be moti nene, naio be kulo Israel nalo napano m̃a aminau kurano ga Ijivi beamu. Atua naio milarur burum̃ara taara nei, naio buru bulaglo ea vio Ijivi, mia karina

nalo miroano abilig taakalo kanio, mia naio mue bulaglo ga amãarmãaro.

<sup>6</sup> Ana juo nene, naio be nailiano nalo na mĩa ajua vio mave beamu. Atua midulo ajua vio novo tai na naio loa laka ruei, mia nalo maka asidom, ajidom ka atua jeleigio bereio, ana mila na naio miorkakarlo ka mñarimieni nalo napano maka ajikia ataluvo denlo bogo tai. Naio mila batitig jelelo dolu tai ea burumelijo, naio buk bulaglo aba ajaiao banbano bokar bogo na burunãara vironiano na legiano na maaro.

<sup>7</sup> Mia tolu nene, naio be kulo Sotomo, bija kulo Komora, bija tomu nalo na komeli dolu nalo na vaataro kalo. Nalo bunu ajavukia nailiano nalo na, kanalo jidomiano nalo bavavin laka. Nalo maka atakii bajago na memedu na mĩa Atua naio midu joa kito, mia ajumĩa amila napano sumãano nalo ga aju abur sumãano bereio, ana sidomiano kiriniagiago nalo na jibe nei naio bavavin toru ealo bogo nonovio. Mia monoka rosidomii vatitig rivu ka venia napano naio miyotuba ka nalo. Burumãara sebi na jijenlo, naruei aju abokar vironiano vo ea sebi dolu napano maka rijikia rivatove bogo tai.

*Tomu va nalo nei nalo aban kirivova tanea*

<sup>8</sup> Ana tomu na bova nalo na abinimei aju kamlika na, nalo na bunu aju amila kariano na jibe na. Nalo mĩa aju amial vite na bova nalo ea kanalo monovovuano, mia venia na mĩa amialio, ajidom aimãaukanio. Nalo amila vite na bova nalo ka niabelo, nalo abukular ga iliano na toro na mĩa jidom ril vanlo, ajumĩa abital bova ea moroano novo dolu nalo na mĩa maka rejikia reialio. <sup>9</sup> Mia moroano dolu nei naio maka ve tena royotel rivijaio. Mia remijikia reial ka napano parinio nailiano Maikel, bogo na mĩa jo mila baravo bija Simãaro ka ber kei ka naljuo nei mia rudu Mosis mokotenano, mia naio

maka ril vova vanio. Vede tiniedo ka mia memedu ka river iliano na jikirkili p̃eli na iliano siniabu nalo, mia maka riverenio, berenio ga ber “Atua na loa laka mia naio ril vanso navo.”

<sup>10</sup> Mia tomu nalo nei, amil kirivova a amil siniabu ea vite nonovio ga. Vite na mĩa amijikia p̃eli na mĩa maka ajikia, mia aberiio kirivova ga. Jikiaiano na mĩa nalo amijev, naio be verare ga ka jikiaiano na temeul, ka napano vite venia namĩa naio mijog ka rila, bo p̃eli na bova, mia naio mila ga. Bajago bova nalo namĩa ajumĩa amila, naio mila kanalo verloglogiano nalo abe tena sibiano ga, maka amemedu, maka ajikia atumolu leleio.

*Tomu va nei nalo amila niege-niege imãauano nalo na lotuano*

<sup>11</sup> Nalo ajumĩa amiel ea mñarabo na mñariano nei napano Ken re nua naio miel eaio, bior napano naio jermĩ ka kuruano. Ana tomu na bova nei, amidulo ajua vio va nei napano Naverialiano Pelama na beamu naio midu naio joaio, bior ka napano naio ber iliano napano maka rimemedu ka rijev puruveru eaio, naruei kanano iliano nei mila Atua kanano tomu nalo aba amilotu ka atua dolu. Mo tai bereio, amijoru abatove abakovio ea p̃ili na borotano nei napano Kora re beamu ba bakovio eaio. Nina ea bogo na borotano napano naio jo jikili jua naio buruþe, bior naio mil die navurimãaraboiano napano Atua naio bitirilario.

<sup>12</sup> Bogo na kamiu kubinimei vio takurano ka kuvila sinaniano na tinietakuraniano nalo, mia tomu nalo na, nalo aju jibe ka baramĩa tai napano naio joluku yetano ea tei, napano ver uako tai va vaataro laka kanio mia riva rivavin eaio. Nalo amila bulag ga semiu sinaniano nalo, napano ajen mĩlea janea vio reraio, amun ba amilaluvu pariparilo, amila uetubaiano toru laka,

a maka asidomial toro dolu, maka aialerinio ea titai.

Tomu na jibe na nalo ajibe ka melijo na mā jegi midulo miuvio barlaka ga bano, naio maka sian yuo ea kiado tiniavio nalo. Nalo ajavukia buruiesi tai napano ajelar menunū naio jo, bior napano naio maka rivar māarati. <sup>13</sup> Nalo ajibe ka tei napano naio jo mikulkulu toru, karina naio jo buk niamniag bija soro nalo abavin ea vio medave. Ajavukia māaritano nalo na mā aburo ea buluniogovu yauo mave, napano aju bogo bulati ga karina aba kovio bereio, aban bo kovio ea buruñara melijokouo ea vio na bobogio.

*Naverialiano nei Inok re nua naio joma berii ruei tomu nalo na jibe na*

<sup>14</sup> Kuvisidomii von naverialiano tai bunu na tormoruo Inok re nua nua laka, napano naio be togio na terati aluo napano amoluo ea Atam. Naio berii tomu nalo na jibe na naruei, napano ber jibe na, ber “! Kamiu kuvitikarlo! Mia Atua na loa laka naio rimej rivija taamaka na nailiano lu nalo na kanano, <sup>15</sup> ka atibure kulo va nalo na amila kariano napano maka amonmonea naio. Mia sian vironiano vanlo rivior imāuano va nalo na kanalo veribinio, a bior kanalo ilisiniabu va napano abuku ea mirano.”

<sup>16</sup> Nalo na na mā abinimej aju bija kamiu, iliano na naio memedu ga ka nalo, bior ka napano abe tomu na vukuleleano, abe tomu na amilidie vite nonovio, abe tomu na mā ajidom nalo ga, a abe tomu na mā amil vevavin ka iliano nalo na tortoru. Mia ver nalo asidom ka avokar vite tai ea kamiu, monoka kuvitikar vatitiglo, bior abe tomu na niosesei, a abe tomu na ilinovoiano bunu.

*Naiagagoano nalo bunu ajumā aberii tomu nalo na jibe na*

<sup>17</sup> Mia kamiu, kanaku bilbilu nalo, bo ka kamiu kuvitumā kuvisidom bunu venia napano mā naiagagoano

nalo na Tubo Yesu Kristo kanano ajumā aberenio ka mia riyotuba iorou. <sup>18</sup> Nalo ajumā aber ka kito aberinavo “Ea bogo na maaro, mia tomu nalo ayotel rivova ea imāuano na Tubo kanano rivija kanano tomu nalo. Mia ala pariparilo, mia ala ga venia napano kanalo sidomiano va nalo ajidom.” <sup>19</sup> Tomu nalo na jibe na ajumā aber aberinavo kanalo taara ga naio bo, aberinavo nalo ga amimāu ea Niununo, mia kin-iou nejidom neverial van kamiu ka nalo amimāu ea ga jidomiano na yetemeriba nei ga, Niununo Lu naio maka toalo leleio.

*Iliano na tunukakar namoneano riano nalo*

<sup>20</sup> Mia kamiu, kanaku bilbilu nalo, bo ka kenemiu imāuano nalo ea kanado moneano lu naio jo bavin lie damariga. Monoka kubolkouo damariga ka moroano na Niununo Lu. <sup>21</sup> Kuvidu vatitig kamiu to damariga yetano ka Atua kanano tinietiano, kuvitu melumu ka kuvisirarago ka Tubo Yesu Kristo ga, rivin napano naio, ea kanano tinieiano, rivuru bulag kamiu kuvan ea meuliano napano maka ve jukuti nene.

<sup>22</sup> Toro na mā jo tiniene beve juo, kuvija naio ka kanano jidomiano rimej sikili rivu bereio. <sup>23</sup> Telabo na jibe na ajumā ajua tivelinio ka bulukusebi, vaataro ka atibirbil ea ruei, mia kuvila soḡeli ka kuvuru bulaglo, kuvilrurlo. Bo ka tiniemiu riia tomu nalo, mia tealō napano abova laka mia kumerou kija kalo. Kariano nalo a niamiamo va nalo na kanalo naio jokol kialo meuliano momou a mila bulag kanalo bajago nonovio, a jua niabelo reraio, mia monoka kuvja kalo, kuve bilbilu re vijalo.

*Iliano na maaro: Volkouano na vameneā Atua*

<sup>24</sup> Kito ravameneā Atua, ka napano naio mijikia rivokar batitig kito ka mia rojoru re, rivin rivano-o naio rivuru kito rava rotumolu rotu

ea kanano mermerano lu, napano  
kanado meuliano naio meravo bo  
ea mirano, mia rovokar buruñara  
jogvuiano.

<sup>25</sup> Kumemi nubameneaso Atua,  
napano jau ga takurano kobe  
najoruriano. Numidular siamo, bior  
moroano, sikiliano, a tuboiano abe  
kanamo ga. Numiaiaso maluvo jelea  
Yesu Kristo Tubo na kenememi, jikar  
ea bogo nalo na beamu rui binime  
bogar vonganei, rivan rivano-o to  
tobo to, mm.

Kiniou, Jut.

## NAVISIPEIANO Napano Jone Mialio Ana Bivitauialario Verialiano Moti

### *Tukunu bulati na niosi nei*

Niosi nei, vite nalo na Kristo bisipeio ban Jone, napano siano na bulati nene “Navisiþeiano,” Jone bivitauiaio. Naio berii visiano nalo napano Yesu berialio ban naio. Naio bivitauia ka bogo napano tomu na Romo amila kirisikili laka ban namoneano nalo, a aju amuebivinlo, bior ka amonea Yesu Kristo. Jone bivitauia niosi nei ka ridular kialo jidomiano nalo, ka asikil atu sikili ea bogokouo nei.

Ea niosi nei, be visiano nalo na Yesu berialio ban Jone. Naio berii jamerijiano nalo ka namoneano nalo ea bogo na amijikia ajoglubar nioniag nalo nene. Mia tomu dolu nalo maka ajikia avokar nioniag nene. Kialo burupati jidomiano na jamerijiano nei jibenei. Yesu Kristo, naio be Atua Soþi, a be kiado Tubo, a ea juþano, Atua mia vudobi vatitig Siþaro vija kiano uolu dolu nalo. Bogo na naio rila nonovio iþauano nei, mia naio sian vuliano van kiano tomu nalo napano ajikili aju kirisikili ea kialo moneano. Mia naio rivurulo ava atu vija naio ea tiniabene vou bija ea yetemeriba vou napano naio mila vatitigio rui aju.

### *Torogio nalo na niosi nei*

Iliano moti 1:1-8

Visiano moti bija mþesi nalo napano ban ea yimo lu aluo 1:9—3:11

Niosi napano be lu ka toro visio bija niajebijo aluo 4:1—8:1

Simeduo nalo aluo 8:1—11:19

Mermu bija temeul juo napano naljuo abova 12:1—13:18

Visiano dolu nalo napano Jone mialio 14:1—15:8

Dise aluo napano abujo ka Atua kiano tiniamimiano 16:1-21

Atua mila bulag bulukomeli nei Babilon a juvulu temeul nei napano bova, a naiolioliano sim-sibi, bija Siþaro 17:1—20:10

Atua jibure tomu nalo ea legiano maaro 20:11-15

Tiniabene vou bija yetemeriba vou, bija Yerusalemo vou 21:1—22:5

Iliano maariano 22:6-21

### *Verivisivisiano na niosi nei*

<sup>1</sup> Niosi na be visiþeiano ka venia napano mia naio riyotuba ea legiano nalo napano mia amei navo. Atua naio jidom ka kanano tomu na iþauano nalo na yetemeriba monoka ameravo rivu ka vite nalo nene, naruei, jian jikiaiano nene ban Yesu Kristo, karina Yesu naio miila kiano nailiano tai miyotuba ka kanano toro na iþauano nei Jone, naio mila vite nalo nene amiyotuba ka naio ea kanano visiþeiano tai.

<sup>2</sup> Jone naio mial nailiano nene bisi, naruei naio bitilubar ka naina be Atua kanano iliano riano, be iliano na be riano tai memedu ka aver visivisii venia napano mia Yesu Kristo naio rimþauka iorou, mila na naio bivitauia bulagio vatitig bo jua niosi nei vite nonovio napano naio mialio, ka kito na iorou romijikia rovolukuio.

<sup>3</sup> Naruei toro kei napano mia naio rivuluku iliano nalo na verialiano nei, þeli mije tilieno kano, mije vatitigio joa kanano iviso, mia Atua kanano ilivuiano ve burutomoruo toa kiano meuliano, bior ka napano burumþara legiano nene naio jo binimej vaataro laka naruei.

*Jone jikar kiano verialiano na kiano moneano ea iliano na ilivuiano ban Atua*

<sup>4</sup> Kiniou Jone, nebitauia bulag iliano nalo nei ka riviedu rivan kamiu taara aluo na namoneano nalo napano kumitua komeli nalo na ea tanobuku na toru na vio nei Esia. Kiniou najaaro ka neviviuo

kamiu ea siano napano naio jo beamu beamu laka, a naio jo vonganei, a mia naio to toboto. Nojoma nobolkouo vonganei ka kamiu ka burumara tiniememiano vija tumaroano toa kenemiu meuliano tulaka, napano mia rijikia rimaluvo ka kamiu den kiado Atua nei vija kanano niununo aluo napano ajumolu ajukamu ka kiano jobaro, <sup>5</sup> a mijikia rimaluvo ka kamiu den Yesu Kristo bunu, naina napano naio biekouo banbano mia kiano burukija miou, karina naina be moti napano naio jumolu meul bereio, napano vonganei naio be burumara parinio tubo ka parinio tubo nalo na yetemeriba.

Riano, Yesu Kristo nene napano naio tinien miia kito toru, banbano mijamo ka kanano burukija miou ka rivulu bulag kito den vironiano na kiado kariano nalo, <sup>6</sup> naruei naio bitiri bulag kito ka romei rove maratavo ve takurano ea yati na kanano tubo sesa nalo, a ka naio bijauia bulag kito ka rajai naio rotibe ka tomu lu na karamano kanano imauano nalo, naio ga be Atua Sopi.

Yesu mila bo ban kito toru jibe na ana bo ka reilivu ka siano, rodular naio to medave laka, rivan rivan mia maka rijikia ribisi bogo tai, tibe na.

<sup>7</sup> Kamiu kuvitii vatitig rivu! Naio naruei joma mijian burevure melijo nalo na mave, naio riyotuba rimei. Mia kito nonovio reial naio ka mirado memedu, a vija bunu nalo nanua ma ajukukakar naio ea makolkolo, nalo bunu avitulubar naio bereio. A mia ve burumara jogvaiano a tegiano riyotuba ea tomu nalo na yetemeriba, tinielo rimaio ka venia napano amila ban naio ea bogo nanua beamu. Mia monoka tibe ga na, neber "Ee" ban naio kanio.

<sup>8</sup> Bo ka kito rovatove ka Tubo Atua, Atua Sopi na moroano, naio napano jo beamu, naio jo banei, a mia naio tobo to, napano kiano

ilitemiano tai naio ber jibe nei, berinavo

"Kiniou nei nebe burupati, kiniou nei nebe juluvati!"

### *Jone mial kijokijo na Yesu*

<sup>9</sup> Kiaku bilbilu nalo, kiniou Jone nebe kuruemiu tormoruo, napano neberial vite nalo nei ban kamiu. Nojidom neverial van kamiu bior kito naruei napano robe Yesu kiano, ktio naruei rojutano ka kiano tuboiano, kito naruei rojuma rabar bitiran jogvaiano na bogokouo nei, ana kito naruei rojuma rojanikar kito bija jidomiano na tebievi.

Mo kanaku tukunuano naio ban jibe nei, berenio nua beamu kiniou nojoma neberial Atua kanano iliano, nojo nomioliolu ka Yesu Kristo banbano na kulo Romo amije vironiano ban kiniou, amila kiniou nebinimei nominau kurano ea uleule na telisu nei, siano Patimos. <sup>10</sup> Naruei ea Legiano Lu tai nojo jibe na ana nomijog jibe Niununo binimei ea kiniou, nomijog jooa tai ju iorou ka kiniou, mil burutomoluo jibe ka pasimeduo miolu, mil ber jibe nei, berinavo:

<sup>11</sup> "Venia napano mia jau kealio, keial kovivitaui bulagio rivan ea niosi tai,

karina jau kotuvan rivan tanea lotuano nalo na tanobuku na vio Esia,

ka ajikia avulukuio.

Lotuano nalo na, nalo aluo, be Eveso, Simena, Pekamam, Taitera, Satisi, Vilatelia bija Leotesia."

<sup>12</sup> Jooa na mil ban kiniou jibe na ana nejidom neial kenia, nabarþilig kiniou nemial burupati na yulu nalo ga aju, napano aminauka niogo ea nalo aluo. <sup>13</sup> Burubati yulu nalo nene ajumolu aju jibe na, karina iviso kanio nemial toro tai jumolu jikili ju, napano naio jibe ka naio napano aber Kulorinio Kenerinio. Naio miya burutili soto tai, bija miya kulumarauo napano amiyako

ka niogo, ajelan barkor iarene.  
 14 Vijinio miuvu mia miuvu, jibe ka vijinio nunu bija mavo, mia tiamirano merera jibe ka minano sebi. 15 Jaano kirisikili bo, javukia m̃arbutoto napano amijie ea sebi ka rila sikili rivu, mia bogo napano naio mil, joono miolu jibe ka tei napano jaburu ea baraaña. 16 Naio jumolu jikili ju jibe ka napano ea jumano meruo naio bokar m̃arvitano aluo, mia iobogu na mira tai napano naio mali ea ikit tivelinio juo naio jo moluo ea niono. Mirano bunu, riano, naio merera, mia merera naio javukia m̃erenio napano naio jikili mia jikili.

17 Nemial toro nene jibe na, tomnei, mila kiniou jibe ka nam̃aro garuei, nomijoru yetano ea jaano. Mia naio jian jumano meruo binimej jokol kiniou, naio berinavo “Jau komerou re ka kiniou, kiniou nei nebe natikariano mia nebe najuluvatiano.

18 Naio napano be burupati na meuliano be kiniou nei, bior napano kiniou nemeul, karina nam̃aro, karina nemeul bereio, nemeul to toboto.

Kiniou nei naruei napano vulariano na m̃ariano a vulariano na bulukusebi kirivova nei na tomu na m̃ariano, nalo ajua jumaku.

19 Mia jau komerou re, jau kotovon re, kovivitaui buлагio vatitig ga venia na jau kojom̃a komialio, napano tealoo abe tena vonganei, bija tealoo abe tena bogo nalo na amei na vo.

20 Mia kiniou never titai vanso beamu vo, ka tivelinio na m̃arvitano aluo nanua jau komialio joa jumaku, bija burupati yulu aluo na ma aminaukalo ea niogo na.

Vite nalo nei ajavukia jikiano tai napano naio joluku, mia nioti nene jibe nei, ber m̃arvitano aluo nalo nei napano, abe nailiano aluo na

mia avitkar lotuano aluo nalo nei, a burupati yulu aluo, naina be lotuano aluo nene neibano.”

## 2

### *Mesi nalo naina ban lotuano aluo*

1 Naruei Yesu mil dolu kia ga ban kiniou, naio berinavo “Vonganei mia kiniou neverial venia napano mia jau komijikia kovivitaui riva rivan lotuano aluo aveve terakurano.”

### *Mesi na jukamu, riva rivan lotuano na vio Eveso, lotuano napano maka ve tinietiano toaio*

“Beamu, jau kovivitaui mesi tai riva rivan nailiano na lotuano na komeli na vio Eveso, jau kovivitaui tibe nei, koverinavo ‘Iliano napano biedu ban kamiu binimej den naio napano bokar m̃arvitano aluo ka jumano meruo, napano jo miel jeli-viv iviso ka burupati yulu aluo nei.

2 ““Naio berial ka kamiu jibe nei, berinavo “Kiniou nemijikia kamiu ruei, bior nemial kenemiu im̃auano novo nalo, nemial ka napano kumila vio toru, nemial ka napano kumitua kamiu bija jidomiano na tebievi naio bo bo laka. Kiniou nemial bunu bo laka jibe napano kamiu maka kuvijamo ka tomu na bova amei ala niegeniege kamiu, bior tealoo, bogo napano amiyotuba ka kamiu, ana aberinavo nalo abe atevi nalo, mia kamiu kuvial vonlo, kuvijikia vatitiglo rivu, ana mia kamiu kuvileal lo ka nalo amijubolbolili kamiu ga.

3 “““Bior siaku ga napano kamiu kumiduio, naruei kubiniua bogokouo, a amila bova ban kamiu, mia nemijikia ka maka kuvituvan kiniou vo, kumitum̃a kubokar jikili bo kia ga vo, mia jidomiano napano ber tiniemiu m̃aro laka, p̃eli na kamiu kumijog kuber bare, nina naio maka toa kamiu leleio.

4 ““““Kenemiu bajago nalo nei kirinovo laka, a be riano, vite tai jo napano kumitum̃a kumila napano maka nasaaro lele kanio, mia bo ka neverialio van kamiu memedu.

Naio jibe nei, ber burumãara tinietiano napano naio joa kamiu be moti, vonganei naio binimei melukluku laka, maka bunu tavukia beamu. <sup>5</sup> Kuvisidomii bereio von ea burumãara bajago na tinietiano novo na beamu, napano tiniemiu jii kinou toru, a tiniemiu jii kamiu ga toru bija kulo dolu nalo. Ea bogo na naio bo mia bo, mia vonganei, naio batove mia batove laka. Mia bo ga, mia monoka kuvilig kamiu ga, a monoka kuvan bereio ea vio novo nei nanua kumitua beamu. Mia ver kuvilig re kamiu, nemijikia never mia neyotuba ka kamiu, navar bulag burupati yulu na ju merera iviso ka kamiu vonganei.

<sup>6</sup> ““Riano, nina be burumãara tena bova tai na kenemiu napano neber vonga, mia nojidom neverial van kamiu bunu ka kumituãa kumila burumãara vite novo tai bunu, napano nejaaro toru kanio. Vite nene napano kumituãa kumijuku die nalo nei napano ajumãa amila vite dolu vovu nalo, napano toro nei Nikolas naio mioliolu kanio be moti. Abova ga, a kiniou bunu maka nosidom leleio.

<sup>7</sup> ““Toro napano be tiliniene, bo ka naio rijoglubar venia napano Atua kanano Niununo Lu naio jo berialio ban taara na namoneano nalo. Toro napano naio tu sikili rivanvano tuvulu na bova, mia nemijikia najamo ka naio ka mijikia riva to jouro rimemedu ea tiniavio novo na Atua kanano, naio riva to sen m̃arati iesi na buruiesi na meuliano.””

*Mesi juo nene, riva rivan lotuano na Simena, lotuano napano m̃a tomu nene nalo ajumãa ajerni kalo*

<sup>8</sup> “Jau monoka kovivitauiãa m̃esi tai riva rivan nailiano na lotuano na komeli na vio Simena, kover tibe nei, koverinavo ‘Iliano na napano biedu ban kamiu binimei den naio napano be moti a ve na maariano, napano amuebin m̃aro, kar na meul bereio.

<sup>9</sup> ““Naio berial ban kamiu jibe nei, berinavo “Kiniou nemijikia vatitig bogokouo nalo napano m̃a kumituãa kubiniua, a nemijikia ka jumemiu nalo abeteau. Mia nojidom ka monoka kuvijikia ka maka kuve talmãasa, mia kube na sanibaiano laka! Riano ga, nemijikia ka nalo nei napano ajumãa aber abe kulo Ju, nalo ajumãa abuku iliano nalo na bova miroano laka ban kamiu, mia maka kuvisidomialio, nemial nalo maka atibe ka Ju nalo leleio, makanio, nalo ajakisor Siãaro memedu.

<sup>10</sup> ““Mia be riano, þeli mia vesiou re kamiu tealo monoka avar burumãara jogvaiano nalo rivior napano kumonea kiniou, mia kumerou re. Peli Siãaro naio mijikia rila ka mia avuku kam tealo avan ea nalakoiano, ka naio to rila vonvon kamiu, mia nemijikia never ka mia naio rijikia rila lelan kamiu ea jogvaiano nalo riva rivokar legiano ve duelimo ga. Ver tibe na, monoka kuvitu sikili riva rivokar bogo na mia adular kenemiu jegi, mia ver kuvijoru re ea bogo na, mia bogo na koviyotuba kean kiniou, mia nesian burumãara ijaiano van kamiu, nina be batubatu niogo na meuliano.

<sup>11</sup> ““Toro napano be tiliniene, bo ka naio rijoglubar venia napano Niununo na Atua kanano naio jomãa berialio ban taara na namoneano nalo. Toro napano jovulu bajago va ea meuliano nei, mia naio riyotuba ea re m̃ariano juo napano mia naio rime iorou.””

*Mesi tolu nene, riva rivan lotuano na Pekamam, lotuano napano mijamo ka verloglogiano va nalo abinime i jouro eaio*

<sup>12</sup> “Tai bunu bereio, jau monoka kovivitauiãa m̃esi tai riva rivan nailiano na lotuano na komeli na vio Pekamam, kover tibe nei, koverinavo ‘Iliano napano biedu ban kamiu naio binimei den naio napano jo mudu iobogu na mira napano mali ea ikiti be juo.

13 “Naio berial ban kamiu jibe nei, naio berinavo “Nemijikia vatitig bo ka vio napano kamiu kumituaio, naio be tanobuku tai iviso memedu ea vio napano Siñaro naio jo be tubo eaio! Kanano vio nalo aju janea kamiu, mia kamiu kubokar siaku jikili bo dañariga. Beamu, jouro ea kenemiu komeli na, þeli romijikia rover komeli na Siñaro kanano, amuebin kuruemiu nanua Antipas, naruei ajikili ka kamiu monoka kuvituvan kenemiu mon-eano ea kiniou. Mia makanio, jibe ka napano naio biekouo ea kiniou bokar mñariano, kamiu bunu, maka kam tai aburo den kiniou.

14 ““Nina naio be tivelinio na bo nene, mia be saba tai nojidom neverial van kamiu bunu. Vite na be moti, jouro ea kenemiu taara, be tomu tealo aju napano ajumña ajakii jidomiano tai napano be verare ka Naverialiano Pelama re nua. Ver kamiu tiniemiu maio kanio, naio naruei napano berii mñarabo tai ban Parak, naruei maka vesiou ana Parak kija buru naio bano beriio ban kulo Israel nalo, mila na maka vesiou, ana ajikar ka ajen sinaniano lu napano kulo dolu nalo amila jokoluolu kanio ban kanalo tavoru nalo, ana nalo ajumña ajidel ka amila siakiano. Aju amila kariano jibe na naruei, mia jakii iliano napano amijog ruei, nalo aber naina bo ga.

15 ““Mia juo nene, be ta bunu na-pano kumijamo kalo aju jouro ea kenemiu taara na namoneano nalo. Nina nalo napano ajumña ajakii verloglogiano vovu dolu nalo nei, napano toro nei Nikolas naio jomña mioliolu kanio beamu.

16 ““Tibe na, monoka kuvilig kenemiu jidomiano taluvo den vov-iano nene! Ver makan, mia noyotuba ka kamiu vesiou re, ana mia iliano napano mia riyotuba ea nioku never kalo ea bogo na, mia naio tavukia iobogu na mira tai napano naio tekitekti rilalo ajikia.

17 ““Toro napano be tiliene, bo naio rijoglubar venia napano Niu-nuno na Atua kanano naio jomña berial ban taara na namoneano nalo. Naio napano bare ka tovulu na bova, mia naio ve kiano ijaiano novo, mia nesian sinaniano tai vanio, tavukia sinaniano napano kulo Ju nalo ajenio ea vio yauo, mia nina be sinaniano tai napano maka toro tai rialio vo. A mia nodu puruveru na mivu tai vanio, napano aje sio vou tai joaio, napano naio riduo, naio ga mia rijikia nioti riano nene.””

*Mesi veri nene, riva rivan lotuano na Taitera, lotuano na mijamo ka bajago na bova jo jouro eaio*

18 “Tai bunu bereio, jau monoka kovivitauia mñesi tai riva rivan nailiano na lotuano na komeli na vio Taitera, kover tibe nei, koverinavo ‘Iliano nei napano biedu ban kamiu naio binimei den Kulorinio Kenerinio, napano mirano merera bilvili javukia menano sebi, a jaano kirisikili jibe ka butoto.

19 ““Naio berial ban kamiu jibe nei, berinavo “Kiniou nemijikia vatitig bo kenemiu imñauano nalo, kenemiu tinietiano bija viek-ouoiano, a kenemiu imñauano kouo nalo a jidomiano na tebievi na kenemiu, a mave lie kanio nomijikia vatitig bo ka kumitumña kumila ba lie vonganei, jovulu nanua mña kumitumña kumilala beamu.

20 ““Nina be tivelinio na bo nene, mia be vite tai na monoka kiniou never rimeravo van kamiu. Nina be tivelinio na tira va nei Jesebel, napano kubitilubar kanano vov-iano nalo, mia kumijamo ka naio jidel dolu ka ga kiano imñauano vovu nalo napano naio jomña milala. Naio berenio naio be tira na verialiano tai, a þeli, kamiu kumonea naio, mia naio mila sibilili ga kamiu. Ea kanano verloglogiano, naio jo buru tomu na kanaku imñauano aba be dolu laka, napano vonganei amijoru ea siakiano, ajumña ajen sinaniano na tavoru nalo kanalo, a ajidom

aber bajago nalo na naio bo ga.  
<sup>21</sup> Kiniou nodu bogo ban tira nei ka naio tinieno maio ka bereio, rivilig naio taluvo den niamiamo na mña milaio, mia naio maka sidomio.  
<sup>22</sup> Mo, kiaku jidomiano naio jo ruei, ka mia nala naio rimon ea jog tai na mieiano na jikirkili nalo, a mia nala nalo napano mña amila siakaiano bijaio, ver aviliglo re ka kanano bajago na bova, mia nalo bunu ajog rivoa ve toru laka.

<sup>23</sup> ““Tira nei mia ve re kenerinio tai meul, mia kanaku siniabu tokol nonovlo aviniu. Naruei bogo napano nalo na taara na namoneano nalo aial vite nei, mia avitulubar ka kiniou naruei, kanaku vitiiano jo jelliviv bakar venia napano jo joa toro kanano iviso, a jikia leal venia na joa kiano jidomiano. A mia avitulubar bunu ka kiniou naruei, nojo nejian meran ban tomu nalo, memedu ga ka bajago na vite nalo napano ajumña amila ea kialo meuliano nalo.

<sup>24</sup> ““Naruei ea tivelinio na kamiu nalo dolu na ea vio Taitera, nemijikia ka maka kuvitakii verloglogiano nalo na tira nei kanano. Naio milavon ka buku iliseseiano nalo ban kamiu, ka ber mia naio rivetavo ea jidomiano lukuluku nalo napano abe teremi bo van kamiu, mia kamiu kubitulubar ka Simaro ga naio ga be burupati na iliano nalo nene. Mia kiniou never re bunu kiri titai ve dolu van kamiu, <sup>25</sup> mia neber ga ka kamiu kuvokar sikili ilirianiano nei napano kubakar ruei, kuvituvan re rivan rivano, mia kiniou nemei bereio.

<sup>26</sup> ““Naio napano juvulu na voviano, naio rila ga takii kiaku tinieiano riva rivokar juluvati na bogo nei, mia kiniou nesian burumara ijaiano vanio. Mia najamo ka vanio ka rije tuboiano ea venuo nalo, <sup>27</sup> tibe ka napano niosi na iouano naio beriio, napano naio ber

*Naio mia rije tuboiano ka tomu nalo, napano kanano iesi napano*

*na bokar ka jumano, naio be m̃arbutoto na kirisikili tai, a nalo napano parilo jikili, mia naio rivukulo avan ea borotano, avurukokorov aveve niati tavukia tanopili na amiñaukanio ea borotano.*  
*Iouano 2:9*

““Moroano na rila tibe nei, Teta naio mijamo ka ban kiniou ruei, naruei mia najamo ka rivan toro na be kanaku. <sup>28</sup> A maka naina ga, mia toro nene, mia nodu m̃arivitano napano Mejegi toa jumano.

<sup>29</sup> ““Toro napano be tiliniene, bo ka naio rijoglubar venia napano Niununo na Atua kanano naio jo berial ban taara na namoneano nalo.””

### 3

*Mesi jumo nene, riva rivan lotuano na Satisi, lotuano napano joñã monmelio kurano damariga*

<sup>1</sup> “Mo jau monoka kovivitauiã m̃esi tai riva van nailiano na lotuano na komeli na vio Satisi, kover tibe nei, koverinavo ‘Iliano nei biedu ban kamiu naio binimei den naio napano bitikar niununo aluo na Atua kanano bija m̃arvitano aluo napano kiano.

“Naio berial ban kamiu jibe nei, naio berinavo “Kiniou nemijikia batitig kenemiu inãuano nalo. Tomu nalo ajumña amiaia kamiu m̃ele janea vio, aberinavo kamiu kube lotuano tai napano meul bo, mia makanio, kiniou nemijikia batitig ka napano kamiu kumarmaro ga kumitu. <sup>2</sup> Vonganei be kenemiu bogo na kuvitevijo kija. Kenemiu inãuano nalo, nemilealio ka Atua kiano vitiiano, kamiu maka kumila nonovio riviniu rivu, mia maka kuvila rimemedu leleio. Kenemiu sebi maka riva kovio vo, mia naio jo ban vaatara ka rimaro dobi nonovio, mia bior vite na, neber vatitig bo ban kamiu neberinavo monoka kuvila vatitig rivu ka mia naio rimei sikili lie bereio.

<sup>3</sup> ““Tibe na, monoka kuvisidomial bereio iliano novo nalo napano

m̃a kumijogio a napano kumijeveio ruei. Kumonmonealo bo dañariga, a kuvilig kenemiu meuliano rimeio bereio, bior ver kuvitevijo re, mia nemijikia never vatitig rivu van kamiu ka mia nemijikia namaluvo ka kamiu tavukia toro na vinauano tai, napano mia kuvijikia lele re.

<sup>4</sup> Beriano, nemijikia ka kamiu maka m̃arati ve telabo na vio Satisi aju bo ga, napano maka aia niegeniege m̃alo kulum̃arauo tavukia nalo dolu. Nalo ameravo bare bo ruei, ka na mia aia kulum̃arauo na miuvu, aiel rivija kiniou nuvan ea kiaku vonuo.

<sup>5</sup> Toro kei napano jovulu vovaiano, naio bunu mia ayovovua vatitig naio rivu ka kulum̃arauo na miuvu jibe na. Mia naio siano, maka nejikia noiolkon bulag den niosi na meuliano bogo tai, mia kiniou nesiloglog naio ka karam̃aku rivija kanano nailiano nalo, never, kema na naio be kanaku toro tai riano.

<sup>6</sup> ““Toro na be tiliniene, bo ka naio rijoglubar venia napano Atua kanano Niununo joñã ber bulavulag ban taara ninio na namoneano nalo.””

*Mesi ari nene, riva rivan lotuano na Vilatelia, lotuano napano bogo novo ka rila iñãuano jukamu ka mirano*

<sup>7</sup> “Bereio, jau monoka kovivitauia m̃esi tai riva van nailiano na lotuano na komeli na vio Vilatelia, jau kover tibe nei, koverinavo ‘Iliano na napano biedu ban kamiu, naio binimeio den naio napano be lu, a naio be riano, napano naio naruei naio midu vukariano na vetavoiano na m̃aratavo napano Parinio Tubo Teviti re nua kiano. Venia napano naio betavo eaio, maka toro tai rijikia tetavoko bereio, a venia napano naio jetavokoio, maka toro tai rijikia rivetavo ea bereio.

<sup>8</sup> “Naio berial ban kamiu jibe nei, naio berinavo “Kiniou nemijikia batitig kenemiu iñãuano nalo ruei.

Naruei monoka kuvitii vatitig, nebetavo ea m̃aratavo tai ban kamiu napano maka toro tai rijikia tetavoko bereio. Kiniou nemijikia ka kenemiu moroano naio telisu ga, mia najaaro toru ka napano kumituñã kubokar vatitig kanaku iliano, a maka kuvila lelan siaku napano joa kamiu. <sup>9</sup> Nalo napano ajakisor Siñãaro, aju aba vio takurano ka avitirilar kialo taara, ana nalo ajum̃ã aber nalo abe kulo Ju memedu, mia maka tibe na, nalo amila sibi ga na. Mia iorou kanio mia nala nalo nei amei anie yetano ka jaamiu ka avitilubar ka kiaku jidomiano maka toalo, joa kamiu ga.

<sup>10</sup> ““Kiniou neber ka kamiu nua ruei neberinavo monoka kuvitu sikili vija jidomiano na tebievi tulaka, naruei nemial jibe kubokar vatitig kanaku iliano nei. Bior vite na naruei, nemijikia neverikar van kamiu never burum̃ara jogvaiano na mia rimeio ea yetemeriba nei, ka rilavon nalo napano ajaio, ana mia kiniou notokovio batitig ka kamiu kanio, mia vite na naio maka rijikia tokol kamiu.”

<sup>11</sup> ““Vesio re, kiniou nemeio ka kamiu bereio. Venia napano kumituñã kumitutua mugaruei, monoka kuvokar sikili rivu-oa ka kiniou nomaluvo, ana mia kamiu kumijikia kuvijev kenemiu ijaiano, mia maka toro dolu rijikia rivarlar kenemiu batubatu niogo den parimiu. <sup>12</sup> Toro napano jovulu jukujukuano nonovio riva rivokar bogo na nemeio, mia novuru naio rimeio tibe m̃artea na toru tai joomo ea yimo lu na Atua kiano, mia toro nene to joomo ea toboto. Mia netekar sio nalo napano mia netiri eaio, tibe sio na kiado Atua kiano, bija bija sio na kiano komeli na toru, naina Yerusalemo novo, napano naio jo batove ea vio mave binimeio napano kiado Atua kanano, a bija nalo napano, mia nevivitauia siaku vou toa naio bunu.

<sup>13</sup> ““Toro napano be tiliniene, bo ka naio rijoglubar venia napano

Atua kiano Niununo naio jomãa berialio ban taara ninio na namoneano nalo.””

*Mesi aluo nene, riva rivan lotuano na Leotesia, lotuano napano ba bova rui, maka sidomial vite tai*

<sup>14</sup> “Na maaro, jau monoka koviv-itauia m̃esi tai riva van nailiano na lotuano na komeli na vio Leotesia, kover tibe nei, koverinavo ‘Iliano napano biedu ban kamiu naio binimeĩ den naio napano naio be parinio ka vite nonovio, napano naio ga mijikia river “Tibe na.” Naio biekouo be riano ea Atua va vokar napano kiano burukija riou, a naio rive tubo ka yetemeriba nonovio napano Atua naio jiio.

<sup>15</sup> “Naio berial ka kamiu jibe nei, naio berinavo “Kiniou nemijikia batitig bo kenemiu im̃auano nalo, mia nebitilubar ka kenemiu jidomiano nalo ea kiniou maka rimenini laka, a maka rivitunu rivare. Bo laka ka ver jau kosidom komenini, mo jau komenini bo kanio, þeli na ver jau kosidom kovitunu, jau monoka kovitunu vatitig rivu, mia naina napano kenemiu iviso beve torogio ga jibe na, bajago na kiniou maka nosidom leleio. <sup>16</sup> Mia bior kamiu naruei kumisidom kumenini, a kumisidom kuvitunu tibe na, kiniou nojo rui ka novule bulag kamiu den nioku. <sup>17</sup> Kamiu kumitumãa kuberinavo kubiohijii saba novo nalo miroano na be kenemiu, tenene na kamiu be tiniemiu ka kuber maka toro tai napano rijikia sian vite tai van kamiu, bior be kenemiu telabo rui. Mia makanio, ea kanaku vitiano naio maka tibe na. Kamiu maka kuvijikia kuvitilubar kamiu, mia kamiu maka ve kenemiu vite novo nalo leleio, kube kulo kurano ga, kube merebono, a niabemiu yauo ga kumitu.

<sup>18</sup> ““Mo kiniou neber ka kamiu, ka bo ka kumei bereio ea kiniou, kumei kuvar niogo nei napano sebi jijenkon niamiamo nene rui, ka kumijikia kuvakar vite novo tai ea

jumemiu. Bo ka kumei kuvar kulumãarauo na miuvu bo, ka kuvisalvoko kamiu, ka mia kuvimou re bunu, a bo kumei kuvar vam̃esi na kuvia ea miremiu, a na mia kumijikia kuvial vite bereio.

<sup>19</sup> ““Toro kei napano tinieku jii naio, monoka neil vanio ka nala kanano meuliano rimemedu, tibe na, kuvidu kiaku iliano nei rivu, ka mia kuvilig kamiu. <sup>20</sup> Kamiu kuviniagago vatitig rivu! Kiniou nejikili noju neminia tavo na kanamo meuliano. Jau napano kojog jooku bio, kovetavo ka kiniou, mia nemei joomo ka kito ve juo rotukunu, kito ve juo rosinan vio takurano.

<sup>21</sup> ““Naio napano ju jikili ba jovulu na bova, mia najamo ka naio rijikia totano biju vija kiniou ea jobaro lu na kanaku, javukia ga napano kiniou bunu nojuvulu kanaku uolu, a na iorou kanio karamãaku buru kiniou nojotano biju bija naio ea jobaro lu na kanano.

<sup>22</sup> ““Toro napano be tiliniene, bo ka naio rijoglubar venia napano Niununo na Atua kanano naio jo berial ban taara na namoneano nalo.””

## 4

*Vio mave na Atua kanano ea tiniabene*

<sup>1</sup> Iorou ka napano kiniou nemial vite nalo nei, nemial bereio m̃aratavo tai ka ava joomo ea vio mave naio juvavo jo ea miraku. Ana nomijog bereio jooa na mil ban kiniou beamu, naio mil burutomoruo javukia pasimeduo, ana naio ber ka kiniou, berinavo “Jau komei mave nei beamu vo, mia kiniou nelaso keial vite nalo napano mia amaluvo iorou.”

<sup>2</sup> Naio ber jibe nei, ana vaarakurano ga, nomijog jibe ka Atua niununo midular niunuku, naio midu kiniou nojo mave tiniabene, naruei nejerarago ban ea burumãara jobaro lu tai napano jokamu ka miraku, napano toro na toru tai naio jotano eaio. <sup>3</sup> Nemial naio jibe ka napano

naio merera, naio bar yovovvano na veru maraiu nalo, a kanano yulu nene jeliviv eaio javukia subovivi tai.

<sup>4</sup> Burumãara jobaro lu nei naio jo iviso, a jobaro dolu nalo bunu ajelivivi eaio, nobulukulo bokar du- elimo valuo ba veri [24]. Ea nalo abeve terakurano, toro tai jotano ealo, mila nalo bunu abe duelimo valuo ba veri [24], napano nalo na abe navagadeano nalo na tiniabene. Nalo na amiya kulumãarauo na mi- uvu laka, abar batubatu niogo jua pariparilo. <sup>5</sup> Nojo nejiraravo jibe na, nomiilo bunu ka napano vijaniano naio miyotuba iviso ea vio lu nei, bija bunu burumãara uetubaiano na tubaalo naio joãa jara. Kamu ea mirano, yulu aluo amiuvu, napano nalo abe Atua kanano niununo aluo nene, <sup>6</sup> a nalo ajumolu aju ea vodobi tai, banbano laka jibe tei, naio mieg meravo bo javukia mermerobi.

Ana iviso ka vio nene bereio, tom meul veri aju, napano ea kamu kalo a iorou kalo, abe miralo nalo vio bujo laka, a nalo aju vaatara, aju jeliviv ea burumãara jobaro lu.

<sup>7</sup> Toro meul na jukamu nene naio javukia laeon, tinene naio javukia bue mãarauo buruolu, tolu nene naio bar kulorinio mirano ga, mo nana maariano naio javukia bebekumo. <sup>8</sup> Nalo abiniu, be sibialo ari, napano miralo jovukoio vatitig bo sibialo bunu, ba bokar yetano kalo.

Nalo nei kanalo iãauano, legiano bogiano, maka ajilimebi bogo tai, ajumãa aberial damãariga jibe nei aber,

“Atua na moroano na mave, naio jo beamu, naio jo vonganei, naio mia to toboto. Naio be lu mia be lu, naio be lu laka.”

<sup>9</sup> Ea iliano nalo na jibe na, nalo aju amidular naio siano napano naio jotano iviso kalo ea vio lu, aju abatove kanio, ajumãa aber siva banio ka napano naio meul to- boto. Bogo napano ajumãa aberenio,

<sup>10</sup> navagadeano nalo bunu abatove kanio, amilotu ka naio napano mia naio maka rijikia riãaro bogo tai. Ana kario, abar bulag kanalo batu- batu niogo nalo den pariparilo, abar jutano ea jaano, aberinavo

<sup>11</sup> “Tubo kenememi Atua, memedu ka mermerano, vatoveano vija moroano nonovio aje vanso, ve kanamo jau ve taku- rano ga.

Jau naruei kojii vite nonovio, ea kanamo jidomiano ga abokar kanalo meuliano.”

## 5

*Niosi napano amijukuio, bija nunu na telisu, napano naljuo aju tiniabene*

<sup>1</sup> Karina kiniou nemial bereio toro na toru nanua jotano mave ea vio lu, ka napano midukar vite tai ka jumãano meruo, naio be niosi tai, napano abivitauia tivelinio be juo karina amijukuio, karina abukario bija sano vukariano aluo nene.

<sup>2</sup> Naruei nomijog nailiano na toru tai miaga jouo, naio bika ber “Toro kei naio bare ka rilakorov vukariano nalo nei? Be toro tai napano naio jo mijikia vetavo ea niosi nei þeli na makanio?”

<sup>3</sup> Naio to tibena vano, vedeio, maka ve toro tai na tiniabene þeli na yetemeriba, þeli na yetano ka yete-meriba, napano naio mijikia rivetavo ea niosi nei, maka tai napano rivare ka sirarago joomo eaio. <sup>4</sup> Nemial jibena naruei nomi- jog bova, nejegi mia nejegi, napano maka toro tai rijikia rila.

<sup>5</sup> Naruei navagadeano nalo tai mil ban kiniou, naio berinavo “Ei, jau keteg re bunu! Koialio, laeon yako napano miyotuba ka tomu nalo na Yuta, naina napano abio ka yati na Teviti, naio jovul vite nonovio ruei. Naio naruei mia rilakorov vukariano aluo nei, naio naruei mia rivetavo ea niosi neibano.”

<sup>6</sup> Naruei nejirarago bano, mia maka rive laeon, mia nemial kiritete

solbouo na nunu tai jumolu jikili ju iviso ka toro meul veri bija navagadeano nalo, kamu ea vio lu nei. Naio be nunu na telisu ga, mia kiano pasimeduo aluo na jikili, bija mirano aluo ajua parinio. Naio jikili ju jibe na, naio jibe ka amila sida ka naio ruei, mia naio meul bo ga jo.

<sup>7</sup> Ana naio miel binime, midular niosi nei den toro na toru nei jumano meruo, napano naio jotano mave ea burumara jobaro lu. <sup>8</sup> Naio midu ruei, ana toro meul veri nei bija navagadeano duelimo valuo ba veri [24] amijoru ea jaano. Nalo be kialo nioragrago nalo janealo a be kialo baju niogo nalo, napano abujo magmago ka maatei napano ajonio, mia bonoti tanunu nene napano jo bavin, naio be volkouano nalo na namoneano lu nalo kanalo. <sup>9-10</sup> Mo nalo amijev iouano vou tai napano ban jibe nei, berinavo

“Amila sida kaso,  
naruei ea kanamo burukija  
jau kobulu bulag tomu nalo abe  
Atua kanano,  
napano amoluo ea taara  
nonovio na tomu nalo,  
ea iliano doldolu nalo nonovio,  
ea uleule nonovio nalo na toro,  
a ea uleule na tertelisu nalo  
bunu.

Jau komiasosol lo abinime, abe taara takurano ajutano ka parinio tubo takurano ga,  
nalo abinime, abe kulo lu na  
Atua kanano inauano, ka napano mia ave tubo ka yetemeriba nei.

Mo bior ka napano jau komila jibe na, memedu ka jau ga ve takurano naruei kodu niosi nei, ka kelelar vukariano nalo nene, ana kovetavo eaio.”

<sup>11</sup> Nojo nejirarago jibe na ana nomijog nailiano nalo amiou, nalo miroano mia miroano mia miroano, nalo jovulu taamaka [1,000,000] bano na jibe na. Aju ajeliviviko jobaro lu bija tomu na ameul bija

navagadeano nalo nei, <sup>12</sup> ana aju amiou jouo, aber jibe nei, aberinavo “Nunu domudomu, napano amila sida ka naio,  
naio ga takurano bo mia bo.

Moroano nonovio, tovuiano nonovio,  
masouano nonovio, sikiliano nonovio,  
vameneano nonovio, mermerano nonovio, miaiano nonovio,  
memedu ga ka ala rivan naio ga ve takurano.”

<sup>13</sup> Iorou ka nina, nomijog bereio ka napano temeul nalo nonovio bunu amiou, nina be temeul nalo napano aju mave ea tiniabene, bija nalo napano ajua yetemeriba, þeli ea borotano, þeli ea tei, kanalo iouano naio ber jibe nei, berinavo

“Miaiano, vameneano, mermerano bija moroano riva van Toro na Toru napano jotano mave ea jobaro lu, bija bunu nunu solbouo, rivan rivano-o to tobo to.”

<sup>14</sup> Ana tom meul veri nei aberial “Jibe na, mm” kar iliano nalo nei, ana navagadeano nalo amijoru, aminie, amilotu kalo abe juo.

## 6

*Vukariano aluo na niosi napano amijuku*

*Vukariano na beamu: Toro na toru na bajago na mila mira, napano naio midu bue kulorinio na miuvu*

<sup>1</sup> Kiniou nojo najirarago bano, ana nemial ka napano kirikiti nunu naio milakorov vukariano na be moti na niosi nei. Naio mila kario ana temeul veri nei nalo tai naio miaga ka jono jibe ka tubaalo, naio berinavo “Komei!”

<sup>2</sup> Vaarakurano ga bue kulorinio tai napano miuvu jikili jua miraku. Ana nemial toro tai jotano mave eaio, naio midu viu, ana nalo amidu parinio tubo kanano batubatu joa parinio, ana naio midu kanano bue kulorinio nene, jikiti batavio javukia

toro na mira tai ban ka tovulu kanano uolu nalo.

*Vukariano juo nene: Toro na toru na bajago na toro muebin toro, napano naio midu bue kulorinio na bilvili*

<sup>3</sup> Karina, nunu solbouo milakorov vukariano juo nene. Naio mila kario naruei nomijog temeul juo nene naio bio, naio bunu berenio berinavo “Komei!”

<sup>4</sup> Vaarakurano ga bue kulorinio dolu tai binimei, napano naio bilvili. Toro napano joaio, amijamo ka ban naio ka riva ridular tumaro napano jo yetemeriba nei, ka mia tomu nalo atuãa auebinvinlo amarmaro. A amidu burumara iobogu na mira joa jumano, naruei naio bunu batavio bano.

*Vukariano tolu nene: Toro na toru na bajago na vitu ea yetemeriba nei, napano naio midu bue kulorinio na bobogio*

<sup>5</sup> Karina, nunu solbouo naio mila korov vukariano tolu nene. Naio mila kario ana nomijog temeul tolu nene naio bio, naio bunu berenio berinavo “Komei!”

Vaarakurano ga bue kulorinio dolu tai jumolu jua miraku, naio bobogio. Toro napano naio miduio, midukar skel tai ka jumano, ka naio rivitii tomu nalo na yetemeriba nei salo sinaniano nalo.

<sup>6</sup> Ana nomijog iliano tai maluvo iviso kean temeul veri [4] nei, naio berinavo “Jau kavano, amijamo ka banso ka jau komijikia kala ka mia vitu toa vio nonovio, ka napano mia monoka avulu ve burumara veru ve toru mia sinaniano ve telisu ga. Mia maka kejikia kalalelan burupati buruolivi napano ma amimauka titikivaka ea marati nene, a maka kejikia kalalelan burupati telikrevi napano amimauka marjumelnelu eaio.” Nalo aber jibe na, ana naio bunu jikiti bano.

*Vukariano veri nene: Toro na toru na bajago na mariano, napano naio midu bue kulorinio napano niabene be yeve*

<sup>7</sup> Bisi na, nunu solbouo naio mila korov vukariano veri nene. Naio mila kario ana nomijog temeul veri nene naio bio, naio bunu berenio berinavo “Komei!”

<sup>8</sup> Vaarakurano ga nomial bue kulorinio tai napano niabene be yeve, jikili joa miraku. Toro na miduio, ajisia ka sio na Mariano, mia naio, kanano bilbilu tai naio jo miel bija naio, napano siano, abio ka Bulukuti Sebi. Ana naljuo nei, amijamo ka amijikia ala rivova van tomu ve miroano ea yetemeriba nei, ea iobogu na mira, þeli ea vitu, þeli ea mieiano, þeli ea temeul nalo. Jibe ka, ver tomu veri ajua yetemeriba nei, tolu nene amijikia atu rivu ga, mia veri nene kalo, nalo amijikia ala naio rijikia tibe na.

*Vukariano jimo nene: Namoneano nalo na ma abiekouo batitig bo ba amuebinvinlo amarmaro*

<sup>9</sup> Karina, nunu solbouo naio mila korov vukariano jimo nene. Naio mila kario naruei nemial boda, bija niununo miroano na tomu nalo amivon ea burupati nene. Naina be nalo napano ma amuebinvinlo bior napano aju jikili ka ajogkar Atua kanano iliano, a aju jikili ka ma aberial ka nalo amonea Yesu. <sup>10</sup> Nalo nene, nemial aju ajegi ban Atua ka burumara jooa, aberinavo “Aue Tubo na vite nonovio, jau kobe lu a jau kobe riano, aiao jau kovitilubar kenememi burukija nei. Nagi ana mia jau kala mirano van tomu na bova nei nanua ma amila bova jibe nei?” <sup>11</sup> Nalo aber jibe nei, ana ajian kulukoti na miuvu banlo ka ayaio, ana mia aber kalo ka vite nei napano abikanio naio maka vo. Nalo aberinavo atu kija ve telisu beamu vo, bior kanalo bilbilu tealo napano nalo aju kia vo, bija bunu kuralo a kuvivinielo dolu nalo, napano mia nalo bunu monoka auebinvinlo amarmaro bior napano amonea, ana ver bogo na amei ve miroano avare ka Atua kiano jidomiano, mia naio rila venia napano abikanio.

*Vukariano ari nene: Legiano na maaro*

<sup>12</sup> Naruei, kiniou nemial ka nunu solbouo naio milakorov vukariano ari nene. Naio mila kario, ana vaarakurano ga mii mikulkulu, a maka vesiou merenio binimej bobogio napano bobogio nonovio, a siberio naio binimej bilvili jibe burukija, <sup>13</sup> a marvitano nalo napano aju mave buluniogovu ajibirbili abatove ea borotano, javukia ga mariesi nalo na buruiesi tai na meruo, bogo na burumara jegi mikulkulu ka jaati nene. <sup>14</sup> Karina, amila bulunio-govu javukia yebe napano amijukuio amidu bano, a burusuku nonovio a uleule nonovio ajaraluvo den jelelo.

<sup>15</sup> Ana bogo na tomu nalo amial vite nalo nei, amerou toru mia amerou toru. Parinio tubo na yetemeriba, tomu na tortoru, tomu na ajukamu ka tomu na mira nalo, sanibaiano nalo, tomu na pirilo jikili, naliko bunu kialo tomu na inauano nalo, naliko kulo dolu nalo reraio, nalo abiniu abijauia buluvae nalo, aban ka vio nalo na mave ea suku napano mia ala vio sikili ka atuluku eaio. <sup>16</sup> Bogo na abokar vio nalo nene, mia miroano jo binimej toru lie, ana nalo abio ban puruveru bija suku nalo, aberinavo "Aio-o, kami kuvijoru kuvisovko vatitig kumemi, ka siraragiano na naio napano jotano mave ea vio lu naio rijikia re rivokar kumemi, a ka nunu solbouo kiano siniabu naio rijikia re rila lelan kumemi. <sup>17</sup> Legiano toru nei na naljuo kanalo siniabuiano binimej ruei, a kei naio mijikia tumolu rimeul ka bogo na? Makanio, vonganei mia naio rivova laka van kito rovinu."

## 7

*Atua naio bijauia burumara taara na tomu nalo tai na abe kanano*

<sup>1</sup> Iorou ka vite nalo nei, nemial ka napano nailiano veri ajumolu ajua sudu veri na yetemeriba, aju

ajukovio ka jegi veri napano ma ajuma amiuvuvu ea yetemeriba, ka rila na jegi nalo nei ajikia re bunu aiuvuvu ea tei, peli ea borotano, peli na mave ea buruiesi. <sup>2</sup> Karina, nemial nailiano dolu bereio, naio binimej bija tena aue tovo napano Atua na meul kanano ea kiano tomu nalo, mia naio jaluvo ea tivelinio na jegi uro binimej. Naio mijikia ka nailiano nalo veri nei, nalo abar mo-roano ka amijikia ala lelan borotano a amijikia ala lelan tei bunu, ana naio bio mele banlo, berburelo ka ala re bunu titai. <sup>3</sup> Naio ber jibe nei, naio berinavo "Ee to, kami kuvila bulag re tei peli borotano peli buruiesi nalo, rivan riva rivokar bogo napano rodu tovo tai toa ea meriniano tomu na memedu nalo napano abe kiado Atua kanano."

<sup>4-8</sup> Ka bogo nei naruei nejikar nomijog ka napano aberial memedu kanalo mirano napano ajekarlo. Nalo na amoluo ea yati duelimo ba juo [12] na Israel, nalo abe yati nalo napano ma abar korobilo nalo sialo, naina be Yuta, Rupen, Gat, Asa, Naptali, Manase, Simion, Livai, Isaka, Sepiulan, Yoseve, a Beniamen. Naruei ea yati nalo nei abiniu, tai bokar tomu nalo menu duelimo ba juo [12,000] amoluo ea naio, mila na nalo abiniu abokar menu toromomou duelimo va veri ba veri [144,000].

*Burumara tiniobi dolu napano amiya kulumarauo na miuvu*

<sup>9</sup> Ana iorou kanio, nejiraravo ba naruei kamu ka miraku be burumara tiniobi na tomu nalo, napano nalo miroano mia miroano, maka ajikia avulukulo, napano nalo na amiyotuba ea yati dolu nalo. Nalo naruei abe tomu na buru-venuo dolu nalo, bija kialo iliano kinkin nalo, naruei abinimej ajumolu ajukamu ea burumara jobaro lu, napano nunu solbouo naio joaio. Nalo amiya kulumarauo novo na

miuvu abiniu, a abar m̄ati burum̄al,  
<sup>10</sup> ana aju abio toru, aberinavo  
 “Kiado Atua jotano ea kiano jobaro  
 lu,  
 naio ga, bija nunu solbouo,  
 naljuo abe burupati na ioruri-  
 ano na kanado.”

<sup>11</sup> Ana bija nalo na, nailiano nalo  
 bunu ajumolu aju jeliviv ea jobaro  
 lu, ana amijil bunu navagadeano  
 nalo bija temeul veri, ana nalo bunu  
 aminie abamenea kamu ka jobaro  
 lu, amilotu ka Atua, <sup>12</sup> aberinavo  
 “Nao, be riano!

Ilivuiano nonovio, a miamoiano,  
 a masouano, a sivaiano, a  
 vameneano, a sikiliano, a mo-  
 roano,  
 nalo nonovio abe kanado Atua  
 kanano naio takurano ga,  
 mia tibe na toboto.

Ilivuiano ban Atua!”

<sup>13</sup> Ana ka bogo na, navagadeano  
 tai naio bika den kiniou, beri-  
 navo “Borum̄ara tiniobi nei napano  
 amiya tena miuvu na, a jau komi-  
 jikia abe kei nalo na, a jau komijikia  
 ka nalo aju be abinimei na?”

<sup>14</sup> Ana kiniou neberinavo “Ii,  
 maka nejikia, mia jau kobe toro na  
 toru tai na vio nei, ŕeli jau komijikia  
 kovio?”

Ana naio berdoŕe berinavo  
 “Terinio, nalo na naruei napano  
 amieldulu ea bogo na burum̄ara  
 jogvaiano nene. Mia kulum̄arauo  
 nalo na m̄a amiya na, ajekon ka  
 burukija na nunu solbouo nei,  
 naruei abinimei amiuvu bo jibe ka  
 na komialio na. <sup>15</sup> Nalo naruei, kialo  
 ińauano jibe nei, ber

‘Nalo ajukamu ea jobaro lu na Atua  
 kanano,  
 legiano a bogiano ana amim̄au  
 kanano joomo ea kunuano lu,  
 a naio napano jotano mave nei,  
 naio mia rivitikarlo.

<sup>16</sup> Mia maka bunu ajikia siserlo  
 bereio,  
 a mia ajog re midou bereio,  
 m̄erenio maka rijikia rila bula-  
 glo,

burum̄ara sebi mia tunu re  
 bunu lo,  
<sup>17</sup> bior nunu solbouo napano naio jo  
 iviso ea vio lu nene mave,  
 mia naio rivaganlo,  
 rivuru m̄arabo kalo avan ea buru-  
 pati uei na meuliano,  
 ana mia Atua naio riolkon nono  
 jogumiralo den miralo.”

## 8

*Vukariano aluo nene: Vio be  
 tum̄aro nonovio*

<sup>1</sup> Iorou ka naina, nemial ka  
 napano nunu solbouo mila ko-  
 rov vukariano aluo nene. Naio  
 mila kario, ana vaarakurano ga  
 vite nonovio na tiniabene maka  
 bunu rila malioano tai, vio nonovio  
 melumu bo jibe na banbano bokar  
 aura togio.

*Simeduo aluo nalo*

<sup>2</sup> Maka vesiou ga, nemial nail-  
 iano aluo napano nalo ajum̄a aju-  
 molu kamu ea Atua mirano ka ala  
 kanano ińauano, a ajian simeduo  
 aluo banlo, abar janealo.

*Basidobidobi na m̄aatei napano  
 amim̄aukanio ea niogo*

<sup>3</sup> Ana iorou kanio, ana nailiano  
 dolu tai naio binimei. Naio midu  
 basidobidobi na m̄aatei, napano  
 amim̄aukanio ea niogo, a bar bin-  
 imei ju kean boda, napano naio  
 bunu amim̄aukanio ea niogo, a na-  
 pano naio jokamu ea jobaro lu.  
 Naruei abar m̄aatei miroano banio  
 ka risebilo ea boda ka rila bonota-  
 nunu rivu, a nalo ajian bunu volk-  
 ouano na namoneano lu nalo kialo  
 banio, ka rivar tumave ea boda tibe  
 ka ijaiano tai. <sup>4</sup> Mia bogo napano  
 sebi jo jijen m̄aatei nene, bonoti  
 nene bija volkouano nalo na kulo  
 lu kanalo, ajaraluvo den nailiano  
 jum̄ano, aba abokar vio mave ea  
 Atua mirano.

<sup>5</sup> Karina, nailiano nene bar  
 vovosebi tealoo napano jua boda,  
 mison ba joomo ea basidobidobi  
 na m̄aatei nei, ana naio buku ba  
 tove yetemeriba. Ana bogo na

vite nei jokol yetemeriba, naio mila napano tubaalo jaara janea vio nonovio nalo, bija uetubaiano javukia bulukusebi bija vio bijaano, a mii mikulkulu bunu.

*Simeduo na beamu miolu: Yuo bija burukija*

<sup>6</sup> Ana nailiano aluo napano abar simeduo aluo nei, amila batitiglo ka aiuvlo.

<sup>7</sup> Nailiano na beamu naio miuvu kanano simeduo, naruei mila na yuo napano jikili jibe kurukuveru, bija burukija napano miaja jibe ka sebi, abinimei amue vio reraio ea yetemeriba. Amila vio jibe na ban bano sebi jijen yetemeriba tivelinio, bija sano buruiesi nene nalo, bija bunu vite nonovio napano ma aju amiluo eaio.

*Simeduo juo nene miolu: Burusuku na sebi*

<sup>8</sup> Ana iorou kanio nailiano juo naio miuvu kiano simeduo. Nina mila napano burumara kenieno burusuku tai, napano sebi jo moluo eaio, abuku batove ea tei. Naio mijuba tei jibe na, ana tei togio binimei jibe ka burukija, <sup>9</sup> ana sano temeul nalo amarmaro, a uako nalo na ma ajuma aburo ea burumara vio reraio nei, nalo amadudu.

*Simeduo tolu nene miolu: Marvitano napano joma buro ea vio yauo*

<sup>10</sup> Karina, nailiano tolu nene miuvu kiano simeduo. Naio ga mila napano burumara marvitano tai, napano sebi joma bovago eaio merera javukia yulu, naio moluo den vio yauo, naio buro binimei bokar yetemeriba. Ana kanano sebi ba jokol uei nalo napano amieraro a burupati na uei nalo. <sup>11</sup> Marvitano nene, siano abio ka Uei Mijea, naruei naio mila ana uei na vio nonovio abinimei amijea, ana tomu nalo maka ajikia amunio, mia midou jerlo banbano ba amarmaro.

*Simeduo veri nene miolu: Melijokouo*

<sup>12</sup> Bisi na, nailiano veri nene naio miuvu kiano simeduo. Naina mila ana merenio tivelinio binimei bobogio, a siberio tivelinio maka bunu rimiamo, a marvitano nalo miroano maka bunu aialo. Naina mila ana legiano binimei bulati laka, a maka vio rimiamo bunu, mila ana be melijokouo reraio ea yetemeriba.

<sup>13</sup> Nojoma nejiraravo bano, ana nemial bebekumo tai joma mier mave, naio jo miaga janea vio, berinavo "Vio bova ruei, mia kuluni-abene kia ga navo. Nailiano tolu aju kia, ana kanalo simeduo nalo ajikili laka. Kamiu na yetemeriba, kamiu kuvitkar, burumara jogvaiano naio jo maluvo!"

## 9

*Simeduo jimo nene miolu: Bulukuþili na batove laka, na be moti ka jogvaiano na jikili na ve varolu*

<sup>1</sup> Bisi na, nailiano jimo naio miuvu kiano simeduo. Naina mila ana marvitano dolu tai moluo ea vio yauo naio bijulu batove ea yetemeriba. Marvitano nene amidu vulariano tai banio, naina be vulariano na rivetavo ea bulukuþili napano ba bokar sebi yetano. <sup>2</sup> Bogo napano naio mijaglar sikmirano bulukuþili nei, iou juru bavin jo molmoluo eaio, javukia iou na burumara sebi, naruei naio bavin miduko vio reraio ea vio yauo, miduko merenio mirano, mila vio bobogio bereio. <sup>3</sup> Mia bogo na iou jo miduko vio jibe na, surubu nalo amolmoluo den iou abatove ea borotano, mia maka bunu ave surubu, mia abinimei ajibe buruolu nalo na tortoru. <sup>4</sup> Aberburelo ka atokol re buruiesi nalo þeli na sinaniano þeli na vite nalo napano ajuma amiluo ea yetemeriba, mia amijamo kalo ka amijikia ala lelan tomu nalo na yetemeriba napano maka avar tovo ea mamerinialo napano Atua midu joa kanano tomu na memedu nalo. <sup>5</sup> Mo buruolu nalo nei, maka ajamo kalo ka ajikia auebinvin tomu amarmaro, mia amijamo kalo ga ka amijikia aikitkitilo

rivanvano-o rivokar siberio ve jimo. Ana bogo napano mia atumã ala tibe na rivanvano, tomu nalo ajog niabele nalo ajalele reraio. <sup>6</sup> Ka bogo na, ve telabo averinavo bo ka amãarmãaro ga, mia amijikia asiravo mãarabo na amãarmãaro eaio, mia mãariano naio maka sidomlo, mia tuvanlo atu tibe na ga.

<sup>7</sup> Ana surubu nalo nei, bogo na nebiti batitiglo, nalo ajavukia bue kulorinio napano tomu na mira nalo mã abarlo. Amiyako pariparilo bija batubatu na abieko ka niogo, ana bogo napano nebiti vatitig miralo, nemiilo ka napano ajibe ka toro ga. <sup>8</sup> Mia vijulo aburon javukia tira vijinio, mia mãarjuvolo javukia kuli kialo parinio tubo mãarjuvono memedu. <sup>9</sup> Amilaŕo baerelo ka butoto, a bogo na mã amier janea vio, sibialo nalo amalmalio, ajavukia bue kulorinio nalo napano aburu rukuruku aburo aban ka ala mira. <sup>10</sup> Mia surubu nalo nei be bulajielo joalo, bija vite na be niononoti ka mã julu tomu nalo joaio, napano mia amijikia atulu kulorinio kanio riva rivokar siberio ve jimo. <sup>11</sup> Nalo abe kanalo parinio tubo tai, naina be nailiano tai, mia maka ve Atua kanano nailiano, mia be nailiano napano naio bitikar mãaratavo na bulukusebi. Toro nene siano jel ea Ipru, abio ka Abatono, a ea Krik, abio ka Apolion, napano sio juo nei nioti nene be toro na mila bulag saba.

<sup>12</sup> Naina naruei surubu nene nalo, napano naio be moti ea jogvaiano tolu na jikili nei. Mia nemial ka napano naio ba bar laka ruei, juo nene ju kiano vo.

*Simeduo ari nene miolu: Naio be nailiano na mã mue tomu, napano naio be juo nene ea jogvaiano tolu na jikili*

<sup>13</sup> Bisi na, nailiano ari naio miuvu kiano simeduo, ana nomijog iliano tai maluvo ea sudu veri na boda lu napano amimãaukanio ea niogo

napano naio joa vio lu ea Atua mirano. <sup>14</sup> Iliano nene mil ban nailiano nei, ber jibe nei berinavo “Nailiano veri nalo napano aju amior vatitig nalo ajua vio na uei napano mieraro napano abio ka Yuvretis, vonganei naruei be bogo na jau kova kotuvanlo avava tavio bereio.”

<sup>15</sup> Nailiano nalo nei, nalo abokar vatitig nalo jibe na ba bokar aura nene memedu ea legiano nene memedu ea siberio nene memedu napano amijikia ataluvo bereio ka ava ala kanalo imãauano nalo. Ana nailiano dolu naio ba juvanlo, mila na ajaluvo, aban janea buruvenuto nalo ka amue tomu nalo vaataro ka rivokar tomu na yetemeriba togio.

<sup>16</sup> Nalo aban bija kanalo tomu na mira nalo napano abar kanalo bue kulorinio na mira, ana nomi-jog napano aberial kanalo mirano bokario taamãaka toromomou juo [200,000,000]. <sup>17</sup> Ana bogo napano nebitii bue kulorinio nalo nei bija tomu napano mã ajutano mave ealo, nemial napano butoto vite na amidu joko baerelo, amiyovovua bo abilvili javukia sebi, abe si javukia bulunio-govu, a amijelea javukia mãerenio. Kanalo bue kulorinio nalo abe dolu, napano pariparilo bar kuli kialo parinio tubo, mia bogo napano aburu jegi nemial be sebi a iou a vijinio bulusebi amiyotuba ea niolo. <sup>18</sup> Vite tolu nei naruei, sebi a iou a vijinio bulusebi, amila na vaataro ka tomu nalo na yetemeriba togio rivakovio ka bogo na. <sup>19</sup> Moroano na bue kulorinio nalo nei ajoa venia napano miyotuba ea niolo, a ajoa bulajielo bunu, bior bulajielo mijukonkon jibe ka mãaro, a javukia parinio mãaro joa juluvati jiolo napano naio jian burumãara jaleleano ban tomu nalo.

<sup>20</sup> Jogvaiano nalo nei ajikili laka jibe na, mia tomu nalo togio toru, nina nalo napano mã ameul kiano vo, maka asidomialio. Maka lele aviliglo ka kialo imãauano va nalo napano jumãalo ga jo mimãaukanio, mia aju ajidel dolu ga ka amilotu ka

simþaro nalo, a ajumþa abolkouo ka tavoru nalo na kanalo atua nalo, napano maka ajikia asirarago, napano maka ajikia ajoglubar vite, napano maka ajikia aiel, napano toro ga miþau kalo ea niogo þeli ea veru na miuvu þeli ea butoto þeli ea puruveru þeli ea iesi. <sup>21</sup> A bija nina, maka aviliglo leleio ka kialo bajago na mþa amuebinvin toro, þeli semei nalo, þeli amijuku bova ka tira, þeli kialo vinauano nalo, na mþa aju amila.

## 10

### *Nailiano tai midu niosi telisu napano mþa amijuku batove*

<sup>1</sup> Karina nemial ka napano nailiano dolu tai na be þirinio juvan vio mave batove. Naio miya melijo jibe ka napano kanano kulumþarauo, a sibovivi tai jeliviv ea parinio, bija mirano na naio jibe ka mþerenio, a jaano be juo ajavukia burumþara mþarteia mia abe sebi. <sup>2</sup> Mo nemial ka napano naio midukar niosi na telisu tai, napano naio bisi dea kamu kanio ea jumþano nalo. Ana naio midu jaano meruo biekar ka tei, mo jaano mali naio biekar ka borotano. <sup>3</sup> Naio jumolu jibe na ju, naruei naio juvan burumþara iagiano tai napano naio jibe ka laeon, mia bogo na naio mila, tubaalo nalo amiolu meran binimeia, amil ban naio ea kanalo saburuburiano nalo. <sup>4</sup> Bogo napano tubaalo nalo ajaraburuburu jibe na, ana nojidom nevitauia bulag kanalo iliano nalo, naruei vaataro ka kiniou netikar nala, ana iliano dolu tai juvan vio mave binimeia ea kiniou, naio berinavo "Jau kotovo, jau kovitauia bulag re kanalo iliano nalo na. Vite nalo napano mþa aju aberenio, nalo maka ave tena tomu nalo amijikia ajikia."

<sup>5</sup> Iliano nalo na jibe nei, mia nailiano nei nua nemial naio biekar tei a borotano, naio jian jumþano meruo bavun mave. <sup>6</sup> Ana naio ber kanano iliano na jikili tai, naio

berkar ea naio napano meul jo jobo jo siano, napano mþa naio jii vio mave bija venia na mþa ajaiao, bija yetemeriba nei bija venia na mþa ajaiao, bija tei, bija venia na mþa ajaiao. Iliano na kanano naio ban jibe nei, naio berinavo "Vonganei naruei maka bunu ve bogo na kotoreia! <sup>7</sup> Vaataro ka bogo na nailiano aluo nene rimeia riuvu kiano simeduo, mia ver naio rila bisi, mia Atua kanano jidomiano viniviano nalo aviniu ayotuba medave, vite nonovio amalmaluvo tavukia ga napano naio berial beamu ban naverialiano nalo nanua mþa ajumþa amimþau kanano."

<sup>8</sup> Naio ber jibe na ana kiniou bunu nomijog iliano dolu tai jel mave binimeia ban kiniou, naio berinavo "Niosi telisu nei napano betavo joa nailiano nei jumþano napano naio jumolu jua tei a borotano, kova kodu beamu."

<sup>9</sup> Mia naban vaataro ka nailiano nei, nebika niosi telisu nei denio. Mia naio mijamo ka ga ban kiniou, berinavo "Bo ga, komijikia koduo. Ver koduo, monoka kosenio. Mia nemijikia never kaso ver bogo napano mia kosenio, mia kojog ka seseiano nene rivu ea niomo, avona bisi, mia jau kojog rijeia ea mabomo."

<sup>10</sup> Ana kiniou nomidu nejenio, mia naio jesei bo ea nioku. Mia nojiomo dodomu ruei, mia jibe ka ga napano naio berenio, napano vite nene mila maboku bova laka.

<sup>11</sup> Karina, iliano binimeia ban kiniou vaarakurano bereio, berinavo "Tibe ga na naruei, bior ka napano verialiano dolu jo napano mia monoka kava koverialio bereio, napano aberii taara þiliþili nalo, buruvenuo nalo, tomu na iliano kinkin nalo, a parinio tubo nalo napano mþa aju yetemeriba nei."

## 11

*Tomu juo na amijakar Atua kiano iliano*

<sup>1</sup> Ana ea bogo na amidu javiniu tai joa juñaku, aber ka mia nava nejetele ea vio nalo vijaio. Aberinavo “Jau kavan ea Atua kunuano Yimo Lu, kejeteli ea vatitigio burutomoruo nene juñabe, a kejeteli ea boda napano ña jo joomo eaio, a kovuluku tomu nalo na ña aju amilotu ea vio na, abokar vio. <sup>2</sup> Mia burumñara tanobuku napano jotavio kanio, nina mia kejeteli ea re, bior naio be vio togio na Yimo Lu napano tomu nalo napano maka ave Ju mia nalo aduio. Valauo nalo nei mia amei atovulu burumñara komeli lu nene Yerusalemo, mia nalo amei jouro aiel tanea vio nene tibe ka kialo vio, mia nina aimaukanio riva vokar siberio ve duelimo va veri ba juo ga [42]. <sup>3</sup> Mia bogo na atua vio na, mia tomu juo napano aju jikili ea ilirianiano na kanaku ayotuba. Mia naljuo aya ñadabake ga tibe ka kialo kulumñarauo, mia nalo averial kanaku iliano ea tikariano na siberio nalo na riva rivokar juluvati nene, napano legiano nalo nene abokar menu takurano toromomou juo duelimo va ari [1,260].”

<sup>4</sup> Tom juo nene, iliano lu na Atua kanano beriilo nua ruei, naina napano berii berinavo be burupati buruolivi juo naio ju, þeli napano berii be ñarte na kadel juo, napano abe juo ajumolu aju kamu ka kiado Atua mirano nei napano naio be tubo ka yetemeriba reraio. <sup>5</sup> A verenio bogo tai toro tai rilavon ka rila vite na bova tai ka naljuo nei, mia sebi mijikia riyotuba ea niolo, mia rijikia rila niadua kanalo uolu nalo. Naina naruei be ñarabo na ver toro jidom ruebin naljuo, mia naio ga naruei sen kanano ñariano bereio. <sup>6</sup> Naljuo nei be kialo burumñara moroano, ka napano amijikia averbure vio yauo mave ka mia yuo rivovo re rimonloglog bogo napano ajumña aberial Atua kanano iliano, a mia amijikia ala uei nalo amei ve burukija, a amijikia ala ka napano jaleleano kinkin þeli bo-

gokouo rimej rila lelan yetemeriba ea bogo na vabe ga napano naljuo ajumña ajidom ka alaio.

<sup>7</sup> Naruei naljuo nei, mia averial Atua kiano iliano riva vokar bogo napano naljuo aimau tibe na ribisi. Ana ea bogo na naruei, mia burumñara temeul na bova napano naio jotano joomo ea bulukusebi naio riyotuba rimej ka naljuo, a mia kanano moroano tovulu naljuo, ruebinvinlo ave juo. <sup>8</sup> Mia avuku salo tasimñaro nalo amon ea ñarabo iviso ea burumñara komeli nei napano be komeli nene kia ga vo napano kialo Tubo, naio bunu ajukukakar naio ñaro ea ñakolkolo eaio, ea bajago na ililuklukuano, bogo tai aber komeli nei siano abio ka komeli moruo na bova na Sotomo þeli vio Ijivi. <sup>9</sup> Mokotenalo be juo aju amon tavio jibe na, mia taara na tomu nalo ve miroano, þeli na yati nalo, þeli ea iliano nalo, þeli ea uleule nalo, amei ka aial naljuo, a mia averbure ka mia ativin re naljuo-oa bogoti ve tolu togio. <sup>10</sup> Mia bogo na ña aju abitii mokotenalo be juo banbano na, mia amiyotel ealo toru a abital niegeniegelo. Mia nalo atu asidomii jogvaiano nalo napano naverialiano juo na ña aju amila binimej ka tomu nalo na yetemeriba, ana mia nalo asaaro mia asaaro ka napano tomu juo nei amarmñaro ruei, mia ala burumñara jokoluolu a mia aje jidomiano vanlo bereio rivorio.

<sup>11</sup> Ana iorou ka bogoti tolu togio nei barlaka kario, mia maka ativinlo ave juo vo ana amiilo ka napano jegi na meuliano tai jaluvo den Atua binimej jokol tasimñaro juo nei, mila naljuo ajumolu bereio ajikili aju. Bogo na tomu nalo amialio, amerou mia amerou, <sup>12</sup> a maka vesiou, amijog burumñara iliano tai jaluvo ea vio mave binimej mil banlo abe juo, naio berinavo “Mo, kam ve juo kumijikia kumej mave naruei.” Naruei vaarakurano ga abe juo abavin amiduburevure melijo

ba aboru mave, napano kanalo uolu nalo nei ajikili aju vovu garuei abitivitiilo bano mia maka bunu ajikia aver titai.

<sup>13</sup> A monloglog bogo na, borotano mikulkulu toru, mila napano komeli tivelinio, yimo nonovio ajibirbili aburu kokorovio naruei, a tomu nalo napano aarmaro ea mii mikulkulu nei abokar menu aluo [7,000]. Nalo na ameul aju bo ga amial vite nei amerou tanea, ana amial aber bo ka ailivu ka Atua na mave rivior kanano buruara moroano nei napano abitulubario.

<sup>14</sup> Mii mikulkulu nei mila be buruara jogvaiano juo nene naio bar laka ruei, mia tolu nene naio maka vo, naio mia rimei vesiou re.

*Simeduo aluo nene miolu: Bogo na tibureiano, napano naio maariano ka jogvaiano tolu na jikirkili*

<sup>15</sup> Bisi na, nailiano aluo naio miuvu kanano simeduo. Nina mila napano jono miroano aber bulavulag buruara iliano nalo na mave, amilivu ka Atua, aber jibe nei

“Vonganei naruei vio nonovio napano beamu aju yetano ka tubo va na yetemeriba nei, aju yetano ka Tubo Atua na kanado, naio bija Naverikariano na kanano.

A mia naio rive Parinio tubo riva rijikia ribisi deio.”

<sup>16</sup> A bija nalo, nalo navagadeano duelimo valuo ba veri [24] nene bunu, napano ajuma ajutano ea kanalo jobaro nalo, aminie tano kamu ka Atua mirano, amilotu kanio, <sup>17</sup> aberinavo

“O Atua Soþi na moroano na mave, jau nanua koju beamu, jau na mia koto vonganei, jau napano mia koto bogo na mia jo rimei.

Kumemi nuber siva toru banso bior komidu bereio kanamo moroano na toru ruei, vonganei naruei koju jikili ea kanamo tuboiano.

<sup>18</sup> Beamu, buruvenuo nalo na yetemeriba ajermi kaso, mia vonganei be kanamo bogo na koverial kanamo siniabu vanlo.

Vonganei be bogo napano mia jau kotibure tomu na mariano, a mia jau kala lelan tomu nalo nanua ma amila lelan kanamo yetemeriba nei.

Ana kanamo tomu na imauano nalo, naverialiano nalo, bija kanamo namoneano lu nalo, a nalo napano ma aju abatove ka siamo, mia avar kanalo ijaiano novo nalo ea bogo na, bekurano ka napano abe tomu na tortoru þeli abe tomu na tertelisu ga ea kanamo imauano.”

<sup>19</sup> Ana ea bogo na abetavo ka Atua kunuano Yimo Lu na mave ea siraragiano na tomu nalo kialo, mia amial basidobidobi lu na tuboiano lu naio ju. Mo vaarakurano ga, vio binimei mkekeano bior Atua kanano moroano naio jo, napano vio bijiiio bija tubaalo joma jaara, vio malmalio, mii mikulkulu, a buruara kenieno kurukuti yuo aes tai mijoru.

## 12

*Tira tai kirinovo bija buruara kenieno niobi tai*

<sup>1</sup> Kiniou nojoma nebitii vite nalo na mave kia ga vo, ana nemial buruara kijokijo tai napano naio be tena iloiano. Nina be tira tai, napano naio midu merenio, miako ka naio jibe kanano kulumarauo, a naio jumolu ju mave ea siberio, a kanano batubatu na parinio, marvitano duelimo ba juo [12] juaio. <sup>2</sup> Tira nene naio jo be mabono, ana naio mijog bova jo miaga souo, bior be kiano bogo ruei, vaatara ka rivar kenerinio.

<sup>3</sup> Nojo nebiti naio kia ga ana buruara temeul dolu tai miyotuba mave, napano be tena merouano laka. Nina be buruara kenieno niobi tai, naio bilvili, be parinio aluo

napano abar batubatu na parinio tubo nalo kanalo, tai bar tai, tai bar tai, be bunu salo pasimeduo jua pariparilo nalo nene, biniu be duelimo [10]. <sup>4</sup> Mia vaarakurano ga tenei þilig jieno mikulkulu jibe na, muebulag m̃arvitano miroano ea vio yauo, buku lo aban ea vio nonovio na yetemeriba. Ana tena bova neibano naio binimei ju kamu ka tira nei mirano, kiano jidomiano jororea ruei ka ver tira neibano naio rivar kenerinio, mia vaarakurano ga naio serbin senio.

<sup>5</sup> Naio jo jibe na bano na tira neibano naio bar kenerinio, bar be suñano. Ana Atua naio jidom ka kiritete nei rimei ve parinio tubo na rivokar butoto ka juñano ka rive tubo ka tomu nalo na yetemeriba, ana bogo napano temeul na kirivova nei naio maka rivokar kiritete nei vo, mia amidular den vaarakurano garuei, amidu bavin ban Atua mave ea buruñara kanano jobaro. <sup>6</sup> Mia tira nei naio merou, naio buro ba joluku ea vio yauo, ea vio tai napano Atua mila batitig be kanano, mia ba juluku ea vio nene, ajirag naio ka bogoti telabo, bokar menu takurano toromomou juo duelimo va ari [1,260].

<sup>7</sup> Mia ka bogo na, be buruñara mira tai maluvo ea vio mave. Parinio nailiano napano Maekel bija kiano nailiano nalo, amila mira kean buruñara kenieno niobi napano, mia naio bunu naliko kiano nailiano nalo amila mira jikili bunu keanlo. <sup>8</sup> Nalo amila mira jibe na bano-o, bokar bogo na niobi nei kanano moroano batove, naruei naio naliko kiano nailiano nalo ajibirbili abatove. Naruei amila bulaglo laka, amije vironiano banlo, abar bulag jelelo na ea vio mave denlo. <sup>9</sup> Mo buruñara kenieno niobi nei, abukulario den vio mave vaarakurano, naio batove ea yetemeriba, naio bija kanano nailiano nalo nei.

Naruei ea bogo na mia kiniou

nebitilubar ka buruñara kenieno niobi nene naina ga napano beamu nuanua laka naio midu maro mirano, naio be toro na m̃a napano abio ka Siñaro, þeli Setano, napano vonganei ea kiado bogo, naio kia ga navo, naio joñã buru yetemeriba reraio ba milaluvu m̃arabo julaka.

<sup>10</sup> Mia iorou, nomijog buruñara jooa tai bio toru janea vio mave, naio berinavo

“Vonganei naruei Atua kiano ioruriano naio jumolu,

Atua kiano sikiliano naio jodovulio, Atua kiano navenatuboiano naio miyotuba,

moroano na kanano Naverikariano naio jo loa laka ka vite nonovio.

Vonganei naruei toro na bova nei napano m̃a joñã mil die m̃aratavo nalo na be Yesu kiano, naio bisi ruei.

Legiano a bogiano naio jumolu jukamu ka Atua mirano naio milavon ka verbulag ga tomu nalo kialo kariano nalo, ana vonganei naruei, abukular naio ruei.

<sup>11</sup> Namoneano nalo miroano maka bunu asidomial kanalo meuliano,

nalo maka amerou ka m̃ariano, mia aju jikili dañariga ba bokar bogo na ajovulu toro na bova neibano,

ana venia napano abokar ka juñalo ka ala mira vijaio, naio be burukija na Nunu Solbouo ga, bija iliano nalo na averial kanalo moneano ea Yesu.

<sup>12</sup> Ajodovulu toro na bova neibano, mila na vonganei mave bija nalo nonovio napano ajuaio, amijikia asaaro mia asaaro, mia nalo napano m̃a aju yetemeriba þeli ea tei, mia ajog rivova, a monoka amerou, bior Siñaro naio batove jo iviso kalo bija tiniene bujo ka siniabu, bior ka naio mijikia ka kiano bogo telisu ga, vaataro

ka riviniu, naruei mila naio be deden lie vo.”

<sup>13</sup> Ninei be iliano napano toro tai berialio ea vio mave, karina kin-iou nemial ka buruŕara kenieno niobi neibano naio bitilubar ka napano abukular naio batove ea yetemeriba, mila na kiano siniabu bavin lie vo, naio berkar jikili ka mia naio monoka rivokar tira nei navo, napano naio bar kenerinio sumano ruei. <sup>14</sup> Naio ba milavio ka tira nei, mia naio miilo ka aŕian sibiano juo ban tira nei, javukia sibiano buruŕara bebekumo, ka naio rijikia rier rivuro riva toluku ea vio tai ea vio yauo napano amila batitig ka abitkar naio eaio. Naio ba jibe na, naruei buruŕara kenieno niobi neibano naio maka rijikia rivokar naio ea vio nene, mia aberinavo mia naio monoka toa vio nene bogo vetebievi kija, napano ve yuka takurano, karina yuka ve juo, karina ve togio bereio.

<sup>15</sup> Vonganei niobi naio mial tira nei jo mier bano, mijikia ka naio maka rijikia rila titai, naruei mila siniabu lie vo, jumolu mijuluo ka buruŕara ueimiya ka rivurular tira nei van vudodom naio. <sup>16</sup> Buruŕara uei nei naio jo mieraro bano, vaataro ka rivokar tira nene, mia amiilo ka napano vaarakurano ga, yetemeriba tinien miia tira nei, naio miija naio ka napano borotano buruŕe, naio betavo jibe buruŕara niono tai, ana naio jiniomo uei napano niobi mijuluo bulagio jaluvo ea niono. <sup>17</sup> Niobi mialio, vonganei kiano siniabu binimej bova laka, mia naio juvan tira jo, naio berinavo mia naio rivan ka kenerinio nalo ga, nina tomu nalo na ma aju ajakii tuboiano na Atua kanano, jibe ka nalo na ma aju abokar jikili Yesu kanano iliano nalo.

<sup>18</sup> Naio ber jibe na, ana batavio bija kanano buruŕara siniabu, ban ka rila mira die nalo dolu nei.

### 13

*Temeul va na be moti, napano*

13:1 Visi 17:3,7-12

*miyotuba ea tei, niobi mije moroano banio*

<sup>1</sup> Buruŕara niobi nei miel ba jumolu jua tei tivelinio ju. Ana maka vesiou, nemial temeul tai jaluvo den tei binimej ka naio. Vite meul nei be parinio aluo, pasimeduo nene nalo bokar duelimo, a ea simeduo beve terakurano be batubatu lu na parinio tubo kanano naio jo jaklele ealo. Ana ea merinialo beve terakurano, abivitaui sio tai jualo, napano ioluoliano ka lalelan tolu na Atua kanano. <sup>2</sup> Vite meul nene nemial be dolu laka, napano naio jibe ka jidom tibe laeon kija, bior niono jibe kuli kialo parinio tubo memedu, mia jaano veri jibe ka temeul deden dolu javukia bea. Naruei naio binimej jikili jukamu ka niobi, ana niobi mije sikiliano banio, mila naio be parinio tubo ea kiano tanobuku nalo, juvan moroano nonovio banio.

<sup>3</sup> Mia nebiti vatitig vite meul nei bija kanano pariparinio nalo, nemial napano kanano parinio tai bar niajebijo tai napano toru laka. Bogo napano naio bar menko nene, ka naio riŕaro ga riviorio, mia tomu nalo na yetemeriba amiilo ka amieliel ka binimej bo, ana mila nalo abilig kialo jidomiano amonea toro meul nei naruei, aju ajakisorio.

<sup>4</sup> Jibe na, tinielo vite meul nei, ana bogo napano amial ka napano niobi mije moroano banio ka rimej sikili batitigio, ajaaro toru, amilotu ka niobi, a amilotu ka toro meul nei napano naio jo jukamu kalo. Aju aber jibe nei, aberinavo “Kei naio mijikia tovulu kanado toro meul ea mira bogo tai? Vonganei maka toro dolu sikili batig tibe naio.”

<sup>5</sup> Mia bogo napano vite meul naio binimej jikili batig bo jibe na, naio jikar ka mila kiano vovaiano nalo. Naio jo juvan kanano ilivevaviniano, jo mioluolu janea vio, a jo miŕau bija kanano moroano va, a mila ba bokar siberio duelimo va veri ba juo [42], nina yuka tolu togio [3½]. <sup>6</sup> Ka bogo na, naio jo

mil niegeniege Atua, naio jo miolua siano, a naio jo buku iliano nalo na bova ka mave a ea kulo lu napano ajuaio. <sup>7</sup> Sikiliano na amije ban naio bare ka naio rila sebi rivan ea namoneano lu nalo, riva rijikia tovulu lo, a moroano na m̃a naio jo miduio, bare ka naio rije tuboiano ea taara ninio nalo, tomu nalo, iliano nalo, vija uleule nalo. <sup>8</sup> Naio mijikia rive tubo tibe na rivano-o rivan nalo nonovio na yetemeriba mia avatove ka naio, mia nalo tealo maka avatove kanio, a nina be nalo ga napano jikar ea tikariano na yetemeriba, sialo abivitauia ju joomo ea niosi na meuliano na nunu solbouo nanua amuebin m̃aro.

<sup>9</sup> Jau napano m̃a komijog iliano nalo nei, ver be tiliniemo bo jo, bo jau koiagago vatitig rivu. <sup>10</sup> Namoneano napano mia avina ka naio ea kanano buruvenuo riva rim̃au kanalo, naio monoka rivan ga na. Mia nana mia atektorov burujono ka iobogu na mira, riano, mia iobogu na mira monoka tekrov burujono ga. Ver ve bogokouo tai tibe na, mia namoneano lu nalo monoka atumolu atu sikili rivija jidomiano na tebievi, monoka aviekouo rivanvano-o avar duluio avokar juluvati nene.

### *Temeul va juo nene, napano naio miyotuba ea borotano*

<sup>11</sup> Ana iorou nemial temeul dolu na bova tai, mia naio mijivi mave ea borotano binimei. Naio pasimeduo nene juo ga, jo ga jibe ka nunu solbouo tai, mia bogo napano naio mil, joono javukia niobi nanua beamu.

<sup>12</sup> Ana temeul na be moti naio mijamo ka juo nene miñau bija kanano sikiliano a kanano moroano nonovio, ana naio miñau banbano-o mila napano yetemeriba bija kanano tomu nonovio aju amilotu ka temeul na be moti, naio napano bar menko na m̃ariano napano amieliel kanio. <sup>13</sup> Ana juo nene naio jo miñauka jameri-jiano na tortoru bija vite na iloiano nalo, banbano-o

naio miñauka tai napano mila sebi jaluvo ea vio mave binimei yetano ea yetemeriba ea tomu nalo miralo napano aju abitiio. <sup>14</sup> Naruei ea kijokijo nalo nei napano naio jo mila ea siano temeul na be moti, naio jom̃a mila sibilili tomu nalo na yetemeriba, naio burulo aba amiavovu laka.

Naio berial kalo berinavo ate tavoru na temeul na be moti, napano iobogu na mira jeio mia naio meul bereio jo. <sup>15</sup> Ana amiñaukanio bisi, ana amidu moroano ban temeul juo nene ka naio rila tavoru nei mijikia rivuru jegi, a mijikia ril, a amije moroano ban naio ka rijikia ruetañaria toro kei napano naio maka saaro ka rivatove ka rilotu ka tavoru nei.

<sup>16</sup> Mo bija nina, naio jikili ka aviniu monoka aue toto tai tualo, ea juñalo meruo ver makanio ana ea mamerinialo. Tomu na tertelisu bija tomu na tortoru, tomu nalo na m̃a abe talim̃asa a tomu nalo na abe sanibaiano, tomu nalo na im̃auano, bija kialo boru nalo, aviniu avar toto nei. <sup>17</sup> Ver makanio, maka ajikia avulu vite ea yimo na ṽiliñiliano, a maka ajikia aṽiliñili ka titai rivan toro dolu.

Toto napano amue jualo, naio miyotuba ea siano temeul nei, naio jibe ka mirano na kanano sio.

<sup>18</sup> Jau napano mia kovuluku niosi nei, monoka kove masou rivu ka vio na. Ver komijikia kovitilubar vatitig rivu vite nalo nei, mia komijikia koleal merano na tomu nalo sialo, mia amijedu merano na temeul nei siano, amileal bokar toromomou ari duelimo va ari ba ari, p̃eli jibe napano tomu tealo aberenio, ari ari ari [666].

## 14

### *Nunu Solbouo bija tomu nalo menu toromomou takurano duelimo va veri ba veri [144,000]*

<sup>1</sup> Bogo tai bereio nejirarago bano, nemial burusuku na Saion naio jo

kamu ka kiniou, a mave ea jumoti levlevi ana nemial nunu solbouo naio jumolu ju, naio naliko buruñara tiniobi na tomu nalo na kanano tai. Nalo abivitauia siano bija karamño Atua siano joa merinialo, nalo miroano laka, merano ba bokar menu toromomou takurano duelimo va veri ba veri [144,000].

<sup>2</sup> Ana buruñara malmalioano tai miyotuba ea vio mave, jovulu malmalioano na tei moñavu ea baraaña þeli malmalioano na tubaalo. Ana nemiagago napano be malmalioano na þi mñarau nalo napano ajuña amueio, <sup>3</sup> a nalo ajumolu aju kamu ka vio lu, kamu ka temeul veri nei bija navagadeano nalo, ajuña amiou ka iouano vou tai. Kulo dolu nalo miroano tinielo jii iouano nene toru, nalo ajidom aiou ka bunu, mia nalo maka ajikia ala kakario. Nalo ga napano amijikia amiou kanio, nina be tiniobi na menu toromomou takurano duelimo va veri ba veri [144,000], napano abulu bulaglo den yetemeriba. <sup>4</sup> Nalo nei naruei napano maka lele avijuku vova ka tira bogo tai. Nalo abokar vatitig kanalo meuliano meravo bo julaka, a ajuña jakisor Nunu Solbouo ban ea vio na vabe napano naio ban eaio. Tomu telabo aju, mia nalo nei naruei abulu bulaglo ajaluvo den dolu nalo, mia amila lo abinimei jibe jidomiano tai ea mñariesi na be moti ba ban Atua bija Nunu Solbouo.

<sup>5</sup> Nalo nei maka lele sibiano riyotuba ea niolo, maka ve vite na bova tai toa kialo meuliano.

### *Nailiano nalo tolu*

<sup>6</sup> Ana ka bogo na, nemial nailiano dolu tai joña mier janea vio mave. Ajian iliano vou na bo nei napano maka rijikia rivakovio bogo tai banio, ka naio rijikia riva rioliolu tanea tomu nalo napano mña ajua yetemeriba, ka riva rivokar venuo nonovio, taara na tomu nalo nonovio a iliano ninio nalo.

<sup>7</sup> Naio jo berial janea vio bija buruñara jooono, naio berinavo “Kamiau kuvatove ka Atua, kuvidular vavin siano, bior napano aura na naio tibure yetemeriba nei naio maluvo ruei.

Kamiau kuvilotu ka naio napano naio jii tiniabene, yetemeriba, a tei, bija burupati uei nalo.”

<sup>8</sup> Ana iorou ka nina, nailiano juo nene tai naio jakisor binimei napano joña bio jibe nei, berinavo “Komeli kirivova na toru nei Bapilon naio mijoru ruei!

Naio ba midu atua na maka rive riano, ana buru tomu dolu miroano amiavovu bija naio, nalo ajavukia tomu nalo na mña parilo jeliviv ga.

Mia vonganei, buruñara komeli nei naio binimei bova ruei bija kanano tavoru nalo.”

<sup>9</sup> Ana bogo tai bereio, nailiano tolu nene naio jakisor naljuo binimei, berial medave berinavo

“Tomu ve telabo anie tano ka alotu van temeul va rivija kanano tavoru, mia nalo ve telabo ajamo ka atirikar kanano toto toa mamerinialo þeli ea juñalo.

<sup>10</sup> Toro na jibe na, buruveru na bitunu ea bulukupil na mia sisen mokotenano ea nailiano lu nalo miralo, bija ea Nunu Solbouo mirano.

<sup>11</sup> Bonoti va na kanalo jogvaiano mia naio to rimaluvo damariga ea sebi nei napano maka rijikia rimaro bogo tai. Nalo napano amilotu ka temeul va nene, aturbanini ka kiano tavoru, vija nalo napano abar toto na siano ea niabelo, nalo maka ajikia avokar vio na jilimebiano na bo, mia atomon ga aial jogvaiano legiano bogiano damariga rivano.”

<sup>12</sup> Vironiano nene napano nailiano naio jo berenio naio kirisikili laka, ana mila na kito namoneano

lu nalo monoka rotumolu rotu sikili vija kiado jidomiano na tebievi, a monoka romonea tuboiano nalo na Atua kanano, a monoka rotu rove riano van Yesu bogo nonovio. <sup>13</sup> Ana kiniou nomijog iliano tai juvan vio mave, berinavo “Ninei be iliano tai ka jau kovivitaui bulagio. Naio ber, tikar vonganei rivano, nalo na mia aĩarmãaro, napano kialo meuliano naio jo bo ea Tubo jumãano ruei, mia nalo avar ilivuiano ve toru.”

Iliano nei bisi, ana nomijog Niu-nuno mijamo kanio, berinavo “Nao, nalo na mia kialo iĩauano novo nalo amei mave vijalo, a vonganei, mia aiĩau re bunu, mia nalo aje kialo jilimebiano na bo.”

*Nailiano tolu nalo aba abar sinaniano napano meruo ea yetemeriba nei*

<sup>14</sup> Ana nemial bereio, ana melijo na miuvu tai naio jukamu ka kiniou, ana nemileal toro tai, jibe ka Kulorinio Kenerinio, naio jomãa jotano mave ea melijo nene. Naio jotano jo bija parinio tubo kanano batubatu tai ea parinio, napano amiĩauka ea niogo, a ea jumãano naio midukar taþig iobogu tai napano mali laka ka te bulag jirati mĩarati sinaniano.

<sup>15</sup> Ana nailiano dolu tai naio miyotuba ea yimo lu, naio bio ban naio napano jotano mave ea melijo nei, berinavo “Mo, jau kotumolu, kodu kanamo iobogu, kava ketikar iĩauano. Sinaniano nalo napano aju yetemeriba nei ameruo ruei, vonganei naruei be bogo na kova kete bijilo.” <sup>16</sup> Mia naio napano jotano mave ea melijo naio jumolu, buku kiano iobogu janea vio yetemeriba, naio je sinaniano nalo napano amermeruo aju.

<sup>17</sup> Ana nailiano tai bereio miyotuba ea yimo lu na mave ea tiniabene, napano naio bunu midu taþig iobogu tai, napano mali bo bunu. <sup>18</sup> Ana nailiano tai bunu binimei bereio, nina be naio na mĩa bitikar bulukuti sebi, naruei

naio jel ea boda binimei bio ban dolu neibano naio midukar iobogu neibano, naio berinavo “Mo, jau bunu, be bogo na kava kala kanamo naruei. Jau kodu kanamo iobogu kava keselivivi ea tilikrevi selivivi ea yetemeriba, ketebijii mĩarati nalo napano ameruo ruei ajaklele aju.”

<sup>19</sup> Naruei nailiano nei mijogio, juvan kiano iobogu ban yetemeriba, ba miobijii mĩarati krevi na yetemeriba, naio bukulo ea vio na abuþi bulag vati nalo napano aju tavio ka komeli. <sup>20</sup> Mia Atua kiano siniabu mila niegeniegelo, budig vatitiglo banbano mĩa burukija miyotuba, miou miou binimei toru jibe ueimia, naio mison buruvenuto nonovio, bululuo bokar kulorinio burujono, banbano-o jibe na mia miralo bulati.

## 15

*Nailiano aluo bija bogo va aluo, napano na maariano*

<sup>1</sup> Kiniou nojo nebitivitii vite nalo na mave ea tiniabene kia ga vo, mia maka vesiou nemial burumãara kijokijo dolu tai napano naio be vite na iloiano laka. Nina be nailiano aluo, napano abar bogo va aluo nalo nei napano na maariano. Nalo abe na maariano jibe na bior ver napano avar laka ruei, naina naruei mia rila Atua kiano burumãara siniabu ribisi ea vio nonovio. <sup>2</sup> Ana nemial burumãara vodobi tai, banbano jibe ka tei, mia nina naio sebi joaio, a naio merera javukia mermerobi. Ana ea tivelinio na vio nene, nemial tomu nalo miroano ajumolu aju, a nalo nei, nina tomu nalo aviniu napano ajodovulu toro deden, ajovulu kanano moroano, ajovulu sikiliano na mirano na toto napano joaio, napano toro nene midu jibe ka kiano sio maraiu tai.

Tomu nalo na ajovulio, ajumolu aju bija kialo þii mĩarauo nalo napano Atua bar banlo, <sup>3</sup> mia nalo ajumãa ajerei kanio, amijev kialo iouano tai, nina be iouano na toro

na miñau Atua kanano Naveri-  
aliano Mosis, mia vonganei naio  
binimej napano abio aber iouano na  
Nunu Solbouo. Iouano nei naio jel  
jibe nei berinavo

“Aire Teta Atua na moroano,  
kanamo iñauano nalo abe to-  
mormoruo laka, a bo laka.

Jau kobe parinio tubo ka bogo  
nonovio, kanamo bajago nalo  
amemedu a abe riano.

<sup>4</sup> Jau kobe tubo, maka ve toro tai na-  
pano rijikia rimerou re kaso,  
maka toro tai napano rijikia  
rivatove re ka siamo.

Jau takurano ga kobe lu ri-  
ano, mia taara na tomu nalo  
monoka amei anie tano alotu  
vanso,

bior vonganei, vite na memedu  
nalo napano komilalo, nalo  
amoluo abinimej meravo bo  
ea tomu nalo na yetemeriba  
miralo.”

<sup>5</sup> Karina, nejirarago ba joomo  
bereio ea vio mave, ana nemial ka  
abetavea m̄aratavo nalo na yimo  
lu. Nemial jibe ka tabobo pan-  
pano napano beamu amidu lilian ea  
vio yauo, napano abar batitig Atua  
kiano tuboiano juaio. <sup>6</sup> Abetavea  
kario, ana nailiano aluo nalo amiy-  
otuba denio. Nalo amiya ku-  
lum̄arauo na teremi nei napano am-  
eravo bo, amerera, ajelan kialo ku-  
lubue napano amiñau kalo ea niogo  
kario ea baerelo. Ana amiel abin-  
imej, bija bogo va aluo nei napano  
ajum̄a abario.

<sup>7</sup> Abinimej ajumolu aju ana  
temeul veri nei tai naio jian  
basidobidobi niogo aluo banlo, tai  
midu takurano, tai midu takurano,  
abujovujo ka siniabu na Atua  
kanano nei napano naio jo jobo jo.

<sup>8</sup> Nalo abario bisi, ana bior na-  
pano burum̄ara miamoiano na Atua  
kanano moroano joa yimo lu nei,  
vio na sebi binimej bujo laka, mila  
napano maka toro rijikia riva joomo  
eaio. Naruei jo jibe na ga ban-  
bano bokar napano bogo va aluo  
na nailiano aluo nalo nei kanalo  
abiniuviniu kokoio.

## 16

*Basidobidobi aluo napano abujo  
magmago ka Atua kiano siniabu*

<sup>1</sup> Ana nomijog iliano na jikili tai  
miyotuba ea vio mave ba ban nail-  
iano aluo nalo nei, berinavo “Von-  
ganei, be bogo na kamiu kuvim̄auka  
kenemiu naruei. Kamiu kuviyon  
bulag veve terakurano basidobidobi  
nalo na kenemiu Atua kanano sini-  
abu rivan ea yetemeriba.”

<sup>2</sup> Naio berenio bisi, ana nailiano  
na be moti naio ba miyon bulag  
kiano basidobidobi ban ea borotano,  
mia sano uei nene mieraro ba mila  
menko va nalo amiyoyotuba ea  
tomu nalo napano toto na temeul  
va joa niabelo, napano m̄a amilotu  
ka kanano tavoru, mila na amijog  
napano niabelo mijalele m̄lea.

<sup>3</sup> Bisi na nailiano juo nene naio  
miyon bulag kanano basidobidobi  
ban ea tei, ana sano uei nene  
miou ba mila tei binimej be buruk-  
ija jibe ka toro na m̄aro kanano,  
ana temeul nalo napano ajaiao  
am̄arn̄aro nonovio.

<sup>4</sup> Karina nailiano tolu nene naio  
miyon bulag kanano basidobidobi  
ban ea uei napano mieraro bija  
burupati uei nalo, ana sano uei nene  
naio miou ba mila nalo bunu abin-  
imej abe burukija garuei. <sup>5</sup> Naruei  
nomijog iliano tai binimej den nail-  
iano napano naio jo be boru ka uei  
nalo na yetemeriba, berinavo

“Jau napano beamu kojo, mia jau  
koto banei, jau kobe nana be  
lu,

kanamo vironiano nalo nei ajikili  
m̄le, mia kanamo tibureiano  
naio memedu ga.

<sup>6</sup> Be riano ka tomu nalo na yete-  
meriba, amuebinvin kanamo  
kulo lu nalo,  
amila burukija na kanamo naveri-  
aliano nalo amiou,  
ana jau kojom̄a komila meran banlo  
memedu ga,  
napano m̄alo uei nalo abe burukija  
ga.”

<sup>7</sup> Ana iliano dolu tai bunu miy-  
otuba ea boda, berinavo

“Atua Soþi Na Mave, be riano laka, kanamo tibureiano nalo amemedu, abe riano laka.”

<sup>8</sup> Bisi na, nailiano veri nene naio miyon bulag kiano basidobidobi ban ea mþerenio, ana sano uei nene mila mþerenio binimej jikili lie vo, naio mijikia tunu tomu nalo na yetemeriba niabelo tibe ka sebi.

<sup>9</sup> Ana mia ajog vio rivitunu mia rivitunu, ana mia mþerenio tunulo rivan rivano-o mia atu aiolua niegeniege Atua siano. Amijikia ka naio joma juvan vironiano nalo nei binimej, amijikia ka naio mijikia verbure ver naio sidom, mia maka lele asidom aviliglo kanio, aber nalo maka ajikia avatove ka naio þeli ailivu ka siano bogo tai.

<sup>10</sup> Bisi na, nailiano jumo nene naio miyon bulag kanano basidobidobi ban ea jobaro soþi na temeul va nei, ana sano uei nene naio mieraro ban ea tanobuku reraio ea kanano navenatuboiano, mila vio bobogio laka. Tomu nalo amijog bova ka vironiano nalo nei, nalo ajer minalo banbano, <sup>11</sup> mia amiolua niegeniege Atua na mave bior niabele bivitunu bija kialo menko lu nalo, na ajuma amilakokoa ga, bior maka asidom ka aviliglo ea kanalo bajago moruo nalo.

<sup>12</sup> Bisi na, nailiano ari nene naio miyon bulag kanano basidobidobi ban ea burumþara uei napano ma mieraro na, siano Yuvretis, ana sano uei nene mila uei nei binimej jabo nonovio. Nina mila napano parinio tubo nalo na buruvenuo nalo ea tivelinio na mþerenio mijivi eaio, be kialo marabo ka avarkor vio amei vija kanalo tomu na mira nalo.

<sup>13</sup> Ana nemial niununo va tolu napano ajavukia niobi na uei, napano nalo tai miyotuba ea burumþara niobi niono, a nalo tai miyotuba ea niono temeul na kirivova nei, a nalo tai miyotuba ea niono naverialiano lubolubo. <sup>14</sup> Nalo tolu nei, abe niununo na simaro tolu napano ajuma aminauka kijokijo nalo, ajuma aba

ajeliviv ea parinio tubo na buruvenuo nalo na yetemeriba, aburulo abinimej vio takurano ka ala batitig vite nalo rivior burumþara mira napano mia naio tumolu ea burumþara legiano na maaro napano Atua Soþi naio berkario ruei. Atua naio beriio legiano nei ruei ea kanano iliano tai, napano naio berinavo

<sup>15</sup> “Kamiu kuvitkar, mia kiniou nemej vina ga ea kamiu, mia kuviilo ka kiniou tibe ka napano ver toro na vinauano tai rimej.

Toro na ver mison vatitig kiano saba nalo, ju rorea ruei ju jevijo kia vo jororea kiniou ka kumemi ve juo nuvano, mia rivu laka van naio.

Ana mia nalo dolu aiilo ga, atikiti moma tanea vio, avar burumþara imouiano ka bogo nene.”

<sup>16</sup> Naruei nemial ka napano bogo na mira na legiano na maaro naio miyotuba, ana niununo nalo aburu burovuron parinio tubo nalo na yetemeriba nei aba vio takurano, nina ea vio na napano iliano na Ipru berii jibe nei ber Amaketen.

<sup>17</sup> Bisi na, nailiano aluo nene naio kija miyon bulag kiano basidobidobi, mia naio miyon bulagio ba janea vio vio yauo mave. Ana iliano tai miyotuba ea jobaro lu joomo ea yimo lu na mave ka bogo na, naio miaga mave berinavo

“Vonganei naruei be bogo na juluvati vite nonovio ribisi.”

<sup>18</sup> Ana vaarakurano ga vio jikar viobijan janea vio, bija tubaalo ajuma ajaara, abe vioano nalo a malioano nalo. A bija nina, miu mikulkulu toru, memebiju ba bova laka jibe ka napano toro maka rial kija ea tikariano na yetemeriba binimej bokar banei. <sup>19</sup> Ana miu mikulkulu bakuþe borotano, mila komeli nalo na buruvenuo nalo na jeliviv ea yetemeriba ajibirbili abavatove, ana na mila na-

pano burumþara komeli nei Bapilon bakuboþve ea niati tolu.

Atua jidomkar vio nene, bija kanano vovaiano nalo, ana naio mila naio mijikia memedu ka kiano bajago nalo napano naio jomþa milaio, mila naio munu ea baja napano bujo ka mþarjumlþmelu na moroano na kanano siniabu. <sup>20</sup> Ana bija mþii nei, uleule sesa nalo aburo janea vio aba kovio, a burusuku nalo nanua beamu ajumolu aju, maka bunu aial lo. <sup>21</sup> Kurukuti yuo aes nalo na mave ea vio yauo ajibirbil ajavukia puruveru na tortoru, ajuba vinvin tomu nalo napano mþa ajua yetemeriba nei. Amijog bova toru biorio, amial ka napano jaleleano nei naio jikili laka, banbano ajumþa abuku iliniegeiegeiano ban Atua.

## 17

### *Tira va jotano mave ea temeul va*

<sup>1-2</sup> Ana ka bogo na nailiano tai binimej, nina be nailiano aluo tai napano aju abar basidobidobi aluo. Binimej kuku ka kiniou, berial berinavo “Jau katakisor kiniou. Mia nesiloglogso ka burumþara komeli va nei Bapilon, napano naio joa vio nei napano burumþara uei nalo napano mþa amieraro ajuaio. Komeli nei naio jomþa miþau bova, naio javukia tira na mþarabo ga. Naio javukia napano parinio tubo nalo na buruvenuto dolu nalo ajumþa aba amila siakaiano bija naio, a jibe ka napano mþano mþarjumlþmelu bilig tomu nalo na yetemeriba aba amia-avovu tanea garuei. Mia jau komei, ka mia nalaso keial venia napano mia rimaluvo kano ea bogo napano mia rivar kiano vironiano rimemedu.”

<sup>3</sup> Mo nailiano nene naio binimej midular niunuku, midu kiniou no-joa vio yauo tai. Ana nemial tira tai naio jotano mave ea buruolu deden tai. Temeul nei naio bilvili mia bilvili reraio, naio be parinio aluo

a pasimeduo nene nalo bokar due-limo, a niabeno reraio abivitaui sio va nalo ka ail niegeniege Atua. <sup>4</sup> Ana tira nene, naio miovo bo laka, ea kulumþarauo nalo na be si a abilvili, mia naio jelan ea niabene nonovio ka yomu, a þejelinio na tiliniene, a niogo nalo, a vermiromu nalo na be burumþara veru nene, a basabebe nalo. Naio midukar baja niogo tai ka jumþano, mia baja nei naio bujo ga ka kanano niamiamo nalo bija kanano siakaiano nalo. <sup>5</sup> Karina abivitaui iliano tai joa mameriniano, naio be ililuklukuano tai. Iliano nei naio javukia sio tai, napano ber jibe nei, berinavo

“Bapilon napano burutomoruo, be kenieno tira nalo na mþarabo, be burupati bajago na niamiamo na yetemeriba.”

<sup>6</sup> Nojomþa nebitii tira nene, nebitilubar ka napano parinio jeliviv, a maka rivior ka napano naio munu mþarjumlþmelu, mia bior naio jomþa munu burukija na moneano lu nalo, nina nalo napano mþa amuebinvinlo bior ka na mþa ajakisor Yesu. Nemial tira nei jibe na, nomijog niabeku þili mia!

<sup>7</sup> Ana nailiano naio mil ban kiniou, berinavo “Ei, venia na milaso komiilo mþele jibe na? Jau koto vo, mia kiniou never bisivisii batitigio navo. Tira na, bija buruolu na naio jotano eaio, napano parinio aluo nalo a sano pasimeduo duelimo, vite nalo nei nioti nene nalo aju, a mia nalaso kovitilubarlo.

<sup>8</sup> “Buruolu na komialio, naio jo beamu, mia maka bunu to vonganei. Ana ka bogo tai napano jo binimej, mia naio riyotuba rimej mave bereio den bulukuþili napano joaio vonganei, mia rivar ka rimþaro ea kanano vironiano. Ana ea bogo na, tomu nalo na yetemeriba napano aju keano vo, mia aial buruolu nene. Nina be nalo napano jikar ea tikar-iano na yetemeriba, sialo maka to joomo ea niosi na meuliano. Mia

bogo na aial naio, mia aiilo ve toru, bior amijikia ka naio jo beamu nua, karina maka bunu to bogo kirisiou laka, karina, naio miyotuba bereio.

<sup>9</sup> Ana toro napano be masou bo, mia naio mijikia rivitilubar rivu nioti na vite nalo napano mia neverenio.

“Moti nene, naio be sano parinio aluo. Nioti nene, naio ber komeli tai napano tira nei naio jo be tubo eaio, napano be sano suku aluo ajuaio. A suku nalo nei, naio be sano nioti nene nalo bunu, berinavo be parinio tubo aluo na tortoruaju. <sup>10</sup> Bokar banei, parinio tubo jimo nene nalo abisi ruei, a be tai na naio jumolu ju vonganei. Tai bereio napano maka riyotuba vo naio jo keano, a bogo na rimei, mia monoka naio to vesiou kija vo.

<sup>11</sup> “Buruolu nei bunu napano beamu naio jo mia vonganei naio maka bunu to, beamu naio bunu be parinio tubo aluo nei tai. Naio be nalo tai ruei, mia naio rimei bereio tibe parinio tubo arolu nene. Naio be toro na toru jibe na, mia bekurano, bior mia iorou naio bunu mia ribisi, naio riva rivar kanano vironiano na jikili.

<sup>12</sup> “Vite dolu ka aver bisivisiio, nina be pasimeduo duelimo nene. Sano nioti nene nalo, naio be parinio tubo duelimo bereio. Nalo na maka atumolu vo ka ave tubo ea kanalo tanobuku veve terakurano, mia nalo ala kanalo imãauano ea bogo napano mia buruolu neibano tumolu. Mia ave tubo ea yetemeriba vija naio, mia nina naio be bogo na kiri bulati tai, tibe aura ve takurano ga.

<sup>13</sup> “Nalo duelimo nei, nalo maka ajikia ala kanalo imãauano nalo, mia nalo abe tena aimãau buruolu nei ga kanano, ka kanalo moroano rijai naio, ka rila naio rimei ve toru lie vo. <sup>14</sup> Mia nalo nonovio na amei vio takurano ka alavon ka ala mira ka Nunu Solbouo, ana mia maka ajikia atovuluio. Makanio, mia naio tovulu nalo bior napano naio ga be tubo loa ka tubo nalo, naio ga be parinio tubo loa ka parinio tubo nalo, a kanano

tomu novo nalo, nina nalo napano naio biolo, naio bijauia bulaglo, a nalo abiekouo ea naio.

<sup>15</sup> “Vite dolu ka aver bisivisiio, naio be uei nalo a tei nalo napano komial tira va nei naio jomãa jotano mave ealo. Salo nioti nene nalo, naio be tomu nalo na mãa ajua yetemeriba, bija taara nalo, a buruvenuo nalo, a iliano nalo.

<sup>16</sup> “Ana iorou kanio, buruolu nei bija sano pasimeduo duelimo, mia asidom re bunu tira va nei. Mia atumolu ala naio rimei vova laka, napano mia aya bulag mãano kulumãarauo nalo denio mia naio rivar momãa ea mirano tomu nalo, mia nalo asen sano sunbue na niabene rivan mia avuku sano buriu nalo rivan ea sebi sisenio.

<sup>17</sup> “Ea mãarabo nei naruei na mia ala van tira nei, kito romial memedu ga ka vironiano napano Atua berialio ea kanano iliano nua, ber naio jidom ka tira nei monoka rivario. Naio ga midu joa kanalo jidomiano bija buruolu, ka ala ka naio tibe na.”

<sup>18</sup> Naruei nailiano nei mila nonovio kanano iliano ea bogo nei, berinavo “Nina naruei vervivisiano na tira nei, napano naio be burumãara bulukomeli napano be tubo ka parinio tubo dolu nalo na yetemeriba.”

## 18

### *Bulukomeli va nei Bapilon naio mijoru*

<sup>1</sup> Bisi na, nemial nailiano dolu tai jaluvo ea vio mave naio binime yetano. Naio be nailiano na Atua kanano na jikili tai, binimei bija burumãara moroano, a kiano mereraiano midulii yetemeriba. <sup>2</sup> Naio miaga mërera ka burumãara joono, berial “Borumãara bulukomeli Bapilon nei mijoru ruei.

Vonganei, vio nene binime be vonuo tai na simãaro nalo kanalo, a vio na niununo va nalo ajulukueaio.

- Menu kinkin nalo na m̃a amim̃auka bajago na mia-giago va, nalo bunu ajum̃a amim̃auka m̃alo niuku nalo eaio.
- <sup>3</sup> Naio ba midu atua nalo napano maka ave riano, a naio buru tomu dolu nalo abe vovu bija naio, ajibe ka tomu nalo na m̃a pariparilo jeliviv ka uei. Jibe ka napano naio buru parinio tubo na buruvenuo dolu nalo, aba amila siakaiano bija naio, a tomu nalo napano m̃a amim̃au bior veru jeliviv ea yetemeriba, amijev veru va miroano ea m̃asautogo va na bulukomeli nei, banbano na abinimei abe sanibaiano laka.”
- <sup>4</sup> Nailiano nei naio mil jibe na bisi, ana nomijog iliano dolu tai jaluvo ea vio mave naio binimei ber jibe nei, berinavo  
 “Aire kiaku tomu nalo, bo ka kamiu kuvuro soþeli kuvitaluvo den vio nei, ver þeli mia kuvila bitiran kiano kariano vija naio, ver þeli mia kuvidu bitiran bunu kiano vironiano nalo.
- <sup>5</sup> Kiano kariano nalo amivonlo ba bokar mave, mia Atua maka rijikia tinien ribobogia bogo va vio napano naio mila korov kiano tuboiano nalo.
- <sup>6</sup> Bo ka asian meran jogvaiano van naio tibe ka napano m̃a naio jian ban dolu nalo, bo ka avulu meran naio rive valuo ka venia napano naio mila ruei. Uei na mijea napano naio mila tomu dolu nalo amunuio, bo ka aion rivan ea kiano baja rivujo batitig.
- <sup>7</sup> Beamu, kanano jogvuiano ea kiano meuliano monmaio naio toru laka, mia naio sibuku rimei ve jogvaiano ea niabelejalele nalo bija tegiano nalo. Mia nina naio maka na vo, bior napano naio jom̃a mila kiano jidomiano be m̃arou laka keano, naio jo berii naio, berinavo  
 ‘O, kiniou nebe tira parinio tubo jibe nei, nojotano batitig nojo nei. Vite nonovio binimei bo laka ban kiniou, ana mia netibe re leleio taanou tai napano maka ve kiano vite, mia maka nejikia neteg rivior jogvaiano.’
- <sup>8</sup> Mia naio, ea legiano tai napano jo binimei, mia jaleleano nonovio ala tanea naio vaarakurano. Mia ve m̃ariano, vija tegiano, vija vituiano, a mia sebi sisen vatitig naio. Naio maka to sidomial, mia Tubo Atua napano mia naio tibure naio, kiano moroano toru laka.”
- <sup>9</sup> Ana nailiano nei ber jibe nei, berinavo “Parinio tubo nalo na buruvenuo dolu jeliviv ea yetemeriba napano ajum̃a aba amilotu ka atua nalo na burum̃ara bulukomeli nei, mia avitulubario ka napano mijoru ruei. Nalo naruei ajibe ka napano aba amila siakaiano bijaio, aba abijurukario ea kanano meuliano na bo banbano, maka asidomial titai. “Mia bogo napano naio mijoru, sebi jo jijenio sano iou nalo bavavin, naina naruei mia ajog rivova kanio ve toru, mia ateg riviorio. <sup>10</sup> Mia aial vironiano napano mia naio to rivario, mia rilalo bunu atikar ka amemebiju. Mia nalo atumolu atu koalabo denio, avitivitiio, averinavo ‘Uerei Bapilon, burum̃ara bulukomeli na moroano, kumemi tiniememi miiaso toru. Riano ga jau koje bo bano, mia ka aura takurano ga nei ana jau komial kanamo jukuti, komijoru, jau kobisi mia kobisi.’”
- <sup>11</sup> Mo bija nalo na, tomu nalo na yimo na ṽilṽiliano nalo jeliviv ea yetemeriba mia ateg ajog rivova, bior ka napano mia ve re bunu tomu tai ka avulu kialo saba. <sup>12</sup> Beamu, amison kanalo uako nalo bija togogo na bo, jibe ka vite nalo na m̃a

amimãaukalo ea niogo þeli na ea verumera, bija vermiromu napano burumãara veru kanio, bija basabebe nalo, a kulumãarauo mkekeano napano salo niabele nalo bo, a iesi bonotanunu, a vite nalo napano amimãau kalo ea mñarjuvono bue mãarauo na eleven, þeli ea iesi nalo, butoto nalo, a puruveru nalo, mia vonganei, kanalo imãauano nalo ka veru mia amei ajuba vio nonovio.

<sup>13</sup> Mo ea bogo na, mia tomu nalo avulu re bunu vite nalo na amimãauka salo sinaniano, jibe ka mãaiesi nalo, þeli na mñarsili nalo, þeli na niago na bilulu, yevi bija kon, bija bunu vite na munuiano jibe mñarjuþmñelu. Mia tomu nalo ajikia re bunu avulu vite nalo na jibe ka mãatei a titikivaka na mñarolivi, þeli na vite nalo na mña ajumã aburu veru ealo beamu, javukia bue mãarauo, þeli na nunu, þeli na bue kulorinio bija kanano rukuruku namña jo burio. Tealo nanua beamu ajumã abulvulu ka tomu nalo na mña amimãau kurano ga ea boru nalo, mia maka bunu ajikia alaio, bior ka bogo napano burumãara bulukomeli nei naio mijoru, mia ve re bunu imãauano tai, mia toro maka bunu rijikia rileal veru ka rivitikar kanano meuliano.

<sup>14</sup> Ka bogo na naruei, mia averii vio na, averinavo

“Jau kojidom ka jau kovar mñariesi na tortoru ve telabo, mia maka rimeruo vatitig vo naio jibirbili ruei.

Beamu, jau kobe sanibaiano laka, kiamo saba nonovio kirinovo laka, mia vonganei biniu bakovio nonovio, mia toro maka bunu rijikia rial tena bo tai easo bereio leleio.”

<sup>15</sup> A tomu na mña aþilvili ka vite nalo, napano mña aburu veru nalo telabo bior ruei, mia atu laka ga asirarago vano mia amerou ka viroiano na mia burumãara bulukomeli nei naio to riduio. Mia ajog rivova rivorio, <sup>16</sup> mia nalo ateg ve toru, averinavo

“Aiou kenememi burumãara bulukomeli nei, aua toru banso.

Nanua jau kojomã komiovovu bo ka kulumãarauo novo nalo, jau kobar yomu niogo a þejelenio niogo janea niabemo,

mia vonganei jau kobe deio ruei, kiamo sebi mñaro.

<sup>17</sup> Jumãabe kanamo burumãara sanibaiano mijikia biniu kokoa ea aura takurano ga jibe na?”

A be natelanvuuiano nalo na uako nalo nanua beamu ajumã abarvar togogo nalo, bija kialo naimãauano nalo, bija nalo napano aju amieliel ea uako þeli abar veru ea tei, nalo bunu aju koalabo ajirarago ban ea vio nene. <sup>18</sup> Bogo na iou na sebi napano jomã miduko vio, jo bavin ea vio yauo, mia atumã aververii vio nene, averinavo

“Riano ga, bulukomeli na be vio tai na,

tai re bunu tibe naio ea yetemeriba nei.”

<sup>19</sup> Tinielo maio ka jibe na, mila amijog bova, abisivisii burumaroro ea pariparilo, ajegi, aberinavo

“Aiou, kenememi burumãara bulukomeli nei, aua toru banso.

Jau kobujo ka veru, mia kumemi numimãau ea uako nalo na kenememi, nubarvar kanamo togogo nalo, banbano kumemi bunu numileal veru, mia vonganei bova ga.

Ea bogo tai na bulati ga nei, mia jau komei kove vio na vakovioiano ga.”

<sup>20</sup> Ana bior napano burumãara vio va nei naio mijoru jibe na, iliano tai miyotuba mave, berinavo

“Ea vio mave, burumãara saariano a jogvuiano.

Kamiu namoneano lu nalo, a atevi nalo, a Atua kiano naverialiano nalo, kamiu kumijikia kuvilivu ka naio ve toru, bior ka napano naio jibure tira va nei ruei, jian meran ban naio bior vovaiano nalo nanua mña mila ban kamiu beamu.”

<sup>21</sup> Ana ea bogo na, nailiano tai binime bitirilar buruñara puruveru tai, naio midular loa ka parinio, ana naio bukuio mijoru mue tei, madudu bakovio. Karina, nailiano nei naio ber jibe nei, berinavo  
 “Naina naruei buruñara bulukomeli va nei Bapilon, mia avukular naio rivan laka tibe na, mia ala naio rijoru ka mia rijikia re tumolu bereio bogo tai.

<sup>22</sup> A jau Bapilon, iliano biedu banso jibe nei, ber iouano nalo na vameleviu bija þi mñarauo nalo, mia toro rijog re to easo bereio, tomu nalo na aimñauka imñauano nalo, mia ve re tai to easo bogo tai, a malioano nalo na abiji ka sinaniano ve re bunu.

<sup>23</sup> Miamoiano na yulu nalo ajegli re kanamo vio nalo bereio, mia jau kojog re ilimerevuiano na mñeaku bija tira napano naljuo ajoro vonga. Tomu na amimñauka kanamo veru, maka dolu tai ea yetemeriba nei tavukialo, a mo-roano na kanamo semei nalo a kanamo sibiano nalo amilaso koburu buruvenuo dolu kialo jidomiano ba be vovu laka.”

<sup>24</sup> Naina naruei kito romial ka napano Bapilon nei naio be vio tai napano be burupati vovaiano toru mugaruei. A naverialiano kei, vede namoneano lu þeli toro dolu napano amuebinvinlo bior nalo abe Atua kanano, mia salo burukija miou ea borotano na bulukomeli nei naruei, naina naruei mila napano Atua kiano tibureiano a kiano vironiano mijoru ea naio jikili laka tanea.

## 19

*Buruñara saariano mave bior tiniabene naio jovulu vite nonovio*

<sup>1</sup> Iorou ka nina, nomijog ka napano tiniobi toru ea vio mave abio toru, aberinavo  
 “Siva ban kanado Atua!

Ioruriano, mermerano a mo-roano abe kanano naio takurano ga.

<sup>2</sup> Kiano tibureiano biniu abe riano a amemedu laka.

Buruñara kenieno tira va na tire nalo na mñarabo nei, kiano siakiano nalo amila yetemeriba binime miagiago laka, ana vonganei Atua jibure naio biorio ruei.

Naio jian buruñara vironiano tai banio bior burukija na kanano tomu na imñauano nalo napano mieraro.”

<sup>3</sup> Ajuñña abio jibe nei, ana ajusol lo bereio, aberinavo

“Siva ban Atua! Sebi joñña jijen soro nalo nene ruei, mia iou nene naio rivavin rijikia bisi re.”

<sup>4</sup> Mia navagadeano duelimo valuo ba veri [24] bija temeul veri nalo anie yetano kamu ka Atua mirano, napano naio joñña jotano mave ea kanano jobaro lu, naruei amilotu kanio. Amiaga, aberinavo

“Bo laka! A siva toru banio!”

<sup>5</sup> A iliano tai miyotuba ea jobaro lu bunu, napano naio ber jibe nei, berinavo

“Kamiu tomu na Atua kanano imñauano,

kamiu tomu na tortoru nalo a tomu nalo reraio,

kamiu nonovio napano kubatove ka naio, vonganei bogo memedu ka kuvilivu ka siano.”

<sup>6</sup> Naruei nomijog bereio tiniobi toru neibano, kanalo niagaiano mila malioano jibe tei momñavu, jibe tubaalo. Nalo aber

“Siva ban naio!

Kiado Tubo Atua Soþi naio jovulu vite nonovio ruei!

<sup>7</sup> Kito reiaia ea naio, reijalar siano, rasaaro kanio.

Vonganei be bogo novo na rala jokoluolu na soriano na nunu solbouo naruei.

Koano naio miyovovua naio batitigio jo ruei,

8 amija vatitig naio ka kulumãarauo vou nalo na bo, amiuvu akirino novo nalo.”

Ana kulumãarauo novo na mivu nei napano nunu solbouo koano naio miyaio, naio be sano nioti nene jo, naio berenio iãauano novo nalo napano namoneano lu nalo na Atua kanano amila ruei.

9 Ana nailiano napano ju bija kiniou ea bogo na mil ban kiniou, berinavo

“Mia kiniou never iliano tai vanto kovivitauiãa kar toa kanamo niosi na. Iliano nene jibe nei, ber toro napano mia avio ka naio tusol lo ka siniano na jokoluolu na soriano na nunu solbouo, mia naio rijog rivu mia rivu laka.”

Ana naio jusol iliano nei bereio, berinavo

“Naina naruei be Atua kanano ilirianiano napano be riano laka.”

10 Mia nomijog naio mil jibe na ban kiniou, neminie tano kanio, nojidom nolotu vanio, mia naio berbereio. Naio berinavo “To, jau kala re tibe na van kiniou! Jau monoka kolotu van Atua naio ve takurano ga. Kiniou nebe toro na kanano iãauano ga, nejibeso ga, nejibe bunu kuruamo dolu nalo napano ãa aju jikili ea Yesu kanano ilirianiano. A bo laka ka napano kamiu kumituãa kumila jibe na, bior ka napano burupati nioti na visiþeiano nonovio na be riano napano aberial beamu binimei, naio be Yesu ga na, bija kanano ilirianiano napano kamiu kumituãa kubokar jikili.”

*Toro na þirinio jikili napano naio midu bue kulorinio na mivu*

11 Mia ka bogo na vio mave betavo ban kiniou, nejiraravo ba joomo, nemial bue kulorinio na mivu naio jumolu ju, a toro kouo tai jotano mave eaio. Naio naruei napano mila mira die vovaiano, ana bogo napano mila kiano tibureiano, naio miãau memedu ga. Toro nene, abio siano ka Parinio Tubo Viekouoiano

na Riano, 12 ana naio siano be dolu tai bunu abivitauiãa joaio napano maka ve toro tai rijikia sano nioti, naio ga takurano mijikia. Mirano naio merera jibe ka sebi napano ãa bilvili, a ea parinio naio miya batubatu na parinio tubo. 13 Naio miya bunu kanano kulukoti tebievi napano ajekon ka burukija ka rila ve kalkal eaio, a siano dolu tai bereio, abio ka naio jibe nei, aber Atua kanano Iliano Lu.

14 Ana ea bogo na, taara nalo na tomu na mira na mave, a miyovovua ka kulumãarauo na miuvuruvu nalo bo, a abar kialo bue kulorinio nalo na amiuvuruvu, aba tavio ajakisor kialo navuriãaraboiano nei abano.

15 Naio burulo abano, kiano iliano jo moluo ea niono javukia iobogu na mira tai na mal ea ikiti be juo, ka napano mia tekkiti venuo nalo na yetemeriba ajoru. Iorou ka napano naio jovululo, mia naio tumolu ve tubo kalo, a kiano nia napano naio midukar ka juãano, naio be butoto na temi tai. Vironiano na jikili be venia napano Atua Soþi kiano siniabu naio midu jo ka mia tomu nalo avario, mia toro na toru nei naruei naio mia rivar riyotuba.

16 A naio be siano dolu tai kia ga vo, napano abivitauiãa joa kiano kulukoti a jaano, be

“Parinio tubo na parinio tubo nalo,  
Toro na toru na tomu na tortoru nalo.”

17 Bisi na, nemial nailiano tai naio jumolu ju napano ãerenio mijegliio, naio bio ka menu nalo napano ãa aju amier reraio mave. Naio biolo, berinavo “Oi, kamiu kuviniu kumei vio takurano ea Atua kanano buruãara jokoluolu nei. 18 Kamiu menu nalo na ãa kumisen sunbue, mia aiãauka semiu siniano tai rive verare ka kamiu vesiou re, napano naio be tasimãaro nalo na Atua kanano uolu nalo. Parinio tubo nalo, tomu na tortoru na mira, tomu na þirilo jikili, bue kulorinio na mira nalo bija nalo napano ajumãa abarlo,

bija tomu nalo dedade napano abe tomu na tortoru þeli abe tomu na tertelisu na iñauano ga, nalo na abiniu ajumolu ka ala mira ka Atua, ana naio jovululo milalo añarmñaro janea vio.”

<sup>19</sup> Ana nemial temeul va nei, bija parinio tubo nalo na yetemeriba, bija kanalo taara na mira, nalo abinimej amidu buronlo vio takurano. Amila batitiglo ka ala mira ka naio napano midu bue kulorinio na miuvu nei bija kanano tomu na mira nalo.

<sup>20</sup> Ana aberinavo ala mira naruei, ana tomu na bova nalo nei amiilo ka napano nalo na Atua kanano ajumolu vaarakurano aba abokar kilkil ea navurimñaraboiano juo na kanalo, naina be temeul va na bija naverialiano lubolubo napano naio be toro na miija naio ka semei a vite na iloiano nalo. Beamu, naio jonña miñauka vite nalo nei, mila sibilili tanea tomu nalo napano naio buru kialo jidomiano ba amijamo ana amue toto na temeul va nei joa mamerinalo, aba amilotu vovu ka kiano tavoru.

Mia nalo abokar vatitig navurimñaraboiano juo na taara va nei, ana abukulo abe juo aban ea bulukuti sebi napano naio jonña jumu.

<sup>21</sup> A dolu nalo na kanalo, maka ala mira vo amiilo ka napano iobogu na mira tai miyotuba ea naio napano midu bue kulorinio niono, mia iobogu nene ban jibe nei ban jibe na je kitkitilo añarmñaro janea vio. Mo jakii venia napano nemialio, menu nalo na mña ajen sunbue abinimej amijede boþe salo tasiñaro nalo nei, ajenlo banbano mabolo jouo.

## 20

*Amiorkar Siñaro nei jo bokar yuka menu takurano [1,000]*

<sup>1</sup> Ana kiniou nemial nailiano tai jaluvo den vio mave binimej yetano, naio midukar vulariano tai ka juñano, napano vulariano nene

be tena mñaratavo na bulukuþili na mñariano napano naio batove maka ve togio nene, a bija vulariano nei, bar bunu mñarimieni na jikili tai.

<sup>2</sup> Ana naio ban memedu ka burumñara kenieno niobi nei, napano be maro moruo nei Siñaro Setano, naio ba bokar batitigio jikili bo, miorikar vatitigio bo ka mñarimieni, berkar ber mia to tibe na rivokar yuka menu ve takurano [1,000].

<sup>3</sup> Ana midu naio bija sano mñarimieni bukuio ban ea burumñara bulukuþili nei napano batove bululuo laka, ana jetavoko, bukar naio jobo, ka toro kirivova nei naio rijikia re bunu rijukujuku tomu nalo na buruvenuto nalo, riva rivokar napano mia yuka menu takurano nei naio ribisi. Ana kanano moroano maka rijikia riviniu nonovio vo, bior mia iorou, ea bogo tai na ve kiri bulati ga, mia mijikia riyotuba ka rila parinio ve vaarakurano bereio.

<sup>4</sup> Ana nemial vio lu nalo, bija nalo napano mña ajutano mave ealo, nalo na napano abijauia bulaglo ruei ka amijikia atibure tomu nalo. A bija nalo nene, nemial niununo nalo na tomu nalo vio bujo aju, nina nalo nanua beamu ajumña amioliolu ka Yesu bija iliano lu na Atua kanano, mia aje kokorov burujolo biorio. Nalo na maka alotu ka temeul va nei, maka anie tano ka kiano boda, a maka avar kanano toto ea mamerinalo þeli na ea juñalo, mia Atua naio jaaro kalo, milalo ameul bereio ka amijikia atumolu atu vija Kristo ka aje tuboiano ea vio nonovio riva vokar jukuti na yuka menu takurano nei.

<sup>5</sup> Nina napano ameul bereio jibe na, naio be bogo moti na tomu nalo ameul bereio den nanñariano, mia nalo nei ga abokario. Nalo dolu napano añaro aju kia vo ea bogo nene, nalo amijev kanalo meuliano bereio ea valuo nene, nina bogo napano yuka menu takurano biniau. <sup>6</sup> Atua kiano ilivuiano na bo toalo napano ameul moti bereio den

nañariano, napano kanalo meuliano be lu vatitig bo. Mariano juo nene maka rijikia tokol lo leleio, mia nalo aimãau tibe ka Atua kanano kulo lu nalo, ave tomu lu na Kristo kanano, mia naio rivitiri bulaglo ka aje tuboiano ea vio nalo vija naio ea yuka menu takurano nei.

### *Siñaro, kanano jukuti*

<sup>7</sup> Ana bogo napano yuka menu takurano nei bisi, mia Siñaro naio mijikia moluo bereio ea nalakoiano nanua naio juaio. <sup>8</sup> Ka bogo nene, mia naio rivan tanea vio nonovio ea buruvenuo nalo na yetemeriba ka rila sibilili tomu nalo bereio, a mia rivuru buron taara juo na tortoru nei amei vio takurano, nina be tomu na Koko bija tomu na Makoko, ka amei vio takurano bereio ka ala mira ka tomu nalo na Atua kanano. Mia bogo na taara juo nei abinimei vio takurano, nalo vio bujo mia vio bujo, jibe ka kurukuti yono na bayono.

<sup>9</sup> Nalo ajibijilo jibe ka tomu na mira nalo, abulan jaalo abarkor yetemeriba abinimei aboru Yerusalemo, vio nei napano Atua jaaro toru kanio, napano naio be vio na ña kanano tomu nalo ajujuaio mugaruei. Mia nalo ajeliviviko batitig bo burumñara komeli nei, aberinavo ajidom atikar mira naruei. Mia vaarakurano ga, amiilo ka napano be burumñara kenieno sebi tai jaluvo den tiniabene binimei karlo, naio jijenlo banbano abiniuviniu. <sup>10</sup> Mo Siñaro, naio napano ña mila sibilililo beamu ruei, abuku naio ban ea burumñara bulukuti sebi napano joña jaraburuburu, ninei sebi napano abuku temeul va nei bija naverialiano sibisibiano abe juo ajuaio ruei. Mia nalo tolu nei mia ajog jogvaiano ea vio nei legiano bogiano, rivan riva to tobo to.

### *Nalo napano maka amonea kanalo tibureiano na maaro*

<sup>11</sup> Naruei nemial burumñara vio tai natibureano na tomu nalo, napano

miuvu mia miuvu, naliko burumñara tubo na tibure tomu nalo naio joña jotano eaio. Kanano mermerano mison vatitig vio reraio, mila na yetemeriba a vio yauo ave juo aburo aba kovio. <sup>12</sup> Mia nemial burumñara taara na tomu nalo tai, nina be nalo nanua beamu amarmãaro ruei ea yetemeriba, tomu na tortoru naliko kulo dolu nalo reraio. Naruei nalo amiyotuba ea vio nei ka atumolu atu kamu ka mirano na tubo na toru na tibure tomu nalo. Nemial niosi tealo abisidea kalo aju, ana aba amidu tai bereio binimei, naina abio ka Niosi na Meuliano, mia abisidea ka naio bunu. Mia abitio amileal venia napano abivitauiua joa niosi nalo nei tivelinio na maariano nalo nei, mia abeve terakurano aburu kialo vironiano jakii niosi nalo nei. <sup>13</sup> Mia bija tomu na mñariano nalo nei, nalo napano amarmãaro ajua tei, a nalo napano ña amarmãaro aba ajua vio na jogvaiano ruei, nalo abiniu abinimei bereio ka atiburelo memedu ka kialo imãauano.

<sup>14</sup> Naruei ajibure tomu na mñariano nei abanbano biniu, karina ajumolu abar vite juo nei mñariano, bija bunu vio na jogvaiano nei, naruei abuku lo abe juo aba joomo ea burumñara bulukuti sebi nei. Ana mñariano na tomu nalo amijev ea vio na, nina abio ka mñariano juo nene. <sup>15</sup> Mia toro kei napano maka alealio siano toa Niosi na Meuliano nei, naio naruei avuku naio bunu rivatove ea burumñara bulukuti sebi nei.

## 21

### *Bulukomeli Yerusalemo vou nene*

<sup>1</sup> Ana iorou ka naina, nemial vio mave vou bija yetemeriba vou amiyotuba, bior vio mave moruo bija yetemeriba moruo bija sano borotano a tei nene nalo, aba kovio nonovio ruei. <sup>2</sup> A nemial komeli lu novo nei, Yerusalemo vou, jaluvo ea Atua ea vio mave binimei yetano ea yetemeriba. Nemial ka napano amiyovovuo bo, jibe ka tira tai

napano miyovovuo kirinovo laka binimej ka aiven riva rivan koano sumano ka soro kano.

<sup>3</sup> Mo ka bogo na kiniou nomijog iliano na bo tai juvan vio mave, berial jibe nei, berinavo

“Vonganei, Atua jidom to vija tomu nalo na yetemeriba, jidom rila kanano vonuo toalo. Mia nalo amei ave tomu nalo na kanano, bior ka napano mia naio to vijalo toboto, naio rimej ve kialo Atua riano.

<sup>4</sup> Jogumiralo nonovio, mia naio rilokon bulagio, mia marioano þeli tegiano, þeli jaleleano, þeli jogvaiano atu re bunu, bior bogo moruo na beamu naio bar laka ruei bano.”

<sup>5</sup> Iliano nei bisi, ana toro lu na ma jo jotano mave naio berial, berinavo “Naio be riano laka kiana! Mia kiniou nala vite nonovio rimej ve terivou bereio!”

A jusol bereio berial memedu ban kiniou, berinavo

“Naina naruei mia kiniou never iliano tai vanto napano naio be riano bo, napano jau komijikia komonmoneaio rivu, mia bo jau kovivitauiua kario.”

<sup>6</sup> Ana naio mil du kia ga, berinavo “Kiaku imauano nonovio, nemila nonovio biniu ruei!

Kiniou nebe motoru a nebe natumaarioano, kiniou natikarioano a najuluvatiano.

Toro na ma midou jerio, mia noviov maano uei tai ea burupati uei na meuliano, nesian van naio rimunuio tibe na ga.

<sup>7</sup> Toro na ma biniua bogokouo ea kiano meuliano, naio tu sikili riva tovulu na vovaiano, mia naio rivokar ilivuiano nalo tibe ka kiano jajumano. Mia kiniou noto neve kiano Atua riano, mia nodu naio rimej ve keneriku.

<sup>8</sup> Mia tomu na vovaiano nalo, nalo bunu mia avokar kialo jajumano tai. Nina be tomu nalo na ma maka atu sikili ea kiniou, napano maka amonea, napano kialo bajago

naio kirivova laka, amuebinvin tomu, abijuku bova ka tira þeli sumano, abar semei, amilotu ka tavoru, a abe tomu na sibiano.

Nalo nei naruei mia ava avokar marioano juo nene, nina ea kialo vio nene rimemedu ea bulukusebi napano bonoti kirivova, a naio maka rijikia ribisi.”

<sup>9</sup> Iliano nei bisi, ana nailiano nalo nei nua tai kalo, nanua ma abar basidobidobi aluo na jogvaiano aluo na maarioano na yetemeriba, naio binimej bio kiniou. Naio berinavo “Jau komei beamu vo, mia nalaso jau keial tira na soriano, nina be Nunu Solbouo koano.” <sup>10</sup> Naio burular kiniou naban ea niunuku ga ana kumemi juo nuba nuboru mave ea burumara burusuku tai. Numisikili numitua vio nene ana naio jiloglog burumara komeli lu nei Yerusalemo ban kiniou, nemialio bereio ka napano naio jo jaluvo ea Atua mave tiniabene naio jo binimej yetano.

<sup>11</sup> Naio jo batove jibe na, naio jo bujo ka Atua kanano mermerano, mila naio merera laka, javukia mermerobi napano mkekeano meravo bo laka. <sup>12</sup> Mia kanano tagvoru jumolu jeliviv eaio, bavin laka, a maratavo na tortoru duelimo ba juo [12] juaio, napano abe terakurano be kialo nailiano aju abitikar vatitiglo. A maratavo nalo nene be terakurano be sio jualo, napano be siano yati duelimo ba juo na Israel, <sup>13</sup> napano maratavo tolu ju ba tivelinio not, tolu ba tivelinio wes, tolu ba tivelinio is. <sup>14</sup> A burumara tagvoru nei jumolu ju ea burumara martea duelimo ba juo na kanano, be sialo abivitauialo beve terakurano, napano sio nalo nei abe atevi duelimo ba juo [12] na Nunu Solbouo.

<sup>15</sup> Naruei nailiano napano naio joma jukunu bija kiniou nei, midu burutili toto tai tena niogo ea jumano, ka riva rijeteli ea komeli nene naio toru jumabe, vija tagvoru nene, a sano maratavo nene nalo.

<sup>16</sup> Burusio na komeli nei, tivelinio veri nene terebievi abe verare ga, ana nailiano naio ba mijeteli ealo, jovulu sadu taamñaka juo, þeli kilo-meta menu juo [2,000]. A mijeteli ea jikar yetano bavin bokar jumoti levlevi, naio be verare ga bereio ka tivelinio ver nene. <sup>17</sup> Naruei naio ba mial tagvoru, naio mijeteli ea mero-roliano nene, naio buluku batitig meta nene nalo, jovulu tiijaano duelimo va ari [60] garuei. <sup>18</sup> A tagvoru nene nalo, maka alailo ka puruveru þiliþili ga nalo, mia amiñau kalo ka puruveru tai napano naio mkekeano na bo laka, a komeli, torogio nonovio nene nalo amiñau kalo ka niogo ga, meravo nono bo laka, naio mieg bo mia bo laka. <sup>19</sup> A marteia tortoru nalo na tagvoru, nalo bunu amiyovovua vatitiglo bija puruveru novo nalo, napano tai amiyovovua nonovio ka puruveru tai napano mkekeano nene jibe nei, tai amiyovovua nonovio ka puruveru tai napano mkekeano nene jibe nei, banbano mila nonovio marteia duelimo ba juo nene. A puruveru duelimo ba juo nei sialo, ajibe nei. Na jukamu, siano saspas, juo nene naio sapaia, tolu nene naio kalseton, veri nene naio be emrol, <sup>20</sup> jimo nene naio be satonik, ari nene naio be kaneleon, aluo nene naio be krisolaet, arolu nene naio be berol, koveri nene naio be topas, duelimo nene naio be krisopres, duelimo ba tai nene naio be sasin, a na maariano be duelimo ba juo naio be ametis.

<sup>21</sup> A marteia nalo, mia abeve terakurano abe burutomoruo basabebe takurano ga. A nemial buruñara marteia na komeli nene bunu, napano naio abijuru ka niogo nonovio, naio kirinovo mia kirinovo tanea.

<sup>22</sup> Mia vite tai napano nomiilo kanio, be tinieku ka mia neial buruñara yimo lu tai to iviso ea bulukomeli lu nei, mia nebitiio mia maka neleal tai. Vio nei maka ve yimo na jibe na, bior Atua Soþi na moroano, bija Nunu Solbouo, tomu

nalo amilotu kalo ea vio nonovio dañariga. <sup>23</sup> A nemileal ka napano komeli nei maka ve mñerenio a siberio amerera eaio, bior napano Nunu Solbouo naio jibe sano yulu nene, Atua kiano miamoiano mila vio nonovio be buruñara mereraiano jo dañariga. <sup>24</sup> Buruvenuo dolu nalo mia aiel ea buruñara mereraiano nei napano miyotuba denio, a vite nonovio venia napano tubo nalo na tortoru na buruvenuo dolu nalo amijeio, mia avarlo rimeia asian riva Yerusalemo vou nei, tibe ka kialo jidomiano tai. <sup>25</sup> Vio nei mia ve re melijokouo rimeia eaio bogo tai, mila na sano marteia na tortoru nalo amijikia atuñia avetavo dañariga, <sup>26</sup> a miamoiano a vite novo nalo na buruvenuo dolu mia atu amei joomo eaio dañariga.

<sup>27</sup> Mia tivelinio ka vite nalo napano maka ameravo rivu laka, mia ve re tai rijikia riva jouro ea vio nei bogo tai, mia toro kei napano naio mila imñauano tai napano be tena imouiano þeli be tena sibiano, mia naio bunu rijikia re riva jouro eaio. Nalo na ka ava jouro, nalo na ga napano sialo, Nunu Solbouo bivitauia rui ju joomo ea kanano niosi na meuliano rui.

## 22

### *Parinio uei na meuliano*

<sup>1</sup> Karina, nailiano jiloglog parinio uei na meuliano ka kiniou. Nemial napano be uei novo nene, naio meravo mia meravo, naio jo mieraro miyotuba jikar ea vio lu na Atua napano Nunu Solbouo juaio.

<sup>2</sup> Uei nene naio mieraro bano, yano nene mieraro memedu jel iviso bure buruñara marteia na komeli na Yerusalemo vou. Uei na meuliano nei naio mieraro jibe nei bano, a be burupati iesi na meuliano nalo na ajumolu aju tivelinio be juo na uei neibano. Buruiesi nalo nene abo laka, bior napano aju ajako ea siberio nonovio ga, duelimo ba juo [12] ka yuka takurano. A marteia nalo bunu, abo laka, bior amijikia aieliel

batig ka mieiano nalo na tomu nalo na buruvenuto na yetemeriba nei.

<sup>3</sup> Tibe na, mia Simaro kanano bajago va nalo, napano jidom rila bulag vurua vite nonovio, mia nalo atua re komeli nei leleio. Nunu Solbouo joa Atua kiano vio lu ea vio nene, a vio bujo ka kanano tomu nalo na m̃a kanalo iñauano, aju amilotu ka naio damariga. <sup>4</sup> Nalo aju vaataro kanio, a ajirikakar siano jua mamerinialo. <sup>5</sup> Ea vio na, melijokouo re, viorijen rivu bogo nonovio, mia maka ve yulu na yulu tai þeli yulu na m̃erenio. Makanio, mia Tubo Atua ga naio be burupati na yulu, napano midulii vio na, mia naio buru kiano tomu nalo nene, naio bitiri bulaglo abe tubo na tortoru ka aje tuboiano ka vite nonovio nalo.

*Yesu kanano bogo na rimei bereio*

<sup>6</sup> Ana nailiano nei naio mil ban kiniou, berinavo “Vite nalo na m̃a komial lo þeli komijoglo, amemedu laka, mia iorou amei ave riano nonovio. Burum̃ara kiado Tubo, naina be Atua nanua m̃a naverialiano na beamu amim̃au ea moroano na Niununo, naio miila kumemi kanano nailiano nalo numiyotuba kaso ka nuvisi vite nalo nei vanso. Naio mila jibe na bior napano naio jidom ka kanano tomu nalo monoka ajikia vite nalo napano mia ayotuba vesiou re.”

<sup>7</sup> Mia Yesu kiano iliano ea vio nei ban kiano tomu nalo, naio jel jibe nei, berinavo “Kamiu kuvitkar! Mia vesiou re, mia kiniou nemei noyotuba ka kamiu bereio. Toro napano bokar vatitig iliano na visiþeiano nalo na kanaku niosi nei, mia rivu laka van naio, mia naio mijikia rijog rivu ve toru.”

*Jone kanano iliano na maaro*

<sup>8</sup> Kiniou na m̃a nemial vite nalo nei, nomijog iliano nalo nei, kiniou tormoruo Jone. A bogo napano nemial nonovio bisi, nomijorua tano neminie kamu ka nailiano nei jaano napano naio bisiþe vite nalo nei ban

kiniou ruei, nomijog jibe nojidom nolotu kanio. <sup>9</sup> Mia naio berbureio, berinavo “To, jau kala re tibe na. Kiniou bunu nebe Atua kanano toro na iñauano tai ga, jibe ka jau kamliko kuruamo nalo naverialiano nalo re nua, bija bunu kulo dolu nalo napano abokar jikili bo iliano nalo na niosi lu nei. Bo ka kito rolotu ka kiado Atua naio ve takurano ga.”

<sup>10</sup> A naio ber iliano dolu tai bunu ban kiniou, berinavo “Jau kodu van re visiþeiano nalo na niosi nei. Be bogo binimei vaataro, naruei bo ka tomu nalo ajikia venia na m̃a ajum̃a aberenio. <sup>11</sup> Toro napano maka sidom riagago, mia naio rila kiano bajago va riva rivavin lie vo, mia kanano kariano na miagiago ava ve burutomoruo laka. Mia toro na m̃a mije tilinieno, mia kanano iñauano na memedu nalo amei avu laka, mia kanano bajago novo nalo amei ave lu laka.”

<sup>12</sup> Ana Yesu kanano iliano ea vio na, naio jibe nei, ber “Kamiu kuvitkar! Kiniou nojo ka namaluvo kean kamiu vesiou lele re. Kiniou nemei vija kanaku jidomiano novo nalo, napano mia nesian van tomu nalo takii iñauano nalo napano amila be kiaku. <sup>13</sup> Kiniou nebe motoru a nebe bajulkuti, kiniou nojukamu a nojo iorou, kiniou nebe natikariano bija namaroano.

<sup>14</sup> “Vesiou re ga, mia burum̃ara ilivuiano riyotuba ka kanaku tomu nalo rimemedu. Nalo ajekon vatitig kanalo kulum̃arauo nalo, amiya vatitiglo ruei, naruei amijikia ava joomo ea m̃aratavo ka ava jouro ea komeli lu na Atua kanano, amijikia ava avokar buruiesi na meuliano. <sup>15</sup> Mia kulo dolu nalo miroano maka ajikia amei jouro. Nina nalo napano ajum̃a amiel janea ga vio jibe ka kuli nalo, bija nalo napano m̃a abar semei, nalo napano m̃a amila siakiano a siakaiano, nalo napano m̃a amuebinvin kulorinio, nalo napano m̃a amilotu ka tavoru nalo, a

nalo napano m̃a tinielo jii ka ala bajago na sibiano.

<sup>16</sup> “Kiniou Yesu, nemiila kiaku nailiano na biedu ka riverial iliano nalo na vanso, ka jau komijikia kava kesian van kanaku lotuano nalo. Naverikariano napano aberkar ka mia rimaluvo ea tormoruo parinio tubo Teviti re nua, kiniou nei. Kiniou nei nebe Mejegi, m̃arivitano napano berial ka vaataro ka viorijen mermeravo.”

<sup>17</sup> Mo Atua niununo naio mijog iliano nalo nei, naio ber ka Yesu, berinavo “Bo ga, jau komijikia komei!”

Tira na ju ka soro kanio, naio berinavo “Nao, bo ka jau komei naruei!”

A toro kei napano naio mijog iliano nalo nei, bo ka naio bunu riverialio, riverinavo “O Yesu, ver jau komei ga!”

Mia kei napano midou jer, kuvetavo ka m̃aratavo kanio ka naio mijikia riviedu joomo. Toro napano naio jidom rimei, mia naio mijikia rivokar m̃ano uei na meuliano, jibe ka kanano jidomiano kurano tai ga.

<sup>18</sup> Mia kiniou neber iliano na jikili tai van kamiu napano mia kuvijog iliano nalo na visiþeiano nalo na niosi lu nei. Verenio toro tai rijeve ka iliano dolu tai bere mave ka napano jo ruei, mia Atua rila naio rivar jogvaiano nalo riviniu napano niosi nei jo berialio nua ruei. <sup>19</sup> Peli ver toro tai rila kokoa bereio iliano nalo nei tealoo napano ju ruei, mia Atua rijelar den bereio kiano jajum̃ano napano joa buruiesi na meuliano, mia naio rijev re tonovo nalo jibe ka napano niosi lu nei naio berenio ka na aju jouro ea komeli lu.

<sup>20</sup> Naio napano joña berial iliano nalo nei, naio berinavo “Naio jibe ga na naruei. Vesiou re, mia kiniou noyotuba kean kamiu.”

Mia tomu nalo na Atua kanano kialo jidomiano, aberinavo “Ver tibe na, rivu mia rivu laka. Aiou Yesu, jau komei soþeli!”

<sup>21</sup> Mia ilimaariano na tivelinio na tukunuano na kanaku monovovvano, kiniou tormoruo Jone nobolkouo ka mia kiado Tubo Yesu kanano tiniememiano novo to vija kamiu, Atua kiano tomu nalo. Mm.